



Digitized by the Internet Archive
in 2011 with funding from
University of Toronto

DOCTORIS ECSTATICI
DIONYSII CARTUSIANI
OPERA OMNIA

IMPRIMI POTEST

FR. RENATUS-MARIA, Prior Cartusiæ,

in festo S. P. N. Brunonis, Conf., anno 1905.

IMPRIMATUR

Tornaci, 21^a Octobris 1905.

V. CANTINEAU, Canonicus, Censor librorum.



DOCTORIS ECSTATICI
D. DIONYSII
CARTUSIANI
OPERA OMNIA

IN UNUM CORPUS DIGESTA
AD FIDEM EDITIONUM COLONIENSII

CURA ET LABORE
MONACHORUM SACRI ORDINIS CARTUSIENSIS
FAVENTE PONT. MAX. LEONE XIII

SERMONES DE TEMPORE (Pars secunda)

TORNACI
TYPIS CARTUSIÆ S. M. DE PRATIS
MDCCCGV



THE INSTITUTE OF MEDIAEVAL STUDIES
10 ELMSLEY PLACE
TORONTO 5, CANADA,

JAN 16 1932

3940

DOMINICA QUARTA POST PASCHA

ENARRATIO IN EPISTOLAM

OMNE DATUM OPTIMUM ET OMNE DONUM PERFECTUM DESURSUM EST. Jacob. I, 17-21.

IN epistola hodierna sacris doctrinis referta, primo docet nos beatus apostolus Jacobus, in vera humilitate omne bonum Deo adscribere, gratias agere, mentem custodire, in bonis proficere. Itaque ait :

Omne datum optimum et omne donum perfectum desursum est. Quidam per « datum optimum », intelligunt omne donum naturæ; atque per « donum perfectum », omne munus gratiæ. Alii per « datum optimum », accipiunt quodlibet munus gratiæ; et per « donum perfectum », munus quodlibet gloriæ. Nec dubium quin littera possit aptari ad hæc. Omne equidem bonum, utpote omne donum naturæ, omne donum gratiæ, omne donum gloriæ, et quidquid citra Deum est, a Deo profluit. Si ergo « datum optimum » referatur ad dona naturæ, « datum optimum » convenienter intelligitur intellectus, et quæcumque ejus perfectio naturalis. Omnia equidem naturalia sunt a Deo immediate vel mediate, id est per creationem, vel per causarum secundarum cooperationem seu subministrationem. Unde et Aristoteles dixit, quod ab hoc ente dependet cælum et terra, et tota universi natura. Et iterum : Ab ipso (inquit) omnibus communicatum est esse et vivere. Dona vero naturæ dicuntur optima, non quasi donis gratiæ præstantiora, sed optima, id est valde bona, vel optima in suo genere ac ordine. Porro dona gratiæ, ut virtutes theologicæ et dona Spiritus Sancti, etc., dicuntur do-

na perfecta, non absolute, quum dona gloriæ sint utique digniora, sed in suo genere et naturalium donorum comparatione, quia immediate jungunt nos Deo et gratos ei efficiunt, atque per ea dona gloriæ promeremur.

Omne ergo hujusmodi donum « desursum est », id est efficienter *descendens a Patre luminum*. Qui licet ubique sit tanquam incircumscribibilis ac immensus (unde per Jeremiam testatur, Cælum et terram ego impleo); nihilo minus in cælo empyreo specialiter esse et habitare asseritur, quoniam ibi clarius cernitur, et evidentius ac sublimius operatur. Propter quod in Deuteronomio scribitur : Non est alius ut Deus rectissimus; habitaculum ejus sursum, et subter brachia sempiterna. Denique per « Patrem luminum », intelligi potest vel Deus Trinitas, a quo omne lumen (tam naturale quam gratificum ac beatificum) est, vel persona Patris æterni, a quo increatum est lumen, quod est unigenitus Filius ejus, qui est lumen de lumine : de quo scriptum est, Erat lux vera; de quo et Simeon justus dixit, Lumen ad revelationem gentium. Sed et Spiritus Sanctus est lumen æternum et increatum, a Patre procedens, imo a Patre et Filio, tanquam a principio et lumine uno. Hinc in Joanne scriptum est : Non potest homo accipere quidquam, nisi datum fuerit ei de cælo.

Apud quem, id est in quo, non est trans-

mutatio. Deus enim est actus purus et ens absolute perfectum, in quo nec est materia arctans, nec potentia limitans, nec differentia contrahens. Nil enim movetur aut mutatur, nisi ens imperfectum. Quum ergo Deus gloriosus et adorandus, sit ens primum, summum, ad nil aliud vel altius ordinabile, sed omnium ultimus finis, nequaquam moveri potest aut transmutari, sed ipse stabilis manens, dat cuncta moveri. Hinc per Malachiam loquitur : Ego Dominus, et non mutor. In Numeris quoque fertur : Non est Deus quasi homo, ut mentiatur; nec ut filius hominis, ut mutetur. Ideo, juxta Paulum, solus Deus habet immortalitatem, id est omnimodam invariabilitatem. Omnis autem creatura, eo ipso quo ex nihilo est, in nihilum vertibilis est ex se ipsa, ad suam nihilitatis originem comparata, ut asserit Damasce-nus; et verteretur in nihil nisi Creatoris omnipotentia conservaretur, ut etiam Plato in primo Timæi fatetur, ubi summum Deum inducit ita loquentem : O dii deorum ! quorum pater et opifex ego ; natura quidem corruptibiles, mea autem voluntate incorruptibiles estis. *Nec vicissitudinis obumbratio*, id est nulla præteritio, nulla successio, nulla alternatio obnubilans aut obumbrans puritatem et immutabilitatem lucis divinæ ac increatæ essentiæ. Non enim sunt in Deo plures aut succedentes actus intelligendi sive volendi, sed uno simplicissimo et æterno actu intelligendi atque volendi cognoscit et vult se ipsum et omnia alia. Nec actus iste ab ejus differt essentia, quia in eo identificantur esse, posse et agere, seu essentia, potentia et actio. Porro in Beatis est actionum istarum vicissitudo, non quoad beatificam divinæ essentiæ visionem ac dilectionem ipsius fruitivam, sed quoad quamdam aliorum quorundam notitiam ac amorem.

Deinde ponitur beneficium magnum Patris cœlestis. *Voluntarie enim genuit nos verbo veritatis*. Potest hoc primo exponi de creatione, quia sponte, intellectualiter

A et liberrime cuncta creavit verbo æterno, juxta illud in Psalmo : Ipse dixit, et facta sunt; itemque, Verbo Domini cœli firmati sunt. « Voluntarie » ergo « genuit » (id est creavit) « nos, verbo veritatis », id est verbo quod est veritas ipsa. Omnia enim per ipsum facta sunt, et sine ipso factum est nihil. Quibus consonat illud Deuteronomii : Nonne ipse est pater tuus, qui possedit te, et fecit et creavit te ? Quidam autem philosophi putaverunt omnia profluxisse a Deo non quasi voluntarie, sed per modum naturalis emanationis : quorum error per prædicta destruitur. Secundo exponitur istud de regeneratione in aqua Baptismatis sub forma verborum a Christo traditorum, quæ sunt verba veritatis æternæ, et dicuntur etiam sermo seu verbum veritatis increatæ. Frequenter enim accipitur verbum pro complexu verborum, sicut in libris Prophetarum : Factum est ad me verbum Domini. Et in libro Judicum Aod ait ad regem Eglon : Verbum secretum habeo ad te, o rex. In Baptismo enim regenerantur fideles ex Deo et Ecclesia, juxta illud Joannis : Nisi quis renatus fuerit ex aqua et Spiritu Sancto, non potest videre regnum Dei. Unde ad Ephesios habetur : Christus dilexit Ecclesiam, mundans illam lavacro aquæ in verbo vitæ. Et recte dicimur in Baptismo regenerari, quoniam ibi sumus esse spirituale, quod est esse gratiæ ac virtutum, adepti. Tertio exponitur sic : « Voluntarie genuit nos verbo veritatis », id est, Pater per Verbum suum incarnatum regeneravit nos et redemit, quia a peccatis purgavit, gratiamque infudit, secundum illud Joannis : De plenitudine ejus omnes accepimus gratiam pro gratia. De Christo quoque Gabriel prænuntiavit : Ipse salvum faciet populum suum a peccatis eorum. Quarto sic : « Voluntarie genuit nos verbo veritatis », id est, per evangelicæ legis veritatem, doctrinam seu verbum, Pater convertit nos et esse gratiæ contulit. Hinc Paulus conversis a se : Per Evangelium (inquit) ego vos genui; et denuo, Filioli mei, quos iterum parturio.

Malach. iii,
6.

Num. xxiii,
19.

1 Tim. vi,
16.

Ps. xxxii, 9.

Ibid. 6.

Joann. i, 3.

Deut. xxxii,
6.

Judic. iii,
19.

Joann. iii,
3, 5.

Ephes. v,
25, 26.

Joann. i, 16.

Matth. i, 21.

1 Cor. iv,

Galat. iv,

19.

- Ut simus initium aliquod creature ejus,* A id est, primatum quemdam inter creata sortiamur. Quamvis enim per naturalia dona simus prælati irrationabilibus creaturis (unde in Genesi dictum est protoplastis : *Gen. 1, 28.* Dominamini piscibus maris, et volatilibus cœli, et cunctis animantibus terræ; atque *Ps. viii, 8.* in Psalmo, Omnia subjecisti sub pedibus ejus, etc.), tamen per dona gratuita populus christianus ceteris gentibus est eminenter prælatus. Propter quod prima Petri *I Petr. ii, 9.* inducitur : Vos autem genus electum, regale sacerdotium, gens sancta. Jamque tempore evangelicæ legis, non utique obstinatis Judæis, sed fidelibus Christianis competit illud Deuteronomii : Non est alia natio tam *Deut. iv, 7.* grandis; et illud in Psalmo, Non fecit taliter omni nationi. *Ps. cxlvii, 20.*
- Scitis, fratres mei dilectissimi,* vera esse quæ dico. Denique, quoniam tanta est Dei majestas, et tam magna beneficia ejus sunt super nos, ideo consequenter docet Apostolus qualiter in Dei obsequio habere nos debeamus. *Sit autem omnis homo velox ad audiendum* ea quæ Dei sunt et salutis, et quæ scire vel audire oportet; *tardus autem ad loquendum,* nisi specialis ratio poscat oppositum, quia in casu statim loquendum est : ut si aliquis periclitetur in fide, vel veritas fidei requiratur ab aliquo, vel innocens condemnetur ad mortem et aliquis veritatem loquendo queat eum eripere. Itaque proni simus ad audiendum salubria, nec inconsulte præsumamus docere, quia ad humilitatem id pertinet, et tutius est audire quam loqui, *Prov. x, 19.* quum Salomon dicat : In multiloquio non deest peccatum. Itemque : Vidisti hominem *Ibid. xxix, 20.* velocem ad loquendum? Stultitia magis speranda est, quam illius correctio. Hinc Pythagoras discipulos suos præcepit quinquennio silere, ut sic opportune discerent loqui. Unde in Vitaspatrum habetur, quod et abbas Agathon tribus annis lapidem tulit in ore, ut disceret taciturnitatem et loquendi opportunitatem, prout Salomon *Eccle. iii, 7.* tetur : Tempus loquendi, et tempus tacendi.
- Et tardus ad iram.* Nam ira per vitium, A est omnino vitanda, quoniam rationem excæcat. Ira vero per zelum, non nisi ex magna causa est assumenda, quia et ipsa rationem aliquantulum turbat. Propterea in Ecclesiaste scriptum est : Ne sis velox ad irascendum, quoniam ira in sinu stulti *Eccle. vii, 10.* requiescit. Nam ira per vitium, efficit hominem fatuo similem. Ideo subditur : *Ira enim viri,* id est ira per vitium, quæ scilicet prævenit rationem, in quocumque sit homine, *justitiam Dei non operatur.* Minus dicit, et majus significat. Nam talis B ira non solum impedit hominem a justa operatione, sed etiam ad injustitiam eum inducit, quia facit eum mensuram rationis et æquitatis excedere. Propter quod Salomon loquitur : Ira non habet misericordiam. In Job quoque habetur : Non te superet ira, ut aliquem opprimas. Nempe in Ecclesiastico asseritur : Homo iracundus incendit litem, et vir peccator turbabit pacem. Ideo ait Psalmista : Desine ab ira, et derelinque furorem.
- Propter quod abjicientes omnem immunditiam,* id est universa inquinamenta mentis et corporis, quatenus casto corpore mundoque corde, fonti totius munditiæ, Deo sanctitatis immensæ, obsequamini; *et abundantiam malitiæ,* id est continuationem operum malignorum, juxta illud Ecclesiastici : Ne adjicias peccatum super *Eccle. v, 5.* peccatum. Vel « abundantia malitiæ », est peccatum ex deliberatione et habitu vitioso, non ex ignorantia vel infirmitate, procedens. « Immunditia » quoque potest referri ad peccata carnalia, « abundantia malitiæ » ad peccata spiritualia, quæ ex suo genere sunt peccatis carnalibus graviora, secundum Gregorium. *In mansuetudine suscipite insitum verbum,* id est verbum evangelicæ prædicationis, quod fidelium mentibus est insertum, impressum, infusum, quoniam Christus per prædicatores suos seminat illud in mentibus credentium. Vel « insitum verbum », est Unigenitus Dei, qui per fidem habitat in cordibus nostris, et per prædicatoris sermonem audientium inseritur animabus.

Quod potest salvare animas vestras : quoniam Verbum æternum, videlicet Christus, efficienter salvat per gratiam suam fidelium animas ; evangelica vero doctrina instrumentaliter dispositiveque salvat ani- *mas pias. Mansuetudo autem specialiter mentem disponit ad susceptionem verbi divini, sicut et ira præcipue impedit bonum hoc. Unde Ecclesiasticus docet : Esto mansuetus ad audiendum verbum Dei.* *Eccli. v, 13.*

SERMO PRIMUS

DE TESTIMONIIS DEI ET PRÆCEPTIS, AUDITIONEQUE VERBI DEI.

S*IT omnis homo velox ad audiendum, tardus autem ad loquendum, et tardus ad iram. Jacob. I, 19.*

Duæ sunt partes legis divinæ, videlicet testimonia et præcepta. Testimonia sunt de credendis, ut quod Deus est unus et trinus, quod Dei Filius est incarnatus; præcepta sunt de agendis aut omittendis. In hac autem epistola quædam ponuntur pertinentia ad testimonia seu credenda, ut quod omne datum optimum et omne donum perfectum a Deo procedit. Et quamvis naturali ratione id possit probari, non tamen potest sufficienter probari ex lumine naturali, quod omnia sint a Deo, eo modo quo fides hoc tenet et scriptura libri Geneseos docet. Insuper ad credenda pertinet quod subditur, Voluntarie genuit nos verbo veritatis, ut simus initium aliquod creaturæ ejus, si intelligatur de regeneratione spirituali et supernaturali, facta in fonte Baptismi seu per instructionem et gratiam Christi. Cetera in epistola hac contenta pertinent ad agenda aut omittenda, ut quod ait : Sit omnis homo velox ad audiendum.

Itaque in primis obediamus huic brevi sed vere salubri verbo Apostoli, quo profatur : Sit omnis homo velox ad audiendum. Quod etiam ad subjectos ac simplices, ad minores ac feminas potissimum pertinet, qui sermocinationes, exhortationes, correptiones superiorum suorum ac sapientiorum et seniorum fervide debent

audire, memoriter retinere, strenue adimplere. Verbum etenim Dei, cibus, robur et medicina est animæ, vita et illuminatio ejus. Ideo loquitur Christus : Beati qui audiunt verbum Dei et custodiunt illud. *Luc. xi, 28.* Augustinus quoque affirmat : Non minus dignum est verbum Dei, quam corpus Christi. Idcirco non minus reus est qui verbum Dei negligenter audit, quam qui corpus Christi ex negligentia sua cadere in terram permittit.

Debemus ergo proni esse et alacres ad audiendum verbum Dei. Primo, quoniam verbum Dei illuminat animam ad cognoscendum ea quæ Deus ab ipsa requirit, et sine quorum notitia salvari non potest. Verbum etenim Dei, est sacra Scriptura et salutaria documenta circa Scripturam conscripta. Hinc ait Propheta : Lucerna pedibus meis verbum tuum, Domine, et lumen semitis meis; itemque, Declaratio sermonum tuorum illuminat, et intellectum dat parvulis. Qui ergo tardus est ad audiendum salubria, propriam fugit salutem, et habet ignorantiam crassam, amatque tenebras suæ mentis. Secundo debemus verbum Dei prompte velociterque audire, quia mentem in amore Dei accendit et ad proficiendum inflamat, juxta illud Jeremiæ : Factus est sermo Domini in corde meo quasi ignis exæstuans. Unde ait Psalmista : Ignitum eloquium tuum vehementer. Et Salomon : Omnis (inquit) sermo Dei ignitus. Denique sæpe contingit

Ps. cxviii,

105.

Ibid. 130.

Jer. xx, 9.

Ps. cxviii,

140.

Prov. xxx,

5.

ut unus homo audiendo bona de alio, inflammetur illius amore : quanto magis audiendo verba sacræ Scripturæ, in quibus infinita Dei bonitas, perfectio et beatitudo immensa describitur, ejusque beneficia ac promissa narrantur, et quantum dilexerit nos recitatur, debemus sincerissimo ejus amore valide inflammari, sicut ait Prophetæ : Concaluit cor meum intra me, et in meditatione mea exardescet ignis, id est, in cogitatione mea de Deo fervor sui amoris accendetur in me.

Tertio debemus veloces esse ad idem, quoniam verbum Dei curat mentem a vitiis, a superbia, ab avaritia, a luxuria, ceterisque peccatis. Nam contra singula vitia continentur in Scripturis saluberrima documenta et salutifera prorsus remedia. Quarto, quoniam verbum Dei ferventer audire, est signum bonitatis, probitatis atque prudentiæ, juxta illud Ecclesiastici : Auris bona cum omni concupiscentia audiet sapientiam. Ideo tardum esse ad audiendum verbum Dei, est signum malitiæ atque stultiæ. Quinto, quoniam verbum Dei libenter audire, est signum probabile prædestinationis divinæ, Christo dicente : Qui ex Deo est, verba Dei audit. Timeat ergo qui verbum Dei audit invite, quum Christus reprobis dixerit : Propterea vos non auditis, quia ex Deo non estis. Sexto, quia per assiduam audientiam verbi Dei, duritia frangitur cordis et emollitur ad compunctionem et devotionem : quemadmodum lapis, quamvis sit durus, guttarum incidentia perforatur. Hinc per Jeremiam loquitur Deus : Numquid non verba mea sunt quasi malleus conterens petram ?

Aliæ sunt plurimæ utilitates et rationes audiendi verba divina, quia per ea instruitur homo qualiter resistat diabolo, qualiter inter bona et mala discernat. Verbum etiam Dei, hominem consolatur et confortat in spe. Idcirco ait Apostolus : Omnis Scriptura divinitus inspirata, utilis est ad docendum, ad arguendum, ad corripiendum, ad erudiendum in justitia, ut perfectus sit homo ad omne opus bonum.

A Sed, heu, heu, et iterum heu ! quoniam multi proniores sunt ad audiendum verba scurrilia, vana et frivola, imo pungitiva et detractoria, quam verba vitæ atque salutis, quum tamen dicat Scriptura : Sepi aures tuas spinis, et noli audire linguam nequam. Emendet se ergo qui talis est, ne pereat in æternum.

Eccli.
xxviii, 28.

Præterea, juxta doctrinam Jacobi apostoli, simus tardi ad loquendum, nisi sufficiens ratio exigat loqui : quia ut ait Gregorius, Sicut incauta locutio in errorem pertrahit, ita indiscretum silentium eos qui erudiri poterant, in errore relinquit. Est ergo congruo tempore silentium, et tempore opportuno loquendum. Ait quippe Ambrosius : Patientia silendi opportunitasque loquendi, et contemptus divitiarum, magna valde sunt fundamenta virtutum. Pronior debet tamen homo consistere ad audiendum quam ad loquendum, ceteris paribus, quia facilius cadit homo loquendo quam audiendo, et majoris humilitatis ac securitatis est tacere quam loqui. Ideo dicit Ambrosius : Multos vidi loquendo in peccatum ruisse, vix quemquam tacendo. Taciturnitas quoque est sapientiæ signum. Propter quod a Job scriptum est : Utinam taceretis, ut putaremini esse sapientes. Denique de his Seneca prudentissime ait : In hoc incumbere ut libentius audias quam loquaris. Quod tacitum esse velis, nemini dixeris. Auribus frequentius quam lingua utere. Quidquid dicturus es, tibi dicas antequam aliis. Taciturnitas stulto homini pro sapientia est.

Job xiii, 5.

D Qui nescit tacere, nescit loqui. Insuper, quam laudabilis est taciturnitas ista, tam vituperabilis est loquacitas, quia insipientiæ vanitatisque signum est, animum lædit, devotionem exstinguit, evagationem et instabilitatem cordi ingignit, et innumera bilia mala oriuntur ex ea. Idcirco in Ecclesiastico verissime scriptum est : Qui odit loquacitatem, exstinguit malitiam. Hinc ait Gregorius : Pravi homines sicut in sensu sunt leves, ita in locutione præcipientes, quia quod levis mens concipit, levior

Eccli. xix, 5.

Ps. xxxviii,
4.

Eccli. iii,
31.

Joann. viii,
47.

Ibidem.

Jer. xxiii,
29.

II Tim. iii,
16, 17.

lingua protinus pandit. Hugo quoque de A
S. Victore: Vanus (inquit) sermo, vanæ con-
scientiæ index est. Mores hominis lingua
prodit, et qualis sermo ostenditur, talis

Matth. XII, 34. animus comprobatur, quia ex abundantia
cordis os loquitur. — Ecce quam necessa-

Prov. XXV, 28. lomom asserit: Sicut urbs patens et absque
murorum ambitu, ita homo qui non potest
in loquendo cohibere spiritum suum.

Amplius, juxta doctrinam Apostoli, si-
mus tardi ad iram, quæ est velut quædam
insania mentis, et rationem a veritatis B

Job V, 2. ea in Job asseritur: Virum stultum in-
terficit iracundia. Et Salomon loquitur:

Prov. XIV, 29. Qui impatiens est, operatur et exaltat stul-
titiâ suam. Imo, quam vitanda et vitiosa
sit ira, docet Gregorius, dicens: Per iram

justitia relinquitur, gratia vitæ socialis
amittitur, mansuetudo perditur, lux veri-
tatis excutitur. Et iterum ait: Per iram
splendor Spiritus Sancti expellitur, qui

Cf. Is. LXVI, 1, 2; *LVII,* 15. super humilem et quietum requiescere
dicitur, quia dum ira quietem menti sub-

trahit, suam Spiritui Sancto habitationem
claudit; per iram quoque sapientia perdi-
tur, ut quid, quove ordine loquendum aut
agendum sit, nesciatur. Denique ira est
unum de septem peccatis mortalibus: ideo
pronitas, consuetudo seu assiduitas ira-
scendi est damnabiliter periculosa. Dupli-
citer quoque fit ira culpa mortalis: primo,
si ipsa commotio sit tam immoderate ve-
hemens, quod rationem omnino superat
et exstinguit; secundo, si vindicta quæ
infertur aut inferri optatur, nimis excedat D
illatam injuriam seu offensam aut cul-
pam. Non autem est ultio appetenda aut
infligenda, nisi secundum rationis censu-
ram ac juris ordinem ac processum. Et
sicut unusquisque debet specialiter luctari
contra peccata ad quæ pronior est ex na-
turali dispositione aut consuetudine, ita
qui ad iram proclives sunt, sicut choleri-
ci, contra eam præcipue debent conari,
Deum pro gratia mansuetudinis invocan-
do, Christi passionem, patientiam, mitita-

tem pensando, se ipsos pro sua iracundia
castigando. Verumtamen ira per zelum,
quæ ex amore justitiæ sponte assumitur,
ut opus virtutis robustius exerceatur, bona
censetur.

Postremo, secundum doctrinam apostoli
Jacobi, abjiciamus omnem immunditiam
carnalium vitiorum, omnemque malitiam
spiritualium peccatorum; cum mansuetu-
dine et tranquillitate suscipiamus verba
salutis a magistris et superioribus nostris.
Siquidem ad fructuosam ac dignam sus-
ceptionem seu audientiam verbi Dei sex
requiruntur aut conferunt, quæ in ista
tanguntur epistola. Primum est velocitas
audiendi: unde in Ecclesiastico habetur,
Fili, a juventute tua excipe doctrinam, et *Eccli. VI,* 18.
usque ad canos invenies sapientiam. Se-
cundum est taciturnitas, quia verborum
tumultus impedit considerationem, et ani-
ma quiescendo fit prudens. Tertium est
mansuetudo, quoniam ira obruit animum
ne possit cernere verum. Quartum est
munditia a carnalibus vitiis, quoniam in *Sap. I,* 4.
malevolam animam non introibit sapien-
tia, nec habitabit in corpore subdito pec-
catis. Quintum est puritas mentis ab inte-
rioribus et spiritualibus culpis. Sextum
est mansueti cordis humilitas: superbis *Jacob. IV,* 6.
enim Deus resistit, et superbus informa-
tionem contemnit, quum sit magnus et
sapiens in oculis suis.

Ecce epistola ista saluberrimis plena est
documentis. Quantum vero Deo compla-
ceat diligens oris custodia atque discreta
tarditas ad loquendum, hinc patet, quod in
quodam cœnobio erat devotus monachus
districtus observator silentii, in tantum
quod nec unum verbum voluit loqui sine
superioris sui licentia. Quumque quodam
tempore inopinate ortum fuisset grande in
cœnobio illo incendium, et ignis tam im-
petuose procederet, quod ab his qui ade-
rant reprimi non valebat, Frater et mo-
nachus jam præfatus accurrit, et se igni
opponens, protulit tantum hæc duo verba:
Ignis, sta. Et mox ignis divina virtute re-
pressus stetit, celeriterque fuit extinctus.

ENARRATIO IN EVANGELIUM

VADO AD EUM QUI ME MISIT. Joann. xvi, 5-15.

APPROPINQUANTE nunc tempore dominicæ Ascensionis, recte legitur in ecclesia die hoc, evangelium præsens, in quo Christus ascensionem suam prædixit, atque Apostolos de suo corporali recessu mœstissimos multipliciter consolatur, ut in processu expositionis patebit. Porro evangelium istud, quemadmodum et præcedens, imo et sequentium dominicarum evangelia usque ad octavas Pentecostes, sumpta sunt ex sapientissimo pulcherri-
moque sermone quem post Cœnam Christus fecit Apostolis, in quo suam resurrectionem, apparitionem, ascensionem et Spiritus Sancti missionem clare ac diffuse prædixit, promisit, et per hoc consolabatur Apostolos. Itaque ait :

Vado, id est, per passionem, resurrectionem ascensionemque meam revertor secundum formam servi quam indui, hoc est secundum naturam humanam quam assumpsi, *ad eum qui me misit*, id est ad Patrem cœlestem, adipiscendo ab eo beatitudinem pleniorum quantum ad præmium accidentale, videlicet corporis mei glorificationem, in cœlestibus mansionem, ad dexteram Patris consessionem. Et quamvis Christus ut homo, non redierit ad Patrem motu locali, quoniam incircumscrip-
tibilis Deus Pater ubique est, tamen ad locum in quo Pater specialiter esse habitareque dicitur, rediit motu locali, ascendendo usque in cœlum empyreum. Et ideo dixit Salvator, *Vado*, quia in proximo fuit ut iret. Unde de re mox futura loquimur quasi de re præsentī.

Et nemo ex vobis interrogat me, Quo vadis? In hujus sermonis exordio legitur Petrus Christum interrogasse : Domine, quo vadis? Cui et Thomas dixit : Domine.

nescimus quo vadis. Quomodo ergo nunc Veritas ait, Nemo ex vobis interrogat me, Quo vadis? Ad hoc respondetur dupliciter. Primo, secundum Augustinum, quod verba hæc Christi ad tempus ascensionis sunt referenda, ut sit sensus : « Vado », id est, prope est ut ascendam, ad Patrem ; « et nemo ex vobis interrogat me », id est, tunc nullus vestrum quæret quo eam, quia tam manifeste ascendam, adstantibus angelis, obsequentibus nubibus, quod non erit ambiguitas quo ascendam. Videntibus

Act. 1, 9.

enim illis elevatus est, et nubes suscepit eum ab oculis eorum, ut scribitur in Actibus. Secundo, dicendum quod in principio hujus sermonis, quidam Apostolorum (ut tactum est) sciscitabantur Christum quo iret. Deinde de cœnaculo sunt egressi, et Christo cœptum sermonem continuante in alio loco, ibique dicente, *Vado ad eum qui misit me*, nullus Apostolorum quæsivit quo iret. Et hoc fuit ex magnitudine admirationis, timoris atque mœroris, propter ea quæ audierunt a Christo : nam ante hæc verba eis prædixit, Venit hora

Joann. xvi,

ut omnis qui interficit vos, arbitretur obsequium se præstare Deo. Obmutuerunt ergo ab hac inquisitione, vehementer attoniti et dejecti. Quam eorum desolationem quodammodo exprobrans Christus : Nemo (inquit) ex vobis interrogat me, Quo vadis?

Sed quia hæc de persecutionibus vobis futuris, et corporali recessu meo a vobis, locutus sum vobis, tristitia aliquantulum indiscreta ac immoderata implevit cor vestrum, quod ex sua imperfectione nondum vere paratum est ad sustinendum mundi adversa, neque me diligit dilectione pure spirituali, sed partim sensuali : unde et corporalem meam præsentiam ni-

Joann. xiii, 36.

Ibid. xiv, 5.

mium cupitis, quam Joannes Baptista, tanquam vir perfectus, non curavit. Non enim legitur Christum corporaliter visitasse aut secutus fuisse, quoniam caro non prodest quidquam.

Joann. vi,
64.

Denique, dicendo, « Tristitia implevit cor vestrum », innuit eos vehementissime contristatos. Ideo eos benignissime consolatur, subdendo : *Sed ego* qui sum veritas increata, *veritatem* proportionalem dico vobis. *Expedit vobis*, id est, animabus vestris salubre est, *ut ego vadam* ad Patrem (modo prætaeto). Cujus ratio subditur : *Si enim non abiero, Paracletus non veniet ad vos* in tanta plenitudine, atque in signo visibili, sicut in die Pentecostes. Jam tamen Apostoli habebant Paracletum, prout requiritur ad salutem : siquidem in die Paschæ insufflavit in eos, Accipite (inquiens) Spiritum Sanctum. Interim quoque profecerunt in caritate et gratia : et sic venit ad eos per gratiæ incrementum. *Si autem abiero, mittam eum ad vos* in signo visibili et abundantia maxima. Cur autem Spiritus Sanctus non fuit hoc modo mittendus nisi post Christi ascensionem, diversæ sunt causæ. Prima, quoniam Apostolorum ad Christum affectio quamdiu conversabatur cum eis, fuit aliquantulum sensualis, quia revera etiam in naturalibus fuit pulcherrimus atque dulcissimus, et valde amorose, dulciter atque humiliter habuit se ad Apostolos, tanquam ad filios, discipulos, amicos et fratres. Quantum autem affectio habet de carnalitate, tantum impedit de Spiritus Sancti receptione. Hinc Paulus perfectionem sortitus, Christumque solum spiritualiter amans ac speculans,

II Cor. v,
16.

ait : Et si novimus Christum secundum carnem, tamen jam nunc non novimus. Secunda causa est, quoniam tam eximia Spiritus Sancti plenitudo danda non fuit, nisi reconciliatis Deo per Christi passionem. Tertia, quoniam Christus rex noster, tam copiose dare non debuit dona sua, nisi quum reversus fuit ad patriam suam, et sedit in sede regni sui. Quarta, quoniam membra non erant tanta gratia decoran-

da, nisi ipsorum capite glorificato. Ideo dictum est : Spiritus nondum erat datus, quoniam Jesus nondum erat glorificatus. Joann. vii,
39.

Et quum venerit, id est, postquam Spiritus Sanctus vobis fuerit tam gratiose infusus; ita quod a vobis abstulerit omnem inordinatum timorem, et dederit vobis invictam animi libertatem, inconcusam constantiam, justitiæ stabilitatem, ac fervidam Dei ac proximi dilectionem : quod totum in die Pentecostes peractum est; *ille arguet mundum*, id est, per vestram prædicationem increpabit homines mundanos ac reprobos, *de peccato* infidelitatis quod habuerunt, *et de justitia* quam omiserunt, id est de contemptu et omissione justitiæ. Justitia nempe non increpationem, sed laudem meretur; verum omissio et contemptus justitiæ meretur redargui. Arguit quoque Spiritus Sanctus mundum de falsa et simulata justitia : de qua Christus in Evangelio multipliciter reprehendit sacerdotes, Scribas et Phariseos. *Et de judicio* eorum temerario, vel de judicio divino, quod non timuerunt, et de temeritate suæ præsumptionis, qua non timuerunt judicium Dei. Erant namque homines mundani his tribus vitiis specialiter implicati, quoniam infideles, injusti et præsumptuosi fuerunt.

Deinde Christus verba sua exponit. *De peccato quidem* Spiritus Sanctus arguet mundum, *quia non crediderunt in me* amatores mundi, videlicet obstinati Judæi atque gentilium multi, quum tamen tot et tanta miracula a me vel a vobis fieri conspexissent, per quæ Deus testimonium veritatis præbuit evangelicæ legi : ideo inexcusabiles sunt. — *De justitia vero* omissa arguet eos, *quia ad Patrem vado* : ideo mihi glorificato et super omnes cælos exaltato, magis quam ante obedire debuerant, quum vidissent atque audissent sufficientia fidei argumenta de mea ascensione. Post ascensionem enim Christi, demonstravit Deus Trinitas hominibus excellentiam Christi, quod Deus et homo esset, et quod non esset in alio salus : ideo obedi-

Act. iv, 12.

endum fuit ejus præceptis. Vel sic : Arguet mundum de justitia Christi, quam non acceptaverunt iniqui, quia ad Patrem vado : per quod patet justitia mea, videlicet quod vera docui, justa præcepi, irreprehensibiliter vixi. Ideo imitanda fuit justitia mea, seu justa conversatio mea. *Et jam non videbitis me* in triduo mortis, nec mortalem ut ante.

De judicio autem discretionis, quod abjecerunt, vel de judicio discussionis divinæ, quod non timuerunt, atque de temerario eorum judicio arguet eos, *quia princeps hujus mundi*, id est diabolus, *jam judicatus est*, id est reprobatus ac condemnatus a me, atque de credentium corde ejectus. Et hoc judicium homines debuerunt attendere, ac diabolo taliter judicato resistere, divini quoque rigorem judicii formidare, eo quod Deus principem mundi tam districte damnaverit. Et utique, si pensemus quam rigorose ac subito Deus a principio principem dæmonum cum adhærentibus sibi damnavit, propter unum conceptionis suæ tumorem, valde timere habemus divinæ justitiæ judicalem rigorem. Hinc enim secunda Petri habetur : Si Deus peccantibus angelis non pepercit, sed rudentibus inferni detractos, in tartarum tradidit cruciandos, novit Dominus iniquos in diem judicii cruciandos servare. Porro, quamvis diabolus a principio suæ ruinæ sit judicatus, et in fine sæculi quodammodo judicandus, specialiter tamen judicatus et reprobatus fuit a Christo conversante in mundo : qui quum tentaretur, dixit diabolo, Vade retro, Satana ; et alias, Nunc princeps hujus mundi ejicietur foras.

Adhuc multa de credendis et agendis, de mysteriis meis et sponsæ meæ Ecclesiæ, de statu sæculi futuri consummationeque mundi, *habeo vobis*, tanquam futuris totius mundi doctoribus, *dicere*, ut possitis totum genus informare humanum de necessariis ad salutem. In omni etenim genere, primum oportet esse maximum et perfectissimum. Quum ergo Apostoli fue-

rint primi post Christum doctores Ecclesiæ, oportuit eos excellentissime eruditos esse de mysteriis Christi, et his quibus instruenda fuit Ecclesia. *Sed non potestis omnia illa portare*, hoc est intelligere et mente ferre ac retinere, *modo* : quoniam inquieti, tristes ac pavidus estis. Passiones enim quum fuerint vehementes, actum rationis multum impediunt. Ideo in Job quoque habetur : Neque possum metuens respondere. Tranquillitas autem mentis disponit eam ad illuminationem divinam et instructionem salubrem : unde in epistola hujus dominicæ scriptum est, In mansuetudine suscipite insitum verbum. Ideo quoque non poterant capere, quia adhuc satis carnales ac rudes fuerunt. *Quum autem venerit ille Spiritus veritatis*, id est Spiritus Sanctus : qui dicitur Spiritus veritatis, quoniam fons et doctor est veritatis, et quoniam essentialiter verus et veritas est, et quia Spiritus est Patris et Filii, qui una sunt veritas ; *docebit vos omnem veritatem*, non simpliciter omnem, sed omnem veritatem de qua nunc loquor, utputa omnia quæ habeo vobis dicere ad vestram salutem atque Ecclesiæ instructionem : quod fuit in die Pentecostes impletum. Juxta hunc modum ait Joannes apostolus : Unctio docet vos de omnibus ; et Paulus, Dabit tibi Dominus de omnibus intellectum.

Deinceps ostendit Christus cur Spiritus Sanctus sit ad instruendum tam perfecte idoneus. *Non enim loquetur a semetipso*, id est, non vos illuminabit per allocutionem internam, virtute et scientia non recepta, sed sibi a Patre ac Filio communicata, ita quod locutio ejus erit tam vera sicut locutio Patris et Filii, imo potius eadem numero, quoniam opera Trinitatis sunt indivisa. Itaque non loquitur a semetipso, quia non est a semetipso, sed potestatem atque scientiam, imo quidquid habet et est, suscepit a Patre et Filio, tanquam ab uno principio, quum Patris et Filii sit una natura et una voluntas. *Sed quaecumque audiet, loquetur*. Verba hæc

Job ix, 35.

Jacob. i, 21.

I Joann. ii, 27.
II Tim. ii, 7.

II Petr. ii, 4, 9.

Matth. iv, 10.
Joann. xii, 31.

sanum ac sobrium exigunt intellectum. Quum enim Spiritus Sanctus sit verus Deus, et per consequens infinitam scientiæ plenitudinem habens a Patre et Filio, non est opinandum quod revelavit alicui homini absolute omnia quæ audivit, et per spirationem passivam seu procedendo accepit et agnovit a Patre et Filio. Rursus, quum Spiritus Sanctus sit Deus, et per consequens summe simplex et penitus immaterialis, non est putandum quod aliquid corporaliter audiat. Iterum, quum sit Deus, et ex consequenti omnino invariabilis ac æternus, nihil audit de novo, nec audiet quod non audivit, id est, non cognoscet quod æternaliter non cognovit. Est igitur sensus : « Quæcumque » vobis necessaria et pro Ecclesiæ informatione utilia « audiet », id est, se per æternam processionem novisse ostendet. Vel, « audiet », id est, in æternitatis momento omne tempus includente audit, seu procedendo cognoscit. Quum enim processio Spiritus Sancti sit æterna, per verba omnium temporum explicatur, quoniam omne tempus comprehendit æternitas : unde de Deo communiter dicimus, Deus fuit, Deus erit, Deus est. « Loquetur », id est, vestris cordibus inspirabit locutione interna : de qua ait Propheta, Audiam quid loquatur in me Dominus Deus.

Ps. LXXXIV,
9.

Et quæ ventura sunt annuntiabit vobis. Ex hoc constat quod Apostoli fuerunt prophetæ, imo summi prophetæ : quod maxime patet in evangelista Joanne, qui in Apocalypsi describit totum militantis processum Ecclesiæ, a tempore Apostolorum usque in finem mundi. Petrus quoque et Paulus in suis epistolis, aliqua de futuris in Ecclesia scribunt.

Ille me clarificabit, id est, per vestras prædicationes et per vestra miracula me-

am majestatem et gloriam hominibus insinuabit. Tanta enim gratia ac sapientia decoravit Deus Apostolos, quod per eos totus mundus conversus est, et Christi claritatem agnovit ac honoravit, juxta illud Psalmistæ : In omnem terram exivit Ps. xviii, 5. sonus eorum. *Quia de meo accipiet,* id est, essentiam et sapientiam a me procedendo invariabiliter habet. Sic enim et de Spiritu Sancto ait, Accipiet, sicut de eo jam dixit, Audiet. Græci dicunt, sive dixerunt, quod Christus idcirco non ait, De me, sed, De meo accipiet, quoniam non procedit a Filio, sed ab eo quod est Filii, hoc est de substantia Patris, quæ et Filio inest. Hoc autem mendaciter confinxerunt, quoniam in verbis sequentibus Christus probat quod a se Spiritus Sanctus vere procedit. *Et annuntiabit vobis* futura, et omnia de quibus instruenda exstat Ecclesia.

Omnia quæcumque habet Pater, mea sunt, non solum per fruitionem, ut dixerunt hæretici, sed et per substantialem identitatem, continentiamque realem ; id est, totam suam essentiam, potestatem et perfectionem Pater mihi communicavit. *Propterea dixi : Quia de meo accipiet,* id est de plenitudine meæ deitatis, et de me procedit. Quasi dicat : Quum in Patre et me sit una essentia, una potentia, una voluntas, quemadmodum Spiritus procedit a Patre, sic et a me, quoniam id per quod competit Patri spirare, est in me : sicut etiam tres Personæ sunt unus Creator, quoniam id ratione cujus competit Patri creare, est in Filio et Spiritu Sancto, nec aliud obstat. Porro Spiritus Sanctus est amor, idcirco procedit a voluntate. Voluntas autem in Patre et Filio est eadem numero. De hac materia multa scribit Anselmus in libro de Processione Spiritus Sancti. *Et annuntiabit vobis* quæ dicta sunt.

SERMO SECUNDUS

DE IMPEDIMENTIS QUIBUS HOMINES IMPEDIUNTUR A SUSCEPTIONE SPIRITUS SANCTI.

SPIRITUS sanctus disciplinæ effugiet A fictum, et auferet se a cogitationibus quæ sunt sine intellectu. Sap. 1, 5.

In his verbis tanguntur duo impedimenta infusionis et gratiosæ inhabitationis Spiritus Sancti. Primum est fictio; secundum est imperita seu stolidi cogitatio. Denique, quamvis omne peccatum mortale impediat hominem a susceptione et inhabitatione Spiritus Sancti, quædam tamen vitia mortalia specialiter ac præcipue tale præbent impedimentum. Sunt etiam appropriatæ rationes assignabiles circa unum- B quodque mortale peccatum, cur impediat infusionem et gratiam Spiritus Sancti, sicut jam, Deo præstante, partim monstrabitur.

Præterea, quod nihil impediat hominem ab inhabitatione et gratia Spiritus Sancti nisi peccatum, multipliciter potest probari. Primo, auctoritate sacræ Scripturæ, quæ evidenter atque frequenter hoc protestatur. Scriptum est enim in Isaia : Ecce non est abbreviata manus Domini, ut salvare nequeat, neque aggravata est auris ejus, ut non exaudiat; sed iniquitates vestræ diviserunt inter Deum vestrum et vos, et peccata vestra absconderunt faciem ejus a vobis. Hinc per Michæam prophetam loquitur Deus : Numquid abbreviatus est spiritus meus, ut salvare non possim? Et in Jeremia habetur : Peccata vestra prohibuerunt bonum a vobis.

Secundo probatur hoc ex parte Dei, quoniam tam infinita est bonitas, misericordia et dilectio ejus circa genus humanum, quod quantum in se est, paratus D sit omni homini gratiam suam conferre, et non nisi perversitas, ingratitude et negligentia hominum impediat eos a donis

et gratia Spiritus Sancti. Proprietas namque boni est se communicare et dona sua effundere. Quum ergo Deus omnipotens et æternus sit infinita puraque bonitas, cujus munificentia et opulentia est immensa, certissimum est quod quantum in ipso est, paratissimus sit gratiam, virtutes et dona Spiritus Sancti conferre; nec impedimentum est nisi ex parte peccantium. Similiter ad misericordiam pertinet miseris subvenire; et dilectio est virtus per quam unus vult atque communicat aliis bonum. Quum ergo tam infinitæ sint misericordia et caritas Dei ad homines, dubium esse non potest quin quantum in se est, paratus sit omnino gratiarum charismata impertiri : imo hominum salutem vult, cupit, et eos ad gratiam suam invitat. Hinc in Ezechiele affirmat : Numquid voluntatis meæ est mors impii, et non ut convertatur et vivat? Unde et in Evangelio loquitur Christus : Jerusalem, Jerusalem, quoties volui congregare filios tuos quemadmodum gallina congregat pullos suos sub alas, et noluisti? Hinc princeps Apostolorum in sua secunda scribit Canonica : Non tardat Dominus promissum, sed patienter agit propter vos, nolens aliquem perire, sed omnes ad pœnitentiam reverti. Præterea, quantum Deus piissimus ex sua dilectione et bonitate velit et optet hominum salvationem et emendationem, quantum quoque miseris pereuntibusque condoleat, constat ex eo quod in Deuteronomio loquitur Moysi de filiis Israel : Quis det talem eos habere mentem ut timeant me et custodiant universa mandata mea, et bene sit eis et filiis eorum post eos in sempiternum? Apud Isaiam quoque : Utinam (inquit) attendisses mandata mea.

Ezech.
xviii, 23.

Matth.
xxiii, 37.

II Petr. iii,
9.

Deut. v, 29.

Is. xlviii, 18.

Is. lxx, 1, 2.

Mich. ii, 7.

Jer. v, 25.

Tertio idem probatur ex beneficiis Dei. Si enim consideremus quanta et qualia Deus pro nostra salute effecit, quanta beneficia contulit, quam misericorditer deum nobiscum egit, et præsertim quanta Unigenitus Dei Patris pro nostra redemptione assumpsit, fecit ac pertulit, luce clarius scimus quam paratissimus sit Dominus Deus noster suam nobis gratiam elargiri, dummodo obicem non ponamus. Nonne Pater æternus pro nostra salute superdilectissimum et unicum Filium suum misit in mundum, et nostram naturam ei univit, atque in ea voluit ipsum laborare, pati et mori pro nobis? Per quod ineffabilem suam caritatem nobis ostendit, juxta *Joann. iii, 16.* illud Joannis: Sic Deus dilexit mundum ut Filium suum unigenitum daret, ut omnis qui credit in ipsum, non pereat, sed habeat vitam æternam. Ideo ad Romanos ait Apostolus: *Rom. v, 8, 9.* Commendat caritatem suam in nobis Deus, quoniam quum adhuc peccatores essemus, Christus pro nobis mortuus est.

Ex hoc quoque quod Deus Pater dedit nobis Filium suum, innotescit quam paratus sit nobis dare gratiæ suæ charismata, *Ibid. viii, 32.* Paulo dicente: Proprio Filio suo non perperit Deus, sed pro nobis omnibus tradidit illum: quomodo non etiam omnia nobis cum illo donavit? Insuper, si consideremus quanta Filius Dei pro nobis assumpsit, fecit atque perpessus est, dubitare non possumus quin Deus paratissimus sit nobis indulgere, succurrere, gratiam et salutem impendere.

Imo Deus legatos suos mittit ad homines impios, ingratos, pravissimos, exhortans, invitans, exorans ut convertantur, et beatitudinem consequantur. Legati etenim Dei sunt angeli sancti, et boni prælati ac prædicatores, per quos Deus hortatur peccatores ad pœnitentiam salutarem.

Cur ergo negligimus? Cur non attendimus viscera infinitæ misericordiæ Dei nostri super nos? Et certe quam ineffabiliter pius est nunc, tam ineffabiliter justus et rigorosus, imo, secundum Apostolum, et severus est post vitam præsentem. Quod

ex hoc solo clarissime constat, quia pro uno mortali peccato tam cito peracto æternam infligit damnationem ac pœnam tam diram, tam indicibiliter gravem. Unde hunc divinæ rigorem justitiæ vocant sancti Prophetæ furorem, quia per modum furiosi tranquillissimus Deus se habet, tam acerbissime puniendo iniquos.

Deinde, si rex aut princeps terrenus pius ac præpotens, graviter esset a subditis suis offensus, quibus nunquam forefecisset, sed semper benefecisset, quos etiam, si vellet, posset ad libitum trucidare, et nihilo minus ex sola sua pietate et caritate, destinaret aliquos sapientes et virtuosos sibi præcaros ad illos, hortando illos per missos a se, ad emendationem, reconciliationem et pacem; nonne valde pius et bonus diceretur hujusmodi princeps? Et si subditi ejus nec sic cessarent ab injuriis et perversitatibus suis, nonne ab omnibus pessimi et omni punitione dignissimi judicarentur? Quanto benignior est Dominus Deus noster, tanto et deteriores nos sumus. Ecce tam bonus, sanctus et pius est Deus, tanta bona largitus est nobis et indesinenter largitur, tamdiu sustinuit impietates atque injurias nostras: et nihilo minus mittit quotidie nobis suos legatos, hortans nos ad emendationem, ad conversionem, ad pacem cum ipso. Per se ipsum quoque occultis instinctibus et inspirationibus incitat nos ad bona, quos uno nutu posset æternaliter condemnare et in nihilum redigere: et tamen repellimus eum, negligimus nosmetipsos, et in nostris perseveramus sceleribus.

Quid ergo meremur? Quid imminet nobis? Quid fiet de nobis, quum omnipotens Deus secundum suam nos cœperit justitiam judicare, et secundum opera nostra, imo et secundum omissiones et negligentias nostras, retribuere nobis? Timeamus ergo justum judicium Dei, qui terribilis est in consiliis suis super filios hominum. Qui et per Salomonem testatur: Quia vocavi, et renuistis, despexistis omne consilium meum, et increpationes *Ps. lxxv, 5.* *Prov. i, 24-27.*

meas neglexistis, ego quoque in interitu A vestro ridebo et subsannabo, quum vobis quod timebatis evenerit, quum irruerit repentina calamitas. Hinc etiam prædixit Propheta : Qui habitat in coelis irridebit eos, et Dominus subsannabit eos ; tunc loquetur ad eos in ira sua, et in furore suo conturbabit eos.

Ps. II, 4, 5.

Insuper, sicut prædictum est, omne mortale peccatum impedit hominem ab infusione, inhabitatione et gratiosa præsentia Spiritus Sancti. In præsentī quoque evangelio tangitur unum impedimentum susceptionis Spiritus Sancti, quod est amor carnalis. Ubi summa cum diligentia oportet advertere, quod quamvis Dominus noster Jesus Christus fuerat Sanctus Sanctorum, et ab omni labe peccati prorsus purissimus, ejusque caro mundissima fuit, utputa ex purissimis sacratissimæ Virginis sumpta sanguinibus, sine peccato concepta, et a Spiritu Sancto formata, et una cum anima sua Verbo æterno unita ; nihilo minus Apostoli inepti fuerunt ad plenam susceptionem Spiritus Sancti, propter hoc quod eorum ad Christum dilectio fuerat aliquantulum sensualis sive carnalis. Quantum ergo amor carnalis ad homines peccatores aut peccatrices, in peccatis conceptos, fragiles atque defectibus plenos, impedit mentem humanam ab infusione et donis Spiritus Sancti? Amor quippe carnalis et spiritualis contrariantur ad invicem, nec se mutuo compatiuntur ; sed ut Isaias fatetur, Coangustatum est stratum, ut utrumque simul capere nequeat.

Is. xxviii, 20.

Si ergo a Spiritu Sancto visitari, impleri D et inhabitari desideramus, purgemus cor nostrum ab omni carnali amore, ut neque nos ipsos nec alios carnaliter, sed spiritualiter diligamus, desiderando nobis ac aliis gratiam Dei, virtutes ac dona Spiritus Sancti, profectum in vita virtuosa, et post hanc vitam gaudia sempiterna, non autem carnales delectationes, divitias temporales, honores humanos, sed necessaria vitæ. Sic ergo et conjugati amare se obligantur, et si se nimis carnaliter ament, Spi-

ritus Sancti inhabitatione privantur ; sic quoque sobolem suam tenentur diligere, et dum peccat, diligenter corripere, ne simul cum sua sobole pereant. Amor iste carnalis, mirabiliter, imo et lamentabiliter ac damnabiliter inficit, fallit, vincit et obtenebrat mentem : idcirco cum suis effectibus, qui sunt lascivi contactus, amplexus, deosculaciones, et libidinosi adspectus et affatus, est omnino vitandus.

Præterea, ab infusione et omni gratioso charismate Spiritus Sancti, præcipue impedit hominem detestabilis illa superbia, coram Deo et hominibus odibilis ac spernenda. Sola namque superbia destruit omnia, si comitetur. Et hujus sunt plurimæ rationes. Prima, quoniam homo qui gratiam Spiritus Sancti recepit, seu recipere petit, habet se tanquam mendicans, et Deus qui Spiritus Sancti dona infundit, habet se sicut pater et dominus ac paterfamilias, eleemosynam tribuens et pauperem ditans. Mendicum autem et pauperem oportet se humiliare, si a divite aliquid petat, vel recipere eleemosynam debeat : si enim intumescat et humiliter petere dedignetur, nec propriam paupertatem penset ac fateatur, juste omnino despicitur. Quum ergo superbia sit quædam inflatio mentis adversus Deum, et tumor animi se ipsum magnificantis, efficit hominem omni gratia Spiritus Sancti valde indignum.

Eccli. x, 7.

Secunda ratio est, quia ad hoc quod homo Spiritum Sanctum accipiat, oportet ut se Deo applicet et substernat sive subjiciat. Superbia vero directe elongat a Deo et ei repugnat : imo superbus voluntatem suam divinæ voluntati præponit, ac divinis jussionibus superponit, nec vult subjici Deo. Ideo ait Scriptura : Deus superbis resistit. Et per Isaiam Dominus loquitur : Super quem requiescet spiritus meus, nisi super humilem et quietum ? Beatissima quoque virgo Maria ait de Deo : Dispersit superbos mente cordis sui. Oportet ergo ut homo se ipsum vere humiliet, proprias vilitates, defectuositates, iniquitates et culpas perpendat, intueatur ac ponderet, si

Jacob. iv, 6.

Cf. Is. lxxvi, 1, 2; lxxv, 15.

Luc. i, 51.

Spiritum Sanctum debet suscipere aut inhabitatorem tenere; et quanto profundius se subiecit Deo, tanto gratiosius visitatur a Spiritu Sancto. Ideo scriptum est: Humilia valde spiritum tuum; et, Humilia mini sub potenti manu Dei.

Eccli. xii, 13.
1 Petr. v, 6.

Tertia ratio est, quia superbia abstrahit Deo quod ei debetur. Nam Deo debetur honor et gloria: et hæc sibi usurpat superbus, quoniam cupit se in se ab aliis honorari et glorificari, quasi bona habeat a se ipso. Estque ingratisimus Deo, qui de beneficiis ejus superbit, non gratias agit. Ideo scriptum est: Quid superbit terra et cinis? Itaque, Quid habes quod non accepisti? Si autem accepisti, quid gloriaris quasi non acceperis? Quarta, quoniam superbia omnium vitiorum est origo, caput, radix, regina. Ideo maxime impedit hominem ab omni gratiæ dono, trahit quoque eum ad gravissima innumerabiliaque peccata: sicque constituit hominem ad Spiritus Sancti susceptionem indispositissimum. Ideo scriptum est apud Job: Quid tumet contra Deum spiritus tuus? Quid te elevat cor tuum, et quasi magna cogitans, attonitos habes oculos? Quinta, quoniam

Eccli. x, 9.
1 Cor. iv, 7.

Job xv, 13, 12.

A in superbia est magis evidenter contemptus Dei. Superbia quoque est diabolicum vitium, et homines mutat in dæmones.

Verum, ne sermo iste nimium extendatur, qualiter cetera peccata mortalia Spiritus Sancti susceptionem et inhabitationem impedian, sequenti reservatur sermoni.

Legitur de Antiocho rege in libro Machabæorum, quod superbissimus fuit, in tantum quod aestimavit se terram ad navigandum, pelagus vero ad iter agendum deducturum. Et hujus superbiam Deus in vita hac terribiliter plagavit et humiliavit. Quum enim sederet in curru, et juberet currum agitari ut persequeretur populum Dei, cecidit repente de curru, et toto corpore conquassatus est; atque tam intolerabili viscerum dolore intus a Deo percussus, quod vermes de suo corpore eruperunt, tantusque fœtor, quod nec ipse nec alii ejus fœtorem poterant sustinere. Sicque miserabili ac amarissima morte decessit, et de pœnis vitæ præsentis ductus est ad sempiternas pœnas inferni. Hoc ergo exemplo terreantur superbi, et humilient semetipsos antequam humilientur a Deo.

II Mach. v, 21; ix, 4 et seq.

SERMO TERTIUS

QUALITER INVIDIA, LUXURIA, AVARITIA, CETERAQUE MORTALIA PECCATA IMPEDIANT
INFUSIONEM AC TOLLANT INHABITATIONEM SPIRITUS SANCTI.

QUI facit peccatum, ex diabolo est. **D**rum; imitantur autem illum qui sunt ex parte illius.

I Joann. iii, 8.

Quicumque in mortali peccato est, membrum est et minister diaboli. Idecirco qui peccat mortaliter, ex diabolo est, non per creationem, sed per imitationem, et quia diabolicæ suggestioni consentit, atque ad diabolum pertinet. Quod tamen de superbis et invidis præcipue veritatem sortitur. Verum in libro Sapientiæ habetur: Invidia diaboli mors introivit in orbem terra-

Sap. ii, 24, 25.

Itaque invidia propter speciales rationes impedit infusionem Spiritus Sancti, et gratiam ejus tollit. Primo, quia præceteris contrariatur Spiritui Sancto, qui per appropriationem caritas appellatur. Ideo præsertim elongat mentem a Spiritu Sancto, et facit eam illi displicentem, deformem, odibilem, atque a luce gratiæ penitus vacuam. Propter quod in prima

sua epistola scribit Joannes apostolus : *I Joann. II, 11.* Qui odit fratrem suum, in tenebris ambulat, et nescit quo eat, quoniam tenebræ obcæcaverunt oculos ejus. Secunda ratio est, quia invidia directe contrariatur summæ virtuti theologicæ ac infusæ, videlicet caritati, sine qua nulla virtus est Deo accepta aut meritoria. Ideo, sicut per caritatem maxime homo conjungitur Deo, ita per invidiam maxime separatur et elongatur ab eo. Tertia, quia sicut invidia de aliorum prosperitate et gratia contristatur, ita homo per eam meretur ut Spiritus Sanctus nullam ei virtutem et gratiam fa-
veat aut impendat, sed spiritualiter pauperem miserrimumque relinquat. Nam, sicut homo se habet circa proximum suum, ita meretur et justum est ut circa ipsum se habeat Deus. Quum ergo invidus specialiter cupiat aliis malum, atque diflaveat eis bonum, specialiter promeretur ut Deus omni eum spoliaret gratia, et deserat ac contemnat.

Abjiciamus igitur diabolicum hoc venenum, quod etiam in præsentī, suo possessori facit infernum. In ceteris quippe peccatis communiter delectatio quædam est, in invidia vero afflictio infernalis. Nam ut asserit Augustinus, Invidi color pallore perfunditur, oculi deprimuntur, mens accenditur, membra frigescent, fit in cogitatione rabies, in dentibus stridor. Qui ergo livoris peste plene carere desiderat, cœlestem hereditatem diligat, quam coheredum numerus non angustat. Nam tanto quisque invidet alteri bona præsentia, quanto minus ea contempserit. Hieronymus quoque : Oro te, inquit, quid delectationis præstat invidio sua invidia, quem quibusdam conscientia ungulis livor ipse discerpit, et aliena prosperitas ejus tormentum est? Est demum valde notabile quod ait Chrysostomus : Quemadmodum columna si recta fuerit, accepto supra se pondere amplius confirmatur, et firmitus stat; si autem modice obliquata fuerit, non solum non confirmatur, sed incurvatur, et amplius tendit ad latus : ita cor

A hominis si fuerit rectum et justum, videns opera viri justī, audiensque doctrinam sapientia ejus, amplius confirmatur; si vero perversum cor fuerit, non solum inde non confirmatur, sed magis ad invidiam excitatur, et magis pervertitur. Ideo Sapiens ait : Neque cum tabescente invidia *Sap. VI, 25.* communicabo. Et iterum Salomon : Putredo (inquit) ossium, invidia. Est enim *Prov. XIV, 30.* putredo ossium animæ, hoc est virtutum quibus anima consolidatur; est quoque putredo ossium corporis, quoniam corporali vitæ et complexioni maxime nocet : sicque corpus occidit et animam.

Præterea, Spiritus Sancti infusionem ac inhabitationem valde specialiter aufert luxuria. Primo, quoniam puritati Sancti Spiritus præcipue contrariatur. Est enim in vitio hoc specialiter magna turpitudine, inhonestas et fœditas. Idcirco, secundum Apostolum, Qui fornicatur, in proprium *I Cor. VI, 18.* corpus peccat, quoniam illud dehonestat. Et crimen hoc non animam tantum, ut cetera vitia, sed corpus simul cum anima inquinat. Secundo, quia luxuria specialiter ingerit homini fastidium divinarum ac spiritualium rerum, et deprimit mentem, obtusamque efficit : sicque omnino constituit eam ineptam atque indignam ad Spiritus Sancti infusionem ac gratiosam præsentiam. Tertio, quia in luxuria maxime vigent amor carnalis et delectatio sensualis, quæ spirituali amori et consolationi Spiritus Sancti penitus opponuntur. Ideo dicit Gregorius : Tanto quisque a superno amore disjungitur, quanto inferius delectatur. Quarto, quia per inquinamenta luxuriæ homo brutis æquatur, et omnino caro efficitur : sicque a spiritualitate et Spiritus Sancti deificatione ac elevatione vehementissime impeditur ac elongatur. Unde in Genesi Dominus ait : Non permanebit spiritus meus in homine *Gen. VI, 3.* in æternum, quia caro est. Unde, quanto plus per vitia carnis afficitur homo, et delectatur in rebus creatis ac vilibus, tanto per ea tenacius creaturis inhæret; et quanto tenacius creaturis inhæret, tanto plus a

Creatoris impeditur amore, et amplius A elongatur a Spiritus Sancti infusione, difficilisque convertitur. Oportet ergo hoc bestiale ac fœdum abjicere vitium, eum qui vult Spiritus Sancti esse aut fieri templum.

Insuper, avaritia specialiter impedit infusionem et gratiam Spiritus Sancti. Primo, quoniam valde fortiter alligat cordis affectum rebus caducis : nam quanto avarus plura acquirit, tanto plura desiderat.

Coloss. iii,
5.

Secundo, quia secundum Apostolum, Avaritia est servitus idolorum, id est idololatriæ similis. Nam, sicut idololatra, vero Deo relicto, idola colit, ita avarus, summo, infinito atque incommutabili bono deserto, terrenis totaliter inhiat, et magis quam Deum ea cogitat, amat et colit. Tertio, quia ut in Ecclesiastico scriptum est, Nihil est iniquius quam amare pecuniam. Nam amator pecuniæ animam suam habet venalem, quam pro nummo subdit diabolo. Quarto, quia ex avaritia oriuntur peccata multa gravissima, ut rapinæ, furta, sacrilegia, mendacia, doli, perjuria, etc.

Eccli. x, 10.

Conformiter potest ostendi de ceteris peccatis mortalibus, cur a Spiritus Sancti infusione et gratia impediunt hominem. Nam de ira, hoc in expositione et sermone epistolæ hujus dominicæ est ostensum. De gula quoque facile est pensare, quia et ipsa bestiale est vitium, gravatque mentem, et pigram efficit ad divina, luxuriæ quoque incentivum atque materiam exhibet. Similiter acedia quum sit torpor et tædium mentis ad ea quæ Dei sunt, caritati et fervori Spiritus Sancti repugnat, et omnium divinorum transgressionem præceptorum inducit.

Præterea advertendum, quod si unumquodque mortale peccatum tam vehementer ac multipliciter ineptum constituit hominem et indignum ad infusionem et gratiam Spiritus Sancti, quam inæstima-

biliter inepti sunt et indigni visitatione Spiritus Sancti, qui multis aut omnibus mortalibus sordent, subduntur replenturque vitiis, et quotidie crimina addunt criminibus, et absque freno ac numero peccant? Siquidem peccatum mortale quod mox per pœnitentiam non deletur, suo pondere trahit ad aliud. Ideo quanto quis sæpius peccat, tanto pronior est ad peccandum, et tanto ineptior ad conversionem. Talibus ergo clamat Isaias propheta : Redite, prævaricatores, ad cor ; et B Paulus apostolus, Resipiscant a laqueis diaboli, a quo captivi tenentur ad ipsius voluntatem. O quam turpes et fœtidæ coram Deo sunt hujusmodi animæ ! Ait namque S. Gregorius : Si videremus quantum per unumquodque peccatum mortale anima deturpatur, usque ad mortem resisteremus peccato. Quam incomprehensibiliter ergo turpes et fœtentes sunt animæ innumerabilibus mortalibus vitiis plenæ? Vehementissime plane condolendum est eis, et indesinenter orandum pro ipsis. Nempe quid C sunt hujusmodi animæ, nisi diabolorum cloacæ?

Is. xlii, 8.

II Tim. ii,
26.

Nec tamen de eis est desperandum. Nam et S. Guillelmus confessor, qui fuit dux, fuit peccator gravissimus et tyrannus, tribusque annis sedit in adulterio incestuoso cum uxore proprii fratris, quasi alter Herodes. Et tamen postmodum per S. Bernardum conversus est, et pœnitentiam egit condignam, quia ad nudum corpus suum portavit loricam, et septem annis jacebat in fovea seu spelunca, die ac nocte lacrimosissime sua deplorans peccata. Visitavit etiam Terram sanctam et Christi sepulcrum, et rigorosissimas abstinentias fecit, longo deinceps tempore in magna sanctitate Deo deserviens, ac beato fine vitam hanc terminans. Ejus ergo exemplo, convertantur ac satisfaciant, qui vitiorum molibus sunt oppressi.

AD RELIGIOSOS

SERMO QUARTUS

DE EXCELLENTIA, MUNIFICENTIA ET EFFECTIBUS DEI.

OMNE datum optimum et omne donum perfectum desursum est, descendens a Patre luminum. Jacob. I, 17.

Quum Deum super omnia toto corde jubeamur diligere, nec tamen valeamus id adimplere, imo neque incipere, nisi eum aliquo modo intelligamus et cognoscamus, quia quod prorsus ignotum est, nec appeti potest nec diligi; hinc Domini Dei nostri cognitio aliqualis nobis in primis necessaria perhibetur. Imo in perfecta Dei cognitione beatitudo nostra a Fonte beatitudinis

constituta asseritur, ipso dicente : Hæc est

vita æterna, ut cognoscant te verum Deum.

Et ipse Deus per Jeremiam ait prophetam : Non gloriatur sapiens in sapientia sua, et non gloriatur fortis in fortitudine sua, et non gloriatur dives in divitiis suis; sed in hoc gloriatur, qui gloriatur, scire et nosse me, quia ego sum Dominus Deus. Merito igitur, juxta Scripturam, Vani sunt omnes homines quibus non subest scientia Dei. Si ergo in visione Dei nostra consistit felicitas (juxta illud : Ostende faciem tuam, et salvi erimus; et alibi, Similes ei

erimus, utputa perfecte beati, quia videbimus eum sicuti est), constat quod quanto nunc in Dei cognitione proficimus, tanto futuræ beatitudini amplius propinquamus, atque in isto exilio quodammodo beatiores efficimur. Quod tamen non de quacumque Dei cognitione intelligo, sed de ea quæ doni sapientiæ actus est, et contemplatio dici meretur, ac formata, non informis, vocatur. Hæc formata et amorosa Deitatis cognitio et ejus dilectio insepara-

biles sunt, atque se invicem fulciunt ac perornant; et quo magis in una, eo plus et in alia crescimus. Sapientia namque quæ donum est, et caritas, simul et æque crescere et decrescere nunc censentur.

Ut ergo summi Dei amore validius accendamus, in ejus contemplativa cognitione perfici enitamur. Quod ut fiat, nunc aliquid de Dei essentia, omnipotentia, sapientia, invariabilitate, perfectione, munificentia, operatione, quantum ipse præstiterit, referetur. Idque in primis patescit, quem-

admodum Deus sublimis et benedictus de suo nomine a Moyse interrogatus, responderit : Ego sum qui sum; hæc dices filiis

Israel, Qui est, misit me ad vos. Unde

concluditur, quod primum et proprium Dei nomen est Esse, seu Qui est, in tantum ut ipse solus esse dicatur. Cujus comparatione esse aliorum est tanquam non esse, propter infinitam excellentiam esse divini : quemadmodum respectu increatæ et infinitæ sapientiæ Dei, sapientia omnis mentis creatæ nullius momenti est; et

omnis lux atque potestas creaturarum, ad immensitatem lucis ac omnipotentiae Creatoris adorandi relata, obscuritas infirmitasque ostenditur. Esse ergo est primum et proprium Dei nomen, quoniam esse, tanquam pelagus infinitum, cetera quæ Deo adscribuntur, teste Damasceno, includit. Propter quod bene disseruit sanctus pater Bernardus, Dei electus : Quid est Deus? Qui est, seu ipsum esse. Nil enim competentius est æternitati, quæ est Deus. Si bonum, si magnum, si sapientem, si

Exod. III, 14.

Job XIV, 4.

beatum, si omnipotentem, vel quidquid tale de Deo dixeris, in hoc verbo instauratur, Qui est. Nempe hoc est ei esse, quod hæc omnia esse, et si centum aut mille talia addas, non recessisti ab esse; si ea dixeris, nihil divino esse addidisti; si ea non dixeris, nihil ei diminuisti. Itaque Deus excelsus et gloriosus est ipsum esse, utputa esse primum, independens, imparticipatum, interminatum, non coarctatum, non receptum, sed in se ipso subsistens, separatum, perfectum, in quo omnis essendi nobilitas, perfectio, beatitudo, cum infinita excellentia ac plenitudine, absque omni prorsus mensura et fine simplicissime continetur et est: ita quod ipsum esse divinum, in extrema simplicitate est omne istud; et omnia ista quæ uno nomine exprimere non valemus, sunt ipsum purissimum et supersimplicissimum esse Dei, et ipse Deus, in quo penitus idem sunt quod est et quod habet, quantum ad absoluta. Hinc solus Deus est ens per essentiam. De quo B. Hilarius subtiliter dixit: Esse non est accidens Deo, sed subsistens, C

Deinde, sicut esse, quod in se communissimum est, in sua plenitudine sumptum, est primum et proprium Dei nomen; sic convertibilia entis, videlicet verum, unum, bonum, in sua plenitudine sumpta, verissime ac propriissime competunt Deo altissimo, ita ut ipse sit primum verum, primum unum, primum bonum, imo veritas prima, unitas summa, bonitas infinita. Deinceps, quidquid, absolute loquendo, dignius et melius est inesse, adesse sive haberi, quam deesse, hoc vere et infinite competit Deo et est in eo, et ipsemet illud est. Idcirco in eo est, et ipse est, sapientia infinita, potestas immensa, beatitudo æterna; suæ pulchritudinis, suæ dulcedinis, suæ amabilitatis nullus est finis; opulentia et libertas, misericordia, justitia et liberalitas ejus nullo usquam termino clauduntur; voluptas et gloria, securitas, incommutabilitas et supersufficiens ejus circumscribi, compre-

A hendi, coarctari nullatenus queunt. Et breviter, ab ejus condigno præconio, ab ejus pleno obsequio, ab ejus cognitione plenaria deficimus in immensum; et hoc ipsum quod verbis de eo proferimus, mente capere, prout ipse in se ipso est, nequaquam valemus. Ideo ei cum profundissima humiliatione, summa reverentia, decenti admiratione, indesinenti et maxima diligentia, subdi, servire, adstare debemus, sincera quoque contemplatione ferventissimoque amore ei intendere ac uniri; nec tamen B quidquam condigni nos ei exhibere humillime fateamur.

Præterea, sicut in epistola hodierna Jacobus tangit apostolus, apud ipsum non est transmutatio, nec vicissitudinis obumbratio. Hæc namque imperfectionem includunt. Unde et Aristoteles subtilissime atque certissime in sua Metaphysica post longissimam inquisitionem probavit: Deus est purus actus, id est natura in se absolute perfecta, cujus est omnia movere, mutare, perficere, et a nullo moveri, mutari aut perfici, utputa sibi in se et per se summe et infinite sufficiens, nulloque indigens, quo cetera indigent universa: ideo movet, mutat et perficit ea, tanquam cunctorum principium et omnium finis, in quo nulla est potentia passiva limitans, nulla differentia contrahens, nulla materia coarctans. Idcirco vere et perfecte æternus est, incomprehensibilis et ignotus, utpote causam non habens, et in se invariabiliter, felicissime incircumscripibiliterque consistens, in quo nulla est vicissitudinis

Jacob. i, 17.

D obumbratio, id est nulla præteritio, nulla successio, nulla alternatio, ejus puritatem, invariabilitatem, perfectionem, beatitudinem aliquo modo obnubilans, violans seu obumbrans. Imo ipse solus habet immortalitatem, id est omnimodam incommutabilitatem, quum in ipso nulla sit volendi aut intelligendi successio, nullus actus recens, inceptio sive desitio; sed ipse tanquam superhonoratissimus intellectus, se ipsum et cetera cuncta uno, æterno ac simplicissimo videt et cognoscit intuitu, et

Ibidem.

1 Tim. vi, 16.

uno volendi actu vult omnia, nec actio sua a probis pavor et horror. Ab ipso averti est a sua diversificatur essentia.

Postremo, quum ipse sit primum ens, solum perfectum et infinitum, ab ipso universa fluxerunt, incessabiliterque dependent: imo eatenus indigent conservatione ipsius, quod nec ad momentum sine ejus mantenentia possint consistere aut durare. Ab ipso ergo manavit omne bonum naturæ, omne donum gratiæ, a quo solo omne donum gloriæ derivatur; ab ipso est ordo rerum et consistentia universi; ipse universa gubernat et omne sæculum administrat, omnia intuetur, et cuncta rectissime judicat. Cujus providentiam plenam et omnia distinctissime complectentem qui negaverunt, stulti facti sunt in sapientia sua; et eorum sapientia, stultitia maxima fuit. Sapientissimus Augustinus optime dixit: Deus est in se ipso sicut Alpha et Omega, in mundo sicut rector et auctor, in angelis sicut sapor et decor, in Ecclesia sicut paterfamilias in domo, in anima sicut sponsus in thalamo, in justis sicut adjutor et protector, in re-

probis pavor et horror. Ab ipso averti est cadere, ad ipsum converti, resurgere; in quo manere est vivere, a quo exire est mori; in quem redire est reviviscere, in quo habitare est perdurare. De quo et sanctus concionatur Bernardus: Quam dives es in misericordia, quam magnificus es in justitia, quam munificus in gratia, Domine Deus noster! Non est similis tibi, munerator copiosissime, remunerator æquissime, liberator piissime.

Igitur, juxta præhabita, Deum superdignissimum contemplemur, in ipso aciem mentis figere studeamus. Et quum tam incomparabiliter et immense ipse præ omnibus bonus, amabilis, speciosus, suavis, dives, pius, sanctus, felix et perfectus consistat, a quo etiam omne bonum profluxit, et quidquid habemus et sumus, accepimus, ipsum super omnia ferventer et incomparabiliter diligamus, omne bonum ei attribuamus, ipsum totis viribus colere, venerari, laudare nunquam cessemus, in ipso stabiliri, roborari atque immobiles fieri semper conemur.

SERMO QUINTUS

DE MODERAMINE IN LOQUENDO ET OBSERVATIONE SILENTII.

SIT autem omnis homo velocæ ad audiendum, tardus autem ad loquendum, et tardus ad iram. Jacob. I, 19.

Inter præcipua ad quæ in libris Sapientialibus admonemur et erudimur, est ut linguam suam unusquisque refrenet, et non nisi utilia suo loco ac tempore moderanter loquatur. Quemadmodum enim ex linguæ irrefrenatione innumerabilia et enormia mala sequuntur, ita ex linguæ coercitione et moderatione loquelæ, bona sequuntur innumera, magna et valde salubria. Nec solum cavenda sunt verba illicita, pungitiva, detractoria, turbativa, men-

dosa, sed etiam certis ex causis, quibusdam in locis et determinatis temporibus a bonis abstinendum est verbis, juxta illud Psal-

mi: Obmutui, et humiliatus sum, et silui a bonis. In Ecclesiastico quoque habetur: ^{Ps. xxxviii,} ^{3.}

Ubi non est auditus, non effundas sermonem. Denique, sicut loquacitas stultitiæ ^{Eccle. xxxii,} ^{6.}

signum est, Salomone dicente, Stultus verba multiplicat; et, Totum spiritum suum ^{Eccle. x,} ^{14.}

profert stultus: sic taciturnitas circum- ^{Prov. xxix,} ^{11.}

specta, magnæ sapientiæ exstat indicium, quemadmodum conscriptum est, Qui moderatur labia sua, prudentissimus est. Un-

de sanctus Job loquacioribus dixit: Utinam ^{Ibid. x,} ^{19.} ^{Job xiii,} ^{5.}

taceretis, ut putaremini sapientes. Merito A ergo in hodierna epistola beatissimus Jacobus monet apostolus ut ad loquendum tardus sit omnis homo. Nam et Salomon loquitur : Vidisti aliquem velocem ad loquendum? Stultitia magis speranda est, quam illius correctio. Præterea, tanta virtus est linguam reprimere moderateque loqui, ut in Evangelio dicat Salvator : Ex ore tuo justificaberis, et ex ore tuo condemnaberis. Hoc est quod Salomon ait : De fructu oris sui unusquisque replebitur bonis.

Quæ omnia quum ita se habeant, rationabilissime ac saluberrime sancti Patres instituerunt ut religiosi servant silentium, nec sine licentia audeant loqui etiam verba utilia. Statuerunt quoque observationem silentii, inter regulares observantias post tria vota inter præcipuas unam. Nec fractionem silentii, modicam culpam seu inordinationem aut transgressionem reputaverunt : quod hinc potissimum innotescit, quoniam fractionem silentii tam specialiter puniendam esse sanxerunt, ut scilicet fractor silentii culpam suam in proximo clamet capitulo, detractisque ex humero vestibus, prostratus suscipiat disciplinam ; quum utique non nisi pro gravibus valde sceleribus soleant rei in sæculo taliter flagellari, nec pro aliis passim culpis, quamvis in religione notabiliter magnis, ita determinatæ sunt a sanctis Patribus communiter pœnæ, aut pœnæ tam magnæ. Fuit itaque beatorum intentio Patrum nostrorum, ut observationi silentii diligentem ac fervidam impendamus custodiam.

Hinc in Regula ait Benedictus : Faciamus quod ait Propheta : Dixi, Custodiam vias meas, ut non delinquam in lingua mea, etc. Si ergo a bonis eloquiis interdum propter taciturnitatem debet taceri, quanto magis a malis verbis propter pœnam peccati debet taceri? Ergo, quamvis de bonis et sanctis ædificationum eloquiis, perfectis discipulis propter taciturnitatis gravitatem rara loquendi concedatur li-

centia, quoniam scriptum est : In multiloquio non effugies peccatum ; et iterum, Mors et vita in manibus linguæ. Nam loqui et docere decet magistrum, tacere et audire discipulo convenit. Eccē quemadmodum, secundum doctrinam sanctissimi Benedicti, rara loquendi licentia danda est etiam perfectis discipulis, quamvis non nisi de sanctis et ædificatoriis velint loqui. Nam ipsa loquacitas et collocutio Fratrum frequens, religionis derogat gravitati. Hinc rursus in Regula : Omni (inquit) tempore

B silentio debent studere monachi, maxime tamen nocturnis horis et post Completorium. Quod si inventus quis fuerit prævaricari taciturnitatis hanc regulam, graviori vindictæ subiaceat, nisi forte abbas alicui aliquid jusserit : quod tamen cum summa gravitate et moderatione honestissime fiat.

Insuper gloriosus Hieronymus dicit in Regula sua : Religio sancta in loquacibus esse non potest. Ex hoc enim sancti Patres in eremo edocti, summa cum diligentia observant sancta silentia, tanquam sanctæ contemplationi necessaria. Plures me reperisse non ambigo, qui per septennium nullum prorsus verbum alteri fuderant. Propterea volo ut in conventu vestro ter aut pluries in hebdomada, exceptis festivitibus, loqui omnino, nisi urgente causa perutili ac necessaria, nullatenus liceat, nec simul nec cum aliis extra. Diebus vero quibus pro remedio et salute loqui conceditur, non singulis horis vacandum est verbis, quæ sine peccato proferri vix possunt. Sed hæc inviolabilis observatio vigeat, quod singulis noctibus post peractam Completorii horam usque post Missam, et a Tertiis usque ad Nonam, sacra observentur silentia, quibus et linguæ Deum laudandi concedatur opportunitas, et inutilia verba penitus abscindantur. In choro autem, dormitorio, coenaculo et capitulo omni tempore loqui non liceat, nisi ea ad quæ ordinata sunt loca in laudibus Dei, ut jam et tempus et locus vestræ religionis prædicent sanctitatem, atque loquacibus ingerant compunctionem, aliosque inflam-

Prov. xxix,
20.

Matth. xii,
37.

Prov. xii,
14.

Ps. xxxviii,
2.

Prov. x, 19.

Ibid. xviii,
21.

ment ad intrandum vestram religionem. A

Deinceps de observantia et commendatione silentii, de loquacitatis vituperio, de culpa fractionis silentii plura hic possent commemorari, quæ infra congruis locis, Deo agente, introducentur.

Præterea, quam tardi esse debemus ad loquendum, tam prompti et veloces esse debemus ad audiendum verba salutis, præsertim a superioribus, sapientioribus et melioribus. Siquidem auditio diligens verbi Dei intellectum illuminat, voluntatem accendit, animum roborat, et reficit mentem, et purgat a vitiis animum; estque signum probabile prædestinationis divinæ. Cordis quoque duritiam frangit; et signum est indolis bonæ et humilis, studiosæ ac docilis animæ, quum scriptum sit in Ecclesiastico : Auris bona cum omni concupiscentia audiet sapientiam. Unde in epistola ista Jacobus loquitur : Abjicientes omnem immunditiam et abundantiam malitiæ, in mansuetudine suscipite insitum verbum, quod potest salvare animas vestras.

Postremo, juxta doctrinam sancti hujus Apostoli, simus tardi ad iram, præsertim quum ira ex suo genere inter mortalia collocetur peccata. Ira namque mentem obtenebrat, confundit, perturbat, et hominem stulto ac furenti similem reddit. Unde et Salomon ait : Ne sis velox ad irascendum, quia ira in sinu stulti requiescit. In libro Job quoque asseritur : Virum stultum interficit iracundia. Ira etiam so-

ciali ac pacificæ conversationi contrariatur, redditque hominem fratribus gravem et ad portandum difficilem, Salomone testante : Spiritum ad irascendum facilem quis poterit sustinere? Itemque : Ira non habet misericordiam, nec erumpens furor; et impetum concitati spiritus ferre quis poterit? Passionem ergo tam pessimam refrenemus : quod cholericiis summe est necessarium. Qui Deum jugiter invocando, Christi passionem, patientiam, mansuetudinem intuendo, Scripturarum doctrinam considerando, discant iræ commotionem reprimere; et ne appareat in facie, nec per verba erumpat, et maxime ne diu duret aut in ultionem procedat.

Itaque ex prædictis studeat religiosus, in observatione silentii esse custoditus ac diligens, sciens quod vir linguosus non dirigitur in terra, et quod qui multis utitur verbis, lædit animam suam; et quum loquendi datur licentia, nihilo minus se ab omni illicito refrenet sermone. Hinc consuetudo pravissima faciliter et sine necessitate ac utilitate loquendi verba pauca, prorsus abjiciatur, quum omnis oratio intelligibilem habens sensum, sine licentia dicta, fractio judicetur silentii, ut si dicatur, Quis est ille? quamvis necessitas frangat legem; sed quæ sit vera sufficiensque necessitas, rite pensetur.

Verum de ista materia, in sermone circa dominicæ sequentis epistolam diffusior erit declaratio hujus, et exhortatio circa ista.

SERMO SEXTUS

QUALITER SPIRITUS SANCTUS PER PATRES ARGUIT NEGLIGENTES RELIGIOSOS.

PARACLETUS arguet mundum de peccato, et de justitia, et de judicio. Joann. xvi, 8.

Quemadmodum paracletus Spiritus San-

ctus, protinus ut infusus est in die Pentecostes beatis Apostolis, cœpit per eos mundum arguere, et homines peccatores in mundo hoc habitantes increpare de pec-

cato quod committendo aut omittendo incurrerunt, et de justitia quam facere neglexerunt, id est de contemptu et omissione atque de falsa et ficta eorum justitia, et de judicio eorum temerario, præsumptuoso, mendoso; sic Spiritus Sanctus, qui verus est Deus, quum spiritualium patrum religiosorum præsentium, zelum Dei sincere habentium, impleverit corda, mox per eos increpat Fratres negligentes, carnales, dissolutos, de eorum peccatis. Qui non regu-

Ephes. iv,
3.

Coloss. i,
10.

lariter conversantur, nec inveniuntur solliciti servare unitatem spiritus in vinculo pacis, nec satagunt digne Deo ambulare juxta suæ exigentiam vocationis. Qui in divinis sunt somnolenti, pigri, vocibus suis parcentes, se ipsos palpantes, in angelorum præsentia, in conventus adspectu, imo in divinæ et summæ majestatis intuitu se irreverenter, intemperate, indevote habentes. Qui utinam rite perpenderent illud propheticum : Maledictus qui facit opus Dei negligenter.

Jer. xlviii,
10.

Consideremus quam attoniti et attenti, quam solertes ac reverentes stant coram regibus principibusque terrenis eorum ministri et milites, quam profunde inclinant, quam prompte, facete, ordinate deservunt, quam custodite et compe loquuntur. Quantam ergo irreverentiam exhibemus Deo, infinitæ excellentiæ regi, quum in ejus laudibus et obsequiis, in cantu et psalmodia ac Horis, in loco tam sancto, in Sacramenti præsentia, tam remisse, frigide et superficialiter nos habemus, oculos cordis ad Creatoris sublimitatem intuendam ac debite honorandam non elevantes? Iheu, quanta est ista perversitas! Nonne carnalis magis quam spiritualis amor abundat in his qui in colloquio, in refectorio, in spatiamiento fortes et alacres sunt ad fabulandum, ad comedendum, ad externa solatia, in divinis vero se habent quasi essent inuncti infirmi, et penitus impotentes? Videant sibi qualiter suam mereantur annonam. Verumtamen ultra posse Deus nil exigit; sed multa possumus in confortante nos Domino, quæ sine gratia non valemus. Si esset

A in nobis spiritualis fervor, sancta devotio, vigilantia cordis, confidentia divini auxilii, experiremur quam facilia et jucunda nobis existerent quæ nobis jam impossibilia arbitramur. Excutiamus ergo torporem, pusillanimitatem et vanam formidinem, invocemusque Dominum; et quod in nobis est faciamus, atque in ceteris religiosis observantiis simus ferventes. Ipsas quoque increpationes quas per Patres nostros facit nobis Spiritus Sanctus, patienter, gratanter et cum ingenti advertentia suscipiamus, et quilibet efficaciter se emendet : quoniam teste Scriptura, Qui acquiescit increpationibus, possessor est cordis; qui autem abjicit disciplinam, despicit animam suam. Et rursus in Ecclesiastico scriptum est : Quam bonum est arguere, quam irasci! Quam bonum est correptum manifestare pœnitentiam! Sic enim effugiet peccatum.

Prov. xv,
32.

Eccle. xx,
1, 4.

Præterea, quoniam non est homo super terram qui faciat bonum et non peccet, sed in multis offendimus omnes, et justus septies cadit in die, imo universæ nostræ justitiæ sunt quasi pannus menstruatus : ideo spiritualis pater nemini parcat, neminem palpet; nec quisquam se irreprehensibilem arbitretur, aut de increpatione sua aliquatenus indignetur, quia hoc pessimum esset, et magnæ imperfectionis indicium, magnæ impatientiæ et insipientiæ signum, quum Salomon protestetur : Argue sapientem, et diliget te. Ecclesiasticus quoque fatetur : Qui odit correptionem, vestigium est peccatoris; qui autem timet

Eccle. vii,
21.

Jacob. iii, 2.
Prov. xxiv,
16.
Is. lxiv, 6.

Prov. ix, 8.

Eccle. xxi,
7.

D Deum, convertetur ad cor suum, hoc est, propriam fragilitatem, defectuositatem et vocationem suam attendit, nec indignabitur corripienti, sed gratias aget. Verum sunt aliqui non illuminati, sed privato amore potius excæcati, simulatorie justii, occulte superbi, qui dum corripiuntur, volunt quasi honorem suum defendere, quia in aliorum cordibus verentur vilescere, et defectuosi ac contemptibiles renuunt apparere : sicque se ipsos excusant, jactant, justificant, clamorose, im-

patienter, arroganter respondent, non attendentes, miserrimi, quod taliter sese habendo, non solum Deo et angelis, sed et spirituali patri ac Fratribus cunctis vilescant, coram quibus vitiositatem et stoliditatem suam tam evidenter demonstrant. Qui si patienter, sapienter et humiliter responderent, seque modeste, si innoxii essent, causa vitandi scandali excusarent, aut si culpa modica esset, dissimularent, crescerent utique in audientium corde, et vere honorabiles reputarentur. Hi igitur se emendent, atque in vera humilitate, et B fractione propriæ voluntatis, ac exstirpatione privati amoris, totam suam conversationem stabiliter fundent, ut assimilentur viro sapienti qui ædificavit domum suam supra petram, non stulto qui ædificavit super arenam.

Matth. vii,
24, 26.

Insuper Spiritus Sanctus per superiores nostros arguit nos de justitia quam imple-re negleximus. Nam Deo honorem, proximis ædificationem, nobis ipsis custodiam jugem tenemur. Si ergo prælatus viderit quempiam coram aliis in exemplariter se C habentem, pusillos scandalizantem, non recta ac regia via pergentem, protinus contra illum, imo pro eo, zelo accendatur justitiæ, et arguat eum, informet, hortetur, ut juxta apostolica documenta, quæ pacis sunt sectetur, et quæ ædificationis sunt diligenter custodiat, memor sententiæ Salvatoris : Væ homini per quem scandalum venit; et qui scandalizaverit unum de pusillis, expedit ei ut alligato ipsius collo saxo mergatur. Quod si tam damnabile est unum scandalizare pusillum, quam damnabile et enorme est coram communitate agere scandalose ac plurimos scandalizare? Qui ergo publice ac graviter peccat, manifeste et acriter arguatur; et nisi emendaverit, durius castigetur.

Rom. xiv,
19.

Matth.
xviii, 7, 6.

Denique, juxta Bernardum, tribus existimus debitores, videlicet superiori, æquali, inferiori. Superiori reverentiam et obedientiam, æquali, utputa proximis, consilium atque auxilium, inferiori disciplinam custodiamque tenemur. Superiori ergo,

Aputa prælato, reverentiam cordis ac corporis et obedientiam caritativam ac promptam exhibeamus; confratribus consilium et auxilium præbeamus, verbis dum licet loqui hortando et instruendo, oratione juvando, seu alias modo possibili ministerium exhibendo. Quocirca ait Bernardus: Nullum ego consilium arbitror melius quam si exemplo tuo fratrem tuum docere studeas quæ oporteat et quæ non oporteat fieri, provocans eum ad meliora et consulens non verbo neque lingua, sed opere et veritate; sed neque efficacius auxilium est quam ut ores devote pro eo, ut non dissimules redarguere culpas ejus, ut nullum ei offendiculum ponas, et quantum prævalet, sollicitus sis, tanquam angelus pacis, scandala tollere et occasiones scandalorum penitus remove. Si talem te fratri tuo consiliarium et auxiliarium exhibes, reddis ei quod debes, nec habet unde causetur. Porro qui alicui præest, disciplinam ei tenetur atque custodiam, quia de manu ejus, pereuntis subditi exquiritur sanguis, si quod sui est officii illi neglexerit exhibere. Si vero aliis non præsis, proprio corpori, sensualitati et sensibus tuis disciplinam custodiamque impende, ut corpus tuum castiges, in servitutem animæ redigas, ne regnet in eo peccatum; sensualitas quoque dometur, et sensitivus appetitus rationi subdatur; et exteriores sensus custodiantur, ne circa sua inordinate oblectentur, evagentur lasciviantque ob-jecta.

Præterea diligentissime perpendamus D quod in præsentī evangelio ait Salvator Apostolis: Si non abiero, Paracletus non veniet ad vos; si autem abiero, mittam *Joann.* xvi, 7. eum ad vos. Cujus rei, secundum doctores, una fuit causa: quia Apostolorum ad Christum cum eis corporaliter conversantem affectio fuit aliququaliter sensualis, non penitus spiritualis. Idcirco, stante hujusmodi affectione et causa ipsius, capaces non erant Spiritus Sancti in tanta plenitudine, in quanta eum post Christi acceperunt recessum. Si ergo sensualis affectio

ad Unigenitum Dei, ad verum Deum carne indutum, ad Agnum sine macula, ad carnem mundissimam ex purissimis sanctæ Virginis sanguinibus sumptam et Spiritu Sancto formatam, impeditiva fuit spiritualis perfectionis et plenæ susceptionis Spiritus Sancti, quam ineffabiliter carnalis et sensualis affectio ad fragiles defectuososque homines, ad sordidum corpus in peccatis conceptum, natum, nutritum, spirituales tollit profectum, et omnem impedit perfectionem? Mirabiliter quippe carnalis affectio trahit atque obnubilat mentem. Propterea esse solliciti caveamus, et omnem ipsius occasionem et causam vitemus, incautum fugiendo adspectum et tactum, amplexus et oscula, lateralem assessionem, et universam hujusmodi provocationem, ex quibus etiam de facili mortalis oritur culpa, præsertim dum serpens tenetur et fovetur in gremio. Unde omnia talia religiosi sunt summe vitanda, qui non solum ad meliorem, sed demum ad securiorem obligati sunt viam: idcirco nequaquam discrimini se committant.

Postremo, immensam pietatem et liberalitatem Spiritus Sancti instanter ac fervide deprecemur, ut sua nos unctione in omnibus edocere, dirigere, conservare dignetur, quum tot casus, tot involutiones, tot ambiguitates, difficultates et tentamenta indesinenter nobis occurrant, ut absque ipsius speciali eruditione, directione, subventionem, evadere, prævalere atque salvari nullatenus valeamus. Ideo ait vir sapiens: Quis hominum poterit scire consilium Dei? *Sap. ix, 13.* aut quis poterit cogitare quid velit Deus? Cogitationes enim mortalium timidæ, et incertæ sunt providentiæ nostræ. *Ibid. 14, 17.* Sensus autem tuum, Domine, quis sciet, nisi tu dederis sapientiam, et miseris Spiritum tuum de cœlis? Denique, quid oremus sicut oportet, nescimus; sed ipse Spiritus *Rom. viii, 26.* postulantes nos facit idoneos. Nec aliquis *I Cor. xii, 3.* potest dicere, Dominus Jesus, nisi in Spiritu Sancto. Nec sufficientes sumus cogitare aliquid ex nobis quasi ex nobis, sed sufficientia nostra ex Deo est. Ecce quam infinita est indigentia, impotentia, defectuositas nostra. Humiliemur igitur sub *I Petr. v, 6.* potenti manu Dei, et ejus benignissimo indesinentissimoque subsidio incessabiliter innitamur. Ad laudem et gloriam ejus. Amen.

DOMINICA QUINTA POST PASCHA

ENARRATIO IN EPISTOLAM

ESTOTE FACTORES VERBI, ET NON AUDITORES TANTUM, FALLENTES VOSMETIPSOS. Jacob. I, 22-27.

BEATUS apostolus Jacobus in tota epistola ista hortatur nos ad divinorum observantiam præceptorum, ne quis putet solam fidem sufficere, aut solam notitiam agendorum. *Estote factores verbi*, id est divini præcepti, *et non auditores tantum, fallentes vosmetipsos* : quia qui audiunt tantum, nec faciunt quæ jubentur quum

Rom. II, 13.

Luc. XI, 28.

Apoc. I, 3.

Luc. XII, 47, 48.

Jacob. IV, 17.

manos loquitur Paulus : Non auditores legis justi sunt apud Deum, sed factores legis justificabuntur. Christus quoque quum dixisset, Beati qui audiunt verbum Dei, addidit, Et custodiunt illud. Et Joannes in Apocalypsi : Beatus (inquit) qui legit et qui audit verba prophetiæ hujus, et servat ea quæ in ea scripta sunt. Imo de scientibus et non facientibus loquitur Christus : Servus qui cognovit voluntatem domini sui et non fecit, plagis vapulabit multis ; qui autem non cognovit, et fecit digna plagis, vapulabit paucis. Unde et idem iste Jacobus ait : Scienti bonum et non facienti, peccatum est illi.

Quia si quis auditor est verbi divinæ jussionis, *et non factor*, id est præcepti impletor, *hic comparabitur viro consideranti vultum nativitatis suæ*, id est faciem suam corporalem in qua natus est, *in speculo*. Consideravit enim se in sua imagine, in speculo resultante, *et abiit, et statim oblitus est qualis fuerit* : quia imago in speculo habet debile esse, ut puta

A intentionale potius quam reale. Ideo non facit fortem impressionem, nec diuturna est memoria ex illa impressione ac consideratione relictæ. Quemadmodum ergo consideratio illa vultus in speculo est infructuosa, ita auditio verbi Dei carens effectu.

Qui autem perspexerit, hoc est, perfecte et profunde consideraverit, *in lege perfectæ libertatis*, id est in evangelica lege, pensando ejus præcepta. Dicitur autem lex evangelica, lex perfectæ libertatis : Primo, quia est lex caritatis et gratiæ, per quam homo sponte et libere ac delectabiliter servit Deo. Porro lex vetus fuit lex timoris, nec gratiam continebat, sed transgressores suos jussit occidi : sicque timore pœnarum, non amore justitiæ, induxit ad bonum. Propterea dicit apostolus Paulus : Nihil ad perfectum adduxit lex ; et rursus, Non accepistis spiritum servitutis iterum in timore, sed accepistis spiritum adoptionis filiorum, in quo clamamus, Abba (Pater). Lex autem evangelica dicitur gratiam

Hebr. VII, 19.
Rom. VIII, 15.

C continere, quoniam sacramenta novæ legis gratiam continent et dant. — Secundo, quia per eam liberamur ab obligatione servandi veterem legem, quæ fuit grave et importabile onus. Unde in Actibus, quum beatissimus princeps Apostolorum dixisset, Quid tentatis cervicibus discipulorum imponere jugum, quod neque patres nostri, neque nos portare potuimus? protinus addidit : Sed per gratiam Domini nostri

Act. XV, 10, 11.

Jesu Christi credimus salvari. — Tertio, A quia per ejus impletionem eripimur a servitute peccati et jugo diaboli. De qua libertate ait Salvator : Si Filius vos liberavit, vere liberi estis. Hæc est spiritualis libertas de qua asserit Paulus : Ubi spiritus Domini, ibi libertas. — *Et permanserit in ea*, perseverando in bonis usque in finem, *non auditor obliviosus factus, sed factor operis* quod lex evangelica fieri jubet : *hic beatus in facto suo erit*, id est, merito operis sui et obedientiæ beatitudinem consequetur ; et jam beatus est in merito et spe, postea erit beatus in præmio et re. Idecirco Christus testatur : Si hæc scitis, beati eritis si feceritis ea.

Joann. viii,
36.

II Cor. iii,
17.

Joann. xiii,
17.

Denique non sufficit corde credere et facto parere, sed oportet et linguam frenare. Ideo subditur : *Si quis autem putat se religiosum esse*, id est Dei ministrum et ejus cultui deditum, utputa veraciter christianum, *non refrenans linguam suam* a verbis mendosis, perjuriis, detractoriis, pungitivis, seu alias contra caritatem sive justitiam existentibus, *sed seducens cor suum*, id est propria loquacitate et culpa mentem suam excæcans et luce gratiæ privans, ita quod ea quæ propriæ salutis sunt, efficaciter non perpendit, *hujus vana est religio*, id est, fides seu lex, sive Christianitatis suæ professio, est inanis : non quod lex aut fides in se ipsa sit vana, sed quoniam ei non cooperatur ad salutem, nec ad ultimum finem perducit, sicut et medicina fertur inanis, quæ sanitatem non confert.

Præterea advertendum, quia ut scribit D Thomas in secunda secundæ, quæstione octogesima prima, Religio dicitur a relegendo, quoniam ea quæ ad divinum pertinent cultum, frequenter sunt relegenda et animo revolvenda. Vel dicitur religio a reeligendo, quoniam Deum quem peccando reliquimus, per eam reeligimus nobis ; vel a religando, quia per religionem ab exterioribus rebus nos religamus seu sequestramus, atque divino cultui mancipamus. Sicque religio ordinat hominem ad Deum,

estque idem quod latria, utputa virtus Deo cultum ac cærimoniam exhibens. Et habet religio duplices actus, videlicet : proprios quos elicit, ut sunt adorare, sacrificare, vovere ; et secundarios quos non elicit, sed imperat, qui procedunt a virtutibus quibus religio tanquam principalior præcipit. De quibus actibus subditur, Religio munda et immaculata, etc.

Albertus quoque hic ait : Religiosus idem designat quod religatus. Sed religatio ista potest attendi : Primo, quantum ad observantiam mandatorum articulorumque fidei : et sic omnes Christiani dicuntur religiosi. Unde Constantinus Magnus, Theodosius et Carolus rex vocati sunt religiosissimi, id est christianissimi ac devotissimi imperatores. Secundo potest attendi quantum ad observantiam evangelicorum consiliorum : et ita claustrales qui se divinis per solennem adstrinxerunt professionem obsequiis, antonomastice religiosi vocantur, quasi divinis totaliter mancipati. Ad quos etiam specialiter pertinet refrenatio linguæ, quia ad observantiam obligantur silentii : quod si facile frangunt et loquaces consistunt, vana et vituperanda censetur eorum religio, id est professio qua Ordinem suum servare voverunt, nec suæ satisfaciunt professioni, proficiendo quotidie sicut monastica requirit professio. — Unde quod dictum est, « Si quis putat se religiosum esse », etc., sic potest appropriate exponi : « religiosum », id est latriæ actibus deditum, seu divino obsequio mancipatum, aut monasticam vitam professum, « non refrenans linguam suam, hujus vana est religio », id est, virtutem latriæ non habet veraciter, vel non habet eam formatam, hoc est caritate et actibus bonis ornatam : ideo vana est ei, id est, frustra eam sortitur.

Deinceps ostendit apostolus Jacobus quæ opera ad religiosum pertineant, loquendo de religione extense seu primo modo. *Religio munda*, id est sincera quantum ad rectam intentionem, *et immaculata apud Deum et Patrem*, id est in executione a

peccato mortali immunis. Et potest per religionem intelligi latria seu christianæ legis professio, non autem monastica professio proprie, in hoc loco, ut sequentia verba ostendunt. Nam subditur: *Hæc est: Visitare pupillos*, id est patrum solatio destitutos, *et viduas*, maritorum carentes præsidio, *in tribulatione eorum*, succurrendo eis in cunctis pro posse, quia miserabiles sunt personæ, et specialiter egent juvamine. Et per istud intelligenda sunt alia opera misericordiæ, quæ ad Christianos potissimum pertinent, quoniam lex Christi est lex totius caritatis et pietatis. Quæ etiam opera pietatis tam grata sunt Christo, ut quæ suis pauperibus exhibentur, sibi exhibita arbitretur ac fateatur, dicendo: Quod uni ex minimis meis fecistis, mihi fecistis. *Et immaculatum se custodire ab hoc sæculo*, id est vitia sæcularium hominum præca-

Matth. xxv,
40.

vere, neque ea quæ mundi sunt inordinate appetere, nec aliquem scandalizare, sed omnes potius ædificare. Unde et Paulus hortatur: Exite de medio eorum, et immun- dum ne tetigeritis; itemque, Nolite (inquit) conformari huic sæculo, sed reformamini spiritu mentis vestræ. Et per istud intelliguntur omnia exercitia virtuosa, quibus homo perficitur in bona vita circa se ipsum.

II Cor. vi,
17.
Rom. xii, 2;
Ephes. iv,
23.

Postremo, secundum Bedam, in auctoritate hac pulchre additur, « apud Deum et Patrem », quia sunt qui hominibus religiosi videntur, quum a Deo habeantur profani. Unde et Salomon fassus est: Est via quæ videtur homini bona; novissima vero ejus deducunt ad mortem. De talibus ait Salvator: Vos estis qui justificatis vos coram hominibus; Deus autem novit corda vestra, quia quod hominibus altum est, abominatio est apud Deum.

Prov. xiv,
12.

Luc. xvi, 15.

SERMO PRIMUS

DE LEGE CHRISTI SERVANDA, LINGUA COHIBENDA, ET CARITATE PROXIMIS IMPENDENDA.

NON omnis qui dicit mihi, Domine, Domine, intrabit in regnum celorum, sed qui facit voluntatem Patris mei qui in cælis est. Matth. vii, 21.

Hæc sunt verba Christi. Ex quibus patet, quod Deum verbis laudare et operibus inhonorare non sufficit ad salutem; nec sufficit nuda Dei cognitio, sed exigitur obedientialis subjectio, hoc est divinorum impletio præceptorum, sicut ait Salvator: Si vis intrare ad vitam, serva mandata. Immo scientia absque virtutibus est magis stultitia quam scientia appellanda. Hinc ait Gregorius Nazianzenus: Prima sapientia, est vita laudabilis et pura mens apud Deum; et illa sapientia vera et clara est, non quæ in verbis volat, sed quæ in virtutibus constat. Hinc quoque in Job habetur: Ecce timor Domini, ipsa est sapien-

Matth. xix,
17.

Job xxviii,
28.

tia; et recedere a malo, intelligentia. In Ecclesiastico quoque: Plenitudo sapientiæ, timere Deum. Quæ de filiali timore sunt accipienda: non quod sapientia sit essentialiter timor Domini filialis, castus et sanctus; sed inseparabiliter ei conjungitur, loquendo de sapientia salutari, quæ est unum de septem donis Spiritus Sancti. Salubriter ergo hortatur apostolus Jacobus, ut simus factores verbi divini, et non auditores dumtaxat. Sed, heu! multi sunt vani et stolidi qui cupiunt multa scire, non ut virtuose vivant et Deo complacent, sed ut hominibus videantur sapientes et docti, et honorentur, ac temporalia lucra acquirant, ac delicatius vivant. Isti sunt miseri vehementer, perversi et excæcati, quos propria inflat et excæcat scientia, nec intuentur neque advertunt sua

Ecclesi. i, 20.

Jacob. i, 22.

pericula. Quorum unicuique apud Isaiam A
Is. XLVII, 10. dicitur : Sapientia tua et scientia tua de-
 cepit te. Ideo dicit Gregorius Papa : Sum-
 ma cura providendum est, ne accepta
 sapientia dum ignorantiae tenebras illu-
 minat, lumen humilitatis tollat, et jam
 esse sapientia nequeat, quæ etsi locutio-
 nis virtute fulgeat, elationis tamen vela-
 mine cor loquentis obscurat.

Præterea, juxta beati Jacobi documen-
Jacob. 1, 25. ta, qui in evangelica lege perseveranter
 obediens manserit, in suis beatus erit ope-
Ps. LXXI, 13. ribus. Nam Deus reddit unicuique juxta B
 opera sua. Christiani autem præ ceteris
 populis ad evangelicæ legis fidelem obser-
 vantiam obligantur : Primo, ex parte legis-
 latoris. Videmus enim in sæculo isto, quod
 quanto præceptor et legislator est major
 ac dignior, tanto diligentius oportet ejus
 præceptum seu legem implere, imo et tan-
 to gravius est ejus jussionem contemnere
 aut violare. Magis namque enorme est non
 obedire regi, quam ballivo. Quum ergo
 præceptor ac legislator Christianorum, a
 quo evangelica lex immediate collata est,
 sit Christus unigenitus Filius Dei Patris,
 verus incarnatusque Deus (cujus auctori-
 tas et dignitas secundum quod Deus est,
 est penitus infinita; auctoritas quoque et
 dignitas ejus creata, omnium ceterorum
 auctoritatem et dignitatem vehementer
 transcendit), constat quod Christiani val-
 de diligenter teneantur implere evangeli-
 cam legem et Christi præcepta, etiam am-
 pliùs quam tenebantur Judæi in veteri
 lege, legem Moysis observare. Quamvis
 enim lex illa fuit a Deo, non tamen col-
 lata atque proposita est populo Israelitico
 immediate ab eo; sed per angelos data est
 Moysi, et per Moysen populo. Unde et in
Act. VII, 53. Actibus S. Stephanus dixit Judæis : Ace-
 pistis legem in dispositione angelorum, et
 non custodistis. Hinc ad Hebræos scribit
Hebr. X, 28, 29. Apostolus : Irritam quis faciens legem
 Moysis, sine ulla miseratione, duobus aut
 tribus testibus moritur : quanto magis pu-
 tatis deteriora mereri supplicia, qui Fili-
 um Dei conculcaverit, et sanguinem testa-

menti pollutum duxerit, et spiritui gratiæ
 contumeliam fecerit? Hinc quoque Sar-
 raceni despiciunt Christianos, et dicunt
 eos pravissimos, eo quod legem a Christo
 summo propheta acceperint, nec tamen
 custodiunt eam. Et revera malorum Chri-
 stianorum pœna est gravissima in inferno,
 multoque gravior quam infidelium pœna.

Secundo, tenentur Christiani ad tam di-
 ligentem evangelicæ legis observantiam, ex
 parte ipsius legis, quæ multo facilius po-
 test impleri quam poterat lex Moysis, præ-
 sertim quoniam jugum Christi suave est
 et onus ejus leve, ut ipsemet asserit. Evan-
Matth. XI, 30. gelica quoque lex gratiam confert per ec-
 clesiastica sacramenta : et sic multa habet
 atque impendit subsidia ad observantiam
 sui. Sed et tempore isto Deus specialiter
 promptus est gratiam copiosam tribuere :
 unde tempus evangelicæ legis, tempus gra-
 tiæ appellatur. Hinc quanto hæc lex faci-
 lius potest impleri, tanto damnabilius vio-
 latur.

Tertio, tenentur Christiani ad hoc ex
 parte beneficiorum Dei, quæ eis a Chri-
 sto et per Christum impensa sunt. Jam
 enim pro eis unigenitus Filius Dei incar-
 natus, in mundo hoc conversatus ac cru-
 cifixus est; ecclesiastica sacramenta eis
 largitus est, potissimum Eucharistiæ sa-
 cramentum, Spiritus Sancti charismata li-
 beralissime dedit, innumerabilia quoque
 miracula per se ac suos ministros peregit.
 Tot ergo et tantis beneficiis esse ingra-
 tum, enormiter auget culpam inobedien-
 tiæ Christianorum.

D Quarto, tenentur ad idem, saltem de
 congruo, ex parte præmii observantiæ hu-
 jus legis, quæ suis perfectis observatori-
 bus, statim dum egrediuntur de corpore,
 dat felicitatem æternam, a qua sancti
 veteris Testamenti, et qui ante fuerunt,
 diu retardabantur. Hinc itaque ferventes,
 diligentes ac timorati simus ad custodi-
 endum legem et præcepta Domini nostri
 Jesu Christi.

Insuper, juxta doctrinam apostoli Jaco-
 bi, studeat unusquisque Christianus lin-
Jacob. 1, 26.

guam suam a verbis illicitis refrenare : **A** et pietate consistit, secundum Ambrosium. quia ut ait Apostolus, Corruptunt bonos mores colloquia mala. Nempe, quam necessaria sit ista refrenatio linguæ, constat ex eo quod de omni verbo otioso reddituri sunt homines rationem in die iudicii. Salomon quoque ait : Stultus verba multiplicat. Unde constat quod fatuum sit verba sine rationabili causa multiplicare. Hinc iterum loquitur : Qui custodit os suum et linguam suam, custodit ab angustiis animam suam; et, Qui moderatur labia sua, prudentissimus est. Qui autem multis utitur verbis, lædit animam suam, ut in Ecclesiastico legitur. Psalmista quoque fateatur : Vir linguosus non dirigetur in terra. Denique ex incustodia linguæ incidit homo in infinita ac gravia valde peccata. Unde **Jacobus** : Universitas (inquit) iniquitatis lingua constituitur in membris nostris. Propter quod Hugo de S. Victore notabiliter loquitur : Lingua dicitur, quia lingit adulando, mordet detrahendo, occidit mentiendo; labitur et fallit. Labitur ut anguilla, penetrat ut sagitta; tollit amicos, multiplicat inimicos, movet rixas, seminat discordias; uno ictu multos percutit atque interficit; blanda est et subdola, lata et parata ad exhaustiunda bona, miscendaque mala. Hinc Sapiens fatur : Qui inconsideratus est ad loquendum, sentiet mala. Non ergo absque præmeditatione sagaci loquamur, quum et Christus in Evangelio protestetur : Ex verbis tuis justificaberis, et ex verbis tuis condemnaberis.

Postremo, juxta doctrinam apostoli Jacobi, proni simus ad opera misericordiæ, **D** tam spiritualia quam corporalia, quantum valemus, faciendo proximis prout nobis fieri volumus, aut vellemus, si in eorum statu aut necessitate essemus. Summa etenim christianæ religionis in misericordia

et pietate consistit, secundum Ambrosium. Christus quoque : Beati (inquit) misericordes, quoniam ipsi misericordiam consequentur. Potissimum vero subveniendum est desolatis, egenis miserabilibusque personis, sicut mendicis, orphanis, pupillis, et viduis ac oppressis. Ad quod etiam prælati et iudices præcipue obligantur, juxta illud in Psalmo : Judicate egeno et pupillo, humilem et pauperem justifyate; eripite pauperem, et egenum de manu peccatoris liberate. Unde de injustis iudicibus **B** Deus per Isaïam conqueritur, dicens : Egeno non judicant, et causa viduæ non ingreditur ad eos. Amplius, custodiamus nos ab hoc sæculo immaculatos, et prava vitemus consortia, vana spectacula, choreas, tabernas, jocos, ludos et risus superfluos, ne cum perversis pervertamur, neque cum pereuntibus pereamus.

Legitur de S. Hugone episcopo Lincolniensi, qui fuit Cartusiensis, quod ab infantia cœpit Deo servire, et omnes sæculi vanitates vitavit; atque in tanta permansit innocentia, quod creditur nunquam peccasse mortaliter, nec gaudia mundi expertus est. Et tamen in magnis abstinentiis vixit; et semper quando evigilavit in lecto, absque mora surrexit, orationibus meditationibusque vacavit. Quumque episcopus factus, interesset interdum conviviis regis Angliæ ac magnatum, et essent ibi cantores ac musicis instrumentis ludentes, tunc specialissime mentem suam recollegit in Deo et custodivit, atque ab exterioribus cor retraxit, ne in aliquo delectaretur inaniter; nec aliquid dixit, nisi quod ædificatorium fuit. Ejus ergo pro posse sectemur vestigia; et prætacta Apostoli impleamus stabiliter saluberrima documenta, quoniam qui perseveraverit in bonis usque in finem, hic salvus erit.

ENARRATIO IN EVANGELIUM

AMEN, AMEN DICO VOBIS, SI QUID PETIERITIS PATREM IN NOMINE MEO,
DABIT VOBIS. Joann. xvi, 23-30.

HODIERNO in evangelio Christus specialiter hortatur fideles ad invocandum Patrem cœlestem; et convenienter promisit discipulis quod Pater cœlestis eorum preces exaudiret, si in nomine Filii ejus eum orarent, ut sic discipuli de Christi recessu tunc imminenti valde dolentes, consolationem acciperent. *Dixit ergo Jesus discipulis suis*, id est Apostolis, in sermone post Cœnam : *Amen, amen dico vobis*, id est, vere, vere vobis affirmo : et repetitio, confirmationis ac certitudinis signum est; *si quid petieritis Patrem*, id est, si aliquid dignum et salutare a Patre æterno instanter atque fideliter postulaveritis, *in nomine meo*, id est per me mediatorem Dei ac hominum, per meritum et virtutem passionis meæ, imo totius conversationis meæ in sæculo isto, et per omnia quæ pro hominum salute assumpsi, feci ac pertuli; vel, « si quid petieritis Patrem in nomine meo », id est aliquid pertinens ad salutem (nomen etenim Filii Dei est Jesus, quod interpretatur salvator : ideo in nomine Filii deprecatur, qui quod ad salutem pertinet, orando impetrare conatur); *dabit vobis*, vel statim, vel tempore opportuno. Et interdum Deus largitur, non quidem quod petitur, sed melius aliquid.

Denique ad exaudibilitatem orationis, primo requiritur ut vere salutaria postulentur. Oratio namque, secundum Damascenum, est petitio decentium, id est rerum quas decet peti, a Deo. Secundo, ut perseveranter oretur, sicut ait Salvator : Oportet semper orare, et non deficere; et Apostolus : Sine intermissione (inquit) orate. Tertio, ut integra fide et cum bona spe

A postuletur, secundum illud Jacobi : Postulet in fide, nihil hæsitans; qui autem hæsitat, similis est fluctui maris : non ergo æstimet homo ille, quod accipiat aliquid a Deo. Spes quippe seu certitudo exauditionis debet esse ex consideratione bonitatis et misericordiæ Dei : certum est namque, quod ex parte ipsius non erit defectus. Quarto, ut oret homo pro se. Quod dico, non quasi homo non debeat orare pro aliis, quum dicat apostolus Jacobus, Orate pro invicem, ut salvemini; sed quia oratio justi, etiam salutaris atque assidua, interdum non exauditur pro aliis, propter indignitatem et incapacitatem illorum, quoniam indesinenter ponunt obicem gratiæ Dei. Hinc Deus dixit ad Jeremiam de pessimo populo Judæorum : Non assumes laudem et orationem pro eis; si Moyses et Samuel steterint coram me, non est anima mea ad populum istum. Quinto quoque requiritur conversatio Deo placens, quia ut Salomon contestatur, Qui declinat aurem suam ne audiat legem, oratio ejus erit exsecrabilis. Apud Joannem quoque habetur : Peccatores Deus non audit; sed si quis cultor est Dei et voluntatem ejus facit, hunc exaudit. Istud tamen intelligendum videtur de peccatore in peccandi proposito permanente. Si vero aliquis in mortali sit culpa, et peccatum suum displiceat sibi, cupiatque illud deserere, et pugnet adversus illud, et videns se sine Dei gratioso auxilio prævalere non posse contra consuetudinem vitiosam seu pronitatem iniquam, invocet Dei subsidium, talem peccatorem cito exaudiet Deus. Et quamvis aliquis sit omnino iniquus, nihilo minus consulendum est ei ut oret, quo-

Jacob. i, 6, 7.

Ibid. v, 16.

Jer. vii, 16; xv, 1.

Prov. xxviii, 9.

Joann. ix, 31.

Luc. xviii, 1.
1 Thess. v, 17.

niam Deus ex sua infinita misericordia A interdum indignissimis subvenit.

Usque modo non petistis quidquam in nomine meo. Apostoli ante hanc horam frequenter orasse creduntur. Nam et Orationem dominicam didicerunt a Christo. In hoc quoque sermone oravit Philippus : Domine, ostende nobis Patrem. Quomodo ergo hucusque nil petierunt in nomine Christi ? Respondendum, quod nullus rite petit in nomine Christi, nisi qui bene sentit per fidem de eo. Apostoli autem usque ad horam hanc non habuerunt satis explicitam B fidem de Christi maiestate ac deitate, et qualiter esset Dei ac hominum mediator, quemadmodum etiam Augustinus hic tangit. *Petite in nomine meo indesinenter in fide et spe, et accipietis quod petitis.* Omnis enim qui petit, accipit; et qui quærit, invenit; et pulsanti aperietur. Ideirco Propheta loquitur Deo : Sperent in te qui noverunt nomen tuum, hoc est tuam puram infinitamque bonitatem, pietatem et caritatem, quoniam non dereliquisti quærentes te, Domine. In Ecclesiastico quoque C asseritur : Quis invocavit eum, et despexit illum ? Ad hoc ergo oretis, *ut gaudium vestrum sit plenum*, id est, perfectam æternæ felicitatis jucunditatem obtineatis, quatenus gaudium spirituale quod habetur in vita præsentī imperfecte, et in quodam prægustu ac spe, perficiatur in vobis in cœlis.

Hæc in proverbii locutus sum vobis, hoc est in similitudine parabolica, et cum quadam obscuritate. Nam paulo ante posuit similitudinem feminæ parientis, et parabolice loqui solitus fuit. *Venit hora*, id est, tempus jam imminet, *quum jam non in proverbii loquar vobis*, id est obscure ut consuevi. Quamvis autem Christus ante passionem suam loquebatur communiter discipulis suis obscure, nihilo minus exposuit eis sensum. Propter quod ait ad eos : Vobis datum est nosse mysterium regni Dei, ceteris autem in parabolis. Unde D *Marc. iv*, et Marcus evangelista, Seorsum (inquit) discipulis suis omnia disserebat : verumta-

men non tam clare ut post resurrectionem. Ideo subditur : *sed palam de Patre meo annuntiabo vobis*, id est, clariorem quam ante dabo vobis notitiam Dei Patris. Quod in die Pentecostes impletum est, quando Apostoli, suscepto Spiritu Sancto, limpida quadam acie mentis intellexerunt de Patre totaque superbeatissima Trinitate, quæ ante passionem audierunt a Filio, sed parum aut nihil intellexerunt. Porro, quod ait, « palam », etc., non est intelligendum de visione Dei clara et immediata per speciem, sed singulariter evidenti per fidem : de qua fatur Apostolus, Nos autem revelata facie gloriam Domini speculantes. Denique, etiam ante diem Pentecostes docuit Christus proprio ore discipulos de divinis, quando aperuit illis sensum, ut intelligerent Scripturas, et insufflavit in eos, Accipite, inquit, Spiritum Sanctum.

In illo die in nomine meo petetis, id est, Patrem per Filium invocabitis, quia tunc omnino fideliter Filium cognoscetis, qualiter sit mundi redemptor et inter Deum et homines mediator, per quem et cujus virtute ac merito, gratiarum charismata dantur hominibus, juxta illud Joannis : De plenitudine ejus nos omnes accepimus.

Quidam exponunt hunc locum ab illo verbo, « Venit hora quum jam non in proverbii loquar vobis », de illustratione et beatifica visione Sanctorum in patria, ubi omnia vident in Verbo, et palam, non per speculum in ænigmate, sed facie ad faciem, Deum conspiciunt. Quam expositionem reprobatur Augustinus, quia subjungitur : « In illo die in nomine meo petetis. » Sancti autem in patria non petunt, ut dicit, quum petitio sit alicujus indigentiae, quæ in patria locum non habet. Sed ad hoc respondere quis posset, quod orant pro aliis, atque pro certis punctis ad præmium accidentale spectantibus.

Et non dico vobis quia ego rogabo Patrem de vobis, id est pro vobis. Quomodo intelligendum est hoc, quum supra in hoc ipso sermone dixerit Christus Apostolis, Ego rogabo Patrem, et alium Paracletum

II Cor. iii, 18.

Luc. xxiv, 45.
Joann. xx, 22.

Ibid. i, 16.

I Cor. xiii, 12.

Joann. xiv, 16.

dabit vobis ? Et sine mediatore Christo nullus habet accessum ad Patrem, nec aliquid promeremur aut exaudimur, nisi virtute et merito Christi, quum ipse dicat : Nemo venit ad Patrem nisi per me. Ad hoc quidam respondent, quod Christus rogat ut homo, et non rogat ut Deus. Quod licet sit verum, non tamen satisfacere videtur proposito, quoniam Christus assignans causam cur non rogaret pro Apostolis Patrem, adjecit : Ipse enim Pater amat vos, quia vos me amastis. Insuper, paulo post, in hoc ipso sermone, Christus pro Apostolis deprecatus est Patrem : Pater, inquit, conserva eos in nomine tuo ; et iterum, Pater, sanctifica eos in veritate. Non ergo voluit dicere, quod nequaquam oraret pro eis, sed quod tantæ perfectionis et gratiæ erant futuri post missionem Spiritus Sancti, quod non indigerent de cetero Deo reconciliari ut ante, sed amantissimi atque gratissimi ei mox essent, nec post Spiritus Sancti susceptionem mortaliter peccaturi, utpote confirmati in gratia, nec indigentes subsidio reconciliatoriæ intercessionis. Ideo ait :

Ipse enim Pater amat vos amore æterno, quia, id est cujus amoris signum seu causa a posteriori, est quod *vos me amastis* actu caritatis infusæ. Certum est quod increatus æternusque amor Dei prævenit nos, et causa est totius gratiæ ac meriti nostri, omnisque boni quod habemus et sumus, ut divinus Dionysius docet. Ideo amor Christianorum ad Christum non est causa a priori quod Pater diligit eos, sed signum, quum sit effectus et donum increati amoris Dei Patris seu Trinitatis ad eos. Ideo in prima Joannis Canonica habetur : Nos ergo diligamus Deum, quoniam ipse prior dilexit nos. Itaque, quoniam Pater primo amavit nos, ideo dedit nobis gratiam diligendi unicum Filium ejus. Unde et alio loco Filius Dei ait Apostolis : Non vos me elegistis, sed ego elegi vos. Amor quippe est primum donum gratuitum, in quo omnia dona cetera condonantur. *Et credidistis quia*, id est quod, *a Deo exivi*,

A id est, a Patre æternaliter natus sum, sicque exivi ab eo emanatione immanente, sicut egreditur notitia intellectualis a mente, et verbum mentale ab intelligente. Vel, « exivi », id est, in mundum directus et missus sum, secundum quod homo, a Deo Trinitate, cujus voluntate et operatione incarnatus atque in mundum missus sum.

Exivi a Patre : secundum illud Ecclesiastici, Ego ex ore Altissimi prodivi, primogenita ante omnem creaturam ; *et veni in mundum* per humanæ naturæ assumptionem, qui ut Deus impleo cælum et terram. *Iterum relinquo mundum*, id est, quantum ad corporalem atque sensibilem præsentiam desero mundum, ascendendo in cælos ; *et vado ad Patrem*, id est, secundum assumptam humanitatem ascendo ad cælum empyreum : in quo Deus Pater specialiter esse et habitare censetur, quoniam ibi excellentius operatur, seque clarius manifestat, quamvis secundum se nullam habeat habitudinem aut determinationem ad locum, sed in se ipso invariabiliter æternaliterque subsistat, tanquam ens vere incircumscriptum, atque simpliciter ac perfectionaliter infinitum.

Dicunt ei discipuli ejus : *Ecce nunc palam loqueris*, dicendo quod Pater nos amet quia amavimus te, etc., *et proverbium nullum dicis*, loquendo de exitu tuo a Patre et adventu in mundum, sed veritatem evidenter pronuntias. Christus namque ante passionem non semper parabolice loquebatur discipulis : et licet paulo ante jam dixerit, « Venit hora quum jam non in proverbii loquar vobis » (quod ad tempus post resurrectionem relatum est) ; non tamen negavit quin etiam ante passionem loqueretur eis quædam de Deo sine proverbiiis. *Nunc scimus* per fidem et experientiam quamdam, *quia scis omnia*. Hoc dixerunt, quoniam Christus prævenit interrogationem eorum, qua eum interrogare proposuerunt, et cogitationes eorum se scire monstravit. *Et non opus est tibi*, id est, ad hoc quod respondeas non oportet nec indiges, *ut quis te interroget*, quia

Joann. xiv,
6.

Ibid. xvii,
11.

Ibid. 17.

Ecclesi. xxiv,
5.

Jer. xxiii,
24.

Joann. iv,
19.

Joann. xv,
16.

tu nosti dubitationes atque proposita cor-
dium : ideo non oportet tibi aliquid noti-
ficari, quum omnia scias. *In hoc credimus*
quia, id est quod, *a Deo existi* per gene-
rationem æternam, ita quod omnia scias
sicut et Pater, sisque Deus : quoniam om-
nia noscere modo præfato, Deo est pro-
prium. Verumtamen, secundum Augusti-

num, Apostoli non intellexerunt verba
Christi quibus se dixit exisse a Patre, sed
putabant se intellexisse quod non intel-
lexerunt. Attamen certum est quod crede-
bant eum exisse a Patre, ita quod divini-
tus directus seu missus esset in mundum;
sed an verba inducta de exitu generationis
æternæ acceperint, non est adeo certum.

SERMO SECUNDUS

QUALITER INVOCANDUS SIT DEUS, ET DE PIETATE AC PRONITATE EJUS AD EXAUDIENDUM.

HÆC est fiducia quam habemus ad
Deum, quia quodcumque petierimus
secundum voluntatem ejus, audit nos.
I Joann. v, 14.

Fiducia qua unus confidit de alio, ex
tribus procedit. Primo, ex cognitione bo-
nitatis et dilectionis ejus in quo confidit :
ut si aliquis sciat alium esse pium, virtuo-
sum et caritativum. Sic Paulus in epistola
ad Philemonem scribit se confidere quod
Philemon faceret sicut rogavit eum. Se-
cundo oritur ista fiducia ex assertione al-
terius : ut si dicat se paratum succurrere
et omnia sibi possibilia pro alio agere ;
tunc ille cui hoc dicit, confidit in eo. Sic
filius Berzellai confidebat in David, ut pat-
et secundo Regum. Tertio, ex beneficiis
jam impensis, hoc est ex quadam expe-
rientia caritatis et pietatis alterius circa
se. Sic filii Israel confidebant in Juda Ma-
chabæo, quia tam sæpe eis subvenit. Ve-
rumtamen fiducia ista in hominibus, inter-
dum decipit confidentem. Nam, quamvis
is in quo quis confidit, sit in se bonus,
fidelis et caritativus, potest tamen contin-
gere quod male informetur secrete et aver-
tatur ab eo qui in ipso confidit : quem-
admodum Siba avertit David regem a
Miphiboseth filio Jonathæ, ut secundo Re-
gum describitur. Item accidere potest quod
homo qui dixit se alteri benefacturum,

mutetur et mentiatur : quemadmodum
Saul promisit filio suo Jonathæ non in-
ferre malum ipsi David, et tamen pro
posse oppositum fecit. Rursus evenire po-
test ut qui alteri sæpius benefecit, pro-
ponat hoc ultra non facere, et facultatem
faciendi hoc perdat : sicut primo Macha-
bæorum legitur de Antiocho rege, quod ad
tempus larga manu dedit stipendia mili-
tibus suis, sed paulo post, evacuato ærario
seu thesauro, continuare non potuit.

Deinceps, his tribus modis habere debe-
mus plenam, summam certissimamque fi-
duciam in Domino Deo. Primo quidem,
quia cognoscimus quod infinita sit bonitas
et pietas Dei, et magna prorsus dilectio
ejus ad homines, quum Paulus testetur :
Propter nimiam caritatem suam qua di-
lexit nos, Deus Pater Filium suum misit
in mundum. Secundo, quoniam Deus tam
in veteri quam in novo Testamento fre-
quenter valde asseruit se paratum succur-
rere, exaudire, ignoscere, et sperantem in
se non deserere. Ait namque per Jeremi-
am : Clama ad me, et exaudiam te. Atque
in Psalmo : Quoniam in me speravit, libe-
rabo eum ; protegam eum, quoniam co-
gnovit nomen meum ; clamabit ad me, et
exaudiam eum. Hinc in Ecclesiastico ha-
betur : Respiciite, filii, nationes hominum,
et scitote quia nullus speravit in Domino,

I Reg. xix,

6.

I Mach. iii,
28-30.

Ephes. ii,
4; Galat. iv,
4.

Jer. xxxiii,
3.
Ps. xc, 14,
15.

Eccli. ii,
11, 12.

et confusus est; aut quis invocavit eum, et A despexit illum? In Evangelio quoque loquitur Christus : Omnia quaecumque orantes petitis, credite quia accipietis, et fient vobis; itemque, Si vos quum sitis mali, nostis bona data dare filiis vestris, quanto magis Pater vester cœlestis dabit spiritum bonum petentibus se? Tertio, quoniam tam multa et magna beneficia contulit nobis, ut dubitari non queat quin deinceps exaudire et dare paratus sit. Pater enim dedit nobis Unigenitum suum in pretium nostræ redemptionis, sicut loquitur Isaias : Puer B natus est nobis, filius datus est nobis. Quomodo etiam non omnia nobis cum illo donavit? Dedit demum nobis Spiritum Sanctum in pignus et arrham hereditatis supernæ, atque inhabitatorem et rectorem animarum nostrarum, dicente Apostolo : Caritas Dei diffusa est in cordibus nostris per Spiritum Sanctum qui datus est nobis. Insuper deputavit unicuique homini sanctum angelum pro custode; totque gratiarum charismata donavit hominibus, et toties ac tamdiu nobis pepercit.

Marc. xi, 24.

Luc. xi, 13.

Is. ix, 6.

Rom. viii, 32.

Ibid. v, 5.

Ex quibus certissime innotescit quam paratissimus sit preces nostras suscipere, fiduciam nostram implere, peccatis ignoscere, gratiam et salutem præstare : potissimum quum ipsemet toties in Scripturis invitet ac moneat nos ad orandum, ut confidamus in eo, atque in omni tribulatione et angustia confugiamus ad ipsum. Hujus quoque est alia ratio : nam ea quæ Deus nobis præcepit, et quæ requirit a nobis, adimplere non possumus absque auxilio gratiæ ejus, saltem eo modo quo D vult ea impleri, puta ex caritate et pura intentione ad gloriam et honorem ipsius. Si ergo non esset paratus nobis gratiam impertiri, præciperet et requireret impossibilia quædam a nobis : quod impium est suspicari de pio et supersapientissimo Deo.

Deinceps fiducia ista in Deo, utpote spes formata, confidentem non potest decipere, quoniam Deum nullus potest sinistre informare, nec ipse mutari potest neque mentiri, neque opulentia ejus minuitur

beneficia erogando. Cum omni ergo fiducia Deum devote ac jugiter invocemus. Ad quod primo inducere et movere nos debet, quod Deus est tam pius, liberalis, caritativus et promptus ad exaudiendum, ut dictum est. Siquidem abundantia pietatis suæ, preces supplicum excedit et vota. Ideo loquitur Augustinus : Erubescat humana pigritia, plus vult Deus dare, quam homo accipere. Unde apud Jeremiam loquitur Deus animæ peccatrici : Tu fornicata es cum amatoribus multis; tamen B revertere ad me, dicit Dominus. Secundo, ad idem movere nos debet indigentia nostra, quia spiritualiter ex nobis ipsis infirmissimi atque pauperrimi sumus, et ad omnia peccata proclives, errantes et in errorem trahentes. Ideo incessabiliter Dei adjutorio, illuminatione, conservatione, et gratia magna ac multa ineffabiliter indigemus. Nempe, ut ait Apostolus, Insufficientes sumus cogitare aliquid a nobis quasi ex nobis. Ideo consulit idem Apostolus : Sine intermissione orate.

Jer. iii, 1.

II Cor. iii, 5.

I Thess. v, 17.

Tertio, ad hoc movere nos debet importunitas, fortitudo, multitudo, crudelitas hostium nostræ salutis, videlicet dæmonum, qui nobis ultra quam capere possumus, insidiantur, inimicantur, et fortiores ac callidiores sunt, crudelissimique consistunt, aliud prorsus non sitientes nisi damnationem nostram æternam. Unde ait Apostolus : Non est nobis colluctatio adversus carnem et sanguinem, sed adversus spiritualia nequitiae in cœlestibus, hoc est dæmones. Quibus verbis, quasi pro consilio atque remedio, protinus addidit Apostolus : Orate omni tempore in spiritu, vigilantes in omni instantia et obsecratione. Jugiter itaque cum omni attentione et fervore Deum precemur, ut ab invisibilibus hostibus istis nos tueatur, et contra eos nos roborare ac armare dignetur, virtutes et dona Spiritus Sancti dando, conservando ac perficiendo in nobis. Quarto, ad idem nos debet inducere immensitas nostri periculi. Si enim succumbimus hostibus istis, si a Deo non adjuvamus, si

Ephes. vi, 12.

Ibid. 18.

incustoditi et intimorati fuerimus, ecce A
 damnum est irremediabile, irrecuperabile
 et immensum, quia non solum æternam
 beatitudinem perdimus, sed perpetuam
 quoque damnationem infernalemque pœ-
 nam incurrimus. Quum itaque in laqueo-
 rum medio ambulemus, simus semper sol-
 liciti, ne ab infernalibus latronibus atque
 raptoribus trucidemur, et in gehennam
 trahamur. Quinto, ad idem nos moveat,
 quod tanta est vis devotæ orationis, et
 tanta dignitas ejus. Nam ab angelo sancto
 suscipitur ac Deo offertur, estque potens B
 ad impetrandum quod postulat : ideo val-
 de ineffabiliter magnum est lucrum ejus,
 et copiosissimus fructus ipsius.

Præterea considerandum est qualiter
 exorandus sit Deus. Est itaque invocandus :
 Primo, cum magno caritatis fervore, tan-
 quam piissimus pater. Nam ab hominibus
 pater vocari dignatur, et potius vult ama-
 ri ut pater, quam formidari ut dominus.
 Unde Orationem dominicam Christus ita
 incepit : Pater noster, qui es in cœlis. Dum
 ergo Deum vocamus patrem, curemus es-
 se boni ac obedientes filii ejus, non re-
 belles ac injuriosi. Secundo, exorandus est
 Deus cum omni fiducia, ut satis jam di-
 ctum est. Tertio, cum grandi reverentia,
 tanquam rex majestatis et excellentiæ in-
 finitæ, hoc est cum ingenti cordis custodia
 et advertentia, ac prævia animi præpara-
 tione, distractiones abjiciendo et mentem
 ad Deum levando, quemadmodum in Eccle-
 siastico scriptum est : Ante orationem præ-
 para animam tuam. Christus quoque dis-
 seruit : Veri adoratores adorabunt Patrem D
 in spiritu et veritate ; nam et Pater tales
 quærit. Spiritus est Deus ; et eos qui adorant
 eum, in spiritu et veritate adorare oportet.
 Quarto, cum vitæ consonantia, ut ora-
 tioni conversatio sit concordans, vel sal-
 tem ad hoc orans absque mora conetur.
 Qui enim a Deo misericordiam petit, et
 tamen peccare non cessat, nec se emen-
 dare proponit ac nititur, ita se habet ac si

aliquis forefactor offensorque regis terreni
 ab ipso veniam precaretur, nec tamen ces-
 saret ei contumeliam irrogare. Hinc in pri-
 ma sua Canonica ait Joannes apostolus :
 Carissimi, si cor nostrum non reprehendit nos, fiduciam habemus ad Deum ; et
 quidquid petierimus, accipiemus. I Joann. III,
21, 22.

Quinto, petendum est cum profunda et
 maxima humilitate, considerando et intime
 confitendo proprias defectuositates, iniqui-
 tates, fragilitates, miserias. Unde in Eccle-
 siastico scriptum est : Oratio humiliantis
 se nubes penetrabit. Sexto, cum indesinen-
 ti constantia, ita ut quantumcumque vide-
 amur a Deo repelli ac despici, non franga-
 mur, nec desperemus, neque cessemus :
 imo cum sancto Job ex corde dicamus,
 Etiam si occiderit me, in eum sperabo. Eccli.
xxxv, 21.
 Itaque juxta hunc modum Deum fideliter
 invocemus. Sed quia taliter non oramus,
 sed sine reverentia et affectu, ex consue-
 tudine quadam, nec damus nos ad emen-
 dationem pro posse, faciendo quod in nobis
 est ; idcirco a benignissimo Patre cœlesti
 non exaudimur. C

Legitur de B. Leone Papa, qui fuit na-
 tione Romanus, ac nobilissimus juvenis,
 utpote patricii filius, quod dum adhuc
 adolescens fuit, subjacuit incontinentiæ vi-
 tio, ad quod ex naturalibus suis erat mul-
 tum proclivis. Sed multum displicuit sibi
 immunditia sua, oravitque Deum pro gra-
 tia castitatis ; singulariter vero invocavit
 piissimam Christi Matrem, Virginem bene-
 dictam, ut pro ipso rogaret Filium suum.
 Quumque quotidie oraret intente, post bre-
 ve tempus apparuit ei beatissima virgo
 Maria, et dixit ad eum : Rogavi pro te, et
 gratiam castitatis impetravi tibi ; et hoc
 tibi prædico, quod etiam ad apostolicæ Se-
 dis dignitatem sis promovendus. Quo di-
 cto, dulcissima Virgo disparuit. Et dein-
 ceptus Leo castissime vixit, atque, auxiliante
 Domina nostra, Papa effectus est ; et in
 papatu sancte se habuit, ac maximum in
 Ecclesia fecit fructum.

Matth. vi,
9.

Eccli. xviii,
23.

Joann. iv,
23, 24.

Job xiii, 15.

SERMO TERTIUS

DE PLENO GAUDIO BEATORUM, ET DE MEDIIS QUIBUS PERVENITUR AD ILLUD.

PETITE ut gaudium vestrum sit plenum. Joann. xvi, 24.

Dominus noster Jesus Christus sciens arctam esse viam salutis quam docuit, et difficile esse omnia quæ præcepit implere, frequenter suis cultoribus ac ministris promisit gaudium spirituale, id est : consolationem internam in præsentī, quæ dici potest gaudium semiplenum et non purum, quia imperfectum est, tribulationibus tristitiisque permixtum; et consolationem beatificam ac perfectam, quæ est gaudium plenum ac purum in cœlo, cui gaudio nulla unquam miscetur tristitia. De gaudio semipleno ait in Matthæo : Venite ad me, omnes qui laboratis et onerati estis, et ego reficiam vos. Sed et alibi quum dixisset, Beati estis quum maledixerint vobis homines, de gaudio isto subjecit : Gaudete et exsultate in illa hora, quoniam merces vestra copiosa est in cœlis.

Est etiam alia ratio cur Christus suis ministris gaudium hoc promisit, videlicet : quoniam naturale est homini gaudere gaudiumque appetere. Ne ergo gaudium acceptaret carnale, promisit gaudium spirituale. Et in præsentī miseria, devotissimos suos ministros carnalia oblectamenta amore Dei spernentes, spiritualiter consolatur gratiose, frequenter et multipliciter valde, sicut fatetur Apostolus, dicens : Benedictus Deus et Pater misericordiarum, Deus totius consolationis, qui consolatur nos in omni tribulatione nostra.

Itaque, juxta Christi doctrinam, ad hoc omnia opera nostra bona, omnes orationes atque sinceras affectiones nostras ordinare debemus, ut plenum gaudium, æternam beatitudinem, beatificæ fruitionis jucunditatem adipiscamur. Quod gaudium

A dicitur plenum, quia totaliter implet et satiat desiderium mentis humanæ, juxta illud in Psalmo : Adimplebis me lætitia cum vultu tuo; itemque, Satiabor quum apparuerit gloria tua. Hoc saluberrimum gaudium Beatorum, est diffusio, dilatio et exhilaratio cordis eorum ex clara intuitionē et immediata fruitione divini vultus, divinæ essentiæ, primæ et increatæ veritatis, summæ, immensæ et incommutabilis bonitatis.

Denique, quam ineffabiliter magna, plena ac dulcis sit gloria Beatorum, considerari potest ex multis : Primo, et valde profunde ac excellenter, ex hoc quod dum genus humanum propter originale peccatum privatum fuisset hoc gaudio, nulla pura creatura digna fuit hominibus recuperare ac promereri hoc gaudium, seu felicitatem gaudiosam cœlestem : ideo misit Deus Pater Unigenitum suum mundo salvatorem. Quum enim beatitudo illa cœlestis sit summi et invariabilis boni immediata fruitio, est quodammodo dignitatis immensæ : ideo infinitæ dignitatis redemptor necessarius fuit. Unde secundum antiquam translationem dictum fuit per Isaiam : Non angelus, non legatus, sed ipsemet veniet, et salvos nos faciet.

Secundo, idem potest perpendi ex hoc quod ipse unigenitus Filius Dei, pro hac beatitudine hominibus recuperanda, tanta assumpsit, fecit ac pertulit. Siquidem homo factus est, et inter homines conversatus, laboravit ac lassatus est, et amarissimam tandem pro hac re pertulit mortem : sicque eam pretiosissime emit, videlicet proprio sanguine suo, imo se ipso, quia ut Isaias prædixit, pro hac re tradidit in mortem animam suam; et ipsemet loquitur :

Joann. x, 15. Animam meam pono pro ovibus meis. Unde et princeps Apostolorum: Non corruptibilibus (inquit) argento vel auro redempti estis, sed pretioso sanguine agni immaculati, Jesu Christi. Paulus quoque testatur: *I Cor.* vi, 20. Empti estis pretio magno. Tertio, ex hoc quod ultra hoc quod Christus beatitudinem istam tam care suis emit, et tanta egit pro ea et pertulit, nihilo minus sancti et electi beatitudinem istam difficulter et care emunt ac obtinent; sicque a Deo valde care venditur eis: quia ut ait Apostolus, Non coronatur nisi qui legitime certaverit; et, Per multas tribulationes oportet nos intrare in regnum cœlorum. Christo quoque testante, Arcta est via vitæ, et angusta porta salutis. Nec potest quis beatitudinem illam acquirere, nisi fuerit totaliter expurgatus et ab omni reatu immunis.

Quarto, perpendi potest pulchritudo et gloria Beatorum ex pulchritudine naturalium et artificialium rerum. Videmus enim magnum decorem non solum in sole, luna, planetis, stellis ac orbibus, sed in infimis etiam rebus, ut rosis et liliis, pratis ac floribus, plantis, arboribus, quæ tempore æstivali variis fulciuntur ornatibus. Unde ait Salvator: Considerate lilia agri, quomodo crescunt; dico vobis, quod nec Salomon in omni gloria sua opertus est sicut unum ex istis. Videmus quoque quod ligna, saxa, metalla, ex se parvam pulchritudinem habentia, ita formantur arte humana, quod miram ac delectabilem speciositatem suscipiunt, ut patet in castris, picturis, sculpturis ac templis. Quam ineffabilem ergo pulchritudinem artifex summus, Deus omnipotens, dat animabus, et in fine mundi dabit corporibus quæ templa ejus fuerunt, et ei fideliter servierunt? Unde Salvator testatur: Fulgebunt justi sicut sol in regno Patris eorum.

Quinto, ex hoc quod Beati, quantum ad animam assimilantur Deo similitudine gloriæ, sicut ait Joannes: Similes ei erimus, quia videbimus eum sicuti est. Et quantum ad corpus, assimilabuntur clari-

tati et gloriæ corporis Christi, qui testante Apostolo, reformabit corpus humilitatis nostræ, configuratum corpori claritatis suæ. *Philipp.* iii, 21. Sexto, ex dignitate objecti. Quum enim gaudium oriatur ex unione potentiæ cum objecto convenienti, et ipse Deus sit objectum dignitatis ac excellentiæ infinitæ, constat quod ex unione mentis humanæ cum incomparabili hoc objecto, summa et incomparabilis oriatur lætitia ac dulcedo in anima. Idem patet ex nobilitate potentiæ quæ Deo beatifice copulatur, videlicet intellectus, qui est suprema vis animæ. Si ergo sensus tam valide delectantur in objectis suis carnalibus, quam inæstimabiliter delectatur mens in increato superpræstantissimo suo objecto? Idcirco Propheta loquitur Deo de viro electo: Lætificabis eum in gaudio cum vultu tuo. Et S. Bernardus: Revera (inquit) illud est verum et summum gaudium, quod non de creatura, sed de Creatore concipitur. Quod quum possederis, nemo tollet a te. Cui comparata, omnis aliunde jucunditas mœror est, omnis suavitas dolor est, omne dulce amarum, omne decorum fœdum, omne delectabile aliud est molestum.

Septimo, patet magnitudo gloriæ Beatorum ex testimoniis sacræ Scripturæ, et Sanctorum quibus Deus hoc revelavit. Ait quippe Apostolus: Oculus non vidit, nec auris audivit, nec in cor hominis ascenderunt quæ præparavit Deus diligentibus se; itemque, Non sunt condignæ passionibus hujus temporis ad futuram gloriam quæ revelabitur in nobis. Et Psalmista loquitur Deo: Inebriabuntur ab ubertate domus tuæ, et torrente voluptatis tuæ potabis eos: quoniam apud te est fons vitæ, et in lumine tuo videbimus lumen. Octavo, ex honore et gloria quibus Deus in vita hac ornat Sanctorum reliquias, quas multis miraculis atque fidelium visitationibus, ac aliis diversis modis honorat. Quomodo igitur animas sanctas honorat, beatificat et sublimat?

Alia insuper multa possent assignari, ex quibus patet ineffabilis magnitudo gloriæ

Beatorum, videlicet : ex jucundissima eorum mutua societate et caritate, qua gaudium unius redundat in alium; item, ex cœlestis paradisi amœnitate, ex intuitu quoque humanitatis Christi et Virginis gloriosæ, et ex consideratione infernalium tormentorum quæ evaserunt, ac miseriorum vitæ præsentis a quibus sunt liberati.

Præterea, quamvis ad tantam beatitudinem mereatur homo perducī per omnem actum ex caritate Dei procedentem, nihil tamen ita facit hominem appropinquare beatitudini illi ut ipsa actualis ac fervida dilectio Dei, qua Deus propter sui ipsius puram bonitatem sincere diligitur. Insuper patientia in adversis et meditatio dominicæ passionis, Deum quoque devote laudare et affectuose orare, sunt alæ quibus volatur in cœlum. Mundemus nos ergo ab omni inquinamento peccati, ab omni amore carnali, a cogitationibus pravis, a verbis illicitis, ut Deo sanctitatis immensæ valeamus conjungi, qui non nisi purgatissimis cernitur mentibus. Postremo, omnium hominum salutem ferventer appetere, commune bonum diligere, universalem reformationem Ecclesiæ desiderare, et summe optare ut Deus gloriosus et sanctus ab universis et singulis diligatur et honoretur, atque de ejus inhonoratione cordialiter contristari, pro omnibus fidelibus defunctis orare, isti sunt virtuosissimi, præclarissimi et Deo acceptissimi actus quibus

ad cœlestis beatitudinis gaudia maxime propinquatur, et in illorum adeptione perficitur. Talibus ergo exercitemus et occupemus nos actibus, et in omni virtute et gratia quotidie crescere studeamus.

Legitur in libro de Viris illustribus Ordinis Cisterciensis, quod quidam monachus valde devotus, post mortem suam, Deo concedente, apparuit cuidam monacho adhuc viventi, qui sibi ante specialiter carus familiarisque exstitit. A quo interrogatus qualiter secum esset, respondit se esse in purgatorii pœnis. Super quo monachus ille vivens, admirans, dixit : Quomodo potest hoc esse, quoniam sanctus Ordo noster adhuc tam stricte servatur? Tu quoque diligens in observantiis Ordinis nostri eras; et in extremis datur nobis ex gratia speciali absolutio a pœna et culpa. Respondit monachus ille defunctus : O quam puram esse oportet mentem quæ Deo beatifice conjungatur et luce divina fruatur, quoniam et a minimis culpis oportet eam esse sufficienter purgatam! Deinde anima illius defuncti pro se petiit exorari, moxque disparuit. Ecce quam graviter puniuntur post vitam hanc etiam culpæ minores, quæ in vita ista a nobis vix culpæ putantur. Vitemus ergo cum diligenti cordis custodia non solum mortalia, sed venialia quoque peccata, quia nisi venialia diligenter vitentur, cito quisque in mortalia labitur. Ideo coram Deo oportet nos sollicite ambulare. *Mich.* vi, 8.

AD RELIGIOSOS

SERMO QUARTUS

DE REFORMATIONE ET MODERATIONE LINGUÆ.

SI quis putat se religiosum esse, non D refrenans linguam suam, sed seducens cor suum, hujus vana est religio. Jacob. i, 26.

Hoc compendiosissimo ac saluberrimo verbo beatissimus frater Christi, apostolus Jacobus, loquacitatem, verbositatem, dissolutionem et incustodiam nostram percu-

tit, reprehendit, compescit, imo et sanat, id est, medicinale apponit remedium. His etenim verbis nos commonet ut discutiamus nos ipsos, an vere simus religiosi; et si non, pœniteamus, et loquacitatem atque silentii fractionem vitantes, vere religiosi efficiamur. Nempe, quam periculosum membrum sit lingua, quanta vitia oriantur ex ea, nisi frenetur et clausa teneatur atque dometur, pandit in sua Canonica idem

Jacob. III, 6, 8. iste apostolus Jacobus : Lingua (inquiens) nostra ignis est; universitas iniquitatis lingua (id est per linguam irrefrenatam) constituitur in membris nostris, quæ maculat totum corpus nostrum, inflammata a gehenna, id est a diabolo; inquietum malum, plenum veneno mortifero. Hinc Hugo de S. Victore : Lingua dicitur, quoniam lingit adulando; mordet detrahendo, occidit mentiendo; ligat, et ligari vix potest; labilis est et teneri vix valet, sed labitur et fallit. Labitur ut anguilla, penetrat ut sagitta; tollit amicos, multiplicat inimicos, movet rixas, seminat discordias; uno ictu multos percutit ac interficit; blanda est et subdola, lata, et parata ad exhaustiunda bona commiscendaque mala. — Quum ergo tam periculosa pars corporis lingua sit, sapientissime sancti Patres instituerunt silentium stricte a religiosis esse servandum, ejusque fractionem esse acriter puniendam, potissimum si in usum vertatur.

Hinc in Regula sua gloriosus ait Hieronymus : Nequaquam Jacobus apostolus experientiam religionis poneret in refrenatione linguæ, nisi certo sciret judicio quod mors et vita est in manibus linguæ. Unde post

Prov. XVIII, 21. multa conclusit : Quicumque refrenat linguam suam, hic beatus in facto suo erit. Ecce quod in refrenatione linguæ beatitudo ponitur, ut detur intelligi quod in multiloquio Deus, qui est beatitudo nostra, haberi et contemplari non potest. Refrenatio linguæ est quum lingua, quæ ex sui vitio semper prompta est ad verba vana, illicita et mendosa, silentio coarctatur, ne in Dei displicentiam prorumpere audeat, vel ad bona exercetur, ut divinas

A laudes exsolvat. Idcirco, carissimi, temporibus quibus loquendi præstatur licentia, ut beati esse possitis, linguas domate, ne convertantur ad lites, ne jurgia, contentiones, rixas et scandala resonent, ne mendacia, juramenta, opprobria, aut aliorum displicentia prodant. Quod si ex instinctu diaboli, qui semper discordias seminat, inter conventuales levis dissensio fuerit orta, penitus statim per præidentem nequitia elidatur in semine, ita ut sole occidente, in sancta domo non inveniatur iracundia, et ne ira convertatur in odium, etc., et domus pacis jam ebriosorum efficiatur taberna. Mendacia vero tanquam infernum expellite. Semper aut divina Officia, aut sacrorum codicum verba, tam inter vos quam inter advenientes deducantur in medium. Si otiosum insonuerit verbum, mox frangatur verbo salubri; et sermo nocivus divino cedat eloquio. Quod si loquens a verbis pravis non cesset, fugiatur ab eo; et velox fuga vestram sanctitatem testetur intrinsecam. Nihil per exteriora corporis intrans, cogitationibus gravet mentem quæ divinæ contemplationi exponitur. Raro cogitatur in mente quod exteriores sensus non mittunt. Hæ fenestræ, hæc ostia, *Jer. IX, 21.* quæ si clausa non fuerint, morti patent introitus, et non nisi funeste ingreditur. Hæc Hieronymus. Cujus omnia verba jam introducta, sunt diligentissime attendenda et efficaciter adimplenda.

Insuper, sanctus præsul Basilius ait in Regula sua, respondens ad quæstionem qua quæritur an liceat penitus tacere : Silentium et taciturnitas bona sunt, quum ad personas vel ad tempus aptantur; et necessaria est taciturnitas, quousque linguæ vitia reprimantur, et discamus opportune ac tempore suo utiliter loqui, quemadmodum scriptum est : Sermo vester semper conditus sit sale sapientiæ, ut *Coloss. IV, 6; Ephes. IV, 29.* det gratiam audienti.

Porro, de multiloquio, et fugibilitate pravitateque ejus, Climacus protestatur : Multiloquium est vanæ gloriæ cathedra, per quod se ipsam manifestare atque pompa-

tice propalare ex sua natura solet. Multiloquium est insipientiæ argumentum, distractionis porta, manu ductor scurrilitatis, minister mendacii, compunctionis resolutio, acuitatis intelligentiæ dispersor, acediæ vocator et conditor, somni præcursor, dissipatio boni mœroris, custodiæ interioris exterminatio, fervoris atque caloris frigiditas, orationis obscuratio. Ecce quam horribilia et pene innumerabilia vitia multiloquium parit. Deinde de religioso silentio subdit : Silentium in scientia (id est discretum silentium) est mater orationis, a captivitate seu distractione revocatio, ignis amoris custodia, episcopus cogitationum, intentio pugnatorum, colligatio luctus, amicitia lacrimarum, amicitiae * mortis operator, æternæ pœnæ depictor, divini iudicii diligens inquisitor, mœstitiæ bonæ minister, confidentiæ propriæ inimicitia, tranquillitas convictus, scientiæ additamentum, verborum Dei productor, non apparens profectus, latens ascensus. Qui propria cognoscit ac pensat delicta, continet linguam; multiloquus vero nondum cognovit se ipsum sicut oportet. Amicus silentii Deo propinquat, et latenter colloquens Deo, illuminatur ab eo. Silentium Jesu Christi inflexit et avertit Pilatum. Melius est in terram cadere ab altitudine, quam a lingua. Multiloquium ex ventris repletionem et vana gloria oritur. Sollicitus de exitu ab hoc mundo, suos circumcidit ac moderatur sermones; et qui luctum animæ possidet, quasi ignem avertit a se et fugit multiloquium. Os suum recludit, qui quietem solitudinis diligit; qui autem incessus et hominum facta libenter videt, a propria passione de cella executitur. Qui multiloquus est, sibi similibus quærit consortium. Ecce ex verbis iis hujus profundi et illuminatissimi Climaci, merito incitari debemus ad sacram observationem silentii salutaris tam fructuosi, atque ad detestationem loquacitatis et multiloquii tam nocivi et vitiosi.

Amplius, de hac ipsa materia multa loquitur Augustinus in sermone quodam ad

A Fratres in eremo : quæ, ut vitetur prolixitas, alteri reservo sermoni. Verumtamen quod in statutis Ordinis Cartusiensis habetur commemorabo. Itaque dicitur ibi : Soli degentes, signa cœnobiorum aut nulla aut pauca novimus, sufficere arbitantes solam linguam non etiam alios artus reatibus implicare loquendi. Et ideo si tanta necessitas urget, uno vel duobus aut paucissimis verbis quod res postulat malumus indicari. Qui vero aliter silentium fregerit, culpam suam clamet et disciplinam accipiat in capitulo proximo; et si assuetus fuerit in frangendo, pœna puniatur majori. Quod autem in verbis iis continetur, Si tanta necessitas urget, etc., a præfati Ordinis Patribus ita exponitur : Si notabile inconveniens aut periculum seu negligentia sequeretur, si locutio usque ad proximum differretur colloquium, vel ad opportunam horam petendi licentiam. Qui autem ex levitate aut affabilitate, aut alia causa insufficienti loquitur verba quamvis paucissima, dummodo ex se intelligibilem pariant sensum per modum complexi, non excusatur a fractione silentii. Ex quibus etiam, salvo meliori iudicio, sequi videtur, quod alii religiosi signis utentes, si ex levitate et irrationabili causa signis utantur, aut eis superflue sint utentes, velut fractionis silentii rei reddantur, nec excusentur a culpa, quum inordinata atque superflua, et quæ ex culpabili procedunt radice, non careant culpa; nec intentio Patrum fuit signorum usum admittere, nisi ex rationabili causa et temperate.

Præterea, quicumque cordis sui diligens custos est, cui propositum et conatus ac consuetudo est mente semper loqui cum Deo aut interne exerceri coram eo, non solum agnoscit, sed certissime experitur quantum fractio silentii, loquacitas, multiloquium, superfluitas quoque signorum inficiant, inquietent indisponantque mentem, quæ facile inertia quadam percuitur. Qui autem ad tantam insensibilitatem atque duritiam cordis dilabatur, quod pro-

* memoriæ

priam læsionem in fractione silentii, loquacitate aliisque præactis nascentem non sentit, male stat, si tamen stat, et nescio si simpliciter vivat. Hinc ad eorum eundum et de choro redeundum est cum ingenti maturitate et taciturnitate. Et qui promptulus est ad loquacitatem et silentii fractionem, sæpe fit aliis consimilis culpæ occasio, et eorum devotionem conturbat, orationem interrumpit, ac pravum intuentibus dat exemplum; extraneos quoque graviter scandalizat si eis absque licentia loqui præsumpserit, quum illis innotescat ipsum sine licentia loqui non posse.

Jacob. i, 22. Postremo, juxta doctrinam sancti apostoli Jacobi, simus factores verbi, et non auditores tantum. Quotidie legimus et audimus verba cœlestia, divina præcepta, monastica instituta, saluberrima documenta, quæ nisi debita cum diligentia fuerimus opere adimplentes, gravioris damnationis obnoxii erimus. Et quia ad veram *Ibid. 27.* spectat religionem immaculatum se ab

A hoc sæculo custodire, nequaquam huic mundo in maligno posito conformemur; *I Joann. v, 19.* nulla mundana affectio, nulla actio vana, nullus amor carnalis in nobis habeat locum, sed prorsus spirituales ac divini efficiamur, quia ut Climacus ait, Monachus est qui solum quæ Dei sunt agit, cogitat et loquitur, Christo unitus omni tempore, loco et negotio. Et discamus linguam compescere, sapienter et ædificatorie loqui, memores quod abbas Agathon, in conversionis suæ exordio, tribus annis lapidem tulit in ore, quousque tacere addisceret: propter quod ab abbate Pastore meruit tunc abbas vocari. Quumque quidam abbati Pastori dixisset, Abba, ille adhuc juvenis est, cur eum abbatem appellas? respondit: Os ejus fecit eum abbatem vocari. Porro, ut Hugo fatetur, Vanus sermo, vanæ conscientiae index est. Mores hominis lingua pandit; et qualis sermo effunditur, talis animus comprobatur, quia ex abundantia cordis os loquitur, prout Dominus *Matth. xii, 34.* ipse testatur.

SERMO QUINTUS

DE ORATIONIS NECESSITATE AC UTILITATE, SI DEBITE FIAT.

DIXIT *Jesus discipulis suis : Amen, Amen dico vobis, si quid petieritis Patrem in nomine meo, dabit vobis. Joann. xvi, 23.*

Quam necessaria nobis sit fervens incessabilisque oratio, docent nos infirmitas propria ad meritorie operandum, magnitudo irremediabilium periculorum quibus expositi sumus, crudelitas et potestas hostium nostræ salutis, impotentia nostra ad resistendum prævalendumque eis, excellentia bonorum quæ orationibus acquiruntur. Porro deprecandi et obtinendi fiduciam præstant consideratio infinitæ bonitatis, caritatis, misericordiæ et munificentiae

C Dei ad homines, abundantia beneficiorum quæ jamdudum etiam non petentibus, ingratissimè aversisque contulit: præsertim quod Deus Pater Unigenitum suum voluit propter nos incarnari, in mundo hoc conversari et crucifigi; quod item Filius Dei corpus suum et sanguinem quotidie nobis in Sacramento largitur; quod item ipsemet Deus toties ad orandum nos invitat, provocat et hortatur; quod etiam Veritas ipsa, quæ nec falli potest nec fallere, in evangelio hodierno multisque aliis sancti Evangelii locis exauditionem orantibus pollicetur, dummodo salutaria cum perseverantia postulentur. Nam, ut ait

Luc. XVIII.
1.

Salvator, Oportet semper orare, et non deficere.

Quod quamvis ad omnem pertineat Christianum, potissimum tamen ad religiosos, quorum præcipuum opus est indesinentem, puram ac fervidam Deo orationem offerre. Imo, ut asserit Climacus, Sicut canum proprium est latrare, sic monachorum orare. Atque ut recitat Cassianus, sancti monachi in Ægypto nec in exterioribus suis operibus ab oratione cessabant. Manducando quoque et cetera corpori necessaria faciendo, mentem ad Deum per orationes internas ubertim levare debemus : quia ut fideliter ait Chrysostomus, Nunquam oranti beneficia denegat, qui ut orantes non deficiant, sua pietate instigat. Denique ipsa oratio est actus nobilis et præclarus, actus felix, perutilis ac divinus. Propter quod ait Chrysostomus : Considera quanta sit tibi concessa felicitas, quanta gloria attributa, orationibus fabulari cum Deo, cum Christo miscere colloquia, optare quod velis, quod desideras postulare. Semper ergo orationem quasi clypeum habeamus ad manum. Sed quum hæc ita se habeant, quid est quod die ac nocte psallendo, Horas persolvendo, celebrando, et ultra hæc alia multa legendo, assidue orare videmur, et tamen in nostris defectuositatibus, paupertatibus, fæcibus et passionibus permanemus? Imo multi ita agentes, deficere magis quam proficere conspiciuntur : isti indubitanter non ita orant sicut oportet. Audiamus in primis quod beatissimus Moyses in Deuteronomio protestatur : Quum quæsieris (inquit) Do-

Deut. ix. 29.

minum Deum tuum, invenies eum, si tamen toto corde et tota tribulatione animæ tuæ quæsieris eum.

Qualiter autem orandus sit Deus, hoc est cum quanta humiliatione, contritione, custodia, instantia et fervore, facile est pensare ex his quæ inter homines fiunt. Ecce qualiter stat reus coram iudice temporali a quo misericordiam adipisci confidit, cum quali subiectione, affectione, pavore, tremore, promptitudine, attentio-

ne, inspectione ibi subsistit, seque iudici repræsentat; qualiter etiam stant famuli coram rege terreno, et mendicantes coram divitibus, vulnerati quoque coram medicis, maxime his a quibus sola prece petunt curari. Quum ergo cœlestem Judicem in multis offenderimus omnes, defectuosi- *Jacob. III, 2.*

que simus, vitiis ac passionibus læsi, si de nostris peccatis vere et digne dolemus, si veniam consequi, gratiam adipisci spiritualiterque curari ex corde appetimus, tunc juxta præactas similitudines Deo in oratione nos præsentemus, et coram ipso stare nosque habere non negligamus. Considerando Deum ut benignissimum, opulentissimum ac liberalissimum patrem, ipsum cum omni filiali affectu atque fiducia invocemus, ut necessaria et accommodata vitæ gratiæ conferre nobis dignetur, videlicet gratiam et virtutes, conservationem continuumque profectum in eis. Considerando Deum ut districtum, justissimum, infallibilem, metuendissimum judicem, non temporalem dumtaxat, sed æternam ac infernalem mortem et pœnam infligentem, nec aliquid mali impunitum deserentem, cum grandi formidine et tremore, cum omni contritione et humiliatione ipsum implorare non desistamus, ne meminerit *Ps. LXXVIII, 8.*

iniquitatum nostrarum antiquarum, neque quotidianarum culparum, nec secundum peccata nostra faciat nobis, sed cito anticipent nos misericordiæ ejus. Porro, Deum considerando ut omnipotentem, immensum et altissimum regem ac dominum universorum, cum summa reverentia et custodia atque decentia, cum indesinenti attentione et circumspectione exoremus eundem, ne nos tanquam sibi negligenter servientes reputet maledictos. Ipsum autem considerando ut piissimum medicum animarum, vulnera, læsiones, cicatrices, paupertates, inopias, indigentias nostras ei plenissime detegamus, peccata nostra universa et singula plenarie confitendo, nil temere excusando aut alleviando. Si ergo his modis invocaverimus Deum instantem, non dubium quin copio-

D

sissime exaudiemur; curabit, ditabit, roborabit, illuminabit, accendet, custodiet et perficiet corda nostra adorandus misericordissimusque Creator, qui nostram quaerit salutem, nec dando amittit.

Denique de hac re multa devota atque subtilia Climacus scribit : Oratio, inquit, est ei qui vere orat sententiæ et condemnationis curia, auditorium iudicii et tribunalis Dei ante futurum tribunal. Dicitur autem oratio ei qui vere et devote orat curia sententiæ et condemnationis, vel quia in ea orans se ipsum accusando profert contra semetipsum sententiam, et damnatione reum se profitetur, vel quia sententiam Dei contra reos attendit, et qualiter iniquos condemnet, considerat. Sic quoque oratio appellatur auditorium iudicii et tribunalis Dei ante futurum tribunal, quia in ea perpendit homo rigorem divini iudicii, et quam metuendum sit divino tribunali præsentari, sicut ait Apostolus : Horrendum est incidere in manus Dei viventis. Et ista considerat ante futurum tribunal, id est ante particulare iudicium, quod fit in morte, et ante generale iudicium, quatenus interim se ipsum accusando, damnando ac puniendo, divinæ evadat condemnationis sententiam, juxta illud Apostoli : Si nos ipsos dijudicarem, non utique iudicarem. Unde dixit abbas Elias : Ego tres res timeo : unam, quando egressurus sum de corpore ; secundam, quando occursurus sum Deo ; tertiam, quando de me proferretur sententia.

Iterum Climacus ait : Si ante visibilem iudicem aliquando ut reus stetisti, alterius typo, id est similitudine seu figura, in orationis tuæ adsistentia non egebis, id est, tunc ex temetipso potes perpendere qualiter in orando te debeas coram Deo habere, recordando videlicet quam formidolose et attente atque humiliter coram iudice terreno stabas et veniam implorabas. Si vero non adstitisti, neque exactos pœnis vidisti, saltem ex supplicatione infirmorum ad medicos, quando ab eis exuri et incidi debent, disce et tu taliter facere co-

ram Christo. Quorum intellectus verborum patet ex introductis.

Insuper de orationis efficacia et effectibus ait : Oratio est mundi consistentia, id est, per sanctorum et devotorum orationes ac merita mundus manet in esse; ornatus collectio, id est interioris decoris congregatio; Dei reconciliatio, lacrimarum mater et filia (nam lacrimas provocat, et ex lacrimis innovatur ac iteratur), peccatorum propitiatio, pons tentationum, tribulationum medius murus, præliorum contritio, angelorum opus, incorporeorum omnium alimentum, futura jucunditas, infinita (id est incessabilis) operatio, virtutum fons, charismatum conciliatrix, invisibilis profectus, deliciæ animæ, mentis illuminatio, desperationis securis, demonstratio spei, tristitiæ dissolutio, divitiæ monachorum et thesaurus quiescentium, furoris diminutio, speculum profectus, declaratio mensurarum. Hæc et alia multa perutilia scribit de oratione hic Climacus.

Dicitur autem oratio speculum profectus et declaratio mensurarum, quia ex modo et qualitate suæ orationis potest homo considerare et probabiliter scire quantum profecit, et ad qualem mensuram seu gradum virtutum devenit : quia secundum quod in orationibus suis stabilior, ferventior, frequentior, elevatior, humilior, lacrimosior, fiducialior fuerit, secundum hoc magis aut minus se profecisse potest et debet advertere. Nam, quamvis etiam viri perfecti quotidie aut frequenter pro suorum remissione peccatorum humillime deprecantur, sicut de sanctissimo fertur Hieronymo, quod quotidie pro venialibus et minutissimis suis culpis tam lacrimose oravit, tam dire se flagellavit, et in lamentis atque gemitibus se ita affecit quasi homicidium perpetrasset; tamen communiter et frequenter juxta diversitatem statuum et mensuram profectuum est diversa qualitas orationum. Propter quod ait S. Bernardus : Quatuor mihi videtur orandi modos exprimere Apostolus, dicens : Volo primum omnium fieri obsecrationes, ora-

Hebr. x, 31.

1 Cor. xi, 31.

1 Tim. ii, 1.

tiones, postulationes, gratiarum actiones. Sunt enim quos adhuc peccati conscientia terret atque excruciat, nondum accepta resistendi virtute, tunc scilicet quum ipsos in vitiorum cœno jacentes Spiritus veritatis primo irradiat, et excitans erubescere facit et timere dum vident immanitatem criminum suorum, exiguitatem meritorum; et velut ardentem coram se expavescentes gehennam, quoniam in se ipsis boni nihil inveniunt, aliunde apprehendunt unde juvântur. Nam, quoniam timent per se ipsos accedere, student quasi per alios supplicare : sicut dum dicimus, Sancte Petre, ora pro nobis. Vel si per se accedunt, ea commemorant per quæ exaudiantur, ut fit in obsecratione dum dicitur, Per passionem tuam libera nos, Domine. Porro, resistendi et continendi virtute accepta, per se accedit, præteritorum delictorum veniam quærens; et oratione sua loquitur Deo, in lamentis pœnitentiæ se affligens, et annos suos in amaritudine animæ suæ recogitans.

Is. XXXVIII.
15.

Deinde per hæc, hilaritate quadam et indulgentiæ concepta fiducia, accedit ad postulationem, qua jam quasi in gratiam Domini sui receptus, etiam pro suis conservis intercedere audet. Post postulationem gratiarum actio sequitur : dum quis se exauditum experitur et optatam consecutum gratiam, pro se ipso aut aliis gratulatur ac regratiatur.

Igitur juxta prædicta Dominum exoremus, laudemus, et in psallendo, celebrando, Horasque persolvendo, nos habeamus : singula verba distincte proferentes, sensum singulorum verborum pensantes, et in Deum cor erigentes ac defigentes. Et quilibet pro gratiis sibi necessariis oret, ut a passionibus et peccatis ad quæ se procliviores nescit, curetur, proficiatque in virtutibus illis oppositis. Omnes vero oremus, ut indesinenter in omni virtute et gratia concrescamus, Deo quotidie propinquiores, complacentiores, devotiores et gratiores efficiamur.

SERMO SEXTUS

DE ORATIONE ; ET QUOMODO AD EAM REQUIRATUR ACTUALIS INTENTIO, ET QUALITER FIAT AD IMPETRANDUM IDONEA ; ET AN DEBEAT ESSE DIUTURNA ET PLURIBUS UTENS VERBIS.

PETITE, et accipietis, ut gaudium vestrum sit plenum. Joann. xvi, 24.

Qualiter sit orandum, sanctus pater Benedictus in Regula sua compendiosissime docet, dicendo : Si dum hominibus potentibus aliqua volumus suggerere, non præsumimus hoc nisi cum humilitate et reverentia agere, quanto magis Domino Deo universorum cum omni humilitate et devotionis puritate est supplicandum? Et non in multiloquio, sed in puritate cordis et compunctione lacrimarum nos exaudiri sciamus : ideo brevis et pura debet esse oratio. Circa quæ beatissimi Benedicti verba sciendum, quod quædam sunt orationes

et preces ab Ecclesia seu ab Ordine institutæ et determinatæ, quas immutare non possumus, nec augere nec minorare ; aliæ sunt orationes arbitrariæ, peculiare, spontaneæ et privatæ, quas pro libitu suo potest quis protrahere sive præscindere.

Porro ad quæstionem qua quæritur an attentio requiratur ad orationem, S. Thomas respondens : Necessarium (inquit) est id sine quo res suum finem vel effectum consequi nequit. Est autem triplex orationis effectus. Primus est, promereri vitam æternam : qui effectus communis est omni actioni factæ ex caritate. Et hunc effectum sortitur oratio, si in principio adsit

attentio : nam, quamvis in prosecutione A
 seu continuatione orationis mens evage-
 tur, tamen vis primæ attentionis totam
 orationem meritoriam facit, sicut in aliis
 actibus caritatis informatis. Secundus et
 proprius orationis effectus est, impetrare
 quod petitur. Ad quem etiam sufficit vis
 primæ attentionis, quoniam illam Deus
 principaliter adspicit. Quod si illa defue-
 rit, oratio nec meritoria nec impetrati-
 va consistit, quum dicat Basilius : Divi-
 num auxilium, non remisse, nec mente
 huc illucque evagante est implorandum, B
 quoniam talis oratio non solum non im-
 petrabit, sed Deum plus irritabit. Unde
 ait Salvator : Spiritus est Deus ; et eos qui
 adorant, in spiritu et veritate oportet ado-
 rare. Tertius orationis effectus, quem et
 præsentialiter facit, est quædam dulcis re-
 fectio mentis, quam devote orans sentit
 orando : et ad hunc de necessitate requiri-
 tur actualis attentio. Propter quod ait Apo-
 stolus : Si orem lingua, mens mea sine
 fructu est. Et Salomon : Muscæ (inquit)
 morientes perdunt suavitatem unguenti. C
 Muscæ etenim morientes, sunt extraneæ
 cogitationes quæ suavitatem perdunt un-
 guenti, id est, orationis impediunt experi-
 mentalem dulcedinem. Est autem triplex
 attentio orationis vocalis : prima, qua ho-
 mo attendit verba orationis, ne erret in
 eis ; secunda, qua sensum attendit verbo-
 rum ; tertia, qua finem suæ orationis, vi-
 delicet Deum et id quod petit et cupit ab
 eo adipisci, attendit. Et hæc attentio tertia
 est magis necessaria, et idiotis quoque
 possibilis ; atque in tantum interdum au-
 getur et superabundat, quod omnium alio-
 rum obliviscitur orans, mente sua Deo ve-
 hementer intenta. — Itaque evagatio quæ
 præter propositum accidit animæ ex hu-
 mana instabilitate, fructum orationis non
 tollit. Ait namque Basilius : Si debilitatus
 a peccato, fixe orare non potes, quantum
 vales te ipsum cohibeas ; et Deus ignoscit,
 quoniam non ex negligentia, sed ex fragi-
 litate non potes ut oportet adistere co-
 ram Deo. Hæc Thomas.

Joann. iv,
 24.

I Cor. xiv,
 14.
 Eccle. x, 1.

Circa quæ aliqua sunt addenda. Primo,
 quod quamvis ad duos primos orationis
 effectus dicatur actualis attentio in princi-
 pio habita sufficere, ita quod evagatio sub-
 sequens illos non impedit, nihilo minus
 certum est quod evagatio facit orationem
 ad duos primos effectus minus idoneam,
 utpote minus meritoriam et minus impe-
 trativam. Et quanto est ferventior produ-
 ctiorque attentio, tanto oratio meritoria et
 impetrativa magis consistit ; nec homo
 meretur gloriæ augmentum, nisi crescat
 in caritate, quum caritatis intentioni es-
 sentiale correspondeat præmium. Rursus
 sciendum, quod si ex fragilitate aut negli-
 gentia veniali desit actualis attentio in ora-
 tionis principio, et tamen in prosecutione
 orationis redeat homo ad cor et fiat atten-
 tus, adhuc oratio meritoria erit et impe-
 trativa, quoniam caritate informatur, et
 mens se refert ad Deum. Est itaque valde
 nobis conandum ut actualis attentio in
 oratione continuetur, fervescat et perseve-
 ret. Tanto plus ad hoc niti debemus, quan-
 to plus adversarius nostræ salutis oratio-
 num attentionem impedire conatur : scit
 enim, per orationis instantiam ac fervorem
 se maxime supplantari. Hinc abbas Aga-
 thon interrogatus quæ virtus in conversa-
 tione plus haberet laboris, respondit : Puto
 non esse alium talem laborem, qualis est
 orare Deum. Dum enim voluerit homo
 orare, semper dæmones festinant inter-
 rumpere per evagationem ejus orationem,
 scientes quod ex nulla re nisi per oratio-
 nem ad Deum fusam vincantur. Siquidem
 in omni alio labore quem homo positus in
 conversatione religiosa assumpserit, quam-
 vis instanter et toleranter agat, habet ta-
 men aliquam requiem ; in oratione autem,
 usque ad ultimam exhalationem opus est
 semper magni certaminis studio.

Præterea, in Regula S. Basilii quæritur,
 quomodo obtinere quis poterit ut in ora-
 tione mens ejus non evagetur. Ad quod
 respondet Basilius : Si certus sit se adsi-
 stere ante conspectum Dei. Si enim homo
 principem et judicem suum terrenum vi-

dens et alloquens, non sibi licitum credit A oculis vagari et aliorum adspicere, quanto magis qui accedit ad Dominum, nusquam ad alia debet movere oculum cordis, sed intentus esse in eum qui scrutatur corda et renes, ut impleatur quod ait Apostolus, Volo viros orare in omni loco, levantes puras manus sine ira et disceptatione?

1 Tim. II, 8.

Rursus in eadem quæritur Regula, si possibile est hominem obtinere ut in omni loco et tempore non vagetur mens ejus, et quomodo id fieri potest. Respondet magnus Basilius : Quod possibile sit, ostendit qui dixit : Oculi mei semper ad Dominum; et iterum, Providebam Dominum in conspectu meo semper, quoniam a dextris est mihi ne commovear. Quomodo autem possibile sit jam diximus, utpote, si non demus otium animæ nostræ, sed in omni tempore de Deo et de operibus, donis et beneficiis ejus cogitemus, eademque cum confessione et gratiarum actione semper volvamus in mente.

Ps. XXIV, 15.

Ps. XV, 8.

Ps. XLVI, 8.

Iterum quæritur ibi, quid est, Psallite C sapienter. Respondet Basilius : Quod est in cibis corporeus gustus, unumquemque cibum cujus sit saporis discernens, hoc est in verbis sacræ Scripturæ sapientiæ sensus. Si quis ergo sic intellectum suum intendat in verba singula psalmodiæ, sicut gustus intentus est ad discretionem saporis ciborum, iste complet quod dictum est, Psallite sapienter.

Nunc videndum, an oratio esse debeat diuturna et verbis proluxa. Et videtur quod non, quum in Evangelio Christus testetur : D

Matth. VI, 7.

Orantes, nolite multum loqui. Et Climacus scribit : Ne coneris multum loqui in oratione, ut non ad quæstionem verborum mens tua dissipetur. Unum verbum publicani Deum ad misericordiam flexit, et unum verbum fidele salvum fecit latronem; David quoque dicendo, Peccavi Domino, Deum sibi reconciliavit. Multiloquium plerumque in oratione pereffudit mentem et phantasticavit. Ad hæc S. Thomas respondet : Quantitas rei suo fini

II Reg. XII, 13.

debet esse proportionata, sicut quantitas medicinæ sanitati. Finis autem orationis vocalis, est interiorum cordis fervorem accendere : ideo convenit orationem tamdiu durare ut utile est ad inflammationem interni affectus in Deo. Quumque oratio sine fatigue et tædio continuari non potest, est finienda. Nam mentis attentio et sancta affectio non est cito rumpenda quando potest durare. Protendenda igitur est oratio, non aridis verbis, sed continuato affectu. Unde et Christus in oratione pernoctasse, Luc. VI, 12. et passione instante prolixius orasse ad nostram eruditionem describitur. Interdum quoque, orans gratiose a Deo prævenitur, illustratur, accenditur, roboratur, ita ut orationem multis continuat horis, etiam quasi absque difficultate, imo cum ingenti jucunditate : quemadmodum legitur de abbate Arsenio, quod a vespere sabbati extendebat manus suas ad cælum orans, donec mane die dominicæ ascendens sol illustraret faciem ejus, et sic residebat. Abbas quoque Dulas de beatissimo abbate Bessarione narravit : Veni aliquando in cellam Patris mei, et inveni eum stantem ad orationem, et manus ejus erant extensæ in cælum; permansitque hoc faciens jugiter per quatuordecim dies.

Luc. VI, 12.

Ibid. XXII, 43.

Igitur juxta præhabita discamus et assuescamus orationibus sanctis insistere, et ante orationem ad eam nos præparare per mentis recollectionem et salutarium rerum meditationem. Actualement quoque attentionem continuare atque intendere seu augere, et magis ac magis inflammare conemur, infinitam Dei bonitatem, caritatem, pietatem, justitiam et excellentiam intuendo, proprias etiam calamitates, culpas, defectuositates, pericula ponderando. Et quoties nos evagari sentimus, mentem ad Deum protinus revocemus, et de ipsa distractione pœniteamus, ac recentem concipiamus fervorem; atque in fine paululum meditemur dum vacat, veniamque de distractionibus et defectuositatibus in oratione habitis postulemus.

Postremo, quamvis quatuor ponantur

partes seu species orationis, interdum tamen plures earum, et non raro omnes, in una oratione concurrunt admiscenturque. Et talis oratio quæ obsecrationem, gratiarum actionem et laudem Dei includit, efficacissima est ad impetrandum. Præstantissima item est illa oratio quæ ex puro Dei amore et zelo boni communis procedit, dum scilicet Dominum exoramus ut gratiam suam super omnes effundat, generalem et plenam reformationem efficiat, vivis mortuisque succurrat, quatenus ipse in omnibus et ab omnibus super omnia honoretur. Ideo talibus precibus insistamus assidue, ad laudem et gloriam ejus.

DOMINICA

POST ASCENSIONEM DOMINI

ENARRATIO IN EPISTOLAM

ESTOTE PRUDENTES, ET VIGILATE IN ORATIONIBUS. I Petr. iv, 7-11.

BEATUS Archiapostolus in præsenti A epistola instruit et hortatur nos ad veram discretionem, ad diligentiam sanctam, ad orationem instantem, ad caritatem continuam, ad sermonis utilitatem, ad gratiarum actionem. Itaque ait :

Estote prudentes, id est discreti ac providi, oculum considerationis internæ circumducentes longe lateque, præterita rememorando, præsentia perpendendo, et prævidendo futura, ut in omnibus habeatis vos ordinate. Prudentia quippe est virtutum auriga ac moderatrix atque magistra. B

Rom. xii,
17.

Hoc est quod ad Romanos dicitur : Estote providentes bona non tantum coram Deo, sed etiam coram omnibus hominibus. *Et vigilate*, hoc est, diligentes ac attentī estote, *in orationibus* : quia non sufficit humana prudentia, nisi directio adsit divina, juxta illud Sapientis, Cor hominis disponit

Prov. xvi, 9.

viam suam, sed Dei est dirigere gressus ejus. Ideo cum Psalmista orandum est : Gressus meos dirige, Domine, secundum eloquium tuum, et non dominetur mei omnis injustitia. Hoc ipsum docet et Sal- C vator : Vigilate, inquit, omni tempore orantes, ut digni habeamini fugere omnia mala quæ ventura sunt, et stare ante Filium hominis. Ait hic Beda : Bene in orationibus vigilare jubemur, ut dum oramus, omnis cogitatio carnalis et sæcularis abs-

Ps. cxviii,
133.

Luc. xxi, 36.

cedat, nec quidquam tunc cogitet animus præter id quod precatur. Subrepat namque frequenter hostis antiquus et subtiliter fallens preces nostras, a Deo cor avocat, ut aliud habeamus in corde et aliud proferamus in voce, quum tamen intentione sincera debeat Deum, non sonus vocis, sed animi sensus, orare.

Ante omnia autem mutuam in vobismetipsis caritatem continuam habentes. Caritas enim est summa et maxime necessaria virtus, forma, vita, motrix ac imperatrix virtutum. Ideo summe debemus esse solliciti ut in vera et spirituali stemus, perseveremus proficiamusque caritate, sine qua nihil est meritorium, nil Deo acceptum. Hinc ad caritatis profectum cetera sunt virtutum exercitia ordinanda. Porro, quod ait, « ante », non est intelligendum de prioritatem temporis, sed ordinis seu naturæ. Virtutes enim connexæ sunt, nec caritas in vita hac ante fidem et spem valet haberi; sed principalissime quærenda et conservanda est caritas. Unde ad Colossenses scriptum est : Super omnia caritatem Coloss. iii, habete, quod est vinculum perfectionis. 14.

Quia caritas operit multitudinem peccatorum. Dum enim infunditur caritas, universa quæ inerant peccata delentur, quoniam simul esse non possunt caritas et mortale peccatum. Per actum vero carita-

tis dimittitur culpa quantum ad pœnam, ita quod quanto major est ardor caritatis in Deum et proximum, præsertim in Deum, tanto plus de peccati pœna dimittitur; potestque fervor caritatis sic crescere, quod tota dimittatur pœna peccati. Hic etenim ardor est spiritualis ignis quo consumuntur peccata quantum ad culpam et pœnam. Propter quod de beatissima Maria

Luc. vii, 47. Magdalene loquitur Christus : Dimittuntur ei peccata multa, quoniam dilexit multum.

In eo quoque qui circa proximorum conversionem, correptionem et correctionem sollicitus est, caritas operit, tegit et tollit multitudinem peccatorum, ita ut non videantur, id est, non imputentur a Deo ad puniendum, sicut orat Propheta : Averte faciem tuam a peccatis meis. Unde denuo

Ps. l, 41.

ait : Beati quorum tecta sunt peccata. Hinc *Jacob. v, 20.* Jacobus ait : Qui converti fecerit peccatorem ab errore viæ suæ, salvabit animam ejus a morte, et operiet multitudinem peccatorum.

Hospitales invicem estote sine murmuratione, ut peregrinos et pauperes propter Deum hilariter suscipiatis, bene tractetis, caritative repausetis. Hinc ad Hebræos dicitur : Caritas fraternitatis maneat vobiscum, et hospitalitatem nolite oblivisci. Non enim sufficit caritatem intus habere, nisi tempore opportuno exhibeatur in opere. Idcirco, sicut proximos amare tenemur, ita et opera caritatis ac misericordiæ eis impendere obligamur, juxta exigentiam loci ac temporis. Idcirco in Canonica

Hebr. xiii, 1, 2.

Joannis scriptum est : Non diligamus verbo neque lingua, sed opere et veritate. Caritas siquidem otiosa non est : ideo signum dilectionis, est exhibitio operis. *Unusquisque, sicut accepit gratiam, in alterutrum illam administrantes*, hoc est, quilibet gratiam sibi collatam communicet proximis, impendendo eis consilium sive auxilium loco et tempore congruo, quantum potest. Caritas enim non quarit quæ sua sunt tantum, sed et quæ aliorum. Hinc in Apocalypsi dicitur : Qui audit, dicat, Veni. *Sicut boni dispensatores multi-*

I Joann. iii, 18.

I Cor. xiii, 5.

Apoc. xii, 17.

formis gratiæ Dei, id est donis gratiæ cœlestis bene et fructuose utentes, erogando et exhibendo ea in proximos. Dicitur autem gratia multiformis, quia multiplices habet effectus et species, ramificaturque in habitus virtutum atque donorum. Hinc ait Christus in Evangelio : *Negotiamini dum venio. Et fructum requirit ex talentis quæ dedit.* *Luc. xix, 13.*

Si quis loquitur, quasi sermones Dei, id est, verba salubria proferat et divina ad Dei honorem et audientium ædificationem, sicut et Paulus ait apostolus : Omnis sermo malus ex ore vestro non procedat, sed qui utilis est ad ædificationem, ut det gratiam audienti. Vitanda sunt itaque verba inania, quibus cordis puritas inquinatur, tranquillitas impeditur, et mens vaga ac dissoluta efficitur. Vel, Quasi sermones Dei, hoc est, non sibi, sed Deo adscribat bonum quod dicit, ut verba sua reputet non sua, sed Dei, in quantum sunt bona, quemadmodum ait Salvator : Non enim vos estis qui loquimini, sed Spiritus Patris vestri qui loquitur in vobis. Imo, secundum Apostolum, Nemo potest dicere, Dominus Jesus, nisi in Spiritu Sancto. *Si quis ministrat, Deo debite serviendo, vel proximis necessaria exhibendo, tanquam ex virtute quam administrat Deus*, id est, hoc se facere arbitretur, non propriis viribus, sed Dei auxilio et virtute desuper data, quum asserat Christus : Sine me nihil potestis facere. Unde, secundum apostolum Paulum, Deus est qui operatur in nobis velle et perficere, pro bona voluntate, hoc est ex sua voluntate piissima. Deinceps, quid habes quod non accepisti ? Propterea Joannes Baptista ait : Non potest homo accipere quidquam, nisi datum fuerit ei de cœlo. Tanto ergo humiliter impendat quisque proximo suo bonum omne quod potest, quanto certius novit se a se ipso non habere quod impendit. Hinc omnis vanitas atque præsumptio sunt spernendæ, dicente Apostolo : Si accepisti, quid gloriaris quasi non acceperis ? Itemque : Qui gloriatur, in Domino gloriatur.

Ephes. iv, 29.

Matth. x, 20.

I Cor. xii, 3.

Joann. xv, 5.

Philipp. ii, 13.

I Cor. iv, 7.

Joann. iii, 27.

I Cor. iv, 7.

Ibid. i, 31.

Ut in omnibus rebus et factis honorificetur, hoc est, verbis et factis laudetur et honoretur, Deus, dum ei de omni bono gratiæ referuntur, et ipse reverenter ab omnibus colitur : hinc et Christus apud *Matth. v, 16.* *Matthæum, Videant (inquit) opera vestra bona, et glorificent Patrem vestrum qui in cælis est ; per Jesum Christum* *I Tim. ii, 5.* *per mediatorem Dei et hominum, quia per ipsum habemus accessum ad Deum, et* *Ephes. ii, 18.* *per ejus doctrinæ ac legis observantiam, Deo Patri, imo superbeatissimæ Trinitati honorificentiam debitam exhibemus. Ideo* *I Cor. x, 31.* *Paulus hortatur : Omnia in gloriam Dei facite. Cui, videlicet Christo, est honor et gloria, quia a bonis omnibus honoratur, tanquam summe virtuosus ac omnibus præsidens (honor namque debetur virtuti ac potestati prædentiali ; ei quoque est gloria, hoc est beatitudo, lætitia ac forma clarissima), et imperium, quoniam omni-*

bus præest et imperat. Et ista debentur sive conveniunt Christo secundum utramque suam naturam. Siquidem etiam secundum suam humanitatem, data est ei *Matth. xxviii, 18.* *omnis potestas in cælo et in terra, sedetque in potioribus bonis Patris, et per totum mundum clarificatum est nomen ejus. Potissimum autem conveniunt ista Christo secundum suam divinitatem. Imo toti supergloriosissimæ Trinitati convenit et debetur unus et summus honor, tanquam uni omnium regi ac domino prorsus altissimo, unaque gloria et unum imperium, dicente Apostolo : Soli Deo honor et gloria. Unde per Isaiam testatur : Ego Dominus, hoc est nomen meum ; gloriam meam alteri non dabo. Ideo ait Psalmista : Non nobis, Domine, non nobis, sed nomini tuo da gloriam. De omni etenim bono debetur principalis et ultima laus Deo. In sæcula sæculorum, id est æternaliter.*

SERMO PRIMUS

DE PRUDENTIA, DISCRETIONE, ORATIONE, CARITATE ET HOSPITALITATE,
CHRISTIANO NECESSARIIS.

DIC sapientiæ, Soror mea es, et prudentiam voca amicam tuam. Prov. vii, 4.

Inter sapientiam atque prudentiam hoc interest, quod sapientia proprie est amorosa seu affectiva cognitio divinorum, prudentia vero est efficax cognitio agendorum et vitandorum, hoc est, quid agendum sit, quid vitandum. Sapientia ergo dignior est quam prudentia : idcirco debemus sapientiam singularius adamare, et sororem vocare. Prudentia quoque necessaria est, et amica vocanda.

In primis ergo docet nos gloriosissimus apostolici ordinis princeps, in præsentī epistola, ut simus prudentes, sicut et Christus in Evangelio loquitur : Estote pru-

dentes sicut serpentes ; et iterum, Habete in vobis sal, id est discretionem. Prudentia etenim docet non solum quid agere debeamus, sed etiam ubi et quando, et qualiter, utpote apto loco et congruo tempore, atque cum moderamine. Et istud servare, et in agendis ordinate procedere, maxime confert et adjuvat ad proficiendum celeriter in omni virtute. Propter quod ait Apostolus : Omnia honeste et secundum ordinem fiant in vobis. Unde, tempore Missæ ac divini Officii, debemus Deo cum omni D cordis custodia esse intenti, et de salute animarum nostrarum sollicite cogitare, peccata deflere, pro gratia exorare, omnes cogitationes carnales, curas mundanas, animi dissolutiones, cordis ac sensuum

Matth. x, 16.

Marc. ix, 49.

I Cor. xiv, 40.

evagationes prorsus abjicere. Unde prudentia convenienter designatur per sal. Primo, quoniam cibaria communiter absque sale insipida sunt, ita aliarum virtutum actus absque prudentiæ directione interno carent sapore. Ideo ait Bernardus : Prudentia semper necessaria est, quia iustitia dum modum excedit, crudelitatem gignit, et dissolutionem nimia pietas parit, sæpeque vitium est, quod virtus putatur. Secundo, quoniam sicut per sal carnes a putrefactione præservantur, ita per prudentiam seu discretionem virtutes ceteræ conservantur, ne a vitiis sibi oppositis corrumpantur. Per prudentiam equidem vitat homo occasiones et causas gulæ, luxuriæ, etc. Hinc ait Isidorus : Quidquid boni sine discretionem feceris, vitium est; quidquid cum discretionem feceris, virtus est. Imo, ut scribit Bernardus, sicut discretio absque caritatis fervore jacet, sic fervor vehemens absque discretionis temperamento præcipitat. Idcirco laudabilis est qui habet utrumque, quatenus fervor discretionem erigat, atque fervorem discretio regat. Et certe quo in aliquo exstat zelus ferventior, spiritus vehementior, caritasque profusior, eo majori indiget discretionem, quæ zelum supprimat, spiritum temperet, ordinet caritatem.

1 Petr. iv,
7 et seq.

Præterea, juxta Archiapostoli documenta, simus in orationibus vigilantes : et de hoc in multis jam sermonibus plurima sunt inducta. Specialiter vero ad orationes continuas ac ferventes animare nos debet quod devotus ac dulcis ait Bernardus : Rogo (inquiens) vos, fratres, ut semper habeatis ad manum tutissimum orationis refugium. Nemo vestrum parvi pendat orationem suam. Dico enim vobis, quoniam Deus quem oramus, eam non parvi pendit. Priusquam egressa sit ab ore nostro, scribi eam jubet in libro suo; et unum ex duobus indubitanter sperare debemus, quia aut dabit quod petimus, aut quod nobis novit utilius. Ideo infructuosa non erit oratio, quandoquidem tanta super te cura est Deo tuo, ut quoties quæris quod

A tibi utile est, non te audiat super hoc, sed mutet illud dono utiliori. Verumtamen ut oratio sit tam fructuosa, oportet ut fiat cum diligentia et affectu. Unde in epistola hodierna apertissime dicit beatissimus Petrus ut in orationibus vigilemus, hoc est, attenti diligentesque simus. De hoc rursus dicit Bernardus : Illud breviter dico, quosdam in oratione quamdam mentis ariditatem ac hebetudinem experiri, ut labiis tantum orantes, non satis attendant neque quæ proferunt neque cui loquuntur, pro eo quod, velut ex consuetudine quadam, cum minus digna reverentia et sollicitudine accesserunt. In cunctis ergo actibus nostris multa opus est animi vigilantia, præcipue in oratione. Quamvis enim semper videamur a Deo, in oratione tamen etiam præsentamus et ostendimus nosmetipsos ei, quasi facie ad faciem loquentes cum eo. Sic ergo oret qui orat; sic se ipsum consideret et attendat, tanquam præsentatus sit Domino majestatis. Credimus angelos sanctos adstare orantibus, offerre Deo preces votaue hominum, ubi tamen levare puras manus perspexerint.

Insuper, juxta apostolica documenta, habeamus in nobis indesinenter mutuam caritatem continuam, ut unusquisque diligat omnem proximum suum (omnem videlicet hominem in hoc mundo viventem, felicitatis capacem, communionem naturæ specificæ sibi proximum) sicut se ipsum, desiderando illius salutem, et benefaciendo eidem, prout vera requirit dilectio. Ait namque Paulus apostolus : Plenitudo legis, est dilectio. Et : Qui diligit proximum suum, legem implevit : nam, non adulterabis, non perjurabis, non falsum testimonium dices, non fornicaberis, non occides; et si quod est aliud mandatum, in hoc verbo instauratur, Diliges proximum tuum sicut te ipsum. Præterea, qualiter caritatem plus potuit commendare S. Joannes apostolus, quam in eo quo dixit, Deus caritas est, et qui manet in caritate, in Deo manet, et Deus in eo? Ideo Paulus hortatur : Estote imitatores Dei, sicut filii caris-

Rom. xiii,
8-10.

1 Joann. iv,
16.

Ephes. v,
1, 2.

simi; et ambulate in dilectione, sicut et Christus dilexit nos. Et utique quam desideranda et conservanda nobis est caritas, tam detestanda ac fugienda est nobis maledicta invidia, quæ est diaboli proles et omnium mors virtutum. Porro desideranda semper est caritas, quoniam operit multitudinem peccatorum. Caritas namque movet et incitat hominem ad ignoscendum proximo suo et ad deprecandum pro eo; et plus dolet de proximi culpa quam de injuria propria, maxime vero de inhonoratione Dei et ejus offensa. Sed sicut homo se habet circa proximos suos, ita meretur, et dignum est, ut circa ipsum se habeat Deus; sicut et Christus testatur: *Matth. vii, 2.* Qua mensura mensi fueritis, remetietur vobis. Quemadmodum ergo per caritatem homo indulget injuriatoribus suis, ita per caritatem eandem meretur ut Deus sibi indulgeat, et peccata ejus operiat, hoc est, ad puniendum non videat. Ideo Christus ait: *Luc. vi, 37.* Dimittite, et dimittemini.

Amplius, juxta præsentis doctrinam epistolæ, debent Christiani hospitales consistere, et Christum in suis membris, hoc est peregrinis pauperibusque, suscipere. *Matth. xxv, 35.* Ipse etenim ait: Hospes fui, et collegistis me. Nam quod propter eum suis impenditur membris, tam acceptum est ei ac si suæ exhiberetur personæ. Christiani namque ad pietatis opera potissimum obligantur, pro posse suo agendo. Nec solum debent eleemosynam, hoc est aliquid cibi, dare, sed et cetera misericordiæ opera exercere, videlicet nudos vestire, peregrinos et pauperes hospitari, etc., et proximis facere ut sibi fieri vellent, si indigerent. Sed, heu! pauci hoc implent. Imo multi tam avari atque injusti sunt, et ab omni

A Dei timore ac proximi caritate tam alieni, ut peregrinis et egenis faciant fraudem in vendendo sumptusque computando. O quam vitiosi sunt isti! Habent enim animas suas venales, et diabolo vendunt eas. *Eccli. x, 10.*

Præterea unusquisque dona sibi a Deo concessa gratis, et caritative et liberaliter suis communicet proximis cum omni humilitate et recta intentione, ut si quid melius novit, si quid amplius potest, si in virtutibus plus abundat, proximos exhortetur, informet, corripiat; et sicut ipse a Deo misericordiam consecutus est, sic misericordiam proximis suis impendat et a Deo impendi peroptet. Valde complacet Deo, habere cor pietatis visceribus affluens, liberalitate et caritate abundans; talique homini Deus copiosa largitur gratiarum charismata. Siquidem sicut ille se habet circa proximos suos, ita et Deus se habet circa illum.

Postremo, quum apostolus Paulus dixisset, Hospitalitatem nolite oblivisci, adjecit: *Hebr. xiii, 2.* Per hanc enim placuerunt quidam, angelis hospitio susceptis. Cujus verbi iste est sensus, quia sicut in Genesi legitur, *Gen. xviii, xix.* Abraham patriarcha, qui fuit hospitalitati valde intentus, dum quadam die sedisset in ostio tabernaculi sui, vidit tres venerabiles personas, quas homines esse putavit, occurritque eis, rogans ut ad suum declinarent hospitium; et fuerunt tres angeli in humana specie apparentes, et transierunt cum Abraham ad suum hospitium. Deinde duo angeli ex illis, relicto Abraham, ingressi sunt Sodomam; et ibi Lot, nepos Abraham, accepit eos hospitio, putans quod homines essent. Unde, quoniam Abraham et Lot hospitales fuerunt, angeli sancti ad eos divertere dignabantur.

ENARRATIO IN EVANGELIUM

QUUM VENERIT PARACLETUS, QUEM EGO MITTAM VOBIS A PATRE, SPIRITUM VERITATIS, ETC. Joann. xv, 26, 27; xvi, 1-4.

QUONIAM modo instat solennitas Pentecostes, in qua Dominus noster Jesus Christus misit Apostolis Spiritum Sanctum, sicut ante passionem et etiam post resurrectionem suam eis frequenter prædixit; idcirco in dominica ista quæ præfatæ sacratissimæ solennitati est proxima, convenienter legitur evangelium præsens, in quo recitatur qualiter Christus missionem ac operationem Spiritus Sancti Apostolis prænuntiavit atque promisit. Et sumptum est evangelium istud ex sermone Christi post Cœnam. In quo quum Christus declarasset obstinationem et infidelitatem Judæorum, inter cetera dicens: Si non venissem, et locutus eis non fuisset, peccatum non haberent; nunc autem excusationem non habent de peccato suo, quia odio habuerunt me gratis; his verbis Christus protinus addit verba evangelii hujus:

Quum venerit Paracletus, quem ego mittam vobis a Patre, Spiritum veritatis, qui a Patre procedit, ille testimonium perhibebit de me. Hoc completum fuit in die Pentecostes, in quo sancti Apostoli, accepto Spiritu Sancto, et ex ejus illuminatione et gratia impleti, intellectum totius sacræ Scripturæ, omnium quoque linguarum adepti notitiam, exeuntes de cœnaculo et conclavi in quo Spiritum Sanctum acceperunt, ingressique templum Jerusalem, cœperunt prædicare de Christo et omnium gentium linguis loqui, atque per veteris Testamenti scripturas probare quod Jesus Nazarenus esset Messias in lege promissus. Specialiter vero beatissimus Petrus, tanquam Apostolorum prælatus et caput, apertissime ac virtuosissime loque-

batur. Sicque per eum Spiritus Sanctus tale testimonium perhibuit Christo, quod Judæi qui paulo ante blasphemaverunt Christum, compuncti sunt corde et pœnituerunt, ac credere cœperunt in eum quem occiderunt, quemadmodum etiam ante passionem suam Christus eis prædixit: Quum exaltaveritis (inquit), id est, cruce suspenderitis, Filium hominis, tunc cognoscetis quia ego sum. Unde, die Pentecostes, conversa ac baptizata fuerunt tria millia Judæorum.

Itaque ait Salvator: « Quum venerit », non locum mutando, sed in signo visibili de novo apparendo ac operando, et gratiam maximam infundendo, « Paracletus », id est Spiritus Sanctus: qui dicitur Paracletus, id est consolator, quia spem veniæ dando lætificat pœnitentem, atque divinarum gratiosam contemplationem infundendo caritatemque accendendo exhilarat mentem; « quem ego mittam vobis », dando et influendo cordibus vestris charismata gratiarum ipsius. Per hoc demum quod Christus dixit, Quem ego mittam vobis, insinuat quod Spiritus Sanctus ab ipso vere procedat: quoniam uni divinæ Personæ non competit mittere aliam secundum naturam divinam, nisi ratione originis seu auctoritatis ad illam. Unde nunquam legitur Pater missus a Filio vel Spiritu Sancto. Filius vero legitur missus a Spiritu Sancto, sicut ait per Isaiam: Et nunc Dominus misit me, et spiritus ejus. Itemque: Spiritus Domini super me, eo quod unxerit me; evangelizare pauperibus misit me. Quæ verba apud Lucam de se prædicta fatetur Christus. Sed hoc convenit Christo ex parte humanitatis assumptæ.

Joann. xv, 22, 23.

Joann. viii, 28.

Act. ii, 41.

Is. xlviii, 16.

Ibid. lxi, 1.

Luc. iv, 18.

Porro, quod addit, « a Patre », exponi potest dupliciter. Primo sic : Quem mittam vobis a Patre, tanquam a fonte de quo Spiritus Sanctus procedit. Secundo sic : Quem mittam vobis a Patre, id est virtute divina quam per generationem æternam accepi a Patre. Filius namque habet a Patre quod Spiritus Sanctus a se æternaliter procedit, ac temporaliter mittitur.

« Spiritum veritatis », id est Spiritum meum, qui sum veritas et sapientia Patris. Unde de Spiritu Sancto dicitur ad Romanos : Si quis Spiritum Christi non habet, hic non est ejus. Dicitur quoque Spiritus Sanctus, Spiritus veritatis, quia et ipse est essentialiter veritas ; est etiam examen et doctor totius veritatis. « Qui a Patre procedit ». Hoc non ait Filius per sui exclusionem, sed ne videretur insinuasce quod Spiritus Sanctus a se, et non a Patre, procederet, eo quod dixit : Quem ego mittam vobis. Quemadmodum equidem totus mundus a tribus Personis creatus est, non in quantum sunt tres distinctæ personæ, sed unus Deus et unum fontale principium, in quo est una essentia et una potentia ; sic Spiritus Sanctus procedit a Patre et Filio, non secundum quod sunt distinctæ personæ, sed in quantum sunt unum, videlicet prout in ambobus est una essentia et una voluntas. « Ille testimonium perhibebit de me », sicut modo expositum est.

Et vos testimonium perhibebitis de me, prædicando, miracula faciendo, omnium gentium linguis loquendo. Hinc quum Petrus claudum a nativitate curasset, dixit Judæis : Deus patrum nostrorum glorificavit Filium suum Jesum quem occidistis. Et tunc ex prædicatione Petri conversa fuerunt quinque millia Judæorum. Quumque principes sacerdotum jussissent Apostolis non prædicare magis de Christo Jesu, Petrus, qui tempore passionis ejus, interrogatione ancillæ contrerritus, Christum negavit, et Joannes, qui cum ceteris Apostolis fugit, ingenti auctoritate atque constantia responderunt : Obedire oportet Deo magis quam hominibus. *Quia ab initio mecum*

estis, id est, ab exordio prædicationis meæ, mihi stabiliter adhæsistis, et audistis verba mea, et opera mea ac miracula conspexistis : ideo estis idonei testes. Hinc Joannes in exordio primæ suæ Canonice, certitudinem apostolicæ prædicationis seu contestationis insinuans, ait : Quod audivimus, quod vidimus oculis nostris, quod perspeximus, et manus nostræ tractaverunt de Verbo vitæ, quod vidimus et audivimus, annuntiamus vobis. ^{1 Joann. 1, 1, 3.}

Sed *hæc locutus sum vobis* de adventu Spiritus Sancti, et aliis multis, *ut non scandalizemini*, id est, ut non cadatis a fide et justitia tempore persecutionis, sed firmi sitis et patientes in omni adversitate, ex promissionibus et consolationibus istis quas facio vobis. Verumtamen post hæc verba scandalizati fuerunt Apostoli ad modicum tempus, in triduo mortis Christi ; sed, Spiritu Sancto accepto, manserunt fortissimi.

Absque synagogis facient vos, id est, tanquam excommunicatos ac perfidos abjicient vos infideles Judæi a sua societate et communione, et a suis materialibus synagogis, prout in Actibus Apostolorum Paulo et Barnabæ legitur accidisse. *Sed venit hora*, id est, tempus jam prope est, *ut omnis qui interficit vos, arbitretur obsequium se præstare Deo*, id est, tam pessimis vos esse putabunt, ut Deo gratum reputent vos necare, quia judicabunt vos esse seductores atque hypocritas. Sed quoniam teste Ambrosio, intentio imprimit operi speciem ; estque commune dictum, quod bonum est opus, si finis sit bonus, et recta intentio : videtur quod persecutores Apostolorum et martyrum bene egerunt, quia arbitrabantur se Deum honorare in occisione Apostolorum et martyrum. Dicendum, quod duplex est finis, videlicet finis operis, et finis operantis. Finis operis, est finis operationi proportionatus et congruus ; finis autem operantis, est finis quem operans sibi præfigit, adinvenit seu confingit, quum tamen non sit operi suo proportionatus et consonus : ut si quis ho-

Rom. viii, 9.

Act. iii, 13.

Ibid. iv, 4.

Ibid. v, 29.

B

C

D

1 Joann. 1,

1, 3.

Act. xiii,

xiv.

stem suum propria auctoritate occidat, quatenus illo occiso, possit pacifice vivere. Verbum ergo Ambrosii intelligendum est de fine seu intentione operis. Hinc patet error periculumque multorum, qui mala quædam agendo, se ipsos excusant justificantque, dicentes, Nil mali intendimus, etc., quum tamen opus eorum sit tale ut bono nequeat fieri fine, vel factum non sit ab eis fine sibi proportionato. Persecutores quoque Apostolorum ac martyrum tot fidei argumenta viderunt, utpote tot et tanta miracula, saltem communiter, quod credere debuerunt ac tenebantur, nec per suam ignorantiam excusantur.

Et hæc mala facient vobis, quia non noverunt Patrem secundum proprietatem relativam. Non enim noverunt generationem æternam, nec emanationem divinarum Personarum ad intra. Vel, « non noverunt Patrem » cognitione formata, quæ caritate ornatur et bonis operibus comprobatur. *Neque me* Unigenitum Patris, secundum naturam meam divinam, neque

secundum meam humanitatem ut a Verbo assumptam, quamvis facilem de me notitiam habuerint sensitivam. Pater enim et Filius relative dicuntur ad invicem, quorum unum definitur per reliquum : idcirco qui unum ignorat, reliquum nescit. Verumtamen ignorantia ista illos non excusavit, quoniam affectata fuit, et ignorantia juris, procedens ex obstinatione et perversitate qua veritatem recipere contempserunt.

Sed hæc locutus sum vobis de vestra persecutione futura, vos præmonendo ac præmuniendo, *ut quum venerit hora eorum*, id est tempus persecutionis quam inferent vobis, *reminiscamini quia*, id est quod, *ego dixi vobis* ista antequam facta sunt, idque recolendo confortetur cor vestrum in fide, et talia non tanquam inopinata et improvisa vos obruant, sed velut diu præcognita æquanimiter tolerantur : quia jacula prævisa minus ferire dicuntur, dum contra ea homo patientiæ clypeo præmunitur.

SERMO SECUNDUS

DE ARGUMENTIS TESTIMONIISQUE FIDEI CHRISTIANÆ.

DOMINUM Christum sanctificate in cordibus vestris, parati semper ad satisfactionem omni poscenti vos rationem de ea quæ in vobis est, fide et spe. I Petr. III, 15.

In his verbis hortatur nos gloriosus princeps Apostolorum ad duo. Primo, ut in cordibus nostris Christum sanctificemus, id est, sanctum esse noscamus ac intueamur, atque in sanctitate et justitia ipsum mente recolamus, de ipso sinceriter cogitando, eum ferventer amando, ejus bonitatem ac beneficia firmiter recolendo, et totum cor nostrum ei plene subdendo, quemadmodum scriptum est : Confitebor

tibi, Domine, in toto corde meo. Secundo, ut parati simus ad reddendam rationem fidei nostræ ac spei cuicumque id postulanti, hoc est, quare credamus ac speremus ea quæ credimus ac speramus.

Ut enim dicunt doctores, quicumque habet caritatem, habet et septem dona Spiritus Sancti secundum aliquem gradum; et quanto homo plus crescit in caritate, tanto plus crescit in donis istis. Porro horum donorum unum vocatur intellectus, per quod illuminatur anima a Spiritu Sancto ad cognoscendum rationes credendorum seu argumenta fidei christianæ. Quamvis enim ea quæ fidei sunt natura-

lem rationem valde transcendant, nihilo A minus fides christiana dicitur habere rationes et argumenta, non quibus veritates fidei seu ejus articuli in se ipsis sufficienter probentur, ita ut evidenter patescant sicut probantur et evidenter patescunt veritates naturalium scientiarum, sed quibus clare ac sufficienter ostenditur quod fides ista a Deo sit et ei complaceat, atque ab ipso testimonium habeat, et confirmationem ab eo sortita sit, juxta illud ad Hebræos : Abundantius oportet nos observare ea quæ audivimus, id est credere et implere quæ Christus docuit esse credenda ac implenda. Et subdit ibi Apostolus : Quomodo enim effugiemus, si tantam neglexerimus salutem, quæ in nos confirmata est, contestante Deo signis, et portentis, et variis virtutibus, et Spiritus Sancti distributionibus? Itaque quicumque fidelis in caritate existens, sicut habet donum intellectus secundum aliquem gradum, ita habet et scit aliquam rationem propter quam credit et sperat ea quæ credit et sperat, utputa, quod a Deo sunt revelata, vel per miracula confirmata, vel a Prophetis prænuntiata, aut propter consimiles rationes.

Sed quanto quisque excellentius illuminatur a Deo, magisque perficitur in caritate et omni virtute, tanto plus confirmatur in fide, et plures rationes credendorum seu articulorum fidei noscit. Hinc viri heroici seu perfecti dicuntur habere fidem cum rationibus credendorum, et purificatione intelligentia mentis. Ad hos ergo potissimum pertinet assignare rationes eorum quæ credimus et speramus, seu fidei nostræ ac spei. Quod etiam ad sacerdotes, præcipue prælatos, pastores, doctores prædicatoresque spectat, juxta illud Malachiæ : Labia sacerdotis custodiunt scientiam, et legem ex ore ejus requirent. Horum equidem est subjectos ac simplices informare, contra infideles fidei veritatem defendere, infidelibus quoque posse persuadere ea quæ fidei sunt, et eos ad fidem pro posse inducere.

Denique Albertus super septem Canonicas ait : Quamvis in primitiva Ecclesia quilibet tenebatur omni poscenti reddere rationem fidei suæ, propter credentium paucitatem, non tamen modo ad hoc omnes tenentur, sed maxime ad hoc tenentur sacerdotes et qui populo præsunt. Insuper Venerabilis Beda dicit : Duobus modis de fide et spe nostra poscentibus reddere rationem debemus : primo, rectas causas nostræ fidei ac spei omnibus insinuando, sive fideliter sive infideliter quærant; secundo, ipsam fidei et spei nostræ professionem illibatam inviolabilemque servando etiam inter adversitates et persecutiones, per patientiam demonstrando quam rationabiliter et constanter eam servandam didicimus, pro cujus amore nec adversa pati nec mortem subire veremur.

Præterea, ad hoc quod aliquis sciat rationes assignare fidei nostræ ac spei, multum valet humana instructio, et studium Scripturarum, seu lectio ecclesiasticorum librorum. Sed, ut in præfato themate sanctus innuit Archiapostolus, iste est rectus salubrisque ordo, ut primo Christum in nostris cordibus sanctificemus, hoc est, sincero corde ei adhæreamus : beati enim Matth. v, 8. mundo corde, quoniam ipsi Deum videbunt; deinde parati simus reddere rationem fidei nostræ ac spei, quia scientia absque bona vita Deo non placet, nec proficit ad salutem, sed potius auget damnationem.

Nunc ergo videndum est quæ sint rationes fidei ac spei Christianorum. Propter D quas rationes Psalmista loquitur Deo : Testimonia tua credibilia facta sunt nimis. Itaque prima ratio fidei et spei præfatæ est operatio miraculosa, præsertim quæ non nisi a Deo fieri queat, ut suscitatio mortuorum. Unde tot sunt fidei et spei nostræ rationes et argumenta, quot tam ab ipsomet Domino Jesu Christo quam ab universis ejus discipulis ac ministris facta exstant miracula, in testimonium quod a Deo sint fides ista et spes. Porro miracula Christi in Evangelio describuntur,

Hebr. ii, 1.

Ibid. 3, 4.

Malach. ii, 7.

Matth. v, 8.

Ps. xcii, 5.

quamvis omnia nequaquam descripta sint. Hæc autem miracula sunt, trium mortuorum suscitatio, illuminatio cæci nati, curatio paralytici, pastio quinque millium virorum, exceptis mulieribus et pueris, ex quinque panibus et duobus pisciculis, ita quod superfuerunt duodecim cophini fragmentorum, pastio quoque quatuor millium ex septem panibus, mundatio leprosororum, et alia prorsus innumera. Nam et cordium cognovit secreta, et universa sibi aliisque ventura. Ad hoc genus testimonii, seu rationis et argumenti fidei ac spei Christianorum, pertinent mirabilia quæ in Christi passione fiebant, videlicet : obscuratio solis, luna plena existente (in qua eclipsi multa valde miraculosa, solique Deo possible, contingebant, prout divinus Dionysius in epistola ad S. Polycarpum verissime refert), quod item tunc multa sanctorum corpora qui dormierant surrexerunt. De hac fidei ratione ait Salvator : Opera quæ dedit mihi Pater ut perficiam ea, testimonium perhibent de me, quia Pater me misit ; atque alibi, Si opera non fecissem in eis, videlicet inter Judæos, quæ nullus alius fecit, peccatum non haberent.

Deinceps, sicut Christus ante passionem prædixit, Qui credit in me, opera quæ ego facio et ipse faciet, et majora horum faciet, quia ego ad Patrem vado ; ita post resurrectionem suam implevit, quia Apostoli ejus majora fecerunt miracula in nomine ejus quam ipse. De Christo etenim legitur, quod tres mortuos suscitavit, et quod omnes infirmi qui fimbriam vestimenti ejus tangebant, plenarie sanabantur. Joannes autem apostolus quatuor mortuos suscitavit, quorum duo suscitati fuerunt per hoc quod tunica S. Joannis super eos posita fuit. Et de beatissimo Petro apostolo legitur, quod super quos venit umbra corporis sui, mox curabantur. Nec potest quis opinari quod ista et similia miracula non sint facta : quomodo enim aliter potuisset totus mundus ad tam incomprehensibilem fidem ac arduissimam legem converti ?

Imo, ut sancti Patres et subtilissimi dicunt doctores, inter omnia divinæ virtutis miracula potissimum mirabilissimumque videtur totius mundi conversio ad christianam fidem et evangelicam legem tam incomprehensibilissimam ac districtam : et hoc per paucos Christi discipulos, qui pene omnes fuerunt idiotæ et simplices, absque armorum potentia, absque humana eloquentia, sine calliditate et magica arte, quæ Christianis maxime prohibetur, et a perfectis Christianis summe vitatur, sicut nos Christiani certissime scimus, quidquid infideles fatue suspicentur. Quoniam itaque per ista miracula contestatus est Deus Pater veram esse catholicam fidem, ideo in prima sua epistola scribit Joannes apostolus : Qui non credit Filio, mendacem facit Patrem, quia non credit in testimonium quod testificatus est Deus de Filio suo. Quemadmodum enim rex terrenus approbat litteras aliquas, suum eis appendendo sigillum aut proprio eas annulo consignando, sic Rex regum et Dominus universorum, evangelicæ legis ac fidei approbavit doctrinam, pro ejus confirmatione tot et tanta faciendo miracula, quæ tanquam propria sigilla ei affixit copiosissime prorsus et innumerabiliter.

Præterea, unusquisque fidelis debet pro posse suo testimonium Christo ac legi evangelicæ perhibere, conversando tam virtuose coram Deo, tamque exemplariter coram hominibus, hoc est tam timorate et juste, tam humiliter, patienter et caste, tam caritative et pie, ut quicumque viderit conversationem ipsius, cogatur fateri bonam et sanctam esse legem quæ talem præcipit vitam. Unde in primitiva Ecclesia, multi gentilium fuerunt ad Christum conversi ex consideratione virtuosæ ac piissimæ vitæ Christianorum. Postremo, juxta mensuram et eminentiam incomprehensibilitatis fidei christianæ, hoc est eorum quæ credimus, sic Deus supercopiosissime, clarissime et eminentissime roboravit et approbavit hanc fidem. Et quanto copiosius fecit hoc, tanto virtuosius juxta

Cf. I. XVI, p. 524.

Joann. v, 36.

Ibid. xv, 24.

Ibid. xiv, 12.

Joann. v, 10.

hanc fidem conversari debemus, et, juxta A fructus, et quod non sunt condignæ pas- *Rom. viii,*
Eccle. ix, Salomonis exhortationem, quidquid pos- siones hujus temporis ad futuram gloriam ^{18.}
^{10.} sumus boni instanter operari, certi quod quæ revelabitur in nobis. Ideirco ferven-
¹ *Cor. xv,* labor noster non erit inanis in Domino, tes atque indeficientes simus in bonis ope-
^{58.} sed quod bonorum operum gloriosus est ribus, ad gloriam Salvatoris.

SERMO TERTIUS

DE FIDEI VERITATE ET LEGE EVANGELICA.

CHRISTO omnes Prophetæ testimoni- B a Samuele et deinceps annuntiaverunt di- *Act. iii, 18.*
um perhibent. Act. x, 43. Hæc sunt es istos; et rursus, Deus prænuntiavit per os omnium Prophetarum pati Christum.

Sicut videmus in sæculo isto, quod reges et principes dum magnum atque præcipuum operari quid volunt, id ipsum prænuntiant, præludia agunt, sicque hominum animos excitant et invitant ad accurrendum, ad inspiciendum, ad collaudandum; ita Deus omnipotens, qui essentialiter est ipsa sapientia æternalis et infinita, nil a casu aut fortuitu agens, imo secundum certam et infallibilem suæ providentiæ dispositionem cuncta efficiens, volens in ultima mundi ætate præclarissima et incomprehensibilia opera perpetrare, videlicet Verbo æterno unigenito Filio naturam humanam unire, atque per ipsum Unigenitum incarnatum, genus salvare humanum, christianam fidem proponere, evangelicam dare legem, innumerabilia ac præclarissima operari miracula, totum mundum convertere, copiosissima quoque ac piissima gratiarum charismata conferre hominibus, omnia ista ab exordio mundi cœpit per angelos sanctos, per Patriarchas et Prophetas prædicere, atque ad omnium horum fidem certissimam corda hominum præparare, per cœlestia oracula, per diversa præsagia, per vaticinia innumerabilia, per miracula varia denuntians ac præsignans omnia illa esse futura, quæ jam credimus esse impleta. Ideo in Actibus loquitur S. Petrus: Omnes Prophetæ

Hinc ipsemet Christus post resurrectionem suam apparens discipulis, dixit ad eos: Oportet impleri omnia quæ scripta sunt in lege Moysis, et Prophetis, et Psalmis de me. Hinc quoque Hebræorum doctores fatentur, quod omnes Prophetæ non sunt locuti nisi super dies Messiæ. Istud ergo est secundum argumentum fidei christianæ, seu ratio secunda ejus quæ in nobis est, fidei et spei: secundum (inquam) argumentum in genere; verum in specie continet argumentum hoc innumerabilia argumenta, utpote tot quot sunt de Christo ac ejus mysteriis Prophetarum oracula seu vaticinia.

Præterea, inter omnia mirabilia atque insignia opera Dei, excellentissimum dignissimumque censetur incarnatio Filii Dei, deinde liberatio generis humani per passionem ipsius. Hinc de his duobus potissimum prænuntiaverunt sancti Prophetæ. Nempe de Christi incarnatione et natiuitate Isaias clarissime prophetavit: Puer (inquiens) natus est nobis, et filius datus est nobis; et vocabitur nomen ejus, Admirabilis, Consiliarius, Deus, Fortis, Pater futuri sæculi, Princeps pacis. In qua divinissima auctoritate, Christi majestas, et duplex ejus natura, puta divina et humana, unitasque personæ in ipso, evidenter tanguntur. Unde rursus loquitur Isaias:

Act. iii, 24.

Is. vii, 14; *Matth.* i, 23. Ecce virgo concipiet et pariet filium, et A vocabitur nomen ejus Emmanuel (quod interpretatur nobiscum Deus). Iterum apud *Is.* liii, 6. Isaiam prædixit Deus : Propter hoc sciet populus meus nomen meum in die illa, quia ego ipse qui loquebar, ecce adsum. *Ibid.* xxx, 20. Et denuo asserit Isaias : Erunt oculi tui videntes præceptorem tuum ; item, *Ibid.* xxxiii, 22. Dominus judex noster, Dominus legifer noster, Dominus rex noster, ipse veniet et salvabit nos. Porro, de Christi generatione humana ex Virgine, et de generatione ejus æterna ex Patre, Michæas propheta clare prædixit : *Mich.* v, 2. Et tu, Bethlehem, ex te egredietur dominator in Israel, et egressus ejus ab initio, a diebus æternitatis ; et magnificabitur in medio universæ terræ. De Christi quoque nativitate miraculosa ex Virgine Jeremias locutus est : *Jer.* xxxi, 22. Novum faciet Dominus super terram : mulier circumdabit virum.

Insuper de Christi passione sancti Prophetæ apertissime prædixerunt. Imo per Isaiam, passio Christi tam diffuse et clare fuit prænuntiata, inveniturque præscripta, ut potius videatur historia, id est narratio C rei gestæ, quam prophetia, hoc est prænuntiatio rei fiendæ. Sic equidem legitur *Is.* liii, 2, 4, 5. ibi : Non est ei species neque decor, et vidimus eum, et non erat adspectus ; vere languores nostros ipse tulit, et dolores nostros ipse portavit ; ipse autem vulneratus est propter iniquitates nostras, attritus est propter scelera nostra. Multaque alia ibi de hoc conscripta sunt. In multis etiam psalmis passio, resurrectio, ascensio Christi describitur. Verum in psalmo cujus exordium est, Deus, Deus meus, respice D in me, taliter passio Christi legitur prophetata, qualiter præallegato Isaiæ capitulo : Ego, inquit, sum vermis, et non homo, opprobrium hominum et abjectio plebis ; omnes videntes me, deriserunt me. Et reliqua quæ ibi lucidissime subsequuntur.

Amplius, tempus primi adventus Christi, passionemque ejus, et Judæorum transgressionem in ipsum, atque finalem eorum reprobationem, derelictionem, vastitatem et excæcationem, Daniel propheta luce cla-

rius prophetavit, Gabriele angelo ad eum loquente : Septuaginta hebdomades abbreviatæ sunt super populum tuum, et super urbem tuam sanctam, ut consummetur prævaricatio, et finem accipiat peccatum, et deleatur iniquitas, et adducatur justitia sempiterna, et impleatur visio et prophetia, et ungatur Sanctus Sanctorum ; et post hebdomadas sexaginta duas occidetur Christus, et non erit ejus populus, qui eum negaturus est ; et civitatem et sanctuarium dissipabit populus cum duce venturo, et finis ejus vastitas, et usque in finem perseverabit desolatio. Multa possent similia introduci de Christo testimonia ex Prophetis.

Insuper, tertium christianæ fidei argumentum, est sanctitas vitæ quam evangelica Christi docet doctrina, et ad quam perducit lex Christi eos qui eam perfecte observant. Hinc observatoribus legis hujus perfectis, certissime et quasi experimentaliter innotescit veritas fidei ac sanctitas evangelicæ legis. Quotidie namque experiuntur qualia desuper fiant in eis, quales visitationes gratiosæ, consolationes internæ, illuminationes divinæ, et inflammationes deificæ ; experiuntur quam fragiles, pigri, infirmi et defectuosi sint ex se ipsis, quam ferventes autem, fortes et alacres ex adjutorio Creatoris. Sciunt se omnem artem magicam detestari ; sciunt se aliud nihil quam Dei honorem et gloriam finaliter affectare, seque divinitus exaudiri, et omne fœdus cum dæmonibus in infinitum abominari. Idcirco certissimi sunt in fide.

Et hoc est quod asserit Christus : Si quis *Joann.* vii, 17, 18. voluerit voluntatem Dei facere, cognosce de doctrina an ex Deo sit. Quibus verbis mox addidit : Qui a semetipso loquitur, gloriam propriam quærit ; qui autem quærit gloriam Dei, hic verax est.

Denique, sicut Aristoteles ait, Virtus uniuscujusque pensatur penes maximum in quod potest. Si ergo volumus scire qualis et quantus sit vigor et valor, virtus et sanctitas evangelicæ legis ac fidei, consideremus maximum in quod potest, hoc

est, qualem efficiat suum observatorem A perfectum, quam item exaudibilem ac potentem faciat eum apud Altissimum. Hoc certe in primis constat, quod perfectio, virtus et sanctitas mentis humanæ consistit in conversione sua sincera et amorosa ad proprium creatorem, Deum verum ac Dominum universorum. Hæc autem conversio fit tanto sincerior atque ferventior, quanto plus avertitur homo ab omnium creaturarum, potissime carnalium et terrenorum, inordinato ac sensuali amore, ac superflua cogitatione et inspectione. Et B quanto lex aliqua perfectius docet, jubet aut consulit talis perfectæ conversionis ad Deum impedimenta vitare, totaliterque in Deum converti, tanto diviniore rite vocatur. Hoc autem lex evangelica perfectissime agit per præcepta sua atque consilia. Præcipit namque actus virtutum, et prohibet vitia; consulitque carnalia et terrena cuncta relinquere, se ipsum quoque per votum obedientiæ abnegare, ac divino se cultui plenissime mancipare, omnem privatam amorem et proprii commodi affectionem funditus extirpare, sicque Deum purissime ac intensissime toto corde diligere.

Denique, quam exaudibiles et potentes, quam grati et familiares, quam cari, accepti et placentissimi isti sint apud Deum, ipse superoptimus et supermiseri-

cordissimus Deus innumerabilibus vicibus demonstravit. Nam preces illorum, etiam in maximis et difficillimis rebus, promptissime exaudivit, ad illorum instantiam mortuos suscitando, cæcos et claudos a nativitate curando, leprosos mundando, imo et bruta animalia mortua reducendo ad vitam, solem in cælo a solito motu impediendo, jubens ut vel staret ad tempus immotus, aut certe rediret per viam quam percurrit, et multa agendo similia, quæ in libris satis authenticis, imo et in Scripturis canonicis diffuse leguntur.

Postremo, sicut in evangelio hodierno Christus prædixit, paracletus Spiritus Sanctus, quem in die Pentecostes misit discipulis, testimonium sibi perhibuit. Quod qualiter factum sit, in epistola et evangelio sequentis dominicæ et sacratissimæ solennitatis præactæ plenius exprimetur.

Quoniam ergo tam virtuosa, perfecta et sancta est lex evangelica a Christo collata, atque tam certa et vera est fides christiana, studeamus omnes concorditer Deo nostro irreprehensibiliter ministrare, omnem superbiam, iram, invidiam, avaritiam, gulam et incontinentiam prorsus vitare, omnem quoque humilitatem, mansuetudinem, caritatem, liberalitatem, continentiam, sobrietatem amplecti, custodire, et usque in finem cum quotidiano profectu in eis viriliter conversari.

AD RELIGIOSOS

SERMO QUARTUS

DE PRUDENTIA, ET QUÆ AD EAM NECESSARIA REQUIRUNTUR.

ESTOTE prudentes, et vigilate in orationibus. I Petr. iv, 7.

Inter virtutes morales, primatum quædam sortiuntur virtutes cardinales, inter

quas S. Thomas prudentiam sentit esse nobiliorem ac digniorem. Ejus namque est alias virtutes in actionibus earum dirigere, considerando media fini virtutum

accommoda, et de illorum executionibus disponendo. Prudentiæ quippe est inter bonum et malum discernere, modum et formam tenere, congruum locum aptumque tempus, et qualitatem negotii considerare et observare. Hinc, secundum Augustinum, prudentia est cognitio rerum appetendarum ac fugiendarum; et juxta Philosophum, est recta ratio agibilium. Unde, secundum Isidorum, prudens dicitur quasi procul videns. Nam prudens considerat ea quæ procul sunt, id est præterita per memoriam, et futura per providentiam, in quantum ex talium consideratione instruitur et juvatur in his quæ præsentialiter sunt agenda. Porro, quod prudentia dicitur rerum appetendarum et fugiendarum cognitio, non de quacumque cognitione est intelligendum, quia non de nuda et informi ac speculativa cognitione, quæ potest esse in vitiosis hominibus, sed de cognitione formata et practica approbativaque boni, quæ solis bonis inest hominibus, ut sexto Ethicorum probat Philosophus. Prudentiæ namque est bene judicare de mediis ad finem salubrem, et de eorum executione disponere : quod a malis hominibus bene fieri nequit, quia in eis per passiones et vitia rationis iudicium pervertitur, excæcatur, corrumpitur; et quamvis habeant quamdam astutiam aut naturalem industriam, non tamen veram prudentiam. Insuper prudentiæ est applicare considerationem communem ad certa determinataque opera : idcirco prudentia est singulare cognoscitiva per quamdam reflexionem. Quum ergo prudentia sit virtus tam nobilis, intellectum perficiens voluntatemque dirigens, atque ubique moderamen faciens observari, recte hortatur nos gloriosissimus apostolici ordinis princeps, in hodierna epistola, ut simus prudentes, id est circumspecti, providi et discreti.

Circa quod quæri potest, an prudentia sit necessaria ad salutem, id est, an sit in cunctis hominibus caritatem habentibus, qui sunt in statu salutis. Et videtur quod

non, quia multi idiotæ et valde simplices sunt in caritate et statu salutis, in quibus non videtur esse prudentia : præsertim quum teste Philosopho, prudentia experimento ac tempore indigeat. Unde et ait, quod in juvenibus non est prudentia, quia sunt inexperti. Ideo dicitur : In antiquis est sapientia, et in multo tempore est prudentia. Et respondendum, quod quum discretio seu prudentia sit omni homini summe necessaria, non dubium quin vera et infusa prudentia cunctis in gratia existentibus insit, quum et virtutes sibi connexæ dicantur. Aristoteles vero de prudentia loquitur acquisita. Nempe quum ad prudentiam spectet industria de agendis, quid scilicet sit agendum, quid cavendum, ista industria omnibus bonis inest secundum aliquem gradum, ut scilicet sciant, aut certe ab aliis sibi inquirendum advertant, quid agere debeant, quid vitare. Idcirco de omnibus gratiam gratum facientem habentibus ait Joannes evangelista, Unctio docet vos de omnibus, scilicet ad salutem requisitis. Job xii, 12.
I Joann. ii, 27.

Insuper, juxta morales, ad prudentiæ perfectionem multa pertinent et concurrunt. Primum est consideratio præteritorum, quæ vocatur memoria, per quam conjicit homo quid expediat modo, et de futuris cavet periculis. — Idcirco secundo ad prudentiam pertinet consideratio futurorum, videlicet commodorum et incommodorum seu periculorum quæ possunt accidere, si hoc aut illud agatur aut omittatur. Quæ consideratio, non ex præteritis tantum, sed et ex præsentibus sumitur. Idcirco prudentia dicitur præsens notio tractans futurorum eventum. Et Seneca ait : Si prudens esse cupis, in futura prospectum intende, et quæ possunt contingere, animo tuo cuncta propone; nihil tibi subitum improvisumque sit, sed totum ante prospicias. Qui prudens est, non dicit : Non putavi hoc fieri. — Tertio ad prudentiam spectat intelligentia, id est præsentium operabilium notitia, quid et quale sit quod instat. Et quia prudentia est circa parti-

cularia operabilia, in quibus sunt tot varietates et circumstantiæ ac mutabilitates, quod nec in brevi, neque de facili queunt ab uno omnes considerari; ideo in his circa quæ versatur prudentia, maxime indiget homo ab aliis informari, præsertim a senioribus et expertis, et a sapientioribus ac magis illuminatis, et desuper unctis. Propter quod sexto Ethicorum dicit Philosophus, quod oportet attendere et esse intentum enuntiationibus et æstimationibus seniorum et expertorum, tanquam quibusdam demonstrationibus in moralibus.

Quum ergo ad docibilitatem pertineat ut per eam sit homo disciplinæ et instructionis bene ac prompte susceptivus, hinc quarto ad prudentiam spectat docilitas, per quam homo mentem suam sollicite, reverenter atque assidue applicat documentis et directionibus majorum et seniorum ac doctiorum, nec negligens ea per ignaviam, neque contemnens per superbiam : quod in junioribus et inexperioribus maxime vituperabile perhibetur. Nam quamvis ad omnes, tamen præcipue ad eos docilitas pertinet. — Quinto ad prudentiam pertinet circumspectio, per quam prudens considerat bonitatem prudentiæ, non solum secundum se, sed etiam secundum circumstantias debitas. In operabilibus namque particularibus circa quæ versatur prudentia, potest esse aliquod bonum secundum se, quod tamen ex circumstantia non est bonum : quemadmodum in se bonum est dilecto amicitiae signa ostendere, quod tamen ex circumstantia bonum non esset, nec ad finem caritatis conveniens, ut si ex tali ostensione nasceretur dilecto adulationis suspicio aut quædam elatio. Indigemus igitur circumspectione, qua oculus mentis late circumducamus, considerando an illud quod intendimus seu optamus, aut in finem aliquem ordinamus, sit expediens, omnibus circumstantiis bene pensatis. — Et quia in operabilibus circa quæ versatur prudentia, sæpe bonis et veris admixta sunt mala et falsa, ideo

A sexto ad prudentiam pertinet cautio, qua bona sic acceptentur quod mala vitentur. Alia quoque aliqua ad prudentiam pertinent, ut bene consiliari, et consiliata congrue exsequi.

Et juxta ista quæ ad prudentiam pertinent, diversa sunt vitia quæ prudentiæ opponuntur, videlicet : imprudentia, præcipitatio aut temeritas (quæ præcipitatio contrariatur rectæ consiliationi), inconsideratio, inconstantia, indocilitas, negligentia. Quæ omnia vitare omnino debemus, et esse ordinati, circumspecti, maturi ac diligentes in omnibus, tanto utique magis, quanto graviora nobis instant pericula. Quo enim majora dispendia imminet, eo majori diligentia ac providentia indigemus. Nec dubium quin æternæ damnationis pericula sint incomparabiliter magna et irremediabilia mala. Hinc circumspectissimi ac bona sollicitudine pleni esse debemus, præsertim divinum subsidium jugiter invocando, quum propriis viribus nec meritorie operari possumus, nec imminetia præcavere pericula, nec callidissimis ac atrocissimis nostræ salutis adversariis prævalere. Idcirco in præsentī epistola admonemur in orationibus vigilare, quoniam ^{1 Petr. v, 8,} hostis noster diabolus tanquam leo rugiens circumit, quærens quem devoret : cui nos oportet resistere forti et infrangibili fide, quæ est bonorum omnium fundamentum. Resistamus ergo diabolo, id est multitudinibus dæmonum nos undique ambientium et impugnantium. Quibus resistendum est, in Deo fortiter confidendo, ejus auxilium ferventer ac jugiter invocando, dominicam passionem assidue ac intime recolendo, otia fugiendo, quatuor novissima meditando, orationibus ac psalmodiis vacando, et semper aliquid boni agendo, Virginem quoque gloriosam et Sanctos ac angelos nostros custodes fiducialiter invocando.

Insuper nos hortatur summus Apostolus, ut ante omnia mutuam in nobis caritatem ^{Ibid. iv, 8.} habeamus continuam, utpote dilectionem sanctam ac spiritualem Dei ac proximo-

rum : quoniam caritas universarum virtutum est vita, vertex, forma, imperatrix et finis. Ipsa quoque est ignis spiritualis peccata consumens. Dum enim infunditur, præterita peccata delentur; et per caritatis fervorem quotidiana consumuntur peccata. Quanto etiam major est fervor dilectionis, tanto plus de pœna peccati dimittitur. Unde de beatissima Maria Mag-

Luc. vii, 47.

dalene loquens Salvator : Dimissa sunt (inquit) ei peccata multa, quoniam dilexit multum. Et Salomon loquitur : Universa delicta operit caritas. Et quia diligere, est dilecto bonum velle, idcirco fraterna requirit dilectio ut bona proximis optemus ac impendamus pro loco et tempore opportuno. Hinc in præsentī epistola princeps docet Apostolorum, ut unusquisque dona gratiæ sibi collata communicet aliis. Propter quod consulendo, auxiliando, docendo, corripiendo, hortando, consolando, juvando, obsequendo, debemus mutuo bona nobis desuper impertita communicare.

1 Petr. iv, 10.

Ibid. 41.

Et si quis loquitur alteri, non vana et frivola, sed quasi sermones Dei, videlicet verba ædificatoria, utilia, necessaria, virtuosā, loquatur. Quod utinam in nostris

A bene servaremus colloquiis. De his autem pertranseo, quia in præinductis paulo ante sermonibus multa de eis sunt commemorata.

Itaque, juxta compendiosissimæ hujus epistolæ documentum, sit semper in nobis vera prudentia, cum præactis quæ ad eam pertinent et concurrunt, ne facile decipiamur, nec incaute omni credamus spiritui, nec unquam simus inconsiderati aut indiscreti. Nam et Seneca protestatur : Prudentis proprium est examinare consilia, et non cito facili credulitate ad falsa labi, in dubiis non definire, sed suspensam tenere sententiam. Iterum ait : Si prudentiam amplecteris, ubique idem eris, et prout rerum temporumque varietas exigit, ita te exhibebis, et pericula multa evades. Ideo loquitur Augustinus : Ubi fuerit prudentia, frustrantur contraria; ubi vero defuerit, dominabuntur adversa. Hinc ait et Christus, Estote prudentes sicut serpentes, et simplices sicut columbæ : ut scilicet serpentinam astutiam columbina simplicitas temperet, et columbinam simplicitatem serpentina prudentia ornet ac dirigat.

Matth. x, 16.

SERMO QUINTUS

DE MYSTERIIS CHRISTIANÆ FIDEI, ET QUID EADEM OPERARI IN VERIS DEBEAT RELIGIOSIS.

QUUM venerit Paracletus, quem ego mittam vobis a Patre, Spiritum veritatis, qui a Patre procedit, ille testimonium perhibebit de me. Joann. xv, 26.

Omnia quæ sunt fidei christianæ, rationem transcendunt humanam; et ipsa lex Christi, lex evangelica, tota est supernaturalis. Habuit quidem hæc fides et lex ista adversarios multos a suæ prædicationis exordio : primo Judæos, qui persecutione ac violentia, et scripturarum veteris Testamenti allegatione eam multipliciter im-

pugnauerunt; deinde philosophos principesque terrenos, imperatores Romanorum atque Persarum, aliarumque gentium; sed et hæretici eam atrociter impugnare et suppeditare moliti sunt. Sed mentita est iniquitas eis; et Deus omnipotens, qui tam supernaturalem præstitit legem, tam incomprehensibilem dedit fidem, per supernaturalia argumenta, per innumerabilia sibi soli possibilia conservare eam dignatus est signa. Quorum hoc erat non minimum, quod in hodierno tangitur evange-

Ps. xxvi, 12.

lio, quod Salvator in sermone post Cœnam Apostolis facto prædixit. Siquidem in sermone illo altissimo, sapientissimo et vere pulcherrimo innotescit excellentia Christi, eminentia sapientiæ ejus, plenitudo gratiæ prophetiæ qua fulsit, et veritas fidei christianæ. In illo quippe sermone Dominus et Salvator omnia sibi Apostolisque ventura prænuntiavit, et evangelicæ legis divulgationem, mundi conversionem, et multa secreta prædixit, suam videlicet tunc instantem captionem, passionem, crucifixionem, sepulturam, resurrectionem, apparitionem, ascensionem, Paracleti missionem, Apostolorum illuminationem, confortationem, inflammationem, prædicationem. Quod totum, sicut prædixit, effectus ostendit.

Verum his immorari non est fori præsentis : infinita enim est certitudo fidei christianæ et firmitas. Verum ideo hæc tetigi, ut supernaturali altitudini legis ac fidei nobis de cœlo per Filium Dei collatæ, correspondeat conversationis nostræ sublimitas in omni spiritualitate et perfectione, in ardenti amore, in contemplativa oratione, in amorosa contemplatione, ut Deo altissimo et rebus spiritualibus et internis, cœlestibus ac divinis, tam valide adhæreamus, immoremur, afficiamur, quod de terrenis, transitoriis atque carnalibus, salva necessitate, nil curemus; necessaria quoque corpori magis cum tædio et mœrore quam cum voluptate et dissolutione accipiamus, in solo Creatore consolationem, quietem et occupationem quæramus.

Ecce quam amore, quam gratiose ac dignantissime, quam liberaliter, supernaturaliter ac supermisericordissime tota supergloriosissima Trinitas egit nobiscum. Siquidem Deus Pater unigenitum Filium suum sibi consubstantialem, coæqualem, consempternum, simillimum, complacentissimum et supercarissimum misit ad nos, contulit nobis; fecit eum fratrem nostrum, et per ipsum fecit nos filios suos; voluit eum incarnari, fecit eum tot annis cum hominibus conversari, atque per ipsum redemit nos, et tot bona nobis largitus

est. Porro, Filius Dei vere ac copiose nobis ostendit quod deliciae ejus sint esse cum filiis hominum. Nam, quum dilexisset suos qui erant in mundo, usque in finem dilexit eos; tradiditque se ipsum pro eis oblationem et hostiam Patri, in odorem suavitatis. Et quidquid de nostro accepit, nobis liberalissime mirabiliterque rependit. Misit quoque, infudit et dedit hominibus Spiritum Sanctum; et Spiritus Sanctus Patri ac Filio consubstantialis, humanorum cordium esse instructor, inhabitator, impletor dignatus est.

Ecce quomodo magnificavit Deus Trinitas operari nobiscum, quam magnifice et gratiose agit cum electis suis quotidie. Nonne corda pauperculorum suorum visitare, inhabitare, excitare, instruere, accendere ac tueri incessanter dignatur? Frequenter prævenit eos piissime, implet uberrime, loquitur intus, mentem præstrinxit, sibi conjungit, rapit, absorbet, amplectitur, osculatur. Et agit hæc omnia ubi vult, quando vult, quantum vult et quomodo vult; ita ut interdum dum rogatur, et homo ad talia obtinenda conatur, non faciat, quandoque autem non rogatus hæc operetur, sicque præveniat, præoccupet, superimpleat animam, ut ipsa, quamvis velit effugere, nequeat : quatenus ex hoc intelligamus propriam infirmitatem, defectuositatem, inopiam, ac benignissimi Dei liberalitatem, caritatem, dignationem et libertatem, sicque tota spes nostra in ipso figatur. Experientia namque donorum Dei spem parit, et fidei certitudinem gignit. Quumque hoc modo Spiritus Sanctus nostra impleverit corda, et hospitaverit in eisdem, reddit testimonium nostro spiritui quod filii simus Dei.

Ad prædictam ergo gratiosissimam ac munificentissimam Spiritus Sancti in cordibus nostris susceptionem ac demorationem disponamus assidue animas nostras, præsertim hoc tempore, appropinquante Spiritus Sancti solennitate, per regularem, fructuosam et exemplarem in omnibus conversationem, per orationes internas, me-

Prov. viii, 31.
Joann. xiii, 1.

Ephes. v. 2.

Ps. cxxv, 3.

Rom. viii, 16.

Is. lxxvi, 2. ditationes salubres, per psalmodum laudationes. Omnem pigritiam, negligentiam, dissolutionem, iram, impatientiam, crapulam, elationem, cum ceteris passionibus et peccatis, abjiciamus, detestemur, suppeditemus, quoniam super quietum et humilem, super pauperulum et contritum, ac Dei sermones trementem, moratur ac conquiescit Spiritus Sanctus. Cujus quum sit munificentia, opulentia, benignitas infinita, suae abundantia pietatis vota nostra excedens et merita, tanto mentes nostras gratiosius visitabit, copiosius illustrabit, B amorosius inflammabit, unget, perficiet, quanto interim ab omni carnali affectione, ab omni privato amore, ab omni negligentia et torpore purgaverimus eas, quanto etiam avidioribus adspirationibus in eum movemur, ejusque gratiosum adventum

A precamur, et quanto sollicitius coram ipso ac custoditius conversamur.

Sint igitur oculi nostri semper ad Dominum, et omne opus Dei quotidie perfectius facere enitamur. Nullam particulam temporis infructuose pertranseamus; oculos, linguam, ventrem cum moderamine reprimamus, et omni custodia cor nostrum custodiamus. Non simus immemores praetactarum caritatis, dignationis, liberalitatis et beneficentiae Dei ad nos, nec ingrati simus eisdem; sed cum Psalmista, bene- *Ps. xxxiii, 2.* dicamus Dominum in omni tempore, semper laus ejus in ore nostro. Nec verbis tantum, sed et veritate et opere pro viribus vicissitudinem rependamus, totum quod sumus, habemus et possumus, summæ majestatis cultui jugiter mancipantes.

SERMO SEXTUS

DE ORATIONE ET DEVOTIONE AD CONTEMPLATIONEM MYSTICAMQUE THEOLOGIAM PERTINENTE.

In lectulo meo per noctes quæsi quem C diligit anima mea. Cant. iii, 4.

Rom. ix, 16. Oratio et contemplatio sunt duæ alæ veloces quibus ad Altissimum fertur, ascendit et volat anima nostra. Contemplatio tamen est ala velocior atque nobilior: oratione etenim quæritur Deus, contemplatione invenitur; oratione ad ipsum ascenditur, contemplatione ipse apprehenditur. Imo, quum Deum sinceriter contemplari, non sit volentis neque currentis, sed donum Dei id concedentis, oratio ad contemplationem disponit, et oratione contemplationis D gratia obtinetur. Deinceps, quia non solum interiori intuitionem atque interna appetitione, sed et piorum operum executione et divini cultus exercitatione ad beatitudinis scanditur fontem, ideo et devotio ala est mentis, qua scandit ad Deum, psalmodia quoque, et alia quævis laudatio Dei.

Imo, quum sine caritate nulla virtus virtutisve actio mentem creatam Deo absolute jungat, ipsa caritatis actualis dilectio propriissime ala cordis asseritur, qua ad Deum volare censetur. Dilectio etenim, spiritualis est ignis volans in altum, et caritas tendit sursum. Nam ubi *Matth. vi, 21.* thesaurus, ibi et cor; et ubi amor, ibi et oculus, in tantum ut anima verius esse dicatur ubi amat, quam ubi animat. Et secundum Augustinum, quod in corporibus est pondus, hoc in spiritualibus substantiis amor: nam sicut pondus trahit corpora ad sua loca, sic amor mentem ad sua objecta, id est ad ea quæ diligit. Vide ergo ad quid magis trahatur cor tuum, ad quid amplius inclinetur, ad quid fortius afficiatur, quia hoc intensius amare probaris. Et sicut blada in humo relictas putrescunt, et in solaris posita reservantur:

sic cor tuum terrenis et carnalibus rebus A quidem retro sunt obliviscens, in anteriora extendo me ipsum. (cogitando et appetendo) inhærens ac immorans, mox putrescit, spiritualiterque corrumpitur; sed in cœlis fixum, ad spiritualia elevatum, ad Deum erectum, viget et conservatur. Hinc loquitur Augustinus : Non putrescit cor tuum si levetur ad Deum. Frumentum tuum si in inferioribus collocatum haberes, illud ne putresceret ad superiora levares. Frumento tuo aptum quæris locum, et in terra putrescere permittis cor tuum? Frumentum tuum levās ad superiora, et mentem tuam leva B ad cœlestia ac divina. Et quomodo, inquis, possum? Quæ funes, quæ scalæ, quæ machinæ requiruntur? Affectus tuus, gradus est; iter tuum, bona voluntas est. Amando ascendis, negligendo descendis; stans in terra, in cœlo es, si diligis Deum.

Ecce ex his colligere possumus alas sex quibus ad summum universorum volatur, Deum sublimem. Prima est oratio; secunda, devotio; tertia, meditatio; quarta, laudatio; quinta, contemplatio; sexta, dilectio. De quibus intelligi potest, quod Isaias C sex alas se in Seraphim vidisse fatetur : Seraphim (inquiens) stabant super illud; sex alæ uni, et sex alæ alteri. Nunc autem de duabus harum alarum, videlicet oratione et devotione, prout ad contemplativam animam ac mysticam spectant theologiam, dicendum est. Superius etenim dictum est, quemadmodum juxta spiritualis profectus mensuram competit personis devotis sublimius puriusque orare. Oratio autem est petitio decentium a Deo. Unusquisque autem a Deo petere debet ea quibus amplius D indiget et quorum capacior est, et quæ Deus ab ipso magis requirit, atque ad quæ per studium spirituale et exercitia virtuosissima magis disposuit semetipsum. Constat autem quod religiosi ad perfectionem tendere obligentur; et qui jam viriliter profecerunt, contemplandique gratiam sunt sortiti, quotidie nihilo minus ad altiora proficisci debent charismata, exemplo illius magni qui protestatur : Ego me non arbitror apprehendisse; unum autem, quæ

Hinc oratio ad contemplationem perti-
nens, a communium oratione in duobus differre videtur. Primo, quoniam contemplativi tranquilliori stabiliorique mente orant, ita quod exorando, quasi in latitudine cordis cum Deo deambulant, et amicebilitate familiariterque loquuntur cum ipso, atque ipsius bonitatem, pietatem, excellentiam speculantur : quod vocatur contemplative orare. Ad quod requiritur tranquillitas mentis. Unde quidam senum dixerunt : Sicut impossibile est ut videat quis in aqua turbida faciem suam, sic et anima, nisi purgata fuerit a cogitationibus alienis, contemplative Deum orare non potest. Ad hanc ergo orationem necessaria est recollectio mentis. Secundo, oratio contemplativorum ab aliorum differt oratione, quoniam contemplativi perfectiora et secretiora gratiarum charismata petunt, Deum orando ut mentes eorum ab omni etiam veniali culpa expurget et præservet, insuper eas assidue magis ac magis illuminet et accendat, impleat, roboret, et eas intimius sibi adstringat, gratas placitasque efficiat, et ita se ipsum eis benignissime applicet, amorose jungat, gratiose infundat, quatenus ipsi valeant sibi quotidie reverentialius ac perfectius deservire, omne opus Dei diligentius adimplere, ei assidue plenius complacere, stabilius adhærere, propinquius cōniri. Ad hanc itaque contemplativam orationem ascendere, pervenire, et in ea proficere ac firmari conemur.

Præterea devotio tripliciter definitur. Siquidem S. Thomas affirmat, quod devotio sit promptitudo voluntatis ad ea quæ Dei sunt exsequenda, hoc est alacritas adimplendi ea quæ ad divinum pertinent cultum. Hugo autem disserit, quod devotio sit fervor bonæ voluntatis, quem mens cohibere non valens, certis manifestat indicibus. Alii vero : Devotio, inquiunt, est teneritudo cordis qua quis de facili in fletum resolvitur. Harum definitionum prima

Is. vi, 2.

p. 41 Cels.

Philipp. iii,
13.

dari videtur per essentiam, secunda per A causam, tertia per effectum. Devotio namque essentialiter est promptitudo præacta, et ex caritatis fervore causatur, et teneritudinem cordis ad lacrimandum producit. Devotio ergo essentialiter est promptitudo voluntatis tradendi se ad ea quæ divinum concernunt obsequium. Estque devotio ista latriæ actus : latria namque est virtus Deo cultum cærimoniamque impendens.

Deus vero est causa exterior devotionis, quæ a virtute latriæ immediate procedit, B formaliter et elicitive. Caritas quoque dicitur causa devotionis, non solum imperative (juxta quem modum causa est cujuslibet actus virtuosus), sed etiam speciali propinquiorique modo, quia ex caritatis affectu, prædicta promptitudo ad ea quæ Dei sunt, valde de propinquo progreditur. Porro meditatio, seu contemplatio, sive cognitio, est causa devotionis, tanquam iter ad eam et directrix ipsius. Quum enim devotio sit voluntatis actio, necesse est ut ex prævio aliquo intellectus actu procedat, C quum voluntas ipsa de se cæca dicatur, et ejus objectum sit bonum intellectum, id est per intellectivam potentiam apprehensum, seu intellectualiter cognitum.

Quocirca sciendum, quod quum cognitio seu contemplatio sit causa devotionis, et item dilectio, idcirco quo aliqua sunt digniora et divinia seu meliora, eo, quantum in se est, majorem facere possunt devotionem, et eam plus excitare ac inflammare. Hinc summæ Trinitatis ac veræ Deitatis contemplatio, devotionem maxime potest accendere ex sua natura. Verumtamen ex parte nostri frequenter contingit oppositum, quoniam sensibilibus manuductione, qua ad divina elevemur, egemus. Idcirco ex consideratione passio-

nis Christi et eorum quæ ad suam spectant humanitatem, sæpius plus ad devotionem movemur, quum tamen devotio principaliter circa Deitatem consistat, ex cujus consideratione viri perfecti ad devotionem præcipue incitantur. Deitas namque quum sit excellentiæ infinitæ, bonitasque prorsus immensa, incomparabiliter ad sui cultum ac venerationem nos debet inducere; et devotio ex Deitatis contemplatione ac dilectione concepta, est altior, dignior atque diviniior.

B Insuper, quum caritas devotionis sit causa, juxta triplicem caritatis gradum, triplex est gradus devotionis. Quo enim caritas fuerit ferventior, eo alacrior ad divinum cultum promptitudo ex ea causatur. Illa ergo devotio dicitur a quibusdam desideriosa, qua quis cum ingenti aviditate et affectione fertur ad divina; voluptuosa vero, quando devotioni conjuncta est delectatio ingens; furiosa autem, quando tam vehemens est, et tam impetuose erumpit, mentem corpusque concutit, ut reprimi nequeat, et hominem furioso quodammodo faciat similem. Quæ ad viros perfectos et contemplativos, ac mysticam theologiam, potissimum pertinere videtur. Ad quam devotionem sic tendere nos oportet, quomodo ad caritatis perfectionem tendere obligamur.

Ad hanc ergo devotionem nos demus, præparemus, extendamus, in caritate et dono sapientiæ ac divinorum affectuosa cognitione proficiendo. Ad quam etiam dominicæ passionis meditatio, et ceterorum D Dei beneficiorum intenta consideratio, multum disponit : ideo ea consideremus assidue, atque ad Dei amorem purissimum et reverentialem ac cordialem eadem ordinemus ac referamus, qui est super omnia benedictus. Amen.

IN DIE SANCTO PENTECOSTES

ENARRATIO IN EPISTOLAM

DUM COMPLERENTUR DIES PENTECOSTES, ETC. Act. II, 1-11.

APUD Judæos, in veteri Testamento, fuit paschalis solennitas, similiter solennitas Pentecostes, sicut nunc apud Christianos : verumtamen non eisdem diebus, nec causis eisdem. Siquidem apud Judæos paschalis solennitas cœpit vespere feria quinta, luna quartadecima; et agebatur in commemorationem liberationis filiorum Israel ab Ægypto, hoc est a servitute Pharaonis regis Ægypti. Deinde quinquagesimo die a die præfata, fuit apud Judæos solennitas Pentecostes, in commemorationem dationis ac susceptionis legis antiquæ a Deo per Moysen in monte Sinai. Porro, apud Christianos semper die dominica celebratur paschalis solennitas, in commemorationem, in honorem resurrectionis Domini nostri Jesu Christi, qui per suam passionem liberavit genus humanum a servitute peccati, a jugo diaboli, a pœna inferni, ab impedimento ingressus regni cœlestis, a reatu peccati originalis. Hinc

Matth. 1, 21.

Dum complerentur dies Pentecostes, hoc est, decurrerent et durarent, quia solennitas illa apud Judæos duravit septem diebus, sicut paschalis solennitas. Sicque dies

A in quo missus est Spiritus Sanctus, fuit quartus vel tertius dies solennitatis Pentecostes, juxta ritum et computum Judæorum, quorum et paschalis festivitas, hanc præcedens, cœperat feria quinta de vespere. Sed juxta ritum et computationem Ecclesiæ, et prout in evangelica lege hæc observatur solennitas, missus est Spiritus Sanctus prima die ipsius, videlicet quinquagesimo die a Christi resurrectione. Porro Pentecoste dicitur a πέντε, quod est quinque, et δεκά, quod est decem, quasi quinquies decem, quæ faciunt quinquaginta. *Erant omnes discipuli*, id est Apostoli et alii multi discipuli Christi, *pariter in eodem loco*, videlicet in cœnaculo, in quo Christus cum Apostolis Cœnam fecit novissimam. Quum enim Christus in die ascensionis appareret discipulis in monte Oliveti, antequam ascendit in cœlum, dixit eisdem : Sedete in civitate quoadusque induamini virtute ex alto; et ego mittam promissum Patris mei in vos, id est Spiritum Sanctum procedentem a Patre, quem et Pater per me vobis promisit. Quumque Christus coram discipulis ascendisset, reversi sunt Jerosolymam cum gaudio magno, et præfatum introierunt cœnaculum. Erant quoque cum eis Virgo gloriosa et aliæ feminæ sanctæ quæ Christum ante passionem fuerunt secutæ, juxta illud : Quum introissent in cœnaculum, hi omnes erant perseverantes unanimiter in oratione cum mulieribus, et Maria matre Je-

Luc. xxiv, 49.

Act. 1, 13, 14.

su, et fratribus ejus, id est cognatis : quia A non solum aliqui Apostolorum, sed et aliorum discipulorum nonnulli fuerant consanguinei Christi.

Et factus est repente de cœlo sonus, tanquam advenientis spiritus vehementis, hoc est instar venti impetuosius et grandis tonitruum, ita quod sonus ille fuit magnus fragor similis sono validi venti sive tonitruum. Vel sic, « factus est repente de cœlo sonus, tanquam advenientis Spiritus vehementis », id est talis sonus qualem decuit esse sonum illum qui majestatem Spiritus Sancti advenientis et velocitatem suæ operationis declaravit atque signavit. Siquidem per ea quæ foris fiebant, invisibilis Spiritus Sancti majestas, virtus et actio significabantur. Juxta hunc modum Ezechiel propheta loquitur : Audiebam sonum, quasi sonum aquarum multarum, quasi vocem sublimis Dei. Deinceps Spiritus Sanctus dicitur Spiritus vehemens, id est in operatione maxime velox, et mentem valde accendens, concutiens et immutans ; vel, « vehemens », hoc est vā demens, C quia in præsenti aufert vā culpā, et liberat a vā infernalis miseriæ. Quod vero dictum est « de cœlo », intelligi potest dupliciter : primo, quoniam sonus ille fiebat virtute cœlesti et miraculose, utpote ministerio angeli ; secundo, quia fiebat in cœlo aërio, hoc est in aere. Unde et aves in aere volitantes, aves cœli vocantur. Fiebat enim in aere, circa cœnaculum istud. Ad hoc quoque fiebat sonus ille tam vehemens, ut per eum corda discipulorum ad reverentialem Dei concuterentur timorem, sicque profundiori humiliatione disponderentur ad Spiritus Sancti infusionem. Et replevit sonus ille totam domum ubi erant sedentes, hoc est in qua manebant.

Et apparuerunt illis, id est Apostolis ac ceteris eis adjunctis (qui omnes simul erant circiter centum viginti, secundum illud : Erat autem turba hominum simul fere centum viginti), dispersitæ linguæ tanquam ignis, hoc est igneæ linguæ diversimode inter se divisæ, seditque supra singulos eorum, id

est, Spiritus Sanctus in linguis istis appa-
rens, super unumquemque discipulorum
quievit. Per quod designavit quod corda
eorum gratiosissime adimplevit. Sic et su-
per Christum in baptismo in forma colum-
bæ descendit et mansit. Postremo duplex ^{Matth. iii, 16.}
est missio Spiritus Sancti : una spiritualis
et invisibilis, qua absque sensibili signo
infunditur mentibus ; alia visibilis, dum
datur in signo sensibili, ad innuendum
quod earum rerum in quarum forma ap-
paret, proprietates et actus spiritualiter
operatur in cordibus quibus præstatur.
Hinc nunc in igneis linguis apparuit, hoc
est in igne et linguis : ita quod ignis
habuit speciem linguæ, et linguæ vide-
bantur igneæ, sic quod æquivalenter fuit
duplex signum sensibile. In linguarum ita-
que specie apparebat, ad innuendum quod
omnium linguarum notitiam, facultatem
et usum eis infudit ; secundo, quia cun-
ctis gentibus erant prædicaturi ; tertio, quo-
niam linguis prædicantium gratia Spiritus
Sancti præcipue necessaria est. Hæ quoque
linguæ igneæ erant, ad designandum quod
verba ferventia proferre et igneam legem
docere deberent. Siquidem lex evangelica
recte lex ignea nuncupatur, quum sit lex
amoris, de quo ait Salvator : Ignem veni ^{Luc. xii, 49.}
mittere in terram. De qua lege scriptum
est in Deuteronomio : In dextera Dei ignea ^{Deut. xxxiii, 2.}
lex. Item, quod intus igne divini succen-
derentur amoris. Itaque Deus per hoc quod
foris exhibuit, ostendit quod intus gessit :
qui enim discipulos caritate succensos, et
verbo atque sapientia eruditos, intus con-
stituit, foris igneas linguas monstravit.

Insuper, convenienter quinquagesimo
die a Pascha, sic datus est Spiritus San-
ctus. Primo, ad declarandam veteris ac
evangelicæ consonantiam legis. Nam ve-
tus lex quinquagesimo die a Pascha Judæ-
orum collata est : sic et Spiritus Sanctus,
per quem evangelica lex in discipulorum
cordibus est firmata, quinquagesimo die
a Pascha credentibus est infusus. Secun-
do, quoniam quinquagesimus numerus re-
missionem et quietem designat : unde in

lege veteri annus quinquagesimus dictus est jubilæus, id est annus remissionis. Quum ergo Spiritus Sanctus peccata dimittat, veramque tribuat pacem, et ad æternam perducatur quietem, quinquagesimo die datus est congruenter. Ad litteram quoque, Apostoli infra hos decem dies ab Ascensione convenienter se valebant disponere ad tam copiosissimam susceptionem Spiritus Sancti. Quo etiam numero mystice designatur, quod per observantiam decem præceptorum, ad incrementa donorum Spiritus Sancti pertingitur.

Præterea, quia in textu habetur, « apparuerunt illis », quidam opinati sunt quod apparitio illa imaginaria fuit. Hinc secundo de Trinitate asserit Augustinus, quod littera hæc quæstionem habet an igneæ linguæ corporaliter visæ sint eis, an imaginarie tantum. Tenendum tamen est absolute, et communiter sic tenetur, quod vere ab extra realiter apparebant, sicut columba super Christum.

Et repleti sunt omnes Spiritu Sancto. Quemadmodum enim domus in qua sedebant repleta fuit sono et igneis linguis, ita et corda eorum illustratione, inflammatione variisque charismatibus Spiritus Sancti. Et utique ante hanc horam, habuerunt gratiam Spiritus Sancti, etiam in abundantia quadam, præsertim quum Christus per insufflationem eis Spiritum Sanctum infudit; sed nunc in præexcellenti plenitudine Spiritum Sanctum adepti sunt. Sunt autem plures gradus quibus electi Dei Spiritu Sancto pleni sunt, seu repleti dicuntur; nec Apostoli sic modo repleti Spiritu Sancto fuerunt, quin ab hac die usque ad finem vitæ suæ, in donis et gratia Spiritus Sancti omni die eminenter profecerint. Insuper, repleti Spiritu Sancto jam describuntur, non solum quantum ad dona gratiæ gratum facientis, sed etiam quoad dona gratiæ gratis datæ, quæ ad aliorum utilitatem præstantur. Jam enim data sunt eis gratia miraculorum magis quam ante, et spiritus prophetiæ, donum linguarum, discretio spirituum, sermo sa-

pieniæ, sermo scientiæ. In tanta quoque plenitudine Spiritum Sanctum quoad dona gratum facientis gratiæ susceperunt, quod confirmati fuerunt in gratia, nec postea peccaverunt mortaliter.

Et cœperunt loqui variis linguis, hoc est diversis uti loquelis, *prout Spiritus Sanctus dabat eloqui illis.* Omnium enim gentium idiomata proferre et intelligere potuerunt: imo, quod mirabilius est, secundum Glossam et expositores communiter, uno eorum aliquam proferente loquelam, omnes qui aderant, quantumlibet idiomatum consisterent diversorum, loquelam illam tanquam proprium idioma audierunt ac intellexerunt, divina id operante potentia.

Erant autem in Jerusalem habitantes Judæi, viri religiosi, hoc est devoti. Religio namque uno modo est idem quod latria, quæ est virtus Deo cultum cærimoniamque impendens. Qualiter autem religio pluribus modis sumatur, et quomodo dupliciter religiosi dicantur, in expositione

C epistolæ præcedentis dominicæ dictum est. p. 26 D et s.

Ex omni natione quæ sub cælo est. Hoc per hyperbolen dictum est, quia non absolute ex omnibus mundi provinciis, sed ex multis et valde diversis quidam Judæi ad Jerusalem confluerunt, et ex devotione ibi manserunt, tanquam in urbe præcipua cultus divini, in qua templum existit: qui erant ex eorum posteritate quos Assyrii et Chaldæi ac Græci per diversa vendiderant atque disperserant loca. Unde in libro Esther refertur, quemadmodum in Estherm, diversis Assueri regis provinciis plurimi 8. morabantur Judæi; et quamvis a Cyro rege Persarum habuerunt redeundi licentiam, multi tamen non redierunt.

Facta autem hac voce, hoc est, locutione Apostolorum tam mirabiliter resonante, quando cœperunt loqui variis linguis, *convenit multitudo,* hoc est, plurimi Judæorum accurrebant. Quidam vero per vocem hanc factam, intelligunt sonum præfatum, tanquam advenientis spiritus vehementis: quem dicunt ab habitatoribus Jerusalem

circa templum fuisse auditum; propter A quod mox illuc concurrerunt. *Et mente confusa est*, hoc est plurimum admirata ac conturbata, *quoniam audiebat unusquisque lingua sua illos loquentes*. Ex quo elicitur, quod singuli unam cujuslibet Apostolorum loquelam intellexerunt: quod fuit magnum et inauditum miraculum, omnes illos in stuporem convertens, quemadmodum subditur:

Stupebant autem omnes. Stupor ex ingenti admiratione causatur. *Et mirabantur, ad invicem dicentes: Nonne ecce isti omnes qui loquuntur, puta Apostoli, Galilæi sunt? Et quomodo nos audivimus unusquisque linguam nostram, in qua nati sumus? videlicet: Parthi, et Medi, et Elamitæ, ex regione nomine Elam, et qui habitant Mesopotamiam, Judæam*. Judæa hic sumitur pro terra duarum tribuum, scilicet Juda et Benjamin, ad distinctionem (ut ait Beda) Samariæ, Galilææ, Decapoleos et aliarum in eadem provincia regionum. Quæ omnes licet una loquerentur lingua Hebræa, tamen in loquendo aliquantulum differrebant, sicut et modo diversi Teutonici. Hinc Petro in passione Christi objectum est quod fuerit Galilæus. *Et Cappadociam, Pontum et Asiam, Phrygiam et Pamphylia*. Asiæ minoris provinciæ fuerunt Phrygia et Pamphylia, Cilicia, Lycaonia, et aliæ multæ. *Ægyptum, et partes Libyæ quæ est circa Cyrenen*. Libya regio est circa

Marc. xiv, 70.

Ægyptum, et protenditur usque in Cyrenen. *Et advenæ Romani*, qui de Italia ad Jerusalem venerant. *Judæi quoque natura, et proselyti*. Sicut in novo Testamento vocantur neophyti, qui de infidelitate ad evangelicam legem de novo conversi sunt; ita in veteri Testamento dicebantur proselyti, qui de gentilitate ad legem convertentur Mosaicam. *Cretes et Arabes*, hoc est de Creta et Arabia. Arabia vero plurimas habet gentes, videlicet Moabitas, Ammonitas, Idumæos et Sarracenos, pluresque alias.

B *Audivimus eos loquentes nostris linguis*, secundum modum prædictum, *magnalia Dei*, videlicet Christi resurrectionem, ascensionem, Paracleti missionem, et quomodo Deus per Christi passionem mundum redemit. Præterea, uno Apostolorum loquente, atque tacentibus ceteris, unus ille non nisi unius idiomatis simul protulit verba; singulis tamen videbatur quod suæ loquelæ verba proferret: et virtualiter, non formaliter ita fuit, sicut et manna cunctorum ciborum saporem continuit, C juxta illud libri Sapientiæ: Panem de cælo præstitisti eis, Domine, omne delectamentum in se habentem, et omnis saporis suavitatem; deserviens enim uniuscujusque voluntati, ad quod quisque volebat, convertebatur. Hoc tamen in bonis Israelitis contigisse dumtaxat aliqui dicunt: nam mali dixerunt, Anima nostra nauseat super cibo isto levissimo. *Sap. xvi, 20, 21.* *Num. xxi, 5.*

SERMO PRIMUS

QUOMODO SPIRITUS SANCTUS PERHIBUIT APOSTOLIS ET ELECTIS TESTIMONIUM DE CHRISTO, ET DE CAUTELIS SERVANDIS IN LOQUENDO.

R *EPLETI sunt omnes Spiritu Sancto*. D Act. ii, 4.

Quemadmodum Dominus noster Jesus Christus in sermone suo post Cœnam prædixit Apostolis, ita hoc die copiose ac glo-

riosissime adimplevit. Tunc enim promisit eis Spiritum Sanctum, et inter cetera dixit: Quum venerit Paracletus, quem ego mittam vobis a Patre, Spiritum veritatis, ille testimonium perhibebit de me. Hoc

Joann. xv, 26.

Marc. xv,
25.

itaque Christus Filius Dei hoc die adimplevit. Nam mane, utpote tertia hora diei (eo modo computandi quo Christus dicitur hora tertia a Pilato præside judicatus), dum beatissimi Apostoli, et qui cum eis erant, orationibus et meditationibus sanctis devotissime erant intenti, repente factus est sonus magnus quasi tonitruum circa domum in qua consederunt, et descendit super eos Spiritus Sanctus, implevitque corda eorum multiplici gratia, omnium linguarum notitia et totius sacræ Scripturæ intelligentia, sanctæ quoque caritatis admirando fervore, et maxima mentis constantia : ita quod ipsi beati Apostoli ceterique discipuli, qui usque ad tempus illud formidabant Judæos nec Christum publice confiteri audebant, subito excellentissime illuminati, ardentissime inflammati, invictissime confortati, velut examen apum eruperunt de illo in quo sedebant cœnaculo, et ingressi sunt templum ; atque ibidem, in omnium præsentia Judæorum, videlicet multorum sacerdotum, Scribarum, Phariseorum et seniorum, ac vulgi, Christum cœperunt absque omni formidine prædicare, protestando et per Scripturas sacras probando, quod ipse Dominus Jesus Nazarenus sit verus Christus, rex Israel et Messias in lege promissus, Salvator mundi ac Filius Dei. Tunc itaque Spiritus Sanctus perhibuit testimonium de Christo per os Apostolorum.

Multipliciter autem perhibuit testimonium Christo. Primo, per hoc quod Christi promissionem de sua missione tam gratiose ac miraculose implevit, utpote, per hoc quod ipsis Apostolis et congregatis cum eis, simplicibus et idiotis, repente sapientiam tantam infudit, tam ardentissimam caritatem Dei et proximi contulit, tantam animi fortitudinem indidit, omnium linguarum notitiam et usum concessit : ita quod sancti Apostoli, qui a Christo adhuc vivente et capto fugerunt, jam eum post suam crucifixionem tam imperterritè ac constantissime prædicaverunt ; et sacratissimus princeps Apostolorum Petrus, qui

ad interrogationem ancillæ negaverat Christum, jam præ ceteris universis coram universo populo prædicavit eundem, nec propter pontificum prohibitionem nec propter flagellationem cessavit. Tam miraculosa ergo et gratiosa operatio Spiritus Sancti, fuit testimonium præclarissimum quod Jesus sit verus Christus et Filius Dei.

Secundo, Spiritus Sanctus perhibuit testimonium Jesu Christo, per Apostolorum ora tam miraculose loquendo, quod uno Apostolo unum idioma loquente, universi qui aderant, diversarum valde existentes linguarum, illud intellexerunt, et quasi proprium idioma unicuique sonuit illud : cujus similitudo præcessit in manna, quod licet in sua natura non habuerit nisi unum saporem, tamen unicuique filiorum Israel *Sap. xvi, 21.* fideli et bono sapuit ut volebat.

Tertio, per hoc quod ex illuminatione ejus, Apostoli verba Prophetarum abundantissime allegaverunt de Christo, probando ex illis quod Jesus sit rex Messias, prout infra in speciali dicetur sermone.

Quarto, prædicationem Apostolorum per multa miracula confirmando. Nempe ex hoc die cœperunt Apostoli solito valde abundantius in nomine Christi miracula operari ; nec solum Apostoli, sed ceteri quoque discipuli, quia de S. Stephano B. Lucas testatur, quod faciebat signa et prodigia magna in populo. Omnes namque infirmos qui præsentabantur Apostolis, protinus gloriosi curaverunt Apostoli : ita quod civitates circa Jerusalem situatæ concurrebant, et ægros quamplurimos secum in Jerusalem ad Apostolos deportaverunt ; sanabanturque omnes, in tantum quod etiam infideles Judæi erant valde perterriti, nec audebant se admiscere credentibus. Hinc in Actibus asserit B. Lucas : Fiebat *Act. vi, 8.* autem omni animæ timor ; multa quoque prodigia et signa per Apostolos fiebant in Jerusalem, et metus erat magnus in universis. Ceterorum etiam nullus audebat se *Ibid. ii, 43.* conjungere illis ; sed beatificabat eos populus. Ista revera fuerunt mirabilia magna *Ibid. v, 13.* nimis et mirabilissima valde, atque mutatio *Ps. lxxvi, 11.*

dexteræ Excelsi. Tantis etenim gratiæ fulgor, tantus potestatis vigor, tamque Omnipotentis magnifica operatio in Apostolis ceterisque discipulis resplenduerunt, quod adversarii veritatis formidare coacti sunt, præsertim propter tam magna et innumera miracula quæ videbant omni die.

Quinto, Spiritus Sanctus testimonium perhibuit Christo, per hoc quod tot millia Judæorum convertit ad eum. Judæi namque, qui paulo ante blasphemaverunt crucifixeruntque Christum, nec in eum credere voluerunt, cujus miracula quotidie perceperunt seu conspexerunt, a quo et mortuos noverant suscitatos; die isto et deinceps, visis tot mirabilibus, et ex prædicatione beatissimi principis Apostolorum perterriti, compuncti sunt corde, et eum adorare cœperunt, quem (ut dixi) ante perpauca dies blasphemare ac crucifigere ausi fuerunt. His itaque modis perhibuit Spiritus Sanctus hoc die testimonium Domino Jesu Christo.

Præterea, circa textum hodiernæ epistolæ advertendum, quod a principio creationis primorum parentum, videlicet Adæ et Evæ, usque ad diluvium, imo et post hoc usque ad ædificationem turris Babilonicæ, fuit unum omnium hominum idioma, utpote lingua Hebræa, cujus notitiam Deus primis parentibus a principio creationis eorum infudit; et lingua hac utebantur in paradiso, deinde et extra paradisum, omnesque posteri eorum boni et mali. Hinc lingua Hebræa est prima ac nobilissima lingua. Signum quoque quod omnium erat una loquela, et quod hæc ipsa fuit Hebræa, hoc est quod omnium hominum nomina quæ ponuntur in Genesi, usque ad descriptionem constructionis turris Babel, exstant Hebræa. Quumque post diluvium cœpissent homines multiplicari, conveniunt, concorditerque dixerunt: Venite, et construamus turrem cujus altitudo pertingat usque ad cœlos; et celebremus nomen nostrum antequam ab invicem dividamur in universa terra. Quum ergo cœpissent hoc agere, confudit Deus loque-

lam eorum, ita quod diversi diversis uti et loqui cœperunt: propter quod unus alium non intellexit. Sicque ædificare cessabant, et divisi sunt ab invicem per universam terram, sicut in Genesi plenius scribitur. Itaque, sicut propter superbiam et rebellionem filiorum Adæ divisæ sunt linguæ, ita per humilitatem et obedientiam discipulorum Christi, operante Spiritu Sancto, unitæ sunt: primo, per hoc quod in quolibet Apostolorum fuit omnium linguarum notitia et facultas; secundo, per hoc quod omnium linguarum nationes ac gentes in Christo per fidem et caritatem sunt adunatæ, juxta illud Danielis: Omnes populi, tribus et linguæ servient ei.

Insuper, sicut Apostoli Spiritum Sanctum acceperunt dum simul sederunt, et jejuniis atque orationibus inhæserunt; ita si nos desideramus Spiritu Sancto impleri, oportet nos pariter esse, hoc est in Ecclesia Dei per caritatem conjungi, et in pace pectoris repausari, omni dissensione, lite, aversione, perturbatione exclusis, quatenus, juxta Apostolum, unanimes, uno ore Deum honorificemus. Idcirco oportet nos caritative, mansuete et patienter ad invicem conversari in vera ac stabili humilitate, quoniam Deus superbis resistit, humilibus autem dat gratiam. Et apud Isaiam loquitur Deus: Ad quem respiciam, nisi ad pauperulum, et contritum spiritu, et tremementem sermones meos? Ubi alia habet translatio: Super quem requiescet spiritus meus, nisi super quietum et humilem?

Postremo, per hoc quod ait Scriptura, quod Apostoli cœperunt loqui prout Spiritus Sanctus dabat eloqui illis, docemur et nos qualiter habere debemus nos in loquendo. In quo sunt quinque attendenda. Primo considerare debemus quid loquimur, ut scilicet non nisi utilia et ædificatoria verba loquamur. Secundo considerare debemus ubi loquendum sit, quia non est in ecclesia fabulandum, nec quilibet locus aptus est ad loquendum; inter sapientio-

res quoque, majores ac seniores aut nihil
Eccle. iii, 7. aut parcius est loquendum. Tertio, quando
 loquendum sit, quia ut Salomon docet, Est
 tempus loquendi, et tempus tacendi. Tem-
 pus loquendi est dum rationabilis causa
 exigit loqui, videlicet propter propriam
 aut proximorum utilitatem, vel ad Dei ho-
 norem. Quarto, cui loquendum sit, utpote
 ei a quo possimus ædificari seu adjuvari,

A vel quem ædificare aut adjuvare possi-
 mus. Quinto, qualiter sit loquendum, vi-
 delicet humiliter ac modeste, et non nimis
 prolixè, quia ut Salomon ait, Stultus verba *Eccle. x, 14.*
 multiplicat. In hac ergo sanctissima solen-
 nitate simus specialiter devoti ac custoditi
 in omnibus, ne Spiritum Sanctum offen-
 damus, sed in ejus gratia crescamus quo-
 tidie et proficiamus.

ENARRATIO IN EVANGELIUM

SI QUIS DILIGIT ME, SERMONEM MEUM SERVABIT, ETC. Joann. XIV, 23-31.

EVANGELIUM præsentis diei in san-
 ctissima solennitate hac congruentis-
 sime legitur, quia quod Christus in sermo-
 ne post Cœnam de Spiritus Sancti missione
 et operatione promisit, atque hodierno die
 complevit, in evangelio isto describitur.
 Ait ergo Salvator discipulis suis, puta Apo-
 stolis, quibus in sermone post Cœnam hæc
 dixit :

Si quis diligit me dilectione superna-
 turali, gratuita et infusa, quæ est theolo-
 gica virtus, *sermonem meum servabit*, hoc
 est, evangelicam doctrinam memoriter re-
 tinebit, præceptis meis obediet, testimo-
 niis meis credet. Qui enim sincere diligit
 alium, voluntatem suam conformat ratio-
 nabili voluntati ejus quem diligit, quoniam
 amicorum est idem velle et nolle, secun-
 dum Philosophum : idcirco qui vere et
 spiritualiter diligit Christum, approbat quæ
 approbat Christus, odit quæ reprobat ille,
 facit quod Christo placet, vitat quod dis-
 plicet illi, sicut dicit Psalmista : In corde
 meo abscondi eloquia tua, ut non peccem
 tibi. Veruntamen naturali dilectione po-
 test quis Deum diligere, nec tamen ejus
 præcepta implere : nam multi iniqui ac re-
 probi, imo et infideles sic diligunt Deum ;
 angeli quoque apostatæ ante suam ruinam
 dilexerunt taliter Deum, etiam plus quam

B se ipsos, secundum Thomam et Scotum,
 imo secundum Augustinum, dicentem quod
 intellectualis creatura naturali dilectione
 Deum plus diligit quam se ipsam (aliter
 aliquid pure naturale esset inordinatum,
 quum tamen peccatum non sit nisi re-
 cessus ab eo quod est secundum naturam,
 vel etiam recessus ab ordine, secundum
 divinum Dionysium). Omni ergo cum di-
 ligentia divina sunt observanda præcepta,
 juxta illud Proverbiorum : Serva mandata *Prov. vii, 2.*
 et legem quasi pupillam oculi tui. Hinc,
 teste Gregorio, signum dilectionis est exhi-
 bitio operis. Et S. Joannes apostolus ait :
 Non diligamus verbo neque lingua, sed *I Joann. iii,*
 opere et veritate. *18.*

Et Pater meus diligit eum. Qui enim
 diligit unam divinam et increatam Perso-
 nam, diligit totam superbeatissimam Tri-
 nitatem, et qui ab una divina Persona
 amatur, a tribus diligitur. Imo sicut nos
 una et eadem dilectione diligimus Trini-
 tatem, ita a singulis divinis Personis ea-
 dem caritate amamur : nam, ut ait Psal-
 mista, Dominus diligit justos ; atque, ut *Ps. cxlv, 8.*
 Aristoteles loquitur, vir contemplativus et
 virtuosus, est amantissimus Deo. Hanc eam-
 dem sententiam Christus paulo ante hæc
 verba expressit, dicendo : Qui habet man-
 data mea et facit ea, ille est qui diligit *Joann. xiv,*
21.

Ps. cxviii,
11.

me; qui autem diligit me, diligitur a Patre A meo. Diligere namque, est alicui bonum velle : amatoribus autem Christi Deus Pater dona gratiæ suæ vult atque largitur; et si perseveraverint usque in finem, dona gloriæ sortientur a Patre. Deinceps, quia dilectio Patris ac supergloriosissimæ Trinitatis ad homines, est æterna, idcirco per omnem differentiam temporis designatur, quoniam omne tempus comprehendit sive includit æternitas. Hinc apud Joannem per Joann. III, 16. verbum præteriti temporis dicitur : Sic Deus dilexit mundum, ut Filium suum B unigenitum daret. Et Paulus : Propter nimiam (inquit) caritatem qua dilexit nos Pater, Filium suum misit. Alibi quoque per verbum præsentis dicitur temporis : Pater amat vos. Et nunc verbo futuri temporis dictum est : Diligetur a Patre meo; et, Pater meus diliget eum.

Omnes autem prædestinatos diligit Deus æternaliter atque simpliciter, etiam tunc quando non diligunt Christum : vult enim eis bona gratiæ in præsentem, et bona gloriæ in futuro. Diligit, inquam, eos secundum C suæ æternæ prædestinationis intuitum. Quum vero convertuntur et diligunt, impendit suæ dilectionis effectum, quem plene finaliterque impendit dum eis æternam felicitatem largitur. Non prædestinatos autem nunquam diligit absolute, quia non vult eis simpliciter gloriam beatitudinis æternæ; sed dum diligunt Deum, et in statu salutis sunt, diligit eos secundum præsentem justitiam. Quum itaque ait Salvator, Qui diligit me, diligitur a Patre meo, seu, Pater meus diliget eum, intelligi D potest de electis qui perseverant et consummantur in bono : hi quippe a Patre æternaliter atque simpliciter diliguntur, a quo plenam beatitudinem consequentur; vel de præscitis qui ad tempus diligunt Christum, et pro tunc diliguntur a Patre secundum præsentem justitiam : sicque diliguntur ab eo quamdiu diligunt Filium ejus. Verumtamen Pater in se ipso invariabilis permanet, et diversitas ista ex parte creaturæ accipitur.

Et ad eum veniemus, ego et Pater; haud dubium quin et Spiritus Sanctus, quoniam opera Trinitatis ad extra sunt indivisa. Veniemus itaque, non per loci mutationem, aut corporalem accessum, sed per caritatis et gratiæ augmentationem, per spirituum donorum multiplicationem. Istud etenim intelligendum est, non de primo adventu Patris et Filii ad amantem, quum nemo diligit Deum sive obediat ei, nisi primo tota Trinitas eum gratiose prævenit, atque per caritatis et gratiæ infusionem mentem ejus pie intraverit. Sed qui diligit Christum, gratis potioribus adimpletur, sicut ait Salvator : Habenti dabitur, et abundabit. Amor quoque facit omnia esse communia : ideo quanto ardentius Deum amamus, eo bona sua liberalius nobis communicat et infundit. Et si timentibus Deum nil deest, quid poterit deesse Deum amantibus? Vel quid Deus suo poterit denegare fervido amatori, quum dicat Apostolus, Qui adhæret Deo, unus spiritus est cum eo? Porro, si aliquid negat oranti, hoc facit ex caritate, quia illi non expedit, vel quia dilatio utilis ei consistit.

Et mansionem apud eum faciemus, hoc est, mentem ejus gratiose et pie inhabitabimus. Quum enim juxta Apostolum, corpora devotorum templum sint Spiritus Sancti, quanto magis mentes eorum? Et si debemus Deum glorificare et portare in corpore nostro, multo plus glorificare eum debemus in animabus nostris per contemplationem sinceram, per ferventem amorem, per jugem recordationem ipsius, quem admodum hortatur Deus in Canticis : Pone me (inquit) ut signaculum super cor tuum. Quamvis autem incircumscriptibilis Deus sit in omnibus per essentiam, potentiam atque præsentiam, illos tamen dumtaxat inhabitare asseritur in quibus est per dona gratiæ gratum facientis. Ideo in Proverbiis dicitur : Longe est Dominus ab impiis. Et in Apocalypsi de justis inducitur : Ecce tabernaculum Dei cum hominibus, et habitabit cum eis.

Matth. XIII, 12; xxv, 29.

Ps. xxxiii, 10.

I Cor. vi, 17.

Ibid. 19.

Ibid. 20.

Cant. viii, 6.

Prov. xv, 29.

Apoc. xxi, 3.

Qui non diligit me, sermones meos non servat, id est, opere non adimplet. Quidam tamen vani et scioli servant memoriter verba Christi, ut prædicando, loquendo, docendo aut disputando, docti appareant, et honorem aut lucrum acquirant. Quibus melius esset viam justitiæ ignorasse. *Et sermonem quem audistis ex ore meo, non est meus, secundum quod homo sum, tanquam principalis doctoris et locutoris, sed ejus qui misit me Patris*, qui per me loquitur tanquam per legatum et magni consilii angelum, secundum quod homo sum. Hinc alio loco Christus disseruit : *Mea doctrina non est mea, sed ejus qui misit me*. Augustinus quoque et Gregorius sic exponunt : Quoniam Christus est verbum et sermo Patris, ideo sermo quem protulit Christus, non est Christi, sed Patris sui. Hoc autem verum est de Verbo increato et sermone æterno, non de sonanti aut transitorio. Christus vero nunc potissimum loquitur de sermone suo vocali, qui aures discipulorum objectaliter immutavit. Persona demum loquens non auditur per se, et tanquam objectum auditus, sed sono mediante.

Hæc locutus sum vobis, apud vos manens corporaliter ac visibiliter. *Paracletus autem Spiritus Sanctus*. Qui vocatur Paracletus, id est consolator, quia spem veniæ tribuendo, et futurorum contemplationem atque prægustum aliquem infundendo, animam recreat et delectat. Dicitur etiam advocatus, non quod Patre et Filio minor sit, sed quoniam eos quos replet Deum invocare fervide facit, prout ait Aposto-

A tempore, nec actione mutabilis; sed missione spiritali, per infusionem donorum Paracleti, ut mitti dicatur ratione sui effectus quem Patre volente causat in rationali creatura. Propter quem etiam effectum dicitur in rationali creatura de novo esse et habitare. *In nomine meo*, hoc est in me, per me et propter me. Pater enim omnia operatur per Filium secundum ejus divinam naturam (juxta illud Joannis : Omnia per ipsum facta sunt); et per ac propter Filium secundum ejus humanitatem, id est, per merita unigeniti Filii sui, dat nobis dona Spiritus Sancti. *Ille vos docebit omnia*, non simpliciter omnia, sed omnia de quibus subjungitur, *et suggeret vobis omnia quæcumque dixerò vobis* : hoc est, quæ vobis modo propono sive proposui, quæ propter eorum profunditatem ac vestri ingenii tarditatem nunc intelligere non potestis, præsertim quum sitis pleni dolore, tristitia et timore, ideo Spiritus Sanctus suggeret vobis ea, hoc est, ad memoriam reducet : quia et id quod intellexerunt tempore hujus sermonis, obliti fuerunt; sed in die Pentecostes Spiritus Sanctus omnia eis inspiravit.

Pacem relinquo vobis, hoc est, pacem spiritualem vobis habendam ac custodiendam committo, ut sitis quieti in Deo, per caritatem quiescentes in eo. *Pacem meam*, hoc est veram mentis tranquillitatem, do vobis jam inchoative, quam dabo vobis in patria consummate. Et quamvis Apostoli non fuerunt bene capaces hujus pacis, quando Christus hæc protulit statim post Cœnam, tamen post resurrectionem, dum eis apparuit, dicens, Pax vobis, capaces effecti sunt, atque ex tunc verba ista impleri cœperunt. Vel sic : « Pacem » gratiæ « relinquo vobis » in via, pro dono præcipuo; « pacem » gloriæ « do vobis » pro præmio in futuro. Hinc enim, secundum Augustinum, dicendo, Pacem relinquo vobis, non addidit, Meam, quia pax electorum in via, est multis tribulationibus defectibusque admixta, et talis non fuit pax Christi, qui caruit omni cul-

II Petr. II,
21.

Is. IX, 6,
juxta LXX.

Joann. VII,
16.

Rom. VIII,
26.

Joann. I, 3.

Ibid. XX, 19,
21, 26.

pa. Sed dicendo, Pacem do vobis, addidit, A Meam, quoniam pax Sanctorum in patria, perfecte assimilatur paci Christi, nam caret omni malo culpæ ac pœnæ. Tunc nempe perfecte implebitur quod per Isaiam Dominus pollicetur: Sedebit populus meus in pulchritudine pacis, et in tabernaculis fiduciæ, et in requie opulenta.

Non quomodo mundus dat, hoc est non pacem carnalem et sæcularem, qualem dant et procurant sæculi hujus vanissimi amatores, *ego do vobis*. Illa etenim pax, est quieta quædam fruitio temporalium B divitiarum, carnalium deliciarum, et ceterorum hujus mundi bonorum, qualem habet anima vitiosa cum propria carne, dum ejus concupiscentiis acquiescit, qualem item habuit Adam cum Eva, dum ad ejus suggestionem divinum violavit præceptum. De qua apud Matthæum ait Salvator: Non veni pacem mittere in terram, sed gladium. Huic malæ paci opponitur bona discordia: quam inter Phariseos et Sadduceos misit apostolus Paulus. De hac inordinata inquinataque pace, quæ est consensus aliquorum in malo, seu quietatio C animi in re prava, ait Psalmista: Quia zelavi super iniquos, pacem peccatorum videns.

Porro de pace ordinata jam dicta, quam ad Galatas ponit Apostolus inter fructus Spiritus, scriptum est apud Isaiam: Non est pax impiis, dicit Dominus. Hæc etenim pax procedit ex caritate, quoniam caritas ordinat et concordat hominem ad Deum ac proximum, et sic facit pacem atque concordiam. Propter quod Propheta loquitur Deo: Pax multa diligentibus legem D tuam. Denique pax ista præcipue appetenda et custodienda est Christianis, quia ut asserit Christus, Beati pacifici, quoniam filii Dei vocabuntur. Et juxta Apostolum, In pace vocavit nos Deus. Unde hortatur: Solliciti servare unitatem spiritus in vinculo pacis. Ista pax pectoris, quæ est tranquillitas ordinis, consistit in hoc quod caro obedit spiritui, sensualitas rationi, et ratio Deo. Idcirco dum anima ab inquietudine passionum est libera, ac legi divinæ

rite subjecta, pacem habet in se et cum Deo, imo et cum proximis, quantum in se est: non enim contra aliquem passionibus agitur, non invidia stimulatur, non ira turbatur. Interdum tamen proximus cum homine tam pacato atque pacifico pacem non habet, ex sua perversitate. Hinc ad Romanos dicitur: Si fieri potest, quod ex vobis est, cum omnibus hominibus pacem habete. Sed non debemus proximis concordare nisi in bono.

Non turbetur cor vestrum, id est, non immoderate afficiatur, ita ut pacem perdat internam, *neque formidet* humano et carnali timore: de quo scriptum est, Nolite timere eos qui corpus occidunt; et Salomon, Justus (inquit) quasi leo confidens, absque terrore erit. Est autem alius timor bonus et virtuosus, quo homo veretur Deum offendere et separari ab eo: de quo rursus Salomon, Beatus homo qui semper est pavidus. Apostoli autem habuerunt inordinatum timorem: metuebant namque Judæos, ne Christum et ipsos occiderent. Admonet igitur eos Christus ad fortem et inconcussam mentis constantiam.

Insuper, cur ex sua passione turbari non debeant nec pavere, Christus subjungit. *Audistis quia ego dixi vobis: Vado*, id est, per passionem a vobis recedo secundum humanitatem meam, ad modicum tempus, *et venio ad vos*, id est, cito post resurrectionem vos denuo visitabo. *Si diligereitis me* dilectione pure spirituali et perfecta, non sensuali, qualis adhuc est affectio vestra ad me, *gauderetis utique, quia vado ad Patrem*, id est, congratularem mihi propter glorificationem corporis mei et accidentalem mercedem quam acquirero per mortem, quoniam moriendo ex caritate et obedientia pro mundi salute, mereor statim resurgere et glorificari in corpore, ad coelos ascendere, ad Patris dexteram residere. Quamvis ergo de passione Christi secundum se accepta, non fuit gaudendum, tamen in quantum fuit tam fructuosa et salutaris, fuit et est causa materiaque gaudendi: et ad amicitiam

Is. XXXII, 18.

Rom. XII, 18.

Matth. X, 34.

Matth. X, 28.

Act. XXIII, 6, 7.

Prov. XXVIII, 1.

Ps. LXXII, 3.

Ibid. 14.

Galat. V, 22.

Is. XLVIII, 22; LVII, 21.

Ps. CXVIII, 165.

Matth. V, 9.

I Cor. VII, 15.

Ephes. IV, 3.

pertinet, ut de bono dilecti et de prosperitate ipsius gloriatur amator. *Quia Pater major me est* secundum quod homo sum, prout mori competit mihi : idcirco ad Patrem eundo, juxta modum jam tactum glorificor. Non tamen Filius Dei est pura creatura, ut sceleratissimus Arius finxit, sed verus Deus et secundum suam divinitatem Patri vere æqualis, juxta illud : Qui quum in forma Dei esset, non rapinam arbitratus est esse se æqualem Deo ; sed semetipsum exinanivit, formam servi accipiens.

Philipp. II,
6, 7.

Et nunc dixi vobis quod mihi futurum est in passione, resurrectione et ascensione, *priusquam fiat, ut quum factum fuerit, credatis* quod ego sum Christus Filius Dei, quem me esse protestor : quoniam ista de futura mea passione, resurrectione et ascensione non possem tam certe prædicere, nisi Christus existerem.

Jam non multa loquar vobiscum ante passionem meam in carne ista passibili. Cujus causa subjungitur : *venit enim princeps mundi hujus*, id est diabolus, princeps hominum impiorum ac mundanorum, qui dæmonibus serviunt. Dicitur autem diabolus princeps mundi hujus, non quod mundum creavit, vel hominum causa sit quantum ad esse eorum, sed quantum ad pravitatem ipsorum, ratione ejus subjecti sunt ei et capti ab eo tenentur vinculis vitiorum. Hinc de diabolo

Job XLII, 25.

Ephes. VI,
12.

II Petr. II,
19.

scriptum est : Ipse est rex super universos filios superbiæ. Et de ipsis dæmonibus scribit Apostolus : Non est nobis colluctatio adversus carnem et sanguinem, sed adversus principes et potestates, contra spiritualia nequitiae in cœlestibus, contra mundi rectores tenebrarum harum. Nempe, ut beatissimus Petrus testatur, a quo quis superatus est, hujus et servus est. Quum ergo iniqui a diabolo victi sint et victi permaneant, ejus servi censentur. Venit ergo diabolus quando Christus hæc protulit : jam enim instigaverat Judam ut traderet Christum, et Judæos ut eum occiderent. Venit quoque (ut reor) ad tentandum Jesum an esset Christus et an posset

A eum ad peccatum inducere. Nondum enim diabolus certus fuit de hoc : aliter non instigasset Judæos ad Christi occisionem. Quod autem diabolus post tentationem Christi factam in deserto, in pinnaulo et in monte excelso, redierit ad tentandum Jesum, elici potest ex eo quod apud Lucam scriptum est : Consummata omni tentatione, diabolus recessit ab eo ad tempus.

Matth. IV,
1 et seq.

Luc. IV, 13.

Et in me non habet quidquam, hoc est nihil culpæ, nec aliquid juris aut potestatis, quia nil pænæ aut nocimenti mihi inferre potest per se aut suos ministros, nisi quantum sponte permisero. De Christo etenim scriptum est : Iniquitatem non fecit, nec inventus est dolus in ore ejus ; et rursus, Tradidit in mortem animam suam ; itemque, Oblatus est quia voluit. Unde et ipse ait : Nemo tollit animam meam a me, sed ego pono eam.

Is. LIII, 9.

Ibid. 12.

Ibid. 7.

Joann. X,
18.

Verum quia ex iis dubitari posset cur Christus pati voluerit, qui culpam non habuit, addidit : *sed ut cognoscat mundus quia diligo Patrem*, id est, ideo pati volo, ut innotescat hominibus quantum diligo Patrem æternum, propter ejus honorem recuperandum mori pro hominibus volo, ut redempti, Patrem æternum seu totam superbeatissimam Trinitatem laudent et honorent in præsentī sæculo et futuro. Denique Christus secundum quod Deus, diligit Patrem amore superæstanti atque simpliciter infinito ; secundum naturam quoque humanam, diligit eum ineffabiliter nimis præ universis et singulis. *Et sicut mandatum dedit mihi* secundum quod homo sum, D *Pater æternus vel Trinitas Deus, sic facio*, et ei in cunctis obedio. Præcepit equidem Deus Christo homini, ut omnia illa faceret, prædicaret ac consummaret, per quæ Deus ab æterno decrevit genus salvare humanum. Cui præcepto Christus ut homo plenissime atque promptissime obedivit, factus obediens usque ad mortem, secundum Apostolum. Hinc divinus Dionysius operationem Christi appellat theandricam, id est deivirilem, quoniam quidquid fecit ut homo, fecit quasi Divinitatis instrumentum.

Philipp. II,
8.

SERMO SECUNDUS

DE PRÆDICATIONE APOSTOLORUM IN DIE SACRATISSIMO PENTECOSTES.

STANS Petrus cum undecim, levavit A
vocem suam. Act. II, 14.

In epistola solennitatis præsentis, et in sermone circa epistolam præinducto, narratum est qualiter Spiritus Sanctus die hoc missus fuit sanctis Apostolis, et qualiter eos replevit caritate, sapientia et linguarum notitia, omnique virtute et gratia; item, qualiter Apostoli alique discipuli mox tunc ingressi sunt templum Jerusalem, et prædicaverunt ibidem publice resurrectionem et gloriam Christi, atque ab omnibus qui aderant diversorum B valde idiomatum hominibus intelligebantur: propter quod homines illi admirati sunt vehementer. Nunc ergo prosequendum est plenius, quid prædicaverunt, quid profecerunt, et quid deinceps egerunt. Et quamvis Lucas in generali scribat prædicasse Apostolos, non tamen in speciali prosequitur, neque describit prædicationem ullius Apostoli, nisi beatissimi Petri, qui tanquam princeps et capitaneus Apostolorum loquebatur pro omnibus.

Itaque, prout Lucas evangelista fidelis- C
sime refert, quum pene omnes Judæi tunc præsentis, visis tot mirabilibus, stuperent et mirarentur, dicentes, Quidnam vult hoc esse? quidam mirabiliter obstinati ac perfidi irriserunt, dicentes: Quia musto, id est novo vino, pleni sunt isti. Ecce quanta fuit horum perversitas Judæorum, qui ex tot mirabilibus non sunt compuncti, sed pejores effecti, tamque miraculosa opera Spiritus Sancti vinolentiæ adscripserunt et gulæ, quasi mustum hoc facere posset quod omnem naturalem transcendit po- D
tentiam. Verumtamen spiritualiter ebrii fuerunt sancti Apostoli, quoniam fervor amoris, sapientiæ sapor, gaudiorum excres-

sus, exuberantia gratiarum inebriaverunt mentes eorum, biberuntque vinum quod Prov. IX, 5.
Christus sapientia Patris miscuit eis. Et impletum fuit in eis quod Propheta ait ad Dominum: Inebriabuntur ab ubertate do- Ps. XXXV, 9.
mus tuæ, et torrente voluptatis potabis eos; et quod Sponsus cœlestis dicit electis: Comedite, amici, et bibite; et inebriamini, carissimi. Cant. v, 1.

Quum ergo induratissimi illi Judæi dixissent, Musto pleni sunt isti, protinus beatissimus Petrus stans cum undecim Apostolis, tanquam imperterritus pugil veritatis et ferventissimus testis Christi, levavit vocem suam: quia ex maxima caritate loqui incepit voce tubali ut audiretur ab universis, et ne opera Spiritus Sancti adscriberentur Beelzebub principi dæmoniorum. Et dixit: Viri Judæi, et qui habitatis Jerusalem universi, scitote quod non sunt, sicut aliqui vestrum putant, hi Apostoli, quorum unus ego sum, ebrii, quum sit hora diei tertia, id est mane; et tam mane non solent homines inebriari. Sed istud quod cernitis, est quod Deus per Jo-
elem prophetam prænuntiavit, dicendo: Erit in novissimis diebus (id est tempore evangelicæ legis, quod ultima mundi ætas vocatur), effundam Spiritum meum super omnem carnem, id est super quosdam de omni genere hominum; et prophetabunt filii vestri et filiæ vestræ, id est discipuli atque discipulæ Christi. Quumque B. Petrus probasset hanc prophetiam in Apostolis adimpletam, et eos Spiritu Sancto, non musto, esse impletos, adjecit: Viri Israelitæ, audite verba hæc: Jesum Nazarenum, virum approbatum a Deo in vobis virtutibus et prodigiis et signis, quæ fecit per illum Deus in medio vestri, sicut

Joel II, 28.

vos scitis, hunc per manus iniquorum crucifixistis et occidistis; quem Deus suscitavit a mortuis; cujus nos omnes testes sumus. Quumque gloriosus Apostolorum princeps per plures sacræ Scripturæ auctoritates Christi resurrectionem probasset, adjecit, quod Christus Dei virtute a morte suscitatus, et super cœlos levatus, effudit hoc donum quod videtis atque auditis, id est, gratiam istam, sapientiam, et linguarum notitiam, ac virtutum constantiam largitus est nobis.

His auditis, compuncti sunt corde : non omnes, sed plurimi Judæorum qui aderant. In quibus impletum est quod Christus ante passionem prædixit Judæis : Quum exaltaveritis Filium hominis, id est, postquam crucifixeritis me, tunc cognoscetis quia ego sum. Siquidem tot allegationibus Scripturarum et tantis prodigiis sunt convicti, et Spiritus Sanctus eos quos elegit interiorius tetigit. Et dixerunt ad Petrum et ad Apostolos alios : Quid faciemus, viri fratres? Petrus vero dixit ad eos : Poenitentiam agite, et baptizetur unusquisque vestrum in nomine Jesu Christi, in remissionem peccatorum suorum; et accipietis donum Spiritus Sancti, id est, non solum remissionem peccatorum, sed etiam donum sapientiæ ac linguarum, quod in nobis miramini. Tunc namque baptizatis dabatur communiter Spiritus Sanctus in signo sensibili per impositionem manuum Apostolorum, ita quod baptizati loquebantur variis linguis, sicut Apostoli. Sicque Spiritus Sanctus replevit corda illorum fervida caritate atque multiplici virtute ac gratia.

Insuper aliis multis verbis hortabatur eos S. Petrus : Salvamini (inquiens) a generatione hac prava, id est, ab infidelibus et obstinatis Judæis abstrahite vos. His dictis, tria millia Judæorum mox crediderunt; et baptizabantur, ac Spiritu Sancto copiose ac misericordissime implebantur. Perseverabant quoque in doctrina Apostolorum, et communicatione fractionis panis, id est perceptione Sacramenti altaris, et orationibus, ac laudibus Dei. Omnia

etiam erant eis communia. Et perdurabant quotidie unanimiter in templo, collaudantes Deum, et habentes gratiam ad omnem plebem; sumpseruntque cibum cum exultatione spirituali et cordis simplicitate. Et multi convertebantur quotidie, in tantum quod multa turba sacerdotum et Phariseorum convertebatur ad Christum. Ecce ista fuit prædicatio ac operatio Apostolorum hoc die.

Porro, alio quodam die, Petrus et Joannes intraverunt templum; et quidam ex Act. iii, 4 et seq. nativitate claudus petiit eleemosynam ab eis. Cui Petrus respondit : Argentum et aurum non est mihi; quod autem habeo, hoc tibi do : in nomine Jesu Christi surge, et ambula. Qui protinus exsiliens, stetit et ambulavit; intravit quoque cum Petro et Joanne in templum, ambulans et exsiliens, laudansque Deum. Viso autem tam ingenti miraculo, conversa sunt quinque millia Judæorum.

Itaque, sicut Judæi hoc die ab Apostolis ad Christum conversi, perseveraverunt in Apostolorum doctrina, et Sacramenti perceptione, et orationibus, ac laudibus Dei, ita nos Christiani agamus. Tenēamus memoriter verba sacræ Scripturæ, et secundum ea vivamus. Nec sermones qui fiunt aliquis tradat oblivioni, sed cordi suo unusquisque imprimat eos pro posse, ut omne tempus suum fructuose expendat, turpes et vanas cogitationes atque illicitas affectiones de corde suo expellat : quia per Jeremiam prophetam loquitur Deus, Usquequo morabuntur apud te cogitationes Jer. iv, 14. noxiæ? et per prophetam Michæam, Væ Mich. ii, 1. vobis qui cogitatis inutile. Nam spiritus sanctus disciplinæ effugiet fictum, et auferet se a cogitationibus quæ sunt sine intellectu. Cogitationes quippe et actiones sunt velut picturæ quædam mentis. Quemadmodum ergo stercora et aliæ sordes atque putredines maculant ea quibus superponuntur, ut ligna, saxa, terram, parietem; ita, imo incomparabiliter plus, pravæ et vanæ cogitationes affectionesque animæ mentem deturpant et inquinant, sic quod

Deus sanctissimus eam abominatur ac despicit. Ideo cupiens Deo placere, cor suum a talibus purget et custodire non cesset.

Præterea, etsi non communicat Christianus quotidie sacramentaliter, corpus Christi realiter suscipiendo, spiritualiter tamen quotidie debet quilibet Christifidelis communicare, videlicet per fidem et caritatem conjungendo se Christo, et eum intra se per sancta desideria amplectendo. Decet tamen ut Christianus in hac sanctissima solennitate, præparatione præmissa, com-

A municet. Postremo, quotidie, et præsertim in his sacris diebus, in orationibus et laudibus Dei occupemur, ac Spiritum Sanctum paracletum totis viribus veneremur; ejus caritati, pietati ac liberalitati cordialiter regratiemur, solliciti ne ejus gratiosam perdamus præsentiam per loquacitates, comessationes, potationes, choreas, aut ceteras vanitates ac culpas; jugiter gratias referamus Deo Patri, qui Filium suum nobis misit ac dedit in redemptionem, et Spiritum Sanctum nobis misit ac dedit in sanctificationem.

SERMO TERTIUS

DE CARITATE, PIETATE ET LIBERALITATE DEI CIRCA HOMINES, ATQUE DE NEGLIGENTIA, INGRATITUDINE PERVERSITATEQUE HOMINUM ERGA DEUM.

CARITAS Dei diffusa est in cordibus nostris per Spiritum Sanctum, qui datus est nobis. Rom. v, 5.

De Divin. nom. c. iv. Quemadmodum divinus Dionysius dicit, amor Dei non reliquit eum sine germine esse. Et S. Augustinus fatetur, quod bonitas Dei est prima causa creationis rerum et omnis entis creati. Aristoteles quoque testatur, quod bonum est sui ipsius diffusivum seu propriæ bonitatis communicativum. Porro propriam bonitatem communicare, seque diffundere aliis, est actus amoris in substantiis intellectualis naturæ. Quum ergo Deus sit pura infinitaque bonitas et intellectualis substantia, idcirco summe et infinite communicativus seu diffusivus est suæ bonitatis: et communicatio ista Dei ad extra, qua scilicet creaturis dona sua communicat, aut eas in esse producit, potest adscribi bonitati Dei, quia proprietas boni est se communicare; et etiam caritati, quoniam caritas est virtus per quam aliquis vult alteri bonum: amare enim, est alicui bonum velle. Itaque amor Dei, quem habuit ad creaturas ante-

quam eas produceret, non reliquit eum sine germine esse, id est, ad creationem rerum eum induxit, quia voluit eis bonitatem suam communicare, videlicet esse, vivere, intelligere.

Denique bonitatem, caritatem et liberalitatem suam ad homines ostendit Deus tripliciter. Primo, dando eis bona naturæ seu naturalia bona, videlicet corpus et animam cum suis membris ac viribus, et omnia ad naturalem hanc vitam necessaria. Nam solem suum facit oriri super bonos et malos, pluitque super justos et injustos. ^{Matth. v, 45.} Omnia quoque elementa creavit in commodum et obsequium hominum, et volucres aeris, piscesque maris, ac bestias terræ in usum et utilitatem eorum produxit ac eis subjecit, sicut testatur Psalmista, alloquens Dominum: Omnia subjecisti sub pedibus ejus (videlicet hominis), oves et boves universas, insuper et pecora campi, volucres cœli, et pisces maris. Nec solum hæc inferiora, ut elementa et elementata seu mixta, sed et cœlestia corpora creavit Dominus Deus omnipotens in ministerium,

Deut. iv, 19. profectum et commodum hominum, prout in Deuteronomio Moyses ait : Ne oculis elevatis in cœlum, adores solem et lunam, et omnia astra cœli, quæ Dominus Deus tuus creavit in ministerium cunctis gentibus quæ sub cœlo sunt.

Insuper in hoc Deus specialiter bonitatem, caritatem ac munificentiam suam monstravit in hominis creatione, quod eum præ ceteris inferioribus creaturis ad imaginem et similitudinem suam creavit, dando ei rationem qua Creatorem suum posset cognoscere, et voluntatem qua ipsum posset diligere, atque intellectualem memoriam qua eum posset jugiter retinere et ad mentem reducere, sicque in illius notitia ac amore firmiter figi. Hinc dixit Gen. i, 26. Dominus Deus : Faciamus hominem ad imaginem et similitudinem nostram, et præsit volatilibus cœli, et bestiis terræ, ac piscibus maris. Hinc Hugo de S. Victore scribit : Vide, o homo, dicit mundus, quomodo amat te qui propter te fecit me. Servio tibi, quia factus sum propter te, ut servias illi qui fecit me et te : me propter te, et te propter se. Si sentis officium, redde debitum ; si accipis benignitatem, redde Creatori tuo dilectionem, pro beneficiis gratias age. Itaque pro his naturalibus donis ac beneficiis Dei gratias semper reddamus ; nec his quæ contulit nobis, in contumeliam atque offensam ejus utamur, sed corpore et anima, totisque viribus ei jugiter obsequamur.

Secundo ostendit Deus bonitatem, caritatem et munificentiam suam circa homines, dando eis dona gratiæ et supernaturalia beneficia sua in vita hac. Siquidem in exordio mundi, non solum creavit hominem in donis naturæ, sed mox supernaturalia dona ei adjecit, quia in originali justitia condidit eum. In paradiso quoque terrestri eum locavit ; et omnem ejus posteritatem in paradiso conservasset, si primus homo præceptum observasset divinum. Quod quum fuisset transgressus, et ipsum de paradiso mox ejecisset, rursus misertus est ejus, pœnitenti ignoscens, et

A humanum genus liberare proponens. Unde a tempore illo semper dedit quibusdam electis hominibus dona diversa gratiæ suæ, Patriarchas et Prophetas constituens, per quos Christi incarnationem, adventum et passionem prænuntiavit ac præfiguravit. Specialiter quoque in veteri Testamento, diversa et copiosa munera gratiarum dedit hominibus. Deinde tempore evangelicæ legis omnem solitæ benignitatis modum excessit, et gratiarum charismata ineffabiliter copiose universis gentibus est largitus, et non uni dumtaxat populo, sicut in veteri Testamento.

Præterea in hoc præclarissime Deus caritatem, bonitatem et munificentiam suam demonstravit hominibus, quod eis non solum dona creata impendit, sed Pater æternus etiam unigenitum Filium suum nobis donavit, sicut Isaias profatur : Puer natus est nobis, filius datus est nobis. Et S. Joannes apostolus in sua prima testatur Canonica : In hoc apparuit caritas Dei in nobis, quoniam Filium suum unigenitum

Is. ix, 6.

I Joann. iv,

9.

C misit Deus in mundum, ut vivamus per eum. Pater quoque et Filius, non solum dona Spiritus Sancti, sed et ipsummet Spiritum Sanctum nobis miserunt atque dederunt. Per hoc enim Persona divina mitti et dari hominibus perhibetur, quod novo modo in eis incipit esse et operari : quod fit, dum gratia gratum faciens ipsis infunditur, aut infusa perficitur seu augetur. Denique, per hoc quod gratia ista seu caritas infunditur homini, ipsemet Spiritus Sanctus dicitur homini infundi ac dari, et habitare in eo, ita quod est hominis ipsum habentis : quod enim alicui datur, est ejus cui datur. Deus vero seu Spiritus Sanctus est hominis, prout homo libere fruitur eo, et quiescit in eo ac utitur donis ipsius : quod esse non valet sine caritate et gratia gratificante. Unde et Deus Pater quamvis non mittatur hominibus, quia de nullo procedit, dat tamen se ipsum hominibus, in quantum se eis communicat ad fruendum. Quæ omnia Thomas in prima parte Summæ suæ magis declarat.

Tertio Deus ostendit caritatem, bonitatem et liberalitatem suam circa homines, dando eis dona gloriæ in futuro, hoc est felicitatem æternam in cœlo, ubi electi inamissibiliter et plene ad libitum Deo jucundissime perfruuntur, et possident eum possessione prorsus segura, beatissima et completa.

Prima ostensio bonitatis, caritatis et munificentiae Dei circa homines, est magna; secunda major; tertia maxima. Quamvis etenim Deus nihil majus possit conferre hominibus quam se ipsum seu Spiritum Sanctum, tamen in regno cœlesti exuberantius dat Deus se ipsum Beatis ad perfruumdum, quam in præsenti exsilio. Ecce quam incomprehensibilis est bonitas, caritas et munificencia Dei circa homines, quam ineffabilis quoque est dignitas hominum virtuosorum et Deo gratorum, quorum inhabitator, possessor, hospes, rector et doctor est Spiritus Sanctus.

Sed ecce quanta est negligentia, ingratitude atque perversitas impiorum, qui tot beneficiis Creatoris sunt ingrati, et pro tot bonis injuriam et contumeliam reddunt; qui tanta dignitate se privant, et contempto Spiritu Sancto, spiritum diabolicum cordium suorum habitatorem, dominum et rectorem suscipiunt, atque Spiritui Sancto ac præstantissimis spiritualibus donis ejus ista præponunt carnalia ac caduca. De quibus apud Zachariam conqueritur Deus :
Zach. vii, 11, 12. Noluerunt attendere, et averterunt scapulas recedentes, et aures suas aggravaverunt ne audirent legem; cor suum posuerunt ut adamantem, ne obedirent præceptis. Tales sunt omnes intimorati, superbi et iracundi, qui nolunt discere lectionem illam a Christo, quam omni proposuit Christiano :
Matth. xi, 29. Discite (inquiens) a me, quia mitis sum et humilis corde. Tales quoque sunt omnes avari, qui Christi despiciunt paupertatem, nec pensant quod ait : Volucres cœli nidos habent, et vulpes terræ foveas; Filius autem hominis non habet ubi caput reclinet. Tales demum sunt omnes gulosi et luxuriosi, quorum (secundum Apostolum) deus

venter est, et qui turpitudinem suam puritati præponunt Spiritus Sancti. In quibus omnia sunt perversa, quoniam sensualitas dominatur in eis rationi, caro spiritui, diabolus menti. Tales sunt ceteri vitiosi, videlicet invidi, acediosi, fraudulent, simulatores et callidi, et omnes qui ita non faciunt proximis ut fieri volunt sibimetipsis. Abjiciamus igitur universa hæc vitia, et cordis nostri hospitium Spiritui Sancto inviolatum, fidele ac pulchrum custodiamus.

Legitur quod quum filii Israel essent in deserto, et invenissent quemdam ex eis ligna sabbato colligentem, obtulerunt eum Moysi. Qui reclusit eum in carcere, quousque Deus sibi revelaret quid agendum esset cum homine illo; jussitque Deus illum lapidibus obrui et occidi. Insuper Deus præcepit per Moysen filiis Israel ut facerent sibi fimbrias quatuor per quatuor angulos palliorum, ponerentque in eis vitas hyacinthinas, ut eas videndo, recordarentur jugiter omnium mandatorum Domini, nec sequerentur cogitationes et oculos per res varias fornicantes. Iterum Moyses præcepit Israelitico populo : Erunt verba Domini in corde tuo, et narrabis ea filiis tuis, et meditaberis ea sedens in domo tua, et ambulans in itinere, et dormiens atque consurgens; et ligabis ea quasi signum in manu tua, eruntque et movebuntur inter oculos tuos, scribesque ea in limine et in ostiis domus tuæ.

Ecce ex his innotescit quam sollicite, ferventer et integre sint observanda divina præcepta, et quam reverenter atque devote celebrandi sint dies festivi. Quid ergo fiet de his qui absque timore perperant mala, et lætantur quum impie fecerint, qui hos sacros dies ac ceteros dies festivos vitiose expendunt, loquacitatibus, risibus, jocis, choreis vacantes, imo et graviora agentes, vani, gulosi, lascivi, invidi, acediosi, et ceteris vitiis inquinati? De quibus beatissimus Moyses ait : Gens absque consilio est et sine prudentia : utinam saperent, et intelligerent, ac novissima providerent.

Num. xv, 32-35.

Ibid. 37-39; Deut. xxii, 12.

Deut. vi, 6-9.

Prov. ii, 14.

Deut. xxxii, 28, 29.

Zach. vii, 11, 12.

Matth. xi, 29.

Ibid. viii, 20; Luc. ix, 58.

Philipp. iii, 19.

Impleat ergo quilibet nostrum quod in A *vissima, sunt mors, judicium Dei, pœna*
Eccli. vii, 40. Ecclesiastico scriptum est : In omnibus *inferni, gloria cœli. Quæ si sagaciter quis*
operibus tuis memorare novissima tua, et *perpendat, timoratus erit et coram Altissi-*
in æternum non peccabis. Hæc quippe no- *mo custoditus.*

SERMO QUARTUS

DE EFFECTIBUS SPIRITUS SANCTI IN CORDE FIDELIUM ; QUALITERQUE SI IN NOBIS SPIRITUM
SANCTUM, CARITATEM EJUS AC GRATIAM HABEAMUS, NOSSE POSSIMUS.

IPSE Spiritus testimonium reddit spi- B *istud forsane sine detrimento salutis licet*
ritui nostro, quod filii Dei sumus. *nescire. Ceterum, quando veniat et quomo-*
Rom. viii, 16. *do vadat, periculosissime ignoratur. Dum*

Quum nihil periculosius sit in vita præ-
senti quam non esse in caritate et gratia
Spiritus Sancti, quoniam qui in illa non
est, in mortali est culpa, et servus est dia-
boli, non filius Dei (de adultis loquendo);
idecirco homines boni maxime curant esse
in caritate : quod est esse in statu salutis,
sicut esse in peccato mortali, est esse in
statu damnationis. Sed quia esse in cari-
tate non contentaret eos nec consolaretur, C
nisi hoc aliquo modo scirent, idecirco, ne
in desolatione sint nimia et anxietate con-
tinua, superpiissimus Spiritus Sanctus dat
eis aliqualem notitiam quod in caritate ex-
sistant, quia interius protestatur secrete
animæ nostræ, quod filii Dei adoptivi su-
mus caritatem habendo.

Præterea, quicumque veraciter cupit Deo
placere, debet esse diligens considerator
proprii cordis, an scilicet Spiritus Sanctus
commoretur in eo : quatenus si cognoverit
quod non, protinus doleat, seque emenda- D
re conetur, et Spiritus Sancti gratiam im-
petrare nitatur; si vero cognoverit quan-
tum potest, quod Spiritum Sanctum habeat
in se habitantem, gratias agat, seque cus-
todiat, et proficere nullatenus pigritetur.
De hac re S. Bernardus multum devote
atque subtiliter scribit, dicendo : Venit et
vadit Spiritus Sanctus prout vult, et nemo
Joann. iii, 8. facile scit unde veniat aut quo vadat. Et

istud forsane sine detrimento salutis licet
nescire. Ceterum, quando veniat et quomo-
do vadat, periculosissime ignoratur. Dum
enim hæ dispensatoriæ vicissitudines Spi-
ritus Sancti circa nos non vigilantissime
observantur, fit ut nec absentem deside-
res, nec præsentem glorifices. Nempe qui
idecirco recedit ut avidius requiratur, quo-
modo requiritur si abesse nescitur? Et
rursum, qui ad hoc dignanter redit ut ho-
minem consoletur, qualiter digne pro sua
majestate suscipitur si nec adesse senti-
tur? Vigilandum est ergo omni hora, quia
nescimus qua hora Spiritus Sanctus ven-
turus sit seu iterum recessurus.

Quum ergo tam necessarium sit diligen-
ter examinare se ipsum, et aliquammodo scire
an Spiritus Sanctus per caritatem et gra-
tiam adsit, atque inhabitet mentem, viden-
dum nunc est qualiter hoc noscere valea-
mus. Et quidem de hoc, in sermonibus
præinductis, hinc inde diversa sunt tacta et
posita signa ac probabilia argumenta, ut-
pote : libenter audire verbum Dei, libenter
loqui et cogitare de Deo, libenter visitare
ecclesiam, observare præcepta, alacriter
moveri ad ea quæ Dei sunt. Porro dominus
Guillelmus, Antisiodorensis episcopus; in
Summa sua ponit de hoc tria signa. Pri-
mum est spiritualis jucunditas mentis ;
secundum, bona desideria; tertium, bona
opera. Verumtamen signa ista non viden-
tur certitudinem magnam adducere. Jaco-
bus quoque de Voragine, archiepiscopus

Januensis, ponit in sermone de solennitate hac, etiam tria signa caritatis et gratiosæ præsentiae Spiritus Sancti. Primum est abundantia lacrimarum; secundum, dimissio injuriarum; tertium est desiderium supernorum. Quæ signa non videntur tribus præfatis signis certiora, prout facile posset probari, præsertim quum multi vere devoti, corporales habere vix valeant lacrimas, quas aliquando habent qui tamen omne mortale peccatum deserere non proponunt. Balaam quoque desideravit mori morte justorum: nec tamen veraciter justus fuit, sed impius. Sunt itaque signa alia certiora.

Num. xxiii,
10.

Unde qui cordialiter cupit agnoscere an sit in caritate et gratia, sic procedat: loco et tempore opportuno vigilanter discutiat conscientiam suam, et vitam suam scrutetur, an sibi de aliqua mortali sit conscius culpa, de qua non pœnituerit confessionemque fecerit et satisfecerit; et si invenerit se in aliquo tali reum peccato, mox doleat juxta mensuram delicti, et confiteri ac satisfacere seque in omnibus emendare absque dilatione proponat. Isto peracto, confidat se esse in caritate et gratia, quia ut per Ezechielem Deus locutus est, quicumque hora taliter ingemiscit peccator, omnium iniquitatum ejus non memorabitur amplius. Denique in libro Job habetur: Si direxerit homo ad Deum cor suum, spiritum illius et flatum ad se trahet. Sed qui ita conscientiam suam examinat et de vitiis suis dolet, confessionem, satisfactionem emendationemque integram indilate proponens, et exsequi inchoans, dirigit cor suum ad Deum: ergo Deus spiritum ejus protinus ad se trahet per caritatem et gratiam. Ad hoc probandum possent multæ auctoritates Scripturæ adduci, ut illud Jeremiæ: Quis est iste qui applicet cor suum ut appropinquet mihi? ait Dominus; et illud Zachariæ: Convertimini ad me, et convertar ad vos, dicit Dominus exercituum; et quod Jacobus scribit apostolus: Appropinquate Deo, et appropinquabit vobis. Unde communiter dicitur,

Ezech.
xviii, 21, 22.

Job xxxiv,
14.

Jer. xxx,
21.

Zach. i, 3.

Jacob. iv, 8.

A quod homine faciente quod in se est, Deus gratiam mox largitur.

Aliud signum est, si homo odit, detestatur ac fugit omne peccatum mortale ex zelo justitiæ, in quantum est Dei offensivum, et non ex solo servili timore, hoc est non solum nec principaliter ex formidine damnationis ac pœnæ. Nec sine isto sufficit primum signum: imo nec aliquis veraciter pœnitet de peccatis, nec veram emendationem proponit, quamdiu ex solo servili id agit timore. Discutiat ergo homo se ipsum, an ex corde odiat, detestetur ac fugiat superbiam, acediam, invidiam, gulum, avaritiam, iram, luxuriam, et cetera peccata mortalia; an etiam virtutes vitiis istis contrarias cordialiter amet et habeat, puta humilitatem, caritatem, mansuetudinem, sobrietatem, continentiam, liberalitatem et devotionem, id est promptitudinem animi ad ea quæ sunt divini obsequii.

Tertium signum est, prompte et delectabiliter implere præcepta, actibus virtutum insistere, et in orationibus Deique laudibus libenter se occupare; item, habere cordialem affectum inhærendi Domino Deo et honorandi eum in omnibus, et timere offensam ipsius; atque de imperfectionibus et defectuositatibus propriis quotidie contristari, et niti ad meliora pro posse; Dei quoque auxilium fideliter invocare, et in ipso spem figere, omne bonum ei adscribere; omnium salutem intime affectare, bonum commune appetere, idque potissimum desiderare ut Deus ab omnibus honoretur; et de temporalibus rebus non amplius cupere quam necessarium et utile est, juxta exigentiam proprii status, ad spiritualem profectum et ad Dei obsequium.

Ista videntur multum probabilia caritatis et gratiæ signa, præsertim dum homo repente et quasi inopinate et valide inflammatur, compungitur, in fletum resolvitur, ita quod totus ad Deum afficitur et cuncta carnalia ac temporalia aspernatur, nec aliud quærit nisi Deo placere, oratque eum intente ut se misericorditer juvet, di-

rigat et indesinenter conservet. Verumtamen sensibilis illa devotio et dulcis alacritas ad divina, non sunt necessariae ad hoc quod homo in caritate sit. Et quamvis illa dispensative homini abstrahantur a Deo, ita ut homo se tardum et frigidum, et quasi tædio quodam affectum experiatur, ex hoc non sequitur quod habitum caritatis amiserit : ideo non debet pusillanimitas aut impatiens fieri, sed fortiter ad spiritualem conari profectum et Dei implorare subsidium, nec carnales consolationes admittere, sed Sponso fidem servare cœlesti. Hinc ait Bernardus : Qui in spiritu ambulat, nequaquam in uno permanet statu, nec eadem semper facilitate proficit ; sed prout Spiritus Sanctus ei dispensat ac moderatur, nunc segnius, nunc alacrius peragit bona. Ergo quum te torpore, acedia aut tædio affici sentis, noli propterea diffidere aut differre a studio spirituali, sed Dei quære auxilium ; et dum gratiam sentis, non immoderanter securus sis quasi hanc perdere nequeas.

Præterea, quoniam Spiritui Sancto appropriantur amor, pietas et dulcedo, ideo eius effectus in homine, sunt inflammatio mentis in caritate, torporis, pusillanimitatis tædiique expulsio, spiritualis consolatio, alacritas ad divina, affectio pia ac dulcis ad proximos. Si itaque hos effectus desideramus adipisci a Spiritu Sancto, discutiamus conscientias nostras quotidie.

A Nec solum mortalia vitia, sed venialia quoque diligenter vitemus, quum Salomon protestetur : Qui timet Deum, nihil negligit. Venialia namque ad mortalia disponunt peccata : idcirco qui venialia non satagit evitare, in mortalia miserabiliter ruit. Sensuales voluptates, iram, invidiam, omnem fraudulentiam, detractionem, cum ceteris iniquitatibus, jugiter fugiamus ; et juxta apostolica documenta, simus invicem caritativi, misericordes, humiles, patientes, ad laudem et gloriam superbenedictissimi paracleti Spiritus Sancti, et Patris, ac Filii.

Legitur de S. Basilio episcopo, quod in magna humilitate et abstinencia vixit. Unde et sapientiam præcipuam Spiritus Sanctus ei infudit, eratque caritate Dei ac proximorum vehementer accensus. Et hoc ipsum Deus revelavit cuidam sancto eremitæ nomine Ephrem. Qui surgens perrexit ad S. Basilium, ut tantum virum conspiceret. Introductus autem ad S. Basilium, vidit igneam linguam in ore ejus loquentem. Quo viso, S. Ephrem clamavit : Vere magnus Basilius, vere columna ignis Basilius, vere Spiritus Sanctus loquitur per os ejus. Deinde Ephrem dixit B. Basilio : Obsecro, domine, impetra mihi a Spiritu Sancto ut Græce loquar. Cui Basilius : Rem (inquit) difficilem postulasti. Orante autem S. Basilio, statim cœpit Ephrem Græce loqui. Ex quibus apparet quanta sit pietas ac potestas Spiritus Sancti in suis electis.

Eccle. vii,
19.

AD RELIGIOSOS

SERMO QUINTUS

DE EMINENTIA SACROSANCTISSIMÆ SOLENNITATIS SPIRITUS SANCTI, ET DE
OBSERVANDIS IN LOQUENDO.

REPLETI sunt omnes Spiritu Sancto, D et ceperunt loqui prout Spiritus Sanctus dabat eloqui illis. Act. II, 4.

Quamvis Deus a mundi exordio semper pronus fuit et liberalis ad dandum gratiarum charismata invocantibus eum,

Joann. vii,
39.

tamen postquam humanam assumpsit naturam in unitatem suppositi, factus veraciter homo, præ solito liberalissimus et gratiosissimus fuit hominibus, et mirabiliter decoravit ac sublimavit eosdem : imo et deificavit per supernaturalia munera gratiarum, tam gratiæ gratum facientis quam gratiæ gratis datæ dona copiosissime eis dando. Et hoc in die hac celeberrima eminenter innotuit et excellenter inceptum est, in qua tam exuberanter præ solito data sunt Christi discipulis gratiarum charismata, et in eis ipsemet fons gratiæ omnis, Spiritus Sanctus, ut evangelista Joannes testatus sit : Spiritus nondum erat datus, quia Jesus nondum erat glorificatus.

Denique, quo benignissimus adorandus paracletus Spiritus Sanctus die hoc gratio-
sius egit nobiscum, et magis dignanter, amore ac munificenter se habuit circa nos, eo in solennitate præsentis, imo et semper, magis devote, custodite et reverenter, magis affectuose et gratanter circa ipsum nos habere debemus, et exhibere nos munda receptacula ac digna habitacula ejus, ut in ipsius caritate, donis ac gratiis indesinenter proficiamus. Itaque in divinis simus ferventes, solliciti, diligentes ; in refectorio sobrii et sacris lectionibus digne intenti ; in colloquio moderati in verbis ac moribus ; in cellis nostris devoti et fructuosi, puri in cogitationibus atque affectibus ; in omni loco, tempore, actu, otio et negotio coram Deo sinceri et laudabiliter occupati. Magna omnino est præsens solennitas, et devotissime expendenda. Nempe si grandis est quævis Virginis gloriosæ, aut Michaelis archangeli, aut principis Apostolorum solennitas, quanto præclarior ista est de Spiritu Sancto, qui essentialiter et incircumscrip-
tibiliter sanctus est et omnis sanctitatis collator, a quo omnes Sancti sanctitatem suam sortiti sunt?

Præterea, si optamus ut Spiritus Sanctus corda nostra visitet et illustret, et intra nos loquatur, et audiamus quid lo-

quatur in nobis, vitemus prava colloquia, otiosa, stulta, illicita verba, verba plane scurrilia et in risum moventia, a beatissimo Benedicto anathematizata ac ebannita. Omnis sermo malus, pungitivus, provocativus, mendax, irrisorius, detractorius, discordiæ seminativus, ex nostro nequaquam ore procedat, sed qui utilis est ad ædificationem, ut det gratiam audienti. Non simus præcipientes ad loquendum, nec veloces ad garriendum, sed cum Propheta oremus :
Pone, Domine, custodiam ori meo, et ostium circumstantiæ labiis meis. Impleamus quoque quod in Ecclesiastico jubetur : Ori tuo facito ostia et seras. Quod vir sapiens necessarium sibi esse cognoscens, dixit :
Quis dabit ori meo custodiam, et super labia mea signaculum certum, ut non eadem ab ipsis, et lingua mea me perdat ?
Ecce quam necessariam judicavit vir sapiens linguæ refrenationem ac moderationem. In qua sanctus apostolus Jacobus perfectionem constituens : Si quis (inquit) in verbo non offendit, hic perfectus est vir. In quo et alter beatitudinem ponens, dixit : Beatus vir qui non est lapsus in verbo ex ore suo. O quam perfectus et felix fuit sanctissimus abbas Pambo, qui moriens ait, Ex quo factus sum monachus, non pœnituit me verbi quod locutus sum ! Qui etiam rogatus a Fratribus loqui verbum ædificationis archiepiscopo eos visitanti, respondit : Si non ædificatur in silentio meo, non ædificabitur in verbo meo.

Præterea, ut loquamur et taceamus prout Spiritus Sanctus dat loqui atque tacere, multa sunt attendenda. Nam sicut in operibus justitiæ oportet primo a malis operibus discedere et cessare, deinde bonum accedere et continuare, juxta quod scriptum est, Declina a malo, et fac bonum ; sic in refrenatione ac regimine linguæ oportet primo verba vitiosa, illicita, otiosa vitare, quum dicat Apostolus : Corrum-
punt mores bonos colloquia mala ; et rursus, Sermo (inquit) vaniloquorum ut can-
cer serpit. Religiosum ergo qui morum conversionem Deo promisit, et ad refor-

Ephes. iv,
29.

Ps. cxi, 3.

Eccli.
xxviii, 28.

Ibid. xxii,
33.

Jacob. iii, 2.

Eccli. xiv,
1.

Ps. xxxvi,
27.

I Cor. xv,
33.

II Tim. ii,
17.

mationem tenetur suorum affectuum, summe oportet prava, vana et stolidia devitare colloquia, nec ita loquentibus attendere, applaudere, consentire.

Secundo observare necesse est ut de bonis, licitis, ædificatoriis simus loquentes, sicut princeps ait Apostolorum : Si quis loquitur, quasi sermones Dei; et Paulus, Sermo vester semper in gratia sale sit conditus, id est discretione ornatus. Qui autem ad loquendum est indiscretus, verbis fatuis quasi quibusdam vermibus scaturit ac putrescit.

Insuper, quia ad actum virtutis non sufficit agere bonum, nisi et hoc bene agatur, utpote cum circumstantiis debitis, suo scilicet loco et tempore, etc., hinc tertio observandum est congruum aut debitum tempus, quia ut Salomon fassus est, Tempus est loquendi, et tempus tacendi. Siquidem dum ex locutione nulla oritur aut speratur utilitas aut profectus, nec honor Dei, tempus tacendi est; dum vero fructus probabiliter ex sermone sequi speratur, aut rationabilis causa seu necessitas exigit loqui, tempus est loquendi. Hinc in Ecclesiastico legitur : Homo sapiens tacebit usque ad tempus; lascivus autem et imprudens non servabit tempus. Salomon quoque protestatur : Qui prius respondet quam audiat, stultum se esse demonstrat et confusione dignum. O quoties unus nostrum verba alterius, imo interdum et præsentis aut senioris et sapientioris, insipienter interrumpit!

Quarto observandus est congruus locus, ut non in ecclesia nec prohibitis locis loquamur. Quod contra aliqui nostrum etiam in choro et circa altaria ad quamdam loquacitatem sunt proni, et in paucis verbis multum excedunt; similiter in refectorio atque capitulo. Isti sunt homines intemorati, et si non malitiosi, tamen leves, pueriles ac dissoluti : ideo fortiter se emendent.

Quinto servanda est mensura in verbis, ne loquendo excedamus et effluamus, aliosque gravemus, et eorum qui fructuosius

A nobis loqui possunt sermonem impediamus, aut verba protrahendo superflue, alios a melioribus actibus impedire, præpedire inveniamur. Ideo Salomone testante : Totum spiritum suum profert stultus; sapiens autem differt et reservat in posterum. Et, Qui moderatur labia sua, prudentissimus est; et item, Stultus verba multiplicat. Quum enim in multiloquio non desit peccatum, insipientiæ et cordis intemorati est esse verbosum. Propter quod in Job habetur : Numquid vir verbosus justificabitur? Hinc in Ecclesiastico asseritur : Verba sapientum statera ponderabuntur.

Sexto pensandum est cui loquamur, quatenus capacitati, conditioni et qualitati audientium verba nostra aptemus ac proportionemus, ne præsumamus sapientiores docere, seniore et virtuosiore increpare, vanum laudare, inexpertum consulere, obstinatum corripere, contemptorem instruere, illusorem monere, simplicioribus alta proponere, coram insipientibus loqui, vel inter sapientiores sermocinari. Hinc in Ecclesiastico scriptum est : In medio magnatum non præsumas loqui; et ubi sunt senes, non multum loquaris. Et, Ubi non est auditus, non effundas sermonem. Itemque : Adolescens, loquere in causa tua vix; si bis interrogatus fueris, habeat caput responsum tuum. Quo constat, quod Fratres juniores et simpliciores debent ad loquendum esse tardiores, et in loquendo etiam breviores : alioqui frontosi apparebunt et inverecundi. Deinde Salomone testante : Qui erudit derisorem, ipse sibi injuriam facit; et qui illusor est, non audit quum corripitur. Propterea denuo ait : In auribus insipientium ne loquaris, ne forte despiciant doctrinam eloquii tui. Pro talibus ergo magis orandum est. Verumtamen quadam benevolentia interdum sunt præveniendi, et ita cum industria admonendi : quod ad præsidentes constat specialiter pertinere.

Septimo est pensandum qualiter sit loquendum, videlicet mansuete, modeste, suaviter et distincte, interdum etiam ri-

gorose, dum cum pietate non proficit A
loquens. Hinc iterum in Proverbiis dici-
tur : Responsio mollis frangit iram ; sermo
durus suscitatur furorem. Et in Ecclesiasti-
co : Verbum dulce multiplicat amicos, et
mitigat inimicos ; et lingua eucharis in
bono homine abundabit. Iterum quoque
ait Scriptura : Dulcis eloquio, possidebit
majora. Sed et in Ecclesiastico legitur :
Tibiæ et psalterium suavem faciunt melo-
diam, et super utraque lingua suavis.

Prov. xv, 1.

Eccli. vi, 5.

Prov. xvi,
21.Eccli. xl,
21.

Octavo pensare debemus cur loquamur,
quo scilicet fine, qua intentione. Generalis B
autem, ultimus et supremus finis esse
debet jugiter honor Dei. Deinde sunt alii
fines secundarii et proximi ac diversi, vi-
delicet ut instruamur ab alio vel eum in-
struamus, vel causa bonæ recreationis aut
prudenter explorationis. Unde secundum
qualitatem finis intenti considerare debe-
mus an is cum quo loqui intendimus, sit

talis quod ex colloquio secum habendo,
finem intentum obtinere possimus.

Hæc itaque in loquendo, quantum fragi-
litate nostræ possibile est, observemus, ut
non delinquamus in lingua nostra. Imo
non confidamus nos propriis viribus pos-
se hæc omnia jugiter observare, sed in
Deo sit tota spes nostra, et ejus directio-
nem, auxilium, protectionem assidue in-
vocemus, quatenus juxta prædicta nos di-
rigat in loquendo atque tacendo : quia in
Proverbiis scribitur, Hominis est animum
præparare, sed Domini est gubernare lin-
guam. Ipse igitur linguam nostram semper
gubernare dignetur, maxime istis collo-
quiorum, minutionum, laborum diebus,
ne excedamus, sed in morum ornatu, in
cordis munditia, in gratia Spiritus Sancti
incessanter crescamus, et dies hos sacra-
tissimos cum devotione expendamus con-
digna.

Prov. xvi, 1.

SERMO SEXTUS

QUAM SIT SALUBRE, FRUCTUOSUM AC MERITORIUM, VERBUM DEI NEDUM AUDIRE
VEL SCIRE, SED OPERE QUOQUE ADIMPLERE.

SI quis diligit me, sermonem meum C
servabit. Joann. xiv, 23.

Eccli. ix, 1.

Quamvis juxta Salomonis eloquium, ne-
sciat homo certo an amore an odio dignus
sit, multa tamen probabilia signa in Scri-
pturis tanguntur, per quæ verisimiliter
scire valemus an simus in caritate et gra-
tia. Quorum unum est istud quod in ex-
ordio hujus evangelii tangit Salvator, di-
cendo : Si quis diligit me, sermonem
meum servabit. Sermo Christi est evan-
gelica sua doctrina ac jussio. Qui ergo vult
probabiliter noscere an vere ac spirituali-
ter diligat Christum, interiora sua sincere
discutiat ; diligenter ac frequenter exami-
net an quicquid præcepit Christus adim-
pleat, et quicquid prohibuit vitet ; an omne

mortale peccatum cordialiter detestetur,
vitet, et semper vitare proponat ; an vere
sit humilis, mansuetus, caritativus, exem-
plaris, sobrius, timoratus ; præcepta quo-
que observet Ecclesiæ ; nec quempiam ve-
lit contristare, perturbare, gravare : imo
quod sibi non vult fieri nemini faciat, et
quod sibi fieri cupit exhibeat aliis. Qui ta-
lem se invenit, confidat se Deum diligere.
Qui autem ad indignandum, ad irascendum
et ulciscendum, ad animositates, conten-
tiones, detractiones, et similes passiones
ac culpas se invenit pronum, timeat vehe-
menter, præsertim si religiosus exsistat, et
maxime quum animositas, ira, crapula,
detractio, contentio, ex suo genere morta-
lia sint peccata, et religiosus ex sua voca-

tione ac professione ad quotidianum tenetur profectum.

Insuper, quam salubre, fructuosum, meritum sit Christi sermones servare, id est opere adimplere memoriterque tenere, ipse in evangelio hodierno pandit, dicendo : Et Pater meus diliget eum ; et ad eum veniemus, et mansionem apud eum faciemus. Ecce quid gloriosius, quid desiderabilius potest excogitari? Numquid parum est ab æterno Patre amari, a Patre et Filio (haud dubium quin et a Spiritu Sancto) visitari, a tota supergloriosissima Trinitate inhabitari? In palatiis imperatorum et regum sæculi hujus, non mediocriter magnum putatur esse amicum et familiarem imperatoris aut regis, visitari et affari ab illo, atque in eodem cum illo contubernio demorari, epulari, quiescere. Unde quum affectuosissima mater sanctissimi Astionis monachi ac martyris audisset filium suum in palatio summi Regis consistere, mox sciscitabatur an bene haberetur a rege suo. Et quum beatissimus Joannes eremita prædixisset principi militiæ imperatoris Theodosii certam victoriam de tyranno, hoc quoque prænuntiabat eidem, quod carus et acceptus futurus esset imperatori. Quid ergo est Regi sæculorum immortalis, invisibili, Deo majestatis immensæ, dignitatis et excellentiæ penitus infinitæ, esse carum, familiarem ac intimum, a supergloriosissima Trinitate visitari, et eam proprii cordis inhabitatricem habere? Qui potest capere capiat, quia res ista videtur mihi tantæ gratiositatis, dignitatis et desiderabilitatis, ut plene comprehendendi non queat, nec exprimi digne. Tantæ igitur dignitatis et gratiæ, tantæ sublimationis ac felicitatis amore, intuitu et effectum, servemus Christi sermones, frangamus, vincamus atque viriliter mortificemus nos ipsos : regnum enim cælorum diripiunt violenti.

Denique in his verbis confertur consolatio magna religiosi. Si namque omnem Christifidelem Christi mandata servantem diligit Deus Pater, et ad eum veniunt Pa-

ter et Filius ac Spiritus Sanctus, quanto magis vere religiosos non solum mandata, sed et evangelica Christi consilia strenue observantes, regulariter conversantes, diligit Pater, et ad tales dignantissime venit, eosque gratiosissime inhabitat, adoranda, superbenedicta æternaque Trinitas ; et potissimum eos qui verbis aut exemplis etiam alios ad Dei sermones implendos inducunt, ad meliora inflammant, qui sua alacritate, devotione, fervore, humilitate, mansuetudine, exemplaritate, sobrietate, diligentia, aliorum pigritiam excitant, indevotionem confundunt, torporem accendunt, elationem humiliant, iram extinguunt, scandalositatem reformant, crapulam reprimunt, negligentiamque corrigunt. Unicuique talium dici potest quod Saul dixit ad Samuelem : Benedictus tu Domino ; et David ad prudentem Abigail, Benedictus sermo oris tui ; quod item Jacobus ait apostolus, Qui converti fecerit peccatorem ab errore viæ suæ, salvabit animam ejus a morte, et operit multitudinem peccatorum.

Præterea, quemadmodum teste Bernardo, Christus maximam persecutionem patitur ab his qui pravis exemplis, suggestionem pestifera, persuasionem maligna, animas suo sanguine liberatas ab ipso avertunt ; sic summam honorationem habet ab his qui virtuosius exemplaribusque operibus, sanctis exhortationibus, errantes ad ipsum reducunt, stantes confirmant, et universos, quantum est in ipsis, ædificant. Simus igitur mutuo exemplares, consilio et auxilio omni quo possumus nos invicem adjuvemus, divinæ majestatis honorificentiam totis viribus exquiramus, procuremus, promoveamus. Et sicut de beatissimo patre Antonio legitur, quod egregio viro illa semper flamma arsit in corde, ne in quacumque virtute alicui inveniretur secundus sive inferior ; ita et quilibet nostrum unumquemque studeat in omni virtute præcedere, in omni humilitate, patientia, diligentia superare. Studeat unusquisque præ ceteris exemplarior, obsequiosior, de-

Joann. xiv,
23.

1 Reg. xv,
13.
Ibid. xxv,
32.
Jacob. v, 20.

votior, ferventior, temperantior, alacrior inveniri. Hujusmodi namque zelus, flamma seu appetitus non ex aliqua procedit elatione, sed ex divino ac fraterno spirituali amore, quo quis Deum totis viribus appetit honorare, et proximos ædificare, quibus et negligentior, indevotior, carnalior, imperfectior inveniri sapientialiter erubescit.

Joann. xiv,
27.

Præterea, sicut Salvator dixit Apostolis, *Pacem relinquo vobis, pacem meam do vobis; sic dum ipse et Pater et Spiritus Sanctus mentem visitant atque inhabitant, B* pacem internam et tanquam continuam quamdam serenitatem causant in ea, facientes eam in se quiescere et gaudere. Unde hujusmodi homo veraciter virtuosus, pace abundat interiori et gaudio spirituali; estque alacer in divinis et jucundus in Domino, cum mentali lætitia serviens Deo, et in hilaritate agens quæ ad laudem et gloriam facit altissimi summique Dei omnipotentis. Qui autem caret hac pace interna, quæ est quies seu tranquillitas cordis in Deo, passionum quidem suarum *C* aculeis frequenter mordetur, inquietudinibus agitur, ira, impatientia et aliis motibus inordinatis affligitur. Talibus solitudo est gravis, et tempus longum, discursio solatiosa, fabulatio grata : nam quia intus non gloriantur in Domino, foris quærunt consolari cum mundo. Redeant ergo ad cor. Bonitatem, suavitatem, misericordiam, excellentiam, beatitudinem Dei considerent; etiam Christi passionem et sua novissima meditentur; in psallendo, orando laudandoque Deum discant gaudere : sic *D* que paulatim vacent, gustent et videant quam dulcis est Dominus, coram quo interiora sua quotidie bene discutiant atque custodiant; omnique otio pulso semper se utiliter occupent, et ad Deum ubique adspirare, ad ipsum mentem suam ubertim levare assuescant. Et tunc utique cito supernæ consolationis fient participes, in tantum quod ex sententia fatebuntur :

A Quam magna multitudo dulcedinis tuæ, *Ps. xxx, 20.*
Domine!

Postremo, quoniam teste S. Leone Papa, nihil tam utile Ecclesiæ, tam necessarium Christianis, tam salubre fidelibus, sicut pacem istam internam habere, unitatem diligere, concordiam observare; studeamus semper pacifice pariter conversari, imo et cum his qui odiunt pacem pacati et tranquilli consistere, discordantes pacificare. Beati namque pacifici, quoniam *Matth. v, 9.* filii Dei vocabuntur. Turbatores vero, contentiosi, detractores, seminatores discordiæ, litigatores, pungitivi, mordaces, cujus nisi diaboli filii comprobantur? Nam sicut in pace factus est locus Dei, ita in perturbatione, contentione, divisione, est locus diaboli. Qui sicut nulla re tantum affligitur sicut caritate, concordia et spirituali jucunditate servorum Dei, ita de nullo tantum lætatur ut de aversione, discordia, contentione et inordinata tristitia eorundem. Propterea, quod ille in nobis magis persequitur et auferre conatur, vigilantius custodiamus; et juxta Zachariæ oraculum, pacem et veritatem jugiter diligamus. Teste equidem Augustino, tale ac tantum est bonum pacis, ut in rebus creatis nil pretiosius audiat, nil avidius concupiscatur, nil carius possideatur. *Zach. viii, 19.*

Hanc igitur pacem mentalem non amittamus, quantumlibet forinsecus impugnemur. Nullius improbitate, persecutione aut exercitatione, ad turbulentiam iræ, impatientiæ, tristitiæ, aut similis passionis seu vitii moveamur; sed in Domino stet inflexibilis animus noster, caritate, mititate, patientia, fortitudine, sapientia, discretione, ceterisque virtutibus undique confortatus, armatus, munitus et constipatus, sicut rex stans in medio sui exercitus ipsum protegentis ac ambientis ne vulnereetur. Hoc nobis benignissimus, adorandus, omnipotens Spiritus Sanctus conferre dignetur, qui cum Patre et Filio unus est Deus super omnia benedictus.

SERMO SEPTIMUS

QUALITER SPIRITUI SANCTO PER VIRTUTES ET DONA SANCTAQUE OPERA ASSIMILARI DEBEMUS.

PARACLETUS Spiritus Sanctus, quem A
mittet Pater in nomine meo, docebit
vos omnia. Joann. xiv, 26.

Quædam in superbeatissima Trinitate sunt propria, quædam appropriata Personis. Quemadmodum enim Filio, quum sit emanatio intellectus, appropriantur veritas, sapientia, ars, exemplar, pulchritudo seu species; sic Spiritui Sancto, quum sit emanatio voluntatis, appropriantur caritas, amor, pax, tranquillitas, suavitas, benignitas, munificentia, usus, communio, jucunditas, nexus, osculum et amplexus. Multa quoque Spiritus Sanctus nomina habet sibi appropriata, propter effectus sibi appropriatos: nam appellatur paracletus, ignis, unctio, digitus Dei. Porro donum dicitur proprium nomen Spiritus Sancti, secundum quod donum accipitur per habitudinem ad eum cujus est ratione originis, et a quo datur.

Ex his elici potest, qualiter et in quibus adorando paracletus Spiritui Sancto assimilari possimus ac debeamus. Primo namque et maxime ei assimilamur per caritatem supernaturalem infusam, qua Deum proximumque meritorie, pure et irreflexe diligimus. Hæc etenim caritas est quædam supernaturalis similitudo, imago atque expressio increati ac spirati amoris, videlicet Spiritus Sancti: et hoc per appropriationem. Realiter namque caritas est communis totius superessentialis Trinitatis effectus, et increati amoris, absolute dicti (qui est divina essentia), supernaturalis similitudo, expressio seu imago. Itaque, quo in caritate purissima ferventiores et perfectiores efficimur, eo Spiritui Sancto similiores amabilioresque reddimur.

Caritas autem unionem facit, zelum et

ecstasim, quia amantem non solum conjungit amato, sed et transponit et transformat eum in illum. Quod fit per ecstasim, quæ est extrapositio qua amans in amatum tendendo, quasi extra se ponitur et in illum transfertur. Unde, secundum divinum Dionysium, divinus amor seu caritas non sinit amantes esse sui ipsorum, sed facit eos esse eorum quos amant, quibus per caritatem se ipsos præbent, exhibent atque communicant, et non sua dumtaxat: sicut et Spiritus Sanctus, qui essentialiter caritas nuncupatur, non solum gratiæ suæ charismata, sed et se ipsum electis suis ad habendum, possidendum ac fruendum se largitur. Nec caritas solum hanc ecstasim facit, sed et amantem amato indissolubiliter nectit ac colligat, dicente Apostolo: Quis separabit nos a caritate Christi? Et istud agi fertur per zelum, quæ est vehemens valde affectio.

De Divin.
nom. c. iv.

Rom. viii,
35.

Primum horum effectuum, scilicet unionem, facit caritas in universis eam habentibus: et pertinet unio illa simpliciter dicta ad incipientes. Transpositio vero in amatum, spectat ad proficientes, qui dilecto super omnia Deo quotidie magis propinquare nituntur, ferventius diligendo, ac per hoc fortius in ipsum tendendo, et in ipsum se transponendo atque quodammodo transformando, utpote quæ Dei sunt magis ac magis agendo. Unumquodque equidem dicitur illi præcipue assimilari et conformari, et in illud transformari, cujus operationes et proprietates magis sectatur, exercet et complet: quemadmodum callidi dicuntur vulpini; gulosi, lupini; audaces, leonini. Contemplativi vero ac fervidi, caritativi rite ac divini vocantur. Porro tertius caritatis effectus, vide-

licet insolubilis ille nexus seu colligatio, A pertinet ad perfectos, qui mille mortes mallent perpeti quam a Deo averti aut in ipsum prævaricari.

Deinceps hos tres caritatis effectus seu actus habere debemus, primo circa Deum, deinde circa proximos omnes. Debemus ergo primum esse Deo per caritatem uniti, ut ei super omnia ut summo bono et ultimo fini adhæreamus, afficiamur, atque ad ejus honorem et dilectionem nos ipsos ac cetera omnia ordinemus, ita quod nihil contra ordinem caritatis optemus aut operemur. Secundo debemus per caritatem esse in Deum transpositi, translati et transformati, per hoc quod ad ejus intensiorem dilectionem nos assidue excitamus, extendimus, elevamus, et ipsum sincerius contemplari enitimur, virtutumque opera instantius exercemus, Deum orando, laudando, pietatis ac justitiæ opera proseguendo : per quæ omnia Deo præcipue assimilamur, et in ipsum transformamur, cui proprium est misereri ac parcere, et qui justus est, et justos ac justitias diligit. C Tertio debemus Deo indissolubiliter esse conjuncti et colligati, eum intra nos continue ac ferventissime amplectentes ; et ei plenarie conformati, omne id quod suæ caritatis quoquomodo læsivum est, aut sancti fervoris minorativum, cordialissime detestantes ac fugientes, non solum graviora, sed et minima quæque abominantes peccata ; sicque habituati, radicati ac roborati in Deitatis amore, ut quantum in hac fragili carne ac labili vita fieri valet, dici possimus in caritate perfecti, et D inavertibiles ab eadem.

Insuper et ad proximos hos caritatis actus habere nos congruit : ut spirituali dilectionis vinculo cunctis viatoribus jungamur, eorum desiderando salutem ut propriam ; et in fraterna caritate proficiendo, transformemur in eos, ut unum cum eis simus in Deo, et zelo salutis eorum simus accensi, faciendo pro eorum salute quod possumus ; atque in his tantum et tamdiu exercitemus nos ipsos, ut

tam valide radicemur ac inflammati perseveremus in eorum spirituali amore, ut ab eis averti non valeamus, sed indissolubiliter colligati simus eisdem : ita ut quidquid injuriæ, persecutionis, molestiæ, invidentiæ, ingratitude nobis intulerint, non cessemus a perfecto eorum amore, sed compatiamur et deprecemur pro eis, vincentes quantum in nobis est, malum in bono. Cujus perfectissimæ caritatis exemplum Christus ostendit in cruce, pro crucifixoribus exorando ; et Stephanus, pro suis lapidatoribus flexis genibus precem fundendo ; Paulus quoque, qui tanquam indulgentissimus pater, tanto plus adversariis suis condoluit, quanto graviora ab eis patiebatur adversa.

Præterea constat ad hanc caritatis perfectionem et ad hos tres actus ipsius nequaquam nos posse pertingere, nisi a privato et carnali amore penitus expurgemur, ab omni quoque animositate, ambitione, ira, impatientia, cupiditate ceterisque passionum immoderantiis plene simus mundati, alienati et reformati, atque in sancta humilitate, mansuetudine, patientia, aliis quoque virtutibus moralibus stabiliti. Quum ergo hoc modo fuerimus in caritate perfecti, viscera caritatis induti, in bonitatis et sanctitatis affectum omnino conversi, tunc Spiritui Sancto sublimiter conformabimur, a pravis suspicionibus et omni malitia penitus alienati. Tunc insuper in nobis erit pax interna tam stabilis, tanta tranquillitas mentis, tanta cordis dulcedo, tanta ad universos benignitas, tanta munificentia, liberalitas atque communio, tanta lætitia cordis in Domino, quod etiam per omnia ista abundantiamque eorum assimilabimur mente paraclito Spiritui Sancto, cui prædicta hæc omnia appropriantur, et essentialiter sunt quod est ipse.

Simus ergo omnino caritativi, non quærentes quod nostrum est tantum. Imo nos ipsos et quidquid possumus et habemus proximis liberalissime impendamus, nil nobis proprium reservantes, sed omnem gratiam nobis communicatam eis toto af-

fectu et omni modo nobis possibili imper-
tientes. Quidquid consolationis, quidquid
informationis, quidquid consilii et auxilii
possumus, cunctis pro viribus impenda-
mus, et ultra quam possumus facere cupia-
mus. Et quod effectum non possumus, facia-
mus affectu, ut sic unusquisque nostrum
suo modo paracletus dici queat; et advo-
catus ac digitus Dei, alios dirigendo; et
ignis, ipsos inflammando; unctio quoque,
dona nobis collata in ipsos administrando.

Ecce ad hæc obtinenda et exsequenda
conemur, tendamus, adspiremus et accen-
damur : suavissimi Spiritus Sancti im-
mensam pietatem fideliter, instanter inde-
ficienterque rogantes, ut propter sui ipsius
bonitatem immensam, connaturalem beni-
gnitatem, immensam dulcedinem, opulen-
tiam, munificentiam infinitam, caritatem
æternam, et propter emanationem suam
a Patre et Filio, omnemque mutuam dul-

A cedinem inter ipsum et Patrem ac Filium,
nobis hæc omnia dignetur conferre, per
Virginem gloriosam, omniumque Sancto-
rum preces ac merita; mala quoque his
bonis contraria incessanter tollat a nobis :
in primis privatum illum amorem, om-
nium vitiorum originem; deinde omnem
elationem, cupiditatem, concupiscentiam,
omnem iram, invidiam, acediam, crapu-
lam, ex improbo illo ad se reflexo privato
amore nascentes. Nec solum ab his ma-
gnis, grossis et horribilibus malis nos abs-
tinere oportet et fugere, sed item omnem
cogitationem inutilem, omne verbum illi-
citurum, omnem inordinatam affectionem
abjicere, nullam temporis horulam infru-
ctuose transire, sed meditando, orando,
psallendo, contemplando, suspirando, fer-
vendo, indesinenter ferri in Deum, su-
per omnia benedictum, unum et trinum.
Amen.

DOMINICA SS. TRINITATIS

ENARRATIO IN EPISTOLAM

VIDI OSTIUM APERTUM. Apoc. IV, 1-10.

QUONIAM hodie in Ecclesia, summæ et supergloriosissimæ Trinitatis solennitas agitur, recte lectio ista ex Apocalypsi sumpta, loco epistolæ legitur, quia in ea adorandæ Trinitatis mysterium tangitur. Ait ergo Joannes apostolus : *Vidi*, visione imaginaria et intellectuali, quales communiter fuerunt propheticæ visiones. Hæc ergo visio imaginaria fuit, quia per corporalium rerum imaginarias ac materiales formas seu species, in interiori sensu angelico ministerio formatas, fiebat. Fuit et intellectualis, quia per illuminationem angelicam intellexit Joannes quid illæ similitudines designarent : alias non fuisset propheta, quia ut in Daniele scribitur, Intelligentia est opus, id est principale, in visione. Itaque vidi *ostium apertum in cælo*. Per ostium expositores communiter intelligunt Christum, qui ait : Ego sum ostium ovium; per me si quis introierit, salvabitur. Quod apertum asseritur, quoniam Christus notitiam sui aperuit mundo, et suo ore aperto docuit per se ipsum homines. In passione quoque unus militum lancea latus ejus aperuit. Insuper, Christus omnibus ad se venientibus gremium offert clementiæ, et misericordiæ suæ aperit januam, secundum quod ait : Venite ad me, omnes qui laboratis; et rursus, Eum qui venit ad me, non ejiciam foras. Hoc ostium apertum est in cælo, id est in militanti Ecclesia, quam Christus in Evangelio frequenter regnum cælorum appel-

lat, dicendo : Simile est regnum cælorum *Matth. XIII, 47.* sagenæ missæ in mare, et ex omni genere piscium congreganti; et item, Simile est regnum cælorum decem virginibus, quarum quinque stultæ fuerunt. *Ibid. XXV, 1, 2.*

Aliqui vero dicunt, quod Joannes in isto loco describit majestatem Dei. Et primo describit majestatem ipsius quantum ad eminentiam throni seu loci quo residet. Sicque per verba hæc, « vidi ostium apertum », datur intelligi, quod Joanni in visione imaginaria apparebat quod janua quædam aperiretur in cælo, ut sibi omnipotentis Dei ostenderetur majestas sub corporalium similitudinibus rerum, atque ad innuendum quod desuper sibi revelaretur status militantis Ecclesiæ. Juxta quem modum in Ezechiele habetur : Aperti sunt cæli, et vidi visiones Dei. Et in eodem capitulo describitur thronus supra firmamentum, et super similitudinem throni similitudo quasi adspectus hominis desuper. Per quod Deus altissimus omnibus præsidens designatur, sicut ibidem plenius scripsi. *Ezech. I, 1. Ibid. 26.*

Et vox prima quam audivi, tanquam tubæ loquentis mecum, dicens : Ascende huc, et ostendam tibi quæ oportet fieri cito post hæc. Per vocem istam tubalem, quæ prima fuit in visione hac, quidam intelligunt vetus Testamentum seu doctrinam propheticam, quam per illuminationem supernam audivit interiori auditu Joannes, quæ admonuit eum ascendere huc, id

Dan. x, 1.

Joann. x, 9.

Ibid. XIX, 34.

Matth. XI, 28.

Joann. VI, 37.

est ad Christum spiritualemente intel-
 etum. Hæc autem expositio nimis spiri-
 tualis videtur, præsertim quia in die Pen-
 tecostes, veniente super Apostolos Spiritu
 Sancto, infusa fuit Joanni excellens notitia
 legis ac Prophetarum. Alii ergo per vo-
 cem istam intelligunt inspirationem divi-
 nam. Sed quoniam Deus ista non docuit
 Joannem immediate per se ipsum, imo
 nec immediate per Christum, sed per ange-
 lum in Christi persona apparentem (quem-
 admodum in Apocalypsi ait Joannes : Vidi
 quasi similem filio hominis; et iterum,
 Ego Jesus misi angelum meum testificari
 hæc in Ecclesia), hinc potius arbitror, quod
 per vocem hanc intelligenda sit angelica
 allocutio, seu ipsemet angelus Joannem
 interius alloquens. Cujus vox quasi vox
 tubæ vocatur, ad insinuandum virtutem
 et efficaciam angelicæ allocutionis. De hac
 voce dixit Joannes in eodem Apocalypsis
 libro, Conversus sum ut viderem vocem
 quæ loquebatur mecum : intelligendo per
 vocem, vocis prolatorem. Denique divino
 Dionysio contestante, propheticae revela-
 tiones per angelos factæ sunt.

Itaque ait : « vox prima » : quasi dicat,
 Eadem quam jam ante audiui. Nam quod
 præcessit, primum vocamus. Verumtamen
 Berengandus * per primam vocem intelli-
 git Joannem Baptistam, qui loquitur de se
 ipso : Ego vox clamantis in deserto. « As-
 cende huc », id est, ad contemplationem
 te erige : de spirituali quippe ascensu, non
 de corporali, hoc dictum est. « Et osten-
 dam tibi quæ oportet fieri cito post hæc »,
 id est statum, processum ac tribulationes
 militantis Ecclesiæ, quæ ex hoc tempore
 usque ad finem mundi decurrent.

Et statim fui in spiritu, id est aliena-
 tus ab exteriorum sensuum usu et actu,
 atque in ecstasi mentis, per diligentissi-
 mam considerationem eorum quæ mihi
 ostendebantur. *Et ecce sedes posita erat
 in cælo*. Si per cælum intelligamus mili-
 tantem Ecclesiam, sedes in ea posita, est
 congregatio quævis devota, seu corda fi-
 delium Dei amore succensa, in quibus

A Deus regnat, residet et quiescit, dicente
 Apostolo : Templum Dei sanctum est, quod
 estis vos. Nam anima justi, sedes est sa-
 pientiae. Unde Scriptura fatetur, Justitia et
 judicium præparatio sedis tuæ : quia vi-
 delicet per justitiæ executionem et judi-
 cii discretionem, disponitur anima ut Deus
 residere dignetur in ea. Si vero per cœ-
 lum intelligatur patria Beatorum, seu tri-
 umphans Ecclesia, per sedem in ea positam
 intelliguntur angelicæ potestates, omnes-
 que mentes Deo beatifice perfruentes, qui-
 bus Deus sublimiter præsidens, interius
 cuncta disponit. Rursus, per sedem hanc,
 auctoritas et potestas Dei Ecclesiam gu-
 bernantis exprimitur. Deus etenim nullibi
 verius quam in se ipso esse et quiescere
 perhibetur. Postremo, quia et ipsa Ecclesia
 sedes est Dei, sedes in cælo est posita,
 quia Ecclesia militans, quamvis adhuc in
 carne versetur, mente tamen cælum in-
 habitat, dicente Apostolo : Nostra conver-
 satio in cælis est.

Et supra sedem sedens, scilicet Deus
 C unus et trinus omnibus dominans, de quo
 fertur in Psalmo : Dominus in cælo sedes
 ejus ; et, Dominus sedet super sedem san-
 ctam suam. Porro immensus et incircum-
 scriptibilis Deus, in divinitatis natura ne-
 quaquam corporaliter sedet nec clauditur
 loco, sed illocalis, intemporalis immate-
 rialisque invariabiliter permanet. Sed quo-
 niam visio ista imaginaria fuit, Deus in
 forma visibili, situatiter residenti, mon-
 strabatur Joanni. Juxta quem modum lo-
 quitur Isaias : Vidi (inquiens) Dominum
 sedentem super solium excelsum et eleva-
 tum. Daniel quoque propheta : Adspicie-
 bam, inquit, donec throni positi sunt, et
 Antiquus dierum sedit, utpote Pater æter-
 nus. Sicque in imaginaria visione appare-
 bat Joanni similitudo sedis corporalis, in
 qua Deus residens videbatur. Quidam au-
 tem per sedentem, specialiter intelligunt
 Christum, Deum et hominem, de quo scri-
 ptum est : Dominus quidem Jesus post-
 quam locutus est eis, assumptus est in cœ-
 lum, et sedet a dextris Dei.

Act. II, 1-4.

Apoc. I, 13.

Ibid. XII, 16.

Ibid. I, 12.

De Cælest. hier. c. IV et XV.

* Berengandus

Joann. I, 23.

I Cor. III, 17.

Ps. LXXXVIII, 15.

Philipp. III, 20.

Ps. X, 5.

Ps. XLVI, 9.

Is. VI, 1.

Dan. VII, 9.

Marc. XVI, 19.

Et qui sedebat, similis erat adspectui lapidis jaspidis et sardii. Per adspectum jaspidis et sardii, color eorum exprimitur. Jaspis autem viridis est coloris : qui color visum oblectat atque confortat. Sardius vero rubeum habet colorem. Hinc Berengandus et Haymo, per jaspidis viriditatem intelligunt Christi divinitatem, quæ interiorum visum summe oblectat, dulcissime reficit, insuperabiliter roborat; per sardii vero rubedinem, intelligunt ejus humanitatem pro nobis sanguine sacro perfusam, secundum illud Isaïæ : Quare rubrum est indumentum tuum? Insuper, quoniam jaspis apparentiam aquæ habet, sardius vero ignis, hinc Christus omnium judex, secundum Bedam, per hæc designatur : quia jam judicium per aquam exercuit, diluvio mundum submergens, aliud in fine sæculi per ignem exercebit. Albertus Magnus, per jaspidis virorem intelligit immarcescibilem felicitatis coronam, quam Christus præstat electis; per sardii ruborem, æterni ignis incendium, quod reprobis irrogat. Alii, qui per sedentem intelligunt Deum unum ac trinum, dicunt quod imaginariæ illæ visiones prophetiæ fiunt secundum congruentiam ad id quod per imagines designatur ac revelatur. Deus autem in visione ista apparuit ut militantis Ecclesiæ gubernator, ad quam se habet ut pius consolator et ut caritatis inflammator : quorum primum designat viriditas jaspidis ; secundum, sardii rubor.

Ezech. 1, 26, 27. Præterea in visione Ezechielis, Deus sedens in throno, visus est in similitudine electri velut adspectus ignis. Et ibi per splendorem electri, quod aurei igneique coloris est, Dei providentia ac sapientia designatur. Hinc quoque hoc loco per sardii igniformem ruborem, divina sapientia; per jaspidis autem virorem, pulchritudo, dignitas et incommutabilitas divinæ naturæ, quæ æternaliter ejusdem vigoris est, vel decor assumptæ humanitatis Christi, quæ in resurrectione refluoruit, intelligi potest.

Et iris erat in circuitu sedis. In Ge-

nesi legitur Deus dixisse ad Noe : Arcum meum ponam in nubibus cæli, et erit signum fœderis inter me et terram. Itaque per arcum seu iridem, elementia fœdusque amicitiae Dei ad Ecclesiam insinuatur : sic enim dilexit mundum, ut unigenitum Filium suum daret ei et pro eo. Itaque « iris erat in circuitu sedis », id est Ecclesiæ, quoniam misericordia Dei et pactum amicitiae ejus circumdat, tuetur ac munit Ecclesiam. Unde Christus promisit Ecclesiæ : Ecce ego vobiscum sum cunctis diebus usque ad consummationem sæculi. *Similis visioni smaragdinae.* Smaragdus est lapis majoris ac clarioris viriditatis quam jaspis. Est equidem nimiae atque gratissimæ viriditatis, in tantum ut intuentium animos in admirationem convertat. Quod ergo iris, in qua tripartitus color apparet, visioni seu colori smaragdi assimilatur, designat quod caritas, misericordia et gratia Dei ad Ecclesiam, sit electis valde miranda, summe accepta, clarissime cognita, consolatoria et confortativa eorum. Rursus, per iridem designatur quod Deus omnibus elementis, eorumque impressionibus ac alterationibus dominetur.

Et in circuitu sedis sedilia viginti quatuor, et super thronos, id est supra viginti quatuor sedilia ista, erant viginti quatuor seniores sedentes. Quidam per viginti quatuor sedilia, intelligunt viginti quatuor libros veteris Testamenti; et per totidem seniores, intelligunt patres legis antiquæ, qui in præfatorum librorum lectione ac meditatione, quasi in sedibus, a curis atque laboribus sæculi quiescebant. Alii per seniores viginti quatuor, intelligunt sanctos patres novi ac veteris Testamenti, propter duodecim Apostolos ac duodecim Patriarchas, quibus omnibus judiciaria potestas aliquo modo communicatur. Alii vero per viginti quatuor sedes, intelligunt universas evangelicæ legis cathedrales ecclesias, et per totidem seniores, earum episcopos : et hoc, propter concordantiam novi Testamenti cum veteri, in quo, sicut primo Paralipomenon legitur, sanctus rex

David cultum cupiens augere divinum, constituit viginti quatuor sacerdotes, successive in templo suis hebdomadibus ministrantes. Sed quia ii viginti quatuor sacerdotes instituti a David, non fuerunt pontifices, imo subjecti uni suo pontifici : videtur quod per eos congruentius designetur universitas sacerdotum evangelicæ legis ; per sedes autem, eorum potestas, virtus et gratia, ac merita eis collata, in quibus velut in sedibus spiritaliter conquiescunt. Dicuntur demum ista sedilia et eorum sessores esse in circuitu sedis, id est Ecclesiæ, quoniam sacerdotum et prælatorum est alios ab hoste antiquo tueri, illosque roborare ac custodire. Unde in ultima Ezechielis visione, templum, quo designatur Ecclesia, legitur triplici muro circumdatum. Per quod triplex Ecclesiæ significatur custodia : nam custoditur a Christo, ab angelis sanctis, et a prælatis.

Ezech. xl,
5.

Apoc. iii, 5.

Is. lxi, 10.

Ps. xx, 4.

Ps. lxi, 9.

Circumamicti stolis albis, id est puritate et honestate undique adornati, et virtutibus decorati. Unde in Apocalypsi loquitur Christus : Qui vicerit, vestietur vestimentis albis. De iis albis stolis ait Ecclesia per Isaiam : Gaudens gaudebo in Domino, quia induit me vestimentis salutis, et indumento justitiæ circumdedit me. *Et in capitibus eorum coronæ aureæ*. Per quod designatur quod sunt aliorum rectores, et æterna felicitate coronandi a Deo, juxta illud in Psalmo : Posuisti in capite ejus coronam de lapide pretioso. Denique in Scripturis, per caput mens, per aurum sapientia exprimi solet. Aureas ergo habent in capitibus suis coronas, quoniam mentes eorum dono sapientiæ decorantur.

Et de throno, id est de militanti Ecclesia, quæ sedes est Dei, *procedebant fulgura*, id est miracula : quæ instar fulguris divina virtute velociter fiunt, clare illuminant ac perterrent videntes, juxta illud Psalmi, Timebunt, qui habitant terminos, a signis tuis. Et in Evangelio sæpius scriptum est, quemadmodum turbæ visis Christi miraculis timuerunt. Fulgura quoque

sunt comminationes divini judicii atque pœnarum inferni. *Et voces*, id est prædicatio mediocris ac simplex : quemadmodum ad Corinthios ait Apostolus, Tanquam parvulis in Christo lac dedi, non solidum cibum. Unicuique enim proponendum est verbum Dei prout capere potest. *Et tonitrua*, id est prædicatio sublimis et magna : secundum illud Apostoli, Sapientiam loquimur inter perfectos. Unde Christus in Evangelio quosdam Apostolorum filios appellavit tonitruum. Et in libro Job habetur : Ecce hæc ex parte dicta sunt viarum Dei ; et quum vix parvam stillam sermonum ejus audierimus, quis poterit tonitruum magnitudinis ejus intueri ? Tonitrua sunt verba Joannis : In principio erat Verbum ; et Verbum caro factum est. Et quod loquitur Paulus : Audiavi arcana verba quæ non licet homini loqui.

I Cor. iii,
1, 2.

Ibid. ii, 6.

Marc. iii,
17.

Job xxvi,
14.

Joann. i, 1,
14.

II Cor. xii,
4.

Et septem lampades ardentes ante thronum. Quid autem per lampades designetur, subjungitur : *qui sunt septem spiritus Dei*, id est septem dona Spiritus Sancti, quibus mens velut lampadibus illustratur ac inflammatur. Hæ lampades sunt ante thronum, hoc est in conspectu Ecclesiæ, imo in corde fidelium. Vel septem spiritus Dei, intelligendi sunt omnes angeli sancti, quorum ministerio corda illuminantur et accenduntur fidelium. Unde in Apocalypsi habetur : A septem spiritibus qui in conspectu throni ejus sunt. Septenario quippe universitas designatur, quoniam septem diebus omne tempus evoluitur. Hinc in libro Tobiae legitur : Dixit Raphael angelus, Ego sum Raphael, unus ex septem qui adstamus ante Deum.

Apoc. i, 4.

Tob. xii, 15.

Et in conspectu sedis, hoc est Ecclesiæ militantis, in qua per gratiam residet Deus, est *tanquam mare vitreum*, id est Baptismatis unda et sacramentum : in quo submergitur acies vitiorum, sicut in mari Rubro mersus fuit exercitus Ægyptiorum. Quod sacramentum instar vitri pellucidum est, animasque clarificat ; per quod, tanquam per vitrum, splendor Solis justitiæ mentem subintrat. *Simile crystallo*

ratione sui effectus, quia ab omni culpa et pœna absolvit, virtutum et donorum decorem inducit, ita ut evolet qui ipsum suscepit, nisi de novo peccet. Rursus crystallo, quod ex nimia congelatione non fluit neque resolvitur, assimilatur Baptismus ob sui effectus soliditatem. Nam indelebilem characterem imprimit : ideo nec iteratur. — Quidam per mare vitreum intelligunt Pœnitentiæ sacramentum, in quo esse debet fons lacrimarum.

Et in medio sedis et in circuitu sedis, quatuor animalia plena oculis ante et retro. Hoc, ut asserit Berengandus, secundum historiam stare non potest : neque enim tam parvus numerus ambitum sedis et medietatem ejus potuit obtinere. Sed spiritualiter intelligenda sunt hæc. Quatuor ergo animalia, non solum quatuor Evangelistas, sed et universos doctores Ecclesiæ signant. Et huic assertioni etiam Beda et Albertus concordant. Ait equidem Beda, per quatuor animalia, in hoc libro, non semper quatuor Evangelistas intelligi, sed quandoque Ecclesias. Atque, ut dicit Albertus, per quatuor animalia, omnes prædicatores, et præcipue quatuor Evangelistæ, signati sunt. Dicuntur autem prædicatores quatuor animalia, quia de quatuor Evangelistiis eorum prædicatio sumitur. — Itaque sensus est : « Et in medio sedis », puta Ecclesiæ, id est inter fideles, « et in circuitu sedis », id est in gyro eorum, ad protegendum et custodiendum fideles, sunt « quatuor animalia », id est universi doctores et prædicatores, quorum est populum Dei ab adversariis suæ salutis protegere : qui pleni sunt « oculis ante et retro », id est Scripturarum doctrinis, et considerationibus pertinentium ad salutem, ac undique circumspecti, quia tam præterita quam futura attendunt.

Verumtamen, quoniam teste B. Gregorio super Ezechielem, et secundum plurimorum doctorum consonam assertionem, per quatuor animalia quatuor Evangelistæ signantur ; dicendum, quod ipsi suis prædicationibus et doctrinis seu evangelicis

A libris usque ad præsens Ecclesiam muniunt, custodiunt ac defendunt. Sicque spiritualiter ambiunt eam.

Sed huic expositioni difficultatem facit quod subditur : *Et animal primum simile leoni, et secundum animal simile vitulo, et tertium animal habens faciem quasi hominis, et quartum animal simile aquilæ volanti.* Qui enim animalia ista Evangelistas interpretantur, per faciem hominis Matthæum accipiunt, qui primus est in ordine Evangelistarum, et primus Evangelium scripsit, secundum Hieronymum. Quum ergo hoc loco animal habens faciem quasi hominis, tertio loco ponatur, non videtur per ipsum significari Matthæus.

Ista objectio, quam aliqui ponderant, non videtur mihi alicujus momenti. Primo, quoniam contestantibus Hieronymo, Gregorio, et aliis multis sanctis doctoribus, quemadmodum apud Ezechielem, ita et hoc loco per hæc quatuor animalia quatuor designantur Evangelistæ. Ezechiel autem faciem hominis ponit primo loco, et ibi per eam significatur Matthæus ; similiter hic. Nec obstat variatio ordinis : quia diversis respectibus idem alicui præponitur atque postponitur. Hinc, ut Haymo ait, Ezechiel primo ponit hominem, secundo leonem, tertio vitulum, quarto aquilam, servans historiæ ordinem : quoniam primo, natus est Christus ut homo ; secundo, prædicans vocem emisit terribilem quasi leo ; tertio, in passione oblatus est tanquam vitulus ; postremo, ascendit in cælum ut aquila. Porro Joannes primo ponit leonem, quia jam Christus surrexit a mortuis, cujus resurrectioni fides præsertim innititur : ideo Joannes tanquam testis resurrectionis, primo ponit leonem.

Quamvis interea præacta expositio S. Gregorii, qua per hominem Matthæus, per vitulum Lucas accipitur, etc., sit communis et bona ; aliqui tamen Sanctorum aliam habuerunt considerationem. Nam, sicut hic recitat Beda, B. Augustinus per leonem intellexit Matthæum, quoniam regiam Christi prosapiam in exordio evan-

Ezech. 1, 10.

gelii sui descripsit; per vitulum vero Lucam, quia sacerdotalem Christi describit originem, secundum Hilarium; per hominem Marcum, quoniam his omissis, humanos Christi describit actus; per aquilam vero omnes Joannem intelligunt, propter sublimitatem sententiarum evangelii ejus. Insuper, ut recitat Berengandus, quidam per leonem, ut dictum est, Matthæum; per vitulum vero, Marcum, propter eloquii simplicitatem; per hominem intellexerunt Lucam, quia humanam Christi generationem est plenius prosecutus: videlicet, qualiter angelo nuntiante conceptus sit, quomodo natus et in præsepio collocatus, circumcisis et in templo oblatus sit.

Aliqui demum per quatuor animalia ista, quatuor patriarchales Ecclesias volunt intelligi: primam, videlicet Jerosolymitanam, per leonem, propter constantiam Apostolorum et aliorum qui in ea fuerunt; secundam, utpote Antiochenam, per vitulum, propter obedientiam qua primi illius Ecclesiæ filii parati fuerunt obedire Apostolis; tertiam, scilicet Alexandrinam, per hominem, quia in ea a principio fuerunt doctissimi viri; quartam, hoc est Constantinopolitanam, per aquilam, quia in ea fuerunt viri sublimiter contemplativi. Sed hoc Jerosolymitanæ Ecclesiæ multo præclarius competit, quia in ea fuerunt Apostoli et primi discipuli Christi, qui in contemplationis gratia omnibus præfulserunt.

Hinc, per quatuor animalia, quatuor Evangelistas arbitror designatos, quamquam per ea etiam Christus ejusque membra, viri scilicet christiani, queant intelligi. Fuit enim Christus homo in natiuitate et conversatione, vitulus in obeditione ac passione, leo in prædicatione ac resurrectione, aquila in contemplatione et ascensione. Sic et quilibet Christifidelis, homo est rationem sequendo; vitulus, carnem cum vitiis et concupiscentiis crucifigendo; leo, a peccatis surgendo et hostibus suæ salutis victorialiter reluctando; aquila, divinorum contemplationibus insisten-

do, orationi, devotioni et laudibus Dei vacando.

Et quatuor animalia, singula eorum habebant alas senas. Alæ Sanctorum sunt virtutes, quibus ad superna se erigunt. Quoniam ergo senarius numerus est perfectus, et per ipsum frequenter perfectio designatur, ideo quodlibet animal sex alas habere describitur: quoniam in cujuslibet Evangelistæ libro omnium virtutum docetur perfectio, et novæ legis doctrina perfectionaliter continetur. Insuper, sex alæ Sanctorum sunt lex naturalis, lex Moysis, doctrina prophetica, lex evangelica, apostolica documenta, et catholicorum Patrum doctrina. His alis homines virtuosus per contemplationem et amorem ascendunt, atque ad proximorum ædificationem descendunt. Volant quoque ad dexteram, gratias agendo seque humiliter habendo in prosperis; et ad sinistram, per patientiam in adversis. Præterea, sicut in Isaia habetur, Seraphim quæ Isaïæ apparuerunt, sex alas habebant. Hinc et animalia ista sex alis alata fuerunt, quoniam per Evangelistarum doctrinam ad angelicam perfectionem beatitudinemque pertingitur. Iterum, per sex alas, sex species contemplationis (secundum quod quidam eas assignant) intelligi possunt. — Quæritur, cur hoc loco animalia sancta sex alas habere scribantur, quum apud Ezechielem quatuor pennas habere dicantur. Ad quod respondere reor difficile, nisi forte quis dicat mysterium animalium horum evidentius atque sublimius revelatum esse Joanni quam Ezechieli.

Et in circuitu, id est per totum corpus suum (sicut et Ezechiel habet): unde alia habet translatio, Ante et retro; *et intus plena sunt oculis,* id est sapientialibus et prudentialibus considerationibus, discretionibus atque scientiis vere salubribus, ubique et in universis habendo se circumspecte.

Et requiem non habebant. Sancti enim in vita hac corporalem repausationem non amant, sed exercitiis virtuosis semper in-

Is. vi, 2.

Ezech. i, 6.

Ibid. 18; x,

12.

sistunt, bonis laboribus variisque tribulationibus exercentur. Potissimum vero laudibus Dei invigilant, sicut ait Propheta :
Ps. xxxiii, 2. Benedicam Dominum in omni tempore, semper laus ejus in ore meo. Ideo subditur : *die ac nocte*, id est congruis horis dierum ac noctium, *clamantia* * magno cordis amore magis quam oris sonatione : *Sanctus, Sanctus, Sanctus, Dominus Deus omnipotens, qui erat ante omnia ab æterno, et qui est invariabiliter in ipso æternitatis instanti, et qui venturus est*, id est, æternaliter erit, et in judicio apparebit.
Is. vi, 3. Huic cantico consonat illud Isaïæ : Clamabant alter ad alterum : Sanctus, Sanctus, Sanctus, Dominus Deus exercituum. Itaque Ecclesia militans triumphanti se conformat Ecclesiæ in laudibus Dei, tanquam ventura ad illam, et Deum cum illa sine fine feliciter laudatura. Porro, in eo quod ter « Sanctus » profertur, supersanctissimæ Trinitatis mysterium commendatur; unitas vero divinitatis, per hoc quod singulariter subditur, « Dominus Deus omnipotens ». Denique Deus gloriosus ac adorandus, est

A absolute perfectum; in quem culpa cadere nequit, quoniam sibi ipsi est finis, et a nullo dependet. Et quo sanctior est, eo plus peccati turpitudinem detestatur ac odit.

Et quum darent illa quatuor animalia gloriam et honorem et benedictionem sedenti super thronum, viventi in sæcula sæculorum, id est, quatuor Evangelistis evangelicam legem per totum mundum disseminantibus per scripta sua, et partim per propria verba (quod faciendo exhibuerunt Deo gloriam et honorem et benedictionem seu laudem); *procidebant viginti quatuor seniores ante sedentem in throno*, id est, universi sacerdotes, prædicatores ac Patres novi Testamenti Deo se humiliter prostraverunt, *et adorabant Viventem in sæcula sæculorum*, id est Deum verum ac sempiternum, qui in se ipso intellectualiter ac superbeatissime vivit; estque vivens, et simplicissima, purissima ac nobilissima vita, quum sit ipsa veritas et sapientia; et in eo sunt idem vivere et intelligere atque diligere. Unde vita superdignissimi Dei, est suæ æternæ veritatis superdeliciosissima contemplatio, et suæ infinitæ bonitatis sempiterna, ardentissima et superdulcissima dilectio.

SERMO PRIMUS

DE NATURA ET ESSENTIA ÆTERNÆ SUPERBEATISSIMÆQUE TRINITATIS,
 ET QUALES EXIGAT CULTORES.

SANCTUS, Sanctus, Sanctus, Dominus Deus omnipotens. Apoc. iv, 8.

Quoniam hodie summæ Trinitatis solennitas agitur, aliquid de ipsa Trinitate simpliciter est dicendum. Est itaque fides catholica, quod quamvis Deus sit unus et summe simplex in suæ deitatis essentia, nihilo minus trinus est in personis, ita quod tres personæ sunt unus Deus, quia in tribus personis est una deitas, una es-

sentia, una majestas. Personæ vero ab invicem sunt distinctæ, ita quod Pater non est Filius aut Spiritus Sanctus, nec Filius est Pater aut Spiritus Sanctus, nec Spiritus Sanctus est Pater aut Filius. Hæ ergo tres personæ, videlicet Pater, et Filius, et Spiritus Sanctus, sunt consubstantiales, coæquales et coæternæ. Et Pater non est ab aliquo; Filius vero a Patre solo est, quia æternaliter genitus est a Patre. Quem-

admodum si sol ipse ab æterno fuisset, splendor ab æterno profluxisset a sole; et quamvis haberet esse originemque a sole, tamen coæternus existeret soli: sic Filius Dei habet esse suum a Patre summo per generationem æternam; nihilo minus coæternus est Patri altissimo. Insuper Spiritus Sanctus est a Patre et Filio, sicut ab uno fontali principio, in quantum Pater et Filius unum sunt, hoc est unius substantiæ ac voluntatis, et unus spirator; et sicut Filius coæternus est Patri, ita Spiritus Sanctus coæternus est Patri ac Filio. Cujus exemplum unum jam positum est de sole et ejus splendore. Possunt quoque alia multa assignari exempla: quia si ignis ab æterno fuisset, calor quoque ejus æternaliter exstitisset, et tamen ab igne fluxisset; similiter, si pes ab æterno stetisset in pulvere, vestigium pedis esset pedi coæternale, et tamen esset a pede. Denique in nobis ipsis invenimus exemplum quomodo Spiritus Sanctus possit esse a Patre et Filio, quia in anima nostra sunt mens, notitia et dilectio. Et notitia est a mente; dilectio autem est a mente et ab ejus notitia. Non enim a mente procedit dilectio nisi mediante notitia, quia incognitum non potest amari, et ex cognitione procedit affectio.

Præterea, quamvis idiotæ, rudes et simplices homines non debeant se multum occupare circa summam et incomprehensibilem Trinitatem, scrutando aut curiose cogitando quomodo tres personæ possint esse unus Deus, vel quomodo Filius generetur a Patre, aut qualiter Spiritus Sanctus procedat ab utroque, sed sufficiat eis simpliciter, firmiter atque humiliter credere quod ita sit, et quod sic credendum sit sicut docet sancta Ecclesia; nihilo minus superficialiter tangi potest ac plane aliquid de ista materia. Itaque, sicut Deus omnipotens et æternus, in propria sua natura ac deitate est simplicissimus spiritus, et ens omnino perfectum, immateriale, incorporale, invariabile; ita generatio qua Filius Dei generatur a Patre æterno,

A est generatio penitus simplex, immaterialis, invariabilis et perfecta. Idcirco Filius nunquam fuit Patre minor, junior, aut impotentior, aut insipientior; sed Pater æternus, perfectus, immensus, omnipotens summeque sapiens, immaterialis et simplex, æternaliter genuit Filium æternum, perfectum, immensum, omnipotentem summeque sapientem, immaterialem ac simplicem. Et idem tenendum est de processione Spiritus Sancti, quod ipsa sit æterna, immaterialis, perfecta, et quod B Spiritus Sanctus sit in omni perfectione, felicitate et gloria Patri Filioque coequalis, ita quod Spiritus Sanctus est verus Deus, infinitus, omnipotens, simplicissimus, summeque sapiens, adorandus, perfectus.

Postremo, de modo generationis ac processionis divinæ aliquid superficialiter jam tangendo, sciendum quod Deus Pater se ipsum intuendo ac intelligendo, intellectualiter intra se concipit ac profert verbum unum mentale de eo quod intuetur C atque intelligit. Et hoc verbum æternum, æternaliter intellectualiterque prolatum a Patre, est unigenitus Filius ejus, de quo scriptum est: In principio erat Verbum, *Joann. 1, 1.* et Verbum erat apud Deum, et Deus erat Verbum. Conformiter Pater et Filius se invicem diligendo, simul producunt et spirant amorem unum perfectum et subsistentem, qui vocatur et est Spiritus Sanctus. Hæc de superbenedicta Trinitate sint superficialiter tacta.

Deinceps, quoniam Trinitas ista altissima est tam puræ infinitæque sanctitatis, ideo vult habere cultores et ministros mundos, devotos ac virtuosos. Oportet ergo ut juxta doctrinam Apostoli, cum metu *Hebr. xii, 28.* et reverentia serviamus Domino Deo uni ac trino: quia maledictus homo qui facit *Jer. xlviii, 10.* opus Dei negligenter. Ut autem Deo taliter serviamus, oportet ut cum sanctis animilibus *Apoc. iv, 6.* simus pleni oculis, id est discreti, providi et circumspecti in omnibus, ne aliquid faciamus quod nobis a Deo aut ab Ecclesia prohibetur, nec aliquid omittamus

quod nobis a Deo aut ejus vicariis praelatis nostris præcipitur.

Postremo, ita vivamus, ut quilibet nostrum sit habens faciem hominis, rationaliter se habendo, et rectam rationem in cunctis sequendo, et pie atque humane inter proximos ambulando; sit etiam leo, virtutibus invictæ ac jugiter inhærendo, et contra diabolum, carnem ac mundum magnanimitè præliando, ut omnem superbiam, avaritiam, incontinentiam, iram, et cetera vitia vincat; sit insuper vitulus, se ipsum Deo in sacrificium offerendo, et propriam voluntatem Deo in cunctis subijciendo, ne contra divinæ legis præcepta utatur propria libertate; sit item et aquila, contemplando cœlestia et divina, atque illorum intuitu ac amore despiciendo hæc infima, carnalia et terrena. Nec requiem habeamus carnalem et immoderatam, sed Deum jugiter collaudemus. Sed, heu! multi sunt habentes faciem bestialem potius quam humanam, quia concupiscentias carnis et ceteras animæ passiones, iram, impatientiam, cupiditatem, magis quam rationem, sequuntur: quorum corda non instar aquilæ ad cœlestia eriguntur, sed tanquam porci ad terrena atque carnalia deprimuntur. Sunt etiam multi qui ad aggrendendum exercitia virtuosa cor habent leporinum, non leoninum, sed ad male agendum veloces sunt et audaces, atque (ut Salomon loquitur) absque ullo timore perpetrant mala. Sunt item quamplures qui non ad similitudinem vituli se ipsos

Eccle. viii,
11.

A offerunt Deo, mortificando passiones et vitia, sed tanquam canes protinus pro parvis causis irascuntur, indignantur, clamant, contendunt et se graviter ulciscuntur. Verum hæc omnia fugiamus, atque præactis insistamus operibus virtuosis.

Legitur de S. Augustino, quod sanctæ Trinitatis devotissimus fuit venerator et profundissimus contemplator. Unde quadam vice, mulier quædam honesta ac bona a quibusdam malitiosis hominibus injuriam passa, Augustinum accessit, ejus implorans auxilium. Quæ quum ipsum invenisset studentem, et reverenter salasset eundem, Augustinus nec eam respexit, nec quidquam ei respondit. Cogitans illa quod ob nimiam suam sanctitatem in faciem mulieris nollet respicere, propius accessit, et causam diligenter exposuit; sed Augustinus eam non adspexit, nec quidquam respondit. Idcirco illa cum magna recessit tristitia. Altero die, Augustino celebrante, et elevatione corporis Christi facta, mulier illa tunc præsens rapta in spiritu, vidit se positam ante tribunal sanctissimæ Trinitatis, ubi vidit Augustinum, facie inclinata, de summæ ac beatissimæ Trinitatis gloria attentissime ac subtilissime disputantem. Et facta est vox dicens ad eam: Quum Augustinum accessisti, ipse tam attentissime de Trinitatis gloria disputavit, quod tuam præsentiam non advertit; sed secure ad eum revertere. Quod quum illa fecisset, Augustinus eam benigne suscepit, atque salubre consilium dedit.

ENARRATIO IN EVANGELIUM

ERAT HOMO EX PHARISÆIS NICODEMUS NOMINE. Joann. iii, 1-16.

QUONIAM hodie de superbeatissima Trinitate agitur festum, recte evangelium istud nunc legitur, quia in ipso Trinitas personarum tangitur. Itaque evangelista Joannes ait:

Erat homo ex Pharisæis, id est de secta et numero Pharisæorum, *Nicodemus nomine*, qui postea fuit Christi manifestus discipulus, sepelevitque eum cum Joseph ab Arimathea, *princeps Judæorum*, id est

unus de principalibus doctoribus atque rectoribus Judaicæ plebis, quæ post mortem Josue regebatur per judices usque ad Samuelem inclusive, deinde per reges usque ad captivitatem Babylonicam, exinde per doctores et sacerdotes, præsertim per pontifices, quorum multi fuerunt Pharisæi. Verumtamen Nicodemus iste non fuit summus princeps aut pontifex Judæorum.

Hic venit ad Jesum, cujus jam miracula aliqua vidit, et documenta audivit; et ex utroque perpendit aliquid magnæ excellentiæ esse in Jesu, cujus tantam potestatem ac sapientiam, tantam quoque justitiam imperterritamque constantiam fuit expertus, ita ut neminem metuens, et pro Deo zelans, omnes vendentes in templo ejiceret, suamque doctrinam confirmaret miraculis. Hinc Nicodemus, zelo agnoscendæ veritatis ac spiritualis profectus desiderio inflammatus, venit ad Jesum ut plenius doceretur ab eo. Venitque *nocte*. Vel quia aliorum Pharisæorum ac sacerdotum offensam incurrere verebatur (quemadmodum Gedeon nocte confregit statuam Baal, proprios timens concives): et hic timor fuit imperfectionis, quem perfecta dilectio mittit foras. Vel quia, quum esset nominatus doctor ac magister in Israel, alicqualiter verecundabatur se submittere publice informationibus Jesu, qui sciebatur litteras non didicisse: et hoc fuisset alicujus elationis. Vel, ut eo liberius, quo secretius loqueretur cum Jesu. Convenit quoque tempus mysterio. Nam quia in tenebris mentis quodammodo fuit, imperfecte credendo in Jesum, et spiritualium mysteriorum notitiam non habendo, recte asseritur nocte venisse: quemadmodum Maria Magdalene venit ad monumentum quum adhuc tenebræ essent, non credens Christum resurrexisse.

Et dixit ei: Rabbi, scimus quia a Deo venisti, id est, divinitus missus es, *magister* veritatis. De quo in Osee scriptum est: Tempus requirendi Dominum, quum venerit qui docebit vos justitiam; et apud

A Joelem, Exsultate in Domino Deo vestro, quia dedit vobis doctorem justitiæ. Deinde causa hujus scientiæ subditur. *Nemo enim potest hæc signa facere quæ tu facis, nisi fuerit Deus cum eo*, ei cooperando, et gratiam ac virtutem faciendi miracula ei præstando. Solus quippe omnipotens Deus facit miracula proprie dicta tanquam principalis effector; servi autem ipsius faciunt ea ministerialiter ac instrumentaliter solum: juxta illud in Psalmo, Benedictus Dominus Deus Israel, qui facit mirabilia solus.

Porro miraculum proprie dictum, est effectus totam virtutem et legem naturæ creatæ excedens. Et talia erant aliqua Christi miracula, ut illuminatio cæci nati, suscitatio mortuorum, eclipsis solis in plenilunio tempore passionis. Et ista miracula sunt certa ac sufficientia argumenta, quod actor eorum sit vera docens, et divina virtute agens, quum Deus non sit confirmator aut testis falsitatis. Hinc ad discipulos suos dixit Christus: Si opera non fecissem in eis quæ nullus alius fecit, peccatum non haberent.

Porro aliqua miracula, communiter loquendo de miraculis, fieri possunt cooperatione diaboli, sicut de Antichristo dicit Apostolus: Cujus adventus erit secundum operationem Satanæ, in omni seductione, in signis et prodigiis. In Apocalypsi quoque ait Joannes: Sunt enim spiritus dæmoniorum facientes signa. Quamvis autem talia sint miracula quantum ad modum agendi, non tamen excedunt facultatem totius naturæ creatæ, sed per occultas naturalium rerum virtutes aguntur: quemadmodum magi seu necromantici Pharaonis, Jannes et Mambres, projecерunt virgas suas, convertebanturque protinus, ut dicitur, in dracones; produserunt etiam ranas, et maleficiis suis converterunt aquas in sanguinem, ut legitur in Exodo. Talia vero miracula etiam multa fecit Christus, convertendo aquam in vinum, quod facit natura paulatim in vitibus; et illuminando cæcos, quod interdum fit arte medicinæ. Et ista per se

Judic. vi, 27.

1 Joann. iv, 18.

Joann. vii, 15.

Ibid. xx, 1.

Osee x, 12.

Joel ii, 23.

Ps. lxxi, 18.

Joann. xv, 24.

II Thess. ii, 9, 10.

Apoc. xvi, 14.

Exod. vii, 12, 22; viii, 7.

non sunt sufficientia argumenta fidei ac specialis cooperationis divinæ, quum sint bonis malisque communia. Verumtamen eo modo quo a Christo et ejus ministris peracta sunt, sunt utique sufficientia fidei argumenta. Christus enim ea fecit imperialiter, et in instanti. Fideles quoque faciunt ea cum invocatione nominis Dei, cum exsecratione omnis artis magicæ et communionis diaboli.

Præterea Deus interdum facit signa per reprobos et injustos : quæ quamvis non probent quod operatores eorum sint boni et Deo accepti ; probant tamen quod vera sit fides qua invocant Deum, et vera doctrina ad cujus confirmationem efficit Deus hujusmodi signa. Propter quod ait Salvator : Multi dicent mihi in die illa, puta judicii : Domine, Domine, nonne in nomine tuo prophetavimus, et in nomine tuo dæmonia ejecimus, et virtutes multas, id est multa signa potentia, fecimus? Et tunc confitebor illis : Quia nunquam novi vos.

Interea, quoniam Christus novit intentionem et desiderium Nicodemi, qui venit ut instrueretur, idcirco incepit eum Christus instruere. Et primo instruxit eum de primo novæ legis sacramento maxime necessario, videlicet de Baptismo, quod est spiritualis regeneratio et porta vitæ. *Respondit Jesus, et dixit ei : Amen, amen dico tibi.* Repetitio, confirmationis indicium est et provocatio advertentiæ diligentis. *Nisi quis natus fuerit denuo*, id est regeneratus, seu per spiritualem regenerationem adeptus supernaturale esse gratiæ et caritatis ac fidei, *non potest videre oculis cordis, clare, per speciem, regnum Dei*, id est patriam Beatorum, seu Deum regnantem in cœlis. Nempe quum ultimus finis hominis, seu æterna felicitas, quæ est visio Dei per speciem, sit supernaturalis, nullus potest ad eam pertingere per naturalia pura, sed oportet naturam juvari ac perfici per caritatem, fidem, ac cetera dona Spiritus Sancti. Denique, sicut homo dicitur primo nasci, quando

A per generationem carnalem ac naturalem producit in esse specifico ; sic dicitur nasci denuo, quando per operationem divinam acquirit esse gratiæ gratum facientis, quod est esse deiforme, supernaturale et meritorium : quoniam ut divinus Dionysius contestatur, Sicut intellectualis creatura ponitur in esse specifico per formam naturalem, per quam apta et potens est ad naturales motus et actus ; ita per gratiam gratificantem ponitur in esse supernaturali, spirituali, divino, per quod redditur idonea ad agendum opera meritoria vitæ æternæ.

Si sic accipimus, Nasci denuo, tunc nunquam potuit quis salvari, nisi rursus nascendo. Omnes namque nati sunt filii iræ, secundum Apostolum, contrahendo originale peccatum secundum communem legem : sicque oportuit eos intus renasci, suscipiendo gratiam gratum facientem reformatem, et esse spirituale supernaturale præstantem. Verum, quia Salvator ad litteram loquitur de regeneratione Baptismatis, ut patet in subditis, idcirco, quod de regeneratione ista jam dicit, intelligendum est pro novi tempore Testamenti. Temporibus vero legis naturæ et legis scriptæ, fuerunt alia contra originale peccatum remedia, scilicet circumcisio tempore legis Mosaicæ, et fides parentum tempore legis naturæ, ut Hugo de S. Victore libro de Sacramentis plenius docet.

Dicit ad eum Nicodemus, arguens contra verba Christi, quæ male atque carnaliter intellexit. Idcirco nec intellexit, quum verum sit intellectus objectum ; Nicodemus enim in lege non fuit assuetus in spiritualibus modis loquendi. *Quomodo potest homo nasci quum sit*, id est, quando est, *senex* ? Christus non dixit simpliciter, Nisi quis natus fuerit ; sed, Nisi quis natus fuerit denuo. Verum, quia renasci includit nasci, et Nicodemus non scivit nisi unam nativitatem, ideo sic resumit : Quomodo potest homo nasci quum sit senex ? Quod non est intelligendum quasi secundum intentionem Nicodemi infans aut

De Eccl.
hier. c. ii.

Ephes. ii. 3.

Matth. vii,
22, 23.

juvenis possit renasci; sed quoniam de se ipso fuit sollicitus, et ipse jam vetulus fuit, idcirco sic fatur: Quomodo potest homo nasci quum sit senex? Et probat quod non possit. *Numquid potest in ventrem matris suæ iterato introire et renasci?* præsertim quum matres communiter mortuæ sint tempore senectutis natum.

Respondit Jesus, solvendo instantiam Nicodemi, et exponendo verba quæ dixit: *Amen, amen dico tibi, nisi quis renatus fuerit ex aqua et Spiritu Sancto*, id est fonte Baptismatis regeneratus per virtutem et gratiam Spiritus Sancti. Aqua enim est materiale elementum corpus lavans, et dispositive regenerans mediante forma verborum sacramenti Baptismatis. Propter quod loquitur Augustinus: Detrahe verbum, quid est aqua nisi aqua? Porro Spiritus Sanctus intus mentem purificat et efficienter regenerat, gratiam influendo, quæ est res sacramenti et causa formalis intrinseca hujus regenerationis. *Non potest introire in regnum Dei*, id est in triumphantem Ecclesiam, et salvari, dummodo adsit facultas accipiendi sacramentum Baptismatis: quæ si desit, sufficit baptismus Flaminis, hoc est interior mundatio Spiritus Sancti, et baptismus sanguinis, puta martyrium, cum desiderio baptismi fluminis. Sed quum Baptismus detur in nomine summæ et inseparabilis Trinitatis, a qua est Baptismi effectus, videlicet gratia sacramentalis (quemadmodum præcepit Christus Apostolis: Euntes, docete omnes gentes, baptizantes eas in nomine Patris et Filii et Spiritus Sancti), cur potius ait nunc, Nisi quis renatus fuerit ex aqua et Spiritu, quam, Ex aqua et Patre seu Filio? Dicendum, quod Baptismus est effectus præcipuæ liberalitatis ac pietatis divinæ. Liberalitas autem et pietas appropriantur Spiritui Sancto, quemadmodum amor et bonitas.

Deinceps Christus ostendit ordinem spiritualis regenerationis, eamque a carnali generatione distinguit. *Quod natum est ex*

A carne, caro est; et quod natum est ex spiritu, spiritus est. Verba hæc difficilia sunt et profunda, multipliciterque intelligi queunt. Primo sic: « Quod natum est ex carne », id est corpus filii carnalis propagatum ac natum ex semine patris, « caro est; et quod natum est ex spiritu », id est anima rationalis creata a Deo, qui spiritus est, id est simplex ac spiritualis substantia, « spiritus est », hoc est spiritualis immaterialisque forma. Quod non est intelligendum quasi corporalia non sint immediate creata a Deo, quum scriptum sit: In principio creavit Deus cælum et terram. Sed in homine sunt duæ partes essentielles, quarum una est caro, a patre carnali contracta, alia est spiritus, a patre spirituali, scilicet Deo, producta. Juxta hunc sensum dicitur ad Hebræos: Patres carnis nostræ habuimus eruditores, et reverebamur eos: non multo magis obtemperabimus Patri spirituum, et vivemus? — Secundo sic: « Quod natum est ex carne », id est proles genita a carnali parente, « caro est », id est res carnalis, non habens nisi esse carnale et naturale, virtute generationis carnalis: idcirco ut talis, non potest salvari. Sic in Genesi loquitur Deus: Non permanebit spiritus meus in homine in æternum, quia caro est. « Et quod natum est ex spiritu », id est, quod spiritualiter regeneratum est in Baptismo, « spiritus est », hoc est, spiritualis homo effectus est, utpote in spirituali esse gratiæ constitutus, et Deo per fidem ac caritatem unitus, cum quo, secundum Apostolum, unus est spiritus. Ex quibus constat, quod generatio ista non est impossibilis, sed necessaria ad salutem, atque a carnali generatione distincta. De qua ait Joannes in prima sua Canonica: Omne quod natum est ex Deo, vincit mundum. Hinc subdit Salvator:

Non mireris, o Nicodeme, eo modo quo nunc miraris, videlicet admiratione incredulitatis, vel ex malo intellectu procedentis, vel animum opprimentis ac tædio afficientis. Sic enim mirabatur Nicode-

Joann. iv, 24.

Gen. i, 1.

Hebr. xii, 9.

Gen. vi, 3.

1 Cor. vi, 17.

1 Joann. v, 4.

mus, quasi verba Christi impossibilitatem A includerent. Potest tamen de Christi doctrina haberi miratio ordinata, quum dicat Propheta : Mirabilia testimonia tua, Domine : ideo scrutata est ea anima mea. Itaque ne mireris *quia dixi tibi : Oportet vos, necessitate non absoluta, sed conditionata, videlicet, si debeatis salvari, nasci denuo : juxta sensum præhabitum.*

Deinde Christus ostendit ordinem spiritualis regenerationis per simile. *Spiritus*, puta Spiritus Sanctus, *ubi vult spirat*, id est, potestative ac libere gratiam præstat B cui voluerit, sicut fatetur Apostolus : Hæc omnia (inquiens) operatur unus atque idem Spiritus, dividens singulis prout vult. Deus namque operatur in creaturis, non necessitate naturæ, sed liberrima voluntate, secundum illud ad Ephesios : Omnia operatur secundum propositum voluntatis suæ. *Et vocem ejus audis*, id est verba sacræ Scripturæ a Spiritu Sancto revelatæ. Vel, « vocem ejus », id est allocutionem internam, « audis », juxta id Psalmistæ : Audiam quid loquatur in me Dominus Deus. Est enim auditus interior, quo divinus instinctus percipitur, dum sentit se homo interius tangi, doceri, accendi, resolvi, rapi et absorberi. Unde per Osee Dominus protestatur : Ducam eam in solitudinem, et loquar ad cor ejus. Nicodemus quoque non venisset ad Jesum, nisi hanc vocem Spiritus Sancti internam audisset. *Sed non scis unde veniat Spiritus Sanctus*, id est, quomodo mentem ingreditur non percipis, *aut quo vadat*, id est, qualiter recedat ignoras, sicut in libro D Job habetur : Si venerit ad me, non videbo eum ; et si recesserit a me, non intelligam. Imo nullus viator scit certitudinaliter absque revelatione, an Spiritus Sanctus sit in ipso per gratiam gratum facientem, quia si sciret hoc, sciret se dignum amore. Ideo, quantum ad istud, Spiritus Sanctus imperceptibiliter venit, imperceptibiliterque recedit. Vel sic : « Vocem ejus audis, sed non scis unde veniat » vox ista, « aut quo vadat » ipsa, id est, tam principium

hujus vocis, quod est Spiritus Sanctus. quam terminus ejus, qui est æterna felicitas, in quam tendit Scriptura allocutioque interna, ignota sunt tibi, quoniam sola fide tenentur, nec possunt in hac vita secundum essentiam sciri, quamvis vox ista percipiatur.

Sic est omnis qui natus est ex spiritu : id est, in homine spiritualiter regenerato est aliquid scitum et manifestum, utpote ipsa persona secundum se ; aliquid quoque non scitum, quoniam intus invisibiliter B reformatur, et de carnali ac perduto, spiritualis et filius adoptivus efficitur imperceptibili gratiæ infusione. Quod enim homo taliter in Baptismo melioratur, sola fide cognoscimus. Vel sic : « Sic est omnis qui natus est ex spiritu » : id est, in regeneratione hominis talis, est aliquid evidens, scilicet aqua et forma verborum ; et aliquid abditum, scilicet principium effectivum regenerationis, quod est Spiritus Sanctus ; et finis regenerationis, qui est beatitudo æterna.

C Istæ expositiones procedunt secundum intentionem Augustini. Chrysostomus vero exponit de vento, ita quod secundum eum, Christus inducit exemplum sensibile ad intelligentiam prædictorum ; ut sit sensus : « Spiritus », id est ventus (de quo fertur in Psalmo : Flabit spiritus ejus, et fluent aquæ), « ubi vult », id est, quo inclinatur, « spirat », id est, flat ; « et vocem », id est sonum, « ejus audis, sed non scis unde veniat, aut quo vadat », id est, ubi flare incipiat, aut desistat. Sed prima D expositio aptior reputatur. Primo et maxime, quoniam Christus hoc loco frequenter per spiritum, intellexit Spiritum Sanctum, vel spiritualem essentiam. Ideo non apparet quod nunc in eodem loco, per spiritum, intelligat ventum. Secundo, quoniam vento non competit proprie voluntas. Tertio, quia nec vox proprie vento potest competere, quum ventus sit res inanimata. Quarto, quoniam scimus quod ventus venit ab aquilone, vel austro, et recte procedit. Verumtamen tria argumenta hæc

Ps. cxviii,
129.

I Cor. xii,
11.

Ephes. i, 5,
11.

Ps. lxxxiv,
9.

Osee ii, 14.

Job ix, 11.

Ps. cxlvii,
18.

solvi possent, quia Scriptura frequenter A
adscribit voluntatem rebus inanimatis, ut
Josue iv, 6. quum dicitur in libro Josue : Quid sibi
volunt lapides isti? Similiter vocem, ut
I Cor. xiv, 7. quum ad Corinthios dicit Apostolus : Quæ
sine anima sunt vocem dantia. Item nesci-
mus determinatum principium ubi inci-
pit, certumque finem ubi desinit ventus,
quamvis sciamus in generali quod ab ali-
qua parte hujus vel illius plagæ terræ
incipiat.

Respondit Nicodemus, et dixit ei : Quo-
modo possunt hæc quæ de spirituali re-
generatione et libera Spiritus spiratione
disseruisti, *feri*, id est taliter se habe-
re? Nicodemus in litterali sensu legis ac
Prophetarum instructus ac usitatus, ad
spiritualem ac mysticum intellectum faci-
liter erigi non valebat : quoniam usus est
velut altera natura. Ideo satis audacter in-
terrogat quomodo queant hæc fieri.

Christus vero cordium cognitor, cernens
legis doctorem de suo magisterio aliquali-
ter tumidum, ad humilitatem eum reducit,
quatenus instrui mereatur. Quemadmodum C
enim superbia excæcationem diabolicam,
ita humilitas illuminationem meretur an-
gelicam ac divinam. Itaque *respondit Je-*
sus Nicodemo, et dixit ei : Tu es magister
in Israel, id est magister Judæorum, *et*
hæc, quæ de Baptismo locutus sum, *igno-*
ras? Quæ tamen in libris Moysis ac Pro-
phetarum figuraliter ac litteraliter descri-
buntur : ideo, quum sis legis doctor, debes
hæc scire, vel saltem faciliter intelligere.
Doctoris quippe sacræ Scripturæ est ejus
mysteria et figuras ac difficilia intelligere D
loca. Baptismus autem Christi, per trans-
itum maris Rubri et per ablutiones legales

Ibid. x, 2. præfigurabatur, dicente Apostolo : Omnes
in Moyse baptizati sunt in nube et in ma-
ri. Prophetæ quoque ad litteram locuti
sunt de Christi Baptismate, ut quum dici-
tur per Zachariam : In die illa erit fons

Zach. xiii, 1. patens domui David et habitantibus Jeru-
salem, in ablutionem peccatoris. Hinc apud

Ezech. xlvii, 1. Ezechielem multa dicuntur de aquis re-
dundantibus templi, quæ de aquis expo-

nuntur Baptismi. Quod ergo ait Salvator,
Tu es magister, etc., non insultando, sed
caritative corripiendo ac admonendo, eum-
que humiliando, locutus est.

Deinde Christus ostendit quam certa et
vera sit sua doctrina. *Amen, amen dico*
tibi, quia quod scimus nos rex Messias,
Filius Dei, universorumque Dominus, *lo-*
quimur de evangelicæ legis sacramentis
ac documentis ; *et quod vidimus* oculo in-
teriori, hoc est, certissime novimus, *testa-*
mur, hoc est, firmiter affirmamus ac præ-
dicamus de pertinentibus ad salutem. Hæc
omnia Christus cognovit non solum scien-
tia increata, secundum quod Deus, sed et
creata scientia, in quantum homo. *Et te-*
stimonium nostrum non accipitis, hoc est,
verbis prædicationis nostræ non creditis.
Quamvis etenim aliqui crediderunt illi, ta-
men comparatione incredulorum fuerunt
perpauci.

Si terrena dixi vobis, et non creditis :
quomodo si dixero vobis cœlestia, crede-
tis? Quæ sunt ista terrena quæ Christus
dixit Nicodemo atque Judæis? Secundum
Augustinum et Bedam, ista terrena non
sunt aliqua dicta in isto capitulo, sed quod
ante dixit Judæis : Solvite templum hoc, *Joann.* ii,
et in tribus diebus excitabo illud. Hoc 19, 21.
quippe protulit de proprio corpore adhuc
corruptibili, terreno et mixto. Tanquam
dicat : Si non creditis quod possim pro-
prium corpus divina virtute suscitare a
morte, quomodo credetis quod homines
valeam ex aqua et Spiritu Sancto regene-
rare, et animas spiritualiter mortuas per
gratiæ infusionem vivificare? — Alii refe-
runt ad Baptismum, qui dici potest terre-
nus, quoniam exhibetur in aqua, sub sen-
sibili forma verborum. Itaque, Si mihi de
his terrenis loquenti non creditis (quod
tamen Christus non dixit de Nicodemo,
sed de Judæis incredulis), quomodo si di-
xero vobis cœlestia, de invisibilibus Dei,
de unitate Trinitatis, et trinitate in divi-
nis, de emanatione divinarum Personarum
ad intra, de immediata visione divinæ es-
sentiae a Beatis, de hierarchiis, aliisque se-

II Cor. x, 5.

cretis cœlestibus, de quibus parum habetur in lege Moysis et Prophetis, credetis? quasi dicat: Difficulter aut nequaquam credetis, quum sint incomprehensibilia et supernaturaliora prædictis terrenis. Necesse est ergo proprium intellectum auctoritati Christi subicere, et his divinis quæ rationem transcendunt, fidem præbere, præsertim quum Deus per sufficientissima argumenta ostenderit Jesum esse Christum Filium Dei. Propterea dicit Apostolus secunda ad Corinthios: In captivitate redigentes omnem intellectum in obsequium Christi.

Verumtamen, quoniam quædam cœlestia et secreta ad Christum pertinentia, omni fidei sunt agnoscenda, videlicet unitas personæ Dei et humanitatis in Christo, et passio Christi, et amor Dei ad homines; ideirco Christus de his instruit Nicodemum, et sub nomine ejus universam Ecclesiam.

Et nemo ascendit in cœlum empyreum, quod est locus et mansio Beatorum, sicut ecclesia dicitur locus orationis sive orantium (nihilominus, sicut fideles orare possunt extra materiale ecclesiam, sic Beati Deum clare conspiciunt ubicumque exstiterint), *nisi qui descendit de cœlo*, non locum mutando, sed humanam naturam assumendo, scilicet *Filius hominis, qui est in cœlo*. Verba hæc aquilina sicut in stilo simplicia sunt, ita in sensu profundissima ac difficillima. Sed pensemus quando Christus hæc verba protulit: utique ante passionem suam, quando in Jerusalem loquebatur cum Nicodemo. Porro quod nullus hominum electorum introierit regnum cœlorum ante Christi passionem, agnoscimus. Itaque, quod ait, « nemo ascendit in cœlum », verum est pro tempore illo, sumendo verbum « ascendit » sive ut est præteriti temporis, sive præsentis.

Sed tunc quæstio oritur, qualiter verba sequentia verificentur, « nisi Filius hominis ». Ascendere quippe competit Christo ratione humanitatis assumptæ, secundum

A quam tunc nondum ascendit. Non ergo excepisset se ipsum, si præfato modo sumpsisset hoc verbum, « ascendit ». Quæstio ista dupliciter solvitur. Primo, ut solus Filius hominis ascendisse dicatur, quoniam solus propria potestate et proprio jure ac merito ascendebat; alii vero virtute et merito Christi, ejus passione fuerunt ab originalis peccati reatu soluti. Secundo, ut nomine Christi non solum intelligatur Christi persona, sed et mysticum ejus corpus, puta Ecclesia patrum qui detinebantur in limbo, ceterique electi omnino mundati, de quibus prædixit: Iterum veniam, et assumam vos ad me ipsum; et rursus: Pater, volo ut ubi sum ego, et illi sint mecum, ut videant claritatem meam. Juxta hunc sensum ait: Ego sum ostium; omnes quotquot venerunt, fures sunt et latrones.

Joann. xiv,

3.

Ibid. xvii,

24.

Ibid. x. 7-9.

Porro, quod subditur, « Filius hominis, qui est in cœlo », majorem habet difficultatem. Si enim Filius hominis descendit de cœlo, videtur ante incarnationem fuisse in cœlo. Sed Filius hominis non est nisi homo: ergo homo ante incarnationem fuisset in cœlo. Item, si sic est, videtur quod Christus detulit secum corpus de cœlo. Insuper, quando Christus verba hæc protulit, stabat cum Nicodemo in terra: quomodo ergo pro tunc Filius hominis fuit in cœlo?

Et respondendum, quod Christus hæc dixit, ad insinuandum unitatem personæ utriusque naturæ in ipso. Tanta namque est unio divinæ naturæ atque humanæ in Christo, ut humana Deo, et divina homini vere conveniant. Sed pensandum quid propter quid dicatur. Dicendum ergo, quod Christus seu Filius hominis, fuit ante incarnationem in cœlo, secundum naturam divinam; descendit quoque de cœlo, non corpus secum portando, sed quia eadem est persona Dei hominisque in Christo. In talibus quippe locutionibus, Jesus, seu Christus, vel Filius hominis, semper supponit personam divinam, seu increatam hypostasim, utpote Verbum æternum. Ideo

istæ sunt veræ : Jesus est æternus, immensus, omnia implens, omnipotens ; Christus est verus Deus, immortalis, altissimus ; Deus est passus, occisus, sepultus. Causa veritatis harum atque similium locutionum, est unitas personalis præfata, et suppositio increatæ personæ. Idcirco de puero qui natus est nobis, et filio qui datus est nobis, Isaias prædixit, quod vocaretur Deus, Fortis, Pater futuri sæculi, etc. Unde de puero Jesu existente in utero, posito in præsepio, uberaque sugente, verum fuit dicere : Iste puer creavit cælum et terram, et est ubique per essentiam, præsentiam atque potentiam. Hinc Judas apostolus in sua Canonica : Jesus (inquit) populum suum salvans de Ægypto, secundo eos qui non crediderunt, perdidit.

Is. ix, 6.

Judæ 5.

Num. xxi, 4-8.

Postquam Christus Nicodemo suæ divinitatis tetigit majestatem, mox eidem de suæ passionis humilitate prædixit. *Et sicut Moyses exaltavit*, id est, in loco alto suspendit, *serpentem* æneum, id est factum de ære, *in deserto*, quod fuit inter Ægyptum et terram promissionis. Ut enim in Numeris describitur, quum tædere cœpisset populum Israel itineris ac laboris, murmurantesque contra Deum ac Moysen dixissent, Anima nostra nauseat super cibo isto levissimo ; misit Dominus ignitos ser-

pentes in populum. A quibus quum multi fuissent occisi, pluresque læsi, venerunt ad Moysen, veniam deprecantes. Orante itaque Moyse pro illis, Dominus ei præcepit : Fac serpentem æneum, et pone eum pro signo ; qui percussus adspexerit eum, vivet. *Ita exaltari*, id est in cruce levari ac figi, *oportet Filium hominis*, id est Christum, necessitate conditionata, videlicet, si liberari debet genus humanum, et quia Deus ita præordinavit, atque ut implerentur Scripturæ.

Deinde finalis causa passionis Christi subjungitur. *Ut omnis qui credit in eum* fide formata, hoc est per caritatem ornata ac operante tempore opportuno. Caritas namque est forma, decor atque perfectio fidei : propterea fides caritati conjuncta, vocatur formata ; et si careat caritate, vocatur informis. *Non pereat*, id est, æternaliter non damnetur, sicut increduli et perversi. Et quia non sufficit non damnari, subjungitur : *sed habeat vitam æternam*, id est, cœlestem beatitudinem consequatur, et habeat eam nunc in merito et in spe, postmodum in præmiò et in re.

Postremo, quomodo serpens ille æneus fuit figura Christi, et cur passio Christi dicatur exaltatio ejus, in sermone dicetur.

SERMO SECUNDUS

DE INFINITA FELICITATE ET GLORIA SUPERDIGNISSIMÆ TRINITATIS, ET DE FIDELI AC HUMILI CONTEMPLATIONE IPSIUS.

OMNIPOTENS Dominus stabilis est in gloria sua. Eccli. xlii, 17.

Joann. xvii, 3.

Summus et adorandus Deus, non frustra, sed ad sui ipsius claram ac beatificam contemplationem nos condidit, sicut Filius Dei loquitur Patri æterno : Hæc est vita æterna, ut cognoscant te verum Deum et quem misisti Jesum Christum. Et Propheta

alloquens Deum : Memorare (inquit) quæ mea substantia : numquid enim vane constituisti omnes filios hominum ? Imo Deus, cujus sapientiæ non est numerus, nil inaniter aut fortuito egit, sed propter certum finem cuncta creavit, quemadmodum in Job habetur : Universorum finem ipse considerat. Finis ergo nostræ creationis,

Ps. lxxxviii, 48.

Ps. cxlvi, 5.

Job xxviii, 3.

hæc est beatitudo ad quam conditi sumus, A
clare et fruitive intueri vitam, felicitatem
et gloriam Domini Dei nostri. Et quamvis
non solum Christiani, sed et Judæi ac Sar-
raceni fatentur et sciunt esse unum solum
summum et verum Deum, omnium crea-
torem; soli tamen Christiani fide cogno-
scunt fideliterque fatentur, hunc Deum
non tantum esse in essentia unum ac sim-
plicem, sed in personis etiam trinum.
Quum ergo beatitudo nostra completa,
quam certissime credimus electis dandam
in patria, sit supergloriosæ Trinitatis in-
tuitio clara, tanto in hac vita perfectiores
consistimus, quanto plus ad illam beatitu-
dinem modo appropinquamus. Ergo et
perfectio nostra in hac vita præsentī con-
sistit in hoc, ut superdignissimam Trinita-
tem nunc, quantum huic statui est possi-
bile, sinceriter, amorose atque stabiliter
contemplemur. Expediit ergo et prorsus
utilissimum est jam scire, prout in vita
hac sciri potest, quæ sit vita, beatitudo et
gloria Domini Dei nostri, qui est unus ac
trinus, seu superfelicissimæ Trinitatis. Ve-
rum, quoniam ista, ut frequenter testatus
sum, pro communi et simplici populo
conscribuntur, idcirco de ista materia nunc
non nisi plane et simpliciter, et velut su-
perficialiter loquar.

Id ergo in primis sciendum, quod quum
Deus sit ens in se ipso infinite perfectum,
nulla indiget creatura, sed sibi in se et
per se omnino sufficiens est. Ideo ait Psal-
mista: Dixi Domino, Deus meus es tu, quo-
niam bonorum meorum non eges. In libro
Job quoque asseritur: Si peccaveris, quid D
Deo nocebis? Porro si bene egeris, quid
donabis ei? Hinc beatitudo, sanctitas et
perfectio Dei, est se ipsum clarissime
æternaliterque inspicere, atque se ipsum
ardentissime incessabiliterque diligere. Et
hoc etiam philosophi cognoverunt. Sed
quoniam Deus est trinus secundum invio-
labilem christianæ sapientiæ veritatem,
beatitudo, vita et gloria summæ et super-
sanctissimæ Trinitatis, est quod unaquæ-
que divina et increata persona non solum

se ipsam, sed et aliam quamlibet clarissi-
me inspicit infiniteque diligit. Itaque Pa-
ter æternus intuetur unigenitum Filium
suum cum infinita claritate et jucunditate,
et diligit eum superardentissimo ac infi-
nito amore; habet etiam Pater superdulcis-
simam complacentiam in unigenito Filio
suo, imo complacentiam penitus infini-
tam. Sed et Filius Patris æterni, tam clare
et hilariter inspicit, atque tam fervide di-
ligit Patrem, ut Pater ipsum; infinitæ
quoque suavitatis complacentiam habet in
B Patre. Denique Pater et Filius non minus
diligunt Spiritum Sanctum quam se ipsos,
complacentiamque immensam habent in
ipso, quemadmodum in se invicem et in
semetipsis: ideo Pater et Filius cum infini-
to gaudio intuentur et superferventissime
diligunt Spiritum Sanctum, ac deliciosissi-
mam complacentiam habent in ipso. Nec
dubium quin Spiritus Sanctus clarissime
intueatur, jucundissime ac superardentis-
sime diligat Patrem et Filium, infinitam
etiam complacentiam habeat in eisdem.

C Itaque, hanc superaltissimæ Trinitatis
mutuam et æternam, clarissimam, ferven-
tissimam et superdelectabilissimam intui-
tionem, dilectionem et complacentiam, fi-
deliter, sincere, affectuose ac fixe, quantum
jam fieri potest, contemplari, est futuræ
felicitatis inchoatio, prælibatio seu præ-
gustatio quædam, atque perfectio vitæ
præsentis. Præterea, istud etiam ab idiotis
et simplicibus dulciter, affectuose et hu-
militer potest jam contemplari: sic ta-
men, ut super omnia sensibilia ac mate-
rialia ac circumscriptibilia seu finita se
elevant; et sicut Deum in essentia unum
apprehendunt tanquam ens simplex, pu-
rum, perfectum, immateriale et infinitum,
vel, ut paucioribus verbis utar, tanquam
ens infinite perfectum, sic quamlibet di-
vinam apprehendant personam tanquam
ens vere simpliciter perfectum et infi-
nitum.

Quo cognito, considerandum est, quod
quanto rationalis creatura Deum sincerius
per donum sapientiæ contemplatur, tanto

Ps. xv, 2.

Job xxxv,
6, 7.

ferventius diligit eum; quanto etiam ferventius amat eum, tanto majorem complacentiam ac delectationem habet in eo. Quum itaque quælibet divina et increata persona cum infinita limpiditate et perfectione cognoscat quamlibet aliam divinam personam, videlicet Pater Filium, et Filius Patrem, Pater quoque et Filius Spiritum Sanctum; et Spiritus Sanctus Patrem ac Filium: constat quod Pater infinita dilectione diligit Filium, complacentiamque immensam habeat in eodem, et econtra; similiter Pater et Filius infinite diligunt Spiritum Sanctum, et complacentiam seu delectationem infinitam habent in illo. Insuper, quum quælibet divina persona sit infinitæ pulchritudinis, perfectionis et bonitatis, constat quod unaquæque diligit aliam cum infinita claritate, immenso caritatis ardore, interminatoque gaudio. Amplius, si rationalis creatura fervide diligit Deum propter beneficia ejus atque promissa, quam infinite ac ferventissime Patrem diligit Filius, et Patrem ac Filium Spiritus Sanctus, quum Pater dederit Filio totam suam divinitatem, felicitatem et gloriam, similiter Pater et Filius Spiritui Sancto? In horum contemplatione habere se debet homo moderate ac sobrie. Porro, hanc summæ Trinitatis vitam, felicitatem et gloriam clare, per speciem seu faciem ad faciem intueri, est omnium felicitas electorum. Et quanto nunc puriora et ferventiora in caritate fuerint corda nostra, tanto cum ampliori claritate et exuberantiori jucunditate intuebimur supersublimem et superbenedictam Trinitatem, omnemque præactam ejus felicitatem et gloriam, mutuam ejus inspectionem, dilectionem, complacentiam, fruitionem, emanationem et communicationem ipsius ad intra.

Porro, quamvis ea quæ absolute conveniunt Deo, sint toti Trinitati communia, nihilo minus Patri appropriatur potentia, Filio sapientia, Spiritui Sancto bonitas. Cujus appropriationis duplex est ratio: Prima, ad removendum errorem. Videmus namque quod in hominibus solet patribus

A deesse potentia propter eorum senectutem, filiis sapientia propter juventutem, spiritibus pietas seu bonitas propter eorum animositatem: ideo, ne sic esse credatur in Deo, adscribitur Patri potentia, Filio sapientia, bonitas Spiritui Sancto. Alia ratio est, quoniam Pater a nullo est, et ipse est omnis boni fontale principium, a quo omnis virtus profluxit: idcirco appropriatur ei potentia; Filio autem sapientia, quia ab intellectu Patris emanat, quum sit verbum mentis paternæ; ac Spiritui Sancto bonitas, quoniam a benevolentissima voluntate Patris Filiique procedit.

Porro omne peccatum quod agimus sive incidimus, oritur aut ex infirmitate, id est passione, ut subita ira seu concupiscentia aut timore, etc.; aut ex ignorantia; aut ex certa malitia seu deliberatione, et habitu vitioso. Unde peccata quæ ex infirmitate contingunt, dicuntur specialiter contra Patrem; quæ autem ex ignorantia, contra Filium; quæ ex certa malitia, contra Spiritum Sanctum. Ut ergo omnia hæc vitemus peccata, invocemus fideliter et instanter adjutorium confortationis divinæ contra infirmitatem, illuminationem supernam contra ignorantiam, suavitatem et caritatem Spiritus Sancti contra interiorem malitiam. Siquidem infirmitas nostra est, quod ratio nostra a passionibus animæ, hoc est a sensualitatis motibus et affectionibus, puta ab ira, impatientia, concupiscentia, timore, cupiditate, etc., superatur; ignorantia nostra est, quod ea quæ pertinent ad salutem nescimus; malitia nostra, quod ex habitu vitioso seu consuetudine prava atque scienter peccamus. Ideo indigemus virtutibus moralibus, scilicet mansuetudine, patientia, continentia, fortitudine, liberalitate, contra passiones corroborari; prudentia quoque et illuminatione superna contra ignorantiam edoceri; atque benignitate Spiritus Sancti contra malitiam adjuvari, quatenus taliter reformati, adjuti ac purificati, ad summæ Trinitatis contemplationem præfatam simus dispositi.

Itaque contra passiones et vitia infatigabiliter reluctemur, et sensualitatem nostram rationi subdamus; informationem quoque petamus a Deo, ab angelo sancto, a viris prudentibus, a Scripturis. Tota intentio atque affectio nostra sit ad Dominum Deum, ad gratiam, virtutes ac dona Spiritus Sancti, ad bona futura, cœlestia et æterna: sicque desiderio futuræ felicitatis, præsertim amore Dei creatoris et salvatoris nostri, temporalia et carnalia cuncta spernamus, vel saltem ea non magis amemus quam ad spiritualia bona nobis valent proficere.

A Legitur de S. Antonio, quod in adolescentia sua, pro Dei amore copiosas reliquit pauperibusque donavit divitias. Hinc successive pervenit ad præclaram ac specialem gratiam contemplationis. Nam circa principium noctis consuevit cor suum cum manibus elevare ad Deum, et tota nocte stetit in contemplatione divina et oratione purissima, cum admirabili caritatis ardore. Quumque de mane lux solis super ipsum descenderet, exclamavit: O sol, cur a summæ veræque lucis contemplatione me impedis? Et tunc manus suas retraxit.

SERMO TERTIUS

DE CERTITUDINE CHRISTIANÆ FIDEI, ET EADEM QUIBUS ADORNANDA SIT OPERIBUS.

NISI quis natus fuerit denuo, non potest videre regnum Dei. Joann. III, 3. C

In evangelio hodierno ad multas informamur virtutes. Primo enim, exemplo Nicodemi confirmamur in fide. Nam circa exordium publicæ prædicationis Domini nostri Jesu Christi, quum adhuc pauca fecisset miracula, Nicodemus legis doctor, in tantum roboratus fuit in fide, ut diceret Salvatori: Rabbi, scimus quia a Deo venisti magister; nemo enim potest facere signa quæ tu facis, nisi secum fuerit Deus. Dupliciter etenim scitur veritas aliqua: primo, per naturalis rationis discursum, D ut quod homo est animal, quia est substantia animata sensitiva; secundo, per supernaturalem divinæ potestatis operationem, quam efficit Deus ad protestationem et ostensionem alicujus veritatis, quia quum Deus sit essentialiter verus et veritas, nequaquam est confirmator et testis falsitatis, nec decipit quemquam directe, I neque permittit homines supra vires suas tentari: et ita sciuntur ea quæ fidei sunt. Sicque Nicodemus sciebat quod Jesus es-

set a Deo missus et vera docens. Prima probatio, certitudinem evidentiae; secunda, certitudinem adhærentiæ facit.

Quum ergo Nicodemus, vir tam eruditus, ex paucis Christi miraculis ita existit in fide firmatus, multo per omnem modum certior et insuperabilior nostra debet fides existere, quam Christus tantis postmodum confirmavit miraculis, mortuos suscitando, leprosos et claudos atque a nativitate cæcos curando, alia quoque innumerabilia faciendo prodigia; et post resurrectionem suam discipulis apparendo, coramque eis in cœlos scandendo; deinde Spiritum Sanctum mittendo, et omnium linguarum ac Scripturarum notitiam Apostolis subito conferendo, eorumque corda tam inæstimabili caritate, constantia et omni perfectione implendo; deinceps per sanctos Apostolos aliosque discipulos, martyres, confessores ac utriusque sexus innumerabiles Sanctos, per tam superinnumerabilia et (ut sic loquar) infinita miracula, fidem catholicam roborando, ac per tot centena annorum curricula eam

in esse conservando, quæ alias dudum multotiesque perisset. Certissimi ergo et prorsus fortissimi simus in fide, scientes possibilis esse cælum et terram annihilari, quam minimum verbum Christi et Apostolorum ac Evangelistarum cassari aut falsificari. Sed et fidem nostram sanctis operibus adornemus, ex quo Deus eam tot signis ornavit, et quoniam de futuro Dei judicio ac retributione finali tam

Jacob. II, 26.

certificati consistimus. Nam fides sine operibus mortua judicatur.

Secundo, exemplo S. Nicodemi docemur esse valde solliciti pro nostra salute, et pro eorum salutari notitia quæ pertinent ad salutem. Quamvis etenim Nicodemus esset princeps doctorque Judæorum, qui pro maxima parte Christo fuerunt increduli, nihilo minus, postposita omni humana verecundia atque formidine prævalente, Christum pro sua informatione accessit. Ita et quilibet Christianus, quantumcumque perversi et intemorati sunt inter quos conversatur, nihilo minus de sua debet salute semper esse sollicitus, atque in dubiis circa quæ conscientia potest periclitari, instructionem a sapientibus quærere, præsertim quum mortaliter peccet qui discrimini se committit, id est periculo culpæ mortalis : ut si quis ambigat an hoc vel illud sit mortale peccatum, et tamen facit hoc, mortaliter peccat, etiam dato quod illud non sit culpa mortalis. Nam valde incaute et contra veram

Tob. IV, 19.

agit prudentiam. Ideo dixit Tobias : Consilium semper a sapiente perquire. Moyses quoque : Interroga patres tuos, et annuntiabunt tibi; majores tuos, et dicent tibi. Et in Ecclesiastico scriptum est : Fili, sine consilio nihil facias, et post factum non poenitebis; itemque, Ante omnem actum, consilium stabile te præcedat.

Deut. XXXII, 7.

Eccli. XXXII, 24.

Ibid. XXXVII, 20.

Tertio, informamur Nicodemi exemplo non nisi idoneum consiliarium, id est prudentem et virtuosum, requirere et amplecti. Grande quippe periculum est, cordis sui secreta arduaque negotia inexperto, indiscreto, intemorato exponere; gravius-

que videtur talium uti consiliis. Propter quod in Ecclesiastico habetur : Multi pacifici sint tibi, consiliarius sit tibi unus de mille; itemque, Non omni homini cor tuum reveles. Deinceps ad bonum consiliarium requiritur primo prudentia, ut sit circumspectus et multa considerans; secundo, ut sit justus, ne quærat propria commoda, neque sub specie boni suggerat mala, nec ex invidia malum alicui machinetur; tertio, ut sit mansuetus, non præceps nimisque calidus : ira enim impedit considerationem acutam ac maturam, in consulendo pernecessariam. Unde, secundum Philosophum, oportet tarde consiliari, quoniam consulentem oportet multa pensare; consiliata vero sunt celeriter exsequenda tempore suo. Talem habere consiliarium indicibiliter expedit, tam ad jucunde ac prospere vivendum in sæculo isto, quam ad proficiendum in omni virtute et gratia. Nam et diabolica tentamenta per hoc potissimum superantur, quod homini bono ac sapienti panduntur. Siquidem princeps tenebrarum et ejus satellites odiunt lucem, sicut asserit Christus : Omnis qui male agit, odit lucem, et non venit ad lucem, ut non arguantur opera ejus. Hinc in Ecclesiastico dicitur : Cum viro sancto assiduus esto, et quemcumque cognoveris observantem timorem Domini; cujus anima est secundum animam tuam.

Eccli. VI, 6.

Ibid. VIII, 22.

Joann. III, 20.

Eccli. XXXVII, 15, 16.

Quarto, docemur per Nicodemum nequaquam a via justitiæ, ab itinere veritatis discedere, sed usque in finem constanter in bonis perseverare : quia ut ait Salvator, Qui perseveraverit usque in finem, hic salvus erit. Quum enim Nicodemus videret quotidie Christum a Judæis, Pharisæis, Scribis, sacerdotibus et eorum principibus irrideri, diffamari, tandemque comprehensum morti cerneret adjudicari, inseparabiliter tamen Christo adhæsit, et fine quievit beato. Hinc in Ecclesiastico habetur : Non te ventiles in omnem ventum; esto firmus in via Domini et in veritate sensus tui, et prosequatur te verbum verax.

Matth. XXIV, 13.

Eccli. V, 41, 12.

Postremo instar Nicodemi simus patientes ac dociles, non pertinaces et iracundi. Siquidem Nicodemus a Christo modeste reprehensus, æquanimiter tulit, et Christi documentis humiliter acquievit ac paruit. Insuper, simul cum Nicodemo instruamur a Christo, et solerter pensemus quod ait Saluator : « Nisi quis natus fuerit denuo, non potest videre regnum Dei ». Quotiescumque enim quis peccat mortaliter, spiritualiter moritur; et nisi per Dei misericordiam renascatur, id est, de suo peccato pœniteat, et de non esse spirituali ad esse spirituale resurgat, hoc est de morte culpæ ad vitam gratiæ, salvari non potest. Ideirco quotidie de nostris peccatis cordialiter doleamus, veniam flagitemus, confessionem facere apto tempore proponamus, et vitam emendemus in omnibus.

Ibid. 14. Postremo attendamus quod Christus deseruit : Sicut Moyses exaltavit serpentem in deserto, ita exaltari oportet Filium hominis. Quemadmodum enim filii Israel ob suam transgressionem ab ignitis morsi serpentibus, intuendo æneum serpentem a Moyse pro signo levatum, a suis curabantur vulneribus; sic fideles a dæmonibus impugnati, tentati et læsi, passionem Christi diligenter inspiciendo, et Dominum crucifixum sinceriter contemplando, a suis tentationibus et peccatis curantur. Si enim diligenter pensemus quam nudus Christus in cruce pependit, avaritiæ vitium superamus. Si intueamur quam mansuete et patienter in tota passione se habuit, ab ira et impatientia mentes nostras purgare studemus. Si consideremus quam caritative, quam humiliter et constanter universa sustinuit, quam amore pro crucifixoribus exoravit, quam humillime coram pontificibus, coram Pilato, coram Herode, et sceleratissimis atque vilissimis illis a quibus nudabatur, flagellabatur, et spinis coronabatur, clavisque perforabatur, ac vehementissime spernebatur ac irridebatur, stetit et tacuit, omnino maledictæ tumorem superbiæ aspernamur. Omnia itaque ista nostris cordibus inscribamus; et qualiter

A Filius Dei propter nos alba veste ac purpureo indumento illusus est perpendentes, vanitates, pompas curiositatesque vestium, et superfluitates earum ceterarumque rerum vitemus. Christus equidem passus est pro nobis, relinquens nobis exemplum, ut sequamur vestigia ejus. Ideo qui dicit se in Christo manere, debet, sicut ille ambulavit ac toleravit, et ipse ambulare et tolerare, dicente Apostolo : Qui sunt Christi, carnem suam crucifigunt cum vitiis et concupiscentiis.

B Itaque æneus ille serpens fuit figura Christi, ob causam nunc tactam : quoniam sicut Judæi a serpentibus vulnerati, æneum intuendo serpentem sanabantur in corpore; sic fideles, Christi passionem pensando, curantur in anima, caritatem, humilitatem, patientiam ceterasque discunt virtutes, et ejus sequuntur vestigia, prout ad Hebræos hortatur Apostolus : Deponentibus omne peccatum, per patientiam curramus ad propositum nobis certamen, adspicientes in auctorem fidei et consummatorem Jesum, qui proposito sibi gaudio sustinuit crucem, confusione contempta. Secundo, quia ænei serpentis erectio præfiguravit elevationem Christi in crucis ligno. Tertio, quoniam sicut æneus serpens habuit similitudinem, non veritatem serpentis ac venenati; sic Christus habuit similitudinem carnis peccati, non ipsum peccatum.

Denique passio Christi, exaltatio appellatur : primo, quia alte in ligno suspensus est; secundo, quoniam sua passione exaltavit genus humanum, promerendo ei regnum cœlorum; tertio, quoniam sua passione præcipue honoravit Patrem æternum, obediendo ei usque ad mortem; quarto, quoniam sua passione meruit sibi metipsi accidentale præmium, scilicet corporis sui glorificationem, gloriosam ascensionem, judiciariam potestatem, atque totius creaturæ prælationem, juxta illud ad Hebræos : Videmus Jesum, propter passionem mortis, gloria et honore coronatum; et alibi : Humiliavit se factus obediens us-

I Petr. II, 21.

I Joann. II, 6.

Galat. V, 24.

Hebr. XII, 1, 2.

Ibid. II, 9.

Philipp. II, 8, 9.

que ad mortem; propter quod et Deus A exaltavit illum, et dedit ei nomen quod est super omne nomen.

Itaque Christi caritatem, pietatem, humilitatem cum ceteris assequamur virtutibus. Præsertim enim vitanda est omni Christiano crudelitas. Et sicut crudeles suis proximis faciunt, sic justo Dei iudicio accidit eis etiam sæpe in vita præsentī, quemadmodum in Ecclesiastico scriptum est : Facienti nequissimum consilium, super ipsum devolvetur; atque in Psalmo : Lacum aperuit, et effodit eum; et incidit B in foveam quam fecit.

Eccli.
xxvii, 30.

Ps. vii, 16.

Legitur de quodam tyranno, quod crudelis exstitit valde, et multis innocentibus

durissimas intulit mortes. Quidam autem artifex volens tyranno illi placere, fecit æneum bovem, in cuius latere fecit fenestram per quam ingrederentur necandi et comburendi; quumque caloris vehementiam sentientes clamarent, non hominis, sed bovis vocem emittere viderentur : qua audita, tyrannus ille amplius accenderetur ad torquendum inclusos. Itaque tyrannus, viso æneo bove, artificium commendavit. Nihilo minus factum execrans, dixit artifice : Tu primus experieris tormentum operis hujus, quod mihi crudeli tu crudelior obtulisti; sicque cognoscam qualiter per os bovis istius clamabis. Et factum est ita.

AD RELIGIOSOS

SERMO QUARTUS

DE SPIRITUALI SIGNIFICATIONE QUATUOR ANIMALIUM, ET DE SEX SPECIEBUS CONTEMPLATIONIS, PER SEX ALAS ANIMALIUM DESIGNATIS.

IN circuitu sedis, quatuor animalia plena oculis ante et retro. Apoc. iv, 6.

Quemadmodum per hæc quatuor animalia quatuor Evangelistæ sint designati, commune et notum est. Et ut super Ezechielem ostendit Gregorius, etiam ipsemet Christus, omnium caput Sanctorum, per hæc quatuor animalia figuratur : ipse enim propter nos vere factus est homo, et pro nobis oblatus atque occisus ut vitulus; surrexit et vicit hostes ut leo; ascendit in cælum ut aquila.

Rursus, secundum Gregorium, unusquisque in via Dei perfectus per quatuor animalia ista exprimitur : qui rationabiliter se habendo, pie inter proximos conversando, recte dignus est homo vocari; se ipsum vero Deo in sacrificium offerendo, et propter Deum propriam voluntatem at-

que carnalia desideria mortificando, rite vitulus appellatur, juxta quod monet Apostolus, Obsecro vos ut exhibeatis corpora vestra hostiam viventem, sanctam, Deo placentem; vitiis quoque viriliter resistendo, et adversariis suæ salutis per Dei auxilium prævalendo, leo vocari meretur; contemplando autem et fervide diligendo cœlestia et divina, congrue dicitur aquila. Quæ omnia ad religiosos potissimum certum est pertinere, quoniam sollemnissimo voto ad obedientiam et propriæ voluntatis fractionem se adstrinxerunt. Ideo se ipsos quotidie tenentur mortificare, carnalia desideria exstirpare, spirituali patri in omnibus obtemperare, in cuius manu est eorum voluntas. Quam resumere, esset rem alterius eo invito contrectare, quod furtum censetur; sed hoc in religiosis etiam

Rom. xii, 1.

sacrilegium judicatur, quia abusus est rei A sacrae, utpote Deo per religionis professionem oblatae et consecratae. Religiosis quoque vere proficientibus bellum continuum est contra humanæ salutis hostes, quibus instar leonum tenentur resistere; et ipsorum est in luce sapientiæ contemplari divina, atque in Solem justitiæ aciem mentis defigere.

Porro in hoc animalia ista specialiter imitari debemus, ut simus pleni oculis ante et retro, hoc est undique circumspecti, illuminati, acuti, ne sub specie B boni decipiamur, ne in manifesta vitia corruamus, ne aliquo præoccupemur delicto. Quum enim, secundum Thomam et alios multos, in actibus humanis qui proprie appellantur humani, qui scilicet ex ratione et deliberatione procedunt, in individuo sumptis, non inveniatur indifferens, sed omnis hujusmodi actus sit moraliter bonus, virtuosus et meritorius, aut demeritorius atque culpabilis (si enim ex recta ratione procedit et ad finem debitum refertur, meritorius perhibetur; sin C autem, demeritorius fertur): hinc nisi undique simus oculati, circumspecti, diligentissimi, et (juxta prophetam Aggæum) ponamus corda nostra super vias nostras, varias omni hora incidimus culpas, et cito pigrescimus. Idecirco, ut Habacuc loquitur, super custodiam nostram stemus; et omni custodia cor nostrum custodiamus a cogitationibus malis, ab affectionibus pravis, a negligentia omni. Sicque cum Job vereamur omnia opera nostra, ne in eis Dominum offendamus. Nam sicut in Ecclesiastico legitur, Timor Dei est corona justitiæ, quæ cunctis est superponenda operibus, ut sollicite in eis omnis vitetur excessus; et qui absque isto timore est, justificari non potest, nec evadere.

Consideremus ergo nos ipsos et omne quod agimus, an vere sit bonum et bene fiat. Consideremus nostram refectionem, comestionem, potationem, dormitionem, ne in eis excessus sit, ne quærat voluntas, ne virtutum circumstantiæ omittan-

tur. Sic et ceteros nostros actus consideremus, discutiamus, dijudicemus; et magis intueamur quid nobis desit, quam quod nos habere confidimus. Hinc ait Bernardus: Consideratio mentem purificat, regit affectus, dirigit actus, corrigit excessus, componit mores, vitam ordinat et honestat, sparsa recolligit, secreta rimatur, vera investigat, verisimilia examinat, ficta et fucata explorat, agenda præordinat, acta recogitat, ut nihil in mente resideat incorrectum correctione vel dignum; hæc est B quæ in prosperis adversa præsentit, et in adversis quasi non sentit. Ecce quanta bona facit consideratio ista in homine. Idcirco quotidie totam nostram conversationem consideremus, reprehendamus, et culpas proprias puniamus in nobis. Necessaria valde est consideratio ista, quamvis sæpe sit gravis. Propter quod ait Anselmus: Omnis gravis conditio. Si me inspicio, me ipsum non tolero; si non inspicio, me ipsum ignoro. Si me considero, terret me facies animæ meæ; si me non considero, C fallit me damnatio mea. Si me video, horror est intolerabilis; si non video, mors intolerabilis. Et certe, sicut in verbis iis innuit satis Anselmus, si quis se ipsum rite considerat, et bonorum quæ operatur admixtas defectuositates perspicaciter intuetur, malorum quoque quæ agit multitudinem magnitudinemque sinceriter speculatur, abhorret et aspernatur se ipsum, et vix ferre se potest, nec deflare se sufficit.

Verum sunt quidam insipientiæ filii, ad hanc sui saluberrimam considerationem cæci, atque ad aliorum facta curiose observanda, temere judicanda, distincte enumeranda, ante et retro oculis pleni, proprias culpas ex aliorum defectibus excusantes, alleviantes ac defendentes: quorum fatuitas est deflenda. Hi miseri non advertunt quod tam terribiliter ait Salvator: Quid vides festucam in oculo fratris tui, et Matth. vii, 3, 5. trabem in oculo tuo non vides? Hypocrita, ejice primum trabem de oculo tuo, etc. Hinc Gregorius et Prosper testantur: Tam-

Agg. i, 5, 7.

Habac. ii, 1.
Prov. iv, 23.

Job ix, 28.

Eccli. i, 22,
28.

diu peccata propria homo nosse et deflare A ignorat, quamdiu curiose aliena considerat; quod si mores suos ad se ipsum versus adspiciat, non requirit in aliis quod reprehendat, sed in se ipso quod lugeat. Nos igitur religiosi et monachi, quorum est uni, utpote Deo, et sibi ipsi intendere, non insipienter relinquamus nos ipsos, nec immoderate occupemus nos circa proximos nostros : præsertim quum dicat Sal-

Luc. ix, 25.

Eccli. xxx, 24.

vator, Quid proficit homo, si lucretur univ-
ersum mundum, se ipsum autem perdat? Nonne caritas incipit a se ipsa, id est a B suo subjecto? Nempe qui vere se diligit, primo se ipsum reprehendit ac corrigit. Hæc ergo agamus, juxta quod scriptum est : Miserere animæ tuæ, placens Deo.

Præterea, per sex alas quibus unum-
quodque oculatum animal fuit ornatum, sex species contemplationis intelliguntur, prout eas quidam enumerant. Sanctus autem Bernardus quatuor species contempla-
tionis distinguit. Quarum prima, secundum eum, est admiratio majestatis, id est admirativa speculatio. Secunda est conside-
ratio judiciorum Dei. Quæ qui profunde intuetur, cum Apostolo exclamare impel-

Rom. xi, 33, 34.

Ps. xxxv, 7.

Prov. xxv, 27.

I Cor. ii, 9.

litur : O altitudo divitiarum sapientiæ et scientiæ Dei ! quam incomprehensibilia sunt judicia ejus, et investigabiles viæ ipsius ! Quis enim cognovit sensum Domini ? Et cum Psalmista loquitur Deo : Justitia tua sicut montes Dei ; judicia tua abyssus multa. In iis duabus speciebus contemplationis, ab immoderato, intimo-
rato, irreverenti, præsumptuoso scrutinio est cavendum, quum dicat Scriptura : Sic-
ut qui mel comedit multum, non est ei bonum, sic qui perscrutator est majestatis, opprimetur a gloria. Tertia est consideratio beneficiorum Dei. Quarta autem

contemplatione ad omnipotentis notitiam Creatoris sublimiter mens ascendit. Secunda est speculatio corporalium ac visibilium creaturarum : ex quibus etiam Dei majestas splendide innotescit. Propter quod Isaias hortatur : Levate in excelsum oculos vestros, et videte quis creavit hæc. Possunt autem species contemplationis aliter assignari, ut infra mox Deo agente tangetur.

Is. xl, 26.

Sed quum contemplatio sit actus sapientiæ, quæ est cognitio divinorum, posset quis quærere, quomodo cognitio creaturarum, præsertim corporalium, ad contemplationem pertineat. Ad quod breviter respondetur, quod creaturæ, in quantum a Deo tanquam a primo principio profluxerunt, et in ipsum sicut in ultimum finem tendunt ac ordinantur, atque Creatoris sui sapientiam, omnipotentiam, bonitatem, amorem seu benevolentiam repræsentant, sic in ipsius cognitionem, admirationem, laudem, timorem, cultum, dilectionem inducunt. Sicque ad contemplationem C consideratio spectat rerum earum. Nam et sic theologia et fides circa eas versantur.

Postremo et nos cum sanctis animalibus requiem superfluum nobis non demus nec admittamus, sed die ac nocte cum eis superbeatissimam laudemus veneremurque Trinitatem, dicentes : Sanctus, Sanctus, Sanctus, Dominus Deus omnipotens. Quum-
que non sit speciosa laus in ore peccatoris, exhibeamus nos divinæ laudis puros idoneosque ministros, Deo sanctitatis im-
mensæ in sanctitate et justitia incessabiliter servientes, ut passionibus reformatis, vitiis extirpatis, negligentiis pulsatis, ex fervida caritate, omne quod agimus ad Dei gloriam et honorem jugiter opere-
mur. Plus etenim placet sancto et justo Deo unus actus virtuosus viri reformati, purgati, heroici et perfecti, quam plurimi actus boni hominis adhuc passionati, imperfecti, pusilli. Unde et vir virtuosus, fervens, purgatus, multo plus de essentiali præmio promeretur, agendo aliquod opus

Apoc. iv, 8.

Eccli. xv, 9.

bonum, quod tamen facit cum promptissimo corde et alacri jucunditate, quasi sine labore, quam homo imperfectus, idem agendo cum grandi difficultate atque labore. Deus namque ad mentis dispositio-

nem et caritatis intuetur radicem, et purgata mens præcipue placet ei : idcirco actus talis mentis magis acceptat, et delectatur in eis. Ideo ad profectum incitemur, et ad perfectionem feramur.

SERMO QUINTUS

DE SUPERGLORIOSISSIMÆ TRINITATIS VITA, FELICITATE ET GLORIA PENITUS INFINITA.

BEATUS et solus potens Rex regum et Dominus dominantium; qui solus habet immortalitatem, et lucem habitat inaccessibilem; quem nullus hominum vidit, sed nec videre potest; cui honor et imperium. I Tim. VI, 15, 16.

Sicut Aristoteles ait, desiderabilius ac nobilius est de rebus sublimibus et divinis modicum quid cognoscere, quam multa de inferioribus. Ideo idem asserit se de materialibus rebus determinasse propter separatarum cognitionem substantiarum. Quanto magis desiderabilissimum ac nobilissimum exstat, aliquid de superessentiali, incircumscriptibili et æterna Trinitate cognoscere, atque ad ejus notitiam finaliter referendum est omne studium, omnisque inferiorum notitia? Rursus, quum Dei Filio protestante, hæc sit vita æterna, summa felicitas, consummata beatitudo, clare cognoscere Patrem et Filium (haud dubium quin et Spiritum Sanctum), certum est, quod quanto in vita præsentia ad sinceriores et affectuosiores adorandæ et superbenedictissimæ Trinitatis contemplationem pertingimus, eo futuram beatitudinem plenius prælibamus, ad plenam felicitatem amplius propinquamus, ad veram perfectionem propinquius pervenimus. Ideo verissime disseruit Augustinus : Nullibi periculosius erratur, nec laboriosius aliquid quæritur, nec quidpiam fructuosius invenitur, quam ubi summæ Trinitatis unitas investigatur. Et rursus :

B Qui Trinitatis mysterium vel ex parte et per speculum in ænigmate videt, gaudeat et gratias agat; qui vero non videt, tendat per pietatem ad videndum, non per cæcitatem ad calumniandum.

I Cor. XIII, 9, 12.

Sed agnoscendum, quod non in qualicumque superdignissimæ Trinitatis cognitione consistit noster profectus, nostra perfectio et futuræ prælibatio felicitatis, quum multi inanes et scioli de Trinitate scholastice disputent, scribant, et multa cognoscant quæ etiam devotissimos latent viros; sed in cognitione amorosa, formata, sincera, quæ actus est sapientiæ et ex fide progreditur illuminata, consistit perfectio et futuræ beatitudinis dulcis prægustatio quædam. De qua cognitione loquitur Augustinus : Mentis humanæ invalida acies in tam sublime lumen non figitur, nisi per fidei justitiam expurgetur. Et denuo asserit, quod Trinitas adoranda non nisi purissimis mentibus cernitur. Qui ergo ad superaltissimæ Trinitatis contemplationem cupit assurgere et in tam supersplendissimum lumen oculum cordis defigere, primo satagat emundari, illuminari, roborari, tantæque puritatis effici capax : quia si bestia tetigerit montem, lapidabitur.

Hebr. XII, 20.

Præterea ad contemplationem hanc cum omni humilitate, reverentia et casto timore est accedendum, et ab immoderata inquisitione cavendum, præsertim quum (ut in themate tactum est) Deus « lucem habitat inaccessibilem; quem nemo hominum

vidit, neque videre potest ». Quod intelligendum est de visione comprehensionis perfectæ, qua quid tam clare et plene cognoscitur sicut ex sua natura cognoscibile exstat. Sic enim a se solo videtur et comprehenditur Deus : nam sua actualitate ac plenitudine infinita, omnium intellectuum creatorum capacitatem in infinitum excedit. Potest quoque intelligi, quod nullus in hac vita potest Deum per speciem videre, vivendo vita sensitiva humana; et item, quod corporalibus oculis videri non valeat. Sed, quamvis Deum comprehendere non valemus, possumus tamen assidue in ejus contemplatione proficere : idcirco quærendus est, ut inventus magis quærat, clariusque inventus, adhuc avidius requiratur; nec huic inquisitioni in via hujus exsilii terminus imponatur. Propter quod dicit Psalmista :
Ps. civ, 3, 4. Lætetur cor quærentium Dominum; quærite Dominum et confirmamini; quærite faciem ejus semper.

Insuper ad habendam superpræstantissimæ Trinitatis aliqualem ac fidelem cognitionem, primo de emanatione unius personæ ab alia aliquid est tangendum. Quocirca sciendum, quod quum Deus sit ens primum, simplicissimum, infinitum, perfectum, naturaliter bonum, ipse est una actualissima vita et supersapientissima mens, atque purissimus, invariabilis, in-circumscribibilis spiritus. Hinc Dei fecunditas, exuberantia, munificentia est omnifarie infinita. Emanatio quoque illa ad intra quæ in Deo est, non nisi simplicissima, immaterialissima, incommutabilis, intellectualis et æterna consistit : talis est ergo generatio Filii Dei, atque processio Spiritus Sancti.

Itaque Deus Pater se ipsum æternaliter ac plenissime intuendo et intelligendo, hoc quoque in se et de se cognoscit, intelligit, concipit, hoc intra se profert, producit et gignit. Sicque Pater æternus se per intellectum cernendo, sui ipsius conceptum in se parit, et verbum unum internum, mentale, non sonans ac transiens, non vocale

A et accidens, sed supersubstantiale et immanens, de se profert, et intra se loquitur. Cujus verbi expressio est generatio Filii Dei. Hoc etenim Verbum æternum, quum secundum rationem similitudinis a Patre per intellectum emanet, et de substantia Patris immediate, non per actum intermedium a substantia realiter distinctum, nascatur, propriissime ac verissime Filius Dei Patris appellatur. Et quoniam Pater uno simplicissimo intelligendi actu se ipsum et omnia perfecte intelligit, ideo B una prolatione immanente verbum producit, quod est sui perfecta imago, et omnium creaturarum exemplar, ars, species et ratio. Nec aliquid minus potest esse, relucere ac repræsentari in Verbo isto, quam est in Patre æterno : ideo tota Patris essentia continetur in eo. Nec dubium quin eadem numero, quum divina essentia nequeat multiplicari, nec esse valeant plures dii. Hoc itaque Verbum æternum, est mentis paternæ verbum internum, intelligibilis dictio, et sapientiæ ejus plena C expressio, splendor gloriæ, character paternæ substantiæ, imago bonitatis paternæ, candor lucis æternæ, speculum superclarissimum et perfectum majestatis incomprehensibilis genitoris. Hunc Unigenitum superpulcherrimum, supersapientissimum, superbonum ac supersimillimum sibi, diligit Deus Pater amore superardentissimo, prorsus gratuito et immenso; æternaliter quoque et incessabiliter adspicit eum cum delectatione vere et intensive interminata, et complacentiam habet in D eo omnino superdulcissimam et immensam. Sed et Filius Patrem invariabiliter intuetur, comprehensive intelligit, superferventissime infiniteque diligit, superdeliciosissimam complacentiam et immensam prorsus lætitiā habens in suo supercarissimo Patre.

Præterea Pater et Filius sibi tam interminabiliter complacentes, se invicem volendo ac diligendo, simul producant et spirant unum subsistentem, superessentialē, perfectum et infinitum amorem,

Hebr. i, 3.

Sap. vii, 26.

qui est Spiritus Sanctus, a Patre et Filio A
tanquam ab uno fonte æterno, ab uno fon-
tali principio et ab uno spiratore proce-
dens, quoniam Pater et Filius per id et
in eo et in quantum producant Spiritum
Sanctum non distinguuntur, sed unum-
sunt, utpote unius substantiæ et volunta-
tis, quæ in ambobus numero una est :
quemadmodum etiam Pater, Filius et Spi-
ritus Sanctus sunt unus universorum crea-
tor, unus fons, unum principium, quia in
eo quo creant non distinguuntur. Hic Spi-
ritus Sanctus Patri et Filio consubstantia- B
lis, coæternus, coæqualis verissime et su-
percertissime creditur; estque amor iste
amborum spiritus, pax serenissima, tran-
quillitas infinita, communio plena, sempi-
terna atque communis lætitia, suavissimum
osculum, inseparabilis nexus, dulcissimus-
que complexus Patris ac Filii.

Denique, quum causæ amandi seu ratio-
nes amoris sint bonitas, cognitio, propin-
quitas, similitudo, beneficentia, communio,
constat quod inter has superbenedictas,
supervenerabiles, adorandas personas est C
dilectio mutua omnino perfecta, superar-
dentissima et immensa, quum omnes præ-
tactæ amandi rationes ibi superexcellen-
tissime et superplenissime æternaliterque
consistent. Quælibet namque persona in-
finitæ est bonitatis, sapientiæ, pulchritu-
dinis, perfectionis; et unaquæque com-
prehensive et superclarissime cognoscit et
aliam inspicit. Filius quoque a Patre im-
mediate procedit, et infinitum bonum ab
eo suscepit, estque Patri simillimus; Spi-
ritus Sanctus etiam a Patre et Filio imme- D
diate spiratur, et infinitum bonum ab ipsis
suscepisse se intuetur. Pater vero se to-
tum Filio, Pater item et Filius se plene
communicant Spiritui Sancto. Quanto au-
tem inter aliquos est major dilectio, tan-
to jucundior est eorum mutua intuitio,
unio, complexus, usus sive fruitio : ideo

unaquæque divina persona cum infinita
jucunditate inspicit, amplectitur compre-
henditque aliam, et se invicem superdeli-
ciosissime perfruuntur.

Denique, si beneplacitum est Domino Ps. CXLIX, 4.
in populo suo; si Seraphim calidissime,
acutissime, penetrantissime, ferventissime
et superferventissime, juxta Dionysium, De Cœlest.
diligunt Deum; si deliciæ Dei sunt esse hier. c. vii.
cum filiis hominum; si gaudium Domini Prov. viii,
est fortitudo nostra : quam beneplacitum 31.
est Patri æterno in unigenito Filio suo, II Esdr. viii,
et econverso? Quam incomprehensibiliter 10.
unaquæque persona complacet alteri? Quam
superdeliciosissime simul sunt, imo in se
invicem inseparabiliter, inconfusibiliter
circumincessibiliterque consistunt? Quam
superæstuantissime, supercalidissime, su-
peracutissime, superferventissime se in-
vicem æternaliter et nobis prorsus incom-
prehensibiliter diligunt dilectione utique
superjucunda, et omni creaturæ quoad su-
am plenitudinem inexpertæ? Ecce hæc est
vita, beatitudo et gloria Domini Dei nostri,
ita contemplari, diligere, communicare,
producere, delectari et taliter se habere.

Tantam igitur supersublimis et super-
omnipotentis Trinitatis beatitudinem, ex-
cellentiam, perfectionem ac mutuam in-
tuitionem, dilectionem, complacentiam,
fruitionem, communicationem, emanationem
et consistentiam devotissime contemple-
mur, dulciter intueamur, cum omni gra-
tulatione et delectatione ingenti uberrime
revolvamus et attendamus. Si enim Domi-
num Deum nostrum vere ex corde super
universa diligimus, debemus utique tam
infinitæ suæ felicitati et gloriæ præcordia-
liter congaudere. Sed ad hanc contempla-
tionem, amorem et congratulationem co-
nemur nos exhibere idoneos, virtuose,
fructuose, pure et digne vocatione hac
conversando, totoque corde Deo jugiter
adhærendo.

SERMO SEXTUS

DE SPECIEBUS CONTEMPLATIONIS, ET DE MYSTICA THEOLOGIA.

NOS autem revelata facie gloriam Domini speculantes, in eandem imaginem transformamur a claritate in claritatem, tanquam a Domini Spiritu. II Cor. iii, 18.

Ad Creatoris sui claram et facialem, fruitivam ac beatificam contemplationem adipiscendam inamissibiliterque possidendam, creata est rationalis creatura. Nunc interim, quamdiu degit in sæculo isto, præfata contemplationi propinquare, et aliquid ejus participare, atque ipsius dulcedinem prælibare debet conari, præsertim omnis religiosus, ab exteriorum sollicitudine, inquietudine, occupationibus liber.

Porro contemplatio est divinorum sincera, prompta et amorosa cognitio. Nam primo et immediate contemplatio circa Deum versatur, deinde circa effectus ipsius, prout ab ipso fluxerunt et gubernantur, atque ad ipsum finaliter referuntur, et a theologis considerantur. Hujus contemplationis prima species, est simplicissimæ Deitatis speculatio naturalis : non quod contemplatio ista sit sapientiæ acquisitæ, naturalis et philosophicæ actus, quum sit doni sapientiæ, quæ est supernaturalis habitus, actio. Sed dicitur speculatio naturalis, quoniam contemplatur de Deo ea quæ naturali ratione possunt cognosci de eo, quæ et pro magna parte cognoverunt philosophi : utpote, quod Deus sit primum ens, purus actus, honoratissimus intellectus, pura bonitas, summa veritas, simplicissima unitas, prima omnium causa et ultimus finis; cujus sapientiæ, omnipotentiae, beatitudinis, opulentiae, sanctitatis, excellentiae, perfectionis, pietatis, justitiæ, suavitatis nullus est finis, nulla mensura, coaretatio nulla.

A Secunda species contemplationis, est summæ et superessentialis Trinitatis cognitio supernaturalis : quemadmodum scilicet Deus sit in essentia unus, et trinus in personis, et quomodo una persona aliam sit producens ; quomodo Filius a Patre generetur, et Spiritus Sanctus ab utroque spiretur ; qualiter una persona aliam superclarissime intueatur, superardentissime diligat, et se invicem perfruantur ac mutuo sibi complaceant æternæ, increatæ et adorandæ personæ. De qua specie contemplationis dictum est in præcedenti sermone.

Sed agnoscendum, quod (juxta divini Dionysii documenta) duplicem de Deo habemus in hac vita cognitionem, videlicet : unam per affirmationem seu positionem, ut quod Deus est ens primum, summum bonum, et quidquid, absolute loquendo, perfectius et melius est habere quam eo carere ; aliam per ablationem seu negationem. Quia ut sacratissimus asserit Dionysius, necesse est in Deo omnium perfectiones ponere ac fateri, tanquam in fontali omnium causa et exemplari universorum principio ; iterumque, oportet omnem rerum perfectionem abnegare de ipso, tanquam super omnia incomparabiliter, separatissime et superessentialiter existente, penitus incomprehensibili et prorsus ignoto quantum ad quid est. Ipsa quippe æterna Deitas, infinita eminentia omne creatum excedit, estque deficiens omne nomen (prout nos illud comprehendere possumus) a superbenedicta et supervivente et incomparabili majestate ipsius, infinito defectu. Unde et (juxta Dionysium) ista cognitio Dei per negationem est potior et clarior prima. Hinc jux-

De Cœlest. hier. c. ii.

De Myst. theol. c. i.

De Cœlest. hier. c. ii.

ta hanc duplicem Dei cognitionem potest contemplatio Dei duplex distingui : prima (ut dictum est) per positionem; secunda per ablationem. Hæc autem cognitio Dei per omnium ab ipso negationem, ad mysticam spectat theologiam, et est sublimior species contemplationis quæ haberi potest in vita præsentis.

Porro mystica theologia, quæ et unitiva sapientia atque flammigera theoria vocatur, realiter idem est quod donum sapientiæ, accipiendo sapientiæ donum secundum gradum et statum suum supremum atque perfectum huic vitæ possibilem. Est equidem triplex gradus doni sapientiæ, sicut et caritatis. Itaque mystica theologia, seu contemplatio ista sapientiæ unitivæ, flammigeræ, amorosæ ac saporosæ, est interna ac secretissima mentis cum Deo locutio, Deitatisque quædam intuitio, non per phantasmata aut rerum imagines, sed per omnium ablationem, transcensionem ac derelictionem, otiantem jam mente ab omni virium cognoscitivarum et appetitivarum actione circa creata versante, ingredientemque mente divinam caliginem, id est se extendente ac immergente in ipsam incomprehensibilem, infinitam, supersplendidissimam lucem divinam, increatam, æternam. Quam quanto clarius intuetur ac perfectius contemplatur, eo quam incomprehensibilis et superexcellens sit, certius cernit atque profundius speculatur. Hinc a quibusdam mystica theologia sic definitur : Mystica theologia est anagogica seu superductiva motio mentis in Deum per purum fervidumque amorem; et rursus, Mystica theologia est experimentalis de Deo notitia per unitivi amoris amplexum. Hæc contemplatio mystica, supernaturalis, theoria, ad viros heroicos, perfectos, purgatos proprie pertinet, quia ad eam disponitur homo immediate per ferventissimæ caritatis ardorem, quo Spiritus Sanctus apicem affectivæ tangit, excitat et accendit, aliqua tamen præeunte naturali ordine contuitione : sicque vertex intellectivæ in Deum erigitur, figitur, pro-

funditur, rapitur, et tota mens in Deitatis oceanum absorbetur, et in divitias gloriæ Creatoris demergitur, atque in ipso feliciter conquiescit suaviterque obdormit. Ad hanc deificam contemplationis speciem non efficitur homo aptus, nisi per plenam privati eradicationem amoris, per reformationem perfectam, per purum et perfectum Dei amorem.

Tertia contemplationis species, quæ et quarta dici potest, est assumptæ humanitatis Christi consideratio : quemadmodum scilicet natura humana in Christo assumpta est in unitatem personæ a Verbo æterno, et suppositata in hypostatico esse ipsius Verbi increato; et quomodo eodem momento caro Christi a Spiritu Sancto formata est, et anima ejus creata ac carni formaliter juncta, atque utrumque simul a Verbo assumptum; qualiter item in eodem illo momento ac instanti impleta est tota capacitas animæ Christi plenitudine gratiæ, perfectione virtutum, excellentia quoque donorum ac fructuum et beatitudinum, imo et beatifica visione divinæ essentiæ, et summa Deitatis perfruitione. Deinde ad hanc contemplationis speciem pertinet considerare omnia quæ in Evangelio et ceteris sacris Scripturis, de Christo secundum quod est homo, leguntur : qualiter scilicet de Virgine conceptus et natus sit, ab angelo nuntiatus pastoribus, adoratus stella duce a Magis; et cetera ejus mysteria, opera atque miracula.

Quarta contemplationis species, est speculatio donorum gratiæ Dei, intelligendo per dona gratiæ universa supernaturalia beneficia Creatoris et munera gloriæ Beatorum, seu divina promissa cœlestia. Ad hanc itaque speciem pertinet intueri beneficia Dei gratiosa, generalia ac specialia, corporalia et spiritualia, exhibita et exhibenda.

Quinta species, est contuitio donorum naturæ, id est consideratio naturalium Dei effectuum, visibilium et invisibilium, terrestrium atque cœlestium, intellectualium, rationabilium, et inferiorum elemen-

torum et mixtorum. Sicque ad speciem A hanc pertinet intueri ordinem universi, species, proprietates et virtutes et operationes naturalium rerum, et substantias separatas, orbes, astra, planetas, prout in istis magnificentia Conditoris relucet, ejusque bonitas, sapientia et potestas in cunctis resplendent.

In his itaque contemplationis speciebus nos actuemus, exerceamus et occupemus;

atque ad eas, per profundissimam humilitatem, patientiam inconcussam, mansuetudinem firmam, ceterasque virtutes, per orationes devotas et assiduam dominicæ passionis memoriam, per indesinentem cordis custodiam et diligentem divini operis executionem, nos quotidie ac strenue præparemus ac disponamus, ad laudem et gloriam superbeatissimæ Trinitatis. Amen.

*Pro solennitate Corporis Christi, quære enarrationes et sermones
in altera parte, de Sanctis.*

DOMINICA PRIMA POST TRINITATEM

ENARRATIO IN EPISTOLAM

DEUS CARITAS EST. I Joann. iv, 16-21.

QUIA adhuc non longe a sacratissima solennitate Pentecostes, in qua de Spiritu Sancto, qui caritas appellatur, festivitas agitur, recessimus, recte epistola ista in qua de caritate fit mentio, in dominica legitur hodierna. Ait ergo S. Joannes :

Sap. xi, 25. *Deus caritas est.* Deus utique amat se ipsum, sed et ea quæ condidit, secundum id quod ab ipso sortita sunt, quemadmodum in libro Sapientiæ dicitur Deo : Diligis omnia quæ sunt, et nihil odisti eorum quæ fecisti. Porro in simplicissimo Deo realiter idem sunt amans et amor, quemadmodum sapiens et sapientia : ideo vere dicitur Deus amor seu caritas. Denique multiplex est distinctio caritatis. Est namque caritas creata, quæ est virtus theologica, et caritas increata, videlicet Deus. Caritas quoque increata distinguitur : quia est caritas increata absolute dicta, quæ est ipsum diligere Dei, quia in Deo sunt idem esse, posse et agere. Est quoque caritas increata spirata, relative accepta : et ista est ipsemet Spiritus Sanctus. Sed caritas increata absolute sumpta, communis est C toti superdignissimæ Trinitati, et cuilibet competit divinæ et increatæ Personæ. Nihilominus, sicut sapientia Filio, sic caritas ista appropriatur Spiritui Sancto, quia Spiritus Sanctus procedit per modum amoris, estque emanatio voluntatis.

Et qui manet in caritate, in Deo manet. Hoc dupliciter potest intelligi. Primo sic : « Qui manet in caritate », scilicet increa-

ta, id est, qui ei inhæret, « in Deo manet », id est, spiritualiter finaliterque quiescit. Quum enim caritas ista sit Deus, consequens est ut qui manet in ea, in Deo sit manens. Juxta quem modum ait Christus : Creditis in Deum, et in me credite. Quum *Joann. xiv,* enim Christus sit verus Deus, consequens ^{1.} est ut qui credit in Deum, credat in Christum, sicut ibidem Augustinus exponit. Secundo sic : « Qui manet in caritate » creata, id est, caritatem, quæ virtus theologica est, in se tenet, « in Deo manet » B tanquam in ultimo fine, et ei summe adhæret, quoniam mentem creatam Deo finaliter copulare, et eam in ipso firmare, opus est caritatis infusæ. Itaque qui manet in caritate, manet in Deo, sicut contentum in continente, et sicut participans in participato, quoniam caritas infusa est quædam similitudo et participatio caritatis increatæ. *Et Deus manet, id est, gratiose habitat, in eo,* sicut participatum in participante et continens in contento. Unde et Beda hic ait : Vicissim in se habitant qui continet et qui continetur. Habitat in te Deus, sed ut contineat te ne cadas; habitas quoque in Deo, ut continearis in eo.

In hoc perfecta est caritas Dei nobiscum, ut fiduciam habeamus in die judicii, id est, diem judicii non formidemus, sed fiducialiter præstolemur, cupientes *Philipp. i,* dissolvi et esse cum Christo. Unde et Chri- ^{23.} stus in Evangelio, de die loquens judicii

Luc. xxi, 28. suis fidelibus : His (inquit) fieri incipientibus, levate capita vestra, id est, corda exhilarate, quoniam appropinquat redemptio vestra. Beda quoque hic scribit : Quid est fiduciam habere in die iudicii? Non timere ne veniat dies iudicii. Quum enim primo quis ad poenitendum se dederit, incipit formidare diem iudicii, ne Iudice apparente damnetur; processu vero bonæ conversationis animatus, discit non timere quod ante timebat, sed potius desiderare ut veniat Iudex, confidens merito bonæ conversationis salvari. In hoc ergo perfecta est caritas Dei nobiscum, id est, perfectio caritatis nostræ ad Deum consistit in hoc, ut fiduciam habeamus in die iudicii, juxta intellectum inductum.

Sed iis obviare videtur, quod etiam viri heroici et perfecti, iudicium Dei usque ad mortem suam formidasse leguntur, quemadmodum supra de beatissimis patribus *Cy. lxxix.* Arsenio et Elia eremitis narratum est. *p. 19 B, 25 C, 33 A.* Sanctus quoque Hieronymus protestatur : Quum diem illum cogito, totus expavescō. Et rursus : Sive comedo, sive bibo, sive aliud aliquid ago, semper mihi videtur tuba illa meis auribus insonare : Surgite, mortui, venite ad iudicium. Ad istud arbitrator respondendum, quod viri sancti diversimode tanguntur a Spiritu Sancto; et quamvis frequenter Spiritus Sanctus perhibeat testimonium menti eorum quod filii Dei sint, interdum tamen permittit eos insistere considerationi infirmitatis imperfectionisque propriæ : et ita verentur timore filiali, videlicet, ne separentur a Deo. Et sicut doctores fatentur exponendo quod scriptum est, Non est inventus similis illi, qui conservaret legem Excelsi, unus Sanctorum magis abundat in ista virtute, alter in alia.

Eccli. xliv.
20.

Insuper, unde fiduciam istam nostræ salvationis habere valeamus, subjungitur. *Quia sicut ille est, et nos sumus in hoc mundo* : id est, quemadmodum Deus in cœlo est totus pius et bonus, non justos tantum sed injustos etiam diligens, vel secundum prædestinationem æternam, vel

A secundum id quod sunt per creationem a Deo, et omnibus beneficia sua liberaliter exhibet, conservando eos in esse et necessaria præbens vitæ; ita et nos sumus in hoc mundo, id est, nos Christiani Deo in hoc assimilamur, quod etiam inimicos diligimus et bona eis impendimus. Hinc jubet Salvator : Diligite inimicos vestros, *Matth. v, 44.* benefacite iis qui oderunt vos, et orate pro persequentibus et calumniantibus vos, ut sitis filii Patris vestri qui in cœlis est, qui solem suum facit oriri super bonos et malos, et pluit super justos et injustos. Unde alio loco scriptum est : Eritis filii Altissimi, quia ipse benignus est super ingratos et malos. Itaque, quod ait Joannes, « sicut ille est, et nos sumus », de similitudine aliquali et parvula est sumendum : siquidem a divina perfectione deficimus prorsus in infinitum. Et juxta hanc similitudinem imperfectam loquitur Christus : Estote perfecti sicut et Pater *Matth. v, 48.* vester cœlestis perfectus est. Et Dominus per Moysen : Sancti (inquit) estote sicut *Lev. xi, 44.* et ego sanctus sum.

Deinceps docet S. Joannes qualis sit caritas. *Timor non est in caritate, sed perfecta caritas foras mittit timorem, quoniam timor poenam habet.* Sex assignantur timores, videlicet : timor servilis, timor mundanus, timor carnalis, timor naturalis, timor initialis, et timor filialis. Timor servilis est, quo vitatur peccatum seu alicujus offensa, non zelo justitiæ nec boni amore, sed solum formidine poenæ. Timor mundanus est, quo malum vitatur ne res exterior amittatur, puta substantia, lucrum, honor, utilitas. Timor carnalis est, quo malum vitatur ne aliquid adversitatis patiatur homo in corpore suo, vel ne carnali voluptate privetur. Timor naturalis est, quo vitatur malum ne aliquid naturali desiderio contrarium accadat. Timor initialis, quo malum vitatur partim amore boni, partim formidine poenæ. Timor filialis, quo malum vitatur solum ne offendantur dilectus, vel ne quis separetur ab illo. Horum timorum tres primi sunt

vituperabiles, et pœnam habent, quia pœnam merentur : idcirco a caritate totaliter expelluntur, nec simul cum illa stare possunt quoad suum esse completum, sicut nec cetera peccata ex genere suo mortalia; sed quantum ad primos motus incompletumque esse, simul cum caritate, præsertim proficientium, stare queunt. Porro timor pure naturalis, nec laudabilis nec vituperabilis est in se : idcirco nec caritati repugnat, nam et in Christo fuit. Ratione tamen regendus est, ne immoderatus reddatur. Timor autem initialis ac filialis sunt idem realiter, nec differunt nisi penes diversum perfectionis gradum in eadem specie, sicut majus album et minus album. Ideo, sicut timor filialis inseparabiliter conjunctus est caritati, ita et initialis absque caritate non est; sed quanto in aliquo caritas magis perficitur, tanto timor initialis in eo magis decrescit quoad id quod habet de servilitate. Itaque timor servilis, carnalis, mundanus, non est in caritate; timor quoque initialis non est in caritate perfecta, quantum ad id quod habet de servilitate. Ideo dicitur : Perfecta caritas foras mittit, id est, totaliter ejicit, timorem hujusmodi, quoniam timor inordinatus pœnam habet, id est meretur, præsertim in quantum servilis et inordinatus : quod tamen de timore initiali accipiendum non est, quoniam principaliter agit amore boni.

Qui autem timet Deum timore servili aut etiam initiali, non est perfectus in caritate, quæ (ut dictum est) servilitatem timoris prorsus excludit, loquendo de caritate perfecta formaliter, utpote secundum quod talis est. Nihilo minus in viris perfectis inveniuntur primi motus, non in quantum sunt viri perfecti, sed in quantum nondum confirmati in bono, atque humanæ fragilitati subjecti.

Nos ergo diligamus Deum, non solum dilectione naturali, sed etiam, imo et principaliter dilectione infusa et spirituali ac supernaturali, *quoniam ipse prior dilexit nos*. Dilectio equidem Dei ad homines, ad

A quaecumque creaturam, æterna est, nec aliquid novi potest esse in incommutabili Deo. Prædestinatos tamen Deus, specialiter simpliciterque loquendo, ab æterno dilexit; reprobos vero secundum quid. Quum enim diligere sit alicui bonum velle, quidquid boni in creaturis consistit, ex Dei dilectione ad eas profluxit. Verum electis præparavit Deus dona gratiæ in præsentī, et dona gloriæ in futuro : et hoc, pura atque omnino gratuita ad eos dilectione, omne meritum præveniente. Denique hoc B ipsum quod est Deum diligere, est præcipuum donum Dei. Ideo nec id habebimus, nisi Deus nos prior amasset, et ex suo in creato amore amorem creatum, infusum, qui caritas appellatur, nobis dedisset. Nam amor est primum donum, in quo omnia dona donantur. Hinc asserit Christus : Non vos me elegistis, sed ego elegi vos. Sed ob-
Jocann. xv, 16.
Jocid. xvi, 27.
C vocatur.

Si quis dixerit quoniam, id est quod, *diligo Deum* caritate supernaturali infusa, quæ cum mortali stare non valet culpa, *et fratrem suum*, id est quemcumque hominem viatorem, virum seu feminam, fidelem seu infidelem, *oderit*, odiendo personam, non vitia tantum, *mendax est* : quoniam odium est mortale peccatum, ideo simul cum dilectione Dei esse non potest; secundo, quoniam dilectio proximi includitur in dilectione Dei, præsupponitque eam; tertio, quia qui quemcumque odit hominem, præceptum Dei transgreditur, ideo Deum non diligit; quarto, quoniam eadem est caritas habitualis qua Deus proximusque diligitur, eo quod Deus sit ratio diligendi proximum : sicut eadem est fides qua creduntur tam pertinentia ad Christi divinitatem totamque superpræstantissimam Trinitatem, quam pertinentia ad Christi humanitatem et ad alia quædam creata, quoniam veritas increata est ratio credendi in omnibus.

Verumtamen S. Joannes tangit specialem sui dogmatis rationem, subdendo : *Qui enim non diligit fratrem suum quem videt*, id est proximum visibiliter sibi notum, *Deum quem non videt* oculo corporali, nec per essentiam in vita præsenti, nec plene comprehendere potest in patria, quum Deus altissimus omnis creatæ mentis capacitatem in infinitum excedat (est namque infinitæ cognoscibilitatis, sicut et infinitæ actualitatis), *quomodo potest diligere?* Quocirca pensandum, quod duplex ponitur causa dilectionis secundum quod sufficit pro præsenti, videlicet : bonitas et cognitio. Bonitas est causa dilectionis, tanquam objectum ipsius : nil enim diligitur nisi sub ratione boni, aut veri aut apparentis. Cognitio autem est causa dilectionis, tanquam via ad eam, utputa ad actualem dilectionem : quia quod prorsus incognitum est, nequit amari. Quum ergo proximum clarius videamus quam Deum,

A quantum ad hoc, dilectio proximi habet quamdam facilitatem præ dilectione Dei, ita ut quoad hoc, facilius videatur diligere proximum, quamvis absolute loquendo, incomparabiliter majores et etiam plures sint rationes diligendi Deum quam proximum.

Et hoc mandatum habemus a Deo, ut qui diligit Deum, diligat et proximum * ** fratrem suum.* Unde interrogatus Salvator quod est mandatum magnum in lege, respondit : Diliges Dominum Deum tuum ex toto corde tuo, etc. Hoc est primum et maximum mandatum. Secundum autem est simile huic : Diliges proximum tuum sicut te ipsum. Et alio quoque loco ait Salvator : Hoc est præceptum meum, ut diligatis invicem sicut dilexi vos. Homo quippe ad Dei imaginem similitudinemque creatus est : ideo est diligendus, in quantum Dei imagine insignitur, et capax est sui Creatoris per cognitionem atque amorem.

Matth.
xxii, 36-39;
Marc. xii,
28, 30, 31.

Joann. xv,
12.

SERMO PRIMUS

DE COMMENDATIONE ET PERFECTIONE CARITATIS, QUA DEUS PROXIMUSQUE DILIGITUR.

DILIGAMUS Deum, quoniam ipse prior dilexit nos. I Joann. iv, 19.

In præsenti epistola S. Joannes apostolus caritatem multipliciter nobis commendat. Primo, quoniam caritas inest et competit Deo : imo ipsemet Deus est caritas. Et quum tres theologicæ sint virtutes, fides, spes, caritas, sola tamen inter has caritas prædicatur de Deo : non univoce, nec essentialiter illa caritas quæ est theologia virtus, quum illa sit accidens. Tamen ex hoc ipso quod Deus appellatur caritas, elicitur caritatis perfectio supra fidem et spem. Ex eodem quoque concluditur, quod caritas dicit perfectionem simpliciter, nec in sua ratione imperfectionem includit, quemadmodum fides, quæ obscu-

ram importat notitiam, et spes, quæ boni optati includit absentiam. Propter quod fides et spes proprie sumptæ, videlicet prout theologicæ sunt virtutes, nunquam fuerunt in Christo, nec in Beatis qui Deo fruuntur in patria, inveniuntur. Unde, ut ait Anselmus, quidquid absolute loquendo melius est inesse seu habere quam non inesse seu non habere, hoc competit Deo et prædicatur de eo, ut sapientia, justitia, caritas, bonitas, pietas, pax, etc. Si vero objiciatur prædictis, quod etiam in Scripturis Deus spes dicitur, juxta illud Psalmistæ, Domine, spes mea a juventute mea; dicendum, quod spes sumitur ibi pro bono sperato, puta pro suo objecto.

Ps. lxx, 5.

Secundo commendatur caritas, quia præ

ceteris cunctis virtutibus perfectius con-
jungit nos Deo, ita quod facit hominem
habitare in Deo et Deum in homine, juxta
verbum Joannis dicentis : Qui manet in
caritate, in Deo manet, et Deus in eo. Ecce
quanta est dignitas caritatis, et quantum
caritas ipsa dignificat hominem quem in-
format ; quam ineffabilis dignitas est ho-
minis habitare in Deo, et Deum habere
habitantem in se. Hinc dicit S. Thomas in
secunda secundæ : Caritas mentem perfe-
ctissime Deo conjungit, et Deum, qui est
actuum humanorum summa regula ac
mensura, directe secundum quod in se
est, immediate attingit. Idcirco est summa
virtus : id enim quod est per se, est dignius
illo quod est per aliud. Fides autem et
spes nos non uniunt Deo, nec ipsum attin-
gunt, nisi secundum quod ab ipso prove-
nit nobis aliquid in hac vita, videlicet co-
gnitio veri et adeptio boni. Sed his objeci
potest, quia etiam ratione fidei et spei di-
citur Deus habitare in nobis, dicente Apo-
stolo : Deus det vobis secundum divitias
gloriæ suæ, habitare Christum per fidem
in cordibus vestris ; et Psalmista, Domine
virtutum, beatus homo qui sperat in te.
Sed nullus beatus est, nisi quem Deus in-
habitat. Et respondendum, quod nec fidei
nec spei competit istud nisi per caritatem,
et non per se : ideo auctoritates præactæ
atque consimiles, intelligendæ sunt de fi-
de formata et spe formata, non de infor-
mibus fide et spe.

Tertio caritas commendatur a suo effe-
ctu, quoniam aufert horrorem futuri ju-
dicii, et facit cum securitate et familiari
fiducia præstolari diem tam particularis et
proprii quam universalis et extremi judi-
cii, imo et cum desiderio adspirare ad il-
lud, quemadmodum scriptum est : Sitivit
anima mea ad Deum fortem, vivum ; quan-
do veniam et apparebo ante faciem Dei ?
Unde Apostolus, Cupio (inquit) dissolvi :
quod nullus rationabiliter cupit, qui tre-
pidat judicari. Hinc sanctus dixit Martinus
diabolo : Nihil in me, funeste, invenies ;
Abrahæ me sinus suscipiet.

Quarto caritas commendatur, quia præ
ceteris virtutibus Deo perfectius nos con-
format. Nam ut divinus Dionysius scribit,
sol iste corporalis visibilis est evidens Dei
imago : quoniam sicut sol iste absque
prævia ratiocinatione et deliberatione, ex
plenitudine suæ lucis universis suæ illu-
minationis capacibus radios suæ claritatis
infundit, et unumquodque juxta suam ca-
pacitatem illustrat, replet et ornat ; sic sol
invisibilis, Deus omnipotens, ex suæ boni-
tatis immensitate omni creaturæ bonita-
tem suam juxta illius capacitatem seu di-
gnitatem communicat, et multa beneficia
cunctis impendit, tam ingratissimis, perversis
ac reprobis, imo et infidelibus, quam gra-
tis, bonis ac electis. Hanc Dei bonitatem,
liberalitatem et pietatem facit caritas in-
fusa perfecta homines sequi, ita quod om-
nes caritate ista succensi, omnibus quod
habent et sunt communicare parati exsi-
stunt, omnium cordialissime optant salu-
tem, et orant pro universis, omniumque
deplorant peccata, ad inimicos et persecu-
tores ac irrisores amorose, benigne ac dul-
citer afficiuntur ; et quanto majorem ab
illis patiuntur injuriam, tanto plus condo-
lent eis, et miserantur eorum insaniam,
atque pro eis precantur. Ita caritas perfe-
cta transformat cor in bonitatis affectum
et in viscera pietatis ac suavitatis.

Quinto caritas commendatur ex delecta-
tione spirituali sibi in actibus suis annexa.
Nulla etenim virtus, nulla forma, tam
prompte ac delectabiliter operatur ut ca-
ritas : ideo servilem timorem excludit.
Nam timor ille pœnam habet etiam in hac
vita annexam, quia cum labore et affli-
ctione ac tædio abstinet ac retrahit a pec-
catis, eo quod solum serviliter timens di-
ligat vitia, a quibus solo pœnarum terrore
se abstrahit. Porro caritas amore dilecti
inclinat et trahit ad bene agendum, dete-
staturque vitia et odit peccata, atque ad
omne bonum honestum inducit. Ideo prom-
pte ac dulciter operatur, et jugum Dei fa-
cit suave, onusque leve ; imo et in adver-
sis facit gaudere et gratias agere, ac fateri

Rom. viii,
18.

illud Apostoli : Non sunt condignæ passion-
nes hujus temporis ad futuram gloriam.

Sexto caritas commendatur, quia ad
omnium observantiam præceptorum in-
ducit. Qui enim veraciter diligit Deum,
cupit ejus honorem, ideo ejus implet præ-
cepta.

I Joann. iv,
19.

Quum ergo tam multipliciter commen-
dabilis sit caritas sancta, eam totis viribus
diligamus, quæramus, custodire, nutrire,
perficere eam in nobis non negligamus;
et juxta apostolica documenta, diligamus
Deum, quoniam prior dilexit nos. Quem-
admodum etenim magnæ bonitatis et per-
fectionis est, inimicos et adversantes sin-
cere et absque renisu diligere; sic grandis
duritiæ et detestandæ malitiæ est, diligen-
tem et beneficientem non redamare. Et
ecce quanta est iniquorum perversitas, in-
gratitudo, duritia, qui quum indesinenter
beneficiis Dei utantur ac sustententur, imo
et Dei omnipotentia conserventur in esse
et tolerantur, nihilo minus ingratis-
sime exstant Domino Deo, nec prævia ejus dile-
ctione ad redamandum emolliuntur.

Sed quæri hic potest, quid sit Deum di-
ligere. Et respondendum, quod quum dili-
gere sit alicui bonum velle, et summum
bonum sit ipsemet Deus, idcirco Deum di-
ligere, est Deo velle quod ipse est, volendo
ei suam omnino immensam bonitatem,
perfectionem, felicitatem, sapientiam, om-
nipotentiam, pulchritudinem, majestatem.
Et quoniam Deo debetur a suis creaturis
maximus honor ac congruus cultus, idcir-
co Deum diligere, est etiam velle et sata-
gere ut ipse ab omnibus hominibus debite
honoretur, jugiter et colatur. Propter quod
asserit Augustinus, quod ille in Dei amore
est major sive perfectior, qui plures trahit
ad ipsius amorem. Sic itaque Deum fervi-
de diligamus, et intima congratulatione ac
complacentia velimus ei quod ipse est, et
quod habet, atque quod ei debetur. Quod
non facit nisi qui in primis personaliter
Deum honorat, ei in omnibus obediendo,
deinde verbis, orationibus, scriptis vel ex-
emplis, ac virtuosis operibus, alios ad idem

A trahendo secundum quod potest et status
suus permittit aut exigit.

Præterea, quoniam sine dilectione pro-
ximi non potest haberi dilectio Dei, ne-
quaquam omittamus omnes diligere pro-
ximos, quantumcumque perversos, adver-
sarios sive incredulos : primo, quoniam
Deus hoc jussit et exigit; secundo, quia
proximi omnes ad Dei imaginem et simili-
tudinem sunt creati; tertio, quia pro ipso-
rum salute occisus est Filius Dei, et adhuc
capaces sunt fructus et meriti passionis
Christi; quarto, quoniam aliter salvari non
possumus; quinto, quia per hoc magnam
valde gratiam in vita hac promeremur,
copiosam quoque in cœlo gloriam sortie-
mur; sexto, quoniam Christus et Sancti
omnes hoc nobis implendum suis osten-
derunt exemplis, quia et Christus in cruce
pendens pro suis intercessit crucifixoribus
crudelissimis nimis.

Postremo quæritur circa prædicta, an
caritas in hac vita possit esse perfecta. Et
respondendum, quod caritas potest dici
perfecta, uno modo, ex parte diligibilis
seu objecti, ut quum illud in tantum di-
ligitur sicut diligibile exstat. Deus autem
est pura infinitaque bonitas : idcirco est
infinite amabilitatis. Et hoc modo caritas
infusa non est nec esse potest perfecta in
quacumque mente creata, nec in hac vita,
neque in patria; sed ipse supergloriosissi-
mus Deus infinite amabilior est quam pos-
sit a creaturis amari, ipseque solus se
ipsum perfecte amat. Secundo, caritas po-
test dici perfecta ex parte subjecti sive
amantis, quando videlicet aliquis secun-
dum totum posse suum diligit Deum. Et
hoc tripliciter accidit. Primo, dum aliquis
toto corde indesinenter actualiter fertur
in Deum. Et ista est perfectio patriæ, quæ
in via haberi non potest propter infirmita-
tem vitæ humanæ, quoniam teste Scriptu-
ra, Corpus corruptibile aggravat animam,
et deprimit terrena inhabitatio sensum
multa cogitantem. Secundo, contingit istud
dum aliquis totum studium suum ordinat
ad vacandum Deo et spiritualibus rebus,

Sap. ix, 15.

vitando ea quæ unionem mentis cum Deo A impediunt, scilicet exteriora et carnalia, voluntatemque propriam. Et ista est perfectio caritatis religiosorum et eorum qui evangelicæ legis servant consilia, perfectorumque hominum. Tertio, istud contingit dum quis totum cor suum habitualiter ponit in Deo, ita quod nihil Deo aut ejus præceptis contrarium velit aut cogitet cum consensu. Et ista caritatis perfectio, quæ tamen improprie appellatur perfectio caritatis, est omni caritatem habenti communis, et specialiter spectat ad eos qui B præcepta servare contenti sunt.

Ponitur quoque triplex gradus caritatis, videlicet incipientium, proficientium, perfectorum. Primo enim incumbit homini ut recedat a malo, et concupiscentiis pravis resistat : et hoc ad caritatem incipientium pertinet. Secundo incumbit homini principaliter occupari circa profectum in

bonis : quod ad proficientium pertinet caritatem. Tertio spectat ad hominem ultimo fini, utpote Domino Deo, dulciter ac fervide inhærere et in ipso quiescere, ipsoque frui quantum huic statui est possibile : quod ad caritatem pertinet perfectorum.

Legitur in Vitaspatrum, quod quadam vice, sanctus abbas et eremita nomine Ammonius venit et visitavit S. Antonium. Quumque de Deo et spiritualibus rebus atque virtutibus loquerentur, S. Ammonius inter cetera dixit B. Antonio : Cur nomen tuum sic divulgatum est et famosum magis quam nomen meum, quum tamen omnia quæ tu facis faciam etiam ego? Jejuno enim, vigilo, oro, laboro ut tu. Respondit S. Antonius : Quia plus diligo Deum quam tu. Postmodum, moriente S. Ammonio, beatissimus pater Antonius vidit animam ejus ab angelis ferri in cælum.

ENARRATIO IN EVANGELIUM

HOMO QUIDAM ERAT DIVES, QUI INDUEBATUR PURPURA ET BYSSO. LUC. XVI, 19-31.

HODIERNO in evangelio ponit Salvator C terribile exemplum contra eos qui gulæ ac avaritiæ sunt subjecti, et opera misericordiæ non exercent. Et idem exemplum est consolatorium valde pro pauperibus et infirmis in hoc mundo despectis, qui in tribulationibus suis patientiam habent. Ait itaque Christus : *Homo quidam erat dives* in terrenis et exterioribus rebus, pauper in anima, quia virtutibus carens, imo pauperrimus, quoniam vitiis fuit plenus. Non ait Evangelista, quod istud sit parabola : ideo dicunt expositores, quod D vere sit res gesta. *Qui induebatur purpura* : quæ est regia vestis, qua utebatur pro gloria vana ; *et bysso*. Byssus est vestis candidissimi atque mollissimi lini, in Ægypto dumtaxat nascentis. Byssus itaque in-

duebatur ad carnem, propter byssi molli-
tiem. *Et epulabatur quotidie splendide*, id est crapulose et delicate, excedendo in ciborum ac potuum multiplici varietate, exquisita præparatione, consumptione pretiosa, in vasorum quoque pretiositate atque decore. Hunc divitem epulonem sequuntur nunc homines molles, carnales, voluptatis amatores magis quam Dei. Quibus dicit Jacobus : Epulati estis super terram, et in
luxuriis enutristis corda vestra. Quibus timendum est illud Apostoli : Si secundum
carnem vixeritis, moriemini, morte utique
damnationis æternæ. O quam multi enormiter excedunt in istis ! quorum quum satisfactum fuerit naturæ, unius cibi aut duorum acceptione, jam tertium ferculum
apportatur, sicque appetitus de novo ad

Jacob. v, 5.

Rom. viii, 13.

gulam et voracitatem infeliciter provocatur. Tales divina illuminatione se reddunt indignos, propriam vitam abbreviant, sanitate se privant. Natura quippe paucis contenta est, et superfluitate obruitur atque gravatur. Ideo princeps Apostolorum: Obsecro (inquit) vos abstinere a carnalibus desideriis, quæ militant adversus animam.

Et erat quidam mendicus nomine Lazarus. Non divitis epulonis, sed egeni et ulcerosi proprium nomen Christus expressit: quoniam pauperem istum per approbationem cognovit, et nomen ejus in libro vitæ seu prædestinationis æternæ habuit scriptum; divitem vero nescivit, id est, per approbationem non novit, quemadmodum Christus de reprobis loquens affirmat: Tunc confitebor illis, Quia nescio vos. Hinc Moysi viro electo ait Dominus: Te ipsum novi ex nomine. Ecce quomodo alia sunt judicia Dei, alia mundi, et quomodo sapientia sæculi hujus stultitia est apud Deum. Certe apud hunc mundum immundum, hoc est apud homines carnales, mundanos, magis famosa et nota sunt nomina divitum ac potentium quam infirmorum ac pauperum; sed apud Deum est econverso. Hinc Unigenitus Dei testatur: Quod hominibus altum est, abominatio est apud Deum. Porro, ex hoc quod Christus pauperem istum ex nomine certo designat, conjicitur istud esse res gesta, secundum Ambrosium. Itaque, quoniam divites nomina sua in hoc mundo magnificant (juxta illud Psalmistæ: Vocaverunt nomina sua in terris suis), et se ipsos exaltando obliviscuntur Domini Dei sui, ideo Deus delet nomina eorum de libro vitæ, et obliviscitur eos. Hæc tamen intelligenda sunt de divitibus qui suis abutuntur divitiis, eas inordinate amando, vel avare servando, aut injuste expendendo, seu indebite ac impie acquirendo.

Qui jacebat ad januam divitis. Ex quo constat, quod infirmus ac debilis fuit; et dives se per ignorantiam excusare nequivit, quoniam intrans et exiens illum adspe-

xit. *Ulceribus plenus*, tanquam alter Job: id eo miserabilior erat, magisque impium fuit ei non subvenire. *Cupiens saturari de micis quæ cadebant de mensa divitis, et nemo illi dabat.* Ex quibus patent humilitas et patientia valde magna hujus leprosi, quia minima cupiebat, et eis fuisset contentus. Ex his etiam elicitur verbis, quod non solum hic dives, sed ministri quoque ipsius, duri immisericordissimique fuerunt, qui infirmo, egeno, famelico, tam parva negabant. Crudeles namque et immisericordes domini, habere solent familiam sibi consimilem, juxta illud Ecclesiastici: Secundum judicem populi, sic et ministri ejus. Salomon quoque fatetur: Rex impius omnes ministros habet injustos. Subditi namque facere solent voluntatem superiorum suorum. *Sed et canes divitis veniebant, et lingeabant ulcera ejus.* Sicque canes benigniores fuerunt pauperi huic quam dives et ejus familia. Canes quippe naturali magisterio linguæ suæ, ulceribus pauperis impendebant medelam, quem dives contra naturale jus contempsit. Dives etiam suis canibus beneficentior fuit quam Lazaro. Et heu, quam multi usque hodie tales sunt, qui pauperes adspicere vix dignantur, aut ex eorum adspectu gravantur! Qui illud Jacobi advertant ac paveant: Judicium sine misericordia illi qui non fecerit misericordiam.

Factum est autem ut moreretur mendicus, id est, non casualiter, sed Deo sic disponente, contigit pauperem istum mori, ut liberaretur a miseriis vitæ præsentis. Deus enim unicuique præfixit certum tempus vivendi, quemadmodum Job dicit Deo: Constituisti terminos ejus qui præteriri non poterunt. *Et portaretur ab angelis*, id est, anima ejus ab angelis sanctis honorifice duceretur, *in sinum Abrahamæ*, id est ad secretam illam quietem Sanctorum in limbo patrum, quæ per sinum Abrahamæ designatur. Per sinum namque quies exprimitur: qui dicitur Abrahamæ sinus, non quod ipsius fuerit tantum, aut quod ipse primus in limbum illum descendit, sed

1 Petr. II, 11.

Matth. VII, 23.

Exod. XXXIII, 17.

1 Cor. III, 19.

Luc. XVI, 15.

Ps. XLVIII, 12.

Ecclesi. X, 2.

Prov. XXIX, 12.

Jacob. II, 13.

Job XIV, 5.

quoniam ipse specialiter pater credentium A multarumque gentium appellatur, secundum illud ad Galatas : Qui ex fide sunt, hi sunt filii Abrahæ. Laudatur etenim Abraham specialiter de magnitudine fidei suæ.

Galat. iii, 7. *Rom. iv, 18, 19, 21.*

Propter quod dicit Apostolus, quod contra spem in spem credidit, et quod non est infirmatus in fide, sed plenissime credidit. Hinc ait Augustinus : Sinum Abrahæ intelligo remotam sedem quietis atque secretam, ubi exstitit Abraham : quæ ipsius dicta est, non quod ipsius sit solum, sed quoniam ipse ibi multarum gentium pater est positus, quibus est ad imitandum fidei principatum præpositus. Verumtamen, secundum Petrum Ravennensem, dicitur sinus Abrahæ, propter hospitalitatis officium, in quo Abraham fuit excellens, ita quod et nunc se beatum quasi non crederet, si a suo cessaret hospitalitatis officio. Præterea, quoniam Abraham nunc de limbo inferni ad cœleste translatus est regnum, nunc per sinum Abrahæ significatur quies Sanctorum in patria. Unde S. Martinus dixit : Abrahæ me sinus suscipiet. Ecce quam salubre est in sæculo isto egere, infirmari, contemni, dummodo propter Deum patienter quis ferat. Patientia equidem opus perfectum habet. Et utique ad deportationem animæ Lazari unus suffecerat angelus, sed ut ait Chrysostomus, multi angeli advenerunt, ut chorum lætitiæ facerent, et pauperis animam abundantius consolarentur ac honorarent. Merito quippe huic egeno angelica exhibebantur obsequia, cui negata erant humana.

Cf. p. 129 D.

Jacob. i, 4.

Ezech. xxxii, 18 et seq.

Mortuus est autem et dives, morte naturæ, qua anima separatur a corpore, et morte culpæ, qua separatur a Creatore, morte quoque infernalis miseriæ, qua separatur anima a superna felicitate; et sepultus est in inferno : id est, anima ejus in profundo infernalium collocata est tormentorum, et infra terram quasi in tumulo clausa, sicut in Ezechiele propheta sepulera regum Ægypti et Assur ac aliorum dicuntur in inferno consistere in gyro eorum. Ibi sepeliuntur parochiani diaboli.

Quemadmodum autem parochianus Dei vocatur, qui ejus Baptismo intinctus est, ei que primitias solvit ac decimas, et Horas ejus ac Missas audit libenter, propter quod moriens dignus est in ipsius cœmeterio sepeliri, videlicet in terra consecrata, quantum ad corpus, atque in cœlo constitui quantum ad animam; sic parochianus fertur diaboli, qui aquis concupiscentiarum intingitur, et primitias seu exordia operum suorum offert diabolo, agens quæ ei sunt placita, bonaque temporalia vitiose consumit, et cantilenis mundanis, verbis scurrilibus, detractoriis et iniquis quasi diaboli Horis intendit : ideo moriens sepelitur in cœmeterio infernali, sepultura asini, hoc est sine honore. Merito ergo ait Psalmista : Mors peccatorum pessima; et iterum : Sicut oves in inferno positi sunt, mors depascet eos.

Jer. xxii, 19.

Ps. xxxiii, 22.
Ps. xlviii, 15.

Porro infernus quatuor modis accipitur, secundum quod quatuor erant loca inferni. Primo, pro loco damnatorum, qui est infimus locus inferorum : de quo ait Propheta, In inferno autem quis confitebitur tibi? Secundo, pro loco purgatorii : sicque orat Ecclesia, Domine Jesu Christe, libera animas fidelium defunctorum de pœnis inferni. Tertio, pro limbo puerorum, id est infantium ab originali peccato non mundatorum. Quarto, pro limbo patrum, qui fuit superior locus inferni : ad quem limbum Christus descendit; ad quem etiam limbum descenderant animæ puerorum ab originali peccato purgatorum; animæ quoque satis punitæ ingrediebantur limbum illum usque ad tempus dominicæ resurrectionis.

Ps. vi, 6.

Elevans autem oculos suos interiores, id est, altiora considerans : nempe quum sola divitis anima fuerit ibi, corporales oculos nec habuit nec levavit; quum esset in tormentis damni et sensus, videlicet in carentia beatificæ visionis Dei, atque in sensibilibus suppliciis tartari. Est enim in illis æternaliter condemnatis valde multiplex dolor, ex horribili dæmonum visione, ex certa gravioris pœnæ futuræ expecta-

tionem, quia post generalem resurrectionem A punientur in anima et corpore, ex verme conscientiae, ex certa cognitione irrecuperabilis suae damnationis, et desperatione omnis salutis. Nec tantum torquentur ab igne tartareo, quantum puniuntur in mente, eo quod sciunt nunquam se liberandos, ut scribit Albertus. *Vidit Abraham a longe*, id est, consideravit eum esse in loco alte super se posito : quia non solum dissimilitudine, sed et locali distantia inter se distabant loca praefata, videlicet limbus patrum, infernusque damnatorum. Itaque huic diviti condemnato intellectum dedit vexatio. Propter quod ait Gregorius : Oculos quos clausit hic culpa, ibi aperuit poena. In hac etenim vita pravis delectationibus mente caecatus, non consideravit supplicia impiorum ac gaudia Beatorum. *Et Lazarum in sinu ejus*, id est, in praefata quiete et certa expectatione felicitatis aeternae, in qua Abraham fuit.

Is. xxviii,
19.

Quocirca scribit Gregorius, quod damnati usque ad diem iudicii Sanctos super se attendunt et vident in gloria, non autem post diem iudicii. Quod qualiter intelligendum sit, Lyra majorum iudicio se committere perhibet; et addit, quod ex hoc loco non habetur sufficiens argumentum quod damnati videant gloriam Beatorum usque ad diem iudicii, ut sonare videntur verba Gregorii, quia Salvator narrat hic rem gestam ante suam passionem, quando Abraham nondum fuit in gloria. Sed Nicolaus de Gorra aliquo modo eluciddat verba Gregorii, dicens : Videre requiem seu gloriam Beatorum contingit dupliciter : primo in generali, ita ut damnati cogitent Sanctos esse in quiete et gloria, sed in quali non vident; secundo in particulari, ita quod videant qualis sit gloria electorum. Primo modo reprobi usque ad diem iudicii vident gloriam Beatorum, non autem secundo modo. Nec tamen de huiusmodi visione laetantur, sed contristantur, tam ex alienae felicitatis invidia, quam ex illius quietis carentia. Post diem vero iudicii, ita ad proprias poenas eorum con-

sideratio reflectetur, quod de gloria Sanctorum non cogitabunt.

Sed contra haec objici posset, quia in reprobis etiam post diem iudicii in aeternum permansura est poena damni, quae ex consideratione est felicitatis amissae : ergo et post iudicium cogitabunt iniqui de felicitate caelesti, quam scient se amisisse et electos obtinuisse. Praeterea, quidquid ad augmentum cumulumque miseriae pertinet, post diem iudicii in reprobis permanebit, potiusque augebitur quam minuetur : si ergo praetacta visio gloriae electorum auget miseriam damnatorum, deberet praesertim post diem iudicii in eis manere. Insuper Thomas super quartum Sententiarum affirmat, quod consideratio eorum quae miseriam possunt augere, permanet in damnatis, nec vehementia poenae illorum considerationem illam absorbet : si itaque consideratio beatitudinis electorum auget tristitiam reproborum, manebit in aeternum in eis, nec per vehementia poenae tolletur. Postremo multorum damnatorum poena major est nunc, quam quorundam damnatorum poena post diem iudicii erit. Si ergo horum poena non impedit eos ante iudicium a visione gloriae electorum, ergo poena illorum post diem iudicii, minus impedit eos post horam iudicii a visione huiusmodi. Posset etiam addi, quod multi reprobi in hac vita agnoscunt gloriam Beatorum consistere in clara per speciem visione divinae essentiae : ergo et post mortem positi in inferno poterunt hoc cogitare, et qualis sit gloria Beatorum in speciali pensare, praesertim quum cogitatio talis esset in eis calamitatis augmentum. Multa similia possent hic introduci, quae potius pertranseunda opinor, ne incerta pro certis conscribam.

Et ipse clamans : juxta illud Isaiae, Clamabitis praedolore cordis, et praedcontritione spiritus ululabitis. Verumtamen iste clamor spiritualis fuit atque interior, utpote affectio vehemens. *Dixit : Pater Abraham*. Patrem vocat, cujus virtutes imitari neglexit : idcirco indignus fuit eum vocare

Is. lxxv, 11.

Joann. viii,
39, 44.

patrem, quamvis carnalem ab eo sumpsit A originem. Unde Christus ait Judæis : Si filii Abrahæ estis, opera Abrahæ facite ; vos ex patre diabolo estis. Itaque si dives iste in pauperes pius, liberalis ac hospitalis fuisset, Abraham merito patrem vocasset. *Miserere mei*. Quum damnati sint in vitiis obstinati, nec unquam vere pœniteant, quomodo sibi optant ac postulant misereri ? Dicendum, quod de peccatis suis non pœnitent in quantum sunt offensiva Dei et deformitatem habentia, sed in quantum sunt eis causa tanti supplicii. Sed et dives iste petiit sibi misereri quantum ad pœnæ mitigationem, non quantum ad culpæ ablationem. Nam addidit :

Et mitte Lazarum, id est, dirige eum ad me, *ut intingat extremum digiti sui in aquam*, id est, ut saltem modicum quid subventionis seu relevaminis mihi impendat. Christus autem hoc loco, spiritualia per corporalia metaphorice exprimit, ut communitas plebis intelligat, quæ spiritualia in sua simplicitate non capit. *Et refrigeret linguam meam* : in qua quoniam C magis peccavit, tam per delectationes gustus in cibis ac potibus, quam per verba inania, quæ abundant in crapula, ideo magis petivit relevamen suæ pœnæ in lingua.

Sap. xi, 17.

Per quæ enim quis gravius peccat, per hæc et in his magis punitur. *Quia crucior in hac flamma*. Qualiter incorporei spiritus ab igne corporeo affligantur, Gregorius in Dialogo, Augustinus super Genesim, et doctores scholastici super quartum Sententiarum describunt. Communis vero responsio est, quod ignis ille, in quantum divinæ instrumentum justitiæ spiritus torquet damnatos, quemadmodum aqua Baptismi agit in animam ut divinæ misericordiæ instrumentum.

Et dixit illi Abraham. Secundum Augustinum, quod in corporalibus facit situs, hoc in spiritualibus agit ordo. Idecirco locutio animarum et angelorum ad invicem, intelligenda est fieri per conversionem eorum ad invicem spiritualement. *Fili*, carnis propagatione, non virtutum imita-

tione, *recordare quia recepisti bona temporalia*, divitias, delicias et honores, *in vita tua* super terram transacta : in qua si aliquid de genere operum bonorum egisti, mercedem tuam ultra condignum sortitus es. Nullum enim bonum pius justusque Deus irremuneratum relinquit. *Et Lazarus in vita sua recepit similiter mala* pœnalia, utpote paupertatem, infirmitates, famem, sitim, opprobria et contemptum, per quæ culpæ ejus quotidianæ quasi per ignem purgatæ sunt. Pauperes B ergo, et si defectuosi appareant, non tamen spernendi sunt, quia fortassis pro culpis suis in hac vita castigantur et purgantur a Deo per eam quam sustinent paupertatem. Porro divitibus, etiam si boni sint, omnino timendum est ne forsitan pro bonis quæ agunt, in præsentia a Deo remunerationem accipiant. Hinc Gregorius Boetiusque testantur, quod quamvis occulta sint Dei judicia, dum reprobis prospera, et electis adversa in præsentia eveniunt vita, secretiora tamen sunt, dum electis C prospera, ac reprobis nunc contingunt adversa. Magis itaque in adversis quam prosperis est gaudendum. Propter quod Jacobus ait : Omne gaudium existimate, fratres, *Jacob. i, 2.* quum in varias tentationes incideritis.

Nunc autem hic consolatur in certa expectatione felicitatis æternæ, *tu vero cruciaris* cruciatu perpetuo. Quemadmodum autem omnis delectatio vitæ præsentis momentanea est comparatione beatitudinis sempiternæ, ita et omnis afflictio in hac vita momentanea est, si ad retributionem comparetur futuram. Potius ergo eligamus cum Lazaro nunc adversitatibus exerceri, et per eas purgari, ut post vitam hanc a Deo misericordiam consequamur, quam cum divite prosperari, ne æternaliter condemnemur : quemadmodum ad Hebræos Apostolus scribit de beatissimo Moyses, quod magis elegit cum populo Dei affligi, quam temporalis peccati habere jucunditatem ; adspexit enim in remunerationem.

Hebr. xi, 25,
26.

Et in his omnibus, id est inter ea quæ

pertinent ad hujus rei de qua profamur A materiam, *inter vos et nos chaos magnum*, id est grandis distantia meritorum ac statuum tenebrosique loci, *firmatum est*, id est irremovibiliter constitutum rigore divinæ justitiæ, quæ post vitam præsentem non dat pœnitentiæ locum, secundum legem communem; *ut hi qui volunt hinc transire ad vos, non possint*, hoc est, vobis auxiliari non valeant. Sancti quippe post vitam hanc ita sunt divinæ conformati justitiæ, quod damnatis subvenire nec possunt nec volunt, loquendo de voluntate deliberativa et practica : quamvis voluntate naturalis cujusdam pietatis, eis, præsertim propinquis et benefactoribus ac olim carissimis, succurrere vellent, si esset possibile. Istud vero non posse, eorum beatitudini non repugnat; sicut et non posse peccare, eorum potestati et libertati non derogat. — Quæritur, an Beati possint in infernum descendere, et an poterunt hoc corporibus reassumptis et glorificatis. Et videtur quod imo, quoniam Augustino atque Anselmo testantibus, quocumque esse voluerit spiritus, obediet protinus corpus per dotem agilitatis; nec corporum spissitudo obstat, neque distantia ulla impedit. Et respondendum, quod possunt et poterunt quandocumque voluerint. Nec obstat quod dicitur hic, « *inter vos et nos chaos magnum firmatum est, ut qui volunt hinc transire ad vos, non possint* », quia hoc intelligendum censetur de transitu ad subveniendum. Hoc etiam dictum fuit antequam Sancti in limbo detenti felicitatem adepti sunt.

Neque inde huc transmeare, hoc est, damnati ad locum et societatem Sanctorum non queunt ascendere, quia non pœnitent; sed inconvertibiliter in illa manent aversione et prava affectione, in qua recesserunt a corpore, juxta illud Ecclesiastæ : Si ceciderit lignum ad austrum aut ad aquilonem, in quocumque loco ceciderit, ibi erit. Hinc, secundum Damascenum, quod angelis est ruina, hoc hominibus est mors. Dicit autem Gregorius, dubium nul-

lum esse quin damnati vellent ad locum atque consortium Beatorum ascendere, si esset possibile.

Sed contra hoc argui potest, quia secundum hoc, damnati non manerent in aversione sua a Deo, neque in prava affectione qua se ad carnalia et caduca finaliter converterunt. Præterea, tam vehementissime odiunt Deum, quod non cupiunt ei uniri, nec esse cum ipso. Thomas quoque allegat Augustinum dicentem, quod damnati non cupiunt veram felicitatem, sed detestantur B omne bonum honestum, quum sint obstinati in malo. Insuper, S. Brigitta in Revelationibus suis scribit, quod anima quædam perversa, tribunali Christi oblata, dixit ad eum : Quamvis possem salvari, tamen non vellem, ne tu consolationem aut gaudium habeas de me. Cui alludens qui adstabat diabolus : Talis (inquit) etiam mea voluntas est. — Ad hæc breviter respondetur, quod sicut damnati maluerunt in hac vita frui bonis creatis, caducis et vanis, quam summo et incommutabili bono; C ita æternaliter post hanc vitam manet in eis hæc perversa voluntas, mallentque turpiter delectari, quam Deum sinceriter contemplari. Nihilo minus tanta eorum est afflictio, quod mallent cum Beatis esse in cœlo, quam cruciari taliter in inferno, in quantum per hoc suas evaderent pœnas, et proprium commodum consequerentur, non in quantum hoc esset ad honorem et gloriam Dei. Sicque per hæc facile est quæ allegata sunt concordare.

D Præterea præinductis objici posset, quod quidam Sanctorum leguntur quosdam in mortalibus peccatis defunctos ab inferis liberasse, sicut et S. Martinus quemdam suscitavit a mortuis, qui laqueo se suspendit; damnati quoque frequenter leguntur vivis apparuisse. Et respondendum, quod nullus per sententiam definitivam damnatus, liberari potest aut egredi de inferno tanquam non reversurus in illum; verumtamen per dispensationem divinam potest ad tempus exire ac apparere : imo in die

judicii omnes exhibunt, mox infelicius ruituri in pristinum lacum.

Et ait : Rogo ergo te, pater, ut mittas eum, scilicet Lazarum, in domum patris mei : habeo enim quinque fratres ; ut testetur, id est, firmiter dicat, illis ac prædicet pertinentia ad salutem et quid mihi acciderit ; ne et ipsi veniant in locum hunc tormentorum, scilicet in infernum,

Job x, 21, 22.

qui ut sanctus Job ait, est terra tenebrosa, et operta mortis caligine, terra miseriæ et tenebrarum, ubi umbra mortis, et nullus ordo, sed sempiternus horror inhabitat. B Cælum autem locus est gaudiorum, et mundus iste locus est meritorum ac demeritorum, tristitiarum ac consolationum. Denique dives damnatus ista petivit nequaquam ex caritate, sed ex servili timore, ne sua augeretur afflictio ex fratrum suorum damnatione, quorum socius fuit in vitiis, quibus et vitiosæ vitæ reliquit exempla, materiamque peccandi. *Et ait illi Abraham : Habent Moysen et Prophetas, hoc est libros Moysis et Prophetarum, in quibus de credendis et agendis ac vitandis docentur ; audiant illos auribus cordis, id est, obediant eis.*

At ille dixit : Non, pater Abraham, id est, Moysen et Prophetas non audiunt. Ista dives iste damnatus agnovit ex recenti sensatorum memoria, seu conjectura, ex

A consideratione sui judicando de aliis. Porro, ex eo quod Abraham de fratribus divitis dixit, « Habent Moysen et Prophetas », elicitur quod dives iste ac fratres ipsius Israeliticæ stirpis fuerunt. *Sed si quis ex mortuis ierit ad eos, pœnitentiam agent, quia ex inconsueta apparitione et exhortatione ipsis specialiter facta, fortius movebuntur.* Sed frequenter contingit oppositum : nam et hujusmodi apparitiones sæpe judicantur phantasticæ ; et quamvis ad horam aliquos moveant, multoties tamen tempore procedente, parum fructificant.

Hinc subditur : *Et ait illi Abraham : Si Moysen et Prophetas, qui tantæ sanctitatis et auctoritatis fuerunt, non audiunt, obediendo eorum documentis ac jussis, neque si quis ex mortuis resurrexerit, et ad eos transierit, credent ei, præsertim credulitate procedente in actus virtutum usque in finem.* Unde Judæi, tempore Christi, Lazaro fratri Mariæ et Marthæ suscitato non solum non crediderunt, sed eum insuper occidere decreverunt, pro-
ut apud Joannem legitur. Mortuis quoque, qui resurrexerunt cum Christo, et multis in sancta civitate Jerusalem apparuerunt, Christum resurrexisse testantibus, non crediderunt obstinatissimi illi Judæi, sed nec Christo tot miraculis coruscanti.

Joann. xii, 10.

Matth. xxvii, 52, 53.

SERMO SECUNDUS

CONTRA PROSPERITATEM MUNDANAM, ET DE CONTEMPTU HUIUS MUNDI.

VÆ vobis divitibus, qui habetis consolationem vestram. Luc. vi, 24.

Hæc est veritas et doctrina sapientiæ christianæ, quod propter primorum parentum primordiale peccatum tota eorum posteritas paradiso terrestri expulsa est, cœlestis quoque paradisi felicitate et gloria fuit privata, sed per Christi passionem

D redempta est. Quoniam itaque peregrini sumus in sæculo isto, videlicet a terrestri^{15.}

paradiso ejecti, et ad cœlestem paradysum pergentes, oportet ut instar peregrinorum et exsulum nos habeamus, si ad cœlestis paradisi patriam pertingemus. Porro peregrini et exsules non diu in uno loco quiescunt ; et gravia onera ferre devitant ; ad

1 Par. xxix,

patriam suam suspirant; de recta via inquirunt; ne spolientur aut capiantur, vel a latronibus trucidentur, solliciti sunt; bonam et expeditam societatem libenter habent; ita se vestiunt, alunt, repaasant, et de expensis sic provident, ut ad itinerandum sint expediti. Omnes has proprietates habere debet quilibet Christianus, quum sit viator ad patriam tendens cœlestem.

Primo igitur, sicut peregrinus non diu in uno quiescit loco, sed solum tamdiu ut corporis sui necessitas aut alia rationabilis exigit causa; sic quilibet Christianus non diu in una et eadem mentis dispositione debet persistere, sed omni hora in exercitiis virtutum proficere, in caritate Dei et proximorum magis ac magis fervere, in omni gratia crescere, ut quotidie humilior, mitior, patientior devotiorque consistat,

Philipp. 1,
9, 10.

quemadmodum scribit Apostolus: Caritas vestra magis ac magis abundet, ut probetis potiora, et sitis sinceri et sine offensione. Sicut enim homo non diu potest subsistere in una corporis dispositione, sed in mutatione et alteratione exstat con-

Job xiv, 1,
2.

tinua, juxta illud Job, Homo quasi flos egreditur et conteritur, et fugit velut umbra, et nunquam in eodem statu permanet; ita nec in una mentis dispositione diu subsistere valet, sed aut spiritualiter proficit, atque cœlesti patriæ proficiendo propinquat, aut spiritualiter deficit, retrocedit et cadit, et deficiendo propinquat inferno. Unde, secundum sanctos Patres, in via Dei, hoc est in divino obsequio exercitiisque virtutum et caritatis fervore, non proficere, est deficere. Hinc necessaria

Mich. vi, 8.

est homini grandis ac timorata cordis custodia, et circumspectio jugis in omnibus, ut semper coram Deo sollicitus sit ne eum offendat, vitamque suam prudenter consideret, examinet et gubernet. Ideo sanctus

Job ix, 28.

Job dixit: Verebar omnia opera mea, sciens, o Domine, quod non parceres delinquenti. Et in Ecclesiastico scriptum est: Si non in timore Domini tenueris te instanter, cito subvertetur domus tua, id est virtutum structura existens in te. Merito

Eccli.
xxvii, 4.

itaque ait Scriptura: Sapiens in omnibus metuit. *Eccli. xviii, 27.*

Secundo, instar peregrini debet quilibet Christianus abjicere onera quæ eum a processu virtutum et ab appropinquatione ad cœlestem impediunt patriam. Hæc autem onera, sunt sollicitudines sæculares, terrenæ affectiones, et ipsæ res temporales, nisi quis eis valde ordinate utatur: quod prorsus difficile est, et vix uni de mille videtur competere. Non ergo sit Christianus pro temporalibus immoderate sollicitus, sed confidat in Domino; et prima ac maxima cura sua sit, ut fiat dives in anima per opera virtuosa, et ne ab æternæ beatitudinis adeptione per quæcumque temporalia impediatur, nec ad terrena et sensibilia inordinate afficiatur, sed dumtaxat in tantum quantum sibi utilia aut necessaria sunt ad virtuose vivendum. Hinc hortatur Apostolus: Habentes victum et quibus tegamur, his contenti simus; et rursus: Deponentes (inquit) omne pondus et circumstans nos peccatum, per patientiam curramus ad propositum nobis certamen, id est ad pugnam contra aciem vitiorum ac dæmonum, adspicientes in auctorem fidei Jesum; qui ut suis fidelibus daret plenum exemplum contemnendi carnalia et terrena, præsertim quoad superfluitatem eorum, tantam elegit, assumpsit ac tenuit paupertatem, quod non habuit ubi caput reclinaret. Non ergo digni sunt a Christo vocari Christiani, sed potius pagani censendi sunt, qui terrenis et temporalibus toto inhiant corde, et de veris spiritualibusque divitiis animarum, videlicet de gratia, caritate, virtutibus donisque Spiritus Sancti, aut parum aut nihil solliciti sunt ut eas habeant aut conservent. *1 Tim. vi, 8.*

Tertio, debet quilibet Christianus instar peregrini ad cœlestem patriam adspirare, æternam beatitudinem totis præcordiis affectare, societatem civium supernorum, videlicet angelorum sanctorum et omnium Beatorum, præ cunctis bonis sæculi hujus incomparabiliter desiderare, ut cum sancto Psalmographo dicere possit: Quemad- *Matth. viii, 20; Luc. ix, 58.*

Ps. xli, 2, 3.

modum desiderat cervus ad fontes aquarum, ita desiderat anima mea ad te, Deus; sitivit anima mea ad Deum fortem, vivum: quando veniam et apparebo ante faciem Dei? Consideremus ergo brevitatem, incertitudinem, fallacias, pericula, vitia atque miseras vitæ præsentis; contemplemur etiam æternitatem, securitatem, sanctitatem ineffabilemque lætitiâ supernæ felicitatis: et ita vilipendamus vitam hanc labilem, ærumnosam; beatitudinem quoque cœlestem, perpetuam, inæstimabiliter gaudiosam, amorosis cupiemus suspiriis, et pro ea orationes lacrimosas fundemus,

Ps. cxix, 5.

cum Propheta dicentes: Heu mihi! quia incolatus meus prolongatus est, id est, habitatio mea in valle hac lacrimarum, a cœlesti habitatione felici longe est distans sive dilata. Ex tali affectu dixit Apostolus: Infelix ego homo! quis me liberabit de corpore mortis hujus? Unde, secundum Gregorium, cœlestem illam beatitudinem nullus condigne desiderat, nisi qui pro ea quotidie cum lacrimis orat. Sed, proh dolor! aliqui fide nuda et nomine solo Christiani, ita carnali excæcantur amore, ut dicant se velle libenter beatitudine carere cœlesti, et Deo relinquere regnum suum cœleste, si possent in hac vita perpetuo permanere et temporali prosperitate gaudere. Hi tales miseri sunt et corde obtenebrati, atque in statu damnationis exsistunt, quia eorum mens plus afficitur ad creata, mundana, carnalia, quam ad Creatorem et ad bona spiritualia, perpetua ac superna. Unde verificatur de eis illud Apostoli ad

Ibid. i, 21.

Romanos: Quum cognovissent Deum, non sicut Deum glorificaverunt, sed evanuerunt in cogitationibus suis, et obscuratum est insipiens cor eorum; illud quoque Psalmistæ: Homo quum in honore esset, non intellexit, comparatus est jumentis insipientibus, et similis factus est illis.

Ps. xlviii, 13, 21.

Quarto, debet quilibet Christianus instar peregrinorum, de recta via ad cœlestem patriam perducente diligenter a peritis inquirere, ut regia via incedat, id est per opera veraciter virtuosa, quæ sale ac

A luce discretionis sunt rectificata atque condita, et neque ad dexteram nec ad sinistram, ut nec medium rationis excedat, neque ab eo deficiat, sed juxta doctrinam Apostoli, rationabile sit obsequium suum. Denique duæ sunt viæ ducentes ad Deum patriamque cœlestem. Una est via præceptorum, id est divinorum et ecclesiasticorum observatio mandatorum: de qua ait Salvator, Si vis intrare ad vitam, serva mandata. Hæc via est omnibus necessaria ad salutem. Alia est via seu observatio B evangelicorum Christi consiliorum: et ista via perfectior est atque salubrior. Itaque simpliciores et minus eruditi ac minus experti in vita spirituali temptationibusque diaboli, informationem quærere debent a spiritualibus, sapientibus et exercitatis, præsertim in dubiis et tempore tentationis. Hinc in Ecclesiastico habetur: Fili, a juventute accipe doctrinam, et usque ad canos invenies sapientiam; in medio presbyterorum sapientium sta, et ex corde sapientiæ illorum conjungere. Sed et Jeremias dicit: Interrogate quæ sit via bona, et ambulate in ea; et invenietis requiem animabus vestris.

Rom. xii, 1.

Matth. xix, 17.

Eccli. vi, 18, 35.

Jer. vi, 16.

Quinto, quilibet Christifidelis instar peregrinorum debet valde ac incessanter esse sollicitus ne ab infernalibus latronibus, id est dæmonibus, seu pravis hominibus, seu propriis concupiscentiis, spoliatur virtutibus spiritualiterque necetur, hoc est, ne ab aliquo horum ad peccandum mortaliter inducatur. Ideirco, jugiter invocandum est Dei auxilium, et Dei præcepta ac documenta semper in mente habenda sunt, ne ab illis homo divertat. In medio equidem laqueorum, in medio invisibilium hostium ambulamus: ideirco oportet nos undique esse armatos prudentia et virtutibus, et omni custodia cordis, juxta illud Habacuc, Super custodiam meam stabo. Unde et Aggæus jubet: Ponite corda vestra super vias vestras, id est, considerate prudenter opera vestra, an vere Deo sint placita. Quædam enim habent apparentiam boni, et tamen sunt vitiosa, quemadmodum Sa-

Habac. ii, 1.
Agg. i, 5.

Prov. xvi,
25. Iomon contestatur : Est via quæ videtur A
homini bona, et novissima ejus ducunt ad
Ephes. vi,
10, 11. mortem. Propterea scribit Apostolus : Con-
fortamini in Domino, et induite armatu-
ram Dei, id est virtutes, ut possitis stare
adversus insidias diaboli.

Sexto, debemus instar peregrinorum
quærere, et libenter habere, stabiliterque
tenere bonam societatem, hoc est, homi-
nes virtuosos habere consortes in via sa-
lutis, et talibus nos associare, quorum
verbis et actibus ædificemur, quorum et
precibus adjuvemur, et quorum societate
sanctificari possimus, juxta quod scriptum
Ps. xvii, 26. est : Cum sancto sanctus eris, et cum in-
nocente innocens eris. Multum enim va-
let bona et virtuosa societas, quia ut Sa-
lomon loquitur : Frater qui adjuvatur a
Prov. xviii,
19. fratre, quasi civitas est munita. In Eccle-
siastico quoque habetur : Quum videris
Ecclesi. vi,
36. sensatum, statim evigila ad illum. Et quan-
tum prodest virtuosa societas, tantum no-
civa est societas prava, quum scriptum
Ps. xvii, 27. sit : Cum perverso perverteris. Et Salomon
Prov. xiii,
20. ait : Amicus stultorum similis illis erit. C
1 Thess. iii,
6. Hinc dicit Apostolus : Subtrahatis vos ab
omni fratre ambulante inordinate. Non er-
go pigris, sed fervidis in via virtutum
nos applicemus, quorum exhortationibus
atque exemplis quotidie accendamus.

Septimo, debemus nos instar peregrino-
rum ita vestire ac enutrire, et nobis taliter
providere, ut expediti simus ad progredi-
endum in via salutis, id est ad proficien-
dum in omni virtute, ad orandum devote,
ad contemplandum sincere, ad diligendum
ferventer Deum præ omnibus, deinde et D
proximos. Porro, taliter se enutrire atque
vestire, est sobrie vivere et simplici esse
vestitu contentum, quemadmodum sacra-
Luc. iii, 11. tissimus Christi præcursor edocuit : Qui
habet duas tunicas, id est unam super-
fluam, det non habenti. Qui autem quoti-
die ditior fieri cupit, insipienter se gravat,
et ab itineratione salubri variis se impedit
1 Tim. vi, 9. modis, dicente Apostolo : Qui volunt divi-

tes fieri, incidunt in tentationes et laque-
um diaboli, et desideria multa nociva, quæ
mergunt hominem in perditionem.

Ecce juxta has proprietates peregrino-
rum et exsulum ambulare et conversari
nos oportet, et mundana despicere, atque
in veris animarum divitiis abundare, non
in temporalibus prosperitatem appetere,
sed necessariis et utilibus contentari, non
in superfluis gloriari.

Postremo aliqui opinantur quod dives
de quo in præsentī evangelio sermo est,
B fuit Nabal, de quo primo Regum habetur : ^{1 Reg. xxv,}
quod prorsus incertum est, quamvis ex ^{2 et seq.}
aliquibus quæ ibidem de Nabal scribun-
tur, apparentiam possit habere. Hinc de
Nabal illo jam aliquid tangam. Fuit itaque
Nabal locuples valde, immisericors et cru-
delis. Quumque quadam die tonderentur
oves ipsius, et ipse præparasset sibi et
suis convivium quasi convivium regis,
sanctus David, qui tunc cum multis sibi
adhærentibus fugiebat a facie Saul regis
ipsum injustissime persequentis, misit ali-
quos ex servis suis ad Nabal, modeste at-
que humiliter petens sibi ac suis aliquid
ciborum destinari a Nabal. Qui statim ser-
vis David superbissime insipientissimeque
respondit, dicendo : Quis est David, et
quis est filius Isai? Hodie increverunt ser-
vi qui fugiunt dominos suos. Hac respon-
sione audita, David cum adjutoribus suis
perrexit ut percuteret impium Nabal. Quo
cognito, uxor Nabal, femina pulchra, elo-
quens, bona valdeque prudens, properavit
in occursum David, deferens ei necessaria
vitæ satis abunde ; et verbis sensatis, hu-
milibus et benignis flexit placavitque eum.
Deinde post octo circiter dies Deus per-
cussit Nabal propter suas perversitates, et
obiit.

Vitemus itaque vitia divitis de quo in
evangelio isto loquitur Christus, ejus vi-
delicet carnalitatem, gulam, curiositatem,
immisericordiam, cupiditatem, ne simul
cum eo æternaliter pereamus.

SERMO TERTIUS

CONTRA IMITATORES DIVITIS EPULONIS, ET CONTRA VITIA EJUS.

V *Æ vobis qui saturati estis, quia esurietis.* Luc. VI, 25.

Matth. VII, 14. Secundum quod Christus Filius Dei in Evangelio docet, arcta est via quæ ducit ad vitam. Et hæc arcta via, est conversatio pœnitentialis ac virtuosa, ut scilicet pro peccatis nostris quotidie nos affligamus et corpora castigemus, sicque per pœnitentiæ opera Deo pro illatis sibi injuriis satisfacere pro posse conemur. Ideo sobrie, non crapulose, vivere obligamur, quemadmodum rursus ait Salvator : Videte ne graventur corda vestra crapula vel ebrietate.

Job XXXVI, 5. Nunc ergo pensemus propter quæ peccata fuerit dives iste damnatus. Et dicendum, quod primo notatur ac reprehenditur de avaritia. Non enim displicuit Deo quoniam dives fuit, quum et Deus summe dives exsistat. Unde, quemadmodum in Job asseritur, Deus potentes non abjicit, quum et ipse sit potens; sic dicere possumus, Deus divites non abjicit, quum et ipse sit dives. Atque ut libro de Civitate Dei asserit Augustinus, Deus est dives non pecunia, sed omnipotentia. Verum idcirco displicuit dives hic Deo, quia divitias suas excessive amavit, avare tenuit, immoderanter ac voluptuose consumpsit, indigentibus non communicavit. Non ergo divitiæ sunt in culpa, sed inordinatus amor et abusus earum. Propter quod ait Ambrosius : Non in facultatibus crimen est, sed in his qui eis male utuntur. Nam divitiæ, sicut impedimenta sunt improbis, ita bonis adjutorium sunt virtutis. Hinc ait Prophetas : Divitiæ si affluent, nolite cor apponere. Super quæ verba loquitur Augustinus : Qui non habet divitias, non cupiat eas; qui habet, non superbiat. Et non dicit

A Propheta, Nolite habere divitias, sed, Nolite cor apponere : non enim damnat divitias, quibus promereri possumus regnum cœlorum, sed cor appositum, quod divitias non bene expendit, sed avare recondit.

Sed tunc diligenter quærendum est, cur Christus verbis et exemplo tam specialiter ac frequenter docuit divitiarum contemptum, paupertatemque commendavit. Et respondendum quod ideo, quia valde difficile est ac rarum divitiis bene uti, et per eas a Deo ac virtutum profectu non impediri. Nam et ipse Salvator in Evangelio protestatur : Quam difficile qui pecunias *Marc. X, 23;* habent, intrabunt in regnum cœlorum ! *Luc. XVIII, 24.* Augustinus quoque : Difficile (inquit) est ut non sit superbus qui dives est. Imo Chrysostomus loquitur : Divitiarum sequela, est luxuria, ira intemperata, arrogantia, gula, et omnis irrationabilis motus. Sed et Valerius scribit : Dives in superfluitate resolvitur, jactantia effrenatur, currit ad libitum, et corruiat ad illicitum; fiuntque ei instrumenta pœnarum, quæ **C** fuerunt oblectamenta culparum. Qui ergo divitias amat, congregat aut reservat, maximis se involvit periculis. Denique, quum ad præfata peccata proni sint divites, congruentissime scribit Apostolus Timotheo : Divitibus hujus sæculi præcipe non sublimē sapere, id est non superbire nec de se ipsis magna sentire; nec sperare in incerto divitiarum, sed in Deo vivo; divites fieri in operibus bonis, facile tribuere.

I Tim. VI, 17, 18. Secundo reprehenditur dives iste de superfluitate, curiositate, pompa atque molitie in vestibus : nam extra purpuram tulit, et ad corpus nudum, tenuissimum ac subtilissimum induit byssum, puta camisiā hujusmodi lineam. Qualiter autem

homo multipliciter possit excedere in vestitu, et qualis esse debeat Christianorum
Cf. t. XXIX, p. 56 et s. quarto circa evangelium secundæ dominicæ Adventus : ideirco de hoc require ibidem, ut hic vitetur prolixitas.

Tertio reprehenditur dives iste de gula, quia quotidie voluptuose et crapulose epulabatur. Vitium autem gulæ omni Christiano est vehementer vitandum, quoniam cor facit obtusum, corpus male dispositum, animum ad virtuosa opera tardum, ad loquacitatem, ludos, jocos, cachinnos, atque ad somnolentiam pronum. Hinc ait Gregorius : Dominante gulæ vitio, omne quod homines fortiter egerunt, perdunt; et dum venter non restringitur, cunctæ simul virtutes obruuntur. Iterum dicit : Pene semper epulas concomitatur voluptas. Nam dum corpus in refectionis delectatione resolvitur, cor ad inane gaudium relaxatur. Ex gula demum generatur luxuria. Et quidquid nunc contra excessum in cibo profertur, etiam contra superfluitatem et excessum in potu intelligi debet. Insuper, *Philipp. iii, 49.* quam detestanda sit gula, constat ex eo quod de gulosis ait Apostolus, Quorum deus venter est : magis etenim colunt proprium ventrem, quam Deum universa regentem. Unde et Judas apostolus in sua Canonica contra istos terribiliter loquitur : *Judæ 12, 13.* Hi sunt in epulis suis maculæ, convivantes sine timore, semetipsos pascentes, nubes sine aqua, arbores autumnales, infructuosæ, bis mortuæ, eradicatæ, fluctus feri maris despumantes suas confusiones, quibus procella tenebrarum conservata est in æternum. Denique in cibo et potu contingit multipliciter excedere et peccare : primo, superflue accipiendo; secundo, in cibo et potu voluptatem carnalem quærendo; tertio, nimis pretiosa quærendo seu præparando; quarto, nimis sæpe manducando et bibendo; quinto, valde diu in mensa sedendo; sexto, ante tempus congruum cibum et potum sumendo; septimo, nimis diversa ac multa genera ferculorum ac poculorum accipiendo.

A Quarto reprehenditur dives iste de im-
 misericordia valde magna, quod Lazaro tam egeno et ægro non condoluit nec subvenit : quod fuit contra legem naturalem atque divinam. Ista crudelitas summe abhorrenda ac fugienda est Christianis, quum Christus testetur : Qua mensura mensi fueritis, remetietur et vobis; itemque, Estote misericordes sicut et Pater vester cœlestis misericors est; et rursus : Beati (inquit) misericordes, quoniam ipsi misericordiam consequentur. *Matth. vii, 2. Luc. vi, 36. Matth. v, 7.* Universa ergo misericordiæ opera quilibet Christianus exercere secundum proprias debet vires; et quod non valet effectu, agat affectu; sitque caritativus, liberalis, affabilis, pius in pauperes propter Christum.

Præterea, nunc dicendum est paululum de imitatoribus et filiis hujus divitis epulonis. Ejus namque imitatores et filii, sunt omnes avari, gulosi, pomposi in vestibus, et immisericordes pauperibus. Verumtamen aliqui sunt avari, non tamen evidenter gulosi, quia tam vitiose sua recondunt, ut vix ad sufficientiam eis audeant uti; parceque vivunt, non amore justitiæ, sed avaritiæ tenacitate : qui et præsentibus atque carnalibus, futuris quoque ac spiritualibus consolationibus privant se ipsos. Quibus potest illud applicari Psalmistæ : Thesaurizat, et ignorat cui congregabit ea. Itaque hujus divitis condemnati infelices sunt filii, qui quotidie splendide epulantur, atque diversis ciborum ac potuum utuntur generibus, et diu in suis sedent conviviis, fabulis, jocis, ludis risibusque vacantes, et de suis reliquiis aut nihil aut parum pauperibus largientes; qui et curiosas ac superfluas habent vestes, et in mollibus dormiunt stratis. Isti potius sunt discipuli Epicuri quam Christi; et sicut nunc conformantur diviti epuloni in vitiis, sic paulo post conformabuntur et associabuntur ei in suppliciis.

Postremo, ex evangelio isto edocemur in multis. Primo, quam occulta, justa ac metuenda sunt Dei judicia, qui in vita præsentī electos suos tot adversitatibus

tribulationibusque exercet, purgat, et per dona gratiæ taliter perficit eos, quatenus protinus post hanc vitam consolationem eis impendat æternam; tantoque gloriosius eos post hanc vitam coronat, quanto nunc districtius eos castigat. Reprobos vero permittit hic prosperari, deliciari, vitiis quoque impleri, et post hanc vitam perpetuis ac condignis eos affligit tormentis.

Secundo, instruimur ex evangelio hodierno, quam inexcogitabiliter gravis et intolerabilis sit eorum damnatio qui absque timore et refrenatione legem transgrediuntur Altissimi, non tantum in vitiis jam præactis, sed et in aliis multis ac gravioribus. Ecce enim dives iste tam graviter condemnatus, non legitur eo condemnatus quia aliena abstulerit, sed quia propria non communicavit; nec quia luxuriosus fuerit aut adulter, sed quia in cibis, potibus vestibisque excessit. Quid ergo infernalis supplicii imminet eis qui post gulas suas, quas et festivis exercent diebus, fornicationibus, adulteriis, similibusque intendunt sceleribus? De quibus *Ps. LXXII, 5-8.* fertur in Psalmo: In labore hominum non sunt: ideo tenuit eos superbia, operti sunt iniquitate et impietate sua. Prodiit quasi ex adipe iniquitas eorum; transierunt in affectum cordis, cogitaverunt et locuti sunt nequitiam.

Tertio, ex evangelio isto docemur, quam subtilissima sint Dei judicia, quia in omnibus pœna correspondet culpæ. Unde dives qui minima negavit egeno in sæculo isto, usque ad minima petenda delapsus est in inferno: nempe qui hic rogatus micam non dedit, ibi guttam aquæ petiit nec accepit; et pauperem quem hic in miseriis vidit ac sprexit, ibi in consolatione

A conspexit ac invocavit. Ita continget præfatis imitatoribus divitis hujus.

Quarto, ex evangelio isto instruimur considerare quanta post vitam hanc sint impiorum tormenta justorumque gaudia, quatenus si vitia evitare et virtutibus inhærere ex Dei amore et zelo æquitatis non volumus, saltem timore æternæ damnationis desiderioque perpetuæ beatitudinis id agamus. Indesinenter ergo pensemus quanta jam sit, et æternaliter erit, hujus divitis omniumque reproborum afflictio, B quanta item sit Beatorum lætitia. Quam intolerabile nobis esset una hora jacere in fornace ardenti: quid ergo est in gehennalis ignis incendio æternaliter cruciari?

Legitur in libro de miraculis S. Hieronymi, quod erat quidam nomine Andreas presbyter cardinalis, qui post mortem suam divino præsentatus judicio, fuit infernalibus deputandus suppliciis, ob hoc quod in vita hac in cibis et potibus ac vestibus nimium fuerat sumptuosus atque C superfluous, nisi B. Hieronymus intercessisset pro eo, quia in S. Hieronymo specialem habuerat devotionem in sæculo isto. Et præfato excessu in vestimentis, cibis potibusque excepto, fuit ille Andreas vir satis bonus. Unde precibus ac meritis S. Hieronymi fuit ad vitam istam reductus et corpori restitutus, ut pœnitentiam ageret dignam, sicut et fecit. Qua peracta, rursus defunctus est, et salvatus.

Attendamus ergo quod sanctus ait Basilii: Quantum possumus, delicias mundi et ciborum opulentiam fugiamus, ne quando cruciati in flammis inferni, guttam aquæ quæramus, et nullum refrigerium consequamur.

AD RELIGIOSOS

SERMO QUARTUS

DE DIVISIONIBUS, HABITIBUS EFFECTIBUSQUE CARITATIS, QUIBUSVE OPERIBUS DECLARARI DEBEAT.

DEUS caritas est ; et qui manet in caritate, in Deo manet, et Deus in eo. I Joann. iv, 16.

Joann. xiii,
23.

I Joann. iv,
16.

Discipulus quem diligebat Jesus, visceribus caritatis redundans, caritatem in præsentis dominicæ epistola multipliciter laudat, et ad eam habendam diversis ex causis nos exhortatur. Itaque in primis hoc cognoscendum, quod sicut Scriptura loquitur de sapientia increata et sapientia creata, sic et de increata et creata loquitur caritate. Unde, quod in ista epistola dicitur, Deus caritas est, de increata caritate asseritur. Et sicut sapientia increata distinguitur, quod est sapientia increata absolute accepta, quæ toti Trinitati et unicuique competit divinæ Personæ, nihilo minus tamen Filio appropriatur ; [et sapientia increata genita, videlicet Verbum :] sic caritas increata alia est absolute dicta, toti Trinitati conveniens, nihilo minus Spiritui Sancto appropriata ; alia est caritas increata spirata, videlicet Spiritus Sanctus, qui a caritate increata absolute sumpta nequaquam realiter est distinctus, sicut nec ab essentia. Quod ergo ait apostolus S. Joannes, « Qui manet in caritate, in Deo manet », dupliciter potest intelligi. Primo sic : « qui manet in caritate », id est, qui increatæ caritati adhæret, « in Deo manet », quia spiritualiter atque finaliter in ipso quiescit : quia quum caritas ista sit Deus, consequens est ut qui manet in caritate, maneat in Deo. Secundo sic : « qui manet in caritate » creata, id est, qui habet habitum caritatis quæ est theologica virtus, « in Deo

A manet », quoniam Deo unit hæc caritas.

Deinde tangit S. Joannes varias rationes propter quas ad caritatem habendam et conservandam debemus esse solliciti : et præsertim hortatur nos ad mutuam dilectionem spiritualem semper habendam. Primo, quoniam caritas est ex Deo, non solum communi modo quo omnia bona ex Deo fluxerunt, sed et singulari modo, tanquam virtus infusa, et summa increatæ caritatis similitudo atque expressio plena. Porro habitus caritatis, videlicet ipsa caritas habitualis qua Deum proximosque diligimus, est unus et idem, sicut et fides qua increata veritas et creata creduntur, est eadem. Deus namque est ratio proximos diligendi.

Secundo, ad mutuam caritatem nos admonet, quoniam omnis qui diligit fratrem, id est proximos suos, ex Deo natus est, et cognoscit Deum, id est, ex Deo spiritualiter est renatus, utpote a non esse spirituali ad esse spirituale perductus, et per caritatem, quæ vita est animæ, spiritualiter vivificatus, atque a morte culpæ ad vitam gratiæ suscitatus, cognoscitque Deum cognitione formata, cujus intuitu vivit secundum præcepta ipsius. Verumtamen non omnis qui diligit fratrem suum, ex Deo natus est secundum prædestinationem æternam, quum aliqui reprobi sint ad tempus in caritate ; sed omnis qui diligit, ex Deo natus est ad minus secundum præsentem justitiam.

Tertio, quoniam Deus ipse dilexit nos, nec qualitercumque, sed valde incomprehensibiliter atque sublimiter, et diligendo

I Joann. iv,
7.

1 Joann. iv,
10, 19.

prævenit nos, quoniam prior dilexit nos, et amavit nos gratis secundum prædestinationem æternam, ex sua propria bonitate, quam nobis voluit ac decrevit communicare : ita et nos debemus invicem nos amare gratis propter Deum, quanquam et propter merita, dona ac beneficia unus alium diligere possit ac debeat. Itaque imitatione et exemplo Dei diligamus nos invicem, et unus alium præveniat in amore : servi enim et milites regem suum sequi consueverunt, præsertim filii patrem. Ideirco et Paulus : Imitatores (inquit) Dei estote sicut filii carissimi, et ambulate in dilectione sicut et Christus dilexit nos. De hoc sic in hodierna epistola ait Joannes : In hoc apparuit caritas Dei in nobis, quoniam Filium suum unigenitum misit Deus in mundum, ut vivamus per ipsum; in hoc est caritas (id est, dilectio Dei gratuita atque piissima ad nos, in hoc evidenter apparuit), quod ipse prior dilexit nos : carissimi, si Deus dilexit nos, et nos debemus alterutrum diligere. Ecce omnia verba hæc vere affectuosissima, devotissima atque dulcissima sunt, et piæ mentis vehementer inflammativa, non solum ad proximorum amorem, sed et maxime ad rediligendum Dominum Deum. Infinitæ namque ingratitude, perversitatis, duritiæ atque malitiæ est amantem non amare, et præamantem non redamare, maxime talem ac tantum amatorem ut est Deus, qui et suum amorem ad nos per tot et tanta beneficia nobis ostendit.

Ibid. 12. Quarto, hortatur nos ad mutuam caritatem, quoniam proximos diligendo mereamur amari et inhabitari a Deo. Unde sic ait : Si diligamus invicem, Deus manet in nobis. Quod si amiserimus caritatem, statim diabolus cor nostrum per mortale peccatum inhabitabit. Ecce quanta res est, quam desiderabile et præclarum, quam salubre et magnum, Deum habere amatorem et proprii cordis habitatorem. Si autem non dilexerimus omnem proximum, quantumlibet adversarium, nec Deum vere atque nos ipsos spiritualiter sinceri-

terque diligimus, quum simus in culpa mortali tanquam divini transgressores præcepti quo et inimicos jubemur diligere. *Matth. v,*
44.

Quinto, ad spirituales amorem nos admonet, quoniam tanta est perfectio caritatis, quod ipsemet Deus caritas appellatur. *1 Joann. iv,*
16. Diligit namque se ipsum et cuncta quæ condidit, quantum ad id quod ab ipso sortita sunt, quemadmodum Sapiens dicit ei : Diligis omnia quæ sunt, et nihil odisti eorum quæ fecisti. Quemadmodum namque in Deo consistit voluntas, ita et caritas; et sicut Deus est sua voluntas, ita et caritas. Rursus, sicut in Deo sunt idem sapiens et sapientia, ita amans et amor. Ex hoc autem quod caritas proprie Deo describitur, patet quod caritas dicit perfectionem simpliciter, quemadmodum sapientia, absque imperfectionis inclusione. Quum ergo tanta sit caritatis nobilitas, debemus eam semper toto corde amplecti, conservare ac prosequi, faciendo quod ipsa requirit. Operatur equidem magna, si est; quod si renuat operari, non vere habetur.

Sexto, quoniam in caritate manendo, manemus in Deo; et recedendo ab ea, a Deo recedimus.

Deinde ponit Joannes apostolus quosdam caritatis effectus, per quos cognoscere probabiliter possumus an simus in caritate divina perfecti. Primus est, quoniam perfecta caritas facit hominem diem judicii fiducialiter præstolari, quoniam facit hominem filialem confidentiam habere ad Deum tanquam ad optimum ac benignissimum patrem; et bonam conscientiam parit, quia inducit hominem ad purum, fervidum ac perfectum Dei obsequium. De hoc sic ait Joannes : In hoc perfecta est caritas Dei nobiscum, ut fiduciam habeamus in die judicii. Imo caritas perfecta facit hominem desiderare dissolvi ut sit cum Christo. *1 Joann. iv,*
17. *Philipp. i,*
23.

Secundus effectus est, quoniam caritas perfecta potissimum assimilatur et conformatur nos Deo : quia per eam efficimur omnibus benevoli, et inimicis ac persecutoribus amorosi atque benefici, quem-

admodum Deus pius, clemens et beneficus A
est non solum bonis et justis, sed et im-
piis et ingratis. Unde ait in Evangelio
Matth. v, 44, 45. Christus : Diligite inimicos vestros, etc.,
ut sitis filii Patris vestri qui in cœlis est,
qui solem suum facit oriri super bonos
et malos. De hoc sic ait Joannes in præ-
1 Joann. iv, 17. senti epistola : Quia sicut ille est, et nos
sumus in hoc mundo.

Ibid. 18. Tertius effectus est, quia perfecta cari-
tas foras mittit, id est, omnino a se ex-
pellit, timorem pure servilem, qui habet
pœnam, id est, pœnam meretur in quan-
tum servilis est. Caritas namque perfecta
convertit totum hominis cor ad Deum, ita
quod solo Dei intuitu ac puro ejus affe-
ctu, non ex formidine pœnæ, sed ut Deo
complaceat ac uniatur, et ne eum offendat
aut elongetur ab ipso, facit bona et vitat
mala. Timor autem servilis movet ad bo-
na retrahitque a malis, non amore justi-
tiæ, nec bonitatis affectu aut Dei amore,
sed pœnarum formidine, ne patiatur in-
commodum. Idcirco, sic timens caritate
non informatur, sed in mortali sordet pec-
cato : nam talis timor ex privato causatur
amore et fide informi. Timor vero filialis
et castus, quo Dei offensa formidatur, ex
caritate procedit et ei connectitur. Timor

autem initialis bonus est, sed imperfectus;
et quanto magis perficitur, tanto minus de
servilitate habet adjunctum. Denique de
hac re S. Benedictus ait in Regula, quod
monachus quum per duodecim gradus hu-
militatis ad Deum ascenderit, mox ad il-
lam Dei caritatem perveniet, quæ foras
mittit timorem. Per quam universa quæ
prius non sine formidine observabat, jam
absque ullo labore velut naturaliter ex
consuetudine incipiet custodire, non timo-
re gehennæ, sed Christi amore, et ipsa con-
suetudine bona ac delectatione virtutum.

Itaque, tot rationibus ab Apostolo san-
cto in præsentī epistola tactis, curemus
semper totis viribus caritatem amplecti,
in ea manere, proficere, perfici, et pro-
ximos absque amaricatione, dulciter ap-
prehendere et benigne. Et quoniam caritas
sancta patiens est et benigna, non reddens
malum pro malo, nec intumescens, idcirco
per patientiam, benignitatem, remissio-
nem injuriæ, humilitatem, alacritatem, fer-
vorem, constantiam, ostendamus nos esse
in caritate. Nemo nostrum sit querulosus,
vindictivus, indignabundus, amarus aut
durus; sed pii, quieti, devoti, suaves et
stabiles semper simus seu esse conemur
in Domino.

SERMO QUINTUS

DE SALUBRI CORPORIS AFFLICTIONE, TRIPLICIQUE VIA SALUTIS, NEMPE PURGATIVA,
ILLUMINATIVA ET PERFECTIVA.

DIVES induebatur purpura et bys-
so, et epulabatur quotidie splendide.
Luc. xvi, 19.

Omni Christiano necessaria est vita pœ-
nitentialis, castigatio corporis, sobrietas
vera. Genus namque humanum, propter
inordinatam concupiscentiam, illicitam vo-
luptatem et cibi immoderantiam a paradi-
so ejectum, non nisi per concupiscentiarum

D refrenationem, carnalium delectationum
aspersionem, cibi et potus parsimoniam
ad cœlestem potest paradisum reduci. Hinc
Christus in Evangelio : Væ (inquit) vobis
divitibus, qui habetis consolationem ve-
stram; væ vobis qui saturati estis, quia
esurietis. Quocirca ait Hieronymus : Im-
possibile est replere hic ventrem, et in
futuro mentem.

Præterea pro quotidianis peccatis igno-
scendis et pro futuris cavendis, jejunium,
abstinentia, afflictio carnis sunt necessa-
ria. Hinc, secundum Christi doctrinam, non
solum delicatiora alimenta, sed et molliora
indumenta, parique ratione et mollior le-
ctus reprobantur : quod etenim carnem
fovet, spiritum necat. Multo magis ergo
vitanda sunt ista religiosis; amplectique
debent corporis castigationem, quemad-
modum Christus ea quæ duriora sunt cor-
pori, in cunctis elegit. Hinc ait Bernardus :
Quod sua macula necat ac polluit crapula, B
abstinentia mundet. Ergo interdum absti-
neo, sed abstinentia mea satisfactio est pro
peccatis. Abstinebo a vino, quia in vino
luxuria est; aut si infirmus sum, modico
vino utar. Abstinebo a carnibus, ne dum
nimis nutriunt carnem, nutrant simul et
vitia carnis; panem cum mensura curabo
accipere, ne onerato ventre stare tædeat
ad orandum; nec simplici quidem aqua in-
gurgitare me assuescam, ne distensio ven-
tris ad titillationem pertingat libidinis.

Utinam ista attenderent qui se quotidie C
instar sæcularium replent : qui si non
fuerint saturati, indignabuntur et detra-
hent præsidenti. Heu, quid dicam quia in
generatione hac tepida, cibi et potus re-
ligiosorum, delicatesiores, pretiosiores, abun-
dantiores sunt escis ac poculis plurium
mundanorum ? Ecce ad tantam ruinam
sancta devenit religio, quod ea quæ sancti
Patres instituerunt in alimoniis observan-
da, commemorari vix patiamur. Idcirco
experientia docet quam gloriose proficia-
mus, imo quam lamentabiliter deficiamus, D
quamvis hoc ipsum advertere non veli-
mus. Statim pro una festuca, passionum
tumultus generatur in nobis; confratribus
et superioribus occasione facile indigna-
mur. Nullus vult vilior reputari; sed et
fabulari, ridere, joculari, hinc inde discur-
rere, curiose hæc et illa inspicere plus
delectat quam orationibus immorari, quam
psallere, quam compunctioni et meditati-
oni insistere, quam in abscondito vultus
Dei, summæ majestatis contemplationi va-

care, et eum cujus essentia, bonitas pura
est, intra nos amore amplecti, atque cu-
stodiæ cordis invigilare. In illis omne tem-
pus breve videtur, et avelli vix possumus;
in istis tempus videtur longissimum, et
pigritia, somnolentia tædioque afficimur.
Distractionis autem et irreverentiæ coram
Altissimo non est finis.

Denique ad tantam carnalitatem, excæ-
cationem, obdurationem sumus delapsi, ut
jam nequaquam nobis sufficiat cibo re-
pleri, sed ea quæ magis delectant exqui-
rimus, et sensualitatem, quæ per se et in
se satis et plus quam satis corrupta et ad
vitia sua proclivis est, excitamus, actua-
mus, succendimus, fiuntque duo contra
unum, et periclitatur sobrietas; non pen-
santes quod rursus ait Bernardus : Vinum
et similia, mulsum et pingua, carni, non
spiritui, militant; frixuris non anima sa-
ginatur, sed caro; gingiber, piper, cumi-
num, salvia, et hujusmodi mille species
salsamentorum, palatum quidem delectant,
sed libidinem etiam turpiter accendunt.
Prudenter ac sobrie conversanti, satis ad
omne condimentum est sal cum fame :
qua non exspectata, necesse est alias atque
alias succis extraneis confici permixtio-
nes, quæ palatum reparent, gulam provo-
cent, excitent appetitum. Sed hæc religiosi
prorsus illicita sunt, quorum est carnem
cum vitiis et concupiscentiis crucifigere,
tollere crucem suam quotidie et assequi
Salvatorem, dicente Apostolo, Si compa-
timur, et conglorificabimur : quatenus sic-
ut Christus sanguinem suum semel fudit
pro nobis, ita et nos pro ipso sanguinem
nostrum suo modo quotidie effundamus.
Unde iterum beatissimus pater noster ait
Bernardus : Est enim martyrii genus et
effusio quædam sanguinis in quotidiana
corporis afflictione : illo nimirum quo
membra cæduntur ferro, horrore quidem
mitius, sed diuturnitate molestius. Sic quip-
pe infirmis et pusillis corde, necesse est
ut quem semel pro Christo ponere non
sufficiunt, saltem mitiori quodam, tamen
diuturniori martyrio sanguinem fundant.

Ephes. v,
18.

Galat. v, 24.

Luc. ix, 23.

Rom. viii,
17.

Præterea, quum triplici via ad Dominum gradatim tendatur ac perveniatur, utpote purgativa, illuminativa et perfectiva, via purgativa fundamentum est atque exordium spiritualis conversationis, interioris reformationis et vitæ monasticæ. Quæ via consistit in sensualitatis dominatione, in passionum refrenatione, in resistentia et abstinencia vitiorum, et in emundatione hominis a culpis quotidianis et a præteritarum culparum reliquiis, scilicet pronitate ad mala, debilitate contra peccata. Et præsertim consistit hæc via in evitatione carnalium vitiorum, ut ab omni gula atque venereis se reprimat homo. Idcirco, qui in via hac purgativa se ipsum negligit exercere, qui ab immoderantia cibi et potus omniumque exteriorum sensuum inordinata voluptate non se nititur cohibere, nondum ad spiritualis vitæ atque interioris profectus ascendit infimum gradum. Necesse ergo est ut omnes actus nostros ponamus sub ordine divini amoris, id est, taliter eos circumstantionemus et circumcidamus, ut Deo complaceant, et per eos in Dei amore crescamus. Hinc loquitur Cassianus : Quibuslibet cibis repletus venter seminaria parit luxuriæ ; nec prævalet mens discretionum gubernacula moderari, ciborum pondere prægravata. Non sola crapula vini mentem inebriare consuevit, sed cunctarum escarum nimietas vacillantem eam nutabundamque reddit, et omni integritatis ac puritatis contemplatione despoliat. Audi Dominum per Prophetam Jerusalem inerepantem : Quid peccavit soror tua Sodomam, nisi quia panem suum in saturitatis abundantia comedebat ? Et quia per saturitatem panis inextinguibili carnis fuerant ardore succensi, iudicio Dei cœlitus igne et sulfure concremabantur. Quod si illos sola nimietas panis ad tam præru-

ptum flagitiorum præcipitium vitio satietatis impegit, quid sentiendum de his qui vegetato corpore, perceptionem carnum ac vini immoderata libertate capere præsumunt, non quantum imbecillitas expetit, sed quantum animi libido suggerit ? Hinc quoque Chrysostomus : Simplicior (inquit) victus et mensa mediocris plurimum habet jucunditatis ; econtrario mensæ divitum execrabiles sunt et horridæ, animi ac membrorum contaminationibus plenæ.

Postremo, quanta sit sobrietatis virtus, utilitas, fructuositas ac dignitas, pandit Augustinus dicendo : Sobrietatis perseverantia, inæstimabilis est animi fortitudo ; eam omnes virtutes et omnes laudum tituli jugiter concupiscunt, quoniam sine ea ornari et complacere non queunt. Sobrietas est mentis et sensus membrorumque omnium cautela, pudicitiae ac castitatis munimen, pudori proxima, pacis et amicitiae serva, honestati semper conjuncta, criminum vitiorumque omnium profuga. Itaque, sicut in Ecclesiastico scriptum est, Sanitas animæ et corporis est sobrius potus ; nec dubium quin et sobrius cibus, qui et vitam efficit longiorem. Atque ut Climacus loquitur, Sicut somnus, ita potatio paulatim consuetudine superatur.

Non ergo cum divite epulone splendide epulemur, sed cum sanctis Patribus temperantiæ studeamus ; Deumque affectuosissime deprecemur ut gratiam discretionis nobis præstare dignetur, qua in cibo, potu, somno ac aliis moderamen servemus. Sic per corporis castigationem exteriorumque sensuum refrenationem, ad cordis tendamus custodiam, ut in viæ illuminativæ exercitiis concrescamus, atque per ea ad perfectivæ viæ exercitia pertingere mereamur.

Ezech. xvi.
4^o.

Eccli. xxxi.
37.

SERMO SEXTUS

DE IMPIORUM MISERIIS PERICULOSISSIMAQUE PROSPERITATE EORUM,
ET DE BEATITUDINE ELECTORUM.

FACTUM est ut moreretur mendicus, et A portaretur ab angelis in sinum Abrahamæ; mortuus est autem et dives, et sepultus est in inferno. Luc. XVI, 22.

Quid intersit inter electos et reprobos, inter justos ac impios, inter eos qui in vita hac prosperantur, super quos non est virga Dei, et inter eos qui multis tribulationibus exercentur et affliguntur in sæculo isto, pandit finis et præmiatio utrorumque. Ecce etenim brevis est vita præsens; transitque mundus et concupiscentia ejus; et dies nostri sunt quasi umbra B super terram, nec ulla est mora. Quod si vita hæc alicui longa appareat, futuræ æternitati comparet eam, et videbit quod quasi momentum sit. Longa quidem forsitan videtur ei præsertim qui in doloribus atque laboribus vivit; verumtamen quum venerit finis ejus, patebit quam brevis exstiterit. Ponamus quod aliquis ab exordio mundi usque nunc vixerit, et hodie moriatur: nonne quasi nihilum apparebit quidquid effluxit atque præteriit, potissimum quum hodie introeat sæculum in quo sine fine mansurus est? Finiti et infiniti nulla (ut fertur) est comparatio: idcirco etsi hic millies mille annis possemus subsistere, adhuc respectu perpetuitatis futuri sæculi nihil esset.

Ponamus quod hodie duo homines moriantur, uterque centum aut mille annorum, quorum unus ab infantia usque ad ultimum vitæ suæ instans in omni prosperitate vixerit temporali, in omni voluptate, opulentia et honore, alter vero in omni adversitate et afflictione; et tamen D ille sit reprobos, iste electus: quid hodie proderit reprobo illi universa sua (quæ

præteriit et desiit) fallax prosperitas, quum jam in sempiterna sit detrudendus tormenta? Et quid huic electo nunc oberit cuncta quam passus est adversitas et ærumna, quum modo æterna adepturus sit gaudia? Imo, certe reprobo illi sua quam habuit mala prosperitas inæstimabiliter nocet; et quo fuit prosperior, eo fuit miserior, quum hodie adimpleatur in eo quod ait Scriptura: Quantum glorificavit se et in deliciis fuit, tantum date illi tormentum et luctum. Huic autem electo sua tribulatio ineffabiliter prodest, quum pro ea hodie æternaliter permansura sortitur sit gaudia. Sic et de divite epulone et paupere Lazaro contemplemur. Ecce quid nunc uterque recepit. Ecce quam paucis annis in sæculo vixerunt, et tamen quam multis annis fuit jam ille in intolerabilibus pœnis, et iste in incomprehensibilibus gaudiis. Et nihilo minus ille adhuc æternaliter punietur, nec aliud quam suæ mœstissimæ calamitatis præstolatur dirum augmentum, quia in die judicii et deinceps absque fine inconsolabiliter præ solito affligetur, et duplici, imo prorsus multiplici calamitate vexabitur, atque in corpore tartareis torquebitur non finendis suppliciis. Lazarus vero æterna gaudet securitate, et suæ beatitudinis incrementum certus exspectat, dum resuscitatus glorificabitur etiam corpore. O quanta est excæcatio et stultitia, imo furor et insania iniquorum! Quam insipientes mercatores sunt, qui carnalem delectationem, temporales divitias, mundanos honores, et ea quæ illicite appetunt, tam pretiose mercantur, dum pro talibus tempore brevi durantibus, damnationem quæ nunquam

Apoc. XVIII, 7.

Job XXI, 9.

Ibid. XIV, 1, 3.

1 Joann II, 17.

1 Pet. XXIX, 15.

Job VIII, 9.

terminabitur, nummo iniquitatis conqui- A
runt, emunt, merentur !

Hæc ideo tango, primum ut indicibilem
magnitudinem misericordiæ et gratiæ no-
bis desuper condonatæ per hoc quod Crea-
tor piissimus de sæculo nos retraxit, et
ad sacram religionem perduxit, conside-
remus, et nequaquam retro respiciamus ;

Num. xxi, 5. nec cum ingratis filiis Israel cœleste

manna fastidientes, revertamur cordibus
in Ægyptum, sed neque ad aliquid sæculi
hujus afficiamur. Insuper, amatoribus hu-
jus mundi, et cunctis mundanis, carnali-
bus, intimoratis hominibus, latam viam
pergentibus, ex intimo corde compati-
mur, atque pro ipsis incessabiliter depre-
cemur. Omnis eorum prosperitas nobis in
nauseam convertatur ; quo amplius pro-
sperantur, eo a nobis infeliciores existi-
mentur. Verumtamen in particulari a te-
merario caveamus judicio, neque inaniter
gloriamur, aut de propriis viribus præsu-
mamus, quasi ipsi jam certi simus, aut
cuncta evaserimus quæ circumstant peri-

1 Cor. x, 12. cula. Verum qui stat, videat ne cadat ; C

Luc. xii, 48. et cui plus datum est, qui ad altiora se
obligavit, qui Deo promisit magna, pror-
sus sollicitus sit ne inveniatur negligens
aut ingratus, eo quod plus requiretur

Eccle. v, 3. ab eo, et Deo displiceat infidelis promissio. Imo sciamus quod sicut pravorum
damnatio Christianorum, damnationem ex-
cedit incredulorum atque supplicia paga-
norum ; sic negligentibus, carnalibus, ir-
reformatis religiosis intolerabilior instat
calamitas infernalis, quam sæcularibus
Christianis iniquis. Porro iniqui et peri-
culose prosperitatibus mundi pollentes, in
quantum hujusmodi, sunt a viro justo sper-

Ps. xiv, 4. nendi, juxta illud Psalmistæ : Ad nihilum
deductus est in conspectu ejus malignus.
Verumtamen sapiens, de incertis, occultis
et dubiis definitivam non profert senten-
tiam, nec temerarie audet quempiam ju-

1 Cor. ii, 14. dicare : quis enim scit quid agatur in
homine ? Præterea, absit a nobis aliquid
cum hoc mundo habere commune, ne
cujuspiam mentem subintret ambitio aut

quævis carnalis affectio, ut malit præ-
esse quam subesse, et apparere in sæcu-
lo quam abscondi in cœnobio. Nulli nisi
in Deo et secundum Deum cupiamus pla-
cere.

Postremo, quia periculosius nihil est
quam temporaliter prosperari, et juxta
propria desideria conversari, nec tamen
a Deo adversitatibus castigari ; nil quoque
securius quam in præsentī pro peccatis
propriis corripī, a Deo paterne increpari,
a propriis desideriis cohiberi, adversita-
tibus et persecutionibus exerceri : hinc
potius eligamus in vita hac pro nostris
defectibus et peccatis quotidie reprehen-
di, disciplinari, et sub obedientia sancta
stare, quam impunitè peccare, palpari,
dissimulari et propriis affectionibus de-
relinqui. O quanta pericula, quanta sup-
plicia brevi et levi purgatorio isto eva-
dimus ! Quantum gratiæ incrementum,
quantum gloriæ cumulum per hoc ipsum
meremur ! Non amemus nos ipsos amore
maligno, stolido et privato, sed puro, spi-
rituali, divino, ut nobismetipsis mortui, in
omni increpatione, aspernatione, humilia-
tione, disciplinatione, quasi in cunctis di-
vitiis gloriamur ; et vigilantissime consi-
deremus quantum omni hora possumus
in virtute, dono et gratia crescere aut fir-
mari, quam ineffabiliter in æternæ bea-
titudinis præmio ampliari, et tantæ feli-
citatē promereri augmentum. Certe omnis
ad Deum caritativa affectio, omnis actio
ex caritate procedens, æternæ gloriæ me-
ritoria est. Idcirco non torpeamus, non

D fatigemur, sed quidquid potest manus no-
stra instantissime operemur ; quotidie in *Eccle. ix, 10.*

sancto caritatis fervore et diligentiae stu-
dio, atque in omni mentis custodia perfi-
ciamur. Non cessemus suspirare, ferri, as-
cendere, elevari ad Deum, sed uberrime, et
quantum fieri valet, indesinenter uniamus
actualiter mentem nostram cum ipso, me-
ditando, orando, suspirando, psallendo, stu-
dendo, seu aliis modis, quatenus carnalia
cuncta oblectamenta et vana solatia nobis
desipiant et in tædium convertantur, nec

minus solliciti, avidi, indefessi simus ad proficiendum in spiritualibus virtutum divitiis, in pretiosissimis gratiarum muneribus, quam negotiatores et amatores mundi consistunt ad conquirenda transitoria bona.

Recordemur quod quidam senior dixit Fratri cui in cella residere erat molestum : Si inferni ponderares tormenta, quamvis tua cella esset usque ad collum vermibus plena, tu tamen patienter sederes in ea. Refert Climacus se in sancto fuisse grandi cœnobio, in quo fuit frater nomine Abbacyrus, qui ab omnibus præcipue exercebatur, et quasi injuriis affici videbatur. Nam et sæpe a ministris expellebatur a mensa : erat enim a natura aliquantulum incontinens circa linguam. Quem,

A quum quindecim annis fuisset in cœnobio, Climacus interrogavit : Frater Abbacyre, quare te quotidie a mensa repulsum video, et frequenter sine refectione dormientem ? Respondit : Crede mihi, Pater, quia probant me Patres mei si vere monachus fio. Idcirco intentionem eorum et Patris nostri intentionem ego cognoscens, sine gravamine universa sustineo : et iuste, o pater Joannes, absque probatione enim non perficitur aurum. Qui frater Abbacyrus morti jam proximus dixit ad Fratres : Gratias ago Domino Jesu Christo, et vobis, Patres, propter id quod me tentastis ad salutem ; ecce decem et septem annis permansi a dæmoniis non tentatus. Ad laudem et gloriam omnipotentis Dei, etc.

DOMINICA II POST TRINITATEM

ENARRATIO IN EPISTOLAM

CARISSIMI, NOLITE MIRARI SI ODI VOS MUNDUS, ETC. I Joann. III, 13-18.

SANCTUS Joannes apostolus in hodierna epistola, inter justos et injustos, inter electos et reprobos distinguit, dicendo : *Carissimi, nolite mirari si odit vos mundus*, id est homines vitiosi, carnales, mundani. Quemadmodum enim similitudo est causa amoris, sic dissimilitudo est causa rancoris. Quum ergo justus se invicem diligant, quia in bonis concordant et mente consimiles sunt, vitia detestando atque virtutes amando; sic impii odiunt justos, quia mente ab eis dissentiunt, et voluntate diffformes sunt. Hinc ait Salvator : Si mundus vos odit, scitote quia me priorem vobis odio habuit. Si de mundo essetis, mundus quod suum erat diligeret; quia vero de mundo non estis, sed ego elegi vos de mundo, propterea odit vos mundus.

Nos scimus quoniam translati sumus de morte culpæ ad vitam gratiæ, quoniam diligimus fratres: id est, ex hoc quod proximos universos spirituali amore diligimus, scimus nos esse per gratiam Dei a mortali omni peccato mundatos, et spiritualiter vivificatos. Nam gratia gratum faciens, seu caritas, vita est animæ, sicut anima vita est corporis. Sed quum Salomon dicat, Nescit homo an amore sit dignus an odio, quomodo ait modo Apostolus, « Nos scimus », etc. ? Et respondendum, quod Apostoli ex speciali dono certitudinaliter agnoverunt se esse in caritate et gratia, imo et confirmatos in ea, quum Paulus testetur : Nos ipsi primitias Spi-

ritus habentes; et item. Quis nos separabit a caritate Dei? Ideo verbum istud in persona Apostolorum exponitur de scientia certitudinali, per divinam revelationem concessa; porro in persona aliorum taliter non certificatorum, et tamen virtuosorum, exponitur de scientia conjecturali probabili. *Qui non diligit Deum ac proximos caritate infusa, manet in morte*, id est, in mortali jacet peccato, estque in statu damnationis; et nisi se emendaverit, in æternum damnabitur.

B *Omnis qui odit fratrem suum, homicida est*, id est similis homicidæ, et quodammodo homicida, quamvis non peccet tam graviter ut is qui ex odio procedit in homicidii actum. Est etiam homicida, quia se ipsum spiritualiter necat peccando mortaliter. De gradibus autem homicidii in sermone dicetur. *Et scitis quoniam omnis homicida non habet vitam æternam in se manentem*, id est, nullus homicida habet in se vitam gratiæ, quoniam subest mortali culpæ, tam ille qui solo rancoris affectu homicida est, quam qui illud opere perpetrat.

Deinceps hortatur ad caritatem fraternam, Christi exemplo. *In hoc cognovimus caritatem Dei*, id est Christi, ad nos, *quoniam ille pro nobis animam suam posuit*, id est, vitam suam corporalem pro nobis ab æterna morte eruendis amarissimæ morti exposuit, quemadmodum ipsemet protestatur : Majorem hac dilectionem ne-

Joann. xv,
18, 19.

Eccle. ix, 1.

Rom. viii,
23.

Rom. viii,
35.

Cf. p. 155 C.

Joann. xv,
13.

mo habet, ut animam suam ponat quis A pro amicis suis. *Et nos debemus pro fratribus animas ponere*, hoc est pro eorum salute vitam nostram corporalem morti exponere, secundum quod ordo exigit caritatis. Siquidem primo et maxime obligamur Deum diligere, deinde nos ipsos, tertio proximos, quarto proprium corpus, ita ut plus diligatur anima proximi, quantumlibet adversarii, quam proprium corpus corporalisque vita. Idcirco, si quis viderit proximum suum periclitari in anima, ut si quis velit eum a fide avertere, debet B ei adstare, et potius velle mori quam ab ejus confortatione cessare: quemadmodum S. Sebastianus martyr dignissimus, quum vidisset quosdam in martyrio vacillare, protinus eos roboravit, non metuens mortem. Porro animarum curam habentes, istud præcipue implere tenentur, quatenus lupo venienti et gregem invadere cupienti resistant, gregem suum salubriter exhortando, ne a persecutoribus vel hæreticis seducantur.

Qui habuerit substantiam hujus mundi, id est temporalia bona, *et viderit fratrem suum necesse habere*, id est extreme seu notabiliter indigere, *et clauserit viscera sua ab eo*, id est, pietatis affectum circa illum non demonstraverit, impendendo ei caritatis et compassionis effectum, *quomodo caritas Dei manet in eo?* quasi dicat: Non manet nec est in homine tali, quia divinum mandatum transgreditur, nec vere diligit proximum, sed impius est et crudelis atque avarus.

Filioli mei, non diligamus Deum et proximos verbo neque lingua tantum, id est sola verbositate et adulatione, *sed opere et veritate*, id est divinorum præceptorum adimpletionem, quantum ad Deum, et caritativa ac pia subventionem, quantum ad proximos. Hinc S. Jacobus etiam ait: Si *Jacob. II, 15, 16.* frater aut soror nudi sint, et indigeant victu quotidiano, dicat autem aliquis de vobis illis, *Ite in pace, calefacimini et saturamini*; non dederitis autem eis quæ necessaria sunt corpori: quid proderit?

SERMO PRIMUS

DE PRÆCONIO ET CONDITIONIBUS CARITATIS IN DEUM PROXIMUMQUE, ET QUOMODO
HÆC FILIOS DEI CONSTITUAT.

OMNIS qui odit fratrem suum, homi- C *cida est.* I Joann. III, 15.

Sacra Scriptura, potissimum novi Testamenti, caritatem uberrime laudat, atque ad eam habendam ac conservandam copiosissime nos hortatur. Primo, quoniam ipsa est summa ac dignissima virtus, juxta illud Apostoli: Major horum est caritas. Unde quoque Aristoteles et Macrobius de justitia conscripserunt, quod ipsa sit præclarissima virtus, et non est lucifer nec hesperus tam admirabilis sicut justitia. Multo excellentius dici potest de caritate. Inter omnes enim virtutes dignissimæ

sunt virtutes theologicæ, utpote fides, spes, caritas, quoniam habent Deum pro immediato objecto; et inter has tres præeminet caritas, quia per eam perfectius atque propinquius Deo conjungimur, magisque unum cum eo efficimur, dicente Apostolo: Qui adhæret Deo (haud dubium quin I Cor. VI, 17. per caritatem), unus cum eo fit spiritus.

Secundo, quoniam sine caritate nulla virtus est viva ac meritoria, sed mortua Deoque inaccepta, quemadmodum plenissime docet Apostolus: Si linguis (inqui- *Ibid. XIII, 1, 2.* ens) loquar angelorum et hominum, caritatem autem non habeam, nihil sum. Deinde

I Cor. XIII,
13.

1 Cor. xiii,
2, 3.

scribit ibidem, quod sine caritate nil prodest fidem habere tam magnam ut ejus vigore quis transferat (id est, de loco uno ad alium projiciat) montes, nec omnia bona exteriora pauperibus erogare, nec proprium corpus pro fidei defensione in mortem exponere. Caritas namque est forma, vita et decor virtutum; earumque actus fieri imperat, et ipsos in Deum refert seu ordinat. Hinc caritas vita animæ nuncupatur, quia per eam anima spiritualiter vivit, et fonti vitæ, Deo viventi unitur, eique accepta et placita redditur.

Ibid. 4-6.

Tertio, quoniam caritas est quodammodo omnis virtus, etiam multo plus quam justitia. Unde et aliarum virtutum actus caritati ab Apostolo adscribuntur, quia ut ait, Caritas benigna est, patiens est, non irritatur, non cogitat malum, non gaudet super iniquitate. Hinc rursus ad Romanos scriptum est: Plenitudo legis est dilectio. Nam. Non adulterabis. non furtum facies, non falsum testimonium dices, in hoc verbo instauratur: Diliges proximum tuum sicut te ipsum. Ex quibus concludit Apostolus: Qui diligit proximum, legem implevit.

Rom. xiii,
10
Ibid. 9.

Ibid. 8.

Quarto, quoniam caritate præsentem, ceteræ adsunt virtutes: nam ad eam tanquam ad dominam ac reginam ceteræ ordinantur virtutes. Idcirco in tantum nos profecisse lætemur, quantum in caritate nos profecisse confidimus; et quidquid caritati et ejus repugnat profectui, hoc tanquam animarum venenum detestemur ac evitemus. Hinc Augustino testante: In caritate, pauper est dives; sine caritate, dives est pauper. Quantumcumque enim quis in exterioribus pauper sit, si caritatem habuerit, spiritualiter dives est corde; et quantumcumque in temporalibus dives sit, si careat caritate, pauper est mente, et dici potest de eo illud Apocalypsis: Nomen habes quod vivas, sed mortuus es; quia dicis quod dives sum et nullius egeo, et nescis quia tu es miser et miserabilis et pauper, et cæcus et nudus.

Apoc. iii, 1,
17.

Quinto, quia per caritatem Deo in tantum assimilamur, quod anima nostra per caritatem efficitur Dei sponsa et filia, heres atque amica. Caritas etenim ista spiritualis infusa, est quædam supernaturalis impressio et imago increati amoris, utpote Spiritus Sancti.

Quum ergo tanta sit caritatis dignitas, fructuositas, efficacia et excellentia, super omnia caritatem Dei et proximi affectemus, custodiamus, et per opera bona nutriamus ac perficiamus in nobis, præsertim per internas et amorosas affectiones ad Deum ac proximum. Nec solum invidiam, quæ directe caritatem tollit, sed impatientiam quoque, indignationem, iram, cupiditatem, ac cetera vitia quæ auferunt aut debilitant caritatem, semper vitemus, imo et venialia quæque peccata pro posse, quæ caritatis fervori repugnant atque ad caritatis amissionem disponunt, quoniam quanto quis amplius diligit Deum, tanto vigilantius vitat non solum mortales, sed veniales etiam culpas.

Præterea, in exordio hujus epistolæ, magna consolatio datur electis ac fidelibus Dei, contemptoribus hujus mundi, ne pusillanimes fiant aut impatientes vel admirantes, dum se a filiis sæculi hujus sentiunt odio haberi, irrideri, diffamari et infestari. Ex hoc namque confidere possunt quod ad Dei pertineant filios, atque idcirco displiceant impiis, quia eorum vita contraria est vitæ illorum. Unde apud Sapientiam habetur: Dixerunt impii, Circumveniamus justum, quoniam contrarius est operibus nostris. Sed et Christus ait quibusdam: Non potest mundus odisse vos; me autem odit, quia ego testimonium perhibeo de illo, quia opera ejus mala sunt. Hinc Ecclesiasticus scribit: Omnis homo simili sibi sociabitur; abominatio est superbo humilitas, sic et execratio diviti pauper. Si ergo optamus inter Christi membra computari et cum Christo capite coronari, non despiciamus cum Christo odia, subsannationes, persecutiones carnalium impiorumque hominum susti-

Sap. ii, 12.

Joann. vii,
7.

Ecclesi. xiii,
20, 24.

nere, sed in adversis gloriemur et gratias A
Deo agamus : quia ut ait Salvator, Non
Joann. xiii, 16. est servus major domino suo. Et alibi suis
Matth. x, 22. prædixit discipulis : Eritis odio omnibus
hominibus propter nomen meum. Grego-
rius quoque fatetur : Hos elegit Deus quos
despicit mundus. Timeant itaque vehe-
menter, qui huic complacent mundo.

Insuper docemur in præsentī epistola,
qualiter probabiliter valeamus agnoscere
an vivamus coram Deo per gratiam, et an
habeamus virtutes infusas. Hujus etenim
signum est, si proximos universos vere B
spiritualiterque diligimus. Sed quæri po-
test, quid sit spiritualiter diligere prox-
imos. Et respondendum, quod hoc nil aliud
est nisi eorum salutem optare, eisque cha-
rismata gratiæ in hac vita appetere, et ver-
bo ac opere eis cooperari ad bona hæc
ipsa acquirenda, seu conservanda ac per-
ficienda. Hoc est, juxta doctrinam hujus
Joann. iii, 18. epistolæ, non verbo et lingua, sed opere
ac veritate diligere. Si itaque hos carita-
tis actus experimur in nobis, et neminem
scandalizare ac perturbare studemus, pro-
babiliter scire valemus quod simus in sta-
tu gratiæ ac salutis.

Præterea, quam grave scelus sit odium
proximi, constat ex hoc quod ait Joannes
Ibid. 15. apostolus : « Omnis qui odit fratrem suum,
homicida est ». Quocirca memorandum,
quia ut sanctus martyr, Papa ac doctor
B. Clemens testatur, beatissimus princeps
Apostolorum Petrus dixit esse triplex ho-
micii genus : unum reale et corporale;
secundum dixit esse odium ; et tertium,
detractionem. Per primum homicidium au-
fertur vita naturæ ; per secundum, vita
gratiæ ; per tertium, esse laudabile seu
bonæ famæ, quod habet quis in cordibus
aliorum. Porro aliquis potest esse homicida
quatuor modis : primo, aliquem ad iram
et impatientiam, et ex consequenti ad ho-
miciidum provocando ; secundo, mortem
corporalem aut spiritualem alicujus op-
tando ; tertio, mortem alterius procurando ;
quarto, aliquem corporaliter occidendo. Om-
nia itaque hæc homicicii genera evitemus.

Amplius ex præsentī docemur epistola,
quam summa et perfectissima fuit caritas
Christi ad nos, quoniam se ipsum obtulit
pro nostra salute, acerbissimam sustinens
mortem ut æternam gloriam consequa-
mur, sicut per Isaiam effatur : Corpus
meum dedi percutientibus, et genas meas
vellentibus ; faciem meam non averti ab
increpantibus et conspuentibus in me. Pro-
pter quod ait Apostolus : In fide vivo Filii
Dei, qui dilexit me et tradidit semetipsum
pro me. Simus igitur Christo grati corde,
verbo et opere, amando, laudando ac ho-
norando eum in omnibus, et obediendo
ejus præceptis. Sed et Christi intuitu ac
amore parati simus mori pro proximorum
salute, dum scilicet casus se offert : ut
dum illi periclitarentur in anima, nisi eis
pro posse subveniremus, hortando, infor-
mando, aut alio modo. Et omnino quilibet
Christianus debet sic stare, quod potius
mori eligeret, quam cujuscumque proximi
animam condemnari.

Postremo docet nos præsens epistola, ut
indigentibus succurramus, et viscera pie-
tatis super eos aperiāmus, communicando
eis de bonis nobis a Deo collatis, sicut ait
Salvator : Quod superest date eleemosy-
nam, id est, quod vobis superfluit, pau-
peribus erogate. In extrema necessitate
dandum est proximo quod superest ne-
cessitati propriæ vitæ ; in aliis vero indi-
gentiis minoribus dandum est proximis
quod superest necessario victui, conside-
ratis circumstantiis proprii status, non so-
lum quoad tempus præsens, sed etiam
D quantum ad ea quæ probabiliter possunt
occurrere et frequenter occurrunt.

At vero S. Joannes apostolus, ante verba
hujus epistolæ mentionem facit de Abel et
Cain, et dicit quod ideo Cain occidit fra-
trem suum Abel, quoniam opera sua fue-
runt vitiosa, opera vero Abel fuerunt justa.
Nam sicut in Genesi legitur, Cain obtulit
Deo de frugibus terræ, hoc est de viliori-
bus rebus suis : et hoc, absque devotione.
Abel autem obtulit Deo sacrificium de op-
timis suis pecoribus : et hoc, devotissima

*Is. l, 6.**Galat. ii, 20.**Luc. xi, 41.**Joann. iii, 12.**Gen. iv, 3-5, 8.*

mente. Ideo Deus respexit ad Abel et ad A
munera ejus, habendo ea accepta : in
cujus signum ignis venit de cœlo et con-
sumpsit sacrificium Abel. Porro ad Cain
et ad ejus munera Dominus non respe-

xit. Hinc Cain concepit invidiam contra
Abel, dixitque ei : Veni, egrediamur in
agrum. Quumque essent in agro, pravis-
simus Cain occidit sanctum et innocen-
tissimum Abel.

ENARRATIO IN EVANGELIUM

HOMO QUIDAM FECIT COENAM MAGNAM, ET VOCAVIT MULTOS. Luc. XIV, 16-24.

CHRISTUS in evangelio hodierno, per B
introductionem cujusdam parabolæ, id
est similitudinis, docet qualiter homines
variis modis impediuntur ab adeptione fe-
licitatis æternæ, et ait : *Homo quidam fe-*
cit cœnam magnam, et vocavit multos. Per
hunc hominem intelligitur Christus, qui
in unitate personæ est verus Deus et verus
homo. Qui fecit cœnam magnam, id est,
beatificam æternæ gloriæ refectionem suis
præparavit electis, de qua ait Apostolus :
I Cor. II, 9. Oculus non vidit, nec auris audivit, nec
in cor hominis ascenderunt, quæ præpa-
ravit Deus his qui diligunt illum. De qua
et Christus in Cœna dixit Apostolis, et
sub eorum persona cunctis fidelibus : Ego
dispono vobis regnum, ut edatis et bibatis
super mensam meam in regno. Unde apud
Isaiam, inter electos et reprobos, inter ju-
stos et iniquos distinguens : Ecce (inquit)
servi mei comedent, et vos esurietis; ecce
servi mei laudabunt præ exultatione cor-
dis, et vos clamabitis præ dolore cordis,
et præ contritione spiritus ululabitis. Ad
hanc cœnam Christus multos vocavit, di-
cendo : Pœnitentiam agite, appropinquabit
enim regnum cœlorum. Hinc dicit in Psal-
mo : Annuntiavi, et locutus sum; multi-
plicati sunt super numerum.

Et misit servum suum, id est Aposto-
lorum omniumque prædicatorum eorum,
cœtum seu ordinem. Sæpe etenim in
Scripturis fit mentio de tota aliqua ple-
be seu multitudine quasi de homine uno,

sicut in Exodo Deus loquitur Pharaoni :
Dixi tibi, Dimitte filium meum, id est ^{Exod. IV,}
populum Judæorum. *Hora cœnæ*, id est ^{23.}
in hac ultima mundi ætate, in cuius fine
exhibebitur cœna ista plenarie cunctis ele-
ctis, dum omnes simul glorificabuntur in
corpore, pariterque cum Christo, peracto
finali judicio, ascendent ad regnum cœ-
leste, in quo cœlestis refectionis dulcedine
replebuntur, sicut ait Propheta : Satiabor ^{Ps. XVI, 15.}
quum apparuerit gloria tua, Domine. In-
terim quoque, a tempore descensus Christi
ad inferos cœpit hæc cœna exhiberi ele-
ctis, quoniam Christus pretio sanguinis
sui januam regni cœlestis aperuit; atque
in limbum patrum veniens, omnes san-
ctos ibi detentos mox suæ deitatis beati-
fica fruitione refecit, quia pro originali
satisfecit peccato, ob cuius reatum sancti
illi retardabantur a gloria. De hac hora
scriptum est in Canonica S. Joannis : No- ^{I Joann. II,}
vissima hora est. Et quotidie quidam ele- ^{18.}
cti in hac hora ad regnum ascendunt cœ-
lorum. Porro refectio ista spiritualis et
beata, potius appellatur cœna quam pran-
dium, quoniam non succedit ei refectio
alia, et habet æternam quietem ei adjun-
ctam, quemadmodum cœnæ in vita ista
conjungitur quies nocturna. De qua cœna
in Apocalypsi scriptum est : Beati qui ad ^{Apoc. XIX, 9.}
cœnam nuptiarum Agni vocati sunt. *Dice-*
re invitatis, id est hortari homines ad re-
gni cœlestis præmia promerenda, *ut veni-*
rent, id est, Deum proximosque amando, et

juste ac timorate vivendo, ad patriam Beatorum appropinquare studerent. Sed cur ait, « invitatis », quasi homines ante Christi et Apostolorum prædicationem invitati ad cœleste non fuerint regnum? Et dicendum, quod a principio mundi homines invitabantur ad promerendum regnum cœlorum, tam per angelicas inspirationes quam per Patriarchas et Prophetas ac justos. *Quia jam parata sunt omnia*, id est, cœlestia gaudia merito passionis Christi hominibus sunt parata, dummodo meritum passionis Christi eis per sacramenta Ecclesiæ applicetur, si adsit facultas (quæ si desit, sufficit desiderium ecclesiastici sacramenti cum proposito accipiendi illud, si facultas unquam adfuerit), et dummodo ipsi non ponant obicem suæ saluti. Ideo dicit Gregorius : Omnia sunt parata, quoniam Christo immolato, patet introitus regni cœlestis. Qui et jam passione instante dixit : Vado parare vobis locum, ut ubi sum ego, et vos sitis. Unde ad Hebræos habetur : Præcursor pro nobis introiit Jesus, etc.

Joann. xiv,
2, 3.

Hebr. vi,
20.

Et cœperunt simul omnes se excusare, id est, quilibet eorum, vel potius quidam de omni genere invitatorum, excusaverunt se ab executione præceptorum cœlestium, et a progressu ad regnum cœlorum : quoniam sensibilia et terrena magis quam spiritualia et divina amabant, ideo excusaverunt se, etsi non verbo, tamen facto.

Primus dixit ei : Villam emi, et necesse habeo exire et videre illam; rogo te, habe me excusatum. Per hunc primum, qui ex occupatione circa villam quam emit, neglexit Deo servire ac obedire, designatur universitas superborum et ambitiosorum : qui ita se occupant circa honorem et principatum acquirendum aut retinendum in sæculo isto, quod Dei mandata negligunt adimplere, nec ad æternæ beatitudinis suspirant honores, sed temporalia atque præsentia æternis præferunt ac futuris, propria excæcati superbia, quæ mentem mirabiliter damnabiliterque obtenebrat, ita quod suo se non subdit Creatori : ideo gratiam

A ejus accipere est indigna. Postremo, per hoc quod ait, « Rogo te, habe me excusatum », datur intelligi quod superbi, sicut et ceteri vitiosi, maxime tamen superbi, de suis se excusant peccatis. Nam sicut accusatio sui ipsius, est effectus, signum et comes humilitatis; sic priorum excusatio vitiorum, est effectus, signum et comes elationis. Idcirco Propheta Deum exorat : Non declines cor meum in verba malitiæ, ad excusandas excusationes in peccatis. Imo præcipue displicet Deo excusatio talis : propter quod ait per Jeremiam, Ecce ego iudicio contendam tecum, eo quod dixeris, Non peccavi. Postremo, quod ait, « Rogo te, habe me excusatum », secundum Gregorium, tantum est ac si dicat : Ora pro me, quia converti non possum. Sicque humilitas sonat in voce, dum ait, « Rogo te »; superbia in actione, dum venire et obedire contemnit.

Ps. cxi, 4.

Jer. ii, 35.

Et alter dixit : Jugu boum emi quinque, id est quinque paria boum, et eo probare illa; rogo te, habe me excusatum. Per hunc secundum intelliguntur avari : qui circa terrenas divitias ita intenti sunt, quod spiritualium atque cœlestium obliviscuntur bonorum; sicque afficiuntur ad illas, quasi nunquam amissuri sint eas, et quasi non sit vita post vitam istam, non considerantes illud Job : Dives quum dormierit, nihil secum auferet; apprehendet eum quasi aqua inopia. Hinc ait Apostolus : Nihil intulimus in hunc mundum; haud dubium quia nec auferre quid possumus.

Job xxvii,
19, 20.

1 Tim. vi, 7.

D *Et alius dixit : Uxorem duxi, et ideo non possum venire.* Per hunc tertium designantur luxuriosi. Nam quamvis matrimonium sit bonum ac licitum, atque ad prolificationem divina providentia institutum, multi tamen per hoc non fecunditatem prolis, sed turpitudinem expetunt voluptatis. Ideo per rem justam ac licitam, non incongrue res designatur illicita, secundum Gregorium. Et quia carnalis voluptas fortissime ligat, occupat, infimisque immergit hominem : ideo tertius iste

non dixit, Rogo te, habe me excusatum; sed simpliciter loquitur, « Non possum venire ». Nam et carnalis voluptas parit acediam atque fastidium divinorum, facitque hominem ad virtutum opera impotentem.

Itaque Christus in ista docet parabola, quod per tria hæc vitia, puta superbiam, avaritiam, luxuriam, homines potissimum a sua impediuntur salute, quodque peccata hæc in hominibus amplius regnant, secundum illud : Omne quod est in mundo, concupiscentia carnis est, et concupiscentia oculorum, et superbia vitæ.

I Joann. II,
16.

Et reversus servus, id est, ordo seu cœtus prædicatorum et pastorum ab actu prædicationis ad contemplationis quietem revertens : quia post exteriorum operum executionem, debet prædicator et prælatus ad interiora opera sua redire, Deo vacare, et coram eo cor suum effundere; *nuntiavit hæc domino suo*, id est, Christo pie et dolorose conquestus est ista per allocutionem internam. Prædicatores etenim et prælati devoti ac fervidi, zelo divini honoris desiderioque salutis proximorum, præsertim sibi commissorum, accensi, vehementer tristantur et Deo humiliter conqueruntur, dum prædicando parum aut nihil proficiunt : sicut et maxime gaudent, dum multos convertunt, quemadmodum ad Corinthios scribit Apostolus : Multa mihi gloriatio est pro vobis; superabundo gaudio in omni tribulatione nostra. Dicitur autem servus Christo hæc nuntiare, non quasi Christus hæc ignoret, sed ut ordinem intelligamus parabolæ.

II Cor. VII,
4.

Tunc iratus paterfamilias, id est Christus, rerum omnium Dominus, militantis ac triumphantis Ecclesiæ princeps, de quo Isaias prædixit : Vocabitur nomen ejus, Deus, Fortis, Pater futuri sæculi, Princeps pacis. Itaque Christus propter tantam hominum negligentiam ingratitudeque juste indignans est. Porro ira non competit Christo secundum suam divinitatem, quoad passionum affectus, sed quantum ad similitudinem operis. Ira vero per ze-

Act. X, 36.

Is. IX, 6.

lum, quæ est appetitus vindictæ secundum rationis dictamen, fuit in Christo et competit ei secundum quod homo est, juxta quod scriptum est : Contristatus est Jesus super cæcitate cordis eorum, circumspiciens eos cum ira. *Dixit servo suo*, id est, cœtui prædicatorum præcepit : *Exi a contemplationis dulcedine ad aliorum informationem ac conversionem, cito*, quia periculum est in mora : ideo sine dilatione providendum est animarum saluti, et satagendum est ne Deus ab hominibus offendatur. Quo verbo reprehenduntur prædicatores atque pastores remissi ac tardi, qui facili occasione prædicationem aut ceteros sui officii actus differunt aut omitunt. *In plateas et vicos civitatis*. Per civitatem hoc loco intelligitur Synagoga, quæ fuit aliquando civitas Dei, videlicet tempore veteris Testamenti, sicut nunc est Ecclesia; fuitque Synagoga lege divina atque angelorum custodia tanquam muro munita. Per plateas vero designantur multitudines hominum numerosiores; per vicos, multitudines minores, quia non multis tantum, sed et paucis prædicandum est. *Et pauperes*, id est donis spiritualibus destitutos; *ac debiles* ad bene agendum : peccatum enim naturales vulnerat vires, ita quod debiles fiunt ad actus virtutum. *Cæcos*, id est indoctos; *et claudos*, id est rectitudinem justitiæ non servantes, atque instabiles : qui quasi in utramque claudicant partem, dum in nulla virtute constantes existunt. De quibus fertur in Psalmo : Filii alieni inveterati sunt, et claudicaverunt a semitis suis. Unde instabilibus filiis Israel tertio Regum ait Elias : Usquequo claudicatis in duas partes? *Introduc huc*, id est, ad regnum cœlestes perducere stude, prædicando, orando, exemplariterque vivendo.

Marc. III, 5.

Ps. XVII, 46.

III Reg.
XVIII, 21.

Et ait servus : Domine, factum est ut imperasti, id est, Judæis prædicavimus ut jussisti. Principibus namque sacerdotum et majoribus Judæorum ad Christum converti nolentibus, multa millia ex minoribus ejusdem populi sunt conversa, quemad-

Act. II, 41;
IV, 4.

modum in Actibus Apostolorum describitur. *Et adhuc locus est*, id est, adhuc vacant loca et sedes in regno cœlesti. Non enim numerus hominum prædestinatorum et angelorum ruina, ex solis Judæis erant implendi.

Et ait dominus servo : Exi in vias et sepes, id est ad gentiles per lata carnalitatis ac perditionis itinera gradientes, divina lege carentes : propter quod quasi agrestes fuerunt, et per sepes merito exprimuntur. Primo quippe prædicandum fuit Judæis, deinde gentilibus, sicut in Actibus Paulus et Barnabas Judæis dixisse scribuntur : Vobis oportebat primum loqui verbum Dei ; sed quoniam repulistis illud, ecce convertimur ad gentes : sic enim præcepit nobis Dominus. *Et compelle intrare*, id est, quasi importune, et per comminationes damnationis æternæ, instiga illos ut convertantur : sicut ad Timotheum scribit Apostolus, Prædica verbum, insta opportune, importune, argue, obsecra, increpa in omni patientia. Verumtamen, quod ait, « Compelle intrare », non est intelligendum de coactione absoluta (quia sic liberum arbitrium cogi non potest, nec Deo placent coacta obsequia), sed de coactione aliquali et inductiva. *Ut implea-*

tur domus mea, id est, numerus prædestinatorum compleatur in cœlo : de qua ait Salvator, In domo Patris mei mansiones multæ sunt. De qua et illud Baruch potest exponi : O Israel, quam magna est domus Dei, et ingens locus possessionis ejus, magnus et non habens finem, excelsus et immensus ! Sed si finem non habet, quomodo potest impleri ? Et respondendum, quod immensus vocatur, non propter interminabilitatem, sed ob latissimam et maximam capacitatem.

Dico autem vobis, quod nemo virorum illorum qui vocati sunt, id est nullus prædictorum qui se excusaverunt et venire renuerunt, *gustabit cœnam meam*, id est, æternæ felicitatis refectionem dulcissimam experietur ; sed omnes illi pariter damnabuntur. Hoc quoque notandum, quod Deus quatuor modis vocat homines ad salutem : primo, inspiratione interna, idque dupliciter, utpote per se ipsum et per angelos sanctos ; secundo, prædicatione exteriori ; tertio, beneficiis atque miraculis ; quarto, adversitatibus ac flagellis. Ad quod designandum Christus quater ait, Revertere, loquens animæ fideli in Canticis : Revertere, revertere, Sunamitis, revertere, revertere.

SERMO SECUNDUS

DE QUADRUPLICI COENA.

BEATI qui ad cœnam nuptiarum Agni Dei vocati sunt. Apoc. xix, 9.

Sacra Scriptura de quadruplici loquitur refectione seu cœna. Prima est cœna sive refectio corporalis. Unde scribitur apud Lucam, quod Jesus intravit in domum ejusdam principis Phariseorum, a quo fuerat invitatus, ut manducaret cum illo. In Joanne quoque legitur, quod quum ante sex dies Paschæ venisset Jesus Bethaniam,

fecerunt ei cœnam ibi, in qua Lazarus paulo ante a Christo resuscitatus, fuit discumbentium unus, Marthaque ministravit. Quales autem ad hanc corporalem cœnam seu prandium sunt vocandi, docet Salvator, loquens ei qui se invitaverat, scilicet principi Phariseorum : Quum facis prandium aut cœnam, noli vocare amicos tuos, neque fratres, neque cognatos, neque vi-

Act. xiii,
46, 47.

II Tim. iv,
2.

Luc. xiv, 1.

Joann. xii,
1, 2.

Joann. xiv,
2.

Baruch iii,
24, 25.

Cant. vi, 12.

Luc. xiv,
12-14.

tent, et fiat tibi retributio in hac vita. Sed quum facis convivium, voca pauperes, debiles, claudos et cæcos; et beatus eris, quia non habent retribuere tibi : retribuetur enim tibi in resurrectione justorum.

Sed circa hæc quæri potest qualiter intelligi debeant, præsertim quum sancti viri legantur divitibus, et amicis ac propinquis frequenter fecisse convivia, sicut et Joseph fratribus suis in Ægypto, et Isaac patriarcha regi Palæstinorum ac principi militiæ ejus, ut in Genesi recitatur.

Gen. XLIII, 16, 31-34. Ibid. XXVI, 30.

II Reg. III, 20.

Denique David rex fecit convivium Abner principi militiæ regis Israel, ut secundo Regum habetur. Quotidie etiam viri honesti, non solum sæculares, sed et religiosi, convivium faciunt amicis suis, fratribus, et propinquis atque divitibus : et laudabiliter agunt hoc, ut videtur. Imo contingere potest quod amici et propinqui sint pauperes : et tunc bene tractandi sunt. Ad hæc venerabilis Beda respondet : Fratres, et amicos, ac divites alterutrum convivia celebrare, non quasi peccatum prohibet Christus, sed sicut cetera necessitatis humanæ commercia, ad promerendum cœlestis beatitudinis præmia nil valere ostendit. Juxta quem modum et alibi dicit : Si benefeceritis iis qui vobis benefaciunt, quæ vobis est gratia ? Hinc ait Nicolaus de Gorra : Amici, et fratres, et cognati, atque vicini, aut sunt pauperes : et tunc meritorie invitantur; aut sunt divites. Et tunc vel invitantur ad fovendum mutuam caritatem : et ita meritorium est, dum invitator sit in statu salutis ; aut propter lasciviam, seu aliam malam causam, ut propter carnalia immoderata solatia : et tunc est demeritorium ; aut propter quamdam liberalitatem ac amicitiam naturalem : et ita est quasi indifferens.

Luc. VI, 33.

Præterea, advertenda sunt diligenter verba Chrysostomi asserentis : Non sub hac spe aliis beneficia conferamus aut convivium præbeamus, ut nobis retribuunt. Hæc est enim frigida intentio ; et talis amicitia celeriter evanescit. Si autem pauperem ad mensam tuam vocaveris, Deum nunquam

obliscentem debitorem habebis. Quanto enim minor, vilior sive pauperior est proximus, tanto magis Christus per eum accedit et visitat. Nam qui magnum suscipit, sæpe propter vanam gloriam facit hoc ; atque utilitas propria sæpe in hoc quæritur, ut suscipiens per illum promoveatur. Sed dicis : Immundus est pauper et sordidus. Lava eum, et fac tecum in mensa sedere ; si sordidas habet vestes, mundum exhibeas indumentum. Christus accedit per eum, et tu frivola loqueris ? Insuper Gregorius Nyssenus hortatur : Non negligas jacentes egenos, quasi nullo sint digni honore. Cogita quid sint, et pretiositatem eorum invenies. Salvatoris induerunt imaginem ; futurorum bonorum heredes sunt, et regni cœlestis clavigeri ; accusatores et excusatores idonei, non loquentes, sed ad specti a Judice. Itaque, sicut ait Chrysostomus : Decet eos in solario reverenter locari ; sed si hoc non placet, saltem deorsum ubi sunt ministri, Christum suscipias. Fiat pauper saltem domesticus tuus ; et si tecum non sedeant, mitte ei fercula de mensa tua. In hoc quoque corporali convivio vitanda sunt lasciva solatia, et detractoria, irrisoria mendosaque verba.

Secunda est cœna spiritualis, de qua in Apocalypsi loquitur Christus : Ego sto ad ostium, et pulso ; si quis aperuerit mihi, intrabo ad illum, et cœnabo cum illo, et ipse mecum. Christus etenim, verus et incircumscripibilis Deus ubique præsens, stat ad ostium cordis, id est, libero arbitrio præsens est ; et pulsatur, hoc est, ad sui gratiosam susceptionem excitatur seu admonet illud per divinas Scripturas, per prædicationes ecclesiasticas, per inspirationes angelicas, per divinos instinctus, per prospera et adversa, atque miracula. Unde loquitur animæ amore : Aperi mihi, soror mea, amica mea, columba mea. Si itaque iis pulsationibus homo consenserit, intrat Christus cor ejus, gratiam suam infundendo, aut infusam augendo ; et cœnat cum ipso, hoc est, simul cum ipso reficitur, ejus bonis actibus congratulan-

Apoc. III, 20.

Cant. V, 2.

Ps. cxlix, 4. do, juxta illud in Psalmo : Beneplacitum A
est Domino in populo suo. Et Nehemias
II Esdr. viii, 10. ait : Gaudium Domini est fortitudo vestra.
Talis quoque cœnat cum Christo, quia per
conscientiæ puritatem delectatur in eo, at-
que in cœlestis beatitudinis expectatione
humiliter gloriatur. Ecce quam ineffabi-
liter magna est caritas, misericordia atque
dignatio Dei nostri ad nos tantillos vermi-
Prov. viii, 31. culos. Nam et in Proverbiis testatur : De-
liciae meæ esse cum filiis hominum. Sed
Jer. xxxii, 41. et Jeremias fatetur : Lætabor super eis,
quum benefecero eis. Tantum igitur pul-
satorem non repellamus, cum tanto hospi-
te cœnare quotidie properemus; quidquid
ejus introitum impedit, quidquid ipsius
vultum offendit, omni cum diligentia fu-
giamus.

Sed quæri potest, cur Christus potius
ait, Cœnabo cum illo, quam, Prandebo. Et
respondendum quod ideo, ut innuat se vel-
le pernoctare nobiscum atque in thalamo
Ps. iv, 9. mentis nostræ quiescere, ut in pace in id
ipsum dormiamus et requiescamus. Sic
cœnat cum Christo, et in castis ipsius
quiescit amplexibus, qui corde devoto per-
git ad stratum, et in meditationibus san-
Ps. xc, 5. ctis obdormit. Talis non timet a timore
nocturno, sed de mentis securitate refici-
tur. Secura etenim mens, Salomone te-
Prov. xv, 15. stante, est quasi juge convivium. Hæc
ergo spiritualis cœna non est nisi mutua
congratulatio, qua Christus nostris con-
gaudet actibus virtuosus, et nos in ejus
bonitate ac pietate lætamur, ejusque bea-
titudini congratulamur.

Hujus cœnæ mensa, est anima devota, in D
qua tot fercula proponuntur, quot actus
virtuosi in ea gignuntur. Ideo juxta tri-
plicem gradum ac statum hominum, ut-
pote incipientium, proficientium et per-
fectorum, tripartita fercula proponuntur
in ea. Siquidem incipientes seu peccato-
res pœnitentes, tria fercula potissimum
ponere debent in cœna ista, videlicet con-
tritionem, confessionem, satisfactionem; et
in iis eorum operibus Christus Dominus
delectatur : quemadmodum ait Gregorius,

quod apud Pharisæum Christus discumbe- *Luc. vii, 36*
bat exterius, apud pœnitentem vero mu- *et seq.*
lierem, videlicet Mariam Magdalene, discum-
bebat interius. Porro proficientes ponere
debent in cœna ista tria fercula, quibus
Christus non mediocriter delectatur, ut-
pote humiliationem, orationem et gratia-
rum actionem : debent enim se humiliare
propter peccata sua præterita, Deumque
jugiter invocare pro gratia proficiendi in
bonis, gratias quoque ei referre quod tam
misericorditer egit cum eis. Perfecti vero
B in cœna hac tria ponere fercula debent,
videlicet divinorum contemplationem, sum-
mi et incommutabilis boni fervidam dile-
ctionem, firmam ac cordialem in Deo com-
placentiam, pacem seu delectationem, vel
certe continuam Dei laudationem, secun-
dum illud : Benedicam Dominum in omni *Ps. xxxiii, 2.*
tempore. Itaque, quanto purioribus ac su-
blimioribus virtutum exercitiis mens no-
stra est intenta, tanto delicatior et com-
placentiorem Christo exhibet cœnam. Qui
vero turpibus cogitationibus, pravis affe-
ctionibus et vitiosis inhæret operibus, cum
dæmonibus vescitur, cœnat et permanet.

Tertia est cœna infernalis, de qua ait
Propheta, scribens de reprobis : Sicut oves *Ps. xlviii, 15.*
in inferno positi sunt, mors depascet eos.
Unde apud Jeremiam loquitur Deus : Ecce *Jer. xxiii, 15.*
ego cibabo eos absinthio, et potabo eos
felle. Hujus cœnæ mensa, est damnatorum
universitas dolorosa; fercula hujus cœnæ,
sunt cuncta inferni supplicia, quibus qua-
si veneno cibantur mortifero. — Primum
ferculum, est omnium gaudiorum ac di-
vinæ visionis carentia, sicut per Jeremiam
Dominus loquitur : Dabo eos in vexatio- *Ibid. xxix, 18, 19.*
nem, et maledictionem, et stuporem, et in-
sibilum et opprobrium, eo quod non obe-
dierunt mihi. Quemadmodum enim gau-
dium Beatorum in cœlo est purum, id est
nihil tristitiæ habens admixtum; sic tri-
stitia damnatorum est pura, quia nulla
consolatio est ei admixta. Idcirco esse et
vivere, quæ creaturis naturaliter valde sunt
appetibilia, sunt damnatis odibilia atque
gravissima, juxta illud in Apocalypsi : In *Apoc. ix, 6.*

diebus illis quærent homines mortem, et non invenient eam; et desiderabunt mori, et fugiet mors ab eis. Unde et Christus dixit de Juda proditore: Bonum ei esset, si natus non esset homo ille. Hoc de quolibet condemnato æternaliterque damnando poterit dici. — Secundum ferculum cœnæ infernalis, est illa inæstimabilis tartarei ignis punitio, qui incomparabiliter affligit damnatos juxta exigentiam pravitatis seu demeritorum eorum, quemadmodum præcipit summus et infallibilis Judex: Quantum glorificavit se et in deliciis fuit, tantum date illi tormentum et luctum. Pœna equidem ignis molestior est. Cogitet ergo unusquisque quam intolerabile sibi esset nudo corpore per unum diem jacere in igne quem cernimus hic fervere: qualiter igitur infernalis ignis incendium sustinebit? Unde apud Ezechielem Dominus contestatur: Conflabo vos et succendam vos in igne furoris mei, et conflabimini in medio ejus, sicut conflatur argentum in medio fornacis. — Tertium ferculum, est vehementissimum illud frigus gehennæ. Unde et Job ait: Ad nimium calorem transeat ab aquis nivium. Quum enim terra sit naturaliter frigida, et infernus in medio terræ esse credatur, constat quod maximum frigus sit ibi: quod per aquas nivium designatur, quum aquæ illæ sint frigidæ valde. Sed contra hoc objici potest, quia si damnati transeunt de maximo calore ad maximum frigus, ergo refrigerium habent, accedendo ab excessu caloris ad aliquale frigus: quia non transitur de extremo ad extremum nisi per medium, ut divinus Dionysius loquitur. Ad hoc super Apocalypsim respondet Albertus, quod damnati transeunt a maximo calore ad maximum frigus immediate, et non per gradus, faciente hoc omnipotentia Dei: idcirco ex hac alternatione non habet eorum pœna refrigerium, sed augmentum. Nam sicut opposita juxta se posita clarius innotescunt, ita dum uni eorum alterum succedit, magis sentitur, graviusque affligere solet, sicut

dum aliquis post opulentiam grandem repente depauperatur. Quod sanctus Job sibi accidisse conqueritur: Ego (inquiens) quondam ille opulentus, repente contritus sum. — Quartum ferculum damnatorum, est desperatio sempiterna, qua magis torquentur in mente, quam igne in corpore. — Quintum ferculum, est infelicissima societas eorum ad invicem, quæ pœnas sibi mutuo auget. Sic et alia possunt diversa assignari fercula cœnæ infernalis. In qua etiam triplex ponitur sonitus miserrorum, loco musicorum instrumentorum. Primus, est stridor dentium; secundus, est planctus omnium damnatorum; tertius, ululatus est dæmonum.

Quarta est cœna cœlestis, id est beata refectio Beatorum. In qua tria sunt principalia fercula, quæ sunt tres dotes animæ succedentes et correspondentes theologicis tribus virtutibus. Primum ferculum, est divinæ essentiae clara notitia, quia ut ait Joannes, Videbimus eum sicuti est: quæ visio est inæstimabiliter gratiosa, quum Deus sit infinitæ pulchritudinis, convenientiæ et deliciositatis. Secundum, est fruitio beatifica summæ et infinitæ bonitatis: quæ quum sit infinitæ dulcedinis, ea frui plenarie in se ipsa, est prorsus magis quam credi potest jucundum. Tertium ferculum, est tentio, hoc est firma, segura perpetuaque mentis in Deo defixio sive inhæsiō. In quibus tribus præmium essentialē consistit. Sunt et alia multa prædulcia fercula Beatorum, videlicet conspiciere Christi humanitatem et Virginem gloriosam, omnes quoque angelicorum spirituum ordines, et omnium beatorum hominum gradus ac distinctiones, horumque omnium segura atque æterna perfrui societate.

Ut ergo infernalem illam cœnam valeamus evadere, et istam cœlestem acquirere, studeamus nunc Christo quotidie spiritualement facere cœnam, et vitia illa vitare de quibus in evangelio legitur hodierno, hoc est superbiam, avaritiam atque luxuriam, et cetera universa, virtutesque illis contrarias obtinere, conservare atque perfi-

Matth.
xxvi, 24.

Apoc. xviii,
7.

Ezech. xxi,
20-22.

Job. xiv,
19.

Cf. de Cœlest. hier. c.
1.

Job xvi, 13.

I Joann. iii,
2.

cere in nobis; et ad ista unusquisque pro A
posse suo proximos suos hortetur.

Legitur de S. Bernardo, qui maximum
fecit fructum in prædicando, innumerabi-
les homines convertendo, quod quum qua-
dam die prædicasset Parisiis et convertisset
perpaucos, ingressus domum cujusdam
prælati, et in loco se claudens secreto, cœ-
pit vehementissime lacrimari, in tantum
quod hospes ille audivit ejus singultus,
gemitus et ploratus. Unde multum admi-
rans, interrogavit unum ex religiosis cum
S. Bernardo pergentibus : Quæ est horum B
am Dei.

SERMO TERTIUS

CONTRA TRIA PRINCIPALIA VITIA, SUPERBIAM, AVARITIAM ET LUXURIAM, DE QUIBUS
IN EVANGELIO HODIERNO FIT MENTIO.

OMNE quod est in mundo, concupi-
scentia carnis est, et concupiscentia C
oculorum, et superbia vitæ. I Joann. II, 16.

Quemadmodum Augustinus testatur :
Amor sui crescens usque ad contemptum
Dei, est origo et causa et radix omnium
vitiatorum; amor vero Dei crescens usque
ad contemptum sui, est origo et fons om-
nis operis boni. Nunc ergo considerandum
est, quid sit iste amor sui crescens usque
ad contemptum Dei, quid item sit amor
Dei crescens usque ad contemptum sui.
Itaque amor sui crescens usque ad con-
temptum Dei, est amor quo quis amat D
se in se, volendo et appetendo sibi aliqua
convenientia sibi sive placentia suæ pro-
priæ voluntati, per respectum ad semet-
ipsum. Ideo iste amor vocatur amor pri-
vatus, improbus et ad se reflexus. Dicitur
enim amor privatus, quum sit amor sui
ipsius seu singularis personæ ac proprii
commodi : ideo etiam dicitur amor ad
se reflexus, et non ad Deum finemque
ultimum ordinatus. Dicitur quoque im-
probus, quia rationi ac justitiæ est con-

trarius. Quum enim homo sit a Deo cre-
atus ob aliquem certum finem et ad sui
Creatoris honorem et gloriam (propter
quod Psalmista loquitur Deo : Numquid Ps.LXXXVIII,
vane constituisti omnes filios hominum?), 48.
ideo homo non debet se ipsum diligere
nisi per comparisonem et secundum exi-
gentiam ultimi finis propter quem condi-
tus est, atque ad gloriam et honorem pro-
prii Creatoris, hoc est per ordinationem
sui ipsius actuumque suorum ad veram
beatitudinem, quæ est finis creationis hu-
mani generis, et ad Dei gloriam et hono-
rem, videlicet : ita vivendo prout expedit
sibi ad perveniendum ad veram salutem,
et ea agendo quæ Deo placent et suæ ma-
jestatis honorativa existunt; similiter illa
bona volendo appetendoque sibi ipsi quæ
sibi utilia aut necessaria sunt ad compla-
cendum Domino Deo, et item ad obtinen-
dum felicitatem æternam. Sic se amare,
est se vere et virtuose, ac ordinate spiri-
tualiterque diligere.

Præterea ex amore privato ac improbo
sui oriuntur in primis principaliter tria

peccata, secundum quod triplex est bonum creatum ad quod homines inclinantur. Est enim bonum delectabile, bonum utile, et bonum honestum. Bonum delectabile est, quod directe et immediate propter voluptatem appetitur, vel in quo magis consistit voluptas, ut sunt objecta gustus et tactus, utpote cibus, potus, femina, atque similia. Bonum utile est, quod ordinatur et accommodum est ad aliud, sicut divitiæ. Bonum honestum dicitur, quod propter se appetitur : et tale bonum dicitur virtus, præsertim felicitas ; tale etiam bonum reputatur quodammodo dignitas, honor, excellentia, prælatio. Ad hæc triplicia bona afficitur homo ex improbo sui ipsius amore, volendo et appetendo ea, non secundum quod sibi expediunt per ordinationem sui ad veram salutem, sed prout placent et congruunt propriæ naturæ, et sensualitati ac voluntati ad se reflexæ. In quantum igitur ex amore sui movetur homo ad appetendum bonum delectabile, sic ex isto privato amore oriuntur gula, luxuria, et plurimæ vanitates, ut ludi, joci, risus, choreæ, amplexus, tactus et oscula carnalitatis. Denique, in quantum ex improbo sui amore movetur homo ad appetendum bona utilia, sic ex isto amore nascuntur avaritia, dolus, fraudulentia, furta, rapinæ, et alia innumerabilia mala. In quantum vero ex amore hoc inordinato movetur homo ad bona honesta, videlicet ad excellentiam et honores, ita ex eo causantur superbia, ambitio, vana gloria, vani ornatus et curiositates, jactantia, ostentatio, præsumptio, atque hujusmodi.

Itaque amor iste privatus recte dicitur crescere usque ad Dei contemptum, quia inducit hominem ad appetendum quæ tacta sunt, contra Dei præcepta, et quod præponit se ipsum Deo. Qui enim sic amat se in se, facit se ipsum finem sui ipsius, quia non ordinat se et actus suos ad Dei honorem et gloriam, neque ad veram salutem, quæ in Dei fruitione consistit ; sed fruitur semetipso et utitur Deo ac donis ipsius, quia ad deliciandum ac prosperandum, at-

que ad habendum honores et excellentias, secundum propriam voluntatem et sensualem inordinatamque inclinationem ordinat proprios actus et studia, ut scilicet abundet carnalibus deliciis, temporalibus divitiis, mundanis transitoriisque honoribus. Ecce tales sunt filii sæculi hujus, filii plane diaboli, utpote omnes qui sunt in peccato mortali : quoniam omnis qui in mortali est culpa, propriam voluntatem præfert voluntati divinæ, contra cujus præceptum agit quod sibi placet ; et ita se ipsum præponit proprio Creatori, magis inhærens et acquiescens desideriis propriis, quam omnipotentis Dei mandatis. Et hic error rationis, ista perversitas voluntatis, hæcque inordinatio totius hominis sunt infinita, hoc est infinitæ irrationabilitatis et enormitatis : idcirco peccato mortali debetur pœna æterna.

Ex præinductis jam patet, quod si quis velit universa peccata vitare ac superare, in omni quoque virtute proficere, hoc solo indiget, ut improbum sui amorem evellat de corde suo, et diligat se in Deo. Nempe se in Deo diligere, est ea velle et appetere quæ sibi expediunt ad complacendum Domino Deo, ad honorandum eum in omnibus, ad obtinendum beatitudinem sempiternam. Hæc autem sunt virtutes et actus earum, puta : humilitas, patientia, mansuetudo, pietas, abstinentia, devotio, oratio, se ipsum humiliare, alios honorare, adversa æquanimiter sustinere, opera misericordiæ exercere, iram reprimere, Deum super omnia præamare et alios cunctos in Deo diligere, ad Dei obsequia ferventem ac alacrem esse, se ipsum pro propriis peccatis quotidie castigare, aliorum quoque peccata deflare, præcepta Ecclesiæ in jejunando ac festivando implere, correctiones atque correctiones fraternas ac paternas caritative, gratanter ac pie suscipere, seque in omnibus exemplarem præbere. Ista et consimilia sunt opera amoris sui in Deo.

Præterea, amor Dei crescens usque ad contemptum sui, est caritas spiritualis in-

fusa, per quam volumus Deo quod ipse A est, utpote sui ipsius immensam perfectionem, felicitatem et excellentiam, et suæ felicitati ac gloriæ cordialiter congratulamur, eum quoque pro viribus honoramus atque ab universis honorari optamus, obediendo suis præceptis, aut etiam acquiescendo Christi consiliis. Iste amor Dei dicitur crescere usque ad contemptum sui, utpote ejus qui hunc habet amorem : quia qui taliter diligit Deum, despicit semetipsum ; nec in aliquo sibimet acquiescit contra Dei præceptum, sed Deo se subji-

Luc. xiv, 18-20.

Amplius, sicut Salvator in hodierno evangelio docet, per tria peccata mortalia homines potissimum a sua impediuntur salute, æternaliterque damnantur : quæ sunt superbia, avaritia, luxuria, de quibus jam modicum est tangendum. Itaque superbia est inordinatus propriæ excellentiæ appetitus, affectus proprii honoris, aspernatio aliorum, excellentia, tumor et elevatio sui ipsius. Ex hoc mortali peccato cetera mortalia oriuntur peccata. Hanc vitiosam detestabilemque superbiam vitare, odire et abhorrrere debemus :

Primo, quia ex magno errore et falsitate procedit. Qui enim superbit, ita se effert ac magni pendit quasi aliquid sit vel habeat a se ipso ; si enim attenderet omne quod est et habet a Deo se recepisse, non superbiret, sed Deo se subderet et gratias ei referret. Semper ergo profunde pense-

1 Cor. iv, 7.

mus illud Apostoli : Quid habes quod non accepisti ? Si autem accepisti, quid gloriaris quasi non acceperis ? Secundo, quia nil boni a nobis ipsis habemus, sed omnium defectuositatem, pronitatem ad omne malum atque multiplicem culpam. Tercio, quia per superbiam efficitur homo specialiter imitator, servus filiusque diaboli, qui (ut in libro Job scribitur) est rex super universos filios superbiæ. Quarto, quia per superbiam efficitur homo odi-

Job xli, 23.

bilis Deo ac proximis, juxta illud Ecclesiastici : Odibilis coram Deo et hominibus est superbia. *Eccli. x, 7.*

Quinto, quoniam per superbiam homo præcipue elongatur a Deo, et gratiæ ejus incapax efficitur, fitque Creatori suo adversarius ac rebellis. Ideirco scriptum est : Deus superbis resistit, humilibus autem dat gratiam ; et alibi : Non te extollas in cogitatione tua velut taurus ; et, Noli te extollere in faciendo opere tuo, sed humilia valde spiritum tuum. Sexto, quoniam

*Jacob. iv, 6 ;
1 Petr. v, 5.
Eccli. vi, 2.
Ibid. x, 29 ;
vii, 19.*

Ex superbia oriuntur peccata multa et magna nimis. Qui enim superbus est, facile indignatur, cito irascitur, parvam injuriam sibi factam reputat magnam, sicque in ulciscendo excedit. Et quia superbia tam singulariter displicet Deo, ideirco superbos merito suæ superbiæ permittit in diversa atque enormia labi peccata. Hinc virtuosus ille Tobias dixit filio suo carissimo : Superbiam nunquam in tuo sensu aut in verbo tuo dominari permittas ; in ipsa enim initium sumpsit omnis perditio.

Tob. iv, 14.

Septimo, quia tam graviter ac frequenter peccavimus, quod non possumus nos satis ac condigne humiliare : imo sola superbia nostra facit nos coram Deo tam viles, quod indigni sumus a terra portari. Aliæ posent variæ causæ vitandi et abhorrendi superbiam assignari, videlicet : quia in tot periculis positi sumus, et ignoramus an digni simus amore Dei an odio, et utrum finaliter condemnabimur an non ; et quoniam immunditiis ac fœtoribus, atque miseriis ac indigentis pleni sumus in corpore et anima. Consideremus ergo hæc omnia, et humiliemus nos jugiter coram Deo ; potiusque optemus subesse quam præesse, obedire quam imperare.

Eccli. ix, 1.

1 Petr. v, 6.

Insuper fugiamus avaritiam, quæ (juxta Apostolum) est servitus idolorum, et ex qua fraudes, rapinæ, mendacia, perjuria, falsa testimonia, dissensiones, lites, inimitiæ et alia diversa vitia oriuntur. De temporalibus rebus nil amplius debet appetere Christianus quam expedit sibi ad bene vivendum, ad spiritualiter proficien-

Ephes. v, 5.

dum, ad adipiscendum salutem æternam. Imo quanto futura vita longior erit quam præsens, tanto plus providere sibi debent Christifideles, ut sufficientiam in illa vita habeant magis quam in ista. Mira et magna est excæcatio cordis humani, quod tantum veretur hujus brevissimæ vitæ inopiam, et futuræ vitæ perpetuæ æternam non formidat penuriam et ærumnam. Et, pro dolor! multi sunt qui quamvis satis et plus quam satis habeant pro sustentatione vitæ præsentis, nil aut modicum pro bona consistentia in vita futura, tamen non cessant temporalia sibi augere et necessaria ad salutem negligere.

Postremo, luxuriam, quæ est bestiale peccatum, et rationem omnino absorbens, prorsus vitet quilibet Christianus : quia mirabiliter excæcat hominem hoc peccatum, facitque eum acediosum, vanum, instabilem, dissolutum; nec permittit eum facile per pœnitentiam veram resurgere, sed reddit eum suæ salutis immemorem. Maxima quoque turpitudine in hoc est peccato. Nec solum vitanda est ipsa luxuria, sed et concupiscentia mala, cogitatio immunda, imaginatio turpis, incautus et libidinosus adspectus, amplexus, tactus et oscula. Vitemus itaque omne peccatum mortale, quo a cœlestis cœnæ impedimur adeptione; venialia quoque peccata pro posse, quoniam ad mortalia peccata disponunt.

At vero quanta mala ex superbia et ambitione nascuntur, copiose docet sacra Scriptura. Unde in libro Judicum legitur, quod Gedeon, vir justus et judex filiorum

A Israel, habuit septuaginta filios ex legitimo toro; habuit quoque unum filium ex concubina. Mortuo itaque Gedeone, filius iste ex concubina, nomine Abimelech, quum esset ambitiosus, blandis persuasionibus obtinuit principatum; factusque princeps, conduxit sibi viros vagos ac inopes. Quibus assumptis, intravit improvise domum fratrum suorum, et interfecit septuaginta viros fratres suos super lapidem unum, ne per eos ejiceretur a principatu. Nec passus est Deus justissimus tantum **B** scelus esse inultum. Nam antequam tribus annis regnasset, permisit Deus maximam oriri dissensionem inter præfatum Abimelech ejusque populum, qui cœpit eum vehementissime detestari, præsertim ob occisionem fratrum suorum. Quumque Abimelech obsideret turrinam quamdam in qua erant multi de populo suo, mulier quædam stans super turrinam in loco plano (quia turris planitiem quamdam habuit), fragmen molæ desuper jaciens, tetigit viciosissimum illum Abimelech inter cervicem et scapulas, confregitque cerebrum ejus. Qui statim dixit armigero suo : Evagina gladium tuum, et interfice me, ne dicatur quod a muliere occisus sim. Qui armiger jussa complens, interfecit eum. Et obiit pessima morte, æternaliterque damnatus est. Ecce ad quantam malitiam delapsus est ille infelix Abimelech ex sua ambitione, et quam cito ac terribiliter Deus sanctissimus ultus est scelera ejus. Omni ergo superbia procul pulsa, in vera semper humilitate perseveremus, ad gloriam **D** Omnipotentis.

Judic. viii, 30, 31.

Ibid. ix, 1 et seq.

AD RELIGIOSOS

SERMO QUARTUS

ADVERSA OMNIA FORTI ANIMO ESSE FERENDA, UT HUMILITAS
FRATERNAQUE CARITAS INCOLUMES SERVENTUR ; ET DEI VOLUNTAS QUOMODO IN OMNIBUS
PRÆ OCULIS HABERI DEBEAT.

NON diligamus verbo neque lingua, *A* sed opere et veritate. I Joann. III, 18.

In hodierna epistola beatissimus evangelista Joannes multiformiter nos informat. Primo etenim consolatur fideles electos ac virtuosos, ne dum ab adversariis et iniquis, a mundanis, injustis carnalibusque hominibus odio habentur, iridentur, affliguntur, moleste id ferant, aut pusillanimes fiant, seu admirentur admiratione aliqua dejectiva; sed potius coram Deo humiliter glorientur, quia hoc ipsum quod sustinent, probabile signum est quod de electorum sint numero, quum et Salvator protestetur : Si mundus vos odit, scitote quia me priorem vobis odio habuit. Si de mundo essetis, mundus quod suum erat diligeret : quia vero de mundo non estis, sed ego elegi vos de mundo, propterea odit vos mundus. Similitudo namque directe est causa amoris et unionis atque concordiae; dissimilitudo vero, aversionis et rancoris ac discordiae est origo. Naturale est ergo ut justus justum, probus probum, sapiens sapientem, virtuosus diligat virtuosum : mente namque consimiles sunt, et vitia pariter detestantur. Iniqui autem, qui justitiae zelo et veritatis carent amore, justos sapientesque odiunt, in quantum eorum dissentiant voluntati. In religionibus quoque ubertim contingit quod negligentiores et magis defectuosi, eos qui spiritu fervent justitiamque zelantur et abstractius ac custoditius se habere satagunt,

Joann. xv,
18, 19.

persequuntur, et instar squamarum se mutuo comprimunt, sibi in hoc ipso quidam passionibus suis immersi cohaerent. Et esse vix potest ut quis ita se habeat ut universorum effugiat odium, omnibusque complaceat, non obstante quod ait Apostolus : Ego per omnia omnibus placeo. Non enim absolute omnibus placuit, ipsomet proloquente, Si hominibus placerem, Christi servus non essem; sed omnibus justis, vere sapientibus, sibi mente conformibus complacuit sanctus Apostolus. Hinc loquitur Seneca : Quamvis sic agas ut ne quis merito tuo te oderit, erunt tamen semper qui te oderint. Hoc autem vir sapiens æquanimiter ferre debet, et odientibus compati atque orare pro eis. Verumtamen servus Christi si odiri se videat persecutionesque pati, non tamen sit pronus quempiam temere judicare, aut magnifice de se ipso sentire, quasi ipse sit Dei electus, et alii de grege sint reproborum : imo potius suis deputet culpis quod patitur, et pro quotidianis suis defectibus, persecutionibus dignum se gravioribus fateatur, sitque in omnibus timoratus, modicum arbitrans omne quod tolerat, quum ipse Salvator et Sancti præcipue tot et tanta absque suis demeritis sint perpessi.

I Cor. x,

33.

Galat. i, 10.

Matth. v,

44.

Secundo, in hodierna epistola docet S. Joannes, in fraterna dilectione vitam gratiae esse sitam, et signum spiritualis vitae esse, fratres diligere. Ait namque : Nos scimus quia translati sumus de morte

I Joann. III,

14.

ad vitam, quia diligimus fratres; id est, A de morte culpæ ad vitam gratiæ scimus nos esse, Deo miserante ac operante, reductos, quia spiritualiter proximos omnes amamus. Ideo subdit: Qui non diligit, manet in morte, id est, mortali peccato jacet prostratus. Quocirca sciscitari quis posset, quomodo hoc sciamus, quum (Salomone testante) nesciat homo an amore sit dignus an odio. Ad quod facile respondetur, quod verbum istud in persona Apostolorum prolatum, verum est de certitudinali scientia, quia ex revelatione sciverunt se esse in gratia, imo in gratia eminenti, Paulo dicente: Quis nos separabit a caritate Dei? et. Nos ipsi primitias Spiritus habentes; et, Superest mihi corona justitiæ. Porro in persona aliorum ita de gratia Dei in se non certificatorum, tamen virtuosorum, exponitur verbum præactum de conscientia conjecturali probabili. Unde et Christus: In hoc (inquit) scient omnes quia discipuli mei estis, si dilectionem habueritis ad invicem. Et quamvis vita gratiæ atque perfectio in actuali amore Dei essentialiter sit consistens, frequenter tamen Scriptura (sicut et hoc loco) in dilectione proximi vitam gratiæ perfectionemque statuit, quoniam amor Dei et amor proximi se invicem complectuntur, concomitantur, includunt, gignunt seu nutriunt, dicente Gregorio: Per amorem Dei amor proximi gignitur, et per amorem proximi amor Dei nutritur. Nam qui amare proximum negligit, profecto Deum diligere nescit.

Præterea de caritate fraterna loquitur D valde pulchre S. Basilius in Regula sua, ubi et aliqua multum notabilia inserit, quorum allegationi et aliquali declarationi nunc modicum immorabor. Itaque inter cetera ait: Quia præcipimur diligere proximos sicut nos ipsos, videamus an insit nobis facultas et virtus ad hujus quoque expletionem mandati. Et quis nesciat quod homo animal sit communicabile, utpote sociale atque humanum, non agreste ac ferum? Nil enim tam proprium est nostræ

naturæ, ut alterum altero indigere et requirere invicem, ad quod requiritur diligere. Quoniam ergo Dominus harum in nobis virtutum semina seminavit, sine dubio fructus etiam horum requirit, et testimonium seu argumentum dilectionis nostræ ad Deum, dilectionem accipit proximorum; et ita in omnibus duo caritatis præcepta conjungit, ut etiam misericordiæ opera quæ in proximis fiunt, transferat in se ipsum. Idecirco per primum completur secundum, et per secundum ascenditur ac B reditur ad primum; et qui diligit Deum, diliget proximum. Ait etenim Dominus: Qui diligit me, mandata mea custodit; et, Hoc est (inquit) mandatum meum, ut diligatis invicem. Ita ergo qui diligit proximum, implet caritatem in Deum, quoniam Deus in se recipit quidquid confertur in proximum. Porro incipientibus converti, prima institutio per timorem utilior est, juxta doctrinam Salomonis dicentis: Initium sapientiæ, timor Domini. Vos autem, o fratres, qui jam in Christo parvuli esse C desistitis, nec ultra lacte jam indigetis, solidos cibos ex dogmatum firmitate et doctrinarum perfectione perquirite ad nutriendum interiorem hominem, ut per eminentiora et perfectiora mandata deveniat ad perfectum, atque in omni veritate quæ est in Christo, firmetur. Et observate ne abundantioris gratiæ vobis exhibitæ pondus, causa gravioris damnationis vobis fiat.

Illud quoque ante omnia considerandum, quia nec hoc ipsum neque aliud quodcumque mandatum implere quis poterit, si per varias et diversas occupationes cor ejus oberret. Nec ullum artificium aut alicujus industriæ disciplinam adipisci quis poterit, qui frequenter ex aliis ad alia fertur. Omni ergo custodia oportet nos conservare cor nostrum, ne desiderium et amorem Dei, prava desideria cogitationesque sordidæ ab animis nostris detrudant ac pellant; sed assidua recordatione et memoria Dei, formam ejus quodammodo et figuram animarum nostrarum signaculis

I Joann. III, 14.

Eccle. IX, 1.

Rom. VIII, 35.

Ibid. 23.

II Tim. IV, 8.

Joann. XIII, 35.

Matth. XIX, 19.

Eccle. XIII, 19.

Joann. XIV, 21.

Ibid. XV, 12.

Matth. XXV, 40.

Prov. I, 7;

IX, 10; Eccle. I, 16.

Hebr. V, 12-14.

Prov. IX, 23.

imprimamus, quæ nullis queant inde perturbationibus aboleri seu removeri. Sic enim desiderium nobis divinæ caritatis accedit, dum frequens ejus memoria mentem illustrat, et ad opus mandatorum Dei erigimus nosmetipsos ac suscitamus; et ex ipsis rursus caritatis operibus conservatur in nobis Dei caritas vel augetur. Et hoc puto ostendere Dominum dicendo aliquando, Si diligitis me, mandata mea servate; aliquando autem, Si facitis quæ dico, manebitis in dilectione mea.

Joann. xiv,
15.
Ibid. xv, 10.

Ex quibus docet nos, prospectum seu intentionem et directionem operis nostri debere ex sua voluntate pendere ac suscipi, ut tanquam speculum quoddam Deum et ejus voluntatem habentes, et semper ad ipsum nostra opera referentes, fixos ad ipsum cordis oculos dirigamus ac teneamus. Quemadmodum enim artificia quæ in hac vita sunt, prospectum seu intentionem aut finem aliquem animo ingerunt, et ita juxta hoc quod animo artifices ipsi conceperint, ministerio manuum sequuntur; sic et in omni opere nostro unus C manet iste prospectus, id est intentio sive finis, unusque terminus fixus est, ut scilicet Deo complaceamus. Propterea secundum istum prospectum et finem dirigamus opera nostra in Dei obsequio ac mandatis. Impossibile namque est aliter constare operis nostri formam, id est intentionem seu bonitatem actionum nostrarum esse stabilem ac valentem, nisi vo-

luntas ejus qui opus injungit, semper in memoria habeatur, ut ejus voluntate servata et per laborem ac diligentiam operis adimpleta, semper jungamur complaceamusque Deo dum ejus semper memores sumus. Sic enim, verbi gratia, faber securim falcemve faciens semper meminit ejus qui opus injunxit, et retinet corde cujus magnitudinis aut qualitatis vel formæ injunxerit fieri opus; quod si obliviscatur, indebite faciet. Ita Christianus omnem considerationem, conatum, omneque studium adhibere debet in cunctis actibus suis, ut secundum voluntatem Dei, qui opus injunxit, omne suum dirigat opus, et ut actus sui virtutum bonitate ornentur, possitque Dei voluntatem in omnibus adimplere et ei jugiter complacere. Et tunc poterit etiam adimplere quod scriptum est: Sive manducetis, sive bibatis, sive aliud aliquid faciatis, omnia ad Dei gloriam facite. Si vero declinet quis a lege seu regula, observantiamque mandati corrumpat, ex hoc ipso arguitur quod sit immemor Dei. — Hæc Basilius, cujus verba sententiosa sunt valde et efficaciter adimplenda.

1 Cor. x, 31.

Ideo in cunctis quæ agimus, Dei voluntatem præ oculis habeamus; et taliter opera nostra ordinemus, decoremus, perficiamus, tamque reverenter et custodite quæ bona sunt exsequamur, ut per ea Deo uniri, complacere, ac debitam honorificentiam ei impendere valeamus.

SERMO QUINTUS

DE ENORMITATE FRATERNI ODII, MULTIPLICIQUE HOMICIDIO; ET CONTRA
DETRACTIONIS VITIUM.

QUI non diligit fratrem suum, manet D in morte; omnis autem qui odit fratrem suum, homicida est. I Joann. iii, 14, 15.

Non poterat sanctissimus evangelista Joannes caritatem sublimius commendare, nec ejus oppositum, utpote odium, horribilius vituperare, nisi dicendo verba hæc

thematis hujus. In quibus odium homicidio comparat, et odientem homicidam appellat; eum quoque qui non diligit Deum ac proximum, asserit in morte, hoc est in mortali peccato, manere.

Quocirca quæri potest, an odium proximi sit gravius peccatum quam homicidium, vel saltem tam grave ut illud. Videtur enim quod imo. Nam optimum opponitur pessimo, quemadmodum malum bono. Unde, quemadmodum caritas Dei, absolute loquendo, est omnium virtutum dignissima, et odium Dei, omnium enormissimum vitiorum; ita apparet, quod sicut caritas fraterna est cunctarum quæ circa proximum versantur virtutum altissima, sic odium proximorum sit universorum in proximos peccatorum gravissimum: sicque homicidio gravius erit. Imo, quum caritas Dei et proximorum habitualis, sit realiter una et eadem virtus, sequi videtur quod post odium Dei, enormissimum crimen sit odium proximi. Ad hoc S. Thomas respondet, quod peccata in proximum, ex duobus malitiam et gravitatem suscipiunt: primo, ex inordinata voluntate peccantis; secundo, ex illato proximis nocumento. Primo modo odium homicidio et omni in proximum peccato est gravius, quia per ipsum præcipue in se ipsa deordinatur voluntas. Secundo modo homicidium est gravius odio, quia nocet plus proximo. Quum ergo tanta sit enormitas odii, inenarrabiliter vitandum est omni Christiano, potissimum religioso, cujus totus conatus, tota intentio, universa diligentia, esse debet ut in caritate Dei et proximorum jugiter crescat, et indesinenter proficiat.

Porro, Thoma testante, odium directe et formaliter ex invidia seu tristitia oritur, quamvis dispositive nascatur ex ira. Siquidem omne animal sicut naturaliter diligit delectationem, ita et naturaliter fugit tristitiam inordinatam, ut decimo Ethicorum habetur. Ideo sicut ex delectatione quam unus ab alio et in alio habet, oritur quidam amor ad ipsum; ita ex tristitia quam ab alio quis incurrit ac patitur, odium

A concipit circa eum. Eos namque qui quemquam contristant incitatur odire, in quantum sub ratione mali et afflictivi concipit eos. Quum ergo invidia sit de bono alicujus tristitia, constat quod odium directe ex invidia oriatur. Hinc innotescit quam diligentissime vitare debeamus ne aliquem contristemus inordinate, aut irrideamus, seu indebite affligamus, ne ei tam mortalis gravissimique peccati, videlicet odii, simus occasio. Et quia invidia ex ira causatur, ira autem ex parvipensione aut injuria alicui irrogata, etiam vitare oportet nos ne quempiam concitemus ad iram irrisione, læsione, verbo aut signo, aut alio modo, ne poculum mortis proximis porrigamus, quibus vitæ exempla exhibere tenemur. Propter quod Solon philosophus dixit: Non derideas aliquem, quoniam ex derisione procedit invidia. Quumque melancholici sint ad tristitiam atque invidiam naturaliter proni, specialiter est cavendum ne quis odii sive invidiæ occasionem aut incitamentum eis ministret: alioqui de mortali timeat culpa, quia omnino caritas id requirit.

Insuper, sicut hic ait Apostolus, « Omnis ^{1 Joann. iii, 15.} qui odit fratrem suum », id est aliquem hominem viatorem, « homicida est », scilicet opere vel effectū, aut similitudine culpæ. Nam et odiens quemquam aut invidens ei, in primis se ipsum spiritualiter necat: ideo sibi ipsi gravissime nocet. Specialiter vero odium et invidia etiam in hac vita sunt miserrimi hominis gravissime afflictiva, corrosivaque cordis, et vitæ abbreviativa, Salomone loquente: Sicut tinea ^{Prov. xxv, 20.} vestimento, ita tristitia nocet cordi. Ideo invidus sive odiens stultissimus comprobatur, quoniam propriam animam ita dilaniat, corrodit ac torquet. Unde hæc vitia præcipue essent cavenda, quamvis non essent post vitam hanc punienda. Quemadmodum autem melancholici non sunt ad odium aut invidiam incitandi, sic et ipsi cavere debent ea quæ aliorum sunt offensiva, et passiones illas gravissimas ad quas ex suæ complexionis malitia sunt procli-

ves reprimere, quanquam hoc ipsum sit A ipsis difficile : unde compatiendum et cedendum est eis ex caritate et pietate fraterna. Ipsi quoque auxilium Dei incessanter implorent, quo vincere queant se ipsos. Verumtamen nos religiosi debemus esse tam virtuosus, tam fortes tamque perfecti, ut nullus quantumlibet importunus et improbus, possit nos ad tam abominabilia provocare peccata ut sunt odium atque invidia, sed neque ad iram. Ideo patientiam veram et firmam incessabiliter habeamus, et in derisionibus, subsannationibus, persecutionibus, adversitatibus, quasi in omnibus divitiis gloriemur, tribulationibus ex corde regrantantes. Nam ut sanctus ait Basilius, tales maximum nobis beneficium præbent, et maxime prosunt, dummodo æquanimiter toleremus : quia per eos purgamur a culpa implemurque gratia, Christo propter nos passo conformamur, atque æternæ beatitudinis incrementum sortimur.

Præterea, prout sanctus martyr, ac doctor et Pontifex summus, S. Clemens testatur, beatissimus princeps Apostolorum Petrus dixit triplex esse homicidii genus. Unum reale et corporale, quo alicui auferitur vita naturæ. Secundum asseruit esse odium, quo quis alicui aufert aut auferre cupit vitam gratiæ. Tertium dixit detractio, quo auferitur esse laudabilis famæ. Quum ergo, tam gloriosissimo Archiapostolo protestante, odium atque detractio sint homicidii genera, patet quam vigilantissime sint vitanda. Et certe qui alium scandalizare non veretur, nonne animam illius quantum in se est trucidare cognoscitur? Porro, quum peccata in proximum tanto sint graviora, quanto nociviora seu magis nocumentum inferentia, et ipsa detractio auferat proximo bonam famam, quæ exteriori substantiæ rite præfertur, innotescit quod detractio sit gravius crimen quam rapina aut furtum. Et sicut rapina est gravior furto, quia majorem injuriationem et contemptum includit quam furtum; sic contumelia est gra-

vior culpa quam detractio. Idcirco summe cavendum est ne quis alteri contumeliose loquatur. Seminatio vero discordiæ quum caritatem et amicitiam atque concordiam tollat (quæ sunt præcipua animæ bona, et bono famæ præstantiora), est scelus gravissimum : præsertim quum non solum tam ingentia auferat bona, sed etiam tam periculosissima ingerat mala, puta aversionem, discordiam, odium. Qui ergo tam detestabilia non abhorret ac vitat facinorosa, ipse quoque habitu ac nomine religiosi B prorsus indignissimus verissime reputatur. Absint ergo et distent a nobis hæc scelera distantia infinita; et verbis, signis et factis, omnique modo nobis possibili, ac viribus totis conemur nos mutuo in vera caritate, pace, concordia confovere, roborare, accendere, ac jugiter conservare, quum et sapiens quidam dicat : In tribus *Eccli. xxv, 1, 2; xxviii, 15.* beneplacitum est spiritui meo, quæ sunt probata coram Deo et hominibus : amor proximorum, concordia fratrum, et vir et mulier bene sibi consentientes. Susurro autem et bilinguis maledictus : multos enim turbavit pacem habentes.

Porro multis modis unus detrahit alteri : primo, ei falsum imponendo; secundo, vere de eo loquendo ea quæ denigrativa sunt famæ, quando hoc facit intentione perversa, ut sic famam ejus commaculet, et ratione non exigente, videlicet loco et tempore non opportuno; tertio, occulta revelando; quarto, dum id quod bonum est asserit mala intentione peractum : in quo etiam temerarii judicii reus est. Est itaque detractio valde mortale ac nimis grave peccatum, præsertim in religiosis. Nec solum obest ei cui detrahitur, sed audientibus quoque, qui vel consentiendo, aut libenter audiendo, aut non resistendo seu fugiendo, de facili incidunt mortale peccatum; conformiter audiendo malum de altero, scandalizari possunt in illo et animari ad prava. Hinc contra detractioem Sancti terribiliter conscripserunt. Est autem detractio locutio ex prava radice procedens, intentione denigrandi famam aliorum pro-

lata. De qua sanctus ait Hieronymus : Nul-
li omnino unquam detrahas, nec aliorum
vituperatione te laudabilem videri velis;
magis tuam vitam ornare disce, quam alie-
nam discerpere.

Insuper de hoc vitio sapientissime sic
sanctus scribit Bernardus : Annon amit-
tunt vitam detractores, Deo odibiles, odi-
biles vitæ? Fugit vita quos odit; et quos
fugit vita, mori necesse est. Annon et ipse
moritur qui venenum bibit, quod ei male-
suada detractoris lingua propinat? Siqui-
dem furtim ei dilectionis vita subtrahitur; B
et dum nescit, in eo paulatim fraterna ca-
ritas refrigescit. Auditurus est forsitan ea
quæ dicta sunt contra se, ipse quoque cui
detrahitur : undique enim verba volant, et
multorum prius ora pertransiens sermo,
difficile fieri potest quin in singulorum
creverit linguis, et quasi jam proventus
referatur ad eum ad cuius spectat offen-
sam. Itaque scandalizabitur audiens et ta-
bescet; eoque facilius exstinguetur in eo
caritas, quo amplius ante vivere videba-
tur. Et quidem sibi cavet prudens audi- C
tor; cavet et ipse, si non desipit, qui sibi
novit esse detractum : ille ne veneno infi-
ciatur, iste ne scandalo perturbetur. Sed
quod in se est, lingua detractoris maledi-

ca, et illius percutiens conscientiam, et
istius vulnerans caritatem, secum pariter
utrumque perimit. Numquid non est vi-
pera lingua ista? Ferocissima plane, quæ
tam letaliter tres inficit flatu uno. Num-
quid non lancea est lingua ista? Profecto
etiam acutissima, quæ tres penetrat ictu
uno. Gladius utique anceps, imo et triceps,
est lingua detractoris.

Caveamus ergo tam detestabile vitium,
ejusque fomitem, scilicet irrationabilem
displicentiam, impatientiam, aversionem,
invidiam, appetitionem laudis humanæ :
ex his namque causis, aut earum aliqua,
solet oriri detractio. Ideo caritativi simus,
timorati et humiles, custoditi in verbis; et
caritatem nostram ad proximum opera
magis loquantur quam verba, in tantum
ut sicut Christus animam suam pro nobis
exposuit, ita et nos in tantum diligamus
nos invicem, ut casu se offerente parati
simus pro fratribus nostris animam pone-
re, id est vitam corporalem morti offerre,
quia illorum salutem seu animam magis
quam propriam vitam corporalem tene-
mur diligere. Verum de ista materia infe-
rius intendo diffusius loqui, præsertim de
detractione. Hæc igitur jam prædicta mo-
do sufficiunt.

Joann. x,
15.

SERMO SEXTUS

DE MULTIPLICI COENA, ET TRIBUS PRINCIPALIBUS VITIIS PER QUÆ HOMINES A DIVINÆ
COENÆ PARTICIPATIONE PRÆPEDIUNTUR.

HOMO quidam fecit cœnam magnam, D
et vocavit multos. Luc. xiv, 16.

Est cœna corporalis, de qua legitur :

Joann. xii,
1, 2.

Ante sex dies Paschæ venit Jesus Betha-
niam, et fecerunt ei cœnam ibi. Est etiam
cœna spiritualis, de qua in Apocalypsi ait
Salvator : Ego sto ante ostium, et pulso;
si quis aperuerit mihi, intrabo ad illum,
et cœnabo cum illo, et ipse mecum. Tertia

Apoc. iii, 20.

est cœna sacramentalis, quam passione
sua instante fecit Christus Apostolis suis,
sacramento corporis et sanguinis sui eos
reficiens. Quarta est cœna infernalis, quem-
admodum scriptum est : Sicut oves in in-
ferno positi sunt, mors depascet eos. Quin-
ta est cœna beatificæ fruitionis, de qua in
Apocalypsi fertur : Beati qui ad cœnam
nuptiarum Agni vocati sunt. De qua in

Ps. xlviii,
15.

Apoc. xix, 9.

evangelio hodierno fit mentio. Ad quam etiam cœnam illi dumtaxat pertingunt in quorum cordibus Deus in vita hac spiritualem peragit cœnam, habitando in eis per fidem caritate formatam, atque in eorum bonis actibus delectando.

Ephes. III,
17.

Is. XIV.

Joann. VIII,
44.

Job XLII, 23.

Eccli. X, 7.

Job XXXIV,
30.

Ab hac spirituali cœna atque a cœna cœlesti, a digna quoque perceptione sacramentalis edulii impeditur homo per mortale peccatum, et præcipue per tria mortalia vitia, quæ sunt: superbia sive ambitio, avaritia sive cupiditas, et luxuria seu carnalis affectus. Ab his igitur vitiis nos specialiter emundari necesse est et cavere: et primo, ab omnium radice ac turbido fonte et male fecunda origine vitiorum, superbia, quæ angelos vertit in dæmones, et homines dæmonum facit imitatores, ac primi illius apostatæ (qui in veritate non stetit) servos et membra ac filios, dicente Scriptura: Ipse est rex super universos filios superbiæ. Estque superbia coram Deo et hominibus odibilis: præsertim coram vere religiosis et humilibus, inter quos humilior, exemplarior, devotior, amplius reputatur. Inter quos tamen interdum invenitur et Satan, videlicet aliquis apparenter humilis et fecte devotus, secrete autem superbus et gloriæ cupidus, promotionis prælationisque avidus. Qui quum intentum nequeat adipisci si sua innotescat elatio, humilitatem foris ostendit, quum intus ad vana adspiret: et decipit miser et excæcatus in primis se ipsum, non Christi, sed Luciferi sequens vestigia; interdum vero fallit et alios, et justo ac metuendo Dei judicio permittitur sortiri cupitum ad majorem suam damnationem, vel propter plebis iniquitatem, faciente Deo regnare hypocritam propter peccata populi. Nec solum ambitiosi, vani, elati sunt qui taliter ad prælationem adspirant, sed et qui in ea inordinato affectu manent et privari verentur, qui et variis suspicionibus sæpius affliguntur. Hinc ait Bernardus: Ambitio mater hypocrisis, latebras amat et tenebras, ac lucis impatiens est. Quum enim prorumpit in impudentiam, effica-

ciam perdit; et quum improbus affectus se aperit, perit effectus. De hoc vitio maledicto iterum ait S. Bernardus: Ambitio subtile malum, secretum virus, pestis occulta, doli artifex, mater invidiæ, vitiorum origo, virtutum ærugo, tinea sanctitatis, excæcatrix cordium, ex remediis morbos generans, ex medicina languorem. O ambitio ambientium crux, quomodo omnes torquens, omnibus placens! Nil acerbius cruciat, nil molestius inquietat: nil tamen apud miseros mortales crebrius sive celebrius negotiis ejus.

Fugiat ergo omnis religiosus malum tam enorme et inquietum; cupiat subesse et obedire, nesciri et parvi pendi, non præesse, apparere aut dominari, ut sic directe feratur in Deum, nec impie recurvetur ad semetipsum: alioqui innumerabilibus involvetur peccatis ex sua ambitione nascentibus, quia ut ait Gregorius, Numerari culpæ non queunt quæ ex ambitione procedunt; et rursus, Quoties (inquit) hominibus præesse desidero, toties Deum meum præire contendo. Nonne ex ambitione nascuntur viles adulationes, adulatoriæ attractiones, pœnales ac stolidæ suspensiones, debitæ correptionis ac correctionis omisio, personarum acceptio, invidia, simulatio, falsitas, et multa prorsus similia vitia æternaliter detestanda, omnique religioso in infinitum odienda ac fugienda, atque, ut brevi concludam compendio, in omni pene quod agitur inordinata ad se ipsum reflexio? Si ergo, o religiose, cupis vere proficere, tuæ professioni satisfacere, puram et rectam coram Deo intentionem habere, fuge hoc infernale venenum, et in sincera ac stabili humilitate te inviolabiliter funda.

Porro, quum sit duplex superbia, puta carnalis et spiritualis, carnalis superbia, quæ de nobilitate progeniei, opulentia rerum, multitudine cognatorum, potentia, principatu, fama, honore, ac consimilibus causis concipitur, in sæcularibus solet vigere hominibus; spiritualis vero superbia, quæ ex interiorum donorum excellen-

tia, ingenio, scientia, aut quasi præcipua devotione, seu ex eminentia meritorum concipitur, in religiosis solet quibusdam regnare: quum tamen hæc omnia Dei sint dona, et a se ipso nil nisi deficere, indigere, peccare habeat homo; atque ob id oporteat unumquemque nostrum tanto esse omnium fonti bonorum magis gratum ac subditum, quanto ab eo eminentiora et plura sortitus est dona. Præterea, quomodo quasi de eminentia meritorum et speciali devotione possumus gloriari, intumescere, aut alicui nos præferre, qui an amore an odio digni consistimus ignoramus, nec aliorum secretiora bona cognoscimus, de quibus et latet nos an æternaliter nos præcedent in gloria, aut quales sint in prædestinatione divina?

Eccle. ix, 4.

Considera ergo te ipsum per comparisonem ad tuum Creatorem, cujus respectu nihil es, et ita te profundissime humiliabis; et item, per comparisonem ad Sanctos in patria, quorum respectu omnis tua virtus et sapientia modici est momenti; et rursus, per comparisonem ad Patres in hoc sæculo olim degentes aut adhuc peregrinantes, quorum respectu te defectuosum esse conspicias. Considera quoque quanta mala bonis tuis permixta sint, quantæ distractiones, negligentia, irreverentia, inordinationes: ita ut Isaias verissime sit locutus, Quasi pannus menstruatæ universæ justitiæ nostræ. Et hoc ipsum boni quod in eis est, Dei est et a Deo est, et ei cum humilitate et gratiarum actione adscribi oportet. Sicque similis comprobarris improbo servo, qui pretiosissimo balsamo sibi a domino suo in scypho oblato, sordes urinarum miscet ac stercorum. Sic namque devotioni, compunctioni, illuminationi, inflammationi, omnique gratiæ nobis desuper communicatæ, nostras miscemus evagationes, torpores, dissolutiones, irreverentias, carnalitates et defectuosita-

Is. lxiv, 6.

Sap. viii, 21.

tes, atque inordinatas affectiones. Considera quoque quantum omnis cultus et honor quos exhibes Deo, distent a cultu et honore quibus dignus est ipse: qui quum sit dignitatis et sanctitatis ac sapientiæ penitus infinitæ, immensa reverentia dignus esse cognoscitur. Considera etiam per comparisonem ad vitia tua quotidianaque mala, et per respectum ad ea quibus expositus nunc consistis pericula. Vide quia ex nihilo factus es, et in tantum divinæ bonitatis ac omnipotentia conservatione incessabili indiges, quod nec ad momentum sine ea subsistere vales. Attende naturales tuas ærumnas, indigentias, sordes, foetores ac vilitates. Perpende quam cito ac faciliter possis lædi, perterreri ac dejici. Si itaque his respectibus te ipsum rite consideraveris, tibi ipsi procul dubio displicebis, vilesces et humiliabis te ipsum; non præesse optabis, sed divini rigorem iudicii formidabis.

Sic igitur omnem in perpetuum elationem, ambitionem, vanitatem spernamus; omnem sensualem affectum, concupiscentiam pravam, et quidquid carnalem excitat motum, vitemus. Ad nihil terrenum inordinate afficiamur, non ad vestem, cellam, instrumenta, utensilia, aut quæcumque similia; sed in omnibus talibus solam necessitatem veramque utilitatem quæramus, ne per inordinatæ affectionis seu illicitæ delectationis admixtionem, divini incurramus amoris minorationem. Sic igitur per sollicitam cordis custodiam, per sensuum refrenationem, per loquacitatis repressionem, per divini obsequii executionem ferventem, per fructuosam temporis deductionem, per indefessam boni instantiam, ad cœnam tendamus ac properemus cœlestem. Ad quam perducere nos dignetur qui se ipsum nobis dedit in cibum, qui cum Patre et Spiritu Sancto unus est Deus super omnia benedictus. Amen.

D

DOMINICA III POST TRINITATEM

ENARRATIO IN EPISTOLAM

HUMILIAMINI SUB POTENTI MANU DEI, UT VOS EXALTET, ETC. I Petr. v, 6-11.

GLORIOSUS apostolici chori princeps, A sacratissimus Petrus, in præsentī epistola verbis perpaucis instruit nos multis saluberrimis documentis : et primo, ut humiles coram Altissimo jugiter simus. Itaque ait : *Humiliamini*, id est, vos ipsos sponte et caritative humiliare, parvos, imperfectos et viles reputare, *sub potenti manu Dei*, id est sub Deo omnipotente, vel sub ejus potestate atque justitia. Manus etenim Dei, potestas ejus potest intelligi, juxta illud in Psalmo : Inveniatur manus tua, Domine, omnibus inimicis tuis. Imo justitia Dei sive potestas in quantum per eam percutit peccatores, recte vocatur manus Dei. Quum ergo Deus judex noster omnipotentem habeat manum qua impios corrigit, debemus sub tanti judicis manu humiliari, nostra fatendo peccata, ejusque misericordiam implorando, ut non secundum peccata nostra faciat nobis. Porro in prima sua epistola, gloriosus Archiapostolus ante hæc verba immediate præmisit : Omnes in invicem humilitatem insinuate, quia Deus superbis resistit, humilibus autem dat gratiam. Protinusque adjunxit verba exposita, quorum rationem subjungit : *ut vos exaltet*, id est, in cœlesti regno sublimet, *in tempore visitationis*, id est tempore judicii vestri, seu particularis seu universalis. Item visitatio Dei aliquando in Scripturis in bono accipitur, utpote pro gratioso et pio accessu ad homines (quemadmodum Zacharias ait : Benedictus

Dominus Deus Israel, quia visitavit et fecit redemptionem plebis suæ; itemque in Psalmo, Visita nos, Domine, in salutari tuo); interdum in malo, puta pro ultione divina, ut quum per Sophoniam Dominus loquitur : Visitabo super viros defixos in facibus suis, et super omnem qui arroganter ingreditur. Huic verbo Archiapostoli consonat testimonium Salvatoris dicentis : Omnis qui se humiliat, exaltabitur. Insuper S. Petrus cautos nos facit, et armat salutaribus valde doctrinis contra adversarios nostræ salutis, invisibiles hostes. *Omnem sollicitudinem vestram projicientes in eum, quoniam ipsi cura est de vobis*, id est, sollicitudo vestra sit ordinata, non immoderata et anxia, sed in Deo radicata, ut ei vos committatis, certi de providentia ejus, non tamen facere negligentes quod in vobis est, quia hoc esset Deum tentare. Hinc ait Psalmista : Jacta super Dominum curam tuam, et ipse te enutriet. Verum de expositione hujus verbi plenius in sermone dicetur.

Sobrii estote : quia sobrietas rationem confortat, sapientiamque custodit, et ad multas disponit virtutes, estque necessaria prorsus ad pugnandum contra invisibiles hostes. *Et vigilate*, sicut et Cato docuit : Plus vigila semper, somno ne deditus esto : Nam diuturna quies vitiis alimenta ministrat.

Itaque « vigilate », id est, bonis operibus diligenter insistite, atque solliciti sem-

per estote ne Deum in aliquo offenda-
tis : *quia adversarius vester diabolus*, qui
pessimo et implacabili odio odit nos, quia
nil aliud quærit nisi damnationem no-
stram æternam, nec minus malum sufficit
ei de nobis, *tanquam leo rugiens circuit*,
quærens quem devoret. Nempe, ut divinus
Dionysius adstruit, in dæmonibus sunt
phantasia proterva, amens furor et irratio-
nabilis concupiscentia. Ideo instar rugien-
tis leonis circuit, tam spiritualiter quam
suo modo localiter. Spiritualiter etenim
circuit, quia undique nos considerat, et
omnium discutit mores, inclinationes ad-
vertit, et qualiter facilius damnabiliusque
decipere possit, examinat, quemadmodum
Leo Papa testatur. Localiter quoque cir-
cuit, quia nunc istum tentat, nunc illum,
et de uno pergit ad alium, quemadmodum
in libro Job ait ad Dominum : Circuivi
terram et perambulavi eam. Quærit autem
« quem devoret », id est, ad mortale pecca-
tum inducat, sicque illum sibi incorporet,
spiritualiter perimat, et ab inferno absor-
beri procuret. Porro, quod ait, « adversari-
us vester diabolus », non de uno dumtaxat
est intelligendum diabolo, sed de multis
et universis qui homines tentant, quia et
quilibet homo ab uno creditur singulariter
infestari.

Cui resistite fortes in fide formata, ut
firmissime credatis Deum paratum vobis
succurrere, ejusque adjutorium fiduciali-
ter imploretis, et per caritatem Deo adhæ-
rentes resistatis diabolo, orando, Christi
passionem pensando, divina mandata præ
oculis retinendo, Dei judicium formidan-
do, futuram retributionem considerando.
Hinc ad Ephesios scriptum est : In omni-
bus sumite scutum fidei, in quo possitis
omnia tela nequissimi ignea extinguere.
Unde in prima Joannis Canonica legitur :
Hæc est victoria quæ vincit mundum, fi-
des nostra. *Scientes eandem passionem*
ei quæ in mundo est, vestræ fraternitati
ferri, id est, hoc pensantes, quod eadem
impugnatio, passio sive tentatio quæ fit
vobis, etiam fiat quotidie fratribus vestris,

A cunctis fidelibus per mundum dispersis :
ideo vos non soli tentamini. Imo tentatio
est vita cujuslibet hominis super terram. *Job vii, 1.*
Unde Judith dixit : Omnes qui Deo pla- *Judith viii,*
cuerunt, per multas tribulationes transie- *23-25.*
runt fideles ; qui autem tentationes non
susceperunt in timore Domini, impatientia
sua exterminati sunt.

Deus autem omnis gratiæ, utpote gra-
tiæ prævenientis et subsequenter, gratiæ
incipientis, prosequenter et consumman-
tis dator et conservator. Potest autem hoc
B loco per gratiam omne donum Spiritus
Sancti supernaturale omnisque virtus in-
fusa intelligi. *Qui vocavit nos in æternam*
gloriam suam, id est, ad cœlestem felici-
tatem nos invitavit, sicut ad eam creavit
nos. *In Christo Jesu*, id est per Christum,
quia exordium prædicationis Christi fuit :
Pœnitentiam agite, appropinquabit enim
regnum cœlorum. Et Christus ait in Psal-
mo : Annuntiavi et locutus sum, multi-
plicati sunt super numerum. Unde et Pau-
lus ait : Deus vult omnes homines salvos
C fieri. Vel, « in Christo Jesu », id est me-
rito Christi, quia merito ejus homines mi-
sericordiam consequuntur. Propter quod
ait Apostolus, quod Deus elegit nos in
Christo, ut scilicet effectum prædestinatio-
nis æternæ merito Christi obtineamus. *Mo-*
dicum passos, quia omnis afflictio vitæ
præsentis, modicissimi est momenti respec-
tu futuræ felicitatis, juxta illud : Non
sunt condignæ passionibus hujus temporis
ad futuram gloriam. *Ipse perficiet gratiam*
quam incepit in vobis, et *confirmabit ve-*
stram fragilitatem (sicut ait Apostolus :
Optimum est gratia stabiliri cor), *solidabit-*
que dilectionem suam in vobis ; vel, « per-
ficiet » rationem, « confirmabit » volunta-
tem, « solidabitque » memoriam.

Ipsi gloria, id est infinita lætitia seu
fama clarissima, *et imperium*, id est uni-
versorum dominium primum et summum,
quoniam ipse solus est Rex regum et Do-
minus universorum. Propter quod ait per
Isaiam : Ego Dominus, hoc est nomen me-
um ; gloriam meam alteri non dabo. Et Psal-

De Divin.
nom. c. iv.

Job i, 7 ; ii,
2.

Ephes. vi,
16.

1 Joann. v,
4.

Job vii, 1.

Judith viii,
23-25.

Matth. iv,
17.

Ps. xxxix, 6.

1 Tim. ii, 4.

Ephes. i, 4.

Rom. viii,
18.

Hebr. xiii,
9.

Apoc. xix,
16.

Is. xlii, 8.

Ps. LXV, 7. mista : Qui dominatur in virtute sua in A illud Psalmistæ : Regnum tuum regnum *Ps. CXLIV,*
 æternum. *In sæcula sæculorum, Amen,* id omnium sæculorum, et dominatio tua in ^{13.}
 est, æternaliter, fiat. Et vere sic est, juxta omni generatione et generatione.

SERMO PRIMUS

QUIBUS MODIS ET MEDIIS STUDERE DEBEANT FIDELES POTENTEM DEI MANUM EVADERE,
 EJUSQUE MISERICORDIA SALUTEM CONSEQUI.

SOBRII estote et vigilate, quia adver- B
 sarius vester diabolus tanquam leo
 rugiens circuit, quærens quem devoret.
 I Petr. v, 8.

Summus prælatus ac beatissimus pa-
 stor totius Ecclesiæ, S. Petrus, de ovium
 sibi commissarum salute sollicitus, in præ-
 senti epistola vere saluberrima ac senten-
 tiosissima nobis dat documenta. Et primo
 docet ut coram Deo semper humiles si-
 mus, quoniam virtutum omnium funda-
 mentum est humilitas, sine qua qui vir-
 tutes colligere aut tenere conatur, similis C
 ei est qui pulveres in aere ferre conspici-
 tur. Et quamvis sint multa quæ ad humi-
 litatem nos possunt inducere (de quibus
 in nonnullis sermonibus de humilitate fa-
 ctis plura sunt introducta), unam tamen
 rationem humiliandi se tangit in præsentī
 epistola S. Petrus : Humiliamini (inquiens)
 sub potenti manu Dei.

Consideratio ergo omnipotentiae Dei cre-
 atoris ac judicis nostri, ad profundam hu-
 militatem nos debet inducere. Primo, quo-
 niam comparatione Dei et omnipotentiae D
 ejus, nihil et infirmissimi sumus, quem-
 admodum Psalmistæ loquitur Deo : Sub-
 stantia mea tanquam nihilum ante te.
 Deus namque in infinitum excedit essen-
 tiam, scientiam atque potentiam nostram.
 Secundo, quoniam coram Judice summo
 metuendissimoque jugiter ambulamus :
 cujus nec omnipotentiae valemus resiste-
 re, nec sapientiae respondere, qui et om-
 nia etiam minima certissime noscit at-

que justissime judicabit ; sed per solam
 humilitatem ac pœnitentiam manum ipsi-
 us evadere, atque ab ejus misericordia
 salvari valemus. Unde, secundum Augu-
 stinum, quia non possumus a divina ju-
 stitia ac omnipotentia fugere, debemus ad
 Dei pietatem confugere, eique dicere : Ini-
 quitatem meam ego cognosco, et peccatum
 meum contra me est semper. Hinc Job di-
 xit : Cogitationem Dei nemo avertere po-
 test ; et quodcumque voluit, fecit : ideo
 a facie ejus turbatus sum, et considerans
 eum, timore sollicitor. Judith quoque ait :
 Humiliemus Deo animas nostras, et in
 spiritu contrito et humiliato serviamus ei.
 Tertio, quoniam quidquid boni in nobis
 est, a Deo judice nostro accepimus, et ei
 de hoc regratiari tenemur ; ac inde inani-
 ter gloriari, extolli, præsumere prohibe-
 mur. Ideo ait Salvator : Cui plus datum
 est, plus requiretur ab eo.

Si igitur ab Omnipotente desideramus in
 cœlestibus exaltari, et nunc quoque ejus
 gratis adimpleri, non cessemus nos sub
 Omnipotente nunc humiliare, nos ipsos
 despiciere, proprias defectuositates, fragi-
 litates, pericula et peccata inspicere, in
 sola Creatoris misericordia infinita spera-
 re, eumque mente, verbis atque operibus
 omni cum diligentia honorare. Ipse enim
 primo Regum testatur : Quicumque glori-
 ficaverit me, glorificabo eum ; qui autem
 contemnunt me, erunt ignobiles. Hinc ait
 Ambrosius : Quisquis cupit divinitatis ob-
 tinere fastigia, humilitatis ima sectetur.

Quicumque vult fratrem seu proximum A prævenire in cœlis regnando, prius illum in terra præveniat obsequendo, sicut ait Apostolus, Honore invicem prævenientes; vincat eum officiis, ut possit vincere sanctitate. Si enim te non læsit frater, obsequium promeretur ut diligas eum; si autem fortassis te læsit, nihilo minus obsequere ei ut vincas. Hæc enim christianæ sapientiæ summa est, ut amantibus vicissitudinem, lædentibus patientiam rependamus. Qui ergo ad injuriam patientior ac humilior fuerit, in regno cœlesti potentior B atque sublimior erit.

Secundo, in ista epistola docet nos princeps Apostolorum, ut omnem sollicitudinem nostram projiciamus in Deum, hoc est, ut ei curam nostram ac provisionem fiducialiter committamus, quoniam ipsi cura est de nobis, secundum quod ait Propheta: Dominus sollicitus est mei. Hinc loquitur Christus: Nolite solliciti esse, dicentes, Quid manducabimus, aut quid bibemus, aut quo operiemur? Scit enim Pater vester cœlestis, quia his omnibus C indigetis. Quærite ergo primum regnum Dei et justitiam ejus, et hæc omnia adjicientur vobis.

Verumtamen ista intelligenda non sunt, quasi homo non debeat moderatam habere sollicitudinem de necessariis sibi ad victum. Est ergo sciendum, quod duplex est sollicitudo. Una est circa spiritualia et necessaria ad salutem, videlicet, ne Deum offendamus, ne caritatem et gratiam aliasque virtutes perdamus, ne beatitudinem amittamus cœlestem, et ne infernaliam incurramus supplicia. Ista est sollicitudo bona ac virtuosa, ad prudentiam ac sapientiam pertinens. De qua ait Apostolus: Solliciti sitis servare unitatem spiritus in vinculo pacis; Michæas quoque: Indicabo tibi, o homo, quid sit bonum, et quid Dominus requirat a te: utique sollicitum ambulare cum Deo tuo. Alia est sollicitudo circa temporalia et necessaria vitæ præsentis: et hæc sollicitudo potest esse ordinata ac inordinata. Est equidem ordi-

nata, dum homo secundum exigentiam sui status quærit necessaria vitæ in ordine ad spiritualia ac divina: quam non habere esset, secundum communem legem loquendo, Deum tentare. Inordinata vero ac superflua est, dum homo circa temporalia et exteriora bona tam immoderanter et anxie occupatur, quod a virtutum operibus impeditur, vel talia abundantius quærit quam necessaria sunt. De qua sollicitudine loquitur Christus, et item Apostolus: Volo (inquiens) vos sine sollicitudine esse; I Cor. vii, 32. et rursus, Nihil solliciti sitis; Salomon Matth. vi, 25; Philipp. quoque: Exspectatio sollicitorum peribit. iv, 6.

Debemus ergo sollicitudinem nostram in Deum projicere, ita quod nequaquam immoderanter pro temporalibus sollicitemur, sed divinæ nos committamus providentiæ, peracto quod in nobis est. Hinc ait Gregorius: Qui rebus temporalibus occupantur, tunc bene exteriora disponunt, quum sollicitudine ad interiora refugiant, quum nequaquam foras perturbationum strepitus diligunt, sed intus in tranquillitate mentis quiescunt. Sit ergo sollicitudo nostra ordinata ac virtuosa; et quanto anima corpore exstat præstantior, tanto amplius pro spiritualibus Spiritus Sancti donis quam pro rebus sollicitemur terrenis.

Tertio, docet nos sacratissimus Petrus apostolus, ut sobrii simus, non crapulosi, I Petr. v, 8. sed moderati ac parci in cibo potuque, quatenus mens nostra vigeat in consideratione divinorum ac pertinentium ad salutem, nec obliviscatur quanta sibi instent D pericula, qualiterque a dæmonibus sit vallata. Hinc asserit Augustinus: Sobrietas est mentis ac sensuum omniumque membrorum custodia seu cautela, castitatis pudicitiaque munimen, pacis ac amicitia conservatrix; honestati semper conjuncta, temeritatem fugit, domum atque familiam cum moderatione gubernat. Denique ista sobrietas vitam prolongat, sanitatem efficit et conservat, mentemque acuit, illuminationem divinam meretur. Ideo scriptum est, Sanitas animæ et corporis est sobrius Eccli. xxxi, 37.

Rom. xii, 10.

Ps. xxxix, 18.
Matth. vi, 31-33.

Ephes. iv, 3.
Mich. vi, 8.

potus : nec dubium quin et sobrius cibus.

In bonis demum operibus debemus esse diligentes, et circumspecti ac stabiles, *I Petr. v, 8.* non ignavi, remissi et pigri, quia adversarius noster diabolus tanquam leo rugiens circuit, quærens indesinenter qualiter nos seducat et ad æternam calamitatem perducatur. Cui fide robusta per caritatem et bonos actus formata debemus resistere, divinum auxilium invocando, Christi passionem diligenter ac multoties recolendo, præsentis vitæ brevitatem, futuri iudicii distractionem, æterni supplicii intolerabilitatem, cœlestis gloriæ immensitatem sagaciter intuendo, quemadmodum in Ecclesiastico scriptum est : Memorare novissima tua, et in æternum non peccabis. Consideremus ergo crudelitatem, infatigabilitatem atque implacabile odium dæmonum contra nos, et quanta damna nobis inferre conentur : sicque contra eos magnanimiter provocemur, humilitatem, patientiam, sobrietatem, caritatem, ceterasque amplectendo virtutes, et per eas repugnando dæmonibus, quos gravius cruciare non possumus, nisi ita agendo. Hinc S. Cyprianus, martyr, doctor ac pontifex, loquitur : Contra omnes diaboli fallaces insidias apertasque minas stare debet instructus animus et armatus, tamque paratus ad resistendum, quam paratus est ille ad impugnandum.

Præterea, ad resistendum diabolo incitat nos S. Bernardus, dicendo : Dæmonum est mala suggerere, nostrum est non consentire ; quoties eis resistimus, toties eos superamus, angelos lætificamus, Deumque *D* honoramus, qui incitat ut pugnemus, adjuvat ut vincamus, confortat ne deficiamus. Et ut idem ait Bernardus : In princi-

A pio gravior est impugnatio dæmonum ; sed si quis forti animo sustinuerit atque restiterit, inveniet eos quotidie debiliores. Hinc resistendum est principio diabolicæ tentationi, videlicet pravæ suggestioni : quia ut ait Chrysostomus, diabolus serpens est lubricus, cujus si capiti, hoc est primæ suggestioni, non resistatur, totus in intima cordis, dum non sentitur, illabitur. Insuper unusquisque contra ea vitia fortius prælietur, ad quæ se proniorem consistere experitur : quoniam teste Chrysostomo, diabolus quando decipere quempiam quærit, prius ejus naturam considerat, et inde applicat unde eum conspicit ad peccandum procliviores.

Sit ergo tota spes nostra in Deo, et projiciatur in eum nostra sollicitudo, ne circa temporalia superflue occupati, impediamur a Dei obsequio, a contemplatione et amore summi et incommutabilis boni.

Legitur de Diogene philosopho, quod dum quadam nocte jaceret in lecto, et sacculum cum pecunia suspendisset prope lectum, ne furto ei abstraheretur, in ipsa nocte fur cameram ejus introiit, sacculumque cum pecunia tollere nitebatur. Quod quum sensisset Diogenes, dixit ad furem : Tolle, miser, hunc sacculum, ut facias duos dormire. Hoc autem dixit Diogenes, quoniam ipsemet quamdiu habuit illum cum pecunia sacculum, timuit eum amittere, sicque impediabatur a somno. Fur quoque aviditate acquirendi pecuniam illam, impediabatur a somno ; sed eam adeptus, ambo dormierunt quietius. Divitiæ namque cum labore acquiruntur, cum timore possidentur, cum dolore perduntur : ideo expedit eas contemnere, et solis necessariis esse contentum.

ENARRATIO IN EVANGELIUM

ERANT APPROPINQUANTES AD JESUM PUBLICANI ET PECCATORES, ETC. LUC. XV, 1-40.

QUIA Dominus noster Jesus Christus *A* *dicentes : Quia hic Jesus peccatores recipit, et manducat cum illis.* Quasi dicant, Non licet : quum Scriptura dicat, Viri *Eccli. ix, 22.* justi sint tibi commensales. Et Psalmista, Superbo (inquit) et insatiabili corde, cum *Ps. c, 5.* hoc non edebam. Sed Christus, qui peccare non poterat, et ideo venerat ut peccatores converteret, non solum absque *Luc. v, 32.* periculo, sed cum ingenti etiam fructu peccatoribus se adjunxit, eisque convesci dignatus est; nec præactis auctoritatibus prohibebatur quin justi hac intentione possent se peccatoribus sociare, ut eos ad Dei obsequium perpetuamque salutem inducerent. Porro Pharisei, qui erant religiosi Judæorum, et Scribæ, qui fuerunt doctores eorum, non vere caritativi ac justi, sed magni et sapientes in oculis suis, atque mendaciter justi, indignati sunt de misericordia Christi in peccatores, de qua gaudere et gratias agere debuerunt. Falsa quippe justitia habet indignationem, vera justitia compassionem, secundum Gregorium.

Insuper, Christus solitus uti parabolis, consequenter inducit parabolam qua ostendit Phariseorum ac Scribarum errorem, seque agere quod ad suum spectabat officium : quod fuit peccatores convertere, perditos quærere, mortuos per culpam vivificare per gratiam, et eos qui per errores ac vitia erant dispersi, per fidem et caritatem in Deo colligere.

Et ait ad illos parabolam istam, dicens : Quis ex vobis homo qui habet centum oves, et si perdiderit unam, etc. Parabola ista plana est, atque ad declarandum Christi intentum aptissima. Etenim aliud per eam probare non voluit, nisi quod ex quo homo multas possidens oves, si unam

Luc. v, 32. **Q**uod hoc venit in mundum, ut peccatores ad pœnitentiam ac salutem vocaret, ideo se eis pium et compassivum exhibuit : atque ob hoc illi fiducialiter confluebant ad eum. Et hoc in evangelio isto describitur. Ait itaque Lucas :

Erant appropinquantibus ad Jesum publicani, qui publicis quibusdam intendebant negotiis, utpote vectigalia seu tributa exigendo, levando aut conducendo. Et quoniam tale officium fit raro aut nunquam sine peccato, Pharisei et Scribæ **B** *publicanos reputabant magnos atque notorios peccatores. Hi ergo et peccatores, id est, qui minus vitiosi fuerunt aut reputabantur, quam publicani. Isti appropinquaverunt Christo quantum ad suam humanitatem corporaliter, quia localiter accesserunt ad eum; et quantum ad suam deitatem appropinquabant ei spiritualiter, per conversionem seu dispositionem cordis sui ad caritatem et gratiam, seu unionem virtuosam cum Deo, secundum quod*

Jacob. iv, 8. **J**acobus ait : Appropinquate Deo, et appropinquabit vobis. *Ut audirent illum,* id est prædicationem Christi, auribus mentis et corporis. Christus enim quosdam illorum gratiose jam tetigit et prævenit, intusque traxit ad se. Qualiter autem propter diversas causas homines confluerunt ad Christum, dictum est sæpe. Siquidem concurrerunt ad eum propter miraculorum ejus frequentiam, propter suæ eloquentiæ eminentiam, ob vitæ suæ sanctitatem, ob nominis sui famam, ob morum suorum venustatem, ob vultus et corporis sui decorem, et quia valde consolatorius fuit ejus aspectus atque affatus.

Et murmurabant Pharisei et Scribæ,

amiserit, diligenter eam inquit, inven-
tam quoque hilariter suscipit et reducit,
Act. x. 36. multo magis Filius Dei omnium Dominus,
homines, quos per eorum culpam ac dæ-
monum fraudem amisit, requirere debuit
per suam pietatem et gratiam, atque cum
gaudio recipere ad pœnitentiam et salu-
tem. Itaque per hominem istum intelligi-
tur Christus, qui habuit centum oves, id
est universitatem angelorum ac hominum.
Angeli equidem sancti vocantur oves Dei,
propter eorum innocentiam obedientissi-
mamque promptitudinem, et quoniam in-
cessanter reficiuntur a Deo beatifica ejus
fruitione. Similiter homines oves sunt Dei,
Ps. LXXXIII, 13; XCIV, 7. secundum illud Psalmistæ, Nos autem po-
pulus ejus et oves pascuæ ejus : quod de
bonis hominibus Deo obedientibus potis-
simum verum est, quoniam per gratiarum
charismata et per Ecclesiæ sacramenta re-
ficiuntur a Christo, et sub suæ directionis
ambulant virga, dum secundum evangeli-
cæ legis vivunt præcepta. Verumtamen qui-
dam iniqui et nondum nati, sunt oves Chri-
sti secundum prædestinationem æternam. C
Dicuntur autem oves hæ centum, propter
numeri hujus perfectionem. Harumque ovi-
um periit una, quia in primis parentibus
infecta fuit et perdita per originale pec-
catum natura humana : quoniam teste Apo-
Rom. v, 12; Ephes. ii, 3. stolo, in uno peccavimus omnes, et eramus
natura filii iræ.

*Nonne dimittit nonaginta novem in de-
serto, et vadit ad illam quæ perierat, do-
nec inveniat eam? Hoc fecit Unigenitus
Dei, dum cives cœlestes, puta angelicos
spiritus, reliquit in cœlo : quod hic voca-
tur desertum, quoniam per peccata homo
deseruit illud. Et non angelum, non lega-
tum misit, sed in propria venit persona,
assumpta in unitate personæ natura hu-
mana; quæsivitque genus humanum, pro
illius conversione ac salute orando, præ-
dicando, inter homines conversando, mi-
racula faciendo, mortem crucis amarissi-
mam patiendo, Spiritum Sanctum mittendo
ac infundendo, Apostolos ceterosque disci-
pulos per mundum destinando. Hinc apud*

A Zachariam loquitur Christus : Lauda et læ-
tare, filia Sion, quia ecce ego venio, et *Zach. ii, 10, 11.*
habitabo in medio tui; applicabuntur gen-
tes multæ ad Dominum in illa die. Porro
hæc applicatio populorum ad Deum, est
eorum conversio, atque inventio qua in-
venti sunt a Christo : quibus in prima
sua Canonica beatissimus loquitur Petrus :
Eratis aliquando sicut oves errantes; sed *1 Petr. ii, 25.*
conversi estis nunc ad episcopum et pa-
storem animarum vestrarum.

Et quum invenerit illam, imponit in
B *humeros suos gaudens.* Hoc egit Salvator,
quia quum quosdam Judæorum conver-
tisset, pro illis et pro cunctis hominibus
crucem propriis tulit humeris ad supplicii
locum : quod faciendo peccata nostra su-
per se sumpsit, portavit ac luit, juxta illud
Isaiæ : Disciplina pacis nostræ super eum, *Is. LIII, 5, 6,*
et livore ejus sanati sumus. Omnes nos *4.*
quasi oves erravimus, unusquisque in vi-
am suam declinavit; et Dominus posuit in
eo iniquitatem omnium nostrum. Vere lan-
guores nostros ipse tulit, et dolores no-
stros ipse portavit. Denique Christus fecit
hoc « gaudens », quoniam licet de passionis
suæ acerbitate vehementer doleret, Tristis *Matth. XXVI, 38.*
est (inquiens) anima mea usque ad mor-
tem; nihilo minus ex ardentissima caritate
ac promptissima obedientia pati volebat,
atque de fructu suæ passionis secundum
superiorem animæ partem valde gaudebat.

*Et veniens domum, convocat amicos et
vicinos, dicens illis : Congratulamini mi-
hi, quia inveni ovem meam quæ perierat.*
Sic Christus in die ascensionis, revertens
D secundum naturam humanam ad cœlum
empyreum (de quo ipse loquitur : In domo *Joann. xiv, 2.*
Patris mei mansiones multæ sunt), illuc
ovem perditam reportavit, quia et plurimi
ex hominibus quos eduxit de limbo, se-
cum pariter ascenderunt, juxta illud Apo-
stoli ac Psalmistæ : Ascendens in altum, *Ephes. iv, 8; Ps. LXXVII, 19.*
captivam duxit captivitatem, dedit dona
hominibus. Tunc convocavit, id est, sibi
occurrere fecit, « amicos et vicinos », videli-
cet angelos sanctos divinæ voluntati plene
et inavertibiliter conformatos, divina se-

creta scientes, et Deo in cunctis promptissime obediētes, atque cum eo in cœlo morantes (propter quod recte amici et vicini Christi vocantur): quos hortabatur ut sibi de ovis suæ recuperatione congratularentur. In quo patet dilectio Christi ad homines, et quantum nostram optet salutem. Propter quod fatetur: Utinam attendisses mandata mea. — Interea, secundum Theophilum, supernæ virtutes seu angeli oves vocantur, eo quod omnis creatura respectu Dei, sit bestialis.

Is. XLVIII,
18.

Dico vobis, quod ita gaudium erit in cœlo super uno peccatore pœnitentiam agente, quam super nonaginta novem justis qui non indigent pœnitentia. Si istud generaliter de quocumque pœnitente et quibuscumque justis seu innocentibus intelligatur, non est absolute intelligendum ut sonat, quasi videlicet simpliciter angeli sancti plus gaudeant de quolibet pœnitente, quam de quibuscumque nonaginta novem justis. Non enim plus gloriantur de peccatore pœnitente qui post pœnitentiam suam non pertingit ad magnam perfectionem, quam de gloriosissima Matre Christi ac sanctis Apostolis gavisi sunt, quando adhuc fuerunt in terra, vel quam modo de ipsis lætentur: imo nec de Paulo, nec de Maria Magdalene, nec de ambobus simul majus gaudium est in cœlo, quam de sola Virgine gloriosa.

Idcirco, quod gaudium de peccatore pœnitente dicitur majus, intelligendum videtur non simpliciter, sed quantum ad aliquid, et quoad recentem quamdam ac evidentiorē gaudii manifestationem, qua se Christus de hominum salvatione lætari ostendit: quia de peccatoris conversione est ei specialis ac multiplex ratio gloriandi. Primo, quoniam dum peccator convertitur, de periculo graviori eripitur. Consuetissimum enim est ut de eo specialiter et quodammodo amplius exsulemus, quem de majori periculo erui intuemur, quamvis, absolute loquendo, eum non plus quam ceteros diligamus. Secundo, quia in peccatoris conversione misericordia Dei

A præcipue declaratur. Tertio, quoniam fructus dominicæ passionis in illo evidentius commendatur. Quarto, quia in peccatoris conversione adversarii Christi ac nostræ salutis specialiter confunduntur. — Insuper, absolute loquendo, si comparemus statum ad statum, constat quod status innocentiae præferendus sit statui pœnitentiæ, eo quod majus Dei donum sit innocentia quam pœnitentia. Si vero comparemus personam unius status ad personam alterius, habent se sicut excedens et excessum: ita quod quidam de statu uno præferuntur quibusdam de statu altero, secundum quod sunt in majori aut minori caritate et gratia. Hinc absolute loquendo, de multis justis ac innocentibus, tanquam simpliciter melioribus et Deo carioribus, majus est gaudium Christo supernisque civibus, quam de quibuscumque peccatoribus pœnitentibus. Verumtamen, quoniam teste Apostolo, Ubi abundavit delictum, superabundat et gratia, frequenter contingit ut impii pœnitentes, tanto fiant in Dei amore et cultu ferventiores, et tanto in se humiliores, quanto se gravius deliquisse, et quanto Deum circa se misericordius egisse considerant: sicque de eorum conversione specialis causa lætandi oritur angelis Dei.

Rom. v, 20.

Unde et qualiter majoritas gaudii hujus sit intelligenda, in Matthæo plenius tangitur, quo habetur: Si fuerint alicui centum oves, et si erraverit una ex eis, nonne relinquit nonaginta novem in montibus, et vadit ad eam quæ erravit? Et si invenerit eam, gaudet super eam magis quam super nonaginta novem quæ non erraverunt. Itaque, sicut paterfamilias plus lætatur de una ove post perditionem inventa, quam de reliquis cunctis quæ non erraverunt (non quod illam plus diligat quam ceteras omnes, sed quia de ejus inventionē quædam specialis ac recens consolatio innascitur ei, primo quoniam ovem illam magis considerat, secundo quoniam propter præcedentem de ejus perditione tristitiam, gaudium ex ejus inventionē ortum

Matth.
xviii, 12, 13.

plus afficit ac sentitur); proportionaliter, de peccatore pœnitente cives cœlestes plus gaudent, aut abundantius signa lætitiæ monstrant. Nam et angeli sancti de hominum sibi commissorum transgressione ac recidivatione dolere et flere leguntur: quod tamen sane intelligi par est, quia quum sint perfecte beati, nulla pœnalis affectio eis realiter potest inesse, sed per modum dolentis se habent: juxta quem modum ira, furor et pœnitudo, Deo attribuuntur.

Deinceps per aliam parabolam docet Salvator, quod non debuit peccatores contemnere et vitare, sed clementer admittere, atque ad viam salutis reducere. *Aut quæ mulier habens drachmas*, id est hujusmodi nummos, *decem, si perdidit drachmam unam, nonne accendit lucernam*, præsertim si tempore tenebroso aut in loco obscuro quærere velit, *et evertit domum*, id est, contenta in domo revolvit seu transfert de loco ad locum, ne forte sub aliquo illorum jaceat lateatque quod quæritur, *et quærit diligenter* perditam drachmam, *donec inveniat* eam, præsertim quum feminæ vehementer afficiantur ad rem, quum ad eam cœperint affici? *Et quum invenerit drachmam, convocat amicas et vicinas, dicens: Congratulamini mihi, quia inveni drachmam quam perdideram.* Hoc in exterioribus ita est.

Spiritualiter vero, per mulierem hanc intelligenda est æterna et increata Sapientia, quæ ob suam amabilitatem, pulchritudinem ac fecunditatem, sponsa ac mulier appellatur. De qua Sapiens protestatur, *pu-*
Sap. viii, 2. *dicus et purus amator: Hanc amavi et exquisivi a juventute mea, et quæsi sponsam eam mihi assumere; et amator factus sum formæ illius. Per « lucernam » vero intelligitur Christi humanitas, quam Verbum æternum eodem quo eam assumpsit instanti, « accendit », id est, divinæ caritatis fervore, totius sapientiæ splendore, omnique virtute nullam imperfectionem in sua ratione includente, implevit. Sicque Sapientia incarnata inter homines conver-*

sando, evertit domum, id est, Synagogam seu populum Judæorum multipliciter excitavit, monuit, et hinc inde deduxit, prædicando, exemplarissime conversando, miracula perpetrando; quæsitque diligenter hominem perditum, summi Regis imagine insignitum, et ob hoc per drachmam congrue designatum. Venit quippe Filius hominis quærere et salvum facere quod perierat. Donec invenit eam, id est, genus humanum sua passione redemit, quemadmodum loquitur Patri: Opus consumma-

Luc. xix, 10.

vi, quod dedisti mihi ut faciam. Inventa itaque drachma hac, id est genere humano taliter liberato, Christus in die ascensionis convocavit « amicas atque vicinas », id est angelicas potestates et mentes: quæ quum divinæ voluntati sint inavertibiliter conformatæ, et vultum sui Creatoris clare per speciem contemplentur, merito amicæ et vicinæ æternæ Sapientiæ nuncupantur. Dixitque eis: « Congratulamini mihi, quia inveni drachmam » amissam. Quum enim sibi ascendenti occurrerent, ac interrogarent,

Joann. xvii, 4.

C Quis est iste Rex gloriæ? ut ait Psalmista; itemque, Quis est iste qui venit de Edom? etc.; et, Quare rubrum est indumentum tuum? ut Isaias prædixit: Christus respondit, Torcular calcavi solus: hoc est, per crucis pressuram genus redemi humanum. Tuncque, ut in Hymno ait Ambrosius, Gavisæ sunt cœli regna reditu Unigeniti. Tanta autem est Christi dilectio ad nos, ut nostram salvationem suam esse dicat lætitiæ.

Ps. xxiii, 8, 10.
Is. lxiii, 1, 2.
Ibid. 3.

Ita dico vobis, gaudium erit coram angelis Dei, id est, in regno cœlesti ad invicem lætabuntur angeli sancti, et Christus eis præsentibus exsultabit, *super uno peccatore pœnitentiam agente*: primo, quoniam ejus evasioni qua æternam evadit damnationem, pie congaudent; secundo, quia per ejus conversionem confidunt cœlestis Jerusalem suppleri ruinam; tertio, quia per hoc vident cultum ac honorificentiam Dei augeri; quarto, quoniam passionem Christi cernunt fructificare; quinto, quia dæmones cernunt superari, et vitia

quibus Deus inhonoratur, diminui; sexto, quia in hoc vident aliis bonum exemplum præberi; septimo, quia divinam vident prædestinationem impleri; octavo, quia rationalis creaturæ quam diligunt, congaudent emendationi, profectui ac saluti.

Itaque Christus æterna ac genita sapientia Patris, habuit « drachmas decem », videlicet novem choros angelorum, et genus humanum, quod tanquam decima drachma, per originalem perierat culpam. Quemadmodum itaque Christus ovem et drachmam amissam quæsivit, sic ejus vicarii, si aliquem ex grege sibi commisso viderint

A deviare, statim ad ejus conversionem et emendationem debent viribus totis conari. Postremo, secundum Bedam, ovem et drachmam perditam Christus invenit, quando hominem restauravit, id est, sua passione salvavit; et super eam inventam majus gaudium est in cœlo quam super nonaginta novem justis seu angelis pœnitentia non indigentibus, quoniam major divinæ laudis materia est in restauratione hominum, quam in creatione aut etiam beatificatione angelorum. Mirabiliter quippe angelos Deus creavit, sed hominem mirabilius instauravit.

SERMO SECUNDUS

QUALITER HOMINES DEO VARIIS MODIS DEBEANT APPROPINQUARE.

APPROPINQUATE Deo, et appropinquabit vobis. Jacob. iv, 8.

Variis modis creaturæ dicuntur suo Creatori ac Deo appropinquare, secundum quod variis modis ab ipso distant. Quum enim Deus sublimis et adorandus, sit penitus infinitæ perfectionis et excellentiæ, omnis autem creatura perfectionis finitæ, certum est quod secundum unum modum loquendi, omnis creatura, omnis angelus, omnis homo quantumlibet bonus et virtuosus, distet in infinitum a Deo, præsertim quum finiti et infiniti nulla sit comparatio. Hinc scriptum est : Cui assimilastis me, dicit Sanctus, utpote Deus? et rursus ibidem : Cui similem fecistis Deum, aut quam imaginem ponetis ei? Itaque per defectum perfectionis distat a Deo quantumlibet creatura in infinitum; et quantum plus proficit in perfectione, tanto plus appropinquat proprio Creatori : nunquam tamen eum attingit per adæquationem, sed semper manet infinite distans, deficiens et occumbens ab eo.

Secundo, creatura rationalis dicitur a

C Deo distare, quia adhuc est in via et peregrinatione, nondum in termino et patria, seu beatifica visione. Propter quod ait Apostolus : Dum sumus in hoc corpore, peregrinamur a Domino; per fidem enim ambulamus, non per speciem. Unde et idem Apostolus : Cupio, inquit, dissolvi et esse cum Christo. Nondum ergo fuit cum Christo, qui cupiebat dissolvi ut esset cum Christo. Nihilo minus, secundum eundem beatum Apostolum, Christus per fidem habitat in cordibus nostris, et corpora nostra sunt templa Spiritus Sancti. Ergo etiam in hac vita sumus cum Christo, et Christus nobiscum est. Idcirco dicendum, quod boni fideles sunt cum Christo in hac vita imperfecte, et per modum motus atque tendentiæ, quia per fidem et caritatem ei aliquo modo uniti sunt; non autem perfecte, quoniam nondum ad ejus claram, gloriosam beatificamque præsentiam deveniunt. Propter quod gemebunde ait Psalmista : Heu mihi ! quia incolatus meus prolongatus est; et item : Sitivit anima mea ad Deum fortem, vivum; quando ve-

Is. xl, 25.

Ibid. 18.

II Cor. v, 6, 7.

Philipp. i, 23.

Ephes. iii, 17.

I Cor. iii, 16; vi, 19.

Ps. cxix, 5.

Ps. xli, 3.

niam et apparebo ante faciem Dei? Quum A
ergo beatitudo Sanctorum in patria, sit
clara visio Dei per speciem, quanto nunc
proficimus in contemplatione Dei per fi-
dem (quæ contemplatio est actus doni
sapientiæ), tanto propinquamus ad Deum
et ad visionem ejus gloriosam per spe-
ciem. Idcirco hortatur Propheta : Quærite
faciem ejus semper. Quod et se fecisse ac
facere velle fatetur, dicendo : Tibi dixit
cor meum, Exquisivit te facies mea; fa-
ciem tuam, Domine, requiram. Denique
iste secundus modus distandi a Deo com-
munis est omnibus in hoc mundo, puta
hominibus bonis ac malis. Propter quod
et ipse sanctissimus propheta Jeremias
disseruit : Longe Dominus apparuit mihi.
In libro quoque Job habetur : Omnes ho-
mines vident Deum, unusquisque intuetur
procul.

Tertio, dicitur homo distare a Deo, quia
licet sit in caritate et gratia, habeatque
virtutes infusas, multum tamen distat ab
ea virtutum perfectione ad quam tenetur,
vel certe ad quam Deo auxiliante pertin-
gere potest, et ad quam merito debet co-
nari : quia in via Dei non proficere, est
deficere. Religiosi vero ad perfectionem
tendere obligantur. Status autem episco-
porum est status perfectionis jam acquisi-
tæ, quia episcopi debent in omni virtute
esse perfecti. Juxta hunc tertium modum
fatebatur Apostolus se distare a Deo : Ego
(inquiens) non arbitror me apprehendisse;
unum autem, quæ quidem retro sunt obli-
tus, ad anteriora vero extendens me ipsum,
ad destinatum persequor, ad bravium vo-
cationis supernæ. Ideo quantum ad modum
hunc tertium, tanto plus appropinquamus
ad Deum, quanto plus in virtutibus et vir-
tutosis operibus crescimus, hoc est, quanto
humiliores, patientiores, misericordiores,
constantiores et ferventiores efficimur. Po-
tissimum tamen dicimur Deo propinqua-
re, proficiendo in caritate, quia per eam
magis attingitur Deus. Ideo dicit Bernar-
dus : Tanto plus proficis, tanto celerius
ambulas, tanto amplius appropinquas ad

Creatorem, ad beatitudinem æternalem,
quanto plus amas Deum. Hinc ad profi-
ciendum in virtutibus bonisque actibus
uberrime nos exhortatur divina Scriptura.
Siquidem Josue Dominus loquitur : Con-
fortare et esto robustus valde, ut custodias
omnia mandata Dei; nec declines a lege
Domini ad dexteram vel ad sinistram, ut
intelligas cuncta quæ agis; et meditaberis
in lege Dei diebus ac noctibus. Psalmista
etiam dicit : Exspecta Dominum, viriliter
age; et confortetur cor tuum, et sustine
Dominum. Apostolus quoque : Stabiles
(inquit) estote, et immobiles, abundantes
in opere Domini semper, scientes quod
labor vester non est inanis in Domino.
Hinc scriptum est de electis et bonis :
Ibunt de virtute in virtutem.

Quarto, rationalis creatura distat a Deo
per culpam, sicut asserit Isaias : Iniqui-
tates vestræ diviserunt inter Deum ve-
strum et vos. Culpam tamen venialis non
facit hominem proprie distare a Deo, sed
mortale peccatum. Verumtamen, qui non
est vigil ac diligens ad vitandum venialia
peccata, cito corruebat in peccata mortalia :
ideo veniale peccatum dispositive facit di-
stare a Deo. Facit quoque distare a Deo
secundum statum : quia quicumque venia-
liter peccat peccareve potest, adhuc est in
statu præsentis miseriæ, nondum in statu
felicитatis et gloriæ. Quemadmodum autem
peccatum potissimum dissimilitudinem ha-
bet a Deo, quia formaliter non est aliquid
positivum, sed defectus et casus ab enti-
tate, bonitate et rectitudine; sic per pec-
catum maxime et propriissime dicitur
homo distare a Deo, juxta illud Prover-
biorum : Longe est Dominus ab impiis. Et
quanto peccata sunt graviora, tanto remo-
torem faciunt ab Omnipotente distanti-
am. Unde sicut caritas Dei et proximi est
summa virtus, et maxime Deo conjungens;
sic odium Dei et proximi est maximum
vitium, atque a Deo vehementissime se-
parans.

Præterea, ex triplici radice homines pec-
cant : nam aliqui peccant ex ignorantia,

Ps. CIV, 4.

Ps. XXVI, 8.

Jer. XXXI, 3.

Job XXXVI,
25.Philipp. III,
13, 14.Josue I, 7,
8.

Ps. XXVI, 14.

I Cor. XV,
58.Ps. LXXXIII,
8.

Is. LIX, 2.

Prov. XV,
29.

quidam ex infirmitate, alii ex habitu pravo, ex proposito seu studio. Et peccare ex ignorantia est minus culpabile, præsertim loquendo de ignorantia facti, adhibita debita diligentia; verum ignorantia juris non excusat, quia omnes tenentur scire quæ juris sunt, quantum ad singulorum pertinet statum. Deinde culpabilius est peccare ex infirmitate, id est ex passionis vehementia seu impulsu; et dum quis proponit vivere continenter et patienter, et tamen concupiscentia aut impatientia superatur, id infirmitatis est, id est fragilitatis humanæ, quod ratio superatur a sensualitate, virtus a vitio, propositum bonum a tentatione iniqua. Ideo princeps Apostolorum :

I Petr. II, 11. Obsecro (ait) vos abstinere a carnalibus desideriis, quæ militant adversus animam.

Maxime autem culpabile est peccare ex habitu pravo, hoc est ex electione, ex certa malitia, ex deliberatione, ex studio at-

Ps. xxxv, 2. que proposito, juxta illud in Psalmo: Dixit injustus ut delinquat in semetipso. Unde, secundum Aristotelem, qui taliter peccant, incurabiles sunt, quia valde difficulter ra-

roque pœnitent ac resurgunt. Cœlesti tamen medico, omnipotenti Spiritui Sancto, nihil est impossibile neque difficile, sed ubi vult spirat, et misericorditer cor tangendo, repente illud immutat, convertit, emendat, sicut et Salomon protestatur :

Prov. xxi, 1. Cor hominis in manu Dei est; quocumque voluerit, vertet illud.

Itaque qui peccat et distat a Deo per ignorantiam, appropinquet ad eum, recipiendo informationem ab homine, illuminationem ab angelo, unctionem a Spiritu

I Joann. II, 27. Sancto, juxta illud Joannis apostoli: Unctio ejus docet vos de omnibus. Unde et Pau-

II Tim. II, 7. lus testatur: Dabit tibi Dominus de omnibus intellectum. Qui vero peccat atque a Deo distat per infirmitatem, appropinquet Deo, implorando adjutorium gratiæ ejus, atque ad robur et profectum virtutum se dando, et rationis judicium assequendo. Porro qui peccat et a Deo distat per habitus vitiosos, per consuetudinem pravam, per certam malitiam, appropinquet ad

eum, de suis vitiis cordialiter pœnitendo, condigne dolendo, integre confitendo, efficaciter satisfaciendo. Assuescat se frangere et contra impiam consuetudinem dimicare, atque in bonis se quotidie exercitet actibus, sciens quod regnum cœlorum vim patitur, et violenti rapiunt illud: intelligendo per violentos, eos qui frangunt propriam voluntatem Deo rebellem, et irrationabiles motus vincunt, corpus suum castigant et in servitutum animæ redigunt illud, concupiscentias ejus calcando.

Præterea quidam peccant solum corde, consentiendo illicitis; alii procedunt in opus; nonnulli ad consuetudinem pravam labuntur. Et isti longissime distant a Deo, quia ut asserit Augustinus, peccata quamvis magna et horrenda, quum in consuetudinem venerint, aut parva aut nulla esse creduntur, adeo ut non solum non occultanda, verum etiam prædicanda diffamandaque videantur. Ideo vincere consuetudinem, dura est pugna; tamen per gratiam Dei facile fieri potest. Aliter satis difficile est, quoniam ipsa vis consuetudinis animam premit, et quasi quamdam peccandi necessitatem inducit, ad quam miser peccator spontanee venit. Nam in primis peccat homo ex ignorantia vel infirmitate; deinde peccatum incipit sibi magis ac magis placere atque dulcescere, et sic frequenter iterat illud, ac per hoc consuetudo in eo pessima generatur, qua tanquam impetu quodam rapitur ad peccandum, dicente Gregorio: Vitiosa consuetudo obligat mentem, ut vix surgere possit ad rectitudinem; conatur et labitur, quia ubi sponte diu perstitit, ibi etiam quum noluerit, coacta cadit.

Verumtamen prava consuetudine inquinatus, nequaquam desperet; sed in Deo confidens, ejus misericordiam ac juvamen indesinenter imploret, Christi passionem jugiter meditetur, novissima sua sagaciter contempletur, mortis horrorem, judicii divini rigorem, tormenta inferni, gloriam cœli. Ista habendo præ oculis, assuescat se in actibus bonis, ut a consuetudine pra-

Matth. XI, 12.

I Cor. IX, 27.

va ad bonam perveniat. Nunc itaque in-
dulta pœnitentiæ tempora non perdamus,
sed omnes appropinquemus ad Jesum, re-
cedendo a malis, aggrediendo opera bona,
perseverando et proficiendo in eis usque
in finem, quemadmodum et sanctissimus

Is. LV, 6, 7.

Isaias hortatur : Quærite Dominum, dum
inveniri potest; invocate eum, dum prope
est. Derelinquat impius viam suam, et vir
iniquus cogitationes suas, et revertatur ad
Dominum, et miserebitur ejus, et ad Deum
nostrum, quoniam multus est ad igno-
scendum.

Postremo, S. Gregorius refert circa evan-
gelium istud, exemplum notabile, quod sci-
licet fuit vir quidam sæcularis et dives, qui
quum in grave corruisset peccatum, re-
diens ad se ipsum, exhorruit quod patra-
vit, desuperque compunctus, ingressus est
cœnobium. In quo in tanta pœnitentia,
abstinentia, humilitate, caritatisque fervore,
et quotidiano virtutum vixit profectu,
quod ceteri Fratres considerando vitam
illius, suam conversationem pro nihilo du-
cere cgebantur. Itaque vir ille Matuti-

nas prævenire solebat, et ante Matutinas
transire ad locum quemdam secretum, ubi
orationibus meditationibusque vacavit. Qua-
dam igitur nocte abbas monasterii occul-
te secutus est illum; et volens scire
quamdiu in oratione persisteret ille, stetit
expectans quousque ille rediret. Quum-
que abbas sic staret, vidit subito lucem
magnam de cœlo venientem, quæ locum
in quo vir ille orabat, copiosissime illu-
stravit, plus quam si dies fuisset. Quo
viso, abbas expavit, contremuit, fugit. Re-
verso autem viro illo, abbas interrogavit
eum : Ubi fuisti? At ille latere se posse
confidens, dixit se fuisse in cœnobio; sed
abbate objiciente, compulsus est dicere
ubi fuit. Quumque abbas loqueretur ei de
luce quam viderat, ille dixit abbati : Quan-
do vidisti lucem descendere super me, vox
quoque de cœlo venit, et dixit ad me,
Dimissum est peccatum tuum.

Hujus ergo peccatoris vestigia imite-
mur; et quanto gravius atque frequentius
Deum offendimus, tanto nunc ei humiliter
ac ferventius obsequamur.

SERMO TERTIUS

DE CARITATE ET MISERICORDIA DEI ANGELORUMQUE AD HOMINES, ET DE MISERORUM
HOMINUM INGRATITUDINE.

FIDELIS sermo, et omni acceptione di-
gnus, quia Jesus Christus venit in
hunc mundum peccatores salvos facere. D
I Tim. I, 15.

Tota superbeatissima Trinitas, Pater, Fi-
lius et Spiritus Sanctus, tres personæ, unus
Deus, ineffabilem caritatem et misericor-
diam suam hominibus multipliciter im-
pendit ac demonstravit. Primo, in hoc
quod quum non essemus, creavit nos, non
ut cetera inferiora, sed ad imaginem et
similitudinem sui ipsius. Secundo, in hoc
quod ad supernaturalem beatitudinem, hoc
est ad suæ divinitatis beatificam fruitio-

Gen. I, 26,
27.

nem, nos condidit, ut simus æquales an-
gelis sanctis in cœlo. Tertio, in hoc quod
a principio multa supernaturalia gratiæ
dona primis dedit parentibus, concreando
eis originalem justitiam; et Adæ concrea-
vit sapientiam valde magnam ac naturali-
um rerum scientiam : unde et animalibus
apta imposuit nomina. Multi quoque do-
ctores affirmant, quod in gratia gratum
faciente et caritate fuerunt creati. Atque
in terrestri eos Deus constituit paradiso,
ut et eorum ibi permaneret posteritas, si
ipsi divinum custodirent præceptum. Et
fuit ingens caritas, liberalitas ac pietas

Gen. II, 19,
20.

Dei, quod non fuit contentus producere hominem in puris naturalibus, sed et dona gratuita supernaturalia ei adjecit. Quarto, in hoc quod quum tam multi angeli ac primi corruissent parentes, complacuit Deo liberare genus humanum, non angelos. Quinto, in hoc quod tota supersapiens supergloriosaque Trinitas concorditer decrevit hominem liberare per æterni unigeniti Filii Patris æterni incarnationem ac passionem. Sexto, in hoc quod tota Trinitate cooperante, unita est natura humana Verbo æterno in unitate personæ : quod fuit caritatis plenissimæ, dignationis immensæ, liberalitatis piissimæ; quod scilicet Deus ita univit creaturam proprio Creatori, imo naturam humanam ex se fragilem et infirmam, tam proxime Verbo conjunxit æterno, ut una esset persona Deus et homo, per quod Deus suam bonitatem abundantissime communicavit naturæ humanæ.

Porro Deus Trinitas multipliciter nobis suam caritatem misericordiamque exhibuit et ostendit : quia ad Baptismi gratiam nos perduxit; deinde sæpissime nobis pepercit, et in pravitatibus nostris nos diu sustinuit; gratiam pœnitendi concessit, Sacramento corporis et sanguinis Christi animas nostras frequenter refecit, virtutes ac dona Spiritus Sancti infudit; unicuique etiam homini angelum sanctum ordinavit custodem.

Sed nunc specialiter consideremus pro posse caritatem et misericordiam Christi ad homines, quæ sicut ipsemet protestatur, in hoc præsertim apparuit, quod se ipsum pro nostra redemptione acerbissimæ morti exposuit. Propter quod loquitur : Majorem hac dilectionem nemo habet, ut animam suam ponat quis pro amicis suis. Ideirco dixit Apostolus : In fide vivo Filii Dei, qui dilexit me et tradidit semetipsum pro me. Circa quæ verba scribit Chrysostomus : Hic est affectus servi fidelis, ut quod pro omnibus a Christo gestum et toleratum est, pro se solo reputet factum ac toleratum. Et utique universa

A quæ Filius Dei pro totius generis humani salute assumpsit, fecit ac pertulit, quilibet Christifidelis sic debet attendere, tamque gratanter adspicere, quasi pro se solo totum esset peractum : potissimum, quoniam Christus pro unoquoque potius vellet adhuc mori, si possibile aut necessarium esset, quam eum, quantum in se est, perire permetteret. Ideo grati esse Christo totis laboremus præcordiis, non verbis dumtaxat eum laudando, sed ipsum in omnibus, quantum valemus, per bona opera B honorando, ad minus observando præcepta.

Insuper, caritatem et misericordiam suam Christus hominibus demonstravit, tam amore ac dulciter inter eos conversando, et peccatores, quantumlibet vitiosos, pie ad pœnitentiam exhortando, pœnitentes gratiose suscipiendo, imo cum publicanis et peccatoribus manducando, quatenus verbo et exemplo eos ad pœnitentiam provocaret. Tertio, caritatem et misericordiam suam ostendit hominibus, pro eorum informatione et salute C toties prædicando, tam longe ac late pertranseundo, seque ex itinere fatigando, tot operando miracula, tot sustinendo a perversissimis illis Judæis opprobria, irrisiones, blasphemias, maledicta : quæ omnia pro nobis egit ac pertulit. Et tamen ingrati sumus, nec Christi capitis ac domini nostri sequi vestigia volumus : nihil propter ipsum pati dignamur. Quarto, caritatem et misericordiam suam excellenter nobis monstravit in Cœna novissima, instituendo Sacramentum dignissimum corporis sui ac sanguinis, in quo se ipsum nobis quotidie tribuit, ita quod idem est dator ac donum.

Quum ergo tanta fuerit et sit caritas Christi ad nos, quæ est ista negligentia, ingratitudo atque perversitas nostra, quod hunc Salvatorem superpiissimum non curamus, imo nec beneficia ejus perpendimus, præcepta ejus transgredimur, consilia aspernamur? Ecce quanta est vilitas, excæcatio, malitia impiorum. Nam potius eligunt esse ministri ac membra diaboli, quam Chri-

Marc. ii,
16, 17.

Joann. iv,
6.

Ephes. v,
23.

Matth.
xxvi, 26-28.

Joann. xv,
13.

Galat. ii, 20.

sti; magis volunt consentire suggestionibus dæmonum, quam acquiescere inspirationibus Christi ac angelorum; plus diligunt suam perditionem et mortem, quam vitam salubrem beatitudinemque æternam, hoc est, peccata mortalia quam virtutes. Quidquid suggerit Spiritus Sanctus, quidquid inspirant angeli sancti, abjiciunt; quidquid immittit eis diabolus, quidquid caro desiderat, protinus approbant, cupiunt, prosequuntur. Tam vehementer et infelicitè peccata obtenebrant hominem; tam valide vitiosæ affectiones suis ponderibus trahunt mentem deorsum.

Deinceps angeli sancti, milites Dei insignissimi, puræ et innocentissimæ mentes, cives superni, beatissimi intellectus, caritatem et pietatem suam eximiam nobis, luteis vasis, saccis stercoreis, vitiosis, fœdis ac vilibus, incessanter impendunt, ubique nos, quantum in ipsis est, custodiendo ac protegendo; bona inspirant, Deum pro nobis exorant, de nostris excessibus quodammodo contristantur, de pœnitentia nostra et bonis operibus valde lætantur. Et nihilo minus tot et tanta eorum beneficia dissimulamus, imo nec consideramus; caritati et benevolentiae eorum circa nos ingratisimii sumus, nec aliquam eorum præsentiæ ac excellentiæ reverentiam exhibemus.

Sed resipiscamus a negligentis, ingratitude et perversitatibus nostris; et omnia jam præacta adspicientes, coram

A Deo et angelis ejus virtuose ac reverenter conversari nitamur. Non plus vereamur ac veneremur præsentiam hominum, quam Dei ac angelorum: idcirco, quod coram honestis hominibus loqui aut agere verendum est, coram Deo et angelis sanctis cogitare, appetere, operari nullatenus audeamus. Et summum amatorem nostrum Jesum Christum saltem redamare non differamus.

Legitur, quod sanctissimus atque præinclytus martyr Christi, B. Ignatius, doctor ac pontifex Antiochenus, discipulus beatissimi Joannis apostoli, Jesum Christum Dominum nostrum ardentissime valde dilexit. Qui quum sub Trajano imperatore gravissima pro fide Christi pateretur supplicia, non cessavit Jesum Christum nominare ac invocare. Quem quum interrogassent tortores cur nomen hoc toties replicaret, respondit: Hoc nomen cordi meo inscriptum habeo, idcirco ab ejus invocatione cessare non valeo. Eo ergo occiso, illi qui hoc audierunt, volentes veritatem verborum curiosius experiri, cor ejus ex corpore abstraxerunt, et scindentes illud per medium, invenerunt totum hoc nomen, Jesus Christus, aureis litteris inscriptum. Tanti ergo martyris exemplo, discamus Christum ferventer diligere, atque ex ejus amore, sanctis operibus alacriter occupari, adversa quoque cum gaudio pati.

AD RELIGIOSOS

SERMO QUARTUS

QUOMODO OMNIS CORREPTIO, ADVERSITAS SIVE EXERCITATIO, TANQUAM DE MANU DEI, BENIGNISSIMI PATRIS, SUSCIPienda FERENDAQUE SIT.

HUMILIAMINI *sub potenti manu Dei, D* ut vos exaltet in tempore visitationis. I Petr. v, 6.

Videmus quam reverenter atque humiliter milites et ministri regum ac principum sæculi hujus suis dominis obsequan-

tur, qualiter eis inclinent et se sæpe coram eis prosternant, quam etiam reverentialiter loquantur ad eos, quam attonite eis adstent : quanto magis Regi universorum, Deo omnipotenti, principi majestatis ac excellentiæ infinitæ, cum summa et incomparabili reverentia, humilitate, custodia, puritate, adstare, psallere, obsequi, loqui, sacrificare debemus? Merito igitur maledictos appellat Scriptura eos qui Dei opus faciunt negligenter, pigre, remisse, fastidiose. Quod si quærat, quid sit opus Dei facere negligenter, respondetur, quod negligentia et diligentia opponuntur. Is ergo opus Dei efficit negligenter, qui non facit hoc diligenter ; et is non facit illud diligenter, qui Dei majestatem et sanctitatem non pensat, et per consequens cum debita cordis custodia et animi puritate ei non servit, nec vigilantiam adhibet mentis ut ei complaceat, sed superficialiter transit.

Jer. XLVIII,
10.

I Petr. v., 6.

Ibidem.

Prov. XXIX,
23.

Job XXII, 29.

Luc. XIV, 11;
XVIII, 14.

Itaque, sub potenti Dei manu humiliemur, id est, ex consideratione omnipotentiae Dei et justi judicii ejus humiliemus nos ipsos, propriam vilitatem, imperfectionem et culpam pensando, et nos ipsos coram Deo deprimendo, contemptibiles et indignos recognoscendo : et ita pro nostris peccatis omnem correptionem, correctionem, adversitatem, exercitationem patientissime toleremus. Atque, ut priores simus ad hoc, hortatur princeps Apostolorum ut ita nos humiliemus, quatenus Deus in tempore visitationis exaltet nos, hoc est in die particularis ac universalis judicii. Nam humilem spiritu suscipiet gloria ; et qui humiliatus fuerit, in gloria erit ; atque ut ait Salvator, Qui se humiliat, exaltabitur. Quo constat, quia quo nunc profundius humiliamus nos ipsos in veritate, eo gloriosius exaltabimur a Deo in æternitate. Et mirum quod non satagimus nos ipsos ad modicum vitæ præsentis tempus humiliare, ut æternaliter exaltemur et mereamur cum Christo regnare. Verumtamen perfectius laudabiliusque consistit se ipsum humiliare, patientiam observare et

A ceterarum exsequi actus virtutum, puro Dei intuitu et sincerissimo ejus amore ad ejus honorem, quam retributionis affectu. Et tamen qui puro Dei amore hoc agit, plus gratiæ in præsentem meretur, ac multo majorem a Deo in cœlis gloriam sortietur.

Insuper nos hortatur summus Apostolus ut omnem sollicitudinem nostram projiciamus in Deum, certi de providentia ejus, qui etiam irrationabilia pascit, et rationalium creaturarum curam ac providentiam habet peculiarem, qui etiam pater hominum appellari dignatur. Idcirco pro temporalibus non est immoderata sollicitudo habenda, quamvis non debeat homo negligere quin quod suum est faciat, ne videatur Deum tentare : nam et bruta, quæ Dominus pascere dicitur, alimoniam suam requirunt. Est autem quædam sollicitudo peroptima, quæ est spiritualis vigilantia cordis se ipsum jugiter custodientis ne gratiam Dei amittat, neve detrimentum patiatur virtutum, ne tentationibus superetur, aut remissius fiat, sed in gratia Dei semper proficiat, in omni virtute et dono Spiritus Sancti firmetur, et Deo quotidie complacentius atque propinquius efficiatur. Hæc est optima sollicitudo, de qua ait Michæas : Indicabo tibi, o homo, quid sit bonum, aut quid Dominus requirat a te : facere judicium, et diligere misericordiam, et sollicitum ambulare cum Deo tuo ; hoc est, cum timore casto ac reverentiali Deo servire. Cui non opponitur illud, Servite Domino in lætitia : quia et ipsa cum qua Deo servitur lætitia, debet consistere timorata, non dissoluta. Diversis quoque respectibus debemus Deo servire in timore et tremore, et nihilo minus in lætitia et dulcore, quatenus ex consideratione divinæ majestatis et infinitæ justitiæ ac justi judicii ejus, timor et tremor concipiantur, ex consideratione vero immensæ bonitatis, caritatis et misericordiæ Dei, orietur in corde nostro lætitia, quæ etiam operi virtuoso naturaliter est annexa.

I Petr. v., 7.

Matth. vi,
26.

Mich. vi, 8.

Ps. II, 11.

Ps. XCIX, 2.

Præterea, hæc sancta et spiritualis solli-

citudo, tanto major ac indesinentior debet esse in nobis religiosis et subditis, quanto ab omni exteriori et temporali sollicitudine sumus plenius absoluti ac liberi, ita ut totum cor nostrum indesinenter intentum sit ad actuale Dei memoriam, ad ejus beneplacitum peragendum, ad vitandam omnem ipsius offensam. Sed, heu ! multi absolutionem illam ac libertatem a sollicitudine temporalium rerum vertunt in dissolutionem ac levitatem, atque in curas viles et anxietates penitus pueriles, occupantes se viliter, quomodo scilicet hoc aut illud eis fiat, formetur, provideatur, contingat : sicque minus intenti sunt Deo ac spirituali profectui. Contra quod monet

I Petr. v, 8.

Apostolus summus, ut sobrii simus mente et corpore : non ebrii passionibus et occupationibus vanis, indignis, illicitis, sed vigilantes in orationibus, meditationibus et exercitiis virtuosis ; non pigritiæ otioque vacantes, potissime quum crudelissimus, callidissimus, fortissimus hostis noster diabolus, indesinenter observet, insidietur, circumeat, quærens qualiter animas nostras absorbeat, non aliud quærens nisi ut æternæ damnationi nos secum involvat.

Ibid. 9.

Idcirco vigilantissima indigemus custodia, incessabili circumspectione et resistentia victoriosa, ut primo omnium simus bene radicati in fide ; deinde, orando, Christi passionem inspiciendo, novissima meditando, in solo Deo plenarie confidendo, renitamur diabolo ; nec tentationum aut tribulationum fatigemur aut vincamur molestiis aut tumultu, scientes (juxta Archi-

Ibidem.

apostolum) eandem passionem ei quæ in mundo est, nostræ fraternitati fieri, hoc est, eandem tribulationem, tentationem seu persecutionem quam ceteri electi in mundo hinc inde dispersi, patiuntur, nos pati. Ideo non miremur, nec dejiciamur,

quasi aliquid novi nobis contingat : imo, si de sorte et corpore electorum esse appetimus, electorum tribulationibus ac tentationibus affici non refugiamus.

Narrat Climacus : In Asia erat senex omnino negligens, habens discipulum juniorem, Innocentium nomine, deliberatione atque arbitrio simplicem, cogitatione vero et operatione prudentem. Qui tanta ab illo sene sustinuit, ut credi vix possit : non enim injuriis et ignominiiis tantum, sed et plagis et verberibus eum quotidie cruciabat. Quem quum quidam Patrum videret quotidie quasi servum empticium extrema affectum miseria, obvians ei sæpe, dixit ad eum : Quid est, frater Innocenti ? Quomodo tibi hodie fuit ? Qui mox quandoque quidem oculum lividum, quandoque collum, quandoque caput monstravit plagatum. Cognoscens autem Pater ille quod Innocentius operator esset, dixit ad ipsum : Bene, bene ; sustine, et salvaberis. Quumque novem annis ita stetisset sub sene illo immisericordi, migravit ad Dominum. Quo sepulto, præceptor ejus ivit ad quemdam magnum senem, dixitque ei : Pater, Innocentius mortuus est. Cui senex : Hoc mihi persuadere nequibis ut credam aut audiam. Et ille : Veni, inquit, et vide. Quum ergo senex ille magnus cum Innocentii præceptore venisset ad monumentum, clamavit : Frater Innocenti, mortuus es ? At vero bene prudens, obediens, et post mortem obedientiæ virtutem ostendens, Innocentius seni respondit : Pater, quomodo possibile est hominem obedientiæ ac patientiæ operatorem mori ? Quo audito, præceptor Innocentii timens ac tremens, in faciem cecidit, cum lacrimis pœnitens ; et exstructa sibi juxta sepulcrum sancti fratris Innocentii cella, ibidem de cetero vixit religiose.

SERMO QUINTUS

QUALITER APPROPINQUANDUM SIT DEO.

ERANT *appropinquantes ad Jesum publicani et peccatores, ut audirent illum.* Luc. xv, 1.

Luc. xix, 10.

Quemadmodum cœlesti medico, in terris conversanti, prædicanti miraculisque pol-
lenti, corporaliter et spiritualiter appropinquabant publicani et peccatores, quos Christus, qui venit quærere et salvare quod perierat, benigne suscepit; ita quotidie etiam nos Deo propinquare debemus. Sed quæri potest, quomodo Deo propinquare possumus, quum ipse immensus sit, ubique præsens, omnia penetrans, intimus rebus, imo intimior eis quam essentialia partes earum, utpote illabens earum essentiis. Rursus videtur, quod Deo appropinquare non valeamus, quum infinite distet a nobis, infinitum autem pertransiri non possit. Verum ad hæc facilis exstat responsio, quoniam sicut non loco, sed dissimilitudine a Deo distamus, sic non locorum spatio, sed similitudine ei appropinquamus, nec passibus corporis, sed mentis affectibus imus et pervenimus ad eum. Est autem dissimilitudo naturæ, qua semper in infinitum distamus a Deo; et est dissimilitudo culpæ, qua tanto plus distamus a sancto et incircumscripibili Deo, quo pluribus atque gravioribus involvitur culpis. Tanto quoque plus ad eum accedimus, quanto plus a peccatis recedimus et bonis insistimus actibus, gratia quoque et virtutibus decoramur. Sed quoniam omnis gratia, virtus et perfectio nostra, a virtute et perfectione Dei distat, occumbit ac deficit infinite, idcirco Deo propinquare asserimur, non solum a dissimilitudine culpæ ac vitiis recedendo, sed item in gratia virtutibusque crescendo.

Porro virtutum quædam eminenter ac

proprie competunt Deo, ut caritas, sapientia, pietas atque justitia; quædam improprie et solum quantum ad similitudinem operis, non quoad veritatem affectus, ut sunt virtutes morales, circa passionum reformationem versantes. Passiones namque in Deo secundum deitatis naturam non sunt: idcirco mansuetudo, patientia, temperantia, castitas, in Deo metaphorice esse dicuntur. Sunt etiam quædam virtutes in sua ratione aut circa suum objectum imperfectionem aliquam includentes seu denotantes. Fides namque et spes in suis rationibus imperfectionem includunt, quoniam fides obscuram notitiam, spes vero distantiam a felicitate et ejus carentiam dicit. Pœnitentia vero, humilitas et latria, circa suum subjectum exprimunt imperfectionem, utpote peccabilitatem et inferioritatem: pœnitentia namque ei qui peccavit solummodo competit; humilitas quoque non nisi defectibili et imperfectæ naturæ potest convenire; similiter latria, quum sit virtus Deo cultum cærimoniamque impendens, non nisi creaturis rationalibus et intellectualibus congruit. Itaque per virtutes Deo proprie convenientes et actus earum, Deo et Domino nostro Jesu Christo secundum suam deitatem, præcipue propinquamus, utpote in caritate et sanctæ dilectionis fervore, in sapientia et sapientiali divinorum contemplatione, in justitia et zelo ipsius, in pietate et actibus ejus essendo atque crescendo.

Quamvis autem fides et spes imperfectionem includant, nec proprie Deo convenient, tamen quoniam Deum pro immediato habent objecto, et in actibus suis circa ipsum versantur et proficiscuntur ad ipsum, idcirco per actus fidei et spei

etiam valde Deo appropinquamus. Latria A quoque, quamvis non sit virtus theologica Deum pro objecto proprio habens, sed tanquam pars justitiæ circa operationes versetur, tamen quoniam operationes illæ Deum respiciunt, et circa ipsum versantur, hinc item per actus latriæ Deo non mediocriter propinquamus, puta orando, adorando, sacrificando, etc. Denique per latrariam ejusque actus, et per virtutes morales, quæ circa passiones versantur, earumque actus nonnullos, propinquamus assimilamurque Christo secundum suam humanitatem, secundum quam ipse Deum Patrem ac superbeatissimam Trinitatem perfectissime coluit, oravit, adoravit, et cunctis modis completissime honoravit, prout ipse in Evangelio protestatur : Sicut mandatum dedit mihi Pater, sic facio ; et, Quæ placita sunt ei, facio semper. Rursus, per virtutes istas morales et actus ipsarum propinquamus et assimilamur Deo quoad operis similitudinem, quamvis non quoad passionis affectum : quemadmodum per misericordiam Deo assimilamur, beneficium exhibendo seu pie subveniendo, non compassionem habendo, quia compassio non competit invariabili, impassibili, superfelicissimo Deo. Verumtamen per actus virtutum moralium, qui sunt passionum refractiones ac moderationes, propinquamus et quodammodo assimilamur Deo dispositive, quia per actus illos, ad ferventiorum caritatem, ad stabiliorem unionem cum Deo, ad sinceriores contemplationem ipsius, et immobiliorem tranquillitatem seu pacem in ipso, disponimur atque provehimur. Immoderantia quippe inquietudoque passionum a tam præclarissimis his bonis nos impedit.

Insuper distamus a Deo, in quantum viatores et peregrini per fidem ad patriam ambulantes : idcirco, futuram beatitudinem nunc prælibando ac inchoando, Deum videlicet suaviter contemplando, id est in contemplatione doni sapientiæ proficiendo, Deo appropinquamus. Verumtamen per caritatis fervorem, per desideria ejus, Deo po-

tissimum propinquare censemur, quum caritati sit proprium diligentem dilecto unire, et in Deum moveri atque ascendere.

Præterea, quoniam justus ex fide vivit, et accedentem ad Deum credere opus est, omniumque fundamentum virtutum est fides, ideo primo per fidem Deo appropinquare conemur, universa quæ sacra Scriptura et sancta Ecclesia docent esse credenda, firmissime inviolabiliterque credendo, et rationes credendorum obtinendo, atque per eas et per illuminationem supernam, ea quæ fidei sunt, purificatæ mentis intelligentia contuendo. Appropinquemus quoque Deo per spem, in ipso tanquam in superpiissimo patre ac fidelissimo domino omnipotentique adjutore filialiter ac magnifice confidendo, considerantes quam amorose, liberaliter ac benignissime egit nobiscum. Sed et æternam futuram beatitudinem certitudinaliter præstolemur, quantum est ex parte veritatis liberalitatisque Dei, qui illam justis promisit ; atque ex ista tantæ felicitatis certa exspectatione, ad laborandum in via Dei, in cultu ipsius, in prælio contra aciem vitiorum, fortiter animemur, ut per opera bona certam faciamus vocationem nostram, cum Apostolo profitentes : Non sunt condignæ passiones hujus temporis ad futuram gloriam ; itemque, Id quod in præsentem est momentaneum et leve tribulationis nostræ, supra modum in sublimitate æternum gloriæ pondus operatur in nobis. Insuper appropinquemus Deo per caritatem, in ea crescendo et magis ac magis fervendo, incitamenta caritatis, videlicet bonitatem, pulchritudinem perfectionemque Dei, et ejus beneficia ac promissa considerando, ad Deum ac patriam assidue adspirando, pro divinæ et fraternæ dilectionis inflammatione continuoque augmento Deum jugiter exorando, omnem etiam sensualem excludendo affectum, et evitando quidquid Dei est offensivum.

Sed quia in multis offendimus omnes, atque quotidie venialiter, heu ! nimis frequenter peccamus, oportet quoque nos

Joann. xiv, 31.
Ibid. viii, 29.

Habac. ii, 4 ; Hebr. x, 38 ; xi, 6.

II Petr. i, 10.

Rom. viii, 18.

II Cor. iv, 17.

Jacob. iii, 2 ; III Reg. viii, 46.

Deo quotidie appropinquare per pœnitentiam et actus ipsius, pro quotidianis et universis nostris peccatis cordialissimam contritionem habendo, ea deflendo, veniam postulando, confitendo et satisfaciendo pro ipsis, ac recidivum cavendo. Interea, quoniam Deo proprium est misereri ac parcere, ideo per misericordiam et opera ejus Deo propinquare non desistamus, actus misericordiæ corporales ac spirituales exercendo loco et tempore opportuno pro posse, potissimum spiritualia misericordiæ opera. Itaque tribulatis, afflictis, captivis, tentatis, peccantibus et collapsis intime compatiamur ac pro viribus succurramus, saltem orando, hortando, opem præbendo. Et quoniam Deus peccantes ac impios tam patientissime ac longanimitè suffert, ultionemque differt, et pœnitentibus mox indulget, imo aversos multoties prævenit, revocat et convertit, ac bona pro innumeris atque gravissimis malis largitur, studeamus et nos pro mo-

Sap. xi, 24, 27.

Ezech. xviii passim.

A dulo nostro per veram mansuetudinem, patientiam, beneficentiam Deo appropinquare, non ulciscendo nos ipsos, sed bona pro malis reddendo, et etiam eos a quibus læsi sumus, pie præveniendū ac mitigandū, atque eisdem antequam veniam postulent ignoscendo, et Deum pro ipsis ex corde orando.

Postremo, quoniam justus Dominus et justitias diligens, nullum malum deserit impunitum, nec aliquod bonum irremuneratum, curemus ei appropinquare, proprias culpas quotidie in nobismetipsis dijudicando ac puniendo, benefactoribus quoque nostris, prout valemus, vicissitudinem rependendo ac gratias referendo condignas, ut sic in pietatis et bonitatis affectum, in sincerissimum justitiæ zelum, in discretionis lumen nostra convertantur præcordia. Sicque Deo quotidie propinquemus, ut cito ad ipsum pertingere, et mox post hujus incolatum exsilii, ab ipso dulciter recipi atque feliciter coronari possimus.

Ps. x, 8.

Job xxiv, 12.

SERMO SEXTUS

DE ADMIRABILI CARITATE ET MISERICORDIA DEI AD HOMINES.

GAUDIUM est angelis Dei super uno peccatore pœnitentiam agente. *Luc. xv, 10.*

Quam incomprehensibilis sit caritas, munificentia et pietas Dei ad homines, sacra evidenter docet Scriptura. Quo namque dulciori amorosiorique verbo poterat Deus caritatem, dignationem et liberalitatem suam ad homines protestari ac declarare, nisi dicendo, Deliciæ meæ esse cum filiis hominum? Cur non potius cum spiritibus angelorum? Sed hæc est bonitas atque dignatio Regis altissimi, ut inferioribus, pauperioribus, defectuosioribus amorosius ac benignius applicet semetipsum instar clementissimi patris medicique piis-

Prov. viii, 31.

C simi, qui circa pauperiorem infirmiori- que filium benigniorem se exhibet, et illi magis se applicat.

Denique, quum diligere sit alicui bonum velle, Deus omnipotens caritatem suam nobis primo monstravit in opere creationis, quo de nihilo nos produxit, esse, vivere, sentire et intelligere dedit, sicque ad sui ipsius imaginem et similitudinem nos condere est dignatus.

Gen. i, 26,

27.

Secundo, in hoc quod non ad naturalem felicitatem, ut putaverunt philosophi, sed ad supernaturalem beatitudinem fecit nos, hoc est ad suæ immensæ felicitatis participationem, ad suæ deitatis claram ac facialem jucundissimam intuitionem, ad suæ

interminabilis bonitatis ac infinitæ dulcedinis beatificam, suavissimam fruitionem plenarie contentantem, ut sicut Joannes evangelista in exordio suæ primæ ait Canonica, societatem habeamus ad Deum et cum Deo. Hæc quippe societas in communicatione illa dignantissima liberalissimaque consistit, fundatur et ponitur, qua Deus naturaliter infiniteque bonus, beatitudinem suam opulentissimam nobis tam copiosissime et supernaturaliter communicare dignatus est; sicque suæ divinitatis, suæ gloriosissimæ vitæ, suæ illimitabilis sapientiæ nos fecit participes, atque in filios adoptavit, et in patria sibi perfecte assimilare decrevit, juxta quod scriptum est : Nondum apparuit quid erimus ; scimus quia quum apparuerit, similes ei erimus, quia videbimus eum sicuti est. Et tamen nunc quoque non solum per dona gratiæ, sed et per dona naturæ Deo aliquatim similes perhibemur, utpote ad ejus similitudinem imaginemque creati; et principem Apostolorum testante, Pretiosa nobis donavit, ut per hæc divinæ efficiamur consortes naturæ.

Verum similitudo omnis hæc vitæ præsentis qua Deo assimilamur, comparatione assimilationis perfectæ in patria, permodici est momenti. Ibi equidem tanta inundatione et exuberantia se Deus communicat et infundit, mentemque implet, præoccupat, possidet, ut recte per Isaïam dixerit ipse : Ecce ego declino in eos ut flumen pacis, et ut torrens inundans gloriæ gentium. Unde et fertur in Psalmo : Inebriabuntur ab ubertate domus tuæ, et torrente voluptatis tuæ potabis eos. Tanta ergo est illa assimilatio, tam largiflua communicatio, tam gloriosa et supernaturalis deificatio electorum in regno cœlesti, ut quod Deus est, quod habet, quod agit per naturam, ipsi sint, habeant et agant per gratiam. O quam ineffabilis est ista summi Dei dilectio ad electos, quos tam propinque et intime, tam amorose et gloriose, tam supernaturaliter et opulentissime sibi in æternum unire, adstringere, conso-

ciare decrevit ! Quod sanctus advertens Hieronymus : Nihil (inquit) felicius Christiano, cui regna promittuntur cœlorum. Certe, si hunc nostræ creationis finem, si tam indicibilem nobis paratam beatitudinem rite attenderemus, vana et vilia omnia despiceremus, cuncta adversa cum gaudio pateremur, nunquam in Dei obsequio pigri, remissi et frigidi inveniremur.

Tertio, suam ad nos caritatem Deus monstravit in hoc quod universa pene creata ad nostram ordinavit utilitatem. Omnia enim inferiora ista pedibus nostris subjecit, nostris usibus deputavit; similiter elementa. Sed et orbis cœlestes, sidera et planetas in nostrum creavit obsequium, juxta illud Deuteronomii : Ne oculis elevatis ad cœlum, videas solem et lunam et omnia astra cœli, et colas ea quæ Dominus Deus tuus creavit in ministerium cunctis gentibus quæ sub cœlo sunt. Angelicos quoque spiritus in nostrum delegavit subsidium, ad nostram misit custodiam, quoniam omnes administratorii spiritus sunt, missi in ministerium propter eos qui hereditatem capiunt salutis.

Quarto, per hoc quod tam multa, copiosa et gratiosa supernaturalia Spiritus Sancti charismata nobis contulit in præsentem : quia ad gratiam nos perduxit Baptismatis, et ecclesiasticis ditavit munivitque sacramentis, evangelica erudit sapientia, fide ac lege, et de christianis fecit nasci parentibus, non in infidelitatis reliquit errore, quemadmodum obstinatos Judæos, excæcos Sarracenos, ac ceteros infideles. Insuper, peccantibus nobis diu pepercit, sæpe indulgit, gratiam et virtutes peccando amissas per Pœnitentiæ sacramentum restituit; de sæculo quoque abstraxit, atque in sancta religione ista constituit. Numquid parva sunt ista? Intueamur quid fecerit aliis multis : nonne jam plurimos absorbit inferus, qui minus peccaverunt quam nos ? O quanta est excæcatio, et negligentia ingratitudeque nostra, quod non perpendimus ista, nec in Deitatis amore

I Joann. 1, 3.

Rom. viii, 15-17.

I Joann. iii, 2.

Gen. i, 26, 27.

II Petr. i, 4.

Is. lxxvi, 12.

Ps. xxxv, 9.

Gen. i, 28-30.

Ps. viii, 8.

Deut. iv, 19.

Hebr. i, 14.

succendimur, nec in sacro ejus obsequio **A** jugiter inflammamur! Porro ab exordio multa supernaturalia largitus est dona hominibus: quia et primos nostros parentes in originali creavit justitia, et Adam in magna scientia; eosque in paradiso constituit, quem et eorum posteris volebat relinquere, si illi non fuissent transgressi. Eosdem quoque primos parentes in gratia gratum faciente, caritate ceterisque infusis plasmavit virtutibus, ut plures opinantur doctores. Nec ideo de his debemus munificentissimo Creatori esse ingrati, quoniam exigente protoplastorum prævaricatione, tot bonis sumus privati.

Quinto, quod quum angeli multi, et primi corruissent parentes, supersapientissimus Deus, non angelos, sed humanum recuperare genus decrevit; nec hoc qualitercumque, sed totius superessentialis ac supergloriosissimæ Trinitatis benignissimo profundissimoque consilio est decretum, ut per Verbi æterni incarnationem et passionem id ageretur.

Sexto, summe et incomparabiliter Trinitas adoranda suam nobis ostendit dilectionem, in hoc quod ipsa volente ac operante, nostra natura uni increatæ personæ, videlicet Verbo æterno, hypostatica unione est conjuncta, qua unione propinquior esse nequivit; atque per hoc, increatum esse personale Verbi æterni communicatum est naturæ humanæ in Christo, quia in illo esse Verbi suppositata est humanitas Christi: per quod inæstimabiliter dignificata est et sublimata tota humana natura. Deinde, quantum nos Christus dilexit, quanta **D** pro nobis fecit ac pertulit, quæ, quanta et qualia nobis beneficia est largitus,

quantam beatitudinem nobis recuperavit, quis eloqui queat?

Quum ergo nos tantum dilexerit Deus creator, quid mirum si et sancti nos diligant angeli, de peccatoris quoque conversione lætentur, in qua Dei misericordia præcipue declaratur, et fructus dominicæ passionis evidentius operatur, atque humanæ salutis hostes diaboli confunduntur?

Itaque caritati, et misericordiæ liberalitatisque Dei in nobis pro posse vicem reddamus, corde, ore et opere ei regratiantes, et quidquid offensivum aut inhonorativum est ejus, cum summa diligentia fugientes, ea quoque quæ complacent ei, toto fervore ac perseverantia strenue prosequentes. In observantiis sancti Ordinis nostri simus ardentes: in observatione cellæ atque silentii strenui, in colloquio custoditi, exemplares et temperati, in cibo et potu ac somno moderati, in divino Officio alacres, in exteriorum interiorumque sensuum refrenatione semper solertes, atque ad exhibendum jugiter Domino majestatis habitaculum cordis mundum indefesse intenti, præsertim quum per Michæam dicat Spiritus Sanctus: Væ qui cogitatis inutile. Sint *Mich. ii, 1.* igitur oculi cordis nostri semper ad Dominum, et per fervida verba adspiremus ad eum, dicentes: O benignissime Deus, quando te toto corde amabo? O bone et superamabilissime Pater cœlestis, quando te toto cordis affectu amplectar? O Creator dulcissime, quando te ferventissime diligam? Utinam stabiliretur cor meum in te. Illumina et accende, conforta et posside incessanter cor meum, ut tibi quotidie magis devotum, gratum ac perfectum consistat, ad laudem et gloriam tuam.

Gen. ii, 7
et seq.

Ibid. iii, 15.

II Petr. i,
3, 4.

Luc. xv, 10.

Mich. ii, 1.
Ps. xxiv, 15.

DOMINICA IV POST TRINITATEM

ENARRATIO IN EPISTOLAM

EXISTIMO QUOD NON SUNT CONDIGNÆ PASSIONES HUIUS TEMPORIS AD FUTURAM GLORIAM,
QUÆ REVELABITUR IN NOBIS. Rom. VIII, 18-23.

BEATUS Apostolus, ad fervidum æternæ beatitudinis desiderium, ad æquanimem quoque adversitatum perpersionem, atque ut Christo compatiamur, in præsentī nos hortatur epistola, eo quod beatitudo illa et gloria incomparabiliter major sit omni labore et tribulatione seu passione vitæ præsentis. Itaque ait :

Existimo ego Paulus apostolus, id est, agnosco, qui de talibus veraciter judico. Dicit autem, « existimo », non quasi incertus aut dubitans, sed sobrium modum loquendi servans, ac edocens ne incauti **B**simus in asserendo ac judicando. *Quod non sunt condignæ*, id est æquales, sufficientes et proportionatæ, secundum rigorem justitiæ, *passiones huius temporis*, id est persecutiones, tentationes, labores vitæ præsentis, *ad futuram gloriam*, id est ad æternam beatitudinem promerendam, *quæ revelabitur in nobis*, id est, clare et coram omnibus intellectualibus creaturis, nobis a Deo electis præstabitur. (Nam quantum ad corpus et animam glorificabuntur electi in extremo iudicio. Imo et qui interim **C** glorificantur in anima quoad rem, tunc quoque in anima glorificabuntur quantum ad manifestationem : itaque tunc omnibus ostendetur gloria eorumdem.) Hinc loquitur Christus : Quum feceritis omnia quæ præcepta sunt vobis, dicite : Servi inutiles sumus. Hæc etenim gloria, est beatificatio divinæ essentiæ visio, plena mentis in Deo

A lætitia, status omnium bonorum aggregatione perfectus, consummataque animæ et corporis glorificatio sempiterna : ad quam promerendam, passiones temporis huius non exstant condignæ. — Sed videtur contrarium, quia secundum doctores, homo in caritate existens, meretur de condigno vitam æternam. Et respondendum, quod passiones huius temporis seu opera caritatis considerantur dupliciter. Primo, secundum quod procedunt a libero arbitrio, vel acceptantur ab eo : et sic non merentur de condigno felicitatem æternam, etiam habitu caritatis adjuncto. Secundo, prout Spiritus Sanctus liberum arbitrium movens, est hujuscemodi actionis vel acceptationis principium : sicque per eas meretur homo vitam æternam de condigno, quia principium meriti est ejusdem bonitatis cum præmio. Apostolus vero nunc loquitur de passionibus primo modo acceptis.

Porro, quod gloria ista nobis præstanda sit, consequenter probat. *Nam exspectatio creaturæ*, id est creatura exspectans, videlicet homo viator. Dicitur enim homo omnis creatura, secundum illud, Prædicare *Marc. xvi,* Evangelium omni creaturæ : primo, quia ^{15.} cum omni creatura in aliquo convenit ; secundo, propter excellentiam, quia omnia corporalia propter ipsum creata sunt. *Re-* *Gen. i., 26.* *velationem filiorum Dei exspectat*, id est, manifestationem beatitudinis seu manife-

stam felicitatem electorum, hoc est sui A ipsius felicitatem, qua cum Dei electis adoptivisque filiis beatificanda est, cum ingenti desiderio præstolatur, dicens quotidie : Quemadmodum desiderat cervus ad fontes aquarum, ita desiderat anima mea ad te, Deus. Hinc in prima Joannis Canonica dicitur : Nunc filii Dei sumus, et nondum apparuit quid erimus ; scimus quoniam quum apparuerit, similes ei erimus, quia videbimus eum sicuti est. Nunc ergo manifestationem et beatificam illuminationem istam electorum affectuosissime præstolemur, quatenus tandem anima et corpore glorificati, declaremur et agnoscamur esse filii Dei per similitudinem gloriæ. Denique, nomine creaturæ intelligitur homo, dicente Apostolo : Invisibilia Dei per ea quæ facta sunt, a creatura mundi conspiciuntur, hoc est ab homine, ut omnes exponunt.

Vanitati enim, id est instabilitati, mortalitati, multisque pœnis, *creatura subiecta est*, id est homo, juxta illud in Psalmo : Verumtamen universa vanitas, omnis C homo vivens ; *non volens*, id est non sponte, quia invite hæc patitur ; vel, « non volens », id est propter originale peccatum, quod non est nostra voluntate commissum, cujus pœnas cogimur sustinere ; *sed propter eum qui subjecit eam in spe*, id est, propter divinam justitiam subjectus est homo huic vanitati, clementer tamen, quia in spe est liberationis futuræ. *Quia et ipsa creatura*, videlicet homo, *liberabitur*, in finali et generali resurrectione, *a servitute corruptionis*, id est servitute ista servili et D corporali, vel magis proprie, « a servitute corruptionis », id est sollicitudinibus vitæ præsentis, puta a cura quærendi vestitum et victum, ac alia quibus sustentatur hæc corruptibilis vita, et per quæ ei servitur. Liberabitur autem, pertingendo *in libertatem gloriæ*, id est ad securitatem atque dominium felicitatis, vel ad gloriosam libertatem *filiorum Dei*, id est electorum et Beatorum in patria, qui quanto præ viatoribus assimilantur perfectius Deo, tanto

excellentius filii Dei vocantur. Deinde præinducta declarat Apostolus.

Scimus enim quod omnis creatura ingemiscit et parturit usque adhuc. Hoc duobus modis exponitur. Primo, de omni homine mortali fideli : qui dicitur ingemiscere, suspirando ad patriam, atque ob vitæ hujus angustias et ærumnas frequenter gemit lugetque in valle hac lacrimarum ; et parturire, hoc est cum dolore operari ; « usque adhuc », quia a principio mundi sic fuit usque in præsens, et usque ad mortem finemque sæculi durabit hic gemitus et parturitio ista. Secundo exponitur generaliter de principalibus partibus hujus mundi sensibilis, scilicet elementis corporibusque cœlestibus : quæ metaphoricè gemere asseruntur ac parturire, quemadmodum campus dicitur exsultare, et Ps. xciv, 12. pratum ridere. Unde per gemitum eorum, intelligitur inclinatio seu appetitus ipsorum ad statum perfectiorem ; per parturitionem vero, mutua generatio et corruptio quantum ad elementa, vel mutua circumvolutio quantum ad cœlestia corpora. Ex quibus elicitur, quod secundum doctrinam Apostoli, corpora cœlestia et elementa in fine mundi, glorificatis electis et peracto judicio, innovabuntur, ita quod elementorum mutua transmutatio atque cœlestium corporum motus cessabunt, majorique lumine ornabuntur. Terra namque, ut dicitur, in superficie lucida erit instar vitri, aqua tanquam crystallus, aer ut cœlum, ignis ut sidera cœli. Quantitas autem meliorationis cœlestium corporum nota est ei qui daturus est eam. Verumtamen de mensura seu quantitate decorationis solis ac lunæ scriptum est apud Isaiam : Erit Is. xxx, 26. lux lunæ sicut lux solis, et lux solis septemplex sicut lux septem dierum. Tunc equidem tanta erit lux lunæ, quanta nunc est lux solis ; et lux solis erit septies major quam modo est ; corpora quoque Beatorum septies clariora erunt (ut fertur) tunc sole. Hoc tamen secundum Thomam, nec ratione probatur, nec auctoritate, quamvis certissime verum sit quod Veri-

Matth. xiii,
43.

tas ait : Fulgebunt justi sicut sol in regno A Patris eorum.

Mihi interea, salvo semper meliori iudicio, videtur, quod sicut præsens locus quo dicitur, « scimus quod omnis creatura ingemiscit et parturit usque adhuc », exponitur de prædictis corporibus, ita et superiora ab eo loco quo dictum est, « nam expectatio creaturæ », de eisdem possint exponi : præsertim quia Apostolus, dicendo, « expectatio creaturæ revelationem filiorum Dei expectat, et ipsa creatura liberabitur a servitute corruptionis in liber- B tatem gloriæ filiorum Dei », manifeste videtur distinguere inter creaturam et filios Dei adoptivos.

Erit itaque sensus : « Expectatio creaturæ » tam elementaris quam cœlestis, « revelationem filiorum Dei », hoc est manifestam glorificationem hominum electorum, « expectat », secundum quod ex divina ordinatione inclinatur ad quamdam meliorationem, quam in fine mundi suscipiet, Dei filiis revelatis seu plenarie glorificatis. Non enim innovabuntur corpora C elementaria atque cœlestia, nisi corporibus electorum glorificatis, vel simul cum illis. Merito autem expectat : « vanitati enim », id est transmutationi seu mutabilitati, præfata « creatura subjecta est, non volens », hoc est non ex se ipsa aut propria inclinatione, loquendo de ea prout ordinata est a Deo ad statum perfectum, parificandum statui electorum post finale iudicium, « sed propter eum qui subiecit eam in spe », id est, ex ordinatione divina subjecta est huic vanitati propter hominem, ut ei deserviat. Corpora namque cœlestia propter generationem inferiorum,

potissime hominum, moventur, et in generationibus mixtorum elementa concurrunt. Hæcque subjectio facta est in spe meliorationis præfatae elementorum atque cœlestium corporum, « quia et ipsa creatura » cœlestis ac elementaris « liberabitur a servitute corruptionis », hoc est a statu suæ variabilitatis, et a transmutatione ac motu, quibus corruptibilibus istis deservit.

Non solum autem illa, id est, non tantum omnis creatura præfata ingemiscit et parturit, *sed et nos ipsi* Apostoli, quibus hoc minus convenire videtur, *primitias Spiritus habentes*, id est majora ac abundantiora charismata Spiritus Sancti : quia præ ceteris repleti fuerunt Spiritu Sancto Apostoli. Propter quod ait Hieronymus : Omnibus Prophetis confidenter Apostolos præfero. *Et ipsi intra nos gemimus*, propter miseras vitæ præsentis, et præ desiderio futuræ felicitatis cupientes dissolvi, *adoptionem filiorum Dei expectantes*, id est plenam filiationem adoptionis divinæ, videlicet beatificam Divinitatis fruitionem. Nec solum animæ glorificationem expectamus, sed et *redemptionem corporis nostri*, id est liberationem corporis nostri a mortalitate, pœnis atque miseriis, quibus in vita ista affligitur. Propter quod David ad Deum clamavit : Sitivit in te anima mea ; quam multipliciter tibi caro mea ! Hanc quoque redemptionem expectamus *in Christo Jesu Domino nostro*, quia per meritum suæ passionis tribuetur electis, dicente Apostolo : Salvatorem expectamus *Dominum Jesum Christum*, qui reformabit corpus humilitatis nostræ, configuratum corpori claritatis suæ.

Philipp. i,
23.

Ps. LXII, 2.

Philipp. iii,
20, 21.

SERMO PRIMUS

QUOMODO LIBERALISSIMUS DEUS, ELECTIS SUIS PRO TRIBULATIONIBUS OPERIBUSQUE BONIS
VITÆ PRÆSENTIS, PRÆSTAT IN PATRIA BEATITUDINEM INEFFABILITER MAGNAM.

NON sunt condignæ passiones hujus A
temporis ad futuram gloriam. Rom.
VIII, 18.

Deus naturaliter bonus, et pius ac liberalis, in infinitum ultra condignum electos et justos remunerat, dando eis in cœlis majorem felicitatem quam meruerunt; et citra condignum perversos ac reprobos punit, infligendo eis in inferno minora quam promeruerunt supplicia. Id-

Ps. cxliv, 9.

eo ait Psalmista: Miserationes ejus super omnia opera ejus. Itaque pro tribulationibus atque operibus bonis vitæ præsentis, parvis, paucis ac brevibus, præstat electis beatitudinem ineffabiliter magnam quantum ad præmium essenziale, innumerabiliter multam quantum ad accidentalialia gaudia ac præmia civium supernorum, incomprehensibiliter longam, quia vere æternam. Unde, quantumcumque magnæ, multæ ac longæ videantur tribulationes seu passiones, laboriosæque actiones justorum

Ps. xxxiii, 20.

II Cor. i, 8.

in vita hac (quum scriptum sit: Multæ tribulationes justorum; et item Apostolus: Supra modum, inquit, gravati sumus; atque, ut asserit Augustinus, Immanissima tormenta martyres perpassi sunt), nihilo minus comparatione felicitatis æternæ, nullius momenti sunt. Tanta quippe est dignitas, jucunditas ac plenitudo felicitatis illius, ut quidquid pro ea agatur aut toleretur, pro modico, imo magis pro nullo sit reputandum.

Sed jam id distinctius est probandum. Primo igitur dico, quod supernæ felicitatis summa sit dignitas sive nobilitas. Est enim summi, infiniti atque incommutabilis boni, videlicet Dei altissimi, clarissima intuitio atque perfecta fruitio: ideo est digni-

tatis seu nobilitatis quodammodo infinitæ ratione sui objecti. Nam et secundum philosophos, præstantiorum seu sublimiorum objectorum, hoc est rerum scibilium, scientiæ, sunt nobiliores. Propter quod Aristoteles protestatur, desiderabilius esse modicum quid scire de substantiis separatis, puta intelligentiis, quas angelos appellamus, quam multa de rebus inferioribus. Nonne ergo incomparabiliter desiderabile, dignum et nobile est, ipsum universorum Creatorem ac Deum clare per speciem intueri, et eo ad libitum plenarie frui? Hinc loquitur Augustinus: Tanta est pulchritudo divinæ justitiæ, tanta est jucunditas lucis æternæ, hoc est incommutabilis veritatis et sapientiæ increatæ, ut etiam si non liceret in ejus clara visione ac beatifica fruitione manere magis diu quam uno die, propter hoc solum innumerabiles anni hujus vitæ pleni deliciis et cunctis mundi divitiis atque honoribus, recte ac merito contemnerentur. Quam inestimabilis ergo est miserorum hominum negligentia, cæcitas, imo insania, perversitas, ingratitude: quia quum in sæculo isto nec diem sciant nec horam, certique sint quod incerta ac brevis sit vita ista, et tamen in ea possint beatitudinem promereri æternam, ut non uno dumtaxat die, sed verissime ac securissime absque fine Deum gloriose conspiciant, et eo suavissime perfruantur, attamen negligunt semetipsos, beneficia ac promissa Dei miserabiliter parvi pendunt, terrenis et carnalibus ita se implicant, quod ad tantam beatitudinem non adspirant; nec ea dumtaxat privantur, sed insuper infernalem sibi calamitatem, tanquam revera stolidissimi

Matth.
xxv, 13.

negotiatores, propria iniquitate mercan-
tur. Quibus ex compassione ingenti clamat
Ps. IV, 3. Propheta : Filii hominum, usquequo gravi
corde? Ut quid diligitis vanitatem, et quæ-
Is. XLVI, 8. ritis mendacium? Isaias quoque : Prævari-
catores (inquit), redite ad cor.

Secundo dico, quod cœlestis felicitatis
sit summa ineffabilisque jucunditas, quo-
niam Deus sublimis et benedictus, quem
Beati clare ac fruitive inspiciunt, est pul-
chritudinis penitus infinitæ et suavitatis
prorsus immensæ : imo ipse est bonum
perfectum, in quo omnis perfectio, omnis
nobilitas, omnis potestas, et quidquid ap-
peti potest, cum infinita excellentia, veris-
sime ac simplicissime continetur, inveni-
tur ac cernitur. Si ergo res tanto jucundior
est ad videndum, et tanto suavior ad fru-
endum, quanto pretiosior, melior dulcior-
que consistit in semetipsa, constat quod
prorsus incomparabiliter deliciosum ac
dulce sit Deum clare conspiciere, et ejus
frui bonitate atque dulcedine in proprio
fonte. Hinc de electis loquitur Deo Psalmi-

Ps. XXXV, 9, sta : Inebriabuntur ab ubertate domus tuæ, C
10. et torrente voluptatis tuæ potabis eos : quo-
niam apud te est fons vitæ, et in lumine
tuo videbimus lumen. Siquidem in lumine
gloriæ videbimus lumen æternum, fontale
et increatum, cujus puritas est immensa,
et claritatis, decoris ac deliciositatis ejus
nullus est finis, nulla mensura. Hinc pri-

1 Petr. I, 8, ma Petri habetur : Videntes Deum exsul-
9. tabitis lætitia inenarrabili et glorificata,
reportantes finem fidei vestræ, salutem
animarum vestrarum. Postremo, si dele-
ctabile est videre pulchrum pratum, pul-

chrum hominem, pulchrum exercitum, ac
cetera quæ in creaturis speciosa dicuntur,
quam delectabile est cernere fontem et
causam universi decoris, præ cunctis et
singulis infinite et incomprehensibiliter
pulchrum? Et si tanta in rebus carnalibus
delectatio sita est, quam incomparabilis
delectatio in omnipotentis ac incircum-
scriptibilis Dei clara visione ac plena frui-
1 Cor. II, 9. tione consistit? Ideo dicit Apostolus : Quod
nec oculus vidit, nec auris audivit, nec in

cor hominis ascenderunt quæ Deus præ-
paravit diligentibus se et electis. Idcirco
ait Hieronymus : Nullus labor durus, nul-
lum tempus longum videri potest, quo
gloria æternitatis acquiritur.

Tertio dico, quod æternæ felicitatis sit
maxima plenitudo. Nam quamvis felicitas
illa sit essentialiter aliquid unum ac sim-
plex, videlicet clara et fruitiva visio Dei,
quæ est præmium essentialiale et felicitatis
essentia, nihilo minus huic præmio essen-
tiali tanta accidentalialia gaudia ac præmia,
tot bona, tot divitiæ, deliciæ et honores,
conjuncta sunt, ut nec numerari queant
nec comprehendere : visio scilicet humani-
tatis Christi et Virginis gloriosæ, intuitio
atque societas omnium angelicorum spiri-
tuum et universorum sanctorum Aposto-
lorum, Prophetarum, Patriarcharum, mar-
tyrum, confessorum ac virginum. Sed et
post diem judicii erunt corpora electorum
glorificata, et quatuor dotibus, utpote cla-
ritate, impassibilitate, subtilitate ac agili-
tate, ineffabiliter adornata; et erit in cœ-
lis, ut rationabiliter creditur, laus Dei
vocalis, symphonia inæstimabiliter deli-
ciosa, eritque ibi dulcissimus odor; cor-
pora quoque cœlestia et elementa erunt
mirabiliter clarificata, speciosa, et ad in-
tuendum jucunda. Ex iis ergo et aliis mul-
tis erunt innumerabilia gaudia Beatorum.
Propterea dicit Gregorius : Si consideremus
quæ et quanta sunt quæ nobis promittun-
tur in cœlis, vilescunt animo omnia quæ
habentur in terris. Terrena namque sub-
stantia æternæ felicitati comparata, pon-
dus est, non subsidium; temporalis vita
æternæ vitæ comparata, mors est potius
dicenda quam vita. Quæ enim lingua ex-
plicare, aut quis intellectus capere possit
illa supernæ civitatis quanta sint gaudia,
angelorum choris interesse, cum beatissi-
mis spiritibus gloriæ Conditoris adsistere,
præsentem Dei vultum cernere, incircum-
scriptum lumen videre, nullo mortis me-
tu affici, incorruptionis perpetuæ munere
gloriar?

Itaque, sicut ait Apostolus, « Non sunt

Rom. VIII,

18.

condignæ passiones hujus temporis » ad A
 felicitatem cœlestem. Primo, quoniam pas-
 siones temporis hujus sunt parvæ, gloria
 illa est magna; secundo, quoniam passio-
 nes hujus vitæ sunt breves, beatitudo illa
 est æternalis. Propter hæc duo Apostolus
 11 Cor. iv, 17. dicit : Id quod in præsentī est momenta-
 neum et leve tribulationis nostræ, supra
 modum in sublimitate æternum gloriæ
 pondus operatur in nobis. Tertio, quoniam
 passiones hujus temporis paucæ sunt re-
 spectu gaudiorum cœlestium, juxta illud
 Sap. iii, 5. libri Sapientiæ : Justi in paucis vexati, in B
 multis bene disponentur. Quarto, quoniam
 passiones justorum in hac vita habent
 consolationes spirituales divinas sibi an-
 nexas, dicente Apostolo : Sicut abundant
 11 Cor. i, 5. passiones Christi in nobis, ita per Chri-
 stum abundat consolatio nostra; et iterum,
 Ibid. 3, 4. Benedictus Deus qui consolatur nos in
 omni tribulatione nostra. Itaque futuræ
 felicitatis amore, despiciamus carnalia gau-
 dia, vana solatia, mundanos honores, opes
 Mich. vi, 8; terrenas; et coram Deo in omnibus timo-
 Deut. iv, 9. rati simus, custoditi atque solliciti. Gema-
 mus propter peccata nostra, defleamus
 nos ipsos, et ad supernam beatitudinem
 cordialiter suspiremus; sed et infernalium
 suppliciorum memoria, pavor, acerbitas,
 a nostris cordibus non recedat.

Refert S. Gregorius, quod tempore suo
 fuit in Roma mulier sancta nomine Re-
 dempta, duas habens discipulas : quarum
 una, nomine Romula, fuit mirabiliter vir-
 tuosa, quoniam summæ patientiæ et maxi-
 mæ obedientiæ fuit, valdeque custodita in
 verbis et taciturna, atque orationibus qua- D
 si semper intenta. Sed Deus, qui electos
 suos in vita hac visitat et castigat, præfa-
 tæ Romulæ paralysim misit, ita quod mul-
 tis annis in lectulo jacens, omnium pene
 membrorum fuit officiis destituta. Nec ta-

men unquam ad impatientiam mota fuit;
 sed tanto incessabilius Deum oravit atque
 laudavit, quanto quid aliud ageret in pote-
 state non habuit. Quadam autem nocte spi-
 ritualem matrem suam præfatam vocavit,
 quæ cum alia sua discipula surgens, ad
 lectum jacentis venit. Quumque staret ibi-
 dem cum sua discipula, subito cœlitus lux
 emissa totam cellulam illam implevit, ita
 quod mater illa et ejus discipula adstan-
 tes, inæstimabili concuterentur pavore, et
 obrigescerent corpore. Cœpit namque qua-
 si cujusdam magnæ turbæ ingredientis so-
 nus audiri, ostium cellulæ concuti, ac si
 ingredientibus se premerent; præfatamque
 lucem odor suavissimus est secutus. Mater
 vero prædicta et ejus discipula multitudi-
 nem ingredientium sentiebant, sed præ-
 nimietate timoris ac luminis videre nil
 poterant. Quumque tantam lucem ferre
 non possent, cœpit prædicta Romula ma-
 trem suam consolari, dicendo : Noli time-
 re, mater, non moriar modo. Quumque
 frequenter hoc diceret, cœpit lux emissa
 paulatim recedere; sed odoris suavis ibi
 remansit usque ad quartam noctem, in
 qua Romula matrem suam rursus vocavit,
 et Sacramentum corporis Christi petiit at-
 que accepit. Et ecce repente in platea duo
 chori psallentium supernorumque civium
 adstiterunt, quibus psallentibus et cœle-
 stes exsequias exhibentibus sancta anima
 Romulæ a carne soluta est. Qua ascendente
 cum Sanctis illis in cœlum, quanto chori
 psallentium altius ascendebant, tanto cœ-
 pit levius psalmodia audiri, quousque so-
 nitus psalmodiæ atque odoris suavis per
 elongationem finiebantur.

Ex præclaro ergo exemplo hoc, discamus
 prospera mundi despiciere, adversa æqua-
 nimiter sustinere, et usque ad finem in
 bonis actibus perseverare.

ENARRATIO IN EVANGELIUM

ESTOTE MISERICORDES, SICUT ET PATER VESTER COELESTIS MISERICORS EST. Luc. VI, 36-42.

SALVATOR in evangelio hodierno multa nobis proponit moralia documenta valde salubria. Et primo ad misericordiam nos hortatur, dicendo : *Estote misericordes, sicut et Pater vester coelestis misericors est.* Misericordia proprie virtus est qua quis miseriis aliorum cordialiter compatitur, realiterque succurrit pro posse. Misericordia itaque Deo non competit quantum ad primum istorum, quia compassionis affectus in Divinitatis invariabili impassibilique natura non cadit; nec quantum ad hoc Deus vocatur misericors, quia ut asserit Damascenus, misericors dicitur quasi cor miserum habens, miserum scilicet ratione poenalitatis, quia compassio poena quaedam est. Sed quantum ad secundum, misericordia Deo potissimum convenit, quoniam omnibus indigentibus et miseris ad ipsum clamantibus piissime subvenit, ignoscit, gratiam praestat, bona corporalia spiritualiaque largitur : imo ingratos ac pessimos saepe misericorditer praevenit, tangit, illustrat, convertit et salvat, saepe tam gratiose, quod ubi abundavit delictum, abundat et gratia. Debemus ergo instar Patris coelestis esse misericordes, proximis pie compatiendo, subveniundo, ignoscendo, et opera misericordiae, tam spiritualia quam corporalia, pro viribus liberaliter impendendo, quemadmodum ad Ephesios docet Apostolus : Estote invicem benigni, misericordes, donantes invicem, sicut et Deus in Christo donavit vobis.

Matth. v, 7. Christus quoque : Beati (inquit) misericordes, quoniam ipsi misericordiam consequentur.

Deinde aliud proponit Dominus documentum. *Nolite judicare, et non judicabimini.* Verbum hoc difficultatem sortitur,

propter diversas auctoritates Scripturae, in quarum aliquibus judicare jubemur seu admonemur, ut quum ait Salvator : Nolite *Joann. vii, 24.* secundum faciem judicare, sed justum judicium judicate. Apostolus quoque affirmat : Spiritualis homo judicat omnia; et, *I Cor. ii, 15.* Si nos ipsos judicaremus, non utique judicaremur. Sic et Michæas ait : Indicabo tibi, homo, quid sit bonum, et quid Dominus requirat a te : utique facere judicium, et diligere misericordiam. Atque Psalmista : Judicate egeno et pupillo. Quomodo *Ps. lxxxii, 3.* ergo Christus ait tam absolute, Nolite judicare? Quibus tamen verbis concordat illud Apostoli : Tu quid judicas fratrem *Rom. xiv, 10.* tuum? Omnes enim stabimus ante tribunal Christi; et, Unusquisque pro se rationem reddet Deo : non ergo amplius invicem judicemus.

Pro horum concordantia est sciendum, quia ut Thomas scribit, judicium proprie sumptum, est actus judicis in quantum est judex. Judex vero dicitur, quasi jus dicens. Idecirco judicium est prolatio sententiae secundum regulam juris. Unde judicium est actus justitiae, tanquam virtutis inclinantis ad judicandum idonee; et est actus rationis atque prudentiae, tanquam proferentis ipsum judicium. Judicium itaque in tantum est licitum, in quantum ex justitia et ratione per prudentiam informata procedit. Denique tria requiruntur ad hoc quod judicium de alio per modum sententiae definitivae sit licitum. Primo, ut procedat ex virtute justitiae, non ex impetu passionis, cupiditate seu odio. Qui enim in magnis peccatis sunt, judicare non debent eos qui in eisdem aut minoribus sunt peccatis, secundum Chrysostomum. Secundo, ut procedat ex auctoritate

præsidentis : quia non debet quis mittere A
falcem in messem alienam, id est non ju-
dicare nisi sibi subjectos. Tertio, ut pro-
feratur secundum veram prudentiam. Si
primum horum defuerit, vocatur iudicium
injustum atque perversum ; si secundum,
vocatur usurpatum ; si tertium, vocatur
suspiciosum aut temerarium. Hæc itaque
inordinata iudicia prohibet Christus, quum
ait : « Nolite iudicare ». De manifestis vero,
et quæ bono fieri animo nequeunt, possu-
mus iudicare, quum dicat Salvator : 'Atten-
dite a falsis prophetis ; a fructibus eorum B
cognoscetis eos.

Matth. vii,
15, 16.

Quoniam ergo debiles sumus in ratione,
ita quod facile erramus et fallimur, atque
ad passiones et vitia rectum iudicium per-
vertentia proni sumus, Christus a multis
periculis nos eripit et præservat, dum ju-
dicare nos prohibet. Et iudicium istud in-
ordinatum præcipue periculosum est ac
cavendum imperfectis et passionatis ho-
minibus ; et præsertim providendum est
eis, ne proni sint iudicare eos ad quos mi-
nus afficiuntur, et contra quos cito tentan-
tur, ne passionibus vitiisque cæcati, de
illis iudicent vitiose. Sed se ipsum unus-
quisque discutiat, attendat, dijudicet, incre-
pet et castiget. Hinc ait Cyrillus : Christus
hic sedat et tollit pessimam consuetudi-
nem et pravitatem animarum nostrarum,
principiumque contemptus aliorum. Quum
enim deceat homines circumspicere se-
metipsos, et secundum Deum conversari,
hoc tamen multi non faciunt, sed exami-
nant aliena, et si viderint aliquos infirmari
aut cadere, tanquam propriarum culparum D
obliti, mox detrahunt. Præterea dubia in
partem meliorem sunt interpretanda, non
cum absoluta assertione, sed cum pia con-
fidentia et æstimatione. Iudicium quoque
detestabile est, dum fertur sententia de se-
cretis cordis absque sufficientibus signis ;
item, dum iudicatur de futuro hominis
statu, hoc est, an debeat pœnitere an non :
de hoc namque incerti consistimus, qua-
lis scilicet quisque futurus sit ; et rursus,
dum dubia in partem trahuntur pejorem.

Præterea quæri potest, an ex suspicione
liceat iudicare. Ad hoc Thomas respondet :
Suspicio est opinio mali de alio, ex levi-
bus causis concepta ; et procedere potest
ex tribus. Primo, ex malitia suspicantis,
qui sibi de propria malitia conscius, facile
putat alios sibi similes in peccatis. Secun-
do, ex malo affectu ad alterum : sicut dum
aliquis alium odit aut ei irascitur, facile
suspicitur malum de eo. Tales igitur sus-
piciones sunt perversæ, sicut et causæ
earum. Tertio procedit ex quadam expe-
rientia : unde secundum Philosophum, se-
cundo Rhetoricæ, Senes sunt magis sus-
piciosi, tanquam aliorum defectuositates
magis experti. Et ista suspicio est minus
illicita, quoniam causa ejus est melior,
certitudinique propinquior. Itaque non li-
cet iudicare ex suspicione procedente ex
malitia suspicantis vel ex malo affectu
ejus ad alium, nec ex suspicione proce-
dente ex quadam experientia cum absolu-
ta assertione. Insuper triplex est gradus
suspicionis sive suspiciosi iudicii. Primus,
dum quis ex levibus causis aut signis, C
de bonitate alterius dubitat : quod est
veniale peccatum, pertinens ad tentatio-
nem humanam, sine qua præsens vita non
agitur, et ex humana infirmitate procedit
suspicio ista. Secundus gradus est, quan-
do ex levibus signis firmiter æstimat ali-
um esse perversum : et hoc est mortale
peccatum, et contra caritatem fraternam,
et habet contemptum fratris adjunctum.
Tertius gradus est, quando ex levibus cau-
sis proceditur ad punitionem alterius : et
hoc adhuc gravius est, et contra justitiam.

Id quoque sciendum, quod quamvis du-
bia sint in melius interpretanda, quantum
ad quamdam piam fiduciam, quoniam non
debemus esse proni ad male sentiendum
de alio ; tamen, quando impendendum est
remedium contra peccatum, interpretanda
sunt in partem pejorem, propter securita-
tem, non asserendo quod mala sint, sed de
pejori timendo, et pœnam seu satisfactio-
nem pro eis injungendo, ac si mala essent.
Itaque, « nolite iudicare » iudicio quo-

Joann. v,
24.

cumque inordinato secundum modos præ-
tactos, « et non judicabimini » judicio
reprobationis ac condemnationis, dummo-
do alia quoque servetis præcepta, et usque
in finem perseveretis in bonis. De hoc ju-
dicio loquitur Christus: Qui verbum meum
audit, habet vitam æternam, et in judi-
cium non venit.

Nolite condemnare. Condemnatio ex ju-
dicio oritur, vel illud includit. Ideo, sicut
non quodcumque, sed inordinatum dum-
taxat prohibetur judicium, ita non quæ-
cumque, sed inordinata condemnatio pro-
hibetur, videlicet propter incerta et levia
signa aliquem condemnare, seu etiam non
subjectum, vel affirmare aliquem finaliter
esse damnandum, qui tamen pœnitere quo-
tidie potest. Præsidentes vero et judices
possunt, imo et obligantur impios con-
demnare, quando justitia id requirit. Aper-
te etiam sceleratos, secundum quod tales
sunt, et eos quos in actu vitioso videmus,
damnare et reprobare sub conditione ex-
plicita vel implicita licet, videlicet, nisi
pœnituerint: ut si aliquem videamus adul-
terium aut homicidium scienter commit-
tere, nullum est dubium, quin in peccato
exsistat mortali, damnationeque dignus sit,
et nisi pœnituerit, in æternum damnabi-
tur. *Et non condemnabimini* damnatione
æterna a Deo, dummodo ex caritate Dei
vitetur condemnatio aliorum inordinata, et
perseveretur in bonis, ut tactum est.

Coloss. III,
12, 13.

Ecclesi.
XXVIII, 2.

Dimittite injurias vobis illatas: juxta
illud ad Colossenses, Induite viscera mise-
ricordiæ, supportantes invicem, et donan-
tes vobismetipsis, si quis adversus ali-
quem habet querelam; *et dimittetur vobis*
a Deo, quod eum offendistis peccando, jux-
ta illud Ecclesiastici: Relinque proximo
tuo nocenti tibi; et tunc deprecanti tibi
solventur peccata. Et ecce hæc est infinita
misericordia atque dignatio superexaltati
et incomparabilis Dei, quod vult illi dimit-
tere sua peccata, qui ignoscit peccanti in
se: quum tamen peccatum per compara-
tionem ad Deum habeat enormitatem quo-
dammodo in infinitum majorem, quam

A peccatum commissum in hominem per
comparationem ejus ad hominem tantum,
secundum quod Deus est majestatis, san-
ctitatis, et excellentiæ in infinitum mayo-
ris quam homo. Non ergo simus Deo in-
grati, nec ad ignoscendum graves et tardi.
Potest et ita intelligi: « Dimittite » ea quæ
pauperes vobis debent, vel captos quos ex-
pedit dimitti, vel temporalia bona, secun-
dum quod princeps Apostolorum asseruit,
Ecce nos dimisimus omnia; « et dimitte-
tur vobis » iniquitas vestra. *Marc. x, 28.*

B *Date* consilium aut auxilium indigenti,
et quod rationabiliter postulatur a vobis
non denegetis, sed date ex caritate Dei ac
proximi, secundum veræ discretionis cen-
suram; *et dabitur vobis* a Deo gratia in
præsenti et gloria in futuro, quum Deus
sit omnium bonorum copiosissimus remu-
nerator. *Mensuram bonam, et confertam,*
et coagitatam, et supereffluentem dabunt
in sinum vestrum. Per hanc omnem cir-
cumlocutionem insinuatur, quod ineffabi-
liter copiosa erit retributio operum carita-
tis ac pietatis in cœlo: quæ retributio per
C mensuram exprimitur, quoniam præmium
merito correspondet ac proportionatur,
quemadmodum mensurato mensura; et
item, quoniam Deus secundum sapientiam
suam omnia moderatur, atque in pondere,
Sap. xi, 21. numero ac mensura constituit universa.
Quamvis autem ista retributio seu mensu-
ra effective detur ab uno Deo, Christus
tamen pluraliter loquitur, « dabunt », vi-
delicet pauperes quibus opera pietatis im-
penditis, quia cooperantibus interventione
D illorum ac meritis datur hæc mensura seu
merces. Itaque, « mensuram bonam », id
est legitimam, quia non minus quam ju-
stum est dabunt, « et confertam », id est
plenam, « et coagitatam », ut per com-
pressionem plus capiat, « et supereffluen-
tem », id est tam abundantem et cumula-
tam ut supereffluat undique, « dabunt in
sinum vestrum », id est in gremio cordis,
in fundo mentis, in secretissimo intelle-
ctus ac voluntatis, quia intellectus im-
plebitur ac reficietur beatifica contempla-

tione veritatis divinæ, voluntas quoque A dulcissima fruitione bonitatis altissimæ.

Eadem quippe mensura qua mensi fueritis, remetietur vobis, id est, juxta exigentiam meritorum vestrorum vobis retribuetur; et sicut feceritis proximis vestris, juxta hoc Deus faciet vobis, videlicet prout opera vestra merentur : quoniam præmium correspondet merito, magisque pensatur secundum magnitudinem interioris affectus, quam operis exterioris; prout ait Salvator, quod vidua quæ misit et obtulit duo minuta, plus omnibus misit. Unde B

Marc. xii, 42, 43.

Joann. xiv, 2.

II Cor. ix, 6.

rursus Christus testatur : In domo Patris mei mansiones multæ sunt, id est diversi gradus præmiorum, juxta gradus ac differentias meritorum. Paulus quoque fatetur : Qui parce seminat, parce et metet. Nec his obviat quod pro temporali merito datur merces æterna, et quod Deus electos supra condignum remunerat, reprobos vero citra condignum punit : quoniam ista mensuræ æqualitas, proportio, sive identitas, consideratur in genere : ut qui plus peccavit, plus puniatur; et qui plus promeruit, C copiosius coronetur.

Dicebat autem illis quibus sermonem hunc fecit, præsertim discipulis suis, et similitudinem quæ subditur : Numquid potest cæcus cæcum ducere? Nonne ambo in foveam cadunt? Hoc in corporalibus ita est; nec est similitudo tantum, sed veritas et res. Verumtamen Christus hoc pro similitudine introduxit, quia per hoc aliud designavit, videlicet quod etiam in spiritualibus ita est : utpote quod mente cæcus, id est ignarus, passionatus, negli-

Job xl, 8.

D am infernalem, de qua scriptum est : Facies superborum in foveam demerge. His verbis edocuit Christus, quod rectoribus, et prædicatoribus, ac prælatis necessariae valde sint notitia divinorum, scientia Scripturarum, splendor virtutum, stabilitas mentis, ne facile conturbentur aut passio-

nentur. Ridicula etenim, imo et periculosa res est speculator et ductor cæcus, doctor inscius, præco mutus, præcursor claudus, rector injustus : tales namque se ipsos aliosque præcipitant. Hinc ait Gregorius : Dum pastor per abrupta vitiorum graditur, necesse est ut per præcipitium grex sequatur. Pastor enim se habet in populo sicut oculus in corpore. Propterea apud Jeremiam scriptum est : Quia stulte egerunt pastores et Dominum non exquisierunt, ideo omnis grex eorum dissipatus est.

Jer. x, 21.

Non est discipulus super magistrum. Hoc generaliter ita est, loquendo de magistro discipuloque formaliter : quia discipulus in quantum discipulus, inferior est magistro in quantum magister est; quamvis materialiter discipulus, id est homo qui est discipulus, possit esse magistro suo potentior, altior, sanctior, ingeniosior, imo et doctior. Si vero ad litteram per magistrum intelligatur ipsemet Christus, qui ait, Unus est magister vester Christus : certum est quod hoc magistro nullus discipulorum sit major; sed omnes valde sunt eo inferiores. *Perfectus autem omnis discipulus erit, si sit sicut magister ejus*, id est, si ei assimiletur per imitationem, aut conformetur. Non tamen talis discipulus erit perfectus simpliciter, sed in suo statu, gradu ac ordine. Si autem per magistrum Christus intelligatur, constat quod quanto plus quis hunc magistrum fuerit imitatus, tanto perfectior comprobetur : imo hujus magistri imitatio omnium est D Christianorum perfectio.

Hæc autem locutus est Christus, ut se ipsum discipulis proponeret in exemplum. Tanquam dicat : Quum ego præactas virtutes, præcepta, consiliaque impleverim, adversarios diligendo, inimicis benefaciendo, et cetera jam inducta agendo, decet ut et vos discipuli mei sic faciatis. Hinc alibi loquitur Christus : Exemplum dedi vobis, ut quemadmodum ego feci, ita et vos faciat. Aut certe verba hæc protulit Christus, ad declarandum quod cæcus cæcum non

Matth. xxiii, 10.

Joann. xiii, 15.

valeat ducere, id est prælatus insipiens alios regere : quia prælatus est velut magister subditorum suorum, ideo ipso errante, illi pariter errant, nec perfectiores sunt eo, secundum communem legem formaliterque loquendo. Verumtamen Deus electos suos non deserit, sed informat unctione superna et directione angelica.

Deinceps Christus unumquemque hortatur ad sui ipsius discussionem sollicitam ac diligentem custodiam, atque per aliam similitudinem instruit, cæcum a cæco duci non posse. *Quid autem vides festucam*, id est, parvum et veniale peccatum consideras, *in oculo fratris tui*, id est in proximo tuo, *trabem autem quæ in oculo tuo est*, id est grande et mortale peccatum proprii cordis, *non consideras?* quasi dicat Salvator : Stulte te habes in hoc, et contra caritatis ordinem atque justitiam agis. Hinc alio loco Christus diseruit : *Quid proficit homo si lucretur universum mundum, se autem ipsum perdat?* Caritas quippe incipit a se ipsa, et ordo caritatis ac justitia exigunt ut homo in primis corrigat, purget et curet se ipsum, aliis quoque exemplarem se præ-

beat, sicque idoneus sit eos arguere, ne in ejus negligentia scandalizentur. *Aut quomodo potes dicere fratri tuo*, id est proximo, *Frater, sine*, id est, permitte et patienter sustine, ut *ejiciam festucam de oculo tuo*, id est, parvum peccatum de corde tuo per correptionem et correctionem amoveam, *ipse in oculo tuo trabem non videns*, id est, in proprio corde majus sive mortale peccatum non pensans? Quasi dicat : Istud sapienter et ordinate facere nequis ; sed oportet ut in primis cures animam tuam, juxta illud : *Medice, cura te ipsum*. Unde ad Romanos dicit Apostolus : *Qui alium doces, te ipsum non doces.*

Luc. iv, 23.

Rom. ii, 21.

Hypocrita: quia justum te simulas, alios increpando de parvis culpis, quum tamen sis vitiosus, non emendando te ipsum in magnis peccatis ; *ejice primum trabem de oculo tuo*, hoc est, per contritionem, confessionem et satisfactionem, in primis purga te ipsum a magnis excessibus. Et istud potissimum pertinet ad prælatos, et præsidentes ac judices. *Et tunc perspicies*, id est, mentaliter illuminatus eris et acute videbis, *ut educas festucam de oculo fratris tui*, secundum sensum expressum.

SERMO SECUNDUS

DE MISERICORDIA OPERIBUSQUE MISERICORDIÆ CORPORALIBUS AC SPIRITUALIBUS.

BEATI misericordes, quoniam ipsi misericordiam consequentur. Matth. v, 7.

Quemadmodum Deus a principio mundi condidit hominem ad imaginem et similitudinem suam, ita tam in veteri quam in novo Testamento admonuit ac præcepit ut homines sibi in virtutibus conformentur, atque in quibusdam operibus virtuosos ipsum pro viribus imitentur, ut Creator in sua creatura resplendeat, et creaturæ rationales suo Creatori se proportionabiliter conformantes, fiant ei amabiliore ac

propinquiore, atque per hoc beatitudinem consequantur. Similitudo namque est causa et ratio dilectionis ; dilectio autem unit amantem amato ; in unione quoque cum Deo consistit rationalium creaturarum beatitudo. Hinc per Moysen Deus locutus est : Sancti eritis, quoniam ego sanctus sum. Et iterum Moyses ait : Perfectus et absque macula eris cum Domino Deo tuo (quoniam detestatur Dominus Deus omnem impietatem). Christus quoque in Evangelio : Estote (inquit) perfecti, sicut et Pater

Lev. xi, 44,
45; xix, 2;
xx, 26, etc.
Deut. xxi,
13.

Matth. v,
48.

Luc. vi, 36.

vester cœlestis perfectus est; atque in A evangelio hodierno: Estote misericordes, sicut et Pater vester cœlestis misericors est. Ecce quanta est dignatio summi omnipotentisque Dei ad mortales ac miseros homines, quod non solum dignatur et exhortatur, sed insuper jubet ut ipsi se ei conforment in virtutibus et in factis, ac per hoc ei similes nuncupentur. Certe in sæculo isto nobiles, divites et potentes indignanter accipiunt quod inferiores ac pauperes se eis conformare nitantur, nec æquanimiter ferunt quod eis pauperes ac B subjecti similes asserantur: et tamen Deus superexaltatus, cujus excellentiæ nullus est finis, homines vult, dignatur, hortatur ac præcipit sibi assimilari ac similes nominari. Præterea in isto etiam consideremus quanta sit dignitas hominum proprio conformari Creatori, Deo incircumscriptibili et sublimi.

Quoniam itaque per misericordiam Deo conformari, in evangelio isto præcipimur, dicenda sunt aliqua de misericordia: et primo quid sit; deinde quæ sint misericordiae opera, et qualiter ea facere debeamus. In primis igitur agnoscendum, quod misericordia est virtus per quam unus compatitur calamitati alterius, et ei pro posse succurrit. Ideo asserit Augustinus: Misericordia est animi condolentis affectus cum beneficii additamento, ut compatiatur proximo et largiamur ei de proprio. Insuper quædam sunt opera misericordiae spiritualia, et quædam corporalia: et utraque sunt septem. Opera misericordiae corporalia sunt ista: pascere esurientem, potare D sitientem, vestire nudum, hospitare peregrinum ac inopem, visitare infirmum, redimere captivum, sepelire mortuum. Opera vero misericordiae spiritualia ista sunt: docere ignorantem, consulere dubitanti, consolari tristem, corripere atque corrigere peccantem, ignoscere injurianti, onerosos et graves patienter portare, et pro universis orare. Hæc quoque spiritualia misericordiae opera sunt multo digniora ac sanctiora corporalibus misericordiae operibus:

primo, quia in se ipsis sunt præstantiora tanquam spiritualia bona, quæ corporalibus præeminent; secundo, quia per ea animabus succurritur, quæ corporibus incomparabiliter digniores existunt. Omnia igitur præinducta misericordiae opera, tam spiritualia quam corporalia, debent exsequi Christiani secundum quod possunt, loco et tempore opportuno, dum causa requirit, seu ipsa indigentia proximi exigit.

Et ad hoc multa incitare possunt fideles ac inflammare. Primo, quia per opera B misericordiae Deo præcipue assimilamur. Deo quippe proprium est misereri ac parcere, quum natura ejus sit bonitas, dulcedo et pietas; punire vero et condemnare competit sibi ex demeritis iniquorum. Quum ergo maxima dignitas hominum sit Deo assimilari, debent actibus misericordiae promptissimo corde esse intenti, ut proprio Creatori, Deo altissimo, conformentur. Hinc ait Ambrosius: Nihil ita commendat Christianum, ut miseratio caritatis.

C Secundo, quia per opera misericordiae fit homo præcipue amabilis Deo. Similitudo namque est causa amoris. Quum igitur per actus misericordiae Deo præcipue assimilemur, constat quod etiam per eos Deo præsertim amabiles et cari efficiamur. Si itaque vis a Deo creatore ac salvatore tuo amari, imo et præcipue diligi, esto cordialiter pius et compassivus, liberaliterque succurrens. Nec solum dandus est panis siccus egenti, sed et potus ac vestis atque hospitium, et aliquid quod simul cum pane edatur. Hinc ait de Deo Psalmista: Diligit misericordiam et judi- Ps. xxxii, 5. cium. Salomon quoque in libro Proverbiorum: Misericordia et veritas non te deserant, et invenies gratiam coram Deo et ⁴ hominibus; itemque, Facere misericordiam et iudicium, plus placet Deo, quam victimæ. Ibid. xxi, 3.

Tertio, quia per misericordiae opera consequitur homo a Deo maxima dona gratiæ ac virtutum in vita hac, atque post vitam præsentem, felicitatem et gloriam copio-

sam. Quanto enim quis plus diligit aliquem, tanto libentius ac abundantius præstat et communicat ei bona sua, quum diligere sit alicui bonum velle. Quum ergo jam dictum sit, quod homo per opera misericordiæ Deo præsertim amabilis fiat et carus, certum est quod Deus charismata gratiæ ac virtutum misericordibus cum præcipua liberalitate ac abundantia largiatur, dummodo opera misericordiæ exerceant eo modo quo debent, puta ex vera caritate, cum recta intentione, ad gloriam Dei, juxta mensuram facultatum suarum, **B** animo prompto.

Ps. xl, 2-4.

Hinc ait Propheta : Beatus qui intelligit super egenum et pauperem ; in die mala liberabit eum Dominus. Dominus conservet eum, et vivificet eum, et beatum faciat eum in terra, et non tradat eum in animam inimicorum ejus ; Dominus opem ferat illi super lectum doloris ejus. Ecce quot bona, quot fructus, quot præmia promittit et imprecatur misericordi. Porro ille super egenum et pauperem intelligit, qui ei pro posse caritative celeriterque succurrit. Non enim sufficiunt pulchra verba aut compassio nuda, nisi in iis qui quod largiantur non habent. Hinc etiam ait venerabilis et misericors ille

Tob. iv, 7-9, 12, 11.

Tobias : Noli avertere faciem tuam ab ullo paupere, ita enim fiet ut nec a te avertatur facies Domini. Quomodo poteris, ita esto misericors : si multum tibi fuerit, abundanter tribue ; si parum, etiam parum libenter impertiri stude. Fiducia magna erit apud Deum eleemosyna omnibus facientibus eam ; et non patietur **D** animam ire in tenebras. Hoc est quod in

Luc. vi, 30.

Act. xx, 35.

Evangelio loquitur Christus : Omni petenti te tribue ; et rursus, Beatius est dare quam accipere. Non ergo dandum est un tantum aut paucis, sed omnibus indigentibus, si adsit facultas, secundum exigentiam causæ, et loci ac temporis. Propter quod ait Ambrosius : Præcedentis misericordiæ beneficium perdit, qui putat sufficere quod semel donavit ; ille autem ad Dominum integros misericordiæ fructus

A præmittit, a quo nullus pauper tristis recedit. Unde, secundum Augustinum, si desit corporale bonum quod detur petenti, dandum est verbum bonum, verbum consolatorium ac salubre.

Quarto, quia per misericordiæ opera non solum dimittuntur peccata in vita præsentis, sed et supplicia pro peccatis infligenda dimittuntur, aut totaliter, aut certe pro magna parte, in vita futura. Ait namque ipsemet Christus in Evangelio : Quod superest date eleemosynam, et ecce omnia munda sunt vobis ; Salomon quoque : Per misericordiam et fidem purgantur peccata. Unde rursus ait Scriptura : Abscondite eleemosynam in sinu pauperis, et ipsa orabit pro vobis ad Dominum ; quia sicut aqua exstinguit ignem, ita eleemosyna exstinguit peccata.

Luc. xi, 41.

Prov. xv, 27.

Eccli. xxix, 15 ; iii, 33.

Quinto, ad opera misericordiæ debet inducere magnitudo culpæ ac pænæ immisericordium, puta eorum qui misericordiæ opera non exercent. Ait namque apostolus Jacobus : Judicium sine misericordia fiet

Jacob. ii, 13.

C ei qui non fecerit misericordiam. Deus etenim facit hominibus secundum quod ipsi sibi invicem faciunt, hoc est secundum quod promerentur, mutuo se habendo, quemadmodum apud Matthæum Christus testatur : Qua mensura mensi fueritis, remetietur vobis. Quod et in præsentis evangelio scribitur. Unde in libro Judicium habetur : Sicut feci, ita reddidit mihi Dominus. Qui enim misericordiæ opera non exercet pro posse, multa enormia incurrit peccata, et furibus ac homicidis atque raptoribus assimilatur. Ait enim gloriosus Hieronymus : Non solum decimæ non sunt nostræ, sed ad Ecclesias deputatæ ; sed quidquid amplius quam nobis opus est a Deo accepimus, pauperibus erogare debemus. Si autem quod illis debetur, nostris cupiditatibus, carnalitatibus aut vanitatibus reservamus, quanti pauperes in locis ubi nos sumus, fame et nuditate moriuntur, noverimus nos de illorum animabus rationem in die judicii reddituros. His consonat illud B. Gregorii : Tot pene homines

Matth. vii, 2.

Luc. vi, 38.

Judic. i, 7.

quotidie divites perimunt, quot morientium pauperum subsidia apud se abscondunt. Nam dum quælibet necessaria indigentibus ministramus, sua illis reddimus, non nostra largimur. Ex his innotescit, quam periculosum sit in vestibus, pecuniis ac ciborum generibus abundare, præsertim quum beatissimus Joannes Baptista docuerit : Qui habet duas tunicas, det non habenti; et qui habet escas, similiter faciat. Quidquid igitur Christiano de cibis, poculis, vestimentis, ac similibus rebus superfluit, indigentibus communicare debet ac dare.

Luc. III, 11.

Et ne ista alicui incredibilia nimisque dura ac rigida videantur, audiamus verba præcipuorum Doctorum et Patrum valde sanctorum. Ait equidem magnus ille Basiliius : Si tibi fateris divinitus provenisse temporalia bona, an injustus est Deus, inæqualiter res nobis distribuens ? Cur tu abundas, ille vero mendicat, nisi ut tu bonæ dispensationis merita consequaris, ille autem patientiæ braviis coretur ? Famelici panis est quem tu detines; nudi tunica quam tu in conclavi conservas; discalceati calceus qui apud te marcescit; indigentis argentum quod possides inhumatum aut clausum. Quocirca tot indigentibus injuriaris, quot dare valebas. Insuper his omnino concordat quod beatissimus ait Ambrosius : Numquid iniquus est Deus, ut nobis non æqualiter distribuat vitæ subsidia, ut tu quidem esses affluens et abundans, alii vero egerent ? An ideo magis sic accidit, quia et tibi voluit Deus benignitatis suæ experimenta conferre, et alium per virtutem patientiæ coronare ? Tu ergo, susceptis Dei muneribus, et in sinum tuum redactis, nihil reputas agere te iniquum, si multorum subsidia solus obtineas ? Quis enim tam injustus, tam avarus, quam qui multorum alimenta, suum non usum, sed abundantiam atque de-

Alicias facit ? Neque enim minoris est criminis, habenti tollere, quam quum dare possis et abundas, indigentibus denegare. Esurientium panis est quem tu detines; nudorum vestimentum est quod recludis; miserorum redemptio, pecunia quam in terra defodis aut in scrinio claudis. Tantorum ergo te scias bona invadere, quantis possis dare. — De hac demum materia multa adhuc essent dicenda : quæ ut vite-
tur prolixitas, alteri reserventur sermoni.

Postremo, quantum complacent Deo opera misericordiæ, patet ex exemplo quod narrat Gregorius, dicens : Fuit quidam comes, Theophanius nomine, in disponendis sui comitatus negotiis et sæcularibus rebus quotidie occupatus, et nihilo minus operibus misericordiæ, præsertim hospitalitati, valde intentus. Qui tandem magna infirmitate tactus, et podagram habens, in tantum quod pedes ejus tumore ac sanie torquebantur, ad vitæ terminum venit. Et erat tunc turbulentissima aura et tempestas gravissima. Propter quod uxor ejus vehementissime flevit, dicens : Quid faciam ? Qualiter ad sepulturam te efferram, quæ propter tempestatem hanc, domum egredi nequeo ? Cui respondit maritus : Noli, mulier, flere, quoniam mox ut defunctus fuero, serenitas orietur. Quo dicto, protinus obiit, statimque serenitas est secuta. Quarto autem die suæ sepulturæ, conjux ipsius volens lapidem corpori viri superpositum deponere ac mutare, fecit aperiri sepulcrum. Quo facto, mox suavissimus odor exivit, ac si pro vermibus aromata de corpore defuncti fluxissent; pedes quoque ipsius sani et integri fuerunt inventi. Unde constat quod etiam homines sæculares, et nobiles ac principes, non obstantibus occupationibus suis in exterioribus, possunt actibus insistere virtuosis, et misericordiæ insudare operibus, hospitalitatieque operam dare.

SERMO TERTIUS

DE EADEM MATERIA.

QUI pronus est ad misericordiam, benedicetur. Prov. xxii, 9.

Præter rationes in præcedenti sermone inductas, ex quibus quilibet Christianus potest ac debet ad opera misericordiæ provocari ac inflammari, sunt adhuc aliæ plurimæ rationes ad hoc ipsum agendum idoneæ. Prima, quoniam tanta est virtus misericordiæ, atque tam specialiter complacent piissimo Deo misericordiæ opera, ut non solum in regno cœlesti præmientur ab eo, sed etiam in præsentī. Nec solum per infusionem spiritualium donorum gratiæ ac virtutum, sed et per temporalium bonorum recompensationem remuneratur homo a Deo pro operibus misericordiæ: nam et in temporalibus solet bene succedere his qui misericordiæ operibus digne liberaliterque inhærent. Imo sæpissime contigit temporibus famis, quod Deus miraculose multiplicavit temporalia bona his qui tunc pauperibus liberalissime subvenerunt, sicut de hoc multa verissima leguntur exempla. Hinc ad Timotheum

¹ Tim. iv, 7, 8.

scripsit Apostolus: Exerce te ipsum ad pietatem: nam corporalis exercitatio ad modicum utilis est; pietas autem ad omnia utilis est, promissionem habens vitæ quæ nunc est, et futuræ. Idcirco loquitur aptissime Augustinus: Si vis esse mercator optimus, fœnerator egregius, da quod non potes diu tenere, ut recipias quod nunquam queas amittere; da modicum, ut recipias centuplum; da temporalem possessionem, ut recipias æternam hereditatem. Hoc idem affirmat Gregorius: Quidquid (inquiens) egeno tribuitur, si subtili consideratione pensetur, non est donum, sed mutuum, quia quod datur, multiplicato sine dubio fructu percipitur. Recte

A ergo Salomon dixit: Qui pronus est ad misericordiam, benedicetur, hoc est, donis ^{9.}

seu beneficiis Dei implebitur, ab hominibus quoque laudabitur. Benedictio equidem Dei, est collatio munerum ejus, et multiplicatio eorumdem. Hinc denuo Salomon ait: Benefacit animæ suæ vir misericors. Nam quum alteri benefacit misericorditer succurrendo, sibi ipsi multo melius facit, multiplicem Dei gratiam ac retributionem copiosissimam promerendo, et partim nunc suscipiendo.

^{Ibid. xi, 17.}

B Secunda ratio est ad idem, quia lex Christi est lex totius caritatis et pietatis; et Christus in omni vita sua in terris peracta, summam et maximam caritatem ac misericordiam exhibuit ac impendit hominibus, imo quotidie incessabiliter exhibet. Hinc ad opera caritatis ac pietatis seu misericordiæ Christiani potissime obligantur. Nam et membra suo debent capiti conformari, sicut Joannes apostolus loquitur: Qui se dicit in Christo manere, debet, sicut ille ambulavit, et ipse ambulare. Id- ^{6.}

^{1 Joann. ii,}

C circo fatetur Ambrosius: Omnis summa christianæ religionis, in misericordia et pietate consistit. Augustinus etiam in libro de Nomine christiano disseruit: Ille vere christianus est, qui omnibus misericordiam facit, qui nulla movetur injuria, qui alienum dolorem tanquam proprium sentit, cujus mensam nullus pauper occurrens ignorat, qui miseris auxiliatur, atque ad fletum aliorum fletibus provocatur.

Tertia ratio est, quoniam sine operibus misericordiæ, aliarum actus virtutum Deo non placent. Specialiter quoque opera misericordiæ orationibus ac jeuniis efficaciam præstant. Propterea dicit Leo Papa: Misericordiæ virtus tanta est, ut sine ea

ceteræ si adsint virtutes, prodesse non possint. Quamvis enim fidelis quis sit, et cautus ac sobrius, aliisque moralibus ornatus virtutibus, si misericors tamen non est, misericordiam non meretur. Hinc Tob. xii, 8. biæ angelus Raphael ait : Bona est oratio cum jejuniis et eleemosyna. Unde ait Chrysostomus : Quum venis ad ecclesiam ad orandum, munera tecum porta, da non habentibus, et pete a Deo qui habet, ut oratio tua bonis operibus commendetur. Infirma est enim oratio quæ eleemosynarum largitate non est munita. Iterum ait : Nil plus valet oratio quam eleemosynarum largitas, quoniam frustra, pro peccatis rogaturus, manus ad Deum expandit, qui has ad pauperem non extendit.

Quarta ratio est, quoniam tanta est virtus, dignitas et efficacia operum misericordiæ, quod quamvis in die iudicii de omni opere bono ac malo sit facienda discussio, de solis tamen misericordiæ operibus Christus specialiter explicat peragendum iudicium, et pro illorum adimplerione felicitatem æternam esse retribuendam, et pro illorum omissione infligendam damnationem perpetuam. Hinc universis misericordiæ actibus, tam corporalibus quam spiritualibus, omnis Christifidelis totis viribus semper intentus sit.

Ad quod etiam adhuc aliæ considerationes possunt et debent inducere. Prima est, quia omnes homines in natura conformes sunt, et in specifica unitate naturæ conveniunt. Ideo, sicut valde naturale est consortem naturæ diligere, ita omnino naturale censetur, consorti naturæ, videlicet omni proximo in miseria constituto, condolere ac subvenire. Ideo Isaias ait : Quum videris nudum, operi eum, et carnem tuam ne despexeris. Secunda consideratio est, quoniam omnes ex eisdem primis parentibus sumus. Ideo confratres et proximi sumus, et invicem misericordes esse debemus. Tertia, quia spiritualem confraternitatem simul habemus : quia ex uno patre Deo et una matre Ecclesia sumus renati. Quarta, quoniam omnes Christiani

A ejusdem sunt capitis membra. Ideo, sicut in corpore naturali unum membrum subvenit alteri, ita in populo christiano, qui est mysticum corpus Christi, unus debet alteri cordialiter compati atque succurrere. Quinta est, quia ejusdem Patris cœlestis filii sunt Fideles, et paternaliter ab illo dilecti sunt, juxta illud primæ Joannis : Videte qualem caritatem dedit nobis Deus Pater, ut filii Dei nominemur et simus. Propterea per Malachiam asseritur : Numquid non pater unus omnium nostrum? Numquid non Deus unus creavit nos? Quare ergo despicit unusquisque fratrem suum? Hac consideratione misereri ac subvenire oportet proximis in miseria positis, tanquam Dei filiis adoptivis. Sexta, est intuitio propriæ calamitatis ac indigentiae. Ideo loquitur Augustinus : Nihil ad misericordiam sic inclinatur, quam proprii periculi cogitatio. Unde in Proverbiis scribitur : Homo indigens misericors est. Septima est, quod homines tantam habent liberalitatem ad membra diaboli, hoc est ad homines divites ac nobiles seu potentes, quamvis iniquos, qui importunissime invitantur et delicate reficiuntur; Christus vero in membris suis, puta pauperibus bonis, invenire vix potest unum sustentantem.

Insuper is a quo eleemosyna petitur, debet quinque considerare. Primo, quod Christus petit in membris suis. Ideo pauperes debet attendere quasi Christum, quoniam Christum repræsentant, qui ait apud Matthæum : Quod uni ex minimis meis fecistis, mihi fecistis. Ideo ait Hieronymus : Quoties manum extenderis pauperi, cogita Christum. Augustinus quoque in libro de Doctrina christiana affirmat : Christus petit a te, nec accipit, et offendis crudeliter. Potius dandum est bonis pauperibus, quam lascivis ac impiis filiis. Secundo, quid petit. Nam Christus in paupere petit quod suum est et quod ipsemet dedit, quemadmodum primo Paralipomenon David loquitur Deo : Tua sunt omnia; et quæ de manu tua accepimus, dedimus

Ephes. iv,

15.

I Cor. xii,

12 et seq.

I Joann. iii,

1.

Malach. ii,

10.

Rom. viii,

15.

Prov. xix,

22.

Matth. xxv,

40.

I Par. xxix,

14.

Tob. xii, 8.

Matth. xxv,

34 et seq.

Is. lviii, 7.

Malach. ii,

10.

tibi. Valde ergo ingratus est qui de donis A Dei abundanter habet in mensa sua, nec tamen vult dare parva et pauca Christo in membris suis petenti. Hinc loquitur Augustinus : O homo, dicit tibi Christus, Da mihi de eo quod dedi tibi; de meo quæro, et mihi non donas; da mihi, et reddam tibi; habuisti me largitorem, fac me tibi debitorem. Tertio, ad quid Christus in membris suis petit : quia ad hoc, ut pro parvis et minimis retribuatur magna dona gratiæ in præsentī, et maxima dona gloriæ in futuro. Unde asserit Augustinus : B O miser homo, cur fœneraris proximo tuo? Fœnerare Deo, centuplumque ab eo accipies, et vitam æternam possidebis. Quarto, quod ipsemet quotidie indiget Christum rogare pro gratia in hac vita atque pro gloria in futuro. Idcirco non neget Christo in suis membris quod petit, ne repellatur a Christo, secundum illud Pro-

Prov. xxi,
13.

Ecclesi. iv, 7.

Prov. xiv,
31.

verbiorum : Qui obturat aures suas ad clamorem pauperum, clamabit ipse, et non exaudietur. Quinto, quod nihil habeat a se ipso, et quod ipse quamvis sit ditior C in temporalibus, pauper tamen mendicans ab eo forsitan ditior sit in spiritualibus, hoc est in gratia atque virtutibus, ac magis electus a Deo. Idcirco cum humilitate debet conferre, et se ipso pauperem meliorem ac feliciorem probabiliter reputare. Hinc ait Gregorius : Quisquis super eum cui aliquid donat, elationis se fastu extollit, majorem culpam incidit superbiendo, quam mereatur opem præbendo. Hinc affabiliter habere se debent divites ad mendicos, quemadmodum in Ecclesia-

D stico scriptum est : Congregationi pauperum te affabilem facito. Salomon quoque testatur : Qui calumniatur egentem, exprobrat factori ejus, id est, Deo creatori pauperis facit injuriam, et contumeliam irrogat.

Præterea, quum sit duplex miseria, utpote pœnæ et culpæ, duplex quoque est misericordia : una qua laboramus ut proximus relevetur et emundetur a culpa, orando, hortando, corripiendo, corrigendo,

docendo, consulendo. Et ad istud potissime pertinent spiritualia misericordiæ opera. Alia est misericordia qua satagimus ut proximus a miseriis pœnæ, seu corporalibus vel spiritualibus pœnalitatibus aut indigentiis, relevetur. Et sicut major valde est miseria culpæ quam pœnæ, sic multo benignius est conari ut proximus liberetur a malo culpæ, quam a malo pœnæ.

Postremo, duplex assignatur misericordia : una laudabilis, qua condolemus personæ; altera vituperabilis, qua condolemus et proximi culpæ, eam non corripiendo nec debite corrigendo. Unde Gregorius : Compassio, inquit, debetur homini, et rectitudo vitiis, ut in uno eodemque homine diligamus bonum quod factus est, et persequamur mala quæ fecit. Verumtamen etiam interdum cum discretionē indulgendum est culpæ, sive in parte, sive totaliter, præsertim quando ex ignorantia excusante aut infirmitate processit, et dum peccans pœnitet, veniam poscit, atque ad emendationem se totum exponit, vel dum de graviore ejus ruina timetur, et absque derogatione boni communis correctio ejus potest differri, diminui aut dimitti.

Refert S. Hieronymus primo libro Vitaspatrum de S. Apollonio eremita, quod multorum sanctorum ac devotissimorum pater exstitit monachorum in desertis Ægypti, et multa egit miracula. Quodam autem tempore orta fame in regione Ægypti, habitatores terræ illius sanctitatem B. Apollonii cognoscentes, omnes simul cum uxoribus suis et filiis perrexerunt ad eum, cibum ac benedictionem ab ipso petentes. At ipse nil dubitans, ex his quæ ad usum Fratrum habuit, cœpit omnibus copiose donare. Quumque tres tantum sportæ ciborum superessent, quæ uno die sufficere poterant pro Fratrum refectione, Apollonius in conspectu omnium qui famis necessitate ad ipsum confluerunt, elevatis ad Deum manibus dixit : Nonne omnipotentia Dei potest hæc multiplicare? Hæc

dicit Dominus Deus : Non deficient panes A per quatuor menses continuos erogati sunt in sportis his, donec satiemur omnes de panes ad sufficientiam ex sportis illis; nec frugibus novis. Et factum est ita. Nam aliquid tanto tempore defuit.

SERMO QUARTUS

DE TEMERARIIS VITANDIS JUDICIIS, DE INJURIARUM REMISSIONE, AC DE ORDINATO MODO JUDICANDI ET CORRIPIENDI PROXIMOS.

NOLITE *judicare, et non judicabimini.* Luc. vi, 37.

Christus in evangelio hodierno multa saluberrima nobis proponit documenta. Primo, ut simus misericordes : de quo in duobus præinductis sermonibus dictum est. Secundo, ut non judicemus. In quo verbo prohibuit nobis inordinata, incauta et nimis dura judicia, non autem judicia ordinata, caritativa, prudentialia, temperata, quum alibi dicat Salvator : Si peccaverit in te frater tuus, corripe eum inter te et ipsum solum. Non enim corripimus aliquem, nisi judicemus eum esse culpabilem : ergo correptio judicium includit ac præsupponit. Denique actum evidenter bonum vel malum possumus judicare, non autem personam, actu cessante, cum certitudine absoluta : nam quolibet momento potest peccator veraciter pœnitere et tangi a Spiritu Sancto. Ideo loquitur Augustinus : Quum unusquisque aut vix aut non veram possit de se ipso proferre sententiam, quomodo potest judicare de alio, quum juxta doctrinam Apostoli, quid agatur in homine, nemo sciat, nisi spiritus hominis? Ex his patet, quam imprudenter et intemperate se habeant multi, qui facta aliorum tam proni sunt judicare ac vituperare, et facili occasione de interioribus animæ judicare præsumunt, atque ex quibuslibet factis præteritis adhuc judicant de persona, cum assertionem quod sit talis et talis. Isti sunt homines incircumspecti, malitiosi et fatui, proni ad obloquendum,

B procaces ad irridendum; et dubia paratiores sunt trahere ad partem pejorem quam meliorem, in hoc arbitantes se sapientes et virtuosos, quod alios de insipientia ac vitiis notant, judicant, arguunt et diffamant, quum potius obscuratum sit insipiens cor eorum, atque inaniter ac damnablem complacent sibi metipsis : quoniam proprias defectuositates, præsumptuositates et vitia non perpendunt, æstimantes se aliquid esse, quum nihil sint. *Rom. i, 21. Galat. vi, 3.*

Præterea, præcipuum impedimentum quo plures, non solum sæculares, sed et religiosi, a spirituali profectu, et a virtute ac gratia Spiritus Sancti impediuntur, est quod incaute se habent judicando de aliis. Quanto etenim quis curiosior ac instantior est ad observandum et judicandum facta aliorum, tanto plus impeditur a sui ipsius saluberrima discussione et vera dijudicatione; et tandem sic excæcatur, quod etiam bona aliorum trahit in pejus, ac detrahit aliis, negligens prorsus se ipsum. Ideo Salomon ait : Qui observator est malorum, opprimetur ab eis. Apostolus quoque : Tu quis es, qui judicas alienum servum? Suo domino stat aut cadit. Hinc sancti Patres in eremo singulariter vitabant incauta judicia, nec faciliter aliquem judicaverunt. Unde quicumque cupit Deo placere, in gratia permanere, in virtutibus quoque proficere, quotidie observet, discutiat, judicet et castiget se ipsum, propria peccata intueatur, aggravet, ulciscatur; de aliis bene sentiat, quantum

Cf. p. 207 et s.

Matth. xviii, 15.

1 Cor. ii, 11.

Prov. xi, 27.

Rom. xiv, 4.

possibile est, seque illis reputet viliorē, eo quod propriæ culpæ ac negligentiae sibi certius constant quam culpæ et negligentiae aliorum. Hoc totum docuit Christus *Luc. vi, 37.* brevi verbo quo dixit : « Nolite iudicare ».

Matth. vii, 1, 2. Amplius, ut a temerario iudicio diligentius caveamus, verbo præfacto adjecit : In quo enim iudicio iudicaveritis, iudicabimini. Unde qui durus et asper est iudicando de aliis, id meretur, ut Deus secundum justitiæ suæ rigorem terribiliter iudicet ipsum. Verumtamen humana infirmitas est suspicari malum de aliis, quando aliqua agunt de quibus incertum est an sint bona vel mala. Ideo loquitur Augustinus : Si suspensiones vitare non possumus, quia homines sumus, iudicia tamen, id est definitivas firmasque sententias, vitare debemus. Verumtamen ex præinductis nolo concludere quin prælati et præsides, et omnes animarum curam habentes, debeant subditos suos considerare et facta eorum discutere : sic tamen, ut non negligant semetipsos.

Cf. p. 205 A. Tertio, docet Salvator in evangelio isto, ut neminem condemnemus : quod qualiter intelligi debeat, in expositione textus præhabitu est. Unde quantumcumque quis videatur iniquus, non tamen debemus de ipsius desperare salute, sed potius ferventer et instanter orare pro ipso. Nec ex crudelitate, odio, ira aut impatientia proferenda est contra aliquem, quantumcumque sceleratum, damnationis sententia, sed ex zelo justitiæ, ut conservetur bonum commune, atque ex caritate, ut transgressor in vita hac pro suis puniatur excessibus, ne æternaliter pereat, sed salvetur, quoniam pœnæ vitæ præsentis sunt medicinales. Summe vero cavendum est ne quis innocentem condemnet, et præsertim ne ex cupiditate id agat.

Luc. vi, 27, 28, 35-37. Quarto, docet Salvator in evangelio isto, ut dimittamus et ignoscamus forefactoribus nostris, quatenus Deus nobis ignoscat. Quid enim tam rationabile, quid tam iustum, quam ut proximis suis misericors sit et ignoscens, qui Dei misericordiam

A consequi, æternam damnationem evadere, cœlestem beatitudinem adipisci desiderat? Quo igitur pacto misericordiam Dei implorant homines crudeles, implacabiles, invidiosi, vindicativi? Sed forsitan quis dicet : Magna mihi injuria facta est, pater meus occisus est, bona mea destructa sunt. Ad ista respondeo, quod secundum evangelicam Christi doctrinam, quilibet Christianus tenetur omnem hominem in hoc mundo, quantumcumque inimicum et injuriosum, spirituali amore diligere, et ejus salutem appetere; nec potest se licite propria et privata auctoritate ulcisci, nec ex invidia ad ultionem conari. Hinc semper ignoscendum est proximo quantum ad culpam, sed justa ac debita pœna expeti potest ex caritate et zelo justitiæ, secundum formam et ordinem juris, ab his ad quos pertinet de injuriatoribus iudicare. Interdum vero virtuosius esset etiam pœnam propter Deum dimittere : quando videlicet injuriator de suo dolet excessu, nec amplius tale quid attentare proponit, nec alia rationabilis causa occurrit, propter quam laudabilius sit pœnam ab eo seu satisfactionem requirere, quam totum dimittere. Si enim injuriator ex hoc quod sibi pœna dimittitur, fieret ad male agendum audacior, et bonum commune inde turbationem incurreret, virtuosius esset pœnam exigere ex spirituali amore et zelo justitiæ, propter bonum reipublicæ, imo et propter salutem aut minorem saltem damnationem iniqui.

D Quinto, docet in evangelio isto Christus, ut proni simus ad dandum. Generosi etenim est animi proclivem esse ad dandum, quoniam teste divino Dionysio, Bonum est diffusivum sui ipsius, et amor communicativus est boni quod habet. Dare quoque spectat ad liberalem. Liberalitas vero facit hominem aliis valde acceptum et carum, secundum Philosophum. Porro, tenaces ac cupidi, et semper ad se ipsos reflexi, ignobilem habent mentem. Hinc in Actibus Paulus : Oportet (inquit) *Act. xx, 35.* reminisci verbi Domini Jesu, quia ipse

De Divin.
nom. c. iv.

dixit, Beatius est magis dare quam accipe-
Prov. xxii, 9. re. Hinc in Proverbiis asseritur: Victoriam
 et honorem acquirit, qui tribuit munera;
Eccli. iv, 36. et in Ecclesiastico, Non sit porrecta manus
 tua ad accipiendum, et ad dandum colle-
 cta. Sed jam, proh dolor! pauci sunt, qui
 non sint proniores accipere quam præsta-
Philipp. ii, 21. re: quoniam Paulo testante, Omnes quæ
 sua sunt quærunt. Et in Isaia habetur:
Is. i, 23. Omnes diligunt munera, sequuntur retri-
 butionem. Nihilo minus multi plus abun-
 darent, si proniores essent ad dandum,
 quoniam individuæ sortis sunt dare et
 dari. Nam et Deus misericordibus ac libe-
 ralibus etiam in temporalibus benedicit.
 Estque commune dictum: Qui non dat
 quod amat, non capit quod optat. In Pro-
Prov. iii, 9, 10. verbiis quoque legitur: De primitiis fru-
 gum tuarum da pauperibus, et imple-
 buntur horrea tua satietate. Non tamen
 prodigalitas commendatur, sed ex virtute
 datio ista debet procedere, discretionemque
 regi. Pensare quoque oportet cui sit dan-
 dum, puta egenis et bene utentibus, et
 quibus recta dictat ratio esse dandum.

Sexto, docet in evangelio isto Filius Dei,
 quam gloriosa et supercopiosissima sit bo-
 norum retributio operum in futuro, quum
Luc. vi, 38. ait: Mensuram bonam, et confertam, et
 coagitatam, et supereffluentem dabunt in
 sinum vestrum. Quamvis etenim Deo altis-
 simo serviendum sit principalissime pro-
 pter puram bonitatem, atque immensam
 majestatem et sanctitatem ipsius, nihilo
 minus Christus humanam tarditatem agno-
 scens, præmium pollicetur, ut si tantæ
 perfectionis non sumus ut Deo servire cu-
 remus modo præfato, ex ejus puro et ir-
 reflexo amore, saltem mercedis desiderio
 accendamus. Non tamen opus est meri-
 torium, nisi principaliter ex caritate na-
 scatur.

Septimo, docet quam justa sint Dei ju-
Ibidem. dicia, dicens: Eadem mensura qua mensi
 fueritis, remetietur vobis. Ut ergo gratio-
 sum a Deo obtineamus judicium, simus
 sinceri in omnibus, omnem fraudem, cal-
 liditatem, duplicitatem, simulationem vi-

A tantes, et corde affectuoso atque prom-
 ptissimo obsequentes Domino summo:
 quia ut Salomon protestatur, Qui ambulat
Prov. x, 9. simpliciter, ambulat confidenter. Et prin-
 ceptis Apostolorum hortatur: Deponentes
1 Petr. ii, 1, 2. omnem malitiam, et omnem dolum, et si-
 mulationes, et detractiones, et invidias,
 crescatis in salutem. Josue quoque ait:
 Timete Dominum, et servite ei corde per-
*Josue xxiv, 14.*fecto atque verissimo.

Octavo, docet quales esse debeant aliorum
 prælati, pastores, doctores, prædicatores,
 omnesque rectores ac præsidentes, dicen-
 do: Numquid potest cæcus cæcum ducere? Nonne ambo in foveam cadunt? Itaque
 qui aliis præest aut prædicat, sit mente
 illuminatus, virtuosus ac stabilis, qui ali-
 orum defectuositates æquanimiter valeat
 sustinere, nec ex illorum improbitate pas-
 sionibus conturbetur, iram, indignatio-
 nem, elationem, impatientiam admittendo,
 sed sua bonitate, humilitate, mansuetudi-
 ne, patientia, aliorum malitiam, animosi-
 tatem, iram, impatientiam vincat, sicut ait
 C Apostolus: Noli vinci a malo, sed vince
Rom. xii, 21. in bono malum. Qui autem adhuc peccatis
 et passionibus subjacet, qui ad iram, im-
 patientiam, animositatem, atque similia
 vitia faciliter concitatur, et mente obtene-
 bratur, qualiter alios recte ducet, et a vi-
 tiis passionibusque purgabit? Heu, quanta
 est excæcatio, imo insania plurimorum,
 qui quum defectuositatibus pleni sint, nec
 satis in moralibus eruditi, neque virtuti-
 bus stabiliti, tamen ingerunt semetipsos
 ad regimen animarum, ad aliorum duca-
 tum, ad cordium curationem, quum uti-
 que nil periculosius sit in mundo quam
 curam animarum habere! Sit igitur quilibet
 timoratus; et primo discamus regere
 nosmetipsos, sensualitatem domando, pas-
 siones et vitia superando, virtutibus in-
 hærendo, rectamque rationem semper se-
 quendo.

Postremo, docet Salvator ordinatum mo-
 dum procedendi ad aliorum considerati-
 onem, increpationem et emendationem,
 dicendo: Quid vides festucam in oculo
Luc. vi, 41.

fratris tui, etc.? Circa quod quæri potest, an liceat vitioso prælato, seu prædicatori aut doctori male viventi, prædicare et alios increpare atque corrigere. Et videtur quod non, ex verbis Christi jam tactis. Item Thomas super quartum Sententiarum fatetur, quod is qui non implet quod docet et prædicat, mortaliter peccat. Præterea, Albertus, Thomas, Raimundus, alique doctores, concorditer dicunt, quod sacerdos in omni actu officii sui quem facit indigne, utpote in mortali existens peccato, peccat mortaliter : et hoc ex verbis S. Dionysii evidenter demonstratur. Ambrosiusque : Judicet (inquit) de errore et culpa alterius, qui in se ipso non habet quod judicet, ne quum de alio judicat, in se ipsum ferat sententiam. Et item Chrysostomus : Omnis (ait) sacerdos qui vult docere populum, primo doceat semetipsum : alioqui nec alium reprehendat aut doceat, ut si judicium Dei non evadit, opprobrium hominum non patiatur. Quemadmodum enim medicus ægrotus, argumentum suæ imperitiæ in proprio gestat corpore ; sic C prælatus iniquus se ipsum non curans, suæ stultitiæ indicium secum portat.

His auctoritatibus multi consentientes, affirmant quod si prælati seu prædicatoris aut judicis peccatum sit publicum, et tamen reprehendit aut prædicat seu judicat alium, peccat peccato præsumptionis et scandali ; si vero peccatum ejus occultum sit, peccat peccato præsumptionis, si agit quæ dicta sunt. Aliqui autem dicunt, quod peccator, aut corripit seu corrigit alium ut prælatus, aut ut persona privata. Si ut prælatus, tunc, aut est peccator notorius, aut occultus : si notorius, peccat tam scandalizando quam suum officium indigne exsequendo ; si occultus, tunc peccat indigne officiando. Porro si corrigit ut persona privata, non peccat, nisi forte peccato scandali, si notorius sit peccator ; aliis tamen apparet, quod peccet etiam per præsumptionem. Thomas vero testatur, quod si peccatum prælati aut judicis sit occultum, incumbatque ei ex officio judicare

aut increpare, potest cum timore et humilitate hoc facere, ita ut corde pœniteat et emendationem proponat antequam judicet sive corripiat. Præterea, juxta Theophilum, in præinductis verbis Christi quibus ait, Quid vides festucam, etc.? percutiuntur prælati et præsidentes qui quum subditorum peccata minima puniant, propria impunita relinquunt.

Ut autem unusquisque ordinate se habeat alios corripiendo, ista observet. In primis emendet se ipsum, quia ut Salomon loquitur, Justus prior accusator est sui. Unde qui in eisdem aut majoribus est peccatis, indignus est corripere alium. Secundo, pie et mansuete hoc faciat, nisi forte quis quasi incorrigibilis videretur, aut specialis causa exigeret aliud. Hinc secundum Augustinum, raro et non nisi ex magna necessitate objurgationes sunt faciendæ. Tertio, ex caritate et zelo justitiæ agat hoc, non ex impetu passionis. Quarto, opportunitatem loci temporisque perpendat. Itaque qui alium vult purgare, corripere, judicare, primo perpendat an sit in eadem vel majori culpa, et tunc primo corrigit semetipsum ; si autem non est in eadem aut majori culpa, sed fuit, tunc misericordiam sibi exhibitam exhibeat proximo, et se hominem esse ac ruere posse consideret : sicque custoditus ac humilis sit, nec super alium se extollat, præsertim quia in alio aliqua forsitan bona sunt propter quæ tolerandus est, vel in prædestinatione divina forte est magnus.

Legitur in Vitaspatrum, quod Pater cujusdam cœnobii Fratrum misit ad abbatem Moysen, ut veniret et judicaret quemdam Fratrem culpabilem. Itaque sanctus abbas Moyses tulit sportam magnam vetustam quam implevit arena, et super dorsum suum eam portavit ; aliam quoque parvam sportam cum modica arena ante se bajulavit. Quumque cœnobiū introiret, dixerunt ad eum : Quid est hoc, Pater? Respondit : Ista magna sporta cum sua arena peccata mea sunt, quia multa et magna sunt, et non adspicio ea ; sed

Epist. viii.

B

Prov. xviii, 17.

sporta hæc parva est culpa proximi mei, et posui illam coram me, atque in ea exerceor, et propria peccata non pondero. Quibus auditis, compuncti sunt Fratres, et dimissa est Fratri illi culpabili culpa sua. Nos ergo tam sancti abbatis sequamur doctrinam. Sed multi sunt vani, audaces, in-

custoditi, proni reprehendere alios etiam in minimis, qui si ab alio increpentur, mox indignantur : ideo obtenebrati sunt mente. Quorum errorem, præsumptionem atque superbiam semper vitemus, et increpationes cum gratiarum actione suscipiamus.

AD RELIGIOSOS

SERMO QUINTUS

DE INCOMPARABILI INÆSTIMABILIQUE ELECTORUM BEATITUDINE.

NON sunt condignæ passiones hujus temporis ad futuram gloriam, quæ revelabitur in nobis. Rom. viii, 18.

Hæc est evangelicæ legis doctrina et christianæ sapientiæ fides, quod in visione divinæ essentiæ clara et immediata per speciem, angelorum ac hominum consistat felicitas. Propter quod oravit Prophetæ : Deus virtutum, converte nos, et ostende faciem tuam, et salvi erimus. Et Christus obediens promisit : Manifestabo ei me ipsum. Et rursus ad Patrem : Hæc est (inquit) vita æterna, ut cognoscant te verum Deum. Hanc autem beatificam, præstantissimam ac deliciosissimam Dei visionem putaverunt summi philosophi non solum hominibus, sed angelis quoque impossibilem esse, eo quod Deus sua actualitate, claritate et perfectione immensa, universorum spirituum creatorum naturam et dignitatem in infinitum transcendat, ac prorsus immensæ perfectionis consistat. Propter quod per speciem creatam clare in se ipso non valet videri. Idecirco, secundum approbatos theologos, non nisi per increatam speciem a Beatis conspicitur, ita quod ipsa divina essentia loco intelligibilis speciei unitur mentibus Beatorum, sic quod ipsa est quod videtur, et quo vide-

tur, seu objectum et forma. Sicque quemadmodum Deus se per suam intuetur essentiam, ita Beati ipsum per suam essentiam beatifice contemplantur. Quis ergo nunc capere queat, quanta sit ista Beatorum felicitas, quanta gloria, quanta nobilitas, quanta excellentia, imo et deificatio quam sublimis, taliter Deo uniri, sic eo repleti, atque ad libitum eo plenarie frui; tam clare et immediate infinitam illam, increatam, supersplendidissimam ac superpulcherrimam lucem conspiciere?

Denique Sancti divinam essentiam clare per speciem cognoscendo, clare et immediate ac facialiter vident, noscunt, intelligunt quidquid in Deo est et quidquid est Deus. Ideo splendide, immediate et delectabilissime contemplantur totam superal-tissimam Trinitatem, et omnem ipsius mutuam intuitionem et superardentissimam dilectionem, mutuam complacentiam ac fruitionem, emanationem quoque et communicationem ad intra; conspiciunt qualiter Filius generetur a Patre, et Spiritus Sanctus profluat ab utroque, qualiter ipse Spiritus Sanctus sit Patris et Filii dulcissimus nexus, jucundissimum osculum, æternus complexus. Insuper, quamvis futura gloria illa, quantum ad principale essen-

Ps. lxxix,
4, 8, 20.

Joann. xiv,
21.
Ibid. xvii, 3.

tialeque præmium, sit clara et fruitiva visio Dei, seu fruitio ejus completa, nihilo minus alia bona quamplurima et accidentalia præmia, præclara gloriæ dona et innumerabilia gaudia, essentiali præmio sunt conjuncta, et præsertim post generalem resurrectionem erunt annexa, videlicet : visio humanitatis Christi et Virginis gloriosæ ac omnium Beatorum, et jucundissima eorum societas, quatuor corporis dotes, melodia cœlestis, admiranda suavitas, ac mutua gaudiorum redundantia ab uno in alium. Itaque, quum Deus, qui est beatificæ fruitionis objectum, sit æterna et incommutabilis veritas, infinita ac superpurissima bonitas, incircumscriptibilis pulchritudo, immensa dulcedo, increata et prorsus interminata felicitas, sapientia, opulentia, omnipotentia ac dignitas penitus illimitata, bene et subtiliter asserit S. Thomas, quod beatitudo Sanctorum in patria, quum sit tanti boni immediata visio sive fruitio, sit dignitatis quodammodo infinitæ. Quumque accidens denominet suum subjectum, beatitudo illa civis cœlestes facit quodammodo infinitæ dignitatis ac excellentiæ esse. O quam incomprehensibile bonum est præmium tantum!

Rom. viii,
18.

Certe, sicut Apostolus ait, nequaquam condignæ sunt passionibus, labores, tribulationes, aut meritoriae actiones vitæ præsentis, ad gloriam tantam, ad tam consummatam, securam, æternalem, et contentativam, satiativam seu plene quietativam felicitatem. Imo, ut Augustinus disseruit, tanta est pulchritudo divinæ justitiæ, tanta est jucunditas lucis æternæ, ut quamvis in ejus clara et fruitiva visione non liceret nisi una die manere, propter hoc solum innumerabiles anni hujus vitæ pleni divitiis, deliciis atque honoribus, merito contemnerentur, imo et omnes adversitates æquanimiter sustinerentur. Non sunt ergo condignæ passionibus vitæ præsentis ad gloriam illam, quum passionibus vitæ hujus sint parvæ et breves ac paucæ, gloria vero futura, magna et ineffabilis, imo quodam-

A modo infinita, et vere æterna ac multiplex exstet, et status omnium bonorum aggregatione perfectus. Ideo apte sanctus dixit Gregorius : Si consideremus quæ et quanta nobis promittuntur in cœlis, vilescunt animo omnia quæ habentur in terris. Vere, ut Propheta Apostolusque testantur, Oculus non vidit, nec auris audivit, nec cor hominis cogitavit, quæ Deus suis præparavit electis.

Is. lxiv, 4;
1 Cor. ii, 9.

Si tam desiderabile et jucundum est videre unum civem cœlestem in sua gloria et decore, quale gaudium est totam cœlestis Jerusalem conspiceret societatem, omni serenitate, tranquillitate, exultatione perfusam, impletam et superimpletam, indissolubili ac fervidissima caritate conjunctam, inviolabili securitate munitam? Quod si in contemplatione felicitum creaturarum humanitatisque Christi et Virginis benedictæ tanta consistit lætitia, tanta felicitas in contemplatione et fruitione supergloriosissimi Creatoris, essentialiter ac incircumscriptibiliter boni et pulchri, veri, divitis et perfecti, delectabilis, gratiosi, convenientis, dulcis atque amabilis, qui universis et singulis infinite et prorsus incomparabiliter eminet, melior, amabilior, pulchrior, dulcior convenientiorque consistit; quam incomparabilis et superexuberans consistit beatitudo et gloria? Utique sicut qui nudo corpore in calidissimo fornace jaceret, se ipsum præ tormentorum excessu non caperet, quoniam totus calamitate et pœnis esset repletus, præoccupatus et victus; sic Sancti in patria tam indicibili beatitudine sunt repleti, quod se ipsos præ gaudio et exultatione capere vix videntur. Ideo scriptum est, quod quasi scintillæ in arundinetis discurrent, et quasi vituli de armento tunc salient. Erunt namque in ipsa increatæ beatitudinis immensa plenitudine quasi in pelago quodam profundissimo demersi atque absorpti.

Sap. iii, 7;
Malach. iv,
2.

Nullum itaque tempus appareat nobis longum, nullus labor molestus, nulla tribulatio gravis, quibus tantam adipisci fe-

licitatem valemus. Studeamus semper cor mundum habere et in caritate proficere : *Matth. v. 8.* siquidem beati mundo corde, quoniam ipsi Deum videbunt. Et quo Deum nunc purius ferventiusque diligimus, eo ipsum in æternum clarius jucundiusque videbimus. Nulla ergo passionum caligine, nulla ira, impatientia, cupiditate, injustitia, aversione patiamur mentis nostræ aciem in-

quinari. Et in primis omnem excutiamus ignaviam et torporem, omnem carnalitatem et dissolutionem; omnique diligentia suam quisque custodiat mentem, et fructuose occupet eam, potissimum quum omni hora possimus tantæ beatitudinis promereri augmentum. Faciamus igitur omne opus Dei diligenter, ferventer, gaudenter, ad laudem et gloriam ejus.

SERMO SEXTUS

QUALITER NON DEBEAMUS JUDICARE ; ET DE MULTIPLICI JUDICIO.

NOLITE *judicare, et non judicabimini.* Luc. vi, 37.

I Cor. i, 24. Sciens Filius Dei sapientia Patris æterni pronitatem cordis humani in malum, et debilitatem ac fallibilitatem intellectus nostri, atque deflendam perversitatem ex superbia et curiositate manantem, qua singuli quique, nobis ipsis relictis et neglectis, proclives ac temerarii sumus alios judicare, accusare, contemnere et damnare, saluberrime docuit ac rationabilissime jussit ut neminem judicemus. Quo verbo ab innumerabilibus periculis et peccatis nos præservavit atque retraxit, si tamen obtemperare dignemur, et non, indomitum instar equorum ac furentium canum, recalcitremus ac remordere conemur. Verumtamen verbum hoc Salvatoris difficultatem habet ad intelligendum, præsertim quum alibi dicat Salvator : Nolite secundum faciem judicare, sed justum judicium *Joann. vii, 24.* judicate; et rursus, Si peccaverit in te frater tuus, corripe eum inter te et ipsum solum. Neminem autem corripimus, nisi quem culpabilem judicamus : sicque correptio præsupponit et includit judicium. Denique præsidentes subditos suos judicare tenentur.

Est igitur advertendum, quod judicare tripliciter sumitur. Primo, stricte ac pro-

prie : et sic judicare est per definitivam sententiam ex auctoritate aliquid determinare. Et ita eorum dumtaxat est judicare qui jurisdictionem super aliquem habent, sive in foro exteriori et contentioso, sive in foro interiori et conscientioso. Sicque asserit Thomas in secunda secundæ : Judicare, proprie nominat actum judicis in quantum est judex. Judex vero, ut ait Isidorus, dicitur, quasi *jus dicens*. Unde judicium sic sumptum, pertinet ad prælatos et præsidentes. In foro autem conscientioso spectat etiam ad confessores, quibus incumbit de confitentium judicare peccatis, et pœnam seu satisfactionem pro culpa ex auctoritate quadam imponere. Itaque judicium sic proprie sumptum, in tantum est licitum, in quantum est actus justitiæ. Porro, ad hoc ut sit justitiæ actus, tria sunt requisita : primum, ut ex inclinatione justitiæ, non ex aliqua passione aut prava radice, procedat; secundum, quod ex legitima procedat auctoritate ejus qui judicat; tertium, ut secundum rectam proferatur rationem seu directionem prudentiæ, et secundum regulas juris. Quodcumque autem defuerit horum, erit vitiosum judicium : quia si desit primum, vocatur judicium perversum; si desit secundum, vocatur usurpatum; si tertium,

dicatur temerarium sive suspiciosum, ut A quando de dubiis et occultis quis ex levibus conjecturis et signis judicare præsumit.

Secundo, judicare sumitur communiter et extense : et ita est idem quod aliquid tale aut tale affirmare aut æstimare, videlicet verum aut falsum, bonum aut malum, licitum sive illicitum reputare. Sicque ad quemlibet ratione utentem aliquo pertinet modo, Deo per Jeremiam dicente: *Jer. xv, 19.* Si separaveris pretiosum a vili, quasi os meum eris. Et maxime debet unusquisque actus proprios judicare secundum quod potest, ut de bonis gratias Deo agat, de malis *I Cor. xi, 31.* pœniteat, dicente Apostolo : Si nos ipsos dijudicaremus, non utique judicaremur.

Tertio, judicare sumitur communissime pro quacumque apprehensione, qua aliquid apprehenditur ut est, vel ut conveniens seu nocivum. Et ita judicium ad irrationalia animalia quoque, atque ad quamlibet cognitivam ac appetitivam spectat potentiam. Nam ovis, viso lupo, judicat eum sibi nocivum, et fugit; visaque matre, judicat eam sibi convenientem, et currit ad eam. Juxta hunc sensum, unaquæque potentia cognitiva, secundum philosophos, judicat de suo objecto. Unde in libro Job habetur : Nonne gustus escas dijudicat, et fauces comedentis saporem? *Job xxxiv, 3; xii, 11.*

Itaque, dum in evangelio hodierno loquitur Christus, «Nolite judicare», sumitur judicare secundo modo. Et intelligendum est verbum hoc Salvatoris, non de quocumque judicio, sed de judicio inordinato, utpote de judicio perverso, et usurpato, ac temerario seu suspicioso. Quod ut *Luc. vi, 37.* clarius intelligatur, oportet scire, quod judicii secundo modo accepti diversæ sunt causæ et varii gradus : quia interdum procedit ex evidentia facti, ut si quis videat quempiam furtum aut homicidium perpetrantem; interdum ex evidentibus signis, ut si inveniatur nudus cum nuda in lecto, cum circumstantiis violentam suspicionem causantibus. Sicque malum de proximo judicare, nulla est culpa, et cuilibet licet, ut communiter scribunt doctores.

Verumtamen in his modis duobus, non reor licitum cum æquali certitudine malum de aliquo judicare. In primo etenim modo, cum absoluta certitudine judicare de proximo licet; in secundo autem, generaliter loquendo, non licet hoc, sed cum quadam præcipua probabilitate. Non enim certitudinaliter sequitur, Iste et ista simul in lecto inventi sunt nudi, ergo sunt fornicati : quia staret quod mas sectus esset aut frigidus, aut per impios compulsi essent simul jacere. Legitur quoque de S. Bernardo, quod religionem nondum ingressus, impudica puella se iniecit ac sociavit in lecto; ille vero cum omni modestia in extremam lectuli se collocans partem, mansit castissimus. Insuper, quamvis de nobis ipsis ac aliis, ad tempus scire pro certo possimus nos esse in peccato mortali, non tamen cum absoluta certitudine scire valemus nos ipsos aut alios esse in caritate et gratia, sine revelatione divina. Propterea, quamvis ex evidentia facti, de nobis ac aliis certitudinaliter judicare possimus esse nos in culpa mortali; non tamen sic, quod simus simpliciter boni, videlicet in caritate et gratia constituti, aut quod actio nostra sit meritorie bona, quamvis sit bona ex genere. Nihilo minus possunt in aliquo apparere tot et tanta meritoriæ bonitatis ac sanctitatis indicia, quod cum certitudine multum probabili et valde præcipua liceat judicare eum vere meritorie bonum, seu in caritate existentem et Deo acceptum, quum illa indicia revelationi æquipollere veraciter videantur.

Tertio, judicatur malum de proximo ex levibus causis et signis. In quo judicio triplex est gradus. Primus, dum quis ex levibus causis aut signis, incipit dubitare de proximi bonitate : et hoc veniale exstat peccatum, ex infirmitate humana procedens; nec hoc proprie appellatur judicium, sed magis suspicio. Secundus gradus, dum ex hujusmodi signis firmiter sentit aut asserit de proximo quod sit malus : quod proprie vocatur judicium. Et si

malum quod taliter de proximo judicat, A mortale peccatum sit, tunc taliter judicare est mortale peccatum, quum sit caritati et rectæ rationi contrarium, justitiæ quoque atque prudentiæ derogativum. Tertius gradus, dum ex levibus causis et signis, non dumtaxat taliter judicat, sed etiam ad proximi punitionem procedit, affligendo aut accusando eum assertive, quasi de facto : et hoc prædictis est gravius, quum tam caritati quam justitiæ magis contrarietur. Hæc ergo judicia prohibet Christus, dicendo : « Nolite judicare ».

Porro, si interrogetur, an ex suspici-
bus liceat judicare, respondent Thomas, Durandus, Joannes, et alii, quod suspicio propriissime sumpta, est opinio mali de alio, ex levibus causis et signis concepta. Oriturque talis suspicio ex origine triplici. Primo, ex malitia suspicantis, qui sibi de propria malitia conscius, faciliter judicat alios sibi esse consimiles. Secundo, ex malo affectu ad alium : sicut qui alium odit aut ei irascitur, malum de ipso facile suspicatur. Hujusmodi autem suspiciones quum sint perversæ, sicut earum origines, non licet judicare ex eis. Tertio procedit suspicio ex experientia quadam. Unde juxta Philosophum secundo Rhetoricæ, senes sunt magis suspiciosi, quia ex temporum diuturnitate aliorum defectus magis experti sunt, et verisimiliter eos conjiciunt atque considerant : juxta illud in Ecclesiastico, Vir in multis expertus, cogitabit multa. Estque suspicio ista minus culpabilis, quia plus de certitudine habet, et ex causa meliori procedit.

Quum autem sit triplex suspicio, utpote levis seu temeraria, quæ ex levibus causis procedit et signis ; alia vero sit suspicio probabilis, ut dum multa aut probabilia signa mali apparent ; tertia autem sit suspicio violenta, quæ ex signis valde verisimilibus et quasi cogentibus profluit : præfata suspicionis definitio, de suspicione propriissime sumpta præstat, utpote de suspicione levi ac temeraria. Suspicio autem probabilis, et violenta, quanto plus

de certitudine sortiuntur, tanto minus proprie suspiciones vocantur. Nec ex suspicione probabili licet malum judicare de alio cum assertionem, quia multipliciter falli quis posset ; tamen judicare ex ea est minus culpabile quam ex temeraria suspicione, loquendo in genere. Imo veniale peccatum est, si in suspicione sistatur ; si autem usque ad assertionem de malo alterius procedatur, mortale esse peccatum præsumitur, si malum quod alteri imputatur existat mortale. Ex quibus omnibus

B innotescit, quam periculosum sit inordinate de proximis judicare, potissimum religiosis, quorum est soli Deo et sibi ipsis vacare. Ideo, Climaco protestante, Qui judicat, usurpat sibi quod Dei est, et tanquam blasphemiae reus probatur.

Denique, circa hæc verba Christi, Nolite *Luc. vi, 37.* judicare, ait Cyrillus : Christus Dominus noster sedat et tollit hic pessimam consuetudinem et passionem animarum nostrarum, principiumque contemptus aliorum. Quum enim deceat homines circumspicere semetipsos, atque secundum Deum conversari, hoc tamen multi non faciunt, sed examinant aliena, et si viderint aliquos infirmari aut cadere, tanquam priorum obliti defectuum, detrahunt. Postremo, quum homo omni possit momento a Spiritu Sancto tangi et poenitere, quamvis possimus certitudinaliter judicare aliquem esse in mortali peccato, dum eum in actu hujusmodi vitii videmus intentum, tamen actu cessante, certitudinaliter judicare non possumus eum adhuc in culpa D esse mortali.

Non igitur simus ad judicandum præcipientes et incauti, sed potius juxta Christi doctrinam, simus misericordes et peccantibus condolentes, atque pro ipsis orantes ; et cetera spiritualia misericordiae opera tanto instantius ac copiosius exerceamus, quanto corporalia misericordiae opera minus exercere valemus : quæ tamen pio affectu exercere non desistamus. Et judicet, corripiat ac castiget unusquisque se ipsum, ad laudem et gloriam Omnipotentis.

SERMO SEPTIMUS

QUAM FACIAT SIBI TERRIBILEM JUDICEM DEUM, QUI PRONUS EST CONFRATRIS SUI
 DICTA VEL FACTA TEMERE JUDICARE.

QUID vides festucam in oculo fratris tui, trabem autem quæ in oculo tuo est, non consideras? Luc. vi, 41.

^{1 Cor. i, 24.} Christus sapientia Dei Patris, sciens sibi
^{Joann. v, 22.} omne iudicium a Deo Patre esse collatum,
 et quam periculosum sit nobis iudicare
^{1 Reg. xvi, 7.} de aliis, quorum corda non intuemur, nec
^{1 Cor. ii, 11.} scimus quid agatur in eis, consultissime
 prohibet nobis temeraria et incauta iudicia : quæ sunt religiosis summe vitanda, quia non solum ad meliorem, sed item ad tutiorem viam tenentur, et ad quotidianum obligantur profectum, a quo pronitas ac temeritas iudicandi de aliis, præsertim impediunt hominem. Nihilo minus quidam sunt religiosi, ut sic loquar, irreligiosi, intimatori, incustoditi ac stolidi, circa aliorum defectus et excessus observandos, describendos, dijudicandos, recitandos proni, curiosi, solliciti, se ipsos miserabiliter negligentes, imo fratres ipsis devotiores et spirituales patres suos iudicare temere præsumentes. Quorum unicuique ait Salvator : Quid vides festucam in oculo fratris tui, trabem autem in oculo tuo non vides? Et quomodo potes dicere fratri tuo, Frater, sine ut ejiciam festucam de oculo tuo, ipse in oculo tuo trabem non videns? Hypocrita, ejice primum trabem de oculo tuo, et tunc perspicies ut educaas festucam de oculo fratris tui.

Luc. vi, 41, 42.

Ex quibus æternæ, increatæ ac infinitæ Sapientiæ verbis ostenditur, quod volens corripere, iudicare, corrigere, docere exhortative alium, debet in primis corripere, iudicare, corrigere, exhortari et instruere semetipsum. Qui enim in majoribus

A quod ait Salvator : Medice, cura te ipsum ; ^{Luc. iv, 23.} et Apostolus : Qui alium doces, te ipsum ^{Rom. ii, 21.} non doces. In Ecclesiastico quoque asseritur : Dum maledicit impius diabolum, maledicit ipse animam suam. Et rursus Dominus loquitur : Ex ore tuo te iudico, serve nequam. Hinc super illud Matthæi, Nolite iudicare, scribit Chrysostomus : Non oportet exprobrare delictum, aut eum qui peccato aliquo præventus est, insolenter obruere, nec persequi jurgio, sed monere consilio. Non enim illum, sed temetipsum **B** profecto condemnas, et facis tibi ipsi terribilius esse iudicium, cogisque adversus te diligentissimam etiam de minimis fieri ultionem : ut enim diligentius tua examinentur peccata, legem primus ipse posuisti, severius de his quæ proximus peccaverat iudicando. Sunt autem hæ diabolicæ tentationis insidiæ : nam qui severe discutit aliena, nunquam propriorum reatum merebitur veniam. Et rursus : Si nullum (inquit) aliud haberemus peccatum, pro hoc solo nos gehennæ tradi satis abunde **C** que sufficeret : quippe qui in aliorum delictis severi et amarissimi iudices residemus, nostras autem trabes oculis nostris infixas non cernimus, qui aliena etiam minima tam sollicite perscrutamur, et ad condemnandos ceteros omne vitæ nostræ tempus absumimus.

Eccli. xxi, 30.

Luc. xix, 22.

Matth. vii, 1.

D Præterea, ut sciamus quæ iudicia sint vitanda, quæ amplectenda, oportet advertere quod multiplex est iudicium. Primum est iudicium discretionis, quo inter bonum et malum, inter verum et falsum discernitur, et bonum ac verum eligitur, malum ac falsum abjicitur : de quo in Job

Job xxxiv, 17.

sanari potest? Et istud iudicium debet A
 quilibet circa se et circa subjectos exerce-
 re, si aliquibus præsint. Secundum est ju-
 dicium commendabile, quod vocatur ju-
 dicium propriæ discussionis, quo homo
 post propriæ vitæ diligentem examinatio-
 nem iudicat se talem qualis est : de quo
 I Cor. xi, ait Apostolus, Si nos ipsos dijudicaremus,
 31. non utique iudicaremur. Tertium est iudi-
 cium tolerabile, puta iudicium definiti-
 vum seu assertivum de aliorum inexcusa-
 bilibus malis, quæ bono nequeunt animo
 Matth. vii, fieri : de quibus Salvator, Ex fructibus B
 16. (inquit) eorum cognoscetis eos. Quartum
 est iudicium utile, scilicet iudicium præ-
 sidentis, secundum regulas juris : juxta
 Prov. xxix, quod in Proverbiis habetur, Rex qui in
 14. veritate iudicat pauperes, thronus ejus in
 æternum firmabitur. Quintum est iudi-
 cium inutile, utpote iudicium suspicionis,
 tamen absque pleno consensu rationis :
 Ps. cxviii, de quo orat Psalmista, Aufer opprobrium
 39. meum quod suspicatus sum. Sextum est
 iudicium detestabile. Quod fit quatuor mo-
 dis. Primo, dum fertur sententia de se-
 cretis cordis sine sufficientibus signis :
 quod ad temerarium spectat iudicium,
 quod non procedit ex certa notitia, neque
 ex vera prudentia. Secundo, dum dubia
 trahuntur in partem pejorem. Tertio, dum
 iudicatur de futuro hominis statu, videli-
 cet quod aliquis sit in vitiis suis mansu-
 rus, aut filius perditionis futurus. Quarto,
 dum contra jus assumitur executio judi-
 cialis : contra quod dicit Apostolus, Quid
 I Cor. v, 12. mihi de his quæ foris sunt iudicare?

Insuper, super illud, Nolite iudicare, as- D
 serit Augustinus : Nil aliud nobis hoc loco
 præcipi puto, nisi ut ea de quibus dubium
 est quo animo fiant, in partem meliorem
 interpretemur. Quædam namque et bono
 et malo animo fieri possunt : de quibus
 iudicare temerarium est, maxime ut dam-
 nentur, id est, in pejorem partem trahan-
 tur. Duo autem sunt in quibus temera-
 rium iudicium vitare debemus : videlicet
 dum incertum est quo animo aliquid fa-
 ctum sit, aut incertum est qualis futurus

sit qui nunc bonus aut malus apparet. Non
 ergo reprehendamus ea de quibus nesci-
 mus quo animo facta sint ; nec ita repre-
 hendamus quæ manifesta sunt mala, ut
 ejus qui fecit emendationem desperemus.

Præterea, juxta doctores, quædam sunt
 mala quæ bono animo fieri nequeunt, quo-
 niam in sua ratione deformitatem peccati
 includunt, ut blasphemare, desperare, fu-
 rari, latrocinari : de quibus iudicare per-
 mittitur, quum certum sit quod sint mala.

Alia sunt bona ex genere, quæ tamen male
 fieri possunt, ut dare aliquid mendicanti
 pro laude humana. Tamen quia aliorum
 nos latet intentio, talia sunt iudicanda in
 bono, et probabiliter bona censenda, nisi
 verisimilia ad oppositum apparerent indi-
 cia. Juxta quod in Evangelio loquitur Fi-
 lius Dei : Quum facis eleemosynam, noli

tuba ante te canere, hoc est signa ostenta-
 tionis monstrare. Alia autem sunt bona ex
 sua natura et propria ratione, quæ male
 fieri nequeunt : ut sunt elicitum et imme-
 diati actus virtutum, quibus secundum
 C Augustinum, nullus directe utitur male,
 sicut diligere Deum, atque aliarum virtu-
 tum opera adimplere secundum intentio-
 nem, formam et modum Dei præcipientis,
 puta ex fide et caritate, ad gloriam Dei. Et
 talia sunt absolute bona et laudabilia ju-
 dicanda in generali ; tamen in particulari
 nos latet an actus nostri seu aliorum sint
 tales, absque revelatione divina, quum igno-
 remus an in caritate simus et gratia. Porro
 alia sunt opera indifferentia, utpote nec
 bona nec mala ex genere, ut levare festu-
 cam, fricare barbam. De quibus iudicare
 illicitum est, quum agentis intentionem
 non videamus ; sed interpretanda dicuntur
 in melius, non utique cum assertionem, quia
 hoc esset incautum, quum sit incertum,
 sed cum quadam pia æstimatione et spe,
 qua semper de proximis meliora debemus
 confidere et sentire, nisi evidentia mali
 oppositi appareant signa.

Hinc, ut præclarissimus ille theologus
 et doctor irrefragabilis, Alexander magnus,
 videlicet Alexander de Hales, fatetur, ad

simplices et subjectos etiam monachos A pertinere potest iudicium assertivum de manifestis et inexcusabilibus malis, loquendo de iudicio interioris intelligentiæ et rationis, quod dicitur iudicium adhæ- sionis, quo judicamus aliquem male egisse Deumque offendisse. De his autem de qui- bus multum probabilia malitiæ signa ap- parent, præsertim quæ suspicionem effici- unt violentam, licet eisdem cum condecanti probabilitate absque assertione temeraria judicare. Ex quibus iudiciis procedere po- test et debet proportionata correptio : quia B de manifestis malis, quæ scilicet bene fieri nequeunt, corripiendus est frater cum assertione, quod scilicet sit culpabi- lis ; de probabilibus vero malis corripi- endus est moderatius et cum probabili- tate, nec pia excusatio fratris est repe- lenda.

Deinceps communiter dicitur, quod de manifeste malis judicare permittimur, re- probando factum, non iudicando aut con- demnando personam. Contra quod objici posset, quod factum personam denomi- net : si ergo factum est malum, ergo et faciens. Rursus, quem actu mortaliter pec- cantem conspiciamus, mortaliter vitiosum esse scimus, judicareque possumus. Et respondendum, quod personam judicare seu condemnare licite possumus ex evi- dentia facti, non quidem simpliciter, hoc est pro toto tempore atque finaliter, sed pro tempore certo, videlicet quamdiu in mortalis peccati actu esse conspicitur.

Simus ergo oculati, rigurosi, solliciti, considerando, discutiendo, dijudicando ac castigando proprias culpas ; pii autem cir- ca confratres. Et facillime ex toto corde omni injurianti indulgeamus, quemadmo- dum in evangelio hodierno docet Salvator, dicendo : Dimittite, et dimittetur vobis ; date, et dabitur vobis : eadem quippe mensura qua mensi fueritis, remetietur

A vobis. Quo constat, quod sicut homo se habet circa proximos suos, sic Deus habet se circa illum. Unde qui fratribus suis ca- ritativi, pii liberalesque sunt ex totis præ- cordiis, consilium auxiliumque præstantes secundum vires, et quod effectu non va- lent, agunt affectu, nec amari, acuti duri- que sunt alios iudicando, conquerendo, aut ultionem quærendo, sed gratiam sibi com- municatam in alterutrum administrant : ^{I Petr. iv, 10.} hi specialem et maximam a Deo gratiam adipiscuntur. Judicare autem de aliis, sum- me periculosum est passionatis et amaris hominibus, potissimum de his a quibus offensos se arbitrantur, et circa quos mi- nus bene afficiuntur. Si autem unusquis- que se ipsum rite discutiatur, tot calamita- tes, defectuositates, vitia atque pericula intuebitur in se ipso, quod non occupabit se inordinate cum alio, nec temere iudica- bit de aliquo, nec querulosus erit, neque detractor, neque facile offendetur : imo omni adversitate et confusione se dignum putabit, atque in propria causa patrocinari C studebit.

Postremo, Christus in evangelio isto di- cens, Numquid potest cæcus cæcum ducere? nonne ambo in foveam cadunt? percu- tit et condemnat quorundam infeliciam ambitionem, qui proprias defectuositates non intuentes, quum sint vani, passionati et ad se ipsos vitiose reflexi, ad fratrum suorum ducatum adspirant, officia amant, ad prælationem se ingerunt, etsi non evi- denter, tamen latenter ; et quod homini- bus insinuare verentur ac sciri verecun- dantur, hoc mente coram Deo et Sanctis ejus gerere non formidant. O quam fœda est cordis eorum coram Deo pictura ! Im- perfectum ergo suum intueantur, et quam periculosum sit præsidere advertant ; at- que divini rigorem iudicii pertimescentes, cum timore et tremore suam operentur salutem. Ad laudem, etc. ^{Luc. vi, 39.} ^{Philipp. ii, 12.}

Luc. vi, 37,
38.

DOMINICA V POST TRINITATEM

ENARRATIO IN EPISTOLAM

OMNES UNANIMES IN ORATIONE ESTOTE. I Petr. III, 8-15.

GLORIOSUS apostolici agminis princeps, in præsenti epistola totam vitam Christianorum sapienter ac sufficienter instituit, docet et ordinat. *Omnes unanimes in oratione estote*, id est, unanimiter Deum invocate, et ab ipso concorderiter petite ea quæ pertinent ad salutem. Unanimitas namque præcipue est necessaria jugiterque servanda universis Christicolis, non solum in oratione, sed et in cordium affectionibus, fidei veritatibus, oris confessionibus, Deique laudibus ac virtuosus operibus. Propter quod ad Romanos affectuosissime ait apostolus Paulus : *Deus patientiæ et solatii det vobis id ipsum sapere, secundum Jesum Christum, ut unanimes uno ore honorificetis Deum. Compatientes, ut unus alteri pie et caritative condoleat mente, succurratque opere, sicut ait Salvator : Estote misericordes. Nempe, ut ait Apostolus, sumus invicem membra atque confratres. Compassio quoque alleviat gravamen ejus qui percipit alium sibi compatientem, quemadmodum sustinens grave pondus, sentit relevamen dum alius secum oneri se supponit, prout secundo Rhetoricæ ait Philosophus. Fraternitatis amatores, id est confratrum, seu communionis eorum, optando quod omnes se invicem fraternaliter ac spiritualiter diligant, quia commune bonum potissimum est amandum. Misericordes, tam spiritualia quam corporalia misericordiæ opera pro viribus exercendo. Modesti, id est mo-*

deramen servantes in factis vestris, eo quod virtus consistat in medio. Propter quod ait Apostolus : Modestia vestra nota sit omnibus hominibus. Humiles, propriam parvitatem ac defectuositatem pensando, neque in aliquo vos ipsos inaniter extollendo.

Non reddentes malum pro malo, hoc est pravum opus pro opere pravo, vos ipsos inordinate vindicando (si autem secundum ordinem juris ultio fiat, non redditur malum culpæ pro malo culpæ, sed malum pænæ pro malo culpæ : et hoc malum pænæ est bonum, quum sit opus justitiæ), nec maledictum pro maledicto, id est verbum injuriosum sive convitium pro verbo injurioso sive convitio ; sed econtrario benedicentes maledicentibus vobis, id est bonum pro malo reddentes, quemadmodum loquitur Christus : Diligite inimicos vestros, benedicite maledicentibus vobis. Unde scriptum est : Benedicite persequentibus vos ; benedicite, et nolite maledicere. Quia in hoc vocati estis, hoc est, idcirco ad fidem catholicam vos Deus vocavit seu gratiose perduxit, quatenus jam dicta opere impleatis, benedicendo maledicentibus vobis, etc., ut benedictionem hereditate possideatis, id est, a Deo benedicamini in æternum, nunc percipiendo ab eo charismata gratiarum, atque post vitam hanc dona gloriæ æternalis, sicque in die judicii inveniamini inter eos quibus dicturus est Christus : Venite, benedicti Patris mei ;

Philipp. iv, 5.

Rom. xv, 5, 6.

Luc. vi, 36.

Ephes. iv, 25.

Luc. vi, 27, 28.

Rom. xii, 14.

Matth. xxv, 34.

possidete paratum vobis regnum a constitutione mundi.

Deinceps confirmat ea quæ dixit, auctoritate Psalmistæ. *Qui enim vult vitam diligere*, id est vitam beatam vere efficaciterque appetere, *et videre*, per felicem experientiam, *dies bonos*, id est dies gloriæ cœlestis, in qua nullum est malum. Dies autem vitæ præsentis pleni sunt malis pœnæ et culpæ, id est tribulationibus, miseriis et peccatis. Propter quod loquitur Christus in Matthæo : Sufficit diei malitia sua. Et Paulus hortatur : Redimentes tempus, quoniam dies mali sunt. Quamvis autem in cœlo non sint dies multi per noctium intervalla, sed unus dies continuus ac æternus (juxta illud : Non erit tibi sol amplius ad lucendum per diem, nec splendor lunæ illuminabit te, sed erit tibi Dominus in lucem sempiternam; in Apocalypsi quoque Joannes ait : Civitas non eget sole neque luna, nam claritas Dei illuminabit eam; unde et in Zacharia legitur : Erit dies una quæ nota est Domino, non dies neque nox), tamen dies iste pluraliter designatur, quoniam sua perpetuitate omne tempus includit. Propter quod in Michæa de Christo habetur : Egressus ejus ab initio, a diebus æternitatis. *Coerceat linguam suam a malo*, id est, a verbis illicitis, maledictoriis, murmuratoriis, injuriosis eam refrenet, sicut et Paulus hortatur : Omnis sermo malus ex ore vestro non procedat. Unde et Jacobus ait : Si quis putat se religiosum esse, hoc est devotum et legi seu religioni christianæ subjectum, non refrenans linguam suam, hujus vana est religio, id est falsa et ficta devotio. *Et labia ejus ne loquantur dolum*, id est, labia sua domet, ne verba proferant fraudulenta, verbis adulatoriis maledicenti loquendo quasi ei non indignetur, et tamen occulte insidiando eidem. Propter quod admonet Augustinus : Non aliud pectus tegat, et aliud lingua proferat.

Declinet autem a malo culpæ (juxta illud Ecclesiastici : Quasi a facie colubri fuge peccata), id est, a vitiis se avertat, et

ea detestetur ac odiat; *et faciat bonum*, hoc est, opera virtutum viriliter aggrediat. Hæ enim sunt duæ partes justitiæ. *Inquirat pacem*, id est, quantum potest conetur pacem habere cum proximis, etiam inimicis, occurrendo eis in omni caritate, humilitate et patientia, sicut ait Propheta : Cum his qui oderunt pacem eram pacificus. Unde ad Romanos habetur : Si fieri potest, quod ex vobis est, cum omnibus hominibus pacem habete. Hæc est pax temporalis, quam si cum proximis perversis habere non possumus, tamen pacem pectoris habeamus ad eos, ut mens nostra contra eos non perturbetur, sed semper tranquilla sit, secundum quod fieri potest et decet. Siquidem de perversitate et vitiis impiorum valde pium est contristari. *Et persequatur eam*, hoc est, perfecte et stabiliter eam sequatur, pro ea constanter laborando, atque adeptam indesinenter custodiendo.

Quia oculi Domini super justos, id est, eos qui prædicta perseveranter observant, Deus misericorditer adspicit, fideliter protegit, et æternæ felicitatis retributione remunerat. Ad id quippe oculus magis dirigitur, quod magis diligitur. *Et aures ejus in preces eorum intentæ sunt*, id est, paratus est eos exaudire, secundum quod in Proverbiis fertur : Longe est Dominus ab impiis, et orationes justorum exaudiet. Alibi quoque ait Scriptura : Oratio justi penetrat cœlos. Verum ut ait Salvator, oportet semper orare, et non deficere : quia Deus non semper exaudit æque celeriter, sed nunc citius, nunc tardius, secundum ordinem sapientiæ suæ. Propter quod Jacobus apostolus ait : Multum valet deprecatio justi assidua. Deinceps, oculi et aures in incircumscriptibili ac simplicissimo Deo spiritualiter intelligendæ sunt, atque realiter idem sunt, utpote intellectus, et cognitio ac miseratio ejus; et pluraliter exprimuntur propter diversitatem suorum effectuum, et cognitorum ac auditorum. *Vultus autem Domini*, id est adspectus divini rigoris, est

Ps. xxxiii, 13 et seq.

Matth. vi, 34.
Ephes. v, 16.

Is. lx, 19.

Apoc. xxi, 23.

Zach. xiv, 7.

Mich. v, 2.

Ephes. iv, 29.
Jacob. i, 26.

Ps. cxix, 7.

Rom. xii, 18.

Prov. xv, 29.

Eccli. xxxv, 21.

Luc. xviii, 1.

Jacob. v, 16.

super facientes mala, hoc est inobedientes A
divinis præceptis, ut puniat eos in æternum, nisi vere et condigne pœniteant. Unde
Ps. xxxiii, 17. in illo psalmo adjungitur : Ut perdat de
Ps. xx, 10. terra memoriam eorum. Et rursus idem
ait Propheta : Pones eos ut clibanum ignis
in tempore vultus tui.

Consequenter docet et admonet Archi-
apostolus, ne propter adversa cessemus ab
actibus virtuosis. *Et quis est qui vobis no-
ceat, si boni*, id est virtutis, seu Christi
essentialiter boni secundum quod Deus
est, *æmulatores*, id est amatores et imita-
tores, *fuertis?* Sed quia contra hoc objeci
posset, quod justis ab impiis lædi possunt,
spoliari, diffamari, imo interfici, sicque no-
cumentum eis inferri videtur; ad hoc pro-
tinus S. Petrus respondet : *Sed et si quid
patimini propter justitiam, beati eritis.*
Tanquam dicat : Quamvis iniqui inferant
justis corporalia damna, tribulationes et
vulnera, hæc tamen justis plus prosunt
quam nocent, dummodo ea propter Deum
æquanimiter patiantur : quia per ea cre-
scunt in gratia, remissionem culpæ, libe-
rationem a pœnis futuris, beatitudinisque
præcipuum adipiscuntur augmentum, sic-
ut ait Salvator, *Beati qui persecutionem pa-
tiuntur propter justitiam, quoniam ipso-
rum est regnum cœlorum.*

Denique, ut id clarius intelligatur, scien-
dum quod quædam sunt bona hominis
prima et principalia, quæ ei invito auferri
non valent, et per quæ Deo placet, ac feli-
citati propinquat seu eam meretur. Et ista
sunt bona hominis simpliciter, ut sunt
gratia, virtutes et dona Spiritus Sancti, ac
opera virtuosa : idcirco eorum amissio est
nocumentum hominis, absolute loquendo.
Alia autem sunt bona hominis secundaria
et minus principalia, ut res temporales,
hominis fama, proles, sanitas corporalis-
que vita. Quæ sunt bona hominis secun-
dum quid, et possunt ei invito auferri :
unde eorum amissio non est hominis
nocumentum simpliciter, sed secundum
quid. Imo incomparabiliter plus prodest
eorum ablatio propter justitiam, quando

Dei intuitu et amore patienter suscipitur,
quam prosit eorum possessio. Imo si alicui
propter sua peccata hæc auferantur, et
ipse pro suis peccatis hoc sustineat cum
pœnitentia vera, adhuc prodest ei multi-
pliciter valde. Hinc asserit Christus : *Beati
estis quum maledixerint vobis homines,
et persecuti vos fuerint, et dixerint omne
malum adversum vos, mentientes, propter
me; gaudete in illa hora et exsultate, quo-
niam merces vestra copiosa est in cœlis.*
Unde in collecta legit Ecclesia, *Nulla no-
cebit adversitas, si nulla dominetur ini-
quitas : quia videlicet si patienti adversa
non dominetur proprii cordis impatientia,
ira, invidia, aut alia culpa spontanea, ad-
versitatum illatio sibi non nocet simplici-
ter, sed proficit multipliciter.* De hoc in
sermone plura dicentur. Itaque, si quid
patimini propter justitiam, id est ob hoc
quod justis estis, justequè agitis, seu pro-
pter fidem aliamve virtutem, aut propter
increatam justitiam, quæ Deus est, beati
eritis in æternum in cœlo, et nunc beati
estis in spe et merito.

Timorem autem eorum ne timueritis.
Timor hic capitur pro objecto timoris, vi-
delicet pro malis pœnalibus seu adversis,
quæ solent timeri, et circa quæ timor ser-
vilis versatur; ut sit sensus : « Timorem
eorum », id est adversa quæ iniqui possunt
inferre, « ne timueritis », quemadmodum
docet Salvator : *Nolite timere eos qui cor-
pus occidunt.* *Et non conturbemini* propter
adversa vitæ præsentis, hoc est, pacem
mentis non amittatis, nec frangamini qui-
buscumque adversis, quum Filius Dei te-
stetur : *In patientia vestra possidebitis
animas vestras.* Et si quis non sit ita per-
fectus quin sustineat primos vel etiam
fortes motus timoris atque tristitiæ, non
tamen vincatur ab eis, neque consentiat
tentamentis, sed Christi passionem ac fu-
turam remunerationem intueatur, ac Dei
auxilium invocare non negligat. Ideo sub-
ditur : *Dominum autem Christum sancti-
ficatè*, id est, firmiter conservate, et in
sanctitate ac justitia honorate, ejusque

Ps. xxxiii, 17.

Ps. xx, 10.

Matth. v, 10.

Matth. v, 11, 12.

Ibid. x, 28.

Luc. xxi, 19.

sanctitatem ac majestatem considerate, *in cordibus vestris*, ut nequaquam propter adversa recedatis ab eo, sed contemplatione ipsius omnia invictissime toleretis. Dicimur equidem Deum sanctificare, dum ei in sanctitate et justitia non omittimus ministrare, ita quod quantum in nobis est, per opera virtuosa eum esse sanctum et omni honore dignissimum demonstramus.

I Petr. III, 13. Postremo, circa illud, «quis est qui vobis noceat», etc., agnoscendum quod, Æmulari, sumitur in Scripturis quatuor modis. B

Primo, pro indignari, juxta illud in Ezechiele : Erat statutum idolum zeli, ad provocandum æmulationem. Secundo, pro invidere, secundum illud ad Romanos : Non in æmulatione et contentione. Tertio, pro amare, juxta quam significationem ait Apostolus : Æmulor vos Dei æmulatione. *II Cor. XI, 2.* Quarto, pro imitari, secundum quod in Proverbiis scribitur : Non æmuleris hominem injustum ; atque in Psalmo, Noli æmulari in malignantibus. Tamen in hoc verbo Psalmistæ accipi potest etiam pro indignari et invidere.

SERMO PRIMUS

DE UNANIMITATE, PACE CONCORDIAQUE FRATERNA ; DEQUE VITIOSIS VITANDIS COLLOQUIIS.

PROHIBE linguam tuam a malo. Ps. XXXIII, 14.

Sacratissimus archiapostolus Petrus in presenti epistola saluberrime nos informat in multis. Primo, ut in bonis actibus simus unanimes. Quemadmodum enim caritas Dei et proximi cunctis fidelibus maxime necessaria est, ita et ea quæ directe et proprie ex caritate sequuntur, ut sunt pax atque concordia. Unanimitas autem idem est quod concordia, utpote diversorum animorum in idem consensus : et istud de bona unanimitate et concordia intelligi debet. Est namque et vitiosa concordia, seu unanimitas prava eorum qui D confœderantur in malis. Unde in Actibus Apostolorum habetur, quod Samaritani unanimiter intendebant Simoni mago, postea vero S. Philippo diacono. Itaque, sicut amplectenda est bona concordia nascens ex caritate, qua plures in his quæ sunt divini obsequii et animarum concernunt salutem, concordant (de qua ait Propheta : Deus inhabitare facit unius moris in domo, seu unanimes, secundum aliam translationem); ita concordia mala est fugienda.

Act. VIII, 11.
Ibid. 6, 12.

Ps. LXXVII, 7.

Ideo nulli consentiamus in rebus illicitis, sicut multi, ex carnali amore aut propter temporalia commoda, consentiunt cognatis et caris ac familiaribus seu sociis suis in malis, etiam ad persequendum, nocendum ac detrahendum his a quibus directe læsi non sunt. Contra quod in Ecclesiastico dicitur : Noli pro amico inimicus fieri proximo. Unde et Tullius contestatur : Hoc amicitia vera requirit, ut intuitu amicorum nil turpe, nil agamus illicitum. Itaque qui alium vere sincereque diligit, si viderit eum contra quempiam inordinate moveri seu irrationabiliter concitari, non debet ei protinus consentire, adstare, succurrere, sed increpationem ac informationem impendere, et pie mediando litigantes ad concordiam revocare : quia ut loquitur Christus, Beati pacifici, quoniam filii Dei vocabuntur. *Eccli. VI, 1.* *Matth. V, 9.*

Præterea, quam necessaria sit bona ista concordia omnibus Christianis, constat ex eo quod ad Philippenses tam affectuosissime ait Apostolus : Si qua consolatio in Christo, si quod solatium caritatis, si qua societas spiritus, si qua viscera misericor-

Philipp. II, 1, 2.

diæ, implete gaudium meum, ut idem sapiatis, unanimes, id ipsum sentientes. Idem enim sapere nos oportet in his quæ sunt fidei ac salutis. Propter quod asserit Leo Papa : Gratia Patris cœlestis, non dissimiles, non discordes, sed unum sentientes unumque amantes adoptavit heredes : ad unam reformatos imaginem oportet animum habere conformem.

Insuper, non cum hominibus tantum, sed cum Deo quoque et angelis debemus habere concordiam, juxta illud Job : Acquiesce Deo, et habeto pacem ; et per hoc habebis fructus optimos. Apostolus quoque ad Romanos : Justificati (inquit) ex fide, pacem habeamus ad Deum. Porro concordia vera ad Deum, est tam in adversis quam in prosperis uniri et consentire voluntati divinæ, et gratias ei referre, non murmurare, neque ad iram impatientiamve moveri. Hinc asserit Leo Papa : Quid est pacem habere cum Deo, nisi velle quod jubet, et nolle quod prohibet ? Concordiam autem habere cum angelis, est eorum sanctis inspirationibus consentire ac libenter obedire. Præterea, si desideras scire an veram cum Deo pacem atque concordiam habeas, conscientiam tuam examina ; et si non fueris tibi conscius de aliqua culpa mortali, spera de meliori.

Ad amorem vero et diligentem conservationem concordiae, duo nos debent inducere. Primo, quod ipsa tam singulariter grata ac placita est tam Deo quam hominibus, secundum illud Ecclesiastici : In tribus beneplacitum est spiritui meo, quæ sunt probata coram Deo et hominibus : concordia fratrum, amor proximorum, et vir et mulier bene sibi consentientes. Secundo, quia ut ait Bernardus, Non est in terra expressior similitudo angelicæ conversationis, quam unitas et concordia vitæ socialis. Ideo semper esse debemus solliciti servare unitatem et concordiam spiritus in vinculo pacis, quia concordia est omnium virtutum custoditrix, sicut discordia cunctarum est dissipatrix virtutum, dicente Hieronymo : Sicut per concordiam par-

avæ res crescunt, ita per discordiam res maximæ dilabuntur.

Secundo princeps Apostolorum docet nos in præsentī epistola, ut proximis simus compatientes. Ad quod nos debet movere, primo conformitas naturæ : nam et bruta quamplura ejusdem speciei sibi invicem compatiuntur, ut patet de porcis. Secundo, caritas fraterna, quæ exigit ut sicut de bono proximorum lætamur, ita de eorum adversitate et casu tristemur. Tertio, quia nos ipsi in multis miseriis atque periculis sumus. Quarto, quia per hoc divinæ pietatis miserationem mere-mur. Quinto, quoniam Christus et omnes Sancti valde compassivi fuerunt. Nam et Christus videns civitatem Jerusalem, futuram ejus ruinam deflevit. Et sanctus Job protestatur : Flebam super eo qui afflictus erat, et compatiebatur anima mea pauperi. Paulus quoque ad Corinthios disseruit : Quis infirmatur, et ego non infirmor ? Quis scandalizatur, et ego non uror ?

Deinceps, sicut malum culpæ incompatibiliter pejus est malo pœnæ, videlicet corporali infirmitate temporalique damno, et persecutione humana ; sic multo plus contristari debemus et compati proximis propter eorum peccata, quam propter eorum mala pœnalia. Sed, proh dolor ! pauci sunt tales, sed pene omnes plus pensant ac dolent corporalia incommoda, quam animarum pericula et peccata. Nempe, si viderint proximi domum comburi, condolent et succurrunt ; si autem ipsum proximum viderint igne libidinis æstuarē et fornicari, a risu vix abstinēt. In talibus non sunt christianæ viscera pietatis, nec fulget cordi eorum illuminatio Spiritus Sancti, sed contenebrati sunt oculi eorum interni. Hinc loquitur Augustinus : Pia est ista tristitia et beata compassio, alienis vitiis tribulari, non implicari ; mœrere, non hærere ; dolore contrahi, amore non attrahi. Verumtamen de pravorum justis castigationibus atque tormentis ex zelo justitiæ seu etiam ex spirituali amore lætari, in quantum eis pœnæ salubres sunt, et per

Job xxii, 21.

Rom. v, 1.

Luc. xix, 41.

Job xxx, 25.

II Cor. xi, 29.

Eccli. xxv, 1, 2.

Ephes. iv, 3.

eas bonum conservatur commune, non A sicut coram Deo et hominibus odibilis est *Eccli. x, 7.*
exstat illicitum, sed potius virtuosum.

Tertio docet Archiapostolus, ut simus
I Petr. III, 8. fraternitatis amatores. Idcirco commune
bonum, generalemque omnium mutuam
caritatem ac pacem cordialissime semper
desiderare et amare debemus, atque orando,
loquendo, hortando, reconciliando, ac
pacifice exemplariterque vivendo, conari
ad hoc, ut inter Christifideles sit caritas,
pax et conversatio pia. Unde unusquisque
paterfamilias ita se debet in propria domo
habere, totisque viribus providere, ut in B
domo sua sit pax, nec inter domesticos
suos inveniatur discordia : quod ut facilius
impetret, ipsemet pius et pacificus esse
debet, ac ceteris virtutibus de quibus in
ista epistola mentio fit, adornari.

Ibidem ; Quarto docet, ut simus misericordes, sic-
Luc. vi, 36. ut et Christus in præcedentis dominicæ
evangelio docuit : de quo in sermonibus
præfati evangelii multa sunt dicta.

Quinto docet, ut simus modesti, ut sci-
licet in omni exteriori motu, incessu, ve-
stitu, gestu et verbo medium teneamus C
seu moderamen, levitates, vanitates petu-
lantiasque vitando, quemadmodum Augu-
stinus hortatur : In omnibus motibus ve-
stris nil fiat quod cujusquam offendat
adspectum, sed quod vestram deceat san-
ctitatem. Ambrosius quoque : Est (in-
quit) in ipso motu, incessu et gestu te-
nenda verecundia. Dispositio enim mentis
in corporis apparatu cognoscitur, ita quod
quædam vox animi est corporis motus.
Hinc exterior levitas, vanitas, curiositas
atque loquacitas, interioris levitatis, vani-
tatis, curiositatis et dissolutionis sunt si-
gna. Idcirco in Ecclesiastico scriptum est :
Eccli. XIX, Ex visu cognoscitur vir, et ab occurso
26, 27. faciei cognoscitur sensatus ; amictus cor-
poris, et risus dentium, et ingressus ho-
minis, annuntiant de illo. Ex quibus patet
eorum fatuitas qui de vestium et similium
exteriorum curiositate et pompa reprehensi,
dicere solent : Non est de exterioribus
cura, dummodo interiora sint bona.

Sexto docet, ut humiles simus. Nam

superbia, ita humilitas efficit hominem
Deo hominibusque amabilem. Quid autem
sit humilitas, et de motivis atque effecti-
bus ejus, in diversis sermonibus multa
sunt introducta.

Septimo docet, ut in omni adversitate
simus plenarie patientes. Ideo propter ad- *I Petr. III, 9.*
versa non contristemur, sed considerando
quanta sit eorum utilitas dum æquanimi-
ter tolerantur, gloriemur in eis, Deoque
gratias referamus, quemadmodum in ex-
ordio suæ epistolæ Jacobus exhortatur :
Omne gaudium existimate, quum in varias *Jacob. I, 2.*
tentationes incideritis. Simus itaque sem-
per virtutibus præmuniti ac custoditi, in
tantum ut nullius hominis improbitate,
vituperatione, detractio, seu quacum-
que inordinata locutione, irrisione aut in-
juriatione, provocemur ad impatientiam,
ad inordinatam locutionem, ad opus illi-
citur, ad minorationem caritatis, aut be-
neficiorum subtractionem : quia hoc esset
vinci a malo, et reddere malum pro malo. *Rom. XII,*
Cujus oppositum docuerunt Christus at- *21, 17.*
que Apostoli. Unde et Psalmista fatetur :
Dixi, Custodiam vias meas, ut non delin- *Ps. XXXVIII,*
quam in lingua mea ; posui ori meo custo- *2.*
diam, dum consisteret peccator adversum
me. Hinc et Archiapostolus ad suæ confir-
mationem doctrinæ introducit verba Psal-
mistæ : Quis est homo qui vult vitam,
etc. ? Prohibe linguam tuam a malo, etc. *Ps. XXXIII,*
13, 14.

Vitanda sunt ergo universa colloquia
vitiosa, superflua, verba detractoria, pun-
gitiva, mendosa, fraudulenta, ac jurato-
ria, imo et otiosa, quum Judex summus
testetur : De omni verbo otioso quod lo- *Matth. XII,*
cuti fuerint homines, reddent rationem in *36.*
die judicii. Quod si ita est de verbis otio-
sis, quale fiet judicium de verbis detra-
ctoriis, pungitivis, mendosis, ceterisque
similibus ? Hinc ad vitandum verba illicita
copiosissime nos hortatur Scriptura. Ait
etenim Salomon : In multiloquio non de- *Prov. x, 19.*
erit peccatum ; et iterum, Stultus verba *Eccli. x,*
multiplicat ; itemque, Vidisti hominem ve- *14.*
locem ad loquendum ? Stultitia magis spe- *Prov. XXIX,*
20.

randa est, quam illius correctio. Hinc in A Ecclesiastico multa scribuntur, videlicet :
Eccli. xx, 5. Odibilis est, qui procax est ad loquen-
Ibid. 8. dum ; Qui multis utitur verbis, lædit ani-
Ibid. xix, 7. mam suam ; Ne iteres verbum durum et
 nequam. Simus igitur circumspecti, ma-
 turi ac timorati in verbis.

Postremo in epistola ista hortatur nos
1 Petr. ii, 19 et seq. Archiapostolus, sicut et ante jam fecit, ut
 patientes jugiter existamus, nec adver-
 sarios fidei atque justitiæ vereamur, imo
 pro veritate et æquitate simus parati mo-
 ri, sicque Christum cum sanctitate et de-
 bita reverentia nostris in cordibus vene-
 remur, quemadmodum Salomon loquitur :
Cf. in Prov. vii, 1. Fili, honora Deum, et valebis ; præter eum
 vero ne timueris alienum. Hinc in Isaia
Is. li, 12. habetur : Quis tu ut timeas ab homine
 mortali, et a filio hominis qui quasi fœ-
 num arescit ? Unde iterum ait Scriptura :
Prov. xxix, 25. Qui timet hominem, cito corruet ; item-
Eccli. xxxiv, 16. que, Qui timet Deum, nihil trepidabit.
 Quæ omnia intelligenda sunt, non quod

prælati ac præsidentes non sint ordinate
 filialiterque timendi, in quantum sunt Dei
 vicarii ; sed quod non debeamus homines
 formidare carnali et vili timore, ita ut
 ex eorum timore a Deo et justitia rece-
 damus.

Denique, quam placitum et acceptum
 sit Deo, propter eum ignoscere inimicis,
 patet ex sequenti exemplo. Miles quidam
 regem quemdam occidit. Quadam vero vi-
 ce, filius regis occisi obviavit militi illi.
 Qui videns se non posse evadere, procidit
 ad pedes regis, postulans sibi propter
 Deum ignosci : filius itaque regis mise-
 ricordia motus, ei indulsit. Postea filius
 regis intravit ecclesiam ; quumque ante
 imaginem crucifixi inciperet adorare, ima-
 go illa amplexata est eum, dicens in per-
 sona Christi ad eum : Quoniam hodie fe-
 cisti misericordiam cum occisore patris
 tui, ego quoque tecum misericordiam fa-
 cio, et omnia tua peccata tibi indulgeo,
 nec a meo separaberis regno.

ENARRATIO IN EVANGELIUM

QUUM TURBÆ IRRUERENT IN JESUM, UT AUDIRENT VERBUM DEI, ETC. Luc. v, 1-11.

I N evangelio hodierno describitur, quam C
 ferventer homines ad Christi prædica-
 tionem confluerunt, et quam sapienter
 docuit eos, quam eminenter etiam per mi-
 racula prædicationem suam corroboravit.
 Ait itaque Lucas : *Quum turbæ irruerent
 in Jesum, ut audirent verbum Dei.* Ex
 quibus verbis docemur, quod cum maxi-
 mo impetu ac fervore concurrebant ad
 eum undique etiam multitudines copiosæ,
 ita quod se invicem comprimebant, et
 ipsummet Christum tangebant. Quis enim
 sanæ mentis non affectaret tam pulchrum
 ac dulcem virum adspicere, tam sapien-
 tem et eloquentem audire, tam virtuosum
 et sanctum attingere, tot et tantorum mi-

raculorum operatori approximare ? Unde
 in Revelationibus S. Brigittæ legitur, quod
 beatissima virgo Maria dixit ad Brigittam :
 Tam gratiosus ac dulcis fuit Filii mei ad-
 spectus, tamque speciosus fuit vultus ipsi-
 us, quod quicumque desolati et tristes
 vultum Filii mei adspexerant, mox conso-
 lationem senserunt, ita quod dicere con-
 sueverunt : Eamus ad Filium Mariæ, ut
 ex ejus intuitu consolemur. Nec mirum,
 quoniam ipse est de quo dixit Propheta :
 Speciosus forma præ filiis hominum, dif-
 fusa est gratia in labiis tuis ; propterea
 benedixit te Deus in æternum. Deinceps
 multi Sanctorum tantæ leguntur sancti-
 tatis et gratiæ fuisse, quod quasi ange-

Luc. viii, 45.

Ps. xliv, 3.

Coloss. II,
9.

licum vultum habebant, resplendentibus A in eorum facie mirabili serenitate atque fulgore : quanto magis id de Christo credendum, in quo omnis plenitudo Divinitatis corporaliter habitavit, non solum per gratiam sicut in ceteris Sanctis, sed et per hypostaticam unionem ac beatificam fruitionem?

Joann. I, 1.

Præterea, qualiter propter plures ac varias causas turbæ confluerunt ad Christum, interdum præhabitum est. Hic tamen ad eum concurrisse scribuntur, « ut verbum Dei », hoc est prædicationem Christi, « audirent »; vel, « Verbum Dei », id est ipsummet Christum loquentem, qui est æternum increatumque Verbum Patris altissimi, juxta illud Joannis : In principio erat Verbum, etc.

Ibid. VI, 1.

Matth. IV,
18; Marc. I,
16.

Et ipse stabat secus stagnum Genesareth : quod alio nomine vocabatur mare Galilææ, quia in illa fuit provincia; et mare Tiberiadis, a civitate Tiberiade sibi vicina. *Et vidit duas naves stantes secus stagnum*, hoc est prope littus stagni præfati. *Piscatores autem*, videlicet Petrus, Joannes et Jacobus, *descenderant*, id est, naves suas egressi, aquam circa littus intraverant, *et lavabant retia sua*, ut purgata convolverent, quia nil ceperant, et volebant ad tempus a piscatione cessare. *Ascendens autem Jesus in unam navim, quæ erat Simonis*, scilicet Petri, et fratris ejus Andreæ, ut aliqui dicunt : quia Matthæus et Marcus dicunt, quod Jesus invenit Petrum et Andream simul piscantes; *rogavit eum a terra reducere pusillum*, id est navim ad modicum spatium a terra in aquam dirigere, ut competenter distaret a ripa, quatenus ab omnibus melius posset audiri. Ideo quippe navim intravit, quia turbæ cœperunt eum comprimere, atque in terra cum eis stans, non poterat tam convenienter a cunctis audiri ac adspici sicut in navi stans, ubi nemini dorsum vertit in faciem, sed in omnium stetit adspectu : nam turbæ stabant circa littus.

Porro, in hoc ostenditur summa Christi

humilitas, dignatio, mansuetudo et pietas, quod Petrum pro tam parva re, tam modestè rogavit, cui præcipere potuit : docens prælatos, ut proniores sint pie humiliterque hortari quam districte præcipere, magisque cupiant diligere quam timeri. Sed econtrario agunt indiscreti, qui ad præcipiendum proclives sunt, gladium sine causa idonea extrahentes, atque per hoc se ipsos ac subditos periculis exponentes : quibus per Ezechielem impropèrat Deus, Cum austeritate imperabatis ovibus meis et cum potentia.

Ezech.
XXXIV, 4.

Et sedens in navi, docebat de navicula turbas. Navim nunc vocat naviculam, quoniam parva erat, et navigium egenorum. Sed quid prædicavit nunc Christus, Evangelista non exprimit, sicut nec omnia ejus miracula aliquis Evangelistarum in particulari prosequitur, imo nec omnes simul. Tanta vero de ejus documentis atque miraculis conscripserunt, quantum ad ædificationem Ecclesiæ, ad fidei confirmationem, ad salutem fidelium sufficere noverant, inspirante ac moderante Spiritu Sancto. Recte quoque asseritur, quod sedens docebat, quoniam sedere doctorum ac judicum est.

Ut cessavit autem loqui, hoc est prædicatione finita, *dixit ad Simonem Petrum*, volens eum remunerare pro obsequio prænarrato, imo præinductam prædicationem volens per miraculum confirmare et audientium cordi imprimere, specialiter quoque Petrum ejusque socios ad suam agnitionem, amorem ac venerationem inducere : *Duc in altum*, hoc est, navim a littore amplius amove ad loca ubi aqua profundior est. Vel ideo dicit, « in altum », quoniam aqua plus distans a littore altior est quam quæ ripæ propinquior est, prout in libro de Sphæra probatur. *Et laxate retia vestra in capturam*, hoc est, ad capiendum pisces ea extendite. Dixit autem Christus singulariter Petro, « duc in altum », quoniam hoc ab eo solo fieri potuit; pluraliterque adjunxit, « laxate », quia a pluribus id aptius fieri quivit. —

Porro mystice per Petrum designantur perfectiores, ad quos præcipue pertinet in altum ducere, id est profunda scrutari mysteria, et difficiliora cognoscere, atque de talibus inferiores instruere, ut in libro de Ecclesiastica hierarchia divinus Dionysius scripsit. Per adjutores vero Petri signantur inferiores, ad quos pertinet retia laxare, hoc est verba ordinate connexa ad aliorum conversionem exprimere.

De Eccl.
hier. c. v.

Et respondens Simon, dixit illi : Præceptor, id est tu, Jesu, qui tantæ es auctoritatis ut rite voceris Præceptor, cui et protinus obedire condignum est, per totam noctem laborantes ad capiendum pisces, nihil, hoc est nullum piscem, cepimus. Quod quamvis naturaliter accidere potuerat, sicut quotidie accidit, divina tamen dispensatione tunc sic evenisse opinor, ut Christi potestas in sequenti miraculo clarius reluceret, atque per hoc alii plus roborarentur in fide, Deumque amplius glorificarent. *In verbo autem tuo, hoc est propter hanc tuam locutionem, et ex spe capiendi pisces merito obeditionis, qua tuis verbis jam obediemus, laxabo rete ad piscandum cum meorum adjutorio sociorum.* Et in hoc promptitudo obediendi S. Petri commendatur, quia secundum naturam videbatur tunc infructuosum laxare retia, quum naturaliter non apparet spes capiendi pisces.

Et quum hoc fecissent, concluserunt Simon Petrus ac socii ejus, piscium multitudinem copiosam. In quo docemur, quam fructuosum sit obedire. Denique, juxta intelligentiam spiritualem, quemadmodum Petrus Christo jubente laxavit retia ad piscandum, quamvis ante tanto tempore et conatu nihil cepisset; ita prælati, et doctores ac prædicatores, juxta sacræ Scripturæ præceptum seu exhortationem extendere debent spirituale rete, id est coordinata seu apte connexa et condependentia documenta, ad aliorum conversionem, instructionem, profectum, cum fiducia subventionis divinæ; sicque vicissim Domino auxiliante multum proficient, in quibus

ante nil profecerunt. Propterea Timotheo scripsit Apostolus : *Insta opportune, importune. Rumpebatur autem rete eorum,* hoc est, partim rumpi cœpit. Non tamen aliquis excidit piscis : quod etiam miraculum fuit. II Tim. iv, 2.

Et annuerunt sociis qui erant in alia navi, videlicet Jacobo et Joanni, ut venirent ad eos navigio, et adjuvarent eos. Annuerunt autem, id est, nutu seu signo, non verbis, insinuaverunt, quia præ admirationis magnitudine loqui vix poterant, et præ reverentia Christi vix loqui audebant. Sic et spirituales piscatores, videlicet prælati et prædicatores, quum se viderint non posse ad portum salutis universos perducere, quos de sæculo isto velut ex procellosissimo mari aliququaliter abstraxerunt, atque ad pœnitentiam induxerunt, alios viros idoneos debent in adjutores quærere, invitare, assumere, ut conversos ac pœnitentes custodiant, dirigant, accendant, et ad finem beatum perducant. Sed quidam superbi et præsumptuosi sunt nimis, qui de propriis viribus ac virtutibus fatue confidentes, aliorum auxilium sibi necessarium non arbitrantur, quum tamen se ipsos regere insufficientes probentur.

Et venerunt ex alia navi, et impleverunt omnes simul ambas naviculas, ita ut pene mergerentur. Quo patet, quod maxima piscium multitudo exstitit capta. Ita et spiritualiter, pluribus verbum Dei digne ac efficaciter prædicantibus, plurimi convertuntur. Porro, per naviculas designantur particulares Ecclesiæ seu congregationes devotæ, quæ pene merguntur, dum multi recenter conversi in eis sunt, in quibus vitiorum reliquiæ et pronitates ad vitia manent : in quibus tam ipsi quam alii sæpe periclitantur, dum alii nondum ita perfecti sunt ut illorum imbecillitates valeant æquanimiter tolerare.

Quod quum videret Simon Petrus, procidit ad genua Jesu, dicens. Honor enim virtuoso debetur atque prælatis : ideo sicut Petrus credidit Jesum esse maximæ sanctitatis et auctoritatis, ita et magnam

Joann. 1,
41, 42.

Matth. viii,
8.

ei reverentiam exhibebat. Nempe et ante miraculum istud credidit Jesum esse Christum, quando videlicet Andreas frater ejus dixit ad eum, Invenimus Messiam qui dicitur Christus, et duxit eum ad Jesum, ut Joannes ait : unde viso miraculo isto, aucta fuit in eo hæc fides. *Exi a me, quia homo peccator sum, Domine, hoc est, tibi tam potenti, magno et sancto ego tam vilis et fragilis adsistere sum indignus. Itaque ex magnitudine miraculosi effectus, majestatem causæ, videlicet excellentiam Christi, pensavit; et quia opposita juxta se posita clarius innotescunt, quo Petrus Christi virtutem excellentiamque magis consideravit, eo propriam parvitatem ac fragilitatem evidentius intellexit, humiliorque expressit. Unde Christum a se exire rogavit, non nisi ex profundissima humilitate; spiritualement vero ejus præsentiam et gratiosam adsistentiam valde optavit. Et centurioni similis fuit dicenti : Domine, non sum dignus ut intres sub tectum meum, etc. Similis quoque fuit sponso Virginis gloriosæ, qui voluit eam ex simili causa relinquere, tanquam cohabitatione illius indignus, secundum quosdam Sanctorum. De spirituali vero et gratiosa præsentia semper optanda dicit Gregorius : Si te peccatorem consideras, necesse est ut a te Dominum non repellas.*

Stupor enim circumdederat eum, et omnes qui cum illo erant, in captura piscium quam ceperant, id est, vehemens admiratio occupavit totaliter corda Petri et sociorum ipsius, ex consideratione tanti prodigii : cujus admirabilitatem tanto certius noverant, quanto in arte piscatoria peritiores fuerunt. Si autem quæretur, qualiter tot pisces ibi tam subito convenerunt, faciliter respondetur, quod Christus omnipotenti sua virtute, angelico quoque obsequio, potuit pisces diversis ex locis illuc cito adducere, imo et pisces de novo creare.

Præterea, sicut Petrus viso hoc signo, nil meritis suis adscripsit, neque inaniter gloriatus est, sed totum se humiliavit, et Christo gratias egit, atque ipsius præsentia

A se fatebatur indignum; ita dum prædicator quosdam aut multos converterit, totum divinæ attribuat pietati, et gratias Deo agens nullatenus extollatur, imo se indignissimum arbitretur ut per eum Spiritus Sanctus talia operetur, et Domino se prosternat. Ex his quoque ostenditur magnitudo devotionis fervorisque Petri, quod ipse solus ad genua corruit Christi, quum tamen senior esset. *Similiter autem Jacobum et Joannem, filios Zebedæi, qui erant socii Simonis in piscando, circumdedit stupor. Con-* B *formiter omnem hominem stupor merito implet, quando subtiliter pensat a paucis Christi Apostolis idiotis totum mundum tam celeriter fuisse conversum ad tam incomprehensibilem fidem ac arduissimam legem, quod omni pene miraculo mirabilius reputatur : in quo et facta olim miracula, tanquam in suo effectum satis relucent. Unde nec opus est ea sæpius iterari, quamquam Deus ex sua misericordia infinita frequenter iteravit ea, ad excitandam hominum tarditatem, qui præterita non advertunt, nec inchoationem ac processum Ecclesiæ sagaciter intuentur, atque ad confutandam hæreticorum infideliumque animorum insaniam.*

Et ait ad Simonem Jesus. Quemadmodum enim Christum specialiter honoravit, et humilior ei genua flexit, sic meruit singulariter consolari et honorari a Christo : quoniam cor contritum et humiliatum Deus non despicit, sed exhilarat, et confortat. Unde et primo Regum Dominus protestatur : Quicumque glorificaverit me, I Reg. ii, 30. glorificabo eum; qui autem contemnunt me, erunt ignobiles. Noli timere, inordinato timore, ex consideratione tuæ fragilitatis et culpæ, ex contemplatione quoque signi hujus et excellentiæ meæ, ut ideo petas me exire a te; sed in consideratione pietatis et gratiæ meæ respira et gaude. Hoc etiam omnibus nobis servandum est. Ex hoc enim, hoc est cito post tempus istud, vel post istud piscationis officium; aut certe, « ex hoc », id est merito hujus obedientiæ tuæ ac reverentiæ mihi exhi-

Act. iv, 13.

Ps. l, 19.

bitæ, loquendo de merito congrui, non A condigni; *homines eris capiens*, hoc est, prædicator et apostolus eris, et prædicationibus, miraculis, orationibus, exemplis et meritis tuis, multos convertes, et intra Ecclesiam colliges, sicut intra sagenam colliguntur detinenturque pisces. Nam et ipsa Ecclesia comparatur sagenæ, Christo dicente : Simile est regnum cælorum sagenæ missæ in mare. Juxta quam similitudinem apud Jeremiam loquitur Deus :
Matth. xiii, 47.
Jer. xvi, 16. Ecce ego mittam pisces multos, et piscabuntur eos.

Et subductis ad terram navibus, utpote duabus præfatis naviculis, *relictis omnibus*, id est cunctis qui aderant ibi hominibus, vel omnibus quæ ibi habebant, scilicet navibus et contentis in eis, *secuti sunt eum*, hoc est, per tempus et aliquale spatium ex reverentia Christi iverunt cum eo; postea tamen redierunt ad sua, secundum doctores. Nam alia die post hæc ad apostolatam vocati fuerunt, et ex tunc non

redierunt ad propria. De hoc plenius scripsi super Matthæum et Lucam.

Postremo, a Joanne aliquid huic miraculo simile scriptum est, scilicet qualiter post Christi resurrectionem, Apostoli isti piscantes tota nocte, nihil ceperunt, sed mane facto, Christo eis dicente, Mittite in dexteram navigii rete, ceperunt mox centum quinquaginta tres magnos pisces; et ibi pro miraculo additur, quod quum tanti essent, non est scissum rete. Hic vero, ad insinuandum aliud miraculum, fertur quod

B rete rumpebatur, et naviculæ pene demergebantur, quum tamen pisces non elaberentur. Idcirco per illam piscium captiorem de qua scribit Joannes, designatur electorum collectio intra triumphantem Ecclesiam, in qua nulla scissura est, nullum prorsus periculum; per hanc vero, collectio credentium intra Ecclesiam militantem, in qua boni malis miscentur, atque diversa occurrunt pericula, hæreses quoque et schismata.

Matth. iv, 20; Luc. v, 11.
Joann. xxi, 3 et seq.

SERMO SECUNDUS

QUALITER AUDIENDA SIT PRÆDICATIO VERBI DEI.

AURIS bona audiet cum omni concupiscentia sapientiam. Eccli. iii, 31.

Qualiter Christiani debeant audire prædicationem verbi cœlestis a suis superioribus ac prædicatoribus, ex hodierno evangelio declaratur. Nam dicit Lucas, quod turbæ irruerunt in Jesum, ut audirent verbum Dei.
Luc. v, 1.

Primo igitur debent Christifideles copiose atque concorditer properare ad locum prædicationis: quod est contra eos qui lente accedunt tardeque veniunt, ita quod principium prædicationis non audiunt, nec plenam informationem suscipiunt. Videmus quam copiose ac celeriter pauperes pergunt ad locum in quo aliqua

magna eleemosyna singulis tribuetur, ut integer panis aut nummus: quanto magis universi credentes festinare deberent ad locum prædicationis, quum verbum Dei sit refectio mentis, panis et potus cordis, et vera opulentia animæ, quia confortat ac recreat mentem, virtutibus ditat eam? Hinc in Ecclesiastico dicitur: Cibabit illum (utpote hominem justum Deus) panem vitæ et intellectus, et aqua sapientiæ salutaris potabit eum. Præterea, quo anima in æternum victura et summæ Trinitatis imagine decorata, præstantior est vili, immundo mortali corpore, eo plus festinandum esset ad prædicationis auditionem, quam ad materialium panum susceptionem. Nec

Eccli. xv, 3.

solum est festinanter eundum ad publicam A prædicationem, sed etiam ad quemcumque virum devotum, ad salubrem exhortationem et piam instructionem paratum.

Verumtamen multi jam libentius tendunt ad audiendum vanas confabulationes, ad garriendum, ad comessationes et potationes gulosas (quæ omnia sunt venena et mors animarum), quam ad audiendum verbum salutis. De quibus prædixit Apostolus prima ad Timotheum : A veritate auditum avertent, ad fabulas autem convertentur. Tales ergo sciant se esse spiritualiter mortuos, hoc est in peccato mortali damnationisque statu, quia plus diligunt vanitatem quam veritatem, mortem culpæ quam vitam gratiæ, carnalia et terrena quam spiritualia et superna, imo plus quam Deum omnium creatorem. Quod enim quis amplius diligit, de hoc libentius loqui audit, et ad illud magis festinat.

Secundo fideles debent verba prædicationis et salubris exhortationis cum magna aviditate audire, et diligenter advertere, non sicut verba hominis, sed ut verba Dei omnipotentis, quemadmodum ad Galatas tangit Apostolus. Deus namque per os prædicatorum et vicariorum suorum sermocinatur. Audiendo enim verba salutis, discit homo sapientiam veram, in qua salus sua consistit, ita quod sine ea nequit salvari. Hinc in Proverbiis Salomon contestatur : Si sapientiam quæsieris quasi pecuniam, et quasi thesaurum effoderis eam, tunc intelliges timorem Dei, et scientiam Dei invenies. Qui ergo veraciter sapientiam appetit salutarem, id est sacræ Scripturæ doctrinam, tam diligenter ac fervide quærat eam, quam diligenter ac fervide quærant avari pecuniam et thesauros in loco quo sciunt eos esse absconditos. Porro sapientiam quærit, qui verba prædicationis, exhortationis et informationis cum desiderio audit. Auditus namque sensus est disciplinæ, quoniam audiendo, informationem et sapientiæ incrementum accipit homo. Propter quod in Proverbiis ite-

rum habetur : Audi, fili mi, disciplinam

patris tui; itemque, Audiens sapiens, sapientior erit. Hinc scriptum est : Audi mandata vitæ; auribus percipe, ut scias viam prudentiæ. Via autem prudentiæ est vera discretio, ut in omnibus ordinate nos habeamus. Præterea, quanto sapientia salutaris seu sacræ Scripturæ doctrina pretiosior ac desiderabilior est omni pecunia et thesauro, tanto est utique avidius incessabiliusque quærenda et conservanda. Est autem incomparabiliter pretiosior illis, quemadmodum in Proverbiis legitur : Pretiosior est sapientia cunctis opibus; et omnia quæ desiderantur, huic non valent comparari. Unde et rursus ait Sapiens : Præposui sapientiam regnis et sedibus, et divitias nihil esse duxi in comparatione illius.

Contra hæc agunt qui verba prædicationis, exhortationis et instructionis cum somnolentia et tædio audiunt, imo ex somnolentia non audiunt, et præ tædio non advertunt : quod est signum animæ vitiis mortuæ. Nam sicut corporalem cibum diu abominari, est signum infirmi morituri-que corporis; sic verbum Dei non affectare, sed fugere, est signum languidæ, imo et mortuæ animæ, juxta illud Psalmi : Omnem escam abominata est anima eorum, et appropinquaverunt usque ad portas mortis. Omnem ergo somnolentiam, torporem et mentis distractionem in prædicatione et exhortatione ac informatione salubri abjiciamus.

Tertio Christiani debent verba prædicationis et salutis memoriter retinere, quoniam magna negligentia est oblivioni hæc tradere, et multa inde mala contingunt, videlicet de peccatis in peccata corruere. Idcirco Propheta loquitur Deo : In corde meo abscondi eloquia tua, ut non peccem tibi. Hinc Moyses ait : Ne obliviscaris verborum Domini Dei tui, et ne excidant de corde tuo cunctis diebus vitæ tuæ. Unde in lege Moysis, animalia non ruminantia reputabantur immunda et ad edendum inepta; animalia vero ruminantia judicabantur munda et esui apta. Per animalia

Prov. i, 5.

Baruch iii, 9.

Prov. iii, 15.

Sap. vii, 8.

Ps. cvi, 18.

Ps. cxviii, 11.

Deut. iv, 9.

Lev. xi, 3-7; Deut. xiv, 6-8.

II Tim. iv, 4.

Galat. i, 11, 12.

Prov. ii, 4, 5.

Ibid. i, 8.

ruminantia intelliguntur homines diligentes, qui verba Dei quæ audierunt et sciunt, mente revolvunt, memoriter tenent, frequenter considerant, quatenus juxta eadem vivant. Unde de viro justo fertur in

Ps. i, 2.

Psalmo : In lege Domini voluntas ejus, et in lege ejus meditabitur die ac nocte. Contra hæc agunt quamplurimi qui prædicatione et exhortatione seu informatione audita, mox ad inutilia se effundunt, confabulantur, cachinnant, nec quid prædicatum sit diligenter recogitant, similes animalibus non ruminantibus ac immundis. Qui autem totum retinere non valet, aliqua saltem retineat, et ea præsertim quæ sibi utiliora sunt pro suorum exstirpatione vitiorum et adeptione virtutum. Hinc S. Joannes Chrysostomus, Constantinopolitanus archiepiscopus, consuevit subditos suos sibi hinc inde obviantes interrogare de iis quæ prædicavit, atque oblitos acriter increpavit : per quod eos induxit ad tenacem ac diligentem prædicationum suarum memoriam.

Quarto credentes debent verba prædicationis ac salutis cum obedientia veloci

Matth. iv, 18-22.

audire, quemadmodum Petrus, Joannes et Jacobus, Christo hortante, protinus adimplere cœperunt quod eis commisit. Ad hoc equidem ordinatur moralis instructio et prædicatione de pertinentibus ad salutem, ut juxta eas vivamus. Propter quod Jacobus

Jacob. iv, 17.

Ps. cx, 10.

II Petr. ii, 21.

ait apostolus : Scienti bonum et non facienti, peccatum est illi ; atque Psalmista : Intellectus bonus omnibus facientibus eum, id est opere adimplentibus quod agendum esse intelligunt. Imo, ut princeps Apostolorum testatur, Melius est non cognoscere viam justitiæ, quam post cognitionem retrorsum reverti. Itaque qui superbus est, audita prædicatione contra superbiam, protinus se emendet, de sua elatione pœniteat, confiteri proponat, satisfacere studeat ; et quanto erat superbior, tanto ad profundiorum se donet humilitatem, quia contraria contrariis curantur. Similiter, qui avarus aut luxuriosus est, dum contra vitia quibus sordet, audierit præ-

A dicari, statim pœniteat, et sicut de superbo prædictum est agat : quoniam Christus testatur, Nisi pœnitentiam egeritis, omnes simul peribitis. Nec admittenda est mora, quia quo in peccatis quis diuturnius jacet, eo difficilius surgit, et tempore infirmitatis sua infirmitate sic premitur, ut per eam ad pœnitendum minus aptus reddatur ; talisque pœnitentia ex timore servili damnationis æternæ plus solet oriri, quam ex amore Dei et zelo virtutum : ideo ad salutem non prodest. Unde periculosissimum ac stolidissimum est differre. Propter quod Ecclesiasticus docet : Non tardes

Luc. xiii, 3, 5.

Eccli. v, 8, 9.

converti ad Dominum, et ne differas de die in diem ; subito enim veniet ira Dei, et in die vindictæ disperdet te. Verumtamen quidam sunt ita indurati et excæcati, ut ex prædicatione non solum non proficiant, sed et pejores reddantur : quia dum contra vitia quibus fœdantur, audiunt prædicari, irident aut indignantur. Qui distant longissime a salute, quum Salomon fateatur : Egestas et ignominia ei

Prov. xiii, 18.

C qui deserit disciplinam ; qui autem acquiescit arguenti, glorificabitur. Semper ergo dociles atque tractabiles simus, quoniam in Ecclesiastico scriptum est : Cor durum

Eccli. iii, 27, 29.

Quinto audienda sunt verba prædicationis cum imitatione Christi perseverante atque finali, ut prædicatione finita, fideles qui adfuerunt, Christum spiritualiter imitentur imitatione stabili et completa. In cujus signum Petrus et socii ejus corporaliter secuti sunt Christum, quum prædicationem ejus audissent. Ita et nos Christum in virtutibus imitemur, quemadmodum ipse hortatur : Qui mihi ministrat, me sequatur. Discamus ergo a Christo, quia mitis est et humilis corde ; simus timorati, maturi et custoditi in omnibus. In cibo, potu, vestitu, somno et possessionibus rerum sit quilibet moderatus ; futurum Dei judicium et infernale supplicium a nostris nunquam recedat memoriis ; linguam a superfluis et illicitis restringamus elo-

Luc. v, 11.

Joann. xii, 26. Matth. xi, 29.

quii; divina semper observemus præcepta et mandata Ecclesiæ.

Legitur de S. Clemente, qui fuit filius nobilissimi civis Romani, et de imperatoris progenie nati, quod quum Clemens iste adhuc puer erat atque gentilis, avidissimus fuit ad cognoscendum veritatem et animæ rationalis immortalitatem : unde studio philosophiæ ferventer intentus fuit. Quumque Barnabas apostolus Romam venisset, et prædicare cœpisset ibidem fidem Christi, S. Clemens accepit eum in suo hospitio. Et quum B. Barnabas retulisset Clementi de sapientia, sanctitate atque miraculis Petri apostoli, Clemens valde accendebatur videre et audire Petrum apo-

stolum : unde post modicum tempus, rebus suis dispositis, venit a Roma ad Terram sanctam, et S. Petro invento, fidelissime ac familiarissime ei adhæsit. Sed et S. Petrus specialissime dilexit Clementem, ex quo tam ferventissimus fuit cognoscere veritatem : unde postea cum B. Clemente venit Romam. Quumque beatissimus Petrus ex divina revelatione agnosceret tempus suæ passionis ac mortis instare, convocatis fidelibus, ordinavit S. Clementem suum in papatu successorem. Mortuo igitur S. Petro, Clemens Papa innumerabiles Romanos ac alios per se ipsum et per suos discipulos ad fidem Christi convertit, et multa præclarissima fecit miracula.

SERMO TERTIUS

QUÆNAM SINT TURBÆ, PER PETRI NAVICULAM SPIRITUALITER INTELLECTÆ,
QUAS CHRISTUS DOMINUS DOCET.

SEDENS *Jesus in navicula docebat turbas.* Luc. v, 3.

Per naviculam Petri, quam Christus intravit et in qua sedens docuit plebem, intelligitur universalis Ecclesia militans, id est contra hostes suæ salutis pugnans, atque in hoc sæculo peregrinans, quæ beatissimo Petro archiapostolo fuit commissa. Quæ Ecclesia quamvis sit magna et navis prægrandis, nihilo minus comparatione triumphantis Ecclesiæ appellatur navicula : triumphans namque Ecclesia, id est tota cœlestis curia, multitudine, dignitate, perfectione et gloria vehementer excedit militantem Ecclesiam. Secundo, Ecclesia militans dici potest navicula ob suam humilitatem, quoniam sui ipsius reputatione est parva.

Sed quæri potest, cur Ecclesia vocetur navis sive navicula. Et respondendum, quod mundus iste inferior seu præsens sæculum nequam, comparatur turbulen-

tissimo mari, in quo innumerabiles demerguntur. Quemadmodum autem per navim transfretant homines aquas maris, ita per Ecclesiam militantem deducuntur homines de hoc sæculo turbulento ad portum salutis æternæ, hoc est ad societatem et gloriam triumphantis Ecclesiæ. Unde, quemadmodum olim tempore diluvii nullus mortem evasit, nisi qui cum Noe fuit in arca; sic modo nemo evadit mortem infernalis miseriæ, nisi qui cum Christo fuerit in Ecclesia per fidem et caritatem. Si ergo volumus perpetuæ damnationis pericula secure evadere, oportet ut simus membra Christi filiique Ecclesiæ, ut non solum per fidem, sed et per caritatem Christo jungamur, atque Ecclesiæ incorporemur : et hoc esse non potest, nisi omne mortale vitemus peccatum, virtutibus quoque decoremur, quæ contrariantur peccatis. Oportet ergo ut veraciter humiles simus, vere mansueti, devoti, patientes,

Matth. xvi, 18, 19; Joann. xxi, 15-17.

Gen. vii, 7 et seq. : I Petr. iii, 20.

casti, sobrii, caritativi, omnem detestantes ac repellentes superbiam, omnem iram, impatientiam et rancorem, omnem avaritiam, gulam, luxuriam atque acediam, omnem transgressionem præceptorum Dei et Ecclesiæ seu prælatorum. Unde quotiescumque quis mortaliter peccat, toties in præfato mergitur mari; et si ante fuit in caritate, peccando mortaliter, Ecclesiæ navim elabatur, atque in rete cadit diaboli.

Quoniam itaque defectuosi valde et ineffabiliter fragiles sumus, hinc post prædictum naufragium navi alia indigemus, per quam de vitiorum profundo trahamur, et ad sinum Ecclesiæ reducatur. Hinc secundo per navim Petri designatur pœnitentia, per quam ex vitiorum fluctibus enatamus, et Christo atque Ecclesiæ de novo incorporamur, sicque in statu salutis reponimur et in portu fiduciæ. Et quia humanum est frequenter cadere et iterum surgere, divina pietas misericordissime ordinavit quod sacramentum Pœnitentiæ jugiter iterari potest quamdiu durat hæc vita, quæ non est nisi via ad vitam futuram. Quotiescumque ergo de mortali peccato conscius tibi es, non differas pœnitere et de Dei offensa summe dolere; ruinam tuam deplora, quod de membro Christi filioque Ecclesiæ, factus es membrum, filius ac minister diaboli, eo quod summo et incommutabili bono, Deo vivo et vero, præposuisti ista carnalia et caduca, contra Dei præceptum talibus adhærendo. Verumtamen non desperes, sed veniam postula, confiteri festina, satisfacere cura; noli in statu damnationis jacere, et in peccatis coram Deo fœtere, a Creatore tuo esse aversus, et diabolo per impiam voluntatem esse conjunctus.

Tertio per navim intelligi potest crux Christi, quia per illam Christus eduxit suos electos de hoc sæculo nequam, de fluctibus vitiorum, de limbo inferni seu patrum, quemadmodum dixit: Ego si exaltatus fuero a terra, omnia traham ad me ipsum. Et Zacharias dicit Christo: Tu quoque, in sanguine testamenti tui, emisisti

Joann. xii,
32.

Zach. ix,
11.

A vincos tuos de lacu in quo non est aqua. Denique omnes veraciter christiani conjungendo se per fidem et caritatem cruci Christi, hoc est dominicæ passioni, seu Christo propter ipsos crucifixo (juxta illud Apostoli: Christo confixus sum cruci), merito passionis Christi et sanctæ crucis virtute evadunt pericula hujus sæculi nequam, et ad æternæ salutis portum pertingunt.

Galat. ii,
19.

Quarto per navim intelligi potest sancta humilitas, quæ sicut B. Antonio cœlitus dictum est, universos laqueos inimici evadit, et hominem ad alta cœlorum perducit. Similiter, per navim obedientia potest intelligi, quæ compendiosissime ducit ad regnum perpetuum. Postremo, per navim intelligi potest cœnobitica religio, quæ est compendiosissima ac securissima via ad beatitudinem æternalem. Sed et caritas per navim potest intelligi, quia per caritatem Deo unimur, ad patriam gradimur, æternaliterque salvamur; nec aliquid prædictorum potest quempiam absque caritate ad Deum perducere, aut nomen navis rite habere.

In præfatis itaque navibus, hoc est in Ecclesia, in pœnitentia, in dominicæ passionis memoria, in humilitate, obedientia, caritate, perseveremus; et qui religionem intravit, in ea secundum suæ vocationis exigentiam ambulet digne Deo, ut a Christo in navi sedente instrui mereatur. Christus quippe adhuc in militanti Ecclesia sedet, quia per fidem et caritatem in mentibus fidelium residet, habitat et quiescit, atque per unctionem internam, per angelicam inspirationem, per prælatorum ac prædicatorum sermocinationem docet credentes, quemadmodum gratiosissime docuit duos adolescentes, de quibus in quarto libro Vitaspatrum sic legitur:

Ephes. iv,
1.

Ibid. iii, 17.

Abbas Macarius dixit: Sedente me in eremo Scythi, venerunt ad me duo juvenes, quorum unus incepit barbam habere, alius nondum, cupientes habitare in eremo. Quos quum vidissem delicate nutritos, dixi ad eos: Non potestis ferre rigorem vitæ ac eremi hujus. Qui constantes man-

serunt, sperantes in Dei auxilio; et me A
eis formam monstrante, ædificaverunt sibi
cellulam. Quibus dixi : Facite sportas, et
date eas custodibus ecclesiæ, ut pro eis
afferant vobis panes. Post hæc recessi ab
eis. Ipsi vero vixerunt secundum quod
docui eos, et non venerunt ad me per
tres annos. Propterea admirabar, rogavi-
que Deum, jejunans per unam hebdoma-
dam, ut ostenderet mihi conversationem
eorum. Post hoc ivi ad eos. Quumque pul-
sassem, salutaverunt me cum silentio; et
facta oratione, sedi, et nullus eorum lo- B
quebatur mihi; postea manducavimus si-
mul. Et facto vespere, dixerunt ad me :
Vadis hinc ? Respondi : Non, sed hic dor-
miam. Posuerunt ergo mihi mattam in
angulo uno, et sibi in alio, posueruntque
se ad dormiendum. Ego autem oravi Deum
ut ostenderet mihi operationem eorum,
statimque apertum est tectum cellæ eo-
rum, et facta est lux in ea quasi dies
fuisset; sed ipsi lucem illam non vide-
runt. Quumque me dormire putarent, ille
major tetigit minorem in latus, surrexe- C
runtque simul; expandentes quoque ma-
nus in cælum, steterunt cum silentio.
Videbam autem dæmones quasi muscas
venientes ut sederent super illum junio-
rem. Vidi etiam angelum Dei habentem
in manu igneum gladium, et dæmones ex-
pellentem ab illo juniore, sed illi majori
non poterant dæmones appropinquare. Cir-
ca mane vero reclinaverunt se; et ego feci
me quasi evigilatum, et ipsi fecerunt si-
militer. Et legi duodecim psalmos cum
illis; et per unumquemque versum de
ore illius majoris exivit flamma ignis, et
ascendebat in cælum; similiter, illo ju-
niore os aperiente, quasi funiculus * igne- * *alias fu-*
us egrediebatur de ore ipsius, et per- miculus
tingebat in cælum. Discedens deinde ab
eis, dixi : Orate pro me. Ipsi vero satis-
fecerunt mihi tacentes. Et cognovi quod
ille major perfectus esset; minorem vero
adhuc dæmones impugnabant. Porro post
paucos dies dormivit in Domino ille ma-
jor et senior frater, et post eum tertio die
ille junior frater. — Ecce quam vere ait
Salvator : Spiritus ubi vult, spirat. Quis *Joann. iii, 8.*
enim comprehendere queat, quam mira-
culosa fuerat tota conversatio illorum duo-
rum fratrum in eremo, quos nullus homi-
num docuit, et tamen in tam brevissimo
tempore ad tam angelicam ac perfectam
vitam venerunt ?

AD RELIGIOSOS

SERMO QUARTUS

DE UNANIMITATE, PACE ET FRATERNA IN BONO CONCORDIA.

OMNES *unanimis in oratione estote.* D
I Petr. III, 8.

Beatissimus apostolici ordinis princeps
in compendiosissima hodierna epistola mul-
tipliciter ac saluberrime nos informat. Pri-
mo, ut unanimis simus, sicut et Christus
in Evangelio jubet, dicendo : Pacem ha-
bete inter vos. Et rursus : Beati (inquit)

pacifici, quoniam filii Dei vocabuntur. Mi-
seri ergo sunt discordes et contentiosi,
quum reputentur servi filiique diaboli, et
ab Ecclesia alieni, dicente apostolo Paulo :
Si quis videtur contentiosus esse, nos ta- *I Cor. xi, 16.*
lem consuetudinem non habemus, neque
Ecclesia Dei. Et rursus : Non est (inquit)
Deus dissensionis, sed pacis. *Ibid. xiv, 33.*

Marc. ix, 49.
Matth. v, 9.

Denique, quamvis Christifideles debeant in omni bono actu esse unanimes, nunc tamen specialiter exhortatur Archiapostolus, ut in oratione existant unanimes, quatenus concorditer exorando, gratiam conservandi unanimi-
tatem, caritatem aliasque virtutes adipiscantur a Deo. Specialiter quoque unanimiter debemus orare, quia omnes veraciter christiani, sunt unus exercitus Dei, jugiter prælians contra aciem vitiorum et impugnationes diaboli. Quum ergo eosdem adversarios, et adversarios valde fortes, atrocissimos ac callidissimos, habeamus, et eadem nobis instent pericula, et pericula prorsus gravissima, utpote amittendi gratiam in præsentī et gloriam in futuro, ac incidendi damnationem æternam, omnino nobis incumbit necessariumque consistit ut in oratione unanimes simus, auxilium Dei et ejus defensionem ac salutarem postulantes triumphum : quemadmodum in libris Regum et Paralipomenon, ac Machabæorum et Judith, multoties legitur, quod filii Israel contra adversarios pugnaturi, Deum ferventer, instanter, unanimiter invocabant, non verbis dumtaxat, sed et jeuniis, abstinentiis, ciliciorum indutionibus et lacrimarum effusionibus, cum omni humiliatione, compunctione et confessione. Si igitur illi contra hostes visibiles pugnaturi, pro temporali morte evadenda ita egerunt, quanto magis veri Israelitæ et milites Christi, quibus incessabile contra invisibiles ac crudelissimos hostes bellum est, Deum indesinenter debent cum omni compunctione, lacrimatione, humiliatione, confessione et corporis castigationibus invocare, quatenus æternæ mortis evadant pericula, et gaudia impetrent sempiterna?

Quum ergo in periculosissimo statu simus et mutua ope indigeamus, oremus pro invicem. Nec unus impediat alterum, nullus nostrum adjutor sit dæmonum, fratrem suum perturbando, gravando, aut quovis modo scandalizando, seu aliquo modo ad culpam in verbis aut factis trahendo; sed quæ pacis sunt, sectemur, et quæ

ædificationis sunt, in invicem custodiamus. Unusquisque exemplariter conversando, ferventer agendo, irreprehensibiliter incedendo, ædificet et inflamet suos confratres. Opportunis quoque temporibus exhortemur nos invicem verbis sacris ad prælium spirituale, ad unanimi-
tatem, ad mutuam opem, ad omnem virtutem, juxta illud Apostoli : Adhortamini vos ipsos per singulos dies, ut non obduretur quis ex vobis fallacia peccati. Hebr. iii, 13.

Denique, sicut caritas, ita et filia ejus ac germen, vera unanimitas, cunctis fidelibus summe necessaria perhibetur. Propter quod affectuosissime monet Apostolus : Si qua consolatio in Christo, si quod solatium caritatis, si qua societas spiritus, si qua viscera misericordiæ, implete gaudium meum, ut idem sapiatis, unanimes, id ipsum sentientes. Unanimitas autem idem est quod concordia, utpote diversorum animorum in idem consensus. De quo Leo Papa : Gratia (inquit) Patris cælestis, non dissimiles, non discordes, sed unum sentientes unumque amantes adoptavit in filios et heredes; ad unam reformatos imaginem oportet animum habere conformem. Hæc sancta concordia inter præcipua computatur bona a sapiente quodam, qui fatetur : In tribus beneplacitum est spiritui meo, quæ sunt probata coram Deo et hominibus : concordia fratrum, amor proximorum, et vir et mulier bene sibi consentientes. Imo, ut sanctus ait Bernardus, non est in terris expressior angelicæ conversationis similitudo, quam unitas et concordia vitæ socialis, præsertim in cœnobiis. Ideo semper solliciti simus servare unitatem et concordiam spiritus in vinculo pacis. Quod quam summe ac singulariter necessarium sit religiosis, sanctus pandit Hieronymus in Regula sua, loquens : Nulla pro certo vita deterior, quam simul degere corpore et non mente; et vere infelices sunt quibus inest, non una, sed diversa voluntas. Sit itaque vobis semper unus affectus, una fraternitas, una voluntas, una proportio morum, una jucun-

I Reg. vii;
II Par. xx;
I Mach. iii,
46 et seq.;
iv; Judith
iv, 8 et seq.;
ix.

Rom. xiv,
19.

Philipp. ii,
1, 2.

Eccli. xxv,
1, 2.

Ephes. iv,
3.

ditas, una tristitia, ne quod placet uni, A displiceat alteri, et quo gaudet unus, alter tristetur : sicque habere poteritis religionis propositum, si in domo Domini habitetis unanimes.

Ps. lxxvii, 7.

Verumtamen est quædam concordia mala, et unanimitas vitiosa eorum qui confœderantur in rebus illicitis, quemadmodum quidam, ex carnali affectu aut commodi temporalis intuitu, aut ex communi quem contra aliquem conceperunt rancore, in pravis concordant : sicut Pharisæi et Sadducæi apostolum Paulum unanimiter im-

Act. xxiii, 6 et seq.

pugnabant ; quorum concordiam detestandam subtiliter sanctus dissolvit Apostolus, bonam inter eos discordiam seminando. Itaque nulli in rebus illicitis consentiamus, nec quispiam partialitatem in Christi congregatione inducat, aut aliquem sibi fraudulenter alliciat, nec errantem seu contententem defendat amicum, nec foveat male discordem ; sed simus vere concordēs in notitia veritatis, in bonitatis et virtutum amore, in verbis et confessionibus oris, Deique laudibus, et observantiis regularibus, cunctisque sanctis operibus. Propter quod ardentissime beatus oravit Apostolus : Deus patientiæ et solatii det vobis id ipsum sapere, secundum Jesum Christum, ut unanimes uno ore honorificetis Deum. Hæc felix concordia in cantu et psalmodia, ac ceteris exercitiis virtuosis, caritatem valde fovet, conservat, auget ac perficit : nam sicut ex caritate emanat, sic eam alit ac roborat. Imo quælibet virtus per proprias actiones conservatur atque perficitur : idcirco in exercitiis humilitatis, patientiæ, mansuetudinis et aliarum virtutum nos ipsos assidue actuemus.

Rom. xv, 5, 6.

Præterea, quæritur circa præacta, an discordia et dissensio sint peccata mortalia. Et videtur ex præinductis quod imo, præsertim quum dissensionem inter peccata mortalia Apostolus numeret. Ad hoc Thomas in secunda secundæ respondet : Concordia est actus caritatis qui diversorum corda in unum conjungit : primo et maxime in bonum divinum, quia in Deo

q. xxxvii, a. 1.

eos connectit, et summo ac incommutabili bono adhærere facit eosdem ; secundo autem in bonum proximorum, ut scilicet velint quæ proximis spiritualiter prosint. Quum ergo concordia opponitur discordia, constat eam esse peccatum. Dupliciter autem concordia per discordiam tollitur. Primo directe et per se, dum quis scienter et ex intentione discordat ab alio in bono divino vel fraterno, puta in spiritualibus rebus et actibus ad Dei honorem et cultum, seu proximorum profectum sive salutem, spectantibus, in quibus cum aliis concordare deberet : et hoc ex suo genere est peccatum mortale, quum sit caritati contrarium. Secundo per accidens, ut quando aliqui in principali bono consentiunt, sed in aliquibus quæ sunt circa illud dissentiunt, quia uni istud melius veriusve videtur, alteri istud : et ista discordia est præter intentionem, nec est peccatum, nec caritati opponitur, nisi sit cum errore circa ea quæ sunt de necessitate salutis, vel aliquis pertinaciter propriæ æstimationi adhæreat. Hinc dissensio seu discordia inter Paulum et Barnabam orta, non fuit peccatum, quia erat per accidens, nec fuit circa ea quæ sunt de necessitate salutis.

Act. xv, 39.

Ecce hic S. Thomas apertissime asserit, quod scienter et ex proposito discordare ab alio in bono divino, in quo cum illo concordare deberet, sit ex suo genere culpa mortalis. Hoc advertant ac metuant, seque emendent, qui in psalmodia aut divino obsequio dissonanter et discorditer habent se ex proposito et scienter, imo ex passione et aversione, sive ut alium gravent, et suam in hoc mitigent iram ac ulciscantur injuriam in loco, actu et tempore, ubi et quando potissimum omni caritati, devotioni, ædificationi et unanimitati studendum est : ex quibus omnibus eorum excessus non mediocriter aggravatur.

Præterea, sicut discordia contrarietatem importat in interioribus actibus et motibus voluntatis, ita contentio in locutionibus. Contrarietas autem loquentis, uno modo pensatur ex intentione loquentis seu

contententis, secundo ex modo loquendi. A Quantum ad primum, considerandum est an quis resistat veritati an potius falsitati; quantum ad secundum, pensandum est an talis modus loquendi seu contrariandi, negotiis et personis conveniat. Contentio itaque quæ est impugnatio veritatis cum inordinato modo loquendi, est mortale peccatum. Sicque accipit eam Ambrosius : Contentio, inquit, est impugnatio veritatis cum confidentia clamoris. Porro contentio quæ est impugnatio falsitatis cum acrimonia moderata, est laudabilis. Quod B si modus excedatur, erit veniale peccatum, nisi in tantum excedatur quod alii graviter scandalizentur. Propter quod dixit

II Tim. II,
14.

Apostolus : Noli verbis contendere; ad nihil enim utile est, nisi ad subversionem audientium. Contentio autem quæ non est cum intentione impugnandi veritatem, sed qua quis defendit quod sibi verum appa-

ret aut justum, non est perfecta contentio nec mortale peccatum. Sumendo ergo contentionem secundum suam perfectam rationem qua est mortale peccatum, ille contendit in iudicio qui veritatem impugnat justitiæ. Ex quo constat, quam enormiter peccent religiosi qui in capitulo suam defendunt offensam seu culpam, et cum præidente contendunt; quum etiam et si vere innocentes consisterent, non nisi modeste deberent se excusare, scientes quod in multis offendimus omnes.

Jacob. III, 2.

Postremo, discordia atque contentio, in quantum sunt vitia, ex superbia aut inani gloria oriuntur, dum quis proprio sensui aut voluntati immoderate innititur, pertinaciterque adhæret. Hinc inter superbos et ambitiosos semper sunt jurgia et frequentes discordiæ; inter humiles vero, mansuetos et caritativos invenitur concordia.

Prov. XIII,
10.

SERMO QUINTUS

DE CARITATE ET COMPASSIONE FRATERNA, ALIISQUE VIRTUTIBUS QUÆ MAXIME
COENOBITAM DECENT.

ESTOTE *compatientes, fraternitatis amantes, misericordes, modesti et humiles*. I Petr. III, 8.

Quoniam divina lege invariabiliter est sancitum ut sicut se habet homo ad proximos suos, ita se Deus ad hominem habeat, hinc frequentissime ac seriusissime sacra hortatur Scriptura, ut simus non solum Deo devoti ac subditi, sed proximis quoque caritativi, pii et subvenientes. Idcirco in præsentis dominicæ epistola, gloriosissimus princeps Apostolorum hortatur nos primo ut simus « compatibles ». Omnibus ergo afflictis, tentatis, captivis et lapsis pie condoleamus, maxime in peccata collapsis, quum malum culpæ sit incomparabiliter deterius malo pœnæ. Ideo Pau-

lus hortatur : Consolamini pusillanimes, suscipite infirmos, patientes estote ad omnes. In Ecclesiastico quoque docetur : Non desis plorantibus in consolatione; et non te pigeat visitare infirmum. Itaque fratres nostros corporaliter spiritualiterve infirmos pie et compassive portemus; et si quempiam tentatum aut discordantem viderimus, ad ejus relevamen ac pacificationem fideliter laboremus, Deum orando et ipsum hortando, seu alio modo. Contra hæc agunt quidam prorsus pusilli ac nimium imperfecti, qui quum personaliter onerosi sint et portari indigeant, pieque tolerantur, alios tamen portare non volunt : imo si quid gratiæ alicui impendatur, aut sufferatur, seu omnia instar aliorum

I Thess. V,
14.

Ecclesi. VII,
38, 39.

non egerit, protinus indignantur, detrahunt, judicant, conqueruntur. Isti sunt indiscreti, ingrati, immisericordes, et pietate quæ eis exhibetur indigni : ideo se emendare non differant.

Insuper docet princeps Apostolorum, ut
1 Petr. iii, 8. *Prov. vi, 19.* *Eccli. xix, 26, 27.* *Philipp. iv, 5.*
 simus « fraternitatis amatores », id est fratrum nostrorum et communionis eorum dilectores. Propterea bonum commune ac generale, omnium mutuam sanctam dilectionem, pacem atque concordiam semper cordialissime appetamus, et pro viribus procuremus, orando, monendo, pacificando et amabiliter conversando. Sed hujus oppositum agunt perversi, qui sunt membra satellitesque diaboli, qui inter fratres discordiam seminant, magisque gloriantur si inter quosdam ad quos non satis sincere afficiuntur, viderint dissensionem et aversionem, quam pacem, consensum ac dulcem caritatis affectum.

Amplius, juxta Archiapostoli documenta, simus « misericordes », non crudeles. Viscera enim impiorum crudelia; et non est sensus ubi abundat amaritudo. Beati autem misericordes, quoniam misericordiam consequentur. Actibus ergo totius pietatis simus pro posse semper intenti, et pro communi bono Ecclesiæ, pro universis peccato oppressis, pro vivis ac mortuis ferventissime intercedere non cessemus, præcipue pro propinquis, commissis et benefactoribus.

1 Petr. iii, 8. *Prov. xii, 10.* *Eccli. xxi, 15.* *Matth. v, 7.*
 Simus quoque « modesti » in omnibus, ut sanctus hortatur Isidorus doctor et episcopus : Sit in gestu tuo gravitas, in motu simplicitas, in incessu honestas; nihil dedecoris, nihil lasciviæ, nil petulantia aut insolentia vel levitatis in incessu tuo appareat. Denique gestus hominis, maxime religiosi, in omni actu sit graciosus absque mollitie, et quietus sine dissolutione, gravis sine tarditate, alacer sine inquietudine, et maturus sine protervitate ac turbulentia, ut Hugo de S. Victore disseruit. Qui iterum ait : Temperanda est facies et modificanda in gestu suo, ut nec proterve exasperetur, nec molliter dissolvatur, sed

A semper habeat dulcedinem rigidam et dulcem rigorem. Itaque in motu et incessu, in verbo, vestitu omnique gestu moderamen servemus, ut sic, juxta Apostolum, modestia nostra nota sit omnibus. Unde *Philipp. iv, 5.* et Augustinus : In omnibus (inquit) motibus vestris nil fiat quod cujusquam offendat adspectum, sed quod vestram debeat sanctitatem. Dispositio namque mentis in corporis apparatu relucet, ita quod quædam vox animi est corporis motus. Hinc exterior levitas, discursus, curiositas atque loquacitas, interioris instabilitatis, levitatis, curiositatis et dissolutionis sunt indicia. Propter quod in Ecclesiastico fertur : Ex visu cognoscitur vir, et ab *Eccli. xix, 26, 27.* occursu faciei cognoscitur sensatus; amictus corporis, et risus dentium, et ingressus hominis, annuntiant de illo. Hinc quoque Salomon loquitur : Quomodo in aquis *Prov. xxvii, 19.* resplendent vultus prospicientium, sic corda hominum manifesta sunt prudentibus (quia videlicet per exteriora, interiora cognoscunt).

C Quum ergo hæc ita se habeant, quid est quod nos religiosi sacerdotesque Domini, nos viri barbati et in religione antiqui, sumus tam dissoluti in moribus, tam immoderati in verbis, tam pueriles in risibus, tam præcipientes in eundo, ita ut sæpius instar picarum currere videamur et prosilire? Non solum in loco colloquii et inter nos, sed et interdum in divinis et coram extraneis taliter nos habemus, Deum inhonorantes, proximos scandalizantes, nec solum confundentes nos ipsos, sed et sanctæ religioni ac sacris ordinibus derogantes. Et dici potest de nobis : Homo quum *Ps. xlviii, 13, 21.* in honore esset, non intellexit. Quid ergo incumbit nobis, nisi vel emendatio magna, aut pœna intoleranda?

Denique, ultra præacta Archiapostolus jubet ut « humiles » simus. Quamvis enim, *1 Petr. iii, 8.* teste Scriptura, coram Deo et hominibus *Eccli. x, 7.* odibilis sit superbia, in nullo tamen genere hominum tam detestanda ac monstruosa, tam fœda et odienda exstat superbia sicut in religiosis, quos oportet esse mor-

tuos mundo atque in omnibus resignatos, A nec aliquid sæculi hujus appetere, sed subjectione et abjectione gaudere : quod et eorum prætendit habitus atque professio. Ideo elatus monachus est monstrum turpissimum coram Deo ; humilitas autem facit religiosum Deo et suis confratribus valde amabilem, et ad omnem disponit profectum.

Amplius, ad perfectam patientiam summus Apostolus nos hortatur, in tantum ut
 1 Petr. III, 9. nulli malum pro malo reddamus, nec maledictum pro maledicto, sed maledicentibus benedicamus : quia in hoc vocati sumus potissimum nos religiosi, ut tali ac tanta patientia benedictionem Dei hereditemus, et æternaliter possideamus. Oportet etenim ut religiosus in omnibus frangat, vincat, abneget, vitaliterque mortificet semetipsum, propriam voluntatem, appetitum naturæ, desideria culpæ ; subsanationes quoque, injurias, derisiones, tribulationes, exercitationes, quasi aquam dulcifluam bibat, atque in talibus quasi
 Jacob. I, 2. in omnibus divitiis gloriatur, omne reputans gaudium quum in varias tentationes inciderit, ut Christi sectetur vestigia, et
 1 Petr. II, 21. suo Domino pro se multa passo aliququaliter conformetur.

Subinde, in hodierna epistola introducit primus et summus Apostolus verba Psalmistæ, ad demonstrandum quam necessaria ad salutem sit refrenatio linguæ. Vir enim linguosus non dirigetur in terra ; et
 Ps. XXXIII, 14. qui multis utitur verbis, lædit animam suam. Qui autem moderatur labia sua, prudentissimus est, sicut de hoc multa sunt in præcedentibus sermonibus allegata.

Præterea in ista epistola tangitur ratio cur propter adversitates et persecutiones non debeamus ab actibus bonis cessare, quum dicitur : Quis est qui vobis noceat, si boni, id est virtutis, seu Christi essentialiter boni secundum quod Deus est, æmulatores, id est amatores ac imitatores, fueritis ? quasi dicat, Nullus : quia etsi iniqui persequantur ac spolient atque interimant justos, totum hoc ineffabiliter prodest eis, et ad copiosissimam eis cooperatur salutem, dummodo æquanimiter
 B ferant. Unde S. Petrus subjungit : Si quid patimini propter justitiam, beati eritis. Et Christus : Beati (inquit) estis quum maledixerint vobis homines, et persecuti vos fuerint ; gaudete in illa hora, quia merces vestra copiosa est in cœlo. Sunt autem quædam bona hominis vere et absolute, quæ ei invito auferri non queunt, ut sunt spirituales divitiæ, gratia et virtutes, ac dona et fructus Spiritus Sancti, ac merita sua. Cetera sunt quæ ei etiam non volenti possunt auferri, quæ non sunt bona ejus nisi secundum quid. Itaque, si quis Frater devotus et vere religiosus ac speciali gratia decoratus, propter zelum suæ justitiæ et propter opera virtuosa videat se contemni, gravari, aut a quibuslibet promotiunculis ad officia impediri, non frangatur, nec contristetur, nec cesset a bonis, sed Deo regratiatur, qui quosdam a se valde electos atque dilectos non permittit exterioribus implicari neque ad prælationes perducī, sed potius in abscondito
 C vultus sui sibi soli vacare, et spiritualibus ac divinis, nocte ac die, pura, fixa, amorosa ac libera mente intendere.

1 Petr. III, 13.

Ibid. 14.

Matth. V, 11, 12.

Ps. XXX, 21.

SERMO SEXTUS

QUAM FELICITER IRRUANT IN JESUM BONI RELIGIOSI, QUAM FELICISSIME AUTEM ATQUE DELICIOSISSIME VERI CONTEMPLATIVI.

QUUM turbæ irruerent in Jesum, ut audirent verbum Dei, etc. Luc. v, 1.

Exemplo turbæ istius docemur, quam avide et ferventer debeamus verbum Dei audire. Irruamus ergo et nos in Jesum, ut audiamus verbum Dei. Sed quum Dominus Jesus ad dexteram sedeat Dei Patris et in throno gloriæ ejus, quomodo poterimus nos vermiculi in terra repentes, in ipsum irruere? Verum ad hoc faciliter respondetur. Non enim est Christus longe ab unoquoque nostrum, quia in ipso (secundum quod Deus est) vivimus, movemur, et sumus; et sicut æternaliter est, ita ubique est. Qui et veraciter protestatur: Ubi fuerint duo vel tres congregati in nomine meo, ibi in medio eorum sum. Sed quid est in Jesum hoc modo irruere? Et respondendum, quod in Jesum irruere, est ad ipsum ferventer accedere, juxta illud: Accedite ad eum, et illuminamini. Apostolus quoque: Adeamus (inquit) cum fiducia ad thronum gratiæ ejus. Porro accessus iste ad incircumscribibilem et ubique præsentissimum Deum, spiritualis est et mentalis, non corporalis; sicque ad Christum accedere, est se ad ejus gratiam præparare, ipsius auxilium invocare, ejus gratiosam inhabitationem, allocutionem internam, illuminationem supernam desiderare, ipsum diligere, contemplari et colere, spiritualiterque proficere. De quo salubri secretissimoque accessu ait ad Hebræos sanctus Apostolus: Accessistis ad montem Sion, et civitatem Dei viventis, et Jerusalem cœlestem, et multorum millium angelorum frequentiam, et judicem omnium Deum. Quanto autem præ tactos ferventius atque frequentius facimus actus,

A tanto impetuosius bona impetuositate, hoc est laudabilius ac celerius, in Jesum irruimus.

Deinceps, in Dominum Jesum Christum salubriter irruit, qui ejus vestigia effeciter affectuoseque sequitur, qui ejus humilitatem, mansuetudinem, patientiam, paupertatem, constantiam, caritatem sectatur, discens ab ipso quia mitis est et humilis corde, et sciens quod omnes qui volunt pie vivere in Christo, persecutionem patientur, nec timendi sint qui corpus occidunt, sed incomparabiliter sit timendus qui potestatem habet corpus et animam perdere atque projicere in gehennam. Itaque, qui in adversis Christi amore lætatur, qui in omnibus prompte obedit intuitu ejus qui factus est obediens Patri usque ad mortem, qui sinceriter et ferventer abnegat semetipsum, et crucem suam portat quotidie, qui non solum viam mandatorum currit, sed semitam quoque evangelicorum consiliorum volat ac per-volat, in observantiis sanctis fervens, universa quæ Ordinis sunt strenue implens, iste feliciter irruit in Jesum.

Verumtamen adhuc invenitur sublimior atque felicior irruentia quædam in Jesum, de qua fertur in Canticis: Tenui illum, nec dimittam; et rursus, Quis mihi det te fratrem meum, ut inveniam te foris, et deosculer apprehendamque te? Ipse quippe est Sponsus cœlestis, cujus amore languet anima sancta viatrix, sitiens ad illum quemadmodum desiderat cervus ad fontes aquarum. Hæc ergo sublimior in Jesum irruentia, est amorosus ipsius amplexus, osculumque occultum, dum anima Deitatis amore succensa, levat se super se,

Marc. xvi, 49; Ephes. 1, 20.

Act. xvii, 27, 28.

Matth. xviii, 20.

Ps. xxxiii, 6.
Hebr. iv, 16.

Ibid. xii, 22, 23.

Matth. xi, 29.

II Tim. iii, 12.

Matth. x, 28.

Philipp. ii, 8.

Luc. ix, 23.

Ps. cxviii, 32.

Cant. iii, 4.

Ibid. viii, 1.

Ibid. ii, 5.

Ps. xli, 2.

Thren. iii, 28.

et summæ lucis primæque veritatis contemplationi infigitur, tamque profunde, amore ac limpidè incomprehensibilem contemplatur, miratur, et ei unitur, imo immergitur, quod in divitias gloriæ ejus interminabiles rapitur, et in infinitæ beatitudinis abyssum demergitur, atque in increatæ majestatis immensitatem saluberrime absorbetur. Et tunc amore devicta, pudoris oblita, eum qui essentialiter et vere interminabiliter bonus, pulcher, dulcis ac sapiens est, brachiis amplectitur caritatis, ac totis deosculatur præcordiis. Tuncque veraciter audit, plane intelligit, sine difficultate advertit, quid loquatur in ea Dominus Deus Jesus Christus sponsus cœlestis, qui tunc instruit eam secretius, et verba arcana loquitur ei, consolaturque eam, et multa ei revelat.

Ps. LXXXIV,
9.

His igitur modis gradatim accedamus et irruamus in Jesum. Et quia nemo repente fit perfectus et summus, sed paulatim proficitur, accedamus et irruamus in Christum : primo, per suæ humanitatis speculationem, per suæ obedientiæ, caritatis et patientiæ, humilitatis, paupertatis, constantiæ ac mansuetudinis assiduam considerationem, ardentem, indefessam et stabilem imitationem; deinde, per suorum beneficiorum ac promissorum attentionem, præsertim per suæ dignissimæ incarnationis ac passionis intuitionem, cruciformemque assecutionem; deinceps, per suæ puræ et infinitæ bonitatis, æternæ ac supersplendidissimæ veritatis ferventissimam contemplationem sincerissimumque amo-

rem; et postremo, per osculum cœliforme atque amplexum internum supernaturalem præactum.

Denique, sic irruamus in Jesum, ut audiamus Verbum Dei, videlicet ipsummet, de quo ait Evangelista : In principio erat Verbum. Unde fatetur Propheta : Audiam quid loquatur in me Dominus Deus; itemque, Beatus homo quem tu erudieris, Domine. Qui enim ab istis transitoriis et terrenis se abstrahit, et ab omni carnali, sensuali, privato amore se purgat, seque intus et extra custodit, ut Deo sincerius queat vacare ac ejus succendi amore : is utique audit frequenter Deum sibi intus loquentem et sua unctione se instruente, et divino acquiescit instinctui atque angelicæ inspirationi. Cum tali equidem homine est sermocinatio Dei, et in eo quasi in thalamo requiescit, et loquitur ad cor ejus.

Joann. I, 1.

Ps. LXXXIV,

9.

Ps. XCIII, 12.

I Joann. II,

27.

Prov. III, 32.

Osee II, 14.

Præterea, audiamus Dominum Salvatorem nobis in Scripturis incessanter loquentem, per suos quoque vicarios superiores nostros nos admonentem et corripientem, seu per fratres nostros salubriter nos affantem; et obedientes simus in omnibus istis, ut cum omni diligentia et reverentia opus Dei agamus, vocatione hac digne conversari conemur, in cunctis virtutibus quotidianum sortiamur profectum, ut simus coram Deo quotidie magis ac magis solliciti, custoditi et timorati, atque in verbis et factis amplius ordinati, et omni die magis perfecti, imperturbabiles, stabiliti. Ad laudem et gloriam Dei.

C

DOMINICA VI POST TRINITATEM

ENARRATIO IN EPISTOLAM

QUICUMQUE BAPTIZATI SUMUS IN CHRISTO JESU, IN MORTE IPSIUS BAPTIZATI SUMUS.
Rom. VI, 3-11.

HORTATUR nos sanctus apostolus Paulus in præsenti epistola ad vitiorum devitationem, spiritualemque innovationem, atque virtuosorum operum continuationem usque in finem. Et ad hoc inducit primo hanc rationem, quoniam in Baptismo purgati sumus ab omni peccato : ergo de cetero decet nos a vitiis abstinere. Itaque ait : *Quicumque baptizati sumus*, id est a vitiis emundati ac loti in fonte Baptismi, *in Christo Jesu*, in institutione, fide et operatione Christi, hoc est secundum quod ipse instituit ac præcepit, dicens : Docete omnes gentes, baptizantes eos in nomine Patris et Filii et Spiritus Sancti. Christus quoque fidem Trinitatis edocuit et intus infudit. Ipse quoque principaliter baptizat, quia ut Deus intus purgat a culpa gratiamque largitur, atque ab ejus passione Baptismus ac alia sacramenta efficaciam suam sortita sunt. Idcirco ad Joannem Baptistam Deus ait de Christo : Super quem videris Spiritum descendentem et manentem super eum, hic est qui baptizat in Spiritu Sancto. Sacerdos vero ministerialiter est baptizans. *In morte ipsius*, id est virtute ac merito suæ passionis et mortis, *baptizati sumus*. Vel, « in morte ipsius », hoc est in similitudine mortis Christi, « baptizati sumus », quatenus, sicut Christus semel mortuus est carne, et semper vivit spiritu, sic nos per Baptismum semel mortui omni iniquitati, deinceps

A semper vivamus justitiæ. Trina namque immersio baptizati in aqua, designat triduum sepulturæ seu mortis Christi ; elevatio autem ex aqua, resurrectionem Christi significat. Hinc secundæ expositioni consonat littera sequens. Declarans namque qualiter in morte Christi baptizati dicamur, adjecit :

Consepulti enim sumus cum illo, id est, Christo sepulto assimilati sumus, *per Baptismum*, id est in Baptismo : nam mersio baptizati in aqua, significat sepelitionem Christi sub terra ; *in mortem* peccati seu vitæ prioris, quæ fuit iniqua, id est ad hoc ut moriamur peccato. *Ut quomodo Christus surrexit a mortuis*, id est a loco atque consortio mortuorum, *per gloriam*, id est gloriosam omnipotentiam, *Patris* : quia divina, non humana virtute, surrexit. Vel, « per gloriam Patris », id est per Verbum æternum carni unitum, quod est gloria Patris, quemadmodum scriptum est : Gloria patris, filius sapiens. *Prov. x, 1.* Isaias quoque de hac gloria seu Filio Patris ait : Revelabitur gloria Domini, et videbit omnis caro Salutare Dei nostri. Nam Christus secundum quod Deus, suscitavit corpus suum, imo se ipsum secundum quod homo est. *Ita et nos in novitate vitæ ambulemus*, hoc est, pristinis vitiis extirpatis, virtuose vivamus et christiformiter conversemur, sicque renovetur ut aquilæ juvenus nostra, et in splen-

Matth.
xxviii, 19.

Joann. i, 33.

Prov. x, 1.

Is. xli, 5.

Ps. cii, 5.

dore gratiæ ac virtutum reflorat anima nostra.

Si enim complantati facti sumus similitudini mortis ejus, hoc est, si instar plantæ seu arboris, eradicati fuerimus a prioribus culpis, et firmiter conformati fuerimus similitudini mortis ejus, scilicet Christi, hoc est vestigiis dominicæ passionis, conformando nos passioni Christi in castigatione proprii corporis, et compassionem mentis ac mortificatione propriæ voluntatis (sicut princeps Apostolorum hortatur : Christus passus est pro nobis, vobis

I Petr. II, 21.

relinquens exemplum, ut sequamini vestigia ejus ; alibi quoque loquitur Paulus :

Galat. V, 24.

Qui autem sunt Christi, carnem suam crucifixerunt cum vitiis et concupiscentiis ; simul et resurrectionis erimus, id est, tunc etiam complantabimur seu conformabimur similitudini resurrectionis Christi,

Rom. VI, 4.

ambulando in novitate vitæ, quæ per Christi resurrectionem figuratur. Mors quippe et resurrectio Christi non solum sunt res, sed etiam sacramenta seu signa : ita quod mors Christi significat vitiosæ ac veteris vitæ extirpationem ; resurrectio autem Christi, spiritualem mentis renovationem, juxta illud ad Colossenses : Si consurrexistis cum Christo, quæ sursum sunt querite. Si ergo in vitiorum mortificatione in Baptismo collata manserimus, non redeundo ad vitia, tunc resurrectioni Christi similes erimus, cœlestem conversationem habendo in terra.

Coloss. III, 1.

Hoc scientes quia vetus homo noster. Expositores quos legi, ita exponunt hunc locum : « vetus homo noster », hoc est fomes peccati, simul crucifixus est, id est, virtute et merito passionis Christi debilitatus est. Vel, « vetus homo noster », id est conversatio vetus et prava, « simul crucifixus est », hoc est, morte Christi deleta est, quoniam Christus abstulit sua passionem peccata mundi, delens quod adversus nos erat chirographum decreti, ut ad Colossenses plenius scribit Apostolus ; ut destruat corpus peccati, id est congeries vitiorum. De quo corpore ait Salvator : Si

Matth. VI, 23.

fuerit oculus tuus nequam, totum corpus tuum tenebrosus erit. — Verumtamen videtur hic passus aliter et magis consonanter ad litteram sic posse exponi : « vetus homo noster », id est quilibet nostrum secundum suam vitiosam ac veterem conversationem, « simul crucifixus est », hoc est simul cum Christo cruci affixus, per præfigurationem et obligationem. Per hoc namque quod crucifixus est Christus, monstravit quod unusquisque fidelium, si velit salvari, debeat Christum sequi, tollendo crucem suam quotidie, prout ipse Salvator disseruit : Qui vult venire post me, abneget semetipsum, et tollat crucem suam quotidie, et sequatur me. Ad hoc quoque nos obligat crucifixio Christi Domini nostri, quoniam non est servus major domino suo. Vel, « vetus homo noster », id est quilibet nostrum secundum originale peccatum ab Adam contractum, « simul crucifixus est », id est huic peccato mortificatus, quia in Christi passione liberati sumus ab isto peccato. « Ut destruat corpus peccati », hoc est, caro nostra multis peccatis fœdata destruat, non quantum ad esse naturæ, sed culpæ, quemadmodum alibi scribit Apostolus : Mortificate membra vestra quæ sunt super terram. Et Christus testatur : Si oculus tuus scandalizat te, erue eum et projice abs te. *Ut ultra non serviamus peccato*, hoc est, non subdamur, nec superemur a vitiis, quia ut apud Joannem habetur, Omnis qui facit peccatum, servus est peccati. Et Petrus asserit : Iniqui sunt servi corruptionis ; a quo enim quis superatus est, hujus et servus est.

Luc. IX, 23.

Joann. XIII, 16.

Coloss. III, 5.

Matth. XVIII, 9.

Joann. VIII, 34.

II Petr. II, 19.

Qui enim mortuus est peccato, id est a vitiis emundatus ; vel, « qui mortuus est », hoc est configuratus morti Christi, per susceptionem Baptismatis ; *justificatus est a peccato*, hoc est, liber factus est ab eo, nec subjacet vitio. Baptismus equidem liberat a pœna et culpa.

Si autem mortui sumus cum Christo, id est ejus passioni et morti conformati, atque a culpis mundati, credimus quia

simul etiam vivemus cum Christo, quia A tur Deus apud Zachariam : Auferam ini- *Zach. iii, 9.*
in hac vita vivemus in eo per gratiam, et quitatem terræ illius in die una. Tunc
in futuro per gloriam. *Scientes* per fidem enim Pater per Christi passionem abstulit
certissimam : de qua scientia ait beatus peccata Ecclesiæ, quæ est terra Christi.
Job xix, 25. Job, Scio quod Redemptor meus vivit, et in *Quod autem vivit* post resurrectionem,
novissimo die de terra surrecturus sum ; *vivit Deo,* hoc est ad gloriam Dei, quia
Joann. xi, 24. et Martha, Scio quia resurget frater meus in quantum homo, est et vivit ad
in resurrectione in novissimo die ; *quod* honorem et gloriam superbeatissimæ Tri-
Christus resurgens ex mortuis, jam non nitatis, tanquam servus illius. De quo
moritur, id est, de cetero non morietur : apud Isaiam loquitur Deus : Ecce servus *Is. xlii, 1.*
quia ad immortalem ac impassibilem vi- meus, suscipiam eum.
tam surrexit, quum impassibilitas sit dos
corporis glorificati. *Mors illi ultra non* B *vos mortuos quidem esse peccato,* hoc est
dominabitur, id est, læsionem ei non in- liberatos a vitiis merito Salvatoris, quan-
feret, nec animam a suo corpore separa- tum ex parte ipsius est, *viventes autem*
bit. *Quod enim mortuus est peccato,* id *Deo,* hoc est ad gloriam Dei, agendo quæ
est peccatorum nostrorum demerito, seu ei sunt placita, *in Christo Jesu Domino*
propter expianda et auferenda mundi pec- *nostro,* id est per meritum et gratiam ejus,
cata, juxta illud Isaïæ, Vulneratus est pro- et permanendo in eo, tanquam in media-
pter iniquitates nostras, et attritus est tore, salvatore et capite. Ipse namque pro-
Is. liii, 5. propter scelera nostra ; *mortuus est se-* testatur : Si quis in me non manserit, mit- *Joann. xv, 6.*
mel, in die Parasceves. De qua die loqui- tetur foras sicut palmes, et arescet.

SERMO PRIMUS

QUALITER VITA CHRISTI EST EXEMPLAR VITÆ CHRISTIANORUM.

NEMO venit ad Patrem, nisi per me. C *Joann. xiv, 6.*

Ista sunt verba Christi in sermone quem post Cœnam novissimam fecit Apostolis. In quibus docet Salvator, quod nemo possit Deo Patri uniri, nisi in Christum credendo, et ejus virtutes sectando. Idcirco, secundum Augustinum, vita Christi exemplar est conversationis omnium Christianorum.

Ad hoc enim quod aliquis Deo complacet justeque conversetur, primo requiritur conceptio boni propositi, juxta illud *Is. xxvi, 17, 18, juxta LXX.* Isaïæ : A facie tua, Domine, concepimus D spiritum salutis. Unde in Proverbiis Salomon profitetur : Hominis est animum præparare, id est se ipsum ad bona disponere, concipiendo bonum propositum. Et Au-

gustinus affirmat : Qui creavit te sine te, non justificabit te sine te, id est absque tua cooperatione ; quia debet homo facere quod in se est. Propter quod per Zachariam Dominus ait : Convertimini ad me, et convertar ad vos. Ab hoc proposito longe sunt qui adhuc permanent in affectu peccandi. Sed quidam sunt qui post aliquod tempus se emendare proponunt, et interim in suis fœditatibus jacent : quorum stultitia magna est, quod tantis periculis se exponunt in differendo, quum dicat Salvator, *Zach. i, 3.*
Vigilate, quia nescitis diem neque horam : *Matth. xxv, 13.*
interim quoque tot bona omittunt, et Creatori suo ita ingrati sunt. Hæc propositi boni conceptio designatur per Christi conceptionem purissimam de Spiritu Sancto.

Secundo, ad bonam conversationem exigitur spiritualis regeneratio, juxta illud : *Joann. iii, 5.* Nisi quis renatus fuerit ex aqua et Spiritu Sancto, non potest introire in regnum Dei. In qua regeneratione homo moritur sibi ipsi et vanitati, et incipit vivere Deo per gratiam et virtutes, quæ in Baptismate conferuntur. Hæc regeneratio designatur per Christi nativitatem sanctissimam.

Tertio, requiritur operum bonorum continuatio, et spiritualis profectus virtutum, quoniam sola perseverantia coronatur, et in virtutibus non proficere est deficere. Hæc continuatio designatur per virtuosissimam Christi conversationem in sæculo isto. Oportet itaque Christi humilitatem, patientiam, caritatem, ceterasque virtutes stabiliter imitari, et in eis proficere, ut in bonis operibus efficiamur quotidie promptiores, diligentiores ac ferventiores. Sed hujus contrarium agunt multi qui in principio suæ conversionis seu alicujus bonæ exercitationis ferventes sunt, sed paulatim tepescunt; et quanto aliqua opera bona agunt frequentius, tanto hæc agunt remissius. De quibus ait Apostolus ad Galatas, *Galat. iii, 3.* quod quum spiritu cœperint, carne consummantur. Unde bona quæ faciunt ex quadam arida consuetudine, faciunt sine gustu et absque custodia mentis atque fervore. Sic vadunt ad Missam, et corde vago ac indevoto stant coram Altissimo : quod valde damnabile esse constat ex eo quod *Jer. xlviii, 10.* Jeremias testatur, Maledictus qui facit opus Dei negligenter. Isti advertant quod *Apoc. ii, 4.* Christus ait ad quemdam : Habeo adversum te, quod caritatem tuam primam reliquisti. Memor esto itaque unde excideris, et pœnitentiam age : alioqui veniam tibi cito. Itemque : *Ibid. iii, 15.* Scio opera tua, quia nec calidus es, nec frigidus ; sed quia tepidus es, incipiam te evomere ex ore meo. Unde qui est in statu salutis, puta in caritate et gratia, nisi fuerit corde custoditus et timoratus jugiter coram Deo, cito cadit et vincitur. Propter quod ait Scriptura : Si non in timore Dei tenueris te instanter, cito subvertetur domus tua, id est mens tua. Apo-

stolus quoque : Cum metu (inquit), timore *Philipp. ii, 12.* et tremore vestram salutem operamini.

Quarto, exigitur pugnatio contra aciem vitiorum tentamentaque dæmonum, quia ut dicitur in Job, Militia est vita hominis *Job vii, 1.* super terram, id est continua pugna contra invisibiles hostes humanæ salutis, et contra vanitates mundi ac desideria carnis. Contra quæ omnia nisi prævaluerit homo, peribit, dicente Apostolo ad Timotheum : Non coronatur nisi qui legitime *II Tim. ii, 5.* certaverit. Et Propheta hortatur : Viriliter *Ps. xxx, 25.* agite, et confortetur cor vestrum, omnes qui speratis in Domino. Ista pugnatio designatur per Christi tribulationem quam a Judæis diu ac frequenter sustinuit : quia verbis et factis persequiebantur eum, jam conando ut eum præcipitarent, jam ut lapidarent; et contumeliosissima verba dixerunt ad eum, videlicet : Insanit, dæmonium habet ; In principe dæmoniorum *Luc. iv, 29.* ejecit dæmonia ; Homo vorax, potator vini. Contra quæ omnia Christus per suam insuperabilem patientiam pugnavit atque *Joann. x, 31.* prævaluit. Potest quoque pugnatio ista designari per tentationem Christi in deserto, in templi pinnaculo, in monte excelso. *Ibid. 20.* *Matth. ix, 34.* *Ibid. xi, 19.*

Quinto, requiritur labor pœnitentiæ post ruinam, et remedium. Estque necesse ut juxta magnitudinem multitudinemque excessuum sit magnitudo contritionis internæ et pœnitentiæ : graviora quippe delicta gravius sunt delenda ; nec sufficit labiis dicere, Peccavi, sed cordialiter dolere oportet, et proportionabiliter ac condigne. Et periculosum est pœnitentiam istam differre, quia ut scribit Gregorius, Peccatum quod per pœnitentiam non deletur, suo mox pondere trahit ad aliud. Sicque perducitur homo ad consuetudinem pravam, quæ tanquam lapis gravissimus deprimit mentem ejus, et a vera pœnitentia impedit eum, ita quod vix aut difficulter resurgit. Hic labor designatur per Christi acerbissimam passionem.

Sexto, requiritur recollectio mentis ad Deum, per cessationem ab occupationibus exterioribus. Oportet enim sæpe mentem

ad Deum levare, et coram eo conscientiam A
examinare, atque de pertinentibus ad sa-
lutem meditari, de brevitate et incertitu-
dine vitæ præsentis, de rigore divini ju-
dicii, de beneficiis Christi, de inferni
tormentis, de supernorum civium felici-
tate ac gaudiis. Ista recollectio designatur
per Christi requiem in sepulcro.

Septimo, oportet sæpe gratiarum cha-
rismatibus innovari, et in sacratioribus
diebus speciali devotione ornari, atque
cum ampliori mentis alacritate ac puritate
Deo vacare ac ministrare, ejusque laudi- B
bus ac orationibus et exercitiis virtuosus
insistere : sicut in festis præcipuis, et tem-
pore quadragesimali, et in Adventu. Hæc
innovatio per Christi resurrectionem si-
gnatur. Unde in hodierna epistola dicit
Rom. vi. 4. Apostolus : Quemadmodum Christus sur-
rexit a mortuis, ita et nos in novitate vitæ
ambulemus ; et alibi, Renovamini spiritu
mentis vestræ. In Isaia quoque habetur :
Ephes. iv. 23. Si glorificaveris Dominum, implebit splen-
doribus animam tuam.
Is. lxxiii. 13, 11.

Octavo, debet interdum adesse aliquis C
saltem contemplatio divinorum : quia qui-
cumque est in caritate et gratia, habet
etiam donum sapientiæ secundum aliquem
gradum ; et per illud potest ac debet in-
terdum contemplari quam bonus et glo-
riosus est Dominus Deus noster, quam om-
nipotens et perfectus, quam pius, liberalis
et justus, et quanta est caritas ac miseri-
cordia ejus super homines, quam ineffa-
bilem beatitudinem præparavit suis ele-
ctis. Hinc ait Apostolus : Quæ sursum sunt

sapite. Ista contemplatio per Christi as-
censionem significatur.

Postremo, finis ac præmium omnium
prædictorum, utpote beatitudo æterna, de-
signatur per Christi consessum in dexte- *Marc. xvi,*
ra Dei Patris. Unde in Apocalypsi asserit ^{19.}
Christus : Qui vicerit, faciam eum sedere *Apoc. iii, 21.*
mecum in throno meo, sicut et ego vici et
sedi cum Patre meo in throno ejus. In
evangelio quoque Joannis dicitur : Pater, *Joann. xvii,*
quos dedisti mihi, volo ut ubi sum ego, et ^{24.}
illi sint mecum, ut videant claritatem me-
am quam dedisti mihi.

Itaque omnia jam præacta ad christia-
nam vitam spectantia habere et exercere
conemur, et usque in finem perseveremus
in eis. Legitur de quodam rege, quod fuit
conversus ad fidem Christi ; quumque ba-
ptizari deberet, et unum pedem posuisset
in aqua, interrogavit ubi esset major pars
hominum mortuorum et regum ac princi-
pum. Responderunt ei qui aderant, quod
in inferno. Tunc stolidus ille pedem suum
retraxit, dicens se velle venire post hanc
vitam ubi major pars hominum esset. Et
ita ad infidelitatem suam reversus, die
tertio aut circiter exspiravit, atque in in-
fernum descendit. Non consideravit ille
infelix, quod quanto plures sunt in infer-
no, tanto major est eorum calamitas : nam
sicut in cœlo unus Sanctus auget felicitatem
alterius, sic in inferno unus damnatus
alterius auget miseriam. Idcirco in con-
demnatis locum non habet illud commune
dictum : Solatium est miseris socium ha-
bere in pœnis.

ENARRATIO IN EVANGELIUM

NISI ABUNDAVERIT JUSTITIA VESTRA PLUS QUAM SCRIBARUM ET PHARISÆORUM,
NON INTRABITIS IN REGNUM COELORUM. Matth. v, 20-24.

CHRIŒTUS in evangelio hodierno docet, D
quam magna sit evangelicæ legis per-
fectio, et item quam arcta sit via salutis,

atque quam magnus ac metuendus sit ri-
gor divini judicii. Itaque, sicut Matthæus
ait, *Jesus* Christus in sermone quem fecit

in monte, inter cetera *dixit discipulis suis* : *Nisi abundaverit justitia vestra plus quam abundat justitia Scribarum et Phariseorum*, id est, nisi justiores, virtuosiores seu perfectiores fueritis Scribis et Phariseis (Scribæ autem fuerunt doctores Judæorum, et Pharisei erant religiosi eorum), *non intrabitis in regnum cælorum*, hoc est, æternam salutem non acquiretis, sed damnabimini in æternum. O quam formidanda est comminatio ista ! primo, propter tanti boni amissionem ; secundo, propter tanti mali acquisitionem.

Deinceps ratio hujus sententiæ Christi potest tripliciter assignari. Primo, quoniam Scribæ et Pharisei, quamvis vera et salutaria docuerunt, non tamen secundum propriam doctrinam vixerunt. Hinc ait Salvator : Super cathedram Moysis sederunt Scribæ et Pharisei : omnia quæcumque dicunt, facite ; secundum opera vero eorum nolite facere, dicunt enim et non faciunt. Secundo, quia Scribarum et Phariseorum justitia fuit servare præcepta legis secundum superficiale intellectum eorum, videlicet, non occidere, non mœchari, vitando dumtaxat opera exteriora iniqua, non desideria prava : quia per præcepta hujusmodi putabant prohiberi opera, non affectum. Talis autem justitia non sufficit ad salutem. Et juxta hunc sensum loquitur Christus hoc loco, prout verba pandunt in textu statim sequentia. Tertio accipi potest, quasi specialiter dictum ad Apostolos, ac prælatos, qui ex speciali vocatione, professione, gradu sive officio, ad perfectionem tenentur : idcirco eorum non est circa communia languere, sed oportet ut subditorum vitam virtutum perfectione transcendant, quum habeant eos purgare, docere et virtuosos efficere.

Verumtamen Christus dixit hæc verba prout ad universos pertinent Christianos. Nam subdit : *Audistis quia dictum est antiquis*, id est, populo Judæorum de Ægypto egresso Deus per Moysen jussit : *Non occides hominem ; qui autem occide-*

A *judicio* damnationis, id est, mortem corporalem meretur, et etiam condemnationem æternam, quæ est mors pessima. *Ego autem dico vobis*, quia non solum occidere prohibeo, sed protestor *quia omnis qui irascitur fratri suo*, hoc est proximo, ira inordinata, rationem excæcante, *reus erit judicio*, hoc est accusatione coram divina justitia. Hoc est dicere : Ego legem non solvo, sed impleo, perficio et expono, et ad perfectam ac sufficientem justitiam doceo ac perduco. In lege namque aperte prohibetur homicidium, quum dicitur, *Non occides* ; sed lex non exponit perfecte qualiter intelligendum sit illud præceptum. Sed Christus id fecit, dicendo : « Omnis qui fratri suo irascitur », id est, vindictam inordinate desiderat, seu nocumentum inferre proponit, « *judicio reus* » est.

Quocirca sciendum, quod aliqui Judæorum per præcepta illa negativa, *Non occides*, non furaberis, non mœchaberis, æstimabant sola opera prohiberi, non cogitationes et affectiones ad opera vitiosa ; nec putabant eas esse peccata, nisi in opus procederent : cujus oppositum docuit Christus. Imo ex lege et Prophetis potest oppositum demonstrari, quum Michæas dicat : *Væ qui cogitatis inutile* ; Zacharias quoque, *Malum vir fratri suo non cogitet in corde suo*. Per Jeremiam quoque Dominus ubertim præcepit : *Revertimini a cogitationibus vestris pessimis*. Imo peccatum non est in opere exteriori, nisi ex interiori deformitate et inordinatione. Peccatum quoque potissime est aversio mentis a Deo.

Qui autem dixerit fratri (id est proximo) *suo, Raca*, id est, verbum indignationis, interiorem iram manifestantis, protulerit, tamen in generali atque confuse, nec certam vituperationem aut contumeliam inferens, sed interiorem commotionem per verbum indignationis in generali aperiens ; *reus erit consilio*, id est tractatu quo investigatur qua pœna torquendus sit quem constat esse damnandum. *Qui autem dixerit proximo suo, Fatue*, id est, commo-

Matth.
xxiii, 2, 3.

Exod. xx, 13. *Non occides hominem ; qui autem occide-*

Matth. v,
17.

Exod. xx,
13.

Ibid. 13-15.

Mich. ii, 1.
Zach. vii,
10.
Jer. xxv,
5; xxxv, 15;
xxxvi, 3, 7.

tionem iracundiæ suæ per verbum contumeliosum, manifestam et certam vituperationem significans, effuderit; *reus erit gehennæ ignis*, id est pœnæ infernalis.

Ecce triplex gradus culpæ, cui correspondet triplex gradus reatus seu pœnæ. Est enim ira latens in corde. Cujus pœna est, mereri reprobationis iudicium, et esse iudicio dignum. Est etiam ira prorumpens in vocem indignationis ac vituperationis in generali: quod primo est gravius. Ideo ejus pœna est, prolatio sententiæ contra eum: quæ pœna etiam est gravior prima. Est quoque ira in verbum contumeliosum certæ aspernationis prorumpens: quod primis duobus est gravius. Ejusque pœna est, ignis gehennæ: quæ præactis est gravior pœnis; et tamen duæ illæ pœnæ ordinantur et tendunt ad pœnam hanc tertiam. Loquitur enim Salvator de ira prout est mortale peccatum, videlicet ex rationis consensu cum affectu nocendi injuste. Dicere autem «raca» ex tali ira, est gravius; sed dicere «fatue» ex iræ commotione, gravissimum est. — Insuper, secundum Hieronymum, «raca» est verbum Hebraicum, significans vacuum aut inane; idem dicit Chrysostomus. Remigius vero cum præfatis testatur, quod sit nomen Hebraicum; sed addit, quod sit interjectio indignantis. Augustinus autem affirmat, quod sit vox non significans aliquid determinate, sed solum commoti cordis passionem, cujusmodi sunt interjectiones. Sed istud faciliter concordatur, quia secundum Chrysostomum, quamvis significet vacuum aut inane, id est stultum, hic tamen accipitur juxta usum loquentium Judæorum, utpote interjectionaliter, secundum modum expositum, prout quælibet regio habet aliquod exprobratorium verbum. Possent hic multa induci de ira, quando et qualiter sit peccatum; sed de hoc in sermonibus mentio fiet.

Sed circa prædicta oritur quæstio, quia *Act. 1, 1.* de Christo scriptum est, Cœpit Jesus facere et docere, quomodo ergo nunc tam districte damnat eos qui proximum nomi-

nant fatuum, quum ipsemet post resurrectionem suam dixerit duobus discipulis: O stulti et tardi corde ad credendum! Apostolus quoque ad Galatas: O insensati (inquit) Galatæ! Et respondendum, quod quum verba sint signa et notæ conceptionum animæ, ex ipsa cordis intentione et affectione considerantur virtus et culpa in verbis. Dum ergo verba præacta dicuntur non animo calumniandi aut aspernandi, sed instruendi, et caritative corripiendi, non sunt illicita.

Ex præhabitis infert Salvator: *Si ergo*, hoc est, quum non liceat irasci fratri, aut dicere ei «raca», vel «fatue», idcirco si *offers munus tuum*, hoc est oblationem corporalem vel spiritualem, *ad altare* materiale in templo; vel, «ad altare» spirituale in anima, quod est fides, secundum Augustinum, vel caritas, secundum Gregorium. Nil enim acceptum est Deo nisi in fide et caritate agatur atque fundetur, et per eas Deo exhibeatur. *Et ibi*, videlicet in loco et tempore oblationis, *recordatus fueris quia frater* (hoc est proximus) *tuus habet aliquid*, hoc est justam querelam, *adversum te*, propter injuriam a te ei illatam, ita quod ei in aliquo forefecisti. Si enim tu eum offendisti, ipse habet adversum te, non tu contra eum. Si vero ipse te offendit, tu habes adversum eum; sed tunc sufficit ut ei ignoscas sicut vis tibi a Deo ignosci, nec oportet te facere quæ sequuntur: quæ tamen si feceris, opus est magnæ perfectionis, caritatis et pietatis, maximumque a Deo præmium consequeris.

Relinque ibi munus tuum ante altare, id est, inchoatum obsequium seu oblationem intermitte seu suspende, actu aut proposito, hoc est realiter inde cessando, aut mentaliter proponendo agere quæ sequuntur loco et tempore opportuno; *et vade prius reconciliari fratri tuo*, hoc est, placa et satisfac ei, veniam postulando, et satisfaciendo, secundum exigentiam culpæ. Obsequium enim seu servitus nostra Deo non placet nisi ex caritate procedat:

Luc. xxiv, 25.
Galat. iii, 1.

quam non habet, imo et contra justitiam agit, qui fratri a se læso non studet reconciliari ac satisfacere. Eundum est autem pedibus corporis, si commode fieri possit, ut si frater offensus non longe sit haberique valeat. Alias eundum esset pedibus mentis, hoc est desiderio atque proposito, quatenus proponas et optes ei statim satisfacere quantum in te est : quod quia non vales, intendas eum accedere et placare congruo loco et tempore. In his quoque pensanda est mensura offensæ, hoc est magnitudo injuriæ proximo irrogatæ, quæ quanto major exstiterit, tanto celerius laboriosiusque conandum est ut reconcilietur offensus. Interim vero debemus munus ante altare relinquere, id est non facere seu continuare opera bona nisi primo proponamus ire tempore apto ad fratrem offensum ut reconcilietur : quod plane propositum exsequi mox oportet dum convenienter fieri poterit.

Porro, secundum Chrysostomum et Casianum, ad caritatis perfectionem præcipue pertinet, ut etiam ille qui læsus est, studeat mitigare forefactorem, non solum illatam dimittendo injuriam, sed et blando sermone cor ejus placando, quatenus de cetero sincerum ad se gerat affectum. Si enim possum alterius quamvis injuriatoris perversitatem curare, et animam ejus de morte peccatī eripere, primo accedendo ad eum et pacem reformando inter eum et me, et tamen non facio hoc, videor non esse perfectus in caritate Christi, qui etiam pro iniquis sanguinem suum fudit, nec proximi, quem possum a tanto liberare periculo humiliando me

A ipsum. Dicit ergo Chrysostomus : Ne dicas, Ille mihi nocuit, ille mihi satisfacere debet, non ego illi. Si pro gloria tuæ salutis jubet te Dominus amicitias facere, tu potius nocitus seu nocumentum perpesus, debes nocentem rogare, ut duplicem gloriam consequaris : unam, quia nocitus es ; alteram, quia prior rogasti. Festina ergo inimicum tuum prævenire ad amicitias, ne forsitan te tardante, ille præveniat ad rogandum, et rapiat de manibus tuis pietatis mercedem. Nam si ille B tibi nocuit, et ille te rogat, infructuosa est amicitia tua. Quam enim justitiam fecisti ante Deum, si rogatus te placaveris ?

Et tunc veniens, hoc est, localiter rediens, vel intentionem tuam ad id quod cœperas, revocans, *offeres munus tuum*, hoc est, inchoatum Dei obsequium prosequeris, spirituales aut corporales hostiæ sunt devota oratio, Dei laudatio, cordis compunctio, præceptorum impletio.

C Heu, quam male et pessime observant Christiani hanc Christi doctrinam, quia faciliter offenduntur, difficulter placantur, facili occasione injuriose loquuntur, atque pro parva offensa grandem cupiunt ultionem inferre, imo rogati vix possunt induci ad ignoscendum forefactoribus suis ! Plures quoque sunt tam duræ cervicis animosæque mentis, ut quamvis notabiliter forefecerint proximis suis, dedignantur tamen et verecundantur veniam postulare ab eis. Considerent, quæso, isti, quam longe distent ab evangelicæ legis observatione, et per consequens a salute.

SERMO SECUNDUS

QUALITER LICEAT IRASCI, ET QUALITER NON.

N*E sis velox ad irascendum, quia ira in sinu stulti requiescit.* Eccle. vii, 10.

Ira inter septem peccata mortalia computatur. Quum ergo ex suo genere sit peccatum mortale, merito Salomon exhortatur ne simus proni ad irascendum. Cui omnino concordat quod in prima sua Canonica ait apostolus Jacobus : Sit omnis homo velox ad audiendum, tardus autem ad loquendum, et tardus ad iram. Sed his atque similibus auctoritatibus Scripturarum contrariari videtur quod ait Psalmista, Irascimini, et nolite peccare : quam auctoritatem allegat, allegandoque approbat Paulus. Ergo prophetico apostolicoque testimonio ira est commendabilis. Insuper de Christo scriptum est apud Marcum : Contristatus est super cæcitate cordis eorum, circumspiciens eos cum ira. Omnis autem motus qui fuit in Christo, laudabilis exstitit.

Est itaque advertendum, quod sicut odium est unum septem mortalium vitiorum, nihilo minus est quoddam odium bonum. De quo fatetur Propheta : Nonne qui oderunt te, Domine, oderam? Perfecto odio oderam illos. Itemque : Iniquos odio habui. Hoc quippe perfectum atque laudabile odium, est odire iniquos secundum quod tales sunt, non in quantum sunt : imo ut homines, sunt amandi. Ita, quamvis ira generaliter sumpta dicatur mortale peccatum, est tamen aliqua ira bona, laudabilis, virtuosa. Ira namque est appetitus vindictæ propter illatam injuriam. Hæc autem vindicta bene et male potest optari et exerceri, videlicet, secundum rectæ rationis judicium et ordinem juris, et etiam modo perverso. Interdum etenim ira prævenit rationem : et ista est ira inordinata; et vocatur ira per vitium, quoniam

actum rationis impedit ac perturbat. Interdum ira sequitur rationem, ita quod ratio sponte iram assumit, ut actum virtutis robustius atque viriliter exsequatur. Est etiam naturale ut appetitu superiori ac intellectivo, utpote voluntate, secundum rationem moto, appetitus inferior sensitivus subsequenter moveatur et cooperetur : sicque ira sequitur rationem ac voluntatem, et eis deservit, sicut inferius suo superiori. Ista ergo est ira laudabilis, et vocatur ira per zelum, quia movetur contra injustitiam secundum rationis censuram; estque actus virtutis moralis quæ dicitur vindicativa, quæ est pars justitiæ. De qua ira dicit Gregorius : Tunc robustius ratio contra peccata erigitur, quum ira subdita rationi famulatur. Et iterum : Cavendum (inquit) summopere est, ne ira quæ ut instrumentum virtutis assumitur, rationi dominetur, ne quasi domina præeat, sed tanquam ancilla ad obsequium parata, a tergo rationis nunquam recedat.

Denique de hac ira intelligenda sunt verba Chrysostomi asserentis : Qui ex causa irascitur, reus non est. Nam si ira non fuerit, nec doctrina proficit, nec judicia stant, nec crimina compescuntur. Justa ergo ira, mater est disciplinæ, id est debitæ correptionis ac punitionis. Unde non solum non peccat qui cum causa irascitur, sed econtra, nisi iratus fuerit peccat, quoniam irrationabilis patientia vitia seminat, negligentiam nutrit, nec solum malos sed etiam bonos trahit ad mala. Hinc quoque ait Bernardus : Irascere, et noli peccare. Peccabis autem nimis irascendo, peccabis etiam omnino non irascendo. Nam non irasci ubi irascendum est, est nolle emendare peccatum; plus vero irasci quam

irascendum est, est peccatum peccato ad-
jicere. Præterea, sicut idem ait Bernardus,
Ira est naturalis affectio hominum, sed
abutentibus bono naturæ fit ira gravis
perditio. Unde, secundum eundem Ber-
nardum, Irasci debemus vitiis, præsertim
propriis culpis, deinde et proximorum
peccatis. Propterea iterum ait : Occupe-
mus iram in quibus expedit. Nolite irasci
eis qui vobis transitoria auferunt, qui con-
vivia inferunt, qui infligunt supplicia. Os-
tendam autem vobis cui debeatis irasci :
irascimini ei quæ sola potest nocere, ut-
pote propriæ iniquitati. Nulla enim nocebit
adversitas, si nulla dominetur iniquitas.
Qui huic perfecte irascitur, ceteris non
movetur. Insuper his concordat quod in
libro de Profectu religiosorum habetur :
Affectus iræ datus est homini ut irascatur
peccatis et malis suggestionibus, atque ex
indignatione non patiat se trahi ad con-
sensum peccati, et ut reprimat motus ma-
los in se et in aliis ubi congrue potest,
ulciscaturque Dei injurias et transgressio-
nes præceptorum ipsius, secundum quod
spectat ad ipsum. Et tunc dicitur zelus
justitiæ : sicut Christus legitur iratus fuis-
se Pharisæis et aliis non recte agentibus.
Nunc autem in vitium deformata est ira,
et contra rationem in furorem conversa,
ut more phrenetici moveatur homo contra
hominem, contra amicum et proximum,
et contra se ipsum, interdum etiam contra
insensibilia et irrationabilia, imo, quod
pessimum est, interdum contra Deum et
Sanctos.

Præterea quæri potest, quando et qua-
liter ira sit peccatum mortale. Et respon-
dendum, quod ira potest esse immoderata
dupliciter. Primo, ex parte vindictæ in
quam tendit, ut si pro parva injuria cu-
piat quis inferre magnam vindictam. Et
hæc ira ex suo genere est peccatum mor-
tale, quoniam caritati contrariatur, quæ
non irritatur, nec cogitat malum; contra-
riatur quoque justitiæ, quia majorem ex-
petit ultionem quam culpa meretur et
justum est. Potest tamen esse venialis

A propter parvitatem nocimenti illati, vel
propter modicitatem commotionis ratio-
nem prævenientis. Secundo, ira potest es-
se immoderata quantum ad modum ira-
scendi, quando videlicet nimis fervescit :
sic enim fit vitiosa, quamvis in finem
tendat laudabilem, puta ad correctionem
peccantis, punitionemque culpæ et con-
servationem justitiæ. Ira vero hoc modo
immoderata, sive intus quoad commotio-
nem, sive foris quantum ad iracundiæ
signa, non est ex suo genere mortalis, ni-
B si in tantum crescat, quod faciat homi-
nem a caritate Dei aut proximorum ex-
cidere : quod fit dum impedit hominem
ab eo ad quod tenetur, aut inducit eum
ad faciendum aliquid contrarium caritati
sive justitiæ. Itaque auctoritates Scripturæ
et Sanctorum quæ protestantur iram esse
omnino culpabilem ac vitandam, intelligi
possunt de ira dicta per vitium, de qua et
in evangelio hodierno loquitur Christus,
dicendo : Qui irascitur fratri suo, reus erit
judicio. Unde et Hieronymus asserit : De-
C finita sententia est, ut ira omnino tolla-
tur. Si jubemur, id est monemur, percutien-
ti alteram præbere maxillam, et inimicos
diligere, et pro persequentibus exorare,
omnis occasio iræ aufertur.

Præterea, ira ista per vitium, præsertim
quæ est mortale peccatum, valde vitanda
est. Primo, quoniam hominem intus om-
nino deordinat, et coram Deo deturpat ac
inhonestat : et hoc ideo, quoniam rationem
excæcat, et ita efficit hominem brutis
consimilem fatuisque conformem. Propter
quod, sicut in themate tactum est, Salo-
mon cohortatur : « Ne sis velox ad irascen-
dum, quoniam ira in sinu stulti », id est in
corde fatui, « requiescit ». Nam eo ipso quo
quis talem iram admittit et retinet, merito
stultus vocatur. Propter quod in Job asse-
ritur : Virum stultum interficit iracundia.
— Secundo, quoniam hominem foris con-
temptibilem reddit, et insano similem fa-
cit. Ira namque cito ac evidenter apparet
in visu, in facie, in voce et gestibus. Ideo
ait Hieronymus : Quid iracundo furor suus

Marc. iii, 5.

Matth. v,
22.

Ibid. 39, 44.

Eccle. vii,
10.

Job v, 2.

1 Cor. xiii,
5.

confert, quem sævissimis exagitat stimulis, et ita ab omni consilio efficit alienum, ut dum irascitur, insanire credatur? Et ita per iram homo alios scandalizat, sicque et aliis graviter nocet. — Tertio, quia per iram fit homo aliis onerosus et ad socialem vitam ineptus, impacificus quoque et turbulentus, juxta illud Proverbiorum : Spiritum ad irascendum facilem quis poterit sustinere? Et iterum Salomon loquitur : Ira non habet misericordiam, nec erumpens furor; et impetum concitati spiritus quis poterit sustinere? Hinc dicit Gregorius : Per iram justitia relinquitur, gratia vitæ socialis amittitur, mansuetudo perditur, lux veritatis repellitur. Unde in Ecclesiastico habetur : Vir iracundus incendit litem, et vir peccator turbabit pacem. — Quarto, quia per iram fit homo dæmonibus similis. Est namque, ut dicit Dionysius adstruit, in dæmonibus amens furor, phantasia proterva, et irrationabilis concupiscentia. Similiter in hominibus iracundis vigent amentia quædam, furor et phantasia proterva. Ideo etiam iracundi merito fatui appellantur, quoniam in Ecclesiastico scriptum est : Non est sensus ubi abundat amaritudo. Hinc dicit Apostolus : Omnis amaritudo, et indignatio, et ira, et clamor tollatur a vobis. — Quinto, per iram fit homo specialiter ineptus ad gratiam, et Spiritus Sancti inhabitatione indignus, quoniam Spiritus Sanctus super quietum et humilem requiescit, et in pace factus est locus ejus, diligitque pacificos. Quum ergo ira faciat hominem turbulentum, inquietum et animosum, constat quod Spiritus Sancti inhabitationem et gratiam vehementer impediat. Ideo quidam sanctus eremita asseruit : Iracundus homo quamvis mortuos suscitaret, Deo placere non potest; et item, Sicut hospitem fumus expellit de domo, sic ira expellit Spiritum Sanctum de cordis habitaculo.

Sed nunc breviter aliquid est tangendum de remediis contra iram. Quorum primum est, consideratio prædictorum ma-

lorum quæ homo per iram incurrit. Nam quædam quamvis in se sint multum delectabilia atque suavia, tamen propter mala annexa vitantur : quanto magis ira in se ipsa amara vitanda est, quum ex ea tot mala sequantur? Secundum est, aversio considerationis eorum quæ provocant iram, ut scilicet homo cesset attendere mala sibi aut suis illata, convertendo se ad alias meditationes et occupationes salubres. Quum enim ira sit quædam affectio, utpote appetitus vindictæ, oritur ex aliqua prima apprehensione; et qui apprehensionem illam abscindit, se ad alia convertendo, facilius vincit iram, quia cessante causa cessat effectus. Tertium est, consideratio mansuetudinis et patientiæ Christi atque Sanctorum, præsertim intenta meditatio passionis dominicæ. Si enim mansuetudinem et patientiam Christi rite pensemus, et quanta pro nobis pertulerit, meditemur, omnem iram impatientiamque repellimus, imo adversa cum gaudio sustinemus. Quartum est, consideratio multiplicis fructus et gratiæ ac salutis, quam iram vitando, refrenando, vincendo, acquirimus. Ait namque Salvator : Beati mites, quoniam ipsi possidebunt terram; et Psalmista : Mansueti hereditabunt terram, et delectabuntur in multitudine pacis. Quum enim ira sit quædam animi amaritudo, turbulentia et afflictio, mansueti qui iram vincunt, specialiter gaudent pace interna, et dulces sunt mente. Sanctus quoque Dionysius in epistola ad Demophilum monachum protestatur, quod Moyses, Joseph et David, ideo maximam apud Deum gratiam invenerunt, quoniam mites fuerunt. Unde Psalmista loquens de Deo : Exaltabit (inquit) mansuetos in salutem.

Quintum est, quoniam omnes in sæculo isto sumus comperegrini et conviatores, ad unam beatitudinis patriam proficiscentes : idcirco debemus mititer ad invicem conversari, atque ad progrediendum in via virtutum mutuo jugiter exhortari. Hinc Joseph fratribus suis profecturis dicebat :

Prov. xviii, 14.

Ibid. xxvii, 4.

Ecclesi. xxviii, 11.

De Divin. nom. c. iv.

Ecclesi. xxi, 15.

Ephes. iv, 31.

Cf. Is. lxvi, 1, 2.

Ps. lxxv, 3.

Matth. v, 9.

Matth. v, 4.

Ps. xxxvi, 11.

Epist. viii.

Ps. cxlix, 1.

Gen. xlv,
24.

Ne irascamini in via. Sextum est, consideratio adversitatum quæ possunt accidere, et contra eas se per rationem et mansuetudinem præmunire, quoniam jacula prævisa minus feriunt. Atque, ut ait Gregorius, mala mundi patientius toleramus, si contra ea per patientiæ clypeum præmunimur. Nam qui corporali congressuri sunt bello, primo discunt artem pugnandi et armant se, et quid eis accidere possit præcogitant, ut ea evadant. Septimum est, facere sibi consuetudinem resistendi primis motibus iræ, ipsamque iram intra se clausam tenere et suffocare, ne foris per verba et signa erumpat. Octavum est, Dei adjutorium jugiter atque cum omni fiducia invocare. Et hoc potissimum necessarium est his qui vel ex naturali dispositione, aut ex consuetudine, ad iram proclives sunt : nam et quilibet contra illa vitia debet specialius instantiusque pugnare, ad quæ se proniorem cognoscit. Superbi autem et magni in oculis suis, celerius et implacabilius irascuntur : quo enim se ipsos arbitrantur majores, excellentiores aut digniores, eo illatam sibi injuriam magis exaggerant, et gravius vindicare nituntur, quamvis sit parva.

Postremo, quadruplex est irascentium genus. Nam in quibusdam fervor iracundiæ cito incenditur, et cito exstinguitur. In aliis cito accenditur, sed difficulter exstinguitur : et isti sunt deteriores. In quibusdam tarde accenditur, et tarde exstinguitur. In ceteris tarde accenditur, et cito exstinguitur : et isti sunt aliis meliores. Sed, heu ! multi sunt nomine, non

A sæpissime et pro causis levissimis irascuntur, et irascendo jurant, perjurant, aliosque perturbant, contristant, et a devotione ac pace mentis impediunt, atque tam irrefrenate se habent ut bruta. Isti sunt ministri et membra diaboli, et non Christi. Emendent ergo se ipsos, et quanta mala ex eorum proveniant ira, pensent.

Recitat Augustinus in libro de Civitate Dei, quemadmodum quidam philosophi, scilicet Stoici, dixerunt, omnes animæ passionēs, videlicet iram, tristitiam, timorem, etc., esse vituperabiles, et animæ morbos. Quumque unus de illis philosophis esset quadam vice in navi, adessetque alius quidam adolescens lascivus et levis, orta est in mari grandis tempestas. Cœpit ergo philosophus ille formidare et pallidus fieri, sed juvenis ille imperterritus mansit, lætus et cantans. Postmodum tranquillitate reversa, adolescens ille insultavit philosopho, eo quod timuisset, et ipse mansisset imperterritus et jucundus. Respondit philosophus : Quid mirum si tu tam malam perdere vitam non timuisti, ego autem tam bonam amittere vitam expavi? Hujus simile contingit quotidie. Nam quidam vitæ vitiosæ ac perditæ, tempore tempestatum et fulgurum non verentur, quia se ipsos non amant veraciter, nec quid eis accidere possit perpendunt sapienter ; aliqui vero boni et sapientes in talibus metuunt, et quid contingere eis valeat intuentur. Non tamen in talibus est immoderanter timendum, sed homo debet se Deo committere, ipsum invocare, ac signo se crucis munire.

SERMO TERTIUS

QUALITER DEBEAMUS NOS PROXIMIS RECONCILIARE.

MEMENTO *novissimorum tuorum, et desine inimicari, et abstine te a lite.* Eccli. xxviii, 6, 10.

Perfectio rationalis creaturæ est, assimilari suo Creatori secundum modum sibi possibilem et decentem. Consideremus ergo qualiter Deus se habuit et quotidie se habet ad homines. Certe a principio mundi, genus humanum graviter ac multipliciter suum offendit Creatorem ac Deum, atque peccando inimicitias fecit inter Deum et se: nihilo minus Deus a principio mundi, per se ipsum, per angelos sanctos, per Patriarchas, Prophetas ac alios homines sanctos, præcipue per prælatos et prædicatores bonos, quos misit ad homines, invitavit eos ad faciendum ac conservandum pacem et amicitiam secum. Præterea, quum filii Israel, tempore Sedeciae regis et ante, Deum gravissime et supergravissime offendissent, idola venerando, Prophetas occidendo, innocentem sanguinem effundendo, aliaque horrenda facinora, quæ in Ezechiele propheta tanguntur, committendo; et ob hoc Deus minaretur eis captivitatem et destructionem per regem atque exercitum Chaldæorum: nihilo minus Deus piissimus, ex sua misericordia infinita, misit sæpissime ad prædictos filios Israel seu populum Judæorum Prophetas suos, hortans et invitans per eos populum illum ad pœnitentiam, ad amicitiam, ad salutem et pacem. Deinde Pater æternus unigenitum Filium suum misit in mundum universis sceleribus plenum, ut induceret homines ad pœnitentiam, ad caritatem et pacem secum. Propter quod ait Apostolus: Deus erat in Christo mundum reconcilians sibi.

Si igitur Deus majestatis immensæ, Rex

regum et Dominus universorum, cujus excellentiæ nullus est finis, tam gratiosissime et supermisericordissime dignatus est homines prævenire, quibus nunquam forefecit, imo quibus tam ineffabiliter beneficia multa et magna donavit, et a quibus pro tot beneficiis, tot et tantas recepit ingrattitudines, injurias, rebelliones, contumelias atque blasphemias; si, inquam, dignatus est hos taliter prævenire, hortando invitandoque eos ad suum amorem, ad pacem salutarem, ad beatitudinem æternalem: quanto magis nos miserrimi atque vilissimi peccatores, deberemus merito non solum ire ad eos quibus forefecimus, ad reconciliandum nos ipsis, videlicet veniam postulando et satisfaciendo, sed etiam laborare pro reconciliatione ejus a quo læsi et injuriam passi sumus, solliciti ex caritate pro ejus salute, ne in aliqua maneat culpa, ne Deum offendat, ne æternaliter pereat? Ad minus ergo oremus pro talibus, et omni industria qua valemus, ad nostram eos amicitiam revocemus. Porro, si duo aut plures sibi invicem forefecerunt, ita quod singuli obligantur veniam postulare, tunc pertinet ad virtutem, præsertim ad caritatem ac humilitatem, ut unusquisque illorum studeat alium prævenire, veniam deprecando ac satisfaciendo.

Insuper, quum post Christi ascensionem totus mundus præter Judæos esset idololatriæ deditus, et innumerabilibus maximisque repletus criminibus, nihilo minus Deus misit Apostolos et eorum coadjutores ad omnia gentium regna, ad omnem populum, tribum et linguam, hortans ac deprecans eos converti ad se et ad suum divinum amorem, ad pacem dulcissimam et gloriam sempiternam.

I Joann. iv, 9.

II Cor. v, 19.

Apoc. xix, 16.

Act. xiii, 46, 47.

Ecce quam infinita et prorsus incomprehensibilis est caritas, misericordia et liberalitas Dei ad homines, et quanta contrario est hominum ingratitude, perversitas atque inobedientia circa Deum, cujus vestigia sequi contemnunt, cujus præcepta transgrediuntur, pro cujus amore sibi invicem renuunt indulgere. Attendamus *II Cor. v, 20.* quod ait Apostolus : Legatione fungimur, tanquam Deo exhortante per nos; obsecramus pro Christo, reconciliamini Deo. Circa quæ verba ait in homilia Gregorius : Erubescat humana superbia, confundatur unusquisque, si non prior satisfaciatur proximo, quum ipse qui offensus est Deus, per suos nos rogat legatos ut ei reconciliemur, de nostris dolendo peccatis, atque de cetero inhærendo virtutibus.

Amplius, juxta modum offensionis debet esse modus reconciliationis, ut qui alium verbis offendit, verbis satisfaciatur, et ultro hoc agat quod requirit justitia. Unde qui alium offendit detrahendo, satisfacere debet famam ei restituendo; et qui abstulit aliena, restituat ea. Generaliterque loquendo, juxta juris tenorem vel prudentium virorum judicium satisfactio seu reconciliatio est agenda.

Præterea, ex his quæ a Deo acceperunt, Christifideles debent Creatori suo liberaliter ac devote offerre : non quod Deus bonorum nostrorum indigeat, sed in recognitionem gratissimam quod omne bonum ab ipso collatum est, et ad sustentationem ministrorum Ecclesiæ, atque ad alios pios usus. Et præsertim offerendæ sunt animo prompto ac læto debitæ oblationes, ad *Ps. xv, 2.* quas cunctis temporibus obligantur fideles. Similiter decimæ atque primitiæ, et

A cetera quæ debentur Ecclesiæ, sunt prompte ac fidelissime persolvenda. Nec ex hoc aliquis depauperatur, imo a Deo copiosissime remuneratur : primo, temporalium rerum majorem abundantiam acquirendo; secundo, corporalem sanitatem adipiscendo; tertio, peccatorum remissionem; quarto, gratiæ ac virtutum infusionem; quinto, æternæ gloriæ beatitudinem obtinendo. Ecce quam grata et placita est Domino Deo devota oblatio, decimarum solutio, et aliorum quæ ad Ecclesiam pertinent exhibitio B caritativa.

Deinceps ex præinductis monstratur, quam districta et ardua sit Christi doctrina, quam perfecta sit lex evangelica, quam vere angusta et arcta sit salutis via : quia *Matth. vii, 14.* tam faciliter meretur homo pœnam gehennæ, tamque caritative, mansuete ac juste tenentur homines invicem conversari, ne mutuo se offendant, ne irascantur, ne reconciliari et satisfacere negligant. Quæ omnia studiosissime impleamus, atque in omni caritate, pietate et æquitate pariter C conversemur.

Legitur quod sanctissimi patres, Epiphanius episcopus Cypri, et abbas Hilarion, quadam vice pariter vescebantur. Quumque S. Epiphanius posuisset aliquid coctæ carnis ante B. Hilarionem, dicens, Abba, manduca; respondit Hilarion : Ex quo factus sum monachus, non gustavi aliquid tale coctum. Cui Epiphanius præsul respondit : Et ego ex quo habitum istum accepi, non permisi dormire quemquam habentem aliquid contra me, nec D ego dormivi aliquid habens contra aliquem. Tunc dixit abbas Hilarion : Ignosce mihi, quia conversatio tua major est.

AD RELIGIOSOS

SERMO QUARTUS

QUOMODO BONI RELIGIOSI IN NOVITATE VITÆ AMBULANTES, SE VIRTUTIBUS
VITÆ CHRISTI CONFORMARE DEBEANT.

QUOMODO *Christus surrexit a mortuis, ita et nos in novitate vitæ ambulemus.* Rom. VI, 4.

Quidquid pro nostra salute egit pertulitque Salvator, nostra est instructio. Quum enim in forma Dei esset, per deitatis naturam Patri æterno vere æqualis, incomprehensibiliter exinanivit se ipsum, nostram sibi hypostatice assumendo naturam, ut totius atque plenissimæ humilitatis nobis præberet exemplum : ut scilicet in omnibus humiliemus, parvi pendamus et sapienter dejiciamus nos ipsos ; neque ex hoc unquam inaniter gloriemur, scientes quod quantumcumque humiliaverimus et parvi penderimus nos, nihil est comparisone humilitatis profundissimæ Christi. Quum itaque non sit servus major domino suo, imitemur Christi humilitatem ut possumus ; atque in hoc compleatur humilitas nostra, ut quum totis viribus humiliaverimus nos ipsos in omnibus, recognoscamus ac fateamur nos nil condignum egisse. Sic et in ceteris est considerandum ac peragendum virtutibus, ut scilicet Domini nostri patientiam, mansuetudinem, fortitudinem, obedientiam, puritatem, sobrietatem et caritatem toto posse sectemur, nec quid condignum nos facere arbitremur, præsertim quum et Dominus in Evangelio dixerit : Quum feceritis omnia quæ præcepta sunt vobis, dicite : Servi inutiles sumus ; quod debuimus facere, fecimus. Ecce Filius Dei propter nos a summo cælo descendit in hunc mundum infe-

riorem, et propter nos pauper effectus est. Imo in summa paupertate, incomparabili patientia, in omnium virtutum plenitudine conversari dignatus est inter homines, viam salutis nobis demonstrans et dicens : Ego sum via, veritas et vita ; nemo venit ad Patrem, nisi per me. In præ-tactis ergo virtutibus ipsum sectemur ; et sicut ipse surrexit a morte, « ita et nos ambulemus in vitæ » assidua « novitate », non solum in præfatis perseverando virtutibus, sed et incessabiliter satagamus proficere in eisdem, ut anima nostra quotidie renovetur, virescat, copiosiusque resplendeat.

Denique « in novitate vitæ » ambulamur, quando quotidie cum recenti fervore, cum ferventiori vigore, cum vigorosiori constantia Deo servimus ; quum pristinis consuetudinibus, et sæcularibus moribus atque mundanis affectibus omnino renuntiamus ; quando cum tanta alacritate, humilitate, devotione, compunctione, lacrimis, patientia et fervore Deo jam famulamur, cum quanta promptitudine, elatione, vanitate, impatientia, libidine olim in sæculo obsequabamur diabolo, quanquam Deo majesticis immensæ incomparabiliter devotius, ardentius, humiliter perfectiusque esset jugiter ministrandum.

Insuper « in novitate vitæ » ambulamur, quando soli vivimus Creatori, qui olim non Creatori, sed nobis ipsis tantummodo vivimus. Dum enim ad se ipsum inordinate reflexus est homo, et contra Dei præce-

II Cor. VIII, 9.

Baruch III, 38.

Joann. XIV, 6.

Ps. CII, 5.

Philipp. II, 6, 7.

Joann. XIII, 16 ; XV, 20.

Luc. XVII, 10.

Ps. XVIII, 7.

pta, monita sive consilia quærit ac diligit commoda sua, opes terrenas, proprias libertates, delectationem illicitam, temporalem honorem, laudem inanem, tunc vivit sibi, non Deo : etsi vivat vita naturæ, mortuus tamen est morte culpæ. Quum vero tota mente in Deum conversus est, illum super omnia pure amans, neque se ipsum nec aliud quidquam nisi in Deo, secundum Deum et propter Deum diligens, tunc vivit Creatori, non sibi, et cum

Galat. II,
20.

Apostolo dicere potest : Vivo autem, jam non ego, vivit vero in me Christus. Istud autem ad religiosos potissimum pertinet, ut scilicet quotidie magis ac magis abnegent, deserant, frangant, vincant mortificentque se ipsos, quatenus per plenariam privati ac improbi evulsionem amoris, ad sincerissimam caritatem pertingant : qua adepta, Deus erit tota eorum intentio, appetitio, delectatio, opulentia, spes, refugium, quies. Verum ad istud non facile pervenitur. Difficile, et nisi Dei adsit copiosum subsidium, prope impossibile est propriam sic superare naturam, tamque complete a se ipso averti, ut homo nec benedictione, nec maledictione, nec laude, nec vituperiis moveatur, nulla irrisione, persecutione, molestia incurvetur, nulla externa inquietudine pacem amittat internam, malitque in omnibus despici, subjici, injurias ferre, nesciri ac jugiter obedire, quam aliquid reputari, aut quomodolibet sublimari. Et tamen nisi quis talis efficiatur, nisi sic deficiat, mortificetur et a se ipso salubriter avertatur, nil sui relinquens sibi, non potest ad monasticam perfectionem, nec ad caritatis pertingere apicem. Ideo frater Zacharias, super quem sanctissimus abbas Moyses vidit Spiritum Sanctum descendere, ab eodem Moyse interrogatus, Quomodo possum fieri monachus? primo ex humilitate se projecit ad pedes illius tam sancti abbatis, dicendo : Me interrogas, Pater? Deinde respondere compulsus, accepit cucullum suum, et eum suppeditans, ait : Nisi sic conculcatus fuerit homo, non potest fieri

A monachus; hoc est, nisi se ipsum ita conculcet, frangat, subjiciat, ab aliis quoque se conculcari, injuriis affici, humiliari, irrideri permittat, non potest ad monachalem pertingere perfectionem.

Heu, ad ista quid dicimus, aut dicere quid poterimus, qui pro modicissima forsitan injuria, pro uno verbo aut signo, mente et corpore indisponimur et turbamur, conquerimur, ultionemque petimus, aut, quod periculosius est, nos ipsos ulciscimur? Quumque per Moysen dixerit Deus,

B Qualem quis læsionem intulerit, talem sustinere cogetur, nos tali simplici non contentamur vindicta, sed duriora rependimus, et pro uno verbo forsitan duro, multa hujusmodi retribuere non veremur. Et unde hæc tanta in nobis pullulant vitia, nisi quia de illorum sumus catalogo de quibus prædixit Apostolus, Erunt homines se ipsos amantes, elati, cupidi? Vivit namque in nobis amor ille maledictus, amor proprius et privatus, quo ad nos vitiose reflectimur, nec ea per quæ Christo conformari, a culpis purgari, gratiis adimpleri, Deo placere, et maximam possemus beatitudinem obtinere, æquanimiter ferimus : imo furimus contra ea, videlicet contra adversa, quorum toleratio pia est compendiosissima ad beatitudinem via. Discamus ergo nos ipsos in solo Deo diligere, quoniam se in se amare, est se false amare veraciterque odire; et in omni quod agimus, laboramus aut patimur, non nisi Dei honorem et veram quæramus salutem. Sed et pro communi bono laborare, orare, D satagere, est Deo gratissimum.

Lev. XXIV,
20; *Exod.*
XXI, 23-25;
Deut. XIX,
21.

II Tim. III,
2.

Refert Climacus, quod in cœnobio illo sanctissimo in quo multis stetit diebus, erat vir sanctus nomine Menas, post abbatem primus in regimine et dispensationibus rerum cœnobii. Qui quum feliciter migrasset ad Christum, et exsequiæ pro ipso solenniter agerentur, repente totus chorus in quo jacuit sanctum corpus, bono ac suavissimo replebatur odore. Quumque ex permissione abbatis loculum discooperuissent, viderunt omnes, et ipsemet

Climacus, ex pedibus sancti illius duos A non aliquid libertatis aut carnalis commoditatis transitoriive honoris exquirere; nec ad officia habita aut habenda quispiam inordinate afficiatur, quoniam numerari culpæ non queunt quæ ex ambitione procedunt. Sed in Deo sit salutare nostrum *Ps. lxi, 8.* et gloria nostra, auxilium nostrum, spes nostra, et omnis consolatio, affectio atque intentio nostra.

SERMO QUINTUS

DE VITUPERIO IRÆ, ET MANSUETUDINIS LAUDE.

OMNIS qui irascitur fratri suo, reus B miserabilis, pauper, cæcus et nudus? Tales igitur grandi egent instructione.

erit iudicio. Matth. v, 22.

Dominus et Salvator in evangelio hodierno districte nos instruit, terribiliter comminatur; et quam arcta sit via salutis, *Matth. v, 20.* testatur in principio, dicens: Nisi abundaverit iustitia vestra plus quam Scribarum et Phariseorum, non intrabitis in regnum cælorum. Sic et religiosis dici potest: Nisi abundaverit iustitia vestra plus quam hominum mundanorum, non introibitis in regnum cælorum. Non enim claustralium est circa communia langue- *Apoc. iii, 17.* re; et tamen sancti Patres vere fatentur, quod nisi religiosus quotidie discat se frangere, proprias voluntates abjicere, per regularis disciplinæ semitas proficisci, custodite et timorate coram Altissimo conversari, multo deterior fit quam fuit aut esse potuit in mundo: quod revera est nobis semper pensandum, atque terribile verbum, præsertim his qui negligenter se habent. Sed, proh dolor! quidam suis peccatis et negligentiis in tantum obtenebrantur, ut dici sibi vix tolerant, vix eis valeat D persuaderi, quod negligenter se habeant: imo se esse aliquid arbitrantur, non revolventes quod in Apocalypsi loquitur Deus, Quomodo dicis quia dives sum et nullius egeo, et nescis quia tu es miser et

Insuper Christus Dominus, evangelicæ legis distractionem, perfectionem excellentiamque demonstrans: Audistis (inquit) *Matth. v, 21, 22; Exod. xx, 13.* quia dictum est antiquis: Non occides; qui autem occiderit, reus erit iudicio. Ego autem dico vobis, quia omnis qui irascitur fratri suo, reus erit iudicio; qui autem dixerit fratri suo, Raca, reus erit consilio; qui autem dixerit, Fatue, reus erit gehennæ ignis. Ecce quantam sinceritatem, quantam cordis munditiam, quantam patientiæ ac mansuetudinis virtutem exigit Deus a nobis.

Denique, quum ira sit unum mortalium vitiorum, constat quantum sit fugienda, et maxime consuetudo seu assiduitas irascendi. Contra quam unusquisque tanto incessabilius ac fortius prælietur, quanto ad eam se esse procliviores ex naturali dispositione aut usu maligno, experimentaliter intuetur. Verumtamen est ira per zelum, quæ ex rationis iudicio sponte assumitur, ut contra vitia fortius insurgatur, et opus virtutis efficacius exsequatur. Hæc est ira laudabilis, quæ (secundum Gregorium) rationem sequitur ut ancilla, nec præcedere debet ut domina. Bernardus quoque de ira hac loquens: Occupemus

(inquit) iram in quibus expedit, ne ad illi-
cita inutiliaque prorumpat. Nolite irasci
his qui vobis transitoria auferunt, qui con-
vitia inferunt, qui supplicia ingerunt. Ira-
scimini ei quæ sola potest nocere, propriæ
scilicet iniquitati. Nulla enim nocebit ad-
versitas, si nulla dominetur iniquitas. Qui
suis peccatis perfecte irascitur, ceteris non
movetur. — Sed, heu! quia ad minima quæ-
que quorum nobis concessus est usus in-
ordinate afficimur, si aliquid horum nobis
subtrahatur, aut ab eo cui concessa fuit,
res male tractetur, aut non satis cito fue-
rit restituta, instar brutorum irascimur, et
per verba ac signa interiorem monstramus
insaniam. Fugienda igitur nobis est ira,
quoniam maxime decet omnem religio-
sum mansuetudo.

Ira vero præcipue ei illicita indecensque
consistit. Primo, quoniam coram Deo et
angelis sanctis facit hominem aspernabi-
lem, inordinatum, deformem, fatuo similem
et bruto conformem, quoniam vehemen-
ter excæcat, perturbat et agitat mentem.

Job v, 2.

Eccle. vii,
10.

Ideo ait Scriptura : Virum stultum inter-
ficet iracundia. Et Salomon loquitur : Ne
sis velox ad irascendum, quia ira in sinu
stulti quiescit. Est etenim ira fervor ini-
quus interiora devastans, et flamma gra-
tiam Dei consumens. Propter quod ait Ber-
nardus : Immanis bestia draco est, flatu
igneo quidquid attigerit necans, non so-
lum bestias terræ, sed et volucres cœli.
Hunc ego iracundiæ spiritum reor. Quanti
etiam sublimis vitæ, ut videbatur, flatu
illius draconis misere satis in os ejus rue-
runt, qui melius sibi ipsis irasci poterant
ne peccarent.

Secundo, quoniam ira per exteriora sua
indicia est aliorum multum scandalizati-
va, facitque hominem hominibus contem-
ptibilem et insensato consimilem. Ira nam-
que per suos effectus evidenter erumpit
et prodit se ipsam, atque in tantum ira-
scientem dementat, ut quidquid sibi pro-
tunc videtur, quidquid suggerit passio, ju-
stum ac licitum arbitretur. Idcirco dicit
Gregorius : Menti furore ebriæ omne quod

A recte dicitur, perversum videtur; et omne
ad quod ira instigat, rationabile judicat.
Itemque : Per iram, inquit, sapientia per-
ditur, ut quid quove ordine agendum sit,
nesciatur. Hinc Seneca dixit : Tibi ira-
scenti nihil volo licere, quoniam te ira-
scente, omnia putas tibi licita esse.

Tertio, quoniam ira in se ipsa pœnalis
est, et quædam afflictio cordis. Sunt et-
enim quædam vitia in se delectabilia, ma-
xime quæ ad tactum gustumque pertinent.
Alia in se ipsis sunt pœnalia, sicut invidia,
B ira, indignatio, amaritudo, impatientia, in-
ordinatus timor ac mœror. Idcirco ait
Hieronymus : Quid iracundo suus confert
furor, quem sævissimis exagitat stimulis,
et ita ab omni facit consilio alienum, ut
dum irascitur, insanire credatur? Ideo in
Ecclesiastico legitur : Non est sensus ubi
abundat amaritudo; et iterum, Vir iracun-
dus incendit litem. Sicque ira est aliis
quoque valde nociva.

Eccle. xxi,
15.
Ibid. xxviii,
11.

Quarto, quoniam ira de habitaculo men-
tis Spiritum Sanctum expellit, et suæ gra-
tiosissimæ inhabitationis ac susceptionis
inhabilem et incapacem statuit animam.
Dominus enim, juxta antiquam translatio-
nem, per Isaiam protestatur : Super quem
requiescet spiritus meus, nisi super quie-
tum et humilem? Ira equidem efficit ho-
minem inordinatum, confusum, turbulen-
tum, inquietum et animositate inflatum.
Hinc ait Gregorius : Per iram, Spiritus
Sancti splendor excutitur, qui super quie-
tum et humilem requiescere dicitur, quia
dum ira menti quietem subtrahit, suam
D Spiritui Sancto habitationem claudit. Ideo
sanctus quidam asseruit eremita : Sicut
fumus hospitem expellit de domo, sic ira
Spiritum Sanctum ab animo; et denuo,
Iracundus homo etiamsi mortuos suscitet,
Deo non placet.

Cf. Is. lxvi,
1, 2.

Ibidem.

Quinto, quoniam ira facit hominem aliis
onerosum, et ad socialem vitam ineptum.
Propter quod Salomon contestatur : Ira
non habet misericordiam, nec erumpens
furor; et impetum concitati spiritus ferre
quis poterit? Rursusque : Spiritum (in-
14.

Prov. xxvii,
4.
Ibid. xviii,
14.

quit) ad irascendum facilem quis poterit A sustinere? Propterea dixit Gregorius : Per iram justitia relinquitur, gratia vitæ socialis amittitur, perditur mititas, et lux veritatis repellitur.

Quum ergo tot mala, tot nocumenta inferat ira tam irascenti quam aliis, eam penitus detestemur ac fugiamus ; et Christi atque Sanctorum mansuetudinem patientiamque pensantes, omnem iracundiæ et impatientiæ commotionem vitemus, mites ac patientes nos ipsos in omnibus exhibeamus, nisi in quantum ira per zelum B requirit temperatum iracundiæ motum, ut actus justitiæ efficacius exsequatur. Denique propriis defectibus et peccatis in tantum indignemur ac irascamur, quod contra alios nequaquam irrationabiliter moveamur. Unde et in divinis, si quis forte in psalmodia et cantu inordinate, aut aliquatim dissonanter seu somnolenter se habeat, non protinus immoderanter commoveamur ; sed peccata propria quibus ibi per omissionem et commissionem culpabiles sumus, intueamur, et quod tam irreverenter et indevote nos in divinis habemus, tristemur et deploremus. Porro, si quis adhuc tam pusillus et infirmus consistit, ut interiorum iræ commotionem vitare vix queat, saltem a verbis inordinatis et iræ eruptionibus caveat. Propter quod ait Ambrosius : Resiste iræ si potes, cede si non potes ; si præoccupaverit et impleverit ira mentem tuam, locum tuum ne deseras : locus tuus patientia est. Isidorus quoque ait : Si non potes iram vitare, tempera ; si non potes furoris ortum cavere, D cohibe eum et tene silentium : tacendo citius vincis.

Consideremus indesinenter omnem patientiam et mansuetudinem Christi in sua ignominiosissima passione, martyrumque in gravissimis eorum suppliciis, ut sic patientiam et mansuetudinem insuperabilem veraciter addiscamus. Nec cessemus Dei adjutorium invocare, et per præscientiæ ac boni propositi clypeum contra adversa omnia muniamur, siquidem jacula prævi-

sa minus molestant. Recordemur quod divinus Dionysius in epistola ad Demophilum asserit, Moysen, Joseph et David præcipuam apud Deum gratiam invenisse, quia mites fuerunt. Faciamus nobis consuetudinem præliandi contra vitia, maxime contra ea ad quæ proniores nos experimur. Nemo alteri dicat, Raca, seu verbum indignationis, iram interiorum pandentis ; nec fatuum proximum appellemus, hoc est, ab omni verbo contumelioso, vituperationem certam et evidentem designante, nos reprimamus, quum hoc ex suo genere sit peccatum mortale etiam gravius detractione, sicut rapina est gravius crimen quam furtum.

Postremo de ista materia Climacus ait : Quemadmodum aqua missa in ignem exstinguit flammam, ita profluvium lacrarum poenitentiae et devotionis exstinguit omnem indignationis et iræ furorisque ignem. Inirascibilitas victoria est naturæ, in injuriarum insensibilitate ex agonibus sudoribusque adveniens. Mititas est immobilis constantia animæ, in ignominiiis et bonæ famæ divulgationibus se uniformiter habens. Principium inirascibilitatis, est silentium labiorum in conturbatione cordis ; medium vero inirascibilitatis, est silentium cogitationum in exili conturbatione animæ ; finis vero, fixa tranquillitas in insufflatione spirituum immundorum. Furor est leviter vertibilis motus, morum deformitas, et animæ inhonestas. Quemadmodum lumine apparente recedunt tenebræ, ita ex fragrantia et odore humilitatis omnis amaritudo, ira et furor exterminantur. Multa alia valde accommodata scribit de præsentī materia.

Acquiescamus ergo Apostolo exhortanti : Omnis amaritudo, et indignatio, et ira, et clamor tollatur a vobis, cum omni malitia. Quod si quis ex sua paupertate ad iræ commotionem pronus et velox est, nullus tamen perseveret in ira, dicente Apostolo : Sol non occidat super iracundiam vestram. In quibusdam namque ira cito accenditur, sed cito exstinguitur. In

Epist. viii.

Ephes. iv, 31.

Ibid. 26.

aliis cito accenditur, sed difficulter exstinguitur : quod pessimum esse constat. In nonnullis tarde accenditur, et tarde exstinguitur : quod malum est. In aliquibus A vero tarde accenditur, et cito exstinguitur : quod ceteris melius judicatur. Ideo juxta præacta nos regulemus, iram et ceteras passiones vincamus.

SERMO SEXTUS

DE RECONCILIATIONE FACIENDA ANTE OBLATIONEM.

S*I offers munus tuum ante altare, et ibi recordatus fueris quia frater tuus, etc. Matth. v, 23, 24.*

Ps. x, 8.

Sicut ait Propheta, Justus Dominus, et justitias dilexit. Ideo exigit ut qui alterum verbo læsit aut facto, seu aliquo modo offendit, satisfaciat ei antequam aliquid obsequii offerat Deo, prout requirit justitia. Quemadmodum enim non dimittitur peccatum, nisi restituatur ablatum, sic nec opus bonum ex genere a Domino acceptatur, nisi qui offensus est juste reconcilietur, præsertim quum ingratum exstet Spiritui Sancto quicquid ei obtuleris, neglecto eo ad quod teneris. Ad istud autem, qui offendit, jure naturali atque divino tenetur. Deinceps, extra caritatem nil complacet Deo. Caritas vero reconciliationem istam requirit. Nec solum ante oblationem Deo exhibendam, eundum est ad fratrem (id est quemcumque proximum in hoc mundo degentem) offensum, ad eum sibi reconciliandum ; sed specialiter ad summum et præstantissimum fratrem illum Dei Unigenitum, qui nostram assumendo naturam, factus est frater noster : quem quicumque offendit, primo eum sibi reconciliet, pœnitendo, veniam postulando, confitendo et satisfaciendo. Sed et Pater cœlestis, Deus Trinitas, universitatis Creator, primo omnium est placandus ; et antequam ei aliquid immolemus, humillime deprecemur ut præteritis nostris indulgeat culpis.

« Si » ergo, o homo, « offers munus tuum ante altare », hoc est, oblationem corpora-

lem aut spiritualem, videlicet aliquem actum ad Dei honorem, volueris facere in templo materiali et ejus altari, sive in altari spirituali et templo interiori, puta in anima et in fide seu caritate ; « et ibi recordatus fueris quia frater tuus habet adversum te aliquid », utpote justam querelam, eo quod ei in aliquo forefecisti : « relinque ibi munus tuum ante altare », hoc est, inchoatum sive intentum obsequium seu sacrificium intermitte aut suspende, actu vel proposito, realiter inde cessando, aut ipsum differendo, aut mentaliter proponendo agere quæ sequuntur, loco et tempore opportuno ; « et vade prius reconciliari fratri tuo », eum placando et ei satisfaciendo, et veniam postula, ac juxta exigentiam injuriæ fratri tuo a te irrogatæ, recompensationem ei impende. Eundum est autem pedibus corporalibus, si congrue fieri poterit, ut si proximus qui offensus est, non sit longe et possit haberi. Alias pedibus mentis, videlicet affectu atque proposito, est eundum, ut mox ei satisfacere cupias : quod quia non potes, proponas eum accedere et placare opportuno loco et tempore.

Porro, quo injuria proximo facta, est major, et quo ipse qui offensus est, dignior exstat aut melior, eo velocius diligentiusque conandum est ut ei satisfiat et reconcilietur. Istud itaque de necessitate salutis est, secundum expositionem Augustini dicentis : Si tu eum offendisti, ipse habet adversum te, non tu contra eum. Si vero te ille offendit, tu habes adversus eum ;

Marc. XI, 25.

sed tunc sufficit ut ei ignoscas sicut vis tibi a Deo ignosci. Verumtamen necessarium est culpam fratri ignoscere, etiam antequam veniam petat, secundum quod *Marc. XI, 25.* *exigit caritas.* Et Christus disseruit: Quum statis ad orandum, dimittite si quid habetis adversus aliquem, ut et Pater vester cœlestis dimittat vobis peccata vestra. Satisfactio autem exigi potest ex caritate et zelo justitiæ, secundum juris tenorem, processum et formam, quanquam laudabilius sit pœnam quoque dimittere, nisi forte hoc cedat in derogationem justitiæ et detrimentum boni communis, et is qui forefecit, ex hoc insolentior fiat, audaciorque ad injuriandum: tunc enim pro ejus salute est ut reprimatur per pœnas. Si ergo alium non offendisti, sed ipse te, non teneris ad ea quæ dicta sunt: quæ tamen si feceris, opus est perfectionis, et magnæ caritatis ac pietatis, copiosumque meritum consequeris.

Unde, secundum Chrysostomum et Cassianum, ad caritatis pertinet perfectionem, ut etiam is qui læsus est, forefactorem suum studeat mitigare, non solum illatam dimittendo injuriam, sed et blandis sermonibus cor ejus caritative mulcendo, quatenus de cetero sincerum ad se gerat affectum. Nempe si alterius quamvis injuriatoris tui potes aversionem curare, ejusque animam de morte peccati eruere modo jam tacto, nec tamen hoc facis, non videris esse in caritate perfectus, nec imitator Christi sincerus, qui pro adversariis sanguinem suum fudit. Imo, quum debeamus Deum altissimum super omnia incomparabiliter semper diligere, debemus omnem ejus inhonationem atque offensam pro posse vitare: idcirco satagendum est nobis ut et injuriatorem a Dei offensa et odio proximi, ac aliis vitiis in quæ forsitan corrueret, præservemus, eum præveniundo et mitigando. Dicit namque Chrysostomus: Ne dicas, Ille mihi nocuit, ille mihi satisfacere debet, non ego illi. Si enim pro gloria et incremento tuæ salutis jubet te Dominus amicitias facere, tu po-

tius nocitus, hoc est nocumentum perpesus, debes nocentem rogare, ut duplicem consequaris coronam: unam, quoniam nocitus es; alteram, quia prior rogasti. Festina ergo inimicum tuum prævenire ad amicitias, ne forsitan te tardante, ille præveniat ad rogandum, et rapiat de manibus tuis pietatis mercedem. Nam si ille tibi nocuit, et ille te rogat, infructuosa est amicitia tua. Quam enim fecisti justitiam ante Deum, si rogatus te placasti?

Quum ergo prædicta peregeris, « tunc veniens », hoc est, localiter rediens, vel intentionem tuam ad id quod cœperas seu proposueras, revocans, « offeres munus tuum », id est, intentum seu inchoatum Dei obsequium prosequeris.

Præterea, perfectio hominis est, ei assimilari ad cujus imaginem similitudinemque creatus est. Quum ergo Deus æternus, a principio mundi, et deinceps per universas ejus ætates, ab hominibus innumerabiliter, gravissime et ineffabiliter prorsus injuriatus, offensus, inhonoratus et contemptus, nihilo minus per cunctas mundi ætates, per se ipsum divino instinctu, per angelos sanctos, videlicet per eorum inspirationes et custodias, per Patriarchas, Prophetas, aut alios homines sanctos, invitaverit transgressores, et prævenerit eos ad suam dilectionem et gratiam, eos hortando et reducendo, imo et per varia beneficia ac promissa id peragendo, et tandem unigenitum Filium suum mittendo in mundum, et per ejus passionem sibi reconciliando genus humanum, atque per ejus Apostolos ceterosque discipulos, ubique terrarum homines sceleratos ad suam amicitiam, reconciliationem et concordiam inducendo, et ultra hoc sempiternam eis beatitudinem pollicendo, gratiarum quoque copiosa offerendo charismata; debemus nos peccatores vilissimi, Dominum Deum nostrum naturaliter bonum ac pium in isto fideliter imitari, non solum injuriatoribus nostris donando dum veniam petunt, aut pœnam simul cum culpa dimittendo eisdem etiam

*Gen. I, 26, 27.**I Joann. IV, 9.*

antequam postulent, vel accedendo veniamque rogando eos quos verbo, signo factove læsimus, sed insuper eos a quibus læsi sumus præveniendo, et omni modo nobis possibili ipsos ad pacem et amicitiam nostram trahendo, et ultra hæc omnia benefaciendo eisdem.

Præterea, si duo aut plures sibi invicem forefecerint, ita quod singuli remissionem a se mutuo postulare tenentur, tunc ad caritatem humilitatemque spectat, ut unusquisque eorum conetur alterum in petendo veniam et satisfaciendo, si exigit, prævenire. Qui autem alium læsit obloquendo, tenetur ei restituere famam.

Sed inter hæc considerata, imo et deploranda est duritia, animositas, indiscretio, excæcatio atque perversitas aliquorum, qui facillime offenduntur, et ad veniæ postulationem difficiles inveniuntur. Qui non solum non curant injuriatores suos sibi reconciliare, prævenire, mulcere, sed induci vix queunt ut ab injuriatis et læsis a se veniam deprecentur, et quod

A pejus est, quidam tam incircumspecti, tam inconsideratissimi grossissimique consistunt, ut quamvis revera verbo, aut signo aut facto forefecerint fratribus suis, et perturbaverint eos, non tamen advertunt, nec volunt advertere, nec culpam suam fateri ac veniam flagitare, sed in sua persistunt duritia, et contra Christi doctrinam ac jussionem transeunt ad altare, orant, sacrificant, communicant, offerunt, et alios scandalizant, et totum ad graviores suam damnationem. Advertant hi verba Gregorii circa verba illa Apostoli, Pro Christo legatione fungimur, tanquam Deo exhortante per nos, obsecramus pro Christo, reconciliamini Deo : Ecce peccando, inter Deum et nos inimicitias et discordias fecimus, et tamen ut ei reconciliemur, ipsemet nos hortatur. Erubescat ergo humana superbia, confundatur unusquisque, si non prior satisfaciatur proximo, quum et ipse qui offensus est, ut ei reconciliari debeamus, legatis intervenientibus obsecrat Deus. Cui honor et gloria in æternum. Amen.

II Cor. v, 20.

DOMINICA VII POST TRINITATEM

ENARRATIO IN EPISTOLAM

HUMANUM DICO, PROPTER INFIRMITATEM CARNIS VESTRÆ. Rom. vi, 19-23.

GLORIOSUS gentium Doctor, in præsentia A epistola ad virtutum exercitia multum pie et rationabiliter ac multipliciter nos hortatur. Nam ait : *Humanum dico*, id est, leve præceptum ac rationabile documentum vobis propono : et hoc, *propter infirmitatem carnis vestræ*, hoc est corporis vestri fragilitatem et fomitis inclinationem ad mala, ex quibus contingit quod non estis dispositi ad ardua præcepta implenda. Doctrina namque et jussio proportionanda est capacitati eorum quibus proponitur : idcirco infirmis et imperfectis B non sunt statim sublimia documenta difficiliaque præcepta proponenda. Unde ad Corinthios ait Apostolus : Non potui vobis loqui quasi spiritualibus, sed quasi carnalibus ; quasi parvulis in Christo lac dedi. Deinde ponit præceptum. *Sicut enim exhibuistis membra vestra servire immunditiæ*, id est carnalibus vitiis, utpote gulæ atque luxuriæ, in quibus est evidentior ac maxima turpitudine, *et iniquitati*, id est spiritualibus vitiis, *ad iniquitatem*, hoc est de uno vitio ruendo in aliud, juxta il- C lud Ecclesiastici : Peccator adjiciet ad peccandum. Tales sunt perseverantes in malis : peccatum namque quod per poenitentiam non deletur, pondere suo trahit ad aliud. Talibus Dominus per Isaiam minatur : Væ qui trahitis iniquitatem in funiculis vanitatis, et quasi vinculum plau- stri peccatum. *Ita nunc*, agnita veritate, *exhibete membra vestra servire justitiæ*, id

est cunctis virtutibus, manibus eleemosynam dando, pedibus ecclesiam visitando, auribus verbum Dei audiendo, ore Deum laudando, *in sanctificationem*, id est, ad hoc ut ad sanctitatem pertingatis, quatenus casto corpore mundoque corde Domino serviatis, juxta illud Deuteronomii : Perfectus et absque macula eris cum Do-

Deut. xviii, 13.

Consequenter inducit rationem ad hoc. *Quum enim servi essetis peccati*, id est, dum pravis concupiscentiis ac vitiis obedistis, *liberi fuistis justitiæ*, id est, Domino justitiæ caruistis, atque extranei a rectitudine æquitatis fuistis, non obtemperando divinis præceptis : quod veræ libertati maxime derogat. Libere autem servit Deo, qui servit ei libenter et sponte : ideo ad peccandum liber est, qui est servus peccati.

Quem ergo fructum habuistis tunc in illis, hoc est, quid utilitatis consequimini ex peccatis, quando inique vixistis, *in quibus nunc erubescitis*, id est, de quorum vitiorum turpitudine nunc ad Deum conversi verecundamini? Peccator namque, post suam conversionem, divinitus illustratus, et per hoc peccati deformitatem cognoscens, erubescit de vitiis in quibus aliquando gloriabatur, quemadmodum in Ezechiele scriptum est : Erubescite, et confundimini super viis vestris, dicit Do- minus. *Nam finis illorum*, id est finalis merces vitiorum, *mors est*, id est æterna

Ezech. xxxvi, 32.

I Cor. iii, 1, 2.

Ecclesi. iii, 29.

Is. v, 18.

damnatio. Vel, mors hæc temporalis, est A finis, hoc est terminus, vitiorum, quia post mortem hanc non possunt impii in turpibus actibus delectari, nec vitia exercere carnalia. *Nunc vero liberati a peccato*, per Christi passionem, per Baptismatis sacramentum et poenitentiam propriam, per gratiæ infusionem, *servi autem facti Deo*, hoc est, divinis obedientes præceptis, seu evangelicis acquiescentes consiliis ad gloriam Dei, *habetis fructum vestrum*, id est bonorum operum meritum, *in sanctificationem*, hoc est proficiens vobis ad B sanctificationem animarum vestrarum, quia per operum bonorum merita animæ efficiuntur formaliter sanctæ, ita ut fructus iste potest dici sanctificatio animæ. *Finem vero*, id est finale consummatumque præmium bonorum operum, habetis jam in spe *vitam æternam*, quæ est beatitudo et merces Sanctorum. De qua apud Joannem ait Salvator ad Patrem : Hæc est vita æterna, ut cognoscant te verum Deum. Itaque quidquid in vita hac agimus, ordinare debemus ad hoc, ut coram Deo mentem puram et sanctam habeamus ; ipsaque puritas vitæ præsentis, ad futuram felicitatem tanquam ad præmium est ordinanda.

Deinde ostendit Apostolus, quod finis vitiorum est mors atque damnatio. *Stipendia enim peccati*, hoc est retributio debita quæ pro peccato infligitur, est *mors* temporalis et infernalis : quia pro peccato originali inflicta est mors corporalis, atque carentia beatificæ visionis, sicut adhuc infligitur in æternum infantibus morientibus absque Baptismo ; pro peccato D autem actuali mortali infligitur æterna

damnatio, utpote pœna damni, quæ est divinæ visionis carentia, et pœna sensus, videlicet punitio ignis gehennalis.

Gratia autem Dei, id est ex gratia seu per gratiam Dei, datur justis pro præmio *vita æterna*, quæ est cœlestis ac plena felicitas. Non dicitur hoc, merita excludendo, sed ad insinuandum quod principaliter adscribendum sit tantum præmium pietati ac gratiæ Dei, qui etiam ultra condignum remunerat. Electi quippe per gratiam merentur vitam æternam. Idcirco tam meritum quam præmium nostrum, primo et maxime dependet atque procedit ex pietate Dei, et gratia ejus quam causat in nobis. Et quoniam beatitudo ista seu vita æterna est supernaturalis, non potest homo eam promereri per pura naturalia, sed per dona supernaturalia, gratuita et infusa, inter quæ primum est gratia gratum faciens : idcirco ex ea et per eam acquiritur et confertur ista felicitas. Et hoc, *in Christo Jesu Domino nostro*, hoc est, per meritum suæ passionis datur gratia ista C hominibus, atque per idem meritum aperta est janua regni cœlestis, quoniam Christus pro originali satisfecit peccato, ob cuius reatum Sancti in limbo retardabantur a gloria. Unde et infantuli baptizati ante annos discretionis decedentes, merito Christi eis in Baptismate applicato, beatitudinem sortiuntur. Denique vita seu beatitudo æterna consistit in Christo Jesu, tanquam in objecto et causa effectiva principali, secundum divinam ejus naturam. Tota enim Trinitas superbenedicta, est causa efficiens et objectum beatitudinis omnium electorum.

SERMO PRIMUS

DE GRADIBUS TIMORIS, ET QUOMODO DEO SERVIENDUM CORDE PERFECTO ATQUE VERISSIMO.

TIMETE Dominum, et servite ei corde A
perfecto atque verissimo. Josue xxiv,
14.

In his verbis tria tanguntur. Primum est, ut Deum timeamus; secundum, ut serviamus ei corde perfecto; tertium, ut id ipsum agamus corde verissimo. Quid est Deum timere? Ejus intuitu a peccatis discedere, quemadmodum in Proverbiis habetur: Per timorem Domini declinat unusquisque a malo. Unde rursus Salomon in Proverbiis loquitur: Timor Domini, fons vitæ, ut declinet a ruina mortis. Si autem B iste recessus a vitiis fiat ne pro eis infligatur supplicium, vocatur timor servilis: qui non est meritorius apud Deum, quia non agit amore boni, sed formidine mali pœnalis. Præterea, si malum culpæ vitetur ne Deus inhonoretur, offendatur aut amittatur, vocatur timor sanctus et filialis, ex sincera Dei caritate procedens. De quo in Ecclesiastico multa conscripta sunt, utpote: Timor Domini, corona justitiæ; et, Nihil dulcius quam timere Deum; et, Timor Domini super omnia se posuit. Si C vero vitetur peccatum partim formidine culpæ, videlicet ne Deus offendatur, partim formidine pœnæ, ne damnatio infligatur, vocatur timor initialis, dummodo principaliter metuatur Dei offensa seu culpa. Propter quod timor iste est meritorius, nec sine caritate habetur.

Itaque in themate præassumpto, sanctus et præclarissimus ille Josue hortatur nos, ut Deum filiali, sancto et casto vereamur timore, tanquam optimum, piissimum, dulcissimum atque carissimum patrem, ne D eum in aliquo offendamus, et ne elongemur aut separemur ab eo, quem in omnibus et super universa diligimus, et in quo

solo tota nostra salus consistit. Videmus enim in sæculo isto, quod boni, probi ac dociles filii valde diligunt suos parentes, et eorum offensionem ac inhonationem sollicitè vitant: quanto magis amare debemus Patrem cœlestem et omnipotentem, Deum et Creatorem nostrum, qui omnibus creaturis infinite melior amabiliorque consistit, et a quo totum quod sumus et habemus, accepimus, atque ex ejus singulari ac summo amore universa peccata vitare, quia per nil nisi per peccata inhonoratur, offenditur, separatur? Scriptum est enim: Plenitudo sapientiæ, Eccli. i, 20. est timere Deum; itemque: Timenti Deum Ibid. 13, 28. bene erit in extremis, et in die defunctionis benedicetur; qui autem sine timore Dei est, non potest justificari.

Secundo, hortatur nos Josue ut serviamus Deo « corde perfecto ». Quid est Deo servire? Mandata ejus implere. Et quid est Deo servire corde perfecto? Hoc est mandata ejus servare cum omni diligentia atque custodia cordis, sicut ait Psalmista: Confitebor tibi, Domine, in toto corde meo, Ps. ix, 2; id est mente recollecta ac stabili, tibi soli intenta, non vaga et intemorata. Denique Deo servimus, non solum per bona opera exteriora, videlicet eundo ad divina Officia, eleemosynas dando, orando, genua inclinando, sed multo plus per actus interiores, videlicet in ipsum credendo, in eo sperando, ipsum fervide diligendo, ejus honorem et gloriam in omnibus intendendo, eum fideliter contemplando, salutaria meditando. Isti sunt actus dignissimi, per quos Deus potissimum colitur, honoratur, eique servitur, quemadmodum primo Regum Samuel exhortatur: Præparate corda I Reg. vii, 3. vestra Domino, et servite illi soli.

Tertio, sanctus Josue nos hortatur ut A
serviamus Deo corde verissimo. Quid est
Deo servire corde verissimo? Et respon-
dendum, quod quum triplex sit veritas,
utpote veritas vitæ, veritas doctrinæ, ve-
ritasque justitiæ, servire Deo corde ve-
rissimo, est Deo servire corde ab omni
iniqua operatione, ab omni falsitate, ab
omni simulatione, calliditate et obliquita-
te penitus alieno. Est enim necessarium
ad salutem, ut omne opus mortaliter cul-
pabile evitetur, omnis quoque error con-
trarius fidei et determinationi Ecclesiæ B
repellatur, et ea quæ directe contrarian-
tur justitiæ, scilicet duplicitas, hypocrisis,
versutia, abjiciantur : quia ut in Job asse-
ritur, Simulatores et callidi provocant iram
Dei. Salomon quoque fatetur : Vir versu-
tus odiosus est. Et in Ecclesiastico indu-
citur : Væ duplici corde et labiis scelestis.

Job xxxvi,

13.

Prov. xiv,

17.

Eccli. ii, 14.

Præterea, his documentis concordant
quæ in epistola hodierna proponit nobis
Apostolus, dicens : Sicut per membra no-
stra inhonoravimus Creatorem nostrum
altissimum, serviendo peccatis per ea, hoc C
est exhibendo ea instrumenta ad male
agendum, videlicet linguam ad blandien-
dum, mentiendum, detrahendum, garrien-
dum ac decipiendum, et ita de aliis mem-
bris nostris, per quæ multa commisimus
vitia ; sic nunc per membra nostra hono-
remus Deum et Creatorem nostrum, uni-
versis membris bene utendo, et bona per
ea agendo ad gloriam Creatoris. Quemad-
modum enim totum quod sumus et ha-
bemus, a Deo accepimus, sic totum ad
Dei honorem, laudem et gloriam conver-
tere et referre seu ordinare debemus.

Rom. vi, 19.

O quam perverse et impie agunt miseri
peccatores, qui se ipsos ac sua ad dæmo-
num vertunt obsequia, qui in peccatis se
occupant, atque ad Creatoris contumeliam
abutuntur se ipsis et bonis desuper datis !
Ecce si rex aut princeps terrenus alicui
militi daret equum, arma, pecunias ad
militandum ac serviendum sibi fideliter,
quantum indignaretur rex aut princeps si
miles ille non solum hoc ipsum non face-

ret, sed insuper adversario regis seu prin-
cipis sui se sociaret, consentiret ac deser-
viret : nonne incomparabiliter plus Deus
justus et sanctus indignari potest ingratissi-
mis impiisque hominibus, quibus corpus
et animam, membra et vires, bona exteriora,
imo et supernaturalia dona largitus est
ut sibi fideliter obsequantur? Et tamen non
solum non agunt hoc, sed ad Creatoris in-
juriam diabolicis consentiunt tentamentis,
concupiscentias suas sequuntur, Dei et Ec-
clesiæ transgrediuntur præcepta. Nonne ju-
stissima apparebit horum damnatio in die
judicii, imo et protinus dum egrediuntur
de corpore, juxta illud Isaïæ, Væ impio in
malum, retributio enim manuum ejus fiet?

Is. iii, 11.

Amplius, quo Deus omnipotens omni
creatura melior exstat ac dignior, tanto
reverentialius ac diligentius serviendum
est ei. Quid ergo tam vile ac erubescibile,
sicut quod post conversionem nostram, pi-
griores, negligentiores frigidioresque su-
mus in Dei obsequio, quam ante eramus
in servitute diaboli, carnis et mundi? Cer-
te per multas horas confabulari, joculari, ac
ceteris pravitatibus immorari, non erat
tunc laboriosum aut tædiosum ; et tamen
jam per unam horam orationibus devotis,
meditationibus sanctis, divinis laudibus
occupari, difficile nobis ac tædiosum con-
sistit. Nondum ergo tam fervidi sumus in
Dei obsequio, sicut eramus in vitiorum
dæmonumque servitio. Erubescamus ita-
que, deploremus et emendemus culpas,
ingritudines et negligentias nostras :
quia ut in Ecclesiastico habetur, Si pœ-
nitentiam non egerimus, incidemus in
manus Dei, et non in manus hominum.

Eccli. ii, 22.

Præterea, quam turpia atque enormia
sint peccata nostra præterita, diligentissi-
me attendamus, de quorum fœditate et
gravitate jam verecundamur ; sed ita de eis
nunc pœniteamus, ne nobis in die judicii
nostri particularis aut universalis valeant
objici, ne tunc de eis coram Deo et San-
ctis ejus ac aliis confundamur. Consi-
deremus sagaciter quam vehementissime
erubesceremus, si universa peccata nostra

nobis coram paucis hominibus objicerentur ac recitarentur. Quam erubescibile ergo erit, coram Deo et Sanctis ejus ac aliis ea manifestari nobisque objici? Deinde autem, post tantam confusionem infligetur æterna damnatio.

Rom. VI, 19. Postremo, per hoc quod in exordio hujus epistolæ ait Apostolus, Humanum dico propter infirmitatem carnis vestræ, docentur fideles, præsertim prælati ac prædicatores, ut discreti et pii sint in præcipiendo ac instruendo, capacitatem et dispositionem subditorum seu proximorum pensantes, nec alta atque subtilia pro humana laude aut commodo temporali proponant, sed ea quæ magis ædificant audientes; cujus tamen oppositum multi vani et scioli agunt.

Legitur in Vitaspatrum, quod unus discipulorum sancti abbatis Pastoris transivit ad aliam regionem pro quodam negotio, venitque ibi ad quemdam abbatem et eremitam, qui fuit vir famosus ac litteratus, ita quod multi quotidie venerunt ad eum pro informatione ac consolatione. Præfatus autem discipulus abbatis Pastoris, loquens cum illo eremita, inter cetera recitavit ei multa de sanctitate atque virtutibus abbatis Pastoris, ita quod eremita ille proposuit, tempore sibi vacante, visitare abbatem Pastorem. Post aliquot itaque dies arripuit iter, et primo venit ad prædictum abbatis Pastoris discipulum. Qui cum magno gaudio et honore suscepit eremitam præfatum; deinde intravit cellam abbatis Pastoris, dicens ad eum: Quidam vir ma-

agnus de loco remoto venit huc, cupiens loqui tecum. Post hoc introduxit eremitam illum ad abbatem Pastorem, et exiit. Quo egresso, cœpit eremita ille loqui cum abbate Pastore de rebus altis et difficilibus sacræ Scripturæ eloquiis. Porro abbas Pastor penitus tacuit, et nullum verbum respondit. Ideo tandem eremita ille admirans et tristis exivit, dixitque Fratri præfato: Putabam quod senex iste responderet mihi, et ecce nullum verbum mihi respondit. Tunc Frater ille intravit ad abbatem Pastorem, et dixit: O abba Pastor, vir iste qui tantum habet honorem in loco suo, venit ad te, et tu nihil locutus es ei? Respondit abbas Pastor: Vir iste de cœlo est, ego autem de terra sum. Hoc audito, Frater ille exivit, et dixit ad eremitam: Abbas iste Pastor non cito loquitur de divinis Scripturis et altis materiis. Tunc eremita ille rursus ingressus est cellam abbatis Pastoris, dixitque: Quid faciam, abba Pastor, quia passionem et peccata adhuc dominantur mihi? Tunc abbas Pastor exhilaratus, respondit: Modo bene venisti; nunc os meum aperiā, et implebo illud bonis. Cœpitque abbas Pastor de virtutibus et vitiis valde sapienter conferre cum eremita prædicto. Qui auditis verbis abbatis Pastoris, dixit: Vere hæc est via salutis. Et ita cum ingenti lætitia recessit, gratias agens Domino Deo et Fratri præfato, quod tam sanctum virum vidit atque audivit. Hoc exemplo docemur loqui de pertinentibus ad salutem, omni vanitate exclusa.

ENARRATIO IN EVANGELIUM

QUUM TURBA MULTA ESSET CUM JESU, NEC HABERENT QUOD MANDUCARENT, ETC. Marc. VIII, 1-9.

IN evangelio hodierno describitur præclarum Christi miraculum. Et textus quantum ad sensum litteralem, difficulta-

tem non habet: ideo immorandum non reor. Ait itaque Evangelista: *Quum turba multa esset cum Jesu.* Quam magna enim

fuerit turba ista, in fine evangelii hujus panditur, quo habetur : Erant quatuor millia hominum, extra parvulos et mulieres. *Nec haberent quod manducarent*, quia victualia quæ secum detulerant, consumpserunt. *Convocatis discipulis* suis, hoc est Apostolis, quibus tanquam familiaribus et amicis sua manifestavit secreta. In quo etiam præsentibus ac prælatis saluberrimum dedit exemplum, ut in rebus magnis utantur subditorum consilio, et prius de agendis tractent cum eis. Spiritus enim ubi vult, spirat; et interdum revelat simplicibus atque humilibus quæ a magnis et litteratis abscondit, quemadmodum apud Matthæum Christus ait ad Patrem : Confiteor tibi, Pater, quia abscondisti hæc a sapientibus et prudentibus, et revelasti ea parvulis. Unde et Salomon in Proverbiis loquens de Deo : Cum simplicibus (inquit) sermocinatio ejus. *Ait illis : Misereor super turbam*, hoc est, fami et indigentiae ac lassitudini ejus condoleo, quia ecce jam triduo sustinent me, id est, per tres dies mecum manserunt, et ita quæ secum tulerunt, consumpta sunt. In hoc autem quod tamdiu permanserunt cum Christo, patet amor eorum ad ipsum, et devotio ad ipsius doctrinam ac signa. Nam statim ante istud miraculum fecit Jesus multa valde miracula. Unde in Matthæo legitur : Accesserunt ad Jesum turbæ multæ, habentes secum mutos et claudos, cæcos, debiles, et alios multos infirmos; et projecerunt eos ante pedes ejus, et curavit eos. Atque, ut evangelista Matthæus enarrat, post hæc protinus fecit quod modo describitur. Itaque propter tot et tanta Christi miracula, et propter eloquentiam, sapientiam consolatoriamque præsentiam ejus, tam continue secum manserunt. *Et si dimisero eos jejunos in domum suam, deficient in via ex fame et lassitudine. Quidam enim ex eis de longe venerunt*, quibus majus instabat periculum, nisi a Christo fuissent refecti.

Et responderunt ei discipuli sui : Unde illos quis poterit hic saturare panibus in

solitudine ? quasi dicant : Non videtur fieri posse. In quo patet imperfectio discipulorum, quia adhuc rudes fuerunt. Nam paulo ante viderunt quemadmodum Christus ex quinque panibus duobusque piscibus saturavit quinque millia virorum, qualiter etiam, sicut jam dictum est, statim ante hæc verba fecit tam multa prodigia : unde considerare debuerant, quod eadem virtute posset et istis de victualibus providere. *Et interrogavit eos. Non ex ignorantia interrogavit*, sed ut ex discipulorum responsione, magnitudo miraculi evidentius innotesceret. *Quot panes habetis ? Qui dixerunt : Septem. Habebant quoque paucos pisciculos*, secundum Matthæum.

Et præcepit turbæ discumbere super terram. Et accipiens septem panes et præfatos pisciculos, omnia simul ante se ponens, *gratias agens* secundum quod homo, Deo Patri, seu toti supergloriosissimæ Trinitati, omnium bonorum omnipotenti datori ac liberalissimo fonti. Quid autem gratias agendo dixerit, non exprimit Evangelista, sed expressit Joannes Lazari suscitationem describens. Unde apud Joannem legitur : Jesus elevatis sursum oculis, dixit, Pater, gratias ago tibi, quoniam audisti me. *Fregit panes*, forsitan et pisciculos, atque frangendo multiplicavit panes potestate sua divina increata, immensa, sive per creationem, ut probabilius dicitur (quia, secundum Augustinum, omnipotentia Domini fons panum fuit), seu aliter; *et dabat discipulis suis panes fractos et multiplicatos, ut apponerent panes turbæ*. Nam et inter discipulorum manus creduntur panes fuisse multiplicati usque ad abundantiam. *Et apposuerunt turbæ. Et habebant discipuli pisciculos paucos; et ipsos benedixit*, ac benedicendo multiplicavit, sicut de panibus dictum est; *et jussit apponi turbæ*. An simul benedixit ac multiplicavit panes atque pisciculos, an seorsum, non satis certum videtur.

Et manducaverunt, et saturati sunt, id est sufficienter, non gulose, refecti. Sed quid biberunt ? De hoc Evangelista nil

Joann. iii,
8.

Matth. xi,
25.

Prov. iii, 32.

Matth. xv,
30.

Matth. xiv,
15 et seq.

Ibid. xv, 34.

Joann. xi,
41.

scribit, sed poterat omnipotentis virtus Christi panibus et piscibus dare vim taliter reficiendi quod potu non eguerunt. *Et sustulerunt quod superaverat de fragmentis, septem sportas*, id est, Apostoli, et forsitan aliqui alii discipuli cum eis impleverunt septem cophinos ex reliquiis cibariorum. In quo magnificentia signi hujus ostenditur. *Erant autem qui manducaverant, quasi quatuor millia*. Apud Matthæum absolute dicitur quod erant quatuor millia. Consuetudo Scripturæ est

A de minutiis numeri ac temporis non curare, sicut in Genesi sæpissime legitur quod homines vixerunt tot aut tot annis : quod non est intelligendum præcise, quasi omnes illi ultimo die anni obierint. Erant ergo quatuor millia, præter pueros et mulieres. Pueri vero in Scripturis vocantur, qui annum nondum attigerunt vicesimum, quasi inepti ad bella procedere, ut in libro Numerorum habetur.

Num. 1, 3, 20 et seq.

Porro de mystico hujus evangelii intellectu in sermone mentio fiet.

SERMO SECUNDUS

DE SEX CONSIDERATIONIBUS EX QUIBUS POTISSIMUM LIQUET IMMENSITAS MISERICORDIÆ DEI AD HOMINES ; ET QUO MENTIS DESIDERIO AUDIENDUM SIT VERBUM DEI, IPSIQUE CHRISTO ADHÆRENDUM PER TRIDUUM.

MISERERIS omnium, Domine, quoniam niam omnia potes, et dissimulas peccata hominum propter pœnitentiam. Sap. xi, 24.

Sicut in oratione ait Ecclesia, Deus omnipotentiam suam parcendo et miserando maxime manifestat. Quod enim iniquis gratiam conversionis infundit, corda illorum immutans, et quo vult ea inclinans, imo in instanti de malo in bonum vertens, opus est infinitæ potentiæ, solique Deo omnipotenti possibile. Propter quod asserit Augustinus, quod justificatio impii est majus opus Dei quam creatio mundi. Præterea, ad personas potentes, magnanimes ac sublimes potissimum pertinet promptitudo misericordiæ. Propter quod etiam Tullius de Julio imperatore fatetur, quod nulla virtus fecit eum ita laudabilem, ut sua clementia. Hinc reges et præsidēs debent esse misericordes. Propter quod Salomon loquitur : Firmatur clementia thronus regis.

Prov. xx, 28.

Apoc. xiv, 16.

Itaque Deus, rex regum et dominus universorum, vere piissimus est, nec possu-

B mus ejus misericordiam satis mirari, quod tamdiu ac patienter sustinet peccatores, imo gravissimis peccatoribus benefacere non desistit. Primo, quoniam indesinenter conservat eos in esse et vita naturali. Quum enim nulla creatura possit per momentum subsistere aut in esse manere, nisi Deo continue conservante, constat quod misericordissimus Deus impios quoque ac pessimos conservat in esse, vivere, ceterisque donis naturæ. Magna fuit misericordia David regis, quod adversarium suum Saulem regem in manus suas bis lapsum non interfecit, nec a militibus suis occidi permisit; verumtamen dixit ad illum : Videat Deus patrum nostrorum, et judicet inter me et te, et ulciscatur me de te. Sed incomparabiliter major est misericordia Dei super iniquos, quorum non interitum sed salutem exspectat et vult, quemadmodum in Ezechiele habetur : Numquid voluntatis meæ est mors impii, dicit Dominus, et non ut convertatur a viis suis, et vivat ?

I Reg. xxiv, 4 et seq. ; xxvi, 7 et seq. ; xxiv, 13.

Ezech. xviii, 23.

Secundo, patet immensitas misericordiæ

Dei in hoc quod non solum bonis, sed et A malis pravissimisque hominibus, necessaria vitæ et bona exteriora tam liberaliter exhibet, victum, vestitum, divitias et honores. Quis proprium inimicum taliter nutrit? Hinc ait Salvator: Altissimus benignus est super ingratos et malos. Nam ut *Luc. vi, 35.* Matthæus plenius scribit: Solem suum facit oriri super bonos et malos, et pluit super justos et injustos. *Matth. v, 45.*

Tertio, quoniam peccatores a morte temporali ac æternali quotidie et tamdiu tuerur. Quandocumque enim quis peccat mortaliter, meretur immediate non solum æternaliter condemnari, sed corporaliter quoque occidi, eo quod tantam faciat Deo creatori suo injuriam. Unde, secundum Augustinum, peccator indignus est pane quo vescitur, terra quam calcat, aere quem respirat, et propria vita qua vivit, imo omni beneficio Dei; idque meretur qui mortaliter peccat, ut omnis creatura contra eum insurgat, et Creatoris sui injuriam ulciscatur in eo. Quum ergo diabolus sit tam atrocissimus hominum hostis, certis- *II Cor. i, 3.* *Thren. iii, 22.* *Is. i, 9.* C tantum ut frequenter ubi plus abundavit delictum, abundet plus gratia.

Quarto, quoniam unicuique homini quantumlibet impio, ingrato ac perfido, ex ordinatione divina adest angelus sanctus, per quem Deus bona inspirat hominibus, atque a multis peccatis retrahit ac custodit iniquos.

Quinto, quoniam indesinenter per divinos instinctus, per angelicas inspirationes, per hominum prædicationes et exhortationes, per Scripturas, per dona et beneficia sua, per Sanctorum miracula et exempla,

invitat peccatores ad pœnitentiam, offerens se paratissimum ad ignoscendum, sicut per Ezechielem testatur: Revertimini et vivite, quia nolo mortem morientis (id est inique agentis, aut quod debitum est negligentis), sed ut convertatur et vivat. In Isaia quoque scriptum est: Propterea exspectat Dominus, ut misereatur vestri. Hinc et beatissimus princeps Apostolorum in sua secunda protestatur Canonica: Patienter agit Dominus propter vos, nolens aliquos perire, sed omnes ad pœnitentiam reverti.

Sexto, quoniam pœnitentibus veniamque petentibus, non solum universa indulget peccata, sed insuper pretiosissima atque supernaturalia Spiritus Sancti dona, gratiam gratum facientem et virtutes largitur, infundit, conservat; et animas paulo ante tam turpes, tam vitiosas ac foedas, tam innumerabilibus enormibusque peccatis sordentes, tam misericordissime adspicit, visitat, ornat, implet, amplectitur, et intime sibi unit atque conformat, in tantum ut frequenter ubi plus abundavit delictum, abundet plus gratia. *Ezech. xviii, 32, 23.* *Is. xxx, 18.* *II Petr. iii, 9.* *Rom. v, 20.*

Itaque, quum talis et tanta sit bonitas, caritas et misericordia Dei ad homines, non simus ei ingrati, nec indulta pœnitentiæ tempora infructuose pertranseamus, sed fructuose ac salubriter expendamus; et Deum cordialiter in omnibus et super omnia diligentes, cum omni diligentia et gratitudine, perseveranter et infatigabiliter obsequamur eidem.

Præterea, hanc misericordiam Dei docet D nos evangelium præsens, quoniam Christus, Deus et homo, adspiciens populum copiosum se assequentem, dixit Apostolis: Misereor super turbam. Si enim corporali penuriæ et fami turbæ illius misertus est, multo amplius miserebitur spirituali indigentia et fami animarum nostrarum, si ad eum nos convertamus. Quo etenim anima corpore exstat præstantior, et quo major est miseria carere virtutibus quam corporalibus alimentis, eo Dominus noster Jesus Christus pronior est animabus mi-

Ezech. xviii, 32, 23.

Is. xxx, 18.

II Petr. iii, 9.

Rom. v, 20.

Marc. viii, 2.

sereri ac subvenire, virtutibus eas ditando ac spiritualiter reficiendo, quam vilibus mortalibusque corporibus. Clamemus ergo cum plena fiducia et incessanti instantia ad Dominum Deum nostrum, ut animas nostras reficiat, roboret, ditet, jugiterque conservet, gratiarum charismata infundendo, infusa perficiendo, atque ad finem saluberrimum perducendo. Hinc enim ad *Hebr. iv, 16.* Hebræos hortatur Apostolus : Adeamus cum fiducia ad thronum gratiæ ejus, ut misericordiam consequamur, et gratiam inveniamus in auxilio opportuno.

Secundo docemur ex evangelio hodierno, ut cum turba hac verbum Dei cum ingenti mentis desiderio audiamus, et Christo ac ejus vicariis, prælatis prædicatoribusque devotis stabiliter adhæreamus ac fervide. Beati enim qui audiunt *Luc. xi, 28.* verbum Dei et custodiunt illud. Et, Qui *Joann. viii, 47.* ex Deo est, verbum Dei audit. Rursusque *Ps. xvii, 26.* scriptum est : Cum sancto sanctus eris. Illis ergo applicare se debet Christianus, a quibus virtutum exempla, sapientiæ documenta, consiliorum moderamina possit accipere. Illorum quoque consortia sunt vitanda, qui trahunt ad vitia, ad ludos, jocos, cachinnos, curiositates et carnalitates. Idcirco in Ecclesiastico scriptum est : *Eccli. xiii, 1.* Qui communicaverit superbo, induet superbiam; et rursus, Cum audace non eas *Ibid. viii, 18, 19.* in via, quoniam tanquam nihil est ante illum sanguis. Denique gulosi et lubrici ad sua alliciunt inquinamenta socios suos.

Tertio ex evangelio isto docemur Christo adhærere per triduum. Possunt autem per tres dies intelligi contritio cordis de omni peccato, confessio oris plenaria, et satisfactio operis digna. Quemadmodum itaque omni hora peccamus, saltem in venialibus culpis, sic omni hora de nostris peccatis cordialiter doleamus, ingemiscamus, veniam deprecemur, et congruo tempore confiteamur, quoniam in confessione omnia lavantur. Confessio quoque sit pura, plena, aperta, cum pudore de turpitudine vitiorum, cum humili recognitione propriæ defectuositatis ac vilitatis, cum servi-

do desiderio divinæ miserationis. Satisfactio demum sit condigna, prout magnitudo exegerit culpæ. Nam satisfactio seu pœnitentia quam facit homo in mortali existens peccato, non est sufficiens nec Deo accepta, sed recuperanda. — Insuper, per tres dies istos intelligi possunt tres status divini obsequii, scilicet status incipientium, status proficientium, et status perfectorum. Et in unoquoque istorum adhærere debemus Deo per caritatem, humilitatem ac proficiendi conatum : ut ex Dei amore omnia faciamus ad ipsius honorem ; per humilitatem, omnem profectum nostrum, et quidquid in nobis exstiterit boni, Deo fideliter adscribamus ; atque per jugem proficiendi conatum, semper ad meliora ac *Hebr. vi, 9.* viciniora saluti tendamus. Nec unquam in vita hac nos apprehendisse putemus *Philipp. iii, 13.* bonum quo gradimur, aut sufficere quod jam fecimus, quum dicat Apostolus : Qui se putat aliquid esse quum nihil sit, ipse se seducit. Imo quotidie in vera humilitate, in sancta obedientia, in stabili mansuetudine, in insuperabili patientia, in sincerissima Dei et proximorum omnium caritate conemur proficere, sicut hortatur Apostolus : Æmulamini charismata meliora ; et Christus in Evangelio : Negotiamini dum venio. Siquidem stare et non progredi, est a bonis cessare atque retrogradi. — Iterum, per tres dies istos intelligi possunt principium operis boni, prosecutio ejus, et perseverantia in eodem usque in finem, seu felix consummatio in eodem. Debemus igitur bona opera fideliter inchoare, viriliter continuare, salubriter consummare, quoniam qui perseveraverit usque in finem, hic salvus erit. — Postremo, per tres dies istos possunt intelligi tres ætates hominis principales, videlicet pueritia, juvenus, senectus. In quibus Domino Deo adhærere atque servire debemus, quatenus ei soli, pueritiæ florem, juvenutis vigorem ac senectutis maturitatem plenarie offeramus. Cujus contrarium agunt multi, quoniam pueritiam ac juventutem in vanitati-

bus voluptatibusque volunt consumere, et A divitibus, quia habetis consolationem vestram. solas senectutis fæces Deo offerre, quum tamen de crastino sint incerti. Isti sunt Deo nimis ingrati, qui suam pueritiam ac juventutem tam fervide amant, et tamen pueritiæ ac juventutis auctorem ac conservatorem in eis tam multipliciter enormiterque offendunt.

Quarto ex evangelio isto docemur moderato ac simplici victu esse contenti. Christus enim, non diversa nec delicata pretiosaque alimenta contulit turbæ, sed panem tantum atque pisciculos. Convivia B namque delicata ac splendida Deo non placent, animam perimunt, corpori quoque nocent : quia in conviviis talibus regnant ventris ingluvies, gulæ voracitas, linguæ loquacitas, deinde dissolutio et choreæ, deinde dominatur libido et immunditia detestanda. In hujusmodi demum conviviis sunt expensæ superflue; et unde multis posset subveniri pauperibus, in paucorum expenduntur delicias. Taliter ergo convivantibus reservatur societas divitis epulonis in inferis, quum dicat Salvator : C

Luc. xvi,
22.
Ibid. vi, 25.
Ibid. 24.

Væ vobis qui saturati estis; et, Væ vobis

Itaque ex evangelio isto discamus Christi caritatem ac misericordiam imitari, sicut in Vitaspatrum de duobus legitur Fratribus. Erant enim duo Fratres simul in eremo habitantes. Quumque unus eorum gravem incurrisset tentationem, et in vitium carnis lapsus fuisset, atque ob hoc desperare vellet et reverti ad sæculum, alter rogavit eum ut secum rediret ad eremum, quatenus simul pœnitentiam agerent. Et quum ille qui peccavit non acquiesceret ei, dixit innocens Frater ille : Ecce, carissime frater, ego dimidium tui peccati super me capio, et pro te dimidium pœnitentiæ huic peccato debitæ facere volo : tantum hoc rogo, ut simul redeamus in eremum. Tunc Frater ille culpabilis, compunctus in verbis tantæ caritatis et compassionis sui confratris, acquievit exhortationibus ejus, rediitque in solitudinem secum, et condignam ibidem pœnitentiam fecit. In quibus impletum est quod Salomon dixit : Frater qui adju-

Prov. xviii,
19.

SERMO TERTIUS

DE SPIRITUALI SIGNIFICATIONE CONVIVII DE QUO IN EVANGELIO HODIERNO LEGITUR,
ET DE SEPTEM PANIBUS QUOS CHRISTUS QUOTIDIE FIDELIBUS SUIS APPONIT.

VENITE ad me, omnes qui laboratis D et onerati estis, et ego reficiam vos.

Matth. xi, 28. Hæc sunt verba Christi.

Matth. vii,
14.

II Tim. ii, 5.

Quoniam Salvatore testante, Arcta est via quæ ducit ad vitam, atque angusta porta salutis; et ut fatetur Apostolus, Non coronatur nisi qui legitime certaverit : constat quod omnes Christo veraciter servientes, graves ac varios interdum habent labores, præsertim quia regnum cœlorum vim patitur, et violenti rapiunt illud. Salubriter quippe violenti sunt, qui vincunt se

Matth. xi,
12.

ipsos, et dominantur animo suo : quæ omnia absque labore non adimplentur. Hos ergo qui in præsentis exilio laboribus pœnitentiæ exercentur, et tribulationibus tentationibusque gravantur, Christus invitat ut eum accedant per fidem, dilectionem et invocationem, promittens quod eos reficiet pane vitæ et intellectus, sanctis meditationibus, cœlestibus consolationibus, caritatis ardoribus, futuræ felicitatis præ gustibus, æternæ et increatæ suæ bonitatis atque dulcedinis gratiosis saporibus; ita

Prov. xvi,
32.

Eccli. xv, 3.

quod ex certissima experientia fatebun-
Ps. xxx, 20. tur : Quam magna multitudo dulcedinis
Thren. iii, 25. tuæ, Domine ! Itemque : Bonus est Domi-
Ps. cxliv, 7. nus sperantibus in se, animæ quærenti il-
 lum. De taliter reffectis Propheta loquitur
 Deo : Memoriam abundantiae suavitatis tuæ
 eructabunt. Istud spirituale convivium fi-
 guratum est per corporale convivium de
 quo in evangelio isto fit sermo. Itaque per
 quatuor millia illa quæ Christus pavit ex
 septem panibus ac paucis pisciculis, desi-
 gnatur universitas populi christiani, do-
 ctrinam quatuor Evangelistarum implen-
 tis, et quatuor virtutes cardinales habentis.
 Christifideles ergo hujusmodi reficiuntur
 a Christo septem panibus, id est septem
 donis Spiritus Sancti.

Primus panis, est donum sapientiæ. Hæc
 sapientia est cognitio divinorum saporosa
 et affectiva, quæ non habetur nisi ab exsi-
 stentibus in caritate et gratia. De qua ait
II Cor. iii, 18. Apostolus : Nos autem revelata facie, id
 est mente illuminata, gloriam Domini spe-
 culantes, id est divinæ majestatis altitudi-
 nem ac beatitudinem contemplantes. Per
 hoc etenim donum illuminat Spiritus San-
 ctus mentem ad summæ Trinitatis ac sim-
 plicissimæ Deitatis contemplationem ali-
 qualem in hac vita habendam, ut fideliter
 contemplemur quam magna et infinita est
 bonitas, perfectio et felicitas Dei nostri,
 quemadmodum ad Ephesios orat et ait
Ephes. i, 17. Apostolus : Pater gloriæ det vobis spiritum
 sapientiæ, in agnitione ejus. Hic est nobi-
 lissimus et mentem valde confortans ac
 lætificans panis, ad cujus gustum et esum
Ps. xxxiii, 9. hortatur Propheta, dicendo : Gustate, et
Ibid. 6. videte quoniam suavis est Dominus; item-
 que, Accedite ad eum, et illuminamini.

Secundus panis, est donum intellectus.
 Intellectus enim, in quantum est unum de
 septem donis Spiritus Sancti, est superna-
 turalis et infusus habitus per quem ratio-
 nes credendorum cognoscimus, seu aliqua
 argumenta veritatis fidei christianæ inspi-
 cimus, utpote quoniam Deus hanc fidem
 per diversa confirmavit miracula, et innu-
 merabiles sanctissimi viri sic crediderunt.

A Ex veteri quoque Testamento omnia pro-
 bantur quæ credimus. Pro quo pane orat
 Psalmista, dicendo : Da mihi intellectum, et
Ps. cxviii, 34. scrutabor legem tuam. Hic autem intelle-
 ctus non est informis, sed formata notitia
 credendorum, seu rationum propter quas
 credimus.

B Tertius panis, est donum consilii, per
 quod illuminamur atque dirigimur a Spi-
 ritu Sancto ad intelligendum quid magis
 expediat in agendis, et quid sit consulen-
 dum in illis, præsertim in his in quibus
 naturalis deficit ratio, et quæ ad evangeli-
 ca Christi consilia pertinent. In quibus
 omnibus tot sunt circumstantiæ et varie-
 tates considerandæ, tamque difficile est
 invenire quid magis expediat, quod super-
 naturali directione et illuminatione Spi-
 ritus Sancti vehementissime indigemus. Id-
 eo Sapiens asserit : Quis hominum poterit
Sap. ix, 13, 17. scire consilium Dei, aut quis hominum
 poterit cogitare quid velit Deus, nisi tu,
 Domine, dederis sapientiam, et miseris
 spiritum tuum de cœlis ?

C Quartus panis, est donum fortitudinis,
 per quod supernaturaliter confortamur a
 Spiritu Sancto ad exsequendum invicte ea
 quæ per donum consilii cognovimus esse
 agenda, secundum illud ad Ephesios : Con-
Ephes. vi, 10. fortamini in Domino et in potentia virtu-
 tis ejus.

Quintus panis, est donum scientiæ. Hæc
 autem scientia quæ est donum, non est
 scientia acquisita humana, sed supernatu-
 ralis infusa, per quam de creaturis bene
 sentimus ac judicamus, easque vere et af-
 fective cognoscimus : utpote, quod in eis
 non sit finis ultimus statuendus, imo quod
 in se ipsis vanitati subjectæ sint, ideoque
 ad Deum sint referendæ, nec appetendæ
 nisi in quantum proficuæ aut necessariæ
 nobis sunt ad pertingendum ac adipiscen-
 dum ultimum finem. Hæc est salutaris
 scientia de qua ait Scriptura : Dedit illi sci-
Rom. viii, 20. entiam sanctorum. De qua loquitur Isaias :
 Divitiæ salutis, sapientia et scientia.
Is. xxxiii, 6.

Sextus panis, est donum pietatis, per
 quam bene et pie afficimur seu benevoli

sumus ad proximos, in quantum ad Dei A imaginem et similitudinem sunt plasmati, sicque eisdem pro viribus subvenimus.

1 Tim. iv, 7. De qua ait Apostolus : Exerce te ipsum ad pietatem.

Septimus panis, est timor Domini filialis, castus et sanctus, optime mentem confortans ne peccatis succumbat : de quo pane dictum est sæpe. Unde in Ecclesiastico scriptum est : Beatus cui datum est habere timorem Dei.

Ecclesi. xxv, 15.

Præterea per pisciculos panibus junctos, possunt intelligi dona gratiæ gratis datæ. B Quæ parva sunt valde respectu donorum Spiritus Sancti, quoniam bonis ac malis communia sunt, neque per se efficiunt hominem Deo acceptum; et tamen conferuntur a Spiritu Sancto, dicente Apostolo : Alii per Spiritum datur sermo sapientiæ, alii sermo scientiæ, alii gratia sanitatum, alii operatio virtutum, alii genera linguarum, alii discretio spirituum, etc. Per hæc dona gratiæ gratis datæ, efficiuntur hominibus dulciora exercitia virtutum atque donorum. Possunt quoque per istos pisciculos intelligi scientiæ et virtutes acquisite ac naturales, quæ bene utentibus cooperantur ad bene vivendum, ad spiritualem profectum, ad contemplationem cœlestium.

1 Cor. xii, 8-10.

Denique, quamvis hos cibos Deus det

effective immediate per se ipsum, quantum ad habitus infusos creatos, dispositive tamen, et ministerialiter ac instrumentaliter dedit eos hominibus per beatos Apostolos, quia per impositionem manuum eorum dabatur Spiritus Sanctus in signo sensibili, et per prædicationem eorum disponebantur corda hominum ad illuminationem divinam. Act. viii, 17; xix, 6.

Postremo, si ita a Christo refici affectamus, sequamur ejus vestigia, et ei stabiliter adhæreamus, carnalia solatia aspernando, mundi honores ac vanitates vitando, locum pœnitentiæ, secretum orationis, arcem contemplationis introeundo, ut soli Deo saltem interdum omni die vacemus. Unde de sancto abbate Arsenio legitur, quod quum adhuc in palatio esset imperatoris, venit ad eum vox de cœlo, dicens : Arseni, si vis salvari, fuge homines. Post aliquot dies Arsenius dixit ad Deum : Domine, volo salvus fieri, et nescio quomodo. Venitque iterum vox de cœlo, et dixit : Arseni, si vis salvari, fuge homines, tace, quiesce. C Quibus auditis, S. Arsenius universa quæ mundi sunt dereliquit, eremumque ingressus est. In qua quinquaginta quinque annis Deo in omni sanctitate, abstinencia et rigore servivit, atque post hoc in Deo felicissime obdormivit.

AD RELIGIOSOS

SERMO QUARTUS

DE VIRTUTUM SPLENDORE, GRATIARUM PULCHRITUDINE, ET PLERISQUE ALIIS RELIGIOSORUM ORNAMENTIS.

QUEM fructum habuistis tunc, in quibus nunc erubescitis? Rom. vi, 21.

Quantus sit splendor virtutum, quanta gratiæ pulchritudo, quanta venustas donorum Spiritus Sancti, quanta item sit vitio-

rum deformitas, concupiscentiæ turpitudine, inhonestas ac fœditas omnis peccati mortalis, nullus mortalium in hac vita comprehendere valet aut eloqui, nec potest per doctissimos quosque plene descri-

bi. Et hoc certissime innotescit, si effectus A gratiæ ac virtutum, concupiscentiæ quoque et vitiorum rite considerentur. Ecce enim quantumcumque sublimis sit alicujus rationalis seu intellectualis creaturæ dignitas naturalis seu natura specifica, non tamen per se accepta est Creatori, nec ad promerendum idonea. Sed tanta est dignitas gratiæ gratum facientis, quod quantumcumque sit modica aut remissa, tamen per eam constituitur rationalis creatura in esse supernaturali ac deiformi, atque ad promerendum idoneo; et ipsa rationalis B creaturæ essentiam in tantum perornat, perficit et exaltat, quod Creatori altissimo fit accepta, grata ac placita, in tantum quod et singula opera ejus quæ gratia informantur, sunt Deo accepta, spiritualiter viva, et æternæ meritoria vitæ.

Rom. viii, 17. Denique caritatis infusæ dignitatem et excellentiam nemo potest exprimere. Per caritatem namque fit homo supernaturaliter similis Deo, fit adoptivus filius Dei, servus et membrum Christi; fit heres Creatoris coheresque Salvatoris, amicus Altissimi, C socius angelorum, particeps electorum; fit anima ejus sponsa cœlestis Sponsi, amatrix et amplexatrix, thronus et tabernaculum Dei viventis; fit homo miles æterni Regis, fit spiritualiter vivus, speciosus ac floridus, Deo amabilis et conjunctus, adhærens ac lucidus. Virtutes quoque ceteræ infusæ, per gratiam et caritatem formatae ac decoratae, reddunt hominem Deo acceptum et æternam beatitudinem promereri potentem, ad bona agenda perfacilem, contra aciem vitiorum impugnationesque dæmonum fortem, munitum, armatum, victoriosum.

Ecce quomodo gratia, virtutes et dona, fructus et opera bona hominem ornant, sublimant, deificant, honorabilem ac beatum efficiunt. Econtra vitiorum ineffabilis est deformitas, fœtor, caligo, vilitas, horror, damnatio: quia per ea fit homo displicens Deo et prorsus aversus ab eo, spiritualiter mortuus, et omni cadavere coram Deo fœtidior; fit servus et membrum dia-

boli, minister peccati, dæmonum servus, Creatorisque inimicus et ei odibilis; fit anima ejus diaboli detestanda adultera, æternæ damnationi obnoxia, omnique brutto incomparabiliter pejor et vilior. Per actum virtutis adipiscitur homo beatitudinem æternalem; per mortale peccatum, damnationem perpetuam gehennalem. Quam ineffabiliter ergo differunt ac distant ab invicem virtus et vitium, meritum et demeritum, quorum tam diversi sunt effectus, tam indicibiliter diversum distansque præmium? Præterea, hæc ipsa partim tangit Apostolus in præsentī epistola, dicens: Quum servi essetis peccati, liberi fuistis Rom. vi, 20. justitiæ. Quo constat, quod peccando redatur homo servus peccati, et a dominio justitiæ alienus: et ita fit Belial, id est absque Domini jugo, subjectus diabolo.

Deinde, dicendo, «Quem fructum habuistis tunc, in quibus nunc erubescitis?» ostendit quam vehemens sit erubescibilitas, inhonestas fœditasque peccati, quum sit aversio a fonte totius lucis, puritatis et honestatis, et ejus præceptis ac rectæ rationi contrarium: idcirco non solum est infructuosum, sed summe quoque nocivum. Et quanto quis plenius desuper illustratur, tanto vilitatem ac turpitudinem vitiorum clarius contemplatur, et amplius inde verecundatur. Quum ergo delectatio peccati tam brevis sit, et erubescencia atque punitio quæ ei debentur, tam diuturnæ, imo perpetuæ, vitemus omne peccatum, omnem actum immundum, omne verbum et opus quodlibet inhonestum.

D Nemo faciat in secreto de quo verecundaretur in publico, ne de illorum sit numero de quibus ait Apostolus: Quæ in occulto fiunt ab eis, turpe est dicere. Siquidem Christo testante: Omnis qui male agit, odit lucem, nec venit ad eam, ut non arguantur opera ejus; qui autem facit veritatem, venit ad lucem, ut manifestentur opera ejus, quia in Deo sunt facta. Erubescamus ergo quotidie, et vehementissime coram Deo verecundemur, quod in ejus obsequio tam imperfecte, tam irreverenter

Ephes. v, 12.

Joann. iii, 20, 21.

et culpabiliter nos habemus, quod quotidie tot mala committimus, tot bona omitimus, quod toties etiam in orando, psallendo, meditando et celebrando sumus distracti, instabiles, et miserrime atque vanissime evagantes ; dumque summo objecto, Deo immenso, incomparabili et in-circumscrip-tibili bono essemus toto corde intenti, de rebus vilissimis cogitamus. Dicat quilibet omni die, se ipsum discutiens, ex corde cum Esdra : Deus meus, confundor et erubesco levare faciem meam ad te, quoniam iniquitates meae multiplicatae sunt super caput meum, et peccata mea creverunt usque ad cœlum. Sicque humiliemus et despiciamus semper nos ipsos ; et si quid boni in nobis est, Deo cum gratiarum omni actione attribuamus, accusantes nos ipsos quod donis Dei tot mala miscemus.

I Esdr. ix, 6.

Rom. vi, 21.

Ibid. 22.

Insuper, dicendo Apostolus, Finis illorum, scilicet vitiorum, mors est, pandit quod vitia ad æternæ calamitatis perducunt interitum. Dicendo quoque, Servi facti Deo, habetis fructum vestrum in sanctificationem, finem vero vitam æternam, docet quod meritorii actus sanctificant hominem, atque ad vitam gloriæ perducunt eundem. Quum ergo hæc ita se habeant, quæ est ista ignavia et insipientia nostra, quod tam remissi sumus ad proficiendum in gratia, in omni virtute, dono et fructu Spiritus Sancti, quum tamen omni hora tam copiose ac mirabiliter possimus in eis proficere ac ditari, atque æternam beatitudinem nobis tam inæstimabiliter accumulare, exuberantissimum nobis thesaurum congregare, reponere, obtinere in cœlis ? Heu ! cur ad declinandum quotidiana et quæ putantur minuta peccata sumus tam segnes, tam incuriosi, tam negligentes, quum tamen per illa a spirituali profectu tam vehementer ac lamentabiliter impediamur ?

Impleamus ergo quod in exordio hodiernæ epistolæ hortatur Apostolus : Sicut exhibuistis membra vestra servire immunditiæ et iniquitati ad iniquitatem, ita nunc exhibete membra vestra servire iustitiæ

A in sanctificationem. Itaque, sicut ante per linguam servivimus impietati verborum et suggestionibus dæmonum, vana, mendosa, perjura, pungitiva, fraudulenta, lasciva, detractoria proferendo ; sic modo per linguam serviamus Deo atque virtutibus, ab omnibus verbis hujusmodi abstinendo, et sola utilia, ædificatoria ac Deum honorantia verba loquendo, alacriter quoque psallendo, orando, et devote cantando. Quemadmodum item per visum offendimus Deum ac variis deservivimus vitiis, libidinose inspiciendo, choreas et spectacula intuendo, aut alios provocando, vana hauriendo, illicitis consentiendo, nunc pompose, nunc furiose videndo : sic nunc per visum Deum honorare semper conemur, ab omnibus talibus abstinentes, et oculos nostros undique cohibentes, potissimum in divinis ; ea vero intueamur per quæ ad Dei contemplationem et amorem, ad compunctionem et devotionem possumus adjuvari.

C Amplius, quemadmodum per auditum variis modis peccavimus, illicita verba aut carmina libenter audiendo ; sic modo per auditum veneremur Creatorem, pristina illa vitantes peccata, et verba salubria atque divina officia cupide advertendo. Et sicut per tactum multipliciter atque enormiter Deum offendimus, sic nunc illa omnia fugiendo, reprimamus tactum inverecunde prosilientem, et disciplinemus castigemusque corpus nostrum. Sicut item per gustum peccavimus valde in cibis ac potibus crapulosis, voluptuosis, assiduus, sic modo per abstinentias atque jejunia satisfacere et Deum honorare non differamus. Rursus, sicut per vestes curiosas, pompaticas, superfluas, pretiosas peccavimus, sic modo in vili et abjecto gloriemur vestitu. Et ventrem quem vitiose replevimus, virtuosa esurie affligamus. Pedes quos ad currendam viam perditionis male laxavimus, nunc in cœnobio, in cella, in camera contineamus. Manus quæ diversorum fuerunt criminum instrumenta, modo non extendamus nisi ad opera virtuosa.

Nec corporis membra dumtaxat, sed et inferiores animæ vires Deo potissimum nunc subdamus. Et voluntatis libertatem qua toties contra Dei præcepta pravissime sumus abusi, nunc sub obedientia sancta, sub regulari observantia coarctemus; rationem seu intellectum in Scripturis et in pertinentibus ad salutem solummodo occupemus. Vana et frivola, atque injuriarum recordationem a memoria excluda-

mus; Dei vero præcepta, consilia, documenta, beneficia, propria quoque peccata, et quæ nos scire oportet aut expedit, includamus eidem. Sicque totum quod sumus sive habemus, in Creatoris cultum honorificentiamque vertamus, et cum beatissima Maria Magdalene tot de nobis inveniamus et Deo immolemus holocausta quot in nobis prava habuimus oblectamenta. Ad laudem et gloriam Omnipotentis.

*Luc. vii, 37
et seq.*

SERMO QUINTUS

DE PANIBUS AC PISCIBUS SPIRITUALIBUS, QUIBUS BONI RELIGIOSI A DOMINO MISERICORDITER PASCUNTUR.

MISEREOR super turbam, quia ecce jam triduo sustinent me, nec habent quod manducent. *Marc. viii, 2.*

Si Dominus et Salvator, turbæ ipsum per tres dies sequenti, corporalique fame, siti ac lassitudine laboranti, misertus est, ac pabulum contulit copiosum, ita quod plurimum superfluxit; quanto magis religiosi ipsum per universum vitæ suæ spatium devote sectantibus, qui se per vota solennia ad incessabilem Domini Jesu Christi imitationem ac juge obsequium adstrinxerunt, miserebitur Christus, eos exuberanter reficiet, gratiosissime confortabit, suaviter quoque potabit? Et sicut turbam illam septem panibus ac paucis refecit pisciculis, ita et nos totidem reficiet panibus.

*Marc. viii,
6, 7.*

Qui ergo sunt septem panes hi spirituales? Responderi posset, quod sint septem dona Spiritus Sancti, seu theologicæ tres virtutes, et quatuor cardinales. Sed nunc alii septem assignandi sunt panes. Sunt enim quatuor sensus seu expositiones et intelligentiæ sacræ Scripturæ. Qui quamvis suaviter reficiant animam, non tamen ei sufficiunt ad salutem, nisi et alii tres panes addantur, videlicet: panis sacra-

mentalis, de quo asserit Dominus, Nisi manducaveritis carnem Filii hominis, non habebitis vitam in vobis; panis quoque bonæ operationis (de quo item testatur Salvator, Meus cibus est, ut faciam voluntatem Patris mei qui misit me; et de quo ait Apostolus, Non auditores legis justi sunt apud Deum, sed factores legis justificabuntur: imo scienti bonum et non facienti, peccatum est illi); et panis divinae conservationis: nam quantumlibet quis Scripturas intelligat, Sacramentum altaris accipiat, et præcepta adimpleat, tamen nisi conservetur a Deo in bonis, confortetur in tentationibus, et præservetur a malis, non potest salvari.

*Joann. vi,
54.*

Ibid. iv, 34.

Rom. ii, 13.

*Jacob. iv,
17.*

Est igitur primus panis spiritualis, quo nunc a Deo in solitudine religionis reficimur, sensus litteralis sacræ Scripturæ. Qui sensus interdum est historialis: ut ea quæ in Evangelio de Christi incarnatione, natiuitate, circumcissione, apparitione, miraculis, persecutionibus, passione, resurrectione, ascensione leguntur. Et præsertim, quantum ad libros novi Testamenti, sensus litteralis libri Actuum Apostolorum est historicus. Interdum vero sensus iste litteralis historicus, est in se ipso valde su-

blimis, pinguis, salubris et deliciosus : ut ea quæ, sicut jam dictum est, de Christo litteraliter historialiterque scribuntur. In quorum lectione, meditatione, auditione, mens humana fidelis, sancta caritate vehementer accenditur, in fide firmatur, in spe consolidatur, ad gratiarum actionem inducitur, in humilitate, patientia, mansuetudine omnique roboratur virtute : ut quum legimus, quod Filius Dei propter nos factus est homo, conversatus in mundo, suspensus in ligno, quod tanta per se ac suos discipulos fecit miracula, quod resurrexit a mortuis die tertia, quod coram discipulis ascendit in cœlum, atque eisdem misit Spiritum Sanctum. Porro interdum sensus litteralis est moralis, tam in novo quam veteri Testamento : ut ea quæ ad evangelicæ ac Mosaicæ legis spectant præcepta et consilia documentaque ethica, in quibus evangelicæ legis perfectio et excellentia elucescunt. Et hic sensus litteralis moralis, in novo Testamento spiritualior, perfectior devotiorque esse non dubitatur, ut patet potissime apud Matthæum. Quandoque sensus litteralis, allegoricus esse videtur, ut quum docet Scriptura quid debeat credi ; aliquando vero anagogicus perhibetur, sicut dum cœlestis patriæ beatitudinem pandit, et quid ibi sperandum sit, edocet.

Sæpissime sensus litteralis et historialis in se ipso aridus satis insipidusque censetur, non utique in novo Testamento compendiosissime scripto, sed in veteri, quod novi præfigurativum exstitit Testamenti, et rudi datum est populo : ideo multa scribuntur in eo in se ipsis sterilia, in quibus oportet sugere mel de petra, oleumque de saxo durissimo. Deinceps in libro Psalmorum sensus litteralis et historialis sæpe omnino sublimis, pinguis, suavis est, ut in psalmis qui ad litteram de Christi mysteriis sunt conscripti ; aliquando sensus litteralis et historialis in eis non est ita deliciosus, fecundus et altus.

Verumtamen dum Scriptura quadruplicem sensum habere asseritur, distinctio

A sensuum illorum formaliter sumitur, prout unus et idem Scripturæ locus multipliciter explanatur. Nec sic sensus illi coincidunt, nec putandum quod quilibet passus Scripturæ quadrupliciter aut multipliciter possit exponi, quum psalmus ille, Miserere mei, Deus, secundum magnam misericordiam tuam, nec allegorice de Christo, nec anagogice de Beatis exponi queat. Imo frequenter ejusdem scripturæ sensus litteralis est multiplex.

Itaque secundus panis sacræ Scripturæ, B quo in præsentī reficimur, est sensus tropologicus seu moralis : ut quando ex eo quod ad litteram Christus fecisse aut pertulisse legitur, quid nos quoque qui ipsius membra sumus, agere et pati debeamus, instruimur. Omnis etenim Christi actio est nostra instructio : unde ex hoc quod ipse non solum obediens factus est Deo Patri usque ad mortem crucis, sed Virgini quoque matri et ejus obedivit ministro, docemur quod volens perfectus fieri et omnem implere justitiam, omnem

C humilitatem, caritatem et pietatem, non solum superioribus suis in arduis, sed æqualibus quoque et inferioribus debeat obtemperare ac ministrare, et cum omnibus humillime conversari. Hoc ergo pane refecti, implemus quod ait Joannes apostolus in sua Canonica, Qui se dicit in Christo manere, debet, sicut ille ambulavit, et ipse ambulare ; et quod princeps ait Apostolorum, Christus passus est pro nobis, vobis relinquens exemplum, ut sequamini vestigia ejus ; et quod ipsemet

D deprompsit Salvator, Qui vult venire post me, abneget semetipsum, et tollat crucem suam quotidie, et sequatur me. Quod ad religiosos potissimum spectat, quos inde sinenter oportet vincere et frangere semetipsos, et sua corpora castigare, ut cum Propheta dicere valeant Deo, Propter te mortificamur tota die ; et, Propter verba labiorum tuorum ego custodivi vias duras : quanquam hoc totum viris vere spiritualibus, fervidis et perfectis delectabile sit atque facillimum.

Joann. i. 14.

Baruch iii, 38.

Joann. xix, 18 ; Act. x, 39, 40.

Act. i. 9 ; ii, 2 et seq.

Ps. l, 3.

I Cor. xii, 27.

Philipp. ii, 8.

Luc. ii, 51.

I Joann. ii, 6.

I Petr. ii, 21.

Luc. ix, 23.

Ps. xliii, 22.

Ps. xvi, 4.

Deut. xxxii, 13.

Tertius panis, est sensus allegoricus, quo ex his quæ ad litteram de membris Christi conscripta sunt, quid de Christo credendum sit, informamur. Sic enim multa ad litteram de Joseph, Samsone, David et Salomone, et aliis Sanctis scripta, de Christo allegorice exponuntur. Et quæ in se ipsis modicæ sunt virtutis ac parvi saporis, fortissimi sunt vigoris et admirandæ suavitatis : ut quod Joseph salvator mundi est appellatus, dominus Ægypti effectus, a fratribus venditus ; quod David prostravit Goliath, quod Salomon sibi desponsavit regis Ægypti filiam, quod Samson portas Gazæ abstulit media nocte. In quibus omnibus Christi sunt mysteria præsignata.

Quartus panis, est anagogicus sensus, quo ea quæ de militanti Ecclesia ejusque membris litteraliter scripta sunt, de triumphanti explanantur Ecclesia. Hic panis subtilis ac nobilis est, et vehementer delectat. Præterea, quæ de superbeatissima Trinitate ac simplicissima Deitate, de ejus excellentia, æternitate, beatitudine, perfectione, sapientia, omnipotentia ad litteram scripta sunt, possunt anagogicæ intelligentiæ appellari, quoniam mentem maxime super se elevant.

Quintus panis, est Eucharistia, pretio-

sisimus panis vitæ præsentis, frumentum electorum, et vinum germinans virgines, panis sacramentalis, in quo ipse fons gratiarum, fons omnium deliciarum, Deus et homo, verissime et superincomprehensibiliter, dignantissime et supergratiosissime continetur. Quem panem possumus et debemus spiritualiter omni hora comedere. Omninoque decet nos religiosos, sacerdotes, tam religiose ac sacerdotaliter conversari, ut simus idonei per gratiam Dei quotidie hunc panem consecrare, Deo Patri offerre, atque salubriter manducare. Quid enim aliud operari habemus, nisi incessanter ad hoc nos disponere, et universa quæ agimus ad tam divinissimum opus referre, ut tota nostra conversatio sit ad celebrandum jugis præparatio?

Sextus panis, est bonæ operationis, ut omni momento simus actibus sanctis intenti, et in observantiis Ordinis strenui, omnem otiositatem, pigritiam negligentiamque vitantes, et opus Dei quotidie reverentialius atque perfectius adimplentes, per quod corda nostra optime reficiantur ac roborabuntur.

Septimus panis, est gratiosa et incessabilis conservatio Dei, quæ in omni bono conservet, tueatur, confortet et ad beatam consummationem perducat.

SERMO SEXTUS

DE SEPTEM EFFECTIBUS SACRÆ SCRIPTURÆ.

S*I dimisero eos jejunos, deficient in via.* Marc. viii, 3.

Quemadmodum corpus materialibus indiget alimentis, ne in vita ista deficiat, ita et anima incorporeis refectionibus eget, ne in via deficiat peregrinationis præsentis. Reficit ergo nos Spiritus Sanctus septem spiritualibus panibus, per quos isto in loco intelligo septem salutares effectus

quos Deus per sacram Scripturam operatur gratiose in nobis, atque per eos animas nostras reficit, exhilarat et confortat.

Primo namque Scriptura docet nos Deum verum cognoscere, et hoc per considerationem creaturarum, juxta illud Isaïæ : Levate in excelsum oculos vestros, et videte quis creavit hæc. Apostolus quoque : Invisibilia (inquit) Dei per ea quæ facta

Is. xl, 26.

Rom. i, 20.

*Gen. xli, 45.
41 ; xxxvii,
28.
1 Reg. xvii,
49.
III Reg. iii,
1.
Judic. xvi,
3.*

sunt conspiciuntur; sempiterna quoque A virtus ejus et divinitas, ita ut sint inexcusabiles, qui scilicet Deum non cognoverunt. Unde et in libro Sapientiæ legitur :

Sap. xiii,
1, 5.

Vani sunt omnes homines quibus non subest scientia Dei, et de his quæ videntur bona, non potuerunt intelligere eum qui est; a magnitudine enim speciei creaturæ poterit Creator cognoscibiliter videri. Si quidem ordo rerum, et ipsa consistentia universi, scala est ascendendi ad Creatoris notitiam, qui fecit omnia ut timeatur: quia idcirco tam mirabiliter et potenter, tam B præclare ac sapienter creata produxit, ordinavit atque connexuit, quatenus ex horum omnium speculatione, ad ipsius Creatoris amorem, pariter et timorem, cultum et venerationem excitemur ac elevemur.

Eccle. iii,
14.

Prov. xvi, 4.

Jer. v, 21,
22.

Propter quod Salomon loquitur : Universa propter se ipsum operatus est Dominus. Et apud Jeremiam Dominus ait : Audi, popule stulte, qui non habes cor. Me non timebitis, qui posui arenam terminum mari, præceptum sempiternum quod non præteribit? Intumescent fluctus ejus, et C non transibunt illud. Quibus verbis Deus increpat eos qui ex consideratione operum ipsius magnalium in creaturis, eum non timuerunt. — Secundo, docet Scriptura nos Deum cognoscere per supernaturales suos effectus, utpote per miracula, per quæ utriusque Testamenti veritas maxime comprobatur; tertio, per oracula Prophetarum, et per documenta Apostolorum et Evangelistarum. Deinceps, per miracula, et oracula ac documenta hæc ipsa, docet nos sancta Scriptura de Deo ea cognoscere D quæ omnem naturalem rationem transcendunt : ut quod ipse in unitate essentiae trinus est in personis, quod Verbum æternum humanam assumpsit naturam ex Virgine, et cetera quæ fides docet de Deo esse tenenda.

Secundus Scripturæ sacræ effectus est, quod vere et certe nos instruit quid de nobis ipsis ceterisque creatis debeamus sentire : qualiter scilicet primo facti sint primi parentes et omne genus humanum

propter beatificam Dei fruitionem adipiscendam, et qualiter beatitudine hac privati, simus per Christi passionem redempti, qualiter in fine mundi resuscitandi.

Tertius effectus est, quod Scriptura ostendit legentibus eam, ipsorum defectus et vitia, omissiones et commissiones iniquas. Ideo religiosi illi præsertim student sunt libri in quibus quid eis desit, quam negligenter se habeant, quantum a perfectione deficient, magis inveniunt : ut sunt Collationes et Instituta Patrum, liber Climaci, Vitaspatrum, homiliæ Eusebii Emiseni, Profectus religiosorum, sermones S. Bernardi, similesque devoti tractatus, inter quos fulget opusculum S. Bernardi ad Fratres de Monte Dei. Dum enim legimus quam sancte, quam rigore, perfecte sobrieque vixerunt et qualia nobis documenta dereliquerunt sancti Patres, cogimur vitam nostram despicere, et nos ipsos pro nihilo reputare. Hinc diligens lectio Scripturarum sæpe plus prodest quam meditatio sive oratio. Per Scripturas namque Deus noster loquitur nobis, et vitia nostra nobis ostendit.

Cassianus.

Quartus effectus est, quod ad spiritualement profectum nos exhortatur, et qualiter proficiendum sit docet; jamque beatitudinem promittendo, jam supplicia comminando, ad virtuosa invitat nos opera. De his Scripturæ effectibus ait Hieronymus : Utere lectione divina vice speculi, fœda corrigendo, pulchra conservando, et pulchriora agendo. Scriptura etenim speculum est, fœda ostendens et corrigi faciens. Gregorius quoque : Sacra (inquit) Scriptura oculis mentis quasi speculum opponitur, ut sibi interna nostra facies videatur. Ibi enim fœda, ibi pulchra nostra conspiciamus; ibi sentimus quantum proficimus, quantumve a profectu distamus. Dum itaque in scripturis canonicis sive authenticis, aliquid de vitiis et negligentis ac defectuositatibus quæ insunt nobis, legimus aut legi audimus, ingemiscamus, pectus tundamus, cordialiter compungamur, contristemur, et deploremus nos

ipsos, et emendationem condignam firmissime proponamus, ac protinus exsequamur; quum vero de bonis quæ forsitan insunt nobis aliquid ibi audimus aut legimus, Deo regratiemur, et ea custodiamus, atque in ipsis proficere non censemus.

Quintus effectus est, quod multipliciter ac salubriter nos informat de divinis mysteriis, de secretis Dei effectibus, de ecclesiasticis sacramentis, multisque rebus atque eventibus nos ipsos concernentibus. Hinc ait Chrysostomus: In Scripturis ignorans invenit quod addiscat; contumax, quod formidet; laborans, præmia; pusillanimis, mediocres justitiæ cibos, qui etsi pinguem non faciunt animum, non tamen mori permittunt eundem. Qui autem magnanimis est, spirituales ibi invenit escas, quæ perducunt eum prope ad angelorum naturam; qui vero vulneratus est a diabolo, invenit ibi cibos medicinales, et salutem per poenitentiam. Iterum ait: Quanto plus quis in sacris Eloquiis assiduus fuerit, tanto ex eis uberiores intelligentiam capit. Porro, qualiter ad Scripturarum medullam, ad profundam earum notitiam, ad veritatum sanctarum saporem aptius perveniatur, docet Hugo de S. Victore dicendo: Ad sacræ Scripturæ cognitionem, opus est intima compunctione magis quam profunda investigatione, suspiriis quam argumentis, crebris gemitibus quam copiosis argumentationibus, lacrimis quam sententiis, oratione quam lectione, gratia lacrimarum quam scientia litterarum, cœlestium contemplatione magis quam terrestrium occupatione. Denique hujus rei signum certissimum est, quod viri sanctissimi, quamvis quodammodo idiotæ, tamen per prædicta ad saporosam ac profundissimam Scripturarum intelligentiam pervenerunt, quemadmodum de beatissimis patribus Martino et Francisco refertur, et de sanctis patribus quorum collationes Cassianus describit, cognoscitur.

Sextus effectus est, quod Deitatis nos inflamat amore, et per hoc, a sæculi

A vanitate et omni carnali avertit affectione. Docet enim Scriptura, quam infinite et incomparabiliter bonus, amabilis, dulcis, pulcher, sapiens, dives, potens, perfectus et beatus sit Deus, quam ineffabilis sit misericordia ejus in nobis, quanta sit ejus ad nos caritas, quam multa, magna et copiosa sint beneficia ejus, quam inæstimabilia bona nobis promisit ac præparavit in cœlis. Ex quibus omnibus debemus ejus amore validissime, atque totaliter inextinguibiliterque accendi, et nunquam ab eo averti, et semper esse solliciti ne prævaricemur in eum.

Septimus effectus est, sublimitas contemplationis, et exuberantia spiritualis consolationis ac delectationis, quas Deus per Scripturas operatur in nobis. Docet namque nos sacra Scriptura, quemadmodum a terrenis, caducis et carnalibus rebus debeamus cor nostrum abstrahere, et ab omni inordinata affectione et occupatione circa eas nos elongare, sicque ad divinorum meditationem, ad summi boni contemplationem atque ad assiduam recordationem assurgere, et in Dei contemplatione gaudere, consolari, et ad omnia Deo placentia promptissimum fieri. Unde ait Bernardus: Quum in virtutibus fueris diutius exercitatus, roga tibi lumen devotionis dari, diem serenissimum et sabbatum mentis, in quo tanquam emeritus miles, in laboribus universis vivas absque labore, dilatato jam corde currens viam mandatorum Dei, ut quod prius cum amaritudine et gravamine faciebas, de cetero cum summa dulcedine agas et delectatione. Verum ad hanc perfectionem pauci, ni fallor, perveniunt in hac vita. Neque enim si aliquando aliquis hanc habere videtur, continuo credat sibi necesse est, maxime si novicius est. Pius enim Dominus pusillos talibus blanditiis solet allicere. Sed noverint qui hujusmodi sunt, gratiam hanc eis concessam, non præstitam, ut in die bonorum memores sint malorum, et in die malorum memores sint bonorum. Longe aliter qui exercitatos habent sensus,

Ps. cxviii,
32.

Eccli. xi, 27.

devotionis hujus felici jucunditate fruuntur. Multi vero tota vita sua ad hoc tendunt, et nunquam pertingunt : quibus tamen, si pie et perseveranter conati sunt, statim ut de corpore exeunt, redditur quod in hac vita dispensatorie est negatum. Qui autem ad hanc devotionis perveniunt gratiam, cavendum est eis ne per indiscretionem destruant corpus suum : ideo rationabile sit eorum obsequium, et exercitatio moderata.

Rom. xii, 4.

Marc. viii, 7.

Postremo, per paucos pisciculos qui (ut in evangelio legitur hodierno) panibus

A erant adjuncti, et dulcem dabant saporem, rite intelliguntur delectationes exercitiis virtuosis annexæ. Quælibet enim virtus propriam habet delectationem suæ operationi adjunctam.

His igitur panibus atque piscibus reficiamur quotidie, abundantes in opere Domini semper, et ad ejus amorosam adhesionem jugiter adspirantes, nosque in ipso assidue occupantes, et custoditi ac ferventes in omnibus, et illud Psalmistæ implere nitentes : Oculi mei semper ad Dominum. *Ps. xxiv, 15.*
B Cui honor et gloria in æternum. Amen.

I Cor. xv, 58.

DOMINICA VIII POST TRINITATEM

ENARRATIO IN EPISTOLAM

DEBITORES SUMUS NON CARNI, UT SECUNDUM CARNEM VIVAMUS. Rom. VIII, 12-17.

DOCET nos sanctus Apostolus in præ- A
senti epistola, non secundum carnalia
desideria, sed secundum rectæ rationis di-
ctamen, et maxime juxta Spiritus Sancti
instinctum esse vivendum. Nam ait : *De-
bitores sumus non carni, ut secundum
carnem vivamus*. Hoc est, quamvis aliquo
modo obligemur carni tanquam animæ in-
strumento, videlicet ut ei necessaria mi-
nistremus in victu, vestitu, somno, habita-
culo, non tamen sic ei obligamur, ut ejus
concupiscentiis acquiescamus, quum et
1 *Petr.* II, 11. princeps Apostolorum hortetur : Obsecro B
vos abstinere a carnalibus desideriis, quæ
militant adversus animam; et alio loco
14. *Rom.* XIII, 14. Paulus : Carnis curam ne feceritis in de-
sideriis. *Si enim secundum carnem*, id
est secundum desideria carnalia, *vixeritis*,
moriemini, morte culpæ in sæculo isto
(unde ad Timotheum scribit Apostolus :
1 *Tim.* V, 6. Vidua quæ in deliciis vivit, vivens mortua
est), deinde morte damnationis perpetuæ
in inferno. *Si autem spiritu*, id est virtu-
te et gratia Spiritus Sancti; vel, « spiritu »,
id est rationis judicio; *facta carnis mor- C*
tificaveritis, id est, affectus et opera ejus
superaveritis, *vivetis* per gratiam in præ-
senti, vitæque gloriæ in futuro. Huic do-
cumento naturalis consonat ratio. Media
namque sunt disponenda secundum exi-
gentiam finis. Quum ergo caro sit animæ
instrumentum, et ordinetur ad spiritum
rationalem sicut ad finem, regenda est ta-
liter, quod animæ serviat, cooperetur et
A prosit ad hoc quod ipsa anima ad beati-
tudinem perducatur. Hinc qui secundum
carnem conversatur, pervertit hunc ordi-
nem, dominam ancillæ subjiciens, utpo-
te rationem sensualitati, sicque se ipsum
brutis incomparabiliter deteriorem ac vi-
liorem constituens.
Insuper, quia mortificantes opera car-
nis inordinata vivent per gratiam, declarat
Apostolus quoniam tales sunt adoptivi fi-
lii Dei. *Quicumque enim Spiritu Dei*
aguntur, hoc est, a Spiritu Sancto regun-
tur, et ejus instinctu ducuntur, atque ipsi-
us fervore impelluntur ad bona : unde de
Christo dicitur, quod agebatur a Spiritu in
desertum; *hi sunt filii Dei*, id est filii
adoptivi per gratiam specialem et filialem
amorem, juxta illud primæ Joannis : Vi-
1 *Joann.* III, 1. dete qualem caritatem dedit nobis Deus
Pater, ut filii Dei nominemur et simus.
Quemadmodum autem Deus omnipo-
tens movet ceteras creaturas ad naturales
operationes et fines, per generalem in-
fluxum; sic rationalem creaturam movet
ad actus meritorios, supernaturalemque
finem, per specialem influxum seu di-
rectionem, quæ providentia appellatur.
Præterea electos Deus singulariter movet
et regit, providens eis non solum suffi-
cienter, sed etiam efficaciter, de om-
nibus necessariis ad salutem, ita quod
divinæ inspirationi acquiescunt, gratiam-
que suscipiunt. Idcirco magis dicuntur agi
a Spiritu Sancto, quam moveri aut regi.

Ad actum namque meritorium non solum A requiritur gratia habitualis, sed etiam actualis motio Spiritus Sancti mentem excitantis ad bonum. Propter quod Isaias asserit : Domine, omnia opera nostra operatus es in nobis. Unde Apostolus protestatur : Deus est qui operatur in nobis velle et perficere. Deinceps, ad hoc quod anima capax sit hujus supernaturalis motionis Spiritus Sancti, indiget quibusdam supernaturalibus habitibus, per quos aptetur ac disponatur ad suscipiendum prompte motionem præactam. Et habitus isti vocantur dona Spiritus Sancti, quæ septem sunt, et sunt habitus supernaturales infusi, per quos anima fit bene prompteque mobilis, docilis ac dirigibilis a Spiritu Sancto. Et quicumque est in caritate et gratia, habet secundum aliquem gradum hæc dona, agitur quoque a Spiritu Sancto quantum exigit status salutis.

Insuper ponitur ratio cur moriemur, si secundum carnem vixerimus. *Non enim accepistis spiritum servitutis iterum in timore*, hoc est, jam tempore evangelicæ legis et gratiæ, non est vobis datus spiritus ad serviendum Deo servili timore, videlicet formidine pœnæ, ut olim tempore legis Mosaicæ, quæ comminatione pœnarum induxit homines ad Dei obsequium; *sed accepistis spiritum adoptionis filiorum Dei*, id est spiritum cujus gratia homines adoptantur in filios Dei, *in quo*, id est cujus instinctu, *clamamus* corde seu ore : *Abba (Pater)*. Duo sunt nomina, unum Hebræum, aliudque Latinum, idem significantia. Et est sensus, quod in Spiritu D Sancto vocamus Deum Patrem, tanquam adoptivi filii ejus, ex caritate ad ipsum fiducialiter et affectuose dicentes : Pater noster qui es in cœlis.

Glossa per spiritum servitutis, intelligit Spiritum Sanctum, a quo cordibus Judæorum incussus fuit timor servilis. Qui in quantum est timor, est bonus, quoniam retrahit a peccato et disponit ad gratiam; sed quantum ad servilitatem, non est bonus, neque a Spiritu Sancto. Dicitur ergo

A Spiritus Sanctus, spiritus servitutis, ratione sui effectus, quia facit servire. Per spiritum vero adoptionis, intelligit Glossa eundem Spiritum Sanctum homines per gratiam adoptantem. Et concordat Glossa Augustino dicenti : Cave ne ex eo quod ait, Spiritum servitutis, et, Spiritum adoptionis, diversum intelligas, quum sit unus atque idem Spiritus, qui in Trinitate dicitur Spiritus Sanctus : quod et Apostolus innuit, dicens, Iterum. Sed propter diversos effectus dissimiliter nominatur. Nam et de eodem Spiritu subditur : Ipse enim Spiritus testimonium reddit spiritui nostro, quod filii Dei sumus. Alias duas expositiones hujus loci introduxi in commentario super epistolas Pauli. Ista pro præsentī sufficiat. Verumtamen præhabita non ita sunt intelligenda, quin in veteri Testamento plurimi acceperunt spiritum adoptionis filiorum Dei. Imo omnes electi habuerunt hunc spiritum, non autem ex lege, neque per legem, quoniam gratiam non continebat nec dabat sicut lex nova, sed ex Deo per fidem qua crediderunt in Christum venturum explicite sive implicite.

Præterea, quod in Spiritu Sancto clamemus, Abba (Pater), et Deum vere Patrem vocemus, hinc constat : *Ipse enim Spiritus Sanctus testimonium reddit spiritui nostro*, hoc est, testificatur animæ nostræ, eamque cognoscere facit per inspirationem internam, aut per revelationem apertam, *quod sumus filii Dei* adoptivi, quamdiu manemus in caritate et gratia.

D Testificatio ista multipliciter potest intelligi. Primo, per manifestam revelationem, sive immediate fiat a Deo, sive per angelum : sicque cognoscit homo certitudinaliter esse se adoptivum filium Dei, sicut noverunt Apostoli, alique viri perfecti. In quorum persona loquitur Paulus : Non spiritum hujus mundi accepimus, sed I *Cor.* II, 12. spiritum qui ex Deo est, ut sciamus quæ a Deo donata sunt nobis. Sic agnovit Abraham esse se filium Dei, et se esse in caritate, quum in Genesi Dominus locutus

Is. xxvi, 12.

Philipp. II, 13.

Deut. xxviii, 13 et seq.

Matth. vi, 9.

Gen. xv, i. est ei : Ego protector tuus et merces tua A magna nimis. Ezechias quoque certissime
IV Reg. xx, dixit : Memento, Domine, quomodo ambu-
 3. laverim coram te in veritate et corde per-
 fecto. — Secundo, fit testificatio ista per
 quamdam bonæ spei consolatoriam infu-
 sionem : et sic virtuosī communiter sciunt
 se esse in caritate, non omnino certitudi-
 naliter, sed conjecturaliter seu probabili-
 ter. — Tertio, fit per propriæ conscientiæ
 diligentem discussionem : ut dum homo
 se ipsum bene examinans, non habet re-
 morsum mortalis peccati, sed Dei mandata B
 custodit, et verba salutis audit libenter.
 Ista sunt probabilia signa caritatis et gra-
 tiæ, sicut in prima Canonica sua ait Joan-
 nes : Si cor nostrum non reprehenderit
I Joann. iii, nos, fiduciam habemus ad Deum, etc. —
 21. Insuper, quoniam teste Gregorio, Exhibitio
 operis est probatio caritatis, dum Spiri-
 tus Sanctus efficit nos in divino obsequio
 promptos, alacres et constantes, tunc uti-
 que per opera ista testimonium perhibet
 spiritui nostro, quod filii Dei sumus : quo-
 niam sicut vita naturalis cognoscitur per C
 actus et motus vitales ac naturales, sic
 vita gratiæ per actus virtuosos.

Si autem filii Dei jam sumus per gra-
 tiam adoptantem, *et heredes* erimus in
 patria per gloriam beatificantem. Filiis si-
 quidem adoptivis debetur pars aliqua he-
 reditatis paternæ. *Heredes quidem Dei*
 erimus, æternaliter possidendo bona Do- *Ps. xxxvi, 13.*
 mini in terra viventium, quæ nec oculus *I Cor. ii, 9.*
 vidit, nec auris audivit. Et bona hæc erunt
 tres animæ dotes et quatuor corporis do-
 tes, et cetera ad beatitudinem pertinentia.
 Felicitas namque est status omnium bo-
 norum aggregatione perfectus. Imo ipse-
 met Dominus Deus est objectalis hereditas
 atque felicitas civium supernorum : quæ
 tota habetur a singulis, a nullo autem, imo
 neque ab omnibus, totaliter; sicque dividi-
 tur in quantum diversimode participatur,
 seu magis vel minus clare conspicitur.
 Hereditates vitæ præsentis terminantur in
 morte; sed illa a morte sanctorum sumit
 exordium, juxta illud : Quum dederit di- *Ps. cxxvi,*
 lectis suis somnum, ecce hereditas Domi- *2, 3.*
 ni. *Coheredes autem Christi*, id est, beati-
 tudinis Christi consortes atque participes
 erimus. Nam ipse est heres principalis, et
 nos simul cum illo beatitudinem conse-
 quemur.

SERMO PRIMUS

QUOMODO CONANDUM CUILIBET CHRISTIANO, UT AD ORIGINALIS JUSTITIÆ
 CONFORMITATEM REDEAT.

QUICUMQUE Spiritu Dei aguntur, hi D
filiī sunt Dei. Rom. viii, 14.

Sicut beatus ait Gregorius, Sic mirabi-
 liter conditi sumus, ut Deus rationem, ra-
 tio animam, anima corpus possideat. Nam
 et primos parentes ita condidit Deus, quod
 in eis per originalem justitiam ipsis con-
 creatam, corpus subjectum exstitit ani-
 mæ, anima rationi, ratio Deo. Et quamdiu
 ratio in eis mansit Deo subjecta, mansit
 et sensualitas subdita rationi, corpusque

animæ; sed quum contra Dei præceptum
 ratio consensisset suggestioni iniquæ, sta-
 tim caro cœpit esse rebellis animæ, et
 sensualitas rationi. Ad hoc igitur quilibet
 Christianus debet conari quotidie, imo et
 incessanter, ut quantum sibi possibile est,
 ad originalis justitiæ conformitatem pro-
 pinquet ac redeat.

Studeamus ergo in primis corpus no-
 strum subjicere animæ, ita illud regendo
 ut aptum sit animæ cooperari ac deser-

vire in bonis operibus ad felicitatem ducentibus. Idcirco corpus nec immoderata abstinentia est debilitandum, nec delicatis superfluisque refectionibus nutriendum; sed medium tenere laudabile est. Ait namque Hieronymus : Corporis debilitas nimia etiam animæ vires frangit, mentis quoque ingenium marcescere facit. Quidquid cum modo et temperamento fit, salubre est. Optimus in omni re modus est, et laudabilis est ubique mensura. Hinc ait Gregorius : Caro nostra adjutrix esse debet animæ in opere bono; aliquando autem est seductrix in malo. Si ergo ei plus quam debemus tribuimus, hostem nutrimus; et si necessitati ejus quæ debemus non tradimus, civem necamus. Reficienda est itaque, sed usque ad hoc ut in opere bono nobis sufficiat.

Denique, sicut regendum est corpus quantum ad cibum et potum, ita etiam quantum ad vestitum et somnum, ut nullus vestimenta superflua, curiosa, pomposa, provocativa aut nimium pretiosa sibi fieri faciat, habeat aut induat; sed sicut *Luc. iii, 11.* beatissimus docuit Baptista Joannes, Qui habet duas tunicas, id est unam superfluam, det non habenti, et qui habet escas superfluas, similiter faciat. Conformer observandum est moderamen in somno, ne plus quam natura requirit quis dormiat aut in lecto quiescat, præsertim ne dormiendo seu jacendo et pigritando, divinum omittat Officium. Imo somnus ille superfluus et immoderata repausatio carnis, corporali vitæ et sanitati plurimum obest, et obtusam efficit mentem, atque multorum incentivum est vitiorum. Propter quod ait Cato :

Plus vigila semper, somno ne deditus esto :
Nam diuturna quies vitiis alimenta ministrat.

Prov. vi, 9. Salomon quoque effatur : Usquequo, piger, dormies? Quando consurges ex somno tuo?

Ibid. xx, 13. Hinc iterum scriptum est : Noli diligere somnum, ne te egestas opprimat. Nempe qui diligit somnum, etsi exteriori egestate non opprimatur, opprimitur tamen egesta-

te interna ac spirituali, quæ est virtutum carentia, operumque bonorum negligentia. Talis namque tempus suum infructuose expendit, multa bona omittit, et etiam in diversa peccata dilabitur.

Insuper debemus corpus nostrum sub-
jicere animæ, non solum in præinductis, videlicet observando moderantiam in cibo, potu, somno, vestitu, sed etiam exteriores sensus ab excessibus circa sua objecta frenando, et singula quæque corporis membra ab usu illicito coercendo.

Custodiendus ergo et reprimendus est visus exterior, ne incaute adspiciat quod desiderare non licet, ne viri et feminæ se mutuo indecenter intueantur, potissimum in ecclesia et in divino obsequio. Ab intuitu quoque chorearum, spectaculorum, jocorum et illicitorum ludorum, atque similibus vanitatum, refrenandi sunt oculi, sicut orat Deum Psalmista : Averte oculos *Ps. cxviii, 37.* meos ne videant vanitatem. Et istud præcipue est servandum, quoniam si quis talia adspiciendo, in ipsis complacentiam habuerit seu consensum, particeps fit iniquitatis illorum, dicente Apostolo : Non solum morte sunt digni qui faciunt ea, sed etiam qui consentiunt facientibus. Consimiliter refrenandus est auditus ab auscultatione verborum detractionis, irrisionis, mendositatis, lasciviæ, omniumque illicitorum sermonum, quemadmodum in Ecclesiastico habetur : Sepi aures tuas spinis, et noli audire linguam nequam; et ori tuo facito ostia, et seras auribus tuis. Si autem quis se avertere nequeat ne audiat hujusmodi verba, cor suum custodiat et avertat, ne audiat ea libenter aut complacenter : alias particeps fieret vitiositatis verborum illorum. Imo et tristem ostendat vultum, quo innotescat prave loquenti quam male loquatur, et quam invite audiantur verba ipsius. Propter quod in Proverbiis asseritur : Ventus Aquilo dissipat pluvias, et facies tristis *Prov. xxv, 23.* linguam detrahentem. Ecclesiastes quoque dicit : Per tristitiam vultus corrigitur *Eccle. vii, 4.* animus delinquentis.

Pariformiter reprimendus valde est ta-

etus ab osculis, amplexibus et palpationibus libidinis atque incautis, quia in talibus faciliter incurritur mortale peccatum. Quod si quis ex talibus senserit se carnaliter stimulari, alterari, et quod detestabilius esset, carnaliter pollui et fœdari, absque dilatione se retrahat, doleat et emendet. Alias mortaliter peccaret, secundum quod scribit Bonaventura, et ponit exemplum : ut si quis serpentem in gremio teneat, a quo intoxicari se experitur, nec abiecit eum, talis est causa propriæ mortis corporalis. Itaque quidquid carnalem generat concupiscentiam aut stimulum corporis, sive sit confabulatio, sive adspectus, sive applicatio lateris ad latus, aut amplexus, seu attactus, vel oscula, prorsus cavendum est. Imo, quamvis quis esset tam virtuosus quod ex talibus nil mali gigneretur in eo, vereri tamen debet ne sit alii peccandi occasio per prædicta. Amplius, refrenandus est gustus, ne in cibis ac potibus voluptatem aut superfluitatem requirat, sed necessitatem naturæ. Sic et olfactus arcendus est, ne in odoribus carnaliter delectetur. Singula quoque membra sunt coercenda ab actibus motibusque illicitis, præcipue lingua a garrula loquacitate, ab omni falsitate, detractioe, et omni verbo iniquo.

Præterea sensualitas subjicienda est rationi, ut non moveamur nec afficiamur circa sensibilia atque carnalia, ea appetendo vel fugiendo, amando aut odiendo, in eis delectando seu propter ea tristando, nisi secundum rectæ rationis iudicium. Et quicumque hoc implet, ille refrenat, vincit ac moderatur passiones animæ suæ, videlicet iram, tristitiam, delectationem, concupiscentiam, etc. : quia nec optat, nec amat, nec servat, nec in usum suum convertit bona exteriora, sensibilia et terrena, nisi secundum quod sibi utilia aut necessaria sunt ad bona spiritualia, hoc est ad gratiam et virtutes, et ad proficiendum in eis, atque ad beatitudinem æternam.

Postremo, ratio et voluntas, quæ sunt duæ supremæ potentiæ animæ, subjicien-

adæ sunt Deo, ut ratio credat quidquid ad fidem spectat catholicam et ad determinationem Ecclesiæ, ceterisque donis ac virtutibus ad intellectum pertinentibus decoretur, puta prudentia, sapientia, scientia, consilio, sicque in omnibus ordinate procedat, et Deum ac cœlestia contempletur, nec unquam recedat ab his. Voluntas quoque subjicienda est Deo, ut eum super omnia diligat, nec aliquid divino amoris contrarium agat aut cupiat, sed Dei atque Ecclesiæ præceptis obediat, in Domino Deo speret, futuram beatitudinem ab ipso expectet. Quicumque sic egerit, perseveraveritque in istis, verus est Christianus, et æternaliter erit salvus.

Insuper, sicut ait in epistola hodierna Apostolus, « Quicumque Spiritu Dei aguntur, filii sunt Dei ». Studeamus ergo moveri a Spiritu Sancto, et non moveamur impetu passionum nostrarum, non fervore concupiscentiarum, nec propriæ animositatis impulsu, nec stulta audacia, nec carnali timore, neque cupiditate terrena. Neque agamur seu moveamur spiritu diabolico, quo sæpissime ac infelicissime agitantur quicumque in mortalibus jacent peccatis, præsertim qui vitiosa consuetudine detinentur, quoniam teste Apostolo, laqueis diaboli involuti sunt, atque ad voluntatem diaboli captivi ab eo tenentur. Unde sicut eques ducit et agitat equum, ita diabolus movet et agitat illos : idcirco sunt membra, et servi filiique diaboli. Itaque qui talem se esse cognoscit, pœnitere, confiteri et emendari non differat.

Præterea, quoniam juxta doctrinam Apostoli, non accepimus spiritum servitutis iterum in timore, sed spiritum adoptionis filiorum, serviamus Deo non servili timore, sed filiali et puro amore, videlicet magis intuitu suæ bonitatis ac dignitatis, quam propriæ utilitatis atque mercedis. Quanto enim purius ac integrius in Deum convertimur, et quanto minus ad nos ipsos reflectimur, tanto perfectiores Deoque cariores existimus, et per hoc excellentiores ac ditiores Christi coheredes æternaliter

Rom. viii,
14.

II Tim. ii,
26.

Rom. viii,
15.

ter erimus. Nec movere quempiam debet, A quod sancti et electi in hoc mundo multa patiuntur adversa : nam quamvis sint virtuosius, tamen venialiter peccant frequenter, et pro hoc solent a Deo purgari in vita præsenti, ne in purgatorio durius ac diuturnius torqueantur. Unde legitur quarto libro Vitaspatrum, quod erat quidam solitarius in eremo, et ministrabat ei quidam sæcularis devotus. Erat quoque in civitate eremo illi propinqua, homo dives et impius. Contigit autem ut dives ille moreretur, deduxitque eum tota civitas et B episcopus cum lampadibus ad sepulcrum. Egrediens vero sæcularis præfatus ut portaret panem solitario eremitæ prædicto, invenit eum a fera comestum. Quo viso,

cecidit in faciem suam in conspectu Domini, dicens : Non surgam hinc nisi demonstretur mihi a Deo quæ sunt hæc, quia impius ille talem habuit apparatus in sepultura, et iste qui die noctuque Deo servivit, sic mortuus est. Et ecce angelus veniens, dixit ei : Ille impius parum boni fecit in sæculo isto, et recepit illud hic, ut nullam inveniat requiem in alia vita ; iste autem solitarius, quia homo erat ornatus omni virtute, habebat tamen aliquam culpam in se, recepit hanc hic, hoc est, in sæculo isto pro ea punitus est, ut coram Deo purus inveniat. His auditis, consolatus est ille sæcularis devotus, abiitque glorificans Deum super judicia ejus, quæ vere sunt justa, quamvis occulta.

ENARRATIO IN EVANGELIUM

ATTENDITE A FALSIS PROPHETIS, QUI VENIUNT AD VOS IN VESTIMENTIS OVIVM, ETC.

Matth. vii, 15-21.

SALVATOR in evangelio hodierno docet, non solum a manifeste malis, sed etiam a fictis bonis cavere, ne quis a simulatoribus et a callidis, a falsis doctoribus, ab hæreticis aut hypocritis decipiat. Itaque ait : *Attendite a falsis prophetis*, id est a perversis doctoribus, hypocritis, fictisque sanctis vos custodite : quoniam scriptum est, Cum perverso pervertaris. Et mala ac falsa tanto periculosius nocent, quo minus mala et falsa videntur. *Qui veniunt ad vos in vestimentis ovium*, id est in operibus simulatorie virtutis, in apparenti devotione et ficta humilitate, in abstinentiis continentiisque prava intentione assumptis. Siquidem vestimenta ovium, id est bonorum fidelium qui oves sunt Christi, sunt veræ virtutes et actus earum, quibus eorum animæ decorantur. Harum vestium seu virtutum quasdam similitudines fictas assumunt

quidam iniqui, ut boni credantur, sicque facilius alios fallant. Frequenter etenim vitia sub virtutum similitudine palliantur, quia sub specie boni multa mala geruntur. Propter quod ait Apostolus : Ipse Satan transfigurat se in angelum lucis ; non est ergo magnum, si ministri ejus transformantur velut ministri justitiæ. De talibus prophetis loquitur Deus per Jeremiam : Visionem mendacem, et divinationem fraudulentam, et seductionem cordis sui prophetant vobis. Possunt quoque, quamvis minus proprie, vestimenta ovium corporaliter intelligi, corporis indumenta speciem humilitatis et devotionis prætendentia : quibus præfati iniqui sæpenumero se induunt, quatenus virtuosii putentur. *Intrinsecus autem sunt lupi rapaces*, id est, in anima similes sunt lupis voracibus : quia sub veste ovina gerunt cor lupinum, quia crudeles sunt, desiderantes

Ps. xvii, 27.

II Cor. xi, 14, 15.

Jer. xiv, 14.

animas fidelium spiritualiter strangulare, A inducendo eas ad vitia et errores. Sunt quoque « lupi rapaces », quia frequenter luporum instar gulosi sunt, atque idcirco virtuosos se simulant, ut temporalia commoda consequantur, quibus ingurgitent semetipsos. De talibus ait in Actibus beatus Apostolus : Scio quod post discessionem meam intrabunt in vos lupi graves, non parcentes gregi.

A fructibus (id est ex operibus) *eorum cognoscetis eos*, quales intrinsecus sunt. Operatio etenim arguit formam, et per exteriora interiora noscuntur : nam qualis quisque est, talia operatur. Nec diu quis potest ferre personam fictam, secundum Senecam, sed in suam cito relabuntur naturam, quibus non subest veritas. Tullius quoque : Fucata (inquit) et simulata cito panduntur. Unde præfati falsi prophetæ, si diligenter considerentur, inveniuntur

Is. v, 21. vane gloriosi, non humiles, sapientes et magni in oculis suis, atque in sensu proprio pertinaces, pleni privato amore, et propria commoda ac præconia affectantes. C Deinceps declarat Salvator, quod opera vere virtuosa non faciunt. *Numquid colligunt homines de spinis uvas, aut de tribulis ficus?* Non utique. Sic nec de cordibus mendacium prophetarum procedere possunt opera veraciter virtuosa. Unde et Jacobus dicit : Numquid fons de eodem foramine emanat dulcem et amaram aquam? Numquid potest ficus uvas facere, aut vitis ficus? Denique falsorum prophetarum corda, propter suam ferocitatem et passionum suarum aculeos, rite spinis ac tribulis D comparantur ; opera vero virtuosa uvis ac ficubus, quia suaviter mentem reficiunt et confortant.

Sic omnis arbor bona, fructus bonos facit. Quod intelligendum est de arboribus quæ ad producendum fructus plantantur. Vel per fructum intelligitur omnis utilitas ex arbore proveniens. *Mala autem arbor fructus malos facit.* Verumtamen de hominibus ista principaliter asseruntur, intelligendo per arborem bonam, ho-

minem virtuosum, seu voluntatem laudabilem ; et per arborem malam, voluntatem perversam, seu hominem vitiosum. Itaque bonus homo, in quantum hujusmodi, fructus seu actus efficit bonos ; et malus homo, secundum quod talis, efficit fructus malos. Hinc subditur : *Non potest arbor bona fructus malos facere.* Ita nec homo virtuosus, in quantum talis, facere potest fructus malos. Potest tamen malus fieri et peccare, in quantum habet liberum arbitrium nondum in gratia confirmatum, et præsertim in quantum ex nihilo est. Sic enim quantum in se est, tendit ad defectum et culpam, nisi a superiori conservetur et perficiatur. Hinc omnis creatura *Rom. viii, 20.* dicitur vanitati subjecta, intelligendo per vanitatem defectum sive distantiam a vero et incommutabili esse. *Neque arbor mala fructus bonos facere potest.* Sic nec homo vitiosus facere potest opera bona et meritoria, in quantum est vitiosus ; nihilo minus per Dei gratiam liberumque arbitrium, potest fieri bonus et agere bona. Loquitur ergo Christus de homine bono et malo formaliter, non materialiter. Propterea hujusmodi propositiones sunt veræ in sensu composito, non in sensu diviso. *Omnis arbor*, id est quilibet homo adultus rationisque compos, *quæ non facit fructum bonum*, observando præcepta, *excidetur*, id est, a consortio electorum pelletur : sicut per Isaiam prædictum est, Tollatur impius, ne videat gloriam Dei ; *et Is. xxvi, 10, in ignem infernalem*, nisi se emendaverit, *mittetur*, statim dum moritur, quantum ad animam, atque in die novissimo, cum corpore et anima, quum Christus dicturus est : *Ite, maledicti, in ignem æternum.* Si ergo peccatum omissionis ignem *Matth. xxv, 41.* inferni meretur, peccatum commissionis quam horribiliter punietur? Hinc ait Salvator : *Omnem palmitem in me non ferentem fructum, Pater tollet, et in ignem mittet.* Et ex his Christus concludit : *Igitur ex fructibus eorum cognoscetis eos.*

Postremo, quod absque fructibus bonis nemo adultus queat salvari, testatur Filius

Rom. viii, 20.

Is. xxvi, 10, juxta LXX.

Matth. xxv, 41.

Joann. xv, 2, 6.

Jacob. iii, 11, 12.

Dei subjungens : *Non omnis qui dicit mihi ex fide informi, Domine, Domine, intrabit in regnum cælorum* : quia non sufficit nuda confessio oris. Imo fides sine operibus mortua perhibetur. Nam et fatuæ virgines dixerunt : Domine, Domine, aperi nobis. Sed objici potest illud Apostoli : Nemo potest dicere, Dominus Jesus, nisi in Spiritu Sancto; itemque, Corde creditur ad justitiam, ore autem confessio fit ad salutem. Dicendum, quod Apostolus sumit Dicere, stricte et proprie, pro prolatione ex attentione et affectu prodeunte, quæ

A exigit caritatem. Loquitur etiam de confessione oris procedente ex fide formata. *Sed qui facit voluntatem Patris mei qui in cælis est*, id est, præcepta Patris cælestis adimplet. Nam et per prælatos Deus præcipit tanquam per suos vicarios : propter quod præcepta prælatorum sive Ecclesiæ sunt Dei præcepta, et de necessitate salutis implenda. *Ipse intrabit* post hujus exsili incolatum, omniumque culparum plenariam expurgationem, *in regnum cælorum*, dummodo perseveraverit usque in

Matth.
xxiv, 13.

B finem.

SERMO SECUNDUS

CONTRA SIMULATORES ET CALLIDOS, CONTRA DECEPTORES ATQUE HYPOCRITAS.

CONGREGATIO hypocritarum sterilis. Job xv, 34.

Christus, qui secundum suam deitatem est essentialiter veritas, in Evangelio hypocritas sæpissime ac specialissime reprehendit, quia hypocrisis veritati specialiter contrariatur. Hypocrita namque se simulat esse quod non est, et sub specie boni abscondit malum. Tripliciter autem hypocrita suam pravitatem abscondit. Primo, in verbis. Sunt enim multi malitiosi qui ut virtuosus reputentur, verba devotionis ac salutis pronuntiant, et quasi ex grandi fervore ac diligentia prædicant. De quibus testatur Apostolus, quod per dulces sermones et benedictiones corda decipiunt innocentium. Tales namque sæpe quasi ex magna compunctione et cum fictis lacrimis sermocinantur. Secundo, in apparatu seu exteriori vultus ac corporis dispositione : quia pallorem assumunt, et inclinato capite maturoque gressu incedunt. Hinc ait Salvator : Quum jejunatis, nolite fieri sicut hypocritæ tristes : exterminant enim facies suas, ut appareant hominibus jejunantes. Tertio, in operatione : quia je-

junant, orant, ecclesiam visitant, eleemosynas largiuntur, peregrinantur, ut sancti esse credantur; sed omnia ista prava agunt intentione.

Est autem falsorum prophetarum, et hypocritarum ac omnium simulatorum magna fatuitas, magna iniquitas, magna prorsus miseria. Quod magna sit eorum fatuitas, patet : Primo, quoniam plus quærunt et cupiunt hominibus placere, quam Deo omnia inspicienti. Propterea dicit Gregorius : Hypocrita corpus per abstinentiam afficit, sed per desiderium gloriæ mundo vivit. Christus quoque in Evangelio : Omnia (inquit) faciunt ut videantur ab hominibus. Secundo, quia pro brevi et parva mercede, æterno et maximo præmio spoliant se ipsos. Quum enim faciant opera bona ex genere, pro quibus æternam beatitudinem sortirentur, si recta intentione facerent ea; tanto se ipsos præmio privant, quia pro temporali commodo aut humano præconio talia operantur. Hinc de eis ait Salvator : Amen dico vobis, receperunt mercedem suam. Gregorius quoque : Quid in cunctis suis sperat hypocrita, ni-

Matth. vi,
2, 5, 16.

Ibidem.

Jacob. ii,
17, 26.

Matth. xxv,
11.

I Cor. xii, 3.

Rom. x, 10.

Rom. xvi,
18.

Matth. vi,
16.

si reverentiam honoris, gloriam laudis, a A
melioribus metui, ab omnibus sanctus vo-
cari? Et Augustinus fatetur: Quisquis ap-
petit videri quod non est, hypocrita merito
appellatur: simulat enim se justum, non
exhibet, quoniam totum fructum in laude
hominum ponit. Interdum vero hypocritæ
carnalia commoda quærunt et lucra, imo
carnales delicias atque divitias, et mulier-
culis se adjungunt, quæ facilius decipi-
untur, ut consequantur præacta. De his
infelicissimis hypocritis ait Bernardus:
Hypocrita singularia magis et inusitata se-
ctatur, ut propriæ fragrantiam opinionis
respergat. Cujus affectio elongatur a Chri-
sto, et vanis favoribus delectatur; cujus
mens, non testimonio propriæ conscien-
tiæ, sed adulationibus demulcetur.

Tertio, quoniam fructum producant, et
tamen usu fructus se privant. Siquidem
opera ex suo genere bona efficiunt, nec
tamen ex ipsis operibus veram utilitatem
animæ adipiscuntur. Non enim ex ipsis
operibus intus ornantur, nec spiritualiter
consolantur, nec crescunt in gratia, sed C
quotidie amplius inquinantur, fœtent ac
indurantur, dicente Gregorio: Qualis im-
peritis apparet hypocrita, talis vult ab om-
nibus æstimari, et paratior est mori quam
corripiri; atque quot vitiis plenus est, quasi
tot stercoribus in conspectu æterni Judi-
cis fœtet, ejusque mentem diabolus tacitus
tenet. Quarto, quia per solam perversam ac
fatuam intentionem, non solum se spoliât
fructu virtutum et gratiæ incremento, æter-
noque beatitudinis præmio, sed insuper
perpetuam sibi damnationem mercatur, et D
pœnas habebit gravissimas ac præcipuam
in divino judicio confusionem. De hypo-
crita namque in libro Job ad litteram scri-
ptum est: Si ascenderit usque ad cœlum
superbia ejus, et caput ejus nubes tetige-
rit, quasi sterquilinum in fine perdetur,
transiet quasi visio nocturna; luet quæ
fecit omnia, nec tamen consumetur; juxta
multitudinem adinventionum suarum, sic
et sustinebit; revelabunt cœli iniquitatem
ejus, et terra adversus eum consurget. Et-

*Job xx, 6-
8, 18, 27.*

enim quanto quis in vita præsentī amplio-
rem sibi procurat famam sanctitatis et sa-
pientiæ, tanto major erit ejus confusio in
die judicii, æternaliterque in pœnis in-
ferni, si vanus et fictus fuerit coram Deo
inventus. Ex his innotescit, quanta sit hy-
pocritarum et simulatorum fatuitas.

Est quoque eorum grandis iniquitas.
Propter quod asserit Augustinus: Simu-
lata æquitas non est æquitas, sed duplex
iniquitas, quia et simulatio est et iniqui-
tas. Præterea, quum Deus sit veritas, quan-
to aliquid magis veritati contrariatur, tan-
to plus displicet Deo, et graviolem culpam
sortitur. Hypocrisis autem quum sit falsi-
tas, et simulatio ac palliatio maledicta,
specialiter contrariatur Deo justo, vero ac
simplici, et singulariter displicet ei. Pro-
pter quod scriptum est: Simulatores et
callidi provocant iram Dei. Et iterum ait *Job xxxvi, 13.*
Scriptura: Væ peccatori terram ingredi-
enti duabus viis. Quod hypocritis et simu-
latoribus maxime competit, quia ut ait
Gregorius, duabus viis peccator terram
ingreditur, quando et Dei est quod opere
exhibet, et mundi est quod per cogitatio-
nem quærit.

Eccli. ii, 14.

Insuper magna omnino est horum mise-
ria, vilitas, contemptibilitas atque damna-
tio. Siquidem valde viles sunt hypocritæ
isti et falsi prophetæ, simulatores et cal-
lidi, in quibus nulla est vera mentis sin-
ceritas, nulla virtuosa simplicitas, sed tam
perversa intentio, tam vilis affectio, tam
stulta et aspernabilis fictio. Nam et pro-
pria hypocrisi mirabiliter lamentabiliter-
que cæcantur, nec cæcitatem suam adver-
tunt. Ideirco dicit Chrysostomus: O hypo-
crita, si bonum est bonum esse, ut quid
vis apparere quod non vis esse? Si malum
est malum esse, ut quid vis esse quod non
vis apparere? Si bonum est bonum appa-
rere, melius est bonum esse; si malum
est malum apparere, pejus est malum es-
se. Aut ergo appare quod es, aut esto quod
appares.

Deinceps hypocrisis ista periculosa est
valde tam ipsi hypocritæ, quia unicuique

nocet permaxime iniquitas propria, quam aliis. Propterea denuo fatetur Chrysostomus : Nulla res sic exterminat sicut simulatio, quoniam malum sub specie boni celatum, dum non cognoscitur, non caveatur. Rectissime ergo Christus hortatur et docet ut attendamus et custodiamus nos a falsis prophetis, a seductoribus universis, qui ad peccata alliciunt per vanas persuasiones, per impias promissiones, per comminationes, aut aliis modis. Interdum enim inducitur homo ad male agendum hac persuasionem, quoniam magna est misericordia Dei, et quia adhuc tempus longum restat in quo poterit pœnitentia agi, et quia multi sunt Sancti qui ad tempus fuerunt maximi peccatores. Sed persuasiones istæ stultissimæ sunt, quia non est minor justitia Dei quam misericordia ejus, et quia nec diem mortis scimus nec horam ; et quamvis aliqui peccatores pœnituerunt et sancti effecti sunt, tamen incomparabiliter plures æternaliter perierunt. Cur ergo perpetuæ damnationis periculo exponit se miser et insipiens homo?

Matth. xxv,
13.

Præterea, ista hypocrisis quamvis tam vana et vitiosa, tam vilis, stulta ac nociva existat, paucissimi tamen sunt qui ea totaliter carent. Nam omnes pene sua palliant et excusant peccata, et boni seu meliores volunt videri quam sunt ; in bonis quoque quæ agunt, frequenter gloria vana tanguntur, complacentiam habent inanem, nec Dei solum ac pure quærunt honorem. Hinc sanctus et illuminatissimus contestatur Bernardus : Serpit hodie putrida tabes, hypocrisis, per omne corpus Ecclesiæ, et eo desperatius quo latius, eoque periculosius quo interius. Nam si insurgeret apertus hæreticus, mitteretur foras et aresceret ; si violentus inimicus, absconderet se quis ab eo. Nunc autem ita diffusa est ista hypocrisis, ut vix sit qui se abscondat ab ea : siquidem et in his qui religiosi videntur, regnare probatur. Ideo loquitur Augustinus : Quam multos hypocritas sub habitu monachorum callidissimus hostis dispersit ! Circumeunt provin-

cias, petunt et exigunt aut sumptus lucrosæ egestatis, aut simulatæ pretium sanctitatis. Hinc etiam scribit Ambrosius : Latet plerumque sub tristi amictu lascivia, et horror deformis vili tegitur veste, ut secreta celentur petulantium animorum. Imo in doctoribus, prædicatoribus et prælatis sæpe et infelicitè viget hoc vitium : qui quod docent non faciunt, scire volunt Scripturas ut docti reputentur ac sapientes, sicque præficientur, honorentur et lautius vivant. Quorum damnatio erit gravissima, et dici potest de eis quod de Pharisæis scribit Chrysostomus : Pharisæorum (inquit) justitia erat in ostentatione operis, non in rectitudine intentionis, in locutione, non in opere, in minoribus observantiis, relictis gravioribus et principalioribus legis præceptis. Tales sunt isti qui corrigunt alios nec emendant se ipsos : imo multoties prava in aliis acriter reprehendunt, et tamen gravia agere scelera non verentur.

Itaque, juxta beatissimi principis Apostolorum doctrinam, deponamus a cordibus nostris omnem malitiam et omnem dolum, et simulationes, et invidias, et de tractiones ; sicut modo geniti infantes, innocentiam et puritatem concupiscamus, ut in eis crescamus in salutem. Sit semper tota nostra intentio pura, et nos ipsos ac opera nostra ad Dei honorem ac gloriam pure atque totaliter ordinemus.

Legitur in quarto libro Vitaspatrum, quod quidam Frater sanctus rogavit Deum ut sibi ostendere dignaretur qualiter diversimode abstrahatur a corpore anima justi et anima peccatoris. Et nolens Deus contristare Fratrem illum, fecit eum egredi. Quumque Frater ille venisset prope quamdam civitatem, ingressus est ibi monasterium, in quo fuit unus habens nomen solitarii magni et jacuit in agone. Viditque Frater ille fieri magnam præparationem cereorum ac lampadarum propter solitarium illum, quasi propter eum daret Deus panem et aquam inhabitantibus civitatem illam. Nam et dixerunt : Si hic

1 Petr. ii,
1, 2.

obierit, omnes simul moriemur. Adveniente autem hora mortis ipsius, vidit Frater præfatus dæmonem descendantem super solitarium illum, habentem in manu tridentem igneum. Dixitque Deus : Sicut anima ista non permisit me quiescere una hora in se, sic nec tu miserearis ejus evellens. Statim ergo misit diabolus tridentem igneum in cor solitarii illius, atque per multas horas torquens eum, extraxit animam ejus. Et fuit damnatus propter suam hypocrisim, quoniam laudes hominum semper optavit.

Post hæc ingressus Frater civitatem illam, invenit peregrinum jacentem in platea ægrotum, non habentem qui ejus gereret curam, et mansit cum eo diem unam. Quumque venisset hora mortis ejus, conspexit Frater ille Michaellem et Gabrielem descendentes propter animam ejus. Sedensque unus a dextris et alius a sinistris, rogabant animam ejus ut egrederetur, et

non egrediebatur, quasi nolens relinquere corpus suum. Dixit autem Gabriel Michaeli : Assume jam animam istam ut eamus. Dixitque Michael : Deus præcepit ut sine dolore ejiciatur, idcirco non potest quis vi eam evellere. Et clamavit Michael : Domine Deus, quid vis fieri de anima ista, quia non acquiescit nobis ut egrediatur? Respondit Dominus : Ecce ego mitto David cum cithara sua et psallentes cœlestis Jerusalem, ut audiens psalmum, ad vocem eorum egrediatur. Quumque descendissent in circuitu animæ illius cantantes psalmos, exsiliens anima illa præ gaudio sedit in manibus Michaelis, atque cum eo ac aliis Sanctis ascendit in cœlum.

Ex quo exemplo ostenditur, quam justa et metuenda sint Dei judicia, quam etiam enorme peccatum sit hypocrisis, et item quam salubre sit nihil mundani solatii habere in vita præsentis.

SERMO TERTIUS

QUOD DISCRETIO MEDIUM IN OMNIBUS DESIDERAT, ET RATIO BENE ILLUMINATA,
BONA OPERATUR, NEC FALLI FACILE POTEST.

PURIFICATE corda, duplices animo. *C*ant Jacob. iv, 8.

Purus ac simplex Deus vult sibi serviri corde puro ac simplici, sicut per Moysen dixit : Sancti estote, quoniam ego sanctus sum. Domini etenim volunt ut servi sui conformentur voluntati eorum : quanto magis summus Dominus universorum requirit ut rationales creaturæ voluntati suæ sanctissimæ conformentur, vitando deformitates et obliquitates culparum, atque amando et exercendo actus virtutum? Jubet itaque Dominus ut « duplices animo », id est vitio duplicitatis, simulationis et caliditatis infecti, mentem suam purificent, pœnitendo, confitendo et satisfaciendo de isto aliisque peccatis, sicque simplices fi-

ant mente et puri in sua intentione, soli Deo finaliter adhærentes, ne et se ipsos propria duplicitate pravitateque perdant, ac alios fallant. Hinc in evangelio hodierno in primis docet unigenitus Filius Dei, ut caveamus a falsis prophetis, hoc est a deceptoribus atque hypocritis, ne eorum fallaci instructione, persuasione, exemplo aut simulata sanctitate fallamur. Nam, juxta Apostolum, Sermo eorum ut cancer ser- *II Tim. ii,*
pit. Qui veniunt in vestimentis ovium, in- ^{17.}
tus vero sunt lupi rapaces.

Hic primo sciendum ac perpendendum, quemadmodum vitia speciem assumunt et similitudinem quamdam habent virtutum, sicque malitiosi virtuosos se simulant. Itaque, quoniam virtus tam nobilis venera-

Lev. xi, 44,
45; *xix*, 2;
etc.

bilisque consistit, quod etiam vitiosi eam A frequenter valde honorant, hinc quidam iniqui virtuosos se esse confingunt et velamen assumunt virtutis : vel ut non reprehendantur, vel ut laudentur, sive ut commoda assequantur carnalia ; vel certe, ut alios pravis fallant doctrinis, et sectas perditionis inducant, atque post se trahant discipulos. Hi tales frequenter suas palliatas malitias in tantum defendunt, ut aliorum veras virtutes vituperent. Sic ergo dissolutio socialis reputatur jucunditas spiritualis ; delicata et excessiva corporis B refectio reputatur discretio ; loquacitas, affabilitas dicitur ; invidia fraterna, zelus justitiæ ; duritia et inclementia, rigor justitiæ ; avaritia, acquirendi fidelis provisio vult videri ; astutia reputatur prudentia ; jactantia de propriis bonis, ædificatio proximi ; detractio, detestatio vitii alieni. Similiter virtutes reputantur vitia a perversis. Nam abstinenter vivere et paucis esse contentum, avaritia atque tenacitas judicatur ; silentium appellatur tristitia ; maturitas, amaritudo ; zelus justitiæ, temerarium judicium ; quies devotionis, pigritia corporis ; castigatio, indiscretio ; simplicitas æstimatur stultitia ; timor Dei, litigiosa conscientia dicitur ; fugere publicum, singularitas nominatur ; cavere scandalum reputatur hypocrisis. Sed inter hæc omnia discretio medium tenet ; et ratio bene illuminata et docta, pretiosum a vili, malum a bono, verum a falso, lucem a tenebris vere discernit, regia gradiens via, neque ad dexteram neque ad sinistram declinans.

Jer. xv, 19.

Deut. ii, 27 ;
v, 32, 33.

Denique, in falsis prophetis de quibus D loquitur Christus, inveniuntur vitia jam præacta et alia multa, quæ ipsi sub specie assumunt et monstrant virtutum. Idcirco ex fructibus seu operibus suis, ut Salvator docet, possunt cognosci : præcipue namque proni sunt detrahare aliis, et aliqua veræ fidei atque catholicæ veritati contraria dicere, et honores appetere.

Insuper docemur ex evangelio isto humanam laudem contemnere, transitoriumque honorem despiciere, soloque Dei intuitu

et amore facere bona et fugere mala : quia ut asserit Augustinus, laus humana non appeti a sapiente, sed sapientem subsequi debet, ut ex sapientis præconio, illi quoque proficiant, qui imitari possunt quod laudant laudare, laudanti prodest potius quam laudato. Hinc, secundum eundem sapientissimum Augustinum, nec vane gaudere debemus quando laudamur, nec contristari dum vituperamur : quia nec damnare nos potest aut peiores facere irrogata injuria, nec coronare nos potest aut meliores efficere laus aliena. Imo si irrogatam vituperationem sive injuriam patienter sufferimus, coronam patientiæ et gratiæ incrementum meremur. Quemadmodum ergo humiles esse tenemur, ita laudes humanas debemus contemnere, quoniam Augustino testante, esse humilem est nolle laudari in se : idcirco qui cupit laudari in se, superbus esse convincitur.

Itaque, prout docet Hieronymus, si vere C laudabilis esse desideras, laudes hominum ne requiras, quoniam quamvis aliquibus facile sit laudem non curare quando non exhibetur, est tamen difficile ea non delectari dum offertur. Imo interdum incipit homo opus bonum recta intentione, et tamen in ipsa operis prosecutione, dum se laudari advertit, in ipsa laude lætatur : sicque intentio ejus inficitur, et quod bene fuerat inchoatum, fit vitiosum et male finitur. Ideo dicit Gregorius : Sæpe operi bono dum humana laus obviat, mentem immutat : quæ quamvis quæsita non erat, tamen oblata delectat.

Verumtamen viri perfecti, ex suis laudibus ac honorationibus affliguntur magis quam delectantur : nisi in quantum considerant illas sibi exhiberi atque deberi ut Dei vicariis, vel ob aliam rationabilem causam, ita quod sine peccato aliter fieri nequeat ; sicque perpendunt illas Deo offerri magis quam sibi. Nihilo minus quidam sunt adeo imperfecti et vani, ut etiam fatue gloriantur dum bona eis adscribun-

tur quæ eis non competunt, et quæ ipsimet A sibi non inesse cognoscunt. In quorum persona ait Bernardus : Laudamur mendaciter, delectamur inaniter ; et vani sunt qui laudantur, et mendaces qui laudant. Laudatio itaque perfectis est majoris humilitatis meritique occasio, vitiosis vero nociva est ; insipientibus autem et imperfectis occasio fit ruinæ seu gloriæ vanæ, nisi specialis gratia eos præservet. Ideo dicit Gregorius : Laus sua justos cruciat, iniquos exaltat : sed justos dum cruciat, purgat ; iniquos dum lætificat, inquinat, B impiosque demonstrat. Unde apud Isaiam Is. iii, 12. loquitur Deus : Popule meus, qui te beatum dicunt, ipsi te decipiunt, et viam gressuum tuorum dissipant. Præterea quidam ita vitiosi ac miseri sunt, ut alios vituperent, aut vituperari ab aliis libenter audiant, ut ex hoc ipsi laudabiliores credantur. Hinc ait Hieronymus : Vilium hominum est et suam laudem quærentium, alios facere viles, quia alterius vituperatione laudari se putant ; et qui suo merito placere non possunt, placere volunt in C comparatione pejorum.

Præterea in evangelio isto comparat Christus hominem virtuosum arbori bonæ, hominem malum arbori infructuosæ. Ut igitur simus arbor bona, fructuosa, in profunda ac solida humilitate totam nostram conversationem fundemus. Quemadmodum arbor mittit radices suas profunde in terram, et sicut arbor tempore suo virescit ; ita per sancta desideria interius renovemur. Iterum, sicut arbor tempore æstivali floribus adornatur, ita verbis ædificatoriis, instructivis, humilibus, veris, utilibus abundemus ac decoremur, sicut Ephes. iv, 29. hortatur Apostolus : Omnis sermo malus ex ore vestro non procedat, sed qui utilis est ad ædificationem, ut det gratiam audienti. Rursus, sicut arbor bona post flores fructibus adimpletur, ita ea quæ docemus et prædicamus, opere impleamus, ne reprobis comparemur Pharisæis et Scribis, qui pro dolor ! multos valde nunc habent imitatores : de quibus in Evangelio loqui-

tur Christus, quod dicunt et non faciunt. Matth. xxiii, 3. Iterum, sicut arbor crescit in altum, ita crescamus in altum dupliciter : primo, ut omne bonum quod agimus et habemus, Domino Deo cum omni gratiarum actione et humilitate jugiter adscribamus, quum dicat Apostolus, Quid habes quod non ac- I Cor. iv, 7. cepisti ? atque Salvator, Sine me nihil potestis facere ; secundo, contemplando ac diligendo Deum altissimum et gaudia civium supernorum, ac ea quæ Christus pro nostra salute assumpsit, fecit ac pertulit. Amplius, sicut arbor tempore suo extra deornatur, nudatur, arescit, et tamen radicitus permanet viva, suoque tempore revirescit : ita si ex hominum pravitate contigerit nos injuste diffamari, contemni, suppeditari, maneamus intus in anima per caritatem viventes, ceterisque virtutibus ac meritis coram Deo fulgentes ; iterum, si per adversitates, tentationes et tribulationes victi et lapsi fuerimus, non ob hoc omnino frangamur aut desperemus, sed per pœnitentiam, confessionem et satisfactionem resurgendo, spiritualiter revirescamus.

Præterea ex evangelio isto docemur quam arcta sit via salutis, et quam difficile sit salvari : quia non tantum arbor Matth. vii, 14, 19. fructus malos producens comburenda censetur, sed etiam illa quæ bonos non efficit fructus. Quocirca, ut ait Fulgentius : Si sterilitas in ignem mittitur, rapacitas quid meretur ? Et si semper ardebit qui pauperibus sua non communicaverit, quid passurus est qui aliena abstulerit ? Itaque non sufficit mala vitare, quæ per negativa prohibentur præcepta, sed oportet et bona peragere, quæ per præcepta affirmativa jubentur. Propter quod dixit Propheta : Declina a malo, et fac bonum. Itaque non sufficit restituere bona injuste adepta, et Ps. xxxvi, 27. aliena bona non cupere, sed oportet de propriis bonis opera misericordiæ exercere, secundum quod adest facultas, et causa requirit. Hinc quippe in fine evangelii hujus ait Salvator : Non omnis qui Matth. vii, 21. dicit mihi, Domine, Domine, intrabit in

regnum cœlorum, sed qui facit voluntatem Patris cœlestis. Imo impius Christianus non obediens Dei præceptis, multo maiorem meretur ac sortietur damnationem, quam infideles. Et quanto quis maioris scientiæ, altiorisve fuerit gradus aut ordinis, tanto gravioris erit damnationis, si negligens et injustus fuerit. Itaque a solo Deo laudem et exaltationem quæramus, omnemque laudem et gloriam et honorem mundi pro nihilo arbitremur.

Legitur in Vitaspatrum, quod fuit quidam sanctus eremita, cui certis temporibus necessaria vitæ portavit quidam vir sæcularis et bonus, in villa habitans. Qui per totam villam suam publicavit sanctitatem eremitæ illius, ita quod villæ habitatores valde optabant eremitam illum conspicere. Unde et vir præfatus eremitam illum frequenter rogavit, ut semel ad villam illam pro populi ædificatione et instructione dignaretur accedere ; sed eremita ille non facile acquievit ex humilitate, quoniam honorari nolebat. Tandem precibus sui pii servitoris victus, acquie-

A currens ergo vir ille, nuntiavit in villa quod eremita veniret ; et protinus illi villani cum magna reverentia cœperunt exire ad occurrendum eremitæ, ut cum omni honore susciperent atque deducerent eum. Quumque eremita eos venire adspiceret, statim nudavit se, atque in aqua juxta quam venit, cœpit totum corpus suum lavare. Quod dum a longe vidissent villani, dixerunt ad invicem : Sensus perdidit senex iste. Vir quoque qui ei servivit, vehementer erubuit, et dixit villanis, Rever-

B timini, quoniam senex noster mente excessit ; et redierunt. Sed vir ille venit ad eremitam, dixitque ei : Abba, cur hoc fecisti ? Nam omnes dixerunt : Dæmonium habet senex iste. Cui eremita respondit : Et ego hoc audire volebam. Et rediit statim ad eremum suam ne honoraretur ab illis.

Ecce qualiter sancti viri fugerunt laudes hominum et honores : quanto magis nos imperfecti, defectuosi et vitiosi, omni vituperio ac tormento dignissimi, facere hoc debemus, atque adversa omnia æquanimitè sustinere ?

AD RELIGIOSOS

SERMO QUARTUS

DE CARNALIBUS VITIIS EVITANDIS ET CONCUPISCENTIIS REFRENANDIS.

IPSE Spiritus testimonium perhibet spiritui nostro quod filii Dei sumus. Rom. VIII, 16.

In hodierna epistola sententiis plena, docet nos sanctus Apostolus, primo carnalia vitia evitare, concupiscentias refrenare, non carnaliter, sed spiritualiter conversari. Quod quum ad omnem pertineat Christianum, quanto magis ad religiosos ?

Galat. v, 24. Alibi namque ait Apostolus : Qui autem

D sunt Christi, carnem suam crucifixerunt cum vitiis et concupiscentiis. Ergo qui corpus suum ejusque concupiscentias et vitia non crucifigunt, id est, non reprimunt, non affligunt ac vincunt, non sunt Christi per gratiam, nec membra ipsius, sed dæmonis. Attende hæc, o religiose, quum de religionis essentia tenuitas victus inseparabiliter esse dicatur. Non ergo super cibum et potum instar canis fame-

lici te effundas, non voluptatem aut carneam consolationem, non superfluitatem et delicatam præparationem in eis requiras, sed necessariam sustentationem naturæ, et discretam castigationem ipsius.

Debitores sumus corpori nostro tanquam ministro et instrumento. Sed quid ait Scriptura? Qui delicate nutrit servum suum, postea sentiet eum contumacem. Ita qui corpus suum delicate alit et satiat, cito experietur illud animæ suæ rebelle et puritati contrarians, somnolentum, pigrum atque carnalia solatia optans. Pensem quoque quod in Ecclesiastico dicitur: Cibarum, et virga, et onus asino; panis, et disciplina, et opus servo: servum enim inclinant operationes assiduæ. Quemadmodum ergo asino conveniunt cibus grossus et moderatus, percussio et onus seu labor; et servo non delicata, sed simplex et modesta refectio, disciplina, operatioque continua: sic corpori nostro debemus moderatam nutritionem, disciplinam, atque in bonis jugem exercitationem; non corporalem repausationem superfluam, ne otio insolescat.

Rom. viii, 13. Itaque, si secundum carnem vixerimus, moriemur, quia æternæ damnationis interitum sortiemur, et carnaliter vivens, sic

Ibidem. vivendo moritur morte culpæ. Si autem spiritu facta carnis mortificaverimus, vivemus vita gratiæ in præsentem, et vita gloriæ in futuro. Nam et Salvator loquitur: Væ vobis qui saturati estis, quia esurietis; beati qui nunc esuritis, quia saturabimini. Hæc, si corde surdi non sumus, valde

Luc. vi, 25, 21. movere et perterrere nos debent, atque inducere ut cum magno Dei timore cibum sumamus ac potum cum cogitationibus sanctis, et Dominum quotidie ex totis precemur præcordiis, ut nobis gratiam moderantiæ in cibis ac potibus largiri semper dignetur, ne corda nostra crapula graventur, nec curam carnis in desideriis faciamus, sed post refectionem aptiores ad opera simus virtutum.

Rom. viii, 14. Insuper ait Apostolus in præsentem epistola: Quicumque Spiritu Dei aguntur, hi

A filii sunt Dei. Quocirca scire oportet, quod ad meritorie operandum, non solum indigemus habituali gratia Spiritus Sancti, sed etiam actuali motione ipsius. Quicumque ergo in caritate et gratia est, seu in statu salutis, in tantum agitur Spiritu Dei, id est, Spiritu Sancto movetur, et ejus directione gubernatur, quantum ei necessarium est ad salutem. Sed quanto quis ardentiori caritate, abundantiorique gratia et majori virtutum perfectione impletur, tanto familiarius, secretius, frequentius, B infallibilis movetur a Spiritu Sancto, etiam sæpe ad quædam mira atque insolita, quæ secundum legem communem essent illicita. Potissimum autem et immediate disponitur homo ad suscipiendum influxum motionis et directionis Spiritus Sancti per septem dona ipsius, qui sunt habitus supernaturales infusi, per quos redditur rationalis creatura a Spiritu Sancto prompte mobilis, docilis ac dirigibilis. Studeamus ergo in omnibus a Spiritu Sancto agi, moveri ac dirigi, nec moveamur impetu C passionum, nec propriæ pertinaciæ voluntatis, ut homines passionati et immansivi. Quemadmodum enim filii Dei vocantur qui Spiritu Sancto aguntur, sic filii sunt diaboli qui proprias voluntates, perversitates et passiones sequuntur, ut sunt homines intemorati et proprii commodi amatores, qui in suis propositis, desideriis, verbis et actibus Deum non habent præ oculis, sed tanquam audaces et sibi placentes, quidquid affectio suggerit, prosequi et implere definiunt.

D Denique ad religiosos subditos, quibus nihil officiorum commissum est, et propriam voluntatem Deo ac ejus vicario obtulerunt, potissimum pertinet agi, acquiescere, obedire, non praticare, obsistere, repugnare. Maxime vero cavendum est religiosi, ne in his de quibus incerti sunt, nec probabilem certitudinem habent an sint a Spiritu Sancto, videlicet an sint pro Dei honore proximique salute et bono communi, pertinaciter renitentur, ne Spiritui Sancto obicem ponere videantur. Sum-

me autem periculosum existeret in talibus, ex passione, aversione seu carnali et vitiosa affectione reniti. Unde si quis competenter aptus instet ad ordinem suscipi, vacetque locus, caveat quisque ne importune resistat, aut aliquem ad resistendum inducat, et ne ex passione aliqua moveatur. Quod si persona multum idonea instaret pro ordine, et quis vanitate seductus seu ambitiosus, ex formidine futuræ promotionis illius, qua se impediendum a concupito suspicaretur honore, receptioni illius reniteretur, omnino diabolicum esset.

Rom. VIII,
15.

Præterea, quoniam teste Apostolo in præsentī epistola, non accepimus spiritum servitutis in timore, sed spiritum adoptionis filiorum, in quo clamamus, Abba (Pater), quem spiritum in Baptismo suscepimus, deinde quotiescumque post mortale peccatum vere pœnituiimus et confiteri decrevimus : ideo Domīno obsequamur, et cunctis virtutibus insistamus, non servili timore, sed puro amore, ex quo filialis oritur timor, qui etiam ad omne peccatum vitandum nos debet inducere, ne superpissimi Patris cœlestis faciem offendamus, et ne ab eo super omnia incomparabiliter nobis carissimo separemur; præsertim quum et ipse Deus majestatis immensæ a nobis vermiculis pater appellari digne- tur, et nos ejus pietati confisi, ipsum appellare patrem humiliter audeamus. Per quod ad ejus honorationem spontaneam, filialem, amorosam, valde adstringimur, ne et tantæ dignationi ipsius simus ingrati.

Malach. I,
6.

Matth. VI,
9.

Ipse etenim loquitur per Prophetam : Si Pater ego sum, ubi est honor meus? Itaque, quotiescumque in Oratione dominica dicimus verba hæc, Pater noster qui es in cœlis, summi ac dignantissimi Patris accendamus amore, provocemur dignatione, atque ad eum in omnibus honorandum animemur.

Rom. VIII,
16.

Insuper, quod in Spiritu Sancto clame- mus, Abba (Pater), id est, Deum vere Pa- trem vocemus, probat Apostolus subdens : Ipse enim Spiritus testimonium perhibet spiritui nostro, id est, Spiritus Sanctus

A per inspirationem internam seu revelatio- nem apertam protestatur animæ nostræ, quod adoptivi filii Dei sumus, utpote in caritate et gratia existentes. Potest quo- que testificatio ista variis modis fieri at- que intelligi. Primo, per evidentem et certam revelationem, sive immediate fiat a Deo, sive per angelum : et ita agnoscit homo certitudinaliter se esse in caritate, vel etiam prædestinatum, ut sancti Apo- stoli et Abraham, cui in Genesi loquitur Deus, Ego protector tuus sum et merces tua magna nimis. Secundo, per bonæ spei consolatoriam infusionem : sicque notabi- liter virtuosī communiter sciunt se esse in caritate, non cognitione certitudinali, sed conjecturali atque probabili. Tertio, per propriæ conscientiæ diligentem exa- minationem : ut dum homo conscientiam suam diligenter examinans, non invenit se mortali peccato obnoxium. Unde in prima sua Canonica dicit Joannes apostolus : Si cor nostrum non reprehenderit nos, fiduciam habemus ad Deum. Quarto, C fit per operum attestationem. Quum enim operatio arguat formam, sicut vita naturæ per actum et motum naturæ ostenditur, sic vita caritatis et gratiæ per alacritatem et promptitudinem virtuosorum exerciti- orum monstratur. Idecirco dum Spiritus Sanctus efficit hominem in divino obse- quio in omnibus promptum et alacrem ac constantem, testimonium perhibet ei quod in caritate existat : siquidem exhibitio operis, probatio est caritatis.

Gen. xv, 1.

I Joann. III,
21.

Posset hic quæri, an aliquis sciat se esse in caritate. Ad quod ex dictis patet aliqua- lis responsio. Porro dominus Guillelmus Antisiodorensis, in tertia parte Summæ suæ, multum magistraliter scribit de hoc, inter cetera dicens : Aliqui dicunt, quod quidam sciunt se non habere caritatem, sicut qui sunt in actu aut proposito pec- candi mortaliter. Alii dubitant se carita- tem habere, quoniam habent rationes pro utraque parte æque fortes : ut qui inci- piunt facere quod in ipsis est, et propo- nunt de cetero non peccare. Alii putant

se habere caritatem, videlicet qui jam multa bona fecerunt, et diu est quod non fuerunt in actu aut proposito peccati mortalis, tamen adhuc sustinent primos motus, imaginanturque turpia, atque inquietudinem patiuntur muscarum morientium, quæ perdunt suavitatem unguenti, id est orationis ac meditationis dulcedinem. Alii sciunt se caritatem habere, qui scilicet gustant dulcedinem Dei, et in quibus post multos fletus pene extinctus est fomes, ut in Maria Magdalene et in Maria Ægyptiaca. Insuper (ait) duplex est scientia : una experimentalis, quæ est per aliqua signa ; alia proprie dicta scientia, quæ est cognitio alicujus per se noti, ut in principiis, aut alicujus noti ex illis. Primo modo potest aliquis scire se caritatem habere. Et illa signa sunt tria. Primum est jucunditas mentis in bono ; secundum, bona desideria ; tertium, bona opera. Secundo modo nullus scit se habere caritatem, nisi per revelationem. Dispensatione ergo divina fit ut aliquo modo sciamus nos esse in caritate : primo, ut aliquam consolationem habeamus in miseriis sæculi hujus ; secundo, ut Deo gratias referamus ; tertio, ut provocemur ad meliora. Aliquo etiam modo istud nescimus : primo, ut cautiores simus, et magis solliciti de nostra salute ; secundo, ut humiliores simus, et omnem præsumptionem vitemus ; tertio, ut simus magis timorati, et in bonis operibus instantiores, nec prava

Eccle. x, 1.

Ps. xxxiii, 9; I Petr. ii, 3.

A securitate aut ignavia resolvamur. Amplius, dicit quod sicut duplex est fides, puta informis et formata, sic duplex exstat dilectio, scilicet naturalis atque gratuita. Quæ duæ dilectiones tantam habent affinitatem et conjunctionem inter se, quod non potest homo discernere an suum diligere sit motus dilectionis naturalis aut magis gratuitæ : nam et naturalis dilectio suas habet delicias et quamdam delectationem. — Multa alia scribit de ista materia, tangens et hoc, quod verbum illud Salomonis, Nescit homo an amore dignus sit, intelligitur de amore prædestinationis : quod tamen de amore præsentis justitiæ ab aliis explanatur.

Eccle. ix, 1.

Postremo mihi videtur, quod quamvis multa ponantur indicia per quæ aliquo modo cognoscere potest homo an in caritate existat, nullum tamen certius est signum, quam dum homo conscientiam suam bene discutiens, invenit se omne mortale peccatum cordialiter abhorrere, vitare et semper fugere velle. Itaque, juxta principis Apostolorum doctrinam, per bona opera certam faciamus nostram vocationem, et hujus epistolæ impleamus strenue documenta, ut simus heredes Dei, bona gloriæ æternaliter possidendo, coheredesque Christi, hoc est, beatitudinis suæ participes, tam increatæ beatitudinis ejus, quam habet in quantum Deus, quam beatitudinis suæ creatæ, quam secundum assumptam habet humanitatem.

II Petr. i, 10.

SERMO QUINTUS

DE VITANDA HYPOCRISI ET FICTA DEVOTIONE.

A FRUCTIBUS eorum cognoscetis eos. Matth. vii, 16.

Christus in evangelio hodierno docet, esse quosdam mendaciter virtuosos, fidei justos, puta hypocritas et falsos doctores,

D quos jubet esse cavendos, ne eorum persuasionibus, suggestionibus, calliditatibus, fictionibus quis credat ac seducatur. Sed quum alibi Salvator nobis prohibeat judicare, quomodo nunc præcipit nobis tales

Matth. vii, 1; Luc. vi, 37.

cavere, quum eos cavere non valeamus, nisi eos esse pravos, fallaces ac periculosos judicemus? Sed ad hoc ex præhabitis patet responsio. Non enim omne iudicium prohibet Christus, sed usurpatum, temerarium et perversum. De manifestis autem iudicare permittimur. Multiplex quoque exstat iudicium, utpote assertionis et cautelæ probabilis. Verumtamen tunc rursus oritur difficultas quomodo isti falsi prophetæ, hypocritæ et fecte devoti queant agnosci, quum plerumque manifesta caveant mala, et ea quæ ex genere suo bona sunt operentur: imo longis orationibus, magnis abstinentiis sunt intenti, et ceteris religiosiores videntur. Nihilo minus ad istud respondet in evangelio isto Christus: « A fructibus », inquit, « eorum cognoscetis eos ».

Qui ergo sunt fructus per quos cognoscantur? Et respondendum, quod quæstio ista inquit, qui sint veri ac proprii fructus ovium, hoc est hominum vere virtuosorum; qui item sint fructus luporum, videlicet hypocritarum ac deceptorum. Nempè quæ utrisque communia sunt aut esse possunt, non sunt veri et proprii fructus alicujus ipsorum; nec per talia ab invicem possunt discerni. Est itaque advertendum, quod quædam sunt bona ex genere, quæ tamen perversa queunt fieri intentione, ut jejuna, eleemosynam dare, ecclesiam visitare, prædicationem audire. Et ista dum bona fiunt intentione, vestes sunt ovium; dum vana intentione aguntur, vestes sunt luporum. Porro alia sunt bona ex sua natura et specie, quæ prava intentione nequeunt fieri, ut sunt immediati atque elicitus actus virtutum: et ista sunt vera et propria ovium vestimenta. Quorum quædam enumerans Apostolus ad Galatas: Fructus (inquit) Spiritus est caritas, gaudium, pax, patientia, longanimitas, bonitas, etc. In quibus verbis nomina illa virtutum, non habitus, sed actus virtutum designant. Virtutibus autem nullus directe utitur male. Alia demum sunt ex se mala, quæ bono non valent fieri animo: quæ sunt

veræ et propriæ vestes luporum. Quorum quædam Apostolus exprimit, dicens: Manifesta sunt opera carnis, quæ sunt fornicatio, inimicitia, contentiones, æmulationes, rixæ, invidia, animositates, etc. Verumtamen falsi prophetæ atque hypocritæ, quorum studium et intentio sunt decipere alios sub specie boni, et famam virtutum, honores ac propria commoda adipisci, non solent se prima fronte talibus vestibus operire, seu talia mala publice exercere, ne quales sint agnoscantur; sed apparentia prima faciunt bona, et tandem ad prava ac pessima, imo et ad apertissima deceptos a se pertrahunt mala, videlicet ad errores et vitia magna, ad hæreses et schismata, ad carnalitates, mollities, rebelliones, pertinacias, ambitiones. Itaque lupi isti et false justi ac deceptores, per fructus illos qui sunt propria vestimenta eorum, utpote per manifesta et inexcusabilia mala, certitudinaliter cognoscuntur, dijudicantur, et secure vitantur.

Per fructus vero qui bono animo fieri possunt, et ovibus quoque communes sunt, non possunt ita cognosci, nisi ex aliquibus additamentis: ut quum talia agunt cum singularitate et probabili vanitate seu ostentatione, vel animo pertinaci, seu contra suorum superiorum exhortationem aut jussionem. Denique, quoniam sicut vasa figuli probat fornax, sic homines justos tentatio tribulationis, isti fallaciter virtuosus, false justi, fecte devoti per adversitates probantur, et per exercitationes prudentes noscuntur. Quum enim non sint veraciter humiles, mites et patientes, solent in talibus indignari, irasci et per impatientiam suam agnosci. Nihilo minus hæretici et alii quidam in sensu proprio immansivi, sæpissime patientes videntur, quia antequam suos relinquant errores, diversas quasi patientissime sustinent pœnas. Attamen eorum patientia non est patientia vera, sed duritia magna, et pertinacia maledicta; atque ex hoc superbi et vitiosi ac pertinaces monstrantur, quia indociles, induribiles et inobedientes consistunt.

Matth. vii,
15.

Galat. v, 22,
23.

Ecclesi. xxvii,
6.

Præterea, aliquæ sunt virtutes et aliqua vitia inter quæ rite discernere satis exstat difficile, eo quod similitudinem magnam videantur habere, et vitia illa speciem prætendant virtutum, seque virtutes esse impie mentiantur. Sic quippe loquacitas reputatur affabilitas, et dissolutio spiritualis lætitia; severitas quoque reputatur justitia, et remissio pietas, atque amaritudo maturitas; sicque de aliis multis. Ad discernendum inter hæc, indiget homo illuminatione divina ac discretione præcipua, ut veraciter separet pretiosum a vili. *Jer. xv, 19.* Unde ad discernendum in talibus, Deum quotidie exorare debemus, ut in illis dirigere nos dignetur, et ab omni seductione ac periculo præservare.

Insuper, circa talia dupliciter fallimur. Primo, ex ignorantia: ut dum quis bene agere putat et bonæ intentionis est, nihilo minus errat et peccat, æstimans bonum et discretum quod est malum et excessivum. Et ita viri boni peccant quotidie in cibo, potu, somno, vel supportatione peccantium, non taliter corripiendo aut corrigendo hujusmodi sicut oportet aut expedit. Secundo, ex certa malitia: ut dum quis ex prava intentione agit quæ bona videntur, videlicet desiderio laudis et famæ humanæ aut honoris, seu commodi temporalis, vel ut alios fallat ac male alliciat. Et qui taliter agunt, proprie falsi prophetæ, hypocritæ, simulatores et deceptores vocantur. Atque de talibus Christus in hodierno evangelio loquitur, et in duobus nos instruit: primo, ut omnem hypocrisim, simulationem, vanitatem, perversitatem abhorreamus ac evitemus; secundo, ut ab his qui talibus vitiis sunt infecti, abstinemus, ne seducamur et inficiamur ab illis. Et istud novellis plantationibus, simplicioribus Fratribus et innocentibus omni verbo credentibus valde est necessarium. Sunt namque aliqui practicatores et partialitatem amantes, seque multitudine adhærentium, non ratione et virtute armantes, qui periculosi sunt nimis et præcavendi.

Porro, quo religiosi præ ceteris cunctis mortalibus magis tenentur esse sibi ipsis ac sæculo spiritualiter mortui, eo plus ab omni hypocrisi, ambitione, calliditate, fictione et appetitione laudis humanæ obligantur esse immunes. Rursus, quo coram Deo tenentur magis esse sinceri et proficientes, nec solum mala, sed et insecuriora vitantes, eo a vitiis illis adstringuntur abundantius esse expertes. Religiosus quippe debet in omnibus esse ad Deum erectus, in ipsum conversus, nequaquam ad se ipsum vitiose reflexus. Quum ergo per vitia illa homo ad se maxime et obliquissime, imo et miserabilissime et damnableissime reflectatur, summe et ineffabiliter detestanda sunt omni religioso. Interea, quo religiosi viam magis arduam sunt aggressi, quo plura propter Deum reliquerunt, quo quotidie plura opera ex suo genere bona, imo et ad perfectionem pertinentia operantur, quo exuberantiorum mercedem desuper adepturi sunt, si sinceri justique fuerint; eo stolidius, infelicius, miserabilius agunt, si jam in claustrum hypocrisim, ambitionem, desiderium laudis humanæ, duplicitatem, fictionem admiserint, si vitia sua pallient et excusent, si sub specie caritatis atque justitiæ suas effuderint passionem, si aliud quid prætendant quam Deum et ejus honorem, ac veram salutem. Audi, o fecte devote, o nequiter humilis, o simulator et callide, quid de hypocritis sacra protestetur Scriptura: Si ascenderit (inquit) usque ad cælum superbia ejus, et caput ejus nubes tetigerit, quasi sterquilinum in fine perdetur, transiet quasi visio nocturna; luet quæ fecit omnia, nec tamen consumetur; juxta multitudinem adinventionum suarum, sic et sustinebit; revelabunt cæli iniquitatem ejus, et terra adversus eum consurget. Jacobus quoque apostolus ait: Vir duplex animo, inconstans est in omnibus viis suis. *Job xx, 6-8, 18, 27. Jacob. 1, 8.*

Sit ergo in omnibus recta nostra intentio, justa nostra affectio, virtuosa actio nostra, sincera omnis occupatio nostra; nec pro vano volatilique favore, præco-

nio aut honore, tot et tantos perdamus labores ; nec tam immensa beatitudine nos privemus, ne et ultra hæc æternam A confusionem atque gravissimam incurramus damnationem, reprobante nos Iudice summo.

SERMO SEXTUS

DE HYPOCRISI ET FICTA DEVOTIONE VITANDA, VARIISQUE DOCUMENTIS RELIGIOSORUM.

OMNIS arbor quæ non facit fructum bonum, excidetur, et in ignem mittetur. Matth. vii, 19.

Unigenitus Filius Dei, qui in quantum Joann. xiv, 6. I Cor. i, 24. Deus est, essentialiter verus et veritas est et ipsa sapientia Dei Patris, sciens quam

Matth. vi, 2, 5, 16; vii, 5; xv, 7; xxiii, 14 et seq.; xxiv, 51; Luc. vi, 42; xii, 1, 56; xiii, 15. specialissime ac vehementissime omnis hypocrisis et appetitio vanæ laudis, omnis confictio, vanitas et deceptio, veritati, æquitati ac veræ sapientiæ contrariantur,

atque a Deo despiciantur, contra hypocrisim in Evangelio terribiliter ac sæpissime loquitur, et hypocritas mirabiliter detestatur, reprobatur et condemnat. Scribas quoque et Phariseos de hypocrisi maxime reprehendit. Quorum nihilo minus quidam specie tenus religiosi, hypocrisim, vanitatem astutiamque sequuntur. Propter quod loquitur Augustinus : Quam multos hypocritas sub habitu monachorum callidissimus hostis dispersit ! Circumeunt provincias, petunt et exigunt sumptus lucrosæ egestatis, aut simulatæ pretium sanctitatis. Quidam etiam in observantiis suis sunt singulares, videri, sciri, laudari optantes. Et qui in secreto coram Deo torpore et negligentia pleni sunt, coram hominibus grandem prætendunt fervorem, simulant æquitatem, devotionem confingunt. Hi sunt qui non attendunt nec metuunt districtum Dei iudicium ; qui homines plus verentur quam Deum, qui magis formidant ab hominibus despici, vituperari, confundi, quam a Iudice altissimo reprobari ac aspernari.

O quam infinita est excæcatio et insipientia horum ! Quibus ait Propheta : Filii

hominum, usquequo gravi corde ? Ut quid diligitis vanitatem, et quæritis mendacium ? Econtra : Beatus vir cujus est nomen Domini spes ejus, et non respexit in vanitates et insanias falsas. Hinc ait Bernardus : Hypocrita singularia et inusitata sectatur, ut fragrantiam propriæ opinionis diffundat. Cujus affectio elongatur a Christo, et vanis favoribus delectatur ; cujus mens, non testimonio conscientiæ propriæ, sed adulationibus demulcetur. Ps. xxxix, 5.

Cogitemus Deum omnia intuentem et omnia judicaturum, et odiamus hypocrisim ; non simulatores et callidi, sed simplices esse satagemus et timorati. Attendamus quam vanum, vile, stultum et periculosum sit humanis laudibus delectari, hominum reputatione inaniter gloriari : quia per hoc non solum æternam beatitudinem, Dei amicitiam, omnemque virtutem amittimus, sed perpetua quoque meremur supplicia, et confusionem perennem habebimus tanto majorem, quanto hic ab hominibus virtuosiores æstimabamur. Et qui modo devotos et sanctos nos arbitrantur, tunc de nostra vanitate atque insaniam mirabuntur.

Quam stultus mercator, qui pro divino, cœlesti et æterno honore, transitorium, imo brevissimum et humanum honorem amplectitur ! O hypocrita, si appetibile est virtuosum esse, cur vis apparere quod non vis esse ? Si malum est vitiosum et vanum exsistere, cur vis esse quod non vis apparere ? An ignoras quod nihil ita exterminet quemadmodum simulatio ? quoniam malum sub specie boni celatum,

Chrysostomus.

dum non cognoscitur, non cavetur. Nihilominus, teste Ambrosio, latet plerumque sub tristi amictu lascivia, et deformis vanitas vili veste obtegatur, ut secreta petulantium tegantur sic animorum. Itaque absit ut quis idcirco se frangat, se aliis applicet, se honeste et exemplariter conversari ac exhibere prætendat, ut ab hominibus commendetur, aut a suis confratribus honoretur, aut certe ad aliquam præsentiam sive officium promoveatur. Hæc enim diabolica esset perversitas.

Denique, si opera bona ad supererogationem spectantia sunt celanda, ne videatur quis affectare humana præconia; et si vanum ac stolidum est de bonis operibus atque virtutibus vere inexsistentibus velle ab hominibus commendari : quanto iniquius insipientiusque consistit de virtutibus non inexsistentibus et operibus non peractis velle laudari, aut intra se de huiusmodi laude inanissime gloriari? Nec quisquam ita sit insensatus, ut alios vituperet, vituperarive cupiat, quatenus illorum comparatione ipse laudabilior reputetur. Interdum contingit ut vanitate seductus, dum ab aliquo se in fama, honore, promotione superari veretur, si ille indecenter se habeat, gloriatur; si vero omnibus exemplaris amabilisque existat, tristetur. Ecce quomodo spiritualia ista vitia miserimi hominis cor excæcant, et pravis implent germinibus, utpote vitiis quæ nascuntur ex ipsis. Nec enim numerari queunt peccata ex hypocrisi, ambitione et appetitione laudis humanæ manantia.

Fundemus ergo totam conversationem nostram in tuto, forti ac stabili fundamento, hoc est in profunda ac inviolabili humilitate, in propria mortificatione vivifica, in plena et indesinente conversione mentis ad Deum; et discutiamus quotidie nosmetipsos, an coram Deo sinceriter ambulemus, an in aliquo ad nos ipsos inani-ter reflectamur. Summum et incommutabile bonum super omnia incomparabiliter appetiemur; ad Creatorem nostrum continue adspiremus; fonti beatitudinis no-

stræ omni hora propinquare conemur; Deo sublimi et adorando jugiter studeamus, peroptemus, deprecemur placere, cohærere, uniri, in ejus amore succendi, in ipso quotidie magis ac magis constabiliri. Non simus incustoditi ac dissoluti, una hora perdentes quod alia acquisivimus de spiritu devotionis ac spirituali profectu; sicut (proh dolor!) multi sunt qui post celebrationem, post confessionem, post correptionem, post infusam eis compunctionis devotionisque gratiam, protinus ad consuetas ac pristinas relabuntur dissolutiones, levitates, loquacitates, incustodiam cordis, evagationesque sensuum : ideo parum aut nihil proficiunt, imo magis deficiunt; et quum spiritu cœperint, carne

Galat. iii, 3.

Denique, non potest religiosus digne proficere, nec ad perfectionem pertinere, nisi venialia peccata quasi mortalia detestetur, abhorreat, fugiat, defleat ac puniat assidue in se ipso, sitque in indesinente mentis suæ custodia, et semper sollicitus ne in aliquo Deum offendant, sed ei quotidie plenius mereatur placere. Itaque collatam nobis frequenter compunctionis devotionisque gratiam diligentissime conservemus, non effundamus : imo in ea crescere semper nitamur. Cogitemus quod juxta Scripturas, congregatio hypocritarum sit sterilis; et quod rursus in libro Job legitur : Numquid Deus exaudiet

Job xv, 34.

vocem hypocritæ, quum venerit super eum

Ibid. xxvii, 9, 10.

angustia? aut poterit in Omnipotente delectari? Ne ergo cum talibus steriles simus, sint oculi nostri semper ad Dominum, nec unquam ab eo deflectatur aut seducatur cor nostrum, quia ut ait Salvator, « Omnis arbor quæ non facit fructum bonum, excidetur, et in ignem mittetur ».

Ps. xxiv, 15.

Matth. vii, 19.

Hinc sancti Patres in eremo omnem hypocrisim, vanam gloriam, laudem humanam specialissime evitabant. Horribilia quoque in Vitaspatrum et alibi leguntur exempla de quibusdam religiosis hypocritis, qui humana æstimatione sanctissimi erant, sed coram Deo vani fuerunt, et gravissimam

sibi damnationem mercati sunt, atque æternaliter perierunt. Non ergo sufficiat nobis laus applaususque hominum, sed conscientiæ bonæ interrogatio in Deum. ^{I Petr. III, 21.} Nulli vanæ conceptioni, nulli fatuæ imaginationi demus ingressum seu moram in nobis : imo si orta fuerit, protinus expellatur, derideatur ac penitus suffocetur. Ideo Climacus loquitur : Si hostis suggerit tibi magistratum, episcopatum, aut fratrum ducatum, non audias eum. Difficile est canem, quantumcumque modice admittatur, a macello cordis expellere.

Postremo, quoniam Christus hominem virtuosum comparat arbori bonæ, sit qui libet nostrum arbor bona, fructuosa et

A pulchra, radices humilitatis mittendo profunde in terram ; puris cogitationibus et sanctis affectionibus quasi floribus adornemur ; verbis fructuosis, ædificatoriis, sacris, quasi foliis venustemur ; exercitiis virtuosis quasi fructibus impleamur ; delectationibus virtutum quasi fructuum bonorum saporibus recreemur. Et si per adversa et aspera, per tentamenta et quotidiana peccata, quasi hiemalibus frigoribus videamur arescere, tamen per consolationem et confortationem Spiritus Sancti, B per contemplationem et ferventem Dei amorem, per incessantem profectum refloreamus et in altum crescamus. Ad laudem et gloriam Omnipotentis. Amen.

DOMINICA IX POST TRINITATEM

ENARRATIO IN EPISTOLAM

NON SIMUS CONUPISCENTES MALORUM, SICUT ET ILLI, ETC. I Cor. x, 6-13.

SANCTUS Apostolus in præsentī episto-
la multa nobis proponit salubria docu-
menta, de quibus in processu expositionis
dicetur. Nam ait : *Non simus concupiscen-
tes malorum*, id est, inordinatas affectiones
et carnales concupiscentias abjiciamus :
quemadmodum Ecclesiasticus præcipit,
Post concupiscentias tuas non eas, et a
voluptate tua avertere. Ideo namque data
est homini ratio, ut per eam illicita desi-
deria refrenet ac superet. *Sicut et illi*, hoc
est rebelles et carnales Judæi, *concupi-
erunt* in deserto, qui fessi de manna, de-
sideraverunt carnes comedere, dicentes :
Quis dabit nobis carnes ad vescendum ?
De quibus ait Psalmista : Tentaverunt
Deum in cordibus suis, ut peterent escas
animabus suis. *Neque idololatræ efficia-
mini, sicut quidam ex ipsis facti sunt*,
vitulum aureum adorantes, quemadmodum
scriptum est in Exodo : *Sedit populus*, id
est pars populi Israelitici in deserto, quan-
do egressi fuerunt de Ægypto, *manducare
et bibere*, hoc est ad manducandum et bi-
bendum coram simulacro ad ejus hono-
rem, *et surrexerunt ludere*, id est chori-
zare, et idolum adorare, dicentes : Isti
sunt dii tui, Israel. Quorum utrumque
puerile et stultum est. Et propter hoc
scelus interfecta fuerunt viginti tria mil-
lia Judæorum per manus Levitarum, se-
cundum quod Moyses jussit, et in Exodo
describitur.

Neque fornicemur corporaliter, sicut

*A quidam ex ipsis fornicati sunt cum mu-
lieribus Madianitis, et ceciderunt*, id est,
occisa sunt, *una die viginti tria millia*. In
Numeris dicitur, Viginti quatuor millia ;
sed numerus minor non excludit majorem,
imo major includit minorem. Occisi
sunt autem fornicatores isti ab aliis filiis
Israel, Moyse id jubente. Atque ob hanc
populi culpam Deus præcepit principes
tribuum Israel suspendi in patibulis, eo
quod populum non retraxerunt a tanto
excessu pro posse : quo constat peccata
subditorum redundare in præsidentes, nisi
qui præsumunt fecerint debitam diligentiam
suam in refrenatione subditorum a vitiis.
Tunc quoque Phinees perfodit Zambri du-
cem filiorum Simeonis, et Cozbi filiam
nobilissimi principis Madianitarum, in lo-
cis genitalibus : quo facto, cessavit plaga
a populo.

Neque tentemus Christum, quærendo
experimentum sapientiæ sive potentiæ
ejus, *sicut quidam eorum tentaverunt
Christum*, secundum deitatem ipsius. Ten-
tando etenim Deum, tentaverunt quam-
libet divinam Personam. Unde Dominus
dixit ad Moysen : Usquequo multitudo hæc
pessima non credet mihi, in omnibus mi-
rabilibus quæ feci coram eis ? Et tenta-
verunt me jam per decem vices. Porro
persona Christi æterna est ; imo Jesus
Christus æternus est, quum sit verus Deus :
supponit enim divinam et increatam Per-
sonam. Ad quod insinuandum, Judas in

Eccli. xviii,
30.

Num. xi, 4.
Ps. cxxvii,
18.

Exod.
xxxii, 6.

Ibid. 4, 8.

Ibid. 28.

Num. xxv,
1.

Ibid. 9.

Ibid. 4.

Ibid. 8, 14,
15.

Ibid. xiv,
11, 22.

- Judæ 5.* sua ait Canonica : Jesus populum salvans A de Ægypto, secundo eos qui non crediderunt perdidit. *Et a serpentibus perierunt.*
- Num. xxi, 6.* Misit enim Dominus in eos ignitos serpentes, a quibus occisi sunt multi, ut in Numeris habetur. *Neque murmuraveritis* contra superiores aut proximos vestros, dum increpant vos, vel aliquid adversitatis accidit vobis, *sicut quidam eorum murmuraverunt* contra Deum et Moysen, juxta
- Ibid. xiv, 1-3.* illud Numerorum : Vociferans omnis turba filiorum Israel flevit, et murmurati sunt contra Moysen, dicentes : Utinam pereamus, et non inducat nos Dominus in terram hanc. Unde Salvator in Evangelio
- Cf. Aug. in Joann. tract. xxxv, 11.* loquens perversis Judæis : Murmuratores, inquit, murmuratorum filii, implete mensuram patrum vestrorum. *Et perierunt,* hoc est, in deserto occisi sunt, *ab exterminatore,* id est ab angelo qui eos extra fines terræ promissionis percussit, et ita per anticipationem eos inde exterminavit.
- Num. xiv, 29-33.* Dixit etenim Dominus : Omnes qui murmurastis contra me, non intrabitis terram hanc; sed in deserto jacebunt cadavera C vestra. De hoc angelo exterminatore ait
- Erod. xxiii, 20, 21.* Dominus in Exodo : Ecce ego mitto angelum meum ante faciem tuam; observa eum, quia non dimittet quum peccaveris.
- Hæc autem omnia,* id est debita ista supplicia pro eorum sceleribus inflicta, *in figura,* id est typica significatione, *contingebant illis,* videlicet ad significandum quod similia aut majora infligentur nobis tormenta si illorum peccata secuti fuerimus. *Scripta sunt autem ad correctionem* nostram,* ut illorum exemplo terreamur et D emendemus nos, quatenus qui amore boni bene agere negligit, saltem pœnarum emendetur formidine. Felix enim quem faciunt aliena damna peritum. Propter
- Prov. xix, 25.* quod in Proverbiis habetur : Pestilente flagellato, stultus sapientior erit. Itaque scripta sunt propter nos, *in quos fines sæculorum devenerunt,* id est ultima mundi ætas, quæ incepit a tempore Christi, et durat usque ad terminum mundi : de qua
- 1 Joann. ii, 18.* Joannes ait, Filioli, novissima hora est.
- Denique, juxta doctrinam divini Dionysii, status Ecclesiæ militantis medio modo se habet inter statum Synagogæ statumque patriæ. Unde sicut ea quæ geruntur in Ecclesia militanti, sunt figura eorum quæ fiunt in Ecclesia triumphanti; sic ea quæ acciderunt in Synagoga, figura erant eorum quæ aguntur in Ecclesia. Imo status ac populus Judaicus, fuit figura status populi christiani. Ideo in figura contigerunt omnia illis.
- Itaque qui se existimat stare,* id est spiritualiter erectum esse in Deo per caritatem et opera virtuosa, *videat ne cadat,* id est, ne gratiam peccando amittat. Nemo ergo securus sit, sed in custodia et timore sit unusquisque, quia in medio laqueorum versamur. Et bene ait, « existimat », quoniam absque revelatione divina nullus *Eccle. ix, 1.* certus est se esse in caritate.
- Tentatio vos non apprehendat,* id est, in vobis non sit, nec capiat, nec vincat, *nisi humana,* id est levis et transitoria, utpote inclinatio ad venialia, sine quibus *1 Joann. i, 8.* non potest agi hæc vita. Hoc autem dicit Apostolus, non hortando aut licentiando ut venialiter peccemus, sed non prohibendo, quia vitari non potest. Quamvis enim singula vitare possumus, non tamen omnia. *Fidelis autem Deus est, qui non patietur vos tentari,* hoc est impugnari a dæmonibus aut pravis hominibus, *supra id quod potestis,* id est ultra vires naturæ aut gratiæ; *sed faciet etiam cum tentatione proventum,* id est spirituales profectum, dando gratiam resistendi et per exercitium tentationis proficiendi, *ut possitis sustinere,* id est patienter tolerare, et tolerando ac resistendo meritorie prævalere. Tentatio ergo passiva, non est in se mala aut fugienda, quum exercitium sit virtutis, et triumphandi ac promerendi materia, atque ad multa perutilis, utpote ad cognoscendum propriam infirmitatem, ad assuescendum invocare divinum auxilium, ad obtinendum experientiam in spiritualibus rebus. Propter quod in Ecclesiastico habetur : Qui non est tentatus, *Eccle. xxxiv, 9, 10.*

quid scit? Qui non est expertus, pauca A dorum, ne quantum volunt et possent homines tentent. Per se ipsum quoque et per angelos, per preces et merita Sanctorum ac devotorum, confortat corda hominum ad sustinendum ac superandum tentationes, juxta illud in Psalmo : Angelis suis mandavit de te, etc.

II Tim. II, 3. recognoscit. Denique non coronatur nisi qui legitime certaverit. Hinc Jacobus : Omne (inquit) gaudium existimate, fratres, quum in diversas tentationes incideritis. Deus enim per angelos sanctos reprimit malignitatem spirituum immu-

Jacob. I, 2.

Ps. XC, 11.

SERMO PRIMUS

DE REFRENANDIS INIQUIS PECCATORUM CONUPISCENTIIS, DEQUE SINCERIS SUMMI DEI CULTORIBUS.

QUI stat, videat ne cadat. I Cor. x, 12. B Docet nos beatissimus Paulus apostolus in præsentī epistola, primo ne desideremus illicita, hoc est per divinam legem prohibita. Quid autem prohibet Deus, nisi peccata? Omnis etenim creatura Dei bona est, et suo modo amanda. Nec prohibet Deus appetere aliorum divitias, aut proximi conjugem, quasi divitiæ in se malæ sint, aut conjux alterius odienda; sed quia illa appetere, malum est et injustum. Sola ergo peccata prohibet Deus directe. Itaque non appetas vitiose delectari, et multa mox superabis peccata : quia ut asserit Augustinus, peccare delectat; nam si non delectaret, non fieret. Verumtamen quædam sunt peccata in se ipsis pœnalia et amara, ut invidia, indignatio, ira, impatientia, desperatio, turbulentia, timor inordinatus. Igitur non cupiamus inordinate delectari, et protinus vitia gulæ atque luxuriæ, jocos immoderatosque ludos, dissolutiones, loquacitates, aliasque innumerabiles vanitates et impietates vincemus, vitabimus, abjiciemus. Sed quid D est inordinate delectari? Hoc est in rebus creatis delectari, non per relationem seu ordinationem earum ad Deum creatorem, ad ultimum finem, ad veram salutem. Hoc enim est contra justitiam, contra ordinem rationis, contra sapientiæ regulam ac censuram. Denique, si quis delectaretur in Creatore, non in quantum in se ipso bonus est, sed solum aut principaliter in quantum bonus est sibi, videlicet homini delectationem in ipso habenti, hoc esset inordinate delectari in Deo, essetque Deo uti, non frui, id est, Deum ad se ac propria commoda referre, non se ad Dominum Deum. Unde talis se ipsum præponeret Deo, et faceret se ipsum finem sibi, Deum autem medium ad se ipsum : quod est omnino præposterum, injustum, per-

I Cor. x, 6.

I Tim. IV, 4.

C

Itaque, juxta doctrinam Apostoli, concupiscamus bona, non mala. Summe et præcordialissime affectemus Deo placere, Deum toto corde diligere, Deum super omnia sincerissime formidare ac honorare. Desideremus quotidie in caritate Dei et omnium hominum, in omni dono, virtute et gratia Spiritus Sancti proficere, ut simus quotidie humiliores, patientiores, ferventiores, puriores, atque in ceteris virtutibus perfectiores. Studeamus quotidie magis solliciti, custoditi, timorati esse coram Altissimo, ut cum Propheta dicere valeamus : Oculi mei semper ad Dominum; et rursus, Providebam Dominum in conspectu meo semper. Sicque Dei intuitu et amore universa indesinenter odiamus ac fugiamus peccata.

Ps. XXIV, 15.

Ps. XXXIII, 8.

Præterea advertendum, quod Scriptura divina loquitur de duplici concupiscentia, videlicet sensitiva et intellectiva. Concupiscentia sensitiva est in inferiori sensitivoque appetitu, estque desiderium rei materialis, terrenæ, sensibilis. De qua Ecclesiasticus asserit : Si præstiteris animæ tuæ concupiscentias ejus, facient te in gaudium inimicis tuis. Concupiscentia intellectiva est in voluntate, quæ est superior intellectivusque appetitus ; estque concupiscentia ista desiderium Dei et spiritualium rerum. De qua in Ecclesiastico legitur : *Ibid.* iii, 31. Auris bona cum omni concupiscentia audiet sapientiam. Et Sapiens ait : Concupiscentia sapientiæ deducit ad regnum perpetuum. Atque in Psalmo : Concupiscit et deficit anima mea in atria Domini.

Denique, communiter dicitur quod concupiscentia sensitiva sit vitiosa, concupiscentia autem intellectiva sit virtuosa. Verumtamen, si subtilius consideretur, aliter distinguendum erit, atque dicendum quod concupiscentia utraque est duplex, utpote virtuosa et vitiosa. Est ergo concupiscentia sensitiva una virtuosa, alia vitiosa. Virtuosa est, dum appetitus sensitivus fertur in suum objectum secundum censuram et ordinem rationis, videlicet, dum aliquod sensibile bonum concupiscimus ordinate, secundum quod recta ratio dicat, utpote ordinando illud ad debitum finem : ut si quis appetat cibum et potum quatenus temperate refectus, aptus et fortis sit ad Dei obsequium, vel si maritus cupiat suam cognoscere conjugem amore prolis ad Dei obsequium educandæ, sive ut debitum reddat. Concupiscentia sensitiva vitiosa est, dum appetitus sensitivus in suum movetur objectum contra rectæ rationis judicium, hoc est, dum sensibilia desideramus, non per debitam ordinationem ad veram salutem, sed propter voluptatem immundam, seu plus quam utile aut necesse est ad spiritualia bona acquirenda, conservanda seu perficienda. De qua scribit Apostolus : Spiritu ambulate, et desideria carnis non perficietis ; caro enim

A concupiscit adversus spiritum, ut non quæcumque vultis, illa faciatis.

Simili modo concupiscentia intellectiva una est virtuosa, quando videlicet summum ac simplicissimum bonum desideramus pure aut principaliter propter puram et incommutabilem bonitatem ipsius, juxta illud in Psalmo : Quemadmodum desiderat cervus ad fontes aquarum, ita desiderat anima mea ad te, Deus. Sicque Isaias loquitur Deo : Anima mea desideravit te in nocte. Est etiam concupiscentia ista intellectualis virtuosa, dum bona creata spiritualia, ut scientiam et virtutes, appetimus ad Dei honorem, ut per eas ad beatitudinem pertingamus, Deumque debite veneremur. Porro concupiscentia intellectualis vitiosa est, dum bonum spirituale, sive increatum sive creatum, appetimus propter proprium, carnale temporaleve commodum : sic multi vani et miseri homines cupiunt notitiam Scripturarum, et aliqua ex suo genere bona efficiunt, quatenus ab hominibus honorentur, laudentur, et bona corporalia adipiscantur. Itaque concupiscentiam vitiosam, tam sensitivam quam intellectivam, prorsus abjiciamus ; concupiscentiam vero virtuosam et ordinatam, tam sensitivam quam intellectivam, apprehendamus, Deum super omnia pure desiderando, atque universa bona creata, tam sensibilia quam spiritualia, per rectam ordinationem ad eum optando.

Secundo ex hodierna docemur epistola, ut simus summi Dei cultores sinceri, eum super omnia appetendo, colendo, amando, et non efficiamur idololatræ. Nec solum idololatræ sunt qui idola colunt seu gentilium deos adorant, sed etiam universi qui creaturis magis quam Creatori inhærent, qui ista carnalia et caduca magis quam Deum sublimem et gloriosum quærunt, intendunt ac diligunt : quales sunt omnes avari, luxuriosi, ambitiosi, et ceteri vitiosi. Unde avari aurum et divitias magis quam Deum colunt ; luxuriosi feminis magis quam Deo student placere ; superbi propriam excellentiam magis quam Dei

Ecclesi. xviii, 31.

Ibid. iii, 31.

Sap. vi, 21.

Ps. lxxxiii, 3.

Galat. v, 16, 17.

Ps. xli, 2.

Is. xxvi, 9.

1 Cor. x, 7.

omnipotentis honorificentiam quærunt. Omnes itaque isti in suis bonis creatis quasi in idolis, summo Deo relicto, lætantur.

I Joann. v, 21. Quibus prima Joannis dicitur : Filioli, custodite vos a simulacris.

Tertio docet Apostolus, ut vitia gulæ vitemus, comessationes et potationes superfluas fugiendo, et ne post cibum et potum, ad choreas, ludos, jocos, et alias vanitates exercendas seu inspiciendas surgamus, sed sobrie refecti, Deo gratias referamus. Unde *Luc. xxi, 34.* ait Salvator : Videte ne graventur corda vestra crapula vel ebrietate, aut curis hujus sæculi.

I Cor. x, 8. Quarto docet, ut peccata fugiamus luxuriæ. Fornicatores enim et adulteros judicabit reprobationis judicio Deus, secundum *Hebr. xiii, 4.*

Galat. v, 19, 21. Apostolum. Qui iterum ait : Fornicatores regnum Dei non possidebunt. Nempe, quum Deus sit puritas infinita et sanctitas prorsus immensa, sapientia supersplendidissima veritasque mundissima, quanto in peccatis carnalibus major est turpitudine, major excæcatio mentis et amplior inhonestas, tanto plus displicent Deo et elongant ab eo : idcirco potissimum vitanda sunt Christianis, qui præ ceteris populis puri ac spirituales, Christique imitatores esse tenentur. Unde alibi docet Apostolus,

Ephes. v, 3. ut ista nec nominentur in nobis. Omnis itaque Christianus ad continentiam obligatur, hoc est ad castitatem virginalem, conjugalem aut vidualem. Atque ut docet *I Cor. vi, 15-19.* Apostolus, corpora hominum continenter et devote viventium templum sunt Spiritus Sancti, et membra eorum, membra sunt Christi; corpora vero luxuriosorum sunt habitacula dæmonum, et membra eorum sunt membra meretricum atque diaboli. Idcirco qui continens est, vitia carnis devitet; incontinens autem pœniteat.

Ibid. x, 9. Quinto docet Apostolus, ne Deum tentemus, quærendo experimentum de omnipotentia aut providentia ejus. Sed certi quod ipse verissime omnipotens est, et universa clarissime intuens, sapientissime ordinans, rectissime quoque disponens, faciamus semper quod in nobis est, seu

A melius nostrum, et in ipso humiliter ac immobiliter confidamus. Sicque nos ipsos et omnia nostra, preces et vota ei fiducia- liter committamus, scientes, ut ait Scriptura, quod ipsi cura est de nobis, et quod sperantes in se finaliter non relinquet.

Sap. vi, 8; xii, 13; I Petr. v, 7; Eccli. ii, 11.

Sexto docet, ne murmuremus, sed patientes et humiles simus. Itaque quidquid adversitatis acciderit nobis, quidquid correctionis seu pœnæ aut reprehensionis fuerit nobis inflictum, non murmuremus; sed Dei providentiam ejusque justa judicia attendentes, pensemus nos talia pati non absque ordinatione divina, vel pro propria culpa, vel pro gratia et gloria augmentanda, aut pro alia rationabili causa justo Deo ac sapientissimo nota : et ideo patientes perseveremus, et gratias Deo agamus. Primo autem et maxime est cavendum ne murmuremus adversus Deum. Ait equidem Augustinus : De nulla re magis Deum offendisse Judaicus populus dictus est, quam murmurando adversus Deum. Secundo, ne contra prælatos aut C præidentes. Unde Moyses filiis Israel contra se et Aaron murmurantibus ait : Non contra nos est murmur vestrum, sed contra Dominum. Gregorius quoque testatur : Qui contra superpositam sibi potestatem murmurat, illum redarguit qui potestatem instituit ac donavit; quisquis vero pro peccato suo corrigitur, nisi murmurando renitatur, eo ipso justus esse jam inchoat, quo corrigen- tis justitiam non accusat. Tertio, ne contra caritative corripientes. Ideo Salomon loquitur : Viro qui corripientem dura cervice contemnit, repentinus super- veniet interitus. Quarto, ne contra injuriantes, quum dicat Salvator : Beati estis quum maledixerint vobis homines, et persecuti vos fuerint; gaudete in illa hora, quoniam merces vestra copiosa est in cœlis. Hinc ait Isidorus : Discat non murmurare qui adversa patitur; et si ignorat cur ea sustineat, per hoc juste pati se arbitretur, quia ab illo gubernatur ac judicatur cujus judicia nunquam exstant injusta.

I Cor. x, 10.

Exod. xvi, 8.

Prov. xxix, 1.

Matth. v, 11, 12.

Septimo docet Apostolus, ut qui stat, *I Cor. x, 12.*

Ezech.
xviii, 24.

Eccli.
xxvii, 4.

I Cor. x, 13.

caveat casum. Oportet enim ut semper si-
mus custoditi atque solliciti ne peccemus,
præsertim quoniam per Ezechielem loqui-
tur Deus : Si averterit se justus, et fecerit
iniquitatem, omnes justitiæ ejus non re-
cordabuntur, sed in prævaricatione sua
moriatur. Magis quoque culpabile est, post
acceptam veritatis notitiam et post carita-
tis ac gratiæ infusionem peccare, quam
ante. Nemo igitur vana securitate torpe-
scat, nemo ex temporum diuturnitate ne-
gligentior aut remissior fiat, quoniam nisi
in timore Dei tenuerit se instanter, cito
ejus conscientia subvertetur.

Ultimo docet Apostolus, ut non appre-
hendat nos tentatio, nisi humana. Gravio-
ribus ergo ac diabolicis tentationibus in-
victissime reluctemur, sicut de hoc in
specialibus sermonibus dictum est. Omni
itaque pravæ suggestioni, omni illicitæ in-
clinationi, omni vitiosæ persuasioni forti-
ter resistamus, Deum habentes semper præ
oculis, et metuendissimum ejus judicium,

atque supplicia impiorum æterna. Unde
quo gravius quis tentatur, eo Dei auxilium
ferventius incessabiliusque invocare doce-
tur. Quemadmodum in Vitaspatrum habe-
tur, quod quidam sanctorum Patrum ha-
buit probatum ac virtuosum discipulum.
Quem quum diabolus acriter valde tenta-
ret, et discipulus ille orando et jejunando
constanter resisteret, dixit sanctus abbas
ejus ad eum : Fili, si vis, oro Deum ut au-
ferat a te impugnationem istam. Respondit
discipulus : Quamvis contra tentationem
istam resistendo laborem habeam ma-
gnum, sentio tamen me in resistendo pro-
ficere : idcirco, o sancte Pater, noli Deum
orare ut tollat a me tentationem istam, sed
ut virtutem et gratiam præstet resistendi
viriliter, et sustinendi ac prævalendi fina-
liter. Quo audito, Pater ille dixit discipu-
lo : Ecce, fili, jam scio quod fideliter
pugnam istam intelligis ; resiste ergo in-
desinenter, et Dominus erit tecum, teque
æternaliter pro victoria coronabit.

ENARRATIO IN EVANGELIUM

HOMO QUIDAM ERAT DIVES, QUI HABEBAT VILlicum. Luc. xvi, 1-9.

Philipp. ii,
7.

Baruch iii,
35, 36, 38.

SALVATOR in evangelio isto ad opera
misericordiæ nos hortatur, proponens
parabolam, ex qua quantum opera miseri-
cordiæ valeant ad salutem, ostenditur. Ita-
que, sicut in Luca scriptum est, Christus
dixit ad discipulos suos : *Homo quidam
erat dives*. Per hominem istum intelligitur
Christus, qui exinanivit semetipsum huma-
nam assumendo naturam, et propter homi-
num salutem factus est homo, juxta illud
Baruch : Qui fecit stellas, hic Deus noster
est ; et post hæc in terris visus est, et cum
hominibus conversatus est. Christus quo-
que secundum quod Deus, dives est opu-
lentia infinita, quoniam beatitudo et per-
fectio ejus immensa est : Patris namque

et Filii et Spiritus Sancti una est opulen-
tia, una plenitudo, una essentia, in qua
omnis nobilitas, omnis pulchritudo, omnis
gloria et potestas simplicissime contine-
tur. Denique Christus est æterna, increata
et infinita sapientia Patris. Et in libro Sa-
pientiæ habetur : Si divitiæ quæruntur,
quid sapientia locupletius ? Christus etiam
secundum quod homo, dives est et ditior
universis, quoniam omni creaturæ præla-
tus est (secundum quod dixit : Data est
mihi omnis potestas in cœlo et in terra),
fuitque summus sacerdos et omnium rex.
Et anima ejus, a suæ creationis principio,
ditissima ac perfectissima fuit in omni
gratia et virtute ac donis Spiritus Sancti :

I Cor. i, 24.

Sap. viii, 5.

Matth.
xxviii, 18.

imo in bonis gloriæ, quoniam Deo beatifice fruebatur, atque divinam clarissime indesinenter vidit essentiam. Nihilo minus Christus in exterioribus voluntariam paupertatem assumpsit (propter quod dixit : *Matth. viii, 20.* Filius hominis non habet ubi caput reclinet), quatenus ejus inopia corporali divites efficiamur opulentia spirituali.

Qui habebat villicum, id est dispensatorem. Quamvis autem villicus, villæ rector et custos proprie nuncupetur, hic tamen pro œconomo, id est procuratore seu dispensatore domus, accipitur. *Et hic diffamatus est apud illum*, scilicet Christum omnium judicem, quem latere nil potest. Porro diffamatio ista iniqui apud Deum seu Christum, fit variis modis ac multiplici testimonio. Primo, per ipsam infallibilem et omnia intuentem sapientiam Dei, qui per Jeremiam testatur : Ego sum testis et judex. Secundo, per angelos, qui zelo justitiæ opera hominum bona et mala coram Deo proponunt. Tertio, per dæmones, qui ex invidia faciunt hoc, quemadmodum *Zach. iii, 1.* in Zacharia patet de Satan, qui Jesu filio Josedec adversabatur per accusationem procacem. Quarto, per remorsum conscientiarum, juxta illud ad Romanos : Testimonium illis reddente conscientia ipsorum. Quinto, per evidentiam operum, sicut in Genesi Dominus ait ad Cain : Vox sanguinis fratris tui clamat ad me. Sexto, per querelam vicinorum atque egentium, secundum quod in Proverbiis legitur : Qui abscondunt frumentum in tempore, maledicentur; benedictio autem super caput vendentium. *Quasi dissipasset bona ipsius*, id est, inutiliter ea expendisset aut consumpsisset.

Per villicum istum intelligi potest quilibet homo, qui corpus et animam, et cuncta quæ habet, a Deo accepit, et eis ad Dei honorem uti tenetur, atque in bonis operibus eadem occupare. Præsertim aliorum prælatus seu princeps quicumque per hunc villicum designatur, qui sibi commissos bene regere obligatur, verbo et opere eos ædificando, temporalia quoque

A utiliter tenetur expendere et superflua in pios usus convertere. Exteriorum quippe bonorum dispensatores magis quam possessores aut domini homines sunt, utpote rationem daturi qualiter ea expenderint : ideo moderate et fructuose eis uti tenentur. Porro pretiosissima Dei bona sunt animæ rationales, Christi sanguine liberatæ : quas dissipat, qui falsis doctrinis, pravis exemplis aut negligentia eas ad vitia pertrahit aut trahi permittit, nec revocat, si ex officio ad hoc tenetur aut congrue posset : quod tanto sceleratius est apud Deum, quanto exterioribus rebus præstantiores sunt animæ immortales.

Et vocavit illum, id est Christus villicum illum. Hæc vocatio, non est illa qua quisque tempore mortis ad divinum vocatur judicium, quia post illam non est locus aut tempus poenitendi ac promerendi, sicut post istam de qua agitur modo. Ideirco vocatio ista est, qua quisque in vita hac divinitus admonetur per inspirationem divinam sive angelicam, seu allocutionem humanam, ut cogitet quam suo tempore rationem de omnibus Deo reddere possit. *Et ait illi : Quid hoc audio de te?* id est, cur ita te habuisti, quod mihi taliter accusaris? In quibus verbis instruuntur prælati in quatuor. Primo, ne subditorum peccata dissimulent, sed citius quo convenienter possunt ea corripiant et emendent. Secundo, ut veritatem famæ inquirent, nec statim omni credant spiritui, sed etiam audiant accusatum : nam ait, « Quid audio », etc.? Tertio, ne accusatores prodant : quia non ait, Ille, vel, Talis mihi hoc dixit; sed, « Audio ». Quarto, ut culpam de qua alius accusatur, specificent. Melius namque potest se homo corrigere, quum ei exprimitur in quo deliquit, aut excusare, si innocens est. Nam ait, « Quid hoc? » *Redde rationem villicationis tuæ*, id est, ad reddendum te præpara, atque conscientiam tuam examina qualiter in dispensatione tibi commissas te habuisti, ut valeas de omnibus reddere rationem. *Jam enim non poteris villicare*, id est, in proximo est ut

Matth. viii, 20.

Jer. xxix, 23.

Zach. iii, 1.

Rom. ii, 13.

Gen. iv, 10.

Prov. xi, 26.

Joann. iv, 1.

de hac vita tollaris, et rebus tibi concessis A ad meritum diutius uti non queas, quia post mortem non est tempus merendi. Ergo dum tempus habemus, operemur bonum ad omnes; sicut et Salomon hortatur: Quodcumque potest manus tua, instanter operare, quia nec opus, nec ratio, nec scientia erunt apud inferos, quo tu pro-
peras.

Ait autem villicus intra se, id est, provide cogitavit, atque consilium a propria ratione quæsivit, quid sibi in tanto esset agendum discrimine. Siquidem timor multos reducit ad meliora. Quid faciam? Potius cogitavit, Quid faciam, quam, Quid dicam, quoniam scivit quod apud justum ac infallibilem Judicem plus valeant opera bona quam verba ornata, dicente Apostolo: Non in sermone est regnum Dei. Quia dominus meus aufert a me villicationem, id est, comminatur quod statim me auferet de vita præsentis, ita quod amplius in rebus mihi ab eo concessis dominari ac promereri non potero: ideo nisi mihi modo providero, post mortem remedium non habebō. Fodere non valeo, id est, dura pœnitentiæ opera exercere non queo, multum abstinendo, peregrinando, me flagellando, in orationibus pernoctando. Mendicare erubesco, id est, ab aliis suffragia meritorum petere verecundor, nisi et ego ipse aliquid boni agam, et temporalia pro vitæ stipendio intercessoribus meis rependam.

Scio quid faciam, id est, ratio mea per evangelicæ legis doctrinam instructa, dictat mihi quid agere debeam, ut quum amotus fuero a villicatione, id est, per mortem ablatus fuero de hac vita, ita quod nec mihi, nec aliis præesse possim ad meritum, recipiant me hi quibus benefacere cogito, in domos suas, id est, meritis ac precibus pauperum salver, et in cœlesti regno suscipiar. Quod licet sit unum, pluraliter tamen ait, « in domos suas », quia in uno regno cœlesti diversæ sunt mansiones, hoc est diversi gradus præmiorum, juxta differentias meritorum. Et juxta di-

versos gradus meritorum, homines assumuntur ad diversos ordines angelorum. Propter quod asserit Filius Dei: In domo Patris mei mansiones multæ sunt. Joann. xiv, 2.

Convocatis itaque singulis debitoribus domini sui, id est religiosi ac indigentibus, qui quantumlibet justi sint, attamen debitores sunt Dei: vel propter sua peccata quotidiana ac venialia, pro quorum remissione orant, dicendo, Dimitte nobis debita nostra; vel quia pro acceptis beneficiis ac donis Dei servire et regratiari ei tenentur, nec Deo valent æquivalens unquam rependere. Dicebat primo: Quantum debes domino meo? At ille dixit: Centum cados olei. Cadus est amphora certæ quantitatis. Et possunt per centum cados olei omnia humanæ fragilitatis designari peccata: quia ut Jacobus loquitur, in multis offendimus omnes. Qui autem vult sibi a Deo ignosci, debet et aliis libenter ignoscere. Dixitque illi: Accipe cautionem tuam, id est chartam in qua ad cautelam describitur forma contractus seu debitum: quæ alio nomine chirographum appellatur. Sede cito, et scribe quinquaginta. Sicque mediam partem ei dimittit. Et ait, « cito », quia celeriter agenda sunt opera bona, præsertim misericordiæ opera. Quemadmodum enim hilarem, ita et celerem datorem diligit Deus. Propterea loquitur Augustinus: Et rem perdit et meritum, qui pauperem molesta mora suspendit. Hinc Salomon ait: Ne dicas, Vade, cras dabo tibi, quum hodie vel statim dare possis. Unde communiter dicitur: Qui cito dat, bis dat; nescit dare, qui dare tardat.

Deinde alio (secundum antiquam grammaticam), id est alteri, dixit: Tu vero quantum debes domino meo? Qui ait: Centum coros tritici. Corus hic sumitur pro mensura. Ait illi: Accipe litteras tuas, et scribe octoginta. Cur minus dimisit huic quam præcedenti? Respondetur, quoniam ille indigentior fuit; et item ad insinuandum quod abundantius debeamus indigentibus compati quam succurrere valeamus. Oleo namque compassio, tritico

Galat. vi, 10.

Eccle. ix, 10.

1 Cor. iv, 20.

Matth. vi, 12.

Jacob. iii, 2.

Tob. iv, 21.

1 Cor. ix, 7.

Prov. iii, 28.

autem subventio designatur. Vel ideo plus A dimisit primo, quia consideravit se magis posse juvari per illum.

Itaque ad hoc Christus istam adduxit parabolam, ut sciamus quod sicut dispensator qui de rebus domini sui fecit liberalitatem et pietatem, ab illis receptus est quibus benefecit; ita Christiani pro posse suo subvenire debent pauperibus, ut in regno suscipiantur cœlorum (de quo ait *Matth. v, 3.* Salvator : Beati pauperes spiritu, quoniam ipsorum est regnum cœlorum), quemadmodum ad Timotheum scribit Aposto- B lus : Divitibus hujus sæculi præcipe non sublime sapere, nec sperare in incerto divitiarum, sed facile tribuere et communicare.

I Tim. vi, 17, 18.

Et laudavit dominus villicum iniquitatis, id est dispensatorem istum injustum, qui et antea bona domini sui dissipavit, jamque de residuo furtum commisit, *quia prudenter egisset* : id est, non de furto eum laudavit, sed de provida provisione sui ipsius : quæ tamen non fuit vera prudentia, sed injustitia. Idcirco laudatio ejus non fuit absoluta laudatio, sed aliqualis. Multo magis Christus, qui nullum sustinet damnum, laudabit prælatos et universos qui subditis et indigentibus vere fuerint misericordes.

I Joann. iv, 5.

Joann. xvii, 9.

Quia filii hujus sæculi, id est amatores mundi, qui huic sæculo se conformant, et terrenis atque carnalibus rebus magis quam Deo inhærent : de quibus Joannes in epistola sua ait, Ipsi de mundo sunt, et de mundo loquuntur, et mundus eos audit. Tales ad Deum non pertinent, quum sint D servi ac membra diaboli, et frequenter mundi nomine exprimuntur. De quibus loquitur Christus Patri æterno : Non pro mundo rogo, sed pro his quos dedisti mihi de mundo, quia tui sunt. *Prudentiores,*

id est astutiores, *filiis lucis*, id est spiritualibus ac devotis hominibus, *in generatione sua* carnali, id est inter suos, *sunt*. Hoc dicitur, non quod iniquis vera insit prudentia, quæ est virtus, sed quia pro temporalibus acquirendis, conservandis seu expendendis, diligentiores, acutiores et agiliores sunt, quam viri boni pro spirituali profectu gratiæ ac virtutum : quum tamen spiritualia dona sint temporalibus rebus incomparabiliter meliora : unde et incomparabiliter plus laborandum esset pro eis.

Subinde Christus parabolam hanc ad propositum applicat. *Et ego dico vobis*, id est, doceo, hortor seu jubeo : *Facite vobis amicos de mammona iniquitatis*, id est, divitias seu bona terrena pauperibus misericorditer ac liberaliter communicando, acquirite vobis amicitias Dei atque Sanctorum, qui misericordes et liberales homines, non avaros et impios amant. Mammon Syriace est nomen dæmonis qui tentat homines de divitiis male acquirendis, cupide reservandis aut vitiose expendendis. Hinc « mammona » appellantur divitiæ. Quæ cur divitiæ iniquitatis dicantur, in sermone patebit. *Ut quum defeceritis a vita præsentis*, id est, obieritis : juxta illud Genesis, Deficiens Abraham mortuus est; *recipiant vos Deus et Sancti, in æterna tabernacula*, id est ad mansiones cœlestes : de quibus ait Propheta, Quam dilecta *Ps. lxxxiii,* tabernacula tua, Domine virtutum ! Quæ ^{2.} dicuntur æterna a parte post, non a parte ante. Vel, « quum defeceritis » a propriis meritis, ea non habendo seu per culpam amittendo, « recipiant vos », etc., id est, gratiam pœnitendi atque finaliter obtinendi vitam beatam vobis procurent precibus suis ac meritis pauperes sancti et boni, quibus per opera misericordiæ subvenistis aut complacuistis.

Gen. xxv, 8.

Ps. lxxxiii,

SERMO SECUNDUS

QUOMODO QUISQUE SUBSTANTIAM SIBI A DEO COMMISSAM, CORPUS VIDELICET ET ANIMAM,
ET QUIDQUID AD SE PERTINET, FIDELITER DISPENSABIT.

OMNES stabimus ante tribunal Christi. Rom. xiv, 10.

Deus omnipotens, præ ceteris creaturis inferioribus dicitur hominem ad imaginem et similitudinem suam creasse, quoniam dedit ei rationem liberumque arbitrium, ut per rationem se regat, compescat, et sapienter in cunctis se habeat, atque per liberum arbitrium sponte bonis adhæreat, peccatis resistat. Porro regere est rem ad suum finem dirigere. Finis autem hominis est æterna felicitas, utpote beatifica visio Dei: debet itaque homo se ipsum et omnia sua, cogitationes, affectiones, verba et opera, possessiones, et quidquid pertinet ad se, ordinare ad finem præfatum, quatenus per omnia ista juvetur ad obtinendum felicitatem æternam. Sic Deus fecit hominem unumquemque villicum suum, id est gubernatorem sui ipsius et rerum suarum, quatenus bene utatur corpore suo et anima, universisque membris corporis ac omnibus animæ viribus: hinc statim dum moritur homo, anima ejus ad tribunal Christi perducitur, ut judicetur ab eo qualiter gubernavit se et omnia sua.

Primo igitur debet quilibet Christianus bene regere proprium corpus, dando illi de necessariis vitæ quantum expedit animæ ad bene vivendum, ad complacendum Domino Deo, ad acquirendum æternam salutem. Qui ita non agit, sed corpore suo abutitur ad peccandum, et per membra corporis exercet peccata, per linguam vana, falsa, detractoria, impia verba loquendo, per oculos lascive et vage circumspiciendo, choreas, spectacula atque similia libenter cernendo, et ita de ceteris membris: hic talis dissipat substantiam Domi-

ni sui, videlicet proprium corpus, quoniam spiritualiter perimit illud, et aufert illud Creatori ac ejus obsequio, facitque illud membrum diaboli, et operibus tenebrarum mancipat illud. Quod potissimum faciunt qui gulæ, luxuriæ, rapinæ et ceteris impietatum operibus corpora sua præbent. Quocontra hortatur Apostolus: Non regnet peccatum in vestro mortali corpore, ut obediatis concupiscentiis ejus; sed neque exhibeatis membra vestra arma iniquitatis peccato, sed arma justitiæ Deo. Denique, quam diligenter et indesinenter debeat quisque membra sua custodire atque reprimere, ne per ea Deum creatorem offendant, constat ex hoc quod ait Salvator: Si oculus tuus scandalizat te, erue eum et projice abs te; et si manus tua aut pes tuus scandalizat te, abscide et projice abs te. Quod non est intelligendum de reali membrorum abscissione, sed de eorum repressione ab omni usu illicito.

Secundo unusquisque fidelis debet bene regere animam suam, interiores sensus et appetitum sensitivum rationi subdendo: potissimum sensum interiorem qui imaginativa vis nuncupatur, ab immundis et vanis ac inutilibus imaginationibus seu phantasmatis purgando ac præservando; sensum quoque interiorem qui vis cogitativa vocatur, ab immoderatis apprehensionibus et cogitationibus suppositorum ac materialium appenditiarum et circumstantiarum individualium mundando et custodiendo; insuper appetitum sensitivum tam concupiscibilem quam irascibilem coercendo, ne circa sua objecta, videlicet circa sensibilia bona aut mala, prospera vel adversa, moveatur aut afficiatur

Gen. i, 26,
27.

Rom. vi, 12,
13.

Matth.
xviii, 9, 8.

nisi secundum rectæ rationis iudicium, A quatenus de nulla re exteriori, temporali, sensibili homo delectetur aut contristetur, nisi prout ratio dietat : nec aliquam rem sensibilem seu carnalem desideremus, amemus, exspectemus, fugiamus, odiamus sive abhorreamus, nisi prout recta et prudens ratio iudicat. Verumtamen hujus contrarium agunt homines carnales, intemorati et insipientes, qui instar brutorum sensualitatem suam sequuntur, et visa aut apprehensa quacumque re carnali aut corporali delectabili aut utili, statim absque timore B Dei, et ratione contempta, appetunt eam, soloque cogitatu et affectu involvunt se peccatis gravissimis avaritiæ, luxuriæ, imo et adulterii ac sacrilegii. De quibus ait

Ps. xiii, 3. Propheta : Non est timor Dei ante oculos
Ps. lii, 2. eorum ; itemque, Corrupti sunt, et abominabiles facti sunt in iniquitatibus.

Præterea ratio et voluntas, quæ sunt supremæ potentiæ animæ, Deo sunt subji-
 ciendæ, angelicis quoque inspirationibus ecclesiasticisque præceptis, et omni salubri exhortationi ac informationi, correptioni et correctioni. Tunc autem ratio subditur Deo, quando juxta evangelicæ legis mandata et documenta se habet, credendo credendis et veritatibus acquiescendo, falsitatibus atque erroribus resistendo aut non consentiendo, carnales concupiscentias et ceteras animæ passiones, videlicet iram, tristitiam, dolorem, delectationem, cupiditatem, etc., vincendo, universaque inferiora sensibilia, imo se ipsam et hominem totum ad Deum, ad Dei honorem et gloriam jugiter ordinando. Insuper subdenda est ratio Deo, ut secundum quod possibile sibi est, occupetur et conquiescat immediate in eo, contemplando infinitam bonitatem, immensam pulchritudinem, sapientiam, omnipotentiam, beatitudinem, omnemque perfectionem, suavitatem, misericordiam, justitiam ac munificentiam Dei altissimi, supergloriosissimæ quoque Trinitatis mutuam intuitionem, mutuam dilectionem, complacentiam ac fruitionem, sed et emanationem ac communicationem

ejus ad intra, æternam et superbeatissimam consistentiam ejus. Horum contemplatio, magna est humanæ mentis perfectio, ad quam pertingere nequit, nisi a cogitationibus vanis et frivolis, ab inordinatis et infructuosis occupationibus ac studiis se expurget, sicut per Isaiam Dominus cohortatur : Auferte malum cogitationum vestrarum ab oculis meis. Unde et negligenti per Jeremiam increpatorie loquitur : Usquequo morabuntur in te cogitationes noxiæ? Imo per Michæam ait prophetam : Væ qui cogitatis inutile. Ecce quam necessaria est custodia mentis atque purgatio intellectus ab omni cogitatione turpi, infructuosa, perversa.

Præterea voluntas Deo subdenda est, ne sensualibus affectionibus inordinatisque motibus acquiescat, sed ordinate se habeat in amando : ita ut homo in primis toto corde super omnia incomparabiliter amet atque desideret Dominum Deum, deinde se ipsum in Deo, tertio proximum, quarto corpus proprium ; inferiora autem non amet nec cupiat inordinate, sed solum in quantum sunt necessaria sive utilia ad virtuose vivendum. Purganda ergo est voluntas ab omni malitia, ab omni affectione non bona, ut jugiter cupiat summo bono uniri et complacere, in omni virtute et gratia crescere, peccata semper cordialius detestari, odire ac fugere. Qui ita se habet, pretiosissimam Domini sui substantiam, utpote propriam animam et nobilissimas ejus vires, bene dispensat, fructuose expendit, salubriter regit. Porro qui carnalibus desideriis acquiescit, qui pravis et sordidis cogitationibus immoratur, qui quotidie addit peccata peccatis, iste tanquam infidelis et negligens villicus dissipat Domini sui substantiam, scilicet animam propriam summæ Trinitatis imagine decoratam et sanguine Christi redemptam, quam tradit dæmonibus constuprandam atque ab inferis glutiendam. O quanta est execratio, ingratitude, negligentia et perversitas hominis talis!

Præterea multi sunt quibus hæc tanta

infidelitas, pravitas et ingratitudo non sufficit, sed suggestione iniqua, pernicioso exemplo, fama scandalosa, vita publice vitiosa, aliorum animas trahunt ad mortem culpæ in præsentī, atque per hoc ad mortem infernalis miseriæ in futuro. Isti sunt odibilissimi Deo, cujus pretiosissimam substantiam tam sceleratissime dissipant, spiritualiterque annihilant, quia ut asserit Augustinus, Peccatum nihil est, et nihil fiunt homines peccando. Unde Apostolus protestatur : Qui se putat aliquid esse, quum nihil sit, ipse se seducit. In isto potissimum culpabiles sunt vitiosi prælati et principes negligentes, omnesque patresfamilias ac matresfamilias, qui suis domesticis ac aliis malum præbent exemplum, nec debitum sui implent officii. In observatione autem præcepti de correptione fraterna pene omnes inveniuntur damnaviter negligentes, quia secundum Christi doctrinam ac jussionem vix aliquis corripit proximum delinquentem : quod in præsentibus summe est damnavile.

Galat. vi, 3.

Postremo exteriora bona bene dispensare debemus, sobrie eis utendo, immoderatos sumptus in alimentis, vestimentis, habitaculis familiisque vitando, eleemosynas largas faciendo. Qui autem exteriora bona libidinose et vitiose consumit, substantiam Domini sui dissipare censetur : sicut de prodigo filio legitur, qui devoravit substantiam suam, cum meretricibus vivendo luxuriose. Sit igitur quilibet Christianus fidelis ad opera misericordiæ tam spiri-

Luc. xv, 13.

tualia quam corporalia pronus, quatenus post hanc vitam præsentem, requiem inveniat et sufficientiam ac provisionem æternam. Unde, ut dicitur, consuetudo fuit in quadam insula maris, quod habitatores ejus quolibet anno regem sibi fecerunt, quem anno impleto in exsilium transmisserunt. Contigit vero quemdam extraneum ad illam divertere regionem, qui consuetudinem ignoravit præactam ; feceruntque eum regem. Quo facto, quidam indicavit ei morem illius terræ. Tunc ille aurum et argentum, victualia copiosa et omnia necessaria eodem anno præmisit ad insulam in quam noverat se transmitendum : nam anno sui imperii ei nil cives sui negabant. Anno itaque evoluto in exsilium missus, invenit ibidem locum bene provisum ac locupletem. Sic quilibet pro posse nunc faciat. Nam insula in qua nunc per annum vivimus et regnamus, est mundus, in quo modico tempore, respectu æternitatis, consistimus. Deinde ad ignotam regionem deducimur ; et quidquid hic egimus, quidquid pauperibus propter Deum contulimus, illic invenimus. Opera enim hominum eos sequuntur, ut ait Joannes. In Ecclesiaste quoque scriptum est : Mitte panem tuum super transeuntes aquas (id est pauperes mendicantes), quia post multa tempora invenies illum. Hoc est quod ait Apostolus : Qui parce seminat, parce et metet ; et qui seminat in benedictionibus, de benedictionibus metet vitam æternam.

Apoc. xiv, 13.

Eccle. xi, 1.

II Cor. ix, 6.

SERMO TERTIUS

DE TEMPORALIUM RERUM PIA ET FIDELI DISPENSATIONE.

FACITE vobis amicos de mammona iniquitatis. *Luc. xvi, 9.*

Inter omnia bona vitæ præsentis, amicitia, seu verus et fidelis amicus, est quod-

dam præcipuum ac delectabile bonum, quemadmodum Ecclesiasticus asserit : Amicus fidelis, protectio fortis ; qui invenit illum, invenit thesaurum. Amico fideli

Eccle. vi, 14-16.

nulla est comparatio, et non est digna A ponderatio auri et argenti contra bonitatem fidei illius. Amicus fidelis, medicamentum vitæ et immortalitatis; et qui metuunt Dominum, inveniunt illum. Itaque, si tam bona et desiderabilis ac jucunda est amicitia hominum, incomparabiliter melior, desiderabilior atque jucundior est amicitia Dei, cujus tam infinita est pietas ac dignatio, quod homines fragiles ac mortales, sed virtuosos ac sapientes, dignatus est et dignatur vocare amicos. Unde per Isaiam locutus est : Semen Abraham amici mei. Psalmista quoque loquitur Deo : Mihi autem nimis honorati sunt amici tui, Deus. Christus etiam Deus et homo, ait : Jam non dicam vos servos, sed amicos.

Is. xli, 8.

Ps. cxxxviii, 17.

Joann. xv, 15.

Denique Christus in evangelio hodierno dat facile ac benignissimum documentum, qualiter unusquisque Christianus fieri possit Dei et angelorum sanctorum omniumque Beatorum ac devotorum amicus : « Facite », inquit, « vobis amicos de mammona iniquitatis », hoc est, divitias seu quæcumque bona terrena pauperibus pie ac liberaliter communicate, quia per hoc amicitiam Dei et Sanctorum ac pauperum devotorum acquiritis. Quum enim similitudo sit causa amoris et amicitiae ratio, constat quod Deus naturaliter pius, misericordissimus ac liberalissimus, diligat homines caritativos, misericordes ac liberales. Quum itaque ista terrena sint tam vilia, amicitia autem Dei et Sanctorum nobilissima, valde stultus et tenax est qui pro tanto bono adipiscendo non vult tam vilia pauperibus misericorditer erogare, et discrete secundum suæ facultatis mensuram communicare. Præterea Christus aliam tangit rationem cur debeant Christiani istud libenter peragere : quia videlicet per hoc cœlestium mansionum beatitudinem promerentur, dummodo ex caritate opera misericordiae faciant. Imo et quamvis in mortali sit culpa qui efficit ea, potest tamen contingere, et frequenter contingit, quod occasione operum pietatis quæ facit, gratiam

Dei et misericordiam consequatur, et potissimum per intercessionem et merita pauperum quibus succurrit.

Circa hæc considerandum est, qualiter homo ad amicitiam Dei perveniat. Respondendum, quod primo per divinorum observantiam præceptorum. Unde asserit Christus : Vos amici mei estis, si feceritis quæ ego præcipio vobis. Sicque universi Christifideles qui in statu salutis sunt, hoc est in caritate et gratia, amici Dei vocantur : nam diligunt Deum et diliguntur a

Joann. xv, 14.

B Deo, qui ait, Ego diligentes me diligo. Verumtamen iste est extensus et latus modus amicitiae Dei. Secundo igitur magis

Prov. viii, 17.

strictè et proprie dicitur homo pervenire ad amicitiam Dei per observantiam consiliorum evangelicæ legis, quæ ordinantur et tendunt ad hoc, ut homo perfecto ac sincerissimo corde diligat Deum, prout in præsentī vita fieri potest. Idcirco in prima sua Canonica ait Joannes : Qui servat verbum Christi, in eo caritas Dei perfecta est. Sicque veraciter religiosi et viri

1 Joann. ii, 5.

C heroici seu perfecti vocantur amici Dei, quoniam omnia vitant ac derelinquunt quorum occasione solent homines a perfectione et profectu divini amoris deficere, puta : divitias, feminas, omnesque carnaliter propinquos ac propriam voluntatem. Nihilo minus ex gratia speciali posset homo fieri vir heroicus et perfectus in statu sæculari ac conjugali, sicut et quidam fuerunt : quod tamen rarissime solet accidere.

Tertio pervenit homo ad amicitiam Dei per opera misericordiae, sicut in evangelio hodierno docet Salvator, jamque ostensum est. Quarto, per donum sapientiae, et per actus vitæ contemplativæ, qui sunt Deo intendere et vacare per speculationem divinorum, per meditationes devotas, per psalmodias et laudes alacres et sinceras, per orationes ferventes. Imo, quum homo in dono sapientiae multum profecerit, atque ad tertium ejus devenerit gradum, qui dicitur sapientia unitiva et mystica theologia, tunc est quasi secretarius et

consiliarius Dei, et carissimus ac familiaris eidem, ita ut cum Propheta dicere valeat Deo : Incerta et occulta sapientiæ tuæ manifestasti mihi. Unde et Aristoteles ait, quod vir contemplativus est amantissimus Deo. Sapiens quoque ait : Neminem diligit Deus nisi qui cum sapientia inhabitat. Et rursus ibidem de æterna et increata Sapientia fertur : Quum sit una, omnia potest; et per nationes in animas sanctas se transfert, amicos Dei et Prophetas constituit.

His itaque modis ac viis studeamus ad Dei amicitiam pertingere, quantum status uniuscujusque permittit. Hoc quippe certissimum est, quod quanto a privato amore, a carnali affectu, a temporalium desiderio magis recedimus, tanto plus ad Dei amicitiam propinquamus, quia ut asserit Augustinus : Caritatis venenum est cupiditas; diminutio autem cupiditatis est incrementum caritatis; nulla vero cupiditas, seu cupiditatis mera evulsio, est caritatis perfectio. In qua auctoritate cupiditas non sumitur pro avaritia, sed pro privato et improbo sui amore, vel pro inordinato affectu ad temporalia et caduca.

Deinceps videndum est, cur Salvator terrenas opes seu facultates vocat « mammona iniquitatis », quum tamen omnis creatura Dei sit bona, et divitiæ communiter bona hominum appellentur. Et respondendum, quod « mammona iniquitatis » vocantur, non quia in se malæ sint, sed quia multorum vitiorum occasio sunt, materia ac fomentum. Nam dives currit ad libitum, corrumpit ad illicitum. Hinc ad Timotheum scribit Apostolus : Qui volunt divites fieri, incidunt in tentationem et laqueum diaboli, et desideria multa, inutilia et nociva. Unde Chrysostomus : Divitiarum (inquit) sequela est luxuria, gula, ira immoderata, furor injustus, arrogantia, superbia, omnisque irrationalis motus.

Secunda ratio est, quia divitiæ communiter injuste acquiruntur, avare servantur, illicite expenduntur. Quo enim copiosius acquiruntur, eo avidius cupiuntur; nec satiant appetitum, sed inquietant, sollici-

tant atque ad plus acquirendum accendunt. Propter quod ait Bernardus : Qui pecuniam diligit, non satiatur; qui mundum diligit, non impletur. Nec libidinosus satiatur voluptate; sic et crudelis quisque sanguinem sitit. Ambiciosus quoque aut cupidus laudis humanæ, adeptis dignitatum titulis seu humanis favoribus, nullum inde capit remedium, sed desiderio æstuat ampliori. Minus autem invenit requiem, qui sibi ipsi placere cupit et suis. Deinceps ratio horum est, quoniam omnia bona creata sunt imperfecta : ideo eis adeptis, restat quod adhuc desideretur. Deus vero bonum est perfectum ac infinitum : hinc eo plene adepto, appetitus quiescit, nec restat quod cupiat. Hinc iterum dicit Bernardus : Ad imaginem Dei facta anima rationalis, ceteris omnibus occupari potest, repleti non potest; capacem etenim Dei, quidquid Deo minus est non implebit. Unde naturali desiderio quisquis probatur summum diligere bonum, nullam nisi eo adepto requiem habiturus.

Tertio divitiæ dicuntur « mammona iniquitatis », quasi inæqualitatis, quoniam inæqualiter possidentur. Itaque juxta Christi doctrinam, divitiæ istæ terrenæ spernendæ sunt, ita quod ultra quam necessariæ seu utiles sunt ad spiritualia charismata promerenda non desiderentur nec reserventur, sed pauperibus distribuantur, quoniam in divitiis abundantem valde difficile est salvari, ut constat ex præinductis. Ad quod insinuandum scriptum est in Ecclesiastico : Beatus dives qui inventus est sine macula, qui post aurum non abiit, nec speravit in pecunia et thesauris. Quis est hic? et laudabimus eum : fecit enim mirabilia in vita sua. Imo ipsemet Christus in Evangelio contestatur : Quam difficile qui pecunias habent, intrabunt in regnum cælorum ! Itaque qui divitias sibi accumulunt, quid aliud faciunt, nisi quod impedimenta salutis sibi multiplicant, mentemque suam gravioribus oneribus deprimunt? Idcirco ait Scriptura : Nihil iniquius quam amare pecuniam; avaro nihil scelestius,

Gen. 1, 26, 27.

Eccli. xxxi, 8, 9.

Luc. xviii, 24.

Eccli. x, 9, 10.

quoniam animam suam habet venalem. A

Luc. xvi, 8. Postremo, sicut in evangelio hodierno docet Filius Dei, filii hujus sæculi, videlicet homines carnales atque mundani, prudentiores sunt secundum suum modum, quam filii lucis, id est homines boni, juxta sensum in expositione textus præhabitu. Et de hoc quilibet Christianus merito verecundaretur gravissime, quod minus fervens, oculatus ac diligens est ad proficiendum in bonis gratiæ ac virtutum atque in meritis æternæ felicitatis, et ad complacendum Deo altissimo, quam homines B carnales atque mundani ad crescendum in temporalibus rebus, et ad placendum quibusdam hominibus. Unde ex his innotescit, quanta sit obscuratio, infectio, tarditas atque fragilitas mentis humanæ. Sed defleamus vitia et miseras animarum nostrarum, invocemusque jugiter viscera misericordiæ Dei nostri, ut corda nostra illuminare, accendere, roborare dignetur : ita

ut prorsus diligentiores, ferventiores acutioresque simus ad obtinendum bona spiritualia ac æterna, quam temporalia ac terrena. Tales utique olim multi verissime christiani fuerunt. Unde in Vitaspatrum describitur, quod divites quidam multam et copiosam pecuniam secum portaverunt in eremum, ut distribueretur Fratribus in eremo commorantibus. Pater vero eremitarum illorum dixit divitibus illis, quod Fratres non indigerent pecunia illa, quia de manuum suarum laboribus vivebant, nec acquiescerent capere illam pecuniam. Quumque divites multum rogarent Patrem illum ut aliquid Fratribus daret, posuit pecuniam in sporta ante ecclesiam, ut Fratres qui vellent, inde acciperent : et ecce nullus Fratrum inde accepit, imo vix adspexerunt. Talis quoque fuit præcipue sanctissimus pater Franciscus, et primi Fratres Ordinis ejus : imo nunc usque de gratia Dei nonnulli sunt tales.

AD RELIGIOSOS

SERMO QUARTUS

DE INORDINATIS AFFECTIONIBUS ET CARNALIBUS CONUPISCENTIIS ABJICIENDIS.

QUI se existimat stare, videat ne cadat. I Cor. x, 12.

I Cor. x, 6. Sanctus Apostolus in præsentī epistola multis nos instruit documentis. Primo, ne simus concupiscentes malorum, hoc est, ut inordinate affectiones et carnales concupiscentias abjiciamus, quemadmodum *Eccli. xviii, 30.* in Ecclesiastico scriptum est : Post concupiscentias tuas non eas, et a voluptate tua avertere. Sed quia hoc ipsum implere absque Dei gratia non valemus, juxta *Sap. viii, 21.* illud, Nemo potest esse continens nisi Deus det; idcirco cum sapiente illud in *Eccli. xxiii, 4-6.* Ecclesiastico exoremus : Domine pater et

C dominator vitæ meæ, extollentiam oculorum meorum ne dederis mihi, et omne desiderium pravum averte a me; aufer a me ventris concupiscentias. Itaque ad nihil terrenum ac transitorium inordinate afficiamur. Ideo namque (ut ait Bernardus) anima terrenis inhiat, quod minime cœlestia meditatur. Infelicitas in concupiscentia et cupiditate. Quid enim si forte alicui videtur in terrenarum affluentia rerum concupita prosperitas arridere? Eo ipso infelicior est anima, quo magis illa amplectitur. Et vide quanta vitia ex illa superfluitate et cupiditate nascuntur: hinc

etenim cæcitas cordis, hinc cervicosus furor animositatis, hinc suspicionis anxius labor, hinc livoris crudele tormentum, atque cremantis invidiæ miserabilis cruciatus. His verbis addit Bernardus : Novi homines satiatos hoc mundo, et ad omnem ejus memoriam nauseantes. Et facile est cuique nostrum hanc satietatem per gratiam Dei sentire : neque enim parit hoc copia, sed contemptus. Ex quo notabili verbo rite concluditur, quod quanto quis donis gratiæ et consolatione interna magis impletur, quo devotior spiritualiorque consistit, tanto de necessariis corpori facilius contentatur, et delicata atque superflua amplius aspernatur; quo autem frigidior mente et carnalior cœperit fieri, eo plus lauta et superflua appetit adipisci.

Denique, quam vitanda sit religiosis concupiscentia omnis carnalis, constat ex verbis S. Basilii, in cujus Regula movetur hæc quæstio : Si quis in corde suo cogitet de cibis, tamen deinde notet se ipsum et arguat, si et hic quasi cogitans de talibus C judicandus est? Ad quod respondet Basiliius : Si non id temporis est quo naturaliter cibos requirere famis necessitate commonemur, necesse est id esse vacuæ mentis indicium, et animæ affectum gerentis circa ista præsentia, et circa Dei voluntatem desidis ac remissæ. Proximam tamen habet Dei misericordiam, et pro hoc ipso quod se ipsam arguit, a crimine excusatur, si tamen de cetero vitet cogitationum Joann. v, 14. ruinas, memor Christi verbi dicentis : Ecce salvus factus es; jam noli peccare, ne tibi deterius contingat. Si autem id temporis est quo naturaliter de cibis appetendis commonemur, mens autem melioribus occupata, inferiora spernit ac despicit, non ratio ciborum notabilis, sed contemptus laudabilis invenitur. Quorum verborum est iste sensus : Si quis de cibo cogitet, fame eum ad hoc impellente, et nihilo minus mens occupata divinis aut spiritualibus actibus, cogitationem illam abjiciat, tunc ratio seu cogitatio illa ciborum non est

A notabilis, id est reprehensibilis, sed contemptus cogitationis hujusmodi exstat laudabilis.

Hinc ait et Climacus : Gaudet Judæus sabbato, et diem agit festivum; et gulosus monachus sabbato et dominica Pascha computat servus ventris, in quibus cibariis faciat dies festos; servus vero Dei cogitat in qualibus gratiis dives fiat. Mens jejunantis orat vigilanter et sobrie; mens autem non abstinens orat repleta idolis multis immundis. Qui suum ventrem fovet et nutrit, et contendit fornicationis spiritum vincere, similis est volenti cum oleo ignem extinguere. Tribulato ventre, humiliatur cor; eodem vero consolato, superbit cogitatio. Te ipsum palpa circa primam horam diei, et circa mediam, et circa extremam ante cibum : et ex hoc a te ipso disces utilitatem jejunii. Exsultat quidem mane cogitatio carnis; apprehendente sexta, deorsum modice inclinatur; ac circa solis occasum humiliatur in finem. Afflige ventrem, et os tuum claudes omnino : a multitudine namque ciborum lingua enervatur et relaxatur. Hæc Climacus.

Præterea, non solum inordinatam concupiscentiam circa cibum, potum, somnum, vestitum, sed et circa alia quæque sensibilia, refrenare ac repellere nos oportet, ut nihil creatum nisi in Deo et secundum Deum optemus.

Insuper docet nos Apostolus, ut non 1 Cor. x, 7. efficiamur idololatræ. Sed forsitan non arbitramur nobis necessariam admonitionem vitandi tam enorme ac apertissimum D scelus. Verumtamen agnoscamus non solum idololatræ appellari qui gentilium deos seu idola colunt, sed et omnes qui creaturis magis quam Creatori adhærent, qui contra Dei præceptum ad aliquid afficiuntur. Nam de gulosis ait Apostolus : Quorum deus venter est. Ideo quantum ad immoderatas creaturarum adhæSIONES seu affectiones appropinquamus, tantum huic spirituali idololatriæ propinqui efficimur. Imo si quis Deum amaret, non principaliter quia in se ipso bonus consistit, sed

Philipp. iii, 19.

solum aut principaliter in quantum bonus A est sibi, seu propter beneficia sua, ut sibi accommoda; iste non vere nec spiritualiter Deum diligeret, sed coleret semetipsum et esset quasi idololatra sui, quoniam plus amaret et honoraret se ipsum quam Deum, et præferret se Deo, se ipsum faciens sibi finem et Deum quasi medium ad se ipsum, atque per hoc Deo utens et se fruens, nec ad Deum se referens : quod totum perversum esset ac prorsus præposterum. Idecirco nos ipsos et omnia sapienter, frequenter et caute referamus ad Deum et ad ejus honorem, sicut ad summum ac ultimum finem, hoc summe et finaliter appetendo, ut Deus gloriosus, omnipotens et excelsus honoretur in omnibus a nobis et a ceteris universis; ipsumque Deum primo et principaliter ob suam puram et infinitam bonitatem sinceriter diligamus.

I Cor. x, 8. Amplius, monet Apostolus ne fornicemur. Quod rursus si de corporali fornicatione intelligatur, nobis non oportere dici forsitan censemus. Sed est spiritualis fornicatio, quæ est vitiosa mentis creatæ ad bonum commutabile et creatum adhæsiō, atque ipsius cum diabolo prava consensio et voluntatis communio. Sicque asserit Augustinus, quod omnis anima est vel Christi sponsa, ei per caritatem adhærendo, vel diaboli adultera, ei in pravis consensiendo. De qua fornicatione ait Deo *Ps. lxxii, 27.* Propheta : Ecce qui elongant se a te peribunt; perdidisti omnes qui fornicantur abs te. De qua habetur in *Osee : Fornicati sunt a Deo suo.* Unde et per Ezechielem *Osee iv, 12.* asserit Dominus : Contrivi cor eorum fornicans et recedens a me. Hanc igitur fornicationem, et omnem ad eam dispositionem et inchoationem penitus fugiamus, quatenus nullius creaturæ affectio caritatem nostram ad Deum minuat aut retardet :

quia ut ait Chrysostomus, Pro quanta parte cor tuum fuerit ad aliquam rem, pro tanto minus est ad Deum, videlicet, si affectio illa ad creaturam non ponatur sub ordine divini amoris. Idecirco, si nobis in divino Officio occupatis, et ibi forte præ solito laborantibus ac lassatis, suborta fuerit aliqua cogitatio de lauta refectione habenda, de colloquio aut spatiamenis, ut sic ex talium consideratione, affectu et spe consolemur atque inordinate delectemur, mox cum sancta indignatione B abjiciamus de corde imaginationem vilissimam, nec spiritualia ad corporalia referamus.

Præterea, monet Apostolus ne Christum *I Cor. x, 9.* tentemus, quærendo experimentum sapientiæ seu omnipotentia ejus : imo de providentia, bonitate, omnipotentia et fidelitate ipsius simus certissimi. Ideoque semper agamus melius nostrum et quod in nostris est viribus, ipsum jugiter invocantes, ei nos committentes, et in ipso immobiliter confidentes, certi quia ut *Sap. vi, 8; xii, 13; I Petr. v, 7.* testatur Scriptura, ipsi cura est de nobis, et quod diligat universa quæ fecit, nec relinquat finaliter sperantes in se, velitque homines omnes salvari. Nihilo minus *Sap. xi, 25. Eccli. ii, 11. I Tim. ii, 4.* simus semper solliciti ne peccemus; et qui se in caritate et gratia stare confidit, videat ne ex diabolica tentatione aut propria passione seu fragilitate dejiciatur et pereat : quia in medio laqueorum versamur, et diaboli tanquam latrunculi nostrum obsident iter. In ipso quoque mortis articulo seu in extremis adhuc gravissima *Prov. xxviii, 14. Eccli. xviii, 27.* imminet pugna. Ideo beatus homo qui semper est pavidus; et sapiens in omnibus metuit. Propter quod vana securitate aut negligentia nullatenus resolvamur, sed divinæ subventionis conservationem jugiter imploremus, et Omnipotentis auxilio incessabiliter innitamur.

SERMO QUINTUS

DE MURMURATIONE COMPESCENDA A BONIS RELIGIOSIS, ET TENTATIONUM UTILITATE.

TENTATIO vos non apprehendat nisi humana. I Cor. x, 13.

Præter documenta epistolæ hodiernæ in præcedenti tacta sermone, etiam nos hortatur Apostolus, ne murmuremus, quemadmodum filii Israel ingrati et indurati, contra Deum et Moysen frequenter murmuraverunt. Murmuratio equidem proprie dicta, ex ira et impatientia nasci videtur, quamvis interdum accipiat in bono : ut si qui ex zelo justitiæ, contra eos a quibus innocentes opprimi viderint, concorditer murmurent, sicut in Evangelio legitur, quod murmuratio multa fuit de Christo in turba. Quidam enim dicebant, Quia bonus est; alii dicebant, Non, sed seducit turbas. Quidquid ergo adversitatis acciderit nobis, quidquid reprehensionis et castigationis fuerit nobis inflicto, quidquid injuriæ contigerit nobis, iram, impatientiam, murmurationem quoque ex eis provenientem reprimamus et exstinguamus. Quod si interior fuerit orta commotio, non tamen sonet in ore murmuratio, nec in vultu appareat ulla turbatio, nec per signa interior passio in aliorum scandalum manifestetur, sed suffocetur potius in se ipsa. Itaque Dei providentiam omnia complectentem ac moderantem, sine qua nec folium arboris labitur, nec avicula cadit in terram, considerantes, cuncta adversa et aspera sine murmuratione æquanimiter toleremus, certi quod non sine ordinatione divina patimur talia pro nostris expiandis peccatis, vel pro donis gratiæ in hac vita augendis, et beatitudinis futuræ augmento, aut alia causa idonea justo ac sapientissimo Deo judici cognita, cui et gratias in talibus referre debemus.

Deinceps, primo et summe cavendum

est ne in infirmitatibus corporis aut quibuscumque adversis contra Deum altissimum murmuremus, illud Job reminiscentes : In omnibus his non peccavit Job labiis suis, nec stultum quid contra Deum locutus est. Et de Tobia sic legitur : Quum ab infantia sua timuerit Deum, non est contristatus quod plaga cæcitatis acciderit ei; sed immobilis in Dei timore permansit, gratias agens Deo omnibus diebus vitæ suæ. Nempe quam enorme sit contra Deum murmurare, pandit Augustinus, dicendo : De nulla re magis offendisse Deum populus ille Judaicus dictus est, quam contra Dominum murmurando.

Secundo cavendum ne contra Dei vicarios superiores nostros murmuremus, præsertim ob hoc quod ab eis exercitamur, corripimur sive corrigimur. Maxime autem in capitulo est cavendum ne quis quando corripitur, præsertim dure loquatur aut renitatur, aut murmurans indignetur. Sed huic obviare apparet quod super illud Job, Si adversum me terra mea clamat, scribit B. Gregorius : Adversus possessorem suum terra tunc clamat, quando contra pastorem suum populus juste murmurat. Et respondendum, quod in certis casibus populus potest et debet pastorem suum, si magnitudo culpæ suæ exegerit, suo superiori legitime accusare, et de ejus omissionibus et peccatis evidentibus quodammodo murmurare, sumendo (ut tactum est) murmurationem in bono, prout ex caritate justitiæque procedit : ut si pastor debitum sui officii circa subditos suos non impleat, in detrimentum salutis eorum, possunt pro salute sua de remedio cogitare ac providere; interim tamen prælatum suum æquanimiter ferant ac debite venerentur,

nec ex prava radice murmurent contra A eum. Ait namque Gregorius : Quisquis contra superpositam sibi potestatem murmurat, illum redarguit qui potestatem instituit ac donavit ; quisquis vero pro peccato suo corrigitur, eo ipso jam justus fieri inchoat, quo ferientis justitiam non accusat. Murmuratio quoque contra vicarios Dei redundat in Deum, sicut Christus ait præ-

Luc. x, 16. latis : Qui vos spernit, me spernit. Et Paulus Thessalonicensibus scribens : Qui hæc (inquit) spernit, non hominem spernit, sed Deum. Unde et Moyses quoque perversis B Israelitis dixit : Non contra nos est murmur vestrum, sed contra Dominum.

Tertio caveamus ne contra corripientes, accusantes seu proclamantes nos murmuramus, quum ipsi vulnera nostra nobis ostendant. Propter quod Salomon in Proverbiis loquitur : Viro qui corripientem dura cervice contemnit, repentinus superveniet interitus. Et iterum scriptum est : Vir sapiens non murmurabit correptus. Qui autem amat se in se, non in Deo, et cupit reputari ac metuit aspernari, corripientibus indignatur : et tamen miserabiliter excæcatus, sua indignatione, impatientia, murmuratione, multo contemptibiliorem se facit, maculamque incurrit. Qui si patienter et gratanter correptionem sustinisset, laude et honore dignus fuisset existimatus.

Quarto cavendum ne contra injuriantes murmuremus, quum dicat Salvator apud Matthæum : Beati estis quum maledixerint vobis homines, et persecuti vos fuerint ; gaudete, quoniam merces vestra copiosa D est in cœlis. Hinc ait Isidorus : Discat non murmurare qui mala patitur ; et si ignorat cur talia patiatur, per hoc se juste pati arbitretur, quia ab illo gubernatur ac judicatur cujus nunquam injusta existunt judicia. Verumtamen quidam frequenter tanto passionum replentur furore, ut contra insensata et inanimata irascantur, loquantur ac murmurent.

Amplius docet Apostolus, ut tentatio nos « non apprehendat », id est, non vincat et

capiat, « nisi humana », id est brevis, levis et transitoria, ut sunt primi motus, et inclinatio ad venialia, sine quibus agi non valet hæc vita. Et hoc ait Apostolus, non utique licentiando sive hortando ut venialiter peccemus, sed non vetando, gravioraque vitia prohibendo. Venialia quippe quamvis singula, non tamen omnia possunt vitari. Præterea, quum teste Scriptura, militia sit vita hominis super terram, simus semper ad pugnam contra tentamenta accincti, contra peccata armati, contra dæmonum tentationes atque insidias præparati, custodiendo cor nostrum, et oculos cordis semper habendo ad Dominum, ejus implorando auxilium.

Est quoque tentatio homini multipliciter utilis ac salubris, si legitime reluctetur. Propter quod asserit Augustinus : Vita nostra in hac peregrinatione esse non valet sine tentatione, quia profectus noster per tentationem nostram efficitur. Nec sibi quis innotescit, nisi tentatus ; nec potest coronari nisi vicerit, nec vincere nisi certaverit, nec certare nisi tentatores habuerit. Viriliter ergo, o homo, omni tentationi resiste. Nam Deus tuum novit conatum, tuam inspicit voluntatem, certamen tuum contra carnem ac dæmones intuetur ; hortatur ut pugnes, juvat ut vincas, deficientem sublevat, vincentem coronat. Deus universorum rector cum omni Sanctorum exercitu tuum inspectat ac præstolatur certamen, et tibi contra dæmones prælianti æternæ beatitudinis parat coronam. Denique, sicut diabolus specialiter tentat nos de peccatis ad quæ proniores nos esse considerat, sic et nos contra hujusmodi vitia singularius semper pugnemus, et ea radicitus extirpare nitamur. Pensemus quod loquitur Leo Papa : Non desinit hostis antiquus tentationum laqueos ubique prætere, ut quoquam modo virtutem fidelium queat corrumpere ; novit cui illecebras carnis ingerat, cui invidiæ virus infundat, quem mœrore conturbet, quem gaudio fallat, quem metu opprimat, quem admiratione seducat ; omnium dis-

Job vii, 1.

Deut. iv, 9.
Ps. xxiv, 15 ;
cxxii, 2.

Eccli.
xxxiv, 9.
II Tim. ii, 5.

Luc. x, 16.
I Thess. iv,
8.

Ezech. xvi,
8.

Prov. xxix,
1.

Eccli. x, 28.

Matth. v,
11, 12.

I Cor. x, 13.

cutit mores, ventilat curas, scrutatur affectus, et ibi quærit causas nocendi, ubi viderit quempiam diligentius occupari. At vero teste Bernardo, Viros perfectos quos diabolus per apertorum suggestionem malorum non potest dejicere, tentat, malum sub specie boni (nec mediocris boni, sed perfecti) proponendo ac persuadendo, decipere, ut cito consentiant qui magnopere diligunt bonum.

Quamvis autem fragiles simus, plurimum tamen nos consolatur sanctus Apostolus, dicendo : Fidelis Deus, qui non *I Cor. x, 13.* patietur vos tentari supra id quod potestis, sed faciet cum tentatione proventum, ut possitis sustinere. Ideo loquitur Augustinus : Tantum permittitur diabolus te tentare, quantum tibi prodest ut exercearis atque proberis, ut qui te ipsum nesciebas, a te ipso inveniaris. Et Prosper fatetur : Ad magnam utilitatem fidelium materia est reservata certaminum, ut non superbiat sanctitas dum pulsatur infirmitas. Confidamus ergo in Domino, qui etiam *Hebr. i, 14.* unicuique angelum sanctum deputavit in custodem ac adiutorem, per quem malignorum insultum crudelitatemque hostium reprimat, et de multiplici auxilio nobis providit, ita quod plures ac fortiores sunt

A pro nobis quam contra nos. Nihilo minus simus semper solliciti, jugiter custoditi; et minora ac quotidiana fugiamus peccata, ne per illa introeat hostis et trahat ad graviora. Vereamur semper Deum offendere, ne ejus destituti subsidio, tentationibus superemur. Verecundemur quoque, coram angelis sanctis custodibus nostris negligenter et viliter nos habere; timeamus eorum venerandos adspectus inhonorare. Sed strenue resistamus tentationibus mundi et carnis ac dæmonum universis; et quo acutius impugnamur, eo ferventius renitamur, nos ipsos in omnibus humiliando, in terram coram Deo humillime prosternendo, pectus tundendo, lacrimis faciem irrigando, Dei in primis, deinde Virginis gloriosæ et Sanctorum omnium, ac specialium patronorum priorumque angelorum auxilium fidelissime ac instantissime implorando, passionem dominicam recolentes, quatuor novissima meditantes, omnem otiositatem vitantes, ac virtuosius insistentes operibus, præsertim caritatis, humilitatis, patientiæ, intendentes exercitiis sacris; quam periculosum, fœdum ac vile sit superari, quam gloriosum, nobile et præclarum sit superare, rite pensantes.

SERMO SEXTUS

QUOMODO RELIGIOSI IN OMNIBUS SECUNDUM RATIONEM SE REGERE,
ET SENSUALITATEM REFRENARE DEBENT.

REDDE rationem villicationis tuæ. *D* *Luc. xvi, 2.*

Dominus et Salvator noster, in hodierno evangelio, per similitudinem seu parabolam quamdam ad opera misericordiæ nos invitat; et quantum ad obtinendum beatitudinem hujusmodi valeant opera, pandit *Luc. xvi, 1.* dicendo : Homo quidam erat dives, qui habebat villicum; et hic diffamatus est

apud illum quasi dissipasset bona illius. Per hunc hominem intelligitur Christus, in unitate personæ Deus et homo existens; per villicum vero intelligitur proprie omnis prælatus. Qui si scandalose negligenterque agat, substantiam Domini sui dissipat, quoniam oves Christi sanguine liberatas sibi commissas, spiritualiter, quantum in se est, perimit ac disperdit.

Eccli. xv,
14, 15, 17.

Rom. xii, 1.

Jacob. ii, 10.

Eccle. vii,
19.
Eccle. xix,
1.

crimen: sic unum veniale non emendatum A disponit ad aliud etiam majus ipso; frequentia vero venialium ad mortale inducit.

Jer. x, 23.

Præterea, quia non est in homine via ejus, nec viri est ut ambulet et dirigat gressus suos, ideo indesinenter Dominum deprecemur ut ipse nos in omnibus dignetur dirigere, intellectum instruere, voluntatem afficere, inclinare, et quocumque sibi placuerit vertere, sensum omnem ac sensualitatem rationi subicere, et rationem sibi in cunctis obedientem facere et subjectam. Et istud a Deo postulare ac impetrare, præsentibus summe necessarium esse cognoscitur, præsertim quum Gregorius Nazianzenus testetur: Revera mihi videtur esse ars artium et disciplina disciplinarum, regere hominem, qui certe inter omnia animantia est maxime moribus varius et voluntate diversus. Sic igitur quilibet regat in cunctis se ipsum. Visum refrenet, ne sibi hauriat vanitates, distractiones, risus, displicentias, perturbationes, potissime in divinis: nam et sæculares scandalizantur in religiosis visu incustoditis; nec dubium quin visus incustoditus, incustoditæ et indevotæ mentis sit signum. Refrenemus quoque auditum, ne linguam detrahentem, discordiam seminantem, sermones aliorum repetentem, vana et frivola, scurrilia et in risum moventia verba proferentem audiamus. Sic et tactum a libidinoso contactu, gustum a delectatione carnali, odoratum interioresque sensus coerceamus. Corpora nostra faciamus animabus nostris in omnibus prompte obsequi D ac parere, in jejuniis, vigiliis, abstinentiis, disciplinis, in orationibus, psalmodiis, et omni religioso labore. Rationem et voluntatem Deo et sanctæ religioni in cunctis

subdamus. Et quoniam ratio et voluntas sunt vires spirituales et immateriales, quæ super se ipsas ac proprios actus, et super alterutram reflectuntur: ideo ratio secundum Scripturas et regulam sibi præfixam regat se ipsam ac voluntatem; voluntas quoque per caritatem informata tendat semper in Deum, et moveat rationem ad sancta, cunctisque virtutibus imperet, ut ad caritatis finem et incrementum omnia fiant.

Postremo, quoniam tota evangelica ista B parabola ad commendationem operum misericordiæ et ad exhortationem talium tendit ac ordinatur, ideo juxta Christi doctrinam pii et misericordes in omnibus *Luc. vi, 36.* simus; tantoque abundantius spiritualia misericordiæ opera exerceamus, quanto corporalia minus implere valemus; et quod effectu non possumus, suppleamus ac faciamus affectu. Simus in omnibus intime compassivi; facillime ignoscamus; omnis crudelitas, amaritudo, iracundia, perturbatio longissime sit a nobis; visceribus *Ephes. iv, 31.* caritatis et pietatis exuberemus; alter alterius onera supportemus; lapsis compatiatur, mœstos pro viribus consolemur; et unusquisque gratiam sibi concessam *Coloss. iii, 12.* confratribus toto affectu communicet. Pro *Galat. vi, 2.* communi bono Ecclesiæ, pro reformatione universali, pro infidelium conversione, fidelium emendatione, pro universorum salute, pro toto conventu, specialiter pro præsentibus, pro vivis et mortuis, pro universis propinquis, commissis et benefactoribus, præcipue pro parentibus, quibus æquivalens reddere non valemus, indesinenter, fervidissime, devotissime exoremus Dominum Deum nostrum laudabilem, *I Petr. iv, 10.* gloriosum et superexaltatum. Cui honor et gloria per omnia sæcula sæculorum. Amen. *Dan. iii, 52 et seq.*

DOMINICA X POST TRINITATEM

ENARRATIO IN EPISTOLAM

SCITIS QUONIAM QUUM GENTES ESSETIS, AD SIMULACRA MUTA, ETC. I Cor. XII, 2-11.

APOSTOLUS in præsentī epistola informat fideles de supernaturalibus donis tam gratiæ gratum facientis, quam gratiæ gratis datæ. Specialiter tamen nunc loquitur de donis gratiæ gratis datæ; et ait : *Scitis quoniam quum gentes essetis*, hoc est, memoria retinetis quod quum adhuc in gentilitate infideliter vixistis, eratis *ad simulacra muta*, id est idola insensata : de quibus ait Psalmista, Os habent, et non loquuntur; *prout ducebamini* a suggestionē diaboli, aut consuetudine prava, vel persuasionē humana, *euntes*, ad colendum ea in fanis.

Ideo, ut scilicet illud vitium vitetis de cetero, *notum vobis facio* per istam epistolam, *quod nemo in Spiritu Dei*, id est in Spiritu Sancto, seu ex caritate, et gratia ac motione Spiritus Sancti, *loquens* corde, vel ore, aut etiam opere, *dicit anathema Jesu*, hoc est blasphemiam, aut quodcumque mortale peccatum separativum a Christo. Anathema enim separationem designat. Hoc dicit Apostolus, ad innuendum quod per gratiam Dei, et non aliter, vitat homo peccata mortalia. *Et nemo potest dicere, Dominus Jesus*, id est Jesum Christum cum debita cordis attentione et affectione exprimere, seu eum veraciter suum Dominum appellare, *nisi in Spiritu Sancto*, hoc est ex gratia gratum faciente et motione Spiritus Sancti. Talis enim expressio Domini Jesu, quum sit oris confessio et actio meritoria, procedit ex caritate et

A fide formata. Nec obstat quod loquitur Christus, Non omnis qui dicit mihi, Domine, Domine, intrabit in regnum cœlorum : quia hoc intelligendum est de prolotione infirmi et nuda, cui nec caritas, nec operatio consonat. Apostolus autem vult dicere, quod non possumus aliquid meritorie cogitare, vel loqui aut operari, nisi per gratiam gratum facientem et motionem Spiritus Sancti, sicut et alibi dicit : Non sumus sufficientes cogitare aliquid a nobis quasi ex nobis, sed sufficientia nostra ex Deo est. Unde apud Osee Dominus protestatur : Perditio tua ex te; in me tantummodo auxilium tuum.

Declarata necessitate et efficacia gratiæ gratum facientis, tractat Apostolus de gratiis gratis datis.

Et pro intelligentia dicendorum sciendum, quia ut Thomas in secunda secundæ prosequitur, triplex assignatur differentia hominum, quantum ad actus et habitus animæ rationalis. Prima est secundum diversitatem gratiarum gratis datarum. Nam alii datur gratia prophetiæ, alii gratia sanitatum, alii sermo sapientiæ, alii sermo scientiæ, sicut patebit. Secunda differentia est penes diversitatem officiorum ac statuum. Quibusdam etenim datum est officium apostolatus, aliis officium sacerdotii. Tertia est secundum diversitatem vitæ et operationum. Aliqui namque sunt contemplativi, alii vero activi. — Porro duplex est gratia, utpote : gratia gratum faciens,

Ps. CXLIII, 5,
sec. Hebr.;
CXXXIV, 16.

Matth. VII,
21.

II Cor. III, 5.

Osee XIII, 9.

quæ datur principaliter propter salutem A
ejus cui confertur; et gratis data, quæ
principaliter datur et ordinatur ad alio-
rum salutem, quia per hanc unus coope-
ratur saluti alterius, ut patet de prophetia
et apostolatu, quæ sunt gratiæ gratis da-
tæ, et ad utilitatem atque salutem Eccle-
siæ ordinatæ ac datæ: quia ut ait Aposto-
lus, quæ a Deo sunt, ordinata sunt. Ordo
autem consistit in hoc, quod unus per
alium ad Deum reducitur, prout divinus
Dionysius protestatur. — Ad hanc quoque
utilitatem aliis impertiendam tria sunt ne-
cessaria. Primum est, facultas exercendi
actum aliis utilem, ut est donum lingua-
rum, gratia miraculorum; secundum est,
auctoritas exercendi hujusmodi actum, ut
apostolatus; tertium est, exsecutio operum.

Quantum ad primum istorum, dicit Apo-
stolus: *Divisiones vero gratiarum sunt*,
hoc est, gratiæ gratis datæ (de quibus
nunc agitur) sunt diversæ atque distinctæ,
idem autem Spiritus, id est, Spiritus San-
ctus, dator gratiarum istarum, est unus et
idem. Quantum ad secundum, subjungi-
tur: *Et divisiones ministrationum sunt*,
hoc est, officia seu ministeria ecclesiasti-
carum personarum sunt varia et distincta,
idem autem Dominus Deus omnipotens, in-
stitutor et distributor officiorum istorum. *Et*
divisiones operationum sunt, id est, di-
versæ sunt exsecutiones et actiones offi-
ciorum istorum, et inter illas una est di-
gnior alia, secundum quod unum officium
est altius alio. *Idem vero Deus qui opera-*
tur mediate vel immediate omnia in om-
nibus, reddendo singula singulis, hoc est,
in unoquoque operatur id quod fit in eo.
Quod enim est causa causæ, est causa cau-
sati: imo effectus causæ secundæ, magis
adscribendus est causæ primæ quam cau-
sæ secundæ, sicut in prima propositione
libri de Causis atque in Elementatione
theologica Procli Platonici demonstratur.
Unde et Christus ait: Pater meus usque
modo operatur. Non autem operatur Deus
omnia in omnibus tanquam sit forma in-
formans et esse intrinsecum omnium re-

rum, sicut aliqui putaverunt, sed sicut
causa efficiens et finalis, cujus virtute et
desiderio operatur omnis causa secunda.

Unicuique autem datur manifestatio
Spiritus, id est, gratia gratis data confer-
tur unicuique cui confertur, *ad utilita-*
tem, id est ad aliorum commodum et pro-
fectum. Deus namque dat beneficiorum
suorum talenta, ut expendantur utiliter,
non ut abscondantur ignaviter. Propter
quod princeps Apostolorum hortatur: Unus-
quisque sicut accepit gratiam, in alteru-
trum illam administrantes. Christus quo-
que in Evangelio: *Negotiamini* (ait) dum
venio. Præterea gratia gratis data vocatur
manifestatio Spiritus, id est donum quo
manifestatur præsentia Spiritus Sancti, non
quod talis gratia semper conjuncta sit ca-
ritati, per quam Deus habitat in electis;
imo gratiæ gratis datæ communes sunt
bonis et malis, electis et reprobis: nam
et Balaam fuit propheta, et Judas traditor
apostolus. Unde et Christus fatetur: Multi
dicent mihi in die illa, Domine, Domine,
nonne in nomine tuo prophetavimus, et in
nomine tuo dæmonia ejecimus, etc.? Sed
dicitur gratia ista manifestatio Spiritus,
quia frequentius signum est divinæ inha-
bitationis per caritatem, et quoniam sem-
per ostendit virtutem divinam per dona
taliter principaliter operantem.

Subinde enumerantur gratiæ gratis da-
tæ. *Alii quidem datur per Spiritum*, id
est a Spiritu Sancto, *sermo sapientiæ*, id
est sapientia aliis sermocinandi, videlicet
cognitio divinorum seu notitia Scriptura-
rum. *Alii autem datur sermo scientiæ*, id
est scientia rerum humanarum et creatu-
rarum: per quas declarantur divina, quo-
niam invisibilia Dei per ea quæ facta sunt
cognoscuntur. Unde, secundum Augusti-
num, Cognitio proprietatum naturalium
rerum reserat abdita Scripturarum. Nem-
pe ad intelligendum qualiter Christus sit
leo, agnus, lapis et vitis, oportet rerum
illarum proprietates cognoscere. *Secun-*
dum eundem Spiritum, id est secundum
beneplacitum et influxum ejusdem Spiri-

Rom. XIII, 1.

De Cælest.
hier. c. VIII.

I Petr. IV,
10.

Luc. XIX, 13.

Num. XXII,
8 et seq.;
Joann. VI,
71, 72.
Matth. VII,
22.

Rom. I, 20.

Joann. V,
17.

tus Sancti, et non secundum aut propter A
merita hominum. Exprimit autem Aposto-
lus hæc duo dona gratis data, præmittendo
sermonem : primo, ad insinuandum quod
dantur ad aliorum instructionem ; secun-
do, ad innuendum quod non solum habi-
tualis notitia, sed etiam ejus actus, seu
usus et ordinata expressio, sit a Deo. Pro-
pter quod ait Salvator : Ego dabo vobis os
et sapientiam, cui non poterunt resistere
omnes adversarii vestri. Denique sapientia
et scientia ista realiter distinguuntur a sa-
pientia et scientia quæ sunt de numero B
septem donorum Spiritus Sancti : quoni-
am illæ haberi non possunt sine caritate
et gratia gratum faciente ; sed istæ com-
munes sunt bonis malisque. Unde sapien-
tia et scientia quæ sunt gratiæ gratis datæ,
præsertim sunt illæ notitiæ per quas fides
catholica defensatur, persuadetur ac de-
claratur.

Luc. XXI, 15.

Is. XI, 2.

Alteri datur fides, id est præcipua cer-
titudo de veritate credendorum, potissi-
mum articulorum fidei, qui in Scripturis
quasi principia præsupponuntur (itaque
fides non sumitur hic, prout est theologica
virtus), *in eodem Spiritu*, id est virtute
ejusdem Spiritus Sancti. *Alii datur gratia
sanitatum*, id est virtus curandi infirmos
supernaturaliter, *in uno Spiritu*, id est a
Spiritu Sancto, qui in se ipso unus et sim-
plex est, quamvis in donis sit multiplex.
Alii datur operatio virtutum, id est ma-
gnorum miraculorum, facultatem naturæ
omnino excedentium, ut est suscitatio mor-
tuum, et statio ac retrocessio solis. *Alii
prophetia*, id est cognitio futurorum con-
tingentium certa. *Alii discretio spirituum*,
id est discreta cognitio seu rectum judicii-

um de iis quæ in animo aliorum versan-
tur, aut ab eis proferuntur, ut Spiritu San-
cto illustrante sciat unus secreta cordis
alterius, et quo animo quid dicatur. Potest
quoque intelligi de gratia discernendi in-
ter spiritum bonum et malum, id est inter
angelum et diabolum apparentem, ne fal-
latur quis a Satana sub specie angeli ap-
parente, seu mala sub specie boni sugge-
rente. Hæc discretio prorsus necessaria est
iis quibus revelationes visionesque fiunt,
ne seducantur. *Alii dantur genera lingua-
rum*, id est diversa idiomata, seu facultas
utendi diversis loquelis. *Alii datur inter-
pretatio sermonum*, id est expositio alie-
norum idiomatum, seu difficilium sen-
suum, aut prophetalium visionum. Harum
gratiarum sufficientiam ponunt doctores,
quam et super epistolas Pauli induxi ; sed
nunc brevitati studens, prætermitto.

Cf. I. XIII,
p. 184 B' et s.

Hæc autem omnia operatur, id est, cun-
cta dona prædicta causat in nobis, *unus
atque idem Spiritus Sanctus, dividens sin-
gulis prout vult*, id est, unicuique libere
donans quantum ei placet. Ex quo constat
quod Spiritus Sanctus sit verus Deus, di-
vina et increata auctoritate potestateque
agens.

Postremo, quamvis hæc omnia adscri-
bantur Spiritui Sancto, non tamen putan-
dum est quod ab eo dumtaxat donentur,
quum opera superbeatissimæ Trinitatis
sint indivisa, quoniam trium Personarum
est una essentia et una potentia. Sed per
appropriationem attribuuntur hæc Spiri-
tui Sancto, quoniam ei appropriantur bo-
nitas, caritas ac liberalitas, ad quas proprie
pertinet se communicare, bona conferre,
alteri dare.

D

SERMO PRIMUS

DE ORNATU ECCLESIAE MEMBRORUMQUE IPSIUS, ET DE CERTITUDINE FIDEI CHRISTIANÆ.

DEUS operatur omnia in omnibus. *I Cor. xii, 6.*

In præsentī epistola docet nos sanctus Apostolus, quanta sit bonitas ac liberalitas Dei, quanta etiam sit defectuositas atque impotentia hominis. Bonitatem liberalitatemque Dei ostendit Apostolus, per hoc quod tanta gratiarum charismata tam copiose ac sapienter dedit hominibus; defectuositatem vero ac impotentiam hominum monstrat, per hoc quod absque speciali subsidio Spiritus Sancti nil boni valemus. Itaque ex consideratione bonitatis et munificentiae Dei, divino accendamus amore, atque ad præcordialem Dei honorificentiam provocemur, juxta illud Ecclesiastici: Diligite Dominum, et illuminabuntur corda vestra. Ex consideratione vero propriæ defectuositatis et impotentiae, humiliemus nos ipsos, et Divinitatis auxilium gratiosum jugiter imploremus, cum Psalmista orantes: Miserere mei, Domine, quoniam infirmus sum.

Eccli. ii, 10.

Ps. vi, 3.

Primo ergo docet nos beatus Apostolus *I Cor. xii, 3.* in hodierna epistola, quod absque speciali, supernaturali ac gratioso juvamine Spiritus Sancti nil bonum ac meritorium valeamus cogitare, loqui aut agere, sicut et alibi protestatur: Deus est qui operatur in vobis et velle et perficere. Porro ratio hujus est, quoniam ad supernaturalem beatitudinem, quæ est visio Dei clara per speciem, conditi sumus. Idcirco ad eam non nisi per supernaturalia media, quæ sunt virtutes et dona, eorumque opera, pertinere possumus: nam media proportionari oportet fini. Nec solum indigemus virtutibus et donis infusis, sed etiam actuali motione Spiritus Sancti in omni meritorio actu, mentem nostram ad actum merito-

Philipp. ii, 13.

rium excitantis. Ecce quanta est indigentia atque infirmitas mentis humanæ. Unde igitur superbimus? Cur extollimus nosmetipsos? Cur miser homo putat se aliquid esse? Nunquam itaque de propriis viribus præsumamus, neque inaniter gloriemur, nec aliquid boni nobis attribuamus. Nec aliquis jaetet se ipsum, quum dicat Apostolus: Quid habes quod non accepisti? Si *I Cor. iv, 7.* autem accepisti, quid gloriaris quasi non acceperis? Hinc iterum ait: Soli Deo honor et gloria. Hinc asserit Leo Papa: Dubium non est unumquemque a Deo habere operis boni initium et consummationem. Omni itaque hora, Dei auxilium invocemus, cum Propheta dicentes: Deus, in *Ps. lxin, 2.* adjutorium meum intende; Domine, ad adjuvandum me festina. Itemque: Cito anticipent nos misericordiæ tuæ, quia pauperes facti sumus nimis. Subinde, ut ita a Deo mereamur juvari, proni semper et alacres simus ad subveniendum proximis indigentibus et infirmis: quia ut asserit Augustinus, Justum consilium est, ut qui se a potentiori vult juvari, adjuvet infirmiore, in quo est ipse potentior.

I Tim. i, 17.

I Tim. i, 17.

Ps. lxin, 2.

Ps. lxxviii, 8.

Ps. lxxviii, 8.

Secundo docet Apostolus, qualiter Christus spiritualiter decoravit Ecclesiam militantem, et pulcherrime ordinavit, per diversa ac præclarissima gratiæ dona, et per diversa officia, per ministros in sacris ordinibus constitutos, per principes et prælatos. Nam quosdam fecit Apostolos, *I Cor. xii, 4-11.* quosdam Prophetas, nonnullos doctores, *Ephes. iv, 11.* aliquos quoque pastores. Et usque in præsens diversi fideles variis gratiis adornantur; atque ut sidera cælum, sic ipsi ornant Ecclesiam.

I Cor. xii, 4 et seq.

Tertio docet Apostolus, ut unusquisque gratiam sibi a Deo misericorditer datam, *I Petr. iv, 10.*

caritative communicet proximis. Idecirco A
 qui doctior, sapientior, in virtutibus for-
 tior, in exercitio vitæ spiritualis ac tenta-
 tionum expertior exstat, alium amorose
 informet, consilio juvet, in bonis confortet
 et pie supportet, atque in tentationibus
 qualiter reluctari et habere se debet, do-
 cere non negligat. Hinc quippe ad Galatas
 ait Apostolus : Fratres, etsi præoccupatus
 fuerit homo in aliquo delicto, vos qui spi-
 rituales estis, hujusmodi instruite in spi-
 ritu lenitatis, considerans te ipsum, ne et
 tu tenteris; alter alterius onera portate : B
 ergo dum tempus habemus, operemur bo-
 num ad omnes. Magnum et Deo gratissi-
 mum est, proximos pie et humiliter infor-
 mare, lapsos pro posse erigere, peccantes
 discrete corripere. Idecirco Danieli Gabriel
 angelus contestatur : Qui ad justitiam eru-
 diunt plurimos, quasi stellæ fulgebunt in
 perpetuas æternitates. Jacobus quoque scri-
 bit : Qui converti fecerit peccatorem ab
 errore viæ suæ, salvabit animam ejus a
 morte, et operiet multitudinem peccato-
 rum. In Ecclesiastico etiam legitur : Cor-
 ripe amicum, ne forte non intellexerit, et
 dicat, Non feci; aut si fecerit, ne iterum
 addat facere.

Quarto docet Apostolus, quanta sit cer-
 titudo et firmitas fidei christianæ, quæ a
 Deo tam multiplex habet testimonium ve-
 ritatis, quæ tot est confirmata miraculis, tot
 approbata prodigiis, utpote gratia sanita-
 tum, operatione virtutum, dono prophetiæ,
 genere linguarum, discretionem spirituum.
 Unde ad Hebræos inducitur : Abundantius
 nos oportet observare ea quæ audivimus, D
 ne forte pereffluamus : quomodo enim
 effugiemus, si tantam neglexerimus salu-
 tem, id est tam salutarem Christi doctri-
 nam, quæ in nos confirmata est, testan-
 te Deo signis, et portentis, et virtutibus, et
 Spiritus Sancti distributionibus? Hoc est
 enim quod in Evangelio legitur : Illi au-
 tem (puta Apostoli) profecti prædicaverunt
 ubique, Domino cooperante, et sermonem
 confirmante sequentibus signis.

Postremo de gratia discretionis spiri-

tuum dicunt sancti Patres atque doctores,
 quod quando spiritus vel angelus bonus
 apparet, quamvis in principio suæ appari-
 tionis terreat hominem cui apparet, tamen
 mox confortat et consolatur eundem, de-
 pellens formidinem, et tranquillitatem il-
 luminationemque ingerens; sed dæmone
 in specie angeli apparente, timor incussus
 perseverat, nec mentis recedit (imo magis
 augetur) turbatio. Per hoc igitur discerni
 potest unus ab alio. Unde aliqui magni do-
 ctiores quærunt: Si diabolus alicui appareat
 in specie Christi, jubeatque se adorari, et
 homo putans quod Christus sit, illum ado-
 ret, an peccet? Ad quod respondent quod
 imo, quia incaute se habet. Non enim sta-
 tim credendum est spiritui apparenti; sed
 homo cui apparet, primo debet se ad Deum
 convertere, et eum orare ut sibi inspirare
 seu revelare dignetur quod verum est, an
 sit illusio aliqua: tuncque piissimus Deus
 in tanta necessitate non deseret hominem.

Legitur quod diabolus interdum appa-
 ruit viris sanctissimis, puta Martino, Anto-
 nio, Apollonio, etc., in specie Christi, et
 jussit se adorari ab illis. Sed illi discretio-
 ne spirituum radiantes, falli non potue-
 runt, quia non statim credebant; sed deli-
 beratione præmissa, intellexerunt dolum
 et increpaverunt diabolum, qui protinus
 fugit atque disparuit. Legitur quoque in
 fine quarti libri Vitaspatrum, quod fuit
 quidam Frater in eremo, qui seducebatur
 a dæmonibus per plurimos annos, putans
 quod angeli essent. Carnalis autem pater
 Fratris illius, illum aliquando visitavit.
 Quadam vero die tulit secum bipennem,
 ut rediens, aliqua ligna secum portaret.
 Quum ergo esset in via, dæmon dixit filio
 ejus : Ecce diabolus venit ad te in simili-
 tudine patris tui, habens bipennem in
 sporta sua ut impugnet te; tu vero tolle
 ab eo bipennem, et percute eum. Quum-
 que pater ejus venisset ad eum, tulit bi-
 pennem, et percussit patrem suum ac in-
 terfecit. Statimque diabolus Fratrem illum
 invasit et suffocavit.

Ex hoc patet exemplo, quam necessaria

Galat. vi,
1, 2, 10.

Dan. xii, 3.

Jacob. v, 20.

Eccli. xix,
13.

I Cor. xii,
9, 10.

Hebr. ii, 1,
3, 4.

Marc. xvi,
20.

I Cor. xii,
10.

Eccli. xix,
4.

sit discretio spirituum. quamque periculo-
sum existat incaute credere spiritui ap-
parenti. Propter quod in Ecclesiastico scri-
ptum est : Qui cito credit, levis est corde,

et minorabitur. Atque in prima sua Cano-
nica docet Joannes : Nolite omni spiritui ^{1 Joann. iv,}
credere, sed probate spiritus si ex Deo ^{1.}
sint.

ENARRATIO IN EVANGELIUM

QUUM APPROPINQUARET JESUS JERUSALEM, VIDENS CIVITATEM, FLEVIT SUPER ILLAM.

Luc. xix, 41-47.

HODIERNO in evangelio docetur quanta
fuerit dilectio Christi ad homines,
quanta etiam fuerit ejus compassio ad
peccatores ac miseros; item, quantus fu-
erit in eo zelus justitiæ pro Dei Patris
honore contra iniquos. Ait itaque Lucas
evangelista :

*Quum appropinquaret Jesus civitati Je-
rusalem, videns civitatem, flevit super
illam, dicens.* Istud fuit in die Palmarum,
quando Salvator a Bethania venit Jeroso-
lymam. Quum enim a turba fuisset cum
ingenti susceptus honore, et cum maxima
processione duceretur ab ea, sedens super
asinam, tandem in tantum appropinquavit
civitati Jerusalem, quod eam exterioribus
oculis vidit : qui secundum quod Deus
est, totum mundum implet et excedit, ac
omnia æternaliter intuetur; imo etiam ab
incarnationis exordio, anima ejus per sci-
entiam creatam ac inditam, cuncta creata
præterita, præsentia et futura cognovit.
Itaque, quum corporaliter urbi illi sic ap-
propinquasset, eamque inspiceret, scelera
ejus atque futuram ipsius vastitatem ac
destructionem deplanxit, dicens : *Quia si
cognovisses*, id est, si mala imminencia tibi
scires, *et tu fleres*, eo quod tanta tibi
adversa appropinquent. Denique nomine
civitatis intelliguntur habitatores ejus. De-
flevit autem Christus ærumnas et tribula-
tiones quas populus civitatis hujus susti-
nuit, quadragesimo secundo anno post
Christi passionem, ab exercitu Romano-

rum; et si hoc ita est, multo plus deflen-
dus fuit populus ille incredulus propter
damnationem ipsius æternam. Christus
quoque plus doluit de malo culpæ, quam
de malo pænæ hominum impiorum.

Et quidem in hac die tua, id est in
tempore isto brevi atque celerrime trans-
eunti, in quo non Dei honori, sed propriis
vanitatibus vacas, *quæ ad pacem tibi*, id
est, ea quæ habes, ad carnalem, tempora-
lem et fallacem tuam pertinent pacem,
quia divitiis, deliciis et honoribus jam
abundas, nec ab hostibus infestaris; *nunc
autem abscondita sunt ab oculis tuis*, id
est, adversa tibi imminencia nunc te la-
tent. Horum damnabilem securitatem mul-
ti sequuntur, qui ex longanimitate et pa-
tientia Dei pejores redduntur et audentius
peccant, juxta illud Ecclesiastæ : Quia non
cito profertur contra malos judicium, abs-
que ullo timore filii hominum perpetrant
mala. Quibus competit illud Sapientiæ :
Dixerunt impii, Venite, fruamur bonis quæ
sunt, et utamur creatura tanquam in ju-
ventute celeriter.

*Quia venient dies in te; et circumda-
bunt te inimici tui*, puta Romani, videlicet
Titus et Vespasianus. Denique Christus in
evangelii hujus principio utitur verbis ob-
scuris seu incompletis ac defectivis, quem-
admodum moris est vehementer amantium
atque dolentium, in quibus magnitudo
amoris visque doloris verba abrumpit, in-
tercidit, abbreviat. Juxta quem modum

Jer. xxiii,
24.

Eccle. viii,
11.

Sap. ii, 1, 6.

Cant. vii,
10.
Ibid. ii, 16.

Sponsa ait in Canticis : Ego dilecto meo, et ad me conversio ejus ; itemque, Dilectus meus mihi, et ego illi. Itaque circumdabunt te *vallo*, id est aggere : quia (ut legitur) tres aggeres circa Jerusalem ad eam capiendam fecerunt. *Et coangustabunt te undique*, id est, tam dire obsidebunt, ut nullus ex te egredi audeat, sed fame et siti gravissime affligeris. Ad tantam namque angustiam existentes tunc in Jerusalem sunt perducti, quod mulieres proprios filios comederunt, multique fame extincti sunt, ut Iosephus refert.

Et ad terram prosternent te : quia tam homines quam ædificia Jerusalem prostraverunt Romani. Ideo subditur : *Et filios tuos*, id est cives, *qui in te sunt*. Civitas enim seu communitas, per modum matris se habet respectu suppositorum contentorum in ea, quoniam fovet ac protegit ea. Vel ideo dicit, « filios tuos », quia tempore quo ista implebantur, pro maxima parte jam obierunt patres et seniores qui in Jerusalem erant dum Christus hæc protulit, quorum filii fuerunt tempore Titi, quando hæc contigerunt. *Et non relinquent in te lapidem super lapidem*, id est, funditus te subvertent. Quod per modum hyperbolice locutionis intelligi potest, qua aliquid dicitur per excessum ad insinuandum magnitudinem rei, sicut in Genesi Pharaon dixit ad Ioseph : Absque oris tui imperio nullus movebit manum aut pedem in universa Ægypto. Legitur quoque, quod quum Vespasianus et Titus destructa Jerusalem Romam redissent, Judæi, qui tempore obsidionis se absconderant in speluncis ac silvis, redierunt, et sacra loca venerari cœperunt et reædificare. Quo cognito, Romani miserunt Ælium Hadrianum, qui urbem præfatam tam funditus dissipavit, quod lapis super lapidem non remansit. Postmodum quoque Hadrianus aliam ædificavit civitatem prima minorem, appellavitque eam Æliam ; et fuit in alio loco saltem pro parte, quia sepulcrum Christi in ea conclusit.

Causa demum præfatæ eversionis sub-

jungitur : *Eo quod non cognoveris tempus visitationis tuæ*, id est Christi adventum, accessum et conversationem ejus in te. Unde scriptum est alio loco : Benedictus Dominus Deus Israel, quia visitavit et fecit redemptionem plebis suæ. Hinc per Isaiam loquitur Deus : Cognovit bos possessorem suum, et asina præsepe domini sui ; Israel autem me non cognovit, et populus meus non intellexit. Apud Jeremiam quoque habetur : Milvus in cœlo cognovit

Luc. i, 68.

Is. i, 3.

Jer. viii, 7.

tempus suum, etc. ; Israel autem non cognovit iudicium Dei. Præterea, quamvis populus Judæorum propter hanc scelestissimam impietatem vastatus sit, captus, dispersus et derelictus usque in præsens (quemadmodum a Daniele apertissime est prædictum : Non erit ejus, videlicet Christi, populus, qui eum negaturus est ; et civitatem et sanctuarium dissipabit populus cum duce venturo, et finis ejus vastitas, et usque in finem perseverabit desolatio), verumtamen Romani tunc adhuc gentiles, non zelo Christi, sed alia intentione demoliti sunt Jerusalem ac Judæam, utpote quia rebelles fuerunt Romano imperio. Deus autem reliquit Judæos, quoniam Christum non receperunt. Quemadmodum etiam tempore Sedeciæ regis vastati sunt a Chaldæis propter idololatrias suas et innocentium ac Prophetarum occisionem, Chaldæi tamen ex ambitione et avaritia, crudelitate et prava intentione fecerunt hoc.

Dan. ix, 26, 27.

IV Reg. xxv ; II Par. xxxvi, 11 et seq.

Et ingressus in templum. Christus quum urbem Jerusalem introisset, primo intravit in templum : primo, propter loci sanctitatem et reverentiam ; secundo, quoniam Patris æterni honorem summe quæsivit ; tertio, ut daret exemplum quod fideles primo ingredi debent ecclesiam : unde ait Chrysostomus, Tu imitator Christi factus, quum ingressus fueris aliquam civitatem, ante omnem actum ad ecclesiam curras ; quarto, ut vitia ministrorum templi corriperet ; quinto, ut prædicaret ibidem. *Cœpit ejicere vendentes in illo et ementes*, dicens : Scriptum est apud Isaiam, ex

Is. lvi, 7.

Gen. xli, 44.

persona Dei : *Domus mea domus orationis est*, id est, templum Deo consecratum, ideo factum est ut Deus in eo colatur orationibus, laudibus, sacrificiis et ceteris actibus virtuosus, non ut ibi sæcularia et vitiosa fiant negotia, ut sunt emptiones et venditiones ibi præsertim illicitæ. *Vos autem fecistis illam speluncam latronum*, id est similem specui seu loco occulto, in quo latrones spolia sua collocant et occultant. Quemadmodum enim latrones ponunt ibi ea quæ rapiunt ab his quos corporaliter necant, sic sacerdotes et eorum familia colligebant in templo pecunias et pretia horum quos pravis exemplis spiritualiter occiderunt, inducendo illos ad peccata gravissima.

Denique Christus bis ante suam passionem ejecit vendentes in templo : primo, quando post mutationem aquæ in vinum, venit ad primum Pascha in Jerusalem et in templum; secundo, in Ramis palmarum, circa tertium Pascha. De prima ejectione scribit tantum Joannes. De secunda loquuntur alii tres Evangelistæ. Unde in Matthæo plus inde habetur quam in Luca. Nam dicitur ibi, quod mensas nummulariorum et cathedras vendentium columbas evertit. Sacerdotes quippe, qui avarissimi erant, posuerunt in anteriori atrio templi, ubi vulgus oravit et doctores docebant, quosdam ex suis ministris, qui omnium animalium quæ secundum legem offerri poterant genera, ibi vendebant, ne aliqui, maxime qui a remotis locis venerunt, possent se ab oblatione animalium excusare, quia a remotis nequibant ea secum adducere. Insuper, ne egeni se excusarent ab immolatione per defectum pecuniæ, posuerunt etiam ibi nummularios seu cam-

Joann. II,
13 et seq.

Ibidem.

Matth. XXI;

Marc. XI;

Luc. XIX, 28

et seq.

Matth. XXI,

12.

psores, qui sub cautione accommodarent egenis pecuniam ad emendum animalia immolanda. Scribit quoque Joannes : Quum fecisset quasi flagellum de funiculis, omnes ejecit de templo. Unde creditur et in ista ejectione ita fecisse.

Joann. II,
15.

Sed quæri potest, quomodo permiserunt se ejici ab homine uno et paupere. Et respondendum, quod Christus divina virtute potuit corda illorum terrere et mentes compescere, ita quod resistere non audebant. Creditur etiam quod quidam divinus splendor et igneus fulgor mirabilis in vultu et oculis Christi apparuit, ex cujus aspectu terrebantur iniqui, nec eum audebant inspicere nec reniti. Nam et tempore passionis jam capiendus, solo verbo armatam cohortem, ac Judæorum ministros furantes, perterruit, debilitavit, dejecit, ita quod abierunt retrorsum et corruerunt in terram. Hinc asserit Origenes, quod ejectio illa vendentium miraculosior fuit quam mutatio aquæ in vinum : quia in mutatione hac aquæ, inanimata subservivit materia; in ejectione vero illa, tot millium compescebantur ingenia. Unde ita imprimere in intima cordium, eaque taliter alterare, ac liberum arbitrium taliter compescere, fuit mirabilissimum opus, et soli divinæ virtuti possibile.

Ibid. XVIII,
3-6.

Ibid. II, 1
et seq.

Et erat Christus quotidie docens in templo, quia in die Palmarum prædicavit ibidem, et feria secunda ac tertia; non autem feria quarta, quia tunc mansit in Bethania, et venditus fuit a Juda; nec feria quinta, sed tunc fecit Cœnam novissimam, et evangelicæ legis Sacramentum instituit, atque Apostolis præclarissimum fecit sermonem. Unde quod Evangelista ait, « quotidie », referendum est ad dies determinatos.

Ibid. XII, 1-
12.

Ibid. XIII-
XVII.

SERMO SECUNDUS

DE CHRISTI CARITATE, PIETATE, COMPASSIONE ET LACRIMATIONE; ET QUALITER
CHRISTO IN HIS CONFORMARI DEBEMUS.

IMITATORES Dei estote, sicut filii carissimi; et ambulate in dilectione, sicut et Christus dilexit nos. Ephes. v, 1, 2.

Evangelium hodiernum sacris plenissimum est doctrinis et vere saluberrimis documentis. Primo commendatur nobis in eo summa caritas ac pietas Christi. Qui quum appropinquasset civitati in qua sceleratissimi, crudelissimi ac ingratis-
simi hostes sui fuerunt, a quibus paulo post fuerat morte acerbissima atque turpissima occidendus, non odio, indignatione, impatientia aut iracundia motus est contra eam, hoc est contra præfatos adversarios suos, sed ex ineffabili caritate et pietate condoluit eis tam vehementer, quod prorupit in lacrimas : nec dubium quin in lacrimas copiosas, calidissimas, præcordialissimas. Siquidem quo major fuit ipsius caritas ac pietas seu misericordia, eo præcordialior fuit ejus compassio, et abundantior ploratio. Sicque Christus implevit quod docuit ac præcepit, dicendo : Diligite inimicos vestros, benefacite his qui oderunt vos, et orate pro persequentibus et calumniantibus vos.

Hoc ergo Christi exemplo docemur, non solum amicis, sed etiam inimicis nostris caritative et pie condolare, subvenire, et pro eorum relevamine ac salute lacrimas fundere : imo dum forefaciunt nobis, magis dolere debemus de eorum culpa quam de injuria propria, de eorum peccato quam de temporali proprio damno, quia eorum animas magis amare tenemur quam exteriora ac temporalia bona, imo plus quam propria corpora et humanos honores. Verumtamen ab hac caritatis et pietatis sinceritate et integritate plurimi nomine

Atenus christiani nimium distant, qui non solum pro magnis injuriis, imo pro modica parvipensione seu irrisione graviter indignantur, iracundia inflammantur, vindictam inferre appetunt et nituntur. O quam longe sunt isti a Christi imitatione, ab evangelicæ legis observatione, et per consequens a salute ! Cogita semper quam enormiter ac frequenter inhonoraveris atque offenderis Dominum Deum tuum, Deum majestatis, dignitatis et gloriæ infinitæ ; itemque, quam patienter et longanimitè te toleraverit ac toleret, quam sæpe indulserit, et quam paratus sit semper ignoscere : sicque injurias tibi illatas patienter ac mititer sustinebis, nec ultionem quæres ex ira vel odio, sed si rationabilis causa expostulat, ex caritate et zelo justitiæ.

Præterea, sicut jam tactum est, caritas exigit, et Deus præcipue hoc requirit, ut proximis in tribulatione et angustia, in necessitate et penuria constitutis, cordialiter compatiamur. Propter quod ait Hieronymus : Vult Deus unumquemque alterius angustias sentire ut proprias ; et sicut sibi, si in tali tribulatione esset, cuperet subveniri, sic ipse alteri propter Deum studeat suffragari. Imo qui perituro succurrere potest, si non succurrit, occidit ; nihil autem sic probat amicum, sicut oneris amici portatio. Idecirco hortatur Ambrosius : Necessitates aliorum quantum possumus adjuvemus, imo interdum plus quam possumus juvare optemus ; nihil tam secundum naturam, quam juvare naturæ consortem. Sed, proh dolor ! multi sunt qui amplius condolent et flent si proximi in corpore vulnerentur, aut in temporalibus damna notabilia patiantur,

quam si in mortalia ruant peccata. In quibus non videtur esse spiritualis dilectio, nec christianæ pietatis compassio, quamvis sit in eis naturalis aut socialis amor et dolor. Ideo loquitur Augustinus : Annon sunt in te viscera christianæ pietatis, ut defleas corpus a quo recessit anima, et non defleas animam a qua recessit Deus, hoc est quæ peccavit mortaliter ? Ex iis perpendant parentes an sobolem suam spiritualiter diligant, an de filiorum et filiarum suarum peccatis magis quam de eorum corporalibus incommoditatibus, B. damnis seu infirmitatibus, contristentur.

Denique, sicut ait Bernardus, Christus legitur sæpe flevisse, nunquam vero risisse. Primo flevit in sua nativitate, quia tunc veraciter frigore affligebatur, statim quum natus fuisset. Secundo flevit in sua circumcissione, in qua magnam sustinuit *Luc. xix, 41.* pœnam ; tertio, quum appropinquasset civitati Jerusalem, sicut in evangelio legitur *Joann. xi, 35.* hodierno ; quarto, in Lazari suscitatione ; quinto, passione instante, quando ut ait *Hebr. v, 7.* Apostolus, cum clamore valido et lacrimis C orationem offerens Patri, exauditus est pro sua reverentia ; sexto, in ipsa sua acerbissima passione, in qua utique multoties *Joann. xix, 1, 2, 18.* flevit, præsertim in sua flagellatione, spinea coronatione et crucifixione. Itaque Christi exemplo, discamus vanitates et levitates, risus et dissolutiones, ludos, jocos, cachinnos vitare, atque salubriter flere, *Luc. vi, 25.* quoniam ipse terribiliter comminatur : Væ vobis qui ridetis nunc, quia plorabitis et *Matth. v, 5.* flebitis. Duleiter quoque pollicetur : Beati qui lugent, quoniam ipsi consolabuntur.

Præterea advertendum et valde pensandum, quod multæ sunt species laudabilis luctus. Prima est, propria peccata ut sunt Dei offensiva defflere. Hujus luctus lacrimæ oriuntur ex interna contritione, suntque effectus pœnitentiæ. De quibus ait *Ps. cxviii, 136.* Psalmista : Exitus aquarum deduxerunt oculi mei, quia non custodierunt legem tuam. Quanta autem sit vis lacrimarum istarum ad impetrandum indulgentiam peccatorum, imo et gratiæ infusionem, docet

A Ambrosius : Lacrimas (inquiens) Petri lego, satisfactionem non lego. Lacrimæ lavant delictum quod voce pudor est dicere ; lacrimæ veniam non postulant, sed tamen eam merentur. Tu ergo similiter lacrimis dilue culpam. Imo, sicut testatur Hieronymus : Oratio Deum lenit, lacrima cogit ; oratio ungit, lacrima pungit.

Secunda species sancti luctus est, proximorum peccata defflere. Hic luctus venit ex fraterna caritate et pietatis intimæ compassione. Hoc modo homines virtuosi deplo- rant iniquos quos diligunt, sicut in veteri Testamento multi Sancti fecisse leguntur, quemadmodum Daniel recitat de se ipso : Posui (inquit) faciem meam ad Dominum *Dan. ix, 3.* Deum meum, orare et deprecari eum in jejunio et sacco et cinere. Legitur quoque in primo libro Esdræ, quod quum ipse Esdras *1 Esdr. ix, 3, 5, 6.* percepisset peccata populi sui, præ nimio dolore scidit vestimenta sua, corruitque in terram, et flevit uberrime ; et dixit : Deus meus, confundor et erubesco levare faciem meam ad te, quoniam iniquitates nostræ multiplicatæ sunt super caput nostrum, et delicta nostra creverunt usque ad cœlum. Quemadmodum enim tenemur proximos diligere sicut nos ipsos, sic caritas *Matth. xxii, 39.* exigit ut de eorum culpa tristemur, et de eorum profectu et gratia gratulemur. Verumtamen fletus iste spectat potissimum ad aliorum prælatos et patres ac superiores, ut subditorum et sibi commissorum vitia lugeant, quos tam specialiter diligere, custodire, considerare atque pro posse curare tenentur, quemadmodum Paulus apostolus se fecisse in suis fatetur epistolis. Unde et de viro sanctissimo B. Hugone Gratianopolitano legitur præsule, quod dum episcopus factus fuisset, et tam clementum quam populum invenisset incompositissimum, vitiosum, et quoad divini cultus opera prorsus rudissimum, die ac nocte amarissime flevit, et flendo pro illis rogavit : per quod in brevi maximam impetravit gratiam subditis suis. Hujus episcopi vestigia imitentur prælati.

Tertia species boni luctus est, præsentis

vitæ ærumnas deflere, ut mereamur libe-
 III *Reg.* XIX, 4. rari ab eis. Sic enim oravit Elias : Tolle,
Rom. VII, 24. Domine, animam meam. Apostolus quo-
 que dixit : Infelix ego homo ! quis me
 liberabit de corpore mortis hujus ? Verum-
 tamen tribulationes et pœnæ vitæ præsen-
 tis sunt æquanimiter tolerandæ, quousque
 Deus dignetur eis finem imponere.

Quarta species est, ex consideratione
 passionis Christi pia compassione moveri
 ac lacrimari, eo quod ipse innocentissi-
 mus Agnus Dei tanta pro peccatoribus
 pertulit. Hinc ait Apostolus : Si compa-
 timur, et conregnabimus ; itemque, Chri-
 sto confixus sum cruci ; et iterum, Ego
 stigmata Domini Jesu in corpore meo
 porto.

Quinta species est, desiderio æternæ be-
 atitudinis flere, et propter dilationem il-
 lius lugere, cum Psalmista dicendo : Heu
 mihi ! quia incolatus meus prolongatus
 est ; et rursus, Quemadmodum desiderat
 cervus ad fontes aquarum, ita desiderat
 anima mea ad te, Deus ; et iterum, Fue-
 runt mihi lacrimæ meæ panes die ac no-
 cte. Ex hoc affectu dixit Apostolus : Cupio
 dissolvi et esse cum Christo. Imo, secun-
 dum Gregorium, futuram felicitatem ne-
 quaquam digne desiderat, qui pro ea quo-
 tidie cum lacrimis non exorat.

Sexta species est, desiderio gratiosæ
 præsentiae ac consolationis internæ Spon-
 si cœlestis etiam in hac vita, pie lugere.
 Sic lugent devoti supernam dulcedinem
 sæpe experti, et Deo familiariter atque
 suaviter vacare assueti, dum solitam gra-
 tiosæ præsentiae Dei dulcedinem devotio-
 nisque alacritatem sentiunt sibi deesse, di-
 centes illud Canticorum : Quæsi vi illum, et
 non inveni ; vocavi, et non respondit mihi.

Septima species est, desiderio spiritua-
 lis profectus ac incrementi in omni virtu-
 te et gratia, lacrimari. Sic plorat qui im-
 perfectum suum sapienter considerat, et
 quam vagus sit mente etiam in divino ob-
 sequio, pensat ; qui divinæ majestatis ex-
 cellentiam intuetur, atque ob hanc Deo
 reverenter, pure ac fervide deservire co-

A hæreque nititur. Quod quia ut cupit non
 implet, cum lacrimis Deum precatur, ut
 gratiam suam et virtutes in se perficere
 omni die dignetur, sicut oravit Propheta :
 Perfice gressus meos in semitis tuis, ut
 non moveantur vestigia mea ; et iterum,
 Gressus meos dirige secundum eloquium
 tuum, et non dominetur mei omnis inju-
 stitia. Istæ lacrimæ sunt salubres et meri-
 toriæ valde.

Octava species est, ex timore divini
 judicii ac infernalis supplicii lamentari,
 B quia horrendum est incidere in manus
 Dei viventis, et in inferno nulla est re-
 demptio. Legitur in Vitaspatrum, quod
 Fratres in eremo miserunt ad abbatem
 Macarium, deprecantes ut veniret et visi-
 taret eos antequam migraret ad Domi-
 num : alioqui sciret totam multitudinem
 Fratrum venturam esse ad ipsum. Quum-
 que venisset ad Fratres, dixit : Ploremus,
 Fratres, ploremus in vita ista, antequam
 veniamus ubi lacrimæ nostræ comburant
 corpora nostra. Et fleverunt omnes, et ce-
 ciderunt proni in facies suas, dicentes :
 Ora pro nobis, Pater.

Nona species est, ex miseriis et tribulati-
 onibus proximorum moveri ad fletum. Sic
 Jeremias deplanxit destructionem civita-
 tis ac templi Jerusalem, interfectionemque
 Judæorum.

Decima species est, ex abundantia spi-
 ritualis gaudii flere, præsertim ex quadam
 serenissima complacentia Domini Dei. Qui
 fletus præ ceteris diviniior dulciorque cen-
 setur.

Postremo, per Jerusalem spiritualiter
 designatur Ecclesia militans et anima ju-
 sti. Quemadmodum ergo Christus deflevit
 vastitatem Jerusalem, ita qui vere chris-
 tianus est, spiritualem ruinam ac defor-
 mationem Ecclesiæ debet merito valde
 deflere, atque pro ejus reformatione in
 omnibus affectuosissime quotidie exorare,
 ut Deus dignetur eam ad pristinum gratiæ
 decus reducere, et tam in prælatis quam
 subditis, tam in clero quam vulgo, omni-
 que gradu, statu ac ordine reparare eam-

dem. Similiter, si aliquem justum contingat tentationi succumbere et ad peccata reverti, deflendus est vehementer, et pro ejus reductione indesinenter orandum. Imo tanto cordialius condolendum est peccatoribus, et plorandum ac interpellandum pro eis, quanto plus excæcantur ac induran-

tur, et quanto minus sciunt sive advertunt cur defleantur. O quam felix est cui datum est ita plorare, atque præactas fletuum species habere, si tamen usque in finem perseveret in eis cum omni humilitate! Propter quod hortatur Apostolus: Qui stat, videat ne cadat.

1 Cor. x, 12.

SERMO TERTIUS

DE CAUSA SPIRITUALIS EXCÆCATIONIS, ET ANGUSTIIS IMPIIS SUPERVENTURIS; ET DEMUM QUID IN ECCLESIA MATERIALI AGENDUM SIT, ETC.

DOMUS mea domus orationis vocabitur. Is. lvi, 7; Luc. xix, 46.

Salvator in evangelio hujus diei, multipliciter nos informat verbis et factis: nam et opera ejus sunt saluberrima documenta. Primo itaque docet quæ sit causa excæcationis impiorum, propria pericula non attendentium. Quum enim deflebat Jerusalem ruituram, dicebat: Si cognovisses et tu, et quidem in hac die tua, quæ ad pacem tibi; nunc autem abscondita sunt ab oculis tuis (juxta sensum in expositione litteræ introductum). In quibus verbis innuit Christus, quod abundantia terrenæ prosperitatis atque carnalis pacis, est multis occasio, imo et causa, internæ excæcationis et negligentiae propriæ salutis: ita quod se ipsos non deflent, nec immensitatem periculorum sibi imminuentium pensant, sed in carnalibus delectantur, in temporalibus resolvuntur, in terrenis prosperitatibus se extollunt. Nempe dum delicate se nutriunt, pretiose et curiose se vestiunt, otiositatibus loquacitatibusque intenti sunt, obliviscuntur Domini Dei sui; D

B docet, videlicet quod reprobi et iniqui prosperantur in sæculo isto, et per hoc damnationem incurrunt æternam. Loquitur namque Jeremias propheta Deo: Justus quidem es tu, Domine, si disputem tecum; verumtamen justa loquar ad te: Quare via impiorum prosperatur, et bene est omnibus qui prævaricantur in te? Hinc etiam sanctus Job ait: Numquid contra hominem disputatio mea est, ut merito non debeam contristari? Quare ergo impii vivunt, sublevati sunt confortatique divitiis? Semen eorum permanet coram eis, et non est super eos virga Dei. De quibus fertur in Psalmo: In labore hominum non sunt, et cum hominibus non flagellabuntur: ideo tenuit eos superbia, operti sunt iniquitate et impietate sua. Prodiit quasi ex adipe iniquitas eorum; transierunt in affectum cordis. Sed quid hanc prosperitatem et iniquitatem sequatur, beatus Job protestatur, dicendo: Ducunt in bono dies suos, et in puncto ad infernum descendunt. Ex his Christiani perpendere debent, quod temporalis prosperitas, divitarum ac deliciarum affluentia, honor mundanus, formidandi sunt potius quam optandi, quum multis et innumerabilibus sint causa damnationis æternæ, et reprobis magis quam electis soleant conferri. Porro, si alicui hæc arrident, impleat illud

Luc. xix, 42.

Jer. xii, 1.

Job xxi, 4, 7-9.

Ps. lxxii, 5-7.

Job xxi, 13.

Ps. lxi, 11. Psalmistæ, Divitiæ si affluent, nolite cor A
I Cor. vii, 31. apponere; et quod ait Apostolus, Qui utun-
 tur hoc mundo, sint tanquam non uten-
 tes: et ita Deo rectore ac duce, sic transeat
 per bona temporalia, ut non amittat æter-
 na. Ad quod necessarium exstat ut ad
 temporalia et carnalia non afficiatur in-
 ordinate, sed ad debitum finem referat ea,
 ac sobrie utatur eisdem.

Secundo docet in evangelio isto Salva-
 tor, quantæ tribulationes atque angustiae
 sint iniquis superventuræ. Quod enim ad
 litteram de illa terrena Jerusalem dixit, B
Luc. xix, 43, 44. Venient dies in te, et circumdabunt te
 inimici tui vallo, et coangustabunt undi-
 que; et ad terram prosternent te, eo quod
 non cognoveris tempus visitationis tuæ:
 totum hoc spiritualiter accipi debet de
 unoquoque reprobo et iniquo, quoniam
 invisibiles hostes, puta diaboli, qui jam
 quotidie per varias suggestiones et blan-
 das persuasiones, ac aliis modis inducunt
 hominem ad peccata, tempore mortis in-
 star apum circumdant eumdem et coan-
 gustant, tentando acerrime, ut vel ad de-
 sperationem, vel ad vanam securitatem,
 aut ad inadvertentiam pertinentium ad sa-
 lutem ipsum inducant. Interdum namque
 diaboli abscondunt agonizanti sua pecca-
 ta, ne vel in fine pœniteat, sed damnabili
 securitate perdat se ipsum. Interdum re-
 ducunt ei ad memoriam sua peccata, et
 vehementissime ea exaggerant, quam mul-
 ta et magna sint manifestant, ut miserum
 ad desperationis pertrahant vitium. Inter-
 dum vero sic occupant agonizantem circa
 exteriora disponenda, aut circa incommo-
 da propria, vel circa impertinentia, quod
 negligit semetipsum, et ea quæ salutem
 concernunt non intuetur. Sicque peccator
 ad terram prosternitur, quia in infernum
 demergitur, et in suis terrenis affectibus

Job xxi, 30. moritur. Unde in libro Job habetur: In
 diem perditionis servatur malus, et ad
 diem furoris ducetur; et de furore Om-
 nipotentis bibet. Insuper animam pecca-
 tricem circumdant et coangustant invisi-
 biles hostes coram Iudice summo, in hora

judicii ejus tam particularis quam univer-
 salis, eam gravissime accusando.

Ea quoque quæ de terrena Jerusalem
 Christus prædixit, Ecclesia militans in par-
 tibus suis frequenter perpessa est ab ad-
 versariis fidei christianæ, Sarracenis ac
 aliis: a quibus in multis regionibus lon-
 ge ac late destructa est, quoniam tempus
 suæ visitationis, id est beneficia Christi,
 non cognovit, non attendit, non mente
 grata ac obediente consideravit. Tempus
 enim evangelicæ legis, tempus gratiæ ap-
 pellatur: ideo gravior culpa est modo,
 Christi visitationem, incarnationem, pas-
 sionem, sacramentalem præsentiam, et ce-
 tera beneficia atque mysteria ejus, non
 debita gratitudine intueri.

Tertio Christus, per hoc quod venden-
 tes, ementes et nummularios seu campso-
 res de templo ejecit, docet nos multa.
 Primo, quod zelum ferventem habere de-
 bemus pro Dei honore, optando ut ipse ab
 omnibus debite veneretur, atque de ejus
 inhonoratione tristando, imo et ejus inho-
 norationi resistendo pro posse, et eam vin-
 dicando quantum spectat ad nos, quia ut
 ait Chrysostomus, Quamvis sit pium pro-
 priam dissimulare injuriam, impium ta-
 men est dissimulare injuriam Dei. Talis
 autem ultio justa et caritativa pertinet ad
 prælatos ac præsidentes. Secundo in hoc
 facto Christus edocuit, quod sæcularia ne-
 gotia non sunt in ecclesia pertractanda,
 nec placita, nec verba ibi habenda sunt
 ad Dei obsequium non pertinentia. Tertio
 per hoc docuit, quod ubique primo debe-
 mus quærere regnum Dei et justitiam *Matth. vi, 33.*
 ejus. Studeamus ergo pro posse exclude-
 re ea quæ contrariantur divinæ majestatis
 venerationi ac proximorum saluti, ita ut
 in primis emendemus nos ipsos, et zelus
 noster discretus sit.

Quarto docet Salvator, quid in ecclesia
 materiali agendum sit, dicens: « Domus *Luc. xix, 46.*
 mea domus orationis vocabitur ». Facta est
 ergo ecclesia Deo dicata seu consecrata:
 Primo, ut in ea fideles Deum exorent,
 præsertim ut ibi sacerdotes et prælati pro

Ps. CXVIII,
164.

toto populo eis commisso præcipue et pro aliis solenniter orent, totusque populus simul et concorditer Dominum deprecetur, quoniam communitatis oratio exaudibilior creditur. Secundo, ut in ea Deus certis horis laudetur, puta in horis canonicis, juxta illud : Septies in die laudem dixi tibi. Tercio, ut ibi Missarum solennia fiant, et Sacrificium altaris ad Dei gloriam pro populo offeratur, populus quoque oblationes suas tam spirituales quam corporales offerat ibi. Quarto, ut aliqua alia sacramenta ibi cum ampliori devotione ac reverentia celebrentur et ministrentur, quanquam alibi id fieri possit dum rationabilis causa occurrit. Quinto, ut verbum Dei ibidem solenniter populo prædicetur. Unde in evangelio isto habetur, quod Christus erat quotidie docens in templo. Ex his constat, quam reprehensibiliter ac damnabiliter agant, qui in ecclesia indevote et irreverenter se habent, qui oculis ibi sunt vagi et mente incustoditi : præsertim qui fabulationibus et verbis scurrilibus ibi ora sua relaxant aut aures præbent, et qui libidine adspiciunt vitioseque appetunt, aut suo ornatu aliquem provocant ad affectum immundum. Itaque cum omni mentis custodia, devotione et fervore intersint fideles divino obsequio, nec aliquid in ecclesia agant nisi ad quod ipsa est consecrata. In ecclesia quoque meditationibus sanctis vacandum est ; signa tamen singularis devotionis vitanda sunt coram aliis.

Denique multis viris sanctis ostensæ sunt visiones, in quibus viderunt diabolum scribentem verba confabulantium in ecclesia. Imo de B. Severino archiepiscopo Coloniensi legitur, quod post mortem suam apparuit archidiacono suo, affirmans se esse in magnis purgatorii pœnis ob hoc

A quod tempore divini Officii permisit ministros suos sibi aliqua exteriora insinuare, et eis quandoque respondit. Si ergo sanctus vir ille propter hoc tanta sustinuit, qui tamen nequaquam verba in se otiosa aut vitiosa in ecclesia protulit, quanta erit eorum punitio qui verba vana, scurrilia, vitiosa proferunt ibi ?

Postremo, in homilia evangelii hujus refert Gregorius, quod erat quidam monachus sanctus nomine Martyrius, qui quodam die pergens ad monasterium quoddam, invenit in via jacentem quemdam leprosum, solo adspectu valde horrendum sive deformem, affirmantem se habere hospitium in itinere per quod iturus fuit Martyrius, sed præ lassitudine et ægritudine non posse procedere. Martyrius ergo ejus misertus, pallium suum super terram expandit, atque in eo illum leprosum accepit, et super suos humeros portavit. Quumque monasterio propinquaret, abbas monasterii exclamavit : Currite, fratres, januas aperite, quoniam frater Martyrius venit Dominum Jesum Christum portans. Veniente autem Martyrio circa cœnobium, is qui videbatur leprosus, Jesus Christus Dominus noster, de collo ejus exsiliens, et in forma qua solet agnoscere apparens, dixit Martyrio : Martyri, tu me non erubuisti super terram, et ego te non erubescam in cœlo. Quo dicto, vidente Martyrio, Christus ascendit in cœlum. Quumque Martyrius cœnobium esset ingressus, abbas dixit ad eum : Frater Martyri, ubi est quem portabas ? Respondit Martyrius : Ego si scivissem quis fuisset, pedes illius tenuissem. Dixit quoque Martyrius, quod quando Dominum sic portavit, pondus ejus non sensit. Ecce quantum misericordiæ opera placent Deo.

AD RELIGIOSOS

SERMO QUARTUS

DE CARITATE, MISERICORDIA ET LIBERALITATE DEI AD HOMINES ; DE INSUFFICIENTIA
QUOQUE DEFECTUOSITATEQUE HOMINUM.

OMNIA operatur unus atque idem Spiritus, dividens singulis prout vult. I Cor. XII, 11.

Meliores et subtiliores philosophi protestati sunt, quod absque indesinenti conservatione omnipotentis Creatoris, nulla possit creatura ad momentum subsistere; quod item sine virtute et influentia primæ causæ, nulla valeat causa secunda quidpiam operari, in tantum quod omnis secundarum effectus causarum, magis sit adscribendus causæ primæ, quæ Deus est, quam cuicumque causæ secundæ. Proportionabiliter dicunt sancti theologi, quod rationalis creatura nil queat meritorie agere, cogitare, appetere, loqui, efficere absque habitualibus donis Spiritus Sancti, quæ sunt gratia gratum faciens, caritas ac ceteræ virtutes infusæ, septemque dona, et absque actuali motione Spiritus Sancti, ita quod ad agendum meritorie indigemus utroque isto supernaturali iuvamine. Propter quod loquitur Isaias Deo :

Is. XXVI, 12.

II Cor. III, 4, 5.

Philipp. II, 13.

Omnia opera nostra operatus es in nobis. Et Apostolus : Fiduciam (inquit) talem habemus ad Deum, quod non simus sufficientes cogitare aliquid a nobis quasi ex nobis, sed sufficientia nostra ex Deo est; itemque, Deus est (ait) qui operatur in nobis et velle et perficere, pro bona voluntate, id est ex sua benevolentissima atque piissima voluntate, non originaliter propter merita nostra.

Ecce ex verbis istis, si tamen advertere volumus, copiosissime ac saluberrime in-

formamur : primo, ut salutari notitia agnoscamus nos ipsos, videlicet quam pauperissimi, defectuosissimi, indigentissimi sumus; secundo, ut ex hoc in infinitum humiliemus et parvi pendamus nos ipsos; tertio, ut inæstimabilem caritatem, misericordiam, munificentiam Dei ad nos et in nobis recognoscamus, miremur, diligamus ac veneremur; quarto, ut omne bonum Deo grata ac humili mente attribuamus, nec unquam inaniter gloriemur, etiamsi sciremus ex revelatione certissima nos esse in gratia. Est namque a Spiritu Sancto omne bonum quod agimus, ejusque dono contingit ut mala vitemus. Ab ipso est gratia præveniens et subsequens, boni inceptio, continuatio, consummatio, temptationum victoria et omnis devotio vera. Ideo Augustinus oravit : Sanctum opus semper, o Spiritus Sancte, in me spira ut cogitem, move ut faciam, accende ut te diligam, confirma me ut te teneam, custodi me ne te perdam. Et Bernardus : Paracletus Spiritus Sanctus dat pignus salutis, robur vitæ, scientiæ lumen. Dat pignus salutis, ut ipse Spiritus Sanctus testimonium reddat spiritui tuo quod filius Dei sis; dat robur vitæ, ut quod per naturam tibi est impossibile, per gratiam ejus non solum possibile, sed etiam facile fiat; dat lumen scientiæ, ut quidquid boni in te noveris, ei attribuas a quo omne bonum est. In tribus istis Spiritus Sanctus docebit te omnia quæ pertinent ad salutem.

Rom. VIII, 16.

Jacob. I, 17.

Quinto, ex prædictis instruimur semper

ad Deum confugere, in ipso solo tota mente confidere, semper humiliter loqui, nunquam præsumere, nunquam nos ipsos jactare, nec alios insipienter despicere, neque nos illis incaute præferre, Dei quoque auxilium jugiter implorare, dicentes : Cito anticipent nos misericordiæ tuæ, quia pauperes facti sumus nimis; adjuva nos, Deus salutaris noster, etc. Ecce in his debet indesinenter esse occupatio nostra, Deum laudare, extollere, admirari, diligere, dona ejus pensare, et omnium fonti bonorum totis præcordiis regratiari, nos ipsos despicere, humiliare, accusare, corrigere, Deo inhærere, ad complacendum ei indefesse studere, ut sic tota conversatio nostra sit vere in cœlis, vere spiritualis, divina et fructuosa, atque per hoc ipso nomine monachi simus condigni : quia ut Climacus loquitur, Monachus est qui ea quæ Dei sunt cogitat, loquitur, operatur, Christo unitus omni loco et tempore. Qui iterum sermocinatur : Monachus est incessabile lumen in oculo cordis; monachus est abysus humilitatis, omnem spiritum extraneum et superbum ex toto præcipitans et suffocans; monachus proprie est non elatus oculus, humilis animæ intuitus, et immotus corporis sensus; monachus est qui impugnatores seu tentatores instar bestiarum advocat, et irritat quum fugiunt ab eo; monachus est incessabilis excessus et tristitia vitæ; monachus est qui ita afficitur et qualificatur virtutibus, sicut alius concupiscentiis et delectationibus vitiosis.

Ecce cui ista conveniunt, hic vere religiosus, hic perfecte est monachus. Et si nondum tales consistimus, tales fieri indesinenter conemur, proficere non cessantes : quia ut sancti Patres fatentur, verus religiosus debet esse neglector et contemptor carnalis quietis et repausationis seu otiositatis, appetitor laboris, patiens abjectionis, honoris impatiens voluptatisque fugax, pauper in pecunia, dives in conscientia, erectus ad merita, superbus contra peccata. Verum, ut asserit Hugo de S. Victore, sunt quidam religiosi mente

vagi, oculis attoniti, moribus dissoluti, plana parietum inspicientes; aliud cantant, aliud cogitant; corpore sunt in choro, mente in foro; nunc intus, nunc foris discunt; psalmodiæ verba proferunt, sed sensum non advertunt. Sunt et alii voce inanes, qui vocis modulatione gloriantur, et alios aspernantur; qui elatione tumentes, aliud cantant quam libri habeant. Et quanta est levitas vocis, tanta forsitan et instabilitas mentis. Cantant forsitan magis ut placeant populo, quam Deo. Ecce quanta est inter verum et vanum religiosum distantia.

Deinceps in præsentī epistola docet Apostolus, quam pulchre et gratiose Deus sapiens atque omnipotens militantem decoravit Ecclesiam diversitate donorum gratiæ gratis datæ, et officiorum ac operationum. Contemplemur itaque quam copiosa gratiarum charismata, quantam sapientiam, scientiam, eloquentiam, quantam miraculorum eminentiam, quantam contra adversarias potestates potentiam, quam admirandam perfectionem virtutum, sublimitatem contemplationum, quam supernaturalem totius sanctitatis munditiam, quam cœlestem et angelicam vitam contulerit Deus sublimis et benedictus sanctis patribus nostris beatis Apostolis et apostolicis viris, gloriosissimis anachoretis et eremitis, ac religionum fundatoribus præelectis : atque ex his immensam Dei bonitatem, sapientiam, omnipotentiam admiremur, laudemus ac honoremus, et quanta sit christianæ fidei certitudo pensemus; sanctorumque Patrum comparatione nos ipsos profundissime humiliemus, et nihilo minus ad imitationem eorum efficaciorē accendamus ac animemur. Nempe et ipsi homines erant similes nobis mortales, nec abbreviata est Domini manus. Imo, quo nunc pauciora nobis præbentur a viventibus sanctitatis exempla, eo plus virtuosum meritoriumque consistit, si quis nunc sancte et irreprehensibiliter conversetur. Magnum enim est valde inter pusillos, infirmos, remissos, perfecte, sancte ac fervide

Ps. LXXVIII,
8, 9.

Philipp. III,
20.

Is. LIX, 1.

vivere. Hinc Climacus cohortatur : Exquirere nosmetipsos et examinare et dijudicare per comparisonem ad Patres et luminaria qui fuerunt ante nos non cessemus ; et tunc inveniemus nos ipsos diligentis et dignæ conversationis nondum calcasse vestigium, nondum incepisse exordium, sed adhuc in sæculari institutione ac consistentia esse.

Hoc quoque sciendum, quod gratia discretionis spirituum religiosi valde sit necessaria, ne a Satana se in angelum lucis transfigurante, aut etiam in Christi aut alicujus Sanctorum persona apparente, fallamur. Unde rursus Climacus contestatur : Quando locum in suis operariis dæmon capit, tunc eis per somnia aut etiam in visione manifeste in figura cujuscumque angeli sancti vel martyris apparens, mysteriorum revelationem aut dona charismatum tradit, ut seducti miserabiles a

sensibus excidant. Denique sanctus pater Antonius inter apparitionem angeli seu spiritus boni et mali ita distinxit, quod quamvis ex apparitione angeli boni, timor in principio incutiatur videnti, mox tamen spiritus seu angelus bonus videntem confortat, consolatur, tranquillat ; dæmone autem in specie angeli apparente, timor incussus perseverat, et mentis confusio ac perturbatio non protinus tollitur, sed augetur. Idcirco, secundum doctores, si quis dæmonem in persona Christi sibi apparentem, seque adorari jubentem, adoret, non excusatur a culpa, quia incaute agit. Non enim mox credendum est apparenti spiritui ; sed is cui apparet, se primo debet ad Deum convertere, et ipsum orare ut sibi inspirare dignetur quod verum est : et tunc benignissimus Deus hominem in tali periculo non relinquet. Cui honor et gloria æternalis.

SERMO QUINTUS

IN QUO COHORTANTUR POTISSIMUM RELIGIOSI NE INANITER
IN PROSPERITATE VEL PROMOTIONE GLORIENTUR, ET MULTIPLCIS VISITATIONIS A DOMINO JESU
SIBI EXHIBITÆ ADMONENTUR.

VIDENS *Jesus civitatem, flevit super eam.* Luc. xix, 41.

Christus in die Palmarum civitati Jerusalem appropinquans, eamque videns, futuram ipsius calamitatem deplanxit. Quo facto multipliciter edocemur. Primo, ne in die bonorum immemores simus malorum, neque in die nostri extollamur honoris. Siquidem Dominus et Salvator, quum in die Palmarum, cum summo honore atque præconio processionally ab innumerabili populo duceretur ad urbem Jerusalem, nequaquam inaniter motus est, sed futura intuens mala, ad compassionem internam et lacrimas est inductus. Si ergo quandoque aliqua temporalis nobis arri-

det prosperitas, aliquis honor sive promotio, tunc magis ad interiora nostra redeamus, occulta ac metuenda Dei judicia formidemus, et vereamur ne forte in vita hac recipiamus bona transitoria pro mercede futura. Nec in talibus inaniter resolvamur, sed potius contristemur, præsertim quum monachorum sit nil terrenæ consolationis, nil caducæ prosperitatis, nil proprii commodi in præsentī requirere neque suscipere, imo subjectione et abjectione gaudere, subsannationes et persecutiones quasi poculum dulcē potare, seque huic sæculo vere mortuos exhibere, ut impleatur in eis quod in Threnis loquitur de solitario Jeremias : Dabit per-

Thren. iii,
30.

Jacob. 1, 2. cutienti se maxillam, saturabitur opprobriis. Omne igitur gaudium arbitremur quum diversæ tentationes ac tribulationes acciderint nobis; nec querulosi, impatientes, vindicativi rebellesque simus.

Ephes. v, 1, 2. Secundo, ex præfacto Christi facto instruimur quam admiranda ac summa fuerat caritas ejus ad homines, compassio ad iniquos, patientia in adversis. Quum enim inspiceret civitatem vitiosis hominibus et crudelissimis suis hostibus plenam, a quibus et in qua vidit se paulo post tam ignominiose pœnaliterque tractandum, non ad invidentiam, indignationem, impatientiam, iram aut maledictionem, sed ad intimam compassionem, lacrimosam ipsorum deplorationem est provocatus, ut et nos eum in istis imitemur virtutibus, juxta illud Apostoli : Estote imitatores Dei, sicut filii carissimi; et ambulate in dilectione, sicut et Christus dilexit nos. Sed inter hæc oculum mentis ad considerandum nos ipsos reflectamus. Puto quod caritas, misericordia, patientia lacrimosa Salvatoris, non minus confundat nos quam erudiat. Quum enim Filius Dei tam ineffabilem caritatem, compassionem, benevolentiam, beneficentiam adversariis suis atrocissimis exhibuerit, tamque incomparabilem patientiam ac mansuetudinem circa ipsos ostenderit, pro quibus et crucifixus ab eis oravit, quid est quod nos pauperrimi et pusilli, quod nos nomine tenus religiosi, tam passionati imperfectique sumus, et pro parva injuria, pro levi verbo aut quovis signo sic perturbamur, irascimur, atque ad omnem devotionem, contemplationem, tranquillitatem inepti efficimur, ut eum a quo nos judicamus læsos, offensos, contemptos, vix valeamus adspicere et affari, nisi forte facie torva allocutioneque dura? Verumtamen, nisi conversi efficiamur ut parvuli, et imitemur vestigia Christi, non introibimus regnum Dei.

Luc. xxiii, 34. Ut ergo damnationem evadamus æternam, ut beatitudinem adipiscamur cœlestem, discamus etiam in magnis adversitatibus inviolabilem patientiam observare,

Matth. v, 44. A gravissimis persecutoribus condolere, pro adversariis quantumlibet gravibus exorare, et benefacere talibus. Quod facilius observare poterimus, si quantum et quoties nos ipsi Deum offendimus, et quantum quamque frequentem nihilo minus ab eo misericordiam consecuti sumus, et semper consequi cupiamus, rite intueamur. Dum itaque aliquem contra nos concitatum videmus, dum ab eo injuriamur, magis de suo doleamus peccato quam de nostro opprobrio, suæ interiori vulnerationi magis quam nostræ injuriationi compatiamur, et vere ex corde oremus pro eo.

Deinceps, quoniam per Jerusalem allegorice designatur Ecclesia militans, tropologice autem quævis anima credens, sicut Salvator civitatem illam Jerusalem et ejus temporalem vastitatem ac desolationem deplanxit, ita nos totius Ecclesiæ defleamus ruinam. Consideremus quanta sit deformatio ejus in omni statu, gradu et ordine, in prælatis, pastoribus, prædicatoribus, a summo usque ad infimum, in cœnobiis utriusque sexus atque collegiis, in omni clero ac populo. Et ex horum diligentissima consideratione, contristemur usque ad mortem; deducant oculi nostri lacrimas per diem et noctem; humilietur in pulvere anima nostra, conglutinetur in terra venter noster; et prostrati solo tenus, viscera misericordiæ Dei nostri pro generali reformatione in universis prænominatis affectuosissime et indesinentissime deprecemur. Eorum quoque quos specialius diligere obligamur, et pro quibus magis orare tenemur, erroribus et peccatis vehementius condoleamus; atque orando, celebrando et pro illorum vitiis nos ipsos disciplinando, lacrimosius ac copiosius succurrere non tardemus. Deploremus, et plorando ac deprecando juvemus eos qui mente obtenebrata nequaquam propria advertunt pericula, ideoque cur deplorentur ignorant. Quibus certissime tanto plus condolendum est, quanto amplius excæcati et indurati consistunt.

Jer. xiv, 17.

Ps. xliii, 25.

Matth. xviii, 3.

Præterea, cur Salvator ingratham ac per-
fidam urbem defleverit advertamus, ne et
nos simus similiter deplorandi, et inter
illos reprobos computandi. Ideo quippe
eam deflevit, quoniam tempus suæ visi-
tationis, videlicet adventus et præsentiae
Christi sibi promissi ac missi, non cogno-
vit. Videamus igitur ne et nos tempus
visitationis nostræ a Christo parvi penda-
mus, obliviscamur, et ingrati reddamur.
Gratiosissime visitavit nos Christus, quan-
do corda nostra illustravit, traxit, et de
sæculari perditissima vita ad sanctæ reli-
gionis ingressum induxit. Huic visitationi
invenitur ingratus, qui secundum exigen-
tiam suæ vocationis non est sollicitus di-
gine Deo conversari, qui a carnalibus et
mundanis affectibus suam non satagit
mentem purificare, qui exclusis distracti-
onibus vanis, mente fervente ac stabili
adhærere et vacare Deo altissimo non mo-
litur. Quod totum in religiosis damnabile
periculosissimumque consistit, quia quo
major eis a Deo gratia exstat exhibita, eo
ipsorum negligentia, ingratitude, recidi-
vatio, gravior comprobatur. Insuper visitat
nos quotidie Filius Dei in Sacramento; ve-
nit ad nos, venit in nos, et reficit nos se

Ephes. iv,
1.

A ipso. Numquid mediocris est gratia, cari-
tas, dignatio, liberalitas ista? Quanta ergo
est culpa nostra, si negligentes, loquaces,
gulosi, passionati ac tepidi sumus? Ite-
rum, visitat nos Christus assidue per in-
ternæ illuminationis infusionem, per con-
solationem piissimam, per excitationem et
inflammationem nostri affectus.

Si ergo post omnia ista, ad pristinas
levitates, dissolutiones, offendicula rever-
tamur, nec Spiritus Sancti charismata cu-
stodire curemus, quid fiet de nobis quum
B Judex cœlestis cœperit et ipsas justitias
judicare, quando justus vix salvabitur,
quando de domo Dei exordietur judicium?
Non blandiamur nec palpemus nos ipsos,
quia periculum est immensum; sed ve-
reamur ne, sicut ait Salvator, circumdent
nos inimici nostri invisibiles et crudelis-
simi hostes, et coangustent nos undique,
atque ad terram prosternant nos, suis nos
tentionibus superando, involvendo peri-
culis capiendoque laqueis, et tandem ad
terram tenebrosam et opertam mortis ca-
C ligine pertrahendo: quia in religione non
religiose vivere, summa est damnatio. Id-
circo cum metu et reverentia serviamus
Domino Deo nostro.

Ps. lxxiv, 3.

I Petr. iv,
18, 17.

Luc. xix,
43, 44.

Job x, 21.

Hebr. xii,
28.

SERMO SEXTUS

DE CAUSA QUOTIDIANÆ RUINÆ ET DEFECTIONIS RELIGIOSORUM.

CIRCUMDABUNT te inimici tui vallo, D
et coangustabunt te undique. *Luc. xix,*
43.

Cor. x, 11.

Omnia, sicut ait Apostolus, contingebant
Judæis in figura. Quemadmodum ergo Sal-
vator perituram civitatem deplorans, cau-
sam excæcationis et carnalitatis ejus per-
hibuit esse terrenarum affluentiam rerum
et temporalis carnalisque pacis prosperi-
tatem, dicendo, Et quidem in hac die tua
quæ ad pacem tibi, nunc autem abscondi-

Luc. xix, 42.

ta sunt ab oculis tuis (id est, tempore isto
vitæ tuæ, ea quæ ad carnalem pacem et
transitoriam prosperitatem pertinent ha-
bes, idecirco mala tibi imminetia non per-
pendis); sic multis, heu! religiosis causa
dissolutionis et negligentiae, ac quotidianæ
ruinæ seu defectionis, est temporalium
abundantia rerum paxque carnalis. Dum
enim temporalibus rebus abundant, se
ipsos superflue ac laute reficiunt, nec
necessariis sunt contenti, sed curiosa re-

quirunt. Laute autem et immoderanter A refectos magis delectat confabulari, joculari, ridere, ludere, quam orationibus meditationibusque vacare, compunctioni et discussioni propriæ conscientiæ insudare, seu lectioni, aut alteri exercitio virtuoso. utilive labori insistere. Et ita mente infrigidantur, vanitatibus dissolvuntur, et noxiis cogitationibus immorantur, non formidantes quod per Michæam loquitur Spiritus Sanctus : Væ qui cogitatis inutile ; quod item in Apocalypsi effatur Christus unicuique tali : Habeo adversus te, quia B caritatem tuam primam reliquisti ; memor esto itaque unde excideris, et pœnitentiam age : alioqui venio tibi cito. Certe hoc verbum metuendum est vehementer omnibus negligentibus ac remissis, qui quanto diutius sunt in Ordine, tanto plus tepescunt magis quam inardescant, quum tamen quilibet nostrum tanto ferventior ac sollicitior fieri debeat, quanto horæ suæ mortis metuendissimique judicii amplius appropinquat. Unde de beatissimis patribus Antonio, Hilarione ac aliis pluribus legitur, C quod in venerando atque decrepito senio suo, quasi quotidie recentibus proficiendi desideriiis accendebantur. Quorum vestigia sacra sectari debemus, imo et obligamur, quia quotidie ad perfectionem tendere, id est proficere, jam tenemur. Tepidi autem ex ore Altissimi evomuntur.

Mich. ii, 1.
Apoc. ii, 4, 5.
Ibid. iii, 16.

Præterea, sicut est pax vera ac spiritualis summe desiderabilis, quæ est tranquillitas mentis in Deo, et ordinata quietatio ejus, dum scilicet omnia in homine ordinata consistunt, ita quod corpus subje-

ma pace ait Salvator : Non veni pacem *Matth. x,* mittere in terram ; et Psalmista : Zelavi ^{34.} super iniquos, pacem peccatorum videns. *Ps. lxxii, 3.* Quam pacem habuit Adam cum Eva in *Gen. ii, iii.* paradiso, et ambo collapsi sunt. Denique huic paci opponitur bona turbatio, qua sensualitati, passionibus et peccatis resistitur, sive a propria ratione, sive a spirituali patre ac præidente, qui subditorum suorum culpis ac negligentis apponit medelam, eosdem arguendo, hortando, docendo et corrigendo, ita quod nec in se ipsis, nec inter se malam et carnalem habere pacem sinuntur.

Verumtamen quidam præidentes sunt remissi et male formidolosi ac negligentes, qui commissi sibi gregis seu cujuslibet Fratris negligentias, carnalitates et vitia intuentes, aut certe intueri ac ponderare omittentes, correptionis et correctionis non apponunt remedium : sicque subditi ad pravam consuetudinem devolvuntur, carnali pace securi, et obscuratum *Rom. i, 21.* est insipiens cor eorum, in tantum quod suos quotidianos defectus, damna et pericula non perpendunt. Sed juxta Salomonis oraculum, Sicut capiuntur pisces hamo, et aves laqueo, sic capiuntur et ipsi tempore malo, quum extemplo supervenerit eis. Et quamvis quotidie intus spiritualiter ab invisibilibus hostibus devastentur, devotionis gratia spolientur, et ad graviora trahantur peccata, maxime tamen in agone hæc accidunt eis, quoniam dæmones, qui blandis persuasionibus, variis tentationibus, callidissimis modis eos nunc ad peccandum et ad deficiendum alliciunt et inducunt, mortis hora instante instar apum et tanquam musca gravissima circumdant, angustiant, hoc est, acerrime ac multipliciter tentant eos qui interim eis consentiunt, et nunc ad desperationem, nunc ad vanam et periculosam securitatem morientem inducere moliuntur. Sæpissime namque diaboli agonizantibus sua abscondunt peccata, et bona quæ egerunt proponunt memoriæ, ne vel in fine vitæ pœniteant, sed magis præsumant, ac prava securitate

Eccle. ix,
^{12.}

perdant se ipsos ; quandoque vero peccata ad commemorationem eis reducunt, vehementer exaggerant, quam multa et magna sint manifestant, ut miseros ad desperationis pertrahant barathrum ; interdum vero inutilibus phantasmatibus occupant mentem, ne pertinentia ad salutem intueantur. Insuper, animam de corpore jam egressam circumdant, perterrent, et coram tribunali summi consistorii horribiliter angustiare conantur, eam multipliciter, procaciter, atrociter accusando, deinde eam secundum sua demerita in purgatorio B (nisi evolaverit) aut inferno acerrime puniendo.

De hac re ait Eusebius : Quotidianus sit illius periculi metus, cujus nescitur incursus. Quam tarde miseram animam suorum pœnitebit malorum, quum se a suo corpore viderit separari, dum sibi in fine claudenti oculos nigrescere et horrescere nox cœperit, quum cœperit immanes et inanes super se dare planctus, ac dicere : Ubi sunt animositates et cupiditates tuæ, quibus hucusque impatienter arsisisti ? Ecce C transierunt omnia illa ut umbra ; abierunt oblectamenta, et sola in perpetuum crimina, opprobria atque supplicia remanserunt. Hinc ait et Climacus : Non tibi securitatem promittas quousque fuerit sententia super te prolata. Et abbas Elias : Ego, inquit, tres res timeo : unam, quando de corpore emigrabo ; aliam, quando præsens tabor tribunali divino ; tertiam, quando de me proferetur sententia. Sed et abbas Arsenius et abbas Agathon etiam in extremis valde formidasse leguntur. Si ergo Patres D illi sanctissimi, qui in tanta abstinence et tanta perfectione, in tanto fervore Deo tam diutissime servierunt, sic timuerunt, quid nos miseros et remissos, carnales ac desideres, necesse est facere, nisi ut redeamus

ad cor, examinemus quotidie conscientias nostras, et nostram consideremus vocationem, deploremus peccata, recenti assidue inflammemur proficiendi affectu, omnem carnalem pacem abhorreamus, nec concordemus in vitiis, in practicis malis ?

Quantumcumque nobis de cibo et potu ministretur, sobrie tamen et timorate utamur eisdem. Et si pretiosa ac delicata sint alimenta ac pocula, nequaquam tamen libidinose, sed temperate ea accipiamus, nec voluptatem, sed necessariam ac salubrem refectionem intendamus, quæramus, acceptemus in eis ; delectationem vero naturalem quæ sentitur in eis, ad finem debitum referamus, et quantum in nobis est, tenuiori ac viliori edulio refici affectemus ac contenti simus. Postremo, tanto amplius nos ipsos in omnibus humilitemus, quanto a patrum nostrorum abstinence, profectu et perfectione nos distare conspiciamus. In cunctis nostris operibus *Eccli. vii, 40.* meditemur novissima nostra ; et tot crudelissimis, fortissimis, callidissimis hostibus circumvallati, nunquam inani resolvamur lætitia, nunquam securitate damnabili torpeamus, nunquam in inchoato salutis itinere fatigemur, sed cum timore et tremore, cum omni diligentia ac sapientia *Philipp. ii, 12.* nostram operemur salutem. Nec aliqua dejectione patiamur nos ab adversariis nostræ salutis vinci, dejici et in terram prosterni, id est ad vana et carnalia affici ; sed Deum semper in adjutorium invocantes, omni die magis ac magis confortemur ac prævaleamus adversus eos, quatenus in fine vitæ eos facillime in Dei auxilio superemus, neque post hanc vitam eorum irrisionibus atque punctionibus pateamus, sed a Judice summo favorabiliter suscipiamur ac protinus coronemur. Ad laudem et gloriam ejus, etc.

DOMINICA XI POST TRINITATEM

ENARRATIO IN EPISTOLAM

NOTUM VOBIS FACIO EVANGELIUM QUOD PRÆDICAUI, ETC. I Cor. xv, 4-10.

APOSTOLUS in præsenti epistola, de Christi resurrectione, de Evangelii proprietate, atque de sui ipsius modicitate pertractat. *Notum vobis facio*, id est, ad memoriam revoco, clariusque expono, *Evangelium quod prædicavi vobis*, id est evangelicam doctrinam, seu bonam de Christo nuntiationem, *quod et accepistis*, id est, firmiter credidistis, *in quo et stastis*, id est, perseveratis stabiliter, et mentem ad Deum elevatam habetis, *per quod et salvamini*, id est, salutem acquiritis, credendo et evangelicæ legis præceptis B obediendo : quia per fidem et operationem virtuosam evadit homo damnationem perpetuam, atque æternam meretur nunc et post hanc vitam acquirit salutem. Et hoc constat esse verum, *qua ratione prædicaverim vobis, si retinetis*. Ordo verborum est : « si retinetis », id est, in memoria habetis, « qua ratione », id est quo fine, qua spe, quo argumento, « prædicaverim vobis » Evangelium Christi. Prædicavi enim illud vobis ad hunc finem et propter hanc spem, ut adipiscamini felicitatem æternam. Argumentum quoque quo probavit Apostolus veritatem evangelicæ prædicationis, non fuit ratiocinatio humana, sed miraculorum ostensio, qua Deus testimonium perhibuit veritati. Unde et alibi : Prædicatio (inquit) mea non fuit in persuasibilibus humanæ sapientiæ verbis, sed in ostensione signorum. De quibus in Actibus legitur : Virtutes non modicas fecit Deus per

A manus Pauli, ita ut super languidos deferrentur a corpore ejus sudaria vel semicinctia, et recedebant ab eis languores, et spiritus nequam egrediebantur. Denique hæc retinetis, et per Evangelium salvamini, *nisi frustra*, id est si non inaniter, *credidistis* evangelicæ prædicationi.

Tradidi enim, id est prædicavi, *vobis in primis*, id est inter præcipua sub fide cadentia, *quod et accepi*, id est, Deo revelante cognovi. Et quid sit illud, subjungitur : *quoniam*, id est quod, *Christus mortuus est pro peccatis nostris*, hoc est, pro expiatione vitiorum generis humani est crucifixus : juxta illud Apocalypsis, Christus dilexit nos, et lavit nos a peccatis nostris in sanguine suo ; *secundum Scripturas Prophetarum*, qui hoc prænuntiaverunt, et Apostolorum ac Evangelistarum, qui hoc impletum esse scripserunt. Unde in Isaia scriptum est : Ipse autem vulneratus est propter iniquitates nostras, attritus est propter scelera nostra. In Threnis quoque loquitur Jeremias : Christus Dominus captus est in peccatis nostris. *Et quia sepultus est, et quia resurrexit tertia die secundum Scripturas*. De sepultura equidem Christi Isaïas prædixit : Erit sepulcrum ejus gloriosum ; itemque, Dabit impios pro sepultura, et divites pro morte sua. De resurrectione quoque Christi apud Osee prædictum est : Vivificabit nos post duos dies, et in die tertia suscitabit nos. Sophonias quoque ait : Expecta me, dicit

Apoc. 1, 5.

Is. LIII, 5.

Thren. IV, 20.

Is. XI, 10.

Ibid. LIII, 9.

Osee VI, 3.

Soph. III, 8.

I Cor. II, 4.

Act. XIX, 11, 12.

Dominus, in die resurrectionis meæ in futurum.

Et quia visus est Cephæ, id est, Petro Joann. i, 42. apparuit, cui Christus prædixit : Tu vocaberis Cephæ. Et quamvis locus et hora hujus apparitionis non cognoscantur certe, creditur tamen facta quando Petrus Ibid. xx, 10. et Joannes a monumento redierunt separatim, in crepusculo diei resurrectionis dominicæ, quando Petrus abiit secum mirans. *Et post hæc visus est undecim*, id est, undecim Apostolis apparuit in conclavi, in octava resurrectionis suæ, Thoma Ibid. 26. præsentem, ut apud Joannem fertur. Apparuit quoque undecim Apostolis in Galilæa, ut Matthæus habet. In die autem resurrectionis suæ Christus apparuit decem Apostolis, Thoma absente, ut scribit Joannes. Et recte nunc dicitur, Visus est « undecim », quoniam tempore hujus apparitionis nondum substitutus fuit Matthias pro traditore. *Deinde visus est plus quam quingentis fratribus simul : ex quibus multi manent*, id est, corporaliter vivunt, *usque adhuc*, quia tempore quo Paulus hæc scripsit, vixerunt; *quidam autem dormierunt*, id est, morte sopiti sunt, tandem resurrecturi. De hac visione nullus Evangelistarum quid scripsit. Aliqui tamen opinantur apparitionem hanc factam in Galilæa, ubi et quando apparuit undecim discipulis, ita quod tunc non solum apparuit undecim illis, sed et quingentis istis discipulis : quod incertum videtur. *Deinde visus est Jacobo Minori*, fratri Simonis et Judæ, qui vovit se non comesturum quousque Filius hominis a morte resurgeret : idcirco in die Paschæ Christus ei seorsum apparuit. Sicque, quod dicitur nunc, « deinde », non denotat ordinem apparitionis determinate, quoniam apparitio ista fuit ante duas præfatas. Aliqui tamen dicunt, quod præter istam, Christus post prædictas apparitiones adhuc semel apparuit Jacobo huic seorsum. De apparitione autem Jacobo facta nullus Evangelistarum conscripsit. *Deinde visus est Apostolis omnibus* in die ascensionis. Tunc enim Christus bis appa-

ruit : primo, undecim Apostolis recumbentibus, ut dicit Marcus; deinde, eisdem et aliis multis in monte Oliveti, quando ascendit, ut dicitur in Actibus. Et inter illos creditur fuisse Matthias, qui inter Ascensionem et Pentecosten in apostolum est promotus. Marc. xvi, 14-19. Act. i, 4 et seq.

Novissime autem omnium prædictorum, puta post ascensionem atque Paracleti missionem, *tanquam abortivo, visus est et mihi*. Hoc fuit quando Paulus transivit Ibid. ix, 2-7. Damascus ad persequendum Christianos : tunc enim Christus in via sibi apparuit, ut in Actibus describitur. Porro abortivum vocatur fetus extra congruum tempus nascens, aut cum violentia exiens, sive ad debitam non perveniens quantitatem. Sicque propter tria comparat se Apostolus abortivo. Primo, quoniam ante missionem Spiritus Sancti alii Apostoli spiritualiter sunt renati seu baptizati a Christo, ipse postmodum ab Anania, ut in Actibus habetur. Secundo, quia cum quadam coactione conversus est, scilicet per terrores et Ibid. 17. minas, Christo ad eum dicente : Quid me Ibid. 4, 5. persequeris ? Durum est tibi contra stimulum calcitrare. Tertio, quoniam aliis Apostolis minor fuit, respectu vitæ suæ præteritæ, in qua blasphemus fuit, contumeliosus I Tim. i, 13. et persecutor Ecclesiæ, sicut ad Timotheum scribens testatur ac deflet. Ideo subdit : *Ego enim sum minimus Apostolorum* : non simpliciter, sed quantum ad aliqua, quia ultimo ad apostolatum vocatus. Juxta quem modum Jacobus Alphæi (de quo prædictum est) vocatus est Jacobus Minor, respectu Jacobi filii Zebedæi, Marc. xv, 40. non sanctitate aut dignitate, sed quia vocatione posterior. Paulus tamen vocat se ideo minimum Apostolorum, quia persecutus fuit Ecclesiam Dei. Idcirco subjungit : *Qui non sum dignus vocari apostolus*, habendo respectum ad demerita præcedentia, *quoniam persecutus sum Ecclesiam Dei*. Nam viros et mulieres in Act. viii, 3; ix, 2. Christum credentes cepit, ligavit, incarcerationavit, atque occidi procuravit, sicut in Actibus Apostolorum multoties tangitur :

quod nullus aliorum fecit Apostolorum. **A**utique minimus, sed sapientia, fervore, labore magnificus. *Et gratia ejus in me vacua*, id est infructuosa, *non fuit*, sed fecundissima valde : quia plus omnibus ^{I Cor. xv,} divisim acceptis laboravit Apostolis ; plu-^{10.} ra etiam scripsit quam aliquis aliorum, et plura terrarum spatia percurrit ad prædicandum ; plura quoque et graviora pro fide perpessus est, ac propriis manibus ^{Ibid. iv, 12.} victum sibi quæsivit.

SERMO PRIMUS

DE FIDEI CHRISTIANÆ FIRMITATE, QUÆ NON RATIONI HUMANÆ, SED SUPERNATURALI OPERATIONI INNITITUR ; DEQUE MAHOMETICI ERRORIS VANITATE.

S*INE fide impossibile est placere Deo.* **B** Hebr. xi, 6.

^{I Cor. xv,}
^{† et seq.}

Sanctus Apostolus in hodierna epistola innuit, fidem christianam non inniti rationi humanæ, sed supernaturali operationi divinæ, quæ a Deo tanquam sigillum applicatur legis evangelicæ documentis, in testificationem quod a Deo sint documenta hæc ipsa. Quemadmodum enim fides est de supernaturalibus veritatibus, quæ humana nequeunt ratione probari ; ita per supernaturalia argumenta, utpote Prophetarum oracula ac divinæ potestatis miracula, est probata. Ideo assentire iis quæ sunt fidei, non est levitatis, quamvis sint incomprehensibilia, quum sint divinitus copiosissime approbata. Hinc teste Apostolo, « Sine fide impossibile est » viatorem, hoc est hominem in hac vita, quæ via est ad futuram vitam, « Deo placere ».

^{Hebr. xi, 6.}

Denique de hac re S. Thomas in Summa contra gentiles, libri primi capitulo sexto, valde notabiliter scribit, dicendo : Veritati supernaturali, cui humana ratio non præbet experimentum, fidem adhibentes non leviter credunt. Hæc enim sapientiæ divinæ secreta (puta credenda), æterna et increata Sapientia omnia plenissime sciens,

dignata est hominibus revelare : quæ etiam sui præsentiam, et suæ doctrinæ ac inspirationis veritatem convenientibus argumentis ostendit, dum ad confirmandum ea quæ naturalem rationem excedunt, opera visibiliter demonstravit et fecit quæ totius naturæ superant facultatem, utpote in mirabili curatione languorum, in suscitatione mortuorum, in cœlestium corporum immutatione, et, quod mirabilius est, in humanarum mentium inspiratione, ita ut idiotæ et simplices dono Spiritus Sancti repleti, summam sapientiam atque facundiam in instanti consequerentur. Quibus inspectis, non armorum violentia, non carnalium voluptatum promissione, et, quod mirabilissimum est, inter persecutorum tyrannidem, innumerabilis turba hominum non solum simplicium, sed et sapientissimorum virorum, ad christianam fidem convolavit, in qua omnem humanum intellectum excedentia prædicantur, voluptates carnis cohibentur, et omnia quæ in mundo sunt contemni docentur. Quibus animas mortalium consentire, maximum miraculorum est, et manifestum divinæ inspirationis opus atque indicium, ut contemptis visibilibus sola invisibilia cupian-

tur. Præterea, hoc non subito neque casu factum esse, sed ex divina dispositione, hinc innotescit quod Deus hoc se esse facturum multis Prophetarum prædixit oraculis, quorum libri apud nos in veneratione habentur. Hæc autem tam admiranda mundi ad christianam fidem conversio, certissimum exstat indicium præteritorum signorum, ita ut ea iterari necesse non sit, quum in suo effectu reluceant evidenter. Esset enim omnibus signis mirabilius, si ad credendum tam incomprehensibilia, ad operandum tam difficilia, ad sperandum tam alta, mundus absque mirabilibus signis fuisset inductus a simplicibus ignobilibusque hominibus, quamvis non cesset Deus, etiam temporibus nostris, ad fidei confirmationem, per Sanctos suos miracula operari.

Porro, ii qui sectas errorum introduxerunt, via inceserunt contraria, ut patet in Mahometo, qui carnalium voluptatum promissis, ad quarum desideria carnalis movet concupiscentia, populos sibi attraxit; præcepta etiam tradidit promissis suis conformia, carnali relaxans voluptati habenas, in quibus in promptu est a carnalibus hominibus obediri. Insuper documenta veritatis non attulit, nisi quæ a quolibet mediocriter sapiente naturali ingenio possunt cognosci: quin potius vera quæ docuit, fabulis falsissimisque doctrinis immiscuit. Signa quoque non adhibuit supernaturaliter facta, quibus solis divinæ inspirationi et supernaturali veritati sufficiens testimonium adhibetur, dum operatio visibilis quæ non potest esse nisi divina, ostendit veritatis doctorem divinitus inspiratum; sed dixit se in armorum potentia esse missum: quod genus signorum nec latronibus neque tyrannis deest. Ei quoque non aliqui sapientes in rebus divinis atque humanis exercitati, a principio crediderunt, sed homines bestiales in desertis morantes, totius divinæ doctrinæ prorsus ignari, per quorum multitudinem, armorum violentia, alios ad suam legem acceptandam coegit. Præterea, nulla præ-

cedentium Prophetarum oracula seu vaticinia ei testimonium perhibent: quin potius quasi omnia veteris novique Testamenti documenta et scripta, fabulosa narratione depravat, ut patet legem ipsius inspicienti. Unde astute libros veteris ac novi Testamenti suis sequacibus non reliquit legendos, ne per eos falsitatis argueretur, suaque falsitas deprehenderetur. Ideo qui ejus dictis fidem adhibent, leviter credunt. — Hæc Thomas loco præallegato. Et ista sint dicta pro eo quod ait in epistola hodierna Apostolus: Qua ratione prædicaverim vobis, si retinetis. *I Cor. xv, 2.*

Amplius, juxta doctrinam Apostoli, per evangelicam doctrinam stamus, quoniam hæc doctrina docet ac jubet nos carnalia et terrena despicere, atque ad supernorum et æternorum amorem mentem erigere, dicente Apostolo: Quæ sursum sunt quærite, non quæ super terram. Unde et Christus: Nolite (inquit) thesaurizare super terram; thesaurizate autem vobis thesauros in cælo: ubi enim thesaurus tuus, ibi est et cor tuum. *Coloss. iii, 1, 2.* *Matth. vi, 19-21.*

Insuper ex epistola ista docemur nos ipsos in omnibus profundissime humiliare, eo quod talis ac tantus Apostolus, scilicet Paulus, qui omnibus plus laboravit, et usque ad tertium cælum fuerat raptus, atque tam copiosissimum in Ecclesia fecit fructum, vocat se minimum Apostolorum et indignum vocari apostolum. Tanti ergo exemplo Apostoli, inspiciamus peccata nostra præterita, et defectuositates vilitatesque nostras, ac culpas quotidianas, ex quorum consideratione humiliemus ac vilipendamus nos jugiter ac profunde, bona vero, si qua forsitan habemus, Deo grata ac humili mente attribuamus, cum Apostolo profitentes: Gratia Dei sum id quod sum. *I Cor. xv, 10.* *II Cor. xii, 2.* *I Cor. xv, 9.* *Ibid. 10.*

Sed contra præinducta objici potest: Si enim Paulus fuit indignus vocari apostolus, ergo male egit vocando se apostolum in multis epistolarum suarum locis. Insuper Apostoli pares fuerunt in ecclesiastica potestate, Petro excepto, qui fuit eorum

Rom. i, 1;
I Cor. i, 1;
Galat. i, 1;
etc.

prælati et princeps : ergo Paulus non A
exstitit minimus inter eos. Imo Leo Papa
affirmat, quod de Petro et Paulo nihil de-
bemus sentire diversum. Glossa etiam ait,
Galat. II, quod Paulus restitit Petro in faciem ut
11. par. Postremo, Paulus secundum verita-
tem dignus et valde dignus fuit vocari
apostolus, secundum quod alibi loquitur :
II Cor. XII, Nihil minus feci ab iis qui sunt supra mo-
11. dum Apostoli. Ergo non dixit veraciter :
Non sum dignus vocari apostolus. Et re-
spondendum, quod ad verificationem ora-
tionum ex humilitate prolatarum, sufficit B
quod secundum aliquam piam considera-
tionem possint salvari. Sicque Paulus vo-
cat se minimum Apostolorum et indignum
vocari apostolum, per respectum ad præ-
cedentia sua demerita, et quia vocatione
fuit posterior; sed quantum ad merita sua
ex Dei gratia sibi concessa, fuit dignus
valde dici apostolus : et quantum ad ea,
non debemus Petrum ipsi præferre.

Legitur quod S. Bernardus habuit quem-
dam monachum qui gravem habuit tenta-
tionem circa veritatem Sacramenti altaris, C
in tantum quod tandem non credidit in
sacramento Eucharistiæ Christum veraci-
ter esse. Unde quando conventus mona-
chorum solenniter communicavit, occulte

subtraxit se, nec communicavit cum aliis.
Quod quum diu fecisset, aliqui monacho-
rum consideraverunt hoc ipsum, interroga-
veruntque Fratrem illum cur ita egisset.
Qui videns se non posse latere, veritatem
aperuit eis, dicens se non credere quod
Christus esset in Sacramento : quod mo-
nachi statim retulerunt S. Bernardo. Qui
Fratrem illum vocavit ad se, atque de fi-
dei veritate diligenter eum instruxit; sed
ille non acquievit, imo asseruit se nun-
quam credere posse quod in Sacramento
esset Christus veraciter, ideoque certum
se esse quod æternaliter esset damnandus.
Quo audito, beatissimus atque piissimus
pater Bernardus dixit : Quid ? damnabitur
monachus meus ? Absit hoc in æternum.
Itaque S. Bernardus oravit pro monacho
illo; et tempore alio, quando Fratres com-
municaverunt, præcepit monacho illi, di-
cens : Jubeo te in virtute obedientiæ ut in
mea fide vadas cum aliis, et Sacramentum
accipias. Frater igitur ille repugnare non
audens, obedivit. Et statim Sacramento ac-
cepto, ab omni tentatione diaboli ac perfi-
dia sensit se liberatum, egitque gratias
magnas Deo altissimo et sancto abbati suo
B. Bernardo; atque de cetero devotus fuit
integerque in fide.

ENARRATIO IN EVANGELIUM

DIXIT JESUS AD QUOSDAM QUI IN SE CONFIDEBANT TANQUAM JUSTI. Luc. XVIII, 9-14.

QUONIAM omnium vitiorum caput, re- D
gina et mater est superbia, omnium
vero virtutum fundamentum, nutrix et de-
cor, humilitas; idcirco Christus in evange-
lio isto, ad detestationem superbiæ atque
ad humilitatis amorem et amplexum in-
format nos, proponens exemplum valde
notabile. Itaque ait Evangelista : *Dixit Je-
sus ad quosdam qui in se*, id est in pro-
priis meritis ac viribus magis quam in

pietate et gratia Dei, *confidebant tanquam
justi*, id est, quasi vere justi fuissent,
quum fuerunt præsumptuosi, vani spiri-
tualiterque superbi. Tales etenim aliqui
fuerunt in turba cui Christus prædicavit.
Quorum corda intuens ipse, propter eo-
rum correctionem dixit sequentia, quam-
vis eos non expresserit nominatim. *Et
aspernabantur ceteros tanquam injustos
ac viles*, quum tamen ipsi sola sua super-

bia essent aliis viliores : quoniam sola superbia destruit omnia, si comitetur. Aspernatio quoque eorum ostendit quod vere justī non erant, quia ut ait Gregorius, Vera justitia habet compassionem, falsa indignationem. Tales sunt qui vana singularitate lætantur, et quamvis opera faciunt bona ex genere, non tamen in vero spiritualis seu virtuosæ vitæ fundamento, utpote humilitate, se figunt, sed ceteris meliores cupiunt reputari. De quibus in sua Canonica fatetur Judas apostolus : Hi sunt qui segregant semetipsos, animales, spiritum non habentes. *Parabolam*, id est similitudinem, *istam*. Et crebro contingit aliquid tale.

Judæ 19.

Duo homines ascendebant in templum : quod fuit in Jerusalem, et situm fuit in alto loco, puta in monte Sion, ideo duo isti intrando templum ascendisse dicuntur; *ut orarent*. *Unus Phariseus*. Pharisei erant religiosi Judæorum, sicut nunc monachi Christianorum; erantque Pharisei in habitu et observantiis multis ab aliis Judæis distincti, sed tempore Christi fuerunt communiter ambitiosi, cupidi atque hypocritæ : nam secta eorum fuerat deformata. *Et alter publicanus*. Publicani vocabantur apud Judæos, qui vectigalia seu tributa aut telonea exigebant aut conducebant, aut lucrosis quibusdam intenti erant negotiis. Et quoniam talia raro fiunt absque peccato, publicani reputabantur publici peccatores.

Phariseus stans ut videretur ab aliis orans, quum magis debuisset se in terram prosternere aut genua flectere, ad reverentiam majestatis divinæ, *hæc apud se orabat*, simulatorie magis quam vere : quoniam oratio est elevatio mentis ad Deum devota cum impetrandi affectu. *Deus, gratias ago tibi, quia non sum sicut ceteri hominum, raptores, injusti, adulteri*. Mirum videtur cur iste Phariseus dicatur fuisse superbus, qui opera sua bona Deo adscripsit. Sed multiplices infectus fuit superbia : primo, quoniam etsi omne bonum noverat esse a Deo, bona tamen sua sibi a Deo collata putavit, non solum ex divina

A misericordia, sed etiam pro industria atque justitia sua; secundo, quia etsi verbis gratias egit, mente tamen intumuit, ab hominibus videri cupiens et laudari, imo et de sua gratiarum actione inaniter gloriabatur; tertio, quia de bonis suis super alios insipienter se extulit; quarto, quoniam alios temerarie judicavit ac sprexit, specialiter publicanum, cujus interiora non vidit. Præterea, quum in Proverbiis dicitur, Justus in principio accusator est sui, Phariseus iste inordinate exorsus est a propria laude. Rectus ergo orandi ordo est, primo se ipsum accusare, deinde Deum suppliciter invocare, atque in fine gratias agere Deo : sicut sacerdos celebraturus præmittit Confiteor, postea orat, et tandem in gratiarum actione consummat.

Velut etiam hic publicanus. Despective hoc ait et temerarie judicat. Quis enim scit quid agatur in homine, nisi spiritus hominis? Ideo dicit Apostolus : Tu quis es, qui judicas alienum servum? Suo domino stat aut cadit. Unde absolute et certitudinaliter aliquem esse in peccato mortali judicare non possumus, nisi videamus aut certe noscamus eum esse in actu peccati mortalis, aut debiti actus omissione. Non ergo facile alios judicemus nec contemnamus, quum omni possint momento tangi a Deo et pœnitere. Denique, etsi agnosceremus quales nunc sint, tamen quales futuri sint aut in Dei providentia exstent, penitus ignoramus. Itaque, sicut de aliis sperare debemus quod prædestinati exsistant, ita de se ipso quilibet metuere debet ne forte præscitus sit atque finaliter condemnandus.

Jejuno bis in sabbato, id est in hebdomada, quam Judæi sabbatum appellabant a principali die hebdomadæ, cujus sabbatum nomen fuit. Tale est jejunium jejunantium ventre a cibis, non mente a vitiis. Contra quos loquitur Deus per Isaiam : Numquid tale est jejunium quod elegi? *Decimas do omnium quæ possideo*. Quod magnum non fuit, quoniam omnia quæ habemus, a Deo accepimus.

Prov.
xviii, 17.

1 Cor. ii, 11.

Rom. xiv, 4.

Is. lviii, 5.

Et publicanus a longe stans, videlicet in posteriori et extrema parte templi, reputans se indignum sacratoribus templi locis, videlicet choro et altari, appropinquare. Per quod multorum etiam nunc sacerdotum et clericorum impudentissima reprobatur præsumptio, qui quum vitiis animæ corporisque repleti sint, sacra tamen ingredi loca, pollutisque labiis psallere, aut etiam celebrare præsument. *No- lebat nec oculos corporales ad cælum levare*, præ pudore magnitudinis ac turpitudinis vitiorum suorum erubescens coram divinæ sanctitatis præsentia apparere, et Deum suum in cœlis habitantem vix audens adspicere. *Sed percutiebat pectus suum*, ex contritionis dolore, et reprehendens cor suum, quod tantorum fuit vitiorum origo et causa. Pectoris namque percussio, est interioris pravitatis reprehensio, aut etiam compunctionis ostensio. *Dicens : Deus, propitius esto mihi peccatori.* Oratio brevis verbo, sed magna virtute, modica quantitate, sed plena sententia : quam ipsemet Christus composuit. Hæc C namque parabola est, ita quod Christus asserit publicanum sic orasse, ut doceat nos ita orare. Frequenter ergo hæc verba corde humillimo ac ferventi dicamus.

Deinde ad nostram informationem po-

nitur Judicis summi sententia. *Amen*, id est vere, *dico vobis : Descendit*, id est, a templo recessit, *hic publicanus justificatus*, id est de injusto justus a Deo effectus, seu a peccatis purgatus virtutibusque ornatus, *in domum suam ab illo*, id est præ Pharisæo, qui sicut peccator advenit, sic peccator reversus est, imo pejor rediit quam venit, quia in templo intumuit. *Quia omnis qui se exaltat* per superbiam, id est, magnum vane se reputat, et propriam excellentiam quærit, *humiliabitur*, id est, a Deo iudice deprimetur, reprobabitur, atque in terram projicietur, nisi interim vere pœniteat seque humiliet. *Et qui se humiliat*, propria peccata, defectuositates, fragilitates vilitatesque suas recognoscendo, et Deo se ipsum cordialiter subjiciendo, *exaltabitur*, quia a Deo laudabitur, atque ab eo suscipiet dona gratiæ ac virtutum in vita præsenti, donaque gloriæ in futuro, et in regno cœlesti inter angelos constituetur, juxta illud Job : Qui humiliatus fuerit, erit in gloria. Unde in Proverbiis habetur : Humilem spiritu suscipiet gloria; *Prov. xxix, 23.* superbum vero sequetur humilitas. Idcirco princeps Apostolorum : Humiliamini (inquit) sub potenti manu Dei, ut vos exaltet in tempore visitationis. Deus quippe superbis resistit, humilibus autem dat gratiam. *Ibid. 5.*

SERMO SECUNDUS

CONTRA SUPERBIAM ET FILIAS EJUS.

ODIBILIS coram Deo et hominibus est *superbia.* Eccli. x, 7.

Superbia est inordinatus appetitus propriæ excellentiæ, seu sui ipsius reputatio nimis magna. Hoc vitium omni Christiano est potissimum fugiendum. Primo, quoniam documentis et operibus seu exemplis Domini nostri Jesu Christi maxime contrariatur. Nam Christus humilitatem

potissimum docuit, dicendo : Beati pauperes spiritu, id est humiles, secundum unam expositionem, quoniam ipsorum est regnum cœlorum; et iterum, Discite a me, quia mitis sum et humilis corde; itemque, Nisi conversi fueritis, et efficiamini sicut parvuli, non intrabitis in regnum cœlorum. Et item : Omnis qui se exaltat, humiliabitur; et qui se humiliat, exaltabitur. *Matth. v, 3.* *Ibid. xi, 29.* *Ibid. xviii, 3.* *Luc. xiv, 11;* *xviii, 14.*

In quibus verbis, sicut humilitatem docuit ac præcepit, sic superbiam penitus vituperavit atque prohibuit.

Denique Christus in sua conceptione, nativitate, infantia, conversatione et passione humilitatem præsertim monstravit et adimplevit. Et primo hoc patet de ejus conceptione seu incarnatione ex Virgine.

Luc. 1, 26 et seq.

Philipp. 11, 6.

Ibid. 7.

Luc. 11, 6, 7.

Ibid. 21, 22.

Matth. 11, 14.

Ibid. 10, 13.

Ibid. 14, 1 et seq.

Luc. 22, 27.

Matth. 23, 28.

Ibid. 19, 11.

Joann. 13, 1 et seq.

Hoc enim fuit summæ et ineffabilis atque incomparabilis humilitatis, quod quum Deo Patri esset vere æqualis, tamen humanam naturam assumere et suæ deitati immediata ac suppositali unione unire dignatus est. Propter quod ait Apostolus : Exinanivit se ipsum, formam servi accipiens. Fuit quoque humiliatio magna, quod pauperem virginem elegit et assumpsit in matrem. Secundo patet hoc in Christi nativitate, quoniam in parvulo oppido, in vili stabulo, in noctis medio nasci elegit, et protinus in præsepio reclinari, ceterisque infantibus in corporis passibilitate, teneritudine ac indigentia assimilari : nam et ploravit ac vagiit. Tertio patet hoc in ejus infantia, in qua instar aliorum puerorum a Matre lactatus est, et circumcidi atque in templo præsentari, et in Ægyptum fugere est dignatus. Quarto patet idem in tota ipsius conversatione in sæculo isto. Nam cum Matre Virgine et S. Joseph secrete et diu in summa vixit humilitate, nec ante congruum tempus ingressit se ipsum ad prædicandum, ad operandum miracula, ad congregandum discipulos. Deinde dignatus est a Præcursore proprio baptizari, a diabolo quoque tentari. Deinceps elegit pauperes simplicesque in Apostolos atque discipulos, inter quos humillime vixit, quemadmodum protestatur : Ego in medio vestrum sum sicut qui ministrat ; et denuo, Filius hominis non venit ministrari, sed ministrare. Insuper, quam humiliter et dignanter, quam caritative et pie se habuerit ad peccatores, ex Evangelio declaratur, quia cum illis comedere dignabatur.

Quinto hoc patet in ejus passione. Nam in Cœna novissima verbis et exemplo hu-

ilitatem edocuit ac præcepit, ante discipulorum genua se curvando, pedes illorum lavando et tergendo, eis quoque dicendo : Exemplum dedi vobis, ut et vos ita faciat. Quibus etiam iterum tunc dicebat : Qui major est in vobis, fiat sicut junior ; et qui præcessor est, sicut ministrator. Idque admirandissimæ fuit humilitatis, quod et sceleratissimi traditoris sui lavit tersitque pedes, et ante illum se inclinavit, a quo se noverat mox tradendum. At vero quam humillime et superhumillime se habuit in sua passione, nullus valet exprimere : quod ab inquinatissimis illis transgressoribus, quos uno verbo dejecit in terram, permisit se tam violenter capi, tam dure ligari, tam atrociter duci, et postea velari, alapis cædi, conspui, irrideri et blasphemari ; quod instar latronis permisit se vinctum præsentari Pilato, quod tam humillime et silenter, tam mansuete et patienter stetit coram eo et etiam coram Herode ; quod in præsentia tot millium hominum se nudari, et flagellari permisit ; quod crucem bajulans exivit ad mortem, et inter latrones suspendi dignatus est.

Joann. 13, 15.

Luc. 22, 26.

Joann. 8, 6.

Ecce in omnibus his unigenitus Filius Dei docuit nos humilitatem amare, amplecti, implere incessabiliterque servare, omnem vero superbiam detestari, odire, abjicere. Quicumque ergo superbus est, non Christi, sed diaboli est minister.

Secundo superbia cunctis est Christianis summe vitanda, quoniam maxime displicet Deo, quemadmodum sacra Scriptura copiosissime protestatur. Scriptum est enim : Juravit Dominus in anima sua, Detestor ego superbiam, et odi. In Proverbiis quoque Dominus loquitur : Arrogantiam, et superbiam, et os bilingue detestor. Hoc etiam patet ex effectum divinæ justitiæ, quæ peccatum superbiæ in cœlo tam horribiliter vindicavit, ita quod pro celerrimo motu superbiæ æternam intulit damnationem præstantissimis creaturis, Lucifero et adhæsoribus ejus.

Amos 6, 8.

Prov. 8, 13.

Is. 14, 12-15.

Tertio superbia est tam maxime evitan-

da, quoniam maxime dedecet omnem creaturam intellectualem ac rationalem. Creatura quippe eo ipso quo creatura, est res dependens ac indigens, et de se non habens nisi deficere, imo nihil esse. Quæ si ad momentum sibi ipsi relinqueretur a Creatore, laberetur in nihilum : jugiter ergo subdi debet proprio Creatori et ad ipsum converti, eique grates rependere ac omne bonum adscribere. Potissimum quoque superbia non decet hominem, propter multiplicem ejus fragilitatem et corporis vilitatem, sordes et fœditates naturæ ac culpæ, innumerabiles quoque defectuositates et calamitates ipsius. Hinc clamat

Eccli. x, 9. Scriptura : Quid superbit terra et cinis?

Job xi, 12. Apud Job demum scribitur : Vir vanus in superbiam erigitur, et tanquam pullum onagri se liberum natum putat. Hinc loquitur Origenes : Cur, homo, arrogantia elevaris, obliviscens quid eris, quam fragili corpore continearis, quibus stercoribus sis immersus, et qualia semper purgamenta de tua projicis carne?

Quarto superbia est maxime abhorrenda, quoniam ipsa potissimum contumeliam et injuriam, rapinam et furtum facit Deo.

1 Tim. i, 17. Soli etenim Deo altissimo debetur honor et gloria, principatus et excellentia; et ista sibi usurpat superbus, quoniam in se cupit honorari ac reputari, præesse atque excellere, imo se ipsum Deo præponit. Deus equidem vult ut suæ voluntati obediatur; superbus vero non acquiescit in hoc, sed resistit vultque propriam fieri voluntatem. Quumque Deus non exigit suam fieri voluntatem nisi in licitis et honestis, superbus suam vult fieri, imo et facit voluntatem in inhonestis atque in illicitis, sicque directe opponit se Deo.

Joh. xv, 12, 13. Propter quod scriptum est : Quid te elevat cor tuum, et quasi magna cogitans, attonitos habes oculos? Quid tumet contra Deum spiritus tuus? Hinc denuo ait Scriptura :

Ibid. 26. Cucurrit impius adversus Deum erecto collo, et pingui cervice armatus est. Idcirco dicit Hieronymus : Quid tam superbum, quid tam ingratum videri potest, quam

adversus illius vivere voluntatem a quo ipsum vivere accepisti, et illius præcepta despicere qui ideo præcipit ut causam habeat remunerandi?

Quinto superbia est maxime fugienda, quia tam multa ex ea oriuntur peccata. Unde in Ecclesiastico fertur : Initium omnis peccati est superbia; qui tenuerit illam, implebitur maledictis, id est vitiis, et subvertet eum in finem. Circa quod asserit Glossa : De superbia nascuntur hæreses, schismata, detractio, invidia, loquacitas, contentio, jactantia. Ideo ait Bernardus :

Initium omnis peccati et causa totius perditionis, est superbia. Quisquis ergo salvari desideras, contra superbiam habe in mente crucem Christi, ne in superbiam eleveris. Denique, quanto quisque superbior fuerit, tanto injuriam sibi illatam reputat graviolem : sicque in iram et impatientiam ruit, atque adversus eos qui suæ voluntati contrariantur, facile invidiam concipit, et talibus indignatur, detrahit, maledicit. Quanto etiam quis est superbior,

tanto majores communiter facere vult expensas, et pretiosius indui curiosiusque ornari : sicque ex superbia generatur avaritia, et filiæ ejus, puta : fraus, furtum, rapina, usura, simonia, mendacium, perjurium, imo interdum etiam homicidium. Et ita facile est pensare qualiter omnium vitiorum origo, regina et radix appelletur superbia. Idcirco Tobias ait : Superbiam nunquam in tuo sensu aut in verbo tuo dominari permittas ; in ipsa enim sumpsit initium omnis perditio. In Ecclesiastico quoque præcipitur : Non te extollas in cogitatione tua velut taurus, sed humilia valde spiritum tuum, quia vindicta impii, ignis et vermis.

Sexto superbia maxime est vitanda, quoniam maximum infert animæ damnum : primo, quoniam efficit eam diabolo similem; secundo, quia per eam privatur homo divino auxilio, sicque in omnem corrumpitur pravitate; tertio, quia præcipue efficit hominem divinæ illuminationis et gratiæ incapacem. Superbis etiam Deus resistit.

Eccli. x, 15.

Tob. iv, 14.

Eccli. vi, 2; vii, 19.

Jacob. iv, 6.

Habac. II, 5. Unde Habacuc inducit : Quomodo vinum A fatetur Apostolus : Ignorantes Dei justitiam, et suam volentes statuere, justitiæ *Rom.* x, 3.
potantem decipit, sic erit vir superbus, et non decorabitur. Superbia etenim mentem ita obtenebrat et seducit, quod propriam vilitatem, fatuitatem, iniquitatem et ingratitudinem, imo et infinita sua pericula non advertit. De hac autem materia adhuc innumerabilia possent adduci, sed brevitati studendum est, atque ex paucis jam introductis plura elici queunt.

Postremo omnem summopere vitemus superbiam. Nec de donis naturalibus, scilicet pulchritudine, eloquentia, fortitudine, B neque de bonis fortunæ, videlicet nobilitate, opulentia, potentia, nec de habitibus acquisitis, utpote quibuscumque scientiis scholasticis, neque ex aliorum adulatione, laudatione aut honoratione nobis exhibitis extollamur; sed neque ex donis gratuitis, non ex virtutibus scientiisque infusis, neque ex bonis operibus nostris præteritis intumescat cor nostrum, ne cum Phariseo isto reprobari mereamur ac condemnari. Nec alios aspernemur, nec temere quempiam judicemus, neque aliis præferamus C nos absolute, quum ignoremus quales cras erimus et an finaliter consequemur salutem, aut quales sint alii in prædestinatione divina. Sed quanto plura a Deo suscepimus bona, tanto eidem gratiores subjectioresque simus; et totam vitam nostram in tutissimo humilitatis fundamento stabiliamus, nec aliquid nos proficere arbitremur, nisi in vera profecerimus humilitate. Qui enim in se ipsis inaniter gloriantur et de meritis suis præsumunt, aut bona quæ operantur, suis viribus aut laboribus magis quam gratiæ Dei adscribunt, excæcati sunt mente, stolidi et inanes. De quibus D

At vero quanta vitia in præsentī, et quanta supplicia in futuro incidat homo ex peccato superbiæ, evidenter patet in Absalone filio regis David, viro pulcherri-
mo, sed ambitiosissimo. Qui ex immoderantissima elatione conabatur proprium patrem regno expellere et vita privare, atque per varia blandimenta corda populi sibi attraxit, quia de mane stabat in porta civitatis Jerusalem, et introeuntes blande alloquebatur, ampletebatur et osculabatur, quatenus suo tempore caperent eum in regem. Deinde facta conjuratione valida contra David regem, misit nuntios in omnes terminos regni Israel, qui dixerunt : Regnavit Absalon in Hebron. Moxque populus undique concurrit ad eum, et unxit eum in regem super se. Deinde, ut manus populi confortarentur secum, vitiosissimum commisit incestum cum uxoribus patris sui. Tandem bellum aggressus contra exercitum patris sui, succubuit, et occisa sunt viginti millia de adhærentibus sibi. Quumque fugeret ipse insidens mulo, mansit cum crinibus suis adhærens quercui, pertranseunteque mulo pendebat ad ramum. Quo cognito, Joab princeps militiæ David accepit tres lanceas, et cordi Absalonis eas infixit : et ita in sceleribus suis periculosissime obiit.

Fugiamus itaque omnem ambitionem et elationem, quia certissime numerari peccata non valent quæ exinde procedunt, ut testatur Gregorius. Cupiamus ergo subesse potius quam præesse, obedire magis quam præsidere.

SERMO TERTIUS

DE QUATUOR SPECIEBUS SUPERBIÆ, ET DE HUMILITATE, ATQUE ALIQUOT
EVANGELII HUIUS DOCUMENTIS.

OMNIS qui se exaltat, humiliabitur; A et qui se humiliat, exaltabitur. Luc. XVIII, 14.

Magister totius humilitatis Dominus noster Jesus Christus, superborum damnationem et humilium salvationem prædicit, ut superbiam detestemur et humilitatem in omnibus amplectamur. Denique, secundum B. Gregorium, quatuor sunt species superbiæ. Prima, dum aliquis bona quæ habet, putat se a se ipso habere. Sed quæri potest, quomodo aliquis possit esse in hac superbiæ specie. Jam etenim omnibus B constat quod omne bonum a Deo est: nam omnia clamant, Ipse fecit nos, et non ipsi nos. Unde in libro Job dicitur: Quis ignorat quod manus Domini fecit hæc omnia? Et respondendum, quod superbi dicuntur putare quod ea quæ habent, habeant a se ipsis, quia sic agunt et vivunt, et ita se habent ac si ita putarent. Juxta quem modum intimatori et impii asseruntur non credere quod Jesus sit Filius Dei. Unde Paulus de inobedientibus ait: Dicunt se nosse Deum, factis autem negant. Et per C Ezechielem Dominus loquitur regi Ægypti: Audi, Pharao draco magne, qui dicis, Meus est fluvius, et ego feci me ipsum. Unde Bernardus: Putasne, inquit, Filium Dei reputet Jesum, quisquis ille est qui illius non terretur comminationibus, nec attrahitur promissionibus, nec præceptis obtemperat, nec consiliis acquiescit?

Præterea sex sunt propter quæ superbus ita se habet ac si putaret se bona sua a se ipso habere: primum, quia in corde suo inaniter gloriatur de eis, quasi non D habeat ea a Deo; secundum, quia de bonis suis se jactat; tertium, quia de eis Deo

gratias non agit; quartum, quia non habentem talia qualia ipse habet, contemnit; quintum, quoniam sibi ipsi vult vivere, et non Deo, nam proprium quærit honorem et gloriam; sextum, quando de bonis suis non tribuit Deo id requirenti. Dum etenim pauper postulat sibi propter Deum elemosynam dari, Deus petit in paupere: dum ergo superbus non dat, Deo in paupere negat. Propter quod ait Salvator: Quamdiu non fecistis uni ex his fratribus *Matth. xxv,* meis minoribus, nec mihi fecistis. Unde ^{45.} et Augustinus: Dicit tibi Christus: Da mihi ex meo quod tibi dedi; de meo quæro, et mihi non donas? Hoc est quod ait Gregorius: Gratuitum putas quod proximo tuo impendis, velis nolis debitor es.

Secunda species superbiæ est, dum quis se putat habere pro meritis suis bona quæ habet a bonitate et misericordia Dei. Istud autem est valde irrationabile, et perversum atque ingratum. Primo, quia est directe contrarium gratiæ Dei, et evacuat eam, dicente Apostolo ad Romanos: Si *Rom. xi, 6.* gratia, jam non ex operibus; alioqui gratia non est gratia. Ad Ephesios quoque: Gratia (inquit) salvati estis per fidem, et hoc non ex vobis, Dei enim donum est; *Ephes. ii,* non ex operibus, ne quis gloriatur. ^{8, 9.} Secundo, quia superbia ista Deum liberalissimum piissimumque datorem reputat venditorem, dum ea quæ a Deo accepit, credit se emere meritis suis. Tertio, quia species ista superbiæ obstruit homini fontem divinæ misericordiæ. Quarto, quoniam quantumcumque conetur homo, tamen non sufficit solvere Deo quod ei debet. Totum namque quod sumus, possumus et habemus, Deo omnipotenti debemus ratione

Ps. xcix, 3.

Job xii, 9.

Tit. i, 16.

Ezech. xxix, 3.

creationis. Propter quod ait Bernardus in A libro de amando Deum : Quia totum me debeo Deo pro me facto, id est, quia creavit me, quid addam pro me refecto, et ita refecto, id est pro me per Christi passionem liberato?

Quinto, quoniam bene agendo facit homo propriam utilitatem, non utilitatem

Ps. xv, 2. aliquam Dei, qui bonorum nostrorum non

Job xxxv, 6, 7. eget. Hinc in Job habetur : Si peccaveris, quid Deo nocebis? Porro si bene egeris, quid donabis ei? Has duas rationes tangit

Luc. xvii, 10. Christus, dicens : Quum feceritis omnia B

quæ præcepta sunt vobis, dicite : Servi inutiles sumus; quod debuimus facere, fecimus. Sexto, quia et merita nostra sunt dona Dei, et ex gratia ejus dependent. Septimo, quia coram Deo frequenter sunt demerita quæ merita esse putamus. Sed et opera nostra bona, imperfecta sunt valde.

Job iv, 18, 19. Hinc apud Job inducitur : Ecce qui servant ei non sunt stabiles, et in angelis suis reperit pravitatem : quanto magis hi qui habitant luteas domos, consumentur velut

Ibid. xv, 14-16. a tinea? Rursusque scriptum est : Quid est C

homo ut immaculatus sit? Ecce inter sanctos Dei nemo immutabilis, et cœli non sunt mundi in conspectu ejus : quanto magis abominabilis et inutilis homo, qui bibit quasi aquam iniquitatem? Hinc beatissimus asserit Isaias : Facti sumus ut immundus omnes nos, quasi pannus menstruatae universæ justitiæ nostræ. Nullus ergo de meritis suis præsumat, præsertim quum ignoremus an opera nostra sint meritoria, quia nescimus an stemus in caritate.

Job ix, 20, 21. Propter quod sanctus Job dixit : Si D

justificare me voluero, os meum condemnabit me; etiam si simplex fuero, hoc ipsum ignorabit anima mea.

Tertia species superbiæ est, dum quis putat se habere bona quæ non habet : ut dum quis se reputat virtuosum aut sapientem, quum sit vanus et incircumspectus. Ista species superbiæ valde est detestanda : Primo, quia a Deo maledictionem meretur, juxta illud Isaiæ : Væ qui sapientes estis in oculis vestris, et coram

Is. v, 21.

vobismetipsis prudentes. Secundo, quoniam valde impedit hominem ab infusione gratiæ et virtutum, secundum illud Proverbiorum : Vidisti hominem sapientem sibi videri? magis illo spem stultus

Prov. xxvi, 12.

habebit. Tertio, quia qui hac specie superbiæ fœtet, magis credit adulatoribus et vanis laudatoribus ipsum exaltantibus, quam veritati et propriæ discussioni. Sicque illuditur ei, et multis modis decipitur, sicut et per Isaiam Dominus protestatur :

Popule meus, qui te beatum dicunt, ipsi

Is. iii, 12.

te decipiunt, et viam gressuum tuorum dissipant. Considera ergo te ipsum, o homo. Vide an aspernationes atque injurias animo patienti ac tranquillo valeas sustinere, an increpationes gratanter accipias, an in adversitatibus stabilis perseveres : sicque agnoscere poteris an vere sis humilis. Examina diligenter te ipsum, an universa Dei atque Ecclesiæ præcepta impleveris, et ultra hoc te servum arbitreris inutilem : et ita non aestimabis te habere facta virtutum quibus cares. Unde ei qui ita non agit, Deus in Apocalypsi loquitur : Dicis, quia dives sum et nullius egeo, et nescis quia tu es miser et miserabilis, pauper, cæcus et nudus.

Apoc. iii, 17.

Quarta superbiæ species est, dum quis in æstimatione sua præponit se ceteris, et eis despectis cupit videri singulariter habere bonum quod habet. Et istud est iniquum ac fatuum, sicut præactum est, quum simus incerti quales coram Deo sint alii, imo ignari de nobismetipsis, an simus in caritate, et utrum prædestinati simus an reprobi. Itaque proprias defectuositates et culpas pensemus, aliorumque bona quæ habent aut quæ habere possunt consideremus, ut sic despiciamus nos ipsos, et alios honoremus. Denique præinductis concordat quod valde notabiliter scribit Bernardus, dicendo : De ignorantia tui venit in te superbia, dum meliorem quam es, decepatrix cogitatio tua te esse mentitur. Hoc quippe est superbia, hoc omnis peccati initium, quum major es in oculis tuis quam apud Deum. Si

enim sciremus quales essemus in oculis Dei, nec supra nec infra secedere debemus; nunc vero quia id ignoramus, justius tutiusque novissimum locum eligimus. Non ergo est periculum, quantumcumque te humilies, quantumcumque parvum te reputes aut minorem quam es; est autem grande malum horrendumque periculum, si vel modice plus quam es te extollas, si vel uni homini te præponas, quem Deus judicat tibi parem aut meliorem.

Insuper, secundum doctores, tres sunt gradus humilitatis. Primus est, subdere se majori, et non se præferre æquali : et hæc vocatur humilitas sufficiens, quoniam sufficit et necessaria est ad salutem. Secundus gradus est, subdere se æquali, et non se præferre minori : et ista vocatur humilitas abundans. Tertius gradus humilitatis est, subdere se minori : et vocatur humilitas superabundans. Itaque humiles
Eccli. xix,
 23. *simus veraciter, non apparenter : est enim qui nequiter se humiliat, et interiora ejus plena sunt dolo. Interiorem quoque humilitatem ostendamus foris decenter in verbis, in incessu, in vestibus. Præterea, exemplo publicani, erubescamus coram Deo puritatis immensæ de enormitate et turpitudine vitiorum nostrorum, de fatuitate cogitationum et imaginationum nostrarum, de perversitate affectionum nostrarum, de negligentis, acediis et ingratitude nostris; atque in tantum verecundemur de his et quod quotidie coram præsentia vultus divini et in conspectu sapientiæ ejus, tam irreverenter, insipienter et negligenter, tam prave et fœde habemus nos, ut nec oculos præsumamus sæpe levare ad cælum, sed mente et facie humiliemus nos intime. Debemus itaque publicanum hunc imitari : primo, pudorem habendo internum de nostris peccatis; secundo, contritionis dolorem; tertio, humilem oris confessionem, et veram ac integram propriæ iniquitatis accusationem; quarto, ferventem pro remissione et gratiæ infusione orationem; quinto, condignam satisfacti-*

onem, et diligentem de cetero mentis custodiam ne peccemus.

Atque in primis et summe caveamus superbiam, quam Deus singulariter odit, et aliquando vindicat etiam in præsentem, sicut in libro Esther legitur de Aman superbissimo, nato ex semine regis Agag. Quem Aman Assuerus, rex et imperator Persarum, in tantum sublimavit, quod primus post ipsum, ab omnibus honorabatur, omnesque servi regis Assueri coram illo genu flectebant, excepto Mardocheo Judæo, viro timorato et justo, qui ex zelo justitiæ noluit genu flectere coram Aman, ne honorem Deo debitum impenderet homini. Quo cognito, Aman decrevit non solum Mardocheum, sed et totum genus Judæorum occidere, obtinuitque ab Assuero rege per informationem falsissimam, licentiam hoc agendi. Quo percepto, Mardocheus et Esther regina, mulier virtuosa, ceterique Judæi, Deum instantissime deprecabantur diebus ac noctibus, in jejuniis et ciliciis, lacrimis atque gemitibus, ut eos a tanto liberaret periculo.

Insuper Aman infra septa domus suæ fecit præparari et erigi patibulum, habens in altitudine cubitos quinquaginta, ut Mardocheus suspenderetur in illo. Mardocheus vero fecerat antea quamdam maximam fidelitatem regi Assuero. Duo enim eunuchi proposuerunt occidere illum : quod dum Mardocheus cognovisset, insinuavit hoc regi. Rex autem quamdam noctem duxit insomnem, et fecit coram se legi quæ sub ejus contigerunt imperio : sicque inter cetera lectum est ibi quemadmodum Mardocheus regem liberavit a morte. Mane autem facto Aman intravit ad regem, ut impetraret licentiam suspendendi Mardocheum in patibulo sibi præparato. Et antequam petivit hoc, rex dixit ad Aman : Quid fiet viro quem rex voluerit honorare ? Cogitans Aman quod rex nullum nisi se proponeret honorare, respondit : Vir quem rex vult honorare, indui debet regiis vestibibus, et diademate capiti ejus imposito, super equum regis

Luc. xiv, 10.

Amos vi, 8.

Esther iii.

Ibid. iv.

Ibid. v, 14.

Ibid. vi.

Esther vii, viii.
sedere, atque per totam civitatem circum-
duci, uno ex principibus regis equum cum
freno tenente, præcurrente et exclaman-
te : Hoc honore condignus est quemcum-
que rex voluerit honorare. Tunc rex dixit
ad Aman : Vade, et omnia quæ locutus
es, fac Mardochæo Judæo. Quod Aman
cum maximo fecit mœrore. Paulo post
Esther regina indicavit regi quod Mardo-
chæus esset patruus ejus, et qualiter Aman
per falsas suggestiones impetrasset licen-
tiam occidendi Judæos, de quorum semine

A ipsa esset. Tunc quoque unus ministrorum
regis indicavit ei qualiter Aman præpa-
rasset patibulum quinquaginta cubitorum
in altitudine Mardochæo. Dixitque rex :
Suspendite Aman in eo. Quo facto, rex
constituit Mardochæum in dignitate atque
officio Aman. Unde patet quod Deus su-
perbos humiliat, et sperantes in se hu-
miles exaltat. Istud contigit tempore ve-
teris Testamenti, quando Judæi fuerunt
populus Dei, et lex Moysis adhuc cur-
rebat.

Prov. xxix,
23; *Luc.*
xviii, 14.

AD RELIGIOSOS

SERMO QUARTUS

DE FIDEI CERTITUDINE, ET HUMILITATE.

GRATIA Dei sum id quod sum. I Cor. B
xv, 10.

Sicut ad supernaturalem finem, qui est
clara et fruitiva divinæ essentiae visio per
speciem, Deus condidit hominem, ita per
supernaturalia media eum perducit ad il-
lam. Et media ista sunt duplicia : quædam
sunt accidentia homini formaliter inhæ-
rentia, utpote gratia, virtutes infusæ, et
dona Spiritus Sancti; alia sunt substan-
tialia sive extrinseca homini, sicut huma-
nitas Christi, incarnatio Verbi, passio et
resurrectio, ascensio ac cetera mysteria C
Salvatoris.

Porro virtutum infusarum prima est fi-
des, quæ est futuræ beatificæ visionis ac
consummatæ notitiæ superbeatissimæ Tri-
nitatis inchoatio quædam seu obscura co-
gnitio. Sed quia hæc fides est de superna-
turalibus veritatibus, quæ scilicet naturali
ratione nec inveniri queunt nec compre-
hendi, idcirco per supernaturalia argumen-
ta fuit probanda, per quæ sciretur esse a
Deo collata. Et hoc omnipotens Deus co-

piosissime fecit, præsertim in novo Te-
stamento, in primis per Christum, dein-
de per Apostolos ac alios Sanctos, usque
in præsens, innumerabilia, præclarissima
et sibi soli possibilia per illos agens mi-
racula, sine quibus certissimum est mun-
dum nunquam potuisse ad tam incompre-
hensibilem fidem ac arduissimam legem
converti. Denique hæc ipsa quæ in no-
vo credimus Testamento peracta, in ve-
teri Testamento Deus per tales ac tantos
prædixit agenda, quod illis non credere,
extremæ esset dementiæ. Unde quanta sit
fidei christianæ certitudo ac veritas, pan-
dit in multis locis Apostolus, præsertim
ad Galatas : Licet (inquiens) angelus de
cælo evangelizet vobis præterquam quod
evangelizavimus, anathema sit. Verum quan-
to pro nostra salute plura fecit ac pertulit
Unigenitus Dei, quanto pro christianæ fi-
dei confirmatione majora ac plura prodi-
gia operari dignatus est Deus æternus,
tanto damnabiliores, ingratiore negligen-
tioresque sumus, nisi digne Deo et juxta

Galat. i, 8.

fidei altitudinem spiritualiter conversati A fuerimus. Propter quod ad Hebræos ait *Hebr. ii, 1, 3, 4.* Apostolus : Abundantius oportet nos observare ea quæ audivimus, ne forte perfluamus : quomodo enim effugiemus, si tantam neglexerimus salutem, quæ in nos confirmata est, contestante Deo signis, et prodigiis, et virtutibus, et Spiritus Sancti distributionibus ?

Præterea, ut cetera sacratissimæ fidei nostræ argumenta omittam, nonne nos omnes aut plures ex nobis admirabilem et gratiosam Dei operationem in nobis ipsis B sumus ubertim experti, præsertim in conversione nostra ad religionis ingressum ? Quid enim tam admirabilissimum, ut quod adolescentes et juvenes mundo aptissimi, divitiis et deliciis affluentes, vanitatibus assueti vitiisque repleti, repente et improvise totaliter mente et voluntate immutentur, compungantur, imo de extremo in extremum non per medium moveantur, alterentur et convertantur, atque invitis parentibus, propinquis, amicis, omnes illos et totum mundum et se ipsos relinquant, C Ordinem intrent in quo civiliter moriuntur, et in professione se usque in finem promittunt mansuros ? Quodque summe mirabile est et divinæ operationis evidentissimum signum, frequenter præfata immutatio, compunctio, conversio, fit absque adminiculo omni humano, et ut sic loquar, quasi renitente eo qui tangitur ea et religionem ingreditur.

Insuper, quoties quum desolati, devoti, duri, tentati frigidique essemus, experti nos sumus subito consolari, illuminari, accendi, tranquillari ac agiles fieri ? Non utique viribus nostris, quum ad talia sæpe non valeamus pertingere, quantumcumque conemur ad ea, multoties autem repentina præventionem sine nostro conamine ad ea facillime pertingamus, atque crebro tam copiose et valide, ut nec reniti valeamus, nec ferre possimus. Hinc Christus testatur : Nemo potest venire ad me, nisi Pater, qui misit me, traxerit eum ; *Joann. vi, 44.* itemque, Nemo (inquit) potest venire ad

me, nisi fuerit ei datum a Patre meo. Et iterum fatetur : Si quis voluerit voluntatem Dei facere, cognoscat de doctrina mea an ex Deo est. Qui enim imperativa et efficaci voluntate voluerit voluntatem Dei facere, id est præcepta servare, potissime qui studuerit secundum evangelicæ legis consilia conversari perfecte, is in se ipso experimentaliter sentit fidei veritatem, et Spiritus Sancti admirabilem ac gratiosissimam operationem. Quum ergo tam inæstimabilis beatitudo promissa sit nobis a Deo, non cessemus cum omni diligentia et fervore, cum omni puritate et profectu incessabiliter servire Altissimo. *Joann. vii, 17.*

Amplius, ex hodierna epistola in humilitate vehementer instruimur, quum beatissimus et laboriosissimus iste apostolus Paulus, qui fuit usque ad tertium cælum *II Cor. xii, 2.* raptus, vocat se minimum Apostolorum et apostolatus appellatione indignum, quia Ecclesiam Dei se meminit persecutum. *I Cor. xv, 9.* Ejus ergo exemplo humiliemus nos omnifarie et complete, et quidquid boni in nobis est, Deo humillime ac gratissime adscribentes, propria peccata et quotidianas culpas nostras proponamus uberrime oculis nostris, ex quorum intuitu et ponderatione condigna despiciamus et castigemus nos ipsos, omnique persecutione atque molestia dignos nos arbitremur : sicque quidquid adversitatis contigerit nobis, quidquid persecutionis fuerit nobis illatum, patientissime toleremus, gratias Deo agentes quod in præsentem aliquid pro nostris excessibus sustinemus ; nec aliquid tot et tantis peccatis nostris condignum pati nos fateamur. Qui sua universa peccata rite perpendit et efficaciter ponderat, circa aliorum defectus nequaquam inutiliter occupatur, nec facta seu vitia alterius curiose observat, scrutatur aut stolide judicat. Imo sicut nullius peccata sic intuetur ac ponderat quemadmodum propria, sic neminem tam defectuosum, peccatorem ita aspernabilem reputat sicut se ipsum. Et frequenter in tantum sibi displicet, ut videatur sibi quod infra

coelum et terram non sit tam miser, tam vilis, tam vitiosus homo ut ipse; et cum ^{1 Tim., I, 15.} Apostolo ex corde fatetur : Venit Jesus peccatores salvos facere, quorum ego primus sum.

Præterea, quanto quis immoderatio et curiosior fuerit aliorum observator, inspector, dijudicator, tanto minus advertet, deplanget, vitabit et corriget proprias labe ac trabes. Ideo grave est curiositatis vitium, quod dum hominem circa alium occupat, se ipsum sibimetipsi abscondit; atque ut sanctus abbas Paphnutius dixit, talis similis est habenti proprium mortuum illumque relinquenti, et ad deplorandum sui vicini defunctum pergenti. Quod totum in religiosis summe præposterum est et iniquum, quia eorum potissime est sibimetipsis et Deo tantum intendere.

Postremo, cum Apostolo quilibet nostrum confiteatur et dicat, « Gratia Dei sum id quod sum »; nec unquam inaniter extollamur. Sed utinam quod sequitur, cum Apostolo fari possimus : Gratia ejus

A in me vacua non fuit. Itaque studeamus jugiter fructuosi existere, gratiæ cooperari, in cunctis virtutibus stabiliri, ea quæ sanctæ religionis sunt strenue observare, intus et extra nos custodite habere, alter alterius onera portare, honore invicem prævenire, per caritatem mutuo deservire, caritative ac dulciter invicem affici, exemplariter conversari, et mutuo ad meliora provocare, nullum temporis momentum infructuose expendere; ut sic humiliemur in bonis, et assueti reddamur exercitiis semper insistere virtuosus, sicque cum ingenti delectatione Deo in omnibus obsequamur, nec animo fatigemur. Tales fuerunt sanctissimi Patres nostri in eremo, qui sæpe tota nocte orationi et contemplationi indesinenter et gaudio se erant intenti, orienteque sole contristabantur quod a summa et incommutabili luce exercitium suum suspendere cogebantur. Quorum sacra vestigia saltem aliquantulum sequi nitamur, ad Dominum Deum nostrum corda nostra per orationem et contemplationem ubertim levantes.

SERMO QUINTUS

DE QUADAM MIRABILI ET OCCULTA SUPERBIÆ SPECIE.

PHARISÆUS stans, hæc apud se orabat : Deus, gratias ago tibi, quia non sum sicut ceteri hominum. Luc. XVIII, 11. D

Mirum videtur cur iste Pharisæus divinitus reprobetur : primo, quoniam secundum legem Moysis vixit, imo et amplius quam lex jussit peregit, bis in omni hebdomada jejunando, quod non erat præceptum in lege; secundo, quia de bonis quæ egit gratias retulit Deo. Cur ergo superbus? Si dicatur quod ideo quia se prætulit aliis, aut publicanum contempsit, neutrum horum videtur posse salvari. Quum enim ^{1 Cor., II, 12.} dicat Apostolus, Nos non spiritum hujus

mundi accepimus, sed Spiritum qui ex Deo est, ut sciamus quæ a Deo donata sunt nobis; constat licitum esse ut is qui præ ceteris excellentiora gratiarum charismata se noscit sortitum, se præferat illis. Nam et anima Christi quamvis omni creatura fuerit humilior, tamen a suæ creationis principio certissime novit omni rationali intellectualique creatura se quasi incomparabiliter eminentiorem, et cunctis se prætulit, id est, digniorem verissime reputavit. Paulus quoque de se aliisque loquens Apostolis, Nos (inquit) primitias Spiritus habentes : ergo se et coapostolos

prætulit aliis in sanctitate et gratia. Sed et David primo Paralipomenon loquitur Deo : Fecisti me spectabilem præ omnibus hominibus. Denique peccator in quantum hujusmodi, contemptibilis est, et juste a justo contemnitur, juxta illud Psalmistæ :
I Par. xvii, 17.
Ps. xiv, 4. Ad nihilum deductus est in conspectu ejus malignus.

Et respondendum, quod Pharisæus iste multipliciter fuit culpabilis ac superbus. Primo, quia de se ipso judicavit incaute. Nam dato quod ante fuisset justus, non tamen certitudinaliter scivit se habere caritatem et gratiam : idcirco non debuit cum tanta assertione justum et virtuosum se reputare. Quod tamen agendo, fecit contra id quod in Ecclesiastico scriptum est :
Eccli. vii, 5. Non te justifies ante Deum. Secundo, quia de proximo suo, videlicet publicano, temerarie judicavit. Quum enim ignoraret quid Deus in interioribus publicani operaretur, judicavit eum adhuc in veteribus vitiis perdurantem, qui vere et valde tactus, compunctus, inflammatus et illuminatus fuit a Deo, qui potest hoc totum in quolibet peccatore quantumlibet impio, quum sibi placuerit, operari. Tertio, quoniam de ipsa sua gratiarum actione intumuit, et laudem quæsivit humanam. Quarto, quoniam gratiarum actio sua non fuit vera gratiarum actio, utpote ex virtute latriæ prodiens, sed potius vana sui ipsius proditio sive jactatio, ex detestabili sui complacentia nascens. Quinto, quia quod aliis se prætulit, non ex vera sapientia aut prudentia, sed ex inconsideratione et ignorantia venit. Non enim consideravit se ipsum nec alios nisi secundum unum respectum, videlicet se quantum ad bona quæ egit, et alios quoad mala quæ fuerant operati. Debuit autem se considerare ac alios etiam secundum alios diversos respectus, ut infra tangetur. Hinc Climacus loquitur : Ex gratiarum actione frequentius hæc passio, puta superbia, paululum accipere diligit, id est, aliquid incitamenti sumit. Irreverenter enim sine rubore ex procæmiis, hoc est a principio, negare

A Deum, id est adjutorium gratiæ Dei, non suggeret. Vidi ore gratiarum actiones referentem, et ex propria prudentia se ipsum extollentem ac magnificantem. Testatur hoc Pharisæus ille ironice dicens : O Deus, gratias ago tibi. Hæc Climacus.

Præterea, ut in homilia loquitur Augustinus, species hujus superbiæ potest etiam subrepere et accidere homini justo et bonæ spei viro. Quocirca sciendum, quod quum superbia sit quidam tumor atque elatio animi, se ipsum ultra terminum sibi præfixum efferentis et magnificantis, constat quod superbia oriatur ex consideratione seu apprehensione alicujus boni seu eminentiæ sibi inexistens aut convenientis vere aut æstimative. Ideo pro ut diversa sunt hominis bona, multiplex invenitur superbia. Sunt enim bona fortunæ, sunt bona Ecclesiæ, sunt bona naturæ, sunt et bona gratiæ. Bona fortunæ sunt possessiones terrenæ ; bona autem Ecclesiæ dici possunt vel ecclesiastici redditus, vel ecclesiasticæ dignitates ; bona vero naturæ sunt naturalia dona, ut pulchritudo, eloquentia, ingeniositas, bonitas complexionis atque ingentis indolis. Itaque de bonis fortunæ, hoc est divitiis, aut ecclesiasticis redditibus, superbire, est quasi carnalis et grossa superbia, sæculares et novos ac pusillos tentans religiosos. Qui etiam de eminentia naturalium solent superbire donorum : nam et quidam religiosi inveniuntur tam imperfecti, ut de vocis sonoritate, de promptitudine legendi, cantandi, loquendi, superbiant atque inaniter gloriantur, et Fratres in talibus defectuosos despiciant. Quidam demum de acquisita sua intumescunt scientia : quorum puerilitas et imperfectio magna est valde. Porro alia est spiritualis subtiliorque superbia, qua quis de eminentia bonorum gratiæ, utpote virtutum et meritum, inflatur, vel quasi a se ipso habeat ea, vel quoniam putat ea sibi inesse quum aliter sit, vel æstimat ea sibi in abundantia ampliori inesse quam insint, et sic temerarie præfert se aliis, aut non ex so-

la misericordia Dei, sed ex propria quoque industria et labore ac merito sentit sibi ea esse collata, seu ea esse se adeptum.

Contra omnes istas superbias sunt generalia quædam remedia. Primum est, quod ait Apostolus : Quid habes quod non accepisti? Si autem accepisti, quid gloriaris quasi non acceperis? Secundum est, consideratio propriarum iniquitatum, vilitatum, defectuositatum, immunditiarum in anima et corpore, et miseriarum vitæ præsentis. Tertium est, considerare quod diabolus est rex super omnes filios superbiae : ideo qui abhorret esse et dici servus filiusque diaboli, detestetur superbiam. Quartum est, considerare quod superbia est diabolicum vitium, primum peccatum, et omnium vitiorum origo, regina et mater. Quintum est, quod superbia specialissime displicet Deo, et sæpissime ac districtissime prohibetur ab eo. Sextum, quod Christus in omnibus summe fugit, vitavit et reprobavit superbiam, et amplexatus est humilitatem. Septimum, quod superbia facit hominem Dei inimicum, et ei rebellem atque sacrilegum, et summe ingratum. Deus enim superbis resistit; et soli Deo debentur honor et gloria, quos sibi usurpat superbus. Ea quoque quæ Deus ex sua infinita bonitate, caritate, misericordia, munificentia dedit, superbus sibi ipsi adscribit, aut eis abutitur; nec de eis Deum, sed se ipsum glorificare conatur. Octavum, quia per superbiam homo sibi gravissimam damnationem mercatur. Sunt autem et alia multa contra superbiam tam odibilem et enormem remedia, utpote : consideratio districti iudicii Dei, qui cui plus dedit, plus ab eo requirit; consideratio quoque propriæ obligationis, quia quanto plura et majora quis a Deo sortitus est dona, tanto amplius est adstrictus ut sit Deo gratus ac subditus.

Denique, contra spiritualem superbiam, quæ ferventiores et eminentiores solet amplius impugnare, sunt præter prædicta adhuc specialia multa remedia. Pri-

mum, quia incerti sumus an amore an odio digni simus. Secundum, quia etsi probabiliter agnoscamus nos esse in caritate et gratia, prorsus tamen nescimus an finaliter Deo placebimus et in gratia finiemus. Tertium, quia de proximis ignoramus quales sint in prædestinatione divina. Quartum, quia et quid nunc agatur in eis nescimus, et qui nunc pessimus esse videtur, subito potest compungi, et Deo agente optimus fieri. Quintum, quod homo non est bonus iudex in propria causa, et multipliciter ac facillime potest errare, de aliis judicando. Sextum, quia etsi homo aliunde bonus exsisteret, tamen sola superbia destruit omnia, si comitetur. Septimum, quoniam fatuum est extollere semetipsum de bonis virtutum, quum omnium virtuosorum actuum sit humilitas fundamentum : idcirco superbus nondum ad fundamentum virtutum venisse probatur. Octavum, quoniam quanto dona supernaturalia gratiæ magis excedunt vires animæ naturales, tanto indecentius, injustius et insipientius est superbire de eis. Nonum, quod et solum omnem elationem evellere et omnem humilitatem inserere exstat idoneum, est quod ipsemet Dominus et Salvator, Christus Unigenitus Dei, in Evangelio loquitur : Quum feceritis (inquiens) omnia quæ præcepta sunt vobis, dicite : Servi inutiles sumus; quod debuimus facere, fecimus. Quomodo ergo potes te alteri in gratiæ donis præferre, qui nescis an exsistas in gratia, an finaliter sis salvandus, an alter sit magis prædestinatus quam tu? Quomodo judicas te esse in gratia magnum et excellentem, ac aliis præfulgentem, qui ignoras an vel minimum de gratia habeas, et quæ bona in aliis latent? Si itaque omnia jam prædicta profunde ac rite consideraverimus, erimus vere valdeque humiles, defectuosi, viles et contemptibiles in oculis propriis, omnem detestantes superbiam, quæ præ cunctis mundi hominibus indecentissima est omni homini religioso.

Quæ quam abominabilis sit, et quanta

Eccle. ix, 1.
Luc. xvii, 10.

I Cor. iv, 7.

Job xli, 25.

Jacob. iv, 6; I Petr. v, 5.

I Tim. i, 17.

Luc. xii, 48.

pariat mala, Climacus pandens, ait : Superbia est negatio Dei, inventio dæmonum, despectio hominum, condemnationis et temerarii iudicii mater, laudum proles, infructificationis argumentum, effugatio adiutorii Dei, ecstasis et amentiae præcursor, ruinarum conciliatrix, defectionis occasio, furoris fons, hypocrisis porta, dæmonum firmamentum, vitiorum custos, inviscerositatis adductrix, compassionis ignorantia, rationis avarus positor et exquisitor, exactor crudelis et inhumanus, luctator Deo contrarius, blasphemiae radix. Initium superbiæ, est finis vanæ gloriæ ; medium vero superbiæ, est contemptus proximorum, et propriorum laborum ac dolorum invereconda propalatio, propriæ laudis amor cordialis, redargutionisque odium ; finis vero, negatio adiutorii Dei, mos dæmoniacus. Altum sapiens monachus contradicit vehementer ; humile autem sapiens monachus contradicere nescit. Dedignatur cypressus pergere super terram, et arrogans monachus et corde superbus dedignatur obedientiam possidere. Vir altus corde desiderat principari. Superbis Deus resistit : quis ergo eorum poterit misereri ? Immundus est coram Deo omnis arrogans corde : et quis de cetero eos mundare valebit ? Hæc Climacus. *Jacob. iv, 6.*

Discamus ergo a Christo, quia mitis est et humilis corde, omnem odientes superbiam in cogitatione et affectione, in verbo atque silentio, in omissione et commissione, in incessu, vestitu, omnique apparatu : quoniam qui tenuerit superbiam, induetur maledictis, id est peccatis, per quæ merebitur maledici æternaliterque damnari a Iudice summo, Deo sublimi, justo et benedicto. *Matth. xi, 29.* *Eccli. x, 15.*

SERMO SEXTUS

DE LAUDE ET ORIGINE HUMILITATIS, ET DE VITUPERIIS ATQUE EFFECTIBUS
MALEDICTÆ ELATIONIS.

OMNIS qui se exaltat, humiliabitur ; et qui se humiliat, exaltabitur. Luc. XVIII, 14.

Quemadmodum sanctus loquitur Augustinus, Humilitas est, ex intuitu propriæ conditionis et sui Conditoris voluntaria mentis inclinatio in suo imo, ordinabili ad proprium Conditorem. Et datur hæc definitio potius de humilitatis actu, quam de ipsa virtute seu habitu humilitatis. Humilitas namque gratuita, de qua nunc sermo, est virtus infusa, id est a Deo per creationem collata atque producta, per quam homo ex intuitu seu consideratione sui ipsius ac proprii Creatoris, se ipsum coram Deo sponte inclinat, et quasi spiritaliter genuflectit, seque prosternit, dejicit, vilipendit et subdit, atque ex interiori inclinatione etiam corporaliter inclinat, genuflectit, prosternit ac dejicit se. Hæc ergo humilitatis inclinatio ex duplici procedit consideratione, videlicet sui ipsius ac Creatoris.

Consideratio demum sui ipsius ad humilitatem impellens, est multiplex valde. Prima, qua consideramus nos ipsos secundum quod ex nihilo sumus plasmati. Secunda, qua consideramus nos ut incessabiliter ab Omnipotente dependentes, et ejus conservatione indesinenter omni momento egentes, sine qua nec ad punctum possemus in esse manere. Tertia, qua consideramus nos ipsos secundum esse specificum, et quoad id quod sumus per naturam. Sicque, quamvis respectu corporalium et irrationalium creaturarum, magnæ dignita-

tis sit homo, tamen respectu superiorum et intellectualium est magnæ defectuositatis : nam sicut se habet materia prima in ordine entium, in quibus infimum locum tenet, ita se habet anima rationalis in ordine intellectualium substantiarum.

Quarta, qua consideramus animam nostram secundum naturales suas potentias, in quibus omnibus est ineffabiliter defectuosa. Intellectus namque valde est debilis, cito fallibilis, ignorantia vulneratus, ad errores proclivis ; et ea quæ scimus, imperfecte scimus, et minima sunt respectu eorum quæ ignoramus. Voluntas quoque malitia est infecta, ad vitia nimis prona, ad carnalia et caduca facillime a sensualitate attrahibilis. Memoria vero tota vaga instabilisque consistit. Porro appetitus sensitivus infirmitate et concupiscentia est infectus, rationi rebellis, ad mala vehementer inclinans. Per exteriores etiam sensus mors culpæ undique ingreditur animam ; interioresque sensus inquietudine sua frequenter a contemplatione divinorum exercitiisque internis impediunt mentem. Ecce quanta ærumna, quanta defectuositas, vilitas, pravitas latent in anima.

Quinta, qua consideramus corpus nostrum quantum ad id unde formatum est : quod fuit semen immundum. Sexta, qua consideramus illud quoad id quod nunc in se est : quod est valde defectuosa natura. Septima, qua consideramus illud quoad ea quæ latent et sunt in ipso, atque de ipso egrediuntur : quæ sunt immunditiæ prorsus fœdissimæ, ita quod corpus nostrum est vas nimis immundum, et sacculus fœtorum ac stercorum. Octava, qua consideramus corpus nostrum quoad suas naturales proprietates et indigentias quotidianas : sicque invenimus illud valde pauperrimum, passibile, vulnerabile et mortale. Nona, qua consideramus illud quoad ea quæ erit, qualiter scilicet in vermes, putredines et fœtores horribiles resolvetur. Decima, qua consideramus nos ipsos quoad mala culpæ, quæ committendo et omittendo incidimus, considerando

A quæ, qualia et quanta commisimus mala, et omisimus bona. Hæc consideratio præ ceteris potest et debet nos ad insuperabilem, profundissimam atque immensam humilitatem, abjectionem et subjectionem inducere.

Præterea, consideratio qua ex intuitu Creatoris ad humiliationem inducimur, etiam multiplex assignatur, secundum quod supersimplici Deo diversæ proprietates ac varia attributa conveniunt. Prima ergo est, qua ex consideratione divinæ majestatis seu infinitatis et excellentiæ, nos ipsos, et totam substantiam nostram esseque nostrum, quasi nihilum et inane et non esse reputamus, juxta illud in Psalmo : Substantia mea tanquam nihilum ante te ; et alibi : Omnes gentes quasi non sint, sic sunt coram eo. Secunda, qua ex consideratione infinitæ sapientiæ Dei, omnem in nobis existentem sapientiam, scientiam, notitiam, quasi insipientiam ac ignorantiam arbitramur, secundum illud in Jeremia : Stultus factus est omnis homo a scientia sua. Tertia, qua ex consideratione omnipotentæ Dei, omne robur nostrum quasi meram censemus infirmitatem, juxta illud : Domine, rex omnipotens, in ditione tua cuncta sunt posita, et non est qui tuæ possit resistere voluntati. Quarta, qua ex contemplatione immensæ puritatis, sanctitatis atque justitiæ Dei, omnem nostram qualemcumque munditiam, sanctitatem, justitiam, velut fœditatem, imperfectionem, injustitiam aspernamur, cum Isaia dicentes : Quasi pannus menstruatus, universæ justitiæ nostræ. Quinta, qua ex consideratione incircumscriptibilis dignitatis honorabilitatisque Dei, omnem cultum, honorem et obsequium quod ei impendimus, pro nihilo judicamus, scientes quod ipse infinita reverentia dignus sit, nosque a condigna veneratione ipsius in infinitum deficere : atque per hoc cernimus quod magnum nil agimus. Multæ consimiles possent ex parte Creatoris tangi considerationes, ex quibus nos ipsos vehementissime humiliare debemus.

Ps. xxxviii,
6.
Is. xl, 17.

Jer. x, 14.

Esther xiii,
9.

Is. lxiv, 6.

Insuper, ex consideratione perfectionis A sanctitatisque Christi, et eorum quæ pro nostra fecit ac toleravit salute, nos prorsus humiliare debemus, quoniam beneficiis ejus sumus tam ingrati, nec dignum aliquid pro eis rependere Christo valemus. De hoc Climacus protestatur: Licet mille mortes pro Christo sustinuerimus, nondum tamen quod est congruum persolvemus. Aliud enim est sanguis Dei, et aliud sanguis servorum, secundum dignitatem, non secundum essentiam. — Adhuc autem ex consideratione sanctitatis Patrum B nostrorum, habemus nos omnifarie humiliare.

Hoc denique advertendum, quod non qualiscumque consideratio prædictorum, ad veram, de qua nunc agitur, humiliationem inducit, quum multi scholastice eruditi subtiles omnia jam inducta acute cognoscant, et subtiliter eloqui sciant; nihilo minus vanitate et pompa replentur, imo de ipsa sua scientia qua ista cognoscunt ac dicunt, inflantur. Præinducta ergo sunt intelligenda de consideratione sui C emanante ex scientia illa quæ est unum septem donorum, et ex virtute prudentiæ, vel etiam ex naturali et acquisita scientia prout fide et caritate formata est. Similiter, quod dictum est de consideratione Creatoris, accipi debet de consideratione ejus ex fide formata et dono sapientiæ prodeunte. Hæc namque consideratio afficit et inflamat.

Præterea, sicut humilitas ex præfata duplici consideratione procedit, ita superbia ex imperfecta et erronea consideratione D sui et pertinentium ad se nasci videtur: dum scilicet homo se ipsum et pertinentia ad se seu inexistencia sibi considerat imperfecte, videlicet quoad id quod sunt in se, vel certe erronee, opinando ea majoris dignitatis quam sunt, et non attendit ea

per relationem ad Creatorem, et secundum veram proprietatem ac valorem eorum. Sicque miser homo superbit ex consideratione suæ nobilitatis, potestatis, prosperitatis terrenæ, vel opulentiæ, aut præsidentiae, pulchritudinis, subtilitatis, scientiæ aut eloquentiæ, aut ex consideratione donorum gratiæ quæ sibi arbitratur inesse. Sed stulta est extollentia ista, et ex imperita, imperfecta, erronea consideratione emanat. Ideo præmemorata Dei dona perfecte consideremus, et in quantum sunt B Dei dona nobis pie collata. Sic quippe ex eorum consideratione non solum non superbiemus, sed Deum magis amabimus, et ei gratiores ac subjectiores, imo et humiliores reddemur. Itaque, si juxta considerationes præhabitas consideraverimus nosmetipsos, omnem penitus elationem abjiciemus, atque in vera ac stabili humilitate fundabimur, proficiemus, perficiemur.

Postremo certissimum est, ex superbia indignationem, iram, impatientiam, proterviam, amaritudinem, pertinaciam, rebellionem audaciamque nasci. Quo etenim C quis superbior fuerit, eo injuriam sibi illatam gravius ponderat, molestius patitur, duriusque, si potest, ulciscitur; nec facilius alteri cedit, neque dociliter acquiescit, sed suam tuetur sententiam, clamat, rixatur, convitiatur. Atque ut asserit Cas- Cf. LXXVII, p. 126 C. sianus, hoc vitio infectus religiosus, ipsam Ordinis disciplinam perhorrescens, cupit aliis præesse, ut ex discipulo nequam detestabilior magister effectus, ex sua ambitione in eum cadat perniciosissimum damnablemque teporem, ut jam nec verus religiosus, nec sæcularis existat, nihilo minus ex miserabili suo statu et conversatione reputet se perfectum. Ne ergo tot vitiis impleamur, in sincerissima ac securissima humilitate jugiter permanere conemur. Ad laudem et gloriam Dei.

DOMINICA XII POST TRINITATEM

ENARRATIO IN EPISTOLAM

FIDUCIAM TALEM HABEMUS PER CHRISTUM AD DEUM, ETC. II Cor. III, 4-9.

DOCET nos sanctus Apostolus in præ-
senti epistola tria. Primum est huma-
næ fragilitatis infirmitas, qua nihil me-
ritorium possumus agere absque auxilio
gratiæ. Secundum est magnitudo et effi-
cacia pietatis ac gratiæ Dei. Tertium est
excellencia evangelicæ legis super legem
Mosaicam. Itaque ait : *Fiduciam talem
habemus per Christum ad Deum*, id est,
magnam spem et confidentiam firmam in
Deo habemus, non quod viribus nostris
aliquid boni principaliter adscribamus. Id-
eo subdit : *non quod sufficientes simus* B
cogitare, et per consequens nec velle, nec
loqui, nec agere possumus, *aliquid* meri-
torium *a nobis*, id est propria potestate,
quasi ex nobis, id est tanquam ex propria
principalique causa. Nam quamvis libe-
rum arbitrium sit aliquo modo causa ope-
ris meritorii, quia aliter nec mereremur,
nec præmiaremur, non tamen est causa
principalis illius, sed indiget tam gratia
gratum faciente et fide et caritate infusa,
quam actuali motione Spiritus Sancti ex-
citantis ipsum ad bona, ut dictum est C
sæpe. Hinc alibi dicit Apostolus : Deus
operatur in vobis et velle et perficere. *Sed
sufficientia nostra ex Deo est*, id est, vir-
tus et efficacia meritorie cogitandi, appe-
tendi, loquendi, agendi et patiendi, prin-
cipaliter profluit et dependet ex Deo, seu
ex motione et gratia Spiritus Sancti, a
quo omne donum optimum et omne da-
tum perfectum descendit, ut Jacobus di-

A cit. Unde et Christus fatetur : Sine me *Joann. xv,*
nihil potestis facere. 5.

Qui et idoneos nos fecit ministros, id
est vita et scientia dignos prædicatores
atque apostolos, *novi Testamenti*, id est
evangelicæ legis; *non littera*, id est non
per scripturam, *sed spiritu*, id est per
supernaturalem Spiritus Sancti illumina-
tionem. Non enim per exteriorem scriptu-
ram, sed per divinam instructionem et
unctionem acceperunt Apostoli evangeli-
cæ legis doctrinam a Christo, qui nullum
edidit librum, sed ore tenus instruxit Apo-
stolos, qui parum aut nihil retinuerunt ex
Christi doctrina. Idecirco post suam ascen-
sionem misit eis Spiritum Sanctum, a quo
de omnibus pertinentibus ad informatio-
nem Ecclesiæ et salutem plenissime fu-
erunt instructi, secundum quod Christus
eis frequenter prædixit, tam ante passio-
nem suam, præsertim in sermone post
Cœnam, quam post suam resurrectionem.
Hinc novum Testamentum vocatur lex spi-
ritus. Porro lex Moysis appellatur lex lit-
teræ, quia in tabulis per scripturam est
data, ut patet in Exodo. Ob quam distin-
ctionem insinuandam, Dominus ait apud
Jeremiam : Ecce dies veniunt, dicit Domi-
nus, et feriam domui Israel et domui Juda
pactum novum, non tale quale pepigi cum
patribus eorum. *Littera enim*, id est lex
vetus scripta, *occidit* occasionaliter, non
directe, quia in se bona fuit : sed gratiam
non continebat nec dabat, concupiscen-

Philipp. ii,
13.

Jacob. i, 17.

Exod. xxxi,
18; *xxxiv, 4,*
28.

Jer. xxxi,
31, 32.

tiamque augebat, eo quod humana perversitas nitatur in vetitum; auxit etiam culpam, quia post veritatis notitiam et legem divinam naturali legi superadditam gravius fuit peccare quam ante. Occidit quoque corporaliter et directe, quoniam transgressores legis præcepit occidi. *Spiritus autem vivificat*, id est, Spiritus Sanctus, qui per impositionem manuum Apostolorum et per subministrationem eorum dabatur fidelibus, vitam gratiæ præstat infundendo virtutes. Vel sic : « Littera occidit », id est sensus superficialis, qui litteralis videtur, mentem excæcat, quia erroneus est; « spiritus autem », id est spiritualis ac mysticus intellectus, « vivificat », quia illuminat mentem.

Subinde ostenditur excellentia evangelicæ legis. *Quod si*, id est Quia, *ministratio mortis*, id est lex vetus, quæ dicitur ministratio mortis eo sensu quo dictum est, Littera occidit (unde et alibi dicit Apostolus : Virtus peccati lex), *litteris deformata*, id est foris formata seu scripta, *in lapidibus*, id est lapideis tabulis, in quibus scriptus fuit Decalogus legis, videlicet decem præcepta, *fuit in gloria*, id est, splendorem et gloriam habuit in suo latore ministeriali, scilicet Moyse, *ita ut non possent filii Israel intendere*, id est visum corporalem figere, *in faciem Moysis propter gloriam*, id est claritatem, *vultus ejus*, qui fuerat luminosus ex consortio Dei. Unde in facie Moysis apparuerunt radii splendidi, angulariter ascendentes in similitudine cor-

anum, repercutientes adspectum filiorum Israel: propter quod Moyses posuit velamen super faciem suam. *Quæ ministratio*, vel quæ claritas Moysis, *evacuatur*, id est, finem accepit. Nam claritas illa cito cessavit; evangelica quoque lege vulgata, Mosaica lex cessavit. *Quomodo non magis ministratio Spiritus*, id est lex evangelica per Spiritum Sanctum indita et edocta, gratiam continens ratione sacramentorum suorum, *erit in gloria*, id est, dignitatem et gloriam habebit in suis ministris, puta Apostolis, qui primitias Spiritus Sancti acceperunt, et tam in sæculo isto quam in regno cœlesti gloriam et dignitatem magnam sortiti sunt? De quibus prædixit Propheta ad Dominum : Constitues eos principes super omnem terram; et iterum, Mihi autem nimis honorati sunt amici tui, Deus. *Isaias* quoque : Qui sunt isti qui ut nubes volant?

Nam si ministratio damnationis, id est lex vetus, quæ dicitur « ministratio damnationis » quoniam suos transgressores obligavit ad damnationem æternam, nec tamen gratiam contulit ad servandum, *gloria est*, id est honor et dignitas Moysis per quem data est; *multo magis abundat ministerium justitiæ*, id est exhibitio novæ legis, veram justitiæ perfectionem docentis et gratiam juste vivendi conferentis, *in gloria*, id est, copiosorem gloriam habet annexam, ut dictum est. Dicitur autem lex Moysis gratiam non dedisse, quoniam sacramenta veteris legis gratiam non continebant nec conferebant.

SERMO PRIMUS

DE PERFECTIONE ET EXCELLENTIA EVANGELICÆ LEGIS.

DOMINUS *judex noster, Dominus legifer noster, Dominus rex noster.* Is. XXXIII, 22.

Deus altissimus, cujus sapientiæ non

est finis, nihil a casu aut fortuito condidit, sed universa et singula propter congruum et certum finem instituit ac creavit. Propter quod Propheta orat : Memorare,

Domine, quæ mea substantia : numquid A enim vane constituisti omnes filios hominum ? Unde in libro Job scriptum est : *Job xxviii, 3.* Universorum finem ipse considerat. Porro genus humanum Deus creavit propter finem seu felicitatem supernaturalem, quæ est clara et beatifica visio Dei : ideo dedit hominibus legem convenientem, qua pertingere possint ad finem hunc. Israelitico autem populo de Ægypto egresso, dedit Deus legem per Moysen ; sed adveniente plenitudine temporis, in quo Deus Pater misit Unigenitum suum, ipse unicus Filius B Dei proprio ore novam et evangelicam instituit et docuit legem. Porro lex est præceptum ac regula per quam regulantur ac diriguntur actus eorum quibus lex datur, secundum exigentiam finis a legislatore intenti.

Quod autem excellentior sit lex evangelica quam antiqua, patet primo ex parte legislatoris. Lex enim evangelica immediate data est ab unigenito Dei Filio Jesu Christo, vero Deo et homine ; sed lex vetus data est a Deo, mediantibus angelis multis et homine uno, videlicet Moyse, cui in monte Sinai angeli loquebantur, et legem veterem indicaverunt, prout Deus ipsis præcepit. Unde ad Galatas dicitur : Lex propter transgressores posita est, ordinata per angelos in manu mediatoris. Hinc in Actibus legitur Stephanus exprobrans ingratis impiisque Judæis : Accepistis (inquit) legem in dispositione angelorum, et non custodistis. Idcirco de immediato legislatore Christianorum dici potest illud Job : Ecce Deus excelsus in fortitudine sua, et D nullus ei similis in legislatoribus. Itaque, sicut Christus fuit Moyse incomparabiliter major, sapientior, sanctior, sic decuit dari a Christo legem multo perfectiorem lege per Moysen data. Unde et Avicenna philosophus Arabs, quamvis de lege fuerit Mahometi, nihilo minus libro Metaphysicæ suæ præfert legem Christi legi Mahometi legislatoris sui, et asserit Christum Mahometo fuisse sapientiores ac magis moralem. Sarraceni quoque concorditer

legem Christianorum fatentur esse divinam, et Jesum esse Christum Dei, prout in Alcorano habetur, et Mahometus dixit ; sed ideo adstruunt Christianos esse pravissimos, quoniam legem eis a Christo datam non servant. Et quamvis in multis aliis mentiantur, tamen quantum ad hoc verum locuti sunt : præsertim quum et Apostolus ex hoc probet transgressores evangelicæ legis esse gravissime puniendos, quoniam transgressores Mosaicæ legis corporaliter occidebantur. Siquidem ad Hebræos scriptum est : Irritam quis faciens legem Moysis, absque ulla contradictione, duobus aut tribus testibus moritur : quanto magis putatis deteriora mereri supplicia, qui Filium Dei conculcaverit, et sanguinem testamenti pollutum duxerit, et spiritui gratiæ contumeliam fecerit ? Denique videmus in sæculo isto, quod quanto magis immediatus præceptor seu legislator est altior, tanto enormius est prævaricari ejus præceptum seu legem. Quum ergo immediatus Christianorum legislator sit Christus verus Deus, constat quod ejus legem prævaricari gravissimum sit.

Secundo probatur excellentia evangelicæ legis, quia lex Moysis disponebat ad eam : ideo comparatur ad eam sicut imperfectum ad perfectum, sicut medium ad finem, et sicut dispositio ad habitum ; lex autem evangelica comparatur ad veterem legem sicut meridies ad auroram, ut lumen ad umbram, veritas ad figuram, domina ad ancillam. Quum enim finis legis divinæ, videlicet antiquæ ac novæ, sit vera felicitas, illa lex divina vocatur perfecta, quæ illa includit per quæ beatitudo acquiritur, ad quam absque gratia gratum faciente nemo perducitur. Vetus vero lex gratiam non continuit, sed promisit ; evangelica autem lex gratiam includit et confert, quoniam sacramenta ejus gratiam non solum figurant, sed etiam tribuunt, efficiuntque quod designant. Unde ad Hebræos scriptum est : Nihil ad perfectum adduxit lex ; introductio vero melioris

Hebr. x, 28, 29.

Hebr. vii, 19.

spei, per quam approximamus ad Deum. **A** et ad usuram accommodare extraneis, ne *Deut. xxiii, 19, 20.*
Galat. iii, 24. Atque ad Galatas : Lex pædagogus noster fuit in Christo. Dicitur quippe lex Moysis disposuisse ad evangelicam legem, quoniam eam præfiguravit, Christi adventum prænuntiavit, et idololatriam reprobavit : idcirco lege evangelica promulgata, cessavit lex vetus.

Tertio idem probatur, quia lex evangelica bona cœlestia et æterna manifeste promittit, docet, et ad ea immediate introducit suos observatores perfectos ; sed lex vetus bona illa non nisi obscure et **B** typice præsignavit atque promisit. Ideo ad *Hebr. x, 1.* Hebræos dicitur : Umbram habens lex futurorum bonorum, non ipsam imaginem rerum. Lex namque Mosaica non nisi bona terrena suis observatoribus manifeste promisit. Itaque dum lex evangelica dicitur gratiam continere et dare, accipitur cum inclusione sacramentorum suorum : quæ sunt vasa spiritualiter medicinalia, gratiæ contentiva, quia per ea virtus et meritum Christi applicatur fidelibus. Et quia lex vetus talia sacramenta non habuit, idcirco **C** virtute propria non justificavit, sed fide et gratia Christi tunc venturi, nunc missi, per cujus fidem opera hominum sub lege positorum, caritate concurrente, meritoria erant.

Quarto idem ostenditur, quoniam proprietates legis conveniunt perfectissime evangelicæ legi. Nam legis officium est homines facere virtuosos, ad quod præ-exigitur declinare a malo, hoc est a peccato recedere. Hinc primo spectat ad legem vitia extirpare. Hoc autem lex humana **D** perfecte non efficit, quoniam communitati proponitur, in qua plurimi sunt imperfecti, vitiosi et ad magna mala proclives : ideo quædam mala permittit, ut meretrices et usurarios, ne contingant pejora, quæ tamen divino relinquit iudicio punienda. Lex quoque Mosaica, quoniam rudi et ad vitia prono dabatur populo, quædam permisit mala, ne deteriora fierent : permisit namque libellum repudii, *Deut. xxiv, 1.* ne crudeles Judæi uxores suas occiderent,

fratribus suis concederent ad usuram. Hinc Christus ait Judæis : Ad duritiam cordis vestri Moyses permisit vobis dare libellum repudii. *Matth. xix, 8.*

Sunt autem et alia multa in quibus lex evangelica omnem aliam legem tam naturalem quam Mosaicam et humanam transcendit, quia non solum omnia peccata excludit ac prohibet, sed etiam interiores actus, cogitationes et affectiones reformat ; et non timore mali seu supplicii, ut lex vetus, sed amore boni inducit ad bene agendum. Compendiosissime quoque ac planissime descripta est atque proponitur ; lex autem antiqua multis fuerat figuris tecta ac velaminibus involuta, prolixèque scripta ac tradita : nam in ea sæpius eadem repetuntur. Verum de hac materia multo plenius scripsi in proœmio super Lucam.

Quoniam ergo ipsemet Unigenitus Dei, Verbum æternum, verus Deus, ad nos descendere, et proprio ore nos informare, legemque dare dignatus est, non simus ingrati caritati, dignationi, pietati et beneficiis ejus, neque præceptis ejus rebelles, sed omni cum diligentia, caritate et perseverantia serviamus eidem. Legitur quod fuit quidam Sarracenus, qui volens fieri Christianus, venit Romam. Quumque vidisset Romanum Pontificem in suo ornatu, et dominos cardinales ac clerum in divino Officio, valde complacuit ei. Deinde a domino Papa baptizatus, rogavit se Largum vocari, dicens : Quemadmodum **D** Christus fuit largissimus hominibus, proprium sanguinem fundens pro eis, atque se totum eis communicans et impendens ; sic ego pro posse et modulo meo volo esse largus Domino Jesu Christo, me totum ejus obsequiis deputando, ejusque fidem inter Sarracenos prædicando, et si opus fuerit, pro ipso etiam moriendo. Itaque Largus ille bene instructus in fide et desuper illustratus, ad Sarracenos reversus, fidem Christi eisdem fortiter prædicavit. Ad gloriam Dei.

ENARRATIO IN EVANGELIUM

EXIENS JESUS DE FINIBUS TYRI, VENIT PER SIDONEM, ETC. Marc. VII, 31-37.

EVANGELISTA Marcus in præsentia A evangelio describit curationem cujusdam hominis qui fuit surdus et mutus. Textus autem quantum ad sensum litteralem, difficultatem non habet : idcirco immorandum non reor. Itaque ait : *Exiens Jesus de finibus Tyri*, quæ fuit urbs antiqua ac opulenta, et olim clarissima, de cujus excellentia in Ezechiele multa con-

Ezech.
XXVI-XXVIII.
Joann. VI,
1.
Matth. XII,
22.

scripta sunt, *venit per Sidonem* civitatem *ad mare Galilææ*, quod alio nomine dicitur mare Tiberiadis, *inter medios fines Decapoleos*, id est regionis decem urbium B quibus (ut dicitur) cingebatur hoc mare. *Et adducunt ei turbæ surdum et mutum*, videlicet unum qui fuit surdus et mutus. Qui, ut dicunt nonnulli, fuit surdus et mutus non ex causa naturali, sed ex dæmonis ipsum possidentis operatione. Unde in Matthæo legitur : Tunc oblatus est ei dæmonium habens, cæcus et mutus.

Et apprehendens eum de turba seorsum, id est, Jesus extra turbam ducens hunc surdum et mutum. Cur duxit eum seorsum ? Respondetur, ut doceret vanam C gloriam in magnis operibus esse vitandam ; vel quia turba fuit indigna videre istud miraculum, quoniam forsitan ex curiositate optavit aliquid rarum videre ; vel ad insinuandum quod spiritualiter surdi et muti plerumque sint seorsum monendi ac instruendi, ne ex humano rubore propter præsentem ab advertentia et pœnitentia retrahantur. *Misit digitos suos in auriculas ejus*. Hoc fecit Salvator : primo, ad innuendum quod divinitas sua operabatur per corpus suum et corporis membra, tan-

eorum, designatur discretio : quæ valde necessaria est ad aperiendum aures interiores hominis spiritualiter surdi, hoc est ad audiendum verbum Dei graviter indurati et clausi. *Et exspuens, tetigit* sputo suo *linguam ejus* : quoniam per salivam, sine qua verba perfecte formari non valent, sapientia figuratur, quæ os mentis, videlicet intellectum, quo interiora verba proferuntur, spiritualiter irrigat, gustumque confert eidem. Exspuit itaque Jesus, et sputo suo tetigit linguam hujus infirmi, ad designandum quod qui mutus est a pro-

latione verborum cœlestium atque salubrium, recte et meritorie loqui nequit, nisi dono sapientiæ intus ornetur, tangatur et perfundatur.

Et suspiciens in cælum, ad demonstrandum quod tota virtus sua esset a Patre cœlesti, quodque ab eo auxilium haberet secundum quod homo, *ingemuit* : non utique propter difficultatem faciendi miraculum, sed ex compassione qua non solum condoluit illi infirmo, sed universis qui dæmonum dominatione premuntur, et item ad ostendendum quam difficulter curetur anima spiritualiter surda ac muta, utpote quæ verba Dei invite audit, inviteque profert. Unde in suscitatione Lazari turbavit se ipsum, fremens spiritu, et lacrimas fundens, ad declarandum quod peccatores pravæ consuetudinis mole pressi, utpote vitiis indurati, super quos clausit puteus os suum, id est, in profundo D vitiorum demersi sunt, qui designantur per Lazarum quatrIduanum mortuum, difficillime convertuntur : non quod ex parte Dei sit difficultas, quoniam omnipotenti et infinitæ potestati omnia æque facillima sunt ; sed ex indispositione talium. Ideo-

Joann. XI,
33, 35, 38.

Ps. LXVIII,
16.

Joann. XI,
39.

que Christus ad cœlum adspexit atque A ingemuit, ut doceret nos suo exemplo in orationibus nostris in cœlum adspicere, et ad Deum suspirare ac gemere, juxta illud : Ad te levavi oculos meos, qui habitas in cœlis. *Et ait* Jesus *illi* surdo ac muto : *Ephphetha*, quod est, id est significat, *aperire*, id est, jubeo ut aperiaris tu auris et lingua hujus infirmi. *Et statim apertæ sunt aures ejus*, id est ad audiendum aptatæ, et naturali usui redditæ, *et solutum est vinculum*, id est impedimentum, *linguæ ejus*, *et loquebatur recte*, id est convenienter et prompte. Sicque idem fuit verborum et operum horum miraculorum momentum. Tanta fuit Christi potestas, quod ejus dixisse fuit egisse. Consimiliter, qui intus illuminatur ac emollitur, atque accenditur ad audiendum et proferendum verba salutis, loquitur recte, id est discrete ac sapienter, juxta illud Apostoli : Sermo vester semper in gratia sale sit conditus.

Ps. cxxii, 1.

Coloss. iv, 6.

Et præcepit illis, videlicet turbæ, *ne cui dicerent*, id est, nemini recitarent illud miraculum. Quod ideo jussit, ut daret nobis exemplum vitandi vanitatem laudis humanæ atque jactantiam. Interdum

vero Christus voluit miracula sua aliis recitari, ad gloriam Dei ædificationemque populi. *Quanto autem eis præcipiebat tacere hoc opus, tanto plus prædicabant illud* : non ex contemptu, sed devotione et admiratione potestatis divinæ. Idcirco non fuerunt proprie inobedientes, quia præceptum Christi fuit intelligendum, ne ad jactantiam diceretur. Præceptum tamen Christi rationabile fuit, et turba etiam pie movebatur ad oppositum, quia utrumque bonum fuit secundum considerationes diversas. *Et eo amplius admirabantur, dicentes : Bene omnia fecit*. De quibus omnibus subditur, ut sit distributio accommoda. Omnia quoque quæ fecit, bene fecit, utpote sapienter. *Et surdos fecit audire, et mutos loqui*. Quamvis enim Marcus non exprimat hic nisi de unius surdi et muti curatione, tamen dum Christus istum curavit, curaverat etiam alios multos surdos et mutos, et cæcos ac debiles, *Matth. xv, 30.* ut in Matthæo legitur. Sed Marcus scribit specialiter de hoc uno, quia curatio ejus solennius facta est, et multa mystica præfiguravit. Verumtamen certus non sum an surdus iste sit idem de quo scribit Matthæus, asserens eum fuisse obsessum. *Ibid. xii, 22.*

SERMO SECUNDUS

DE SPIRITUALI SIGNIFICATIONE CURATIONIS SURDI AC MUTI.

ECCE Deus vester ipse veniet, et salva- bit vos : tunc aperientur oculi cæcorum, et aures surdorum patebunt; tunc saliet sicut cervus claudus, et aperta erit lingua mutorum. Is. xxxv, 4-6.

Beatissimus Isaias propheta verba hæc de Christi adventu prædixit. Christus etenim (de quo in prima Joannis Canonica scriptum est : Hic est verus Deus et vita æterna) venit per incarnationem suam ad homines, et eos salvavit, quemadmodum

1 Joann. v, 20.

D angelus dixit ad Joseph : Vocabis nomen ejus Jesum; ipse enim salvum faciet populum a peccatis eorum. Denique miracula in verbis his Isaïæ præacta, et plura alia ac majora, Christus inter homines ambulans, corporaliter spiritualiterque peregit. Unde et in evangelio hodierno describitur unius surdi ac muti curatio. *Matth. i, 21.*

Circa quam multa mystice sunt pensanda. Et primo, qui per eum spiritualiter designentur : quod in expositione textus

Marc. vii, 31 et seq.

aliqua-
litter est
expres-
sum. Ita-
que per
hunc A
saurizas
tibi iram
in die ju-
sti judicii
Dei. O, o,
evigilet
unusquis-
que ad ver-
ba ista
coelestia,
terrifica
et divina,
et emendet
se ipsum,
quia nesci-
mus diem
nec horam,
estque hor-
rendum in-
cidere in
manus Dei
viventis.

Secundo
circa cura-
tionem hu-
jus surdi
et muti
consideran-
dum est,
quod turba
duxit eum
ad Christum.
Per quod
spiri-
tualiter da-
tur intelli-
gi, quod
mente sur-
di seu viti-
osi, per se
ipsos non
valent ad
Deum acce-
dere, quum
non sint in
carita-

Matth. xxv,
13.
Hebr. x, 31.

Matth. xi,
13; xiii, 9;
Luc. xiv, 35;
etc.
Is. xlii, 19.
Jacob. i, 19.
Jer. v, 3.
Rom. ii, 3-5.
Evangelio
sæpe hortatur
: Qui habet
aures audi-
endi, audiat.
In quibus
verbis in-
sinuat, eos
qui verba Dei
non audiunt
per salubrem
effectum, per
obedientiam
et consensum,
aures cordis
non habere,
ideoque spiri-
tualiter surdos
esse. De taliter
surdo loquitur
Deus apud
Isaiam : Quis
surdus, nisi
ad quem nun-
tios meos misi
? Quod quamvis
ad litteram dictum
sit de indurato
populo Judæorum,
ad quos Deus
misit nuntios
suos, puta
Prophetas,
quos populus
ille obedientialiter
audire contempsit;
nihilominus
spiritualiter
Christus hæc
dicit de unoquoque
pravo rebel-
lique Christiano,
ad quem Deus
mittit quotidie
nuntios suos,
videlicet præ-
latos ac præ-
dicatores, aut
quoslibet exhortato-
res devotos :
imo unicuique
deputavit an-
gelum sanctum
pro custode et
jugi exhortatore
ad bona. Sed
omnes istos
miser peccator
audire effectualiter
aspernatur :
idcirco durus
est valde, et
nequaquam
obtemperans
documento
apostoli Jacobi
admonentis,
Sit omnis homo
velox ad audi-
endum. Unde
de talibus
apud Jeremiam
Dominus loquitur
: Induraverunt
facies suas
supra petram,
et noluerunt
reverti.

B
te, quæ
sola ducit
ad Deum
et movet sur-
sum, ascen-
dens ut ignis
: quemadmo-
dum in carnali
attendi potest
amore, qui tan-
quam pondus
gravissimum
semper trahit
deorsum, ad
caduca, im-
munda et vana
inclinans. Pro-
pterea vita
hominis carnali
amore infecti,
non est nisi
cursus ad tor-
menta inferni.
Hinc talis
indiget per
alios ad Christum
adduci. Quod
fit dum homi-
nes timorati
jugiter ac
ferventer orant
pro ipso, ut
gratia conversionis
infundatur ei
a Deo : quemad-
modum devotissima
mater C
B. Augustini
lacrimose ac
instantissime
oravit pro
filio suo
Augustino
adhuc de-
cepto et lubrico.
Per alios quoque
peccator ad
Deum deducitur,
dum homo
devotus trans-
gressorem ad
pœnitentiam
ferventer
hortatur, exemplo
Christi qui
prædicavit :
Pœnitentiam
agite, appropin-
quavit enim re-
gnum cœlorum;
itemque, Nisi
pœnitentiam
egeritis, omnes
simul peribitis.
Et ita pec-
catorem ad
Christum adducere,
spectat præ-
cipue ad animarum
curam habentes,
quorum unicuique
dicit Apostolus
ad Timotheum
: Prædica
verbum, insta
opportune,
importune,
argue, obse-
cra, increpa
in omni
patientia.

Matth. iv,
17.
Luc. xiii, 3,
5.

II Tim. iv,
2.

Denique
unicuique
tali diligen-
ter pen-
sandum
est et vehe-
menter pav-
endum quod
ad Romanos
ait Apostolus
: Existimas,
o homo qui
taliam agis,
quod tu effu-
gies judicium
Dei ? An
divitias boni-
tatis Dei,
et patientiæ,
et longanimitatis
contemnis ?
Ignoras quoniam
benignitas
Dei ad pœni-
tentiam te
adducit ?
Secundum
duritiam
autem tuam
et impœnitens
cor tuum, the-

Postremo,
taliter sur-
dus et mutus
propriam
infirmi-
tatem insuffi-
cientiamque
cognoscens,
aliorum
debet suffragia
quærere,
rogando
eos ut orent
pro se, juxta
illud in Job
: Ad aliquem
Sanctorum
convertere.
Videmus in
sæculo isto,
quod rei et
balbi volentes
suo principi
reconciliari,
quoniam coram
illo apparere
non audent,
nec formare
verba congrua
possunt, quæ-

Job v, 1.

runt prolocutorem facundum et principium carum, qui loquatur pro eis : sic miseri peccatores Deo reconciliari cupientes, facere debent, ad devotos et sanctos confugiendo, qui orent pro eis. Nihilominus peccator quantumlibet magnus, etiam personaliter orare debet pro se, exemplo publicani, de suis vitiis erubescendo, pectus tundendo, humiliterque dicendo : Deus, propitius esto mihi peccatori.

Luc. xviii, 13.

Præterea, quamvis præinducta secundum communem legem sint vera, nihilominus Deus interdum peccatores etiam valde magnos per se ipsum reducit ad se per instinctum internum, per illuminationem divinam, aut per apparitionem et comminationem terribilem, ut patet in Paulo apostolo, qui quum proficisceretur Damascum ad persequendum fideles, subito in via, quum esset in itinere pessimo ac damnando proposito, repente apparuit ei Christus, et per comminationem terribilem eum convertit. Sic quoque per se ipsum Deus reduxit ad se Manassen regem Jerusalem, qui quum diu sceleratissimam vitam duxisset, tandem a rege Assyriorum captus, vinctus atque in carcere positus, rediit ad cor et pœnituit valde, seque de cetero emendavit.

Act. ix, 1 et seq.

IV Reg. xxi; II Par. xxxiii.

Tertio circa surdi et muti hujus curationem est attendendum, quod dum turba pro ejus sanatione rogasset, Christus apprehendit eundem et duxit seorsum. Per quod duo sunt intelligenda. Primum, quod Deus frequenter confert aliquibus gratiam meritis ac precibus aliorum, utpote Sanctorum in cœlis triumphantium, ac devotorum in terris adhuc militantium. Unde quum filii Israel Deum graviter offendissent, contra Moysen murmurando, et sanctissimus Moyses pro illis Deum ardentissime exorasset, Deus dixit ad Moysen : Dimisi eis juxta verbum tuum. Denique, quum Deus subvertere vellet civitatem Sodomorum propter horrenda peccata eorum, et sanctus patriarcha Abraham oraret pro Sodomitis, Deus tandem dixit ad Abraham : Non subvertam civitatem, si

Marc. vii, 33.

Num. xiv, 2 et seq.

Ibid. 20.

Gen. xviii, 20 et seq.

Ibid. 32.

A invenero in ea decem homines justos. Item, quum tres amici Job Deum offendissent, disputando adversus Job, et eum injuste culpando, finita disputatione, Deus dixit ad unum illorum : Iratus est furor meus in te et in duos amicos tuos : ite ergo ad servum meum Job, et orabit pro vobis; faciem ejus suscipiam, ne vobis imputetur stultitia. Hinc Jacobus : Orate (inquit) pro invicem, ut salvemini; multum enim valet deprecatio justis assidua. Instanter ergo et fervide deprecemur tam Sanctos in cœlo quam devotos in terra, potissimum Virginem gloriosam et angelos nostros custodes, ac Sanctos ad quos magis afficimur, ut misericordissime pro nobis intervenire dignentur.

Job xlii, 7, 8.

Jacob. v, 16.

Secundum (quod in hoc tertio datur intelligi) est, quod eos quos Deus a vitiis curat et salvat, oportet prava vitare consortia, atque a communi hominum per latam perditionis viam ambulantium conversatione discedere, et Deo in secreto crebrius vacare per orationes devotas, per meditationes salubres, per examinationem conscientiae propriae, per exercitia pœnitentiae. Idcirco dicit Apostolus : Exite de medio illorum, et immundum ne tetigeritis. Porro immunda non tangere, est rebus illicitis non consentire. Unde si quis corporaliter separari non valet ab habitaculis et societatibus impiorum, mente tamen ab eis se debet abstrahere, ita ut eorum peccatis non cooperetur, nec consentiat, neque communicet, sed potius quantum potest, redarguat ea, dicente Apostolo : Nolite communicare operibus tenebrarum, magis autem redarguite. Ideo ait Propheta : Beatus vir qui non abiit in consilio impiorum, id est, a Deo non recessit, consentiendo consiliis pravis hominum iniquorum; et in via peccatorum non stetit, id est, in vitiosis actibus non permansit; et in cathedra pestilentiae non sedit, id est, mala exempla aliis non præbuit. In cathedra quippe pestilentiae sedet, qui publice male vivit seu alios scandalizat : per quod eos spiritualiter, tanquam basiliscus, occidit.

Matth. vii, 13.

II Cor. vi, 17.

Ephes. v, 11.

Ps. i, 1.

Itaque vitanda sunt superbiorum et iracundorum lubricorumque hominum, imo et omnium vitiosorum consortia, quum scriptum sit : Cum perverso perverteris. Mala namque societas trahit ad vitia, quemadmodum bona societas ad virtutes. Propter quod Salomon loquitur : Qui cum sapientibus graditur, sapiens erit; amicus stultorum similis eis erit.

Ps. xvii, 27.

Prov. xiii, 20.

Bonis ergo et timoratis atque prudentibus hominibus unusquisque se applicet, et verba salutis velociter obedienterque

Audiat; nec ab orationibus et Dei laudibus, ac verbis salubribus obmutescat, sicut in Vitaspatrum legitur de duabus devotis uxoribus simul habitantibus, quæ desideraverunt a suis separari maritis, et vitam cœnobiticam assumere. Quibus quum mariti consentire non vellent, statuerunt feminae illæ inter se, ut quamdiu pariter morarentur, nunquam otiosum aut indecens verbum proferrent : quod etiam fideliter servaverunt. Quo exemplo discant mulieres a suis loquacitatibus abstinere.

SERMO TERTIUS

DE SPIRITUALI INTELLECTU EORUM QUÆ CHRISTUS IN CURATIONE SURDI ET MUTI EGIT, AGITQUE IN DIES IN JUSTIFICATIONE PECCATORUM.

BENE omnia fecit; et surdos fecit audire, et mutos loqui. Marc. vii, 37.

Sap. viii, 1.

Marc. vii, 32 et seq.

Rectissime dixit turba de Christo, quod « bene omnia fecit ». Ipse enim est æterna et increata sapientia, de qua Sapiens ait quod attingit a fine usque ad finem fortiter, et disponit omnia suaviter. Hinc Dominus noster Jesus Christus, qui solo verbo, imo solo imperio potuit surdum et mutum de quo in evangelio hodierno fit sermo, curare, ita non fecit, sed multa circa ipsius egit curationem. Nam duxit eum seorsum, et digitos suos misit in ejus auriculas; C exspuit quoque, et sputo suo tetigit linguam illius; deinde adspexit in cœlum atque ingemuit, et postea dixit, Adaperire; postremo turbæ præcepit ut nemini dicerent istud miraculum. Per quæ omnia aliquid spiritualiter designavit : non enim sine causa condigna aliquid egit horum. Denique, cur surdum et mutum istum duxit seorsum, in præcedenti est introductum sermone. Nunc de aliorum spirituali intelligentia est dicendum.

Itaque, quod Christus digitos suos posuit in auribus hujus surdi, significat quod

T. 30.

B nullus curatur ab interiori surditate, mutitate ac vitiis ceteris, nisi per infusionem Spiritus Sancti, qui tollit a mente ea per quæ surda et muta efficitur. Per digitum namque Spiritus Sanctus signatur, secundum quod Christus effatur : Si in digito Dei ejicio dæmonia. Peccata vero mortalia, quæcumque sint illa, efficiunt animam surdam, mutam et cæcam, imo et spiritualiter mortuam. Certum est autem peccata mortalia non auferri nisi per infusionem Spiritus Sancti. Præcipue tamen consuetudo prava efficit mentem mutam et surdam. Omne quippe mortale peccatum est quoddam obstaculum dividens inter Deum et mentem, Isaia testante ac asserente : Iniquitates vestrae diviserunt inter Deum vestrum et vos. Hinc manente isto obstaculo in anima peccatrice, non potest ipsa illuminari a Deo. Idecirco necessaria est infusio Spiritus Sancti, qui gratiam et virtutes infundendo, expellit et aufert peccata : quibus ablatis, capax est anima gratiæ amplioris. Propter quod loquitur Isaïas :

Luc. xi, 20.

Is. lix, 2.

Hic est omnis fructus, ut auferatur iniquitas. Quicumque igitur mortali sordet pec-

Ibid. xxvii, 9.

25

cato, auxilium Spiritus Sancti imploret, qui simul auferat vitia et largiatur virtutes.

Secundum fuit, quod Christus sputo suo linguam tetigit surdi et muti istius. Per quod significatur quod homo spiritualiter mutus, hoc est a verbis salutaribus silens, nec meritorie quidpiam loquens, non potest curari a vitio isto, nisi a Christo donum sapientiæ sortiatur : quia (ut dictum est) per salivam sapientia designatur. Quod enim peccator a verbis salutaribus obmutescit, hinc oritur quod ea quæ Dei sunt, sibi non sapiunt, sicut testatur Apostolus :

1 Cor. II, 14. Animalis homo non percipit ea quæ sunt

1 Petr. II, 3. Spiritus Dei. Nec gustat quam dulcis est Deus, nec cœlestia et æterna bona desiderat, sed tota ejus affectio est ad carnalia et terrena, in quibus tantummodo delectatur. Quum ergo per donum sapientiæ contempletur anima Deum creatorem suum et spiritualia bona, non nudo intuitu, sed cum gustu interno (sapientia enim quasi sapida scientia dicitur, et a sapore nomen accepit), hinc constat, quod dum dono sapientiæ perfunditur anima, protinus audit quid loquatur in ea Dominus Deus, et incipit loqui ea quæ Dei sunt et salutem concernunt. Tuncque carnalia et caduca ei desipiunt, solusque Deus super omnia complacet ei, atque ad spiritualia bona gratiæ ac virtutum anhelat, quia in eis quotidie cupit proficere. Ad futura quoque gloriæ dona adspirat, dicendo : Domine, dilexi decorem domus tuæ, et locum habitationis gloriæ tuæ. Itemque : Quam dilecta tabernacula tua, Domine virtutum ! Concupiscit et deficit anima mea in atria Domini.

Itaque pro infusione, incremento ac perfectione doni sapientiæ, Deum fideliter deprecemur, omnemque carnalem prudentiam ac mundanam versutiam detestemur, quum dicat Apostolus : Prudentia carnis mors est. Et Salomon : Vir (inquit) versutus odibilis est. Porro, quanto plus avertit se homo a delectatione carnali, a consolatione mundana, a desiderio terrenorum,

A tanto aptior redditur ad degustationem internam suavitatis divinæ, tantoque amplius in virtutum operibus delectatur, præsertim in consideratione infinitæ perfectionis et gloriæ Dei omnipotentis, ita ut dicat : Quam magna multitudo dulcedinis tuæ, *Ps. XXX, 20.* Domine ! et denuo, Melior est dies una in atriis tuis super millia. Certum est equidem quod in his quæ homo plus diligit, amplius delectatur, et de talibus libentius loquitur. Qui ergo super omnia diligit Deum, in ipso delectationem et consolationem potissimum quærit ac invenit.

Tertium fuit, quod Christus ad cœlum adspexit. Per quod docuit nos, in omni tribulatione et angustia ad Deum confugere, ejus succursum et consolationem quærendo, sicut et Josaphat rex testatur : Quum ignoramus quid agere debeamus, hoc solum habemus residui, ut oculos nostros levemus ad te, Domine Deus. Quotidie quoque in orationibus et meditationibus nostris debemus ad cœlum adspicere, id est Creatorem cœlorum in cœlo habitantem cogitare ac contemplari, sicut ait Propheta : Ad te, Domine, levavi animam meam ; et item, Ad te levavi oculos meos, qui habitas in cœlis. Insuper debemus cœlum adspicere, quatenus ex consideratione cœlorum et planetarum ac siderum, et velocissimi motus multiplicisque virtutis ac ornatus eorum, elevetur mens nostra ad contemplationem Dei creatoris universorum. Causa namque ex suo effectu cognoscitur. Hinc etenim Isaias hortatur : Levate oculos vestros in cœlum, et videte quis creavit hæc. Et Sapiens dicit : A magnitudine speciei creaturæ poterit Creator cognoscibiliter videri. Ex contemplatione quoque infinitæ bonitatis, et sapientiæ ac omnipotentiae Dei, debemus ejus amore accendi, et ipsum cum ingenti reverentia admirari, eum quoque vereri, atque in omnibus semper pro posse humiliter venerari.

Quartum fuit, quod Christus ingemuit. Per quod docuit nos, Deum cum intimo gemitu invocare, et propter peccata nostra

ac aliorum ingemiscere ac dolere, desiderio quoque spiritualis profectus ac futurae beatitudinis gemitus cordiales effundere. Itaque omnem vanam lætitiā aspernemur, soli Altissimo placere conemur, ad confitendum peccata nostra, ad orationes Deique laudes proni ac fervidi simus.

Legitur in libro de Viris illustribus Ordinis Cisterciensium, quod semel quidam vir illustris nomine Henricus, cognatus regis Franciæ, visitavit S. Bernardum. Quumque redire vellet, rogavit B. Bernardum ut Fratres, id est monachi ejus, orarent pro ipso. Respondit Bernardus : Faciam, et cito senties fructum orationum Fratrum istorum. Protinus ergo Bernardus convocans Fratres, dixit : Dominus Henricus petit orationes vestras, ideo hortor ut statim unanimiter ac ferventer oretis pro ipso. Moxque Fratres facere hoc cœperunt. Et statim Bernardus rediit ad Henricum, qui virtute orationum Fratrum interim tactus fuit a Spiritu Sancto, et compunctus corde petiit a B. Bernardo in monachum recipi : quod Bernardus cum ingenti gaudio fecit. Fratres quoque de tam nobilissimi viri conversione multum lætati sunt, et gratias Deo egerunt, qui preces eorum exaudivit tam cito.

Habuit autem idem dominus Henricus secum inter ceteros famulum quemdam, virum perversum. Qui visa domini sui conversione, cœpit vehementissime indignari, et pessime loqui ac maledicere S. Bernardo, vocando eum seductorem, pseudopropheta, hypocrita, et quidquid potuit excogitare malignum, in tantum quod hi qui aderant, ægre ferebant quod diabolicus ille homo tam pravissime loquebatur

A viro sanctissimo. Quibus dixit Bernardus : Dimittite eum, anima enim ejus in amaritudine est, et ipse quoque est noster. Quo audito, famulus ille cœpit insultare Bernardo, et dicere : Nunc probabo te esse mentitum et falsum prophetam, et coram rege istud tibi objiciam, quia jam prophetasti quod nunquam fiet. Denique qui præsentes fuerunt, quamvis non crederent verba Bernardi posse cassari, satis tamen attoniti erant, et mirabantur qualiter fieri posset quod prædixit Bernardus, propter nimiam perversitatem viri illius. Itaque vir ille malignus altera die mane consurgens, et S. Bernardo ac toti ejus monasterio maledicens, recessit. Quumque paululum processisset, forsitan per medium milliare aut circiter, cœpit infinita misericordia Dei in illo famulo operari, ejusque mentem alterare, illuminare, accendere. Qui sentiens se taliter immutari, mirabatur quid sibi acciderit; volensque progredi, non valebat, quia gratia Dei in ipso prævaluit. Statim ergo ad beatissimum patrem Bernardum revertens, veniam postulavit, et monachus fieri flagitavit, et factus est bonus religiosus. Præfatus quoque Henricus crevit in virum virtutum, et post aliquot annos factus episcopus, magnum peregit fructum in populo.

Ecce quam infinita est bonitas et misericordia Dei, et qualiter per preces et merita devotorum aliis gratiarum charismata elargitur. Ideo alios cordialiter deprecemur ut orent pro nobis, præsertim quum et Paulus apostolus tam frequenter rogaverit spirituales suos filios quos convertit, ut orarent pro eo.

Rom. xv, 30; I Thess. v, 25; II Thess. iii, 1; etc.

AD RELIGIOSOS

SERMO QUARTUS

DE EXCELLENTIIS LEGIS EVANGELICÆ SUPRA LEGEM VETEREM,
ET QUA SANCTIMONIA NUNC VIVENDUM.

LITTERA occidit, spiritus autem vivificat. II Cor. III, 6.

In exordio hujus epistolæ docet sanctus Apostolus, quanta sit inidoneitas, infirmitas, impotentia seu insufficientia hominis ad promerendum vitam æternam, nisi per dona gratiæ desuper adjuvetur. Et de hoc jam in multis sermonibus plura sunt introducta. Ideo omnis præsumptio, jactantia, vana gloria, omnis elatio, procul dif-
fugiant, imperfectumque nostrum videant oculi nostri, et in Deo sit tota spes nostra, ejus adjutorio semper inhæreamus, ipsum
jugiter invocemus, omne bonum ei humillime adscribamus, ei indesinenter regratiantes, ipsum in omnibus laudantes et venerantes.

Insuper docet, quanta sit excellentia evangelicæ legis supra legem Mosaicam, ut informet fideles quomodo spiritualius atque perfectius debeant conversari modo in novo Testamento, quam olim Israeliticus populus vixit in veteri. Quemadmodum autem Moyses fuit in multis figura Christi, sic lex data per Moysen, dispositio
fuit ad legem a Christo collatam. Ideo sicut se habet dispositio ad habitum, imperfectum ad perfectum, medium ad finem, umbra ad lucem, typus ad veritatem, sic se habet lex Moysis ad legem Christi. Hæc ergo est una excellentia legis evangelicæ supra veterem legem. Secunda est, quod ipse legislator evangelicæ legis, videlicet Christus, incomparabiliter est sanctior, dignior, sapientior legislatore veteris Testa-

menti, utpote Moyse. Tertia, quia lex evangelica immediate et evidenter promittit bona cœlestia et æterna, sed lex Mosaica non promisit manifeste et immediate nisi bona terrena. Quarta, quia lex nova multo compendiosius data et scripta est quam lex vetus, in qua eadem sæpissime repetuntur. Quinta, quoniam evangelica lex multo evidentior et excellentior doctrinam tradit de Deo, quam lex illa Mosaica. In qua evangelica lege, ea quæ ad supergloriosissimæ Trinitatis spectant notitiam, atque ad Christi mysteria et ad salutem humanam, multo limpidi-
us edocentur quam in veteri lege.

Sexta, quoniam lex evangelica gratiam non solum promittit, sed etiam confert; nec solum præcipit actus virtutum, sed etiam præstat virtutem ea implendi; nec solum futuram felicitatem denuntiat, sed ad eam quoque observatores suos inducit. Et istud totum intelligendum est, in quantum accipitur lex evangelica cum suorum inclusione sacramentorum, quæ gratiam continent et etiam præstant. Talia vero non erant legis veteris sacramenta: ideo dicitur quod lex Moysis non continuit nec contulit gratiam, nec virtutem implendi sua præcepta donavit. Propter quod ab Apostolo appellatur ministratio mortis et damnationis, et virtus peccati, non directe, sed occasionaliter. Septima, quia lex nova, interiores motus, videlicet cogitationes et affectiones, perfectius ordinat et reformat quam vetus. Octava, quoniam

Ps. CXXXVIII,
16.

II Cor. III,
7, 9; I Cor.
xv, 56.

pauciora ac salubriora habet præcepta et sacramenta lex evangelica quam vetusta. Imo ut Rabbi Moyses loquitur, Tot erant mandata in Moysis lege, quot sunt dies in anno, et quot ossa in homine. Hinc princeps Apostolorum vocat eam importabile jugum. Nona, quoniam proprietates legis multo excellentius conveniunt novæ legi. Proprietates etenim legis sunt, vitia extirpare, virtutes inducere, præmia polliceri, bene agentes remunerare, iniquos punire, communitati proponi, plane et succinctim præstari. Quæ omnia evangelicæ legi perfectissime competunt. Ipsa etenim nullum permittit peccatum, æternam beatitudinem obedientibus pollicetur. Porro lex humana permittit plurima mala; in veteri quoque lege mittebantur libellus repudii et usura circa extraneos. Decima, quoniam lex nova inducit ad vitandum peccata et ad implendum præcepta atque consilia amore boni. Vetus autem lex induxit ad hæc timore supplicii: nam et transgressoribus suis etiam in præsentem corporalem intulit mortem.

Deinde, quo legislator noster est altior, eo evangelicæ legis præcepta non observare enormius damnabiliusque consistit. Propter quod ad Hebræos scribit Apostolus: Irritam quis faciens legem Moysis, absque ulla contradictione, duobus aut tribus testibus moritur: quanto magis putatis deteriora mereri supplicia, qui Filium Dei conculcaverit, et sanguinem testamenti pollutum duxerit, et spiritui gratiæ contumeliam fecerit? Sed inter hæc vigilantissime intueamur quam virtuose, quam spiritualiter et perfecte obligemur vivere.

Consideremus in primis, qualiter conversari teneamur in quantum Christiani, deinde in quantum sacerdotes, deinceps in quantum religiosi, hujus aut hujus Ordinis professores. Certe qualiter vivere teneamur in quantum Christiani, ex Evangelio demonstratur, utpote: per arctam viam incedere, inimicos diligere, pro persequentibus exorare, forefactoribus bene-

A facere, omnem iram et contumeliam in tantum vitare, ut qui dixerit proximo suo, Fatue, peccet mortaliter; omnem quoque superbiam, acediam, invidiam, incontinentiam, avaritiam, gulam abjicere; humilitatem, caritatem, continentiam, liberalitatem temperantiamque amplecti; nos ipsos et omnia quæ habemus et agimus, referre ad Dei gloriam et honorem; opera misericordiæ corporalia ac spiritualia exercere, sicque proximis facere sicut ab illis fieri volumus nobis; præcepta quoque Ecclesiæ B observare, et superioribus nostris Dei vicariis tanquam Deo humiliter obedire; in omnibus simpliciter, innocenter, humiliter nos habere, neminem scandalizare, omnes ædificare. Ad ista ac multa similia tenemur, in quantum Christiani; porro, ut sacerdotes, pene ad omnia illa quæ Apostolus in epistolis ad Timotheum ac Titum docet ad episcopos pertinere: siquidem quæ ibi de episcopis scribit, de sacerdotibus quoque intelliguntur, secundum doctores. Ad qualia vero teneamur in quantum C religiosi, docet Regula nostra sive Statuta.

Quantum ergo erubescendum est nobis, quam confusibiliter nos habemus, quam fœde ac viliter agimus, dum mutuo scandalizamus, quando contendimus, quando irascimur, dum querulosi, turbulenti, inquieti existimus, dum pro malo reddimus malum, et optamus vindictam, ac molestanti vicem rependimus, dum unus adversus alterum inflatur, quando cibo et potu immoderate replemur, dum curiosi et cupidi sumus et ad divina acediosi: quia in omnibus istis non solum contra sacram religionem cujus sumus professores, nec solum contra præcepta ordinis sacerdotalis cujus sumus executores, sed etiam contra evangelicæ legis operamur præcepta; ita quod non solum sumus indigni religiosi ac sacerdotes vocari, imo Christiano nomine censemur indigni, remotissimeque distamus a monastica perfectione atque a nostræ professionis impletionem. Et de hoc in libro de Nomine

Act. xv, 10.

Deut. xxiv, 1; xxiii, 19, 20.

Hebr. x, 28, 29.

Matth. vii, 14.
Ibid. v, 14.

Matth. v, 22.

Ibid. vii, 12.

christiano multa loquitur Augustinus, inter cetera dicens : Ille veraciter christianus est, qui omnibus misericordiam facit, qui nulla omnino movetur injuria, qui nulla afficitur impatientia, crudelitate aut ira, qui in omnibus caritativus, mitis humilisque consistit, qui nemini nocet, et alienum dolorem tanquam proprium sentit, qui a malo non vincitur, sed malum vincit in bono, qui humanam laudem contemnit, et coram hominibus habetur inglorius, ut coram Deo glorietur et angelis. Atque ut asserit Cyprianus, Christianus nemo recte dicitur, nisi qui Christi moribus conformatur.

Postremo certum est, religiosos esse debere exemplar evangelicæ puritatis, et sublimiter Christianitatis vocabulo esse condignos, ut se ipsos in cunctis exhibeant

A excellenter mansuetos, patientes, temperatos, justos, castos, misericordes, devotos, timoratos, custoditos et caritativos, et in omni virtute assidue crescant, in tantum ut quicumque adspexerit eos, ædificetur et Deum glorificet, ac fateri cogatur quod vere a Deo sit lex quæ hujusmodi præcipit vitam. Unde beatissimus princeps Apostolorum testatur : Hæc est voluntas Dei, ut benefacientes obmutescere faciatis imprudentium hominum ignorantiam. Paulus quoque apostolus : In omnibus (inquit) te ipsum præbe exemplum bonorum operum; verbum sanum sit et irreprehensibile, ut qui ex adverso est, vereatur, nihil mali habens loqui de nobis. Ut ergo tam sancte et irreprehensibiliter conversari possimus, Deum incessanter ac fervide cum omni fiducia invocemus in adiutorem.

SERMO QUINTUS

CAUSÆ SPECIALES QUÆ RELIGIOSUM REDDUNT SPIRITUALITER SURDUM AUT MUTUM.

SUSPICIENS *Jesus in cælum, ingemit.* Marc. vii, 34.

In evangelio hodierno legitur, Christum quemdam curasse qui fuit surdus et mutus. Atque, ut multi affirmant, non erat surdus et mutus ex naturali causa, sed ex operatione obsidentis ipsum diaboli, juxta quod apud Matthæum fertur : Tunc oblatus est ei dæmonium habens, cæcus et mutus. Itaque per hunc surdum et mutum, spiritualiter intelligendus est negligens et perversus religiosus, qui per iter disciplinæ regularis non graditur, nec superiorum suorum monitis acquiescit, et si corripitur ac castigetur, amplius induratur et indignatur, nec loquitur verba salutis, nec sua confitetur peccata. Omnis qui talis est, non immerito surdus appellatur et mutus, et a diabolo obduratus. Deinceps, quum vita ista tam brevis sit et incerta, mors quoque incessanter propinquet, et tam ineffa-

C biliter horrendum sit incidere in manus Dei viventis, cujus judicium tam districtum esse cognoscitur, atque post vitam hanc momentaneam pro uno peccato mortali infligatur æterna damnatio : nonne mirabile et supermirabile est quod rationalis creatura, potissimum in religione existens, potest sic excæcari et obdurari, quod spiritualiter tam surda et muta efficitur, ut nec blanda exhortatione, nec rigorosa increpatione, nec regulari disciplina provocetur ad meliora, sed absque Dei timore in suo persistit errore ? In talibus adimpletur quod Salomon loquitur : Considera opera Dei, quod nemo possit corrigere quem ille despexerit. Talis fuit Judas proditor Christi, quem tot miracula, tot caritatis indicia, tot avisationes et prædicationes, tot beneficia Salvatoris non averterunt a crimine prodicionis. Timeamus ergo et nos ne forte induretur quis nostrum fallacia vitiorum.

Rom. xii,
21.

1 Petr. ii,
13.

Tit. ii, 7, 8.

Hebr. x, 31.

Eccle. vii,
14.

Luc. xxii,
48.

Præterea hanc animæ obdurationem, A
 surditatem et mutitatem facit præcipue
 consuetudo prava, quæ tanquam gravissi-
 mum saxum opprimit animum, ne assur-
 gat ad Deum. Impius namque quum in
Prov. XVIII, profundum venerit peccatorum, contem-
 3. nit. Ideo omnis religiosus debet quotidie
 suam conscientiam serenare, nec spirituali
 patri quidquam abscondere, præsertim in
 confessione, ne in barathrum impii usus
Ps. LXVIII, trahatur, ne eum demergat tempestas aquæ,
 16. neque absorbeat eum profundum, nec ur-
 geat super eum puteus os suum. Unde B
 quanto peccatum fuerit majus, tanto cla-
 rius et magis circumstantionale est confi-
 tendum, ne serpens in corde manens ac
 latens, venena sua diffundat in viscera
 mentis, sed funditus educatur ac obrua-
 tur. Hinc quoque vitanda est nobis omnis
 consuetudo malâ, etiam in peccatis quæ
 parva videntur, ut in evagatione oculorum
 tempore divinorum, in risu et levitatis cu-
 juscumque indiciis, et præsertim in fra-
 ctione silentii; in negligentis quoque quæ
 in orando, psallendo, meditando, celebran- C
 do, confitendo, solent admitti, ita quod si-
 ne diligenti cordis custodia, sine actuali
 attentione, absque distractionum refrena-
 tione et absque debita summæ majestatis
 reverentia actus tales multoties fiunt ex
 quodam arido usu, corde insipido : quod
 vehementer ac summe cavendum est, præ-
 cipue ne frequenter sic accadat, et ne in
 usum ducatur, sed si quandoque ex huma-
 na fragilitate contigerit, mox homo redeat
 ad se ipsum, seque dire corripiat, valde
 pœniteat, dolorose confiteatur, digne ca- D
 stiget, diligenterque vitet, atque in tam
 sancto agone sit quotidiana occupatio no-
 stra. Quantumcumque etenim culpa modi-
 ca videatur, tamen in consuetudinem du-
 cta, valde gravatur, nec tamen tunc gravior
 videtur, in tantum consuetudo prava obte-
 nebrat mentem. Hinc asserit Augustinus :
 Moles imposita sepulcro, ipsa est dura vis
 consuetudinis qua premitur anima, nec
 resurgere nec respirare permittitur. Et ite-
 rum : Peccata (inquit) quamvis magna et

horrenda, quum in consuetudinem vene-
 rint, aut parva aut nulla esse creduntur.

Secundo, præfatam surditatem ac muti-
 tatem et indurationem in anima parit su-
 perbia. Qui enim sapientes et magni in *Is. v, 21.*
 suis sunt oculis, audaces et sibi placentes,
 proni sunt ad contradictionem, ad proprii
 sensus defensionem, ad disputandum con-
 tra superiorem, ad indignandum; nec fa-
 cilitate acquiescunt, nisi eis dicantur seu
 injungantur ad quæ aliunde sunt inclinati,
 et ex voluntate propria affectati : in qui-
 bus quasi obediendo non vere obediunt, et
 parum aut nihil merentur, quoniam non
 ex caritate et virtute obedientiæ, sed ex
 propria potius voluntate seu affectione
 moventur. Hinc Cassianus disseruit : Su-
 perbia quum in monachi mente resederit,
 primo inobedientem eum reddit ac asper-
 rum, deinde eum mitem atque affabilem
 esse non patitur, nec æqualem commu-
 nemque Fratribus esse sinit, nisi forsân
 fictæ, dum ex ambitione se applicat desi-
 derio proprii commodi ac honoris. Super-
 bia non permittit monachum superiorum
 suorum institui disciplina, imo spiritualis
 verbi collationem sibi in nauseam vertit,
 in tantum ut sermocinatione salutari du-
 rante, visus ejus hinc inde discurrat, et
 pro devotis suspiriis sputa de sicco guttu-
 re traducantur, et exscreationes sine ces-
 satione phlegmatis provocentur; sicque
 membra hinc inde moventur, ut quamdiu
 spiritualis collatio agitur, totum se scaten-
 tibus vermibus vel acutissimis credat su-
 dibus insidere, et quidquid ad ædificatio-
 nem profertur, ob suam suggillationem
 seu repræsentationem putat esse prola-
 tum. Sicque spiritualis collatio ei non so-
 lum non prodest, imo majoris peccati fit
 occasio. Deinde post hæc, alta vox, rigidus
 sermo, amara et turbulenta responsio, in-
 cessus erectus, lingua loquax, nec tacitur-
 nitatis amica, nisi dum contra Fratrem
 aliquem rancorem mente conceperit : fit-
 que silentium ejus, non compunctionis
 aut humilitatis, sed superbiæ et indigna-
 tionis indicium.

Tertio, surditatem et mutificationem ac indurationem præfatas facit amor carnalis, et prava voluptas, quæ tanquam pondera quædam trahunt mentem deorsum, et vitiis passionibusque subjiciunt tanto validius, quanto sensualis illa affectio et delectatio inordinata fuerint magis intensæ. Hinc gulosi et crapulosi verba salubria de sobrietate, abstinencia et corporis castigatione impatienter suscipiunt, nec per approbationem hæc audiunt, sed magis irident. Vitandus ergo est religiosus omnis amor carnalis, et universa sensualis affectio, tam circa se ipsos quam circa ceteros, et circa corporis alimenta, sed et circa vana solatia, circa ludos, jocos, confabulationes, discursus ac proprias libertates, in quibus assuefieri periculosum est maxime et omnino damnabile. Propterea in solo Deo gaudendum est, et extirpanda est delectatio prava. Carnalis equidem amor, sensualis affectio atque immoderata delectatio, mirabiliter ac miserabiliter cor humanum excæcant, trahunt, variisque peccatis involvunt.

Quarto, sic surdum, mutum et induratum facit religiosum duritia cordis, et immansio proprii sensus. Sunt etenim quidam partim ex naturali dispositione duri, indociles atque in sensu proprio pertina-

ces, qui nisi se ipsos fortiter vicerint, et salubrem sibi ipsis violentiam inferre sat-e-gerint, nunquam ad verum perducentur profectum.

Has ergo et alias animam surdificantes ac mutificantes et obdurantes causas et culpas vitemus, et juxta apostolica documenta, sit quilibet nostrum velox ad audiendum verba salutis, verba correptionis, ædificationis, informationis, non verba detractoria aut discordiæ seminativa, nec verba inania, nociva, turbativa, vel ad cachinnos moventia. Insuper Dominum de-

precemur ut tollat in æternum a nobis cor lapideum, aversum, amarum, et præstet nobis cor carneum, cor compunctionis, devotionis omnisque gratiæ faciliter susceptivum, fortiter retentivum; et aperiamus os nostrum ad verba salubria, accusando nos ipsos, ædificandoque alios. Postremo, Christi exemplo adspiciamus in cælum, ad Deum cœli levando cor nostrum, et super miseriis, defectuositatibus ac peccatis nostris cordialiter ac frequen-

ter gemamus; misericordiam imploremus, et defleamus ac emendemus assidue nos ipsos, cum Propheta dicentes ac facientes quod ait: Sicut oculi ancillæ in manibus dominæ suæ, ita oculi nostri ad Dominum Deum nostrum, donec misereatur nostri.

Jacob. 1, 19.

Ezech. xxxvi, 26.

Ps. cxxii, 2.

SERMO SEXTUS

DE MYSTERIIS CURATIONIS SURDI ET MUTI, QUÆ IN SCOPUM SIBI PRÆFIGERE BONI DEBENT RELIGIOSI.

ADMIRABANTUR, dicentes: Bene omnia fecit; et surdos fecit audire, et mutos loqui. Marc. vii, 37.

Quando Salvator curavit surdum et mutum de quo præsens loquitur evangelium, curavit et alios multos surdos ac mutos, cæcos quoque ac debiles, ut in Matthæo legitur, implens quod in Isaia de ipso fuit prædictum: Ecce Deus vester veniet, et

salvabit vos: tunc aperientur oculi cæcorum, et aures surdorum patebunt; tunc saliet sicut cervus claudus, et aperta erit lingua mutorum. Verumtamen Marcus evangelista specialiter recitat de isto surdo et muto, quia in ejus curatione Christus multa mystice egit, et magna præfiguravit mysteria, atque solennius facta est hujus surdi ac muti curatio. Porro turba quæ omnia

Marc. vii, 32 et seq.

Matth. ix, 35; xv, 30, 31.

Is. xxxv, 4-6.

illa Christi conspexit miracula, de tot et A
Marc. vii, tantis mirabilibus stupens, dixit : « Bene
 37. omnia fecit ». Dixitque hoc solum propter
 exteriora illa mirabilia : multo magis nos
 idem dicere possumus et debemus propter
 mysteria in hujus surdi et muti curatione
 signata. Cur etenim Christus, qui prote-
 stante Joanne apostolo, est verus Deus et
 20. vita æterna, cujus perfecta sunt opera, qui
Deut. xxxii, solo verbo, solo nutu, solo imperio potuit
 4. hunc curare, tanta egit in ejus curatione ?
 Nam duxit eum seorsum, misitque digitos
 suos in auriculas ejus ; et exspuens, tetigit B
 sputo suo linguam ipsius ; atque in cœlum
 suspiciens ac ingemiscens, dixit, Adaperi-
 re ; deinde præcepit præsentibus ne istud
 alicui propalarent miraculum. Ecce omnia
 ista in grandi mysterio egit Salvator.

Denique, per hoc quod turba surdum et
 mutum istum, per se ipsum Dominum Je-
 sum accedere non valentem, duxit ad eum,
 instruimur quod de Fratre indurato spiri-
 tualiterque surdo ac muto non faciliter
 desperemus, nec pro ejus conversione la-
 borare cessemus : imo quum videmus nos C
 nullo modo posse eum convertere, hortan-
 do, corripiendo, comminando, terrendo,
 corrigendo, offeramus eum cœlesti, omni-
 potenti, superpiissimo animarum medico,
 illum intente ac ferventer orando pro Fra-
 tre perverso. Multum, imo ineffabiliter
 multum complacet et commendat nos ca-
 ritas, benevolentia, patientia, sollicitudo
 ac devotio ista, Deo qui ex sua pietate im-
 mensa, et merito ita agentium, frequen-
 ter spiritualiter curat hujusmodi Fratrem,
 quemadmodum ad instantiam turbæ cor- D
 poraliter sanavit hunc surdum et mutum.
 Unde in vita S. Pacomii legitur, quod fuit
 in cœnobio illo Pacomii quidam juvenis
 monachus nomine Silvanus, multum inor-
 dinata se habens et levis, alios quoque
 quosdam juniores sibi alliciens atque infi-
 ciens. Propter quod seniores voluerunt
 Fratrem illum expellere, et de hoc sæpe
 loquebantur Pacomio. Qui beatissimus pa-
 ter et vir apostolicæ sanctitatis, rogavit
 Fratres illos patientiam ad tempus habere

cum juvene illo, et orare pro ipso ; et ipse
 Pacomius pro eodem instanter oravit. Pau-
 lo post Deus omnipotens et benignus, tan-
 ta compunctione et gratia, tanto devotionis
 fervore, tam profundissima humilitate im-
 plevit mentem Silvani, quod jugiter in
 omni loco ploravit, nec tempore refectionis
 a lacrimis se potuit refrenare, ita ut san-
 ctus pater Pacomius testabatur de illo,
 quod nullus in toto suo monasterio sic
 esset humilitatem secutus, ut frater Sil-
 vanus. Quo post paucos annos moriente,
 dixit Pacomius animam ejus cum gau-
 dio ab angelis sanctis esse susceptam. Ita-
 que consideret quilibet nostrum quam
 misericorditer ac patientissime egerit Deus
 secum, et similiter agat etiam ipse cum
 proximis suis errantibus.

Insuper, per hoc quod Salvator surdum
 et mutum duxit seorsum, insinuat quod
 eos qui volunt mente curari et gratiarum
 charismatibus adimpleri, necesse sit prava
 et dissoluta vitare consortia, et Deo cre-
 brius in secreto vacare, orando, meditan-
 do, se ipsum discutiendo, et peculiaria
 devotionis exercitia peragendo, exemplo
 dicentis : Ecce elongavi fugiens, et mansi
 in solitudine ; itemque, Similis factus sum
 pellicano solitudinis. Hinc vitanda est fa-
 miliaritas eorum qui in religione irreligio-
 se se habent, videlicet negligenter, præ-
 sertim inobedientium et practicantium,
 qui superiori suo de facili rebelles sunt,
 non pensantes quod scriptum est : Quasi
 peccatum ariolandi est repugnare, et quasi
 scelus idololatriæ, nolle acquiescere. Quo-
 circa ait Gregorius, et habetur in Decreto :
 Vitium paganitatis incurrit, qui superiori-
 bus suis injuste resistit. Amplius, per hoc
 quod Dominus Jesus surdum et mutum
 duxit seorsum, datur intelligi quod homo
 societati iniquorum populariumque ad-
 mixtus, non est faciliter capax gratiæ Dei,
 sed ab illis se retrahens ac se ipsum re-
 colligens, fit aptus ad illuminationem su-
 pernam. Rursus fecit hoc Christus, ut
 doceret vanam gloriam esse vitandam, at-
 que ad designandum quod spiritualiter

Ps. LIV, 8.

Ps. ci, 7.

I Reg. xv,
23.

surdi et muti sint interdum seorsum hortandi ac informandi, ne si hoc publice fiat, ex humano rubore ab advertentia et poenitentia se avertant.

At vero Dei Filius incarnatus digitos suos in auribus posuit surdi et muti istius, ad designandum quod sua divinitas operabatur per corpus suum et corporis membra, tanquam per instrumentum animatum, proprium et conjunctum; item, quia per digitos, propter eorum articulationem ac distinctionem, signatur discretio, quæ ad aperiendum interiores aures valde est necessaria. Rursus, quum Spiritus Sanctus digitus Dei appelletur, per positionem digitorum Christi in auribus surdi et muti, exprimitur quod a spirituali surditate ac mutitate nemo curetur, nisi per infusionem donorum Spiritus Sancti. Rogemus ergo et nos Dominum salvatorem, ut veram discretionem ac dona Spiritus Sancti ponat semper in cordibus nostris, quatenus honeste et secundum ordinem omnia fiant in nobis. Discretio quippe, teste S. Antonio, specialissime necessaria est monacho, ut suo loco et tempore omnia faciat ordinate, regia via incedens, nec majus nec minus quam congruit agens.

Præterea, per salivam, sine qua verba completa formari non queunt, sapientia designatur, quæ os animæ, utpote intellectum, verba mentalia proferentem, rigat, et dulcem ei saporem largitur. Per hoc ergo quod Dominus sputo suo linguam hujus tetigit surdi et muti, docemur quod recte ac meritorie loqui non possumus, nisi dono sapientiæ desuper irrigemur ac per-

Prov. x, 19. fundamur. Propter quod scriptum est: Qui moderatur labia sua, prudentissimus est. Quemadmodum enim multiloquium si-

Eccle. x, 14. gnum est stultitiæ (juxta illud: Stultus

Prov. xxix, 41. verba multiplicat; et, Totum spiritum suum profert stultus), sic taciturnitas et moderata locutio, sapientiæ est indicium et

Job xiii, 5. effectus. Propter quod ait Scriptura: Utinam taceretis, ut putaremini sapientes; et

Prov. xxix, 11. denuo: Sapiens reservat et differt in posterum. Deprecemur itaque Dominum ut

A dono sapientiæ linguam nostram in omnibus gubernare dignetur, et cum Propheta oremus: Pone, Domine, custodiam ori meo, *Ps. cxi, 3.* et ostium circumstantiæ labiis meis. Dei *Prov. xvi, 1.* etenim est gubernare linguam, quam nullus sine gratia potest domare. Nempe, quod de terrenis, vanis, inutilibus libentius quam de spiritualibus ac divinis conferimus, quid est nisi quia ea quæ Dei sunt, nobis non sapiunt, nec gustamus quam dulcis est Dominus, sed vana et frivola meditamur? Sicque ex abundantia cordis os loquitur. Quum autem sapientiæ dono perfundimur, et spirituales atque interni effici-mur, gustantes quam magna sit multitudo dulcedinis Dei, mox otiosa et infructuosa detestamur colloquia, et de pertinentibus ad Dei honorem, ad animarum salutem, ad proximorum ædificationem loquimur.

Præterea, Christus adspexit in cœlum, ad designandum quod omnis potestas et virtus sit a Patre cœlesti. Ingemuit quoque, non ob difficultatem curandi hunc surdum et mutum, sed ex generali et intima compassione qua cunctis spiritualiter mutis et surdis compatiebatur, et item ad insinuandum quod tales difficulter convertuntur, non ex impotentia Dei, sed propter indispositionem eorum. Simili ratione in suscitatione Lazari vidit in cœlum, turbavit se ipsum, fremuit spiritu et ploravit. Postremo, Christus gemitu suo nos docuit, Deum cum interna contritione cordialique gemitu invocare, et propter nostra ac proximorum peccata gemere ac dolere, desiderio quoque vitæ perfectioris ac quotidiani profectus beatitudinisque futuræ, et maxime ex affectu communis reformationis Ecclesiæ præcordiales gemitus Deo offerre, et vanam lætitiā abhorrere. Jussit quoque miraculum non referri, ut doceret nos vanam ostentationem et laudem humanam aspernari ac fugere, solique Deo velle placere, proximis autem in Deo ordinate ad Dei honorem et ipsorum ædificationem, ut sit semper in omnibus recta et sincera nostra intentio. Ad laudem et gloriam Omnipotentis.

DOMINICA XIII POST TRINITATEM

ENARRATIO IN EPISTOLAM

ABRAHÆ DICTÆ SUNT PROMISSIONES, ETC. Galat. III, 16-22.

OSTENDIT Apostolus in præsentī epistola, quod non virtute legis Mosaicæ, sed per fidem Christi consequantur fideles felicitatem æternam ac gratiam : quod etiam in præcedentis dominicæ est declaratum epistola, et in sermonē ei annexo.

Abrahæ dictæ, id est divinitus factæ, sunt promissiones. Nam sicut in Genesi legitur per diversa capitula, frequenter facta est ei promissio de Christo, quod nasciturus esset ex semine ejus, ut quum dictum

est ei : In semine tuo benedicentur omnes gentes. Aliæ quoque promissiones quamplures factæ sunt Abrahæ, utpote de possessione Terræ sanctæ, et de innumerabili multiplicatione seminis sui. Itaque Abrahæ factæ sunt promissiones, *et semini ejus*, id est Christo filio Abrahæ secundum humanam naturam, juxta illud Matthæi : Liber generationis Jesu Christi, filii David, filii Abraham. Factæ sunt autem promissiones tunc Christo, non quod ad eum tunc nondum incarnatum fiebant, sed quia pertinebant ad eum, tanquam implendæ per ipsum. Siquidem per Christum data est benedictio omnibus gentibus, quæ fuit principalis promissio Abrahæ facta. Hinc subditur :

Non dicit Scriptura Geneseos, In seminibus, quasi in multis, id est, promissionem semini Abrahæ, utpote Christo, factam, Scriptura non exprimit pluraliter, dicendo ad Abraham, In seminibus tuis benedicentur omnes gentes : quod faceret,

si de pluribus loqueretur; *sed quasi in uno*, id est, singulariter exprimit semen istud, dicendo : *Et semini tuo, qui est*

Christus, id est, in Christo ex te nascituro, jam nato, benedicentur omnes gentes, hoc est, virtute et merito Christi, dona gratiæ in præsentī, donaque gloriæ in futuro acquirent quidam de omni genere hominum. Elegit enim nos Deus in Christo ante constitutionem mundi, secundum Apostolum. Et ipsemet Christus : Nemo

(inquit) venit ad Patrem, nisi per me ; itemque, Ego si exaltatus fuero a terra, omnia traham ad me ipsum. Hinc Psalmista prædixit : Benedicentur in ipso omnes tribus terræ, et omnes gentes magnificabunt eum. Apud Daniele quoque est prædictum : Omnes populi, tribus et linguæ servient ei. Princeps etiam Apostolorum : Non est (ait) aliud nomen sub cælo datum hominibus, in quo oporteat nos salvos fieri. Præterea, hoc loco, quum dicitur, « quasi in uno », Quasi, denotat veritatem, non similitudinem tantum, quemadmodum et in Evangelio legitur : Vidimus gloriam ejus, gloriam quasi Unigeniti a Patre.

Hoc autem dico quod subditur : Testamentum confirmatum a Deo, quæ post quadringentos et triginta annos facta est lex, non irritum facit. Littera aliququaliter est obscura, sed iste est ordo verborum : « Lex » scripta « quæ facta est », id est Moysi data in monte Sinai, « post quadringentos et triginta annos », incipiendo hanc com-

Gen. xxii, 18.

Ephes. i, 4.

Joann. xiv, 6.

Ibid. xii, 32.

Ps. lxxi, 17.

Dan. vii, 14.

Act. iv, 12.

Joann. i, 14.

Exod. xxxii.

Gen. xii, 3; xviii, 18; xxii, 18.

Ibid. xii, 7; xiii, 15, 16; xv, 5, 7; xxii, 17; etc.

Matth. i, 1.

putationem annorum a tempore promissionis quæ primo facta est Abraham venienti de terra Chaldæorum, « non irritum facit testamentum confirmatum a Deo », id est, promissionem Abraham factam, per Christum tunc adimplendam, modo impletam atque divino juramento firmatam, non cassat neque falsificat, *ad evacuandam promissionem*, id est, ita ut præfatam promissionem privet suo effectu, seu ejus impletionem impediat : quod tamen faceret, si per legem daretur benedictio illa præfata, quæ est hereditas seu salus æterna. Hæc namque promissio ad Abraham facta est diu antequam lex Moysi data est, et antequam Moyses natus est. Si ergo bonum per eam promissum, utpote benedictio ista, daretur per legem, primo sequeretur quod non esset ex promissione ; secundo, quod frustra fieret mentio de semine Abraham, quod est Christus ; tertio, quod Abraham, Isaac et Jacob, ceterique electi qui ante legem fuerunt, divina benedictione seu gratia caruissent, nec æternam hereditatem jam essent adepti, quoniam ante legislationem defuncti sunt. Unde certissime constat quod a principio mundi, per fidem Christi futuri dabatur hominibus benedictio gratiæ ac salutis. Idcirco subjungitur :

Nam si ex lege hereditas, hoc est, si virtute legis scriptæ daretur hominibus gratia felicitasque æterna, *jam non ex promissione Dei daretur*, et sic Abraham esset frustratus spe sua : quod dici non potest, sicut subjungitur. *Abrahæ autem per repromissionem* sibi de Christo sæpius factam, seu per fidem Christi promissi, *donavit Deus* hereditariam benedictionem cœlestem : de qua in Genesi ait ad eum, Ego protector tuus, et merces tua magna nimis.

Sed quia ex præinductis sequi videtur quod lex fuit omnino inutilis, quærit Apostolus, ut nostræ satisfaciatur dubitationi : *Quid igitur lex ?* id est, ad quid data est, et quæ ejus utilitas ? Et respondet : *Propter transgressionem*, id est propter peccata hominum reprimenda ac punienda,

A posita est, hoc est, hominibus data, ut saltem timore pœnarum quæ determinantur in lege, retraherentur a vitiis, *donec veniret semen*, id est, Christus per incarnationem suam mundum intraret, *cui repromiserat*, hoc est, de quo Deus promisit quod per ipsum implerentur promissiones, sicut ad Abraham dixerat Deus : In semine tuo benedicentur omnes gentes. Lex, inquam, *ordinata*, id est ordinate collata a Deo, *per angelos* Moysi, atque per Moysen populo. Unde in Actibus Apostolorum Stephanus dixit Judæis : Accepistis legem in dispositione angelorum. *In manu mediatoris*, hoc est, lex ista posita est in potestate Christi, ita quod eam potuit immutare, perficere, eique finem imponere, nec esset necessario ei subjectus. Propter quod apud Matthæum protestatur : Dominus est Filius hominis etiam sabbati. Ita communiter exponitur. Sed videtur hoc loco per mediatorem, Moyses posse intelligi, per cujus manum atque obsequium data est lex. Moyses quippe inter Deum et populum Israel exstitit mediator, quemadmodum sæpius fatetur : Ego (inquiens) inter Deum et vos fui sequester. Constat ergo quod lex data est Moysi, non solum unius ministerio angeli, sed multorum, quamvis communiter in libris Moysis non fiat mentio nisi de angelo uno, quia principalius ac familiarius loquebatur cum Moyse : qui etiam angelus sæpe Dominus appellatur, quoniam in persona Dei apparuit locutusque fuit. *Mediator autem unius non est* dumtaxat, sed duorum extremorum, inter quæ mediat, eademque connectit ; *Deus autem unus est* in essentia. Tanquam dicat : Licet Christus sit mediator Dei et hominum, est tamen idem Deus cum Patre et Spiritu Sancto.

Lex ergo adversus promissa Dei ? id est, numquid sequitur ex his, quod lex sit promissioni divinæ contraria, ita quod ex lege datur salus et gratia ? Quasi dicat, Non. Ideo subdit : *Si enim data esset per Moysen lex quæ posset vivificare*, vitam gratiæ conferendo, atque ad vitam gloriæ

Gen. xii, 3.

Gen. xxii, 18.

Act. vii, 53.

Matth. xii, 8.

Deut. v, 5.

1 Tim. ii, 5.

Ibid. xv, 1.

perducendo; *vere ex lege*, id est legis observantia, *esset justitia* infusa ac meritoria, sufficiens ad salutem absque fide de Christo. *Sed conclusit*, hoc est, esse ostendit, convicit, et occasionaliter fecit, *Scriptura*, id est lex vetus seu Mosaicæ legis scriptura, *omnia* genera hominum, seu universos Judæos, *sub peccato*, non solum originali, sed etiam actuali. Per legem namque erat directe peccati cognitio, ac indirecte peccati augmentatio: primo, quia in vetita nitimur, id est, ad prohibita magis afficimur; secundo, quoniam post prohibitionem gravius est peccare quam ante. Hinc ait Scriptura in Psalmo: Omnes declinaverunt, simul inutiles facti sunt; et Isaias: Omnes nos quasi oves erravimus, unusquisque in viam suam declinavit. *Ut promissio*, id est promissa beatitudo et gratia, *ex fide Jesu Christi daretur*

A credentibus: quia per fidem Christi venturi, salutem adepti sunt electi qui ante adventum Christi fuerunt, nec opera illorum meritoria erant nisi per fidem hanc, quemadmodum electi qui postea exstiterunt, per fidem Christi incarnati et missi, salutem sunt consecuti, et consequuntur quotidie.

Postremo, circa verbum illud Apostoli in præsentī epistola, « post quadringentos et triginta annos facta est lex », posset quæstio magna moveri, quoniam idem iste Apostolus ait: Distribuit eis Deus terram eorum, quasi post quadringentos et quinquaginta annos. In Exodo quoque dicitur: Habitatio filiorum Israel in Ægypto, fuit quadringentorum triginta annorum, quibus expletis, eodem die egressi sunt. Sed de horum concordantia super epistolas Pauli scripsi: ideo brevitati intendens, jam transeo.

SERMO PRIMUS

QUOMODO DEUS PROMISSA OLIM ABRAHÆ IN LEGE, SPIRITUALITER SUIS LARGIATUR FIDELIBUS; HI QUOQUE QUOMODO DIGNE VIVERE DEBEANT.

VENIET *Desideratus cunctis gentibus.* Agg. II, 8.

Filium Dei Jesum Christum esse incarnandum, et in mundum mittendum, ac redempturum genus humanum, Deus Pater a principio mundi, per Patriarchas ac Prophetas prædixit ac præsignavit. Propter quod apud Lucam Zacharias testatur: Erexit cornu salutis nobis, sicut locutus est per os sanctorum, qui a sæculo sunt, Prophetarum ejus. Et in Actibus princeps Apostolorum ait: Deus prænuntiavit per os omnium Prophetarum suorum pati Christum suum. Denique, secundum Prophetarum doctrinam, Christus venturus erat non solum ad liberandum populum Judæorum, sed totum genus humanum, quemadmodum ex nunc dictis in expositione

epistolæ hodiernæ potest probari. Nec promissus fuit Christus ad liberandum humanum genus seu populum Judæorum de captivitate humana et exteriori, sed de captivitate spirituali, qua genus humanum, propter originale primi parentis peccatum, sub quadam exstitit dæmonis potestate, ita quod æterna beatitudine fuit privatum, nec a reatu originalis peccati potuit liberari, nisi per Christum, qui pro illo satisfecit peccato, et gratiam ac salutem promeruit mundo, sicque januam regni cœlestis antea clausam reseravit hominibus. Idecirco Christus vocatur « Desideratus cunctis gentibus », quoniam universis populis summe desiderabilis fuit, cunctisque gentibus ad fidem conversis præcipue desideratus. Hinc quoque Jacob patriarcha

Ps. XIII, 3;
LIII, 4.

Is. LIII, 6.

Galat. III,
17.

Act. XIII, 19,
20.

Exod. XII,
40, 41.

In Galat.
III, 17.

Luc. I, 69,
70.

Act. III, 18.

Agg. II, 8.

Gen. XLIX, ait de Christo : Ipse erit exspectatio gentium. Sed et apud Isaiam Deus Pater loquitur Christo : Dedi te in fœdus populi, in lucem gentium, ut aperires oculos cæcorum.

Insuper ex iis patet error et excæcatio miserabilium Judæorum : primo, in hoc quod asserunt regem Messiam seu Christum venturum solum ad liberationem eorum; secundo, in hoc quod putant Christum ad hoc esse venturum, ut eruat eos de captivitate hac temporali et corporali in qua detinentur, per mundum dispersi. Imo beatissimi Prophetæ apertissime prædixerunt populum Judæorum in primo Christi adventu esse excæcandum ac deserendum, gentiles vero ubique terrarum credituros in Christum. Hinc quippe in

Ibid. XLIX, 5, 6. Isaia habetur : Et nunc hæc dicit Dominus, formans me ex utero servum sibi, ut reducam Jacob ad eum; et Israel non congregabitur. Et glorificatus sum in oculis Domini, et dixit : Parum est ut sis mihi servus ad suscitandas tribus Jacob, et fæces Israel convertendas : dedi te in lucem

Rom. XI. lus in epistola ad Romanos, ex scripturis veteris Testamenti, præsertim ex libro Psalmorum et Isaia. Hinc rursus Danieli a Gabriele prædictum est : Occidetur Christus, et non erit ejus populus qui eum negaturus est; et finis ejus vastitas, et usque ad finem perseverabit desolatio. Præterea, ex hac radice probat Apostolus in pluribus locis insufficientiam veteris legis : quia ejus observatio non suffecerat ad salutem, sed necessaria fuit redemptio humani generis per Christum; nec poterat quis salvari, sive in lege naturæ, quæ duravit ab Adam usque ad Moysen, quantum ad omnes, sive in lege scripta data per Moysen, quæ duravit usque ad evangelicæ legis promulgationem, nisi habendo fidem explicitam, aut certe implicitam, de Christi adventu et redemptione mundi per eum.

Galat. III, 16. Amplius, circa exordium epistolæ hodiernæ quo legitur, Abrahæ dictæ sunt

A promissiones, pensandum quod Deus omnipotens promisit Abrahæ principaliter tria. Primum fuit collatio Terræ sanctæ melle et lacte manantis. Quam tamen promisit Abrahæ non pro se, sed pro semine ejus, juxta illud : Semini tuo dabo terram hanc. Secundum fuit seminis sui multiplicatio, prout in Genesi ait ad eum : Multiplicabo semen tuum sicut stellas cœli et sicut arenam maris. Tertium fuit cœlestis retributionis beata merces. Unde ibidem Deus loquitur Abrahæ : Ego protector tuus

B sum et merces tua magna nimis. Hæc tria promittit atque largitur Deus suis fidelibus Abrahæ imitatoribus : primo videlicet, temporalium sufficientiam, juxta quod loquitur Christus, Primum quærite regnum Dei et justitiam ejus, et hæc omnia adjicientur vobis; secundo, spiritualium bonorum affluentiam, scilicet gratiam, et virtutes ac dona Spiritus Sancti, quemadmodum in principio primæ epistolæ ad Corinthios scribit Apostolus, Gratias ago Deo meo pro vobis, quia in omnibus divites facti estis in Christo, in omni verbo

C et in omni scientia, ita ut nihil vobis desit in ulla gratia; tertio, præmium felicitatis æternæ, in quo omnia desiderabilia includuntur. De quibus Apostolus : Oculus (inquit) non vidit, nec auris audivit, nec in cor hominis ascenderunt quæ præparavit Deus diligentibus se. De quibus fatetur Psalmista : Credo videre bona Domini in terra viventium. Hæc bona præparata sunt perseverantibus usque in finem in virtutum operibus, sicut ait Salvator : Qui perseveraverit usque in finem, hic salvus erit.

Unde in Apocalypsi hortatur : Esto fidelis usque ad mortem, et dabo tibi coronam vitæ. Itaque, juxta informationem Apostoli, habentes has promissiones, mundemus nos ab omni inquinamento carnis et spiritus, hoc est ab universis carnalibus spiritualibusque peccatis, ab omni gula, luxuria, somnolentia, avaritia, item ab omni superbia, invidia, acedia, ut Deo sanctitatis immensæ mundo corde castoque corpore serviamus.

Gen. XII, 7.

Ibid. XXII, 17.

Ibid. XV, 1.

Matth. VI, 33.

I Cor. I, 4, 5, 7.

Ibid. II, 9.

Ps. XXVI, 13.

Matth. XXIV, 13.

Apoc. II, 10.

II Cor. VII, 1.

Præterea, ut Deo altissimo tam decenter A et pure obsequi valeamus, cogitemus sæpissime quod ipse Deus indesinenter nos adspicit, et omne quod intus forisque agimus, clarissime intuetur, nec minimam culpam dimittit inultam. Idcirco in ejus præsentia atque intuitu turpiter agere, illicite loqui, male cogitare, vitiose appetere, bona omittere erubescamus, cum Elia et Eliseo dicentes : Vivit Dominus, in cuius conspectu sto hodie. Hæc consideratio movit David regem ad virtuose vivendum, secundum quod loquitur Deo : Servavi B mandata tua et testimonia tua, quia omnes viæ meæ in conspectu tuo. Consideremus quantum indignaretur rex terrenus mortalis, si quis eo inspiciente et adstante præceptum ipsius transgrederetur : nonne se nimis despici judicaret, atque districtam inferret vindictam ? Quantum ergo indignatur Deus, rex omnipotens et æternus, impiis vilibusque hominibus qui eo intuente exercent tot mala ? Quam horribilem suo tempore facit ultionem ? Certe quanto nunc diutius differt, tanto paulo C post terribilius ulciscetur.

Denique, ad vitandum peccata, atque ad vitam in omnibus custoditam, fructuosam, ferventem, plurimum confert diligens ac profunda consideratio quatuor novissimorum, videlicet propriæ mortis, divini iudicii, infernalis supplicii, cœlestisque gaudii. Cogitemus igitur sagaciter ac frequenter quam brevis, incerta et fallax sit vita hæc,

quam amara sit mors; quam districtum ac metuendissimum sit Dei iudicium, in quo etiam de omni verbo otioso exigenda est ratio; quam intolerabilia ac acerbissima sint inferni tormenta, et quanta sit beatitudo cœlestis. Horum consideratio ad omne bonum nos incitet et inflammet, quemadmodum S. Hieronymus primo libro Vitaspatrum refert de quodam fratre Joanne, eremita sanctissimo. Qui quum primo transisset ad habitandum in eremo, per tres annos continuos sub cuiusdam saxi rupe semper stans oravit, ita ut nunquam sederet neque jaceret. Somni autem tantum sumpsit, quantum stans capere potuit; cibum vero non sumpsit nisi die dominico. Pedes quoque ipsius, eo quod tamdiu immobiles steterant, dirumpebantur, ita quod sanies ex eis profluxit. Tribus demum annis completis, adstitit ei angelus, dicens : Dominus noster Jesus Christus orationes tuas suscepit, et corporis tui vulnera sanat, cœlestisque cibi, id est verbi ac scientiæ salutaris, abundantiam tibi largitur. Tangens itaque angelus os et pedes viri sancti illius, corpore reddidit sanum et gratia doctrinæ cœlestis repletum, jussitque eum eremum circuire, et Fratres undique visitare, consolari, instruere. Dedit etiam Deus eidem fratri Joanni gratiam et virtutem copiosam faciendi miracula, ita quod quibuscumque ægris panem benedictum mittebat, mox ut inde comederunt, sanati sunt.

ENARRATIO IN EVANGELIUM

BEATI OCULI QUI VIDENT QUÆ VOS VIDETIS. Luc. x, 23-37.

IN evangelio hodierno principaliter tria D tanguntur. Primum est consolatio discipulorum Christi. Secundum est informatio omnium Christianorum de necessariis ad salutem, videlicet de observatione

duorum principalium mandatorum. Tertium est instructio quis sit proximus cuiuslibet hominis.

Itaque dixit Jesus discipulis suis : Beati oculi qui vident quæ vos videtis. Dico enim

III Reg. xvii, 1; IV Reg. iii, 14.

Ps. cxviii, 168.

Ecclesi. vii, 40.

Matth. xii, 36.

vobis, quod multi Prophetæ et reges voluerunt videre quæ vos videtis, et non viderunt; et audire quæ auditis, et non audierunt. Hæc verba consolatoria dixit discipulis suis Salvator duabus ex causis. Primo, quia ipse vocavit eos ad paupertatem et mundi contemptum, ad diversos labores, tribulationes, angustias, quas secum sustinuerunt. Propter quod tempore Cœnæ dixit Apostolis: Vos estis qui permansistis mecum in tentationibus meis. Idecirco consolatur ac beatificat eos, dicendo verba prædicta. Secundo, quia Christus statim ante hæc verba gratias egit Deo Patri, quia sacra christianæ fidei mysteria abscondit a sapientibus atque prudentibus sæculi hujus, et humilibus suis discipulis eadem revelavit. Idecirco asserit beatos esse oculos eorum.

Sed quæri potest, de quibus oculis intelligenda sunt hæc. Non de corporalibus oculis, nam Judas et Pharisæi et Scribæ corporalibus oculis Christum ejusque signa viderunt, et verba ipsius audierunt, et tamen infelices fuerunt et sunt. Imo ille adspectus et auditus fuit eis majoris ruinæ ac damnationis occasio, secundum quod Christus in sermone post Cœnam dixit: Si non venissem et locutus eis fuisset, peccatum non haberent; nunc autem viderunt, et oderunt me et Patrem meum. Nec de interioribus et spiritualibus oculis, quoniam illis oculis sancti reges ac Prophetæ Christum ejusque facta viderunt: aliter non prophetassent de eis, nec ejus miracula prænuntiassent. Nonne Christum in spiritu vidit Isaias, quum dixit, Puer natus est nobis, filius datus est nobis; itemque, Tunc aperientur oculi cæcorum, etc.; et rursus, Et vidimus eum non habentem speciem neque decorem? Christus quoque dixit Judæis: Abraham pater vester exsultavit ut videret diem meum; vidit, et gavisus est. Respondendum, quod verba inducta intelligenda sunt de visu et auditu interiori conjuncto visui et auditui exteriori. Sic equidem Dei Unigenitum incarnatum ejusque miracula intueri, et verba ipsius audire, divinitatem ejus credendo,

A et humanitatem ipsius corporaliter inspicendo, atque dulcissima, eloquentissima ac sapientissima verba ejus auribus cordis et corporis audiendo, fuit utique delectabile valde; et beati fuerunt oculi illi beatitudine spei ac meriti. Denique omnes sancti Prophetæ et multi devoti reges valde desideraverunt taliter Christum et ejus gesta videre, ac verba ipsius audire: nam et ejus adventum ardentissime cupiebant. Desideraverunt itaque istud vel absolute, vel conditionaliter, utpote si fuisset possibile: communiter namque sciverunt quod eis viventibus Christus non esset venturus.

Et ecce quidam legisperitus, id est doctor legis seu Scriba, surrexit, quasi reverentiam exhibens Christo, vel ut ab omnibus melius audiretur, vel ut præsentibus ad suum adspectum atque præconium incitaret, tentans eum, id est, circumvenire et fallere cupiens Christum, et dicens: Magister, quid faciendo vitam æternam possidebo? id est, quibus operibus felicitatem æternam potero promereri ac obtinere?

At ille, videlicet Jesus, qui cordium cognitor est, dixit ad illum: In lege Moysis quid scriptum est? quomodo legis, in libris Mosaicæ legis? Conabatur autem hic legisperitus probare quod Christus aliquid contra legem Moysis ageret aut doceret. Ideo Christus remittit illum ad legem: per quod ostendit se legem approbare.

Ille respondens, dixit: Diliges Dominum Deum tuum ex toto corde tuo, id est ex toto voluntatis affectu. Sicque per cor designatur voluntas, quoniam sicut cor est primum vivens in animali, et cetera membra movens, sic voluntas per caritatem primo vivificatur, et ceteras animæ movet potentias. Et ex tota anima tua, id est tota animæ intentione, et ex omnibus viribus tuis, id est cunctis etiam inferioribus potentiis, ut appetitus concupiscibilis et irascibilis omnesque sensus interiores et exteriores regantur per rectæ rationis judicium, secundum quod caritas Dei re-

Luc. xxii, 28.

Ibid. x, 23.

Joann. xv, 22, 24.

Is. ix, 6.

Ibid. xxxv, 5.

Ibid. liii, 2.

Joann. viii, 56.

Ps. vii, 10.

quirit, atque ad caritatis profectum consummationemque pertinet, quemadmodum *Eccli. xiii, 4-6.* Ecclesiasticus sapiens orat: Domine, pater et dominator vitæ meæ, extollentiam oculorum meorum ne dederis mihi, et omne desiderium pravum averte a me; aufer a me ventris concupiscentias, et concubitus concupiscentiæ ne apprehendant me. *Et ex omni mente tua,* id est toto intellectu, ne in eo sit error aut hæresis, aut aliquid veritati fidei derogans, sed tota consideratio, contemplatio omnisque actio intellectus ordinetur et tendat ad Dei honorem, ad divini amoris fervorem, ad perfectam mentis cum Deo conjunctionem. Cognitio enim veritatis ad amorem Divinitatis atque virtutum debet referri. *Joann. xvii, 25, 26.* Unde ait Salvator: Pater juste, notum feci eis nomen tuum, ut dilectio tua in eis sit.

Denique præceptum istud scriptum est *Deut. vi, 5.* in Deuteronomio, in quo legitur: Diliges Dominum Deum tuum ex toto corde tuo, et ex tota anima tua, et ex tota fortitudine tua. Et quamvis Moyses ibi non exprimat nisi tria, tamen in illis tribus hæc quatuor includuntur. Nempe quod hic dicitur, « ex omnibus viribus tuis », Moyses dicit, Ex tota fortitudine. Per totum autem cor intelligit voluntatem et intellectum, quemadmodum et Psalmista dicendo: Confitebor tibi, Domine, in toto corde meo. De intelligentia demum hujus præcepti in sermonibus magis dicitur. *Ps. ix, 2; lxxxv, 12; cxxxvii, 1.*

Et proximum tuum diliges sicut te ipsum, id est vere et spiritualiter atque stabiliter in Domino Deo, optando ei bona gratiæ in præsentī, et bona gloriæ in futuro, consilium et auxilium ei præbendo tempore opportuno, et in necessariis vitæ, dum opus est, succurrendo. Hoc præceptum sumptum est ex Levitico, ubi scriptum est, Diliges amicum tuum sicut te ipsum: ubi Septuaginta transtulisse dicuntur, Proximum tuum. Per proximum autem intelligendus est omnis homo gratiæ capax et gloriæ, qui communione naturæ est proximus. *Lev. xix, 18.*

Dixitque illi, scilicet legisperito, Jesus:

T. 30.

Recte respondisti; hoc fac, id est, hæc duo caritatis præcepta adimple, *et vives* per gratiam et virtutes in via, et per gloriam felicitatis æternæ in patria.

Ille autem volens justificare se ipsum, id est justum monstrare, et suam excellentiam ostentare, quum tamen in Ecclesiastico scriptum sit, Non te justifies ante Deum; *dixit ad Jesum: Et quis est meus proximus?* id est, quem intelligere debeo nomine proximi? Hoc rursus quæsit, ut caperet Christum in sua responsione. Advertit enim, ut apparet, quod Christus docuit etiam inimicos esse diligendos: quod iste putavit contra Moysis legem, quia Judæi quamplures per proximum non intelligebant nisi Judæos, et ceteros reputabant alienos, non proximos. Hinc interrogavit, « Quis est meus proximus? » ut si Christus diceret, Quilibet homo vitæ præsentis, probaret eum legis adversarium; si autem diceret, Quilibet Judæus, probaret se justum, dicendo, Omnem amo Judæum. Sed, ut Salomon loquitur, Frustra *Prov. i, 17.* jacitur rete ante oculos pennatorum. Unde et Christus omnium sapientissimus sapientium, ita respondet, quod insidiatorem propria responsione capit vincitque, proponens parabolam, sicut subjungitur.

Suspiciens autem Jesus, id est, sursum adspiciens, seu longe et late visum circumducens, ad insinuandum quod de re magna esset locuturus, atque compatiens communi humani generis calamitati, *dixit: Homo quidam descendebat ab Jerusalem in Jericho, et incidit in latrones.* Sensus qui superficialiter litteralis videtur, difficultatem non habet. Et quod hic dicitur quasi parabola, potuit sæpe contingere et esse res gesta: quia ut ait Basiliius, Jerusalem in alto sita est, Jericho autem deorsum, et inter has urbes fuit desertum in quo latrones quosdam occidere consueverunt.

Spiritualiter, per hominem istum intelligitur primus homo, seu genus humanum; per Jerusalem, paradisos terrestris; per Jericho, mundus iste in maligno po- *1 Joann. v, 19.*

situs, seu instabilitas, insipientia atque A mortalitas vitæ præsentis. Jericho enim interpretatur luna, per quam ob suam continuam variationem, crescentiam et decre-
Eccli.
 xxvii, 12.
 scientiam, designatur hic mundus instabilis, seu instabilitas, insipientia et mortalitas vitæ hujus. Nam scriptum est : Stultus mutatur ut luna. Itaque Adam et genus humanum in eo, per originale peccatum descendit et corrui-
 I Petr. v, 8.
 tit a paradiso in præsentis exilii locum, atque in statum mortalem, instabilem, defectuosum vitæ præsentis. Peccando quoque incidit in latrones, hoc est in dæmonum acies, qui animas quærunt per peccata occidere, et peccantes ad æternæ damnationis mortem pertrahe-
Qui etiam despoliaverunt eum, id est, decore gratiæ ac virtutum spiritualiter nudaverunt : quia dum hominem per tentamenta sua ad mortale peccatum inducunt, gratia et virtutibus, quæ sunt animarum vestes ac ornamenta, eum mox privant. *Et plagis impositis, abierunt*, id est, quum animam ejus graviter multipliciterque læsis-
 sent, cessaverunt ad horam ab ejus læsione; vel, « abierunt », insidias abscondendo. Denique, tam Adam quam genus humanum incurrit specialiter quatuor vulnera animæ ex originali peccato, puta malitiam, id est pronitatem ad mala in voluntate, ignorantiam in intellectu, infirmitatem in vi irascibili, concupiscentiam in concupiscibili. *Semivivo relicto* : quia licet per mortale peccatum vita gratiæ et caritas totaliter auferantur, manet tamen in homine liberum arbitrium, quo potest dispositive resurgere, faciendo quod in se est; sublata D quoque vita gratiæ, manet vita naturæ.

Accidit autem ut sacerdos quidam descenderet eadem via, et viso eo, præteriit. Per sacerdotem istum, intelligitur Aaron, seu universitas sacerdotum legalium : qui eadem via descendit, quia per originale peccatum mundum intravit; et cognita Adæ generisque humani præfata læsione, pertransiit, quia subvenire ac salvare nequivit. *Similiter et Levita, quum esset secus locum et videret eum*, scilicet ho-

minem semivivum, *pertransiit*. Per Levitam intelligitur Moyses frater Aaron Levites, seu universitas Levitarum ministrorumque templi aut Prophetarum : qui quum esset in mundo hoc vivens, atque agnosceret vulneratum esse genus humanum modo præfato, curare et salvare illud non valuit, imo pertransiit, et moriendo ad inferni limbum devenit.

Samaritanus autem quidam iter faciens. Per Samaritanum istum, ob nominis interpretationem, intelligit Christus se ipsum, quoniam Samaritanus custos interpretatur. Christus autem est humani generis custos, juxta illud Job : Quid faciam tibi, o custos hominum? Et in Psalmo : Ecce non dormitabit neque dormiet qui custodit Israel. Christus quoque iter fecit in sæculo isto, secundum illud Joannis : Verbum caro factum est, et habitavit in nobis. *Venit secus eum*, id est, humano generi clementissime se adjunxit, et illud ut medicus piissimus visitavit, quemadmodum per Zachariam prædixit : Gaude, C filia Sion, quia ecce ego venio, et habitabo in medio tui. *Et videns eum* oculo corporali ac interiori, *misericordia motus est*, id est, pie condoluit et subvenit, juxta illud Threnorum : Misericordiæ Domini, quia non sumus consumpti.

Et appropians, id est, humano generi caritative et pie se applicans prædicando, signa faciendo, gratiam infundendo, *alligavit vulnera ejus*, id est, peccata curavit, et vires animæ spiritualiter vulneratas, per gratiarum et virtutum charismata reformavit. Hoc enim Christus meritorie fecit in sua salvifica passione, deinde per sacramenta Baptismi ac Pœnitentiæ realiter sic implevit. Unde ab Isaia dictum est : Vere languores nostros ipse tulit, et peccata nostra ipse portavit. Hinc angelus de Christo dixit ad Joseph : Ipse salvum faciet populum suum a peccatis eorum. Princeps quoque Apostolorum : Jesum (inquit) unxit Deus Spiritu Sancto et virtute, qui pertransiit benefaciendo et sanando omnes oppressos a diabolo. *Infundens ole-*

Job vii, 20.

Ps. cxx, 4.

Joann. i, 14.

Zach. ii, 10.

Thren. iii, 22.

Is. liii, 4, juxta LXX.

Matth. i, 21.

Act. x, 38.

um, id est, piam adhibens informationem et consolationem, *et vinum*, id est justitiæ disciplinam, seu increpationem et correctionem, confortationem quoque et exhortationem ad opera virtuosa. Christus enim pie et juste se habuit, et actus pietatis atque justitiæ cum summa discretione commiscuit, juxta illud : Universæ viæ Domini misericordia et veritas.

Et imponens illum in jumentum suum, id est, in corpore suo peccata humani generis luens, et per hoc corpori suo homines uniens, juxta illud Isaïæ : Dominus posuit in eo iniquitatem omnium nostrum; et iterum, Vulneratus est propter iniquitates nostras. Unde prima Petri habetur : Peccata nostra pertulit in corpore suo super lignum. Itaque per jumentum Christi, intelligitur corpus ejus, non ob bestialem vilitatem, sed propter obedientissimam subjectionem, atque promptissimam servitutem, qua animæ divinitatque Christi semper paruit ac servivit. Unde vir obediens loquitur Deo : Ut jumentum factus sum apud te. *Duxit in stabulum*, id est, Ecclesiæ ipsum incorporavit. Ecclesia namque est Christi ovile ac stabulum, in quo oves suas ponit ac reficit. Et recte Ecclesia stabulum appellatur, quia durante hac vita, miseriis multis et immunditiis quibusdam afficitur, imo ad ruinam et deformationem multiplicem modo collapsa est. Universæ quoque justitiæ nostræ panno menstruatae comparantur. *Et curam illius egit*. Christus namque, quamdiu in sæculo hoc fuit, valde fuit pro hominum salute sollicitus, ad prædicandum hinc inde discurrens, miracula faciens, pro hominibus orans, multos convertens, discipulos quoque ad prædicandum mittens.

Et altera die, id est tempore suam passionem et resurrectionem sequente, *protulit duos denarios*, id est veteris ac novi Testamenti scripturas, *et dedit stabulario*, id est choro Apostolorum et aliorum discipulorum suorum, quibus post resurrectionem suam frequenter apparens, Scripturarum dedit notitiam, juxta illud : Tunc aperuit il-

lis sensum, ut intelligerent Scripturas. Potissimum autem fecit hoc in die sacratissimo Pentecostes, dum misso Spiritu Sancto, omnium linguarum ac scripturarum scientiam abundantissime infudit Apostolis.

Et ait : Curam illius habe. Præcepit quippe Apostolis, ut omnem populum sollicitè erudirent. Unde ait eis : Euntes in mundum universum, prædicate Evangelium omni creaturæ. Sed et beatissimo Petro specialiter universalem commisit Ecclesiam ante ascensionem, dicendo : *Pascue oves meas. Et quodcumque superero-* *gaveris*, id est, ultra debitum feceris, et de naturali industria ac labore addideris, cooperando gratiæ et donis infusis, et pro aliorum salute fideliter insudando. *Ego quum rediero* ad judicandum vivos et mortuos; vel, « rediero », id est, tempore mortis vestræ vos visitavero per particulare judicium ac retributionem, juxta illud Apocalypsis : Ecce venio cito, et merces mea mecum est, dare unicuique juxta opera sua. *Reddam tibi præmium copiosum ultra condignum*.

Deinceps quærit a legisperito, non quasi ignorans, sed illum instruere volens : *Quis horum trium videtur tibi proximus fuisse illi qui incidit in latrones ? At ille dixit : Qui fecit misericordiam in illum*, id est, Samaritanus ratione beneficii tanti magis promeruit proximus appellari. Sicque Christus legisperitum ex sua responsione convicit, cepit, conclusit, utpote quod per proximum non debet intelligi solus Judæus sive amicus. *Et ait illi Jesus : Vade*, id est, recede et desine mihi insidiari; spiritualiter quoque, « Vade », in virtutibus proficiendo, et legem Moysis veraciter intelligendo. *Et tu fac similiter*, id est, omni homini indigenti pro viribus tuis succurre, nec solis Judæis te proximum exhibe, sed omni homini viatori, si casus evenierit ut tua quis ope indigeat.

Circa evangelium istud plura pulcherri-
ma dici possent, et super Lucam plura circa ipsum conscripsi; nunc vero brevitati studens, perpauca celeriter tetigi.

SERMO SECUNDUS

DE JUCUNDITATE VISIONIS DIVINÆ, DE FELICITATE CHRISTIANORUM, DEQUE NOCUMENTIS
MORTALIUM PECCATORUM.

BEATI viri tui, et beati servi tui, qui hic adstant coram te semper, et audiunt sapientiam tuam. III Reg. x, 8.

III Reg. x,
1 et seq.;
II Par. ix, 1
et seq.

Verba ista ad litteram scripta sunt de Salomone rege, qui in sapientia fuit ita famosus, quod regina Saba venit a finibus terræ cum grandi comitatu, et auro copioso ac pretiosissimis aromatibus, audire sapientiam ejus. Quæ quum ingressa fuisset ad Salomonem, proposuit ei difficillimas quæstiones ac diversa ænigmata, et universa quæ erant in corde ipsius. Ad quæ omnia rex Salomon clarissime atque promptissime mox respondit. Quumque regina illa prudentissima experta esset tantam sapientiam Salomonis, vidissetque templum quod ædificavit, et domum quam fecit sibi ac conjugii suæ, cibos quoque mensæ ipsius, et ordines ministrantium ac vestes eorum, et etiam alia multa præclara, præ admiratione defecit, et ultra non habuit spiritum, sed quasi in ecstasim lapsa est. Deinde post tempus reversa ad se, dixit ad regem : Major est sapientia tua et opera tua, quam rumor quem audi- vi; beati viri tui, et beati servi tui, qui hic adstant coram te semper, et audiunt sapientiam tuam.

I Cor. i, 24.

Si ergo beati fuerunt Salomonis ministri, qui ex ore ipsius verba sapientiæ audierunt, quanto magis Apostoli ceterique discipuli, qui quotidie Christum, Dei virtutem et Dei sapientiam, corporaliter spiritualiterque viderunt ac audierunt, beati fuerunt? Christus namque non solum sapiens fuit ut Salomon, sed in quantum Deus, fuit sapientia ipsa æterna, increata, immensa; secundum naturam quoque humanam, fuit ineffabiliter sapientior Salo-

mone. Hinc Christus in Evangelio reprehendit Judæos incredulos, quod prædicationi sapientiæ suæ non attendebant neque credebant, dicens : Regina Saba surget in judicio contra generationem istam, et condemnabit eam, quia venit a finibus terræ audire sapientiam Salomonis; et ecce plus quam Salomon hic, id est, ego Salomone sum major ac sapientior. Deinde opera Salomonis operibus Christi comparari nullatenus possunt. Sed his immorari superfluum reor. Itaque, sicut Salomoni dixit regina Saba, « Beati viri tui, et beati servi tui, qui hic stant coram te semper », etc.; sic Christo in mundo hoc adhuc conversanti, multo excellentius dici quivit : « Beati viri tui, et beati servi tui », hoc est Apostoli ceterique discipuli, qui fide, caritate et opere pertinebant ad Christum. De quibus ipse dixit ad Patrem in sermone post Cœnam : Tui erant, et mihi eos dedi- sti; et sermonem tuum servaverunt, et cognoverunt quia ex te exivi. Isti Christo adstiterunt usque ad passionem, quibus et post resurrectionem apparuit.

Matth. xii,
42.

III Reg. x,
8.

Joann. xvii,
6, 8.

Præterea, verba hæc ad litteram de Salomone conscripta, et allegorice de Christo exposita, possunt et anagogice exponi de Deo regnante seu Christo triumphante in cœlis, et comprehensoribus universis, hoc est cœlestibus civibus. Si ergo beati fuerunt discipuli Christi, qui eum per fidem et visum ac auditum corporalem viderunt ac audierunt, qui nihilo minus adhuc mortales et multis fuerunt subjecti miseriis : quam incomparabiliter feliciores sunt omnes cives cœlestes, qui Christi, imo totius supergloriosissimæ Trinitatis essentiam clare ac per speciem inavertibiliter vident,

atque immensa illius bonitate ac suavitate ad libitum plene ac securissime perfruntur ?

Sed quia ad spiritualium cognitionem mens humana non facile elevatur, nisi sensibilibus similitudinibus seu exemplorum manuductionibus adjuvetur, poni potest hujus rei sensibile clarissimumque exemplum. Certe in corporalibus rebus videmus quod quanto aliquid est pulchrius, tanto delectabilius est ipsum adspicere; et quanto quid est suavius, tanto jucundius est illud gustare seu perfrui illo. Si ergo intraret ad nos adolescens tam pulcher ut fuit Absalon, seu Paris sive Adonis, nonne cum admiratione et gaudio illum intueremur ? Si autem paulo post ingrederetur ad nos adolescens decies speciosior illis, hunc utique cum ampliori valde admiratione atque lætitia inspiceremus. Si vero post modicum intraret juvenis centies pulchrior isto qui illis decies pulchrior est, jam istum secundo visum modice reputaremus comparatione hujus tertii centies pulchrioris, huncque cum ingenti obstupescatione et delectatione conspiceremus. Deinde, si quartus intraret millies pulchrior illo tertio, jam præ admiratione stupidi redderemur, omnesque illos comparatione quarti istius quasi pro nihilo arbitraremur. Sic quoque ascendere possemus, imaginando quod quintus intraret decies millies pulchrior, sextus centies millies venustior, septimus millies speciosior : et tamen quantumcumque ascenderemus per numeros, nunquam ad aliquem infinitæ pulchritudinis veniremus. Quis ergo poterit cogitare quam delectabile et jucundum sit Deum in se ipso clare per speciem intueri, quum utique Deus sublimis et benedictus sit pulchritudinis penitus infinitæ, ipsaque pulchritudo intellectualis sit incomparabiliter amœnior pulchritudine corporali ? Imo Deus incomprehensibilis et immensus, est ipsa superessentialis, separata, pura et incircumscriptibilis pulchritudo, a qua omnium creaturarum pulchritudines etiam

A simul sumptæ, distant atque deficiunt infinite. Incomparabiliter ergo delectabile et jucundum est Deum per speciem clare et immediate conspicere, ejusque incircumscriptibili bonitate atque dulcedine frui.

Hinc S. Augustinus in epistola de obitu gloriosi Hieronymi asserit, Hieronymum statim post suam in Domino dormitionem sibi apparuisse, et cogitanti sibi qualis et quanta esset gloria Beatorum in cœlo, sic esse locutum : Augustine, Augustine, quid quæris ? Putasne parvo immittere vasculo mare totum, aut brevi includere pugillo orbem terrarum, vel cœlum immobilitate ne usitatos exerceat motus ? Quæ oculus nullus hominum in hoc mundo videre potuit, tuus videbit ? quæ auris nulla audivit, audiet tua ? quæ cor humanum nullatenus intellexit, nec etiam cogitavit, æstimas te intelligere posse ? Infinitæ rei quis erit finis ? Potius totum mare in arctissimo clauderetur vasculo, potius orbem terrarum parvus teneret pugillus, potius a motu suo cœlum desisteret, quam gaudiorum et gloriæ quibus Beatorum animæ sine fine fruuntur, minimam intelligeres particulam, nisi ut ego, experientia docereris.

Præterea, quum certissime talis ac tanta, tam incomprehensibilis et immensa sit cœlestium civium beatitudo et gloria, nonne miserrimi atque stultissimi sunt, qui propter hujus incertæ ac labilis vitæ carnisque fœdæ delectationes immundas, vanitates iniquas, divitiasque caducas, tanta se privant felicitate et gloria ? Contemnamus igitur vana et vilia, divitias temporales, delicias corporales, mundanos honores arbitremur ut stercora, quatenus æternam illam incomparabilem beatitudinem adipiscamur. Sed quoniam Deus sanctitatis immensæ non nisi mundo conspicitur corde, purgemus nos ipsos per contritionem internam, per puram confessionem, per satisfactionem idoneam, ab omni mentis ac corporis impuritate, ab omni elatione, cupiditate, incontinentia, ab omni ira, impatientia, acedia et ran-

Philipp. iii, 8.

Matth. x, 8. core. Siquidem beati mundo corde, quoniam ipsi Deum videbunt.

Secundo, ex evangelio hodierno docemur quanta sit Christianorum in mundo isto felicitas, dummodo negligentes et ingrati Deo non fuerint : quoniam documenta Christi, ejus quoque miracula, suæque conversationis in sæculo isto sanctissima opera et exempla quotidie audiunt, legunt, *Luc. x, 24.* cognoscunt. Quæ multi reges et justii ac vates audire et noscere optaverunt, non tamen viderunt, nec audierunt, nec cognoverunt ea, saltem tam circumstantialiter et perfecte ut ex Evangelio innotescunt. Sed quanto hæc melius scimus, tanto graviora sunt nostra peccata, et intolerabiliora erunt supplicia, nisi juxta documenta et exempla Christi vivamus, ipsum in vera caritate Dei et proximi, in sancta humilitate, mansuetudine, castitate actibusque misericordiæ imitando. Ait namque Christus : *Ibid. xii, 47.* Servus qui cognovit voluntatem domini sui, et non fecit, plagis vapulabit multis. Hinc ad Titum Apostolus loquitur : *Tit. ii, 11-13.* Apparuit gratia Salvatoris nostri omnibus hominibus, erudiens nos, ut abnegantes impietatem et sæcularia desideria, sobrie et juste et pie vivamus in hoc sæculo, expectantes beatam spem et adventum gloriæ magni Dei.

Tertio, ex evangelio isto instruimur quanta mala et damna incurrat homo ex mortali peccato. Nam primo, per illud privamur hereditate regni cœlestis, hoc est æterna felicitate et gloria : quod notat *Luc. x, 30.* Christus, quum ait, Homo quidam descendebat ab Jerusalem. Secundo, per peccatum captivamur sub defectu multiplici, et mente instabiles, exsulesque efficiimur : quod notatur, quum dicitur, In Jericho. Tertio, per peccatum subjicimur servituti peccati atque diaboli, quia et princeps Apostolorum testatur : *II Petr. ii, 19.* A quo quis victus est, hujus et servus est. Propter quod *Rom. vi, 12.* Paulus hortatur : Non regnet peccatum in vestro mortali corpore. Hoc notatur, quum dicitur, Incidit in latrones. Quarto, per peccatum spoliatur donis gratuitis, id est

A gratia gratum faciente, caritate, donis virtutibusque infusis : quod notatur, quum dicitur, Despoliaverunt eum. Quinto, per peccatum vulneramur in naturalibus, quia per illud naturales vires inficiuntur, et ad virtutes magis ineptæ redduntur : quod notatur, quum ait, Et plagis impositis. Sexto, per peccatum mortale mortificantur præcedentia meritoria opera. Quum ergo tot mala ex peccato incurramus, nil tantum odiamus, abhorreamus, vitemus sicut peccatum.

B Præterita quoque vitia digne et efficaciter deploremus, quemadmodum legitur in vita beatissimi Abrahamæ eremitæ, de Maria nepte ipsius. Quam adhuc adolescentulam, imo septennem, juxta cellam suam clausit in cella : sicque Maria illa viginti annis in omni innocentia, puritate et caritatis fervore Deo angelice deservivit. Postea quidam falsus monachus eam decipit, ita quod cellam exivit ad illum, qui statim eam violavit atque reliquit. Illa autem peracto peccato, vehementissime doluit ; et præ rubore et timore ad cellam suam redire non audens, quasi desperans ad sæculum rediit, et publicæ abjectionis scortum effecta est. Quo cognito, sanctus patruus ejus Abraham inæstimabiliter tristabatur, et die ac nocte cum lacrimis oravit pro ea. Evolutis demum duobus annis, quum percepisset ubi illa esset et quid ageret, mutavit habitum, militaremque induit vestem, et equitavit ad eam, vultum suum ita tegens, quod ab ea cognosci nequivit. Quumque solus cum ea esset in camera, vultum suum detexit et allocutus est eam. Ipsa vero cognito patruo suo, quasi exanimis est effecta. Ipse vero benignissime eam confortavit, consolabatur, convertit, et secum reduxit, atque in interiori cella reclusit. In qua Maria illa peccata sua die et nocte uberrime deploravit, induta cilicio et in abstinence summa corpus suum affligens, vigiliis, orationibus, compunctionibus supra humanas vires insistens : sicque ad tantam rursus perfectionem devenit, quod etiam multa egit miracula.

SERMO TERTIUS

DE DIVINO AMORE ET ELUCIDATIONE PRÆCEPTI CARITATIS DEI ET PROXIMI.

QUI diligunt te, Domine, sicut sol in ortu suo splendet, ita rutilent. Judic. v, 31.

I Joann. iv,
16.

Sicut in prima sua scribit epistola Joannes apostolus : Deus caritas est; et qui manet in caritate, in Deo manet, et Deus in eo. Porro, qui non manet in caritate, manet in morte, hoc est in mortali peccato. Quum itaque caritas Dei sit vita animæ et summa virtus (qua inexsistente et præsentē, ceteræ adsunt virtutes; et qua deficiente seu perdita vel absente, nulla virtus adest aut inest quantum ad formatum et completum esse virtutis), ita quod faciat mentem Deo acceptam, ut aliquid meritorium vitæ æternæ agere queat; hinc universa quæ agimus, ordinare debemus ad hoc, ut in caritate Dei ac proximi jugiter proficiamus, roboremur et accendamus.

Nec sufficit nobis Deum diligere naturali amore, prout ratio dictat humana, et propter beneficia ejus, sed necessarium est ad salutem ut ipsum diligamus spirituali, supernaturali, infuso amore, primo et principaliter propter puram et summam bonitatem ipsius. Quicumque autem taliter amat Deum, amat etiam spiritualiter omnem proximum, hoc est quemlibet hominem in hoc mundo, tam amicum quam inimicum. Iterum, quicumque sic diligit Deum, omnia ejus implet præcepta, mandata quoque Ecclesiæ, et rectæ rationi obedit. Unde qui cupit agnoscere an meritorie diligat Deum, discutiat semetipsum, an universa observet præcepta, et omnes diligat homines quantumcumque adversarios et molestos. Itaque Dominum Deum nostrum debemus summe ac pure diligere, primo atque potis-

sime propter puram et infinitam bonitatem ipsius. Unaquæque etenim res tantum habet de amabilitate, quantum de bonitate. Quemadmodum ergo Deus est bonitas superexaltata, incomparabilis et immensa, in qua nihil est cogitabile contrarium bonitati, imo quidquid ad bonitatem pertinet, cum infinita plenitudine et excellentia competit ei; sic ipse est summe, pure incomparabiliterque amandus. Ideo Deus præcepit se diligi quasi sine mensura et modo, utpote toto corde, tota mente, tota fortitudine. Deinde quicumque sic diligit Deum, ita stat quod pro nulla re mundi vellet peccare mortaliter, imo nec pro conservatione propriæ vitæ : quia per peccatum mortale amittitur Deus, qui summe et incomparabiliter magis quam propria vita diligitur.

Deut. vi, 5;
Marc. xii,
33.

Secundo debemus Deum summe incomparabiliterque diligere propter suam omnimodam et universalem perfectionem, videlicet quoniam quidquid perfectionis, quidquid pulchritudinis, quidquid nobilitatis, suavitatis, jucunditatis et excellentiæ excogitari potest, in Deo simplicissime et supereminenter invenitur, et ipse Dominus Deus est ipsa pulchritudo immensa, ipsa infinita beatitudo, sapientia, omnipotentia, misericordia, dulcedo, justitia, sanctitas, veritas, omnisque perfectio. Si ergo diligimus aliquem quoniam pulcher aut sapiens est, aut dives, aut potens, aut misericors, aut justus, aut dulcis, nonne incomparabiliter plus amare debemus Dominum Deum, in quo omnia ista simplicissime cum infinita perfectione consistunt? Insuper, sæpe diligimus aliquem hominem quem nunquam vidimus, ex fama ipsius, quia bona multa de ipso per-

cepimus, utpote, quod sit timoratus, devotus, justus, pius, et pro communi bono indesinenter laborans : quantum ergo Deum amare debemus, de quo nihil nisi tam incomparabiliter bonum audivimus, et de quo omne bonum cognoscimus ?

Tertio debemus Deum summe diligere ratione propinquitatis. Si enim carnales parentes diligimus quia ab ipsis secundum carnem processimus, quanto magis diligendus est nobis Dominus Deus, a quo, quantum ad animam, immediate conditi sumus, ex cujus etiam providentia, potestate et dono profluxit quod a parentibus carnaliter nati sumus ? Itaque, sicut anima est incomparabiliter dignior corpore, sic animarum creatorem et patrem Deum incomparabiliter plus amemus quam carnales parentes.

Quarto summe diligendus est Deus propter universa beneficia sua generalia et specialia, corporalia et spiritualia, naturalia et supernaturalia, quibus incessabiliter utimur, sustentamur et conservamur, super terram calcando, aerem respirando, aqua nos refrigerando, et igne variis modis utendo. Ipse Deus lucet nobis per solem, ipse dat pluviam, ab ipso sunt fructus terræ, et omnia necessaria vitæ ex ipsius providentia conferuntur ; ab eo habemus esse, vivere, sentire, intelligere, corpus et animam. Consideremus quantum pauper diligit eum a quo quotidie bene reficitur ac vestitur : quantum ergo Deum amare tenemur, a quo omnia quæ habemus, accepimus, cujus dona sunt omnia bona, a quo indesinenter conservamur in esse, sine cujus conservatione nec ad momentum possemus subsistere ? O quanta est ingratitude atque perversitas iniquorum, et quam vere justissima apparebit in die judicii condemnatio horum !

Quinto debemus Deum summe diligere quia in eo solo tota nostra consistit felicitas, et quoniam tot bona nobis præparavit atque promisit in cœlis.

Itaque omnia ista multoties ac profunde pensemus, et in Dei amore quotidie cre-

Ascere studeamus, ejus præceptis obedire conemur, ei grati esse nitamur ; quidquid offensivum et inhonorativum est ejus, omni cum diligentia caveamus.

Nunc de intellectu seu expositione præcepti caritatis Dei et proximi aliquid breviter est tangendum. Porro dilectio potest dici perfecta dupliciter. Primo, ex parte dilecti, sicut quum res tantum diligitur quantum ex sua natura aut consistentia diligibilis est. Quum ergo Deus sit infinitæ amabilitatis sicut et infinitæ bonitatis, constat quod nullius creaturæ dilectio ad Deum, potest esse perfecta, sed infinite deficit ab hac perfectione dilectionis divinæ : solusque Deus se ipsum hoc modo perfecte diligit. Secundo dilectio dicitur esse perfecta ex parte diligentis, dum amans secundum totam suam facultatem fertur per amorem in amatum : sicque intellectualis creatura potest habere ad Deum dilectionem perfectam, et habet quando secundum totum posse suum diligit Deum. Hujus autem perfectionis caritatis sunt tres gradus.

Primus et summus est, dum intellectualis creatura secundum omnem suam virtutem indesinenter actualiter fertur in Deum : et iste gradus perfectionis divinæ dilectionis competit omnibus Sanctis in patria. Sic enim Deum diligere toto corde, est ipsum diligit actuali amore incessanter in Deum erecto secundum totum posse voluntatis, absque admixtione omnis inordinati et impertinentis affectus. Sic quoque Deum diligit tota mente, est divinæ veritatis contemplationi indesinenter vacare secundum extremum posse intellectus, absque admixtione totius evagationis, erroris et deceptionis. Diligere autem Deum tota anima, est tota intentione actualiter esse semper elevatum in Deum in omnibus quæ cogitantur, amantur, aguntur. Porro diligere Deum tota fortitudine seu ex omnibus viribus, est omnium aliarum inferiorumque virium actiones semper habere actualiter ordinatas in Deum, ita quod Dei dilectio erit

omnium actuum illorum ratio : quod erit in Beatis, potissimum post resurrectionem futuram, quando omnes operationes exteriorum interiorumque sensuum et utriusque appetitus sensitivi, omnesque corporis motus et actus, ordinatissimi erunt in Deo, atque ad ejus conferent contemplationem, amorem, laudem et venerationem. Universaque ista implebuntur in patria, non solum absque difficultate, sed etiam cum inenarrabili facilitate et jucunditate. Idcirco præceptum istud caritatis divinæ non impletur perfecte nisi in patria.

Secundus et medius gradus perfectionis caritatis est, dum omnia illa relinquuntur et contemnuntur quæ solent in hac vita a Dei contemplatione et amore impedire, quatenus mens Deo perfectius atque stabilius per dilectionem contemplationemque vacet. Et hic gradus perfectionis caritatis cadit sub consiliis evangelicæ legis, et spectat ad religiosos, qui desiderio præactæ perfectionis, juxta Christi consilium abnegant semetipsos, et omnibus quæ habent renuntiant, carnaliterque propinquos et contoralem relinquunt, ut soli Deo liberius amorosiusque adhæreant : quoniam mens humana tanto intensius uni infigitur, quanto plus a multis abstrahitur. Certumque est quod occupatio circa exteriora, et carnalis affectio circa propinquos, potissimeque delectatio sensualis in actu carnali, a pura et stabili affectione mentis in Deo vehementer impediunt hominem : ideo Filius Dei, sapientia Patris æterni, consuluit omnia illa relinquere, ut soli Deo perfectius intendatur.

Tertius vero et infimus gradus perfectionis caritatis est, ut sic Deus toto corde, tota mente, tota fortitudine diligatur, quatenus in omnibus his nihil sit quod caritati contrarietur, sed omnia actu vel habitu ordinentur in Deum sicut in ultimum finem, et intellectus Deo subdatur per fidem, voluntas per spiritualem amorem : quatenus nec se nec aliquid aliud diligat homo, nisi in Deo, exteriora quoque opera ejus ac verba ex Dei amore pro-

A cedant, dicente Apostolo, Omnia vestra in caritate fiant ; sicque intentio recta sit coram Deo, ut ejus honorem et gloriam principaliter intendamus, juxta illud Apostoli : Sive manducatis, sive bibitis, sive aliquid aliud facitis, omnia in gloriam Dei facite. Et hic gradus caritatis est de necessitate salutis. Postremo patet ex his, quam graviter peccent carnales parentes, propinqui, amici et socii, qui sobolem suam, vel propinquum, aut socium a religionis ingressu impedire conantur. Hoc enim caritati **B** Dei ac proximi contrariatur, et valde damnable a sanctis Patribus judicatur. Tales namque sunt homines carnales, omni spiritali sapientia destituti et vera caritate carentes, qui consiliis Christi repugnant.

Legitur in vita **BB.** Epicteti et Astionis, quod idem Astion ex gentilibus parentibus natus, et eorum unicus filius, cujus mater fuit filia senatoris, quum esset decem et octo annorum, et eloquentissimus atque pulcherrimus adolescens, ingeniosus, mansuetus et in naturalibus valde præclarus, a **S.** Epicteto presbytero est ad fidem conversus. Et ut Christo liberius deserviret, cum præfato Epicteto longinquam regionem intravit : in qua Deo in omni sanctitate et perfectione servivit, in tantum quod etiam magna fecit miracula. Parentes vero ipsius, de ejus amissione incredibiliter doluerunt. Post multos vero annos, beati viri Epictetus et Astion pro fide Christi martyrium sunt perpassi, in quo crudelissimas pœnas constanti et alacri animo pertulerunt. Et circa idem **D** tempus perceperunt parentes **S.** Astionis, in qua civitate diu mansisset. Qui protinus illuc venerunt. Quumque civitati illi propinquarent, **B.** Astion apparuit cuidam Christiano in urbe illa, rogans ut parentes suos pie susciperet, bene tractaret, et de fide Christi diligenter instrueret : quæ omnia Christianus ille nomine Vigilantius, fideliter fecit. Post paucos vero dies, gloriosi martyres Epictetus et Astion visibiliter apparuerunt in plena vigilia parentibus Astionis, circa eorum sepulcra

I Cor. xvi, 14.

Ibid. x, 31.

Luc. ix, 23; xiv, 26, 33.

orantibus, præsente Vigilantio. Epictetus A cœlum. Post modicum tempus parentes autem apprehendebat et osculabatur patrem Astionis; Astion vero amplectebatur et osculabatur matrem suam. Quumque diu affati et consolati fuissent ac instruxissent præfatos parentes, redierunt in Astionis acceperunt Baptisma, et redierunt ad sua; atque feliciter tandem obdormierunt in Domino. Est autem legenda ista S. Epicteti et B. Astionis pulcherrima et consolatoria valde.

AD RELIGIOSOS

SERMO QUARTUS

QUOMODO PER FIDEM IN JESUM CHRISTUM FIDELES CONSEQUANTUR GRATIAM ET GLORIAM.

CONCLUSIT Scriptura omnia sub peccato, ut promissio ex fide Jesu Christi daretur credentibus. Galat. III, 22. B princeps Apostolorum ait in Actibus : Deus prænuntiavit per os omnium Prophetarum, pati Christum suum. Act. III, 18.

In hodierna epistola docet Apostolus, quod non Mosaicæ legis virtute, sed per fidem Jesu Christi consequantur fideles gratiam in præsentī et gloriam in futuro. Nam Trinitas summa, æternus ac simplicissimus Deus, decrevit per unum caput, videlicet Jesum Christum, salvare genus humanum. Et sicut Christiani jam tempore gratiæ salvantur in fide Christi nunc incarnati, missi ac crucifixi, sic electi fideles qui ab exordio mundi fuerunt in lege naturali et scripta, salvabantur in fide ejusdem Christi tunc incarnandi, morituri ac crucifigendi, et quidquid nos modo de Christo credimus adimpletum, illi crediderunt in Christo et per Christum implendum. Et superiores in illis, videlicet Patriarchæ ac Prophetæ, ex revelatione divina, per diversa oracula, per divina mysteria, per vaticinia et figuras plurima de Christo prænuntiaverunt, imo pene omnia quæ de ipso modo creduntur. Idcirco eadem est fides illorum et nostra. Propter quod evangelicus Zacharias loquitur : *Erexit cornu salutis nobis, sicut locutus est per os sanctorum, qui a sæculo sunt, Prophetarum ejus.* Beatissimus quoque

Porro hæc fides, a principio mundi usque in præsens, per cunctas mundi ætates habuit testimonium Dei seu attestaciones divinas, puta vera et soli vero omnipotentique Deo possible miracula, quæ Deus fecit in testimonium veritatis fidei hujus : quia eorum doctrinam qui fidem hanc docuerunt, approbavit, et confirmavit, ac divulgavit per hujusmodi copiosa miracula, quæ tamen in evangelica lege et tempore gratiæ, quando hæc fides per universum diffusa est orbem, copiosius, imo quasi incomparabiliter excellentius atque frequentius sunt peracta, nec aliter potuissent homines ad hanc fidem induci. Deinceps, post diluvium, hominibus ubique ad idololatriam passim ruentibus, Deus excelsus et gloriosus elegit et assumpsit sibi populum unum, in quo hæc fides uniusque Dei cultus manserunt, puta Israeliticam plebem. Et in populo illo Deus æternus multo evidentius quam ante docuit homines de Christi adventu atque mysteriis, per angelos instruendo Prophetas, et per Prophetas plebem communem. Unde Prophetæ de Christo et ejus adventu, passione ac mysteriis copiose ac evi-

denter locuti sunt et scripserunt. Hinc quoque in Israelitica plebe fecit Deus multa præclara miracula, multo copiosius quam fecerat ante. Et hoc duravit usque ad Christi adventum, in quem translata sunt illa miracula, quoniam per se ipsum operatus est innumerabilia excellentissima prorsus prodigia. Unde et quidam Judæi dixerunt de ipso : Nunquam apparuit sic in Israel. Et ipsemet protestatur : Si opera non fecissem in eis quæ nemo alius fecit, peccatum non haberent.

Matth. ix,
33.
Joann. xv,
24.

Luc. x, 9,
19 ; *Marc.*
xvi, 17, 18 ;
Act. ii et
seq.

Joann. xiv,
12.

Act. xiii, 2,
46, 47.

Christus quoque virtutem agendi miracula suis dedit Apostolis ceterisque discipulis, etiam ante suam passionem, et multo excellentius post suam passionem, resurrectionem ac Sancti Spiritus missionem. Imo, quamvis Dominus Jesus Christus, rex Messias, unigenitus Dei, per se ipsum tot et tanta fecit prodigia, nihilo minus, sicut ipse passione sua instante prædixit, multi Apostolorum et discipulorum suorum, in virtute et nomine ejus plura et majora miracula sunt operati quam ipse, qui quamdiu inter Judæos fidem christianam prædicaverunt, coruscabant inter illos miraculis. Judæis vero majori ex parte in infidelitate sua manentibus, et ex jussione divina sanctis Apostolis illos relinquentibus, atque ad gentilium informationem ac conversionem se transferentibus, translata sunt universa miracula quibus ante splenduit Synagoga, per beatos Apostolos ad Ecclesiam pro maxima parte etiam gentilitate collectam, nec interim habuerunt Judæi miracula. Perdiderunt quoque sceptrum regium, propriam terram, sacrificia legis, ordinem sacerdotum, dignitatem pontificum. Et quum omnia videant sibi ablata, non advertunt nec intelligere volunt ea in Christum et in ejus Ecclesiam esse translata. Ecce hæc est fidei christianæ probatio vera atque

A certissima, quæ et per alia multa probatur insolubilia argumenta.

Præterea per fidem Christi salutem consequimur, dummodo Christo capiti nostro per fidem formatam, hoc est per fidem et caritatem, nunc uniamur. Oportet nos ita Christo uniri, ut meriti ac gloriæ ejus simus participes. Quumque Christus sit caput nostrum, cujus tota conversatio in hac vita fuit meritoria nobis, debemus opera nostra meritoria plurimum defectiva supercopiosissimis meritis Christi unire, et sic ea Deo offerre, quatenus imperfectum nostrum suppleatur ex superabundantia meritorum Domini nostri Jesu Christi : quemadmodum et Ecclesia in suis orationibus per Jesum Christum postulat exaudiri. Postremo, meritum Christi tanto exuberantius communicabitur nobis, quanto ad ejus participationem amplius nos aptamus, quanto per ferventiorum dilectionem Christo uniti fuerimus, quanto ipsius vestigia perfectius imitatur.

Ephes. iv,
15.

Ideo omnem inordinatam abjiciamus affectionem, omnem consolationem spernamus indignam, omne verbum et opus a Christo elongans vitemus. Christi bonitatem et caritatem ad nos, ac beneficia ejus consideremus : quæ omnia intuenso, ejus accendemur amore. Discamus ab ipso, quia mitis est et humilis corde, et in patientia nostra possideamus animas nostras. Serviamus Domino Deo nostro corde perfecto atque verissimo, omnem passionum impulsus, iræ et impatientiæ impetum, vitiorum tumultum eradicemus a nobis. In cibo, potu, somno et cunctis necessariis huic misero corpori, simus semper moderati ac parci, ut vitam vere religiosam ac pœnitentialem ducamus, atque in omni pietate, munditia, fervore, justitia, constantia, alacritate ac spirituali profectu ministremus Altissimo.

Matth. xi,
29.
Luc. xxi, 19.

Josue xxiv,
14.

SERMO QUINTUS

DE PRIMIS ET PRINCIPALIBUS LEGIS DIVINÆ PRÆCEPTIS, ET QUO STUDIO
IMPLERI DEBEANT.

BEATI oculi qui vident quæ vos videtis. Luc. x, 23.

Christus Dominus fons vitæ, in visione quadam beatitudinem hominis ponit, dicendo : Hæc est vita æterna, ut cognoscant te verum Deum. Itaque in visione superdignissimæ Trinitatis clara per speciem nostra consistit felicitas. Nec solum appellat beatos eos qui Deum ita vident, sed eos quoque qui ad ejus beatificam visionem sunt dispositi : Beati (inquiens) mundo corde, quoniam ipsi Deum videbunt. Nec hi dumtaxat beati vocantur, qui ad istam beatitudinem sunt dispositi jam in actu, sed omnes quoque qui ad eam æternaliter sunt electi.

Porro ut in evangelio legitur hodierno, Christus suis dixit discipulis : « Beati oculi qui vident quæ vos videtis ». Fuit enim valde desiderabile ac beatum videre ad oculum Unigenitum Dei, verum Deum veraciter incarnatum, utpote in unitate personæ Deum et hominem, inter homines conversantem, prædicantem atque miracula innumerabilia ac præclarissima operantem. Sic olim regina Saba Salomonis sapientiam admirans, asseruit : Beati viri, et beati servi tui, qui hic adstant coram te semper, et audiunt sapientiam tuam. Quanto magis beati Apostoli ceterique Salvatoris discipuli, qui ei quotidie adstiterunt, ejus sapientiam audierunt, ejus mirabilia contemplantur? Verumtamen non omnes erant beati qui Christum corporaliter conspexerunt et audierunt. Nam quidam eorum abierunt retrorsum, et infelicissimus Judas unus fuit eorum. Aliquibus etiam gravis exstitit ad videndum, qui et tandem manus sacrilegas injecerunt in

eum, et crucifixerunt Dominum majestatis : sic invidia mentem excæcat, sic malitia eam subvertit. Quod itaque dixit Salvator, « Beati oculi qui vident quæ vos videtis », de interioribus oculis ad corporales oculos reflexis, fideliterque intelligentibus exterius visa et audita, rite accipitur.

Nec solum illi beati, quia de nobis Christus disseruit : Beati qui non viderunt et crediderunt. Denique magis meritorium est Christum in Sacramento altaris fidelibus oculis intueri, quam fuit eum corporalibus oculis speculari. Hieronymus quoque testatur, Nihil felicius Christiano, cui regna promittuntur cælorum : quod de Christianis illis verificatur qui tanto nomine operantur condigna.

Ut ergo et nos simus beati, videamus et contemplemur oculo fidei illustrato, Dei Filium incarnatum, et universum suæ sanctissimæ conversationis modum in sæculo isto, documenta et miracula ejus, et omnia quæ pro nostra egit sustinuitque salute. Nonne, quum Dominus esset universorum, fons omnium divitiarum et Deus majestatis immensæ, ut viam salutis nobis perfectissime demonstraret, non verbis dumtaxat, sed etiam factis, elegit in sæculo isto vitam prorsus pauperrimam, vitam asperrimam, persecutionibus, derisionibus, opprobriis plenam? Et postremo, sui pretiosissimi sanguinis effusione redempturus genus humanum, non brevem aut levem, sed longam nimis, et vere acerbissimam ac ignominiosissimam elegit perpeti mortem; atque in omni conversatione, prædicatione et passione sua exhibuit et implevit profundissimam

Joann. xvii, 3.

Matth. v, 8.

Luc. x, 23.

III Reg. x, 8.

Joann. vi, 67.

Sap. ii, 15.

Joann. xx, 29.

Matth. v,
11, 12.

humilitatem, incomparabilem patientiam, insuperabilem mititatem, caritatem ardentissimam ac summe perfectam, insinuans et protestans unumquemque fidelium tanto esse veracius christianum, tanto perfectiorem ac feliciorum, quanto eum in præactis virtutibus, in præfatis operibus, in tribulationum, adversitatum, persecutionum et derisionum æquanimibus tolerantibus, plenius fuerit imitatus. Unde non solum in visione et gloria, sed in tribulationum quoque multiplicium sustinentibus spontaneis, beatitudinem statuit

Habentes autem talem legislatorem ac dominum, instructorem ac præcessorem, talia documenta, exempla, consilia et præcepta, cur unquam impatientes, irati, indignantes, perturbati efficimur? Cur prosperari, solatiari, ridere, honorari, seu aliquo modo promoveri, et non potius tribulari, disciplinari, pœnitere, flere, despici et subesse, optamus: præsertim nos religiosi, qui in vera paupertate, continentia, obedientia Dominum et magistrum istum sequi solenniter vovimus; qui solummodo pauperes esse sic volumus, ut nullam patiamur inopiam; sic casti, ut carnalia desideria non funditus exstirpemus; sic obedientes, ut præsidens considerare indigeat quid nobis injungi velimus, et vix arduum aliquid alicui præcipere audeat? Videndum est et providendum an sic nostræ satisfaciamus professioni. Sed intuitu et amore Domini nostri Jesu Christi, sic in prædictis eum sectemur, ut in tenuitate victus et vestitus, in penuriis, afflictionibus, disciplinis et propriæ voluntatis fractionibus arduis, quasi in cunctis divitiis gloriemur; tantoque amplius gloriemur, tanto beatiores nos arbitremur, quanto in universis jam tactis Dei Filium Jesum Christum abundantius sequi, et ei

A perfectius conformari poterimus. Et si non ex sincerissima caritate ipsius id cupimus et implemus, saltem ex spe et desiderio inæstimabilis beatitudinis æternalis inde nobis provenientis, una cum caritatis affectu totum illud cupiamus et exsequamur, quia ut ait Apostolus, Modicum et leve tribulationis nostræ in vita hac habitæ, æternum gloriæ pondus operatur in nobis. Nec condignæ sunt hujus vitæ ac temporis passiones ad futuram beatitudinem illam.

II Cor. iv,
17.

Rom. viii,
18.

B Insuper in evangelio isto docetur, quæ sint prima ac principalia legis divinæ præcepta, videlicet, Deum ex toto corde, tota anima et viribus cunctis diligere, proximum quoque sicut se ipsum: ad quæ cetera ordinantur præcepta. Quum etenim præcepta de actibus sint virtutum, et caritas sit virtus altissima, constat quod caritatis præceptum sit summum. Idcirco ad ejus impletionem maxime infatigabiliterque conemur, quoniam absolute loquendo, ille est melior, ille perfectior, ille in præsentia et in futuro beator, qui in Dei amore exstat intensior, major sive ferventior. Propterea miser et stultus est valde religiosus, qui tot quotidie exercet labores, tanta dimisit in sæculo, tamque aptissima proficiendi media habet in cœnobio, nec tamen hæc omnia ordinat ad divini incrementum amoris, neque in sincerissima Dei et proximorum dilectione crescit ac proficit; qui mentem suam non satagit omni hora Creatori suo amorese unire, affectum suum in Deum defigere, caritatisque vinculis animam suam Sponso cœlesti indissolubiliter colligare, ut jam nihil libeat ei, nil eum delectet, nisi se occupare cum Deo suo, illum pura mentis acie contemplari, illum indesinenter affari orando, psallendo ac meditando, pro ipsius amore omnia dura et aspera hilariter sustinere. Et quoniam amantis est beatitudini sui dilecti cordialiter congaudere, istud præcipue ad sincerum ac fervidum Dei pertinet amatorem, infinitam opulentiam immensamque perfectionem, superplenis-

Luc. x, 27.

simam beatitudinem, omnem sapientiam, A pulchritudinem, suavitatem et excellentiam ejus considerare, mirari, et ei de his omnibus toto corde congratulari.

Verumtamen ad perfectionem hanc ipsam, ad omnem hunc caritatis actum, unionem, amplexum ac virtutem, non ita pertingit neque faciliter pervenit homo, nec potest ad ista ascendere, nisi in primis cum omni diligentia indesinenter vitet peccata, non solum mortalia, sed venialia quoque. Nam sicut mortalia caritatem extinguunt, sic venialia ejus profectum B impediunt, ejus fervorem diminuunt, perfectionique derogant. Porro peccata taliter evitare non poterit, nisi qui passionum suarum refrenationi, affectionum reformationi, et interiori cordis custodiæ studiose, sollicite, incessanter invigilat, exteriores interioresque sensus coercet, linguam et

ventrem ab excessu compescit. Insuper est necesse omne opus Dei reverenter peragere, in omni humilitate, patientia, mansuetudine, temperantia, pietate, justitia ceterisque virtutibus ad caritatis perfectionem disponentibus, requisitis atque præambulis digne proficere, coram Deo semper sollicite ambulare, quotidiana, venialia, et quæ putantur minuta peccata quasi mortalia ponderare, deflare, punire et emendare, invocationi divini subsidii indefesse insistere. Ad quæ omnia adimplenda, non mediocriter confert dominicæ passionis frequens et cordialis meditatio, et sui ipsius diligentissima quotidiana examinatio. Idcirco in omnibus his exerceamus nos strenue, quatenus ad caritatis perfectionem, ad divini amoris ardorem, ad serenissimæ dilectionis sanctum stabilemque affectum valeamus pertingere.

SERMO SEXTUS

ELUCIDATIO PRÆCEPTI CARITATIS, ET DE NOVE NOCUMENTIS PECCATI.

DILIGES Dominum Deum tuum ex C toto corde tuo. Luc. x, 27.

Deus essentialiter et incircumscripibiliter bonus jussit se ab hominibus toto corde, tota mente, tota anima, et ex omnibus viribus diligere: non quod homo in vita præsentis possit præceptum istud perfecte implere, sed ut sciamus quo tendere, ad quid omnia nostra ordinare exercitia debeamus, et ut semper imperfectum nostrum recognoscamus, ut etiam possimus advertere quantum profecerimus, quousque pervenerimus, et quantum a vera perfectione D distemus. Denique Deus omnipotens, justus et sapiens, istud præcepit non ob indigentiam suam aut commodum suum, qui bonorum nostrorum non indiget, sed ob alias causas diversas. Primo, quoniam ipse summe et incomparabiliter ac prorsus in infinitum amabilis et superamabilis est in se ipso, utpote superpura, superessentialis ac penitus interminabilis bonitas. Secundo, quoniam quidquid sumus et habemus, ab ipso accepimus: ideo totum suæ dilectioni debemus. Tertio, propter alia specialia et generalia, corporalia et spiritualia, naturalia et supernaturalia beneficia ejus innumerabilia nimis. Non enim solum esse, vivere, sentire, moveri, intelligere, corpus et animam, membra et vires ab eo accepimus, sed ab ipso in his incessabiliter conservamur, ab ipso necessaria vitæ sortimur, et creaturarum suarum obsequio jugiter utimur. Ab ipso diversa gratiarum charismata sumus adepti, a periculis multis maximisque erepti. Quarto, quia ipse prior dilexit et valde dilexit nos. Diligens autem vult redamari.

Ps. xv, 2.

1 Joann. iv, 10, 19.

Quinto, quia non aliter nisi eum toto corde amando, beatitudinem ad quam ipse nos condidit possumus adipisci.

Præterea, Deum toto corde, tota mente, tota anima et omnibus viribus diligere, tripliciter potest intelligi. Primo, ut nihil Deo, sed ipse rebus omnibus præponatur, tam in corde, id est voluntate, quam in mente seu intellectu, in animæ quoque intentione et ceteris viribus ejus; nec in omnibus aliquid divinæ contrarium caritati agatur, sed ad minus juxta Dei præcepta vita hominis dirigatur. Et istud est de necessitate salutis, et cadit simpliciter sub præcepto, estque gradus infimus caritatis.

Secundo, ut in cunctis præactis, non solum nihil caritati contrarium fiat, sed illa etiam relinquantur quæ a caritatis profectu et perfectione solent hominem impedire; et illa agantur quæ ad supererogationem pertinent, et caritatem ex sua natura augere atque perficere consueverunt. Hic autem est gradus caritatis secundus ac medius, in hac vita possibilis, ad religiosos præcipue spectans, qui terrena omnia et propinquos relinquunt, abnegantes insuper et se ipsos, seque Deo in manu vicarii sui offerentes in holocaustum, quatenus a multis abstracti, et a carnali affectu ac voluptate remoti, a propria quoque libertate nudati, uni, summo, necessario bono purius vacent spiritualibusque inhæreant, et omnino transformentur in ipsum ac possideantur ab ipso. Hic gradus caritatis cadit sub evangelicæ legis consiliis, ad quæ tamen religiosi post suam professionem tenentur, quia et ipsa consilia tunc eis in præcepta vertuntur, ad minus principalia tria consilia.

Verumtamen gradus hic caritatis latitudinem habet, quum quidam in hac vita dicantur in caritate perfecti, ut viri heroici, in quibus passionibus sunt penitus mortificatæ ac reformatæ, et spiritualis amor sic dominatur quod amor privatus prorsus extinctus est, omnisque affectio inordinata proprii commodi est sepulta;

A qui extra Deum nil diligunt, neque ad creata inordinate afficiuntur, quantum humana fragilitas in hac vita permittit. Qui etsi quandoque venialiter peccent, tamen per caritatis ardorem, per contritionis vehementem vigorem, per sapientialem de sua culpa pudorem, atque per alia virtuosa exercitia multa et magna, pro suis quotidianis culpis non solum satisfaciunt plene, sed ultra hoc plurimum promerentur ac crescunt. Nam et ipsi ita appellantur perfecti, ut nihilo minus assidue possint plus perfici, et omni hora proficiant. Idcirco lignum, fœnum stipulamque non colligunt, sed morientes mox evolvunt. Ex quibus elicitur, quod etiam perfectio ista caritatis graduum latitudinem sortiatur, et diversos habeat gradus, secundum quod unus alio sanctior in hac vita fuit aut est. Siquidem quidam Sancti post hanc vitam pœnas purgatorii ad tempus passi leguntur, quia cremabile quid, utpote lignum, fœnum, stipulam, secum tulerunt.

I Cor. iii,

12.

Ibidem.

Tertio, præfatum caritatis præceptum ita intelligitur, ut rationalis creatura jugiter, sine interpolatione seu interruptione, secundum extremum posse suum, secundum omnes suas potentias actualiter in Deum pure feratur et quiescat, absque admixtione totius erroris et culpæ. Et iste est gradus tertius caritatis, vere perfectus, respectu cujus, gradus caritatis Sanctorum in hac vita perfectus, est imperfectus, quanquam et ille perfectus dicatur in suo statu et genere.

Sed quum diligere sit actus proprius voluntatis, cui soli vere, subjective atque formaliter caritas inest, quomodo rationalis creatura dicitur Deum diligere tota mente cunctisque viribus in quibus caritas et ejus actus elicit non inveniuntur? Respondetur, quod non eodem modo dicitur homo Deum diligere toto corde et tota mente, etc. Dicitur namque Deum toto corde diligere formaliter et directe, sed tota mente, et tota anima, et omnibus viribus, in quantum actus intellectus, intentio animæ et inferiorum virium opera-

Luc. x, 27.

Luc. ix, 23;
xiv, 26, 33.

tiones, secundum caritatis imperium, exigentiam, et profectum seu congruentiam diriguntur et exercentur. Itaque hoc modo Deum toto corde diligere, est eum actuali ferventissimoque amore indesinenter secundum totum posse voluntatis amplecti et velle, in eo complacentiam plenam ac puram habere, et ejus infinitæ beatitudini totis præcordiis congaudere, omni inordinato et impertinenti affectu in æternum prorsus excluso. Porro, sic Deum tota mente diligere, est ejus beatificæ contemplationi incessabiliter juxta extremum posse intellectivæ potentiæ absque omni errore esse intentum. Diligere autem eum sic tota anima, est tota animæ intentione actualiter semper esse erectum ad Deum in omni actione, intuitione ac dilectione. Diligere vero Deum omnibus viribus, est ceterarum virium operationes indesinenter habere in eum erectas, et secundum ipsius voluntatem directas, ita quod Dei dilectio erit omnium illorum actuum ratio : quod totum post generalem resurrectionem, resumptis corporibus, completur consummate in Sanctis, quia tunc universorum interiorum exteriorumque sensuum actus, et utriusque appetitus affectiones, atque aliarum potentiæ operationes, ac corporis motus, ordinatissimi et pacatissimi erunt in Deo, et ad ejus contemplationem, dilectionem, laudem ac honorificentiam conferent. Denique, tam plenissima ac prædominans gratia, tanta gloriæ plenitudo tunc erunt in Sanctis, quod omnia ista, non tantum absque omni labore et difficultate, sed insuper cum inæstimabili suavitate ac summa felicitate atque lætitia efficientur in eis, et fient ab eis.

Ecce in isto consistit beatitudo Sanctorum, gloria civium supernorum, finis omnium electorum. Ad hanc felicitatem conditi sumus, et ei quotidie appropinquare debemus. Cui quo amplius propinquamus, eo perfectiores consistimus.

Studeamus igitur incessanter in caritate proficere, in contemplatione succrescere,

A Deo frequentius ac stabilius inhærere, in ipso magis ac magis defigi ac immorari sine evagatione et obnubilatione, præsertim orando, psallendo, meditando ac celebrando. Istud debet esse exercitium nostrum, studium, occupatio, labor, intentio, quatenus omne bonum quod agimus, etiam ad Dei gloriam et honorem actualiter ac sæpissime ordinemus. Si istud non agimus, nos ipsos negligimus. Quid etenim aliud operari habemus, quum simus ab exteriorum sollicitudine et temporali provisione exonerati, atque divinis totaliter mancipati, aptissima quoque media ad ista habentes, quibus nequaquam abuti debemus?

Postremo, Salvator in evangelio isto docet quanta mala ac nocumenta homini infligant peccata mortalia. Primo equidem, privant eum donis gratuitis, utpote caritate ceterisque virtutibus ac donis infusis. Secundo, mortificant præcedentia merita. Tertio, privant hominem hereditate superna ac gloria sempiterna. Quarto, vulnerant naturalia, imo et spiritualiter perimunt animam. Per peccata quippe moritur anima morte culpæ, et naturales animæ vires inficiuntur. Quinto, faciunt hominem servum ac membrum diaboli, atque iniquitatis ministrum. A quo enim quisque superatus est, hujus et servus est, ut princeps ait Apostolorum. Sexto, summæ Trinitatis imaginem in homine deformant, et multiplicem in anima causant defectum, utpote pronitatem ad vitia, infirmitatem resistendi tentationibus et peccatis, et captivitatem sub vitiis, quemadmodum Salomon profitetur : Iniquitates suæ capient impium, et funibus peccatorum suorum constringetur. Septimo, trahunt ad alia vitia, imo ad graviora, quia peccatum quod per pœnitentiam non deletur, mox pondere suo trahit ad aliud. Octavo, rationem excæcant, judiciumque pervertunt, et spiritualiter insensibilem efficiunt hominem. Nono, ad æternam damnationem obligant peccatorem, et illuc perducunt impœnitentem. Quum ergo tot tamque incomparabilia

II Petr. II, 19.

Prov. V, 22.

Eccli ^{xxi,}
^{2.} nocumenta homini infligant peccata, quasi a facie colubri, et tanquam a vultu infernalis serpentis, hoc est diaboli, fugiamus ea. Negligentiam atque pigritiam repellamus, quum ad perfectionem tendere obligemur; temeraria iudicia, prava colloquia, detractoria verba, discordiæ semina, velut A diabolica detestemur venena; iram, impatientiam, contentionem, aversionem, et omnem perversitatem ac proximi læsionem, sicut mortifera animarum pocula et sicut mortis æternæ pignora semper abominemur. Ad laudem et gloriam omnipotentis Dei, etc.

DOMINICA XIV POST TRINITATEM

ENARRATIO IN EPISTOLAM

SPIRITU AMBULATE, ET DESIDERIA CARNIS NON PERFICIETIS. Galat. v, 16-24.

VAS electionis sanctus Apostolus, ad carnalium affectionum ac operum devitationem nos hortatur in præsenti epistola, dicendo : *Spiritu ambulate*, hoc est, secundum Spiritus Sancti instinctum, vel secundum angelicæ inspirationis directionem, aut secundum rectæ rationis iudicium agite, sequendo Spiritus Sancti inclinationem, angelicam inspirationem, rectæque rationis censuram. Ratio namque, secundum Philosophum, deprecatur ad optima. Divinus quoque Dionysius : Optimum (inquit) hominis est esse et vivere secundum rationem. *Et desideria carnis non perficietis*, id est, carnales concupiscentias non deducetis ad effectum, neque præbebitis eis consensum, qui coram Deo pro opere reputatur.

Caro enim, id est appetitus sensitivus, seu anima secundum carnem, vel homo ipse ex parte sensualitatis, *concupiscit adversus spiritum*, hoc est, ea desiderat quæ rectæ rationi contrariantur, videlicet delectationes carnales, immundas, de quibus in Ecclesiastico præcipitur : Post concupiscentias tuas non eas, et a voluptate tua avertere. Vel, « Caro concupiscit », hoc est, ad concupiscendum inclinat : in carne enim radicaliter fomes est. *Spiritus autem*, id est appetitus intellectivus, seu ratio, vel anima secundum partem suam superiorem, *concupiscit adversus carnem*, id est ea quæ carni et sensualitati molesta sunt, utpote sobrietatem, continentiam, corporis castigationem, divinorum frequentem ac stabilem vacationem. Et istud verum est de spiritu bene disposito ; in vitiosis autem hominibus ratio victa est, et sensualitati consentit ac servit. *Hæc enim*, videlicet spiritus et caro, *sibi invicem adversantur*, appetendo contraria, sicut prædictum est. Caro enim appetit delectabilia sibi in se ; spiritus vero cupit bona honesta per respectum ad Deum. In virtuosus tamen hominibus caro et appetitus sensitivus rationi subduntur per virtutes morales. *Ut non quæcumque vultis*, secundum rationis iudicium, *illa faciatis*, propter rebellionem sensualitatis sæpe impediens quæ bona sunt, juxta illud ad Romanos : Non quod volo bonum, hoc facio. Vel sic : « Hæc sibi invicem adversantur, ut non quæcumque vultis », id est non omnia ad quæ inclinationem habetis, « faciatis », sed per rationem prava desideria refrenetis, ne in manus dæmonum incidatis, secundum illud Ecclesiastici : Si præstiteris animæ tuæ concupiscentias ejus, facient te in gaudium inimicis tuis. Sicque dictio ista, « ut », tenetur concomitanter : quia ex mutua adversatione carnis et spiritus sequitur, quod non licet nobis facere cuncta quæ volumus. Unde prima Petri habetur : Obsecro vos abstinere a carnalibus desideriis, quæ militant adversus animam. *Quod si spiritu ducimini*, id est, si a Spiritu Sancto movemini, *non estis sub lege*, id est, legi Moysis non estis

De Divin.
nom. c. iv.

Eccli. xviii,
30.

Rom. vii, 15,
19.

Eccli. xviii,
31.

1 Petr. ii,
11.

subjecti, quantum ad cærimonialia legis A præcepta, nec quoad præcepta ejus judicialia.

Denique spiritus multipliciter sumitur in Scripturis. Primo, pro intellectuali et separata substantia : sicque Deus et angeli spiritus appellantur, juxta illud, Spiritus est Deus. Et Sadducei dicunt, nec spiritum nec resurrectionem esse : ubi per spiritum angelus designatur. Secundo, pro substantia animæ : sicque Stephanus ait, Domine, accipe spiritum meum. Tertio, pro superiori parte seu potentia animæ, sicut hoc loco. Quarto, pro virtute imaginativa, ut in Apocalypsi : Fui in spiritu in dominica die. Quinto, pro subtili humore per quem anima operationes vitales exercet in corpore : unde Sapiens ait, Spiritus diffunditur tanquam mollis aer. Sexto, pro aere aut vento, de quo quidam exponunt illud Genesis : Spiritus Domini ferebatur super aquas ; et illud Joannis, Spiritus ubi vult spirat.

Subinde opera carnis exponuntur. Manifesta autem sunt opera carnis, id est opera vitiosa ad quæ caro inclinatur, quæ sunt, fornicatio, id est coitus soluti cum soluta, immunditia, id est vitium contra naturam prorsus turpissimum, impudicitia in adpectu, tactu, osculis atque amplexibus, quæ ad libidinem provocant, luxuria, quæ est nomen commune quo ceteræ species luxuriæ jam non expressæ designantur, idolorum servitus, quæ interdum ex luxuria nascitur, sicut in Salomone, veneficia, id est sortilegia, inimicitia, quæ ex privato generantur amore, contentiones verborum, æmulationes, id est invidentiæ eorum qui idem appetunt, sed unus impeditur per alium, ut dum plures ad prælationem adspirant, iræ, rixæ, id est lites verborum, dissensiones animorum, quantum ad partialitates, sectæ, id est separationes dissentientium jam firmatæ, invidia, homicidia, ebrietates, comessationes, et his similia, quæ prædico vobis esse vitanda, antequam præoccupemini morte, sicut prædixi : quoniam qui talia agunt, id est

aliquid horum, regnum Dei non consequentur. Ex quo duo sequuntur : primo, quod omnia hæc sunt peccata mortalia ; secundo, quod damnati nunquam liberabuntur. Et quod ait, Regnum Dei, id est æternam salutem, non obtinebunt, nec ad triumphantem pertinebunt Ecclesiam, intelligendum est, nisi vere et condigne pœniteant.

Deinde enumerantur opera Spiritus, id est, quæ a Spiritu Sancto in nobis causantur, et spiritui nostro rationali insunt atque conveniunt. Dicuntur quoque hæc opera, fructus, ad similitudinem fructus materialis. Quemadmodum enim hujusmodi fructus ex terra seu arbore oritur, et cum quadam dulcedine degustatur, sic opera ista a Spiritu Sancto principaliter, atque a nostro spiritu divinitus confortato nascuntur, animamque delectant. Ait ergo : Fructus autem Spiritus, id est Spiritus Sancti, seu spiritus nostri rationalis, secundum sensum prædictum, est caritas, id est actus dilectionis divinæ ac fraternæ, gaudium spirituale, non carnale aut sæculare, pax, id est tranquillitas mentis in Deo, patientia, id est æquanimis perpessio adversitatum, longanimitas, id est stabilis aut diuturna exspectatio bonorum divinitus promissorum (de quibus ait Propheta : Credo videre bona Domini in terra viventium), bonitas, id est benevolentia, benignitas, id est executio benevolentiae hujus in benefaciendo ac subveniendo egentibus, mansuetudo, id est tractabilitas iram refrenans, fides, id est fidei certitudo sive fidelitas, modestia, id est moderamen in verbis et factis, continentia, id est refrenatio voluptatum laboriosa, castitas, id est repressio venereorum et concupiscentiæ prompta ac facilis. Continentia namque et castitas, quamvis circa idem versentur, nihilo minus distinguuntur : quoniam continens sustinet concupiscentias fortes, sed ab eis non vincitur ; castus vero nec sustinet eas.

Denique horum duodecim fructuum Spiritus, ad quos alii reducuntur, distinctionem et sufficientiam ponit S. Thomas

Joann. iv, 24.
Act. xxiii, 8.

Ibid. vii, 59.

Apoc. i, 10.

Sap. ii, 3.

Gen. i, 2.

Joann. iii, 8.

III Reg. xi, 1-8.

I Cor. vi, 9, 10.

Ps. xxvi, 13.

q. LXIX, a. 3. in prima secundæ hoc modo : Fructus distinguuntur secundum diversum processum seu variam operationem Spiritus Sancti in nobis. Primo enim mens ordinatur in se ipsa per spiritualem amorem. Ideo primus fructus est caritas, sine qua nihil rationem fructus sortitur, et in qua Spiritus Sanctus specialiter datur. Secundus fructus est gaudium, quod caritate producit : quoniam amans ex unione sua cum amato gaudet, quam unionem caritas facit. Tertius fructus est pax, quæ est gaudium imperturbatum, dum nec ab exterioribus mens turbatur, nec ab interioribus desideriis fluctuantibus inquietatur. In malis quoque seu adversis bene se habet mens dupliciter : primo, ne ex imminente aut illato malo tristetur, quod fit per patientiam, qui est fructus quartus ; secundo, ne ex dilatione boni sperati frangatur, quod fit per longanimitatem, qui est quintus fructus. — Secundo, bene disponitur homo ad id quod est juxta se, puta ad proximum suum, primo per voluntatem benefaciendi, quod spectat ad bonitatem, qui est fructus sextus ; secundo, per voluntatis hujus executionem, quod fit per benignitatem, qui est septimus fructus ; tertio, absque commotione et ultionis affectu tolerando mala illata, quod fit per mansuetudinem, qui est fructus octavus ; quarto, ne fraude aut dolo alicui noceamus, quod fit per fidem pro fidelitate quæ est pars justitiæ sumptam ; si vero fides sumatur pro certitudine fidei quæ est virtus theologica, sic per eam bene disponitur homo ad id quod su-

A pra se est, hoc est ad Deum, subdendo ei proprium intellectum. — Tertio, recte disponitur mens ad id quod infra se est : primo, quantum ad verba et actus, quod fit per modestiam, qui est decimus fructus ; secundo, quantum ad interiorem passionem seu concupiscentiam : et ita ponuntur alii duo fructus, videlicet continentia et castitas, quarum differentia posita est.

Præterea agnoscendum, quod fructus sunt actiones virtutum, vel delectationes actibus virtuosis annexæ. Idcirco caritas, patientia, mansuetudo, etc., prout fructus vocantur, non sumuntur pro ipsis habitibus, sed pro habituum actibus vel delectationibus.

Adversus hujusmodi, id est contra præfatos fructus, *non est lex* prohibens eos, sed lex est pro eis, quia commendat et præcipit eos. *Qui autem sunt Christi*, hoc est, per fidem et caritatem ei conjuncti sunt, et ad eum sic pertinent, *carnem suam crucifixerunt*, id est, spiritualiter mortificaverunt per exercitia virtuosa jejuniorum, abstinentiarum, vigiliarum, disciplinarum, *cum vitiis* exterioribus, et *concupiscentiis* interioribus, tam vitia quam concupiscentias extirpando. Sed contra istud objici potest, quia dum aliquis carnalis de novo convertitur, per fidem et caritatem spectat ad Christum, et tamen carnem suam nondum sic crucifixit ; item imperfecti nondum sic sua corpora crucifixerunt, et tamen sunt Christi. Respondetur, quod isti actu, vel proposito, aut inchoatione, sua corpora crucifixerunt.

SERMO PRIMUS

DE FRUCTIBUS SPIRITUS QUIBUS ORNARE SE DEBENT BONI RELIGIOSI.

FRUCTUS Spiritus est caritas, gaudium, pax, patientia. Galat. v, 22.

Ad hoc tendit tota moralis doctrina sacræ Scripturæ, ut homo corpus suum

D subiciat animæ, sensualitatem rationi, rationem et voluntatem Deo. Idcirco Apostolus ad istud frequenter et copiosissime nos hortatur. Præterea, quum corpus in-

strumentum sit animæ et quasi servus A ipsius, anima autem finis ac domina corporis sui, tunc corpus subicitur animæ quando ea exercet quæ expediunt animæ ad salutem, ita quod ei obedit ac servit in bonis operibus, sicut ait Apostolus : Castigo corpus meum, et in servitutem redigo. Quod nihil aliud est quam quod in præ-

I Cor. ix, 27.

Galat. v, 24.

Rom. vi, 13.

Eccle. i, 15.

I Cor. vi, 15.

senti ait epistola : Qui autem sunt Christi, carnem suam crucifixerunt cum vitiis et concupiscentiis. Unde ad Romanos hortatur : Non exhibeatis membra vestra arma iniquitatis peccato, sed arma justitiæ Deo. Quemadmodum enim princeps terrenus dat suis militibus ac ministris congrua arma, ut per ea sibi deserviant, suam patriam defendendo, suis hostibus repugnando, atque se ipsos a morte ac vulneribus præservando; sic Deus nobis contulit membra, ut per ea in bonis operibus sibi deserviamus, Ecclesiam adjuvemus, vitiis renitamus, et contra animarum pericula muniamur, audiendo verbum Dei per aures. Quemadmodum ergo pravissimus ac infidelissimus reputaretur minister principis, qui per arma sibi a suo principe data, impugnaret principis plebem ac patriam, et principi injuriaretur, et tandem se ipsum occideret; sic infidelissimi, pessimi atque stultissimi sunt omnes iniqui qui sui corporis membris abutuntur in contumeliam Creatoris, exercendo per ea opera vitiosa a Deo prohibita, et alios scandalizando, ac proprias animas spiritualiter occidendo. Unde de talibus Salomon loquitur : Stultorum infinitus est numerus. Istud tamen specialiter faciunt luxuriosi, gulosi et vinolenti, qui corpora sua Deo consecrata et templa Spiritus Sancti effecta violant, et dæmonum habitacula faciunt, membraque Christi membra faciunt meretricis.

Insuper sensualitas rationi subicitur, dum appetitus sensitivus sic regitur et frenatur, quod circa sua objecta, videlicet sensibilia et carnalia ac caduca, non afficitur, nec movetur, nec operatur, nisi secundum rectæ rationis iudicium; sicque

carnalia desideria reprimuntur, et ira, impatientia, avaritia, ac ceteræ passionēs animæ, superantur, juxta illud ad Ephesios : Omnis amaritudo, et ira, et indignatio, et clamor tollatur a vobis. Unde in præsentī docet ac jubet epistola, ut opera carnis vitemus, videlicet fornicationem, impudicitiam, comessiones, ebrietates, ac cetera in textu epistolæ tacta atque exposita.

Ephes. iv, 31.

Galat. v, 19-21.

Circa quæ considerandum est diligentissime, quod inter peccata æternam damnationem promerentia, ponit Apostolus iram, rixam et dissensionem. Timeant ergo ac tremant, qui tam proni sunt ad irascendum, ad contendendum, ad dissentiendum ab aliis in his quæ bona existunt. Si enim ista ex suo genere sunt peccata mortalia, prout docet Apostolus, multo magis consuetudo eorum mortalis est et valde damnable. Reprimat ergo unusquisque et vincat se ipsum, ac pessimæ consuetudini reluctetur. Regnum enim cœlorum vim patitur. Et Salomon protestatur : Non sis facilis ad irascendum, quoniam ira in sinu

Matth. xi, 12.

Eccle. vii, 10.

Prov. xiv, 17.

II Tim. ii, 14.

I Cor. xi, 16.

Prov. xx, 3.

Eccle. xxviii, 6, 10.

C stulti requiescit; et rursus, Qui impatiens est, operatur stultitiam. Apostolus quoque : Noli (inquit) verbis contendere; ad nihil enim utile est, nisi ad subversionem audientium. Itemque : Si quis videtur contentiosus esse, nos talem consuetudinem non habemus, neque Ecclesia Dei. Multa etenim mala ex rixis et contentionibus oriuntur, et inhonestum est his vitiis subjacere. Propter quod in Proverbiis scriptum est : Honor est homini qui separat se a contentionibus. Et alibi scriptum est : Memento novissimorum tuorum; et, Abstine te a lite.

Præterea docet nos sanctus Apostolus, ut omnia vitia caritati fraternæ contraria fugiamus, videlicet inimicitias, æmulationes, invidias, quia mortalia sunt peccata, quibus damnatio debetur æterna. Sed contra hoc multi jam faciunt, qui non solum pro injuria eis illata, sed etiam pro injuria aut læsione propinquis aut amicis eorum irrogata, concipiunt contra injuriatores invidiam, inimicitiam, et propria auctoritate

vindictam exercent exercereve cupiunt. **A** perseveret, dicendo : Mihi autem adhærere Deo bonum est; ponere in Domino Deo spem meam. Nil etenim evenit nobis nisi ordinante providentia Dei, de cujus circa nos dispositione debemus esse contenti, nec inordinate turbari, contristari, neque illicite reluctari.

Matth. v,
44, 45.

Qui rebelles sunt Christi præcepto dicentis : Diligite inimicos vestros, benefacite his qui oderunt vos, et orate pro persecutibus et calumniantibus vos, ut sitis filii Patris vestri qui in cœlis est. Unde qui non implent istud, non sunt filii Patris cœlestis, sed dæmonis. Simus ergo concordēs in bonis, et caritativi ad invicem, atque unanimes in Dei obsequio, quemadmodum ad Romanos monet Apostolus :

Rom. xv, 6.

Unanimes uno ore honorificetis Deum.

Insuper, juxta doctrinam Apostoli in hodierna epistola, studeamus in nobis habere duodecim fructus Spiritus, de quibus in expositione epistolæ tactum est : primoque omnium, caritatem et ferventem affectum ad Deum, deinde ad proximos, ita ut cum delectatione interna diligamus Deum ac homines, sicque spirituali gaudio impleamur. Quum enim gaudium oriatur ex apprehensione vel præsentia boni convenientis, et ipse Deus gloriosus ac adorandus sit bonum infinitum, incomparabiliter deliciosum, convenientissimum, dulcissimum, C pulcherrimum et præsens ubique, in apprehensione seu contemplatione aut consideratione ipsius debemus potissimum gloriando delectari de hoc quod ipse est talis ac tantus, et suæ beatitudini penitus infinitæ præcordialiter congaudendo, sicut

Ps. xxxvi, 4.

hortatur Propheta : Delectare in Domino. Cujus delectationis fructum subjungit, addendo : Et dabit tibi petitiones cordis tui.

Philipp. iv,
4.

Unde monet Apostolus : Gaudete in Domino semper. Et utique qui cordialiter super omnia diligit Deum, cogitando de ipso consolationem sentit internam gaudiumque sincerum, prout Psalmista de se ipso

Ps. lxxvi, 4.

fatetur : Memor fui Dei, et delectatus sum. Verumtamen homo spirituali gaudio est indignus, qui vanas consolationes vel turpes delectationes requirit.

Amplius, juxta documentum Apóstoli, pacem spiritualem in nobis studeamus habere et conservare, quatenus quidquid adversitatis foris evenierit aut intus surrexerit, mens in Deo quiescat, in ipso stabiliter

Postremo, secundum apostolica documenta, debemus esse longanimes in spe, et Deo ferventer servire; nec longum nobis apparere debet tempus præsentis vitæ, in quo æternam possumus beatitudinem promereri, quum vix momentum sit comparatione æternitatis quæ restat. Unde Jacobus dicit : Exemplum accipite longanimitatis, et laboris, et patientiæ, Prophetas, qui locuti sunt in nomine Domini : ecce beatificamus eos qui sustinuerunt; sufferentiam Job audistis, et finem Domini vidistis. Itaque, quum sancti veteris Testamenti, imo et illi qui ante illud a principio mundi fuerunt, Domino tam fervide ac longanimitè ministraverint, qui certi tamen fuerunt non nisi post longissima tempora posse se adipisci salutem, quanto magis nos Christiani qui certi sumus mox post vitæ finem præsentis posse nos beatifice coronari, deberemus Altissimo ferventissime famulari? Abjiciamus ergo omnem acediam ac torporem, et mente promptissima Deo obtemperemus, simusque benevoli et benigni ad proximos, ut pie ac dulciter afficiamur ad eos, et consilium atque auxilium eisdem pro posse exhibeamus.

Ps. lxxii,
28.
Jacob. v, 10,
11; *Job i, ii,*
xlii.

Sed et moderamen servemus in verbis et factis ac moribus, et custoditi ac timorati semper simus in omnibus. Unde in Vitaspatrum narratur, quod quum archiepiscopus Alexandrinus Theophilus venisset in eremum ad visitandum sanctos Patres ac Fratres, dixerunt Fratres viro sanctissimo abbati Pambo : Abba, dic unum verbum salubre archiepiscopo, ut ædificetur cor ejus in loco isto. Quibus abbas Pambo respondit : Si non ædificatur in silentio meo, non ædificabitur in verbo meo. Rursum, quum alia vice Alexandrinus archiantistes venisset in montem deserti *,

* Nitriæ

occurrissetque ei abbas loci illius, dixit A culpāre me ipsum. Cui episcopus : Non ad eum episcopus : Quid amplius invenis est, inquit, alia via. Ecce quam moderati in loco hoc, abba? Cui abbas respondit : in verbis, custoditi in omnibus et humiles erant sanctissimi illi Patres.

ENARRATIO IN EVANGELIUM

DUM IRET JESUS IN JERUSALEM, ETC. Luc. XVII, 11-19.

HODIERNO in evangelio describitur ad B litteram valde præclarum Christi miraculum, imo decem miracula ejusdem speciei pariter facta, videlicet decem leprosum curatio. Estque lectio ista evangelica litteraliter plana, sed spiritualibus sensibus plena. Ait ergo Lucas evangelista : *Dum iret Jesus in Jerusalem*, id est versus civitatem illam. Et istud contigit modicum ante festum Palmarum, passione Christi instante. *Transibat per mediam Samariam et Galilæam*, id est, per medium provinciarum istarum, in quibus C multoties prædicavit ac multa egit miracula.

Et quum ingrederetur quoddam castellum, occurrerunt ei decem viri leprosi, qui ex deliberatione atque industria observabant Christi iter, ut curarentur ab eo, quia de ejus miraculis plura magnifica audierunt : propter quod confidebant se posse ab eo sanari, quamvis lepra sit morbus incurabilis per naturam. *Qui steterunt a longe* : quia secundum legem Moy-
Lev. XIII, 46. sis, non poterant inter alios commorari ac D conversari. Et propter reverentiam Christi non accesserunt ad eum, de sua immunditia, secundum Theophilum, verecundantes, et suspicantes quod Jesus eos forsitan fastidiret propter foeditatem eorum. *Et levaverunt vocem suam, dicentes*. Ex vehementi namque desiderio curationis a tam gravi infirmitate, proruperunt in altam vocem. *Jesu præceptor*, id est, qui tantæ auctoritatis ac potestatis es, ut rite præceptor voceris. Præcipere autem competit Christo, secundum suam divinitatem, absolute, universaliter et plene; secundum naturam quoque suam humanam, convenit ei participative ac ministerialiter quantum ad divinitatem, sed excellenter respectu creaturarum, quia et Christi humanitas omni creaturæ prælata est. *Miserere nostri*, id est, compatere nobis tam afflictis, miseris et infirmis, et compatiendo succurre, beneficium curationis præstando. Quemadmodum autem isti leprosi pro corporali curatione tam affectuose et alte clamaverunt ad Christum, sic et nos pro spirituali curatione a vitiis clamare ad Christum debemus et dicere : Jesu præceptor, miserere mei. Imo, quo mortale peccatum pejus est omni lepra corporea, eo præcordialius atque instantius orandum est pro sanatione mentis a vitiis, quam corporis a lepræ aut cujuscumque infirmitatis incommoditatibus. Sed, heu! multi plus dolent ac deflent exteriora damna et mala pœnalia, quam mala interiora perpetua, id est peccata mortalia.

Quos ut vidit, non solum corporali intuitu, sed et piæ compassionis affectu, *dixit*, compassionem internam extendendo in opus : *Ite, ostendite vos sacerdotibus*. Non dixit, Jubeo vos sanari, aut, Curo vos; sed, « Ostendite vos sacerdotibus » : ut doceat nos omnem ostentationem superbiamque vitare, ne magna agamus, nec quidquam agere cupiamus propter hominum admirationem, applausum aut laudem; et item,

Lev. xiv, 2. quia præceptum fuit in lege, ut mundati a lepra se sacerdotibus præsentarent, quatenus sacerdotes judicarent an vere essent mundati, et etiam ut pro sua emundatione sacrificium Deo offerrent, prout lex jussit. Tertio misit eos ad sacerdotes propter mysticam rationem, videlicet ad insinuandum quod peccatores spiritualiter lepra infecti, a Deo curari optantes, sacerdotes debent accedere, et corda sua per confessionem eis integre aperire.

Et factum est dum irent, mundati sunt a lepra antequam ad sacerdotes venirent : B primo, ad declarandum Christi pietatem atque potentiam; secundo, ne virtute sacrificii legalis aut sacerdotum putarentur curati; tertio, ad commendandum meritum fidei ac obedientiæ leprosorum istorum, qui juxta Christi præceptum protinus ire cœperunt, seque curandos firmiter crediderunt. Melior quippe est obedientia quam victimæ, ut Samuel loquitur primo Regum.

I Reg. xv,
22.

Deut. xxxii,
4.

Unus autem ex illis, id est de numero leprosorum illorum, *ut vidit* per experientiam ac corporalem intuitum, corpore suo subito mirabiliter immutato in colore et dispositione, pristinoque cessante dolore, *quia,* id est quod, *mundatus est* a lepra corporali, imo et spirituali : quia ut creditur, Christus verus Deus, cujus perfecta sunt opera, quos corpore curavit, spiritualiter quoque sanavit ab omni culpa mortali; *regressus est* ad Jesum ut gratias ageret, *cum magna voce,* hoc est devota et affectuosa laude et gratiarum actione, *magnificans Deum,* id est, Deum esse omnipotentem, magnum et misericordem protestans. Quamvis autem vir iste nondum explicite credidit Jesum esse verum Deum, credidit tamen quod esset magnus et sanctus propheta, per quem Deus operaretur miracula. *Et cecidit in faciem suam ante pedes ejus,* scilicet Christi, *ei gratias agens,* humiliter regratiando pro tanto beneficio, pro quo satis regratiari nequivit : quia ut

A in Ecclesiastico scriptum est, Non est census super censum salutis corporis. *Et hic* ^{Eccli. xxx, 16.} *erat Samaritanus,* id est natione gentilis, utpote de illorum semine natus quos Salmanasar rex Assyriorum, translatis decem ^{IV Reg. xvii, 24.} tribubus, constituit in terra Samariæ, ut quarto Regum habetur. Et forte leprosus iste fuit proselytus, id est ad Judaismum jam ante conversus. Denique, per hoc quod dicitur Samaritanus fuisse, innuitur quod alii novem fuerunt natione Judæi. Per hoc quoque quod iste solus ad Jesum regressus est, præfigurata est gentilium ad Christum conversio, Judæis in perfidia sua manentibus. Alii vero novem non redierunt ad Christum, quia forsitan sacerdotes eos ad hoc induxerunt, ut æstimerent se non Christi virtute sed legis, esse curatos.

Respondens autem Jesus, dixit : Nonne decem leprosi mundati sunt? Et novem ubi sunt? quasi dicat : Ad oculum patet ingratitude illorum. *Non est inventus* de illis decem, *qui rediret* ad me, *et daret* C *gloriam Deo,* id est, de sua miraculosa curatione Deo regratiaretur, ejusque pietatem et potestatem extolleret, atque in se declaratas denuntiaret, *nisi hic alienigena,* id est natione gentilis, et quantum ad hoc alienus a Deo ac lege. Quæritur, quomodo isti novem ad Christum non redierunt, si non corporaliter tantum, sed spiritualiter quoque ab eo fuerunt curati. Et respondendum, quod eundo ad sacerdotes, corporaliter spiritualiterque mundati sunt, sed postea seducti a sacerdotibus, aut aliunde subversi creduntur.

Et ait illi Jesus : Surge a terra in qua jaces prostratus, atque a pristina conversatione, *vade* ad loca tibi accommoda, et de bono in melius, atque a via præsentis exsili ad patriam salutis æternæ, *quia fides tua te salvum fecit,* id est, actu fidei tuæ qua credidisti te posse curari a me, meruisti curari, etsi non de condigno, saltem de congruo.

SERMO SECUNDUS

DE SPIRITUALI SIGNIFICATIONE LEPROSORUM, ET QUÆ REQUIRANTUR
AD INTEGRITATEM SPIRITUALIS SANITATIS.

CORRUPTI sunt, et abominabiles facti sunt in iniquitatibus. Ps. XIII, 1; LII, 2.

Secundum Scripturas, duplex est corruptio, et duplex incorruptio sive integritas. Est enim corruptio corporalis, sicut dum res corporalis in partes dividitur, vel partes ejus ab invicem separantur. Huic corruptioni opponitur corporalis integritas. Alia est spiritualis corruptio, qua rationalis seu intellectualis substantia a veritate et bonitate recedens, per falsitates et pravitates distrahitur. De qua in

Osee x, 2. Osee scribitur de injustis : Divisum est cor eorum, nunc interibunt. Apostolus quo-

que : Corrumpunt (inquit) mores bonos colloquia prava. Hanc corruptionem formaliter facit peccatum, et ipsa culpa est mentis corruptio, læsio et mors. Diabolus vero per suas tentationes inclinat homines ad eandem, sed homo per liberum arbitrium est velut causa efficiens corruptionis istius. Huic corruptioni opponitur incorruptio sive integritas spiritualis, de qua

scriptum est : Incorruptio facit esse proximum Deo. De qua ad Thessalonicenses

dicit Apostolus : Deus pacis sanctificet vos per omnia, ut integer spiritus vester, et corpus, et anima sine querela servetur. Hanc integritatem seu incorruptionem facit formaliter in nobis virtus, sumendo virtutem extense, prout etiam septem dona Spiritus Sancti virtutes vocantur : nam habentem perficiunt, et opera ejus bona efficiunt.

Sed quæri potest, quid sit incorruptio ista. Et respondendum, quod ipsa est bona et virtuosa habitudo, seu consistentia mentis in Deo, seu perfecta et omnimoda creaturæ rationalis ad Creatorem suum

conversio. Hinc incorruptio sive integritas ista vocatur sanitas mentis, pro qua oravit Jeremias, dicendo : Sana me, Domine, et sanabor ; atque Psalmista : Miserere mei, Domine, quoniam infirmus sum ; sana me, Domine, quoniam conturbata sunt ossa mea. Denique, sicut totum integrale corrumpitur dum partes ejus integrales ab invicem separantur, ut si tectum, paries et fundamentum domus ab invicem deiciantur ; et sicut totum essenziale corrumpi perhibetur dum partes ejus essentielles ab invicem dividuntur, ut homo dum anima recedit a corpore : sic anima hominis, quæ est totum potestativum, quoniam plures continet in se vires, spiritualiter corrumpi asseritur dum ejus potentiæ per dissensionem et rebellionem dividuntur ab invicem, ita quod inferiores potentiæ non obediunt rationi, vel ratio et voluntas dissentiunt, ut dum voluntas contra rationis judicium inhæret peccatis. Si ergo esse volumus spiritualiter sani, incorrupti seu integri, subdamus sensitivum appetitum nostrum rationi, et rationis censuram sequatur voluntas, rationem quoque dirigat lex divina seu sacra Scriptura, quatenus secundum divinæ et evangelicæ legis præcepta ac documenta ratio regat se ipsam ac ceteras vires totumque hominem.

Præterea spirituales hanc integritatem præsertim efficiunt sapientia et caritas. Quemadmodum enim sanitas corporalis est integritas seu bona habitudo aut temperantia naturæ ex calido et humido, sic spiritualis integritas mentis est bona habitudo ac salutaris dispositio mentis ex directione sapientiæ, quæ se habet ut humidum,

Jer. XVII,
14.
Ps. VI, 3.

1 Cor. XV,
33.

Sap. VI, 20.

1 Thess. V,
23.

et ex imperio caritatis, quæ se habet ut A calidum. Sapientia namque est summum donum Spiritus Sancti, atque dignissimus habitus perficiens rationem seu intellectum; caritas vero est summa virtus perficiens voluntatem. Hinc omnes inferiores virtutes, et dona, habitus ac scientiæ, regulandæ sunt et dirigendæ per sapientiam et caritatem, quatenus actus earum ordinentur finaliter ad Dei honorem et gloriam beatitudinemque æternam, prout sapientia dictat et caritas exigit.

Insuper, quod sapientia recte comparetur humori seu aquæ, caritas autem calori seu igni, sacra docet Scriptura. Scriptum est enim in Ecclesiastico : Aqua sapientiæ salutaris potabit illum, videlicet virum justum Dominus. Isaias quoque : Haurietis (inquit) aquas in gaudio de fontibus Salvatoris; itemque, Omnes sitientes, venite ad aquas. In quibus auctoritatibus per aquas intelliguntur doctrinæ salubres quæ ex fontibus Salvatoris, id est ex quatuor Evangelistarum codicibus ceterisque Scripturarum voluminibus, hauriuntur. Christus etiam testatur : Qui biberit ex aqua quam ego dabo, non sitiet in æternum. Ex quibus omnibus constat, quod sapientia aqua vocatur, quia humori in multis assimilatur. Quod vero caritas comparetur calori, imo et ignis nominetur, patet ex eo quod Christus in Evangelio loquitur : Ignem veni mittere in terram, et quid volo nisi ut accendatur? Unde evangelica lex quum sit lex caritatis, ignea lex appellatur, juxta illud Deuteronomii : In dextera Domini ignea lex. Hinc Spiritus Sanctus, in die Pentecostes, in similitudine linguarum apparuit ignearum, quoniam quos implere dignatur, per caritatem facit ardentes. Propterea pigro ac tepido increpatorie loquitur Christus in Apocalypsi : Utinam frigidus esses aut calidus; et rursus, Suadeo tibi emere aurum ignitum probatum, id est caritatem, quæ orationibus a Domino emitur. Unde duo discipuli quibus Christus in die resurrectionis suæ apparuit et Scripturas aperuit, quum

ex eorum oculis Christus evanuisset, dixerunt : Nonne cor nostrum ardens erat in nobis dum loqueretur nobis in via, et aperiret Scripturas? *Luc. xxiv, 32.*

Sed nunc breviter est tangendum, cur sapientia aquæ, et caritas igni similis perhibetur. Itaque sapientia comparatur humori : Primo, quoniam duplicem sitim refrigerat vel exstinguit. Est etenim sitis mala, videlicet cupiditas terrenorum, quæ crescit in infinitum, nisi per sapientiam reprimatur, juxta illud Ecclesiastæ : Avarus non impletur pecunia. Hanc igitur sitim exstinguit sapientia, quia dum homo sapit ea quæ Dei sunt, atque in contemplatione spiritualium ac cœlestium delectatur, et etiam vitæ præsentis brevitatem considerat, avarorum quoque æternam damnationem perpendit, sitim avaritiæ abjicit, acquiescens exhortationi apostoli Pauli dicentis : Habentes victum et quibus tegamur, his contenti simus. Alia est sitis bona, videlicet desiderium spiritualis profectus cœlestiumque bonorum, de qua ait Salvator : Beati qui esuriunt et sitiunt justitiam; et Psalmista, Sitivit anima mea ad Deum fortem, vivum. Quamvis autem hæc sitis sit virtuosa, indiget tamen per sapientiam moderari : non quasi in se ipsa possit esse nimis magna, imo quo major, eo est melior; sed ne homo ex ea immoderate se habeat in exercendo opera per quæ ad justitiam plenior beatitudinemque pertingitur, per quæ corpus suum destruere posset, jejunando, vigilando, et aliis modis se affligendo. Imo ipsum desiderium bonum in se, si nimis continuetur ac intendatur, posset per accidens esse occasio mali, videlicet debilitatis sensuum et ineptitudinis ad Dei obsequium. Propter quod monet Apostolus : Rationabile obsequium vestrum. Et Jeremias ait : Quia plus fecit quam potuit, ideirco periit. Juxta hunc sensum in Ecclesiaste scriptum est : Noli esse justus multum, neque plus sapias quam oportet, ne obstupescas. — Porro, teste Philosopho, omnes homines naturaliter scire desiderant. Quod sciendi

*Is. xi, 2.**Eccle. xv, 3.**Is. xii, 3.**Ibid. lv, 1.**Joann. iv, 13.**Luc. xii, 49.**Deut. xxxiii, 2.**Act. ii, 3.**Apoc. iii, 15.**Ibid. 18.**Eccle. v, 9.**1 Tim. vi, 8.**Matth. v, 6.**Ps. xli, 3.**Rom. xii, 1.**Jer. xlviii, 36.**Eccle. vii, 17.*

desiderium naturale, est quædam sitis animæ, quam refrigerat sapientia dum hominem ab inquisitione incomprehensibilium et inutilium et curiosorum, imo et minus utilium, reprimit et avertit, atque ad inquisitionem ac considerationem pertinentium ad salutem ac utiliorum et divinorum inducit, juxta illud Ecclesiastici : *Eccli. iii, 22, 24.* Altiora te ne quæsieris, et fortiora te ne scrutatus fueris, sed quæ præcepit tibi Deus, illa cogita semper; et in supervacuis rebus noli scrutari multipliciter.

Secundo, sapientia comparatur aquæ, *Sap. vii, 30.* quoniam ignem vitiorum, ardorem libidinis, fervorem iræ, impatientiæ aliorumque vitiorum refrigerat et exstinguit. Sapientia enim, ut ait Scriptura, vincit malitiam; et divinorum degustatio quæ per sapientiam habetur, carnalium voluptatum aufert affectum. Sapientes quoque iram, impatientiam et alias superant passiones, quia efficaciter pensant quam nocivæ et irrationabiles ac inhonestæ existant. Idcirco in libro Sapientiæ conscriptum est : *Ibid. vi, 1.* Melior est sapientia quam vires, et vir prudens quam fortis. — Tertio, quia in omni anxietate, tribulatione et miseria vitæ præsentis, sapientia dulciter refrigerat, consolatur ac reficit hominem. Propter

Ibid. viii, 16. quod Sapiens ait : Intrans in domum meam, conquiescam cum sapientia. Non enim habet amaritudinem conversatio illius, nec tædium convictus illius, sed gaudium et lætitiā. Unde rursus ibidem asseritur :

Ibid. 9. Sapientia erit allocutio cogitationis et tædii mei. Per sapientiam namque homo se erigit ad divinorum contemplationem, ad D salutarium rerum meditationem, ad novissimorum suorum considerationem, per quas inutiles phantasie et cogitationes anxie repelluntur, dolores et tristitiæ mitigantur. Hinc in Ecclesiastico scriptum est : Vir eruditus suavis est animæ suæ.

Eccli. xxxvii, 22. Præterea, caritas igni rectissime comparatur. Primo, quia frigus acediæ, id est torporem mentis, repellit. Secundo, quoniam cor in Dei ac proximorum dilectione accendit. Nempe quod homo ad Dei obse-

A quium tardus est, hinc contingit quia ad Deum parum aut nihil afficitur; quum vero caritate perfunditur, in Deo fervescit, atque ad omnia ei complacita inardescit. Unde in Threnis ait vir justus, De excelso *Thren. i, 13.* misit Dominus ignem in ossibus meis, et erudivit me : ubi per ossa intelliguntur superiores ac fortiores potentie animæ. Tertio, quoniam caritas efficit hominem cum impetu ad bona promptissimum, ita ut instar ignis videatur moveri. Hinc Jeremias dicit : Factus sum quasi vir ebrius, *Jer. xxiii, 9.* et quasi homo madidus vino, a facie Domini. Quarto, quoniam sicut ignis levis naturæ est et ascendit, sic caritas facit cor diligentis relinquere terrena atque ad æterna ascendere, et in cœlestibus commorari, sicut Apostolus loquitur : Nostra *Philipp. iii, 20.* conversatio in cœlis est. Unde rursus hortatur : Quæ sursum sunt quærite, ubi *Coloss. iii, 1, 2.* Christus est in dextera Dei sedens; quæ sursum sunt sapite, non quæ super terram. Quinto, quoniam sicut ignis consumit ligna et stipulam, sic caritatis fervor *Prov. x, 12.* peccata. Caritas enim, ut ait Scriptura, *I Petr. iv, 8.* operit multitudinem peccatorum.

Hinc itaque ad sapientiam et caritatem semper nos demus, in eis proficere studeamus, ad mentis integritatem obtinendam, conservandam ac perficiendam jugiter laboremus, atque ab omni spirituali lepra, id est mortali peccato, abstineamus; superbiam, avaritiam, luxuriam cum ceteris sceleribus detestemur; omnipotentis Dei omnia intuentis præsentiam et adspectum jugiter attendamus ac veneremur; metuendissimum Christi judicium, æterna inferni supplicia, Beatorum quoque perpetua gaudia quotidie meditemur : sicque coram Altissimo sinceriter ambulemus, moderati in verbis et factis.

Postremo, quanta sit excellentia Christi et Sanctorum novi Testamenti super Sanctos veteris Testamenti, hinc innotescit quod in toto veteri Testamento non legitur aliquis Sanctus curasse leprosum, nisi Eli-seus, qui unum dumtaxat curasse legitur *IV Reg. v, 1 et seq.* quarto Regum, videlicet Naaman qui fuit

princeps militiæ regis Syriæ. Fuitque Naaman ille, vir potens, dives, fortis et regi ac populo ejus carus ac honorabilis. Quumque Naaman percepisset in Syria de miraculis Elisei, venit ad eum cum grandi comitatu atque divitiis multis, ut curaretur ab eo. Cui Eliseus dixit per nuntium, ut

A in Jordane septies se lavaret : quod quum fecisset, a lepra sua purgatus est, in tantum quod restituta est caro ejus quasi caro parvuli pueri. Christus vero in evangelio isto legitur simul curasse decem leprosos ; multi quoque Sanctorum evangelicæ legis curaverunt leprosos.

Luc. xvii, 12 et seq.

SERMO TERTIUS

DE SPIRITUALI SIGNIFICATIONE LEPROSORUM, PER QUOS ET UNIVERSI
DESIGNANTUR PECCATORES.

JESU præceptor, miserere nostri. *Luc. xvii, 13.*

In hodierno evangelio legitur quemadmodum unigenitus Filius Dei, salvator noster, decem leprosos curavit. In Scripturis autem per denarium universitas aliquando designatur. Per hos ergo decem leprosos, universi peccatores qui a Christo a suis curantur mortalibus culpis, rite intelliguntur. Per lepram namque omne mortale peccatum potest intelligi. Ex quo protinus innotescit, quam viles, fœdi et abominabiles sint coram Deo iniqui qui multis mortalibus sunt inquinati peccatis. Si enim per lepram omne mortale accipi potest peccatum, certum est impios tot spirituales lepras habere, quot mortalibus eos contingit vitiis subjacere. Nec dubium quin omne peccatum mortale quantumcumque modicum videatur incomparabiliter turpius, magisque fœtidum coram Deo exsistat, quam lepra quantumlibet magna coram hominibus. Quum ergo leprosus per unam lepram tam turpis ac fœdus atque vitandus coram hominibus sit, quis concipere queat aut eloqui quam turpis, fœdus abominabilisque coram Deo exsistat, qui multis mortalibus subjacet culpis, præsertim qui prava consuetudine premitur? Hinc in Jeremia dicitur animæ peccatrici : Quam vilis facta es nimis, ite-

B rans vias tuas ! Sapiens quoque ait : Odio sunt Deo impius et impietas ejus. Rursusque scribitur : Cor iniqui cinis est, et terra supervacua spes illius, et luto vilior vita illius, quoniam ignoravit illum qui se finxit et creavit. Quod si iniqui dicant se suum agnoscere Creatorem, audiant quid ad Titum dicat Apostolus : Coinquinatis (inquit) nihil est mundum, sed inquinatæ sunt eorum mens et conscientia ; dicunt se nosse Deum, factis autem negant, quum sint abominati et reprobi.

Sap. xiv, 9.

Ibid. xv, 10, 11.

Tit. i, 15, 16.

C Itaque per lepram potest intelligi omne mortale peccatum. Primo, quoniam sicut lepra efficit hominem ita infectum, contagiosum et fœdum, quod a communi hominum conversatione dividitur, atque seorsum habitare compellitur ; sic omne mortale peccatum privat hominem communione fidelium, facitque eum coram Deo excommunicatum, ita quod a mystico Christi separatus est corpore, nec vivum Salvatoris est membrum, sed ad diaboli pertinet corpus, et membrum est diaboli. Recte ergo dicitur excommunicatus, quoniam coram Deo privatus est communione bonorum fidelium, ita quod non est particeps operum virtuosorum quæ a fidelibus fiunt. Quum etenim boni et virtuosus Christiani sint unum mysticum corpus Christi, per caritatem connexi, meritum unius com-

Ps. cxviii,
63.

municatur et aliis, et bona quæ in Ecclesia generaliter fiunt, singulis prout capaces sunt et condigni, communicantur. Propter quod dixit Propheta ad Dominum : Particeps ego sum omnium timentium te et custodientium mandata tua. Et utique valde horrendum atque nocivum est, coram Deo esse taliter excommunicatum, quamvis Ecclesia excommunicationis sententiam non infligat nisi pro certis excessibus. Qui ergo non vult coram Deo esse excommunicatus, nec vult esse equus et servus, membrum filiusque diaboli, sategat jugiter esse et conversari absque peccato mortali.

Is. vi, 1.

IV Reg. xv,
5; *II Par.*
xxvi, 21.

Eccli.
xxxiv, 31.

Secundo, per lepram intelligitur culpa mortalis, quoniam sicut lepra facit hominem civiliter mortuum, ita quod ad actus vitæ civilis et socialis ineptus et mortuus est, quemadmodum religiosi (unde et illud Isaïæ, In anno quo mortuus est rex Ozias, communiter exponitur de morte Ozias civilis, non naturalis, quia in anno de quo ibi loquitur Isaïas, factus fuit leprosus); sic mortale peccatum facit hominem coram Deo spiritualiter mortuum, hoc est ad omnem actum æternæ vitæ meritorium Deoque placitum prorsus ineptum et impotentem, in tantum quod etiam opera bona ex genere, facta ab eo, coram Deo sunt mortua, nec meritoria. Unde in Ecclesiastico habetur : Homo qui jejunit in peccatis suis, et iterum eadem faciens, quid proficit humiliando se?

Tertio, quoniam sicut lepra dum invalescit, est morbus generalis totum inficiens corpus et auferens homini usum convenientem membrorum; ita mortale omne peccatum totum inficit hominem, quoniam singulares animæ vires universaque corporis membra ab omni actu impedit veraciter virtuoso. Itaque lepra spiritualis, hoc est culpa mortalis, aufert homini omnem usum intellectus seu rationis salubrem : privat etenim eum donis Spiritus Sancti quæ perficiunt intellectum, videlicet sapientia, scientia, consilio. Idcirco intellectus nullam habet considerationem

A nullumque actum coram Deo spiritualiter vivum, formatum, meritorium et acceptum, seu affectuosum ac saporosum; sed omnis actio hujusmodi intellectus, est informis, nuda, sterilis atque insipida : ideo non expellit peccata nec vitiosos affectus, nec rationem Deo conjungit. Aufert etiam homini omnem usum laudabilem seu actum meritorium voluntatis. Per mortalem etenim culpam voluntas privatur caritate, sine qua homo spiritualiter nihil est, quoniam penes caritatem spiritualis vita attenditur, juxta illud ad Corinthios : Si habuero prophetiam, et noverim omnia 1 *Cor.* xiii, mysteria et omnem scientiam, et habuero 2. omnem fidem ita ut montes transferam, caritatem autem non habeam, nihil sum. Aufert quoque mortale peccatum homini usum et motum virtuosum omnium membrorum suorum : sicut videmus quod homines vitiosi libentius vadunt ad spectacula, ad tabernas, ad convivia, ad choreas, ad prostibula ac ceteras vanitates, quam ad divina officia, ad sermocinationes, ad Missas; et si vadit talis ad Missas, interest corde vago, visu incustodito, nec mentem suam ad Deum salubriter dirigit, sed coram Deo ac venerandissimo Sacramento irreverenter se habet et indevote, imo forsitan libidinose et garrule, vitiosos habens affectus, atque ad eos provocans alios.

Quarto, quoniam sicut lepra est morbus contagiosus, ita omne mortale peccatum infectivum est aliorum et alios scandalizat. Propter quod mala societas est nociva, et præsertim periculosa sunt luxuriosi consortia. Propter quod ait Scriptura : Qui tetigerit picem, inquinabitur ab ea; et 1. qui communicaverit superbo, induet superbiam. Itemque : Cum perverso perver- *Ps.* xvii, 27. teris. Eligenda est ergo societas virtuosorum.

Quinto, quoniam sicut lepra est morbus sitibundus, ita peccatum est sitibundum, quia pessimam sitim causat in homine. Nam quanto quis gravius ac sæpius peccat, tanto plus cupit peccare, et ad pec-

candum magis accenditur, quia ut loquitur Augustinus, delectat peccare : si enim non delectaret, non fieret. Usus quoque est velut altera natura. Unde quanto quis plus appropinquat ad consuetudinem pravam, tanto fortius inclinatur ad vitia. Hujus autem rei multæ sunt causæ. Prima, nam quanto quis gravius peccat, tanto plus Deum offendit, et quanto plus Deum offendit, tanto plus a Deo relinquitur; quanto autem plus a Deo relinquitur, tanto in majora ac plura peccata delabitur. Hinc de impiis loquitur Deus : Dimisi eos secundum desideria cordis eorum, ibunt in adinventionibus suis. Secunda causa est, quoniam quanto quis gravius atque frequentius peccat, tanto plus incorporatur diabolo, fitque vehementius membrum et servus ipsius, et subjicitur potestati illius : sicque diabolus ducit eum quo vult, sicut equester ducit ad libitum equum. Hinc ait Apostolus de iniquis : Resipiscant a laqueis diaboli, a quo captivi tenentur ad ipsius voluntatem. Unde apud Job dicitur de injusto : Immisit in rete pedem suum. Et in Proverbiis habetur : Iniquitates suæ capient impium, et funibus peccatorum suorum constringetur. Tertia causa est, quia mortale peccatum est velut gravissimum pondus : ideo trahit deorsum et ad opera tenebrarum. Propter quod ad Hebræos hortatur Apostolus : Deponamus omne pondus et circumstans nos peccatum. Gregorius quoque testatur : Peccatum quod per pœnitentiam non deletur, suo mox pondere trahit ad aliud. Quarta causa est, quia peccatum mentem excæcat, juxta illud libri Sapientiæ : Impii erraverunt; excæcavit enim eos malitia eorum. Ideo quanto quis gravius atque frequentius peccat, tanto plus mente cæcatur : et ita pericula sua et animæ suæ damna non inspicit, sed ruit de malo in pejus, et de pejore in pessima. Propter quod Salomon protestatur : Via impiorum tenebrosa ; nesciunt ubi corruunt. Quinta est, quia nonnulla peccata connexa sunt : sicut ex comestationibus sequuntur loquacitates, lusus, am-

plexus, oscula, et graviora ; ex avaritia quoque nascuntur dolus, mendacium, furtum, rapina, perjurium.

Præterea, considerandus est modus curationis leprosorū istorum. Circa quem pensandum est : Primo, quod simul venerunt. Sic unus peccator debet alium trahere secum ad pœnitendum, dicendo : Si pœnitentiam non egerimus, omnes simul peribimus. Secundo, quia a longe steterunt, quemadmodum publicanus : in quo eorum humilitas designatur. Sic et peccator volens purgari, debet se profunde humiliare, atque indignissimum reputare coram Altissimo apparere, juxta illud Esdræ : Deus meus, confundor et erubesco levare faciem meam ad te, quia delicta nostra creverunt usque ad cœlum. Tertio, quod propriam infirmitatem cognoverunt, et pro remedio pietatem invocaverunt divinam. Ita peccator debet peccata sua plene ac diligenter advertere ac Deo fateri (juxta illud Psalmistæ : Dixi, Confitebor adversum me injustitiam meam Domino ; et sanctus Job ait : Vias meas, id est operationes, in conspectu Dei arguam, et ipse erit salvator meus), deinde divinam misericordiam invocare pro interiori curatione, dicendo illud Psalmistæ : Amplius lava me, Domine, ab iniquitate mea, et a peccato meo munda me. Quarto, quod Christus misit eos ad sacerdotes, ut se illis ostenderent. Per quod insinuat quod quamvis Deus veraciter pœnitenti statim indulgeat, vult tamen ut peccator suo confessori confiteatur, et vultum conscientie suæ ei plene humiliterque ostendat. Quinto, quod dum ibant mundabantur : quia dum pœnitens vadit ad confitendum, curatur si vera contritione movetur. Sexto, quod non nisi unus ad Christum reversus fuit, gratias agens. Per quod figuratum est quod pauci sic confitentur quin recidivent : sicque Christo redduntur ingrati et pereunt, imo plus inquinantur quam ante.

Itaque custodiamus nos ipsos ab omni culpa mortali : quod implere non possumus, nisi et cum diligentia magna etiam

Ps. lxxx,
13.

II Tim. ii,
26.

Job xviii, 8.

Prov. v, 22.

Hebr. xii, 1.

Sap. ii, 21.

Prov. iv, 19.

Luc. xiii, 3,
5.

Ibid. xviii,
13.

I Esdr. ix,
6.

Ps. xxxi, 5.

Job xiii, 15,
16.

Ps. l, 4.

venialia vitemus peccata, quoniam ad mortalia disponunt, et ipsa venialium consuetudo mortalis est. Unde qui assidue verbis vanis, jocosis, scurrilibus, otiosis, superfluis vacant, nequaquam a peccato excusantur mortali, et multo minus qui cogitationibus inutilibus assidue occupantur. Oportet ergo implere quod beatus ait Apostolus, *Philipp. II, 12.* Cum timore et tremore vestram operamini salutem; et quod sanctus Job loquitur, *Job XXXI, 23.* Semper quasi tumentes super me fluctus timui Deum. Qui enim taliter timet Deum, cum omni diligentia vitat peccata, quum tam fœda et turpia coram Deo exsistant: sicut in Vitaspatrum narratur, quod quidam sanctus eremita ambulavit in solitudine cum quodam pulcherrimo juvene qui fuit angelus Dei; sed eremita putavit quod

A homo existeret. Quumque pariter ambularent, obviaverunt cuidam specioso adolescenti super equum sedenti: quem eremita diligenter adspexit; angelus vero se avertit ab illo, quasi fœtorem ejus pati non valens. Venerunt quoque ad quoddam cadaver turpe ac fœtidum, a quo avertebat se eremita, non angelus. Ideo eremita admirans, dixit ad angelum: Cur te ab illo pulchro juvene avertisti, et non ab isto cadavere? Dixitque angelus: Juvenis ille luxuriosus est, ideo coram Deo et angelis ejus est plenus fœtore et turpitudine; sed cadaver istud quum sit res totaliter corporalis, coram Deo et angelis ejus non fœtet, quoniam Deus est immaterialis ac simplicissimus spiritus, angeli quoque sunt spirituales substantiæ.

AD RELIGIOSOS

SERMO QUARTUS

QUOMODO RELIGIOSI, SUPERATIS VITIIS ET OPERIBUS CARNIS, FRUCTUS SPIRITUS APPREHENDERE POSSINT, ET SECUNDUM EOS DIGNE VIVERE.

FRACTUS Spiritus est caritas, gaudium, pax. Galat. v, 22.

Vas electionis, in suis epistolis, ad carnalium desideriorum et operum ex illis procedentium detestationem ac fugam sæpissime nos hortatur. Quum enim ex carne et spiritu constet homo, profectus et salus ejus consistit in hoc, ut se a carnalibus abstrahat et ad spiritualia erigat, caduca et transitoria aspernetur, divina atque cœlestia contempletur. Sic et in præsentī hortatur epistola, ut spiritu ambulemus, id est, spiritualiter conversemur, et Sancti Spiritus sequamur instinctum, angelicis inspirationibus acquiescamus, et rectæ rationis sequamur judicium. Dum itaque sentit se homo intus ad salutaria inclinari,

C ad compunctionem et emendationis propositum stimulari, debet mox consentire et exsequi ac sanctæ inspirationi cooperari, ne Deum in se loquentem aut angelum admonentem videatur repellere, quum scriptum sit: Audiam quid loquatur in me Dominus Deus; qui per Isaiam fatetur: Ego Dominus Deus tuus, docens te utilia, gubernans te in via qua ambulas. De quo et in Job legitur: Per somnium in visione nocturna aperit aures virorum, et erudiens eos instruit disciplina. Si igitur ita egerimus, desideria carnis non perficiemus, eis consentiendo aut ea ad effectum perduciendo, sed refrenabimus ea. Idcirco ad ea quæ corpori necessaria sunt, non carnaliter, sed spiritualiter solum afficiamur, non

Ps. LXXXIV,

9.

Is. XLVIII,

17.

Job XXXIII,

15, 16.

secundum passionis impetum, sed juxta A rectæ rationis censuram talia appetendo; nec delicata atque superflua cupiamus, quoniam illa concupiscentiam augent, passionem inflammant, carnem delectant et foveant, et per consequens spiritum necant, secundum Gregorium.

Denique, quam necessaria ad salutem sit carnalium desideriorum coercio, pandit *Galat. v. 17.* Apostolus, dicens : Caro enim concupiscit adversus spiritum, spiritus autem adversus carnem; hæc enim sibi invicem adversantur, ut non quæcumque vultis, illa faciatis. Caro etenim, utpote appetitus sensitivus, appetit delectabilia sibi in se; spiritus vero, seu ratio recta, aut intellectivus appetitus (puta voluntas) ratione directus, appetit ea quæ appetit, per ordinationem et respectum ad Deum, prout complacet ei expeditque saluti. Hinc et princeps Apostolorum : Obsecro (inquit) vos tanquam advenas et peregrinos abstinere vos a carnalibus desideriis, quæ militant adversus animam. Sed quum caro conjuncta sit animæ a justo ac sapientissimo Deo, ut animæ serviat, obediat, cooperetur et prosit, mirum quod caro dicitur animæ adversari ut hostis ipsius. Et respondendum, quod contrariatio ista non est ex Deo, sed ex corruptione inclinationeque fomitis, a peccato originali emanans. Deus vero conjunxit corpus spiritui seu carnem animæ in bonum animæ, scilicet ad ejus profectum. Et ita fit dum anima per rationem subjicit sibi corpus : imo tunc unio animæ et corporis est in bonum amborum, quia et caro serviendo ac obediendo spiritui, meretur glorificari. Itaque caro bene gubernata, est salubre animæ instrumentum et amica ipsius; si vero non recte regatur, protinus insolescit, læditque animam et est hostis ejusdem. Idcirco bene dixit Gregorius : Si corpori necessaria subtrahimus, civem necamus; si ei superflua indulgemus, hostem nutrimus.

Insuper enumerat sanctus Apostolus *Galat. v. 19.* opera carnis, quæ sunt, fornicatio, im-munditia, impudicitia (quæ consistit in

libidinoso adspectu, tactu, osculis atque amplexibus, ad concupiscentiam et stimulationem provocantibus : quæ valde vitanda sunt, quia secundum doctores, in eis consistit culpa mortalis), inimicitiae, contentiones, æmulationes, iræ, rixæ, dissensiones, invidiæ, ebrietates, comessiones. Et omnia ista, secundum Apostolum, sunt ex suo genere peccata mortalia, quia subjungit : Qui talia agunt, regnum Dei non consequentur. Multo magis consuetudo vitiorum istorum omnino mortalis est atque B damnabilis. Væ ergo religiosis contentiosis, discordibus, iracundis, gulosis et ambitiosis, ad quos specialiter æmulatio pertinet. Æmulatio quippe invidentia est eorum qui idem obtinere seu tenere desiderant, sed unus impeditur aut impediri veretur per alium : sicut dum plures ad prælationem adspirant. Væ itaque qui instar sæcularium hominum passionantur, rixantur, dissentiant, æmulantur, irascuntur, et cibo ac potu se replent, ac alios ad talia provocant. Et, proh dolor ! tales sunt multi, qui C pacem turbant communitatis, et scandala atque offendicula pariunt : imo tales sunt universi qui non discunt mortificare et frangere semetipsos, qui in sancta humilitate, vera patientia et Dei timore suam conversationem non fundant, qui impiissimum illum amorem privatum a visceribus animæ suæ radicitus extirpare non satagunt. Quibus alibi ait Apostolus : Quum I *Cor. iii, 3.* sit inter vos zelus et contentio, nonne carnales estis ? Jacobus quoque apostolus : Si *Jacob. iii, 14-16.* zelum (inquit) amarum habetis, et contentiones sunt inter vos, nolite gloriari et mendaces esse adversus veritatem; non est sapientia ista a Deo, sed terrena, animalis et diabolica : ubi enim zelus et contentio, ibi inconstantia et omne opus prævum. Ecce quid acrius, quid terribilius contra hæc dici potest ? Ea igitur prorsus et in æternum vitemus. Porro, si quis contra fratrem suum contendere inchoet, cedat frater ille contentioso : et tunc honeste se habet, et veraciter vincit, quemadmodum in Proverbiis scriptum est, Honor est *Prov. xx, 3.*

homini quum se separat a contentione. Et A
II Tim. II, 14. Apostolus : Noli (inquit) verbis contendere; ad nihil enim utile est, nisi ad subversionem audientium. Qui autem contendendo, verba contumeliosa, pungitiva, detractoria vel diffamativa profert, enormiter et valde damnabiliter peccat.

Postremo, superatis his vitiis et operibus carnis, studeamus apprehendere et semper in nobis habere duodecim fructus Spiritus, quos consequenter in hodierna epistola
Galat. v, 22, 23. Apostolus exprimit, dicens : « Fructus autem Spiritus est caritas, gaudium », etc. B
 Quocirca pensandum, quod fructus sunt actiones virtutum, vel delectationes actibus virtuosus annexæ. Dum ergo caritas, patientia, mansuetudo, longanimitas, fides, etc., fructus vocantur, non pro virtutum habitibus, sed pro ipsis virtutum actionibus aut delectationibus accipiuntur. Et dicuntur hæc « fructus Spiritus », vel quia a Spiritu Sancto in nobis causantur, vel quia sunt operationes nostri spiritus rationalis, videlicet animæ nostræ intellectualis. Itaque « fructus Spiritus est caritas », id est Dei ac C
 fratrum dilectio, « gaudium », hoc est spiritualis delectatio, ex apprehensione seu contemplatione Dei aut rerum divinarum procedens, « pax » quoque, quæ est tranquillitas mentis et gaudium imperturbatum, dum scilicet tranquillitas illa mentis nec ab interiori nec ab exteriori causa turbatur, inquietatur, concutitur (imo tam virtuosus esse debemus, ut quantumlibet forinsecus impugnemur, pectoris tamen pacem non amittamus), « patientia », quæ est æquanimis tolerantia adversitatum, « longanimi-

tas », quæ est diuturna ac stabilis præstatio futurorum desuper promissorum bonorum, « bonitas », id est benevolentia, « benignitas, mansuetudo, fides », id est fidei certitudo sive fidelitas, « modestia », utpote moderamen in verbis et apparatu ac factis, « continentia », id est laboriosa refrenatio voluptatum, « castitas », id est venereorum repressio eorumdem prompta et facilis.

Hos fructus nos oportet habere, et præ-nominatis operibus carnis carere : aliter ad Christum non poterimus pertinere, quia (ut ait Apostolus) qui sunt Christi, carnem Galat. v, 24. suam crucifixerunt, id est, a carnalibus vitiis mortificaverunt, cum ipsis vitiis exterioribus et concupiscentiis interioribus, quæ salubriter in se peremerunt quantum ad ea in quibus mortalis consistit culpa, prout alio loco dicit Apostolus : Castigo I Cor. IX, 27. corpus meum, et in servitutem redigo. Juxta quem sensum jubet Salvator, scandalizantem oculum erui, et scandalizantem Matth. XVIII, 8, 9. manum ac pedem abscidi : non utique quantum ad membrorum essentiam, sed quoad eorum abusum, prout alibi loquitur Paulus, Mortificate membra vestra quæ sunt super terram. Quicumque autem per caritatem et gratiam, Christi est eique at-tinet, carnem suam sic crucifixit actu, proposito aut inchoatione. Religiosorum vero est per quotidiana pœnitentiæ opera, per exercitia virtuosa, vigilias, disciplinas, jejunia, abstinentias, orationes et consimilia, corpora sua ita quotidie mortificare et Deo sacrificare, ac sanctis laboribus jugiter exercere, atque sub rationis domatu tenere, D
 eaque arma justitiæ Domino exhibere. Rom. VI, 13.

SERMO QUINTUS

QUALITER QUISQUE SE CONFESSORI OSTENDERE DEBEAT, UT A LEPRA PECCATI MUNDETUR.

ITE, ostendite vos sacerdotibus. Luc. XVII, 14.

Sicut in evangelio hodierno scribitur,

T. 30.

Christus decem leprosis ad ipsum pro curatione clamantibus jussit ut irent et sacerdotibus se monstrarent. Sic cunctis

28

fidelibus ad ipsum pro interiori sanatione a culpis orantibus præcipit ut sacerdotibus se ostendant, veram et integram illis faciendo confessionem. Sic ergo et quilibet nostrum confessori suo se ostendat quotidie, conscientiam suam ei plenarie detegendo, peccataque singula cum suis circumstantiis planissime confitendo, et ex qua peccavit radice aperiendo, an scilicet ex ignorantia, an ex infirmitate, aut certe ex proposito, aut consuetudine prava.

Aperiendum est ergo in confessione ubi, et quando, quotiesque peccatum contigerit : ut si quis passus est sordidam cogitationem, et ex ea carnis stimulationem in ecclesia, in choro aut circa altare, et si stimulatio usque ad aliquam resolutionem processit, vel si ex contactu habuit ortum; et an quis stimulari se sentiens, non statim a causa stimulationis, videlicet cogitatione, affectione, contactu, avertit atque retrahit se. Sic et de aliis singulis confiteri debemus, videlicet de immoderantia cibi ac potus, in quibus potest homo multis modis excedere, puta in quantitate, in qualitate, et si extra congruum tempus refecit, aut aliquid cibi vel potus extra debitum tempus sumpsit, vel si nimis diu sedit in mensa, et si reficiendo habuit cogitationes vanas ac frivolas, si benedictionem ante refectionem, et post eam gratias indevote (quod absit) legit. Deinceps, si culpa est etiam in uno morsello aut haustu delectari inordinate, et ipsam suavitatem sensibilem in se et propter se seu immoderanter appetere, quanta culpa est per totam refectionem aut grandem ipsius partem talem delectationem et mentis super cibum et potum effusionem continuare? Considerandum quoque an quis reficiendo, lectionem refectorii diligenter advertit, an oculos suos hinc inde curiose direxit, aliosque inspexit, atque impertinentia consideravit, et per hoc sibi distractiones, levitates, temeraria judicia, frivolas occupationes adeptus est, aut etiam scandalizavit alios. Quæ omnia sunt sinceriter et circumstantialiter confitenda.

A Conformiter, si quis forte obdormivit tempore legendi seu persolvendi aliquam Horam aut faciendi aliquod Ordinis opus, considerandum ex qua causa processerit obdormitio illa, an scilicet ex carnalitate atque pigritia : ut si audierit et discreverit signum aut pulsum excitans ad surgendum, et nihilo minus pausans tardaverit, non erubescens in præsentia summi Dei et angeli sui sancti tam viliter se habere, et aliis Deum laudantibus, orantibus, laborantibus, lecto decumbere, atque ad opus Domini Dei sui tam acediosus negligensque consistere. Porro, si signum aut pulsum non audivit, vel forsitan non discrevit, videndum ex qua causa contigerit illud, an ex immoderata præcedenti vigilia, an ex refectione superflua; et si ex immoderata vigilia, intuendum qualiter et in quibus exercitiis tempus illud deductum sit, an scilicet orando, meditando, psallendo, aut aliqua inutilia faciendo. Consideranda ergo sunt omnia ista et confitenda, atque de cetero præcavenda.

C Præterea considerare debemus qualiter in divinis nos quotidie habeamus : an in psalmodia et cantu alacres ac vigiles fuimus, an pigri ac somnolenti, mente et oculis vagi; an singula verba distincte protulimus sive advertimus, an ad sensum pro posse attendimus, an magis advertimus ad cantum quam sensum, et an magis delectavit nos cantus quam sensus. Quocirca scire debemus quod asserit Hugo, quemadmodum pro verbo omisso repetendus est totus versus, pro versu psalmodia, pro psalmo nocturnus; et item quod loquitur Augustinus : Quoties me magis delectat cantus quam id quod cantatur, pœnaliter peccare me fateor; et tunc mallem non audire cantantem. Verumtamen si quis forte ex subreptione aut oblivione non possit verbum aut versum omissum statim repetere, melius arbitraretur cum choro ultra cantare et psallere, quam ingentem sibi facere occupationem exeundo de choro ad resumendum, seu alio modo a communi labore et actu cantandi et

psallendi se subtrahendo per tempus notabile. Imo si quis faceret hoc quasi ad ostentationem suæ magnæ diligentiae aut strictæ conscientiae, esset non parum culpabile.

Præterea, non raro contingit psallentibus et cantantibus, ut de inordinatione aliorum in cantando et psallendo, vel vera, vel apparente, satis tententur et indignentur, aut etiam, quod detestabilius est, in quadam aversione et tentatione seu passione permaneant. Qui si proprios bene ponderarent quos habent in cantu et psalmodia defectus, evagationes, irreverentias, levitates, pigritias, tantum sibimetipsis salubriter indignarentur, quod aliis facilius placarentur, nec tam cito et immoderanter contra alios provocarentur. In divinis ergo et aliis mutuo supportemus; et quilibet nihilo minus omnem diligentiam suam apponat ad hoc, ne Deum offendat, aut fratrem gravet, scandalizet, sive devotionem impediat aliorum. Quidquid ergo et qualitercumque in præactis culpabiles fuerimus, sacerdoti in confessione plenissime aperiamus.

Insuper, perpendamus qualiter in celebrando nos habuerimus: an decenter pro posse nos ad tam divinissimum præparavimus opus agendum, an in celebratione ad singula verba rite attentis exstitimus, si cum debita actuali devotione, humilitate, reverentia et fervore celebrationem complevimus. Vitanda est evagatio etiam in memoriis, et si duo celebraverint simul, alterutrumque servierint, diligenter invicem sibi ministrent, et mutuo patientiam habeant. Quidam vero nimis faciliter tentantur in tanto officio: ut si frater forsitan aliquo aliter se habeat quam complacet eis. Qui si digne pensarent quantum ab

A omnipotente Deo indigeant supportari, patientiores essent ad fratres suos. Quidquid igitur in his et consimilibus culpæ incurrimus, confessori aperiamus.

Deinceps, si (quod absit) aliquod ex suo genere mortale quisquam commiserit, detractoria, contumeliosa aut seminaria discordiæ verba loquendo, aut debitum omitendo, sive prohibitum committendo, hoc a venialibus sapientialiter separet et discernat, et tanquam lepram horribilem superiori confiteri non differat. In quo, proh dolor! quidam sunt periculosissime negligentes, quia quum sint taliter qualiter religiosi, tam inconsiderate et intemperate pertranseunt, quasi mortaliter non possint peccare, et verba sua ac facta atque omissiones ex genere mortalia, non nisi quasi venialia reputant et confitentur. Quibus incumbit ut coram Deo sollicite ambulantes, verba et opera ac negligentias suas acutius perscrutentur ac justius confiteantur.

Postremo, si juxta formam istam præscriptam quotidie confessori suo se unusquisque ostenderit, et sua peccata condigne ponderare studuerit, eaque cum cordiali contritione et sapienti confiteatur pudore, præsertim erubescens et confitens de hoc quod toties recidivat, et eadem iterat omni die, nec idoneam ad emendationem apponit diligentiam; tunc utique magnam in brevi sentiet gratiam mirabilemque profectum, et bonæ conscientiae relevamen ac gaudium, cautelam quoque et cordis custodiam in futurum et emendationem magnam in omnibus. Sic ergo agamus, et bona quæ quotidie facimus, non quasi superficialiter et ex arido usu, sed quotidie cum diligentia ampliori, devotione recenti et perfectione efficiamus majori.

SERMO SEXTUS

DE INGRATITUDINE PECCANTIUM, DEQUE MULTIPLICI RELIGIOSORUM LEPRO.

NONNE decem mundati sunt? Et novem ubi sunt? Luc. xvii, 17.

Quemadmodum de leprosis a se curatis Christus conquestus est quod de decem non nisi unus ad ipsum reversus est et gratias egit, et alii omnes fuerunt ingrati; ita quotidie conqueri potest de multis quos in fonte Baptismatis aut in sacramento Pœnitentiæ ab omni purgat lepra peccati, et tamen eorum paucissimi in innocentia atque munditia eis collata persistunt, sed recidivantes fiunt ingrati.

Galat. iii, 3.

Porro, non solum de illis ita conqueritur, sed de multis quoque pigris ac negligentibus religiosis, quos in assumptione seu professione Ordinis sui ab omni mundavit labe peccati, et tamen tempore procedente pigrescunt et fiunt ingrati, et quum spiritu cœperint, carne consummantur, et non proficiendo deficiunt. Creditur autem, et quidam sanctorum id ipsum asseruit Patrum, eandem gratiam in Baptismo et in assumptione seu professione monasticæ vitæ conferri. Denique, quanto majora gratiarum charismata data sunt religiosis, tanto eorum ingratitudo invenitur enormior, si (quod absit) negligentes existant, et corde redeant in Ægyptum. Ideo valde opportunum est eis ut in spiritualibus crescant affectibus, atque in virtuosis exercitiis delectentur, quatenus ex intimo corde ea quæ mundi sunt aspernentur. Non enim potest anima rationalis sine quibusdam affectibus et delectationibus diu consistere : ideo qui spiritualibus affectibus gaudiisque non recreantur, ad carnales et sæculares affectiones et consolationes labuntur, et ad exteriora ac vana se conferunt.

Præterea, prout S. Thomas in secunda

secundæ fatetur, ingratitudo est speciale et frequenter mortale peccatum; atque ut Seneca protestatur, maxima pars ingratitudinis est beneficium non recognoscere. Propterea pigris ac tepidis religiosis magnum valde instat periculum, eo quod magnitudinem pietatis et gratiæ eis a Deo exhibitæ non advertant, nec vicem Deo pro posse rependant, ei regratiando ac fervide obsequendo. Ne ergo sic periclitemur, quidquid potest manus nostra, instanter et infatigabiliter operemur : quia

Eccle. ix, 10.

ut ait Chrysostomus, quanto majora fuerint alicui beneficia præstita, tanto graviora ei peccanti et ingrato restant iudicia. Et, ut ait quidam devotus, nihil adeo indignationem provocat Dei, sicut ingratitudo; ipsa est beneficiorum exinanitio et meritorum exterminatio.

Præterea, quamvis omne mortale peccatum lepra hominis possit intelligi, sunt tamen quædam peccata quæ non immerito religiosorum lepræ specialiter appellantur. Horum primum, est pertinacia sive immansio proprii sensus, seu indocilitas, quæ veræ sapientiæ maxime contrariatur, ad inobedientiam quoque disponit, et hominem in suo conservat errore, in temerariis suis iudiciis, in periculosis defensionibus propriæ affirmationis. Hæc lepra præbet diabolo locum in anima, et innumerabilibus eam involvit peccatis, utpote contentionibus, indignationibus, contumeliis, contradictionibus et disputationibus, etiam contra superiores. Religiosi hac lepra infecti, non advertunt quam debilis sit intellectus humanus, et quam faciliter decipiatur homo præsertim in propria causa, quod item quasi scelus idololatriæ sit acquiescere nolle. Talibus ergo clamat

I Reg. xv, 23.

Is. v, 21. Scriptura : Væ qui sapientes estis in oculis vestris. Et Salomon : Vidisti (inquit) *Prov. xxvi, 12.* hominem sapientem sibi videri ? magis illo spem stultus habebit. Nisi etenim pertinaces in suis essent oculis sapientes, non magis crederent sensui proprio quam alieno, potissime quam sensui superiorum ac sapientiorum. Unde etiam hujusmodi homines duri sunt corde, et metuendum est eis quod in Ecclesiastico *Eccli. iii, 27.* legitur : Cor durum male habebit in novissimo.

Secunda religiosorum lepra, est hypocrisis, quæ est semen diaboli, venenum mortiferum, excæcatio cordis, stultitia infinita : quoniam homo hac lepra infectus non erubescit Deo mentiri, et coram hominibus simulare cujus oppositum scit Deo constare ; sicque amplius cupit hominibus complacere quam Deo, nec veretur mendax et falsarius esse, apparere et inveniri coram eo. Hæc lepra sic inficit hominem, ut et bona ex genere quæ operatur, ad finem perversum ordinare non desinat. Merito itaque, juxta Scripturam, *Job xxxvi, 13.* simulatores et callidi provocant iram Dei. Et si, juxta Sapientem, qui sophisticè loquitur odibilis est, quanto magis qui hypocritaliter operatur, cujus cor in omnibus obliquatur ? *Eccli. xxxvii, 23.*

Hæc lepra in ambitiosis potissime videtur, et in his qui nequiter se humiliant, qui se honorem et promotionem despiciere fingunt, ut honorem et præsidentiam in vita hac consequantur, non pensantes quod ait Gregorius : Unusquisque toties ad apostasiæ culpam delabitur, quoties præesse hominibus afficitur ; et rursus, Toties, inquit, Deum meum præire desidero, quoties hominibus dominari affecto. Utinam miseri isti perenderent quod coram summi Judicis tribunali tanto confusibilius stabunt, quanto

A se nunc amplius ab hominibus reputari procurant.

Tertia religiosorum lepra, est curiositas, quæ ut asserit Hugo, est superflua investigatio impertinentium ad se. Atque, ut ait Gregorius, grave curiositatis est vitium, quæ dum hominem ad discussionem vitæ alienæ sollicitat, propriam vitam sibi abscondit. Quo constat quod quanto quis aliorum defectus immoderantius perscrutatur, tanto a propriorum intuitu vitiorum miserabilius impeditur : quod in monacho qui sui ipsius dumtaxat custos est positus, maxime reprobat. Porro, qui aliorum defectus observant, inquirunt, describunt, ut eos suo tempore apud superiores suos valeant accusare, nec interim eos caritative corripiunt ac hortantur, contra caritatem agunt et graviter Deum offendunt, nec fratrum suorum emendationem, sed confusionem et gravamen intendere comprobantur. O utinam tales propria peccata rite intuerentur, conscriberent, ponderarent ! Certe tantum haberent agere in propria causa, quod non tam stolidè adspicerent aliena, neque inspicerent festucam in proximis, qui trabibus pleni sunt in se ipsis.

Insuper aliæ multæ sunt lepræ religiosorum, puta : loquacitas, scandalum, temerarium judicium, complacentia sui. A quibus ac aliis vitiis universis jugiter caveamus. Et si aliquo horum infecti fuerimus, protinus mundari per contritionem et confessionem satisfactionemque prope-remus ; atque curati regrediamur ad Christum, et coram eo in terram prostrati, regratiemur ei, affectuosissime deprecantes ut a tantis excessibus, et universis animarum lepris, ac recidivis nos indesinenter præservare dignetur. Sed et quilibet nostrum ad hoc ipsum viribus totis conetur. Ad laudem et gloriam, etc.

DOMINICA XV POST TRINITATEM

ENARRATIO IN EPISTOLAM

SI SPIRITU VIVIMUS, SPIRITU ET AMBULEMUS. Galat. v, 25, 26; vi, 1-10.

EPISTOLA dominicæ hujus moralibus A saluberrimisque doctrinis plenissima est. Ait namque divinus Apostolus : *Si spiritu vivimus*, id est, si rectæ rationis judicio seu Spiritus Sancti operatione intus in anima vitam gratiæ habemus, spiritualiter intus vivendo per caritatem, *spiritu et ambulemus*, id est, etiam foris spiritualiter conversemur, opera virtuosa et exemplaria peragendo, sicque rationis judicium et Spiritus Sancti instinctum in exterioribus prosequendo, quatenus im-

Matth. v, 16.

pleamus quod docet Salvator : Sic luceat lux vestra coram hominibus, ut videant opera vestra bona, et glorificent Patrem vestrum qui in cœlis est. Sed ne in hoc propriam gloriam intendamus, addit Apostolus : *Non efficiamur inanis gloriæ cupidi*, id est, non appetamus inaniter ab hominibus reputari aut honorari. Hoc est

Ibid. vi, 1.

quod præcepit Christus : Videte ne justitiam vestram faciatis coram hominibus, ut videamini ab illis. *Invicem provocantes*, id est, verbis aut signis seu factis mutuo ad iracundiam, impatientiam aut aliam pravam animi motionem inducentes aut irritantes, quia hoc esset proximum scandalizare. Non ergo per irrisionem aut alio modo provocandus est proximus. *Invicem invidentes*. Invidia quippe directe contrariatur caritati : ideo sicut caritas est potissimum vita animæ, ita invidia potissimum appellatur mors animæ. Propter quod Salomon protestatur : Putredo osium, invidia.

Prov. xiv, 30.

Deinceps hortatur prælatos et perfectiores, ut imperfectis ac subditis pie condescendant atque subveniant. *Fratres, etsi præoccupatus fuerit homo in aliquo delicto*, id est, quamvis aliquis præventus fuerit, ita quod ex tentatione, infirmitate aut ignorantia inciderit aliquam culpam, *vos qui spirituales estis*, id est in virtutibus exercitati et desuper illustrati, *hujusmodi hominem instruite in spiritu lenitatis*, id est, animo mansueto, non indignabundo, informate, ostendendo ei suum errorem et culpam, atque ad viam veritatis et æquitatis eum pro viribus reducite. Deinde Apostolus a plurali numero descendens ad singularem, subjungit : *Considerans te ipsum*, id est, istud quod dictum est impleas, propriam fragilitatem perpendens, *ne et tu tenteris*, id est, tentatione vincaris, aut gravi tentatione impugneris. Quemadmodum enim meremur misericordiam nobis fieri desuper, dum aliis condolemus ac subvenimus, secundum illud, Beati misericordes, quoniam ipsi misericordiam consequentur; sic aliis lapsis et indigentibus non consulendo, succurrendo aut benefaciendo, sed indignando, meremur a Deo relinqui et in easdem aut majores culpas corruere. Unde propriæ fragilitatis et culpæ consideratio inducit hominem ad habendum compassionem cum aliis, et ad succurrendum eisdem. Hinc in Ecclesiastico habetur : Memento judicii mei : sic enim erit et tuum. Mihi heri, et tibi hodie.

Matth. v, 7.

Eccli. xxxviii, 23.

- Alter alterius onera portate*, id est, A Porro præinducta Apostoli verba non defectus vestros et infirmitates atque peccata mutuo patienter sufferte, et vobis in vicem condolete atque succurrite, orate quoque pro invicem, ut salvemini. *Et sic adimplebitis legem Christi*, id est præceptum caritatis fraternæ, de quo dicit Salvator : Mandatum novum do vobis, ut diligatis invicem sicut dilexi vos.
- Itaque præinducta implete, et nolite per superbiam vos ipsos erigere. *Nam si quis existimat se aliquid esse quum nihil sit*, id est, si se ipsum vane reputat et extollit, quasi a se ipso aliquid habeat boni, vel quasi in caritate et gratia sit, quum tamen per superbiam suam virtutes amiserit, et spiritualiter nihil sit. Propter quod in Ecclesiastico scriptum est : Quid superbit terra et cinis ? Propheta quoque loquitur Deo : Substantia mea tanquam nihilum ante te. *Ipsa se seducit*, id est, propria elatione excæcat, in falsitatem præcipitat, et damnationem incurrit, juxta illud Habacuc : Quomodo vinum potantem decipit, sic erit vir superbus, et non decorabitur. *Opus autem suum probet unusquisque*, id est, actus vitæ suæ prudenter examinet, et sic in semetipso tantum gloriam habebit, id est, de propriis bonis operibus exsultabit, si fuerit virtuosus : verumtamen non finaliter nec principaliter in se, sed in Domino, juxta illud, Qui gloriatur, in Domino gloriatur. *Et non in altero*, id est, de factis et meritis aliorum non præsumet, neque in aliorum laude et adulatione lætabitur. Quis enim scit quid agatur in homine, nisi spiritus hominis ? ut ait Apostolus. *Unusquisque enim onus suum*, id est causam quam cum districto judice habet, seu conscientiae suæ gravamen, vel vitiorum suorum ultionem, vel actionum suarum manipulum operumque congeriem, *portabit*. Opera enim illorum sequuntur illos. Unde in libro Job asseritur : Omnipotens opus hominis reddet ei, et juxta vias singulorum restituet eis. Ad Romanos quoque legitur : Unusquisque pro se rationem reddet.
- B *Communicet autem is qui catechizatur verbo*, id est qui instruitur sapientia salutari seu sacræ Scripturæ eloquiis, *ei qui se catechizat*, id est suo instructori, in omnibus bonis : id est, tam spiritualia bona sua, videlicet preces et merita, quam corporalia, communicet, impendat, dividat suo informatori, si temporalibus eget ; ei quoque in bonis operibus se conformet. Justum est equidem ut qui ab alio spiritualia accipit, in temporalibus ei subministret, si potest, et ille indigeat. Propter quod alibi dicit Apostolus : Si nos vobis spiritualia seminavimus, magnum est si carnalia vestra metamus ? Christus quoque in Evangelio : Dignus est (inquit) operarius mercede sua.
- C *Nolite errare*, non acquiescendo sanis doctrinis, seu non obtemperando præceptis. *Deus non irridetur*, id est, non fallitur. Cujus signum subjungitur : *Quæ enim seminaverit homo*, id est opera quæ in præsentī vita peregerit, quæ ad præmium comparantur futurum sicut semen ad fructum ; *hæc et metet*, id est, horum condignam mercedem accipiet. Unde per Ezechielem Deus frequenter testatur : Unumquemque vestrum juxta viam suam judicabo. *Quoniam qui seminat in carne sua*, id est, carnaliter vivit, concupiscencias suas sequendo, *de carne et metet corruptionem*, id est, pro vitiis suis carnalibus recipiet æternam damnationem, virium quoque animæ suæ infectionem, quia peccata animam indisponunt, et vires ejus inficiunt seu corrumpunt. Hoc est quod

Rom. viii, 13. ad Romanos inducitur : Si secundum carnem vixeritis, moriemini; si autem spiritu facta carnis mortificaveritis, vivetis. Unde nunc subditur : *Qui autem seminat in spiritu*, id est, spiritualiter conversatur, sensualitatem domando, et actibus latriæ ac ceterarum virtutum insistendo, *de spiritu metet vitam æternam*, id est, pro spiritualibus et virtuosus suis operibus sempiternam beatitudinem sortietur, juxta illud in Psalmo : Hic accipiet benedictionem a Domino; in Apocalypsi quoque, *Servi Dei videbunt faciem ejus, et regnabunt in sæcula sæculorum.*

Ps. xxiii, 5. *Bonum autem facientes, non deficiamus*, id est, a bonis operibus non cessemus, nec tepescamus : quoniam qui perseveraverit usque in finem, hic salvus erit; nec coronatur nisi qui legitime certaverit. Tepido quoque loquitur Deus in Apocalypsi : Habeo adversus te, quia caritatem tuam primam reliquisti. *Tempore enim suo*, id est hora a Deo præordinata, *metemus*, id est, gloriam consequemur, *non deficientes*, id est, finem non habituri præmii tanti, nec plus appetituri, juxta illud Psalmistæ : Adim-

Matth. xxiv, 13. *II Tim.* ii, 5. *Apoc.* ii, 4. *Ps.* xv, 11. *A* plebis me lætitia cum vultu tuo; et, *Satiabor* quum apparuerit gloria tua. Istud erit post vitam præsentem, quando fuerit anima nostra sufficienter purgata sive in vita hac sive in purgatorio. Hinc secundo Paralipomenon dicitur : Confortamini, et non dissolvantur manus vestræ; erit enim merces operi vestro. *Ergo dum tempus promerendi habemus*, videlicet durante hac vita, *operemur bonum ad omnes*, id est, omnibus pro posse beneficiamus juxta exigentiam causæ et loci ac temporis, spiritualia et corporalia bona nostra eis communicando, prout exigit caritas. *Maxime autem operemur bonum ad domesticos fidei*, id est Ecclesiæ filios seu Christifideles; quibus ad Ephesios dicit Apostolus : Jam non estis hospites et advenæ, sed estis cives Sanctorum et domestici Dei. Itaque iis qui nobis magis conjuncti sunt, magis benefacere obligamur. Caritas namque est ordinata. Propter quod prima ad Timotheum scribit Apostolus : Si quis suorum, et maxime domesticorum, curam non habet, fidem negavit, et est infideli deterior.

Ps. xvi, 15. *II Par.* xv, 7. *Ephes.* ii, 19. *I Tim.* v, 8.

SERMO PRIMUS

DE INANI GLORIA INVIDIAQUE VITANDIS, ET VARIIS CIRCA CARITATEM
PROFECTUMQUE PROXIMI OBSERVANDIS.

NON efficiamur inanis gloriæ cupidi, D *invicem provocantes, invicem invidentes.* Galat. v, 26.

In præsentis dominicæ epistola proponit nobis Vas electionis, sanctus Apostolus, multa valde moralia ac saluberrima documenta. Primum est, ut non solum in anima vivamus per gratiam Spiritus Sancti et per interiores actus virtutum, credendo, sperando, diligendo, contemplando, compatiendo, sed etiam forinsecus virtuose et exemplariter conversemur in exteriori ex-

secutione mandatorum, in moderamine linguæ, et sensuum refrenatione, ac vestium simplicitate, quatenus Deo offeramus puram conscientiam, et proximis bonum exemplum : quoniam in Ecclesiastico scriptum est, Unicuique mandavit Deus de proximo suo, ut scilicet eum ædificet verbis, factis et moribus. Propter quod ait Apostolus : Quæ ædificationis sunt, in invicem custodiamus.

Eccli. xvii, 12. *Rom.* xiv, 19.

Secundo docet Apostolus ut « non efficiamur » nec simus « inanis gloriæ cupidi »,

ne scilicet desideremus propriam excellentiam, laudem humanam, temporalem honorem; sed quidquid boni in nobis est Deo grata ac humili mente attribuentes, Dei honorem et gloriam, laudem et excellentiam in omnibus præcordialiter affectemus, quatenus ipse ab universis honoretur, extollatur et collaudetur propter infinitam dignitatem, bonitatem et maiestatem suam, et propter beneficia sua in nobis. Ideo propriam defectuositatem, vanitatem et vilitatem sapienter intuentes, omnem vanam gloriam totaliter eradice-

Judith viii,
26, 27.

mus, atque nos ipsos vilipendamus; et quantum in nobis est, vilipendi ab aliis peroptemus; irrisiones, aspernationes, injurias nobis illatas, patienter, imo hilariter patiamur, certi quod multo graviora pati meruimus, juxta illud *Judith*: Non ulciscamur nos pro iis quæ patimur; sed reputantes peccatis nostris hæc ipsa supplicia minora esse, flagella Domini, quasi servi qui corripimur, ad emendationem, et non ad perditionem nostram evenisse credamus.

Denique vana gloria, quæ est gloriatio stulta in se, est vitium valde periculosum, occultum, velocissimum et ingratum. Quum enim a nobis ipsis non habeamus nisi deficere et peccare, et quidquid vanitatis est atque miseriæ, valde inordinatum, ingratum et impium est de donis Dei in se, et non in Deo gaudere, aut pro eis non Dei, sed propriam laudem et honorem appetere. Nihilo minus vitium istud mirabiliter cito et improvise, imo nonnunquam quasi imperceptibiliter hominem pulsatur, mentem invadit, animumque quasi præoccupat. Et antequam homo advertat, cor ejus impletur motu vitii hujus, ita ut etiam de bonis actibus Deique gratiis vanissime gloriatur, atque de hoc quod ab aliis videtur, reputatur et in admiratione habetur, intra se insipienter ac perverse lætetur. Ideo ait Bernardus: Time sagittam; leviter volat, leviter penetrat, sed, dico tibi, non leve infligit vulnus, cito interficit. Sagitta hæc, vana gloria est. Chrysostomus quoque

A testatur: Qui omnium pecuniarum habuerunt contemptum, et totius mundi spreverunt honores, atque tyrannicas corporum concupiscentias superaverunt, ii multoties capti a vana gloria, omnia perdiderunt.

Insuper, quanta mala ex vana gloria sequantur, idem pandit Chrysostomus: Nihil, inquit, ita pecunias concupiscere facit, ut gloriæ cupido. Propter hanc namque famulorum greges, equos auro opertos et argenteas mensas expetunt homines, non ut utilitatem aut voluptatem hinc hauriant, sed ut multis ostendantur et honorentur. Solet quoque vana gloria noviter conversos vexare, ut ait Isidorus: Qui ex deteriore jam melior esse cœpit, caveat ne de acceptis se extollat virtutibus, ne gravius per vanam gloriam corruat quam prius per lapsum vitiorum jacebat. Vexat quoque hæc gloria vana proficientes, imo etiam aliquialiter et perfectos. Idcirco dicit Gregorius: Quum bene vivitur, valde timendum est ne mens, despectis ceteris, de singulari gratia eleve-

C tur. Unde Hieronymus: Ne nimis religiosus velis videri, nec plus humilis quam necesse est; nec quæras gloriam, fugiendo simulatorie eam. Quidam enim pessime vani fingunt et simulant se fugere gloriam et honorem, quatenus per hoc ea acquirant. Quibus competit quod ait Scriptura: Est qui nequiter se humiliat, et interiora ejus plena sunt dolo.

Insuper, juxta doctrinam Apostoli, nullus debet alium ad illicita provocare, nec ad iram, impatientiam, indignationem aut aliud vitium incitare per verba aut opera procacia, illusoria, offensiva. Hoc enim diabolicum est, quum dæmonum totus conatus sit homines ad vitia trahere, et contrarium caritati Dei ac proximorum. Qui enim diligit Deum, optat et promovet quantum potest ejus honorem, impeditque ejus offensam: idcirco in se atque in aliis studet vitare seu impedire peccata, ne inhonoretur Dominus Deus. Similiter qui diligit proximum, optat et satagit ne corruat in peccatum, quum nihil ita nocivum sit

Eccli. xix,
23.

animæ sicut iniquitas. Ideo unusquisque A pro posse provocet proximos suos ad perfectum virtutum, ad caritatis fervorem, ad vitæ perfectionem, juxta illud ad Hebræos:

Hebr. x, 24. Consideremus invicem in provocationem caritatis et bonorum operum. Rursusque *Ibid. iii, 13.* in eadem epistola dicit Apostolus: Adhortamini vosmetipsos per singulos dies, ut non obduretur quis ex vobis fallacia peccati.

Præterea in hodierna epistola docet Apostolus ne invicem invidiamus. Invidia quippe est dolor de prosperitate alterius. B Propter quod Hugo de S. Victore: Invidia, inquit, est in suum auctorem reciprocus de bono alterius tabescentis animi cruciatus. Hæc infelix invidia ex superbia nascitur, et in ambitiosis potissimum regnat. Quod enim unus de alterius prosperitate et excellentia contristatur, hinc accidit quia illum præcedere cupit, aut quod ille habet, appetit adipisci, dicente Gregorio: Tanto quisque plus invidet aliis bona præsentia, quanto minus contempserit ea. Interdum tamen ex aliis causis generatur invidia, scilicet ex frequenti ira seu injuria sibi ab alio irrogata, vel quia ab illo gravatur. Invidia itaque est species tristitiæ. Unde melancholici quum specialiter ex naturali dispositione tristes sint, ex complexionis malitia ad invidiam sunt proclives: ideo contra eam præcipue debent pugnare. Magna certe est invidorum miseria. Alia namque peccata communiter habent aliquid delectationis annexum; invidia autem in se ipsa pœnalis est, et quoddam mentis tormentum. Hinc Hieronymus loquitur: Oro te, quid delectationis præstat invido sua invidia, quem quibusdam conscientiae ungulis livor dis-

Ibid. vi, 1. Tertio principaliter docet Apostolus ut proximos quacumque tentatione aut culpa præoccupatos, præventos, deceptos, pie ac mititer instruamus, propriam fragilitatem considerantes, ne et ipsi tentemur ac corruamus. Istud enim pertinet ad spiritualia misericordiæ opera; vera quoque justitia

habet compassionem; et sicut nos ipsi habemus nos ad proximos nostros, sic Deus se habebit ad nos. Itaque tentati et lapsi sunt pie instruendi, consolandi et reducendi. Instruendi sunt qualiter pœnitere atque resistere peccatis ac tentationibus debeant, Dei auxilium invocando, Christi passionem inspicendo, novissima præmeditando, ac aliis modis; consolandi sunt, ne abundantiori absorbeantur tristitia aut desperent, sed in Christi pietate confidant; reducendi sunt ad pristinum gradum, ad præcedens bonum propositum, ad recentem inchoationem exercitiorum bonorum, juxta illud Apocalypsis: Memor esto unde excideris, et pœnitentiam age. *II Cor. ii, 7.* *Apoc. ii, 5.*

Porro aliqui peccant non ex præoccupatione, subreptione, infirmitate aut ignorantia, sed ex deliberatione, ex habitu vitioso, ex certa malitia; nec pœnitent, sed pertinaces sunt et duræ cervicis. Quibus competit quod apud Isaiam loquitur Deus: Scio quia durus es, et nervus ferreus cervix tua, et frons tua ærea. Istos oportet C durius reprehendi et per censuram justitiæ castigari, præsertim quando cum pietate lucrari non queunt. Præoccupati vero in malo qui dociles et convertibiles sunt, sicut prædictum est, sunt leniter instruendi ac mititer corripiendi: quia ut Prosper testatur, Leniter castigatus exhibet reverentiam castiganti; asperitate vero immoderatæ increpationis offensus, nec increpationem recipit, nec salutem. Ambrosius quoque fatetur: Plus proficit amica correctio, quam accusatio turbulenta; illa pudorem incutit, hæc indignationem movet. Sed diligenter est advertendum efficaciterque implendum quod ait Isidorus: Qui admonitus secrete de peccato, emendare se negligit, publice arguendus est; et vultus quod occulte sanari non potest, manifeste est emendandum. Manifesta peccata non sunt occulta correctione purganda. Palam enim arguendi sunt qui palam peccant scandalizandoque nocent, ut dum illi aperta objurgatione sanantur, hi qui eos imitando deliquerant, corrigantur: sic-

que dum unus corrigitur, plurimi emendantur.

Galat. vi, 2. Quarto docet Apostolus ut defectus nostros atque gravamina mutuo pie et caritative portemus, quatenus unus cum alio patientiam habeat, et sicut ipse cupit portari in suis oneribus, infirmitatibus atque defectibus, tam a Deo quam a proximis et domesticis suis, sic ipse alios portet. Imo, secundum Gregorium, qui portare malos renuit, ipse sibi per impatientiam suam testis est quia bonus non est.

Quinto docet Apostolus ut qui instruuntur in spiritualibus rebus, instructoribus suis sint grati, et de bonis suis communicent et vicem rependant illis. Unde in *Eccli.* ii, 23. ecclesiastico dicitur: Danti mihi sapientiam, dabo gloriam. Hinc loquitur Augustinus: Si me posses docere quod nescio, non solum te verbis, sed et pugnis cædentem deberem patientissime sustinere. Hinc constat quod subditi suos prælatos ac prædicatores tenentur cordialiter valde diligere, grates ac honorem et vicem eis rependere, et temporalia prompte subministrare. Ideo *1 Tim.* v, 17. ait Apostolus: Qui bene præsunt presbyteri, duplici honore digni habeantur, maxime qui laborant in verbo; et rursus: *1 Thess.* v, 12, 13. Rogo vos, fratres, ut noveritis eos qui præsunt vobis, et monent vos, ut habeatis illos abundantius in honore et dilectione; et propter opus eorum pacem habete cum eis.

Galat. vi, 3. Postremo, juxta doctrinam Apostoli, non existimemus nos aliquid esse, quum nihil simus, nec decipiamus nos ipsos, sed examinemus vitam et conscientiam nostram quotidie. Ferventes quoque ac stabiles simus in bonis operibus, et omnibus pro posse benefaciamus; et quod effectum non possumus, affectu agamus, certi quod pro his modicis brevibusque actibus virtuosis æternam et ineffabilem beatitudinem adipiscemur. Propter quod alibi scriptum est: Non sunt condignæ passionibus hujus temporis ad futuram gloriam. Sapiens quoque: Bonorum (inquit) laborum gloriosus est fructus.

A Legitur in *Vitaspatrum*, quod quidam Frater in eremo graviter fuit tentatus, abiitque ad senem quemdam, et retulit ei. Qui carens discretione et exercitatione prælii spiritualis contra invisibiles hostes, dixit ad Fratrem: Perdidisti animam tuam. Quo audito, Frater ille tristis et quasi desperans recessit, proponens reverti ad sæculum; sed Deo ordinante, obviavit ei abbas Apollo, vir magnæ discretionis atque virtutis. Qui considerans Fratrem illum esse vehementer afflictum et mœstum, petivit quid haberet, et quæ esset tanti causa mœroris. Frater autem ille prima fronte erubuit propalare; tandem tamen aperuit veritatem, videlicet qualiter esset tentatus, et quomodo senex ille sibi responderit. Tunc abbas Apollo sapienter et leniter Fratrem illum instruxit, rogavitque eum ut ad suam cellam rediret; acquievitque ei Frater præfatus. Deinde abbas Apollo perrexit ad senem prædictum. Quumque appropinquasset cellulæ ejus, oravit: Domine Deus, obsecro, converte pugnam seu tentationem Fratris illius in senem istum, ut discat propriam fragilitatem cognoscere ac aliis condolere. Et protinus abbas Apollo vidit dæmonem in forma Æthiopis stantem prope cellam senis illius, igneasque sagittas jacentem in senem illum. Et ecce senex ille quasi insanus et furens cœpit cellam suam exire, et huc illucque discurrere. Quo viso, abbas Apollo accessit ad eum, et ait: Quid habes? Quo curris? Senex vero ille erubuit dicere qualiter tentaretur. Cui abbas Apollo: Redi, inquit, in cellam tuam, et scito te hucusque non esse exercitatum; hæc autem tentatio ideo accidit tibi, quoniam Fratrem illum desperare fecisti. Tunc abbas Apollo rogavit Deum pro sene illo, ut liberaretur ab illa tentatione.

D Ex quibus patet, quam salubre sit viris spiritualibus, discretis et exercitatis tentationes et cordis secreta manifestare, quam periculosum sit etiam indiscretis et inexercitatis talia revelare. Præfatus demum Frater post hæc valde profecit in

sapientia atque virtutibus. Unde abbas A si stella inter Fratres jam fulget. Non ergo Apollo postea dixit seni præfato : Ecce despiciendi, sed pie tractandi et sapienter Frater ille cui desperationem fecisti, qua- instruendi sunt qui tentantur.

ENARRATIO IN EVANGELIUM

NEMO POTEST DUOBUS DOMINIS SERVIRE. Matth. vi, 24-33.

SALVATOR in evangelio hodierno docet B qualiter serviendum sit Deo, videlicet puro ac simplici corde, absque sollicitudine carnali et sæculari. Itaque ait Matthæus : *Nemo potest duobus dominis servire*. Quid est hoc? Nonne possumus servire Deo et prælatis atque principibus terræ, Sanctis quoque qui sunt in regno cœlesti? Ad hoc quidam respondent, quod intelligendum sit verbum istud de dominis non subalternatis atque contrariam voluntatem habentibus. Sed rursus objici potest, quod secundum beatissimorum apostolorum Pe- C tri et Pauli doctrinam ac jussionem, servi fideles dominis suis etiam infidelibus ac dyscolis servire debent fideliter, et subditi esse humiliter. Et respondendum, quod nemo potest servire eodem tempore duobus dominis contrariam voluntatem habentibus, in quantum ita contrarii sunt, et quantum ad ea in quibus contrariantur. Sic etenim quidquid placet uni, displicet alteri; et quod præcipit unus, prohibet alter. Ideo dicit Apostolus : Si hominibus placerem, Christi servus non essem. Unde D dominis infidelibus et iniquis serviendum aut obediendum non est in his in quibus Deo atque justitiæ sunt rebelles.

Deinde Christus rationem dicti sui subjungit. *Aut enim unum dominum odio habebit*, quantum ad ea in quibus contrariatur alteri domino, *et alterum diligit*, eum videlicet cui ex animo servit. *Aut unum dominum sustinebit*, eum videlicet cui servit : quem etsi non diligit, tamen tolerabit eum, et iugo ejus subiciet se;

et alterum contemnet, videlicet eum cui non servit neque obedit. Non dicit, Aut unum diligit, et alterum contemnet : quia interdum non diligit eum cui deservit, et tamen sustinet eum quasi durum dominum, ut patet de his qui diabolo serviunt, quem non amant. Item non dicit, Et alterum odio habebit, sed, « contemnet », videlicet Deum : quia secundum Augustinum, etiam illi qui non serviunt Deo, non odiunt eum, sed spernunt, dum quasi de pietate ejus securi, præcepta ipsius transgrediuntur. Dicit etenim Augustinus : Nullius fere conscientia Deum potest odisse. Sed objici potest quod Christus asserit de obstinatis Judæis : Oderunt me et Patrem meum grati. Psalmista quoque loquitur Deo : Superbia eorum qui te oderunt, ascendit semper; et, Nonne qui oderunt te, Domine, oderam? Et respondendum, quod Deus considerari potest dupliciter. Primo, in se, secundum quod est summus, bonus atque perfectus : et ita non potest odiri. Secundo, ut punitor iniquitatis atque prohibitor vanitatis ac voluptatis : sicque damnati et aliqui scelerati in sæculo isto odiunt Deum.

Ex præactis elicitur, quod secundum Augustinum, Christus hoc loco ad litteram per duos dominos intelligit Deum, qui ratione creationis, et omnipotentiae ac præsidentiae suæ, est omnium dominus, atque diabolus, de quo ait Salvator : Venit enim princeps mundi hujus. Dicitur quippe diabolus dominus iniquorum, quoniam propriæ voluntatis perversitate se subdunt

Rom. xiii,
1 et seq.;
Ephes. vi,
5; Coloss.
iii, 22; 1
Petr. ii, 18.

Galat. i, 10.

Joann. xv,
24, 25.
Ps. lxxiii,
23.
Ps. cxxxviii,
21.

Act. x, 36.
Joann. xiv,
30.

Job xli, 25. diabolo, qui ut in *Job* asseritur, est rex A
super universos filios superbiæ. Nemo ergo potest Deo servire et diabolo. Quicumque enim in mortali est culpa, servit diabolo tanquam victus ab eo. A quo enim quis superatus est, hujus et servus est, ut secunda Petri habetur. Porro qui in mortali peccato est, Deo servire non potest quamdiu permanet in peccato : nam et si faciat opera bona ex genere, dando elemosynam audiendoque Missam, non tamen sunt opera Deo accepta ac meritoria vitæ æternæ, quia non fiunt ex caritate. Ex his B infert Salvator :

Non potestis Deo servire vere et meritorie, *et mammonæ*, id est divitiis, seu dæmoni de avaritia tentanti. Qui enim servit Deo, spiritualia et æterna temporalibus ac sensibilibus præfert; qui vero divitiis servit, terrena præfert cœlestibus. Divitiis namque servire, est ad eas superflue affici, atque in eis constituere finem : quod est cupiditatis vitio superari. Porro a quo quis victus est, hujus et servus est. Propter quod ait Salvator : Omnis qui facit C peccatum, servus est peccati. Talis potius possidetur a divitiis, quam possideat eas.

Ideo dico vobis : Ne solliciti sitis, id est, immoderatam et anxiam curam non habeatis, *animæ vestræ*, id est vitæ animalis alimoniis indigenti, vel vobis ipsis (ut ponatur pars pro toto, videlicet anima pro homine), *quid manducetis*, id est de cibo, sub quo jam intelligitur etiam potus; *neque corpori vestro* solliciti sitis hoc modo, *quid induamini*, id est de vestitu. Denique superflua circa talia sollicitudo D vocatur, quando circa ea homo in tantum occupatur, quod a spiritualibus debitis seu virtuosius operibus ad quæ tenetur, impeditur, aut ea plus quærit quam necessaria sive utilia sunt sibi. Sollicitudo vero ordinata est, dum homo secundum exigentiam sui status quærit seu providet sibi de necessariis vitæ, ordinando ea ad spiritualia bona. Talisque sollicitudo pars est prudentiæ; quam non habere, esset Deum tentare, aut ignaviter se habere.

Præterea prædictam superfluum sollicitudinem esse vitandam, probat Salvator ratione et exemplo multiplici. Et primo per locum a majori, quum ait : *Nonne anima plus est quam esca?* id est, utique anima præstantior est omni corporeo alimento; *et corpus plus quam vestimentum?* id est, corpus hominis dignius est vestitu. Ac si dicat Filius Dei : Qui absque vestra sollicitudine, ex sua liberalissima bonitate largitus est vobis corpus et animam, alimentum quoque et vestitum præstabit vobis sine immoderata sollicitudine vestra, dummodo confidatis in eo. Ei enim cura I *Petr.* v, 7. præcipua est de rationalibus creaturis.

Deinde ponit aliam rationem ad idem, sumptam ex consideratione irrationalium creaturarum. *Respicite volatilia cœli*, id est, aves diligenter considerate : quæ dicuntur volatilia cœli, quia in cœlo volant aerio, puta in aere, qui infimum cœlum vocatur; *quoniam non serunt, neque metunt, neque congregant in horrea*. Omnia enim hæc rationis sunt opera, quæ illis nequeunt convenire. Videmus tamen ad oculum, quod multæ aves congregant victum in nidos; quemadmodum in Proverbiis habetur : Vade ad formicam, o piger, *Prov.* vi, 6-8. et disce semitas ejus, et disce sapientiam; quæ quum non habeat ducem, parat in æstate cibum, et congregat in messe quod comedat. Itaque, sicut volatilia pergunt ad grana, et colligunt ea secundum naturalem instinctum, sic hominibus committitur labor et providentia, non cura superflua, juxta illud *Job* : Homo ad laborem *Job* v, 7. nascitur, et avis ad volatum. Unde primo homini post peccatum a Domino dictum est : In sudore vultus tui vesceris pane. *Gen.* iii, 19. *Et Pater vester cœlestis pascit illa*, id est, per causas inferiores providet et concedit eis necessaria vitæ. Siquidem opus naturæ ac intelligentiæ, opus est causæ primæ. Hinc fertur de Deo in Psalmo : Qui dat *Pss.* cxlvi, 9. jumentis escam ipsorum, et pullis corvorum invocantibus eum. In *Job* quoque dicitur : Quis præparat escam corvo, quando pulli *Job* xxxviii, 41. ejus clamant ad Deum, vagientes eo quod

non habeant cibos? *Nonne vos magis pluri*, id est majoris dignitatis ac pretii, *estis illis* volatilibus? Et per consequens vobis potius providebit quam illis. In tantum equidem major cura est Deo de rationalibus quam irrationalibus creaturis, ut dicat

I Cor. ix, 9.

Apostolus : Numquid cura est Deo de bobus?

Quis autem vestrum cogitans potest adjicere ad staturam suam cubitum unum? id est, quum nemo possit corporis sui quantitatem augere cubito uno, sed Deus det quantitatem sibi placentem, constat quod de alimento sufficientiam largietur, similiter de vestitu. Ideo subditur : *Et de vestimento quid*, id est cur, *solliciti estis* superflue? Et quod inde immoderate sollicitari non debeant, probat inanimatorum exemplo. *Considerate lilia agri*, quæ crescunt in agro, *quomodo crescunt*. *Non laborant, neque nent* pro adeptione naturalis consistentiæ ac decoris, et tamen pulcherrime decorantur, secundum quod subditur : *Dico autem vobis, quoniam nec Salomon*, qui fuit rex valde dives ac præpotens,

III Reg. iv, x.

in omni gloria sua, id est apparatu atque ornatu suo, *coopertus est*, id est, tam speciose ornatus est, *sicut unum ex istis* liliis agri. Quæ enim purpura regum, quæ tinctura artificum æquari poterit pulchritudini florum? Ars nempe humana imitatur naturam, non autem adæquat eam. *Si autem fœnum agri*, id est herbam, *quod hodie est*, et *cras*, id est cito post hæc, *in clibanum mittitur* ad comburendum, *Deus sic vestit*, id est, tam pulchre ornat virore ac aliis qualitatibus; *quanto magis* vestiet vos *modicæ fidei*, qui de divina providentia imperfectam fidem habetis, ideoque tam immoderatam sollicitudinem de necessariis vitæ habetis?

Nolite ergo solliciti esse, cum inquietudine mentis impediende pacem internam et libertatem cordis in Deo, *dicentes* : *Quid manducabimus*, aut *quid bibemus*, aut *quo operiemur*, id est, vestiemur? *Hæc enim omnia*, utpote cibum, potum, vestitum, *gentes*, id est gentiles et infideles,

A inquirunt cum sollicitudine immoderata, quoniam providentiam Dei ignorant aut non advertunt, putantes Deum hæc inferiora non cognoscere distincte, nec actus humanos determinate particulariterque disponere et curare, juxta illud Psalmistæ : *Dixerunt, Quomodo scit Deus?* et, *Si est scientia in Excelso?* *Scit enim Pater vester cœlestis*, id est Deus omnipotens, unus in essentia et trinus in personis. Cujus ineffabilis pietas, dulcissima caritas, immensa dignatio patet in hoc, quod a nobis pauperrimis vermiculis pater appellari dignatur. Sed formidandum est nobis, ne propter ingratitude et negligentiam nostram mereamur audire ab eo illud Isaïæ : *Filios exaltavi et enutrivì, ipsi autem spreverunt me. Quia his omnibus*, scilicet cibo, potu, vestitu, habitaculo, *indigetis*.

Ps. lxxii, 41.

Is. i, 2.

Ex quibus omnibus infert Salvator saluberrimum documentum. *Quærite ergo*, id est, bene vivendo, contemplando, amando adipisci studete, *primum regnum Dei*, de quo Sapiens scribit : *Justi accipient regnum decoris et diadema speciei de manu Domini*. Hoc regnum est beatitudo cœlestis, seu Ecclesiæ triumphantis societas. Quod quum sit finis noster, primo cadere debet in intentione, atque ad ipsum ordinanda sunt alia universa. Sed quoniam illud adipisci non possumus nisi servando præcepta, ideo addit Salvator : *et justitiam ejus*, id est, opera virtuosa ac meritoria, quibus ad regnum cœleste pertingitur, exercete. Nam fides sine operibus mortua est. *Et hæc omnia vitæ necessaria adjici-*

Sap. v, 17.

Jacob. ii, 26.

D cientur vobis, quasi bona secundaria et minus principalia, tamen et necessaria. Itaque, si bona spiritualia et æterna in primis condigne quærimus et constanter, temporalia vitæ necessaria, Deo ordinante, non deerunt. Primum autem ad secundum refertur. Per hoc itaque quod Salvator regnum Dei et justitiam ejus docet primo esse quærenda, innuit temporalia quoque esse moderate quærenda cum labore laudabili, non cum sollicitudine sæculari, quum scriptum sit : *Labores manuum tua-*

Ps. cxxvii, 2.

rum quia manducabis, beatus es, et bene Act. xx, 34. tibi erit. Apostolus quoque : Ad ea (inquit) quæ mihi necessaria erant, ministraverunt manus istæ. Non ergo sic adjiciuntur, quod homo otio debet vacare, nec quod in se est facere. Sed nonne aliqui martyres fame extincti sunt, et multi iusti maximas patiuntur penurias, sicut et A Paulus asserit se perpessum? Et respondendum, quod sæpius subtrahuntur prædicta electis ad probationem eorum, et meriti præmiique augmentum. Christus vero nunc loquitur in communi, et sicut frequentius accidit. Deus tamen ex causis sibi cognitis quandoque aliter agit in particulari. II Cor. xi, 9, 27.

SERMO SECUNDUS

DE IMPEDIMENTIS DIVINI OBSEQUII, ET MULTIPLICI SERVITUTE.

PRÆPARATE corda vestra Domino, B et servite illi soli, et liberabit vos de manibus inimicorum vestrorum. I Reg. vii, 3.

Ista sunt verba sanctissimi prophetæ Samuelis, in quibus ad duo hortatur nos. Primum est, ut corda nostra præparemus Domino Deo, id est, ad ejus caritatem et gratiam gratiosamque inhabitationem, seu gratiæ et virtutum augmentum, nos disponamus. Secundum est, ut soli Deo altissimo serviamus : quod intelligendum est de patriæ servitute, quæ soli Deo debetur. Latratria namque est virtus quæ Deo cultum cærimoniamque impendit. Unde in Deuteronomio habetur : Dominum Deum tuum timebis et ipsi soli servies. Tertio, in verbis præinductis tangit Samuel fructum seu utilitatem proveniente[m] nobis ex Dei obsequio, quia liberabit nos de manibus inimicorum nostrorum, videlicet invisibilibus hostium, de quibus ad Ephesios legitur : Non est nobis colluctatio adversus carnem et sanguinem, sed adversus principes et potestates. Istud idem docet in D evangelio hodierno Salvator, dicendo : Nemo potest duobus dominis servire ; itemque, Non potestis Deo servire et mammonæ. In quibus verbis hortatur nos ut soli Domino serviamus.

Sed his objici potest, quia videmus quo-

tidie quod multi homines quibusdam mortalibus subiacent vitiis, et tamen serviunt Deo, audiendo Missas, orando, jejunando, eleemosynas dando et dies celebrando festivos : imo a multis abstinere peccatis mortalibus, Dei intuitu ac timore. Sunt quippe nonnulli qui licet simplicem fornicationem non vitent, adulterium tamen committere nolunt. Quidam etiam quamvis propria bona cupide servant, aliorum tamen bona non cupiunt. Et respondendum, quod nullus in mortali existens peccato vere ac proprie servit Deo. Nunc enim sermo est de servitute Dei quæ est actus virtutis et meritorium opus ex caritate procedens. Qui autem in mortali est culpa, nullam habet virtutem quoad perfectam rationem virtutis, nec caritatem. Unde qui in mortalibus sunt peccatis, non nisi improprie Deo servire dicuntur. Non enim obediunt Deo, quoniam ejus præcepta non implent eo modo quo Deus ea jubet impleri, puta ex caritate et recta intentione ad gloriam Omnipotentis, nec vitant peccata ex caritate aut filiali timore, sed servili formidine aut naturali Dei amore. Dicuntur tamen Deo servire, in quantum faciunt quædam opera bona ex genere, et quoad substantiam facti videntur implere præcepta, honorando parentes, Deum verum solummodo adorantes, non

jurantes, non occidentes ; verumtamen A quum spiritualiter mortui sint, nihil efficiunt Deo acceptum atque æternæ meritum vitæ.

Denique jam pensandum qualiter debeat homo præparare cor suum Deo, et quid sit soli Deo servire. Ad quæ respondendum est, quod Deo cor præparare, est ea a se remove per quæ ineptus est et indignus ad caritatem et gratiam Dei, ad dona Spiritus Sancti, ad salutarem unionem mentis suæ cum proprio Creatore. Hæc autem non sunt nisi peccata mortalia, quæ, Isaia B testante, dividunt inter Deum et nos, atque ut loquitur Jeremias, prohibent bonum a nobis, id est, a susceptione charismatum Spiritus Sancti impediunt corda nostra. Itaque cor Deo parare, est mentem a peccatis purgare : quod facit peccator, de suis peccatis dolendo et eadem confitendo, pro eis quoque satisfaciendo, et cavendo ea in posterum. Iterum cor Deo parare, est illud ad gratiam et virtutes disponere, et se Deo pro viribus applicare, dando se ad opera Deo complacita. Ad C quod etiam beatissimus Christi præcursor admonuit, dicens : Parate viam Domini, rectas facite semitas Dei nostri. Hinc scriptum est : Ponite corda vestra super vias vestras ; id est, opera vestra considerate an sint virtuosa, an vitiosa : quatenus si virtuosa sint, perseveretis ac proficiatis in eis ; si vitiosa, pœniteatis ac emendetis.

Præterea istud est quod in evangelio isto docet nos Unigenitus Dei. Docet enim primo, ut avaritiam fugiamus ; secundo, ut sollicitudinem immoderatam temporalium D rerum abjiciamus ; tertio, ut primo quæramus regnum Dei et justitiam ejus, sicque confidamus in Deo quod temporalia necessaria nobis adjicientur. Qui autem hæc agit, soli utique Deo servit, quia non servit carni, nec mundo, neque diabolo. Quidam etenim serviunt carni, ut gulosi et luxuriosi, quoniam carnis suæ concupiscentiis magis obediunt quam Dei præceptis : imo Dei præcepta transgredi non verentur, quatenus vilissimæ atque fœdis- simæ carnis suæ desideriis satisfaciant scelerate. De quibus ait Apostolus : Qui in Rom. viii, 8. carne sunt, scilicet, carnalibus desideriis acquiescunt, Deo placere non possunt. Alii serviunt mundo magis quam Deo, sicut avari, qui transitoriis rebus et terrenis divitiis, magis quam Deo, cordis sui affectum conjungunt, et magis solliciti sunt, magis cogitant et conantur terrena ac peritura acquirere, conservare, augere, quam Deo placere, quam divina præcepta implere, quam salutem adipisci æternam. Quorum fatuitas est immensa ; et mirum quod cor hominis obtenebrari sic potest. Isti advertant quod divinus ait Apostolus : Qui I Tim. vi, 9. volunt divites fieri, incidunt in tentationem et laqueum diaboli, et in desideria multa, mala et inutilia, quæ mergunt hominem in perditionem.

Deinceps his avaris valde timendum est illud Ecclesiastici : Avaro nihil est scelestius, nihil est iniquius quam amare pecuniam ; avarus enim animam suam habet venalem. Sed quæri potest, cur avarus dicatur animam suam habere venalem. Et respondendum, quod ideo, quia pro nummo vendit eam ac tradit diabolo. Dum enim ad lucrum seu nummum in tantum afficitur, quod ejus desiderio mentiri aut perjurare, decipere, et dies festivos violare sive infringere, aut alio modo præceptum Dei vel Ecclesiæ transgredi non veretur, quid aliud operatur, nisi quod diabolo animam propriam tradit venditque ?

Deinde quanta et quam horribilia vitia ex avaritia generentur, pandit Augustinus, dicendo : Quæ est ista aviditas avaritiæ, quum et ipsæ bestiæ habeant modum ? Tunc enim rapiunt quando esuriunt, parcuntque prædæ dum sentiunt saturitatem. Insatiabilis est sola avaritia hominum : rapit, nec satiatur ; nec Deum timet, nec hominem reveretur ; nec patri parcit, nec matrem agnoscit ; nec fratri obtemperat, nec fidem amico servat ; viduam opprimit, pupillum invadit, liberos in servitium revocat ; testimonium falsum profert, mentitur, perjurat, mortuorum res occupat. Quæ

Is. lxx, 2.

Jer. v, 25.

Matth. iii, 3.

Agg. i, 5.

Matth. vi, 24-33.

Eccli. x, 9, 10.

est ista animarum insania, amittere vitam gratiæ, appetere mortem culpæ, acquirere aurum, et perdere cælum?

Alii serviunt diabolo, ut superbi, qui *Job xli, 25.* diabolum omnium regem superborum specialiter imitantur. Nam primum peccatum diaboli fuit superbia, et usque ad præsens manet in ea, non obstante omni sua miseria. Sic superbi, non obstante quod tot vilitatibus et foeditatibus pleni sunt in corpore et anima, quod tot peccatis gravantur, quod tot periculis æternæ sunt damnationis expositi, imo inferno jam proximi, utpote in statu damnationis lamentabiliter constituti, nihilo minus insensati et excæcati, tument, extolluntur, seque honorabiles arbitrantur, quum omni sint luto et stercore viliores ac turpiores. *Eccli. x, 7.* Merito ergo ait Scriptura : Odibilis coram Deo et hominibus est superbia.

Præterea, istud quod dictum est, quosdam servire carni, aliquos mundo, et quosdam diabolo, intelligendum est per quamdam appropriationem. Certum est equidem quod quicumque mortaliter peccat, servit diabolo. Idcirco gulosi, luxuriosi, avari, et omnes iniqui, dæmonibus serviunt; sed per appropriationem præactam, gulosi et lubrici servire dicuntur carni, avari mundo, superbi diabolo. Sed, proh dolor! multi jam sunt qui tam carni quam mundo atque diabolo obsequuntur, quoniam universis vitiis jam præactis ac aliis multis replentur. Isti pluribus serviunt dominis quam duobus : imo tot dominis serviunt ac subduntur, quot peccata committunt, et quot pravis desideriis devincuntur. O quanta est vilitas, turpitudine et immunditia iniquorum! Certe nulla mundi cloaca tam turpis et foetida est coram hominibus, ut anima transgressoris coram oculis Creatoris. Unde ergo superbis, vas putridum, mancipium vitiorum, serve diaboli, qui infelicissime servis tam multiplici culpæ mortali? Verum, ut ait Apostolus, carnalis homo non sapit ea quæ sunt Spiritus Dei; stultitia enim est illi. Quum enim iniquorum atque carnalium hominum corda sint

A plena vitiorum foetore, immunditiarum amore, pravitatis obliquitate, carnalis ac sæcularis prudentiæ stoliditate, introire in ea vix potest odor virtutum, puritatis dilectio, justitiæ rectitudo, sapientiæ splendor. Verumtamen de eis desperandum non est, quia converti possunt. Propter quod clamat ad eos Isaias propheta : Redite, prævaricatores, ad cor, hoc est, considerate vos ipsos, peccata vestra perpendite, quanta vobis instet damnatio intuemini, et horrete. *Is. xlii, 8.*

Nunc ergo, juxta Christi doctrinam, soli Deo altissimo placere ac deservire conemur, avaritiam et sollicitudinem terrenorum immoderatam jugiter detestemur, et spirituali amore diligamus nos ipsos ac alios. Multi quippe filios suos ac filias, propinquos ac ceteros carnaliter ac mendaciter diligunt, dum eis temporalia bona colligere non desistunt, ut in hoc mundo ditentur, honorentur ac prosperentur : per quod se ipsos ac illos infernalibus parant tormentis. Unde legitur, quod fuit quidam dives avarus filios habens duos, quorum unus nolens patri succedere in divitiis periculose adeptis, factus est eremita. Alius filius mansit cum patre, cupiens ei in hereditate succedere : quod etiam factum est. Defunctoque patre, defunctus est post modicum tempus et filius ejus iste. Quo cognito, contristatus est eremita, timens de patris sui ac fratris damnatione æterna; oravitque Dominum, ut patris ac fratris sui statum sibi ostendere dignaretur. Benignissimus vero Deus preces sanctissimi eremitæ celeriter exaudivit : nam raptus est ille eremita, atque in spiritu ductus est ad infernum. Ubi quum non invenisset patrem suum ac fratrem, exspectavit paulisper; et protinus vidit patrem suum exeuntem de quodam puteo infernali sulfureo, et statim post hoc de eodem puteo vidit fratrem suum egredientem. Vidit quoque quod pater suus et filius ejus ille damnatus se invicem mordebant et affligebant, litigando dicentes mutuo impropertoria verba. Pater equidem filio dixit : Maledictus sis tu, quia ut te ditarem ava-

rus fui. Filius econtrario dixit ad patrem : A socii sunt in tormentis, et quod qui in vita Maledictus sis tu, quia nisi temporalia illa præsenti magis se invicem amant carnali mihi reliquisses, damnatus non essem. Ex amore, postea magis se odiunt in infernali quo constat quod qui socii sunt in culpis, ardore.

SERMO TERTIUS

DE VARIIS CAUSIS VITANDI AVARITIAM SOLLICITUDINEMQUE SUPERFLUAM,
ET DE MULTIPLICI INSIPIENTIA AVARORUM.

PPRIMUM quærite regnum Dei et justitiam ejus, et hæc omnia adjicientur vobis. Matth. vi, 33.

Quemadmodum Paulus ait apostolus, II Cor. viii, 9. Propter nos Christus egenus factus est, ut ejus inopia, id est merito suæ paupertatis, nos divites simus : divites utique spirituali opulentia, ita ut in vita præsenti abundemus in charismatibus gratiæ ac virtutum, in futuro autem donis gloriæ in æternum. Quia etenim Filius Dei venit in mundum hunc, ut ab amore rerum præsentium transferret nos ad amorem cœlestium, æternorum ac divinorum, ideo verbis et factis talem edocuit vitam per quam homines magis apte atque faciliter ad æternam possint pervenire salutem : hoc est vitam purissimam, humillimam, itemque pauperrimam, quia superbia et avaritia ac incontinentia a cœlestis regni introitu præsertim impediunt homines. Hinc præsenti in evangelio Christus specialiter avaritiam ac superfluum reprobatur circa temporalia curam.

Ad omnem itaque Christianum præcipue spectat avaritiam sollicitudinemque calcare superfluum. Primo, quoniam Christus, magister, dominus ac judex noster, hoc docuit et præcepit : cujus doctrinis acquiescere, cujus præceptis obedire tenemur. Imo multiplici ratione Christus id persuasit, sicut in evangelii expositione ostensum est.

Joann. xiv, 6.

Secundo, quoniam Christus, qui est via,

veritas et vita, omniumque Christianorum exemplar, pauperrimam in hoc mundo vitam elegit, secundum quod ipse testatur : Vulpes terræ foveas habent, et volucres cœli nidos ; Filius autem hominis non habet ubi caput reclinet. Hinc ait Bernardus : Filius Dei in hunc mundum descendens, paupertatem elegit, ut sua æstimatione eam nobis faciat pretiosam. Descendit ab inenarrabilibus cœli divitiis, atque in tanta paupertate advenit, ut natus mox in præsepio poneretur. Et vere magna nimisque magna abusio, ut dives esse velit vermiculus vilis, propter quem pauper fieri dignatus est Dominus majestatis. Matth. viii, 20.

Tertio, quoniam quanto lex evangelica, ad cujus observantiam omnes Christiani tenentur, est spiritualior, perfectior atque divinator omni aliarum gentium lege, tanto Christiani præ ceteris gentibus spiritualiores et magis perfecti ac divini consistere debent, bona carnalia et terrena despiciendo, cœlestia vero et æterna desiderando. Ideo Christus dixit : Estote perfecti sicut Matth. v, 48. et Pater vester cœlestis perfectus est ; itemque, Nolite thesaurizare in terra. Quum Ibid. vi, 19. ergo in evangelica lege beatificetur paupertas, et voluntarie pauperibus pro hujus brevissimæ vitæ spontanea inopia promittantur regni cœlestis deliciæ, Christo dicente, Beati pauperes spiritu, quoniam Ibid. v, 3. ipsorum est regnum cœlorum ; hinc non vere christianum, sed magis paganum se esse demonstrat, qui toto affectu temporali-

bus inhiat, qui magis conatur temporalibus abundare quam gratiæ ac virtutum beneficiis decorari, qui plus nititur in præsentiditari quam in cœlestibus coronari. Sed heu, quam multi sunt tales! Dicit jam potest de populo christiano quod Jeremias de Judæorum ait populo : A minori usque ad majorem, omnes avaritiæ student. Verumtamen tales sciant se nomine, non virtute, christianos, atque præ ceteris gentibus longe damnabiliores.

Quarto, quia divitiæ sunt homini innumerabilium culparum occasio. Videmus namque quod homines quanto sunt ditiores, tanto communiter sunt animosiores; ex divitiarum quoque abundantia procedunt vitia gulæ atque luxuriæ, otiositas, loquacitas, pompa in vestibus, pluraque alia mala. Itaque quanto homines plures congregant sibi divitias, tanto plurium vitiorum occasiones sibi procurant, et plura salutis impedimenta sponte assumunt. Hinc ait Salvator : Deceptio divitiarum, et circa reliqua concupiscentiæ introeuntes in cor, suffocant verbum Dei, et sine fructu efficitur. Denuo quoque : Væ (inquit) vobis divitibus, qui habetis consolationem vestram. Deinde, quam verissima hæc sint, constat ex eo quod Unigenitus Dei fateatur : Quam difficile qui pecunias habent, intrabunt in regnum cœlorum! Et rursus ait ibidem : Amen dico vobis, facilius est camelum per foramen acus transire, quam divitem intrare in regnum cœlorum. Quum ergo valde difficile sit divitiis abundare, nec eas immoderanter amare, neque superflue eis uti, certum est quod homines imperfecti et in virtutibus nondum exercitati, maximis æternæ damnationis periculis se involvunt, atque innumerabilium vitiorum occasionibus se exponunt, dum temporalibus rebus abundare nituntur, et divitias congregare seu conservare quotidie moliantur.

Quinto, quia immoderatus amor temporalium rerum et sollicitudo superflua circa eas, impediunt hominem a spirituali profectu virtutum, a contemplatione divi-

norum et a divino amore. Ideo dicit Gregorius : Avaritia mentem facit tam gravem, ut ad appetenda cœlestia attolli non possit. Et Christus in Evangelio protestatur : Ubi est thesaurus tuus, ibi est et cor tuum. Unde probatur quod quando deorsum sunt quæ amantur, tunc cor ad inferiora deprimitur; dum vero sursum sunt quæ diliguntur, cor ad superiora erigitur : præsertim quum asserat Augustinus, Anima verius est ubi amat, quam ubi animat.

Sexto, quia ad Christianos potissime spectat filialem habere amorem ad Deum, et de ejus bonitate, caritate ac providentia plenam habere fiduciam. Idcirco non debent pro temporalibus nimis sollicitari, quasi Deus non habeat providentiam actuum humanorum. Hinc in evangelio hodierno ait Salvator : Scit Pater vester cœlestis quia his omnibus indigetis.

Insuper multæ sunt stultitiæ avarorum. Prima, quod abundanter sibi præparant de necessariis et utilibus in loco ubi (comparative loquendo) per unam horam vixerunt, et non provident sibi de necessariis in loco ubi æternaliter permanebunt. Hæc enim vita comparatione vitæ futuræ momentum est. Et in hac vita præparant sibi avari cibaria, habitacula, vestimenta ultra mensuram; in futura vero vita nil præparant sibi accommodum, sed æternæ damnationis supplicium. Aguntque stultius quam si quis uno die habitaturus in Francia, et centum annis in Italia, faceret sibi ædificia multa et magna, provisiones accopias grandes in Francia, nihil vero ædificaret, nec provideret sibi in Italia. Secunda eorum fatuitas est, quod sollicite provident corpori suo et animam propriam negligunt, quum tamen anima incomparabiliter corpore exstet præstantior. Sicque stolidius agunt quam si quis auro purissimo præferat lutum vilissimum. Tertia eorum insipientia, quod quanto plus morti propinquant, tanto plus temporalia sibi accumulare nituntur, quasi tanto diutius essent victuri, quanto magis senescunt. Videmus enim quod in senescen-

Jer. vi, 13.

Matth. vi, 21.

Marc. iv, 19.

Luc. vi, 24.

Marc. x, 23, 25; Matth. xix, 23, 24.

C

D

tibus ac senibus avaritia crescit. Quarta, quoniam ultra modum se onerant, atque pro eo quod de onere debent minuere, augment illud tamdiu quousque cadant sub eo, et opprimantur ac pereant. Quid enim sunt temporalia ista nisi onera magna, quibus annexæ sunt variæ curæ, timores, distractiones, inquietudines? Ideo dicit Hieronymus : Avaro tam deest quod habet, quam quod non habet, quia aut non habita concupiscit ut habeat, aut habita metuit ne amittat; et dum in adversis sperat prospera, in prosperis formidat ad-versa. Iterum ait : Avarus hic ardet æstu concupiscentiæ ac multiplici cura custodiæ rei terrenæ, postmodum vero ardebit igne gehennæ. Si potentio rem videt, timet raptorem; si infirmio rem, suspicatur furem. Infelix tanta patitur, quanta pati timet.

Præterea, sicut Thomas scribit in seq. LV, a. 6. cunda secundæ, sollicitudo temporalium rerum fit tribus modis illicita. Primo, ex parte rerum de quibus quis sollicitatur, videlicet dum in temporalibus rebus adipiscendis aut conservandis aliquis sibi finem constituit, inhærendo eis per cordis affectum magis quam Deo. Avarus equidem magis afficitur circa nummum quam circa Deum, nec curat Deum amittere per juramenta, mendacia ac alia vitia, dummodo queat adipisci pecuniam. Ecce quanta est avari insania. Secundo fit sollicitudo ista illicita, propter superfluitatem conatus seu studii circa ea : sicut dum aliquis tantum circa illa insistit ac nititur, quod a spiritualibus et a bonis operibus ad quæ obligatus est, impeditur. Tertio, ratione timoris superflui quo homo nimis veretur temporalia sibi posse deficere, etiamsi Deo debite obsequatur : et hoc Christus in evangelio isto multipliciter reprobatur, ut in expositione patuit textus. Verum loco et tempore opportuno moderate sollicitari pro temporalibus necessariis congregandis aut conservandis, ordinando ea ad spiritualia bona, licitum est atque laudabile.

Postremo, multa sunt remedia contra

A avaritiam sollicitudinemque superfluam. Primum est consideratio paupertatis Christi in sæculo isto. Non enim est servus Joann. XIII, 16. major domino suo. Secundum est consideratio brevitatis et incertitudinis vitæ præsentis, in qua modica possunt sufficere, dicente Boetio : Natura paucis minimisque contenta est. Ideo dicit Gregorius : Longa nostra desideria increpat brevis vita. Tertium est consideratio periculorum ac vitiorum quæ homo ex temporalibus incurrit, præsertim dum abundat in eis, quod scilicet tam difficile est locupletem salvari : quia secundum Hieronymum, impossibile est nunc gaudere cum mundo, et postmodum regnare cum Christo. Quartum est consideratio multiplicis fructus quem homo acquirit contemnendo divitias, quia per hoc Dei gratiam in præsentem et gloriam promeretur æternam, multaque vitia et pericula summa evadit.

Itaque, juxta Salvatoris doctrinam, primo quæramus « regnum Dei », ut scilicet Matth. VI, 33. omnia quæ agimus, ad Dei honorem et gloriam ac nostram æternam beatitudinem ordinemus : et expedit omni die actualiter omnia taliter ordinare etiam sæpe. Et antequam ad exteriora agenda quis trans-eat, quærat « justitiam » regni cœlestis, id est, aliqua opera spiritualia virtuosa exerceat, orando, Deum laudando, et Missam, si potest, audiendo. Sed in isto sunt multi vehementissime reprehendendi : nam quasi bestię surgunt, et statim ad exteriora cor suum effundunt, et vix unam legunt Orationem dominicam ; sic quoque vadunt dormitum absque memoria Dei, sine examinatione conscientiæ suæ, et absque invocatione pietatis divinæ pro remissione culparum diei præteritæ ac totius vitæ elapsæ. Ideo juxta prædicta quilibet se emendet, et circa spirituales animæ suæ divitias, hoc est virtutes et meritorias actiones, maxime sollicitetur, ne eas amittat, ne Deum offendant, ne sempiternam perdat salutem.

Refert Hieronymus de Socrate philosopho, quod in juventute sua volens ire ad

studium, et videns se non posse habere aurum ac sapientiam adipisci, magnam auri massam projecit in mare, dicens : Malo dominari tibi, quam quod tu domineris mihi. Sanctus quoque Antonius dum perrexit ad eremum, invenit in via copiosissimum ac splendidissimum aurum, et cursum arripiens, cum omni festinatione fugit ab eo tanquam a colubro. Sic et B. Franciscus in tantum sprexit pecunias, quod etiam tactum earum universis sui Ordinis prohibuit Fratribus.

AD RELIGIOSOS

SERMO QUARTUS

DE MULTIPLI PERFECTIONE AD QUAM POTISSIMUM OBLIGANTUR RELIGIONUM PROFESSORES.

ALTER alterius onera portate. Galat. vi, 2.

Quam sancta et exemplaris ac irreprehensibilis esse debeat, et in primitiva Ecclesia fuerit omnium conversatio Christianorum, ex hodiernæ epistolæ perpenditur documentis, quæ non solum religiosis, sed universis scripta ac jussa sunt Christianis. Ut enim devotissimi patres Cassianus Climacusque testantur, talis esse debet vita cujuslibet Christiani, ut quicumque eam diligenter conspexerit, fateri cogatur legem illam esse divinam et sanctam, quæ talem instituit vitam. Ad hanc quoque vitæ perfectionem gloriosissimus apostolici agminis princeps omnes generaliter hortatur Christianos, dicendo : Hæc est voluntas Dei, ut benefacientes obmutescere faciatis imprudentium hominum ignorantiam. Itemque : Conversationem (inquit) vestram inter gentes bonam habentes, ut in eo quod detrectant de vobis tanquam de malefactoribus, ex bona conversatione vestra vos considerantes, glorificent Deum. Si ergo ad omnes hæc pertinent Christianos, quanto magis ad religiosos, quos utique in omnibus istis virtutibus et exercitiis sanctis abundare oportet, prout eorum requirit professio ?

Porro, quod hæc ita se habeant, ex

processu doctrinæ præsentis epistolæ innotescit. In cujus exordio ait Apostolus : Si spiritu vivimus, spiritu et ambulemus ; hoc est, si vere spiritualiter vivimus intus per gratiam, rectæ rationis judicium et Spiritus Sancti sequendo instinctum, studeamus etiam foris spiritualiter, hoc est virtuose et exemplariter, conversari. Ecce his verbis docet Apostolus ut non dumtaxat coram Deo in sinceritate conscientiae conversemur, sed et coram proximis ædificatoria operemur : quoniam Deo debemus bonam conscientiam, proximis bonam famam. Ideo alibi dicit Apostolus : Providentes bona non solum coram Deo, sed etiam coram omnibus hominibus. Et Christus in Evangelio : Luceat (inquit) lux vestra coram hominibus, ut videant bona facta vestra, et glorificent Patrem vestrum qui in cœlis est. Ex quibus patet error eorum qui pro aliquo verbo aut facto scandalizante correpti, eo quod alii conquerantur de ipsis, respondent se non curare quidquid de ipsis homines dicant, dummodo coram Deo bene se habeant, quasi aliquis sine Dei offensa possit proximis scandalum aut obicem ponere, quum tamen Ecclesiasticus scripsit sic : Unicuique mandavit Deus de proximo suo. Et Salvator in Evangelio : Væ (inquit) homini

1 Petr. ii, 15.

Ibid. 12.

Galat. v, 25.

Rom. xii, 17.

Matth. v, 16.

Eccli. xvii, 12.

Matth. xviii, 7.

Matth.
xviii, 6, 10.

per quem scandalum venit; item, Videte ne scandalizetis unum de pusillis istis. Intus ergo coram Deo vivamus per caritatem et gratiam, ceterarumque virtutum actus interiores elicitos, in Deum credendo, sperando, et proximis compatiendo. Coram proximis quoque vivamus per exteriores actus virtutum, per mores venustos, per refrenationem linguæ ac sensuum, per executiones præceptorum exercitiorumque Ordinis, ut verbis et factis ac moribus ædificemus confratres nostros. Nempe qui negligit famam, crudelis est, quum lædat non solum se ipsum, sed et proximos suos : et hoc totum divino contrariatur honori.

Sed quia tam virtuose ac irreprehensibiliter conversantes, solent vana gloria tangi et complacentiam in se ipsis habere inanem, recte post verba præmemorata subiecit Apostolus : Non efficiamur inanis gloriæ cupidi, ne scilicet optemus ab hominibus honorari aut reputari. Et hoc

Galat. v,
26.

Matth. vi,
1.

est quod præcipit Christus : Videte (inquiens) ne justitiam vestram faciatis coram hominibus, ut videamini ab eis. Sed circa hoc quæri potest, quomodo ista stent simul. Non enim possumus habere propositum ædificandi proximos, nisi intendamus eos inducere ad bene sentiendum de nobis : ergo oportet ut optemus reputari ab eis, præsertim quum Scriptura hortetur, Curam habe de bono nomine. Et respondendum, quod ista stant simul, quia debemus velle boni reputari et bene de nobis sentiri, in quantum hoc cedit ad Dei honorem, atque necessarium exstat ad proximorum ædificationem, non autem in quantum hoc cedit ad nostram magnificationem, commoditatem aut venerationem. Imo in quantum in nobis est, debemus potius velle ab omnibus vilipendi, sperni et conculcari : sic tamen ut propter hoc nil indecens aut scandalizativum agamus.

Eccli. xli,
15.

Itaque vanam gloriam odiamus, nec de collatis nobis desuper bonis laudem humanam, temporalem honorem, propriam

A excellentiam affectemus; sed quidquid boni in nobis est, Deo humillime adscribentes ac regratiantes, ejus honorem, laudem et gloriam in omnibus cordialissime cupiamus, ut ipse a nobis ac aliis debite honoretur, laudetur et extollatur. Quum enim a nobis ipsis non habeamus nisi deficere et peccare, et quidquid miseriæ est et contemptibilitatis; valde ingratum, impium et perversum censetur, de donis Altissimi, non ipsius sed propriam quærere gloriam et honorem. Imo propriam defectuositatem, ingratitude ac transgressionem rite pensantes, omni confusione, increpatione et adversitate reputemus nos dignos; omnem quoque injuriam, subsannationem, persecutionem nobis illatam patientissime toleremus, gratias Deo agentes quod in vita præsentī purgamur, et illud Judith dicentes ac adimplentes : Non ulciscamur nos pro his quæ patimur, reputantes peccatis nostris hæc ipsa supplicia esse minora.

Judith viii,
26, 27.

Insuper docet Apostolus ne invicem provocemus, hoc est, ne unus alium verbo C aut signo seu facto inordinato ad iram, impatientiam,urbationem aut quodecumque aliud provocet vitium : quia hoc esset alium directe scandalizare. Estque hoc tam divinæ quam fraternæ caritati contrarium. Caritas namque Dei requirit ut ipsimet Deum honoremus, atque ab aliis honorari optemus : cujus oppositum agit qui provocat alium, quum ipsemet Deum inhonoret peccando, et alium ad illicitum quo Deus offenditur trahere jam conetur. Denique qui alios provocat, coadjutor, instrumentum et servus est dæmonum, quorum summus conatus est homines ad peccata allicere. Constat quoque quod fraterna exigit caritas proximo benefacere, et nocumentum ac læsionem ipsius vitare. Quum ergo peccatum incomparabiliter nocivum et læsivum sit hominis, certum est quod proximum provocare ad culpam, sit caritati fraternæ omnino contrarium: quod etiam in divinis potissime est cavendum. Verumtamen est quædam provocatio bo-

Galat. v,
26.

Hebr. x, 24. na, de qua ad Hebræos fertur : Consideremus invicem in provocationem caritatis et bonorum operum. Ideo verbis et exemplis incitemus nos mutuo ad caritatis fervorem, ad spiritualem profectum, ad strenuam pugnam contra hostes nostræ salutis.

Præterea, quia in cupidis vanæ gloriæ, in superbis et ambitiosis, et provocatoribus aliorum, solet regnare invidia, monet Apostolus ne invicem invideamus. Invidia equidem est tristitia de bono alterius. Quod autem unus de alterius prosperitate, eminentia aut virtute tristatur, contingit ex hoc quod illum præcedere appetit, aut quod ille habet adipisci desiderat, vel certe, quia ab illo derideri, opprimi seu gravari se intuetur. Ideo Solon dixit : Non derideas aliquem, quia ex derisione generatur invidia. Quumque melancholici ex complexionis suæ malitia ad tristitiam invidiamque proclives sint, specialiter circa eos vitanda sunt ea ex quibus ad invidiam atque tristitiam faciliter inducuntur. Præterea, quanto plus religiosi ad sanctæ caritatis profectum tenentur, quanto ad mutuam dilectionem amplius obligantur, tanto plus ab omni invidia debent esse purissimi. Nec sufficit dicere, Diligo fratres meos, sed ea quæ caritatis et amicitiae sunt oportet fratribus exhibere, et quæ caritati et amicitiae repugnant cavere, secundum quod in prima sua Canonica ait Joannes apostolus : Non diligamus verbo neque lingua, sed opere et veritate. Est autem invidorum infelicitas magna ac summa miseria, quia non tantum merentur post vitam hanc in inferno æternaliter cruciari, sed etiam in præsentī corda sua dilaniant, quum Salomon dicat : Putredo ossium, invidia. Invidia siquidem est species quædam tristitiæ. Et Salomon veraci-

ter contestatur : Spiritus tristis exsiccat ossa; itemque, Sicut tineam vestimento, sic tristitia nocet cordi. Qui autem ad tristitiam et invidiam specialiter proni sunt, contra eas specialiter pugnent, Deum pro virtute et gratia eas vincendi rogando, seque ad caritatem ac spiritualem dulcedinem dando, nec etiam aliorum facta multum considerando, sed proprios intuendo ac deplorando defectus. Non ergo immittant se de impertinentibus sibi : et sic magis quiescent, ac minus amaricabuntur.

Postremo, quia in multis offendimus omnes, et unusquisque suos habet defectus, sapientissime monet Apostolus ut « alter alterius onera » portemus, hoc est, unus caritative ac pie supportet et patiatur defectum alterius, sive sit defectus naturæ seu gratiæ, quatenus sicut ipse in suis infirmitatibus atque defectibus cupit a Deo ac proximo supportari, sic et ipse suos portet confratres. Deus namque omnipotens, pius et sapiens, posuit nobis regulam benignissimam istam, ut scilicet taliter habeamus nos ad proximos nostros quemadmodum cupimus Deum habere se circa nos. Qui ergo circa fratres suos duri, amari, querulosi, vindicativi consistunt, quid restat nisi quod Deus circa eos se dure, vindicative terribiliterque habebit, ut impleatur in eis quod ait Salvator, Eadem mensura qua mensi fueritis, remetietur vobis ? Verumtamen non sic debemus alter alterius onera portare, ut fraternæ correptionis medelam negligamus proximis, dum culpabiles exstant, impendere, aut pro eorum salubri emendatione orare et nostram diligentiam facere; sed ut non moveamur ad iram, impatientiam, aut turbulentiam, sive invidiam, propter ipsorum defectus, imo caritative et pie compatiamur ac subveniamus eisdem.

Prov. xvii, 22.
Ibid. xxv, 20.

Jacob. iii, 2.

Galat. vi, 2.

Matth. vii, 2.

I Joann. iii, 18.

Prov. xiv, 30.

SERMO QUINTUS

QUOMODO SUBDITI A PRÆLATIS AD VIAM VIRTUTIS POST
LAPSUM SINT REVOCANDI, PRUDENTERQUE DIRIGENDI ; ET QUOMODO ILLI IPSI SUBDITI
HABERE SE DEBEANT.

FRATRES, si præoccupatus fuerit ho- **A** auxiliandumque aliis. Propter quod et in
mo in aliquo delicto, vos qui spiritu- Ecclesiastico dicitur : Memento iudicii *Eccli.*
ales estis, hujusmodi instruite in spiritu mei : sic enim erit et tuum. Mihi heri, *xxxviii, 23.*
lenitatis, considerans te ipsum, ne et tu
tenteris. Galat. vi, 1.

Deus justus, bonus et sapiens, unicui-
que secundum opera sua restituens, mise-
ricordibus misericordiam pollicetur : Beati *Matth. v, 7.*
(inquiens) misericordes, quoniam ipsi mi-
sericordiam consequentur. Immisericordi-
bus vero, duris et crudelibus per suum ait
Jacob ii, 13. Apostolum : Judicium sine misericordia ei
qui non fecerit misericordiam. Hinc in ho- **B**
dierna epistola, Vas electionis hortatur ut
viri spirituales in virtutibus exercitati at-
que in præliis tentationum experti, tentatis
et lapsis pie condoleant, non aspere indi-
gnentur, eosque instruant qualiter resur-
gere, emendare, et de cetero custodire se
ac repugnare tentationibus et peccatis de-
beant universis ; istudque faciant animo
mansueto cum magna discretione, juxta
dispositionem et capacitatem eorum qui-
bus loquuntur, et cum humilitate, consi-
derando propriam fragilitatem, præsertim **C**
si deserantur a gratia, ne et ipsi tententur
tentatione prædominante ac dejiciente.
Quam tentationem mererentur incurrere,
si tentatis et lapsis non condolerent ac sub-
venirent humiliter. Quemadmodum enim
meretur homo misericorditer adjuvari ac
conservari a Deo, aliis misericordiam im-
pendendo, præsertim tentatis, afflictis et
lapsis ; sic ad tales indignanter et aspere
se habendo, meretur a Deo relinqui et
tentationibus vinci. Itaque propriæ defe-
ctuositatis et culpæ consideratio incitat **D**
hominem prudentem ad compatiendum
abundantiori absorbeatur tristitia, sed ad
pristinum redeat gradum, atque de cetero
cautior perseveret. Aliqui vero peccant non
ex tali præoccupatione, sed ex deliberatio-
ne, ex habitu vitioso, ex proposito, ex usu
iniquo, ex certa malitia : qui sunt durius
arguendi, et in spiritu æquitatis discipli-
nandi. Præoccupati autem in malo qui do-
ciles convertibilesque consistunt, mititer
sunt tractandi, nisi forte causa exercitatio-
nis aliter fiat cum discretione. Nam, ut Pro-
sper testatur : Leniter reprehensus exhibet
reverentiam castiganti ; asperitate vero im-
moderatæ reprehensionis offensus, nec in-
crepationem recipit, nec salutem. Ambro-
sius quoque : Plus (inquit) proficit amica
corruptio, quam reprehensio turbulenta ;
illa pudorem, hæc indignationem produ-
cit. Verum, ut ait Isidorus : Qui secrete
admonitus de peccato, emendare se negli-
git, publice arguendus est ; et vulnus quod
secreta reprehensione curari non potest,
publica redargutione curandum est. Ma-
nifesta peccata non sunt occulta corre-
ptione purganda, sed manifeste sunt in-
crepandi qui publice peccant, ut dum illi

aperta objurgatione curantur, hi qui eos A in hoc ipso peccaret. Omnino enim oportet ut præsident tantæ sit perfectionis, ut sua bonitate, aliorum malitiam, sua humilitate, mansuetudine, patientia, caritate et sapientia, aliorum (maxime sibi commissorum) superbiam, iram, impatientiam, aversionem, imprudentiam possit vincere et curare : alioqui non bonus neque idoneus est medicus animarum.

1 Tim. v, 20. ad Timotheum Apostolus : Peccantes coram omnibus argue, ut ceteri timorem habeant. Qui etenim publice peccat, aliis præbet peccandi audaciam, et scandalizando nocet communitati : idcirco dum publice corripitur ac debite castigatur, alii a peccandi audacia retrahuntur, et communitatis saluti prospicitur, communique paci sagaciter providetur.

Deinde ista præoccupatorum in aliqua culpa instructio ad præsidentes potissime pertinet. Ideo spiritualis pater religiosorum, si aliquem viderit contra se aut alium quemquam esse tentatum aut in aliquam culpam notabilem lapsum, debet celerius quo poterit tentatum illum pie accedere, mansuete instruere, ad virtutis viam reducere. Et si viderit expedire, potest aliquem ex Fratribus virum discretum et timoratum mittere ad tentatum sic instruendum ; et ille Frater ad tentatum C directus, fideliter et discrete se habeat, ea dumtaxat loquendo quæ ad tentationis sedationem et Fratris curationem possunt conferre. Quod si forte inter præidentem et Fratrem tentatum causa vertatur, ita quod tam præidentem quam tentatus aliqua dura de se invicem ad Fratrem intermediantem loquantur, non oportet ut Frater ille medians narret ambobus quid de se invicem sunt locuti, quia per hoc interdum augetur tentatio ; sed duriora verba transiliens, quæ ad pacem expediunt hinc D inde denuntiet. In qua re magna opus est discretionem. Si autem intermedians fuerit injuste et fecte se habens, et tentatum contra præidentem magis inflammans, sive econtra, diabolicum crimen committeret. Conformiter, si is qui præest, ex quadam durtia, indignatione, elatione aut zelo amaro nollet se tantum humiliare quod iret aut mitteret ad Fratrem tentatum, sed eum in sua inquietudine per dies et dies dimitteret, non mediocriter

in hoc ipso peccaret. Omnino enim oportet ut præsident tantæ sit perfectionis, ut sua bonitate, aliorum malitiam, sua humilitate, mansuetudine, patientia, caritate et sapientia, aliorum (maxime sibi commissorum) superbiam, iram, impatientiam, aversionem, imprudentiam possit vincere et curare : alioqui non bonus neque idoneus est medicus animarum.

Hinc sanctus pater Benedictus, postquam in Regula sua expressit qualibus pœnis et quali excommunicationi debeat subjacere B qui aliqua graviore culpa devictus est, ut scilicet a mensa et oratorio suspendatur, nec aliquis Fratrum ei in aliquo jungatur consortio neque colloquio, deinde docet qualiter spiritualis pater circa recuperationem talis Fratris debeat esse sollicitus, dicens : Omni sollicitudine curam agat abbas circa Fratres delinquentes, quia non est opus sanis medicus, sed male habentibus. Ideo procedere debet omnino ut sapiens medicus, immittendo quasi occultos consolatores senipectas*, hoc est seniores sapientes Fratres, qui quasi secrete consolentur Fratrem fluctuantem, et provocent eum ad humilitatis satisfactionem, consolenturque eum, ne abundantiori absorbeatur tristitia, sed confirmetur in eo caritas, et oretur pro eo ab omnibus. Magnopere enim debet sollicitudinem gerere abbas et omni industria ac sagacitate curare, ne aliquam de ovibus sibi creditis perdat. Noverit enim se infirmarum suscepisse curam animarum, et boni pastoris imitetur exemplum, qui relictis nonaginta novem ovibus in montibus, abiit quærere unam ovem quæ periit : cujus infirmitati in tantum compassus est, ut eam sacris humeris suis dignaretur imponere, et sic reportare ad gregem. Ecce hæc beatissimi patris Benedicti verba omni spirituali patri sunt diligentissime intuenda ac observanda.

Insuper in præsentis dominicæ epistola ad humilitatem cohortatur nos Apostolus, dicens : Si quis existimat se aliquid esse quum nihil sit, ipse se seducit ; hoc est,

Matth. ix, 12.

* sympæctas

II Cor. ii, 7, 8.

Matth. xviii, 12.

Galat. vi, 3.

Habac. 11,
5.

qui se ipsum inaniter magnificat et extollit, quasi sit virtuosus aut a se ipso aliquid boni habens, se ipsum seducit, quoniam propria elatione cæcatur, et sibi ipsi maxime nocet superbia sua. Unde Habacuc ait : Quomodo vinum potantem decipit, sic erit vir superbus, et non decorabitur. Quemadmodum enim vinum suaviter intrat, sed paulo post venenum diffundit et mordet ut regulus ; sic vana gloria, propria complacentia, stulta elatio, falsa sui ipsius reputatio, quasi dulciter animum ingrediuntur, sed nisi mox extrudantur, B instar basilisci inficiunt mentem, et omni virtutum privant decore. Idcirco se ipsum bene examinet homo, et inveniet se ærumnosum, defectuosum, periculis undique circumvallatum. Qui autem caritate et gratia caret, spiritualiter nihil est.

Amplius, docet Apostolus ut qui informantur ab aliquo de pertinentibus ad salutem, grati sint suo instructori, et ei vicem rependant. Hinc religiosi suum spiritua- lem patrem, a quo quotidie salubriter instruuntur, debent specialiter valde dili- gere, honorare, et si ex humana fragilitate in aliquo forsitan defectuosus fuerit, sup- portare, nec ei faciliter indignari et esse

A molesti. Hinc alibi dicit Apostolus : Qui bene præsumt presbyteri, duplici honore digni habeantur, maxime qui laborant in verbo ; et denuo : Rogo vos, fratres, ut noveritis eos qui præsumt vobis et mo- nent vos, ut habeatis illos abundantius in honore ; propter opus illorum pacem habete cum eis. Nec solum superior, sed et quilibet doctior salubriter aliquem instru- ens et exhortans, ab illo est honorandus specialiterque amandus, tanquam benefa- ctor præcipuus. Propter quod vir sapiens quidam protestatur : Danti mihi sapien- tiam, dabo gloriam. Et Augustinus : Si me, inquit, posses docere quod nescio, non solum verbis corripientem, sed et pugnis cædentem deberem te patientissi- me sustinere.

Postremo hortatur Apostolus ut bene- facientes non deficiamus, sed incessanter atque ferventer Domino obsequamur, qui non deridetur, nec fallitur, sed omnia su- perclarissime intuetur, et unicuique se- cundum quod seminaverit, reddet. Idcirco dum tempus habemus, operemur bonum ad omnes, ad minus orando pro univer- sis, et opera misericordiæ, præsertim spi- ritualia, totis viribus exsequamur.

SERMO SEXTUS

DEO ET ANIMÆ PROPECTIBUS SERVIENDUM, NON CONCUPISCENTIIS CARNIS ; ET DE INUTILI TEMPORALIUM SOLLICITUDE ABIGENDA.

QUÆRITE primum regnum Dei et ju- stitiam ejus, et hæc omnia adjicien- tur vobis. Matth. vi, 33.

In evangelio hodierno, multis divinis- simis documentis instruit nos Salvator. Primo, quod non possumus simul finaliter inhærere summo et incommutabili bono et rebus creatis caducis. Oportet enim vel in summo bono constituere sibi finem, aut certe in rebus creatis. Quicumque au- tem super omnia diligit Deum, is in Deo

D sibi finem constituit : imo ipsemet Deus est ejus finis objectalis, et beatifica visio Dei est ejus finis formalis. Hinc itaque in evangelio isto asserit Christus, quod nemo duobus dominis possit servire. Quicumque autem in caritate et gratia stat, Deo ser- vit ; qui vero mortali subjacet culpæ, ser- vit diabolo, qui princeps mundi et rex filiorum superbiæ appellatur.

Caveamus igitur ne ad aliquid amplius quam ad Deum afficiamur. Imo quum ad

hoc etiam sæculares homines teneantur, nos religiosi, quorum non est circa communia languere, sed perfectioni studere, caveamus ne ad aliquid extra Deum immoderate aut inordinate afficiamur, sed solum et pure in Deo et secundum Deum et propter Deum optemus ac diligamus quidquid citra Deum cupimus et amamus : quia in tantum a puritate cultus divini impedimur atque discedimus, quantum ad aliquid qualitercumque inordinate aut immoderate afficimur, hoc est plus aut aliter quam illud nobis necessarium accommodumque consistit in ordine ad Deum, hoc est ad serviendum, complacendum inhærendumque Deo, ad unendum nos ei, ad proficiendum in ejus amore, quatenus omnia sub ordine divini ponantur amoris. Denique nec ad nos ipsos aliter quam hoc modo affici nobis licet, quia non aliter nisi in Deo debemus diligere nos ipsos, ut omnia illa æquanimiter operemur ac patiamur quæ nobis expediunt per respectum ad Deum, et ad proficiendum in ejus gratia in hac vita, atque in ejus gloriosa fruitione in patria. Et si aliter ad cibum, potum, vestitum, ad aliquem hominem aut ad quodcumque creatum, sive ad somnum, sive ad humanum solatium afficimur, jam a vera perfectione, a divini amoris sinceritate, a divini cultus puritate distamus et elongamur. Toto ergo et puro corde Deo adhæreamus ac obsequamur, ut cum Propheta ex sententia decantemus : Confitebor tibi, Domine, in toto corde meo.

Præterea, sicut duobus servire dominis non valemus, ita non possumus carni servire ac animæ, sensualitati et rationi. Gulosi autem, immundi, pigri, et mente mundani ac indevoti, serviunt suæ carni; et quantum quis de necessariis attinentibus corpori amplius cupit aut sumit quam rectæ convenit rationi ac suæ vocationi, in tantum suæ carni deservit. Sobrii vero, ferventes et spirituales serviunt animæ suæ atque spiritui. Et quia diabolus specialiter nominatur rex super omnes filios

A superbiæ, constat quod superbi ministrent diabolo. Est quippe superbia diabolicum crimen; et quanto quis plus de animositate et arrogantia habet, in tantum diabolo obsequi comprobatur. Abjiciamus ergo semen hoc maledictionis, superbiam vitæ, in qua omnis perditio sumpsit exordium. Tob. iv, 14. Quum enim lex Christi sit lex totius caritatis, pietatis et humilitatis, superbia summe indecens est atque illicita Christifidelibus universis: quanto magis religiosi, quos in cunctis virtutibus præfulgere oportet, qui et voluntatem propriam abjecerunt, ut nihil hujusmodi secundum propriæ cupiant voluntatis impulsus? Dicunt quoque doctores, B. Gregorium in hoc ipso sequentes, quod spiritualia vitia, ut superbia, invidia, acedia, graviora sunt, loquendo in genere, carnalibus vitiis, puta gula, luxuria, ira, quamvis luxuria in quantum est contra votum solenne, sit gravior elatione. Quo innotescit quam vigilantissime debeamus semper omnem animositatem, elationem, acediam, invidiam, et consimilia peccata, de nostri habitaculo cordis expellere.

Præterea, quia non potest quis duobus dominis deservire, docet ac jubet Salvator ne immoderatam habeamus sollicitudinem de necessariis vitæ præsentis : quoniam talis sollicitudo ex carnali amore et avaritia, aut simili vitiosa procedit radice, et ex diffidentia quadam providentiæ Creatoris, qui quum corpus et animam dederit, victum et vestitum sperantibus in se non negabit. Et ad hoc Christus, sapientia Patris, multas ac subtilissimas rationes in evangelio isto compendiosissime introducit. Si autem objiciatur, quod aliqui martyres fame extincti sunt, et multi justis maximas frequenter penurias sunt perpassi; dicendum, quod prædicta interdum ex dispensatione et ordinatione divina subtrahuntur electis ad probationem eorum, et meriti præmiique eorum augmentum permaximum. Salvator autem jam loquitur in communi, et ut frequentius evenit, quanquam Omnipotens, cujus sapientiæ non est finis, ex cognitis sibi causis in-

terdum in particulari aliter operetur ac A gant, ac plurima mala sequuntur ex eis. ordinet.

Præterea, nos religiosi, non obstante quod ex provisione superiorum nostrorum satis nobis de necessariis vitæ corporeæ ministretur, ita quod nullam habeamus rationabilem causam sollicitudinis circa hujusmodi, tamen sæpius ex carnalitate, negligentia et animi vanitate, cogitamus et sollicitamur de his quæ nobis pro refectione ministrabuntur, an sufficientia; satisque lauta, et sensualitati complacita erunt : quod prorsus inane et B stultum est, ac vacuæ mentis indicium. Rursus, quamvis paupertatem Deo promissimus, nihilo minus pro temporalium abundantia quandoque cupide occupamur, nec ab avaritia invenimur immunes. Unde et sæculares frequenter scandalizantur non parum in religiosis, in quibus omnium mundanorum contemptus et exemplaritas maxime resplendere deberent; atque in hac cupiditate ac avaritia superiores religiosorum videntur sæpe magis culpabiles. Hinc etiam, justo Dei moderante ac C permittente iudicio, magna multoties damna religiosis contingunt, a quibus, si ab omni avaritia se arcerent, Deus bonus, justus et sapiens, eos utique præservaret : et tunc essent hominibus cunctis magis amabiles, exempla, honorabiles et præclari, nec dubium quin et plura in eleemosynas eis darentur; nunc autem contemnuntur et blasphemantur a multis. Et revera ad præcavendum tot mala, ad promovendum tot bona, merito abstinerent omnes religiosi ab omni avaritiæ culpa, frugalitati ac par- D citati studentes, præsertim quum tenuitas victus et vestitus sit indispensabiliter de essentia religionis, et Apostolus dicat, Ab omni specie mala abstinete vos, et ipse Unigenitus Dei in tam extrema paupertate vixerit in hoc mundo. Experientia quoque frequenter edocuit, per temporalium abundantiam periisse devotionem observantiamque claustralem; sed et sollicitudo et cupiditas ista, perfectioni spei in Deo et caritatis sinceritati non mediocriter dero-

Postremo, in evangelio isto docemur ut omni cupiditate et immoderata sollicitudine abdicatis, primo ac principaliter quæramus regnum Dei, veram salutem, gratiarum charismata, spiritualem profectum; et temporalia huic vitæ necessaria nobis adjicientur. Sit ergo in nobis bona et spiritualis sollicitudo accumulandi spirituales et interiores divitias, exuberantiam meritorum, incrementa virtutum, affluentiam munerum supernorum; et ne Deum in aliquo offendamus, ne tempus aliquod infructuose pertranseamus, ne circumveniamur a Satana, ne frigescat in nobis caritas Dei dilectione fraterna, ne proximum scandalizemus, ne Deo inveniamur ingrati. Ecce quam solliciti sunt filii hujus mundi pro opulentia temporali, pro obtinendis bonis delectabilibus aut utilibus vel honestis vitæ præsentis, quæ existit tam incerta et brevis : quanto magis nos religiosi, pro opulentia spirituali, pro bonis vitæ futuræ æternaliter permansuræ, deberemus summe et incomparabiliter esse solliciti, sicut et sancti patres nostri fuerunt, qui in omni diligentia et fervore, in omni cordis custodia, sobrietate, et corporis castigatione ac moderamine somni, in profectu continuo, in profundissima humilitate, insuperabili patientia, indefesso labore, fidelissime servierunt Domino Deo suo.

Ipsorum ergo vestigia conemur saltem aliququaliter imitari. Et quo anima corpore exstat nobilior, et vita futura vita præsentis diuturnior, eo plus solliciti ac studiosi simus pro animarum nostrarum veris divitiis, internis refectionibus, spiritualibus consolationibus, cœlestibus sempiternisque gaudiis, quam pro necessariis vitæ præsentis; et simus custoditi in omnibus, in omni sensu et verbo ac opere, præsertim in divino Officio, et coram intraneis atque extraneis, ut omnes ædificentur in nobis, et nos ipsi cum illis de eorum ædificatione ditemur donis gratiæ in præsentis, et gloriosius coronemur donis gloriæ in regno cœlesti. Ad laudem et gloriam Dei. Amen.

Matth. vi,
33.

II Cor. ii, 11.

Matth.
xxiv, 12.

I Thess. v,
22.

Matth. viii,
20; *Zach.*
ix, 9.

DOMINICA XVI POST TRINITATEM

ENARRATIO IN EPISTOLAM

OBSECRE VOS NE DEFICIATIS IN TRIBULATIONIBUS MEIS PRO VOBIS.

Ephes. III, 13-21.

APOSTOLUS in præsentī epistola ad A patientiam atque constantiam nos hortatur, dicendo : *Obsecro vos*, id est, per sacra rogo (de obsecratione quid sit, et de eminentia ac efficacia ejus, dicta sunt multa in expositione epistolæ dominicæ secundæ post nativitatem Christi), *ne deficiatis*, id est, ne per impatientiam, pusillanimitatem tediumve frangamini, neque a bono opere desistatis, *in tribulationibus meis*, hoc est ex consideratione adversitatum et tribulationum quas patior *pro vobis*, id est ad vestram ædificationem ac probationem; vel, « pro vobis », id est pro prædicatione evangelicæ veritatis quam propter vos facio; *quæ res seu constantia est gloria vestra*, id est gloriosum meritum vestrum. Circa verbum istud plura essent dicenda, de quibus in sermone tangetur.

Hujus rei gratia, utpote, ut non deficiatis a bono propter adversa, *flecto genua mea*, id est, cum genuflexione oro, *ad Patrem Domini nostri Jesu Christi*, id est Deum Patrem æternum, a quo æterna generatione Unigenitus ejus manavit, *ex quo omnis paternitas in cælis et in terra nominatur*, hoc est, de cujus prima, summa atque verissima paternitate derivatur ac nomen paternitatis sortitur omnis paternitas angelorum et hominum : ita quod paternitas primo ac propriissime convenit Deo Patri, qui genuit Filium non solum

in natura similem, sed etiam sibi consubstantialē; ceteris vero convenit paternitas per aliquam imitationem paternitatis divinæ. Ex prædictis vero putandum non est quod in angelis sit proprie dicta paternitas, ita quod unus angelus alium vere produxerit; est tamen in eis quædam paternitas, qua superiores inferiorum patres dicuntur. *Ut det vobis secundum divitias gloriæ suæ*, id est secundum opulentissimam plenitudinem suæ perfectionis increatæ, videlicet prout opulentiam ac munificentiam ejus decet, non tamen secundum extremum posse omnipotentiae suæ : unde divitiæ gloriæ Dei, sunt immensa perfectio atque felicitas ejus penitus infinita; *virtutem corroborari*, id est fortitudinem mentis qua roboremur, *per Spiritum ejus*, id est a Spiritu Sancto, per inspirationem et motionem ipsius : ita quod Spiritus Sanctus est causa efficiens hujus gratiosæ confortationis; virtus autem infusa est causa formalis ipsius. Unde ad Hebræos scriptum est : Optimum est *Hebr. xiii,* gratia stabiliri cor. Hæc autem est confortatio spiritualis contra peccata ac dæmonum tentamenta. Ideo subditur, *in interiori homine*, id est in anima : quod est *habitare Christum per fidem* formatam in *cordibus vestris*. Christus namque est verus Deus, et in illorum cordibus commoratur, quiescit ac præsidet, qui ei per fidem caritate formatam uniti sunt, quem-

^{9.}

admodum apud Joannem Christus loquitur : Si quis diligit me, sermonem meum servabit, et Pater meus diliget eum; et ad eum veniemus, et mansionem apud eum faciemus.

Joann. xiv, 23.

Insuper sitis *in caritate* Dei ac proximi *radicati*, id est firmiter stabiliti, et *fundati* per rationes fortissimas propter quas diligendus est Deus primo et incomparabiliter, videlicet propter infinitam ipsius bonitatem, et quoniam prior dilexit nos, item propter beneficia ejus, et rursus propter promissa ipsius, deinde et proximus in Deo et propter Deum.

I Joann. iv, 10, 19.

Ut possitis comprehendere, id est sincere cognoscere, *cum omnibus sanctis*, id est, sicut sancti in via hujus exsilii Deo revelante seu illustrante cognoscunt, *quæ sit spiritualis latitudo caritatis, et longitudo, et sublimitas, et profundum ipsius*. Istæ dimensiones metaphorice attribuuntur caritati, per similitudinem corporaliū dimensionum. Siquidem latitudo caritatis est, quod ad omnes se extendit, etiam inimicos, quibus et benefacit. Longitudo ejus est, quod tendit in longum et in futurum, utpote usque in ultimum finem, seu vitam æternam, nec frangitur propter adversa. Hinc secundum Augustinum, longitudo est perseverandi longanimitas. Sublimitas caritatis est, quod immediate unit nos Deo. Profundum vero caritatis est, condescensus ad proximum, vel humiliationis inclinatio ex consideratione terribilium judiciorum Dei. — Posunt quoque hæc metaphorice ad divinam referri naturam : ut latitudo pertineat ad divinæ bonitatis communicabilitatem, qua

Jacob. i, 5.

Sap. viii, 1.

dat omnibus affluenter, nec aliquid in universo expers relinquit participatione perfectionis divinæ; longitudo vero pertineat ad æternitatem, qua attingit a fine usque ad finem, imo universa præcedit et omnia sequitur, vel ad longanimitatem expectationem qua iniquorum poenitentiam præstolatur; sublimitas autem ad divinæ majestatis excellentiam interminatam, vel ad divinorum promissorum supernatura-

lem dignitatem; profundum vero pertineat ad incomprehensibilitatem divinæ naturæ, judiciorumque ejus. Hinc apud Job de Deo asseritur : Excelsior cœlo est, et quid facies ? Profundior inferno, et unde cognosces ? Longior terra mensura ejus, et latior mari.

Job xi, 8, 9.

Possitis *scire etiam scientia practica*, utpote sciendo sectari, *supereminentem scientiæ caritatem Christi*, id est dilectionem illam præcipuam qua Christus secundum suam scientiam nos dilexit. Dilectio enim ex cognitione procedit. Vel sic, Possitis « scire caritatem Christi supereminentem scientiæ », id est nostram scientiam et capacitatem sua magnitudine transcendentem. *Ut impleamini*, id est, divinorum charismatum recipiendo influxum, tendatis ac perducamini, *in omnem plenitudinem Dei*, id est ad omnia dona perfecta quæ conferuntur a Deo, videlicet ad virtutes virorum heroicorum in vita præsentī, atque ad dona gloriæ magnorum Sanctorum in patria.

Ei autem, scilicet Deo omnipotenti, *qui potens est omnia sibi placentia ac nobis salubria facere superabundanter quam petimus aut intelligimus*, id est copiosius et excellentius quam orare aut comprehendere possumus, *secundum virtutem*, id est omnipotentiam suam, *quæ operatur in nobis* ut causa prima ac principalis, nobisque virtutes et gratiam operandi largitur, atque ad bona nos excitat; *ipsi sit gloria in Ecclesia militanti*, ut glorificetur ab omnibus, ejusque gloria, beatitudo, lætitia, excellentia, omnibus innotescat atque in cunctis resplendeat, *et in Christo Jesu*, id est propter beneficia quæ per Christum nobis donavit, *in omnes generationes*, id est per universarum generationum intervalla, durationes et tempora, *sæculi*, id est vitæ præsentis contentivæ sæculorum, id est includentis in se sæcula universa, hoc est singulas mundi ætates. Postremo, secundum Damascenum, sæculum multa significat : primo, uniuscujusque rei vitam ; secundo, tempus mille

annorum; tertio, totam durationem præ- A ram æternorum; sexto, mensuram perpe-
sentem usque ad mundi finem; quarto, tuorum; septimo, singulas septem mundi
vitam futuram in patria; quinto, mensu- ætates.

SERMO PRIMUS

QUOMODO RADICARI IN DEI AC PROXIMI CARITATE DEBEAMUS, TRIBULATIONESQUE AC
SENSUALITATI MOLESTA ÆQUANIMITER FERRE.

DEUS Pater det nobis secundum di- vitias gloriæ suæ, virtutem corrobora-
rari in interiori homine. Ephes. III, 16.

In exordio hujus epistolæ docet nos sanctus Apostolus ne terreamur, neque a bonis cessemus operibus, nec per impat-
tientiam, aut pusillanimitatem vel admi- rationem frangamur, dum videmus homi-
nes virtuosos, sanctos et sapientes ab insensatis ac impiis in mundo hoc tribu-
lari ac opprimi. Solent namque pusilli ac imperfecti multum mirari, terreri et a
bono cessare, dum cernunt justos ab in- justis opprimi et occidi, quasi infructuo-
sum et vanum sit Deo servire, eo quod servi ejus a servis diaboli in hoc mundo
sic opprimantur. Hinc in persona imper- fectorum inde mirantium dicit Habacuc :
Quare, Domine, non respicis contempto- res, et taces conculcante impio justio-
rem se? Propter hoc lacerata est lex. Hinc etiam apud Malachiam ait Deus de istis
imperfectis hominibus : Invaluerunt super me verba vestra, et dixistis : Vanus est
qui servit Deo; et quod emolumentum, D
quia custodivimus præcepta ejus, et quia ambulavimus tristes coram Domino?

Porro exercitati in via Dei et desuper illustrati, de re ista non admirantur, nec conturbantur, neque franguntur. Sciunt namque quod Deus in hac vita exercet et purgat electos ac bonos per reprobos et perversos, ut sic electi in gratia crescant, et a futuris eruantur tormentis, atque cœlestia gaudia celerius ac copiosius

adipiscantur. Unde in Isaia loquitur Deus de rege Assyriorum : Væ Assur, virga fu-
roris mei et baculus ipse est. Gregorius quoque testatur : Abel esse renuit quem Cain malitia non exercet. Insuper, sciunt quod Deus eos quos amat, arguit et casti-
gat, quod item per multas tribulationes oportet nos intrare in regnum cœlorum, et quod præcipuum signum reprobationis
divinæ ac futuræ damnationis æternæ, est in hoc sæculo prosperari nec castigari, sed propriis adinventionibus desideriiisque re-
linqui, quemadmodum de talibus Deus fa- tetur : Dimisi eos secundum desideria
cordis eorum, ibunt in adinventionibus suis. Iterum sciunt et pensant quanta Uni-
genitus Dei a sceleratissimis sit perpressus hominibus; quod demum electi Dei quan-
to fuerunt Domino cariores, tanto plura et graviora sunt in hoc sæculo passi adversa. Propter quod dixit Apostolus : Quicum-
que volunt pie vivere in Christo, perse-
cutionem patientur. Ex his itaque consi-
derationibus roborati, dum cernunt bonos conculcari a malis non perturbantur, nec a bonis retrahuntur operibus; imo potius occultum Dei benedicunt judicium, et di-
cunt quod ait Salvator : Beati qui perse-
cutionem patiuntur propter justitiam, quo-
niam ipsorum est regnum cœlorum.

Deinceps abbas Cassianus, in secundo libro Collationum Patrum, describit quem-
admodum suo tempore aliqui sanctissimi eremitæ fuerunt a Sarracenis dira morte occisi. Propter quod aliqui Fratres non-

Is. x, 5.

Apoc. III, 19.

Act. XIV, 21.

Ps. LXXX, 13.

II Tim. III, 12.

Matth. v, 10.

Cf. Habac. I, 13, 4.

Malach. III, 13, 14.

dum perfecti mirati sunt cur Deus viros tam sanctos ab illis inquinatissimis permisit interfici; veneruntque Fratres illi ad abbatem Theodorum, petentes ab eo super hac re informationem: et fecit inde abbas ille pulcherrimam collationem, quam Cassianus redegit in scriptis. Itaque nec in propriis, neque in proximorum ac justorum tribulationibus, per impatientiam corruamus, nec terreamur, sed in via Dei, in virtutum operibus usque in finem viriliter persistamus. Siquidem apud Isaiam

Is. LI, 7.

Matth. x, 28.

loquitur Deus: Nolite timere opprobrium hominum et blasphemias eorum. Christus quoque in Evangelio: Nolite (inquit) timere eos qui corpus occidunt, animam autem non possunt occidere; sed eum timete qui habet potestatem et corpus et animam mittere in gehennam ignis. Præterea, juxta doctrinam Apostoli, studeamus semper esse radicati in caritate Dei et omnium proximorum, ut salubriter agnoscamus quæ sit caritatis latitudo, sicque non solum amicos, sed et adversarios diligamus corde, ore et opere, sicut in prima sua epistola scribit Joannes: Diligamus opere et veritate. Agnoscamus quoque quæ sit caritatis longitudo, sicque futuram beatitudinem longanimitate expectemus, atque pro ejus adeptione, quotidie cum infatigabili diligentia ac fervore virtutis actibus insistamus. Noscamus etiam quæ sit caritatis sublimitas, sicque per sanctam dilectionem applicemus et uniamus nos Domino Deo, et transformemur in eo, imo et indissolubiliter colligemur eidem, ut cum Apostolo dicere mereamur:

Ephes. III, 17, 18.

I Joann. III, 18.

Rom. VIII, 35.

Galat. VI, 2.

Ephes. IV, 2.

Quis nos separabit a caritate Dei? Item sciamus quæ sit caritatis profunditas, quatenus condescendat unusquisque proximo suo, et patientiam mutuo habeamus, juxta illud Apostoli: Alter alterius onera portate; et rursus, Supportate invicem in caritate.

Amplius etiam contemplemur qualiter Deo ista convenient, scilicet longitudo, latitudo, sublimitas et profundum. Consideremus ergo immensam communicabilitatem

seu munificentiam Dei; et ita cum omni fiducia et perseverantia invocemus eum pro omni gratia desiderata, quemadmodum ad Hebræos habetur: Adeamus cum fiducia ad thronum gratiæ ejus, ut misericordiam consequamur, et gratiam inveniamus. Unde et Jacobus dicit: Si quis vestrum indiget sapientia, postulet a Deo, qui dat omnibus affluenter, et non impropertat; et dabitur ei. Qualiter vero sit postulandum, subditur ibi: Postulet in fide, nihil hæsitans. Nam et Christus in Evangelio protestatur: Omnis qui petit, accipit; et qui quærit, invenit; et pulsanti aperietur. Nonne Deus libenter dat nobis quod petimus, dum id ab eo petimus ad quod postulandum ipsemet nos hortatur, et quod ipse requirit a nobis, hoc est conversationem sibi placentem, ut divina impleamus præcepta, et digne ambulemus vocatione qua vocati sumus?

Hebr. IV, 16.

Jacob. I, 5.

Ibid. 6.

Luc. XI, 10.

Ephes. IV, 1.

Consideremus etiam longitudinem Dei, id est æternitatem ipsius, et quam pie ac longanimitate nostram emendationem expectat; et ita grati simus eidem, nec differamus converti ad ipsum, quia nescimus diem nec horam. Et super omnia præcavendum est nobis ne tam benignissimum Deum ac superdulcissimum patrem in aliquo offendamus: hoc namque sincera ad eum requirit dilectio.

Eccli. V, 8.
Matth. XXV, 13.

Contemplemur quoque sublimitatem Domini Dei nostri, hoc est incomparabilem et immensam dignitatem et eminentiam ejus, cujus comparatione totum universum est quasi arena perminima, imo minus arena; sicque cum omni reverentia ei deserviamus, et ei humillime nos subdamus, scientes quod ejus majestati nil condignum poterimus facere aut offerre, præsertim quum infinita reverentia dignus sit, et in infinitum majori dignus cultu atque honore quam tota Ecclesia militans ac triumphans ei queat impendere. Cur ergo putat se homo aliquid operari in Dei obsequio, quum hoc ipsum quod agit sit donum Dei, cujus dona sunt omnia merita nostra?

Consideremus demum et profunditatem, id est incomprehensibilitatem, Dei ac iudiciorum ipsius; sicque caveamus a præsumptuosa et periculosa discussione secretorum Dei, quum et Salomon fateatur : *Prov. xxv, 27.* Qui perscrutator est majestatis, opprimetur a gloria. Quomodo enim poterimus Deum et ejus judicia perscrutari, qui nec minima ista inferiora valemus plene cognoscere, quum utique Deus gloriosus ac adorandus sit in infinitum toto incomprehensibilior universo ?

Postremo, consideremus eminentem et maximam caritatem Christi ad nos, quæ, quanta et qualia pro nobis fecit ac pertulit; sicque juxta apostolicum documentum, *Ephes. v, 2.* ambulemus in dilectione, sicut et Christus dilexit nos et tradidit se ipsum pro nobis. Merito igitur intuitu et amore Christi, fugeremus omne peccatum, omnem superbiam, incontinentiam, avaritiam, rancorem, pigritiam, atque ad observanda ejus mandata fervidi essemus semper ac alacres.

Legitur in sexto libro Vitaspatrum, quod fuit quædam virgo quæ valde profecit in timore Dei et in omni virtute, cujus parentes fuerunt valde dissimilis vitæ. Nam pater ejus fuit vir timoratus et simplex, pavitque oves suas in agris et pratis; porro mater ejus libidinosa fuit atque adultera, comessionibus et ebrietatibus ac luxuriis vacans quotidie. Post aliquot annos defunctus est pater ejus : quo mortuo, cœpit esse tempestuosa et ineptissima aura, ita quod sepeliri vix potuit. Ex tunc cœpit mater ejus absque freno vitiis gulæ et luxuriæ esse intenta, quia a viro fuerat libera-
ta. Post aliquantum tempus et ipsa defuncta est : qua mortua, cœpit esse serenissima aura, ac si elementa ejus beatitudini congaderent.

Paulo post cœpit præfata cogitare puella cujus vitam potius sequi deberet, patris

sui an matris; atque post longam deliberationem et argumentationem, videbatur ei vita matris suæ potius esse sequenda : præsertim quia in omni vixerat voluptate, et tamen semper sana fuit, ac prospere ei successit; pater vero ipsius quamvis Deo ferventer servivit, tamen semper quasi infirmus fuit, et tribulationes sustinuit. Quumque sic cogitaret puella ista tempore nocturno jacens in lecto, venit in mentis excessum et rapta est in spiritu. Apparuitque ei in visione quidam Sanctus, et terribiliter eam adspiciens, dixit : Cur sic cogitas? Veni, ostendam tibi patrem tuum et matrem, ut scias cujus debeas sequi vitam. Itaque primo duxit eam in deliciosissimum locum, in quo vidit patrem suum. Qui cum gaudio venit ad eam, amplexans ipsam et filiam vocans. Tunc illa rogavit patrem ut maneret cum eo. Cui pater : Modo, inquit, non hic potes manere; sed si vitam meam fueris assecuta, post modicum tempus huc venies et manebis. Deinde Sanctus ille duxit puellam ad locum tenebrosus, omni stridore, fœtore et confusione repletum, in quo vidit fornacem ardentem, et matrem suam ad collum usque in illa demersam. Mater itaque visa filia sua, cœpit ululare, clamare ac dicere : Miserere mei, o filia mea; memento doloris quem sustinui quando te peperisti, memor esto lactis quod sumpsisti a me, et omnium obsequiorum quæ tibi exhibui; extende manum tuam et extrahe me, quoniam crucior in hoc igne sulfureo. Ecce pro parvis et brevibus voluptatibus meis quanta jam patior; miserere mei, o filia mea, et noli despiciere matrem tuam. Quumque illa hæc diceret, cœpit filia ejus ex compassione ingemiscere, et clamare ac lamentari; protinusque rediit ad se ipsam, et decrevit vitam sui patris sectari, sicut et fecit.

ENARRATIO IN EVANGELIUM

IBAT JESUS IN CIVITATEM QUÆ VOCATUR NAIM. Luc. VII, 11-16.

HODIERNO in evangelio describit Lucas evangelista, quemadmodum Christus suscitavit a mortuis unicum filium cujusdam viduæ : in quo Salvator mundi, Christus Dominus, potestatem suam ac pietatem monstravit. Itaque ait : *Ibat Jesus in civitatem quæ vocatur Naim* : quæ fuit civitas parva (ut fertur) in Galilæa. *Et ibant cum illo discipuli ejus*, præsertim Apostoli qui ei familiariter adhærebant, et turba copiosa virorum ac mulierum, puerorum ac senum. Nam propter Christi sapientiam, eloquentiam, sanctitatem, et præcipue propter incomparabilem excellentiam suam in operationibus miraculorum, plurimi sequebantur eum, imo frequenter multa millia. *Quum autem appropinquaret portæ civitatis Naim, ecce defunctus efferebatur, filius unicus matris suæ*, id est, corpus defuncti qui fuerat filius unicus matris suæ, portabatur ad monumentum ; et hæc vidua erat, ideo magis condolendum fuerat ei, quia tam viri quam unici filii fuit solatio destituta ; et turba civitatis multa, id est magna, ibat cum illa pro consolatione ipsius.

Quam quum videret Dominus, id est, non solum exterioribus oculis eam inspexisset, sed et interioribus oculis suæ sapientiæ ac misericordiæ, ejus mœrorem pensasset, secundum quod subditur : *misericordia motus super eam*, id est, ei compatiens. Fuit namque in maximo constituta dolore propter mortem unici filii sui. Quemadmodum enim nil carius unico filio, ita dolor de morte illius maximus est. Propter quod Jeremias dicit populo

Jer. VI, 26. cui maxima vastitas imminebat : Luctum unigeniti fac tibi, planctum amarum. Secundo, quoniam amor unici filii maximus

est præsertim in vidua : quia non habet mariti solatium, ideo dolor viduæ de unici filii morte gravissimus est. Tertio, quoniam vidua est persona miseranda, ut orphanus, ac pupillus, peregrinus quoque, et pauper, et infirmus, atque oppressus. Ideo in Deuteronomio dicitur : Dominus Deus facit judicium pupillo et viduæ, amatque peregrinum ; et in Psalmo : Dominus custodit advenas, pupillum et viduam suscipiet. Quarto, quoniam filius iste ad adolescentiæ venit ætatem, et aptus jam fuit conjugio. Adolescentiorum autem mors miserabilior est, quia in flore juventutis ac vitæ fuerunt, et cum grandi sollicitudine ac labore parentum ad illam pervenerunt ætatem.

Dixit illi : Noli flere, quia tristitia tua mox convertetur in gaudium, et erit consolatio tua tanto major quanto inopinatior. *Et accessit, et tetigit loculum in quo jacuit corpus exanime. Hi autem qui portabant defunctum, steterunt*, sperantes defunctum esse jam suscitandum, quia fama miraculorum Christi devenit ad eos. *Et ait : Adolescens, tibi dico, surge*, id est, divina potestate tibi præcipio ut reviviscas, et surgendo ac ambulando signa vitæ veraciter monstres. — Quæri potest, cui Christus dixit hæc verba : nam quando dixit hoc verbum, adolescens adhuc mortuus fuit, ergo non fuit tunc adolescens. Respondetur, quod in Scripturis multoties ponitur pars pro toto, et econverso. Sicque Christus nomine adolescentis intelligere potuit corpus ejus, cui præcepit iterum animari ac suscitari.

Et resedit qui erat mortuus, hoc est, statim revixit, seque erexit, et sedit super id in quo deferebatur, et cœpit loqui, in

signum quod vere surrexit. *Et dedit illum* A *matri suæ*, id est, assignavit eum suæ genitrici viventem, ut cum eo læta rediret ad domum : quemadmodum Elias suscitato filio viduæ in Sarepta, dixit ad eam, En vivit filius tuus, ut legitur tertio Regum. Denique, sicut alii infirmi a Christo curati, mox plenarie restituti sunt sanitati ac robori naturali, ut patet de paralyticis, quibus curatis, statim præcepit proprios lectos deferre ; sic credo quod adolescens iste resuscitatus, statim sanus et fortis processerit. Christi namque opera fuerunt B perfecta. Hinc creditur Christus adolescentem istum, etiam spiritualiter suscitasse, id est a vitiis, si quæ habuit, emundasse.

Accepit autem omnes timor, id est, universos qui viderunt istud prodigium, timor invasit. Iste fuit timor reverentiæ et admirationis, grandem consolationem et jucunditatem habens admixtam, non timor afflictionis ac desolationis. *Et magnificabant Deum*, id est, ex consideratione tam magni et miraculosi effectus, fatebantur Deum esse omnipotentem, ejusque om- C nipotentiam ac pietatem circa homines totis præcordiis collaudabant, *dicentes: Quia*, id est quod, *Propheta magnus*, id est magnæ sanctitatis ac potestatis, *surrexit in nobis*, id est, inter nos apparuit. Quamvis enim nondum explicite crediderint Jesum esse Deum, non tamen dubitabant

quin divina virtute fecit hoc signum : ideo Deum principaliter collaudabant, et Jesum tanquam Dei præclarum ministrum, per quem et per cujus merita Deus fecisset tantum miraculum. Insuper per Prophetam magnum, aliqui dicunt eos intellexisse regem Messiam, ita quod viso hoc signo crediderunt Jesum esse Christum in lege promissum, quemadmodum Samaritani de Christo dicentes : Quia hic est vere Pro- pheta qui venturus est in mundum. Potius tamen reor, quod nomen Prophetæ sum- pserunt communiter, intendentes quod Jesus esset magnus Propheta, sicut Elias et Eliseus ac alii quidam fuerunt. Unde et alio loco, quum Christus interrogaret Apostolos, Quem dicunt homines esse Filium hominis? responderunt : Alii Joannem Baptistam, alii Eliam, alii Jeremiam, aut unum ex Prophetis.

Postremo, in isto miraculo modus agendi valde præclarus, mirabilis ac magnificus fuit, quod scilicet Christus tam repente ac imperialiter suscitavit hunc mortuum. Non enim Elias aut Eliseus taliter mortuum suscitavit, sed instanter orando, et super defunctum procumbendo.

Et quia Deus visitavit plebem suam, hoc est, misericorditer egit nobiscum, hoc est cum populo Judæorum, mittendo eis tam sanctum Prophetam, atque per eum tot et tanta beneficia impendendo eisdem.

SERMO SECUNDUS

DE SPIRITUALI SIGNIFICATIONE TRIUM MORTUORUM QUOS CHRISTUS SUSCITAVIT.

SICUT Pater suscitatur mortuos et vivificat, sic et Filius quos vult vivificat. Joann. v, 21.

Quum Patris et Filii ac Spiritus Sancti sit una potestas eademque voluntas, sicut et una essentia, constat quod opera eorum ad extra sint indivisa. Idcirco « sicut Pater

suscitat mortuos et vivificat, ita et Filius quos vult vivificat » : quod idem de Spiritu Sancto credendum est. Nec alios Pater, alios Filius, sed prorsus eosdem quos suscitatur atque vivificatur Pater, suscitatur vivificaturque unigenitus Filius ejus, Dominus noster Jesus Christus. Deinceps, sicut duplex

Joann. vi, 14.

Matth. xvi, 13, 14.

III Reg. xvii, 19-21;
IV Reg. iv, 33-35.

est mors, utpote mors naturæ, quæ vocatur mors corporalis (de qua ait Salvator :

Joann. xi, 11, 14. Lazarus amicus noster mortuus est), et mors culpæ (de qua scriptum est : Os quod

Sap. i, 11. mentitur, occidit animam; de qua etiam *1 Tim. v, 6.* ait Apostolus : Vidua quæ in deliciis vivit, vivens mortua est); sic duplex est suscitatio mortuorum : una spiritualis, qua Deus per pietatem et gratiam suam suscitatur peccatorem a morte peccati ad vitam gratiæ ac virtutum. De qua suscitatione Paulus

Ephes. v, 14. hortatur : Surge, qui dormis, et exsurge a mortuis. Alia est suscitatio corporalis, qua

Luc. vii, 14, 15. naturaliter mortuus ad vitam reducitur pri-

Marc. v, 38-42. stinam : de qua in evangelio hodierno fit

Joann. xi, 38-44. mentio. Loquendo ergo de hac suscitatione, non legitur Christus nisi tres mortuos

Ibid. xxi, 25. suscitasse, videlicet filiam Jairi archisynagogi duodennem, et filium viduæ hujus, ac Lazarum fratrem Mariæ ac Marthæ. An vero plures suscitaverit mortuos, est incertum : non enim omnia Christi miracula sunt descripta, imo non nisi pauca de multis. Unde evangelista Joannes ait : Sunt autem et alia multa quæ fecit Jesus; quæ si scribantur per singula, nec ipsum arbitratur mundum capere posse eos qui scribendi sunt libros.

Præterea omnia Christi opera atque miracula, mysticam seu spirituales et occultam habent significationem, suntque plena doctrinis. Spiritualia quoque per corporalia designantur. Hinc per corporalem illam trium mortuorum illorum suscitationem designata est triplex suscitatio spiritualis peccatorum, quos frequenter suscitavit atque quotidie suscitatur Dominus. Diligenter ergo considerandi sunt modus et ordo quibus Christus tres illos suscitavit defunctos. Et primo in generali est intuendum, quod duos illorum Christus suscitavit rogatus ab aliis, puta puellam ad instantiam patris ejus carnalis, Lazarum vero ob rogatum sororum ipsius; sed filium viduæ ex propriæ pietatis compassionem, sic tamen quod dolor et lacrimæ matris inclinaverunt eum ad filii sui suscitationem.

Marc. v, 22, 23.

Joann. xi, 3, 21, 32.

Luc. vii, 13.

A Per quod primo spiritualiter designatur quod mortuus in anima per mortale peccatum, promereri non potest de condigno gratiam resurrectionis et conversionis. Verumtamen mereri hanc potest aliquo modo de congruo, faciendo quod in se est, utpote disponendo se ad gratiam per considerationem et detestationem vitiorum suorum, per invocationem divini auxilii, per subtractionem sui ab actibus pravis et ab occasionibus eorundem pro posse, per accessum ad confessionem, in qua sæpe virtute sacramenti de attritione fit contritio; per opera misericordiæ, per frequentem auditionem Missæ ac divini Officii, per audientiam prædicationum, per meditationes de pœnis inferni, de distractione divini judicii, de gaudiis civium supernorum, de brevitate vitæ præsentis respectu vitæ sequentis duraturæ in sempiternum, per abstinentias, disciplinas, peregrinationes, jejunia, ac consimilia opera, quæ quantum ad substantiam facti, fieri possunt ab existentibus in peccato mortali. Idcirco per ista, unusquisque peccator in quantum statui suo possibile est, ad gratiam se disponat. Unde apud Jeremiam loquitur Deus : Quis est iste qui applicet cor suum ut appropinquet mihi? tanquam dicat : Qui hoc egerit, inveniet me paratum ad indulgendum atque ad infundendum gratiam. Hinc Jacobus ait : Appropinquate Deo, et appropinquabit vobis. Per Zachariam quoque Dominus exhortatur : Convertimini ad me, et convertar ad vos; itemque, Convertimini de viis (id est operibus) vestris malis, et a cogitationibus vestris pessimis.

Jer. xxx, 21.

Jacob. iv, 8.

Zach. i, 3.

Ibid. 4.

Secundo, per istud significatum est quod Deus ex infinita bonitate et misericordia sua, sæpe nonnullis gratiam conversionis largitur precibus ac meritis aliorum. Imo interdum superpiissimus Deus, omnium cordium cognitor, videns quosdam vere devotos et caritativos de aliorum peccatis cordialiter contristari ac lacrimari, propter eorum sanctum dolorem amorosumque luctum, gratiam pœnitentiæ et conversionis

infundit iniquis. De talibus enim devotis *Is. lxxv, 24.* et caritativis dixit per Isaïam : Antequam clament, exaudiam eos. Hinc Psalmista : *Ps. x, 17,* Desiderium (inquit) pauperum exaudivit Dominus; præparationem cordis eorum, id est dispositionem ad orandum, audivit auris tua. Hinc innotescit quam utile sit orationes petere devotorum : in quibus tamen nullus debet immoderate confidere, ut scilicet audacius peccet, quoniam multi orant pro eo, quia hoc fatuum esset ac pessimum; Deus quoque non semper audit devotos pro aliis.

Marc. v, 22 Itaque Christus suscitavit in primis filiam archisynagogi in domo ac lecto jacentem, nondum elatam. Per quam designatur unusquisque peccator qui mortuus est solo interiori cordis peccato, puta vitioso affectu et pravitatis consensu, ita quod nondum processit ad opera prava, sed quiescit in lecto, hoc est in propriæ mentis ac malæ conscientie turpi nido, similis avibus fœdis quæ proprios nidos commaculant. Talis indiget suscitari a Christo, qui mentem peccatoris misericorditer visitando, infundit ei compunctionem displicentiamque culparum suarum : ad quarum considerationem ac detestationem illuminat eam, ita quod advertit ac pensat quam multipliciter atque enormiter Deum offendat, quanta sibi damnatio instet, quanta quotidie negligat bona, et quantam perdat felicitatem in patria.

Luc. vii, 11 Secundo, Christus suscitavit filium viduæ extra domum et civitatem portatum, loculoque impositum. Per domum intelligi potest familia seu cohabitantium multitudo; per civitatem autem, ipsa communitas plebis. Itaque per defunctum istum signatur quicumque peccator non solum intus culpabilis, sed qui in actum peccati mortalis processit in tantum, ut tam condonesticis suis quam communitati pateat ejus peccatum, ita quod plurimos, quantum in se est, scandalizat. Quod prorsus iniquum est et valde damnabile, Augustino dicente : Peccator tantos occidit a quantis male agere scitur aut cernitur. Si enim tam im-

pium atque damnabile est unum scandalizare pusillum, ut dicat Salvator, Qui scandalizaverit unum ex his pusillis qui in me credunt, expedit ei ut suspendatur mola asinaria in collo ejus, et demergatur in profundum maris : quam vitiosum et damnabile exstat totam familiam, et præsertim totam communitatem, scandalizare, quum et sancti doctores testentur, Quicumque in conspectu populi male agit, tot occidit coram quot peccat? Denique gravitas hujus scandali tanto est major, quanto

B scandalizans amplius obligatur exemplaris exsistere, et quanto majoris est auctoritatis, potestatis, gradus, ordinis sive scientiæ. Certumque est quod sicut prælatus tenetur esse exemplaris plebi sibi commissæ, ita parentes propriæ soboli ac toti familiæ. Rectores quoque communitatis, videlicet officii, ut scultetus, scabini ac alii, valde tenentur ædificatorii esse ac virtuosus : alias essent indigni ministri ac executores justitiæ, quoniam sancti patres Ambrosius Chrysostomusque testantur, quod indignus est alios judicare, qui in eisdem cum illis aut majoribus seu paribus est peccatis, quum et Apostolus loquatur : In quo alterum judicas, te ipsum condemnas; eadem enim agis. Et rursus : Existimas, o homo, qui judicas alios et talia agis, quia tu effugies judicium Dei?

Insuper per domum intelligi potest proprium corpus, juxta illud Job : Qui habitant domos luteas, consumentur velut atinea. Unde et Apostolus loquitur : Scimus quoniam si terrestris domus nostra corrumpatur, quod ædificationem habemus in cœlis. Rursus, per domum intelligi potest cor, juxta illud in Ecclesiastico scriptum : Nisi in timore Domini tenueris te instanter, cito subvertetur domus tua, id est cor tuum. Tunc ergo peccator extra domum portatur, dum vitia cordis procedunt in corpus, ita quod membra nostra exhibemus arma iniquitatis peccato; item, dum peccata nostra per corpus patrata inferunt aliis damna, sicut dum verbis aut factis proximos lædimus. Ad quod vitan-

Matth. xviii, 6.

Rom. ii, 1.

Ibid. 3.

Job iv, 19.

II Cor. v, 1.

Ecclesi. xxvii, 4.

Rom. vi, 13.

dum hortatur Apostolus ad Romanos, di-
Rom. XIV, cens : Non ponatis offendiculum fratri, vel
 13, 15. scandalum ; noli illum perdere pro quo
 Christus mortuus est. Nempe quam grave
I Cor. VIII, sit hoc, pandit alio loco : Peccantes (in-
 12. quit) in fratres, et percutientes conscien-
 tiam eorum infirmam, in Christum pecca-
 tis. Verbis ergo et factis, incessu, vestitu
 et moribus, totaque vita et fama studeat
 unusquisque proximos ædificare. Maxime
 quoque cavendum est ne peccator extra
 civitatem feratur, id est, ne tam publice
 male agat, quod etiam ad alias terras ac
 nationes vitiositatis suæ deveniat fama,
 sicque innumerabilium hominum culpa
 redundet in ipsum. Talis namque non est
II Cor. II, bonus odor Christi in omni loco, sed pes-
 14, 15. simus odor diaboli undequaque.

Tertio, Christus suscitavit Lazarum jam
Joann. XI, sepultum, et quatuor dies jam in sepulcro
 17-44. habentem. Per quem intelligitur omnis
 transgressor qui ad vitiosam consuetudi-
 nem venit, et vitiorum voragine pressus
 est ac induratus in malis, ita quod singu-
 lariter foetet et mole consuetudinis pravæ

Ibid. III, 20. jacet opertus, ita quod non venit ad lucem,
 ne arguantur opera ejus. Talis difficulter
 convertitur, quia ut Salomon contestatur,
Prov. XVIII, Impius quum in profundum peccatorum
 3. venerit, contemnit. Tunc enim spiritualem
 perdidit sensum, et vitiorum veneno to-
 tus infectus, stupidus mortuusque effectus
 est : ideo ad hoc designandum, Christus

Lazarum suscitaturus, in se ipso infre-
 muit, et turbavit se ipsum ac flevit, dein-
 de alta voce clamavit. Verumtamen de tali
 transgressore desperandum non est, eo
 quod Deus sit animarum omnipotens me-
 dicus, cujus virtus ac sapientia ad curan-
 dum, finem non habet, et non solum nil
Jer. XXXII, impossibile, sed et nihil difficile ei est.
 17, 27; *Luc.* 1, 37. Itaque quocumque modo quis mortuus est
 per culpam, sive in corde tantum, sive in
 corde et opere, sive in corde, opere et
 consuetudine, erigat se contra se, et ad
 Deum respiret ; consideret ea quæ perti-

nent ad salutem, et ad Dei gratiam se dis-
 ponat ; perpendat quam brevis sit præsen-
 tis vitæ vanitas et voluptas, quam item
 amara, intolerabilia et æterna sint inferni
 tormenta : sicque indesinenter clamet ad
 Deum, et ejus misericordiam invocare non
 cesset.

Legitur in vita S. Pacomii, quod juvenis
 quidam nomine Silvanus, cœnobium S. Pa-
 comii est ingressus, sed ad tempus valde
 negligenter et perverse vixit in eo, in tan-
 tum quod quosdam Fratres suis pravis ex-
 B emplis traxit ad malum. Ideo seniores
 Fratres cœnobii illius multoties rogave-
 runt S. Pacomium ut Silvanum illum ex-
 pelleret : quod Pacomius facere distulit ; ac
 Fratrem illum frequenter seorsum pie, se-
 riose ac sapienter corripiens ac infor-
 mans, indesinenter oravit pro Fratre præ-
 fato. Et paulo post, meritis precibusque
 B. Pacomii, Spiritus Sanctus illum Silva-
 num tanto implevit Dei timore, et tanto
 succendit fervore, et tanta compunctione
 emollivit cor ejus, quod deinceps a lacri-
 C mis abstinere non potuit : imo in omni
 loco et actu jugiter plorans, nec tempore
 refectionis potuit se a lacrimis cohibere.
 Propter quod Fratres sæpe rogabant eum
 ut saltem in mensa cessaret a lacrimis,
 quoniam multi Fratres visis lacrimationi-
 bus ejus, manducare nequibant. Quibus
 respondit : Conor sicut jubetis a lacrimis
 temperare, nec possum, quoniam pectus
 meum tanquam flamma incensum, me non
 sinit quiescere. Itaque Frater ille emen-
 datus, per omnia magnum ædificationis ac
 D perfectionis exemplum præbuit universis,
 atque ad tam profundissimam pervenit hu-
 militatem, quod S. Pacomius dixit, nullum
 Fratrum sic esse suam humilitatem secu-
 tum sicut fratrem Silvanum. Sicque Silva-
 nus per octo annos taliter militans Christo,
 feliciter obdormivit in Domino. De cujus
 exitu testabatur S. Pacomius, quod mul-
 titudo angelorum animam ejus accipiens,
 eam magna cum lætitia obtulit Christo.

SERMO TERTIUS

DE PORTITORIBUS QUI PECCATORES SPIRITUALITER MORTUOS
PORTANT SEPELIENDOS IN INFERNO.

MISERICORDIÆ Domini, quia non sumus consumpti : quia non defecerunt miserationes ejus. Thren. III, 22.

Ps. cii, 10. Sanctus propheta Jeremias considerans quod Deus non secundum peccata nostra fecit nobis, neque secundum iniquitates nostras retribuit nobis, locutus est verba hæc : « Misericordiæ Domini, quia non sumus consumpti », id est, divinæ pietati et gratiæ adscribendum est quod non omnino perimus, quod æternaliter condemnati non sumus. Si enim juste nos reliquisset, non solum omni virtute et gratia careremus, sed insuper innumerabilibus repleti essemus peccatis, aut jamdudum propter ea occisi essemus a Deo, atque damnati. Quandocumque enim quis peccat mortaliter, eodem momento meretur a Deo relinqui, diabolo tradi, corporaliter perimi, æternaliterque damnari. Hoc itaque est immensa misericordia Dei, quod peccator qui eum in tantum offendit, non solum non protinus condemnatur, sed diu portatur, et demum gratiam conversionis ab ipso sortitur. Denique, qualiter id communiter aut frequenter fiat, ex evangelio perpenditur hodierno. Nam legitur in eodem, Luc. vii, 12 et seq. quod dum Jesus propinquaret civitati nomine Naim, defunctus efferebatur, filius unicus viduæ matris : cujus dolori Christus compatiens, consolatus est eam, ejusque filium suscitavit. Conformiter omni die conspiciens Deus peccatores ad infernum deduci, illucque ire, imo et currere, condolet eis, et quibus vult gratiam tribuit conversionis.

Hic considerandum, qui sunt isti qui Deum peccatorem spiritualiter mortuum portant quotidie ad infernum, ita ut non respi-

scat, nec redeat ad cor, nisi a Christo misericorditer adspiciatur, et præveniatur gratia ejus. Primus itaque hic portitor, est amor peccati seu vanitatis ac voluptatis. Quidam enim sic afficiuntur ad hæc, ut sine eis dicant se vivere non valere : quemadmodum quidam libidinosi asserunt se mulieribus carere non posse, et aliqui iracundi ac invidi affirmant se suos adversarios non posse diligere, nec injuriatoribus suis se posse ignoscere ; sic et gulosi dicunt se jejunare non posse, quasi Deus impossibilia hominibus præceperit. Quod dicere, blasphemia plenum est. Hos increpat Salomon, dicendo : Usquequo stulti ea quæ sibi nociva sunt cupient ? Quibus clamat Psalmista : Filii hominum, usquequo gravi corde ? Ut quid diligitis vanitatem, et quæritis mendacium ? Isti namque ineffabiliter stulti sunt qui ea amant, exercent, reseruant, quæ eis incomparabiliter nocent, puta peccata mortalia : per quæ perdunt omnia gratiarum charismata in præsentī, donaque gloriæ in futuro, imo summum et incommutabile bonum, Dominum Deum, et spiritualiter occiduntur, atque post vitam hanc, ad infernalis miseriæ mortem omni morte amariorem trahuntur. Ideo odiunt semetipsos, quemadmodum scriptum est : Qui diligit iniquitatem, odit animam suam. Et certe tales sunt omnes superbi, invidi, avari, lubrici, acediosi, gulosi et iracundi. Propter quod Salomon protestatur : Stultorum infinitus est numerus. Denique isti sunt similes quibusdam infirmis corruptum palatum habentibus, qui ea cupiunt manducare quæ comesta mortem mox inferunt. Cesset igitur unusquisque ab ista stultitia suique ipsius

Prov. i, 22.

Ps. iv, 3.

Ps. x, 6.

Eccle. i, 15.

odio, et vere se diligat, illa optando quæ suæ saluti expediunt.

Secundus portitor, est timor spiritualis laboris, seu exercitii virtuos, aut pœnitentiæ. Multis namque videtur quod tam durum sit Deo servire, pœnitentiam agere, operibus insistere virtuos, ab actibus retrahi vitiosis, quod nec volunt nec audent iter virtutum arripere atque condigna pœnitentiæ opera exercere, sed manent in fœcibus, fœditatibus et malitiis suis. Isti non credunt Christo qui ait : Venite ad me, omnes qui laboratis et onerati estis, et ego reficiam vos; tollite jugum meum super vos, et discite a me quia mitis sum et humilis corde, et invenietis requiem animabus vestris: jugum enim meum suave est, et onus meum leve. O utinam isti agnoscerent quam vere dulcissimum sit Deo altissimo puro corde servire, tranquilla mente vacare, virtutibus insudare! Et quamvis sæpe sit in principio difficultas, in processu tamen suavitas est; et qui constanter proficere satagit, atque in bonis exercitiis strenue perseverat, consolationes divinas, cœlestes, internas, frequenter ac copiose experitur, quemadmodum Jeremias asserit : Quærite quæ sit via bona, et ambulate in ea, et invenietis requiem animabus vestris. Hinc apud Isaiam Deus suis promittit cultoribus : Quemadmodum mater consolatur filios suos, ita et ego consolabor vos. Apostolus quoque ait : Benedictus Deus qui consolatur nos in omni tribulatione nostra.

Jer. vi, 16.

Is. lxvi, 13.

II Cor. i, 3, 4.

Prov. xxi, 15.

Subinde, secundum theologos atque philosophos, quælibet virtus habet delectationem spiritualem ac propriam sibi annexam. Propter quod in Proverbiis scriptum est : Gaudium est justo facere judicium. Et Aristoteles : Signum (inquit) virtutis est delectatio fiens in opere. Idcirco, dum pervenit homo ad radicationem et exercitationem seu assuefactionem virtutum seu actuum virtuosorum, tunc opera bona sunt sibi delectabilia valde, et quod mundanis carnalibusque hominibus videtur difficile, est ei perfacile ac suave. Ideo dixit Deo

A Psalmista : Exsultabunt labia mea dum cantavero tibi, et anima mea quam redemisti. Imo revera impiorum vita multiplici inquietudini, tribulationi, anxietati, dolori, remorsui ac tædio permiscetur, quemadmodum in Sapientiæ libro dicunt, et in die judicii sunt dicturi : Erravimus a via veritatis, et justitiæ lumen non luxit nobis; lassati sumus in via iniquitatis et perditionis, et ambulavimus vias difficiles. Hinc Ecclesiastes ait : Homini bono in conspectu suo dedit Deus sapientiam, et scientiam, et lætitiā; peccatori autem, afflictionem et curam superfluum. Utinam miseri amatores carnis ac mundi essent ista experti; utinam saperent, et intelligerent, ac novissima providerent.

Ps. lxx, 23.

Sap. v, 6, 7.

Eccle. ii, 26.

Deut. xxxii, 29.

Tertius portitor, est præsentis vitæ prosperitas seu temporalium affluentia rerum, quæ decipit multos, et tanquam tenacissimus viscus detinet eos in vitiis, ita quod ad divina et spiritualia, ad cœlestia et æterna parum aut nil afficiuntur. Ideo in Proverbiis inducitur : Prosperitas stultorum perdet eos. Unde, secundum Gregorium, servis Dei prosperitas multo plus quam adversitas est timenda : præsertim quia in temporalibus prosperari, solet esse signum reprobationis ac damnationis futuræ, quia electos suos Deus in sæculo isto arguit et castigat. In adversis ergo potius quam in prosperis est gaudendum, juxta illud Jacobi : Omne gaudium existimate, fratres, quum in varias tentationes incideritis. Hinc ait Salvator : Væ quum benedixerint vobis homines. Imo Psalmista terribiliter loquitur : Deus dissipavit ossa eorum qui hominibus placent; confusi sunt, quoniam Deus sprexit eos. Ecce quam periculosa est mundi prosperitas. Qui itaque cupit esse de numero electorum, non recuset exerceri eventibus adversorum.

Prov. i, 32.

Jacob. i, 2.

Luc. vi, 26.

Ps. lxx, 6.

Quartus portitor, est immoderata confidentia de misericordia Dei, quasi minor sit divina justitia quam misericordia. Illis quippe Deus pronus est misereri qui de pristinis dolent abstinere peccatis; qui

vero peccant in spe, atque ob id audacius A contumeliam faciunt Deo, quoniam ipse bonus et pius est, incidunt in divinæ rigorem justitiæ, quum sint ingratis Deo et improbissimi coram eo. Hinc scriptum

Eccli. v, 5-7.

est in Ecclesiastico : Non adjicias peccatum super peccatum, et ne dicas, Misericordia Domini magna est; misericordia enim et ira ab illo cito proximant, et in peccatores respicit ira illius.

Insuper possunt et portitores alii assignari. Primus est fiducia longioris vitæ.

Math. xxv, 13.

Contra quam loquitur Christus : Vigilate, B quia nescitis diem neque horam. Et quamvis quis sciret se diu victurum, tamen quanto diutius perseverat, habituatur et assuescit in vitiis, tanto ineptior erit ad resurgendum. Iterum, certum est quod stultum est emendationem et conversionem differre : nam interim homo Deum creatorem suum graviter multipliciterque offendit, tempus infructuose, imo et damnose expendit, multa et maxima negligit bona, et futura sibi auget supplicia; servit diabolo, ingratus est Christo, animam suam quotidie miserabiliter vulnerat, foedat, occidit, et coram Deo facit odibilem, foetidam atque turpissimam. Secundus est consideratio culpæ alienæ. Multi quippe dum majores et doctiores vident peccare et gravia scelera perpetrare, peccant audacius; qui tamen et si viderent illos præcipitare, submergere aut jugulare se ipsos, non imitarentur eos in his. Isti quoque

Ibid. xx, 16; xxii, 14.

non pensant quod ait Salvator : Multi sunt vocati, pauci vero electi. Qui ergo non vult cum multis et magnis peccatoribus condemnari, non audeat eos in malis sequi.

III Joann. 11.

Hinc in tertia sua Canonica ait Joannes : Carissime, noli imitari malum, sed quod bonum est semper. Accipe ergo exempla virtutum a bonis, non vitiorum a malis. Tertius est dilatio divini judicii. Ideo Salomon ait : Quia non cito profertur contra malos judicium, absque omni timore filii hominum perpetrant mala. Sed attendamus quod rursus Salomon loquitur : Nescit

homo finem suum; sed sicut pisces capiuntur hamo, et aves laqueo, sic homines capiuntur tempore malo, quum eis exemplo supervenerit. Quartus est adulatio in-justorum : quia ut ait Psalmista, Laudatur peccator in desideriis animæ suæ, et injustus benedicitur.

Ps. x, 3, sec. Hebr.

Insuper per loculum in quo adolescens defunctus ferebatur ad monumentum, intelligendum est corpus in quo anima peccatrix ad infernum deducitur, dum concupiscentiis servit, nec vanitatibus suis renititur. Sed Christus electis compatiens animabus, accedit, et corpus tangit per infirmitatem et tribulationem multiplicem, ita quod præfati portitores desistunt et stant. Quoniam homo tunc timet se moriturum atque in manus Dei viventis casurum, idcirco exhortationibus acquiescit ac pœnitet, et cum adolescente illo spiritualiter surgit. Porro misericordia Dei, omnium horum bonorum fontalis est causa.

Luc. vii, 12.

Abjiciamus ergo a nobis universos portitores præfatos, nec permittamus nos per eos ad infernum deduci, hoc est sic decipi ut in vitiis maneamus emendationemque differamus, et morte jam imminente postulemus pœnitentiæ tempus : quemadmodum accidit cuidam juveni viro, qui fuit in studio socius meus et commensalis ad tempus. Eratque vir corpore valde fortis, sed vagus lascivusque nimis : unde et ab ipso me separavi. Quumque ad tricesimum circiter annum venisset, pestilentia tactus, ad extrema perductus est; et videns mortem jam sibi imminere, lamentabiliter dixit : Heu! nunc venit mors quando inciperem primo aliquid agere boni. Quibus dictis, protinus expiravit. Denique, eodem anno quo Ordinem ingressus sum, vidi in villa magna, in die dedicationis, presbyterum juvenem ultra modum vagum ac lubricum, qui habuit super caput suum pileum stramineum ita pennis pavonum in altum erectis opertum, ut vix stramen videretur in eo : qui eodem anno defunctus est.

Ibid. ix, 12.

AD RELIGIOSOS

SERMO QUARTUS

DE TRIBULATIONIS UTILITATE; ET QUOMODO CHRISTUS IN CORDE
ET CORPORE PORTANDUS SIT.

FLECTO *genua mea ad Patrem Domini nostri Jesu Christi. Ephes. III, 14.*

Hortatur sanctus Apostolus in præsentī epistola, ne quis tam pusillus et imperfectus existat, ut ex consideratione tribulationum, persecutionum et adversitatum quas viri virtuosī sustinent in vita præsentī, pusillanimis fiat aut retrahatur a bonis: sicut quidam nondum satis illuminati, dum justos et studiosos ac sapientes conspiciunt in hac vita tribulationibus exerceri, terrentur atque a bono deficiunt inchoato, quasi inane sit Deo servire aut sapientiæ operam dare, quum hi qui devotionis ac sapientiæ studio magis insistant, et zelo Dei atque justitiæ amplius inardescunt, multoties præ ceteris a ceteris irrideantur ac molestentur. Imo quidam defectuosiores, instar squamarum sibi coherēnt ad persequendum eum in quo forte aliquid specialis gratiæ videtur lucere, in tantum quod quidam simpliciores Fratres Fratrem talia patientem quodammodo miserum reputent, et ejus vestigia sequi non audeant, ne et eis contingant similia. Sed isti sunt valde imperfecti, sicut et illi persecutores sunt valde maligni. Nonne Deus electos suos in vita hac per adversa et aspera purgat, exercet ac perficit, et per talia disponit eos quotidie ad perfectiora gratiæ dona beatitudinemque majorem, facitque eos expertos et exercitatos in via virtutum, atque a multis vitiis retrahit eos, et a purgatorii pœnis salubri compendio eos præservat? Ecce quanta est

A tribulationum utilitas, quanta electio ac beatitudo æquanimiter sustinentium eas. Hinc electissimi Dei gravissima in hoc mundo pertulerunt adversa. Quemadmodum ergo beatificamus patres et sanctos dudum defunctos qui in sæculo isto passi sunt gravia; sic et homines devotos quos nunc infirmitatibus corporis, tentationibus dæmonum, persecutionibus iniquorum, increpationibus et correctionibus superiorum suorum exerceri conspiciamus, beatificemus in cordibus nostris, eosque tanto arbitremur feliciores, quanto omnia illa abundantius ac æquanimius patiuntur, quum et Christus in Evangelio protestetur: Beati *Matth. v,* estis quum maledixerint vobis homines, ^{11.} etc. Jacobus quoque apostolus: Omne (inquit) gaudium æstimate, quum in diversas tentationes incideritis. Porro impios quos prosperari et deliciari videmus, miseros arbitremur, et pro ipsis Dominum deprecemur.

Insuper gloriosus Apostolus dicit omnem paternitatem in cœlo et in terra a *Ephes. III,* ^{15.} Patre æterno nominari ac derivari, ita quod nomen et ratio paternitatis primo, principalissime ac verissime Deo Patri conveniunt, quamvis per modum eminentiorem quam comprehendere valeamus. Ipse enim est prima omnis fecunditatis et communicabilitatis origo, omnis causalitatis et paternitatis principium, qui se ipsum intuendo et intelligendo, sui ipsius conceptum et verbum æternaliter in se profert ac gignit. Quod verbum est unicus Filius ejus,

ei non solum similis in natura, sed et A de possessionibus, nec de parentibus, nec de gloria vitæ præsentis, non de amicis, aut fratribus, aut quocumque terreno; sed omnem suam habitudinem et affectionem, omnem ad aliquid passionem, omnem de his sollicitudinem odiens atque excutiens, et proprium corpus refrenans, nudus et sine sollicitudine terrena, et absque pigritia, Christum sequetur, in cœlum semper adspiciet, et inde auxilium implorabit, secundum sanctum David qui dixit, Adhæsit

anima mea post te, et Jeremiam dicentem, Ego non laboravi te sequens, et diem hominis non concupivi, tu scis. Confusio maxima est post vocationem ad quam vocavit nos Deus, et non homo, nos qui omnia exteriora reliquimus, de aliquo curare et sollicitari non valente nobis in die mortis nostræ prodesse. Nempe istud dixit Dominus Jesus Christus, converti retrorsum et respicere retro, nec aptum inveniri ad regnum cœlorum. Dominus Christus sciens cordis nostri lubricam fragilitatem ad affectiones mundanas, et quomodo monachi sæcularibus participantes seu communicantes seque commiscentes, faciliter convertantur rursus in mundum, dicenti sibi, Dimitte me primum ire et sepelire patrem meum, respondit : Dimitte mortuos sepelire mortuos suos. Hæc in sententia Climacus.

Sed circa præallegatum Jeremiæ verbum utiliter quæritur, quid sit concupiscere diem hominis. Respondetur, quod diem hominis concupiscere, est ea desiderare quæ homines mundani et carnales in diebus suis in sæculo isto affectant, appetiunt et amplectuntur, videlicet divitias, delicias et honores, vanitates et insanias falsas, joculari, ridere, in concupiscentiis et carnalitatibus tempus expendere, quemadmodum ad Jerusalem dixit Salvator : Et quidem in hac die tua, quæ ad pacem tibi. Qui ergo Dei intuitu et amore hæc omnia aspernatur, diem hominis non concupiscit. Nec solum ea non desiderare debemus, sed etiam fastidire, et tanquam tormenta vitare ac fugere, ut sic mundus

Quemadmodum ergo beatus Apostolus

flexis genibus Deum Patrem oravit pro Ephesiis quibus hæc scripsit, ut ipse Deus Pater secundum divitias gloriæ suæ, corroboraret corda eorum per Spiritum Sanctum, ita ut Christus per fidem habitaret in eis, radicatique essent in caritate; ita et nos devotissime Deum Patrem oremus, quatenus corda nostra ex se ipsis semper fragilia atque in omne peccatum proclivia, dignetur secundum infinitam opulentiam et munificentiam ac omnipotentiam suam, gratiosissime confirmare et omni die in se ipso fortius consolidare, ne in peccata ruamus, sed Christo per fidem formatam habitante in nobis, in omni caritate et perfectione stabiliamur, omnem quoque tentationum impulsus, et omnem passionum ventum ac impetum velociter exsufflemus, simusque similes viro sapienti qui ædificavit domum suam supra petram. Ædificemus ergo habitaculum nostri cordis supra Christum, in ejus humilitate, patientia, paupertate, obedientia, caritate cor nostrum et omnem vitam nostram fundantes, præfatas Salvatoris virtutes strenue imitantes, ut non habeamus ad aliquid passionem, id est, ad nihil vitiose afficiamur.

Quod quid sit, et a quo fiat, et qualiter fieri debeat, pandit Climacus, dicens : In veritate Dominum nostrum Jesum Christum diligens, et ipsum in corde suo ac corpore portans, in corde per fidem, in corpore per ipsius castigationem et quotidianam crucifixionem, in veritate futurum regnum adipisci inquirens ac studens, in veritate dolorem de suis peccatis et offensionibus habens, in veritate memoriam tormentorum inferni possidens, et rigorem æterni judicii pensans, in veritate memoriam et timorem exitus sui assumens, non ulterius amabit, neque curabit, neque sollicitus erit de pecuniis, nec

Ps. LXII, 9.

Jer. XVII, 16.

Luc. IX, 62.

Ibid. 59, 60; Matth. VIII, 21, 22.

Luc. XI, 42.

Joann. X, 30.

Ephes. III, 14 et seq.

Matth. VII, 24.

Galat. vi, 14. crucifixus sit nobis, et nos mundo. Qui talis est, cum Apostolo dicere habet : Mihi absit gloriari, nisi in cruce Domini mei Jesu Christi, per quem mihi mundus crucifixus est, et ego mundo.

Postremo certissimum est quod quanto cordialius Deum diligimus, et Christum in nostris circumferimus cordibus, atque novissima nostra præmeditamur, tanto intensius ac intimius omnia illa despiciamus ac fastidimus mundana, nec aliquid honoris aut excellentiæ, aut pristinæ libertatis seu egressionis de cœnobii monumento appetimus, imo ineffabiliter abhorremus : quemadmodum sancti viri internæ exercitationis suavitatem experti ac desuper illustrati, scientes prælationis pericula et spiritualium

A exercitiorum atque profectuum impedimenta ex occupatione externa et discursu per loca diversa provenientia, vehementissime prælationes atque officia, et educationem de cellulis suis ac claustris, detestabantur ac fugiebant. Discamus ergo et assuescamus in solo summo omnipotentique Deo cor nostrum defigere, omnia ejus desideria adunare, omnes intentiones rectificare, actionesque universas et cogitationes simplificare, ut in cordis latitudine, puritate et devotione dulciter, amore et familiariter ambulemus in eo, et cum eo, et coram eo. Habitemus quoque in ipso, et ipse in nobis, et immobilitemur in ipso, in ejus amore semper crescentes. Ad laudem, etc.

SERMO QUINTUS

MEMORIA MORTIS QUÆ GIGNIT BONA ; ET DE PURGATORII POENIS.

MISERICORDIA motus Jesus, dixit : *Adolescens, tibi dico, surge.* Luc. vii, 13, 14.

Luc. vii, 12 et seq. Sicut in evangelio legitur hodierno, benignissimus Filius Dei compatiens vehementissimo mœrori matris viduæ unici filii sui mortem deflentis, etiam non rogatus consolatus est eam : primo verbis, Noli (inquiens) flere ; deinde exhibitione miraculi, filium ejus suscitando a morte solo imperio potestatis suæ divinæ. Suscitavit autem Christus Dominus et alios duos, videlicet filiam archisynagogi ac Lazarum. Quid vero spiritualiter per horum trium mortuorum suscitationem designetur, in præmissis est expressum sermonibus. Illis ergo omissis, nunc quod inspiraverit Spiritus veritatis, dicetur.

Marc. v, 38-42 ; Joann. xi, 38-44.

Quemadmodum ergo adolescentem illum corporaliter mortuum, quum duceretur ad tumulum, Christus corporaliter suscitavit, sic usque in præsens multos

C quotidie per intentam mortis meditationem suscitatur a morte peccati. Eos quoque qui vivunt per gratiam, et in spirituali profectu sunt constituti, Spiritus Sanctus per profundam mortis corporalis meditationem suscitatur aut præservatur ab omni torpore pigritiæ et negligentia animæ, facitque eos ad labores ac alia quæque exercitia virtuosa paratos. De hoc sic loquitur Climacus : Memoria mortis his qui sunt in monasterio gignit labores, dolores et exercitationes, videlicet quia ad illa inducit eos ; magis vero beatæ ignominie delectationem, id est injuriam, ignominiam, aspernationem, facit delectabiliter sustinere, quatenus talia propter Deum et sua peccata libentissime tolerando, mereantur apud Deum misericordiam invenire in mortis suæ articulo. Porro in solitariis habet hæc meditatio mortis alios quosdam salubres effectus, sicut Climacus ait : Apud eos qui solitarii sunt, gignit depositionem

turbationis ac tumultus curarum, indesinentem orationem et mentis custodiam. Denique, Cassiano testante, ad omnium vitiorum, præsertim superbiæ, exstirpationem, atque ad omnis boni executionem, ad omnem spiritualem profectum valde præcipue confert cordialis ac frequens meditatio mortis. Cujus quamvis certa hora ignoretur, tamen certissime scitur quod ad eam incessabiliter unusquisque propinquet mortalium, quod item celeriter veniet. Et istud intelligendum est in quantum mors non solum consideratur ut mors, et ut finis vitæ præsentis ac quædam acutissima pœna, sed etiam ut porta ad aliam vitam perpetuam, sive in summa miseria, sive in gloria maxima, et item ut quidam ingressus ad districtum ac supermetuendissimum Dei judicium. Hinc Augustinus et alii multi Sancti affirmant : Nihil sic revocat a peccato, ut frequens mortis meditatio.

Et merito unusquisque diem et horam suæ mortis expavescere debet. Primo, quoniam nescit an amore an odio dignus sit, potissimum vero ignorat an tunc amore an odio dignus invenietur. Secundo, quia in hora mortis, homines a dæmonibus tentantur gravissime. Tertio, quoniam post mortem non est pœnitentiæ locus, sed in quali mentis dispositione, videlicet conversione seu aversione, quis moritur, in ea æternaliter est mansurus. Vehementissime ergo formidare debemus ne tunc a Deo mereamur relinqui : ideo interim laudabiliter conversari non differamus, quia ut Augustinus loquitur, Non potest male mori qui usque ad mortis horam vixerit bene, et bene vix moritur qui male vixit. Quarto, quia post mortem mox restat particulare judicium morientis districtum ac metuendum. Quinto, quia quum paucissimi evolent, ad minus purgatorii pœna post mortem etiam bonis pene universis adultis infligitur. Quæ pœna mirabiliter est molesta, et omnem quam sancti martyres passi sunt pœnam, excedit; estque amarior indesinenter quam pœna quam

A tolerat moriens in ipso mortis articulo, quando cor frangitur, quæ pœna indicibiliter gravis et magna est. Si ergo tam intense formidaremus per unam horam jacere nunc in medio fornacis ardentis, mirum quod non timemus per multos dies aut etiam annos post vitam hanc purgatorii ferre supplicia. Merito ergo dixit S. Hieronymus : Qui se quotidie recordatur moriturum, contemnit præsentia et ad futura festinat. Sanctus quoque Gregorius ait : Ad hoc Conditor noster latere nos voluit diem nostræ mortis, ut dum semper ignoratur, semper proximus esse credatur, et tanto unusquisque sit ferventior in operatione, quanto incertior est de suæ vocationis hora ac die. Mors ergo sit semper suspecta, ut dum eam providere non possumus, ad ipsam sine intermissione nos præparemus. Insuper, omni excussa mentis ignavia, quidquid boni valemus, infatigabiliter ac ardentissime in vera discretione agamus, non solum propter evadenda præcontacta pericula, sed ideo quoque, quia quum brevis sit vita præsens et mors jugiter appropinquet, statim et indilate post mortem sortiemur certissime inæstimabilem illam beatitudinem sempiternam, si interim sancte et fructuose vixerimus, et pro quotidianis culpis quotidie plene satisfecerimus. In ipso quoque agone, qui sancte interim vivit, securior erit, et consolationem desuper obtinebit majorem.

Deinceps, quamvis timor mortis sit homini naturalis, tamen ut Climacus profitetur, tremor mortis, videlicet intensa et immoderata ejus formido, est non actæ de offensionibus pœnitentiæ argumentum. Unde ut scribit Hieronymus : Quum beatissimus pater Mutius vidisset quemdam ex suis discipulis in extremis laborantem, et metu mortis graviter conceuti, dixit ad eum : Cur imparatus es, fili, ad profectum ? Accusatrix, ut video, ignaviæ tuæ, tecum pergit conscientia tua. Quumque S. Mutium rogaret discipulus, Obsecro, Pater, intercede pro me, ut modicum temporis spatium Dominus mihi largiri

dignetur, quo possim me emendare; respondit Mutius : Modo tempus pœnitendi requiris ? Quid faciebas in omni tempore vitæ tuæ ? Post hæc Mutius impetravit ei quod petiit. Verumtamen agnoscendum, quod etiam dispensatione divina interdum contingit ut et sancti viri in extremis multum formident, sicut de S. Arsenio legitur, qui morti proximus dixit discipulis suis : Timor mortis qui semper fuit in me, etiam modo in me est. Unde Gregorius : Sanctorum (inquit) animæ a levibus quibusque contagiis ipso sæpe mortis pavore purgantur, atque æternæ retributionis gaudia post ipsam a carne resolutionem suscipiunt; plerumque vero contemplationis internæ dulcedine, etiam dum mortis debitum solvunt, hilarescunt, et antequam carne exuantur, quadam lætitia perfruuntur.

Refert Climacus, quod fuit solitarius quidam in eremo Choreb habitans, in omni negligentia vivens, et nullam suæ animæ curam gerens. Qui tandem extreme ægrotans, quasi unius horæ spatio perfecte migravit a corpore. Qui rediens ad se ipsum, rogavit omnes qui aderant, inter quos fuit et Climacus, confestim recedere. Ipse vero ostium suæ cellulæ obstruens, intus clausus annis duodecim mansit, cum nullo colloquium habens, nec parvum nec magnum, nil præter panem et aquam gu-

stans. Jugiter sedens, et ad ea quæ vidit in eestasi stupens, sic mœrens intendebat, ut nunquam proprium morem seu apparatus mutaverit. Attentus considerans excessumque patiens, calidas lacrimas sine strepitu semper fundebat. Quum autem migraturus esset ad Dominum, ostium destruentes introierunt ad eum Climacus et alii Fratres, et eum valde rogantes, hoc solum audierunt ab eo : Indulgete mihi; nemo memoriam mortis habens ac nesciens, potest peccare. Quumque sepultus fuisset, requirentes Fratres ejus reliquias sanctas, eas non invenerunt, Deo eos certificante per hoc de studiosa et sancta pœnitentia viri illius.

Itaque his exemplis discamus omnem levitatem, pigritiam negligentiamque vitare, et juxta nostræ exigentiam vocationis, juxta debitum nostræ professionis diligenter Deo jugiter ambulare, in sanctitate et justitia Altissimo deservire, in linguæ et sensuum ac ventris refrenatione, in cordis custodia, in mentis munditia perseverare ac crescere, sicque nos ad mortem indesinenter parare, ipsam affectualiter omni hora præmeditando cum beato abbate Arsenio, de quo Theophilus archiepiscopus moriens dixit : Beatus es, abba Arseni, quia hanc, scilicet horam mortis, semper præ oculis habuisti. Sic ergo agamus ad gloriam et honorem Altissimi. Amen.

SERMO SEXTUS

DE UTILISSIMA MORTIS MEMORIA, ET PRÆPARATIONE AD EAMDEM.

PROPHETA magnus surrexit in nobis. D
Luc. VII, 16.

Hæc sunt verba turbæ quæ viso miraculo resurrectionis adolescentis defuncti, timore reverentiæ ac admirationis repleta, Deum magnificavit, et de Christo asseruit : « Propheta magnus surrexit in

nobis ». Christus enim secundum naturam humanam, etiam gratia prophetiæ fuit plenissime decoratus, et de secretis Dei, de futuris eventibus, de magnis mysteriis copiose erudit per se ipsum suos discipulos, potissimum in sermone quem post Cœnam fecit ad eos. Sed quia discipuli

Ephes. iv,

^{1.}

Joann. xiii.

^{xvii.}

tunc adhuc rudes fuerunt, nec ea quæ dicebantur a Christo capere erant idonei, ipse Dominus Jesus Christus post suam resurrectionem et ascensionem in cœlum,

Act. II, 3, 4. misit illis Spiritum Sanctum, qui ipsos de universis instruxit, quemadmodum in sermone præfato ipsis promisit, dicendo :

Joann. XVI, 13. Quum venerit ille Spiritus veritatis, docebit vos omnem veritatem; et rursus,

Ibid. XV, 26; XIV, 26. Quum venerit Paracletus, quem ego mit-
tam vobis a Patre, Spiritum veritatis, qui a Patre procedit, ille vos omnia docebit, et suggeret vobis omnia quæcumque dixerō

vobis. Christus ergo fuit summus sapientissimusque propheta, ut etiam adversarius nostræ legis, miserrimus Mahometus, in suo Alcorano testatur, quem et de virgine natum fatetur, verbumque Dei et spiritum ac nuntium Altissimi nominat.

1 Cor. I, 24. Hic itaque Christus, virtus et sapientia Dei Patris, verbo et sui ipsius exemplo docuit nos cuncta terrena despicere, carnalia et caduca relinquere, æterna et cœlestia jugiter affectare, atque ad mortem

Matth. XXIV, 42. nos indesinenter parare : Vigilate, inqui-

Ibid. XXV, 13. ens, quia nescitis qua hora Dominus vester venturus sit; et item, Vigilate, quia nescitis diem neque horam. Unde et Mar-

Marc. XIII, 35, 36, 33. cus eum dixisse scribit : Vigilate (nescitis enim quando Dominus veniet : sero, an media nocte, an galli cantu, an mane), ne, quum venerit repente, inveniat vos dormientes; videte, vigilate et orate. Porro magna pars præparationis ad mortem, est frequens et cordialis, affectiva atque profunda meditatio mortis, qua homo se cogitat celeriter moriturum, et in ipsa mortis

hora puncturas et angustias mortis amarissimas acutissimasque passurum, ab invisibilibus hostibus circumvallandum et dire tentandum, divini quoque iudicii consistorio præsentandum, et de minutissimis etiam culpis tam commissionis quam omissionis dijudicandum ac puniendum, pro quibus interim non satisfecit plenarie. Itaque talis meditatio mortis saluberrima est et sapientia magna, quoniam revocat hominem a peccatis, et de præteritis vitiis

A parit contritionem, compunctionem, et terrenorum despectum inducit, facitque hominem custoditum, timoratum ac fructuosum in omnibus.

Denique ad hoc ipsum allegant summi Doctores et sancti Patres etiam Platonem philosophum. Ait namque Hieronymus : Platonis sententia est, omnem sapientium vitam meditationem esse mortis. Debemus ergo et nos præmeditari quid aliquando simus futuri : et quod, velimus nolimus, longe abesse non potest. Ambrosius quo-

B que disseruit : Secundum Platonem, summa philosophia est meditatio mortis assidua. Sed et Climacus aliquid inde tangit, dicendo : Mirum certe quomodo et Græci tale aliquid sunt effati, quia philosophiam esse dicunt mortis meditationem. Verum ut hæc evidentius innotescant, diffusius introducam ac commemorabo quid de hac re dixerit et in scriptis reliquerit Plato, ut etiam ex gentilium philosophorum doctrinis confundatur pigritia, negligentia, insipientia et carnalitas nostra. Itaque in

C Phædone sic loquitur Plato : Vir in philosophia ducens vitam, confidit quum mori debeat, maximis fructum ire bonis. Revera philosophantes morti se parant. Mors aliud non est nisi animæ corporisque divisio. Non est philosophi studere circa voluptates escarum et potuum ac vene-
reorum. Ridiculum est virum omni vita præparantem se ad mortem, adveniente ea, moleste ferre eandem. Si quem videas graviter ferre quum debeat mori, nullo modo erat philosophus. Hæc Plato. Nomine

D autem philosophi intelligit amatorem sapientiæ. Præterea advertendum, quod in eodem libro multum seriose, pulchre, subtiliter et profunde loquitur Plato contra voluptates carnales, contra avaritiam, contra curiositates ac cetera vitia, et de contemplatione ac retributione quæ fit post vitam præsentem. Consuevit autem Plato libros suos nominibus intitulare discipulorum suorum, quorum intuitu edidit libros. Habuit vero discipulum nomine Phædonem, qui primo fuit servus quorundam

qui pravissima lucri cupiditate inducti, prostituerunt Phædonem, quia adolescens erat pulcherrimus. Quem Plato bonæ indolis esse considerans, redemit pecunia de turpitudine tanta, et philosophiæ eum applicuit, ejusque nomine præallegatum composuit librum, quatenus ipsum Phædonem ab omni carnalium voluptatum amore prorsus averteret, et amore sapientiæ inflammaret.

Præterea ad habendam salubrem mortis memoriam, expedit quod in Horologio æternæ sapientiæ dicitur, commemorare. Ibi enim pro excitanda devotione, similitudinarie inducitur quidam speciosus juvenis morte præventus sic loqui et exclamare : Circumdederunt me gemitus mortis, dolores inferni circumdederunt me. Heu me, Deus æternæ, ad quid in hunc mundum sum natus ? O mors, quam amara est memoria tua cordi jucundo in deliciis enutrito, quam horribilis est ei præsentia tua ! O quam parum credidissem quod tam cito mori debuissem ! Sed nunc, o mors, repente quasi ex insidiis erumpens, super me irruisti, et mille funibus me ligasti, et tecum me trahis. Nunc præ dolore complosis manibus rugitum emitto, cupiens mortem evadere, et non est locus effugiendi. O quanta bona in tanto tempore sano corpore facere potui, et non feci ! Quam immensas spirituales divitias congregare potui, et neglexi ! En cruentæ bestiæ, larvales dæmonum facies, nigerrimi æthiopes innumerabiles circumdant me, insidiantes et exspectantes miseram animam meam in proximo exituram, ut eis torquenda tradatur. O districtissime Judex, quam districtissima sunt judicia tua, quam multum ponderas, judicando me miserum, ea quæ nulla aut minima reputantur ! En sudor mortis adest, membra penetrans et victam jam esse naturam contestans. O terribilis aspectus justi Judicis mihi jam præsentis per timorem, subito venturi per exhibitionem ! Nunc valete, o socii et amici carissimi, quia hinc nunc exiturus, oculum mentis ad

aliam et ignotam regionem converto, et ad purgatorium quo deducendus exsisto, inde non exiturus nisi minimum quadrantem reddidero. Ibi oculo cordis intueor miseriam et dolorem, pœnam et afflictionem multiplicem ; video ibi exurgere flammæ ignium, atque involvere et reimpingere animas miserorum, quæ tanquam scintillæ in medio ignis hinc inde jactantur. Multa in libro illo de ista scribuntur materia, ad devotionem excitandam proficua.

Ideirco hæc diligentissime præmeditemur ac salubriter imaginemur, quatenus omnia vana et frivola nobis omnino vertantur in nauseam, solisque spiritualibus exercitiis ac virtuosis laboribus delectemur, et quolibet die sic conversemur quasi morituri de sero. Nempe, ut beatissimus pater Macarius dixit, Monachus semper sic vivere debet quasi centum annis victurus, et quasi eodem die quo vivit moriturus, ut scilicet cum vera discretione sanctis exercitiis ferventissime et incessanter insistat, quatenus fervor et discretio se invicem ornent, informant, regant et actuent. Denique hoc ipsum et Seneca tetigisse videtur : Nemo, inquiens, scit quam prope terminus suus versetur. Sic itaque faciamus animum, quasi ad extrema jam ventum sit. Venientem nemo hilaris suscipit mortem, nisi qui se ad illam composuerit diu. Omnis dies velut ultimus ordinandus est, quia de felicitate hominis dies ejus ultimus judicat. Hinc ait et Climacus : Non est præsentem diem pie transire et exsequi, id est, diem hodiernum non possumus pie et fructuose expendere, nisi eum extremum et ultimum totius vitæ nostræ existimemus. Et denuo ait : Non sufficit hominibus dies, ut possint suum debitum Deo solvere absque diminutione et defectu. Quemadmodum omnibus alimentis magis necessarius est panis, ita præ ceteris bonis operationibus, intenta meditatio Dei ac mortis. Postremo, scire mori, non aliud est quam ad mortem semper esse paratum, secundum quod ait quidam devotus : Scire mori, est animam

Ps. xvii, 5,
6.

Matth. v,
26.

et cor semper ad divina habere erecta, ut
quandocumque mors venerit, paratum in-
veniat hominem, ut absque omni retra-
ctione eam quasi amicam suscipiat.

Discutiamus ergo quotidie conscientias
nostras, et quidquid parit remorsum, vera

A contritione, integra confessione, digna sa-
tisfactione mox deleamus ac evitemus;
horam mortis semper præ oculis habea-
mus, atque quotidie in sanctis operibus
magis ac magis abundare conemur. Ad
laudem et gloriam Omnipotentis. Amen.

DOMINICA XVII POST TRINITATEM

ENARRATIO IN EPISTOLAM

OBSECRO VOS, EGO VINCTUS IN DOMINO. Ephes. IV, 1-6.

HORTATUR Apostolus in præsentī epistola omnes Christifideles, ut juxta evangelicæ legis exigentiam conversentur, dicendo : *Obsecro vos, ego Paulus vinctus in Domino*, id est propter Deum et fidei prædicationem incarceratus (fuit enim Apostolus Romæ incarceratus atque ligatus, quando hæc scripsit Ephesiis), *ut digne ambuletis*, quotidie in virtutibus proficiendo, quia in via Dei non procedere, est retroire : « digne », inquam, *vocatione qua vocati estis* ad evangelicam legem christianamque fidem et religionem, Deo intus agente et per inspirationem internam vocante, meque Dei apostolo foris per prædicationem meam vocante : hoc est, sic vivite ut Christi lex jubet.

Cum omni, id est perfecta, *humilitate*; vel, « cum omni humilitate » tam interiori quam exteriori, *et mansuetudine*, quæ est virtus moralis iram refrenans. Hoc est quod docuit ac præcepit Salvator : Discite (inquiens) a me, quia mitis sum et humilis corde. Quo patet quod hæ duæ virtutes ad omnem Christianum præcipue pertinent. *Cum patientia*, quæ passionem tristitiæ moderatur. *Supportantes invicem*, ita ut unus defectum alterius patienter sustineat, unusque alteri in omnibus pro posse opem impendat, juxta illud : Alter alterius onera portate; *in caritate*, id est sincero affectu, non simulatione aut pro commodo temporali; *solliciti servare unitatem spiritus*, id est diligentes ac studio-

A si ad conservandum spiritualem unionem conformitatemque animarum, ut per caritatem habeatis cor unum et animam unam : unde ait Salvator, Pater sancte, *Act. IV, 32.* *Joann. XVII, 11.* *in vinculo pacis*, id est animi tranquillitate, quæ est spirituale vinculum unitatis præfatæ, quoniam nutrit eam atque conservat. Nam sicut per discordiam homines ab invicem dividuntur, ita per pacem spiritualiter colligantur.

B *Unum corpus* Christi mysticum estis, quia uno Spiritu, utpote paracleto Spiritu Sancto, spiritualiter vivificamini per caritatem et gratiam. Quemadmodum enim multa membra sunt unum corpus naturale, organicum, in quantum ab una anima informantur; sic multi fideles sunt unum mysticum corpus, secundum quod ab uno Spiritu Sancto spiritualiter vivificantur, et item in quantum in uno capite, scilicet Christo, connectuntur, a quo influentiam sortiuntur, videlicet vitam gratiæ et motum virtutum. *Et unus spiritus* estis cum Deo, ei fideliter adhærendo, quemadmodum alibi dicit Apostolus : Qui adhæret Deo, unus spiritus est. Vel, « unus spiritus » cum spiritu proximi estis, concordando cum eo in bonis. Vel, omnes estis « unus spiritus », non per essentiam, sed per caritatis adunationem, quemadmodum per Jeremiam loquitur Deus : Dabo eis cor unum et animam unam. *Sicut vocati*

Matth. XI, 29.

Galat. VI, 2.

I Cor. VI, 17.

Jer. XXXII, 39.

estis in una spe, id est ad eandem beatitudinem, *vocationis vestræ*, id est ad quam vestra ordinatur vocatio.

Deinde subditur ratio cur conservanda sit unitas ista : nam, *Unus Dominus*, scilicet Deus Trinitas. De quo in libro Esther Esther xiii, 9. legitur : Domine, rex omnipotens, in ditione tua cuncta sunt posita. *Una fides*, id est, omnium Christianorum est una et eadem fides in specie, puta ex parte objecti, quod est veritas prima; sed ex parte subsectorum fides numeraliter multiplicatur. Quamvis enim multa sint credibilia et multi articuli fidei, una tamen est formalis et propria ratio objectalis cui fides innititur, et propter quam omnia illa creduntur, utpote veritas increata : quemadmodum etiam una est caritas qua Deus proximusque diligitur, quoniam Deus est causa formalisque ratio diligendi proximum. *Unum est Baptisma* in specie, quia materia una est, utpote aqua, et una est forma ipsius, videlicet forma verborum. Dicitur quoque « unum Baptisma », quoniam iterari non potest, estque ejusdem

A valoris a quocumque ministretur, quoniam non consistit in merito dantis seu exterius baptizantis, sed in virtute et merito dominicæ passionis, seu Christi intus lavantis. *Unus Deus et Pater omnium*, id est Deus Trinitas : qui Deus omnium appellatur ratione creationis; Paterque omnium, ratione benignæ gubernationis atque paternæ provisionis. Cui Isaias dicit : Pater noster es tu, nos vero lutum; et fictor noster tu, et opera manuum tuarum omnes nos. *Qui est super omnes*, id est, infinita excellentia universos transcendit: juxta illud in Psalmo, Quoniam tu Dominus altissimus super omnem terram, nimis exaltatus es super omnes deos; *et per omnia*, id est, sua immensitate omnia continet, implet et penetrat : quemadmodum per Jeremiam contestatur, Numquid non cœlum et terram ego impleo? *et in omnibus nobis est*, quia in Christifidelibus est per fidem, caritatem et gratiam. Nam et ipsi sunt templum Dei, dicente Apostolo : Templum Dei sanctum est, quod estis vos. Is. lxiiv, 8. Ps. xcvi, 9. Jer. xxiii, 24. I Cor. iii, 17.

SERMO PRIMUS

DE PERFECTIONE VITÆ CHRISTIANORUM, ET QUOMODO DIGNE AMBULARE
IN VOCATIONE SUA DEBEANT.

DIGNE ambuletis vocatione qua vocati estis. Ephes. iv, 1.

In his verbis compendiosissime docet Apostolus qualis esse debeat omnium Christifidelium vita, ut scilicet conversentur juxta Christi doctrinam, præcepta et opera, quia ut ait Salvator, Cui plus datum est, plus requiretur ab eo. Qui ergo ad christianæ religionis ac evangelicæ legis notitiam est vocatus atque perductus, ita quod Christianus effectus est, tenetur Deo gratus esse de beneficio tanto, ita quod Deus requiret ab eo conversationem tam gratio-

sæ ac sublimi vocationi correspondentem, consonam seu conformem. Tenetur itaque quilibet Christianus evangelicæ legis præcepta servare, primo unum Deum colendo. Primo autem et maxime colitur Deus per fidem, spem et caritatem, ut scilicet in ipsum indubitanter credamus, in eo firmiter confidamus, et eum ferventer jugiterque amemus. Isti sunt actus interiores quibus colitur Deus.

Denique, sicut lex Christi est maxime alta, spiritualis atque perfecta, sic Christianorum vita debet esse præ ceterarum

gentium conversatione sublimis, id est in omni virtute excellens, et spiritualis per terrenarum et carnalium rerum contemptum, perfecta quoque per ferventem Dei amorem divinorumque contemplationem.

Christiani itaque debent præcipue esse casti ac sobrii, divino amore succensi, et salutaribus meditationibus ac sanctis contemplationibus occupati. Hinc ad Philippenses scribit Apostolus : Omnia facite sine murmurationibus, ut sitis sine querela, simplices filii Dei, in medio nationis pravæ atque perversæ, inter quos lucetis sicut luminaria mundi, verbum vitæ continentes. Unde prima Petri omnibus dicitur Christianis : Conversationem vestram inter gentes habete bonam, ut in eo quod detrectant de vobis tanquam de malefactoribus, ex bonis operibus vos considerantes, glorificent Deum. Ex quibus auctoritatibus elucescit, quam alta et in omni virtute sublimis ac irreprehensibilis debet esse Christifidelium vita.

Insuper, quod debeat esse spiritualis per omnium terrenarum atque carnalium rerum contemptum, constat ex verbis Christi dicentis : Qui viderit mulierem ad concupiscendum eam, jam mœchatus est eam in corde suo; et rursus, Cavete ab omni cupiditate, quia possibilis est camelum per foramen acus transire, quam divitem intrare in regnum cœlorum. Ad idem pertinet quod iterum ait : Væ vobis divitibus, qui habetis consolationem vestram; væ vobis qui saturati estis, quia esurietis. Itemque : Videte ne graventur corda vestra crapula vel ebrietate, aut curis hujus sæculi. Hinc iterum docet : Nolite solliciti esse in crastinum, et nolite thesaurizare super terram. In quibus omnibus jubet carnalia et terrena contemni, nisi in quantum necessaria aut utilia sunt pro conservatione propriæ vitæ aut speciei. Idcirco ait princeps Apostolorum : Obsecro vos tanquam advenas et peregrinos abstinere a carnalibus desideriis, quæ militant adversus animam.

Postremo, quod vita Christianorum de-

beat esse perfecta per divinæ dilectionis ardorem, testatur Christus quum ait : Primum mandatum est : Diliges Dominum Deum tuum ex toto corde tuo, et ex tota anima tua, et ex tota mente tua, et ex tota virtute tua. Secundum autem simile est huic : Diliges proximum tuum sicut te ipsum. Quamvis autem præceptum hoc etiam in veteri datum fuerit Testamento, Christus tamen docet perfectiorem et expeditiorem modum implendi illud, quam docebatur in veteri lege.

Præterea, quum Apostolus in præsentī epistola dixisset in generali, « Digne ambuletis vocatione qua vocati estis », protinus quasi exprimens quid sit hoc et qualiter fieri debeat, subdidit, Cum omni humilitate : primo, quia humilitas est omnium fundamentum virtutum; secundo, quoniam Christus verbo et opere potissimum docuit humilitatem; tertio, quia ut ait Gregorius, sicut superbia signum est reproborum, ita humilitas signum est electorum. Unde quemadmodum Augustinus distinguit filios Dei a servis diaboli, per hoc quod in filiis Dei, qui sunt cives supernæ Jerusalem, regnat ac prævalet amor Dei crescens usque ad contemptum sui, in servis vero diaboli, qui cives sunt Babylonis, regnat improbus amor sui crescens usque ad contemptum Dei (nam facit hominem præcepta Dei negligere, voluntatemque propriam voluntati Dei præponere); ita Gregorius inter istos distinguit per humilitatem atque superbiam, quia per humilitatem fit homo filius Dei, per superbiam servus filiusque diaboli.

Præterea, valde pensandum est quod ait Apostolus, Cum omni humilitate, quia ad vere Christianum non solum pertinet atque requiritur humilitas cordis, verum etiam humilitas oris, ut vitet verba jactantiæ, præsumptionis et animositatis, ne quis laudet se ipsum, juxta illud in Proverbiis : Laudet te alienus, et non os tuum; extraneus, et non labia tua. Item humilitas operis, juxta illud Ecclesiastici : Noli te extollere in faciendo opere tuo. Idcirco in

Philipp. ii,
14-16.

I Petr. ii,
12.

Matth. v,
28.

Luc. xii, 15;
Matth. xix,
24.

Luc. vi, 24,
25.

Ibid. xxi,
34.

Matth. vi,
34, 19.

I Petr. ii,
11.

Matth.
xxii, 37-39;
Marc. xii,
29-31.

Deut. vi, 5.

Ephes. iv,
1.

Ibid. 2.

Prov. xxvii,
2.
Eccli. x, 29.

opere curiositas singularitasque vitandæ sunt. Requiritur quoque humilitas in vestitu, quia ut sancti Patres testantur, si vir aut mulier ornaverit se, et suo ornatu adspectum hominum in se provocaverit, etiam si nullum malum inde sequatur, tamen æternum supplicium patietur, quoniam quantum in se fuit, propinavit venenum, si fuisset qui biberet. Unde certissime potest concludi, quod uti vestitu ornato ad libidinem provocativo, sit mortale peccatum. Item humilitas in incessu omnique apparatu, quoniam per Isaiam loquitur Do-

Is. III, 16, 17.

minus : Pro eo quod elevatae sunt filiae Sion, et ambulaverunt collo erecto, et gradu composito incedebant, decalvabit Dominus verticem filiarum Sion, etc. Ideo de se ipso testatur Hieronymus : Ab adolescentia mea nihil sic didici evitare sicut tumido corde et erecto collo incedere. Per Sophoniam quoque Dominus comminatur:

Soph. I, 9.

Visitabo super omnem qui arroganter ingreditur. In Ecclesiastico quoque ait Scriptura : In vestitu ne glorieris unquam.

Eccli. XI, 4.

Ephes. IV, 2.

Secundo adjecit Apostolus, Et mansuetudine. Nempe post humilitatem, præsertim spectat ad unumquemque Christifidelem mansuetudo, per quam fit Deo proximisque amabilis, et in mutua conversatione tolerabilis ac suavis. Propter hoc in Ecclesiastico dicitur : Fili, in mansuetudine opera tua fac, et super omnem hominum gloriam diligeris. Mansuetudo quoque est signum sapientiæ, sicut ira est signum stultitiæ. Propter quod Jacobus ait : Quis sapiens et disciplinatus inter vos? Ostendat operationem suam in mansuetudine sapientiæ. Denique qui vere est humilis, non facile propter injuriam sibi illatam irascitur, nec inordinatam appetit ultionem : sicque ex humilitate mansuetudo causatur.

Eccli. III, 19.

Jacob. III, 13.

Ephes. IV, 2.

Tertio addit Apostolus, Cum patientia, quia hæc virtus valde necessaria est omni fideli in vita præsentis, quæ adversitatibus plena est. Ideo ne quis propter adversa immoderate tristetur ac perturbetur, patientia indiget. De qua ait Salvator : In pa-

Luc. XXI, 19.

tientia vestra possidebitis animas vestras. Quod si in patientia nostra nostras animas possidemus, constat quod per impatientiam eas amittimus, quia ut Salomon loquitur, qui impatiens est, stultitiam operatur. At vero qui humilis vere consistit, adversitatibus, tribulationibus, confusionibus ob sua peccata dignum se reputat : ideo dum sibi contingunt, non contristatur, imo potius gaudet in eis. Sicque ex humilitate patientia generatur.

Prov. XIV, 17.

Quarto addit Apostolus, ut nos invicem caritative et pie sustineamus ac supportemus, quemadmodum in nostris defectibus a Deo misericorditer tolerari optamus. Quilibet enim proprios habet defectus, et indiget a proximis supportari atque a Deo misericorditer adspici. Unde qui contra proximos propter eorum defectuositates facile indignatur, cito amaricatur, eosque despicit et supportare renuit, quid aliud promeretur, nisi ut Deus eum juste despiciat, rigoroque judicet, et ejus peccata graviter ulciscatur, ut impleatur in eo quod ait Salvator, Eadem mensura qua mensi fueritis, remetietur vobis?

Ephes. IV, 2.

Matth. VII, 2.

Postremo saluberrimam Apostolus dat doctrinam, ut simus solliciti servare unitatem spiritus in vinculo pacis. Unusquisque ergo summe provideat, curet, conetur ne sua singularitate, impatientia, turbulentia, inordinatione aut quacumque perversitate alios turbet dissentientesve faciat, et ne ipse ab aliis per mentis discordiam separetur, sed caritatem, pacem, conformitatem laudabilem totis viribus foveat et conservet cum his inter quos conversatur.

Ephes. IV, 3.

Hoc enim angelicum est, quia in angelis inviolabilis est dilectio, pax atque conformitas sancta : unde unitatem spiritus solvere et vinculum pacis dirumpere, diabolicum rite censetur. Idecirco de talibus turbatoribus, inquietis, perversis, ait in sua Canonica Judas apostolus : Hi sunt querulosi, murmuratores, secundum desideria sua ambulantes ; itemque, Hi (inquit) sunt qui segregant semetipsos, animales, spiritum non habentes.

Judæ 16.

Ibid. 19.

Præterea præinductum documentum Apostoli, quo hortatur ut digne ambulemus vocatione qua vocati sumus, non solum est intelligendum modo præfacto, ut scilicet juxta communia evangelicæ legis ambulemus præcepta, ad quorum observantiam universi tenentur, verum etiam ut unusquisque ea adimpleat ad quæ ratione specialis status seu gradus vel ordinis obligatur: ut scilicet religiosi seu monachi juxta suarum regularum vivant tenorem, canonici quoque juxta decreta summorum Pontificum eis præfixa, similiter sacerdotes secundum statuta eis præcepta, conjugati etiam prout ad eorum pertinet statum, quatenus vir debito modo se habeat ad suam uxorem, et econverso, et parentes ad sobolem suam, et econverso, unusquisque quoque ad suos superiores, et econverso. Quæ omnia adimplere, est de necessitate salutis, et magna indiget gratia, magna custodia præcipuoque conatu. Propter quod verissime testatus est Christus: Arcta est via quæ ducit ad vitam; itemque, Regnum cælorum vim patitur, et violenti rapiunt illud; atque Apostolus: Non coronatur nisi qui legitime certaverit. Agamus ergo viriliter, et juxta præsentis epistolæ sacratissima documenta, studeat unusquisque digne sua vocatione coram Altissimo ambulare, præsertim quia ingratum est Spiritui Sancto quidquid ei obtulerimus, neglecto eo ad quod tenemur.

Præterea, quum juxta præscripta, tam virtuosa, pia, simplex et humilis debeat Christianorum vita existere, nonne hinc vehementissime est dolendum ac flendum, quod populus christianus in omni statu jam ad tantam devenit ruinam, ad tam intimoratum scandalosamque vitam? Ecce enim quanta est eorum vanitas, curiositas, pompa et novitas in vestitu, quanta incustodia in loquendo, quanta superfluitas in cibo et potu, quanta acedia ad divina, quam facile mutuo irascuntur, contendunt ac pugnant. Nullus vult aliquid pati a proximo, vixque a superioribus suis corripitur volunt ac corrigi, et alia innumerabilia et

graviora his scelera vigent in eis. O quam pauci incedunt per arctam viam salutis! Ideo S. Brigitta in Revelationibus suis, et alii quidam Sancti, fatentur et scribunt quod sicut cadit nix super terram, sic animæ corruunt in infernum.

Legitur in secundo libro Machabæorum, quod quum Antiochus rex sederet in curru, et currum agitari præciperet, quia contra Judæos fuit inflammatus, voluitque eos omnino destruere, Deus plagavit eum, ita quod cadens de curru, gravissime læsus est. Insuper dolore incurabili viscerum Deus eum percussit, in tantum quod vermes de ejus corpore scaturiebant, et foetor tam ingens, quod proprium ferre nequivit foetorem. Tunc Antiochus vexatione instructus, rediit ad se ipsum, et dixit: Justum est subditum esse Deo, et mortalem non paria Deo sentire. Deinde oravit Deum, et multa bona se promisit facturum, ac honoraturum Judæos et templum, universaque loca sacra se visitaturum, Judæum quoque se esse futurum: et tamen, sicut præfato scriptum est loco, misericordiam non est consecutus a Deo. Cujus causam assignant doctores, quoniam tota ejus pœnitentia, oratio atque promissio ex servili venit timore, non ex zelo justitiæ, neque ex Dei amore. Ex quo plane exemplo datur intelligi quam periculosum sit pœnitentiam usque ad agonem differre, et item quod plurimi videntur tunc pœnitere, et tamen non prodest eis ad veram salutem, quoniam ex servili pœnitent et confitentur timore. Verumtamen desperatio nulli est persuadenda. Sed idcirco hæc recito, ut certiolem securioremque viam eligat unusquisque, atque dum sanus et potens ac juvenis est, pœnitere ac Deo servire non negligat qui ad senium et languorem nondum devenit. Porro qui distulit usque ad senium et languorem, doleat se distulisse tamdiu, et invocet misericordiam Dei immensam, ut veræ pœnitentiæ gratiam sibi dignetur infundere, nec se æternaliter permittat perire. Ad laudem et gloriam nominis sui piissimi.

II Mach.
ix, 4 et seq.

Matth. vii,
14.
Ibid. xi, 12.

II Tim. ii, 5.

ENARRATIO IN EVANGELIUM

QUUM INTRARET JESUS IN DOMUM CUJUSDAM PRINCIPIS PHARISÆORUM SABBATO
MANDUCARE PANEM, ETC. LUC. XIV, 1-11.

IV Reg. vi, 22.
Ibid. 23.

LUCAS evangelista in evangelio hodie- A
no describit qualiter Christus curavit
hydropicum, quomodo etiam confutavit
adversariorum suorum errorem, et quali-
ter humilitatem docuit esse servandam.
Itaque ait : *Quum intraret Jesus in do-
mum cujusdam principis Phariseorum,*
invitatus ab illo, sabbato, qui fuit dies
celebris apud Judæos, quemadmodum apud
nos dies dominica, *manducare panem*, id
est cibum. Per panem etenim in Scripturis
intelligitur quilibet cibus, sicut per aquam
quilibet potus : ut constat ex eo quod in B
libris Regum Eliseus regi Israel dixit de
Syris : *Pone panem et aquam coram eis.*
Et subditur ibi : *Apposita est eis ciborum
magna præparatio. Et ipsi,* scilicet Phari-
sæi, *observabant eum,* qualiter possent
eum reprehendere in verbis aut factis,
præsertim an aliquid faceret contra sab-
bati celebritatem. Christus namque, se-
cundum Bernardum, in factis suis passus
est observatores, in verbis contradictores,
in tormentis illusores. Denique Pharisei
avidissimi erant laudis humanæ, et a Ju- C
dæis reputari consueverunt præ ceteris
religiosi et boni : ideo Christo maxime in-
videbant, quia sapientia, sanctitate, mira-
culis, eloquentia et fama ipsos transcendit,
et præ eis honorabatur a populo. Itaque
Pharisæos nunc multi sequuntur fide de-
voti et false justi, qui præ ceteris cupiunt
honorari, promoveri, et sapientes virtuo-
sique reputari : idcirco invident his quos
cernunt se doctiores, prudentiores ac me-
liores, et eos observant, ut eorum famam
valeant denigrare. Contra quos in libro Sa- D
pientiæ scriptum est : *Cum tabescente
invidia non communicabo.*

*Et ecce homo quidam hydropicus erat
ante illum,* id est, hydropicus iste venit
ad Jesum ut sanaretur ab eo. Porro ab
ὕδωρ, quod est aqua, dicitur hydropisis :
quæ est morbus aquosus, ex vesicæ vitio
natus, cum inflatione turgente atque fœ-
tente anhelitu. De spirituali autem signifi-
catione hydropici in sermone dicitur.

Et respondens Jesus, non ad verba, sed
ad insidiosas cogitationes Phariseorum,
quas intuebatur, *dixit ad legisperitos,* id
est Scribas seu doctores Judæorum, *et
Pharisæos : Si licet sabbato curare,* a cor-
porali infirmitate supernaturaliter et mi-
raculose? Non ex ignorantia hoc petivit,
sed ut illorum errorem corrigeret. Taliter
quippe curare, est opus divinum, pium et
caritativum, ad Dei honorem, laudem ac
dilectionem inflammans, ad divinæ quo-
que omnipotentiae contemplationem indu-
cens, non a vacatione Dei, ad quam sabbati
celebritas ordinabatur, impediens. *At illi
tacuerunt :* quia subtilitatem ac sapientiam
Christi sciebant, ideo metuebant confutari
ab eo quidquid responderent. *Ipse vero
apprehensum sanavit eum,* id est, Jesus
hydropicum illum manu accipiens, super-
naturaliter et miraculose curavit eum-
dem, imperialiter et repente, *ac dimisit
abire,* ut expedite velociterque eundo, os-
tenderet se vere esse curatum, atque ad
Dei laudem alios provocaret.

Et respondens Jesus ad cogitationes Pha-
riseorum ac legisperitorum, qui viso hoc
signo, cœperunt cogitare et intra se judi-
care quod Jesus sabbatum violasset curan-
do hydropicum. In quo apparet magna il-
lorum perversitas, quod viso tanto prodigio
non fuerunt ædificati; magna quoque cæ-

citae eorundem, quod cogitabant et iudicabant tam fatuae. *Ad illos dixit : Cujus vestrum asinus aut bos in puteum cadet, et non continuo extrahet illum die sabbati?* quasi dicat : Si licet brutis die sabbati cum grandi labore succurrere, cur non potius licet homini ægro sanitatem supernaturaliter dare die sabbati, præsertim quum istud fiat tam absque labore, imo facillime? *Et non poterant ad hæc respondere illi*, videlicet Christo. Sed viderunt se esse convictos ab eo, secretaque cordium suorum inspecta et redarguta esse ab ipso : **B** quod fuit magis mirabile ac divinum quam hydropici corporalis curatio, quem tamen etiam spiritualiter curavit (id est a peccatis mundavit) Salvator.

Confutatis ergo adversariis veritatis, et corporali hydropisi in uno curata, convertit se Christus ad spiritualis curationem hydropisis, utpote superbiæ et ambitionis, qua laborabant legisperiti ac Pharisei, et nunc usque plurimi sunt infecti. *Dicebat autem et ad invitatos parabolam*, id est sermonem aliquid mystice significantem, **C** quia per corporalia ista, innuebat spiritualia documenta; *intendens*, id est, considerans vel intelligi dans, *quomodo primos accubitus eligerent*, id est, ad altiora loca in mensis adspirarent, aviditate honoris, vel propter fercula lautiora quæ altius sedentibus proponuntur; *dicens ad illos : Quum invitatus fueris ad nuptias, non discumbas in primo loco*, id est, te ipsum vane non ingeras ad sedendum in loco superiori, *ne forte honoratior te sit invitatus*, etc. Sensus superficialiter litteralis **D** difficultatem non habet; sed magister humilitatis hoc exemplo, hacque rationabili persuasionem, intendit nos informare, ut semper, quantum in nobis est, humiliemur et parvi faciamus nos ipsos, ne quis ultra propriam mensuram se erigat, imo potius inferioribus arbitremur nos viliores. Denique, quando per Christi ministros, id est prælatos ac prædicatores, invitamur ad nuptias spirituales, hoc est ad unionem mentis cum Deo, ad refectionem et dele-

ctationem internam in eo, non debemus in primo loco discumbere, id est aliis nos præferre, neque de meritis nostris præsumere, ne reprobemur a Christo.

Sed quum vocatus fueris ad nuptias si-ve convivium, vade, recumbe in novissimo loco, id est, quantum in te est, locum elige inferiorem; *ut quum venerit qui te invitavit, dicat tibi*, admonitione seu supplicatione honoraria (sufficit enim monitio apud discretos) : *Amice, ascende superius*. Sicque per humilitatem honor acquiritur, sicut subjungitur : *Tunc erit tibi gloria coram simul discumbentibus* : juxta illud **Job** xxii, 29. Qui humiliatus fuerit, erit in gloria. Huic morali doctrinæ Christi consonat quod in Proverbiis Salomon ait : Ne gloriosus appareas coram rege, et in loco magnorum ne steteris; melius est ut dicatur tibi, Ascende huc, quam ut humiliaris coram principe. Dicit quoque Basilius : Occupare ultimum locum in conviviis, juxta mandatum Christi, conveniens est; sed rursus in hunc contentiose se ponere, vituperabile est, tanquam destructivum ordinis et causativum tumultus, et de hoc mota contentio comparabit nos litigantibus de primatu. Quapropter, sicut docet hic Christus, expedit accubitus ordinem committere facienti convivium. Sic enim in patientia nos mutuo sustinebimus, honeste et secundum ordinem omnia prosequentes.

Quia omnis qui se exaltat per superbiam, humiliabitur humiliatione justæ ultionis, id est, reprobabitur, deprimetur ac punietur tanto confusibilis atque poenalius, tam in particulari suo judicio quam in judicio generali, quanto nunc magis se erigit, nisi vere poeniteat seque in vita hac sponte humiliet. *Et qui se humiliat*, id est, propriam defectuositatem et culpam pensando, dejicit et prosternit se ipsum coram Altissimo, atque in exterioribus humilitatem vere ostendit in verbo et facto, *exaltabitur* : quia in hac vita magna a Deo accipiet dona gratiæ ac virtutum, in futuro quoque sublimis erit in

Prov. xxv, 6, 7.

Jacob. iv, 6. gloria cœlestique patria. Deus namque superbis resistit, humilibus autem dat gratiam. Hinc in Numeris Moyses loquitur : *Num. xv, 30, 31.* Anima quæ per superbiam aliquid commiserit, quoniam adversus Dominum rebellis

A fuit, peribit de populo suo : verbum enim Dei contempsit. Ecclesiasticus quoque dicit : Quanto major es, humilia te in omnibus, et coram Deo invenies gratiam, quoniam ab humilibus honoratur. *Eccli. iii, 20, 21.*

SERMO SECUNDUS

DE SEPTEM HYDROPICORUM PROPRIETATIBUS, PER QUAS SEPTEM MORTALIA PECCATA DESIGNARI POSSUNT.

DUO mala fecit populus meus : me dereliquerunt fontem aquæ vivæ, et foderunt sibi cisternas dissipatas, quæ continere non valent aquas. *Jer. ii, 13.*

Hæc sunt verba Dei, in quibus ad litteram conqueritur de indurato populo Judæorum, quod duo commiserunt peccata, loquendo in generali : innumerabilia namque commiserunt peccata in speciali. Primum est, quod corda sua averterunt a summo et infinito ac invariabili bono, videlicet Deo, qui est fons aquæ vivæ, id est origo salutaris doctrinæ, juxta illud Ecclesiastici : Omnis sapientia a Domino Deo est ; itemque, Fons sapientiæ, verbum Dei in excelsis. Secundum malum est, quod Deo relicto converterunt se ad pseudoprophetas, ad falsos doctores, ad idolorum culturam seu gentium deos, qui vocantur dissipatæ seu perforatæ et fractæ cisternæ quæ aquas nequeunt continere. Cisternæ namque seu putei sunt quasi vasa aquarum ; quæ cisternæ si fuerint dissipatæ, aquas continere non valent. Per cisternas itaque intelliguntur homines seu corda humana, quæ esse debent vasa sapientiæ et scientiæ, gratiæ ac virtutum ; si autem fuerint corda hæc per concupiscentiarum et vitiorum pravitatem corrupta, continere nequeunt sapientiam salutarem, gratiam et virtutes, juxta illud libri Sapientiæ : In malevolam animam non introibit sapientia. Unde in Ecclesiastico asseritur : Cor

B fatui quasi vas confractum, omnem sapientiam non tenebit. Falsi ergo doctores, et fabulatores vani ac impii, atque simplicium seductores, vocantur dissipatæ cisternæ. Conqueritur itaque Deus de perversis Judæis, quod ejus doctrinam et sanctos Prophetas dereliquerunt, et pseudoprophetas, mendaces magistros, garrulos seductores exquisierunt ac susceperunt.

Deinde hoc ipsum conqueritur modo Christus de populo christiano, quod ipsum dereliquerunt, qui est via, veritas et vita, *Joann. xiv, 6.* fons totius sapientiæ atque scientiæ, nec ejus servant doctrinam. Imo ut in libro Judicum fertur de filiis Israel, quod audientes præcepta Dei, omnia fecere contraria, ita jam populus christianus, quantumcumque ei prædicetur de Christi doctrinis atque præceptis, totum agit contrarium. Insuper fodit sibi « cisternas dissipatas », hoc est, prælatos et prædicatores exquirat a quibus non multum corripitur nec castigetur, sed ea audiat quæ amplius placent. Sicque impletum est nunc quod ad Timotheum prædixit Apostolus : Erit tempus *II Tim. iv, 3.* quum sanam doctrinam non sustinebunt, sed ad sua desideria coacervabunt sibi magistros prurientes auribus. Isti sunt duri et incorrigibiles, qui si veraciter corripiantur justeque corrigantur, protinus indignantur, resistunt et obloquuntur. De quibus in Isaia legitur : Dicunt adspicientibus. *Is. xxx, 10.* Nolite adspicere nobis ea quæ recta sunt,

loquimini nobis placentia, videte nobis errores. Tales sunt omnes qui in suis permanent culpis mortalibus, qui spiritualiter fiunt et exstant hydropici. Ex quo enim aquam sapientiæ salutaris, hoc est fluentia sanæ doctrinæ, repellunt a se, cordaque sua carnali implent prudentia, mendacibus documentis, cogitationibus vanis, curiosisque fabulis, et superstitiosis scientiis; pessimas in se congregant ac continent aquas, et recte hydropici nominantur, atque per istum (de quo in evangelio hodierno fit sermo) hydropicum designantur; indigentque curari a Christo, nec curari queunt ab alio.

Præterea septem sunt proprietates hydropici, per quas septem peccata mortalia designantur. Prima est tumor corporis ac membrorum, præcipue ventris. Sicque per hydropicum designantur superbi, quia superbia est quidam animi tumor, erectio sive elatio (juxta illud Job : Quid tumet contra Deum spiritus tuus?), quemadmodum econtrario humilitas est quædam inclinatio ac depressio mentis, et resilitio ejus in propriam parvitatem. Hinc sicut aqua colligi nequit in monte sive monticulo, sed in concavo loco, ita dona cœlestium gratiarum recipi ac servari non valent in corde superbo, sed humili. Itaque si a Deo appetis misericorditer adspici, gratiose visitari, beatitudinem adipisci, aufer a corde tuo tumorem superbiæ; propriamque vilitatem, impietatem, defectuositatem atque ad omne peccatum proclivitatem perpendens, despice et inclina te ipsum (juxta illud Ecclesiastici : Humilia

Eccli. vii, 19. valde spiritum tuum, quoniam vindicta impii, ignis et vermis) : alioqui deprimeris a Deo, et usque ad profunda lacu infernalis dejiceris. Siquidem proprium est Deo justo ac omnipotenti superbos prosternere, prout in Ecclesiastico æterna Sapientia protestatur : Omnium superborum et sublimium colla propria virtute calcavi. Unde ad sanctum Job Dominus dixit : Si habes brachium ut Deus, et si simili voce tonas, disperge omnes superbos in

A furore tuo, et respiciens omnem arrogantem humilia, demerge eos in foveam. Abhorreamus ergo maledictum semen superbiæ, ex quo omnia vitia oriuntur, et cum beato David rege dicamus, Ego sum vir pauper et tenuis; atque cum Jeremia, Ego vir videns paupertatem meam. Specialiter autem superbia in pauperibus vituperabilis intolerabilisque censetur. Propter quod sapiens ait Ecclesiasticus : Tres species odivit anima mea : pauperem superbum, divitem mendacem, et senem fatuum.

B Secunda proprietas hydropici est compressio spirituum, per quam designatur invidia. Invidi quippe aliorum bona opera pro posse abscondunt; et si bona sint manifesta, quantum possunt ea denigrant, detrahendo atque in pejus ea interpretando. Idcirco invidia est detestabile et ineffabiliter vile ac grave peccatum, tam naturali quam divinæ legi prorsus contrarium. Invidus quoque eo ipso quo alteri invidet, parvum, vilem ac defectuosum se esse ostendit : quoniam bonum quod invidet alteri, fatetur sibi deesse, sicque inferiorem se efficit eo cujus invidet bono. Propter quod fertur in Job : Virum stultum interficit iracundia, et parvulum occidit invidia. Quocirca scribit Gregorius : Invidere non possumus nisi his quos nobis in aliquo meliores putamus. Parvulus ergo est qui livore occiditur, quoniam ipse sibi testimonium perhibet quod eo minor sit cujus torquetur invidia. Abjiciamus ergo hoc infernale venenum sanctæ caritati omnino contrarium, quod non animam tantum, sed corpus quoque occidit, Salomone dicente : Putredo ossium, invidia. Porro ad invidiam specialiter proni sunt melancholici et pusillanimes : idcirco incumbit eis contra invidiam singulariter præliari, dando se ad caritatem sinceram ac spiritualem lætitiā.

Tertia proprietas hydropici est ardor sitis. Sicque per eum designantur avari, qui quanto plura acquirunt, tanto plura desiderant, et semper sunt pauperes, quia se reputant indigentes. Ideo loquitur Augusti-

1 Reg. xviii, 23.
Thren. iii,

Eccli. xxv, 3, 4.

Job v, 2.

Prov. xiv, 30.

Ibid. xxiv, 11.

Job xl, 4, 6, 8.

nus : Avarus similis est inferno. Infernus enim quantoscumque absorbet, nunquam dicit, Sufficit; sic nec avarus, quantumcumque acquirit. Gregorius quoque fateatur : Omnis avarus ex potu sitim multiplicat, quia dum ea quæ appetit adeptus fuerit, ad adipiscenda alia amplius anhelat. Denique quidam hac siti ita insaniunt, ut etiam aliorum bona optare non vereantur, aut per fraudem occulte, vel per violentiam manifeste rapere moliantur : quibus damnatio imminet sempiterna nimis gravissima. Avaris ergo timendum

Is. v, 8. Isaïam : Væ qui conjungitis domum ad domum, et agrum agro copulatis; numquid habitabitis vos soli in terra? Disce ergo, o Christiane, spiritualia gratiæ dona appetere, summum et incomparabile bonum, Dominum Deum creatorem tuum diligere, æternam desiderare salutem : sicque despicias ista terrena, quæ ab illorum amore atque adeptione bonorum impediunt, quoniam Christo testante, nemo potest Deo servire ac mammonæ.

Matth. vi, 24.

Quarta proprietas, indigestio est humorum : sicque per hydropicum designantur iracundi. Ira namque est velut fumus et vapor incensus, mentem offuscans, turbans et inquietans, per quem fit homo similis fatuo et insano. Per iram quoque societas aggravatur, concordia dissipatur, imo et Spiritus Sanctus repellitur. Ideo in Proverbiis habetur : Spiritum ad irascendum facilem quis poterit sustinere?

Prov. xviii, 14.

Quinta proprietas est tarditas pedum ad incedendum. Sicque per hydropicum designantur acediosi, qui nec summi boni accenduntur amore, nec divinæ majestatis reverentia provocantur ad agendum viriliter, nec quanta beatitudo ac merces sit ferventibus Dei ministris præparata, perpendunt, sed ad bene agendum tædio afficiuntur tartareo, neque in spiritualibus delectantur. Considerate ergo, o acediosi, quam ferventer diligendus sit Deus, quam reverenter ac prompte obsequendum sit ei, quam copiosissimus remunerator ope-

rum sit bonorum, quanta beneficia incessabiliter largiatur hominibus. Considera demum quam indesinenter et clare ipse te et omnia intueatur, quantum ipsam acediam detestetur, quantam damnationem acediosis infliget. Siquidem in Apocalypsi ait : Quia tepidus es, incipiam te evomere de ore meo; quasi dicat, Nauseam habeo de te.

Apoc. iii, 16.

Sexta, est genitalium inflatio, per quam luxuria designatur. Est quoque proprietas hydropici, fœtor anhelitus, per quem aptius significatur luxuria, in qua est maxima turpitudine et bestialitas fœda ac inhonestas erubescenda. Quod si ita est, quam turpes, vitiosi ac fœtidi sunt coram altissimo atque sanctissimo Deo, qui non solum una ac simplici fornicatione se maculant, sed et adulterio et consuetudinali luxuriatione absque freno se polluunt? His præparatus est ardor gehennalis incendii et fœtor ineffabilis infernalis ergastuli, juxta illud Apocalypsis : Pars illorum erit in stagno ardenti igne et sulfure. Unde et in Psalmo : Ignis, sulfur et spiritus procellarum,

Ibid. xxi, 8.

Ps. x, 7.

C pars calicis (id est pœnæ) eorum. Quod si totum hoc est pars pœnæ illorum, qualis et quanta est tota eorum pœna? Væ infelicissimis ac deflendis hominibus qui quidquid eis prædicetur, in suis manent spurcitiis, nec intolerabiles pœnarum sibi imminentium acerbitates considerant. Præterea, per præactam genitalium inflationem potest intelligi gula, quæ luxuriæ præbet materiam et corporis inflammationi deservit. Quæ prorsus vitanda est tanquam vere peccatum mortale, ad quam multa et magna peccata sequuntur; quæ et rationem obtenebrat, corpus lædit ac indisponit, et vitam non parum abbreviat.

Itaque quacumque spirituali hydropisi jam præacta infectus quis fuerit, festinet ire ad Christum, coram ipso prosternat se, indulgentiam gratiamque conversionis et emendationis in omnibus deprecetur, recogitet sua peccata et confiteri acceleret, ac juxta præhabita instituat ac gubernet se ipsum.

Legitur de quadam devota matrona, cu-

jus vir miles fuit, et fidem violans conjugalem frequenter, atque post bellica exercitia balneis et luxuriis vacans. Quo mortuo, uxor ipsius instanter Deum rogavit ut mariti sui statum sibi ostendere dignaretur. Cujus precibus annuit Deus. Nam rapta in spiritu, ducta est in visione ad inferos, viditque ibi animam viri sui in quodam calidissimo sulfureo balneo balneari. Deinde audivit dæmones dicentes :

A Præparemus ei lectum mollissimum et pulchram puellam. Statimque vidit virum suum poni super ferreum lectum et totaliter inflammatum, et juxta eum infernalem bufonem. Qui quum apprehenderet et amplecteretur virum illum, sustinuit inestimabilissimam pœnam. Qua visione conspecta, intellexit devota illa matrona in quantis suppliciis esset vir ejus : ideo ipsa de cetero ad virtuosiores vitam se dedit.

SERMO TERTIUS

DE VARIIS VIRTUTIBUS QUIBUS COELESTIBUS NUPTIIS DISPONUNTUR FIDELES.

BEATUS homo qui invenit sapientiam. B Prov. III, 13.

Doctrina sacræ Scripturæ merito sapientia appellatur, nam docet Deum cognoscere et ea quæ ad salutem sunt necessaria scire. Hanc sapientiam debent Christiani singulariter adamare, non solum ut sciant, sed ut juxta Christi præcepta sive consilia vivant, sicque in divinæ bonitatis amore, in divinæ æquitatis timore, in divinæ majestatis veneratione crescant quotidie.

Denique, quamvis verba aliqua Evangelii interdum videantur esse non multum sententiosa, si tamen diligenter considerentur, spiritualibus sensibus salutaribusque doctrinis sunt plena. Itaque in evangelio hodierno multipliciter edocemur : Primo, quanta sit fragilitas, imo et malitiositas cordis humani. Ecce legisperiti ac Pharisæi, non obstante quod Christus tam innumerabilia ac præclarissima fecit miracula, etiam totam creatæ naturæ facultatem transcendentia, solique Deo possible, quod tanta sanctitate, sapientia et eloquentia fulsit, quod cuncta terrena contempsit, nihilo minus insidiabantur ei ubique. Ambitiosi namque et cupidi laudis humanæ, innumerabilia incidunt vitia ; et quidquid boni agere videantur, eorum intentio est

semper corrupta atque ad proprias commoditates reflexa, nec unquam pure ac recte feruntur in Deum. Hi miseri homines faciliter invident aliis, et melioribus insidiantur, observando facta et verba eorum ut eos valeant accusare. Advertant hi quod Salomon loquitur : Qui observator est malorum, opprimetur ab eis. Dum enim aliorum peccata observat, ipse a vitiis superatur, et multis defectuositatibus adimpletur, negligitque se ipsum. Insuper ex his duo documenta trahuntur. Primum est, ut homines virtuosius ac sapientes non frangantur per impatientiam, quando se sentiunt observari, accusari et diffamari ab aliis, sed quid passus sit Christus cogitent, et quod servus non est major domino suo considerent. Secundum est, ut qui cupit Deo placere et in virtutibus crescere, bona aliorum penset ad imitandum, et ab unoquoque homine virtuoso discat virtutem in qua ille magis abundat, ut discat ab isto humilitatem, ab illo patientiam, ab alio caritatem, ab alio sobrietatem, ab illo spiritualem lætitiā, ab isto constantiam, sicque de aliis actibus virtuosius.

Secundo, ex evangelio isto docemur quanta sit negligentia atque impietas ma-

Pr. v. xi, 27.

Joann. xiii, 16.

lorum ac negligentium praelatorum, Phariseos sequentium : quia si viderint pectoribus suis aliquid adversitatis contingere, dolent, protinusque pro posse succurrunt; si vero conspexerint proximos suos ac subditos spiritualiter lædi, imo occidi, hoc est mortaliter transgredi, tacent, dissimulant, non curant, neque subveniunt. Quo constat quod veram Dei ac proximi non habeant caritatem : nempe quo anima est præstantior corpore et omni jumento, eo de animarum morte ac perditione amplius est dolendum, atque eisdem celerius succurrendum. Hinc ait Chrysostomus : Si populus decimas non obtulerit, murmurant pastores; sed si populum peccantem viderint, tacent. Omnes de suo honore solliciti sunt, non de Dei honore. Ideo etiam dicit Bernardus : Cadit asina, et est qui sublevet; perit anima, nec est qui curet. Deinceps in isto sæculares etiam inveniuntur culpabiles : multi enim parentes plurimum tristarentur, si filii aut filiæ eorum suas perderent vestes; sed quod per diversa peccata mortalia suas amittunt animas, non advertunt. Paucissimi (proh dolor!) sunt qui spiritualis dilectionis debitum proximis suis impendant, corripiendo, dirigendo, orando, et de eorum ruina dolendo ac succurrendo pro posse.

Tertio, ex evangelio isto docemur ambitionem vitare, nec superiorem locum appetere. Nam sicut avaritiæ, ita et ambitionis jugiter crescit sitis tam in spiritualibus quam in sæcularibus ubique hominibus, quemadmodum sanctus describit Bernardus. Nam si quis in aliquo collegio exstat canonicus, cito verecundatur esse canonicus simplex, sed ad aliquod adspirat officium. Quo adepto, adspirabit ad altius, et quanto plus promovetur, tanto adhuc ad altiora conabitur: quod si archidiaconus fuerit, jam ad episcopatum nitetur pertingere, sicque deinceps. In sæcularibus quoque hominibus proportionabiliter invenitur. Unus appetit esse magister civium, alius consul, tertius scultetus aut judex; et quanto quis ampliorem acquirit honorem, tanto

plus adspirabit adhuc ad sublimiorem. Sed sicut isti sunt miseri, ita beati sunt qui omnia ista spernunt, omnesque suas affectiones figunt in Deo, nec ditari, nec delectari, nec honorari quærunt nisi in eo : qui contemnunt terrenos et temporales honores, ut adipiscantur cœlestes ac æternales; nec in transitoriis optant abundare divitiis, quatenus mereantur divinarum impleri charismatum donis, in virtutibus perfici, Deo uniri; similiter carnales despiciunt voluptates, ut mereantur consolationes experiri divinas et delectari in Domino, atque post vitam hanc labilem, nunquam terminandam beatitudinem sortiri ab ipso. Hinc de hujusmodi homine ait Propheta : Beatus vir cujus est nomen Domini spes ejus, et non respexit in vanitates et insanias falsas.

Ps. xxxix, 5.

Quarto, instruimur ex evangelio hodierno qualiter ad cœlestem felicitatem oporteat pervenire. Ait quippe Salvator : Quum invitatus fueris ad nuptias, vade, recumbe in novissimo loco. Omnes etenim ad cœlestis regni sumus nuptias invitati, in quibus mens Deo plenissime inavertibiliterque unitur, beatificæ fruitionis suavitate reficitur, et torrente voluptatis divinæ potatur. Qui ergo ad nuptias has pervenire cupit ex animo, recumbat in novissimo loco, hoc est, in humilitatis tutissimo figat se fundamento, vilipendat se ipsum, et aspersiones atque injurias æquanimiter ferat. Hoc est quod alibi docet Salvator. Quum enim interrogassent eum Apostoli, Quis, putas, major est in regno cœlorum? vocavit puerum unum posuitque eum in medio, dicens, Nisi conversi fueritis, et efficiamini sicut parvuli, non intrabitis in regnum cœlorum; et rursus ibidem, Quicumque humiliaverit se sicut parvulus iste, hic major est in regno cœlorum. Cujus causam in evangelio exprimit hodierno, dicendo : Quia omnis qui se humiliat, exaltabitur; et qui se exaltat, humiliabitur. Quæ verba sunt cordibus Christianorum firmissime inscribenda ac jugiter recolenda. Utinam verbum istud adverterent ex-

Luc. xiv, 10.

Ps. xxxv, 9.

Matth. xviii, 1-3.

Ibid. 4.

Luc. xiv, 11.

cæcati ac miseri amatores sæculi hujus, qui quum variis vitiis sint repleti, nihilo minus cupiunt aliis præfici, præsidere ac imperare; et qui nesciunt regere semetipsos, ingerunt se ad regendum alios, imo alios multos, quorum non quærunt salutem, nec Dei honorem, sed propriam promotionem, dominationem atque similia, non pensantes illud in libro Sapientiæ : *Sap. vi, 6, 7.* Judicium durissimum in his qui præsumunt fieri, et potentes tormenta potenter patientur.

Postremo est aliquis principatus salubris quem Deus vult nos appetere et habere, ut scilicet per rationem rectam evangelica doctrina instructam sit homo rector sui ipsius, propriam voluntatem frangendo et eam Deo in omnibus semper subdendo, vanis cogitationibus locum negando. Itaque regamus et cohibeamus vires animæ nostræ et membra corporis nostri, ne appetitus sensitivus cupiat sensibilia, carnalia et terrena nisi secundum rationis dictamen, ne lingua proferat verba otiosa, mendosa, detractoria, provocatoria aut lasciva, ne pedes currant ad spectacula aut choreas, ne manus extendantur ad opera vitiosa, nec aures audiant verba oblocutoria et iniqua; sic quoque refrenandi sunt oculi, ne per eos mors concupiscentiæ introeat animam. Hunc principatum Deus nobis commisit, juxta illud *Eccli. xv, 14.* Ecclesiastici : Deus ab initio constituit hominem, et reliquit eum in manu consilii sui. Hoc etenim Deus requirit a nobis, ut omnibus membris ac viribus nostris utamur ad laudem et gloriam ejus, sicque

A glorificemur ab eo : quoniam ipse glorificantes se temporaliter, glorificat æternaliter; eos vero qui eum contemnunt, etiam frequenter in præsentī sæculo terribiliter punit, quemadmodum secundo Paralipomenon legitur de Joram, qui fuit filius Josaphat regis. *I Reg. ii, 30.*

Qui Josaphat fuit vir valde virtuosus, justus ac timoratus : propter quod Deus etiam in hac vita contulit ei multiplicem prosperitatem, divitias, potentiam, victorias et honores. Quumque moriturus esset, *II Par. xvii-xx.* dedit filiis suis argentum et aurum copiosum, ac pensationes, cum munitissimis civitatibus in regno suo. Porro regnum dedit filio suo Joram, quia primogenitus fuit. Qui quum confirmatus esset in regno, *Ibid. 4 et seq.* ex intolerabili ambitione et avaritia interfecit omnes fratres suos numero sex, quatenus bona illorum devolverentur ad se; insuper cultum Dei reliquit, ac idolis deservivit. Idcirco electissimus ille Dei beatissimus Elias misit ad Joram increpatoriam comminatoriamque epistolam; nec tunc vere poenituit : ideo paulo post, sicut Elias prædixit impletum est. Siquidem Philistæi et Arabes intraverunt regnum Joram, atque ad libitum vastaverunt; diripuerunt quoque omnes thesauros Joram et uxores ejus ac filios, et in magnis eum reliquerunt doloribus. Insuper Deus percussit eum insanabili alvi dolore, in tantum quod interiora sua ac vitalia egerebat; sicque per duos annos consumptus, vita pariter caruit et languore. In quo facto considerari potest providentia Dei, et justissimum ejus judicium.

AD RELIGIOSOS

SERMO QUARTUS

DE VARIIS MEDIIS QUIBUS PERTINGITUR AD FINEM PERFECTIONIS MONASTICÆ.

OBSEURO vos ut digne ambuletis vocatione qua vocati estis. Ephes. iv, 1.

Quam virtuosa esse debeat universorum vita Christianorum, rursus in præsentis dominicæ epistola compendiose docet Apostolus; et quanto conversatio religiosorum excellere debet vitam plebis communis, tanto perfectius oportet eos implere documenta hodiernæ epistolæ. Eis ergo specialiter et affectuose clamat Apostolus: « Obsecro vos ut digne ambuletis vocatione qua vocati estis » ad vitam monasticam, juxta vestræ professionis tenorem: cujus professionis finis est cum speciali animi puritate, cum interna et stabili tranquillitate, cum libertate salubri, cum omnium passionum reformatione completa Deo per contemplationem sinceram et dilectionem fixam fervidamque vacare. Ad quem saluberrimum finem in hac vita pertingitur per promptam obedientiam, observantiam regularem, quotidianum virtutum profectum, per indesinentem mentis custodiam, per continuam divini auxilii invocationem, per refrenationem et fractionem sui ipsius virilem.

Deinde non potest religiosus digne sua vocatione Deo servire nisi per grandem diligentiam sui cordis coram Altissimo, ut memor sit semper cur venerit, et penset quousque pervenerit, quantum profecerit sive defecerit, sicque consideret semper se coram divinæ majestatis præsentia ambulare, et coram Rege superdignissimo, supersanctissimo et supersapientissimo erubescat se indecenter, inhoneste, negligenter

A habere, cum Elia pronuntians, Vivit Dominus, in cujus conspectu sto hodie; et illud ^{1.}

Psalmistæ perpendens, Meditatio cordis mei in conspectu tuo semper. Si in præsentia præsentis non audemus silentium frangere, et si intuentem eo aut aliis, erubesceremus obdormire aut pigre surgere ad divina, aut in aliis quæ sunt Ordinis reprehensibiliter nos habere; quomodo omnipotente Judice summo præsentem, inspiciente et omnes vias nostras ac gressus observante ac dinumerante, audemus horum quidquam committere, et debita nostra aut injuncta negligere? Non sic parvi pendamus Dominum majestatis, ut plus timeamus, curemus et revereamur humanum intuitum quam divinum: alioqui juxta irreverentiam, negligentiam perversitatemque nostram restituet nobis Dominus justus, qui primo Regum fatetur: Quicumque glorificaverit me, glorificabo eum; qui autem contemnunt me, erunt ignobiles. ^{1 Reg. ii, 30.}

Præterea, quum humilitas sit fundamentum virtutum, et ad omne incrementum gratiarum cœlestium præparamentum, quum dixisset Apostolus, « Ambuletis digne » Deo, mox subdidit, Cum omni humilitate: quoniam teste Gregorio, sicut ^{2.} superbia signum est reproborum, ita humilitas electorum. Simus igitur humiles vere, non nequiter, et primo interius coram Deo, cujus immensam excellentiam considerando, debemus nos coram throno gloriæ ejus intus profundissime inclinare ac nihilum reputare, foris quoque humiliter

¹ III Reg. xvii,² Ps. xviii, 45.¹ Reg. ii, 30.² Ephes. iv,

genua flectere, corpus totum in terram prosternere ac decenter inclinare Altissimo. Sed et coram proximis nostris ac fratribus debemus nos humiles exhibere in omnibus, in verbis, factis et moribus, in incessu et apparatu, ac omnibus nos viliores putare, atque in mansuetudine opera nostra perficere. Beati etenim mites; ira vero in sinu stulti requiescit. Monet demum Apostolus ut cum patientia invicem supportemus, ne unus ex defectu aut gravamine alterius, aut de injuria sibi illata, tristetur inordinate, indignetur et impetuose se habeat : quia impatiens operatur stultitiam. Quemadmodum autem mansuetudo iram, sic patientia refrenat tristitiam. Estque patientia ista nobis necessaria valde, quoniam ea carentes, cito ac sæpe turbantur, inquietantur et vitam sæpe ducunt amaram, et ultra hæc omnia æternam merentur damnationem.

Porro qui humilitatem perfecte amplectitur, iram et impatientiam faciliter superare cognoscitur, quum se tribulationibus ac persecutionibus multis ac magnis dignum esse profiteatur. Est autem patientia virtutum probatrix et spiritualis profectus argumentum : idcirco an vere devoti, virtuosique simus, melius ac certius sciri non poterit, nisi per hoc, an in adversitatibus, tribulationibus, persecutionibus, irrisionibus, injuriis vere patientes inveniamur. Propter quod in Ecclesiastico scriptum est : Vasa figuli probat fornax, et homines justos tentatio tribulationis. Quemadmodum ergo mala olla in fornace ardenti posita, exsilit, crepat et deficit, sic homo apparenter et fecte virtuosus et devotus, in igne adversitatis, tribulationis exercitationisque positus, per impatientiam suam erumpit, et per impatientiæ verba ac signa, qualis sit intus prodit. Ideo loquitur Augustinus : Perfacile est vestem vilem portare, capite inclinato incedere, velum super oculos demittere; sed verum humilem ostendit patientia vera injuriæ. Unde, secundum Gregorium, patientia est, aliena mala æquanimiter to-

lerare, contra eum quoque qui mala irrogat nullo dolore morderi. Itaque teste Ambrosio, illud magnificum est, si subjectus contumeliis, judicium Dei laudes, si vexatus ægritudine, te Deo committas. Hinc ait et Hugo : Patientia religiosi viri est, laborum ac dolorum omnium, spe futurorum bonorum et Dei amore, tolerantia grata. Hæc est virtus quæ omnia vincit adversa, non colluctando, sed sufferendo, non murmurando, sed grates agendo. Fortis atque egregia res est, audire injuriosa ac noxia verba, nec tamen respondere contraria.

Sed quæri potest, cur patientia specialiter probatrix virtutum vocetur. Et respondendum quod ideo, quia patientiæ est passionem tristitiæ moderari ac refrenare, ne homo pro injuriis sibi illatis et adversitatibus irrogatis immoderanter tristetur. Quemadmodum autem ex privato contingit amore et ex superbia de talibus contristari, inquietari, turbari; ita de talibus non tristari nec commoveri, signum est eradicationis privati amoris et elationis. Quum ergo amor privatus dicatur origo omnium vitiorum, superbia quoque mater eorum, merito patientia, quæ signum est eradicationis privati amoris atque superbiæ, dicitur esse probatrix virtutum, quæ utique copiose insunt his qui a privato amore et superbia sunt purgati. Imo si rite consideremus quam multipliciter fructuosum sit et salubre adversa omnia æquanimiter ferre, non solum libenter, sed et hilariter ea curabimus sustinere.

De hoc in Horologio æternæ sapientiæ sic habetur : Sicut in cithara chordæ proportionabiliter extensæ sonum reddunt suavem, sic electus quisque dum adversitate premitur, quasi vi quadam extra se tenditur, quia in Deum se dirigit, et sic ad reddendum dulcem ac cœlestem melodiam plenius habilitatur. Patientia a Judice summo pretiosissima reputatur. Ipsa etenim Judicis iram exstinguit, et ejus severitatem in benignitatem amicitiam-

Eccli. iii,

Matth. v, 4.

Eccli. vii,

Ephes. iv,

2.

Prov. xiv,

17.

Eccli. xxvii,

6.

que convertit. Qui adversa pro Deo libenter patitur, Christo passo assimilatur, et ab eo tanquam a simili, dilectionis nexu valde adstringitur. Fructus patientiæ balsamiticus imputribilem præstat vigorem. Quemadmodum stella matutina vicinum nuntiat huic mundo solis ortum, sic tribulatio æquanimiter tolerata, supercœlestis solis animam tribulatam invisere volentis jucundam monstrat propinquitatem, atque internam auget consolationem subsequenter. Et sicut nox tenebrosa diem præcedit luminosum, hiemisque asperitas æstivalem antecedit jucunditatem; sic bonarum mentium internam et æternam consolationem præcedit tribulatio in hac vita. Sicut arcus refulgens inter nebulas, signum est pacis divinæ ad genus humanum; sic tribulatio sæviens, signum est divinæ propitiationis ad homines. Patientia est gratiæ præambula, spei socia, dilectionis puerpera. Ipsa activam vitam suo munimine protegit, et contemplationis oculum subtiliter acuit. Hæc est quæ hominem carnalem facit spiritualem, et mentem terrestrem mutat in cœlestem. Ipsa

Matth. vii,
14.

se ipsum faciat recognoscere et non alta sapere, sed in se ipso humiliter sistere ac timere? Quid etiam sic condescendere proximo docet? Perpendat nunc unusquisque quam stultus sit qui has patientiæ ac tribulationum utilitates cognoscit, et tamen ab eis supportari * desiderat.

* Cf. t.
XXVII, p.
45 C.
Ephes. iv,
3.

Postremo, juxta doctrinam Apostoli, simus semper solliciti servare unitatem spiritus in vinculo pacis, servando spiritua-lem unionem, fixam concordiam et animi conformitatem in tranquillitate pectoris nostri: quæ tranquillitas est spirituale vinculum unitatis præfatæ, quum eam nutriat et conservet. Quemadmodum enim per discordiam homines ab invicem dividuntur, ita per pacem spiritualiter colligantur. Unitatem vero spiritus in vinculo pacis faciliter veraciterque conservant, qui juxta præhabita, humiles, mites et patientes consistunt, non prudentes in oculis suis, neque in sensu proprio pertinaces. Superbi autem, iracundi et impatientes unitatem istam non tenent, sed per contentiones, discordias ac varias difformitates, ab invicem separantur, unoquoque in suo sensu abundante, suas passiones sequente et se alteri præferente. Quod religiosis vehementissime illicitum, indecens, periculosum atque damnable est. Ideo semper humilitate, mansuetudine, patientia, caritate et pace interna proficere ac firmari nitamur.

SERMO QUINTUS

QUÆ DEBEAT FUGERE VITIA, QUASQUE COLERE VIRTUTES VERUS VESTIGIORUM
CHRISTI OBSERVATOR.

IPSI observabant eum. Luc. xiv, 1.
Quemadmodum sanctus ait Bernardus, Christus in factis suis passus est observatores, in verbis contradictores, in tormentis illusores. Qui ergo vult Christi sequi vestigia, non frangatur, neque a bo-

T. 30.

no desistat, si et sibi aliquid tale contingat, memor verbi Domini Jesu dicentis: Non est servus major domino suo. Denique in omnibus quæ de Salvatore leguntur, facile est pensare quam verissime divinus Dionysius protestetur: Quod uni est cibus,

Joann. xiii,
16.

32

alteri est venenum. Nam sicut homines boni et dociles, spiritualium profectuum cupidi, caritativi, sinceri, Dei honorem et proximorum ædificationem sinceriter cupientes, gratulantur de gratiis et excellentiis gratosius desuper aliis distributis, nec dolent quod excedantur ab illis, imo quod in se ipsis non habent gaudent in aliis inveniri; sic perversi, ficti, ambitiosi et invidi bona aliorum quibus ipsi carent obscurare nituntur, et eminentia bona interpretantur in pejus. Quod ut verisimilius facere videantur, gesta aliorum et verba observant, occasionesque expetunt contra illos, ut eos valeant accusare. Sic in omnibus accidit Christo. Quum enim tantæ esset sapientiæ et eloquentiæ, tantæ sanctitatis et eminentiæ, tamque potentissimus in miraculis, quod merito ab omnibus honorari, laudari ac diligere debuisset, nihilo minus a multis, præsertim a majoribus populi sui, et legisperitis ac Pharisæis, a sacerdotibus et pontificibus, insidias, injurias, detractiones, persecutiones perpesus est. Et in isto perpendere debemus quam mirabiliter ac lamentabiliter peccata humanam obtenebrent mentem, præsertim invidia, quæ non sinit hominem rancorosum bene judicare de eo quem odit: imo quo præclariora sunt documenta, facta et magnalia ejus, eo invidus magis torqueatur, pejoratur atque obloquitur.

Excutiamus ergo, o fratres, et funditus eradicemus ex cordibus nostris omnem privatum amorem et germina ejus venenata, invidiam, ambitionem et omnem elationem, zelum amarum, temeraria quoque judicia, omnem abusum et universam malitiam. Non simus curiosi aliorum observatores, quum hoc monachis maxime existet illicitum, eo quod unusquisque eorum, unius, utpote sui ipsius, constitutus sit custos. Et dato quod religiosus etiam ex proposito caveat alios observare, nihilo minus sæpius et abundantius quam oportet occasio sibi occurret videndi, considerandi ac judicandi facta illorum. Cur ergo nobis ipsis injicimus laqueum, cur distra-

ctiones et perversa judicia sponte assumimus? Deinceps, non simus proni ad scandala, sed quæ mala apparent in aliis, quantum valemus, intra nos excusemus; simusque proni ad ædificationem, ut scilicet bona confratrum consideremus ad imitandum, et instar prudentissimæ apsis hinc inde flosculos colligamus, ut mellificemus ex eis. Ab isto humilitatem, ab illo mansuetudinem, ab uno patientiam, ab alio caritatis fervorem discentes, hujus alacritatem ac spiritualem lætitiā, illius studiositatem, taciturnitatem, maturitatem sectemur. Unusquisque enim proprium donum habet a Deo. Sic quippe agendo, beatissimus pater noster Antonius cito ad magnam devenit perfectionem. Sed, heu! quidam adeo sunt perversi, ut quamvis mille bona in aliquo cernant, non ædificentur, nec reminiscantur; si autem unum malum in ipso conspiciant, protinus scandalizentur, irrideant, memoriter teneant, et illud divulgant. Hi se potant absinthio, felleque cibant.

Amplius, in evangelio hodierno docet Salvator omnem ambitionem esse penitus detestandam, proponens parabolam in qua legisperitorum ac Pharisæorum notavit ac reprobavit ambitionem. Nonne immensa est fragilitas, imo pravitas ac cæcitas humanæ mentis? Quia quum homo vix valeat gubernare, custodire ac refrenare se ipsum, neque pro se solo sufficiat reddere rationem; quum insuper tanta sit incertitudo ac brevitās vitæ præsentis, tam item rigorosissimum judicium instet præsidentibus, quemadmodum scriptum est, Judicium durissimum in his qui præsumunt fiet: nihilo minus excæcatus, vanus et miser homo ingerit se ad primatum, ad prælationem adspirat, et ut possit præesse, nequiter se humiliat, callide applicat, dolose blanditur, seque frangit in multis. Ecce quanta est ista calamitas miseri hominis tot periculis se involventis, nec Deum omnia intuentem considerantis: et tamen, ut sanctus docet Bernardus, quemadmodum avaritiæ, ita et ambitionis sitis crescit in

1 Cor. vii, 7.

Sap. vi, 6.

infinitum. Abjiciamus ergo hanc mortem, et coram Deo sit purum cor nostrum, sit rectum, humile, timoratum; imperfectum nostrum videant oculi nostri, dirigatque unusquisque et refrenet ac purget se ipsum, et sicut ad præsidendum non ingerit semetipsum, sic nec alterius promotioni inordinate resistat, nec impertinenter se occupet.

Præterea, quoniam ad cœlestes nuptias, in quibus Deo altissimo plenissime perfruemur, invitati sumus, docet Dominus *Luc. xiv, 10.* viam perveniendi ad eas : Quum fueris (inquiens) invitatus ad nuptias, recumbe in novissimo loco. Sunt enim et nuptiæ quædam spirituales etiam in hac vita in militanti Ecclesia. Quemadmodum enim universalis Ecclesia militans, est sponsa generalis Sponsi cœlestis; sic anima omnis veraciter christifidelis, ejusdem Sponsi est sponsa particularis, quia per fidem et caritatem conjungitur illi, eumque brachiis caritatis affectuose constringit, et ipso, prout in hac peregrinatione fieri potest, jam fruitur, ei tanquam summo et invariabili bono propter se pure et amoroze inhærens, et cetera cuncta ad ipsum finaliter ordinans. Si ergo optamus in nuptiis patriæ, in nuptiis gloriæ, in nuptiis fruitionis consummatæ constitui atque in illis magni sublimesque fieri, interim in militanti Ecclesia careamus superbia, amplectamur humilia, deprimamus et despiciamus nos ipsos. Nemo in cogitatione sua se extollat ut taurus, nullus cornua sibi assumat : imo si quis in donis naturæ aut gratiæ, in sapientia aut scientia videtur præclarior, in omnibus sit humilior, quia ut ait Bernardus, Nihil tam efficax est ad inveniendum gratiam apud Deum, quam ut semper inveniaris non alta sed humilia de te sentire, nec præsumere, sed timere. Unde et sanctus pater Hieronymus dixit, se ab adolescentia sua nihil sic abhorruis-

se, sicut erecta cervice seu superbo corde incedere. Quid enim superbit terra et cinis? Quid superbit homo miserrimus quotidie peccans, innumerabilibus defectuositatibus plenus, tot expositus periculis, tot circumdatus laqueis? Hinc Christus interrogatus a discipulis, quis major sit in regno cœlorum, respondit : Nisi conversi fueritis, et efficiamini sicut parvuli, non intrabitis in regnum cœlorum; et rursus, Quicumque humiliaverit se sicut parvulus iste, hic major est in regno cœlorum. Simus ergo humiles sicut parvuli, simus mansueti ut oves, simplices ut columbæ; simus agiles et ferventes in omnibus quæ sunt cultus divini; simus sobrii, custoditi, exemplares, constantes, sinceri; cupiamus quantum in nobis est semper nesciri, obedire, subesse. *Eccli. x, 9.* *Math. xviii, 1-3.* *Ibid. 4.* *Ibid. x, 16.*

Postremo, in evangelio isto instruit nos Salvator ut sit ordinata dilectio nostra, ne ad temporalia et corporalia magis quam ad spiritualia et æterna afficiamur, sicut (proh dolor!) multi sunt etiam religiosi, qui si in aliqua ruant peccata, non tantum tristantur nec conturbantur, neque sic conqueruntur sicut si aliqua utensilia aut victualia, aut victualium lauticia*, seu alia quævis exteriora eis a præsidente aut alio abstrahantur. Aliqui quoque religiosorum prælati, sunt non mediocriter negligentes, atque in ordine caritatis deficientes : qui si cœnobii pecora dissipentur, tristitiis affliguntur; si vero quidam ex Fratribus sibi commissis acediose et male se habeant, si somnolenti, contentiosi, passionati consistant, cito facileque pertranseunt. Tales prælati non videntur satis illuminati, neque animarum pericula satis pensantes, nec quam summe et incomparabiliter omnis inhonoratio et offensa Dei sint fugiendæ rite ponderantes. Cum extrema igitur diligentia extirpent prælati peccata a se ipsis ac subditis suis, et subditus unusquisque a proprio corde.

* lautitia

SERMO SEXTUS

DE HYDROPE SEPTEMPlici NEGLIGENTIUM ET PEREUNTIIUM RELIGIOSORUM,
QUI OPUS HABENT CURARI A CHRISTO.

IPSE apprehensum sanavit eum. Luc. A
xiv, 4.

Spiritualia per corporalia designari certissimum est; et sicut dona gratiæ designantur per dona naturæ, sic mala culpæ exprimentur per mala naturæ. Porro in hydropico septem inveniuntur proprietates, juxta quas septiformis negligentium ac pereuntium religiosorum distinctio potest intelligi.

Est namque in primis in hydropicis inflatio ventris, tumor corporis ac membrorum. Sicque per hydropicum intelligitur quicumque superbus religiosus, cui in Job
Job xv, 12, 13. dicitur : Quid te elevat cor tuum, et quasi magna cogitans, attonitos habes oculos? Quid tumet contra Deum spiritus tuus? Nonne contra Deum tumet cor horum qui contra superiores suos, Dei vicarios, intumescunt et eos despiciunt; quos non solum ex jure seu præcepto divino, sed ex proprio quoque solenni voto honorare tenentur? Quibus prælati dicere possunt :
Exod. xvi, 8. Non contra nos est inflatio vestra, sed contra Deum.

Denique, sicut legisperiti et Pharisæi specialius erant superbi, sic usque in præsens aliqui magis eruditi ac famosi, sunt magis superbi, vani et ambitiosi, quum ceteris humiliores et exemplariores consistere obligentur, juxta quod scriptum est : Quanto major es, humilia te in omnibus; et,
Eccli. iii, 20. Cui plus datum est, plus requiretur ab
Luc. xii, 48. eo. Isti sunt quos inflat scientia, in quibus est informis, nuda, insipida, non formata et saporosa notitia; non pensantes illud
I Cor. viii, 1. Apostoli : Qui vult sapiens esse, stultus
Ibid. iii, 18. fiat ut sit sapiens. Isti specialius ac gravius alios scandalizant.

Nec solum istos, sed et eos qui in religione devotiores, alacriores, exemplariores et perfectiores esse censentur, impugnat ista superbia, secundum quod ait Bernardus : Superbiæ vitium peccatum est maximum, quod Dei populo magis insultat, specialiterque insurgit adversus eos qui cetera videntur vicisse peccata. Unde enim animam illam tentet superbia, quam sibi subjugavit tepiditas aut pigritia? Unde ei oriatur superbia, unde extollentia oculorum, cui in tantum cetera vitia dominantur, ut dijudicari se ab universis tanquam sibi male conscius arbitretur? Quid qui cetera vitia potenti virtute devicit, nisi contra nequissimum superbiæ vitium dimicaturus accedat?

Quid autem mali ex superbia innascatur religioso, pandit Bernardus, dicendo : Gravis labor superbia. Hæc est quæ non recipit disciplinam, curari renuit, nec recipit medicinam, ulcus pessimum medellam non sustinens, quod nec summis digitis se patitur attrectari. Hinc superbia
C recte vocatur morbus dictus, Noli me tangere. Et designantur superbi per hericium, qui pro pilis quasi spinis opertus est. Sunt etenim quidam tanta elatione atque durtia offuscati, ut nec pro suis excessibus patiantur se corripere, et præsidenti indignentur correpti : quod est intolerabile malum, et cæcitas atque perversitas consummata.

Isti advertant quod Climacus ait : Sit tibi cervicoso, arroganti et elato, pastor
Cf. i. XXVIII, p. 93. celer et acutus ac irremissibilis, non benignus et mitis; sit tibi iste modus ad obedientiam pulcher et bonus, ut scilicet semper existimes quod probet et tentet te

Luc. 1, 35. ille qui præest; et nunquam decides vel errabis. Quando incessanter redargutus et correptus a patre spirituali, ampliorem ad ipsum assumis fidem et caritatem, Spiritus Sanctus visibiliter habitat in anima tua, et virtus Altissimi obumbravit tibi. Verumtamen ne glorieris nec gaudeas vane, suffere patienter contumelias et ignominias; sed magis plora et luge, quia aliquid contumeliis dignum egisti, et conturbasti aliquem contra te. Noli admirari et stupere super id quod dicturus sum (habeo enim Moysen mecum idem dicentem): Expedit magis, id est, minus malum est, in Deum quam in spirituales patrem peccare. Deo enim ad iracundiam concitato, spiritualis pater noster potest eum reconciliare; patre autem spirituali a nobis conturbato, jam non habemus aliquem pro nobis Deum exorantem ac mitigantem. Ecce ex verbis his Climaci innotescit quantum honorandus sit præsident, quam patienter sit ejus correptio atque correctio sustinenda, quam summe vitanda sit ejus offensa, quam optimum signum sit ex assidua præsidentis correptione et castigatione ampliorem ad ipsum caritatem fiduciamque assumere. Hoc enim revera certissimum signum est magnæ humilitatis, sapientiæ salutaris et mortificationis salubris seu extirpationis privati amoris: quemadmodum ex correptione eidem indignari, signum est pravissimæ elationis, magnæ fatuitatis et inveterati privati amoris.

Secunda hydropicorum proprietas est ardor sitis. Sicque per hydropicum significantur avari, qui quanto plura acquirunt, tanto ad plura obtinenda vehementius inardescunt. Sed forte ab avaritiæ vitio reputamus nos esse immunes, quoniam propria non habemus, nec habere appetimus, imo penitus abhorremus. Verumtamen non blandiamur sic nobis, neque fallamus nos ipsos, quoniam quidquid superflue affectamus, quidquid curiose appetimus, quidquid intensiori affectu quam rectum est coram Deo cupimus aut tenemus, quamvis eo indigeamus, hoc totum nobis in

A avaritiæ reputabitur culpam, ita quod inordinata cupiditas, et immoderata ad ea quæ corporis sunt affectio, sit avaritia religioso. Porro, quam inordinata sit nostra cupido, declarat rerum amissio sive abstractio aut deterioratio, ex quibus frequenter ad contentiones, tristitias atque prædominantes accendimur passionibus. Nec potest ad divini amoris puritatem ac perfectionem pertingere, quamdiu in se habet aliquid hujusmodi cupiditatis aut avaritiæ religiosus.

B Tertia hydropici proprietas est compressio spirituum. Et ita per hydropicum denotatur rancorosus et invidus, qui aliorum bona deprimere nititur et celare ac vituperare, et eo ipso quo talis est, parvum, vilem, depressum et inferiorem eo cui invidet, se esse demonstrat, juxta quod ait Scriptura: Parvulum occidit invidia. Quæ Job v, 2. hominem in præsentem et futuro miserum efficit et afflictum; tantoque amplius detestanda est religiosis, quanto plus in caritate proficere, atque ad eam omnia sua

C ordinare tenentur.

Quarta hydropicorum proprietas est tarditas pedum ad gradiendum. Et ita per hydropicum designatur acediosus, cui impropèratur a Christo quod caritatem suam Apoc. II, 4. primam reliquit. Ista acedia summe fugienda est religiosis, qui ad quotidianum tenentur profectum. Et infert acedia religiosis gravissima damna, quia et in præsentem privat eos consolatione divina, devotione jucunda, et tanquam pondus ingens deprimit eos. Quumque ea quæ Ordinis sunt cum grandi prosequantur labore, parum tamen aut nihil merentur, quoniam sine caritatis affectu et spirituali alacritate faciunt ea, et cum tædio ac horrore. Isti sunt quos nec bonitas Dei infinita inflamat, nec divinæ majestatis immensa honorabilitas provocat, nec æternæ beatitudinis supercopiosissima retributio incitat, ut ea quæ Dei et Ordinis sunt fervide exsequantur, atque cum gaudio obsequantur Altissimo. Abjiciamus ergo infernalem illum torporem, et opera bona strenua ac

veloci agilitate incipiamus, fervide continuemus, reverenter adimpleamus. Consideremus quod pigri servi adstantibus dominis suis fortiter et instanter laborant, quamvis illis absentibus torpeant : quanto magis erubescere nos oportet in summi Dei præsentia superari aedia, vinci pigritia, et non ferventer, jucunde ac strenue Creatori omnia intuenti servire ?

Quinta hydropicorum proprietas, indigestio est humorum. Et ita per eos iracundi designantur, qui commotione iracundiæ suæ quasi quodam fumo fervescunt et indigestæ sunt mentis : a quibus Spiritus Sanctus recedit, quemadmodum hospes a domo in qua vapor fumi abundat. Estque ira in religioso nimium abhorrenda, quem in ovina mititate et columbina simplicitate oportet incedere, et societatem suam ædificare, non aggravare.

A Sexta hydropicorum proprietas, genitalium est inflatio, per quam luxuria explicatur. A qua non solum, sed ab omni quoque cogitatione immunda, ab omni concupiscentia mala, ab omni incitamento libidinis et occasione ac provocatione ad eam omnino cavere oportet religiosum.

Septima illorum proprietas est fœtor anhelitus : quo gula recte exprimitur, quia ex ea multiplex fœtor tam spiritualis quam corporalis consequitur. Atque, ut sanctus loquitur Benedictus, nihil tam fugiendum est religioso ut crapula, ex qua nascuntur loquacitas, pigritia, somnolentia, stimulatio et concupiscentia vitiosa. Emundemus ^{II Cor. vii,} igitur nos ab omni inquinamento carnis ^{1.} et spiritus, et quacumque hac spirituali hydropisi fuerit quis infectus, a Christo curari exoret.

DOMINICA XVIII POST TRINITATEM

ENARRATIO IN EPISTOLAM

GRATIAS AGO DEO MEO SEMPER. I Cor. I, 4-8.

BEATUS Apostolus in præsentī docet A epistola, quantum superiores de spiritali profectu et gratia subditorum suorum debeant gratulari. Nam ait : *Gratias ago Deo meo semper*, id est omni tempore opportuno seu convenienti ac debito, *pro vobis*, quos spiritualiter diligo sicut me ipsum, *in gratia Dei quæ data est vobis*, id est pro omnibus supernaturalibus atque gratuitis donis vobis a Deo collatis, *in Christo Jesu*, id est per Christum mediatorem, seu merito ejus, per quem gratiarum charismata hominibus desuper conferuntur.

Quia in omnibus ad salutem necessariis divites facti estis in illo, hoc est, per Christum abundatis in omni gratia et virtute, secundum modum et statum hujus fragilis vitæ. Juxta quem modum ait Psalmista : Nihil deest timentibus eum. Has quoque divitias exprimit in speciali Apostolus. *In omni verbo* evangelicæ prædicationis ac salubris exhortationis, ita quod abundatis in gratia prædicandi, exhortandi, docendi salubriter. Vel ideo ait, « in omni verbo », quoniam linguis omnibus loquebantur. In primitiva namque Ecclesia, per impositionem manuum Apostolorum dabatur communiter baptizatis donum linguarum. *Et in omni scientia* salutari, videlicet in doctrina sacre Scripturæ, et in multiplici intellectu ipsius, utpote litterali, tropologico, allegorico, anagogico. *Sicut testimonium Christi confirmatum est in vobis*,

id est, prout protestatio qua Christus prædixit gratiam copiosam credentibus dandam, in vobis impleta est, et per effectum ratificata. Ipse enim dixit : Qui credit in me, flumina de ventre ejus fluent aquæ vivæ. Hoc autem dixit de Spiritu, quem accepturi erant credentes in eum.

Joann. vii, 38, 39.

Ita ut nihil vobis desit in ulla gratia necessaria ad salutem, et tam in donis gratiæ gratum facientis, quam in donis gratiæ gratis datæ, notabiliter abundetis. Virtutes namque et dona Spiritus Sancti

B connexa sunt. Verumtamen non ita perfecti fuerunt, quin potuerunt, imo et debuerunt omni die proficere perfectioresque fieri, quum dicat Salvator : Omnem

Ibid. xv, 2.

qui fert fructum, purgabit eum Pater, ut fructum plus afferat. Unde ad Philipenses de se ipso fatetur Apostolus : Quæ retro sunt oblitus, ad ea vero quæ priora sunt extendens me ipsum, ad destinatum persequor, ad bravium vocationis supernæ. Itaque, nihil gratiæ deest vobis *expectantibus revelationem*, hoc est manifestam apparitionem, *Domini nostri Jesu Christi* in die judicii, quando juxta Isaïæ oraculum, videbit omnis caro Salutare Dei nostri. De qua revelatione scriptum est in Apocalypsi : Ecce venit cum nubibus, et videbit eum omnis oculus, et qui eum pupugerunt. Vel, « revelationem Christi », id est claram visionem ejus in patria : quæ visio est tota merces. De qua Christus pollicetur : Qui diligit me, diligetur a Patre

Philipp. iii, 13, 14.

Is. lii, 10; Luc. iii, 6.

Apoc. i, 7.

Joann. xiv, 21.

meo; et ego diligam eum, et manifestabo ei me ipsum.

Qui et confirmabit vos in virtute et gratia, ut confido (optimum enim est gratia stabiliri cor), usque in finem vitæ præsentis inclusive, sine crimine, id est mortali peccato, ita quod gratiam perseverantiæ dabit vobis, ne peccetis mortaliter. Itaque, «confirmabit vos usque in finem», qui erit in die adventus Domini nostri Jesu Christi, id est die judicii universalis in fine mundi, vel judicii particularis in morte cujuslibet hominis. Unde et ait : Vigilate, quia nescitis qua hora Dominus vester venturus est. De quo item adventu comminatur negligenti in Apocalypsi : Si non

Hebr. xiii, 9.

Matth. xxiv, 42.

Apoc. iii, 3.

A vigilaveris, veniam ad te tanquam fur, et nescies qua hora veniam. Dicitur autem Christus in morte cujuslibet venire, non corporaliter descendendo ad morientem, sed per justitiæ suæ effectum. Unde Jacobus dicit : Patientes estote usque ad adventum Domini, id est usque ad mortem. Nam subditur ibi : Ecce judex ante januam adsistit. Postremo adventus Christi, potest intelligi spiritualis ejus adventus quo quotidie venit per gratiæ infusionem ac incrementum ad devotos ac obediētes, quem admodum loquitur : Si quis diligit me, sermonem meum servabit, et Pater meus diliget eum; et ad eum veniemus, et mansionem apud eum faciemus.

Jacob. v, 7.

Ibid. 9.

Joann. xiv, 23.

SERMO PRIMUS

DE GRATITUDINE PRO NATURÆ ET GRATIÆ BENEFICIIS.

MAJOREM horum gratiam non habeo, quam ut audiam filios meos in veritate ambulare. III Joann. 4.

Ista sunt verba S. Joannis apostoli in tertia sua Canonica. In quibus in omnium prælatorum persona loquens, fatetur maximam suam esse lætitiā, quod spirituales filios suos seu subditos percipit Deo juste atque sinceriter deservire. Nempe quo pastor gregem sibi commissum specialius intentiusque diligere obligatur, eo de illius spirituali profectu amplius gloriari, de ruina quoque illius plus contristari tenetur. Hinc in exordio hodiernæ epistolæ, Paulus apostolus, qui teste Chrysostomo, instar ferri igniti in caritate Dei et proximorum ardebat, testatur se semper gratias agere Deo pro omni gratia spiritualibus filiis suis, puta Corinthiis, impertita.

Nec solum prælati, sed et singuli Christiani, quemadmodum se mutuo tenentur diligere, ita pro invicem gratias agere de-

bent Deo pro universa virtute et gratia proximis suis concessa. Debet itaque unusquisque Deo quotidie præcordiales agere gratias pro universis beneficiis ejus, tam sibi ipsi quam aliis desuper contributis. Primo, quia divina Scriptura ad hoc multipliciter nos hortatur. Ait namque Propheta : Benedic, anima mea, Domino, et noli oblivisci omnes retributiones ejus. Deinde partim enumerat beneficia Dei, dicendo : Qui propitiatur omnibus iniquitatibus tuis, qui sanat omnes infirmitates tuas. Rursus sanctus David ad gratiarum actionem nos admonet, devotissime dicens : Quid retribuam Domino pro omnibus quæ retribuit mihi ? Conformiter affectuosissime loquitur Isaias : Miserationum Domini recordabor, laudem Domini super omnibus quæ reddidit nobis Dominus, et quæ largitus est nobis secundum indulgentiam suam. Ad hoc hortatur Apostolus ad Colossenses : Orationi (inquiens) instate, vigilate in ea in gratiarum actione; et

Ps. cii, 2.

Ibid. 3.

Ps. cxv, 12.

Is. lxiii, 7.

Coloss. iv, 2.

1 Thess. v. alibi, In omnibus gratias agite. Hoc est A
18. quod docuit filium suum Tobias, dicendo :

Tob. iv, 20. Omni tempore benedic Deo. Hinc ait Ber-
nardus : Disce in referendo gratiam non
esse tardus aut segnis ; stude pro singulis
donis gratias agere.

Secundo debet unusquisque Deo regrati-
ari, quoniam indesinenter utimur bene-
ficiis ejus. Ipse etenim nos in esse con-
servat, ipse nos alit et vestit ; terra utimur
ad sustentandum, aere ad respirandum,
aqua ad refrigerandum, igne ad calefa-
ciendum. Corpora quoque cœlestia crea-
Hebr. i, 14. vit in ministerium gentibus universis : imo
et angelicos spiritus mittit hominibus pro
custodia et directione eorum salutis. Non-
Gen. i, 28. ne volatilia cœli, bestias terræ piscesque
maris donat ad hominum utilitatem ? Om-
nis itaque creatura ad regratiandum Deo
invitat nos.

Tertio, quoniam non regratiari est valde
rusticanum, indecens et injustum, etiam
apud barbaros et indoctos. Si quis man-
ducanti propinat quartam vini, vituperat-
ur is cui propinatur, nisi regratietur. Qua-
lis ergo rusticitas est Deo omnipotenti non
regratiari, cujus dona sunt omnia bona ?
Idcirco ait Chrysostomus : Admoneo vos
ut Dominum semper benedicatis : si vene-
rint mala, benedicite, et dissolventur ; si
venerint prospera, benedicite, et stabunt.
Itaque, non solum in prosperis, sed etiam
in adversis regratiandum est Deo. Nam de
impio ait Psalmista ad Dominum : Confi-
Ps. xlviii, tebitur tibi quum benefeceris ei. Unde
19. loquitur Augustinus : Quid est sine inter-
missione Deum laudare ? Hoc est, gratias
agere in prosperis quoniam consolaris, et
in adversis quia corrigeris. Imo si quis
incidat malum culpæ, nihilo minus gratias
agere debet, non quod peccavit, sed ju-
stum Dei judicium benedicendo, quia non
nisi juste relictus est ita ab illo.

Quarto, summe et incomparabiliter ac af-
fectuosissime regratiari debemus Domino
Deo nostro, propter innumerabilem multi-
tudinem atque incomprehensibilem magni-
tudinem beneficiorum suorum. Quis enim

universa beneficia Dei generalia et specia-
lia ac singularia, naturalia et supernatura-
lia, corporalia ac spiritualia, exteriora et in-
teriora comprehendere queat, enumerare,
effari aut scribere ? Si alicui nostrum unum
deesset membrum aut sensus unus, quan-
tum regratiaretur ei qui membrum illud
aut sensum sibi conferret ? Si aliquis dives
per unum annum bene nutriat pauperem,
quantum ei pauper regratiatur ? Quantum
ergo, quam incessanter, quam summe, ar-
denter atque humiliter regratiari habemus
Deo sublimi et benedicto, a quo omnia
dona naturæ, corpus et animam, membra
ac vires, universaque dona gratiæ et ne-
cessaria vitæ suscepimus, qui toties nobis
pepercit et indulsit, et bona pro malis
retribuit, imo ingratissimis nobis benefa-
cere non cessavit, quod quum peccaremus
tam graviter et frequenter, non permisit
nos a diabolo protinus jugulari atque ad
inferos trahi, item quod toties prævenit
nos gratiose, et gratiam pœnitendi infudit
piissime, ab innumerabilibus etiam malis
C ac vitiis præservavit, et tam longanimiter
nostram exspectavit emendationem. Insu-
per, quod unigenitus Filius Dei pro nostra
salute tanta fecit ac pertulit, et nostram
assumpsit naturam, atque in Sacramento
tam superamorse et superliberalissime
tribuit nobis se ipsum.

Quinto ad jugem gratiarum actionem
nos debet inducere, quia hoc ipsum sin-
gulariter placet Deo. Propter quod Au-
gustinus disseruit : Quid melius animo
geramus, et ore promamus, et calamo ex-
primamus, quam Deo gratias ? Hoc nec
dici brevius, nec audiri lætius, nec intel-
ligi gratius, nec agi fructuosius potest.
Bernardus quoque hinc loquitur : Danti
rependi nil gratius potest ab accipiente,
quam si gratum habuerit quod gratis ac-
cepit. Idcirco spiritui gratiæ contumeliam
facit, qui beneficium dantis grata non sus-
cipit mente.

Sexto, quoniam actus iste est homini
multipliciter fructuosus. Primo, quoniam
beneficia collata custodit, ne amittantur.

Matth. xxv,
29.

Secundo, quia majora meretur. Propter A quod ait Salvator : Habenti dabitur, id est, gratias de acceptis agenti dabitur gratia copiosior in præsenti : quemadmodum per ingratitude meretur homo collatis donis, his quoque quæ sibi danda erant nisi ingratus fuisset, privari, graviterque puniri. Propterea ait Bernardus : Ingratitudo est ventus urens, fontem pietatis et gratiæ sibi desiccans. Gregorius quoque : Indignus (inquit) est dandis, qui non agit gratias de collatis. Tertio, quoniam magnam promeretur gloriam in futuro.

Præterea ingratitude habet tres gradus in malitia differentes, secundum tria quæ ad gratitudinem exiguntur : quorum primum est, beneficium impensum recognoscere ; secundum est, illud laudare et gratias agere ; tertium est, juxta exigentiam loci ac temporis pro posse vicem rependere. Primus ergo ingratitude gradus est, vicem non reddere : ad quod reducitur reddere mala pro bonis. Quod faciunt omnes iniqui, quoniam inhonoratorem, contemptum et contumeliam faciunt Deo. Secundus gradus est, beneficium dissimulare, non demonstrando se illud accepisse : ad quod reducitur beneficium vituperare. In quo gradu sunt negligentes, qui beneficia Dei non pensant, et ita se habent quasi ea non sint a Deo sortiti. Tertius atque gravissimus gradus est, beneficium non recognoscere : ad quod reducitur, beneficium quasi maleficium aestimare. Hoc ingratitude gradu laborant increduli. Hinc ait Chrysostomus : Optima beneficiorum custoditrix est ipsa memoria beneficiorum, atque perpetua confessio gratiarum.

Itemque quæri potest utiliter, quomodo habere se debet homo in regratiando Deo pro donis gratiæ gratum facientis, quia incertus est homo an sit in caritate et gratia, sicque videtur non posse de eis Deo regratiari. Propter quod Cassiodorus protestatur : Qui quanta sibi gratia collata sit nescit, quantas largienti gratias debeat non intelligit. Et respondendum, quod cum

conditione implicita de talibus regratiandum est Deo, et item in generali atque cum probabili æstimatione.

Itaque juxta præhabita consideremus frequenter ac diligenter universa beneficia Dei generalia, specialia ac singularia, et Deo præcordiales grates dicamus, ei que pro posse vicem jugiter rependamus, ipsum totis viribus honorantes, nec tamen quidquam condignum nos agere profitentes : præsertim quia hoc ipsum est donum Dei præcipuum, taliter Deo esse gratum, nec possumus gloriari nisi in misericordia Dei. Ideo cum Psalmista dicamus : Misericordias Domini in æternum cantabo.

Ps. lxxxviii,
2.

Insuper, juxta tenorem hodiernæ epistolæ, studeamus ditari in Deo in universis donis, gratiis atque virtutibus, quibus animæ veraciter locupletantur, ornantur, impinguntur, vestiuntur ac roborantur ; et quanto istæ divitiæ sunt terrenis divitiis præstantiores, quantoque anima corpore dignior est, tanto plus enitatur istis abundare divitiis quam externis. Sed infelices filii Adæ, excæcati miserandique homines, exteriora atque præsentia plus quam interiora ac futura pensantes, pro temporalibus istis divitiis sollicitantur quotidie, laborant continue, et varias vias excogitant quibus congregent sibi terrena, quasi in hoc sæculo sint perenniter permansuri ; de veris et interioribus animæ divitiis, aut nulla, aut novissima cura est eis, quasi post vitam hanc non sint in alio sæculo in æternum victuri.

1 Cor. i, 5.

Consideremus quam incessanter ac strenue sancti viri pro expurgatione vitiorum, pro adeptione virtutum, pro gratia perfectionis laboraverunt, orando, jejunando, plangendo, se ipsos coram Deo quotidie examinando ac semper custodiendo, quemadmodum de beatissimo viro S. Dominico, institutore Ordinis Fratrum Prædicatorum, legitur. Qui dum adhuc adolescentulus esset, sæpe in noctibus super nudam humum dormivit. Quumque missus esset ad studium, et magna esset caristia in civitate qua mansit, libros suos cum omni

supellectili sua vendens, totum eorum pretium erogavit pauperibus. Denique hospitatus in partibus Tolosanis apud quasdam matronas ab hæreticis per fictas devotiones abstinentiasque deceptas, per totam Quadragesimam in solo pane et aqua ieiunavit; noctibus vero vigiliis ac orationibus instans, quando necessitas requirebat, lassa membra sua super nudam tabulam reclinavit ad dormiendum: atque per hæc matronas illas ad fidei reduxit integritatem. Per hæc et similia exercitia sancta, ad tantam pervenit perfectionem

A virtutum, quod multa præclara egit miracula, et inter cetera duos mortuos suscitavit in Roma. Studeamus itaque sanctorum patrum sequi vestigia, nec corpori parcere in vigilando, orando, abstinendo, ac cetera bona opera exercendo, quatenus per hoc ditentur animæ nostræ in omni dono, virtute et gratia Spiritus Sancti, sicque totis præcordiis Deo adhæreamus. Unusquisque quoque proximos suos ædificare conetur verbo et factis, atque erroneos ac deceptos ad viam reducere veritatis et æquitatis. Ad laudem Dei.

ENARRATIO IN EVANGELIUM

ACCESSERUNT AD JESUM PHARISÆI. Matth. XXII, 34-46.

I N evangelio hodierno docet Salvator ad quid omnia præcepta, documenta et scripta legis Mosaicæ ac Prophetarum tendant ac ordinentur, videlicet ad hoc, ut Deus toto corde ametur, et proximus sicut ipsemet amans. Ait ergo evangelista Matthæus: *Accesserunt ad Jesum Pharisei, et interrogavit eum unus ex eis legis doctor, tentans eum, id est, reprehendere et vincere cupiens: Magister, quod est mandatum magnum, id est summum, in lege Moysis datum? Istam quæstionem proposuit Christo hic Scriba die sequenti post Ramos palmarum. Quum enim Christus feria secunda in Jerusalem rediisset, et multa in templo fecisset miracula, proposuerunt ei multas quæstiones Judæi, videlicet principes sacerdotum et Pharisei, deinde et Sadducæi. Quibus quum Christus imposuisset silentium, rursus Pharisei convenerunt in unum, inter se conquirentes quam Christo proponerent quæstionem: et deliberaverunt quod unus eorum loqueretur pro omnibus. Venerunt quoque multi simul, ut multitudine vincerent quem ratione superare non poterant.*

Ait illi Jesus: Diliges Dominum Deum tuum ex toto corde tuo, et in tota anima tua, et in tota mente tua. Hoc est maximum et primum mandatum. Secundum autem simile est huic: Diliges proximum tuum sicut te ipsum. Hæc est Christi responsio. Denique de expositione verborum istorum et duorum horum præceptorum, dictum est diffuse supra in expositione atque sermonibus evangelii dominicæ tertiædecimæ post octavas Pentecostes: idcirco non reor nunc immorandum, ut vitetur prolixitas, præsertim quoniam opus istud in majorem jam crevit quantitatem quam æstimabam. Itaque Deum «toto corde», id est toto voluntatis affectu, et «tota mente», id est toto intellectu, totaque «anima», quantum ad ceteras animæ vires, diligere dilectione spirituali infusa, est «maximum», id est principalissimum, «et primum», id est dignissimum perfectissimumque «mandatum», quoniam actus quem præcipit, utpote dilectio Dei, inter omnes actus virtutum atque donorum sortitur primatum. Quemadmodum enim caritas est nobilissima virtus, et omnium im-

Deut. vi, 5; Marc. xii, 30, 31; Luc. x, 27.

Cf. p. 400 C' et s.

peratrix, vita, vertex, forma ac finis virtutum, sic actus ejus inter omnes actus virtuosos perfectissimus perhibetur. « Secundum » vero mandatum « est simile huic » primo mandato, non tamen æquale in dignitate, sed proxime sequens, videlicet : diligere « proximum », id est quemlibet hominem in mundo hoc conversantem, sicut se ipsum, spirituali amore, desiderando ejus salutem, et cooperando ei ad illam pro posse, juxta exigentiam seu opportunitatem temporis, loci et causæ. Denique diligendus est proximus propter Deum, id est, quia Deus præcepit hoc, et quia ad Dei imaginem factus est, et gratiæ capax, atque finaliter ob hoc, ut Deo uniatur feliciter in æternum.

In his duobus mandatis implendis universa lex Moysis, imo et Evangelii, pendet, et Prophetæ, id est, scripta Prophetarum pendent in eis : hoc est, universa præcepta, hortamenta et dogmata legis et Prophetarum, ordinantur ad horum duorum observantiam præceptorum, et virtualiter continentur in eis, sicut conclusiones in primis principiis. Propter quod ad Timotheum ait Apostolus : Finis præcepti est caritas de corde puro, et conscientia bona, et fide non ficta. Et alibi : Plenitudo (inquit) legis, est dilectio : nam, non occides, non adulterabis, non furtum facies, non falsum testimonium dices; et si quod aliud est mandatum, in hoc verbo instauratur, Diliges proximum tuum sicut te ipsum.

Denique, Christi responsione descripta, introducitur quæstio quam ipse proposuit Pharisæis et Scribis. *Congregatis autem Pharisæis, interrogavit eos Jesus, dicens : Quid vobis videtur de Christo? Cujus filius est dicendus? Dicunt ei : David, id est, filius regis David dicendus est. Noverant enim Judæi communiter Christum de David semine nasciturum fuisse.*

Ait illis : Quomodo ergo David in spiritu, id est, inspirante ac edocente eum Spiritu Sancto; vel, « in spiritu », hoc est in spirituali ac prophetali intuitu; vocat

eum Dominum, dicens : Dixit Dominus, id est Deus Pater, Domino meo, videlicet Christo, Sede a dextris meis? Hoc dupliciter de Christo exponitur. Primo, secundum ejus divinitatem, hoc modo : « Sede a dextris meis », id est, mecum residendo, regnando, essendo, esto mihi æqualis. Unde ad Hebræos Apostolus dicit de Christo : Qui quum sit splendor gloriæ, sedet ad dexteram majestatis in excelsis. Secundo exponitur quantum ad Christi humanitatem : « Sede a dextris meis », id est, præ cunctis creaturis esto mihi vicinior, et in potioribus bonis meis consistere, repletus gratia et honore, omnique felicitate et gloria præ omni penitus creatura, omnibus quoque prælatus. Donec ponam inimicos tuos, id est omnes reprobos, scabellum pedum tuorum, id est, eos tibi perfecte subiciam : quod erit in die judicii. A principio quippe incarnationis Filii Dei, data est Christo homini omnis potestas in cælo et in terra, quantum ad potestatis hujus possessionem; in resurrectione vero et deinceps data est ei ista potestas, quoad ejus manifestationem, quia ex tunc cœpit præcipue apparere ac prædicari potestas ac dignitas Christi; sed in die judicii dabitur ei ista potestas, quantum ad ejus plenariam executionem, quia tunc Christus potestate sibi a Patre collata omnes adversarios suos plene dejiciet, et in infernum retrudet, dicendo : Ite, maledicti, in ignem æternum. Si (pro Quia) ergo David vocat eum Dominum, quomodo filius ejus est, præsertim quum David fuerit tantus propheta et rex?

Et nemo Pharisæorum et Scribarum : nam aliqui Pharisæi fuerunt Scribæ, sicut nunc quidam religiosi sunt doctores theologiæ; poterat ei respondere verbum aliquod ad quæstionem præactam; quia non exspectabant Christum nisi ut hominem purum; et secundum hoc, non esset Dominus David. Si autem exspectassent eum ut Deum et hominem, faciliter respondissent, quod secundum deitatem esset Dominus David, secundum humanitatem ve-

Gen. I, 26, 27.

I Tim. I, 5.

Rom. XIII, 10, 9.

Ps. CXXXI, 11.

Ps. CIX, 1.

Hebr. I, 3.

Matth. XXVIII, 18.

Ibid. XXV, 41.

ro diceretur filius ejus. *Neque ausus fuit A* quisquam ex illa die eum amplius interrogare, quia timebant vinci atque confundi. Verumtamen post paucos dies, videlicet tres aut quatuor, ausi fuerunt eum captivare ac crucifigere. Unde et tempore passionis interrogavit eum Annas, deinde et Caiphas, multique alii, an esset Christus. Hæc namque consuetudo est impiorum, ut quando prævalere non possunt per rationem atque justitiam, prævalere conantur per oppressionem ac violentiam. *Joann. xviii, 13, 19.*

SERMO SECUNDUS

DE AMORE SPIRITUALI PERFECTO, QUI VOCATUR AMOR ECSTATICUS, ET DE SIGNIS IPSIUS.

FULCITE me floribus, stipate me malis, quia amore langueo. Cant. ii, 5.

Sapientissimus Salomon, qui etiam spiritum habuit prophetiæ, tres edidit libros, quorum unus vocatur Canticum canticorum, in quo de spirituali tractat amore qui est inter sponsum cœlestem, unigenitum Dei Filium Jesum Christum, et animam amorosam; et frequenter sub similitudine quadam carnalis amoris ac corporalium rerum, loquitur illo in libro de spirituali amore, et de vehementia ac proprietatibus ejus, quia nec aptius potest notificari amor ille spiritualis cum proprietatibus suis, quam per carnalem amorem et proprietates ipsius.

Præterea, sicut amor carnalis interdum tam magnus, fervens vehemensque efficitur, quod facit amantem desiderio rei amatae languere, quemadmodum scribit Ambrosius de filio Symphronii præfecti urbis Romæ, quod in tantum amavit beatam Agnetem, quod ejus desiderio languorem incidit grandem et lecto decubuit; sic amor spiritualis divinus in virtuosus hominibus quandoque in tantum crescit, perficitur atque accenditur, quod spirituales languorem facit in anima. Qui languor dici potest defectus mentis amorosæ et sanctæ, quo præ amore ac desiderio Sponsi cœlestis, quem super omnia ardentissime incomparabiliterque affectat, deficit, dejicitur et tabescit in semetipsa.

B Denique, quum Deus gloriosus, omnipotens et perfectus, sit omni creatura in infinitum amabilior, pulchrior, convenientior atque suavior, quid mirum si homo spiritualis quandoque sic incalescat sancto amore ipsius, ut spiritualiter langueat, quum amor carnalis quandoque sic crescat ut homo carnalis præ desiderio sensuali alterius hominis corporaliter infirmetur, arescat, tabescat aut etiam moriatur, quemadmodum secundo Regum de Amnon narratur? Quemadmodum enim amor est causa delectationis, dum amans conjungitur suo amato; sic amor est causa afflictionis, mœroris ac defectionis, quando a sui amati præsentia, conjunctione, usu seu fruitione differtur, impeditur, abstrahitur: quod tam in carnali quam in spirituali amore solet contingere. Itaque quum jubeamur Deum superbomum et superamabilem et superdulcissimum tota voluntate, toto intellectu totisque viribus adamare tanquam infinitum, summum et incomparabile bonum, et tanquam omnium bonorum datorem, utpote creatorem, salvatorem ac glorificatorem, in quo solo tota nostra consistit felicitas; hinc decet omnem Christifidelem quotidie ad hoc niti, ut in sincerissimo Dei amore proficiat, quatenus tandem ad perfectum Dei pertingat amorem, qui vocatur amor ecstasticus, id est, mentem amantis a se ipsa totaliter alienans, atque in dilectum ipsum

omnino transferens ac transformans, ita ut vix aliud quam id quod tam ardentissime diligit, scilicet Deum, valeat cogitare.

Porro, ut possit homo agnoscere probabiliiori modo quo id fieri potest, an amore spirituali ecstático diligat Deum, describendæ jam sunt proprietates amoris istius. Et quia spiritualia per corporalia cognoscere connaturale est homini, ideirco proprietates amoris spiritualiter ecstáticos notificandæ sunt per proprietates amoris carnalis ecstáticos, qui etiam amor ἔρως appellatur, quasi prædominans rationi. Nam et amor carnalis dum tam intensus ac fervens efficitur, quod totaliter superat rationem, carnaliterque amantem in amatum ita transponit atque transformat, ut aliud quam ipsum vix cogitare queat, amor ecstáticus nuncupatur ab ecstasi, quod extrapositio interpretatur.

Itaque prima proprietas amoris carnalis ecstáticos est, quod taliter amorosi multa de se invicem concipiunt, præsertim quando ab invicem sunt absentes; sed dum præsentés sunt, pauca loquuntur, ac suos conceptus exprimunt imperfecte. Defectivæ namque locutiones propriæ sunt ita amantium, maxime quando de re amata vel cum re amata loquuntur. Cujus duæ sunt causæ. Prima, quoniam magnitudo affectionis verba abrumpit et intercidit. Unde et Christus quum destructionem Jerusalem deploraret, defectiva usus est locutione, dicendo : Quia si cognovisses et tu; et quidem in hac die tua, quæ ad pacem tibi; nunc autem abscondita sunt ab oculis tuis. Secunda causa est, quia affectus unius ita transfert et absorbet eum in alium, quod plura simul loqui non vacat. Hoc itaque modo locutionis, Sponsa purissima, hoc est anima spiritualiter amorosa, utitur frequenter in Canticis, sicut quum ait : Ego dilecto meo, et ad me conversio ejus; itemque, Dilectus meus mihi, et ego illi. Unde quemadmodum Aaron eloquens loquebatur pro Moyse ineloquente, ita in locutionibus istis debet ratio loqui pro affectu, et verba

A ferventis affectus supplere atque exponere, ut quum dicitur : Ego dilecto meo, id est, cœlesti Sponso mihi super omnia caro totis præcordiis sum intenta, illi vaco, ei complaceo; et ad me conversio ejus, hoc est, ipse mihi vicem rependit, grátiosus et dulcis est mihi, caritatem suam ostendit ad me. Itaque, si quis scire desiderat an spiritualementem amorem ecstáticum habeat ad Deum sponsum cœlestem, perpendat qualibus sermonibus alloquatur illum in suo secreto, in ferventis dilectionis alloquio, in cordis sui effusione coram illo.

Secundum signum carnalis amoris ecstáticos, desiccatio est membrorum : quoniam taliter amorosi arefiunt in membris, quia ex veheménti cordis applicatione circa rem dilectam, multiplicantur spiritus, ex quo interiorem desiccationem patiuntur. Sic ex spirituali amore ecstático, anima desiccatur ab omni carnalis voluptatis humore, ab omni libidinoso affectu, ita quod carnis concupiscentia tollitur. Nunc ergo perpende an carnalium desideriorum mortificationem tibi inesse sentis. Nempe quod homo Deum in cordis sui thalamo ardentius frequentiusque amplectitur, eo ab omni carnali atque mundano affectu plus moritur, ita quod neque in cibo, potu, vestitu, somno, neque in aliqua re temporali inordinate delectatur, nec aliud quærít in illis nisi necessitatem naturæ et utilitatem animæ, per respectum ad spiritualia bona ac veram salutem.

Tertium signum carnalis amoris ecstáticos, est concavitas oculorum. Consueverunt enim taliter amorosi oculos habere concavos seu profundos, quoniam oculi sequuntur spiritus sese retrahentes atque ad locum æstimationis concurrentes. Conformiter, interiores oculi animæ spiritualiter amorosæ ecstátice, profundantur in corde. Totum namque est intra, quod quærít ac diligit; extra nil cupit, intus nihil fastidit. Itaque ad contemplationem Dei, ad ejus intuitum et ardentem amorem se totam recolligit intus. Intus enim fulget, intus manet quem diligit, quemadmodum

Luc. xix, 42.

Cant. vii,

10.

Ibid. ii, 16.

Exod. iv,

14-16, 30;

vii, 1, 2.

Is. XXVI, 8. Isaias loquitur Deo : Nomen tuum et me- A dam, quando de Dei præsentia gratiosa
 moriale tuum, Domine, in desiderio ani-
 mæ. Insuper in cordis profundo habet
 oculos suos intellectuales anima taliter
 amorosa, ut consideret et perpendat ne
 quid in ea sit quod cœlesti Sponso, qui
 solus cor intuetur, displiceat. Considerat
 quoque adspectu interius profundato oc-
 cultos accessus et recessus Sponsi cœle-
 stis : qui accedit dum insolita aut singulari
 devotione, illuminatione seu inflammatio-
 ne mentem tangit, visitat ac perfundit ;
 recedit vero dum hujusmodi gratiam pia B
 subtrahit dispensatione. Ex his homo per-
 pendere potest an ecstatische diligat Deum.
 Qui enim incustoditi est cordis, dissolutus,
 verbosus et levis, ac sensibus vagus, pro-
 cul nimis ab isto ecstático distat amore.

Quartum signum amoris carnalis ecsta-
 tici, est siccitas oculorum seu carentia
 lacrimarum : unde nec mors proximorum,
 nec damna rerum, in taliter amorosis la-
 crimas queunt excutere. Similiter anima
 amorosa caritate ecstática, omnia exteriora
 damna sive adversa parvi pendit, nec ali-
 quid tale eam contristat, quia tam vehe-
 menter circa Deum afficitur, quod nil
 aliud ejus comparatione appretiat ; et
 quidquid a Deo non elongat nec impedit,
 hoc pro nihilo arbitratur, dummodo ei re-
 maneat salvum quod summo et incompa-
 rabili cupit amore, videlicet Deo uniri,
 eum intra se retinere, amplecti, contempla-
 ri, gustare. Unde qui amplius contristantur
 de temporalium rerum amissione seu ad-
 versitate terrena, quam de Dei offensa seu
 culpa, longe sunt ab ista ecstática caritate. D

Quintum signum amoris carnalis ecsta-
 tici, est inordinatus pulsus. Omnis equi-
 dem taliter amorosus habet pulsum aut
 nimis tardum et rarum, aut nimis fre-
 quentem atque velocem, secundum diver-
 sas apprehensiones quas concipit de ama-
 to : tardum enim habet pulsum, dum de
 illius adeptione desperat ; velocem, quando
 de adeptione confidit. Sic anima ecstatische
 amorosa pulsum habet velocem, id est af-
 fectionem ferventem, promptam, jucun-

dam, quando de Dei præsentia gratiosa
 ejusque fruitione gloriosa habenda confi-
 dit ex consideratione bonitatis, caritatis,
 misericordiæ beneficiorumque ejus. Ex
 quali affectione dixit Propheta : Cor me- *Ps. LXXXIII,*
 um et caro mea exsultaverunt in Deum ^{3.}
 vivum. Porro, dum anima amorosa, ex con-
 sideratione propriæ defectuositatis et cul-
 pæ, ac difficultatum obtinendi salutem,
 formidat de suis periculis, pensans melio-
 res se corruisse, tunc habet quasi tardum
 pulsum, id est lentum affectum.

Sextum signum carnalis amoris ecsta-
 tici, est profunda cogitatio et sollicitudo
 versa ad interiora, ita quod taliter amoro-
 sus gerere videtur imaginem dormientis.
 Qui evigilare vix potest, nisi fiat ei mentio
 de dilecto ; cetera non advertit, quoniam
 tota sua cogitatio et affectio fixa est in
 amato. Sic anima ecstatische amorosa ita in
 Deo est fixa, quod vana et sæcularia ver-
 ba non curat, nec otiosa advertit ; si au-
 tem de Deo sit sermo, mox quasi evigilans
 audit libenter, et de ipso fatur hilariter.
 C Væ igitur eis qui ad loquendum ac au-
 diendum de rebus carnalibus ac munda-
 nis, curiosis et vanis sunt prompti, ad
 loquendum vero ac audiendum de Deo
 ac rebus pertinentibus ad salutem sunt
 tardi. Hoc equidem signum est, quod in eis
 deficit amor Dei, regnatque amor mundi.

Septimum signum carnalis amoris ec-
 statici est, quod taliter amorosus quum
 videt rem rei amatæ consimilem, inflam-
 matur, commovetur, et quasi insanire vi-
 detur. Pariformiter anima ecstatische amo-
 rosa, dum in vita præsenti Dei bonitatem
 atque dulcedinem experitur (quæ expe-
 rientia, futuræ beatitudinis prælibatio quæ-
 dam est ac summæ suavitatis quædam
 imago), mox alienatur, accenditur, et ad
 æternam felicitatem cum impetu sanctæ
 dilectionis afficitur.

Itaque, juxta evangelii hodierni doctri-
 nam, in vera Dei ac proximorum caritate
 esse, permanere, proficere indesinenter
 curemus ac enitamur, omnemque carna-
 lem abjiciamus amorem. Qui tanto est vi-

lior ac culpabilior, quanto intensior sive A ferventior, quia per ipsum subicitur homo rebus carnalibus subjectione vitiosa, prorsus vilissima. Amor quoque carnalis ecstasticus, est ineffabiliter vilis ac vitiosus, non animæ tantum, sed corpori quoque valde nocivus. Porro amor spiritualis ecstasticus nobilissimus est ac virtuosissimus nimis. Quo divino ac deificante amore mirabiliter plenus fuit sanctissimus ille eremita abbas Bessarion, de quo retulit sanctus ejus discipulus abbas Dulas, quod per quatuordecim dies stetit in continuo B raptu mentis suæ ad Deum, alienatus ab omni sensu exteriori et Deum indesinenter contemplans. Alio tempore, idem abbas Bessarion cum discipulo suo abbate Dula ambulavit juxta mare, dixitque abbas

Dulas : Sitio valde. Quumque abbas Bessarion orasset, discipulo suo dixit : Bibe de mari. Et dulcis facta est aqua maris. Et bibit abbas Dulas, hausitque parum de aqua illa in vase. Cui dixit abbas Bessarion : Cur implesti hoc aqua ? Respondit : Ne iterum sitiam. Cui dixit abbas Bessarion : Deus qui hic est, et ubique est. Alio tempore, idem Bessarion pedibus pertransivit fluvium magnum, et aqua non pertingebat nisi usque ad talos ejus. Iterum, præfatis abbatibus euntibus ad quemdam senem, venit sol ad occasum, dixitque abbas Bessarion : Obsecro, Domine, stet sol donec perveniam ad servum tuum. Et factum est ita. Ecce quanta agit Deus omnipotens pro suis amicis viris perfectis, spirituali amore ecstático inflammatis ac roboratis.

SERMO TERTIUS

DE AMORE MULTIPLICI, ET DE FOEDITATE AC SIGNIS AMORIS CARNALIS.

IN novissimis diebus instabunt tempora C periculosa, et erunt homines amantes se ipsos, cupidi, elati, voluptatum amatores magis quam Dei. II Tim. III, 1, 2, 4.

Ista sunt verba Apostoli, quæ nunc impleta videntur, atque quotidie adimplentur. In primitiva namque Ecclesia Christiani dilexerunt se ipsos ac proximos suos amore veraciter spirituali ac fervido, quia æternam salutem et gratiarum charismata quibus ad illam pertingitur, sibi ipsis ac aliis præcordialiter optaverunt, et pro eisdem acquirendis, conservandis ac perficiendis strenue et infatigabiliter laboraverunt. Sed, heu ! in fæcibus temporum horum caritas ista refriguit, et pro ea amor carnalis, privatus ac improbus corda hominum est ingressus, ita quod homines amant se ipsos in se, non in Deo, quia carnaliter, non spiritualiter amant se. Siquidem ea quæ carnem delectant et

fovent, non quæ animæ prosunt, desiderant et exquirunt, videlicet temporales divitias, carnales delicias, humanos honores, lauta cibaria, curiosa ac superflua vestimenta, fabulationes vanas et frivolas, ludos, jocos, spectacula et choreas. Taliter se amare, est se false diligere veraciterque odire, juxta quod scriptum est : Qui diligit iniquitatem, odit animam suam. Qui enim amant se ita, ea sibi ipsis desiderant quæ eis maxime nocent, per quæ spiritualiter occiduntur, omni virtute et gratia Spiritus Sancti privantur, dæmonibus subjiuntur, et tandem æternaliter condemnantur. Ecce qualiter amant se impii, utpote omnes qui sunt in peccato mortali, qui creaturis magis quam Creatori inhærent, afficiuntur, deserviunt.

Ps. x, 6.

Præterea, ut sciatur quis amor sit bonus ac meritorius, et quis malus ac demeritorius, quis item indifferens, advertendum

quod quintuplex ponitur amor : est enim amor naturalis, socialis, mercenarius, carnalis et spiritualis. Omnis autem amor in quadam similitudine et communicatione unius cum alio fundari videtur. Amor itaque naturalis, est affectio animi qua eos qui nobis in natura aut naturalibus communicant seu propinqui sunt, vel in naturalibus donis eminentiores videntur, diligimus, ut parentes ac sobolem et cognatos, eos quoque qui ejusdem nobiscum sunt complexionis, et qui in naturalibus magis sunt gratiosi. Porro amor socialis, est affectio qua eos cum quibus familiaris ac frequentius conversamur, diligimus, ut collegas. Unde in Proverbiis scriptum est : *Vir amicus quam frater. Amor mercenarius, est affectio qua aliquid amamus seu cupimus, non propter commodum ejus, sed in quantum est utile nobis, sicut diligimus vestem, pecuniam, bruta. Hunc amorem quidam appellant amorem concupiscentiæ, qui distinguitur ab amore amicitiae, quo aliquid amamus propter bonum ipsius, videlicet proximum ut salvetur. Amor carnalis est, quo aliquid propter carnalem delectationem, vel ob ea quæ ad carnem spectant, amatur. Amor spiritualis est, quo Deum propter se ipsum, et intellectuales creaturas felicitatis capaces in Deo diligimus.*

Deinceps omnium horum amorum, solus spiritualis amor infusus, qui caritas nuncupatur, laudabilis, virtuosus meritoriusque censetur, quia per eum Deo placeamus. Amor vero carnalis vituperabilis est, fœdus et demeritorius; tamen inter conjugatos quodammodo admittitur et excusatur, quia carnalis voluptas in actu matrimoniali per tria bona matrimonii honestatur, et a culpa immunis fieri perhibetur: sicque per hujusmodi voluptatem se possunt diligere, referendo tamen ad spirituale bonum eandem. Porro amor naturalis ac socialis sunt indifferentes, quia nec boni nec mali moraliter; sed si ad finem laudabilem ac salutem referantur, et

A spirituali amore condiantur ac formentur, actus eorum meritorii fiunt. Quemadmodum enim amor naturalis ac socialis fit faciliter ac frequenter occasio et incitamentum carnalis amoris ac vitiorum, nisi prudenter regatur (nam unus sociorum trahere solet alium ad opera sua; et si se invicem incaute tangant aut tractent, carnalis affectio generatur); sic quilibet horum amorum si sapienter regatur, fit utilis, et spiritualem dilectionem valde accendit, fovet ac agilem facit, dum scilicet caritati subjicitur, et ea formatur ac regitur. Unde homines spirituales qui etiam naturalem aut socialem ad invicem habent amorem, valde spiritualiter amant se mutuo, et ferventer orant pro invicem, et obsequiosi sunt simul, atque ad mutuam communicationem et subventionem promptissimi. Præfati ergo hi duo amores sapienter sunt ac sollicite gubernandi, ne generent mortem, sed augeant caritatem.

Præterea amor mercenarius etiam, in se vocatur indifferens : nam exteriora ac temporalia diligere possumus propter commoda nostra, quum et propter nos credantur creata. Sed amor hujusmodi potest fieri excessivus, si propria commoda quæramus inordinate; et item laudabilis, si commoda nostra referamus ad gratiam ac salutem, et Dei honorem : ut si diligamus cibum, potum, vestem, pecuniam et jumenta, in quantum nobis necessaria sive utilia sunt ad vivendum ac serviendum Domino Deo. Servus quoque amat dominum suum, et dominus servum, mercenario hoc amore : dominus namque diligit servum propter obsequium, et servus dominum propter lucrum, loquendo de eis ut sunt servus et dominus; verum in quantum sunt homines christiani, debent se invicem spirituali amore diligere.

Insuper quæri potest, an liceat nobis mercenario amore diligere Deum. Videtur quod imo, quia possumus et tenemur eum diligere propter beneficia ejus, videlicet quia utilis et necessarius nobis est. Possumus quoque Deo servire propter nostram

utilitatem, videlicet ob mercedem æternam, quum dicat Psalmista : Inclinavi cor meum ad faciendas justificationes tuas in æternum, propter retributionem. Unde de Moyse dicit Apostolus, quod respexit in remunerationem. Oppositum hujus videtur, quia Deo servire et diligere eum propter propriam utilitatem et mercedem, est Deo uti et se ipso frui, hoc est Deum habere pro medio et se ipsum pro fine. Ad hanc quæstionem quidam doctores respondent affirmative, alii negative; verumtamen in sensu concordant. Nam servire Deo et diligere eum propter propriam utilitatem ac mercedem principaliter atque finaliter, id est potius quam propter propriam Dei bonitatem, gloriam et honorem, perversum est : sicque quidam doctores accipiunt amorem mercenarium, asserentes quod amor ille sit in se inordinatus et vitiosus. Sed Deo servire et eum diligere propter mercedem utilitatemque propriam minus principaliter quam propter ipsius bonitatem et gloriam, licitum est, quamvis sit imperfectum, quum sit ibi quædam reflexio ad se ipsum. Porro, si homo serviat Deo et diligat eum propter beneficia ejus ac præmia, in quantum sine illis Deo servire, placere ac uniri non potest, ita quod pure atque totaliter refert ea ad Deum et ejus honorem; tunc Deo servire et eum diligere propter beneficia ejus ac præmia, nequaquam perfectionem minuit caritatis, imo et auget, quia tenemur Deum etiam propter beneficia sua ac promissa amare.

Subinde, quia frequenter amor carnalis spirituali amori se miscet, et sub specie spiritualis amoris quidam se amant carnaliter; ut discernantur isti amores ab invicem, aliquid de indiciis amoris carnalis tangendum est. Primum signum carnalis amoris, est inquietum desiderium existendi corporali præsentia cum dilecto sive dilecta : nam quoniam carnem carnaliter diligit, carni cupit uniri. Spiritualis autem dilectio, quoniam spiritualia respicit, quæ locum et tempus transcendunt,

A parum curat de corporali præsentia, nisi forte propter spiritualem profectum, sed sincero cordis intuitu ac tranquillo affectu dilectum contemplatur ac diligit, sive absentem, sive præsentem. Secundum signum carnalis amoris, est collocutio de vanis et inutilibus rebus, præsertim de magnitudine mutuæ dilectionis, verba adulatoria aut lasciva miscendo. Tertium signum, est corporalis contrectatio, insertio manuum, applicatio laterum, amplexus et oscula, contactusque uberum, atque similia, ex quibus frequenter hinc inde libidinosi motus causantur, et quod horrendum est, resolutio seminis : quæ gravi non carent culpa, quoniam causa eorum sponte admittitur. Sed ratio carnali mollitie et fædo amore obtenebrata, in particulari non advertit nec judicat quod in generali indecentissimum esse cognoscit : imo hic amor talia efficit in occulto, qualia nec fateri nec fari audet amator in publico. Propter quod ait Apostolus ad Ephesios : Quæ in occulto fiunt ab eis, turpe est dicere. Quartum signum, est quod carnalis amator vult solus amari, et de facili suspicatur alium plus amari quam se. Quintum, est pronitas invicem indignandi ac irascendi, iterumque placandi, quemadmodum pueri cito rixantur ac reconciliantur. Sextum, est datio seu transmissio munusculorum, quibus hic amor nutritur. Septimum, est fraternæ correptionis subtractio et mutuum vitiorum palpatio sive laudatio, in tantum quod taliter se amantes, frequenter se mutuo juvant in defendendo sua peccata.

Vitet itaque Christifidelis omnem carnalis amoris labem, effectum et notam, ne ratio sua veræ sapientiæ luce privetur, voluntasque effeminata, spiritualis dilectionis sinceritate destituatur. Spiritus enim est qui vivificat; caro autem non prodest quidquam. Et qualiscumque sit dispositio carnis, quid est caro nisi caro?—Legitur de quadam sanctissima femina, cujus manum quum tangeret suus confessor, et sensisset ex hoc stimulum corporis, femina illa au-

Ps. cxviii,
112.

Hebr. xi, 26.

Ephes. v,
12.

Joann. vi,
64.

divit in spiritu vocem sibi dicentem : Noli me tangere. Ignorans quoque cur verba illa dicerentur ad eam, dixit ad confessorum : Pater, audivi in spiritu verba hæc, Noli me tangere. Tunc confessor propria conscientia tactus, dixit ei qualiter ex contactu manus ejus sensisset corporis motum; atque ex tunc ipse vitavit talem contactum. Ex hoc patet quam caute et pure

A habere se debet Christifidelis circa omnem proximum suum, nec solum vir circa feminam, sed et masculus circa masculum, et mulier circa mulierem. Præcipue quoque dum quis incipit motum carnalem sentire, debet contactum dimittere. Similiter qui frequenter propriam fragilitatem ex contactu expertus est, debet eum semper vitare, ne illaqueet semetipsum.

AD RELIGIOSOS

SERMO QUARTUS

QUOMODO RELIGIOSI SATAGERE DEBENT UT SPIRITUALITER DIVITES FIANI,
ET NIHIL EIS DESIT IN ULLA GRATIA.

GRATIAS ago Deo meo semper pro vobis in gratia Dei quæ data est vobis. I Cor. 1, 4.

Ex hodierna docemur epistola, quam ardentissime sanctus Apostolus spirituales filios atque discipulos suos dilexit, de quorum conversione, perfectione et gratia tam præcordialiter lætabatur, tamque devotissime Deo regratiabatur. Sic et omnis prælatus de gregis sibi commissi gratia et profectu debet intime gloriari et Deo regratiari, tanto amplius quo eos magis specialiter ac intense tenetur diligere; ex eadem quoque caritatis radice, de uniuscujusque sibi commissi negligentia et ruina debet ex corde tristari. Hinc S. Joannes apostolus, in tertia sua Canonica, in sua ac omnium bonorum prælatorum persona fatetur : Majorem horum gratiam non habeo, quam ut audiam filios meos in veritate ambulare. Nec istud solis præsentibus competit; sed unusquisque fidelis, quemadmodum proximos suos obligatur diligere sicut se ipsum, ita de proximorum suorum gratia et virtute, meritis et profectu gaudere debet in Domino, et gratias ei

B referre. Siquidem gratiarum actio, est præclarissima species laudis, et actio Deo valde accepta, exercitiumque divinum, angelicus actus et occupatio vere cœlestis : superni etenim cives Deo adorando, æterno et benedicto incessabiles immolant grates, laudes perennes. Per gratiarum actionem, supernorum fluentia charismatum ad proprium refluunt fontem, exuberantiusque inde derivantur ac diffunduntur in animam gratam. Hinc loquitur Augustinus : Quid melius animo geramus, ore promamus, et calamo exprimamus, quam Deo gratias? Hoc nec dici brevius, nec audiri lætius, nec intelligi gratius, nec agi fructuosius potest.

Consideremus ergo pro viribus omnem caritatem, pietatem et munificentiam Dei super omne genus humanum, et universa beneficia ejus impertita hominibus a principio mundi usque in præsens, et præsertim quæ modo in tota præstat Ecclesia et nobis ipsis, propinquis, commissis et benefactoribus nostris; et de omnibus istis Deo ex totis regratiemur præcordiis. Bonitatem, sapientiam, omnipotentiam, mise-

ricordiam ejus in omnibus pro toto posse magnificemus, laudemus, admiremur ac veneremur, diligamus et vereamur.

Præterea consideremus qualiter sanctus Apostolus in præsentī epistola suos laudat ^{1 Cor. 1, 5, 7.} discipulos : In omnibus (inquit) divites facti estis in Christo, in omni verbo et in omni scientia, ita ut nihil vobis desit in ulla gratia. Videamus ergo an etiam nobis conveniat ista laudatio, vel quantum distamus ab ea. Primo ergo intueamur an spiritualiter divites simus in omni verbo, ita ut linguam nostram sciamus refrenare ac temperare in omnibus, atque in loquendo et etiam in tacendo congruum tempus, locum et modum servare ; item, an habeamus gratiam verbi cœlestis in consolando tentatos, afflictos, pusillanimes, mœstos, in corripiendo delinquentes, in exhortando pigritantes, in instruendo ignaros, in perterrendo præsumptuosos, in comminando duris et obstinatis, ne aliquid horum facere præsumat qui gratiam id agendi non habet, quoniam scriptum est : Si est tibi sensus, responde proximo tuo : ^{Eccli. v, 14.} C alioqui sit manus tua super os tuum. Nihilominus unusquisque faciat ista pro posse suo, loco et tempore opportuno.

Insuper videamus an divites simus in omni scientia, eorum videlicet quæ pertinent ad salutem et ad sacræ paginæ intellectum. Omnes quippe homines naturaliter scire desiderant ; sed in desiderio illo naturali multi negligenter, curiose, infructuose, imo et nocive se occupant, non solum sæculares, sed item religiosi, qui ad sciendum ea quæ Ordinis sui sunt et observantiam regularem concernunt, sunt tardi et defectuosi, atque ad sciendum impertinentia suæ vocationi, sunt studiosi, curiosi et fervidi. Multi quoque libentius legunt et student subtilia et scholastica aut historialia, quæ ingenium immoderate occupant, et a devotionis fervore, a salubri conscientiae discussione impediunt, memoriam lacerant, quam libros devotionales monasticos, ex quorum studio diligenti inflammatur dilectio, nutritur devotio, et mens

A vere ac saluberrime illustratur ad inspicendum ac deplorandum suos defectus, et excitatur ad emendationem et profectum in omnibus. Aliqui quoque studiis suis nimis diu insistunt, ita ut vix ab eis possint avelli dum spiritualiora ac magis debita sunt exercitia peragenda.

Quemadmodum ergo ceteri actus boni debitæ virtutum circumstantiis sunt orrandi, ita et studium seu lectio, ut scilicet apto loco et tempore fiat cum discretione et recta intentione. Ea quoque studeamus quæ nostræ magis consonant vocationi, ex quibus in omni virtute et gratia nostræ professioni necessaria et accommodata amplius crescere, confirmari perficique valeamus, sicut in Ecclesiastico legitur : ^{Eccli. iii, 22-24.} Altiora te ne quæsieris, et fortiora te ne scrutatus fueris ; sed quæ præcepit tibi Deus, illa cogita semper, et in pluribus operibus ejus ne fueris curiosus. Non est enim tibi necessarium, ea quæ abscondita sunt videre oculis tuis : ideo in supervacuis rebus noli scrutari multipliciter. Studeamus itaque non quæ magis delectant, non quæ curiositatem, vanitatem, loquacitatem, jactantiam nutriunt et inutiliter tempus consumere faciunt, sed quæ vere magis expediunt. Nec obliviscamur quod dictum est : Maledictum studium quo negligitur divinum Officium. Imo ingratum est Spiritui Sancto quidquid ei obtuleris, neglecto eo ad quod teneris. Ea quoque quæ legimus, applicemus ad praxim, quia scienti bonum, et non facienti, peccatum ^{Jacob. iv, 17.} est illi.

D Deinceps inspiciamus pro posse an nihil desit nobis in ulla gratia, nobis videlicet necessaria ad salutem : an juxta Ordinis nostri regulam seu statuta digne Deo vivamus, idonee proficiamus ; an ea quæ Ordinis sunt, inviolate servemus. Puto quod in hac consideratione compellemur humiliare et aspernari nos ipsos, et conversationem nostram pro nihilo reputare, magisque damnationem vereri quam vane præsumere aut nos ipsos jactare, eo quod a patrum nostrorum conversatione, a pu-

ra et inviolata Regulæ aut Statutorum observatione distemus ac deficiamus tam infinite. Videamus an nihil nobis desit in humilitate, sine qua Deo non possumus complacere. Si autem ex levi occasione, ad elationem, ad vanam gloriam incitamus, aut contra alios indignamur, et fratrem despiciamus aut temere judicamus, multum nobis deest humilitatis. Conformiter examinemus nos, an nihil nobis desit in mansuetudine, patientia, fortitudine, iustitia, obedientia, sobrietate, discretione, caritate, ceterisque virtutibus; atque, ni fallor, in omnibus inveniemus nos defectuosos ac pauperes.

Quid itaque restat, nisi ut quotidie in nostro secreto coram Deo nos discutiamus, accusemus, corripiamus, defleamus, castigemus, confiteamur, satisfaciamus, atque in universis nos totis viribus emendemus? Ad quid venimus, assidue revolvamus; temporis infructuosam deductionem vehementissime detestemur; orando, meditando, psallendo occupetur semper cor nostrum in Deo. Dominum Deum cum Propheta oremus: Deduc me, Domine, in via tua, et ingrediar in veritate tua; lætetur cor meum, ut timeat nomen tuum; itemque, Gressus meos dirige secundum eloquium tuum, et non dominetur mei omnis injustitia; rursusque, Notam fac mihi viam in qua ambulem; et, Doce me facere voluntatem tuam; ut tandem perfectionem adepti beatitudinemque sortiti, cum sancto viro grata ac hilari mente can-

Ps. LXXXV,
11.

Ps. CXVIII,
133.

Ps. CXLII, 8.

Ibid. 10.

Atemus: Tenuisti, Domine, manum dexteram meam, et in voluntate tua deduxisti me, et cum gloria suscepisti me. Quum enim præcepta Dei sciamus, et quid agendum sit nobis non ignoremus, quid necessariæ nobis sunt præactæ orationes et eis consimiles, nisi quia ad bene ac meritorie operandum, cogitandum, appetendum, loquendum jugiter indigemus actuali motione et directione Spiritus Sancti, ope et protectione Altissimi, ut unctio ejus in cunctis nos doceat, et universa cum vera discretione agamus, errores et vitia atque malorum permixtiones quantum possibile est declinantes.

Ps. LXXII,
24.

I Joann. II,
27.

Ut autem hæc omnia a Deo impetrare possimus, cum omni humilitate et filiali fiducia confidamus in eo, et ejus auxilio incessabiliter innitamus. Ad ipsum suspirat cor nostrum, invocemusque eum, et indesinenter simus solliciti ne ipsum in aliquo offendamus, informationem quoque a superioribus nostris et sapientioribus libenter accipiamus. Unde et Climacus loquitur: Quicumque volunt discere Domini voluntatem et beneplacitum ejus, suas ipsorum voluntates et complacentias prius mortificare tenentur et debent, et in fide ac simplicitate absque malitia Patres suos aut etiam Fratres interrogare, et consulta benigne suscipere. Ut ergo nihil in ulla gratia desit nobis, infatigabiliter satagamus juxta nostræ professionis exigentiam efficaciter conversari, ad laudem Altissimi.

SERMO QUINTUS

QUOMODO DILIGENDUS SIT DEUS (QUEMADMODUM PRIOR DILEXIT NOS)

SUAVITER, SAPIENTER ET FORTITER.

IN his duobus mandatis tota lex pendet et Prophetæ. Matth. XXII, 40.

Quum caritas sit omnium finis ac regina virtutum, Scriptura divina ad ipsam

uberrime nos cohortatur. Unde in evangelio hodierno Christus testatur quod tota lex Moysis, imo et Evangelii, et omnes Prophetæ pendent in duobus caritatis præ-

ceptis. Quorum primum est, ut Deus toto corde, tota anima, tota mente totisque viribus diligatur; secundum, ut quilibet diligat proximum, hoc est omnem hominem viatorem, sicut se ipsum. In his duobus primis altissimisque mandatis tota lex et Prophetæ dicuntur pendere, quoniam universa præcepta, hortamenta, documenta, consilia, ad hæc duo ordinantur mandata, et virtualiter continentur in eis, quemadmodum conclusiones in primis principiis.

1 Tim. 1, 5. Propter quod ait Apostolus: Finis præcepti est caritas de corde puro, et conscientia

Rom. XIII, 10. bona, et fide non ficta; et iterum, Plenitudo legis est dilectio. Idcirco et nos omnia exercitia nostra, et quidquid propter Deum agimus et patimur, ad hoc finaliter referre debemus, ut in pura Dei ac proximorum dilectione crescamus ac perficiamur. De hac re dicta sunt multa valde in diversis sermonibus supra, hinc inde.

Deinceps, quum perfectio rationalis creaturæ sit, suo Creatori ordinate assimilari (propter quod Deus in veteri Testamento

Lev. XI, 44, sæpe præcepit: Sancti estote, quoniam ego sanctus sum; Christus quoque in Evangelio: Estote, inquit, perfecti sicut et Pater

Matth. v, 48. vester cœlestis perfectus est; et rursus jubet ut et inimicos amemus, persecutoribus

Ibid. 44, 45. beneficiamus, ut simus filii Patris cœlestis, qui pius et benignus est super iniquos, et beneficia multa largitur ingratis, impiis, perfidis et indignis), hinc sicut

1 Joann. IV, 19. Deus dilexit nos, sic debemus et nos diligere Deum.

Porro, ut ait Bernardus, Deus dilexit nos tribus modis, videlicet dulciter, sapienter et fortiter: dulciter, quia nostram assumpsit naturam, et caritatem suam ad nos multis et evidentissimis nobis monstravit caritatis effectibus, signis ac beneficiis; sapienter, quia sic naturam assumpsit humanam, quod non assumpsit peccandi pronitatem, nec aliquam contraxit aut fecit culpam, juxta quod Isaias prædixit: Iniquitatem non fecit, nec inventus est dolus in ore ejus. Dilexit quoque nos fortiter, quia pro nobis pertulit

A mortem. Unde evangelista Joannes fatetur:

Quum dilexisset suos qui erant in mundo, usque in finem dilexit eos. Plenum certe *Joann.* XIII, 1.

omni dulcedine, videre in carne Deum hominem, hominum conditorem. In carnis assumptione, nobis condescendit; culpam vitando, nobis quid agere debeamus ostendit; mortem sustinendo, Patri pro hominibus satisfecit. Ecce amator dulcis, consultor prudens, fortis adjutor. Ei secure nos credimus qui salvare nos scit, vult et potest. Dulciter igitur nos amavit, qui ad nos requirendos, redimendos, beatificandos, in hujus peregrinationis descendit exsilium. Sed huic affectioni junxit sapientiam, qua falleret dæmones, et patientiam, qua Deum Patrem placaret offensum: sic et nos affectionem nostram sapientia gubernare et patientia adornare debemus.

Præterea et nos his tribus modis debemus Deum diligere. Primo, suaviter, ne male allecti quacumque delectatione carnali, sæculari, inordinata, aut mundi honoribus, a Dei avertamur amore. Ideo mo-

C net Propheta: Delectare in Domino; atque *Ps.* XXXVI, 4.

Apostolus, Gaudete in Domino. Noverant *Philipp.* IV, 4.

sanctus Propheta et beatus Apostolus mentem humanam non diu posse sine delectatione consistere, nec delectationem carnalem ac spiritualem, sensualem et cœlestem, humanam et divinam se invicem compati aut pariter esse posse: ne ergo in nobis ipsis aut rebus creatis, caducis, vanis ac vilibus illicite delectemur, hortantur ut delectemur in Deo. Et mirum, quum Deus sublimis et benedictus sit universis et singulis in infinitum pulchrior, dulcior, melior, amabilior, amœnior, convenientior, sapientior, ditior, potentior, perfectior, felicior, liberalior ac beneficentior, quod non maxime atque assidue delectamur in eo, in contemplatione, memoratione et amore ipsius, in laude et cultu ejus, in omni actu quo ipse honoratur ac colitur. Si delectamur in cibo et potu, in adspectu et colloquio hominum, in rebus materialibus, cur non multo plus in eo qui essentialiter et incircumscriptibiliter dulcis

est, in spirituali gustu atque alloquio ejus, puta in psalmis, orationibus, meditationibus et lectionibus sacris? Magna est ergo imperfectio, tarditas, cæcitas cordis nostri, imo et infectio interioris palati. Propterea satagamus mentem ab omni inordinato affectu purgare, a pravis cogitationibus custodire, spiritualibus actibus semper et affectuose habere intentam.

Insuper, diligamus Deum sapienter. Deus etenim sapiens est et sapientia ipsa : ideo vult sapienter amari, ut sapientia caritatis affectum informet (ne indiscreto zelo agatur, præcipitet et fallatur), erroresque excludat, et bene sentiatur de Deo, quemadmodum scriptum est : Sentite de Domino in bonitate. Alioqui, ut ait Bernardus, facillime illudet spiritus erroris zelo tuo, si scientiam negligas ; nec habet callidus hostis machinamentum efficacius ad tollendam de corde dilectionem, quam si possit efficere ut in ea incaute, et non secundum rectum rationis judicium, ambules. Unde et alibi scriptum est : Neminem diligit Deus nisi qui cum sapientia inhabitat.

Sap. i, 1.

Ibid. vii, 28.

Amemus etiam Deum fortiter, ut nec prospera nec adversa a divini amoris sinceritate nos avertere queant, aut amoris sancti actum ac profectum in aliquo impedire. Imo quo plura occurrunt incitamenta corruendi a caritatis exercitiis atque profectibus, eo intensius ac frequentius cor nostrum ad Deum levare assuescamus, et in prosperis amplius quam in adversis metuere ac dolere. Sit itaque constans et fortis nostra dilectio, non cedens terroribus, nec succumbens laboribus. Non abducamur blanditiis, nec seducamur erroribus, nec frangamur injuriis. Sit fervens caritas nostra, ut omnem semper pigritiam, teporem ignaviamque excludat ; sit discreta, nec præcipitanter impellat ; negligentiam et omnem errorem devitet ; sit fortis, ne præsentis vitæ adversitatibus terreatur. Dilige Dominum Deum tuum toto et pleno cordis affectu ; dilige tota mente, id est tota rationis vigilantia et circumspectione ; dilige tota anima, tota sci-

licet intentione et exquisitione ; sed et tota virtute, ut nec mori pro Dei amore formides. Sit suavis tuo affectui Deus contra blandientes illecebras, contra dissolutiones, risus, jocos, ludos, cachinnos et confabulationes. Confortet te virtus Dei Christus, ut nec comminatione, nec adulatione, nec quocumque commoditatis tuæ intuitu relinquant justitiam, a veritate discedas, passioni aut pravæ machinationi consentias. Beati enim qui esuriunt sitiuntque justitiam. Esto rectus corde coram Altissimo, quoniam rectus Dominus Deus noster, et justus Dominus justitiam diligit, justos amplectitur, et pro ipso zelantes deosculatur, roborat et tuetur.

Matth. v, 6.

Ps. xci, 16.

Ps. x, 8.

Amplius, sicut Deus dilexit nos gratis, videlicet non propter commodum suum, nec originaliter propter merita nostra, sed propter puram et incircumscriptibilem suam bonitatem ; ita et nos eum gratis amemus, videlicet ob bonitatem ipsius immensam, non propter commodum nostrum. Et si diligamus eum propter sua beneficia et promissa, hoc sit non in quantum illa sunt nobis accommoda per respectum ad nos ipsos, sed in quantum sunt nobis necessaria per comparisonem ad ipsum, videlicet in quantum sine eis Deum perfecte diligere, honorare et colere, aut plenarie frui eo non possumus : ut sic nos ipsos et omnia rectissime referamus ad illum, super omnia incomparabiliter intendendum, amandum, colendum, nec aliqua re-curvatione seu obliquitate ad nos reflectamur.

Postremo, quia signum dilectionis est exhibitio operis, caritatem nostram sinceram et magnam ad Deum et proximos, per opera virtuosa sincere ac magnifice demonstramus, ut omne opus Dei reverenter ac fervide exsequamur ; sensus, linguam et cor jugiter refrenemus et custodiamus, ne Deum in aliquo offendamus, ne distractionem mentis caritatisque minorationem anima nostra incurrat ; atque ad hoc semper nitamur, ut quantum possibile est, simus actualiter ubique et semper Deo in-

D

tenti. Proximis quoque obsequiosi, favorabiles, benefici, pii exemplaresque simus. Ut autem ad actualementem Dei unionem assiduam proficiamus, stet, juxta Climaci documentum, semper in porta cordis nostri aliqua

A cogitatio virilis, fortis, pervigil, non dormitans, cogitationes inutiles advenientes repellens, et mentem in Deo firmans. Hæc autem cogitatio potest esse ista aut similis : Volo semper Deo esse intentus.

SERMO SEXTUS

DE EFFECTIBUS ATQUE INDICIIS AMORIS ECSTATICI, DEQUE MULTIPLICIBUS AMORIBUS ALIIS.

DILIGES Dominum Deum tuum ex toto corde tuo, etc. Matth. xxii, 37.

Spiritualia per corporalia declarantur. Est autem amor quidam carnalis tam vehemens atque prædominans, quod merito amor ἔρως et ecstasticus appellatur, quia rationi amantis in tantum prædominatur, quod amantem a se ipso quasi totaliter alienat et in amatum transponit, transformat, defigit, in tantum ut ejus nequeat oblivisci, et amore illius crebro languescat, deficiat, imo interdum in amentiam quamdam labatur. Quum ergo Deus omnipotens, cujus bonitatis nullus omnino est finis, sit universis creatis infinite amabilior, non mirum si homines spirituales, devoti, sæpe ad tantam divinæ dilectionis vehementiam perducantur, ut præ summi boni amore defluant a se ipsis, et per caritatis ardorem transformentur in Deum, et quasi in divinæ amabilitatis absorbeantur abyssum, sicque divino amore vulnerentur, ac langueant, morianturque sibi ipsis et cunctis caducis, soli quoque vivant Creatori superdignissimo. Hujusmodi autem amor spiritualis vocatur ecstasticus, quasi extra se ponens et in Deum transferens amorousum, ita ut cum Sponsa possit faten-
Cant. ii, 5. ri : Fulcite me floribus, quia amore lan-
Ibidem. gueo; itemque, Caritate vulnerata ego sum;
Galat. ii, et cum Apostolo, Vivo autem jam non ego,
 20. vivit vero in me Christus.

Denique proprietates et effectus ac si-

B gna amoris spiritualis ecstastici, per effectus et signa ac proprietates amoris carnalis ecstastici sunt pandendi. Itaque primus effectus et primum signum amoris carnalis ecstastici, est concavitas oculorum, quoniam oculi sequuntur spiritus sese ad intra retrahentes atque ad locum æstimatoriæ concurrentes. Conformiter interiores oculi animæ spirituali amore ecstastico inflammatae, profundantur ad intra in fundo seu intimo cordis, ab exterioribus se retrahentes, quoniam summum bonum et primum verum quod quærit, quod contemplatur, cupit, amplectitur, omni secreto exstat secretius, intusque fulget ac invenitur. De quo loquitur Isaias : Vere tu es Deus absconditus. Habet item anima taliter amorosa oculos intus sic profundos ad discutiendum se ipsam, ne quid cœlesti displicens Sponso in ipsa resideat, ut etiam occultos Sponsi accessus ac recessus advertat. Accedit etenim Sponsus, quando insolita aut ingenti illuminatione, inflammatione, consolatione, devotione mentem visitat, tangit, perfundit; recedit autem, quando hujusmodi dona subtrahit aut suspendit. Itaque qui incustoditi est cordis, dissolutus, verbosus vagusque sensibus, ab ecstastico spirituali amore procul est nimis.

Secundum signum et opus amoris carnalis ecstastici, est pulsus inordinatus. Taliter equidem amorosi habent pulsum aut

nimis velocem, aut valde tardum : et hoc, A secundum diversas apprehensiones de dilecto conceptas. Dum enim de ejus adeptione diffidunt, tardum habent pulsum ; velocem vero, quando de ejus adeptione confidunt aut certi sunt. Sic anima spiritualiter ecstatische amorosa, pulsum habet velocem, id est, promptum, lætum fervidumque affectum, quando de gratiosa Dei præsentia aut gloriosa ejus fruitione futura multum confidit. Ex quo affectu dixit Propheta : Cor meum et caro mea exsultaverunt in Deum vivum. Tardum autem B pulsum, id est lentum affectum, habet anima, dum in sua quasi ariditate relinquitur, et ex propriæ defectuositatis ac culpæ intuitu, atque ex difficultate obtinendi salutem, spiritualiter consternatur, et de suo veretur periculo, non ignorans meliores se corruisse.

Tertium signum et effectus amoris carnalis ecstatici, est defectiva locutio, quia in taliter amorosis magnitudo affectionis verba intercidit atque abrumpit. Sic quoque ipsa intensissima affectio unum transponit et absorbet in alium, quod plura simul loqui non vacat : imo in absentia, de se invicem multa concipiunt ; dum vero præsentibus sunt, pauca loquuntur, et suos conceptus exprimunt imperfecte. Conformer anima ecstatische amorosa, hoc modo locutionis alloqui solet Sponsum cœlestem, ut dum ait in Canticis : Ego dilecto meo, et ad me conversio ejus ; itemque, Dilectus meus mihi, et ego illi. In quibus ratio supplere et exponere debet verba ardentis affectus, quemadmodum olim eloquens Aaron loquebatur pro Moyse.

Quartum signum amoris carnalis ecstatici, desiccatio est membrorum : nam ex vehementi cordis applicatione circa dilectum, multiplicantur spiritus in taliter amorosis, sicque interiorem desiccationem patiuntur et arefiunt in membris. Sic anima ecstatische amorosa, a carnali voluptate, libidinoso amore et concupiscentiis arefit, et desipit ei omnis caro.

Quintum signum amoris carnalis ecsta-

tici, est lacrimarum carentia, ita quod nec mors propinquorum, nec damna rerum, taliter amerosos queunt movere ad fletum. Sic animam spiritualiter ecstatische amorosam parum aut nihil contristat quæcumque terrena adversitas aut corporalis infirmitas, sed solum id quod cœlesti displicet Sponso, et quo ab ejus unione, præsentia, amplexu, osculo impeditur, quia ipsum super omnia incomparabiliter appretiatur, et cetera ejus comparatione parum attendit.

Sextum signum amoris carnalis ecstatici, est profunda sollicitudo versa interius, ita quod taliter amerosus gerit quasi imaginem dormientis, vixque evigilat, nisi de dilecto sit sermo. Sic anima spiritualiter amorosa, circa Deum ita est sollicita, sic fixa, occupata, intenta in eum, quod exteriora, vana et sæcularia non advertit, nec quæ dicuntur libenter audit, nisi sit sermo de Deo et pertinentibus ad salutem. O quantum distant ab amore spirituali ecstático, qui promptiores sunt loqui et audire verba inutilia, vana, sæcularia, dissoluta, quam ædificatoria ac divina !

Septimum signum amoris carnalis ecstatici est, quod taliter amerosus, dum aliquem videt consimilem ei quem tam valide amat, inflammatur, concutitur, et quasi insanire videtur. Sic anima ecstatische amorosa, Deum in hac vita clare sicut in se ipso est contemplari atque gustare non valens, dum eum in suis effectibus experitur, eumque prout in hac vita fieri potest, gratiose contemplatur ac dulciter sapit (quæ experientia ac degustatio, futuræ beatitudinis aliqualis prælibatio est et quædam imago), protinus inflammatur, alienatur, atque ad futuram felicitatem intenso caritatis fervore afficitur.

Ecce ex iis spiritualis amoris ecstatici proprietatibus, indiciis et effectibus perpendamus quousque in caritate profecerimus, quantum caritati ecstatiæ appropinquaverimus ; et si ab ea multum distamus, contristemur de hoc et festinemus ad eam, simus jugiter introversi, coram Deo solliciti, intus et extra custoditi.

Ps. LXXXIII,
3.

Cant. VII,
10.
Ibid. II, 16.

Exod. IV,
14-16, 30 ;
VII, 1, 2.

Præterea multiplex ponitur amor : est enim amor carnalis, amor naturalis, amor socialis, amor mercenarius, et amor spiritualis, divinus, infusus. Amor carnalis est, quo aliquem propter carnalem delectationem, vel maxime quantum ad ea quæ carnis sunt, diligimus. Amor naturalis est, quo aliquem propter naturæ similitudinem, aut naturalem propinquitatem, aut convenientiam talem, amamus. Amor socialis est, affectio qua eos cum quibus familiarius aut frequentius conversamur, diligimus. Amor mercenarius est, quo aliquid amamus, non propter ipsius commoditatem, sed nostram, puta in quantum est utile nobis. Amor spiritualis est, quo Deum primo et maxime propter suam propriam bonitatem, deinde rationales ac intellectuales creaturas atque nos ipsos in Deo, secundum Deum et propter Deum diligimus. Inter omnes istos amores sola spiritualis dilectio est per se virtuosa, meritoria et Deo accepta. Amor vero carnalis detestabilis est et fœdus, præsertim in religiosis, qui spirituales vocantur et esse tenentur. Alii amores indifferentes esse dicuntur : qui tamen facile fiunt carnales, nisi diligens adsit custodia cordis.

Postremo, signa amoris carnalis sunt hæc : inquietum desiderium corporalis præsentiae, collocutio de vanis et inutili-

bus rebus, potissimum de magnitudine mutuæ dilectionis; corporalis quoque contractatio, insertio manuum, applicatio laterum, amplexus et oscula, et indecentes ac impudici contactus, ex quibus frequenter sentiuntur motus lascivi, stimulatio fœda, imo sæpenumero, quod horrendum est, calefactio periculosa ac resolutio seminis : quæ non carent culpa enormi, quum causa eorum spontanee admittatur; item pronitas mutuo indignandi, irascendi, et rursus placandi, collatio munusculorum, et exclusio comparis, quia amator carnalis vult solus amari.

Fugiamus ergo hunc carnalem cum suis signis effectibusque amorem, et naturalem ac socialem, mercenarium quoque amorem ordinemus ad amorem divinum. Et ne quis sub specie spiritualis amoris fallatur amore carnali, eum sub specie spiritualis amoris admittendo, ex præinductis perpendat signis et effectibus amoris carnalis, an amor suus vere spiritualis existat. Quod si quis aliquem spiritualiter diligat, et aliquid de sensuali affectione habeat admixtum, separet pretiosum a vili, *Jer. x. 19.* et quidquid carnalis fœditatis est, extirpare non differat, ne modicum venenum paulatim serpens, inficiat totum et perimat caritatem. Sit ergo affectio nostra omnis ordinata, spiritualis et pura, ad laudem et gloriam Omnipotentis. Amen.

DOMINICA XIX POST TRINITATEM

ENARRATIO IN EPISTOLAM

RENOVAMINI SPIRITU MENTIS VESTRÆ. Ephes. iv, 23-28.

APOSTOLUS in præsentī epistola ad in-
ternam nos admonet puritatem ac
tranquillitatem, et ait : *Renovamini spiri-
tu mentis vestræ*, id est, novum ac spiri-
tuale esse acquirite in superioribus viri-
bus animæ vestræ, gratiam ac virtutes
accipiendo a Deo aut in eis proficiendo.
Ideo quasi expositorie subditur : *et indui-
te novum hominem*, id est, similitudinem
Christi assumite, ejus sequendo vestigia :
unde alibi ait Apostolus, Induimini Domi-
num Jesum ; *qui secundum Deum creatus
est*, id est, a Deo seu operatione divina, vel
secundum beneplacitum Dei formatus est,
in justitia et sanctitate veritatis, id est
in vera justitia ac sanctitate. Quas Chri-
stus, secundum quod homo, accepit in
ipso incarnationis momento : nam anima
ejus, in omni gratia, sapientia, virtute,
dono, fructu et beatitudine essentiali per-
fecta creata est.

*Propter quod deponentes mendacium
omne, puta jocosum, et officiosum, et
præsertim perniciosum, quod est mortale*
peccatum, de quo Sapiens ait : Os quod
mentitur, occidit animam ; et in Psalmo,
Perdes omnes qui loquuntur mendacium ;
loquimini veritatem unusquisque cum pro-
ximo suo, id est non nisi verba veracia
quæ expedit dici : unde apud Zachariam
inducitur, Pacem tantum et veritatem di-
ligite ; *quoniam sumus invicem membra*,
id est per fidem et caritatem conjuncti,
atque ad idem mysticum corpus Ecclesiæ

A pertinentes, ad subventionem quoque mu-
tuam obligati.

Irascimini, et nolite peccare. Hoc ex
Psalmo acceptum est. Et multipliciter po-
test exponi, secundum quod ira variis mo-
dis accipitur. Si enim sumatur pro motu
primum primo seu pure naturali, non est
peccatum, sicque permissive dicitur, « ira-
scimini » ; additur tamen, « et nolite pec-
care », quatenus ira illa non permittatur
procedere, ne fiat culpabilis. Secundo su-
mitur ira pro motu subito, ex humana in-
firmitate et pœna peccati prodeunte, qui
est veniale peccatum. Procedit namque ex
aliqua apprehensione, nec rationis exspe-
ctat judicium. Et ita quod dicitur, « ira-
scimini », non est exhortatio irascendi,
sed consilium atque remedium iram vin-
cendi : nam subditur, « et nolite peccare ».
Tanquam dicat : Si talis in vobis oritur
ira, non ei consentiat ratio, sed per re-
ctum judicium ac mansuetudinem repri-
mat eam. Tertio, sumitur ira pro motu
rationem sequente, quo contra propria vel
aliena peccata movemur, optando vindi-
ctam juxta rationis censuram. Et ista est
ira per zelum, estque laudabilis, faciens
actum virtutis robustius exsequi : quam
virtuosi frequenter sponte assumunt. De
qua dicit Gregorius : Tunc robustius ratio
contra peccata erigitur, dum ei ira subita *
famulatur. Sicque admonendo nunc dici-
tur, « irascimini » ; additur vero, « et no-
lite peccare », quia et ira hæc magno

Ps. iv, 5.

Rom. xiii,
14.

Sap. i, 11.

Ps. v, 7.

Zach. viii,
19.

* subdita

moderamine indiget, ne excessive ferve- A scat, aut majorem inferat ultionem quam culpa meretur.

Sol non occidat super iracundiam vestram, id est, si inordinatus aliquis motus iræ in vobis nascatur, non tamdiu perseveret in vobis quousque sol iste visibilis perveniat ad occasum, sed ante noctis adventum tollatur. Vel, Sol justitiæ, scilicet Christus, aut certe sol intelligentiæ, id est lux seu judicium rationis, « non occidat super iracundiam vestram », id est, a vobis non elongetur, nec separetur propter B iræ vestræ excessum. *Nolite locum*, id est ingressum ad cor vestrum, aut mansionem in eo, *dare diabolo*, ejus suggestionibus consentiendo, aut ad pristinas iniquitates redeundo. Hinc subditur :

Qui furabatur ante suam conversionem aut confessionem, jam non furetur, ne recidivando ingratus sit Deo, graviusque offendat, quoniam vulnera repetita plus nocent. Furari quoque est contra præceptum Decalogi : ideoque ex suo genere est peccatum mortale. *Magis autem laboret^{15.} operando manibus suis quod bonum est*, id est, opera exteriora licita pro pretio faciat, *ut habeat aliquod bonum temporale unde tribuat necessitatem patienti*, id est, indigentibus eleemosynam aut succursum impendat de labore manuum suarum : quod valde sanctum et meritorium est. Unde in Actibus ait Apostolus: Omnia ostendi vobis, Act. xx, 35. quia sic laborantes oportet suscipere infirmos, et meminisse verbi Domini Jesu: Quia beatius est magis dare quam accipere.

SERMO PRIMUS

DE RENOVATIONE SPIRITUS ; ET DE MENDACIO, IRA FURTOQUE VITANDIS.

RENOVABITUR ut aquilæ juventus tua. Ps. cii, 5.

Ista, ut fertur, aquilæ est natura, quod tempore senectutis suæ superius labium suum per modum unci in tantum excre- scit, quod nec os aperire, nec cibum sumere potest. Propter quod tandem fame senioque afflicta, ex naturali industria labium collidit ad petram, deponitque uncatum, quo sumptio cibi impediabatur : quo facto, ad valetudinem pristinam reparatur per sumptionem escarum. Sic anima rationalis, mole hujus gravissimi corporis at- que terrenæ inhabitationis occupationibus ac necessitatibus prægravata, et a divino- rum contemplationibus impedita, per viti- osam quoque conversationem spiritualiter inveterata, ad Christum, qui lapis angularis ac petra vocatur, deponit gravedinem istam ac senectutem, id est, Christi virtutes considerando ac imitando, ejus doctrinis in-

C tendendo atque ipsius obtemperando præceptis, a carnalibus desideriis, ab exterioribus occupationibus, a necessitatibus vitæ præsentis ac miseræ carnis, quantum potest se abstrahit, spiritualibus vacat orationibus meditationibusque devotis, contemplationi cœlestium et summi boni dilectioni ferventi intenta est : sicque instar aquilæ renovatur ejus juvenus, id est, per gratiam, virtutes ac dona Spiritus Sancti, per exercitia virtuosa, per divinorum contemplationem ac ceteros actus præfactos, spiritualiter renovatur, reviviscit, ornatur, splendida ac robusta efficitur. Hoc itaque est primum ac præcipuum documentum quo in præsentī epistola nos informat Apostolus. Unde ad Corinthios testatur : Licet is qui foris est, noster homo corrumpatur, id est caro mortalis, quæ quotidie tendit ad mortem ; tamen is qui intus est, id est anima rationalis, renovatur de die in diem.

^{15.} Ephes. ii, 20 ; I Cor. x, 4.

Ps. cii, 5.

II Cor. iv, 16.

Studeamus ergo quotidie in præfatis virtutibus actibusque earum proficere, et per orationes ac sanctas meditationes mentes nostras ad Deum frequenter levare, ad cœlestem patriam adspirare, ad æternam atque plenissimam illam felicitatem et gloriam affici, quatenus intuitu et amore Domini Dei nostri et spiritualium æternaliumque bonorum, vilescant nobis universa carnalia et terrena, sicque cum Isaia propheta dicamus Deo : Anima mea desideravit te in nocte, sed et spiritus meus in præcordiis meis; de mane vigilabo ad te. Sed, proh dolor! multi jam sunt Christiani, si tamen Christiani, qui totum diem ita expendunt, quod raro aut nunquam cogitant de Deo et sua salute, et vix unam legunt Orationem dominicam; sic quoque vadunt dormitum absque discussione conscientiae suæ et absque devotione, ut bestiae. Quam rationem daturi sunt isti Domino Deo de omni hora seu tempore eis impenso?

Secundo nos docet Apostolus in præsentī epistola, ut vitemus omne mendacium. Unde S. Hieronymus quum ageret in extremis, suis præcepit discipulis : Non sit inter vos mendacium; omnis mendax est abominabilis Deo. Deus namque est veritas, et veritati contrariatur omne mendacium : hinc omne mendacium est peccatum. Nulloque modo licet mentiri, nec debet homo quasi ex humilitate asserere se fecisse vitium quod non fecit. Propter quod loquitur Augustinus : Quum humilitatis causa mentiris, et quod non fecisti fecisse te dicis, si non eras peccator antequam mentireris, mentiundo efficeris. Verumtamen licet et expedit interdum veritatem celare, et per quamdam industriam ac circumlocutionem abscondere, ut aliquis a periculo liberetur, quemadmodum Augustinus iterum fatetur : Aliud est mentiri, aliud verum occultare, sicut aliud est falsum dicere, aliud verum tacere : ut si quis non velit ad mortem prodere hominem, paratus esse debet occultare verum, non dicere falsum, ut neque prodatur, nec

mentiatur, neque occidat animam suam pro alterius corpore.

Præterea triplex est mendacium, puta : jocosum, quod dicitur causa solatii; et officiosum, quod dicitur causa alicujus utilitatis sine damno alterius : ut si quis dicat non esse in domo hominem qui quaeritur ad mortem, qui tamen est ibi. Tertium est mendacium perniciosum, quod dicitur causa nocumenti alterius, vel in se ipso contrarium est veritati fidei christianæ aut eorum quæ directe pertinent ad salutem : et istud mendacium est mortale peccatum, quia contrariatur veritati divinæ et caritati atque justitiæ. Alia duo mendacia non sunt ex suo genere peccata mortalia, sed assiduitate et immoderata complacentia seu libidine mentiendi, mortalia fieri possunt et fiunt, præsertim quum Ecclesiasticus dicat : Melior est fur quam assiduitas viri mendacis.

Eccli. xx,
27.

Denique, etiam coram hominibus valde honestum et exemplare est ut homo sit jugiter verax in verbis, ita quod scienter non proferat falsum, sed verbum suum sit quasi juramentum suum. Verumtamen si quis dixit aut et juramento firmavit se facturum quod divino prohibetur præcepto, non debet verbum tale implere. Nec fit mendax non implendo, sed dicendo sive jurando : nam eo ipso quo dicit seu jurat se facturum quod non licet, tenetur non adimplere. Præterea, quum mendacium sit falsa verborum prolatio intentione fallendi, constat quod si quis dicat aliquod falsum quod æstimat esse verum, non mentitur formaliter, sed materialiter tantum. Similiter si dicat aliquis verum quod putat falsum, quamvis materialiter verum dicat, formaliter tamen mentitur et peccat. Tollat igitur unusquisque a se pessimam consuetudinem mentiendi, quæ vitiosa est et damnabilis valde, præsertim dum quis se in suis peccatis false excusat : quod est non solum mendacium, sed propriæ quoque iniquitatis defensio, quæ (secundum Bernardum) est iniquitas maxima et negatio contra Deum omnipotentem, potissi-

Job xxxi,
28.

mum quando ex ea sequitur aggravatio A injusta alterius. Omni itaque fugato mendacio, loquatur unusquisque veritatem cum proximo suo, nec quamlibet veritatem, sed loco et tempori congruentem, causæ ac personæ convenientem, quum Salomon dicat : Sermo opportunus optimus est. Itemque Apostolus : Omnis (inquit) sermo malus ex ore vestro non procedat, sed qui utilis est ad ædificationem, ut det gratiam audienti. Maxime ergo cavenda sunt verba detractoria, rixosa, lasciva ac scandalosa.

Prov. xv,
23.
Ephes. iv,
29.

Ibid. 26.

Tertio docet Apostolus ut sic irascamur quod nec peccemus, nec in ira perseveremus, hoc est, ut iram per vitium quæ rationem prævenit et perturbat, vitemus, et iram per zelum cum grandi moderamine habeamus, nec excedamus in ira. In qua dupliciter homo excedit : primo, si ira nimium inardescat, quia sic rationis iudicium impedit valde ; secundo, si graviolem velit inferre vindictam quam illata meretur injuria : quod est contra justitiam. De hac materia, quoniam in diversis sermonibus dicta sunt plura, pertranseo.

Ibid. 27.

Quarto docet Apostolus ut non demus locum diabolo, sed orando, jejunando, documenta, præcepta et exempla Christi pensando, viriliter resistamus cunctis temptationibus ejus, nec patiamur corpora nostra ac corda, Spiritui Sancto in templum ac habitaculum consecrata, fieri dæmonum loca. Omnia equidem dæmonis tentamenta mendosa sunt, et quidquid suggerit ordinat ad fallendum. Propter quod ait Salvator : Diabolus in veritate non stetit, quia veritas non est in eo ; quum loquitur mendacium, ex propriis loquitur, quoniam mendax est, et pater ejus, puta mendacii. Ideo loquitur Augustinus : Quemadmodum Deus Pater genuit filium veritatem, sic diabolus lapsus genuit quasi filium ipsum mendacium. Unde si aliquando verum quid dicat, non nisi ad falsitatis confirmationem id ordinat, dicente Chrysostomo : Concessum est diabolo aliquando dicere verum, ut mendacium suum rara

Joann. viii,
44.

veritate commendet. Ex quibus omnibus innotescit, quod sicut veritatem semper loquendo fit homo filius Dei, sic assidue mentiendo filius fit diaboli.

Quinto docet Apostolus ne quis furetur, *Ephes.* iv,
28.

quia furari ex suo genere est peccatum mortale. Tamen interdum est veniale, propter actus imperfectionem, aut damni illati parvitatem : ut si quis alteri pomum furetur, præsertim dum probabiliter putat id domino rei parum aut nil displicere ; alioqui non excusaretur a gravi culpa.

B Quod si furtum omne vitandum est, multo plus detractio : quæ gravior culpa est furto, quoniam majus nocumentum proximo infert quam furtum, utpote carentiam bonæ famæ, quæ præferenda est exteriori substantiæ. Maxime vero seminatio discordiæ est vitanda, quoniam auferit concordiam, pacem et caritatem, quæ tam famæ quam substantiæ sunt anteponendæ : sicque seminatio discordiæ est gravius vitium quam ipsa detractio. Idcirco Salomon loquitur : Detestatur anima

Prov. vi, 16,
19.

C mea eum qui inter fratres seminat discordias. Vitemus ergo universa hæc vitia. Et quod ineffabiliter virtuosum est, ita de laboribus manuum suarum vivere studeat Christianus, ut etiam inde valeat indigentibus subvenire : quemadmodum abbas Joannes Cassianus describit, quod suis temporibus et ante, monachi in Ægypto ac alibi de laboribus manuum suarum vixerunt, et quidquid eis superfuit, captivis, egentibus ac infirmis miserunt.

Ephes. iv,
28.

Legitur de illustrissimo duce Godefrido de Bolonia, quod diligentissimus fuit veritatis amator, in tantum quod legitur nunquam fuisse mentitus. Quumque tempore suo Christiani obtinuissent sanctum sepulcrum ac Terram sanctam, ad quod ipse strenuissime jovit, fecerunt eum regem Jerusalem Terræque sanctæ. Verumtamen ex maxima humilitate, nunquam ferre voluit regium diadema, dicens se nequaquam velle auream ferre coronam illo in loco ubi Dominus suus Christus Jesus, unigenitus Filius Dei, spineam portavit coronam.

ENARRATIO IN EVANGELIUM

ASCENDENS JESUS IN NAVICULAM, TRANSFRETAVIT. Matth. ix, 1-8.

MATTHÆUS evangelista sanctissimus, in A evangelio hodierno describit qualiter Christus paralyticum quemdam curavit, qui pene omnium perdiderat usum ac motum membrorum, et ait : *Ascendens Jesus in naviculam, transfretavit per mare Galilææ, et venit in civitatem suam, puta Capharnaum* : quæ dicitur civitas Christi, non quia in ea conceptus aut natus sit, sed quia in ea frequenter fuit, habitavit, prædicavit ac multa peregit miracula. Denique, ante jam Christus in navicula transfretavit ultra mare Galilææ, et B venit in terram Gerasenorum; quumque ibidem docuisset, et duos curasset obsessos, reversus est inde in navicula, sicut nunc scribitur. Venerunt quoque Apostoli in navicula ista cum Christo. Denique in hoc Christi patet humilitas, quod non grandem et cortinatam, sed vilem elegit naviculam. Paupertatem namque et humilitatem, ab utero matris usque ad patibulum crucis, in omnibus præelegit ac docuit.

Et ecce offerebant ei paralyticum ja- C *centem in lecto*, id est, habitatores aliqui urbis Capharnaum, cognito reditu Christi, statim portaverunt ad eum in lecto paralyticum unum, ut eum curaret. Et ut Marcus habet, portabatur a quatuor viris. Atque ut Lucas testatur, quum domum in qua Jesus prædicavit, præ multitudine audientium ingredi non valerent, ascenderunt tectum, et facto in eo magno foramine, per tegulas submiserunt paralyticum istum in lecto ante Jesum, per funes, ut creditur. *Et videns Jesus oculo interiori, fidem illorum* qui adduxerunt hunc ægrum : quorum magna fides in exterioribus eorum actibus relucebat, sed Chri-

stus cordium est inspector; *dixit paralytico* : *Confide, fili*, id est, spera te adepturum corporis sanitatem : imo majora recipies. Nam subditur : *remittuntur tibi peccata tua*, propter quæ forsitan sustinuit paralyticus hic ægritudinem istam. Sciendum vero, quod antequam Christus dixit paralytico verba hæc, infudit ei displicentiam seu contritionem quamdam culparum suarum : non enim dimittuntur adultis sua peccata, nisi pœniteant, seu absque prævia contritione eorum.

Et ecce quidam de Scribis, id est legisperitis seu doctoribus Judæorum, quorum Scribarum multi tunc aderant, ut legitur apud Lucam : qui magis venerunt ex curiositate et animo insidiandi ac calumniandi, quam desiderio proficiendi; *dixerunt intra se*, id est cogitaverunt (cogitatio namque est interior locutio) : *Hic blasphemat*, id est, Deo contumeliam facit, usurpando sibi quod Dei est, videlicet dimittere culpas. Dixerunt enim in cordibus suis, secundum Lucam : Quis potest peccata dimittere, nisi solus Deus? Quoniam ergo putabant Jesum esse hominem purum, imposuerunt ipsi crimen blasphemiae, eo quod dixit, « remittuntur tibi peccata tua », quum tamen non dixerit, Dimitto tibi peccata tua, sed, « remittuntur » : quod etiam unus alius posset dicere peccatori, si Deo revelante sciret illum veraciter pœnitere. Verum Scribæ isti ex invidia traxerunt verba Christi ad partem reprehensibiliorem, non ad pium intellectum : ut moris est perversorum, qui pro-niores sunt reprehendere quam emendare. Nihilo minus Christus verus Deus, per verba hæc insinuavit se divina auctoritate huic infirmo peccata sua dimittere. Præ-

Luc. v, 17.

Ibid. 21.

Matth. viii,
28 et seq.Marc. ii, 3.
Luc. v, 19;
Marc. ii, 4.

terea advertendum, quod tribus modis blasphemia in Deum committitur : primo, quando ab eo negatur quod ei convenit; secundo, dum ei attribuitur quod sibi non competit; tertio, quando id quod Dei est aliquis sibi usurpat : sicque Scribæ imposuerunt Christo crimen blasphemiae.

Et quum vidisset Jesus, id est, mente intuitus esset, cogitationes illorum, dixit eis : Ut quid cogitatis mala in cordibus vestris, imputando mihi blasphemiam, qui indesinenter honorifico Patrem meum æternum? Sic Salvator divinitatem suam monstravit, cordium reserando arcana. Subinde probat eandem per grande miraculum. Quid est facilius dicere, id est dicendo efficere, istud videlicet quod remittuntur tibi peccata tua, an dicere cum effectum, Surge, o paralytice, et ambula omnino sanatus? Ut autem sciatis quoniam, id est quod, Filius hominis (noverant turbæ quod per Filium hominis intellexit se ipsum, quia communiter ita expressit se) habet potestatem in terra, id est in hominibus qui demorantur in terra vel in loco peregrinationis præsentis, dimittendi peccata, secundum quod Deus est, per auctoritatem primam ac principalem, ita quod operari possit in anima, maculam culpæ per nitorem infusæ gratiæ auferendo. Loquitur quippe nunc Christus de potestate sua divina, increata, immensa : aliter argumentum istud non videretur concludere. Tunc ait paralytico. Hoc verbum interponit Evangelista. Christus enim adjecit : Tibi dico, paralytice, surge sanus de lecto quo jaces, tolle lectum tuum, in signum quod plene curatus es, et vade in domum tuam.

Sed quæritur, quomodo ista argumentatio valeat, quum utique majus sit animam a peccato curare, quam corpus in-

A firmum sanare. Dicendum, quod Christus intendit probare utrumque soli omnipotenti Deo posse competere. Nam quamvis paralysis naturaliter possit curari, et item miraculose per virtutem infusam seu homini præstitam, tamen tam imperialiter, instantanee ac auctoritative eam curare, non competit nisi divinæ potentiæ. Ideo Christus ostendendo se taliter posse curare paralytim, ostendit se etiam posse dimittere culpam et esse Deum.

Et surrexit paralyticus jam sanatus, et abiit in domum suam cum gaudio vehementi. Videntes autem turbæ tantum miraculum, timuerunt. Cur non potius exultaverunt, quum valde delectabile sit nova, præsertim facta miraculosa, videre, propter quæ videnda multi remote discurrunt? Objectum quoque timoris est malum : istis autem non malum, sed bonum objiciebatur videndum. Et respondendum, quod ex isto prodigio perpenderunt Christi sanctitatem ac dignitatem, quem licet nondum credebant Deum, tamen tenebant eum esse virum sanctissimum, divina virtute agentem : sicque Christi sanctitate pensata, propriam quoque defectuositatem et culpam consideraverunt, quia opposita juxta se posita clarius innotescunt; sicque ultionem divinæ formidabant justitiæ, et se ipsos abhorruerunt, Christi quoque præsentia se reputabant indignos, et eum offendere verebantur. *Et glorificaverunt, id est, gloriosum, pium ac omnipotentem esse professi sunt, Deum, qui dedit potestatem talem hominibus, scilicet faciendi miracula.* Cur non dixerunt singulariter, Qui dedit potestatem talem homini huic? Dicendum, quod forsitan intendebant ponere plurale pro singulari; vel nondum putabant majorem potestatem datam Christo, quam Moysi et Prophetis.

SERMO SECUNDUS

DE SPIRITUALI COMPARATIONE NAVIS ET ECCLESIAE, MARIS ET MUNDI,
TRANSFRETATIONIS VITAEQUE PRÆSENTIS.

IMPII quasi mare fervens quod quiescere non potest. Is. LVII, 20.

Qualiter per navem possit intelligi crux Christi ac pœnitentia, monastica quoque religio, itemque Ecclesia, crebro prætactum est; nunc tamen plenius est tangendum quomodo per navem designetur Ecclesia. Itaque navis est vehiculum ligneum quo homines deferuntur per aquas; ita Ecclesia est vehiculum per quod fideles transferuntur per sæculum istud nequam, ad portum salutis æternæ patriamque cœlestem. Nec aliquis potest evadere pericula

Gen. VII, 23. extra quam nullus hominum temporis illius evasit demersionem in aqua. Nec sufficit in Ecclesia permanere per fidem
Jacob. II, 26. dumtaxat, quoniam fides sine operibus mortua est; sed oportet quoque per caritatem et divinorum observantiam præceptorum in Ecclesia perseverare, sicut
Matth. XIX, 17. ait Salvator : Si vis ad vitam ingredi, serva mandata.

Nec mirum quod Ecclesia navis vocetur, quum quilibet vir perfectus possit communis populi navis dici. Legitur enim
IV Reg. II, 11, 12. quarto Regum, quod dum Deus omnipotens tolleretur ac transferret beatissimum Eliam prophetam in paradysum in igneo curru, Eliseus clamavit ad ipsum Eliam : Pater mi, pater mi, currus Israel et auriga ejus. Quod non est intelligendum quasi per currum Israel intellexerit Eliseus igneum currum in quo transferebatur Elias; sed per currum Israel intellexit Eliam, quem
Ibid. XIII, 14. et postea, ægrotante Eliseo ad mortem,

A venit ad eum rex Israel, flevitque coram eo, dicens : Pater mi, pater mi, currus Israel et auriga ejus. Itaque tam Elias quam Eliseus appellatus est currus Israel, hoc est Israeliticæ plebis, quoniam per modum currus portavit unusquisque eorum populum illum, defectus plebis illius supportando, pro ea rogando, eamque ad finem salubrem pro posse vehendo; et sicut auriga dirigit equos, sic ipsi sua discretionem direxerunt populum illum ad meliora. Nec dubium quin hoc modo Moyses, Josue, David, ac alii quidam, fuerunt currus Israel et ejus auriga. Porro in novo Testamento, potissimum Christus, deinde summus ac plenus et universalis ejus vicarius gloriosissimus Petrus, et aliquo modo ceteri sancti Apostoli, fuerunt currus populi christiani et ejus auriga; eademque ratione possunt vocari navis populi hujus et gubernator ipsius.

Præterea, vehiculum istud sive navigium recte ligneum nuncupatur, quoniam ex fidelibus constat hominibus, quorum
C unusquisque lignum seu arbor vocatur, quemadmodum apud Matthæum ait Joannes Baptista : Jam securis ad radicem arboris posita est : omnis ergo arbor quæ
Matth. III, 10. non facit fructum bonum, excidetur et in ignem mittetur. Unde homo virtuosus comparatur arbori pulchræ ac fructuosæ, juxta illud in Psalmo : Erit tanquam lignum quod plantatum est secus decursus aquarum, quod fructum suum dabit in tempore suo; et rursus, Justus ut palma florebit. Propter quod sanctus David, non
Ps. I, 3. præsumptuosa, sed grata ac humili mente de se ipso disseruit : Ego autem sicut
Ps. XCII, 13. oliva fructifera in domo Dei, speravi in

misericordia Dei in æternum. Imo et Christus se ipsum dixit viride lignum, quando bajulans sibi crucem exivit, et mulieribus ipsum plangentibus ait : Filiæ Jerusalem, nolite flere super me, sed super vos ipsas flete et super filios vestros ; quia si in viridi ligno hæc faciunt, in arido quid fiet ?

Secundo, Ecclesia dicitur navis, quoniam sicut navis continue est in aqua, et partim tingitur ea, ita Ecclesia militans, seu populus christianus fide et caritate ornatus, indesinenter est in tribulationibus, persecutionibus tentationibusque nonnullis, quum dicat Apostolus : Per multas tribulationes oportet nos intrare in regnum cœlorum. Et denuo : Omnes (inquit) qui volunt pie vivere in Christo, persecutionem patientur. Deus quoque electos suos in sæculo isto adversis exercet, ut per ea purgentur a vitiis, atque ad gratiarum charismata disponantur. Propter quod loquitur : Ego quos amo, arguo et castigo. Præterea, homo volens veraciter juxta evangelicam vivere legem, continuam habet pugnam contra aciem vitiorum ac dæmonum, contra proprium corpus et mundum. Propter quod apud Job scriptum est : Militia est vita hominis super terram.

Tertio, Ecclesia navis vocatur, quoniam sicut navigium supereminet aquis, ita quod eis non totaliter operitur, ita quantumcumque Ecclesia in hoc mundo tribulationibus adversitatibusque prematur, nunquam tamen in toto demergitur, nec succumbit, quia a Spiritu Sancto omnipotente juvatur et conservatur, ne prorsus deficiat. Hinc Christus prædixit discipulis suis : In mundo pressuram habebitis ; sed confidite, ego vici mundum.

Quarto, quoniam sicut navis contra aquarum pericula fortiter compaginatur et clavis connectitur ; atque ne aquæ ab imo eam subintrent, sollicite custoditur : ita Ecclesia, contra invisibilium hostium impugnationes, contra vitiorum læsiones et contra omnes adversitates, per gratiam, virtutes ac dona Spiritus Sancti firmiter ædificatur ac adunatur, præsertim per ca-

ritatem, et velut clavis configitur per Dei timorem ; et ne per occultas dæmonum artes vincatur, diligentissime custoditur et circummunitur, tam per Dominum salvatorem, imo totam superbeatissimam Trinitatem, quam per angelos sanctos, quam etiam per prælatos. Hinc Ecclesia designatur per templum ac civitatem quæ Ezechieli in visione monstrata sunt. Videbatur quippe templum triplici muro circumdatum, ad insinuandum quod Ecclesia militans triplici spirituali muro cir-

Cf. in
Ezech. xl,
p. 612 C,
617 D'.

cum datur, firmatur ac custoditur. Primus est Dominus Deus, seu ejus adsistentia gratiosa, protectio pia, quia ut ait Propheta, Dominus in circuitu populi sui ; et iterum, Nisi Dominus custodierit civitatem, frustra vigilant qui custodiunt eam. Hinc in Isaia legitur de Ecclesia : Urbs fortitudinis nostræ Sion, Salvator ponetur in ea murus et antemurale. Secundus murus est angelorum custodia : unde uno modo exponitur quod in Isaia Dominus loquitur, Super muros tuos, Jerusalem, constitui custodes. Tertius murus est prælatorum ac prædicatorum directio seu præsidentia. Istud quoque est figuratum per hoc quod Jerusalem tempore Salomonis, triplici muro erat circumdata.

Ps. cxxiv, 2.
Ps. cxxvi, 1.

Is. xxvi, 1.

Ibid. lxii, 6.

Cf. in III
Reg. iii, 1,
p. 598 B.

Quinto, per navem signatur Ecclesia, quoniam sicut in navi unus est gubernator, cujus directioni obtemperant ceteri, ita in tota Ecclesia est unus pontifex summus universalisque rector, videlicet dominus Papa, cui omnes ac singuli obedire tenentur, cui etiam quilibet Christianus magis tenetur obedire quam cuicumque inferiori prælato. Quælibet demum particularis Ecclesia proprium habet prælatum, nec in eodem genere prælationis una Ecclesia habere debet nisi unum prælatum. Quemadmodum ergo omnes existentes in navi, quantumcumque sint magni, acquiescunt gubernatori, atque ad pedes ejus se ponunt ; sic quilibet Christianus, quantumcumque sit litteratus, potens, dives aut nobilis, nihilo minus suo proprio debet humiliter obedire prælato in his quæ ad

Luc. xxiii,
28, 31.

Act. xiv, 24.

II Tim. iii,
12.

Apoc. iii, 19.

Job vii, 1.

Joann. xvi,
33.

illius spectant officium : alioqui non so-
lum prælato, sed et Christo esset rebellis.
Siquidem Christus suis ait vicariis, puta
Luc. x, 16. prælatis : Qui vos audit, me audit; et qui
vos spernit, me spernit. Quod quantum
Num. xvi, 1 et seq. displiceat Deo, hinc innotescit, quod Da-
than et Abiron, Core et Hon, Moysi re-
belles, terra vivos absorbuit. Quilibet er-
go Christianus diligenter observare debet
præcepta Ecclesiæ, jejunando, festivando,
decimas persolvendo, ac alia bona agendo,
vitandoque mala, prout jubet Ecclesia.

Sexto, quia sicut in navibus super ma-
rina maria transeuntibus sunt homines in
magno timore atque custodia propter di-
versa maris pericula, sic in Ecclesia de-
bent universi fideles esse timorati, cu-
stoditi atque solliciti coram Deo, ne eum
offendant, ne æternaliter pereant. Si et-
enim navigantes in magno exstant timore
ac custodia pro temporali vita et exteriori
substantia conservanda, quanto magis
Christiani in hoc sæculo peregrinantes,
debent summe esse timorati ac custoditi,
ne spiritualem mortem animarum suarum
incurrant, ne virtutes et dona Spiritus San-
cti amittant, ne æterna felicitate priven-
tur, ne in perpetua inferorum tormenta
projiciantur? Ideo Salomon ait : In timore
Prov. xxiii, 17, 18. Domini esto tota die, et habebis spem in
novissimo. Apostolus quoque : Cum metu
Philipp. ii, 12. (inquit) et timore ac tremore vestram ope-
ramini salutem.

Septimo, quoniam sicut in navi non
quæritur cibus et potus delicatus atque
superfluous, nec mansio spatiosa, ita in
Ecclesia volens integer esse et computari,
nequaquam debet delectabilia ac mollia
carni appetere, nec divitiarum abundan-
tiam quærere, sed pœnitentialem ducere
vitam, et mediocri victu ac decenti vestitu
esse contentus, sicque juxta doctrinam
1 Cor. ix, 27. Apostoli, castigare proprium corpus et in
servitutem redigere. Propter quod jubet
Luc. xxi, 34. Salvator : Videte ne graventur corda ve-
stra crapula vel ebrietate, ac curis hujus
sæculi. Quemadmodum enim navis si ni-
mium oneretur, demergitur, sic qui volunt

ditari, deliciari ac honorari, in æternæ
damnationis profunda labuntur, Christo
testante qui loquitur : Væ vobis divitibus,
Luc. vi, 24, 25. qui habetis consolationem vestram, væ vo-
Joann. v, 44. bis qui ridetis; et iterum, Quomodo po-
testis credere (scilicet fide formata), qui
gloriam ab invicem accipitis?

Insuper nunc dicendum, cur mundus
iste vocetur mare. Cujus multæ sunt cau-
sæ. Prima, quoniam sicut in mari multi
periclitantur, ita quamplures, imo, pro-
portionabiliter loquendo, valde plures, per-
eunt in hoc mundo, et in æternum dam-
nari merentur. Nam multi vocati, pauci
vero electi. Secunda, quoniam sicut mare
diversis tempestatibus, inquietudinibus,
inundationibus plenum est, sic sæculum
istud, seu homines prævi, carnalibus desi-
deriis tumultuantur, passionibus agitantur,
nec in Deo, neque in ratione, neque in
virtutum medio stabiliuntur, sed de uno
peccato ruunt in aliud. Hinc apud Job di-
citur : Si iniquitatem abstuleris a te, sta-
Job xi, 14, 15. bilis eris. Tertia, quoniam sicut aqua ma-
ris amara et salsa est, ita mundanorum
hominum mentes, vitiorum amaritudini-
bus adimplentur, ira, indignatione, invi-
dia, et curas habent superfluas angustias-
que diversas. Unde et Christus divitias
Matth. xiii, 22. comparat spinis, quia et cum labore ac-
quiruntur, cum timore possidentur, cum
dolore amittuntur. Quarta, quoniam sicut
mare insatiabile dicitur, juxta illud Ec-
clesiastæ, Omnia flumina intrant in mare,
Eccle. i, 7. et mare non redundat; sic corda hominum
iniquorum, nec divitiis, nec voluptatibus,
nec honoribus satiantur, sed semper ad-
spirant ad amplius. Ut ergo non simus
similes mari, conemur in pacis tranqui-
litate firmari, in rectæ rationis judicio
stabiliri, et contra passionum inquietudi-
nes virtutibus decorari ac roborari mora-
libus, contra vitiorum quoque amaritu-
dines ac sæculi acerbitates spiritualibus
recreari consolationibus, atque in bonis
actibus delectari, in divinorum contem-
platione lætari, quemadmodum ait Prophe-
ta : Memor fui Dei, et delectatus sum. *Ps. lxxvi, 4.*

Postremo, per transfretationem maris A designatur conversatio virtuosa, qua omni hora electi tendunt ad patriam beatitudinis sempiternæ.

Studeamus ergo quotidie per arctam viam salutis ad regnum propinquare cœleste, omnia carnis ac spiritus inquinamenta vitando, in verbis servando decentiam, in cibo, potu, vestitu ac somno moderantiam fixam, atque ab omni superbia, invidia, incontinentia, avaritia, acedia, ceterisque mortalibus vitiis, multo plus quam a serpentibus ac draconibus B fugiendo : quemadmodum secundo Macha-

bæorum describitur de venerabili ac vir- II Mach. vi, 18 et seq.
tuo illo Eleazaro, ætate sancta provecto.

Qui quum esset nonaginta annorum, et a gentilibus urgeretur comedere carnem porcinam contra Moysis legem, nullatenus acquievit, sed amarissima maluit pati supplicia ac mortem durissimam, quam vesci cibo in lege Dei prohibito : unde gentiles illi, ministri Antiochi, acerbissimam ei mortem intulerunt in tam senili ætate. Sicque venerandus senior ille reliquit nobis præclarum exemplum, ut potius eligamus omnia mundi pati adversa ac mortem pœnosam, quam Dei prævaricari præceptum.

SERMO TERTIUS

DE SPIRITUALI INTELLECTU EORUM QUÆ CIRCA PARALYTICI CURATIONEM ACTA SUNT.

UNICUIQUE mandavit Deus de proximo suo. Eccli. xvii, 12.

Quemadmodum Deus præcepit hominibus ut unusquisque diligat proximos suos, sic iussit eisdem ut quilibet loco et tempore opportuno benefaciat et succurrat proximis suis, tam in spiritualibus quam in corporalibus rebus. Hoc quoque in Evangelio Christus exprimit, dicens : Quæcumque vultis ut faciant vobis homines, hæc eadem facite illis. Unde et Tobias ait : Quod tibi non vis ab alio fieri, vide ne aliquando alii facias. Sicque istud est tam de jure naturali quam divino.

In primis autem mandavit unicuique Deus de proximo suo, ut præbeat ei bonum exemplum, et ne scandalizet eum directe. Unde, secundum Augustinum, proximis tenemur bonam famam : nam qui in conspectu aliorum male agit aut impie vivit, tot quantum in ipso est, spiritualiter perimit, a quantis conspicitur. Secundo mandavit Deus unicuique de proximo suo, ut congruo loco et tempore caritative corripiat eum, dum exstat cul-

pabilis : quia ad correptionem fraternam C omnes, secundum Augustinum, tenentur, quum dicat Salvator, Si peccaverit in te frater tuus (hoc est te sciente proximus tuus), vade, et corripe eum inter te et ipsum solum. Quocirca asserit Augustinus : Si corripere eum neglexeris, pejor eo efficeris. Tertio mandavit Deus unicuique de proximo suo, ut oret pro eo, juxta illud Jacobi, Orate pro invicem, ut salve-
mini; et item ut instruat eum, hortetur ac dirigat quantum potest, dum causa et tempus requirunt. Quarto, ut in necessariis vitæ ei subveniat indigenti, atque a corporalibus nocumentis ac læsionibus eum pro viribus protegat, quantum permittit justitia. Impendat ergo hæc omnia unusquisque proximis suis pro posse, juxta exigentiam causæ ac temporis. Sed vae eis qui absque timore perpetrant mala, et sine erubescencia coram aliis peccant, præsertim qui alios trahere ad peccata nituntur, ut homines incontinentes, ac alii multi. De quibus in Isaia legitur : Peccata sua quasi Sodoma prædicaverunt; in Pro-

Matth. vii, 12.

Tob. iv, 16.

Matth. xviii, 15.

Jacob. v, 16.

Is. iii, 9.

Prov. II, 14. verbiis quoque, Lætantur quum malefecerint, et exsultant in rebus pessimis. O quam remote hi distant a Christi doctrina et a via salutis !

Præterea, hujus doctrinæ, videlicet qualiter debeat unusquisque proximo suo cooperari ad bonum, habemus in evangelio hodierno efficax evidensque exemplum, in quatuor viris istis qui paralyticum in lecto jacentem tulerunt ad Salvatorem; qui quum præ multitudine turbæ non valent accedere, ascenderunt tectum, et illo nudato, per tegulas submiserunt eum in medio ante Jesum. Itaque dum Christiani, præsertim prælati et qui animarum cûram habent, ac seniores atque parentes, viderint quempiam spiritualiter paralyticum, id est acediosum, lascivum, aut quibuscumque magnis peccatis fœdatum, portare eum protinus debent ad Jesum, orando pro ejus conversione, seu hortando eum ad emendationem, et loquendo ei de pertinentibus ad salutem, item ducendo eum ad ecclesiam, ad sermones, et ad homines spirituales, quorum exemplo, fama, doctrina, meritis ac precibus possit converti. Si etenim caritativum et pium fuit corporali paralysi tabefactum pro corpora sanitate ferre ad Salvatorem, nonne multo plus amorosum atque piissimum est, spiritualiter paralyticum seu in mortali vitio existentem, præfatis modis pro spirituali curatione Salvatori adducere ? Hinc zelus animarum est sacrificium Deo gratissimum; atque, ut divinus Dionysius protestatur, omnium divinorum divinissimum est Deo cooperari in reductione animarum ad eum. Ideo beatissimus Jacobus ait apostolus : Qui converti fecerit peccatorem ab errore viæ suæ, salvabit animam ejus a morte, et operiet multitudinem peccatorum. Et sicut istud est valde divinum et sanctum, ita homines ad peccandum inducere, a via salutis avertere, diabolum est omnino et impiissimum vehementer.

Præterea, sæpe contingit ut quum quis vult aliquem ita ad Christum convertere,

præ multitudine impiorum non potest id adimplere, quia impeditur a pravis hominibus, qui ex proposito trahunt peccatorem ad vana et ad permanendum in culpa. Sed tunc homo devotus et caritativus debet ascendere tectum, id est ad altitudinem divinæ pietatis confugere, et alta contemplationis intrare, considerando qualiter supersapientissimus Deus omnia intueatur, nec sperantes in se derelinquat, sicque indesinenter pro peccatore orare, eumque divinæ pietatis conspectui præsentare, nec cessare a bono incepto, quousque obtineatur effectus : siquidem per hujusmodi actus meretur frequenter unus alteri gratiam conversionis.

Insuper, nunc pensandum qui per istos quatuor portitores hujus paralytici designentur. Per quos primo intelligi possunt divinus instinctus hominem ad bona instigans (juxta illud in Psalmo : Audiam *Ps. LXXXIV, 9.* quid loquatur in me Dominus Deus; pro quo orat Propheta, dicendo : Inclina cor meum in testimonia tua; et rursus, *Ps. CXVIII, 36.* *Ibid. 133.* sus meos dirige secundum eloquium tuum); item angelica inspiratio, exhortatio quoque superiorum, et naturalis instinctus ad bonum (quia synderesis semper movet ad bonum, secundum Hieronymum), seu propria ratio per Scripturas instructa seu naturali lege edocta. Itaque quatuor ista quotidie incitant nos ad bona, videlicet : Deus omnipotens seu ejus instinctus, angeli sancti, homines boni, potissimum præsidentes, et ratio naturalis sive synderesis. Et certe valde ingratus ac durus est, qui tot tamque dignissimis ad bonum incitatoribus non obedit nec acquiescit, sed dæmonibus desideriiisque iniquis præbet assensum.

Amplius per hos quatuor portitores possunt intelligi quatuor novissimorum diligentes considerationes, quæ si quis profunde consideret, peccata vitabit, juxta illud Ecclesiastici : In omnibus operibus tuis memorare novissima tua, et in æternum non peccabis. Hæc vero novissima sunt : mors, divinum judicium, pœna in-

De Cælest. hier. c. III.

Jacob. V, 20.

Eccli. VII, 40.

ferni, gloria cœli. Consideremus ergo vi-
vaciter ac frequenter quam cito morie-
mur, quam amara sit mors, quam incerta
sit nobis hora ipsius; quam graviter a dæ-
monibus in agone tentabimur, quam vehe-
mens ac multiplex tunc erit angustia no-
stra, quanta formido; quam periculosa sit
mors impiorum, sicut ait Propheta : Mors
peccatorum pessima. Pretiosa autem in
conspectu Domini mors Sanctorum ejus.

Ps. xxxiii,
22.
Ps. cxv, 15.

Consideremus quoque distractionem di-
vini judicii, tam in mortibus singulo-
rum quam in die novissimo; pensemus
qualiter exiget Deus rationem a nobis de
omni verbo otioso, multo plus de omni
verbo iniquo, lascivo, mendoso, detracto-
rio, pungitivo, de omni cogitatione vana,
de omni affectione perversa, de omni ope-
re pravo, et de omni bono ad quod te-
nemur omisso. O quam metuendum est
expectare irrevocabilem illam Judicis sum-
mi sententiam, qua vel æterna damnatio
vel perpetua salus redditur pro mercede !
Certe, sicut fatetur Apostolus, horrendum
est incidere in manus Dei viventis.

Matth. xii,
36.

Hebr. x, 31.

Insuper attendamus infernalium tormen-
torum multipliciter atque inæstimabi-
lem acerbiter : quantus sit ardor tar-
tarei ignis, quam amara sit desperatio illa
æterna; quam afflictivus innumerabilium
dæmonum sit adspectus, quum unum dæ-
monem intueri tam intolerabile sit in vita
præsenti; quid sit in igne illo calidissi-
mo, sine spe evasionis, perpetuo cruciari,
quum per unam horam, in fornace ar-
denti nemo velit pro toto mundo jacere.
O quanta est excæcatio peccatorum ista
non attendentium, sed quotidie peccatis
peccata addentium ! Merito sanctus Moy-
ses dixit de eis : Gens absque consilio est
et sine prudentia; utinam saperent, et
intelligerent, ac novissima providerent.

Deut. xxxii,
28, 29.

Adhuc autem pensemus æternæ beati-
tudinis gloriam : quanta sit Beatorum ju-
cunditas, qui summo, infinito et incom-
mutabili bono ad libitum cum inviolabili
securitate immediate fruuntur, et super-
gloriosissimam Trinitatem clare per spe-

ciem æternaliter intuentur; quorum tanta
est salus ac gloria, ut mille anni eis vi-
deantur vix unum momentum, quemad-
modum tanta est damnatorum miseria,
quod una hora videtur eis mille anni.

Præterea, per hos quatuor portitores
possunt intelligi bona et devota societas,
quæ homini valde cooperatur ad bona,
sicut et societas prava maxime nocet et
trahit ad vitia; item paterna visitatio qua
Deus per adversa visitat hominem, ita
quod vexatio ei tribuit intellectum (unde
in Job dicitur : Visitat per dolorem in
lectulo, et omnia ossa hominis marcesce-
re facit, ut revocet eum ab impietate) :
hoc modo plurimi convertuntur ad cor,
imo ad Deum; eleemosynarum quoque
largitio et ceterorum operum misericor-
diæ exercitatio, quoniam scriptum est,
Beati misericordes, quoniam ipsi miseri-
cordiam consequentur; et item preces ac
merita devotorum, nam et paralytico huic
Christus subvenit merito fidei et virtutis
eorum qui eum tulerunt. Ideo studeat
C unusquisque, virtuosorum ac sapientium
hominum uti consortio, quia ut ait Hie-
ronymus, nihil tantum nocet ut mala so-
cietas; cupiat quoque a Deo in hac vita
paternaliter castigari, ne pereat in æter-
num: siquidem beatus homo qui corripitur
a Domino. Sed et operibus misericordiæ,
tam corporalibus quam spiritualibus, unus-
quisque pro posse caritative liberaliterque
insistat, et devotorum precibus ac meritis
juvari se deprecetur; atque ut hoc sortia-
tur, devotos honoret, diligat, et eis pro
posse deservire ac benefacere non omittat.

Is. xxviii,
19.
Job xxxiii,
19, 30.

Matth. v, 7.

Job v, 17.

Postremo, quemadmodum in tertio li-
bro Vitaspatrum describitur, sanctus abbas
Arsenius dixit : Quum quidam eremita se-
nex sederet in cella sua, venit angelus Dei
dicens ad eum, Veni, ostendam tibi opera
hominum. Duxitque angelus eremitam il-
lum ad quemdam locum, et ostendit ei
Æthiopem ligna incidentem facientemque
sarcinam grandem : quam quum vellet
levare, non poterat præ gravitate; et pro
eo quod debuisset sarcinam minorare, ivit

et abscidit plura ligna, ac sæpius auxit eam. Deinde angelus parum procedens, ostendit sancto eremitæ hominem haurientem aquam ex puteo et effundentem eam in cisternam pertusam, quæ refundebat aquam illam in puteum. Iterum dixit ad eremitam : Veni, ostendam tibi aliud. Ostenditque ei templum et duos viros equestres lignum ex transverso portantes; et volebant per januam templum intrare, nec poterant propter lignum illud quod vehebant transversum sive per longum; et non inclinantes se unus post alium ut ferrent lignum illud directum, remanserunt extra

A templum. Quumque eremita interrogaret angelum quid ista significarent, respondit: Per istos equestres, designantur superbi quorum unus non vult se alteri humiliare, ideo remanent extra regnum Dei. Per eum vero qui sarcinam fecit de lignis, intelliguntur hi qui in multis et magnis peccatis sunt, atque pro eo quod poenitentiam agerent et peccata sua minuerent, augent ea. Porro per haurientem aquam, signantur qui bona opera efficiunt, sed propter mala admixta Deo non placent. Idcirco oportet hominem esse acutum ac sobrium in considerandis operibus suis, ne frustra laboret.

AD RELIGIOSOS

SERMO QUARTUS

DE RENOVATIONE SENSITIVI APPETITUS CETERORUMQUE HABITUUM INTELLECTUM ET VOLUNTATEM PERFICIENTIUM, ET QUIBUSDAM ALIIS ORNAMENTIS ANIMÆ.

RENOVAMINI spiritu mentis vestræ, et induite novum hominem, qui secundum Deum creatus est. Ephes. iv, 23, 24.

Anima rationalis, quantum ad naturalia sua, ad summæ Trinitatis imaginem est creata. Sed illa naturalis sua similitudo cum Creatore, nuda, informis et imperfecta consistit. Per peccata autem corrumpitur et fœdatur, non tamen penitus tollitur; sed per dona gratiæ gratum facientis reficitur ac perficitur. Renovatur autem non solum in infusione charismatum gratiæ, sed etiam per gratiæ ac virtutum profectum, per donorum et fructuum incrementum; et quanto in illis magis proficimus, tanto spiritualiter recentiores efficimur. Ideo quum Propheta loquens de Deo dixisset animæ suæ, Qui replet in bonis desiderium tuum, mox addidit : Renovabitur ut aquilæ juvenus tua.

Itaque, juxta doctrinam Apostoli, reno-

vemur quotidie, imo omni hora, « spiritu mentis » nostræ, videlicet in superiori parte animæ nostræ, in dono sapientiæ, in salutarī scientia, in vera discretione, ceterisque habitibus intellectum perficientibus proficiendo, ut sic vis intellectiva seu ratio nostra renovetur, ornetur ac perficiatur; et potissimum in contemplatione Dei, quæ est actus doni sapientiæ, crescere omni die conemur, atque ad tam salubrem profectum, per orationes et dominicæ passionis affectuosas meditationes nos disponamus. Insuper renovemur in superiori vi appetitiva, scilicet voluntate, in caritate Dei et proximi, in vera justitia, pietate, fortitudine, filiali timore, spe æternorum, ac ceteris habitibus voluntatem perficientibus conerescendo. Studeamus quoque ad hoc, ut memoria nostra stabiliatur in his. Tunc in anima nostra Dei imago speciose splendeat, eritque Sponso cœlesti anima

Prov. viii, 31. nostra valde cara ac placita; eruntque de-
II Cor. iv, 16. licia ejus esse in ea, et quotidie eam magis ac magis divinis charismatibus fecundabit; et cum Apostolo fari poterimus: Licet is qui foris est, noster homo corrumpatur, tamen is qui intus est, renovatur de die in diem.

Verumtamen ad hanc mentis renovationem perfectam nequaquam pervenire poterimus, nisi in primis appetitus noster sensitivus in suis passionibus per virtutes reformetur ac decoretur morales, quoniam fumus ac impetus passionum mentem ob-
 tenebrant, quemadmodum vapores ac nebulæ aerem. Si autem appetitus sensitivus fuerit per virtutes morales bene ac firmiter reformatus, armatus ac confortatus, tunc etsi motus passionum subito oriantur in eo, non tamen prævalebunt, nec usque ad superiorem animæ partem, in qua Trinitatis imago resplendet, ascendere poterunt, illamve offuscare: quemadmodum impressiones meteorologicæ, quamvis generentur in aere, ad cœlestium corporum regionem non queunt pertingere.

Ephes. iv, 23. Hinc quum dixisset Apostolus, «Renovamini spiritu mentis vestræ», protinus subdidit: «Et induite novum hominem, qui secundum Deum creatus est», id est, Christum sequamini, similitudinem ejus assumite, juxta illud: Induite Dominum Jesum. Qui dicitur novus homo propter singulari-
Ibid. 24. rem suam formationem ac productionem
Rom. xiii, 14. secundum naturam assumptam, quia conceptus est de Spiritu Sancto et natus ex Virgine, nec unquam fuit in eo ulla vetustas culpæ. Quem debemus induere se-

Luc. i, 26 et seq. cundo ejus vestigia, ut vere et digne ab ipso Domino Jesu Christo Christiani vocemur, juxta quod ait Scriptura: Qui se
I Joann. ii, 6. dicit in Christo manere, debet, sicut ille ambulavit, et ipse ambulare. Quid est Christi vestigia sequi, nisi ab eo per effe-

Matth. xi, 29. ctum addiscere quia mitis est et humilis corde, et quod non venit ministrari, sed ministrare, et quia obediens factus est Patri usque ad mortem, quia non venit facere voluntatem suam, sed Patris æterni?

A Denique passus est pro nobis, relin-
I Petr. ii, 21. quens nobis exemplum, ut sequamur vestigia ejus, faciendo quod ait: Qui vult
Luc. ix, 23. venire post me, abneget semetipsum, et tollat crucem suam quotidie, et sequatur me. Istud est Christum induere, per ar-
Matth. vii, 14. ctam viam incedere, in adversitatibus, correptionibus, castigationibus, aspernationibus, sicut in omnibus divitiis gloriari. Et sicut, teste Apostolo, Christus non clarificavit se ipsum ut pontifex fieret, sic nullus ad primatum adspiret se ipsumve ingerat, aut in eo inordinate et ambitiose manere nitatur, quia vindex est Dominus
I Thess. iv, 6. de omnibus his. Discipulis quoque de primatu concertantibus dixit: Nisi conversi fueritis, et efficiamini sicut parvuli, non intrabitis in regnum cœlorum. O quam metuenda sunt verba hæc, si rite pensentur! Ideo Climacus protestatur: Quemadmodum ignis non parit nivem, ita neque qui in præsentī quærit honorem, futuri honoris jucunditate fruetur; et rursus, Quemadmodum qui in sealam ascendunt
Matth. xviii, 3. teredine putrentem et vetustate corruptam, periclitantur, ita in honoribus et prælationibus, in fama et gloria periclitantur qui diligunt ea, quæ amata, sunt veræ humilitati contraria, et habentem subtus cadere faciunt atque dejiciunt. Chrysostomus quoque: Quis est, inquit, qui cupit præesse, nisi qui non timet judicium Dei?

Præterea, juxta Apostoli documentum, *Ephes.* iv, 25. deponamus omne mendacium, non solum perniciosum, sed et jocosum ac officiosum. Quum enim Deus sit veritas, et omne mendacium veritati repugnet, constat quod et Deo displiceat atque culpabile sit. Potissimum autem nos sacerdotes et religiosi, quorum ora consecrata sunt Deo, qui verba divina incessanter proferimus, et per sacratissima verba corpus et sanguinem unigeniti Filii Dei consecramus, ab omni verbo mendaci, imo ab omni verbo illicito, præsertim detractorio, pungitivo, contumelioso et discordiæ seminativo, prorsus abstineamus. Summe quo-

que cavendum est nobis ne in capitulo aut alibi a superioribus nostris aut etiam a confratribus correpti, excusemus nos non vere, et incurramus enorme mendacium. Nec aliqua calliditate palliemus aut occultemus nostros excessus ex quocumque rubore, vel ut disciplinam effugiamus, quum dicat Apostolus : In disciplina perseverate; quod si extra disciplinam estis, ergo adulteri, et non filii estis. Impleamus ergo quod Josue ait : Fili mi, da honorem Deo, et confitere atque indica quid feceris, nec abscondas. Qui peccatum suum negat, abscondit, palliat vel excusat, similis est vulnerato et infecto qui medico non vult detegere vulnera sua, neque evomere ingesta sibi venena. Impleamus quoque compendiosissimum illud dogma Apostoli : Omnis sermo malus ex ore vestro non procedat, sed qui utilis est ad ædificationem, ut det gratiam audienti.

Hebr. xii,
7, 8.

Josue vii,
19.

Ephes. iv,
29.

Ibid. 26.

Præterea, juxta doctrinam præsentis epistolæ, sic irascamur ut non peccemus, neque in ira perseveremus, quia iram per zelum licenter assumere possumus, maxime contra propria vitia. Iram vero per vitium prorsus eradicare nitamur : quod sine humilitate non valemus implere, Climaco protestante, Quemadmodum non est possibile sine armatura fortem bestiam capere aut necare, sic non est possibile sine humilitate inirascibilitatem possidere. Porro, qui propter alterius culpam inordinate irascitur, et cum passionis vehementia illum redarguit, se ipsum lædit ut alium sanet.

Ibid. 27.

Postremo, ut docet Apostolus, non demus locum diabolo. Cui locum damus non solum peccando mortaliter, quia sic damus ei locum ad possidendum nos sibi in servos; sed etiam quodammodo damus ei

locum peccando venialiter et habendo nos remisse, tarde ac negligenter, quia per hoc concedimus ei occasionem et aditum tendendi ac pertrahendi nos ad pejora. Qui autem protinus et indesinenter ac fervide resistit omni suggestioni malignæ, omni affectioni inordinatæ, omni negligentia, non dat locum diabolo. Et istud utique necessarium est volenti proficere : quia si quis una hora devotus ac diligens est, alia vero remissus et vagus ac levis, non proficit; sed quod uno tempore colligit, alio stultus dispergit, estque similis mittenti merces in sacculum pertusum. Hinc asserit Climacus : Quemadmodum cancri cito progredi nequeunt, quia quandoque ante, quandoque retro gradiuntur, et per hoc faciliter capiuntur; sic anima quandoque ridens, quandoque lugens, quandoque deliciis utens, quandoque pœnitentia se affligens, nihil proficere potest. Necesse est ergo ut simus jugiter custoditi, et tunc plus ubi major est dissolutionis occasio, nec immoderate utamur indulto solatio. Et sicut fons ex eodem foramine non emanat amaram et dulcem aquam, ita ex eodem ore nostro non procedant verba veritatis et verba falsitatis, verba exemplaria et verba scandalizantia, verba Dei et verba diaboli.

Agg. i, 6.

Jacob. iii,
11.

Ephes. iv,
28.

Eccle. ix,
10.

Rursus, hortatur Apostolus ut qui furabatur, jam non furetur, sed laboret manibus suis, ut tribuat necessitatem patienti. Sic quidquid potest manus nostra, id est quæcumque vis seu potentia boni operativa, instanter agamus, quatenus in bonis actibus taliter abundemus, quod aliis, præsertim benefactoribus, propinquis et commissis, ac nostra suffragia cupientibus, cunctisque indigentibus, subvenire possimus.

SERMO QUINTUS

QUO PACTO PER NAVICULAM, NEDUM MONASTICA, SED TOTA RELIGIO CHRISTIANA
DESIGNETUR; ET DE VERA ET FALSA POENITENTIA.

ASCENDENS Jesus in naviculam, A duntur, dicente Apostolo : Non est nobis *Ephes. vi,*
transfretavit, et venit in civitatem colluctatio adversus carnem et sanguinem, ^{12.}
suam. Matth. ix, 1. sed contra spiritualia nequitiae in coele-

Cf. l. XXIX,
p. 246 B et s. Quemadmodum per naviculam monasti-

ca designetur religio, superius dictum re-
corder. Nec solum monachalis, sed et chri-
stiana religio, ad quam universi tenentur
fideles, potest per naviculam significari.
Primo, quoniam sicut in navi est tenuis
victus, sic et christiana religio cunctos
suos cultores ad sobriam semper vitam,
et certis diebus ad abstinencias atque je-
junia obligat, quoniam cunctis fidelibus

Luc. xxi, 34. ait Salvator : Videte ne graventur corda
Ibid. vi, 23. vestra crapula vel ebrietate; itemque, Vae

vobis qui saturati estis. Secundo, quoniam
sicut existentes in navi, propter immi-
nentia pericula sunt in continua custodia
et timore, sic christiana religio omnibus
suis professoribus jubet cum timore et
tremore propriam operari salutem, et cum
metu ac reverentia Deo servire, eumque

Matth. x,
28. super omnia formidare qui habet potesta-
tem corpus et animam perdere in gehen-
nam. Tertio, quoniam sicut navis aquarum

II Tim. iii,
12. inundatione hinc inde concutitur, sic om-
nes qui volunt pie vivere in Christo secun-
dum christianam religionem, persecutio-

Act. xiv, 21. nem patiuntur, et per multas tribulationes
oportet intrare in regnum Dei. Nam et Do-

Matth. xi,
12. mino protestante, Regnum coelorum vim
patitur, et violenti rapiunt illud, utpote

hi qui efficaciter praeliantur contra pro-
prias concupiscentias, passiones et incli-
nationes malignas. Quarto, quia quemad-
modum existentes in navibus, frequenter
a piratis ac aliis impugnantur, sic in chri-
stiana religione Domino ministrantes, a
mundo atque daemonibus saepissime inva-

diuntur, dicente Apostolo : Non est nobis
colluctatio adversus carnem et sanguinem,
sed contra spiritualia nequitiae in coele-
stibus.

Quinto, quoniam sicut navis a suo fre-
quenter impeditur progressu ex contra-
riis ventis aut etiam nimia tranquillitate
maris; sic veraciter christiani a profectu
virtutum quem christiana docet religio,
frequenter ex diversis causis praepediun-
tur, videlicet ex curis et necessitatibus
corporis, ex fragilitate et instabilitate pro-
priae mentis, ex diversis occupationibus,
suggestionibus, tentationibus occurrenti-
bus. Nam corpus hoc fragile quod gesta-
mus, nunc cibo et potu, nunc somno, nunc
aliis plurimis indigens, a spiritualibus ex-
ercitiis saepe nos impedit, quemadmodum
scriptum est : Corpus quod corrumpitur, *Sap. ix, 15.*

aggravat animam. Propter quod dixit Apo-
stolus : Quis me liberabit de corpore mor-
tis hujus? Et alter : Educ (inquit) de carce-
re animam meam ad confitendum nomini

tuo. Denique de hoc in Phaedone sic lo-
quitur Plato : Quamdiu habuerimus cor-
pus, et conglutinata fuerit anima huic

malo, nunquam plene adipiscemur quod
cupimus. Decies enim millena vacationum
impedimenta nobis inde proveniunt, pro-
pter corporis necessitatem et alimoniam.

Amplius, si quid morbi acciderit, impedit
animam nostram, quae et diversis amori-
bus, et timoribus, et concupiscentiis, ac
idolis omnifariis, a contemplationibus im-
peditur. Et iterum notabiliter ait : Si quae
nobis aliquando fiat vacatio a corpore, et
convertamur ad considerandum quod ve-
rum est, iterum undique illabens, tumultu
praestat et turbationem, ac stupefa-

cit, ut non possimus sub eo conspicere A
veritatem.

Sexto, quoniam sicut navis partim im-
mergitur aquis, et partim supereminet
eis : sic christiana religio partim circa
corporalia quædam versatur, et quasi ter-
restris est; partim vero, imo et principa-
liter divinis spiritualibusque intendit, at-
que cœlestis est. Septimo, quia sicut in
navi unus gubernator est, sic christiana
religio docet unum summum Christi vi-
carium universis præesse fidelibus. Octa-
vo, quoniam sicut navis transvehit navi-
gantes ad locum cupitum, sic christiana
religio suos professores ac viatores ad por-
tum deducit salutis æternæ. Nono, quo-
niam sicut navis contra aquarum pericula
compaginatur, clavis connectitur; sic chri-
stiana religio contra suæ fidei adversarios
veteris ac novi Testamenti consolidatur
scripturis, atque innumerabilibus roboratur
divinis miraculis soli omnipotenti Deo
possibilibus, ac variis argumentis, diversis
quoque gratiarum charismatibus, donis,
virtutibus, fructibus Spiritus Sancti orna-
tur, ac suos confortat cultores.

Insuper per naviculam pœnitentia desi-
gnatur, quæ vere per hoc mare magnum,
per sæculum nequam, de peregrinatione
præsenti ad patriam regni cœlestis per-
ducit. In qua utique pœnitentia præactæ
proprietas inveniuntur. Primo videlicet,
tenuitas victus. Propter quod asserit Cli-
macus : Pœnitentia est fortis tribulatio
ventris; quia ad eam pertinet etiam de
necessariis corpori subtrahere aliquid pœ-
nitenti, ut fiat recompensatio pro pecca-
to, ut asserit Thomas. Secundo, in pœniten-
tia vera est continuus timor, ne recidivare
contingat, et grandis custodia cordis, ut
de cetero peccata confessa vitentur. Unde
ait Gregorius : Inanis est pœnitentia quam
sequens coinquinat culpa. Et iterum : Pœ-
nitentia, inquit, est præterita peccata de-
flere, et deflenda non rursus committere.
Ideo loquitur Augustinus : Nil prodest
lamentatio, si replicantur peccata; nihil
valet de malis veniam poscere, et mala

A denuo iterare. Quum ergo religiosos oporteat venialia quasi mortalia abhorrere, de-
flere ac fugere, quum ad spirituales
teneantur profectum caritatisque incre-
mentum, a quibus certum est venialia
hominem impedire : qualis est pœniten-
tia nostra, quando post confessionem et
celebrationem, mox ad consuetas ac pri-
stinas dissolutiones, distractiones, loqua-
citates, verbositates, cachinnos redimus ?
Ab omni etenim vana consolatione atque
illicita delectatione pœnitentem abstinere
B necesse est. Ideo ait Bernardus : Equum
indomitum domant flagella, et pœniten-
tem contritio spiritus ac assiduitas lacri-
marum. Climacus quoque : Pœnitentia, in-
quit, est indesinens desperatio corporalis
consolationis, atque afflictio animæ in sen-
su vehementi. Hoc est quod ait Bernar-
dus : Verus pœnitens semper in dolore est
et labore : nam sicut de præteritis dolet,
ita pro futuris cavendis laborat; sic plan-
git commissa, ne committat plangenda.
Irrisor namque et non pœnitens est, qui
C adhuc agit quod pœniteat.

Præterea, quia ad pœnitentem pertinet
peccata quibus Deum offendit vehementer
detestari, et ad recompensationem esse
paratum, ut pro peccatis quibus Creato-
rem suum inhonoravit, libenter patiatur
aspera et adversa ad ipsius honorem, imo
ab omni creatura despici et affligi arbi-
tretur se dignum; ideo ad pœnitentem
pertinet injurias, adversitates, derisiones,
persecutiones æquanimiter sustinere, imo
cum gaudio eas amplecti, nec pro expian-
dis vitiis suis eas reputare condignas. Id-
circo ait Ambrosius : Qui pœnitentiam
agit, paratus esse debet ad sustinenda op-
probria, ad subeundas injurias, nec move-
ri si quis ei peccati sui crimen objiciat.
Et Climacus contestatur : Pœnitentia est
voluntaria omnium tribulantium et affli-
gentium patientia. Sed quia nos miseri et
obtenebrati, nos negligentes et quotidie
recidivantes, peccati gravitatem non intel-
ligimus nec pensamus, nec Deum sincere
diligimus, nec nocumenta quæ ex nostris

incurrimus culpis, advertimus; propterea A pro parva re ad impatientiam concitamur, et ad emendandum quotidiana peccata parum aut nihil conamur, superficialiter pertransimus, et in fœcibus nostris manemus: imo vix caritativam ac justam correptionem et correctionem a præsidente æquanimiter toleramus. Hinc ad perfectionem nequaquam pertingimus; et utinam non contra nostræ professionis debitum ab ea longius discedamus, ac periclitemur. Faciamus ergo quod admonet Augustinus: Ad tribunal tuæ mentis conscende contra te, et reum te constitue ante te.

Itaque consideret unusquisque suos quotidianos defectus atque excessus, omissionisque culpas, et quam grave sit quod opus Dei facit tam negligenter, quod in divinis, in celebratione, in psalmodia tam distractus est, quod coram Altissimo tam irreverenter se habet, quod negligit et omittit tot bona: sicque puniat et castiget se ipsum, et a spirituali patre corripitur optet ac corrigi. Porro, si quis adhuc tam

pusillus consistit ut præsidentis correptiones non satis gratanter accipiat, iste, juxta Climaci documentum, formet sibi in animo judicium Christi, et coram illo cogitet se judicandum adstare: et nequaquam indignabitur præsidenti, sed super se ipsum verebitur. Hinc idem Climacus asserit: Beatus monachus qui omni ignominia et despectu se dignum singulis reputat horis. Beatus qui sibi ipsi vim facit, propter Deum quotidie maledictus, contemptus et exprobratus: nam iste cum martyribus tripudiabit, et cum angelis fiducialiter aget. Beatus qui propriam voluntatem usque in finem mortificat, et superiori suo tradit curam sui. Si quis autem redargutionem sive justam sive injustam a se projecit, iste suam negavit salutem. Simus ergo in omni eventu tranquilli ac Deo intenti, quoniam Climaco teste, cœnobium est cœlum terrenum. Propter quod sicut afficiuntur in cœlo angeli Domino ministrantes, ita afficiamus cor nostrum in cœnobio servientes. Ad laudem et gloriam Omnipotentis.

SERMO SEXTUS

DE EXEMPLARI INDUCTIONE QUORUMDAM VERACITER POENITENTIUM,
UT VERE POENITERE DISCAMUS.

CONFIDE, fili, remittuntur tibi peccata tua. Matth. ix, 2.

Exempla, ut communiter dicitur, plus movent quam verba. Moralia namque documenta sunt de actibus et passionibus hominum, actiones vero et passionibus sunt suppositorum: ideo quanto in moralibus magis ad particularia quædam descenditur, tanto perfectior est doctrina, ac melius instruit audientes atque legentes. Ut ergo quæ de poenitentia dicta sunt, clarius intelligantur, exemplarem de eis narrationem inducam.

Itaque Climacus, in solenni ac sancto D cœnobio in quo, ut sæpius tactum est, multis fuit diebus, vidit quosdam monachos seorsum reclusos, videlicet incarceratos, de quorum poenitentia scribit revera mirabilia in hunc modum: Concurrite et venite, venite et audite, et narrabo vobis, o omnes qui Deum offendistis. Congregamini et videte quæ ad ædificationem ostensa sunt animæ meæ. Audiamus, custodiamus et faciamus secundum hæc, quicumque peccavimus. Attendite, fratres, verba mea, inclinate aurem vestram, qui-

cumque vobis reconciliare Deum appetitis. Ecce totum istud, imo et alia quæ brevitati studens omitto, invitatorium est et admonitorium ad ea quæ recitat et recitanda nunc sunt. Ex quo constat quam magna sint ea.

Deinde narrationem prosequitur in hac forma : Audiens, inquit, ego infirmus, esse quamdam magnam et insolitam humilitatem ac institutionem quorundam degentium in semota mansione, carcere dicta, oravi Patrem cœnobii, qui fuit luminare luminarium, justus et magnus, ut me permetteret illuc accedere ; et consentit pius ille, qui nunquam voluit animam contristare. Quum ergo accessissem in pœnitentium mansionem, et vere in regionem lugentium, verissime vidi quæ nec oculus hominis negligentis adspexit, nec auris pusillanimis audivit, nec in cor hominis otiosi ascenderunt, videlicet res et verba Deum violentare valentia, adventiones et modos pietatem Dei celeriter flectentes.

Alios illorum incarcerationum vidi totis noctibus vigilantes usque mane, sub æthere stantes, pedes habentes immobiles, et a tali vi naturæ miserabiliter somno confractos, qui se ipsos dejicientes, ignominiis se et improperiis increpabant, nullam sibi requiem dantes. Alios vidi in cœlum sursum miserabiliter adspicientes, et inde auxilium cum fletibus, lamentis ac vocibus invocantes. Alios vidi in orationibus stantes, et more damnatorum retro suas manus ligatas tenentes, qui in terram vultum suum obscurum ac mœrentem inclinantes, se ipsos judicabant indignos in cœlum adspicere, et a cogitationibus suis ac confusione conscientiae suæ aporiati, nec quid ad Deum dicerent habentes, nec unde aut quomodo supplicationem formarent invenientes, solam sine voce mentem et animam Domino exhibebant. Alios vidi in pavimento sedentes in sacco et cinere, qui faciem genibus operientes, frontem in terram percutiebant. Alios vidi pectus suum semper tunden-

tes, et suam vitam ad memoriam revocabant : quorum aliqui in suis lacrimis pavementum balneabant. Aliqui vero lacrimari non valentes, se ipsos disciplinis cædebant. Aliqui super animas suas quasi super mortuos ululabant, formidinem et angustiamurbationis sui cordis ferre non valentes. Quidam vero corde frendebant, se continere ulterius non potentes.

Vidi ibi quosdam more et mœrore et meditatione quasi se ipsos excedentes et exaggerantes, stupentes et multa mœstitia quasi mutos effectos, atque ad omnia hujus vitæ quasi insensibiles constitutos, mentem de cetero jam in abyssum humilitatis profundantes. Alios vidi repletos mœstitia, sedentes et terram intuentes, suaque capita indesinenter moventes, et instar leonum e cordis medio emittentes rugitum, dentibusque frendentes. Quidam illorum bona spe remissionem culparum quærebant et obtinebant. Alii se ipsos remissione indignos ex humilitate indicibili judicabant, et non posse se satisfacere nec Deo rationem reddere clamitabant. Alii deprecabantur Deum hic ad tempus cruciari et in futuro misericordiam invenire. Alii quum essent sub onere conscientiae contriti, sincere dicebant : Neque damnemur, Domine Pater, si possibile est, neque salvemur, et sufficit nobis.

Vidi ibi animas humiles et contritas, lapideum cor suis vocibus ad Deum exclamatis potentes compungere. Ita namque ad terram adspicientes dicebant : Scimus ergo, scimus quod omni pœna digni sumus et juste. Neque enim de cetero sufficientes sumus, etiamsi pro nobis universum convocaverimus mundum flentem, ad satisfactionem et rationem reddendam debitorum nostrorum. Illud vero solum petimus, Domine, ne in furore tuo arguas nos, neque in ira tua corripas nos, nec justo judicio tuo nos crucies ; sed parce, et sufficit nobis, atque a multis minis tuis et a tormentis dissimilibus, innominatis et occultis, nos libera. Nam in finem ad plenum remissionem petere non audemus,

Ps. vi, 2 ;
xxxvii, 2.

sicut qui promissionem nostram non custodivimus, sed ipsam post priorem benignitatem et remissionem violavimus. Isti habebant ossa adhærentia carni, erantque ut fœnum arefacti. Nil apud eos erat audire nisi ista et similia verba : Ah, ah; vœ, vœ; juste, juste; parce, Domine; miserere, miserere; indulge, indulge, si possibile est. In illis erat videre linguas adustas et instar canum ex ore projectas. Quidam eorum se in caumate puniebant, quidam se in frigore cruciabant. Quidam vero modicum aquæ gustantes, requiescebant, et refrigerium capiebant tantum ne siti morerentur. Quidam vero modicum panis sumentes, hunc longe a se projiciebant, se ipsos cibo humano reputantes indignos, eo quod irrationabilia opera commisissent. Ubi in illis risus, ubi otiosum verbum, ubi furor aut ira, qui neque si ira in hominibus esset sciebant, luctu plenarie extinguente furorem? Ubi in illis contradictio, ubi præsumptio, aut corporis cura, aut vestigium gloriæ vanæ, ubi deliciarum spes, aut meditatio vini aut degustatio fructus, ubi coctio aut ulla delectatio gustus? Nempe omnium horum spes erat apud illos extincta. Ubi in illis aliquem judicare?

Omnes sedebant, in oculis mortem semper habentes, et dicebant : Putas appropinquaverunt nobis custodes nostri angeli sancti, an longe a nobis sunt? Illis enim non appropinquantibus nobis, omnis labor noster infructuosus est. Quidam quoque ex eis dicebant : Forte exaudivit nos Deus, forte miserebitur nostri, forte adspiciet nos. Alii autem respondebant ad ista : Quis novit, sicut dixerunt fratres nostri Ninivitæ, si quo modo convertatur Dominus, et saltem a supernimio nos redimat cruciatus? Nos nihilo minus quod nostrum est faciamus : et si quidem aperuerit nobis, bene quidem ; alioqui, benedictus Dominus Deus nos juste excludens. Quocirca resuscitabant se ipsos, dicentes : Curramus, fratres, curramus; cursus enim nobis necessarius est, et cursus nimius, quoni-

Jonæ III, 9.

am bonam nostram societatem reliquimus.

Vidi in illis ex multitudine genuflectionum genua arefacta, oculos extra factos, et in parte concavos ad profundum, capillis privatos, genas a fervore calidarum lacrimarum exustas, facies tabidas et pallidas, nil in apparatu a mortuis differentes, pectora plagis dolentia, sanguinisque livores ex frequentibus in pectore tunsionibus aggregatos. Ubi erat in illis lectuli statio, aut vestimentorum integritas atque munditia? Omnia dirupta et sordida, pediculis aut pulicibus cooperta. Quid ad illorum comparisonem, a dæmonibus vexatorum afflictio? Et certe multi illorum precabantur abbatem circumponi sibi in collo et manibus ferramenta, et pedes suos compediri in ligno usque ad mortem; nec sepeliri, sed tanquam sepultura indignos, in campo bestiis tradi, aut submergi.

Porro pavendum et miserabile erat spectaculum, quando aliquis eorum erat moriturus, quia tunc omnes convenerunt ad eum miserabili nimium more ac luctu, sua capita ex compassione moventes, et tristi sermone dicentes : Quid est, frater? Quomodo et quid dicis? Quid speras? Quid suspicaris? Sentis illuminationem et consolationem in corde?

Hæc et alia multa vere miranda, et saxeæ corda mollificare valentia, Climacus scribit de istis, et addit : Ego hæc videns et audiens, paulo minus desperavi me ipsum, comparans vitam et pœnitentiam meam ad vitam pœnitentiamque illorum. Nempe qualis erat statio et habitatio loci? Tota fœtens, tenebrosa, sordida, merito carcer vocata : ita quod ipse loci adspectus universæ pœnitentiæ et luctus fuit magister. Ego vero per triginta dies fui cum eis. Hæc Climacus.

Ecce ex ista narratione, si eam bene attendimus, possumus utique multum proficere, in primis humiliando et despiciendo nos ipsos in infinitum, omnemque vitam et pœnitentiam nostram pro nihilo reputantes, imo quasi ludum et veræ pœ-

nitentiæ irrisionem existimantes ; deinde horum vestigia saltem aliquammodo sequi conantes, ut discamus de cetero omnes dissolutiones, cachinnationes, abusiones, incustodias et negligentias pristinas abhorrere ac fugere, professionem nostram incessanter attendere, præsentis vitæ brevitatem, divini iudicii districtiorem, futurorum

A suppliciorum acerbiteriam, et discrimen atque amaritudinem mortis nobis incessabiliter ac celerrime propinquantis ubertim ac profunde pensare, sicque juxta exigentiam nostræ vocationis ac professionis, vitam Deo placentem, pœnitentiam efficacem, finem salubrem ei offerre. Cui honor et gloria per sæcula sempiterna.

DOMINICA XX POST TRINITATEM

ENARRATIO IN EPISTOLAM

VIDETE QUOMODO CAUTE AMBULETIS. Ephes. v, 15-21.

DOCET nos sanctus Apostolus in præ-
senti epistola, verbis parva, sed sensu
plenissima, ut in omnibus prudenter aga-
mus, tempus fructuose expendamus, vino-
lentiam quoque vitemus, et in charisma-
tibus Spiritus Sancti conemur proficere,
Deo cantare, psallere ac gratias agere, sed
et mutuo humiliter timorateque conversa-
ri. Hæc est summa sententiæ hujus epi-
stolæ.

Prov. iv, 23.

Itaque ait : *Videte*, id est, per rationem
attendite, *quomodo caute ambuletis*, id est,
prudenter ac custodite vivatis, occasiones
peccati vitando, atque in via virtutum cum
omni circumspectione pergendo ac profi-
ciendo, juxta illud Proverbiorum : Omni
custodia custodi cor tuum; *non quasi in-
sapientes*, id est sola temporalia atque car-
nalia attendentes nec divinorum internum
saporem habentes, *sed ut sapientes*, id est
ea quæ Dei sunt cum gustu mentali scien-
tes. Sapientia namque quasi sapiens sci-
entia dicitur. *Redimentes tempus*, id est
tempus vitæ vobis concessum ad bene vi-
vendum, ab infructuosis occupationibus
ac malis operibus præservantes; vel, « re-
dimentes tempus », id est tempora in-
fructuose expensa recuperantes, quatenus
præterita mala jam recompensetis per con-
versationem virtuosam ac fervidam, et tan-
to nunc diligentiores sitis in Dei obsequio,
quanto negligentiores fuistis. *Quoniam dies
mali sunt*, id est adversitatibus, periculis
ac vitiis pleni. Non quod dies in se mali

sint, sed quia hæc insunt hominibus in
diebus vitæ præsentis. Scriptura enim fre-
quenter adscribit tempori ea quæ fiunt in
tempore, quemadmodum primo Machabæ-
orum inducitur : Videns Jonathas quia
tempus eum juvat. Christus quoque : Cra-
stinus (inquit) dies sollicitus erit sibi; et,
Sufficit diei malitia sua.

1 Mach. xii,

1. Matth. vi,
34.

Ibidem.

Propterea nolite fieri imprudentes, ve-
ra discretione carendo : quemadmodum
enim prudentia est auriga seu directrix
virtutum in earum operibus, ita quod facit
moderamen in omnibus observari; sic im-
prudencia, mater, fatrix et origo plurimo-
rum est vitiorum; *sed intelligentes quæ
sit voluntas Dei*, id est, hoc diligentissime
inquiratis atque pensetis, quid Deo com-
placeat, et quid requirat a vobis, ut illud
adimpleatis, bona agendo et mala vitando.

*Et nolite inebriari vino, in quo est lu-
xuria* causaliter, quia luxuriæ materiam
incentivumque præbet. Propter quod ait
Hieronymus : Venter vino æstuans, cito
spumat in libidinem. Et Salomon prote-
statur : Luxuriosa res vinum, et tumultuo-
sa ebrietas; quicumque his delectatur, non
erit sapiens. *Sed implemini Spiritu San-
cto*, id est, in gratia et donis Spiritus San-
cti proficere ac repleti conemini : Deus
enim unicuique influit secundum quod se
disponit et capax efficitur. *Loquentes vo-
bismetipsis*, id est vos ipsos mutuo ex-
hortando, *in psalmis* ad bene operandum
hortantibus, *et hymnis* Dei laudem conti-

Prov. xx, 1.

mentibus, *et canticis spiritualibus* quæ de futuræ beatitudinis gaudiis tractant. Verumtamen horum trium unum frequenter pro alio sumitur. *Cantantes et psallentes in cordibus vestris*, id est silenter in mente; vel, « in cordibus vestris », id est cum cordiali intentione et ex mentali affectu; *Domino Deo altissimo uni ac trino. Gratias agentes semper*, id est omni tempore opportuno, *pro omnibus* beneficiis Dei, vel « pro omnibus » hominibus beneficia suscipientibus, omnium congratulando gratiæ ac salutis, *in nomine* nominato *Domini nostri Jesu Christi*, id est in Christo Jesu, puta per eum, et secundum voluntatem ac doctrinam ipsius, seu virtute ac merito Christi, *Deo et Patri*, id est Patri æterno,

A qui est pater omnium per creationem, naturalisque pater Christi per generationem æternam, et pater noster per gratiam adoptantem.

Subjecti invicem ex debito obedientiæ, vel ex condecencia humilitatis ac caritatis, *in timore Christi* casto ac filiali. Superiores enim per caritatem et humilitatem subdunt se inferioribus, salva justitiæ disciplina; inferiores autem superioribus ex debito obedientiæ subjiciuntur. Ceteri se invicem honorare præferreque debent, juxta illud Pauli : Honore invicem prævenientes. Ideo ait Salvator : Qui major est vestrum, sit vester minister. Et in Ecclesiastico scriptum est : Quanto major es, humilia te in omnibus.

Rom. xii, 10.

Matth. xx, 26; xxiii, 11.

Eccli. iii, 20.

SERMO PRIMUS

QUOMODO VIVENDUM HIS QUI SPIRITU SANCTO IMPLERI PEROPTANT.

IMPLEMENTI *Spiritu Sancto*. Ephes. v, 18.

Tam infinita est bonitas, pietas, dilectio et munificentia Spiritus Sancti, ut omni menti eum desideranti seque ad ejus susceptionem paranti, paratissimus sit se infundere ac donare. Sed quid est se ad Spiritus Sancti susceptionem parare, nisi cordis habitaculum a vitiis emundare, vel saltem ad emundationem veram, quæ sine Spiritus Sancti infusione ac gratia non fit, se pro posse disponere, id quod in se est faciendo? Displiceant ergo nobis peccata nostra, doleamus quod unquam offendimus Deum, proponamus a pristinis abstinere peccatis, et occasiones peccandi vitemus, et ultra hoc, Dei adjutorium invocemus stabiliter : sicque Spiritus Sanctus indubitanter succurret, veram dabit contritionem, gratiam et virtutes infundet, eas quoque quotidie in nobis perficiet. Sed quæro qualiter impleri possimus Spiritu

C Sancto : Apostolus enim tam absolute ait, « Implemini Spiritu Sancto », quasi nobis ad manum sit Spiritu Sancto impleri. Et respondendum, quod Spiritu Sancto replei poterimus, imo et indubitanter replebimur, si ea quæ in præsentis epistola docet ac jubet Apostolus, observemus.

Itaque in primis docet ut attendamus qualiter caute ambulemus. Oportet ergo ut circumspecti simus in omnibus, considerando proprios actus an vere sint virtuosus, an aliquid contra rectam rationem agamus, an opera bona cum debitis virtutum circumstantiis faciamus, videlicet apto loco, congruo tempore, recta intentione et rationabili moderamine, ne quid superfluum aut diminutum in eis sit, et ne incidamus laqueos inimici, ne a dæmonibus aut pravis hominibus seducamur, ne vitia quæ speciem quamdam habent virtutum, pro veris acceperimus virtutibus. O quam magnum atque difficile est coram Deo in

Ephes. v, 15.

omnibus caute ambulare, ita ut nec cogitando, nec appetendo, neque loquendo, nec operando, sed nec debita omittendo, peccemus! Verumtamen ad istud pro posse nitamur, et propriam insufficientiam, defectuositatem ac calamitatem jugiter ac humiliter confitentes, Spiritus Sancti auxilium, illustrationem, directionem fiducialiter ac incessabiliter imploremus: et tunc utique ipse superbenignissimus Spiritus Sanctus infirmitatem nostram gratiose copioseque valde juvabit. Itaque caute ambulemus, et quibus modis, viis seu mediis citius ac abundantius proficere in omni gratia ac virtute valeamus, solerter pensemus, utpote in primis nos ipsos in omnibus humiliando, in cibo, potu, vestitu, somno, locutione modum servando, exteriores interioresque sensus custodiendo, Christi passionem in mente semper habendo, orationibus quoque insistendo viriliter, atque de mortis acerbitate, de divini iudicii horrendo rigore, de infernali supplicio, de gaudiis futuræ beatitudinis sempiternis cogitando frequenter, sed et beneficia Dei pensando, ejusque bonitatem, majestatem, justitiam, omnipotentiam ac sapientiam contemplando. Hæc agere, est caute ambulare.

Ephes. v.
16.

Secundo docet ut tempus redimamus, illud fructuose expendendo, atque tam virtuose in eo vivendo, ut dierum inutiliter aut etiam criminaliter expensorum negligentias recuperemus, cunctaque vitia emendemus. Itaque quanto quis plura mala commisit, quanto plura bona omisit, tanto post confessionem seu conversionem suam virtuosius atque ferventius vivere debet, ut dignos poenitentiae faciat fructus. Nonne erubescibile est ut facta confessione aut conversione incepta, segiores frigidioresque simus in cultu Dei quam ante eramus in servitute diaboli? Diabolo etenim servit qui peccatis subjectus est. Sed, heu! quot miserabiles homines ista non pensant, sed post confessionem recidivant tam cito, tempus quoque pro nihilo ducunt, et qualiter illud in vanitatibus

Luc. iii, 8.

A suis expendant, excogitare nituntur, quum tamen dicat Bernardus: Nil pretiosius tempore, et heu! nil hodie vilius reputatur; transeunt dies salutis, et nemo cogitat, nemo sibi perire diem et nunquam rediturum causatur. En quanta est carnalium excæcatio hominum: si quis mercator obdormiret hora in qua centum florenos posset lucrari, aut certe negligeret nundinas in quibus mille florenos lucrari valeret, vituperaretur ab omnibus tanquam stultus, ignavus ac negligens; sed quod homines quotidie multas horas consumunt in quibus nec semel meditantur de Deo, nec aliquid meritorium operantur, imo econtrario sine mensura et numero peccant, nemo vituperat, nullus deplangit, imo laudatur peccator in desideriis animæ suæ, quum tamen non tantum omni hora, sed et in omni momento æternam possimus beatitudinem promereri. Siquidem omnis actio ex caritate procedens, meritoria est vitæ æternæ, quæ incomparabiliter omnibus mundi prævalet bonis.

Ps. x, 3, sec.
Hebr.

C Hinc iterum illuminatissimus ait Bernardus: Nemo nostrum parvi aestimet tempus quod in verbis consumitur otiosis. Volat verbum irrevocabile, volat tempus irremeabile, nec advertit insipiens quid amittat. Fabulemur, inquiunt, donec hora pertranseat. O donec pertranseat hora quam tibi ad agendam poenitentiam, ad obtinendam gratiam, ad acquirendam gloriam, misericordia Creatoris indulsit; donec transeat tempus quo divinam repropitiare debueras pietatem, properare ad angelicam societatem, suspirare ad amissam hereditatem, adspirare ad promissam felicitatem, excitare remissam voluntatem, flere commissam iniquitatem! Itaque quid coram divino dicturi sunt tribunali, qui in confabulationibus, comessionibus, potationibus et choreis, ac similibus vitiis, tempus suum non solum tam infructuose, sed demum tam vitiose expendant? Nonne sicut de omni verbo inutili, ita de omni momento temporis ratio exigitur?

Matth. xii,
36.

Ephes. v,

Tertio docet Apostolus ne imprudentes

17.

simus aut insipientes, sed discreti ac sapientes, intelligendo quæ sit Dei voluntas, quid requirat a nobis. Studeat igitur unusquisque cognoscere ad quæ obliget eum vocatio sua. Quemadmodum enim religiosi scire tenentur ad quæ ex sua regula adstringuntur, ut impleant ea; sic sæculares discere debent ac scire ad quæ ratione sui status sint obligati, ut conjugati sciant ad quæ obligantur in quantum sunt conjugati, item ad quæ, in quantum parentes, sicque de aliis: juris namque ignorantia non excusat.

Ephes. v, 18.

Quarto docet ne vino inebriemur, nec aliquo potu, quum et aquam superflue bibere sit peccatum. Ebrietas namque ex suo genere est mortale peccatum, quamvis aliquando a tanto excusetur piaculo, quando videlicet ipse bibens non advertit aut nescit quod potus quem accipit sit inebriativus. Si autem advertat potum esse immoderatum ac inebriativum, et nihilo minus malit inebriari quam a potu cessare, si tunc inebrietur, ebrietas illa est culpa mortalis, quoniam usu se privat rationis, et peccandi periculis se committit. Summe ergo ebrietas est vitanda, quia in se tam vitiosa est, et multa generat vitia, quum etiam ex ea frequenter nascatur luxuria. Consuetudo vero se inebriandi gravissimum vilissimumque peccatum est.

Denique vitia ista carnalia, scilicet gula, luxuria, dicuntur vitia maxime exprobrabilia, quia sunt maxime inhonesta ac turpia, quia parificant hominem brutis, et nihil de lumine rationis invenitur in eis. Hinc ait Hieronymus: Ensis diaboli, D luxuria est. Heu, quot illa interfecit rhomphæa! Non est aliud peccatum quo toties diabolus victor exsistat. Fugite luxuriam: nam sicut virginitas hominem æquat angelis, sic luxuria brutis, imo brutis facit pejorem. Pro nullo alio peccato legitur *Gen. vi, 7.* Deus dixisse, Pœnitet me fecisse hominem; nec pro alio aliquo peccato tam manifestam exercuit ultionem, quoniam propter hoc vitium induxit mundo diluvium, *Ibid. vii, 1 et seq.; xix, 24-28.* Pen-
tapolimque combussit.

Quinto docet ut impleamur Spiritu Sancto. Siquidem Spiritu Sancto impleri, non est aliud quam gratia ejus ac virtutibus perfici; et quanto quis affectuosius cupit Deo placere eumque in omnibus honorare, tanto capacior fit repletionis Spiritus Sancti. Qui ergo vult Spiritu Sancto impleri, satagat ab omni macula culpæ purgari, seque ab omni Dei inhonoratione servare immunem, et fervens sit ad proficiendum in omni virtute. Docet ergo Apostolus ut impleamur Spiritu Sancto, id est, ejus repletionem exhibeamus nos modo nobis possibili dignos, sicque mutuo nos hortemur ad bene agendum, ad Deum laudandum, ad desiderandum futuræ beatitudinis gaudium, et Deum mente laudemus etiam in occupationibus exterioribus, atque eidem pro universis beneficiis ejus, tam nobis quam aliis impertitis, referamus jugiter gratias cordiales. Ait namque Bernardus: Peremptoria res est ingratitude, gratiæ hostis, inimica salutis, exinanitio meritorum, virtutum dispersio, beneficiorum perditio, fontem pietatis sibi desiccans. Nihil sic displicet Deo, præsertim in filiis gratiæ, sicut ingratitude: nam vias obstruit gratiæ. Quidquid igitur boni, quidquid virtutis ac devotionis aut spiritualis consolationis in te est, refunde in eum qui contulit; non tuam quæras gloriam, sed ipsius.

Postremo docet Apostolus ut invicem *Ibid. 21.* simus subjecti in timore Altissimi, quatenus nullus per animositatem se præferat alteri, sed ex humilitate inferiorem se arbitretur aliquo modo: quia etsi quis videatur multum iniquus, qualis tamen in divina prædestinatione consistat nos latet, et de nobis ipsis sumus ambigui an simus electi, imo an simus in caritate incerti. Si ergo ad evangelicæ legis pertinet puritatem ut omnes simus subjecti invicem in timore Dei, longe prorsus a Deo et ab evangelicæ legis tenore remoti sunt qui superioribus suis obedire non curant, vel, quod gravius est, aspernantur.

Itaque qui hujus epistolæ cupit docu-

menta implere, sibi ipsi non potest in sanctis laboribus parcere, quemadmodum de S. Pacomio legitur, quod quum esset viginti annorum aut circiter, dives ac delicate nutritus, cuidam viro religioso ac sancto, Palæmon nomine, se ad habitandum conjunxit. Cum quo abstinentissime vixit in pane, sale et aqua, orationibus et vigiliis manuumque laboribus strenue nimis insistens. Quumque nocturnis temporibus S. Palæmon videret B. Pacomium somno gravari, eduxit eum de cella, præcepitque ei arenam portare de loco ad locum, ut sic disceret vincere somnum. Le-

gitur quoque de abbate Arsenio, qui erat primus in palatio imperatoris et senator præcipuus, quod quum factus esset eremita et monachus, quotidie laboravit manibus suis, et de suis vixit laboribus, totisque noctibus vigilavit, orationi et contemplationi insistens. Quumque circa diluculum natura ejus fatigaretur et somnum exigeret, dixit ad somnum: Veni, serve male. Sicque sedendo dormivit una dumtaxat hora. Legitur item de S. Bernardo, quod nullum tempus tantum se perdere conquirebatur, sicut quod dormiendo expendit: et tamen valde parum dormivit.

ENARRATIO IN EVANGELIUM

LOCUTUS EST JESUS PRINCIPIBUS SACERDOTUM ET PHARISÆIS, ETC. Matth. XXII, 1-14.

SALVATOR noster, unigenitus Filius Dei, sequenti die post festum Palmarum, C multas parabolas proposuit principibus sacerdotum, Pharisæis ac Scribis seu doctoribus Judæorum: in quibus parabolis insinuavit ingratitude ac derelictionem Judaicæ plebis vocationemque gentium. Et inter parabolas illas una, hæc fuit quæ in evangelio scripta est hodierno. Ait ergo evangelista Matthæus:

Locutus est Jesus principibus sacerdotum, qui tunc fuerunt Annas et Caiphas (non quod simul fuerint principes sacerdotum sive pontifices, sed quia unus alteri in pontificio sæpe successit: erat enim pontificium Judæorum venale, et anno evolutum pontifex mutabatur), et Pharisæis, quorum quidam fuerunt Scribæ, in parabolis, dicens: Simile factum est regnum cælorum, id est negotium seu processus militantis Ecclesiæ, cujus conversatio est in cœlis, et in qua Deus regnat per fidem et caritatem, homini regi, id est facto seu operi hominis regis, qui fecit nuptias filio suo. Per hunc hominem regem intelligi-

tur Deus Pater, qui unigenito Filio suo nuptias fecit, dum ei in utero sacratissimæ Virginis naturam conjunxit humanam. Deinde eidem Filio suo desponsavit Ecclesiam, præsertim dum cœpit publice prædicare, et multos convertere, atque ex ipsis fabricare Ecclesiam, id est per fidem et caritatem eos spiritualiter adunare. Hinc a Zacharia de Christo prædictum est: Ecce vir, Oriens nomen ejus; et ædificabit templum Domino, et erit sacerdos super solio suo.

Et misit Deus Pater servos suos, id est priores Prophetas ac patres, videlicet Moysen, Aaron, Samuelem, etc., vocare invitatos, id est populum Israel, quem Deus per legem ac varia beneficia invitavit ad credendum in Christum, ad præstolandum gratiam et salutem seu redemptionem per eum. Unde in Actibus princeps Apostolorum ait: Omnes Prophetæ a Samuele et deinceps, annuntiaverunt dies istos, videlicet tempus incarnationis, passionis ac gratiæ Christi. Ad nuptias, id est ad fidelem ac caritativam unionem suæ mentis cum

Philipp. III,
20.

Zach. VI,
12, 13.

Act. III, 24.

Christo, ut sic crederent in mittendum, A sicut nos credimus in eum qui venit ac missus est. *Et nolebant venire*, id est per fidem formatam credere, et servorum illorum documenta servando, laudabiliter conversari. Judæi namque communiter pro majori parte fuerunt increduli et rebelles.

Act. vii, 51.

Propter quod Stephanus dixit : Duraervice, et incircumcisi corde et auribus, vos semper restitistis Spiritui Sancto, sicut et patres vestri. Moyses quoque in Deuteronomio loquitur populo Judæorum : Ne dicas in corde tuo, Propter justitiam meam B introduxit me Dominus in terram hanc, quum durissimæ cervicis sis populus. Et rursus loquitur ei : Ego scio contentionem tuam et cervicem tuam durissimam ; adhuc vivente me et ingrediente vobiscum, semper contentiose egistis contra Dominum : quanto magis quum mortuus fuero ?

Deut. ix, 4, 6.

Ibid. xxxi, 27.

Iterum, id est postea, *misit* Deus Pater *alios servos*, id est posteriores Prophetas, sive Apostolos, aliosque Christi discipulos, *dicens : Dicite invitatis*, puta Judæis, quibus specialiter Prophetæ sunt missi, et Christi est prænuntiatus adventus : *Ecce prandium meum paravi*, id est, mysterium Incarnationis perfeci, sacramentum Eucharistiæ per Christum institui, diversa sacræ Scripturæ alimenta proposui, gratiarum charismata dedi. *Tauri mei et altitia occisa sunt*. Per tauros atque altitia, designantur spiritualia fercula, utpote solidus cibus perfectorum, potusque lacteus parvulorum : hoc est alta contemplatio Dei et mysteriorum Christi (unde dixit Apostolus, Sapientiam loquimur inter perfectos) ; facilis quoque scientia præceptorum ac operum Salvatoris : unde rursus Paulus

I Cor. ii, 6.

Ibid. 2.

imperfectis scripsit, Non judicavi me aliquid scire inter vos, nisi Jesum Christum, et hunc crucifixum. Per tauros etiam possunt intelligi firma Dei præcepta ; per altitia vero, evangelicæ legis consilia, per quorum observantiam mens spiritualiter impinguatur dulciterque reficitur. *Et omnia parata sunt*, id est, quidquid ad salutem requiritur, per passionem et meritum

Christi vobis offertur, videlicet purgatio a peccatis in sacramentis Baptismi ac Pœnitentiæ, infusio gratiæ ac virtutum, ut de plenitudine ejus omnes accipiatis. *Venite ad nuptias* Christi præfatas, adhærendo ei ut capiti, ut influxum gratiæ accipiatis ab eo, atque per caritatem unus cum eo efficiamini spiritus.

Joann. i, 16.

Illi autem neglexerunt venire, occupati rebus carnalibus ac terrenis, et beneficia Dei parvi pendentes. Pauci etenim Judæorum, comparative loquendo, crediderunt in Christum. Ad quod insinuandum Deus per Jeremiam prophetam dixit ad eos : Assumam vos, unum de civitate, et duos de cognatione. *Et abierunt, alius in villam suam*, id est, in terrenis divitiis et temporali dominio occupavit se, *alius vero ad negotiationem suam*, hoc est ad lucra sectanda. Sicque, per euntes « in villam », signantur ambitiosi et qui rebus jam habitis inordinate insistunt ; per euntes vero « ad negotiationem », avari, qui pro temporalibus adipiscendis immoderate laborant. *Reliqui vero tenuerunt servos ejus, et contumeliis affectos occiderunt*. In Actibus enim leguntur Apostoli a Judæis capti, incarcerati ac flagellati : qui etiam a Judæorum concilio recesserunt cum gaudio, quoniam digni habiti sunt contumeliam pati pro Christo. Stephanum autem lapidaverunt, et Jacobum decollavit Herodes.

Act. iv, 3 ; v, 18, 26, 40.

Ibid. 41.

Ibid. vii, 58.

Ibid. xii, 2.

Rex autem, scilicet Deus Pater, *quum audisset* vocem sanguinis occisorum. Auris enim zeli audit omnia, ut dicit Sapiens.

Sap. i, 10.

Et Psalmista : Qui plantavit (inquit) aurem, non audiet ? Interfectio quoque innocentium est unum de quatuor peccatis quæ clamitant ante Deum. Porro auditio Dei non est aliud quam cognitio seu consideratio ejus. Loquitur tamen Deus more humano, quasi recenter corporaliterque audiret, ut ea quæ Dei sunt melius intelligamus. Unde per Isaiam loquitur regi Assyriorum : Quum fureres in conspectu meo, superbia tua ascendit in aures meas. Vel dicitur audire ab angelis sanctis an-

Is. xxxvii, 29.

nuntiantibus sibi quæ fiunt in sæculo isto, non quasi ignoranti, sed ut dominatori ac judici, a quo petunt effectum pietatis aut æquitatis. Hinc enim eleemosynæ Cornelii dicuntur commemoratæ in conspectu Dei. *Iratus est*, non iræ passionem habendo, sed justam infligendo vindictam. *Et missis exercitibus suis*, id est armatis turbis Romanorum qui cum Vespasiano ac Tito contra Judæam venerunt. Et dicuntur gentiles illi exercitus Dei, quia divina ordinatione venerunt adversus Judæos, et quia divinæ justitiæ executores fuerunt contra eosdem. Juxta quem modum Deus in Ezechiele et Jeremia regem Babylonis frequenter nominat servum suum. *Perdidit homicidas illos*. Romani enim innumerales Judæos interfecerunt, vendiderunt ac disperserunt, ut Josephus scribit. Sicque Romani nescientes deservierunt divinæ justitiæ in punitione hominum impiorum, sicut subjungitur. *Et civitatem illorum succendit*, puta Jerusalem, quam simul cum templo combusserunt Romani. Et quamvis Romani alia ratione venerunt contra Judæam, quam ad ulciscendum Christi discipulorumque ejus occisionem, Deus tamen movit Romanos contra Judæos incredulos, in quantum hoc opus fuit justitiæ.

Tunc rex ait servis suis, id est Christi discipulis : *Nuptiæ quidem paratæ sunt*, hoc est, Christi mysteria sunt completa, videlicet ejus incarnatio, passio, resurrectio ejus, et conjunctio Christi cum Ecclesia primitiva incepta est, spiritualis quoque refectio sacramentorum ac gratiarum offertur hominibus virtute ac merito Salvatoris ; *sed qui invitati erant*, id est Judæi primo vocati, *non fuerunt digni* ad nuptias istas gratia adspirante perducii, propter suam rebellionem, ingratitude atque perfidiam. Unde Paulus loquitur Judæis : Vobis oportebat primum loqui verbum Dei ; sed quoniam repulistis illud, et indignos vos judicastis vitæ æternæ, ecce convertimur ad gentes.

Ite ergo ad exitus viarum. Ad litteram,

A misit Deus Apostolos ad exitus viarum, id est ad loca ultra Judæam, dicendo : *Euntes in mundum universum, prædicate Evangelium omni creaturæ*. Sed ante passionem præceperat : *In viam gentium ne abieritis*, id est, fines Judææ non exeatis ad prædicandum. Spiritualiter autem, viæ sunt virtutes et actus earum, per quas itur ad regnum cœleste ; exitus vero viarum sunt recessus a medio virtutis ac veritatis, videlicet vitia et errores. Jussit ergo Deus Apostolos ire « ad exitus viarum », hoc est ad corrigendos errores atque excessus gentium, qui non fuerunt in via, sed devio, in tenebris umbraque mortis. — At vero de reprobatione ac derelictione Judæorum ait Christus apud Isaïam : *Hæc dicit Dominus, formans me ex utero servum sibi, ut reducam Jacob ad eum, et Israel non congregabitur*. In qua auctoritate Jacob et Israel accipiuntur pro populo Judæorum nato ex Jacob, qui alio nomine dictus est Israel. De gentilium vero conversione adjecit : *Et glorificatus sum in oculis Domini, et dixit : Parum est ut sis mihi servus ad suscitandas tribus Jacob et fæces Israel convertendas ; dedi te in lucem gentium, ut sis salus mea usque ad ultimum terræ*. Hoc est quod subditur : *et quoscumque inveneritis, vocate ad nuptias*, id est, cunctis gentibus Evangelium Christi prædicare, atque ad ejus gratiosam refectionem eas pro posse adducite, sicut in Psalmo prædictum est : *Benedicentur in ipso omnes tribus terræ ; itemque, Reminiscentur et convertentur ad Dominum universi fines terræ*.

Et egressi servi ejus in vias, id est ad gentium dispersiones ac lata itinera perditionis, *congregaverunt*, hoc est, ad Christum converterunt, atque in ejus fide, caritate et ecclesiastica unitate spiritualiter collegerunt, *omnes quos invenerunt, bonos et malos* : non simpliciter omnes, quoniam teste Apostolo, non omnes obediunt Evangelio, nec omnium est fides ; sed omnes, id est quosdam de omni genere hominum, ut sit distributio pro generibus singulo-

Act. x, 4.

Ezech.
xxix, 18 ;
Jer. xxv, 9 ;
xxvii, 6 ;
xliii, 10.

Act. xiii, 46.

Marc. xvi,
15.

Matth. x, 5.

Luc. i, 79.

Is. xlix, 5.

Gen. xxxii,
28.

Is. xlix, 5,
6.

Ps. lxxi, 17.

Ps. xxi, 28.

Rom. x, 16.

II Thess. iii,
2.

rum, non pro singulis generum. Sed qualiter inter gentiles inveniri poterant aliqui boni? nisi quod (teste Apostolo) gentes quæ legem non habent, et tamen ea quæ legis sunt faciunt, ipsi sibi sunt lex: multi quoque gentilium virtutibus acquisitis et indole bona fulgebant, qui comparatione aliorum boni vocantur. Unde et Paulus dixit gentili: Non insanio, optime Feste. Vel ideo dicuntur congregasse bonos et malos, quoniam in Ecclesia boni sunt malis admixti.

Et impletæ sunt nuptiæ discumbentium, id est, multitudo vocatorum, atque in nuptiis Christi spiritualiter recumbentium, numero ac merito est completa: quod tamen non erit perfecte, nisi in fine mundi, quum gentium intraverit plenitudo, omnisque Israel juxta Apostolum fuerit salvus, hoc est universi electi ex paganismo ac Judaismo. Nunc autem aliququaliter sunt nuptiæ istæ impletæ, quia in omnem terram exivit sonus prædicationis Apostolorum, ita quod toto terrarum orbe diffunditur ipsa Ecclesia.

Intravit autem rex, scilicet Deus Pater, non motu locali, sed per effectum sui judicii, in nuptias sive Ecclesiam, *ut videret discumbentes*, ut singulorum merita pensaret ac judicaret: quod facit in morte singulorum, judicio particulari; et in fine sæculi aget hoc judicio universali. *Et vidit ibi hominem non vestitum*, id est intus non decoratum, *veste nuptiali*, id est gratia gratum faciente, seu caritate, vel meritorio actu. Et merito caritas dicitur vestis nuptialis, quoniam Christum inclinavit ut humanam naturam assumere et Ecclesiam sibi desponsare dignaretur. *Et ait illi: Amice*, per naturalem bonitatem et fidem informem, non per gratiam, caritatem ac meritorium actum. Omnia enim diligit Deus quantum ad id quod sunt per naturam, quod ab ipso per creationem sortita sunt, juxta illud Sapientiæ: Diligis omnia quæ sunt, et nihil odisti eorum

quæ fecisti. *Quomodo huc intrasti*, id est, qua præsumptione in Ecclesia exstitisti, et inter fideles apparuisti, sacramentis quoque communicasti, *non habens vestem nuptialem*, videlicet caritatem, quæ inter electos reprobosque in fine discernit? *At ille obmutuit*: quia injusti Deo reddere nequeunt rationem.

Tunc dixit rex ministris: non illis de quibus prædictum est, puta Apostolis; sed angelis sanctis, qui in die judicii erunt executores sententiæ Judicis, quemadmodum asserit Christus: In consummatione sæculi exhibunt angeli, et separabunt malos de medio justorum, et mittent eos in caminum ignis. *Ligatis manibus et pedibus ejus, mittite eum in tenebras exteriores*, id est infernales ac corporales, quas incidere meruit cadendo in tenebras interiores, videlicet mentis iniquitates seu vitia et errores, quæ sunt animarum caligines. Præterea, constat quod reprobi in die judicii retrudentur in tartarum nudi. Idcirco per manuum ac pedum ligationem, nil aliud designatur, nisi inevitabilitas divini

judicii, cui resistere et a quo fugere nemo valebit, secundum quod Dominus per prophetam Amos protestatur: Ecce ego stridabo super vos, sicut stridet plaustrum onustum fœno; et peribit fuga a veloce, et fortis non salvabit animam suam. *Ibi erit fletus*, non quantum ad lacrimarum resolutionem ac emanationem, sed quoad cerebri perturbationem, animique dolorem, *et stridor dentium*, propter frigus vehementissimum. Ibunt enim a calore nimio ad aquas nivium. *Multi enim sunt vocati ad nuptias Ecclesiæ militantis, pauci vero electi ad nuptias Ecclesiæ triumphantis*. Quamvis enim in se multi atque innumerales sint, comparatione tamen reprobosque sunt pauci. Unde alibi ait Salvator: Arcta est via quæ ducit ad vitam, et pauci inveniunt eam; lata vero et spatiosa quæ ducit ad perditionem, et multi vadunt per eam.

Rom. II, 14.

Act. XXVI, 25.

Rom. XI, 25, 26.

Ps. XVIII, 5.

Sap. XI, 25.

Matth. XIII, 49, 50.

Amos II, 13, 14.

Job XXIV, 19.

Matth. VII, 13, 14.

SERMO SECUNDUS

DE MULTIPLICIBUS NUPTIIS DE QUIBUS SACRA LOQUITUR SCRIPTURA.

VENERUNT nuptiæ Agni, et uxor A
ejus præparavit se. Apoc. xix, 7.

Quoniam homo ex corpore et anima exstat compositus, naturale est ei ex cognitione corporalium rerum ad spiritualium rerum perducere notitiam. Unde et Aristoteles docuit, quod intellectualis nostra cognitio, ex sensitiva cognitione sumit originem. Hoc Christus, increata sapientia Dei Patris, certissime sciens, in Evangelio sæpissime per materialium rerum similitudines instruit nos de intellectualibus, spiritualibus ac divinis, sicut et in evangelio hodierno, in quo Christus per similitudinem nuptiarum carnalium docet nos de spiritualibus nuptiis quæ in militanti fiunt Ecclesia.

Deinceps Scriptura loquitur de nuptiis quinquepartitis, seu de matrimonio quintuplici. Primæ sunt nuptiæ corporales, seu carnale connubium, quod est legitima conjunctio maris et feminae, individuum vitæ consuetudinem communionemve servans.

Joann. II, 1.

De his nuptiis fertur in Joanne : Nuptiæ factæ sunt in Cana Galilææ. Quid autem taliter conjugati sibi invicem teneantur, et qualiter vivere debeant, dictum est in sermone tertio evangelii in dominica secunda post octavas Nativitatis Christi.

Cf. I. XXIX, p. 189 et s.

Secundæ sunt nuptiæ personales, quæ sunt unio Verbi æterni seu unigeniti Filii Dei cum natura humana, quæ unio est hypostatica seu suppositalis conjunctio qua natura humana conjuncta est Verbo æterno in Christo. In hac nuptiali conjunctione, persona Verbi æterni se habet per modum sponsi, et natura humana assumpta per modum sponsæ. Sponsus namque ample-

dit, amplexus est, omnique lumine gratiæ ac gloriæ, omni virtute et dono Spiritus Sancti ac beatifica fruitione implevit ac fecundavit eandem. Iterum, sicut in carnali matrimonio consummato, sponsus et sponsa, seu maritus et conjux, una fieri caro dicuntur, et unam prolem eis communem producunt; ita in nuptiis personalibus ac spiritualibus jam præfatis, ex conjunctione Verbi æterni seu Filii Dei cum natura humana constat una persona, quæ est Christus. Christus namque est una persona in duplici subsistens natura, divina videlicet et humana. Operatio autem hujus personæ, quæ velut proles quædam ab ea progreditur, toti personæ huic communis est. Præterea de his nuptiis debemus unigenito Filio Dei, imo toti superbeatissimæ Trinitati jugiter et affectuosissime regratiari, quod scilicet nostram naturam naturæ divinæ tam immediate ac hypostatice unire dignatus est, ita quod unigenitus Filius Dei, Deus, creator ac Dominus noster, factus est frater noster, conservus noster, redemptor noster. Harum nuptiarum thalamus fuit castissimus gloriosissimæ Virginis uterus. De quibus prædixit Psalmista : In sole posuit tabernaculum suum, et ipse tanquam sponsus procedens de thalamo suo. De his nuptiis dicit Gregorius : Tunc Deus Pater Filio suo nuptias fecit, dum ei naturam humanam in Virginis utero copulavit.

Gen. II, 24.

Ps. XVIII, 6.

Tertiæ sunt nuptiæ sacramentales, videlicet conjunctio Christi cum Ecclesia. Et nuptiæ istæ tunc potissime celebrari cœperunt, dum homines credere inceperunt in Christum jam incarnatum, et converti ad eum, quanquam dici possit quod inceperunt ex tunc quo homines desuper il-

B

C

D

lustrati, credere incepterunt Dei Unigenitum esse incarnandum. In his nuptiis sponsus est Christus, et sponsa est ipsa Ecclesia, quæ Christo jam valde gratiose et caritative unitur, atque ab ipso spiritaliter ac valde liberaliter fecundatur.

Quartæ sunt nuptiæ spirituales et quotidianæ, videlicet unio Christi gratiosa cum fidei devotaque anima. Has nuptias, si efficaciter volumus, Christus quotidie cum nostris celebrat animabus, eas caritative, suaviter ac intime sibi conjungens, fecundans, amplectens, quemadmodum per Osee

Osee II, 19, 20.

affirmat dicendo: Sponsabo te mihi in iudicio, et justitia, et misericordia; et sponsabo te mihi in fide. Ad hanc desponsationem animæ cum Christo, requiritur primo immunitas seu purgatio animæ ab omni peccato mortali. Imo quæcumque anima mortali subjacet culpæ, adultera exstat diaboli, cui per mentis consensum miscetur, et voluntatis affectu communicat, operibusque obedit. Ecce quanta est insania impiorum. Nonne insensatissimus reputaretur qui draconem aut basiliscum amplecteretur et eorum potaret venena, nec sanis acquiesceret exhortationibus persuadentium ut se ab illis averteret? Quanto magis insensati ac stolidi sunt omnes qui peccant mortaliter aut in mortali permanent culpa? Quoniam infernalibus draconibus miscentur ac basiliscis, atque illorum se implent venenis, id est vitiosis affectibus qui mortem inferunt sempiternam, neque obtemperant admonitionibus piis quatenus se emendent, sed animo pertinaci in vitiis perseverant. Talibus clamat

Matth. III, 7, 8.

Osee XIV, 2.

A tuum, quoniam corruisti in iniquitate tua. Et verissime ait, Corruisti in iniquitate tua.

Præterea advertamus quantum et qualiter corrui quicumque mortaliter peccat. Si aliqua nobilis puella, regis filio desponsata, sponsum illum dimitteret, seque alicui garcioni, pultroni * aut lenoni subderet constuprandam, nonne gravissime ruere atque vilissima fieri censeretur? Sed ecce ineffabiliter gravius labitur ac vilius operatur anima christiana, quæ summi regis Filio, veri et æterni Patris vero ac unico nato, desponsata est in Baptismo seu Pœnitentiæ sacramento, seu quando caritatem sortita est, et tamen ab illo per inobedientiam se avertit, nec fidelitatem servat eidem, sed (sicut præactum est) cum dæmonibus adulteratur, illis subicitur, ab eis fœdatur ac pessime fecundatur, ita quod opera efficit tenebrarum, imo potius instar meretricum efficitur sterilis, quoniam mala agere sterilitas potius quam fecunditas perhibetur. Denique si uxor alicujus omni anno generaret non hominem, sed serpentem, lupum aut ranam, non fecunda sed abominabilis atque miserrima diceretur. Consimiliter peccatores qui opera bestialia ac diabolica operantur, qui gulæ ac luxuriæ turpitudinibus inquinantur, qui superbia, indignatione, crudelitate, pertinacia, instar dæmonum adimplentur, non fecundi aut fructuosi, sed steriles abominabilesque omnino, et prorsus miserrimi sunt censendi. Unde et magis merentur bruta ac dæmones quam homines nuncu-

* Cf. Cangii Glossarium.

D

pari. Quintæ sunt nuptiæ supercœlestes, quæ sunt nuptiæ triumphantis Ecclesiæ, utpote beatifica unio mentis creatæ cum Deo, seu felix et consummata summi ac superdulcissimi boni fruitio, quæ est plena, æterna inæstimabiliterque deliciosa refectio omnium Beatorum in Domino. De quibus nuptiis in Apocalypsi legitur: Beati qui ad cœnam nuptiarum Agni vocati sunt. Unde, secundum Hieronymum, nihil felicius Christiano, cui regnum cœlorum promitti-

Apoc. XIX, 9.

tur, cui nuptiarum cœlestium beatitudo offertur. Et sicut id verum est, ita veraciter dici potest : Nihil infelicius Christiano qui tanta beatitudine se reddit indignum, qui tantis beneficiis ac promissis se facit ingratum. Et tamen quam multi sunt tales ! Etenim tales sunt omnes superbi, luxuriosi, avari, acediosi ac invidi, et qui potationibus, comessionibus, loquacitatibus ac vanitatibus vacant. O quanta est cæcitas et insipientia nostra, quod propter hujus brevissimæ vitæ delicias, divitias et honores, æterna illa beatitudine nos privamus, et propter fœdissimæ carnis voluptates, illa supercœlesti, æternali, incomparabili atque purissima voluptate spoliavimus nos ipsos !

Postremo videmus quod inter sponsum et sponsam specialiter quæritur similitudo, quoniam nobilis nobili, dives diviti, sapiens sapienti, juvenis juveni communiter vult conjungi. Quum ergo Sponsus cœlestis, Dominus noster Jesus Christus, sit vere humillimus, mitissimus, purissimus, omni caritate et sanctitate plenissimus, oportet ut anima quæ illius sponsa esse ac permanere desiderat, in cunctis humiliet semetipsam, mansueta, munda et spirituali amore plena esse conetur, nec sponsi sui offendat adspectum, sed fidelitatem ei inviolabilem servet, sicque adulterinos dæmonum vitet amplexus, id est vitiosos affectus, præsertim superbiæ, iræ, concupiscentiæ, avaritiæ motus.

Simus itaque jugiter coram Altissimo custoditi, sinceri ac fervidi, nec dæmonibus præbeamus assensum. Imo quotidie profectui insistamus virtutum, quemadmodum de B. Euphrasia virgine legitur, quæ fuit de prosapia devotissimi Theodosii

A imperatoris. Cujus Euphrasiæ parentes valde virtuosii fuerunt, ita quod ea nata, de cetero continenter omnino vixerunt. Porro Euphrasia quum adhuc esset quasi infantula, claustrum introiit monialium devotarum, inter quas vixit humillime, ita quod quanto illustrior, tanto fuit humilior. Nam et abjectiora cœnobii fecit obsequia, fuitque omnibus obsequiosa ; et vixit tam abstinerenter quod interdum in tota hebdomada non nisi semel se refecit. Hinc diabolus contra eam insaniens, semel projecit B eam de alto solario, et præcipitavit eam in terram ; sed ipsa divinitus præservata, non lædebatur. Obiit autem quum adhuc esset juvencula. Abbatisa quoque cœnobii illius fuit mulier eximiæ sanctitatis, cui Deus revelavit instare mortem felicem S. Euphrasiæ. Siquidem abbatisa illa in spiritu rapta, vidit Sanctos coram Dei tribunali stantes, et de humilitate ac virtutibus B. Euphrasiæ admirantes, eamque cœlesti corona dignam pronuntiantes. Verumtamen in cœnobio illo fuit soror una C valde perversa, quæ sanctitati et famæ Euphrasiæ semper invidit atque detraxit, ad quam Euphrasia humillime, amorose ac benevolentissime indesinenter se habuit. Nam in cœnobio eodem fuit soror quædam a pessimo obsessa dæmonio, ad quam nulla audebat appropinquare sororum, præter Euphrasiam, quæ illam accessit intrepida, deditque manducare eidem. Cujus privilegio invidens soror illa perversa, asseruit se quoque posse obsessam illam accedere. Quod quum facere D præsumpsisset, mox eam invasit, percussit et vulneravit illa obsessa, quousque superveniens S. Euphrasia, de manibus illius obsessæ eripuit eam.

SERMO TERTIUS

DE IMPEDIMENTIS PERTINGENDI AD SPIRITUALES NUPTIAS CHRISTI.

LIGATIS manibus et pedibus ejus, projicite eum in tenebras exteriores; ibi erit fletus et stridor dentium. Matth. XXII, 13.

In hodierno evangelio edocemur quam incomprehensibiliter magna sit caritas, misericordia ac munificentia Dei ad homines, et item quam ineffabiliter magna sit hominum negligentia, perversitas, ingratitude. Ecce enim Deus omnipotens et æternus, non solum ad suam imaginem ac similitudinem nos creavit, sed etiam ad supernaturalem beatitudinem, quæ est sui ipsius clara, immediata ac fructiva cognitio, condidit. Quam quum primi parentes sibi ipsis et nobis omnibus demeruisent, misertus est Deus hominibus, et Filium suum pro mundi redemptione ac salute incarnandum prædixit ac moriturum. Deinde per homines electos et sanctos, videlicet Prophetas ac Patriarchas, invitavit homines ad salutem, ad nuptias spirituales, ad emendationem et conversionem constantem, ad fidem caritatemque Christi : quod ab initio mundi facere cœpit per Adam post suam emendationem, et Seth, Enoch, Noe et alios multos. Specialiter autem in veteri Testamento, per Moysen, Aaron, Josue, Samuelem, David, Isaiam aliosque Prophetas, et sanctos aliquos reges, ut Josaphat, Ezechiam, Josiam, invitavit populum Judæorum valde frequenter ad fidem, caritatem, spiritualesque nuptias ac salutem. In quo caritas, pietas et munificentia Dei monstrantur; præsertim quod ingratis, rebelles, perversos, toties tamque dignantissime invitavit.

Insuper hominum ingratitude, negligentia atque perversitas ostenduntur in hoc, quod tam dignanter tamque sæpissime in-

vitati divinitus, noluerunt venire, carnalia spiritualibus, temporalia, vana ac vilia spiritualibus et æternis, imo creaturam Creatori insipientissime ac injustissime præferentes. De quibus in Zacharia scriptum est : Noluerunt attendere, et averterunt scapulas recedentes, et aures suas aggravaverunt ne audirent legem.

Zach. vii, 11, 12.

Præterea in evangelio hodierno tanguntur quædam specialia impedimenta perveniendi ad spirituales nuptias ac salutem. Primo etenim dicitur, quod nolebant venire; secundo, quod neglexerunt venire; tertio, quod abierunt in villam suam; quarto, quod abierunt in negotiationem suam; quinto, quod quidam eorum tenuerunt ministros regis, et contumeliis affectos interfecerunt.

Primum ergo impedimentum gratiæ ac salutis, est nolle converti, nolle acquiescere, nolle subdi ac obedire. Per istos qui venire noluerunt, designantur universi intimorati, qui de sua salute non curant, nec aliud habent impedimentum bene vivendi, nisi quia non volunt; sed quidquid prædicetur eis de Dei timore, de divini judicii rigore, de pœnis æternis ceterisque ad salutem spectantibus, cordialiter non advertunt, imo magis convertunt illud in risum, et in suis vanitatibus fœditatibusque persistunt. Qui similes sunt induratis Judæis, de quibus ad Ezechielem prophetam locutus est Deus : Fili hominis, ecce mitto te ad gentem exasperatricem, filios Israel qui audiunt sermones meos ex te, et non faciunt eos, sed in canticum oris sui vertunt eos; et factus es eis quasi carmen musicum quod suavi dulcique sono canitur. Nam et isti intimorati etiam eos a quibus audiunt verbum Dei frequenter de-

Ezech. ii, 3; xxxiii. 31, 32.

Gen. i, 26, 27.

Ibid. iii, 6, 15.

rient. Hinc remotissimi sunt a salute: nam bona voluntas seu bonum propositum est bonæ conversationis exordium. Unde quam grave sit nolle hujusmodi, primo Regum edocetur, quo dicitur: Quasi scelus idololatriæ, nolle acquiescere.

I Reg. xv, 23.

Secundum impedimentum gratiæ ac salutis, est negligentia. Et ista est duplex: una, qua opera bona quis omnino omittit, non jejunando, aut non festivando ac confitendo juxta præceptum Ecclesiæ; secunda, qua quis opera bona exercet, sed absque debita reverentia Dei et sine condigna diligentia animi, videlicet cum tempore, fastidio et distractione irrefrenata.

Jer. xlviii, 10.

Apoc. iii, 16.

De qua Jeremias asserit: Maledictus qui facit opus Dei negliger. Unde et in Apocalypsi Dominus loquitur: Quia tepidus es, incipiam te evomere de ore meo. Ubi sapienter pensandum est, quod si maledictionem meretur et condemnationem æternam, qui opus Dei facit negliger, quanta erit eorum maledictio atque damnatio qui illud omnino omittunt? Oportet ergo cum diligentia et reverentia Deo servire. Propter quod apud Marcum ait Salvator: Videte, vigilate et orate. Ad Hebræos quoque scribitur: Serviamus Deo cum metu et reverentia. Hinc in Deuteronomio Moyses exhortatur: Custodi te ipsum et animam tuam sollicite; ne obliviscaris verborum Domini, et ne excidant de corde tuo cunctis diebus vitæ tuæ. Consideret igitur homo infinitam majestatem Dei, atque incomparabilem excellentiam ejus in omni dignitate, sapientia, justitia et perfectione: sicque omnem negligentiam in ipsius devitet obsequio. Pensemus quam reverenter ac sollicite serviatur regibus, principibus et prælatis sæculi hujus ab eorum ministris, et hoc exemplo discamus Deo reverenter ac fervide ministrare. Præsertim autem in ecclesia, tempore divini obsequii, et maxime hora celebrationis, reverenter et fervide habere se debent

Marc. xiii, 33.

Hebr. xii, 28.

Deut. iv, 9.

I Tim. i, 17.

Christiani coram rege sæculorum immortali, invisibili, Deo vero, non pigre sedendo, sed decenter, genibus flexis orando,

aut stando, seu inclinando, nisi infirmitas eos excuset. Sed quidam ita sunt duræ, intemperate ac tumidæ mentis, ut nec tempore elevationis genua flectant, et Creatori suo tam irreverenter adsistere non vereantur. Quocontra Psalmista loquitur Deo: In toto corde meo exquisivi te.

Ps. cxviii, 10.

Tertium impedimentum salutis et gratiæ, est superbia, ambitio, seu vana gloria: quod significatur per eum qui transivit in villam suam, hoc est ad locum dominationis ac præsentis suæ. Qui enim mundi hujus quærunt honores, et aliis appetunt dominari, malentes præesse quam subesse, Christi humilitatem discere ac assequi aspernantur; nec quam periculosa sit præsentia contemplantur, neque divini distractionem judicii expavescunt, sed neque adspiciunt quid peccando meruerint, quantum confusionem, dejectionem ac pœnam. Consideret ergo unusquisque se ipsum et proprium imperfectum, propriam defectuositatem et culpam, quam insufficiens sit regere semetipsum: sicque cessabit ad

aliorum regimen adspirare. Nec quisquam se ingerat impudenter, sed qui vocatur a Deo, ut Aaron, præsertim quum dicat Gregorius: Numerari culpæ non possunt quæ ex ambitione procedunt. Et rursus: Unusquisque prælatus seu præses toties ad apostasiæ crimen delabatur, quoties præesse hominibus delectatur. Ejus enim vestigia sequitur qui similis fieri Altissimo concupivit, et angelis juxta propriæ voluntatis placitum præesse optavit. Advertant ergo superbi et honoris ac gloriæ cupidi in præsentia, quod apud Matthæum Christus Dominus contestatur: Nisi conversi fueritis, et efficiamini sicut parvuli, non intrabitis in regnum cœlorum. Humilitatem ergo in omnibus amplectamur, sine qua nemo potest Deo placere, nec gratiam ac virtutes in corde suo colligere.

Hebr. v, 4.

Is. xiv, 14.

Matth. xviii, 3.

Quartum impedimentum, est avaritia: quæ significatur per eum qui ad suam abiit negotiationem. Per quem omnes expiuntur avari, qui quanto plus terrena appetunt atque accumulunt, tanto plus a

profectu virtutum, ab adeptione salutis A
 æternæ impediunt semetipsos. Avaritia
 quippe, tanquam gravissimum pondus, de-
 primit animam ad terrena, ita quod in illis
 spiritualiter suffocatur, nec ad contem-
 planda divina levatur. Verum ut ait Grego-
 rius, si consideremus quæ et quanta nobis
 promittuntur in cœlis, vilescunt animo
 omnia quæ habentur in terris. Dilige te,
 o Christiane, spirituali et vero amore, do-
 na gratiæ ac virtutum optando, servan-
 do, augendo, atque ad gloriam æternæ bea-
 titudinis cordialiter adspirando : sicque B
 carnalem et falsum tui ipsius amorem ab-
 jicias, ea nequaquam desiderando quæ im-
 pediunt a salute, quæ offensiva sunt Dei,
 et spirituali dilectioni exstant contraria,
 ut sunt voluptates carnales, terrenæ et
 superfluæ possessiones, etc.

Quintum, est manifesta malitia : quæ si-
 gnatur per eos qui servos regis cœlestis
 contumelia affectos injustissime occide-
 runt. Per quos intelliguntur omnes obsti-
 nati ac pessimi, qui eos a quibus audiunt
 verbum Dei et justas increpationes, seu C
 caritativas ac pias exhortationes, odiunt,
 persequuntur aut etiam perimunt, juxta
 illud Amos : Odio habuerunt corripientem,
 et loquentem perfecte abominati sunt. Isti
 advertant quod Salomon contestatur : Viro
 qui corripientem dura cervice contemnit,
 repentinus superveniet interitus. Isti sunt
 similes phreneticis et furibundis infirmis,
 qui violentas injiciunt manus in patres
 suos ac medicos eis succurrere cupientes :
 imo similes sunt Scribis ac Pharisæis, ce-
 terisque Judæis, qui persecuti sunt Chri- D
 stum, eo quod contra eorum vitia prædi-
 cavit, et eos condigne corripuit. Itaque
 increpationes justas et caritativas, infor-
 mationes salubres, cum omni gaudio et gra-
 tiarum actione suscipiamus, nec minus gra-
 tanter accipiamus curationem vulnerum
 animæ nostræ quam corporis nostri, quum
 in Proverbiis scriptum sit : Qui abjicit
 disciplinam, despicit animam suam ; qui
 autem acquiescit increpationibus, posses-
 sor est cordis.

Insuper, quoniam caritas vestis est nu-
 ptialis, in vera ac fervida Dei ac proxi-
 morum caritate jugiter permanere atque
 proficere enitamur, omnem prorsus dete-
 stantes invidiam. Pensemus quoque distri-
 ctionem divini judicii in isto qui veste
 caruit nuptiali, per quem designantur om-
 nes qui in peccato exstant mortali. Qui
 manibus pedibusque ligatis, jussus est
 projici in tenebras infernales, ut qui hic
 membra sua contra Dei præcepta exten-
 dit, illic ea habeat vinculis æternæ dam-
 nationis constricta. Itaque tenebras illas
 nimis horribiles intolerabilesque inferni
 fœtores, dæmonum metuendos adspectus,
 gehennale frigus et ignem æternum, om-
 nem demum desolationem, desperationem
 et perturbationem damnatorum sapientia-
 liter modo quotidie inspiciamus, vereamur
 et effugere semper conemur, atque
 prædicta salutis ac gratiæ impedimenta
 vitemus.

Legitur in libro Jeremiæ prophetæ,
 quemadmodum ipse Jeremias in utero ma-
 tris suæ sanctificatus, et a pueritia sua
 spiritu prophetiæ repletus, a perversissi-
 mis incredulisque Judæis multas et graves
 tribulationes perpessus est. Nam semel
 miserunt eum in nervum, et sæpe in car-
 cerem, imo semel in profundissimum la-
 cum, in quo non fuit aqua, sed lutum ;
 descenditque beatissimus ille Propheta us-
 que ad renes suos in cœnum. Alia quoque
 vice diutissime sedit in carcere, susten-
 tatus ibidem pane tribulationis et aqua
 angustiae, atque omni humano privatus so-
 latio. Et subsannabatur ab omnibus, ac ar-
 repticius seu obsessus a pluribus diceba-
 tur. Tandem quum jam sancta senectute
 grandævus, acriter increparet populum su-
 um pravissimum, ab eodem ictibus la-
 pidum est occisus. Et omnia ista pro ju-
 stitia pertulit, et quoniam plebem illam
 vitiosissimam reprehendere non cessavit.
 Ecce præelecti amici ac filii Dei quanta
 in isto perpessi sunt sæculo. Ipsorum ergo
 exemplo, patientiam sanctam discamus ac
 jugiter observemus.

Amos v, 10.

Prov. xxix,
1.

Ibid. xv, 32.

Jer. i, 5-10.

Ibid. xx,
2; xxxii, 3;
xxxviii, 6.

Ibid. xxxvii,
14 et seq.;
iii *Reg.* xxii,
27.

Jer. xviii,
18; xx, 7;
xxix, 26.

Cf. t. IX,
6 A, 263 A⁷.

AD RELIGIOSOS

SERMO QUARTUS

DE DISCRETIONE ET VIGILANTIA MENTIS SEMPER HABENDA.

VIDETE quomodo caute ambuletis. A
Ephes. v, 15.

Ps. cxvii,
12.

Cautio ad prudentiam pertinet, et est cautio prospectio ac diligentia mentis ad vitandum pericula. Quum ergo in medio laqueorum versemur, atque innumerabilium invisibilium hostium, omni calliditate, crudelitate, experientia, grandi etiam fortitudine abundantium, multitudine circumvallemur, qui nos circumdant ut apes, et contra nos exardescunt sicut ignis in spinis, certum est quod incessabili cautione indigeamus : præsertim quum pericula nobis imminetia, sint de irremediabilibus, incomparabilibus et interminabilibus malis, utpote de amissione beatitudinis summæ ac sempiternæ, et de incursione damnationis perpetuæ et extremæ. O utinam hæc saperent nobis taliter ut oportet : puto quod nunquam dissoluti, intimorati, otiosi essemus.

Porro hoc loco, per cautionem discretio potest intelligi, quæ omni proficere cupienti potissimum necessaria exstat, non solum ut mala vitentur bonaque fiant, sed C item ut horum utrumque fiat compendiose, et ut celeriter multum proficiamus, et ad perfectionem pertingamus velocius : ut scilicet in omni actu virtutis, modum, tempus, locum, rectam intentionem, jugem custodiam observemus, totaque diligentia id adimplere conemur propter quod religionem sumus ingressi. Hinc ait Bernardus : In cunctis nobis semper præesse debet discretio, et suo moderamine singulas discernere voluntates, ne verisimilis

fallat opinio, ne decipiat sermo versutus, ne quod bonum est, malum esse credatur, aut econverso. Discretio quippe omni virtuti ordinem tradit, modum præfigit, firmitatem pulchritudinemque largitur ; nec solum est virtus, sed et moderatrix virtutum, ordinatrix affectuum, doctrix morum : qua sublata, virtus vertitur in peccatum. Etenim si adsit timor et desit discretio, vertitur in desperationem ; si dolor, transit in amaritudinem ; si amor, in desolationem ; si spes, in præsumptionem ; si lætitia, in dissolutionem ; si ira, in furorem. Frequenter quoque contingit quod dum actui virtuoso immoderate insistitur, fit vitiosus ac perditur ; si autem discrete interrumpatur, salubrius conservatur. Imo, ut ait Isidorus : Quidquid boni sine discretionem feceris, vitium est ; quidquid cum discretionem, virtus.

Verumtamen in his multi religiosi sunt valde defectuosi, qui sæpe alicui operi exteriori tanto insistunt fervore, ut hora divini Officii imminente aut etiam designata vix queant avelli, tamque immoderato affectu prosequuntur opus inceptum, ut a spirituali exercitio ac profectu non mediocriter impediuntur : quemadmodum recitat Cassianus de Fratre qui saxum quoddam volebat forsan dividere aut aliter sibi aptare, atque tam acriter laboravit, quod sudor ejus erupit. Et quum paululum respirasset, mox cœpit rursus percutere. Superveniens autem quidam Patrum, vidit diabolum in specie quadam humana ex opposito Fratris stantem, et

eum ad opus illud importune concitantem. Dixitque Pater ille ad Fratrem : Quid agis, frater? Respondit : Laboramus contra saxum istud durissimum. Et senex : Bene (inquit) dixisti, Laboramus, quia non solus laboras, sed adstat alius quem non vides, et te provocat. Itaque a spiritualibus studiis nunquam longe recedamus, et ante orationem, psalmodiam, celebrationem, confessionem, persolutionem Horarum, mentem recolligamus, devote incipiamus, reverentialiter prosequamur, fervide finiamus. Virtus namque principii insequentibus manet, et a fine denominatio sumitur.

Denique de laude discretionis, Cassianus in secunda collatione abbatis Moysis pulchra multa inducit, inter cetera referens quemadmodum beatissimus pater Antonius, congregatis apud se sanctis senioribus qui causa inquirendæ perfectionis convenerunt ad eum, a vespere usque ad lucem matutinam (per totam videlicet noctem) protraxit collationem, maxime quærens quæ virtus possit monachum a laqueis inimici semper servare illæsum, rectoque tramite ac gressu firmissimo ad perfectionis culmen perducere. Quumque unusquisque quod sibi apparuit responderet, uno dicente jejunia atque vigilias id compendiosius facere, alio solitudinem eremi, tertio opera pietatis, quarto abnegationem temporalium rerum, tandem sanctus respondit Antonius : Omnia quæ dixistis, utilia sunt ad profectum, sed nulum eorum ad perfectionem compendiosius provehit monachum. Sæpe etenim vigiliis et jejuniis acerrime incumbentes, atque mirifice in solitudine permanentes, omnia quoque relinquentes terrena, et pietatis exsequentes opera, repente dejecti sunt, maximumque fervorem et laudabilem vitam fine detestabili concluderunt. Quorum deceptionis exstitit causa, quod non satis a senioribus fuerant instituti, nec vera discretionem ornati. Quæ utrumque vitiosum devitans extremum, via regia facit incedere monachum, ut nec fervoris

A excessu abstinentiæ modum transcendat, nec sub prætextu gubernandi corporis tempore lentescat. Hæc discretio, oculus et lucerna corporis in Evangelio nuncupatur, Christo dicente : Lucerna corporis tui est oculus tuus; si oculus tuus simplex fuerit, totum corpus tuum lucidum erit. Discretio enim cogitationes et facta hominis cuncta discernens, quæ agenda sunt prospicit, judicat et illustrat. Hæc est virtus quæ non solum lucerna corporis, sed et sol ab Apostolo nuncupatur dicente : B Sol non occidat super iracundiam vestram. *Ephes. iv, 26.* Ipsa etiam dicitur gubernatio vitæ nostræ, secundum illud : Quibus non est gubernatio, cadent ut folia. Ipsa quoque consilium nominatur, sine quo (secundum Scripturam) agere nil debemus, quum scriptum sit : Omnia fac cum consilio. Ipsa est et solidus cibus, de quo ait Apostolus : Perfectorum est solidus cibus. Sicque B. Antonii et universorum Patrum sententia definitum est, discretionem esse quæ fixo gradu intrepidum monachum perducit ad perfectionem, ceterasque virtutes conservet illæsas : cum qua ad consummationis fastigia minori fatigueatione conscenditur, et sine qua multi, quamvis plus laborantes, perfectionis culmen nequiverunt ascendere. Omnium namque virtutum genitrix, moderatrix et custos exsistit discretio. Hæc Cassianus.

Hinc etiam abbas Pastor allegavit verba abbatis Ammonis dicentis : Est homo qui toto tempore vitæ suæ portat securim, et non potest dejicere arborem; est autem D alter habens usum incidendi, et in paucis ictibus dejicit arborem. Securim autem dixit esse discretionem. Sic et nunc, heu ! multi religiosi satis magnos exercent labores, et tamen in veris virtutibus minus proficiunt quam aliqui sæculares aut alii quicumque minus exterius laborantes, quoniam indiscrete se habent.

Deinceps, ut abbas Moyses docuit, ad veram discretionem maxime proficit homo per veram humilitatem, qua quis non solum sua facta, sed et cogitationes atque

Matth. vi, 22.

Ephes. iv, 26.

Prov. xi, 14, juxta LXX.

Eccli. xxxii, 24. Hebr. v, 14.

affectiones senioribus et sapientioribus, A præsertim præsentibus, reserat examinanda, nec suo credit iudicio, sed illorum instructioni consentit : per quod etiam dæmonum vincit insidias, et illuminari ac confortari meretur a Spiritu Sancto. Acquiritur quoque discretio per indesinentem orationem a Deo, sed et per studium et lectionem in libris devotis, in quibus de hac re sanctorum et expertissimorum Patrum verba digesta sunt et exempla plurima recitata. Unde et aliqui qui in solitudine vitam duxerunt arctissimam, perisse B leguntur, quoniam suo sensui pertinaciter inhærentes, Patrum iudicio non acquieverunt.

Ephes. v.
15, 16.

Itaque, juxta doctrinam Apostoli, in omni conversatione nostra caute agamus ac

procedamus, non quasi insipientes, indiscreti, præsumptuosi, intemorati, sed quasi veraciter sapientes, Dei auxilio jugiter inhærentes, et omne tempus fructuose atque strenue expendentes; atque præterita tempora negligenter exacta sic recuperemus, ac modis præactis veram ac plenam discretionem adipisci ac possidere infatigabiliter laboremus, simusque custoditi corde, ore et opere, sensu, appetitu, ac ceteris omnibus. Dies enim nunc maxime mali sunt; et tempus nostrum est quasi umbra I *Par. xxxix,*
15.
in terra, nec ulla est mora. Quæ autem restant, imminent et propinquant, æterna sunt. Idcirco non fatigemur, non negligamus; sed tanto in omnibus devotiores, agiliores ferventioresque simus, quanto termino vitæ amplius propinquamus.

SERMO QUINTUS

QUOMODO RELIGIOSI PRÆCIPUE DEUM ORARE, AD IPSUM SUSPIRARE, SPIRITUIQUE SANCTO HABITACULUM PARARE DEBEANT.

IMPLEMINI Spiritu Sancto, loquentes C vobismetipsis in psalmis, et hymnis, et canticis spiritualibus. Ephes. v, 18, 19.

Deus, cujus natura est bonitas, cujus proprietas pietas, cujus munificentia est immensa, qui abundantia pietatis suæ merita supplicum excedit et vota, nequaquam tam multoties ac districte juberet in se sperare, seque ab omnibus invocari, nisi vere paratissimus esset in se sperantibus seque invocantibus subvenire, præsertim quum et ipse, qui essentialiter verus ac veritas est, exauditionem et opem D tam copiose illis promiserit : Petite (inquiens), et accipietis; quærite, et invenietis; pulsate, et aperietur vobis. Omnis enim qui petit, accipit, etc. Hinc in hodierna epistola hortatur Apostolus, « Implemini Spiritu Sancto », quasi in promptu sit nobis Spiritu Sancto non solum tangi, in-

Matth. vii,
7, 8; *Joann.*
xvi, 24.

formari, et in eo proficere, sed etiam ipso repleti. Et vere in promptu, si quod est in nobis fecerimus, nos ipsos præparando ad gratiam plenam. Quod facimus implendo quod scriptum est : Declina a malo, et fac bonum. Duobus etenim modis nos ad gratiam ejusque profectum ac plenitudinem præparamus, videlicet mala vitando, hoc est omnem carnalitatem, negligentiam, dissolutionem, loquacitatem, immoderantiam fugiendo, deinde quæ bona sunt exsequendo, ut ea quæ Ordinis sunt ac legis divinæ, cum omni diligentia observemus. Sic enim habendo nos, ad mirabile gratiæ incrementum nos coaptamus.

Ps. xxxvi,
27.

Porro, quoniam desiderium aperit mentem desiderantis ad susceptionem desiderati, idcirco ad omnipotentem ac superliberalissimum Deum fervide adspiremus, ejus sacra charismata ardentè optemus,

pro ipsorum affluentia ipsius misericordiam totis deprecemur præcordiis. Et certe libenter et exuberanter exaudiet nos benignissimus Deus, si juxta hodiernæ documenta epistolæ, in omnibus caute tenamus, tempusque redimamus, nec vino inebriemur : id est, sollicitè et ferventer gradiamur ad patriam claritatis æternæ, faciendo omne quod possumus bonum, et tam fructuose tempus quod restat explendo, ut in eo etiam præteritos dies recuperemus; nec in cibo excedamus ac potu, vel ante tempus debitum seu extra illud aliquid cibi et potus accipiendo, nec diutius ad mensam sedendo, neque superflue nos replendo, nec delicata quærendo.

Nempe quam detestabile sit extra tempus aliquid horum sine spiritualis patris consensu accipere, constat ex eo quod abbas Serapion retulit de se ipso, quemadmodum quum adhuc adolescens esset, et ignorante patre suo S. Theona, quotidie unum paximacem, videlicet parvum panem, comederet; tandem propriam prodidit culpam, moxque fumus fœtidissimus atque

Cassianus.

Insuper, quam vitiosum sit cibo et potu se immoderate replere, innotescit ex eo quod abbas Moyses in primo Collationum libro refert de quodam fratre Benjamin. Qui in eremo habitans, præter aliorum consuetudinem biduanas jejunavit, videlicet secundo die nil accipiens cibi, quatenus tertio die, duorum dierum præfixam quantitatem, videlicet quatuor paximaces, simul manducans, se saturaret. Qui tandem hujus peccati demerito a Deo relictus, ad sæculum est reversus.

Si ergo tanta exstitit culpa in solo pane sicco excedere, extra horam edendo aut se immoderate replendo, quale peccatum esse censendum est omni die per immoderantiam se replere, aut extra tempus cibum aut potum delicatum absque licentia capere, potissimum quum, teste beatissimo Benedicto, nihil tam fugiendum sit mo-

nacho quemadmodum crapula? Infinitam habemus rationem humiliandi et despiciendi nos ipsos, si rite perpendimus quoniam olim sancti Patres multo et quasi incomparabiliter magis temperate et parce ac sobrie sumpserunt siccum panem et frigidam aquam, quam nos pauperrimi, ingentia carnum aut piscium corpora et pocula pretiosa. Humilitas ergo, pietas, patientia, mansuetudo, obedientia, caritas, zelus justitiæ, suppleat in nobis quod de abstinentia nobis deest.

B Præterea, quoniam Salvatore testante, Ex *Matth. xii,* abundantia cordis os loquitur, rite adjun- ^{34.}xit Apostolus verbis præactis quibus dixit, « Implemini Spiritu Sancto », verba ista *Ephes. v,* sequentia : « loquentes vobismetipsis in ^{18, 19.}psalmis, et hymnis, et canticis spiritualibus ». Quemadmodum ergo de rebus spiritualibus incessanter conferre, non intermiscendo verba inania, et de sacra Scriptura humiliter loqui, probabile signum est gratiosæ ac copiosæ præsentiae Spiritus Sancti; sic de vanis et frivolis loqui, cujus rei indicium esse videtur, nisi miserimæ ac vacuæ mentis, præsertim talibus immorando ac delectando? Porro verba detractoria, susurratoria, contumeliosa, discordiæ seminata, mendosa, pungitiva proferre, cujus inhabitationis est signum, nisi diaboli? Quæ quum ita se habeant, quid est quod convenientibus nobis in unum, jam non est dominica verba proferre, de pertinentibus ad Dei honorem ac animarum salutem conferre, mutuo ad meliora hortari, et ex sacris collationibus inflammari, compungi, doceri, sed fabulationibus stultis, dissolutionibus puerilibus risibusque vacare, et sic pretiosissimum tempus expendere ac damnabiliter perdere, et lacerata memoria menteque frigida ad divina accedere? Recordemur quod Pater quidam dixit coram magno et sancto Antonio de Fratribus qui in via contulerant nunc de sacra Scriptura, nunc de verbis Patrum, nunc de suarum operibus manuum : Boni (inquiens) sunt, sed habitatio eorum janua caret; quicumque vult, intrat stabu-

lum solvitque asinum. Si hoc dixit de Fratribus qui tamen de illicitis non fuerant collocti, quid de nobis dicendum est, qui non solum venialiter illicita verba, sed et ex suo genere quoque mortalia crebro, Deum obliti et ejus judicium non verentes, proferre audemus, ut sunt verba oblocutoria, susurratoria, discordiæ seminata, contumeliosa, mendosa? Nunc ergo de cetero Deum habentes præ oculis, non nisi ædificatoria, salubria et divina loquamur.

Ephes. v, 20. Atque, ut consequenter monet Apostolus, gratias Deo Patri in nomine Filii ejus Jesu Christi agamus pro universis beneficiis tam nobis quam aliis desuper distributis; et ex caritate et latria ac zelo justitiæ hoc agamus, cum omni cordis affectu inæstimabili bonitati, caritati, misericordiæ ac munificentiae Dei nostri sæpissime regratiantes. Sicque de proprio imperfecto et de nostris peccatis, de multiplici quoque ruina Ecclesiæ contristemur, ac Deum pro subventionem et affluentiam gratiæ deprecemur, ut nihilo minus de omni pietate et gratia nobis aliisque collatis, Deo humillime ac frequenter grates agamus, ei omne bonum attribuendo, et de omni beneficio suo ipsum toto corde laudando, nec verbis tantum, sed operibus quoque

A ei pro posse vicem ac honorificentiam tribuendo, ne dicat de nobis : Populus hic labiis me honorat; cor autem eorum longe est a me. De omni igitur bono quod fieri cernimus aut audimus, omnium fonti bonorum regramur ex animo.

Postremo, juxta apostolica documenta, subjecti invicem simus in timore Dei casto ac filiali : et hoc, ex obedientiæ debito, aut certe ex condecencia et supererogatione caritatis ac humilitatis. Superiores equidem per caritatem et humilitatem sponte se subdunt inferioribus, salva justitiæ disciplina; inferiores autem superioribus, ex obedientiæ exigentia. Unde ait Salvator : Qui major est vestrum, sit vester minister. Ceteris autem ait Apostolus : Honore invicem prævenientes; et, Per caritatem servite invicem. Ecce omnia ista cunctis Christifidelibus scripta sunt et injuncta. Quanto magis religiosos oportet ea sublimiter adimplere, atque evulsa omni superbia, in vera, sancta, profunda ac stabili humilitate pariter conversari, et in Dei timore persistere, ne quis alium scandalizet, gravet, perturbet, et Christum in suis membris trucidet? Sed omnes mutuo ædificatorii, pacifici caritativique simus, ad laudem et gloriam Omnipotentis. Amen.

SERMO SEXTUS

DE VARIIS NUPTIIS, ET IMPEDIMENTIS PERTINGENDI AD NUPTIAS SPIRITUALES
PERFECTIONEMQUE MONASTICAM.

SIMILE est regnum cælorum homini regi qui fecit nuptias filio suo. *Matth. xxii, 2.*

Sunt nuptiæ carnales, sunt et spirituales. Et nuptiæ spirituales sunt multæ, videlicet : personales, quæ sunt unio Verbi æterni cum natura humana in Christo; item sacramentales, quæ sunt conjunctio

D Christi atque Ecclesiæ. Sunt et nuptiæ internes et gratiæ, utpote unio Christi cum anima fidei per fidem, caritatem et gratiam. Sunt etiam nuptiæ supercœlestes et gloriæ, quæ sunt beatifica unio mentis creatæ cum Deo : ad quas præfatæ nuptiæ ordinantur.

Nuptias personales fecit Deus Pater Uni-

genito suo in utero Virginis, conjungendo ei naturam humanam in unitate personæ. Ad has nuptias sumus vocati, ut eas factas esse vere credamus et confiteamur, atque pro tam incomprehensibili caritate, dignatione ac munificentia totius supergloriosissimæ Trinitatis, et potissimum Verbi æterni circa nostram naturam, superaltissimæ Trinitati totis viribus regratiemur. In iis nuptiis, unigenitus Filius, tanquam amosissimus sponsus, naturam humanam quam assumpsit, intime ac propinquissime sibi conjunxit, adstrinxit, amplexus est, omnique dono gratiæ ac lumine gloriæ, omni Spiritus Sancti charismate incomparabiliter adornavit, fecundavit, implevit, quia non decuit Unigenitum Dei humanam naturam nisi omni dono supernaturali præfato venustissime decoratam et pulchrificatam assumere, non quod adornatio illa gratiosa ac gloriosa hypostaticam unionem aut assumptionem præcesserit tempore, imo eodem instanti utraque facta est.

Præterea, nuptiæ sacramentales et nuptiæ internes se habent ut totum et pars : ideo ad utrasque sumus vocati, ut simus per fidem et caritatem membra Ecclesiæ, et per eandem fidem et caritatem sint animæ nostræ Christi sponsæ. Sed sicut in Evangelio tangitur, diversi diversis peccatis impediuntur ab accessu ad nuptias istas, et per consequens ab adeptione supercœlestium nuptiarum, ad quas non nisi per nuptias Ecclesiæ militantis pertingitur. Vitia autem ab his nuptiis impediunt, sunt, ut Evangelium tangit, duritia, obstinatio, indocilitas cordis, immansio proprii sensus, aspernatio obediendi : et his vitiis involuti, designantur per eos qui noluerunt venire. Tales sunt qui correpti et castigati non emendantur, sed murmurando, indignando seque excusando, aut aliis modis, fiunt pejores, similes obstinatissimis filiis Israel, de quibus ad Ezechielem loquitur Deus : Filii indomabili corde sunt, et attrita fronte; et rursus, Fili hominis, mitto te ad gentem

Ezech. II,
4; III, 7.
Ibid. II, 3;
XXXIII, 34.

A exasperatricem, filios Israel, qui audiunt sermones meos ex te, et non faciunt eos.

Deinde in evangelio hodierno, de aliquibus dicitur quod neglexerunt venire. Per quos significantur negligentes et pigri religiosi, qui opus Dei faciunt irreverenter, indevote, insipide, adspirantes ad finem, mente vagi, oculis incustoditi, graves et somnolenti. Qui multiplex damnum incurrunt, quia et in præsentī tædiosum est eis spiritualibus exercitiis immorari, sicque plurimum laborantes, parum aut nihil apud Deum merentur; imo potius damnationem sibi accumulunt, quum scriptum sit : Maledictus qui facit opus Dei fraudulenter; itemque, Quia tepidus es, incipiam te evomere ex ore meo. Qui autem custoditi sunt cordis, spirituque ferventes, opus Dei delectabiliter agunt, et omne tempus quod in divinis expendunt, eis breve videtur, imo vix moras percipiunt. Etiam si matutinale officium per quatuor aut quinque horas protrahatur, apparet eis quasi momentum; psalmodia eis dulcissime sapit; diuturnitate orationum ac meditationum non affliguntur, sed reficiuntur, et mira in sanctis actibus, qui indevotis laboriosi videntur, suavitate pascuntur, cum Psalmista fatentes : Exultabunt labia mea quum cantavero tibi, et anima mea quam redemisti. Hi itaque aliis multo minus laborantes, multo plus de essentiali præmio consequuntur, quoniam promptiori et ferventiori affectu Deo servire noscuntur. Assuescamus ergo nos ipsos compescere, pravas consuetudines extirpare, dissolutiones vitare, consolatiunculas viles contemnere, exteriores reprimere sensus; in cibo, potu, somno et omni re exteriori nequaquam quærere voluptates, nos ipsos quotidie examinare diligentissime, disciplinare discrete, componere mores, et mentem assidue ad Deum erigere.

Insuper in evangelio fertur quod quidam abierunt in villam suam. Per quos exprimuntur ambitiosi, honoris et gloriæ cupidi, quos delectat præesse, præcipere, judicareque alios, quum non sufficiant re-

Jer. XLVIII,
10.
Apoc. III, 16.

Ps. LXX, 23.

gere semetipsos, in quibus sola superbia destruit omnia. De aliis quoque in evangelio isto asseritur quod abierunt ad negotiationem. Per quos notantur avari, quos sequuntur curiosi et lauti religiosi, necessariis non contenti, neque pensantes ad quantam victus ac vestitus tenuitatem sint obligati. De ceteris in evangelio legitur quod servos domini tenuerunt, et contumelia affectos interfecerunt. Per quos designantur ingrati et persecutores superiorum suorum. De quibus dicit Amos :

Amos v, 10.

Odio habuerunt corripientem, et loquentem perfecte abominati sunt. Tales sunt qui superioribus suis detrahare non verentur, qui eos a quibus corripiuntur et accusantur, gravius reaccusare nituntur. In quibus nulla est lux sapientiæ salutaris, sed tenebræ et caligo involvens.

Emendemus nos igitur, atque ab universis his vitiis funditus expurgemus, præsertim ab his ad quæ vel ex usu, aut ex ingenta dispositione proniores consistimus, sicut ex collatione abbatis Serapionis recitat Cassianus : Ita nobis adversus vitia arripienda sunt prælia, ut unusquisque vitium quo maxime infestatur explorans, adversus illud arripiat principale certamen : omnem curam mentis ac sollicitudinem circa illius observationem et impugnationem defigens, adversus illud quotidiana jejuniorum dirigens spicula, contra illud cunctis momentis suspiria cordis crebraque gemituum tela contorqueus; adversus illud vigiliarum labores ac meditationes sui cordis impendens, indesinenter quoque orationum fletus ad Dominum dirigens, et vitii sui extinctionem ab illo specialissime ac jugiter poscens, sciens se suis viribus prævalere non posse. Superato igitur vitio uno fortiori in se,

A rursus ad aliud quo post illud gravius impugnatur expugnandum, se simili modo et per eadem arma convertat : sicque fortioribus suis peccatis prius devictis, celeriore contra alia obtinebit triumphum, quia et mens victoriarum suarum processu fit fortior. Nec putandum quod mens contra unum vitium sic specialiter dimicans, ab aliis vitiis inopinato ictu possit facilius sauciari. Impossibile namque est mentem contra unum vitium sollicitè præliantem, et desiderio puritatis internæ intentionem suam contra illud armantem, adversus cetera quoque peccata generalem quemdam horrorem atque custodiam similem non habere, quia nec de una qualibet passione aut culpa potest quis emundari, si aliorum contagio vitiorum faciat se auxilio gratiæ Dei indignum. Hæc Cassianus.

Postremo, quia tam misericordissime, tam amore atque dulcissime agit Deus majestatis immensæ nobiscum, ut animarum nostrarum sponsus esse dignetur, imo et jubeat nostras sibi animas desponsari, C adspiremus ad gratiosum, purum et fervidum ipsius amplexum in vita præsentī, ut per amplexum hunc incompletum ad plenum et æternalem pertingamus ipsius amplexum fruitivum, gloriosum, securum. Hic autem amplexus in vita hac, est sanctæ caritatis affectus ad Deum, ardens desiderium ejus, unio amorosa. Nec nos ita cœlestem amplectimur Sponsum, nisi ipse gratiose præveniat nos, et nostras animas primitus amplexetur, eas ad se afficiendo, D sibi alliciendo, in se inflammando, rapiendo aut absorbendo. Idcirco in caritate, quæ vestis est nuptialis, semper conemur proficere, ad laudem et gloriam bonitatis divinæ, infinitæ et adorandæ. Amen.

DOMINICA XXI POST TRINITATEM

ENARRATIO IN EPISTOLAM

CONFORTAMINI IN DOMINO, ETC. Ephes. VI, 10-17.

AD spiritualement confortationem et armaturam internam contra omnes animarum nostrarum hostes hortatur nos gloriosus Apostolus in presenti epistola, dicens : *Confortamini in Domino*, id est, robur gratiæ ac virtutum a Deo adipisci ac conservare studete, atque ex consideratione divinæ pietatis ac omnipotentiae roboretur spes vestra in Creatore, ut contra impugnationes dæmonum, carnis ac mundi viriliter compugnetis, et in bonis operibus perseveretis ac proficiatis. *Et in potentia virtutis ejus*. Istud est quasi expositio particulæ præcedentis, quia potentia virtutis Dei non est nisi omnipotens Deus. Itaque, « in potentia virtutis ejus », id est in potenti potestate ipsius, innitendo semper divinæ potentiæ, non propriis viribus, juxta illud Isaïæ : Quis ambulat in tenebris, et non est lumen ei ? Speret in nomine Domini, et innitatur super Deum suum. Potest quoque per potentiam virtutis Dei intelligi virtus infusa nobis a Spiritu Sancto, quæ formaliter nos confortat; Deus vero effective nos roborat.

Induite vos armaturam Dei, id est, virtutibus interiores vires animæ vestræ vestite ac roborate, videlicet : intellectum fide, sapientia ac prudentia; voluntatem spe, caritate, justitia; appetitum sensitivum temperantia, fortitudine ceterisque virtutibus moralibus. Hæc sunt spiritualia arma a Deo fabricata, data, infusa, quibus contra vitiorum ac dæmonum acies corroboratur atque protegitur anima nostra. Id-

eo subditur : *ut possitis stare adversus insidias diaboli*, id est occultis machinationibus suggestionibusque diaboli prævalere : nam et Satanase se crebro transfiguravit in angelum lucis, sub specie boni mala proponens.

Quoniam non est nobis colluctatio principalis aut sola adversus carnem et sanguinem, id est homines carnales ac fragiles, seu vitia carnis. Nempe per carnem et sanguinem Scriptura significat hominem, juxta illud : Caro et sanguis non revelavit tibi. Verumtamen grave bellum habemus contra propriam carnem et concupiscentias ejus, et contra homines carnales, qui vel adversa infligunt, vel ad vitia trahere moliantur. Bellum vero quod contra invisibiles hostes habemus, periculosissimum acerrimumque consistit. De quo sequitur : *sed adversus principes et potestates*, id est angelos apostatas seu dæmones, qui ante lapsum suum fuerunt de ordinibus Principatum et Potestatum. De singulis quippe angelorum ordinibus aliqui cecidisse creduntur, qui universi jam per principatus ac potestates signantur : ita quod nomine principatum exprimuntur dæmones inferiores; et nomine potestatum, superiores, quibus inferiores obediunt, homines impugnando. Est enim in dæmonibus prælatio quædam : nam et omnes concordantes sunt in desiderio nocendi hominibus. *Adversus mundi rectores*, id est contra prædictos invisibiles hostes, mundanorum hominum directores ac principes. Homines

enim iniqui dæmonum obediunt voluntati, et ab ipsis captivi tenentur, id est vinculis impietatis adstricti, ac undique circumferuntur sicut servi a dominis suis. Unde Apostolus se ipsum quasi exponens, adjecit : *tenebrarum harum*, id est hominum qui ignorantiae ac vitiorum tenebris excæcantur. Qui mundi nomine in Scripturis multoties designantur, sicut apud

Joann. i, 10. Joannem : Mundus eum non cognovit; et

I Joann. v, 19. alibi, Mundus in maligno positus est. Hinc

Ephes. v, 8. Fuistis aliquando tenebræ. *Contra spiritualia nequitiae*, id est dæmonum agmina nequitiis plena, habitantia in cœlestibus, id est in aere caliginoso, in quo usque ad diem judicii multi dæmonum volitant ac morantur. Aer autem frequenter cœlum vocatur. Unde volucres cœli dicuntur, quia in aere seu in cœlo aerio volare cernuntur. Propter quod dæmones designantur per volucres cœli, ut quum ait Salvator : *Semen cecidit secus viam, et volucres cœli comederunt illud.*

Luc. viii, 5.

Propterea, id est, quia tam arduum prælium imminet vobis, *accipite armaturam Dei*, id est virtutes et dona Spiritus Sancti, eorumque opera, quibus vitia expugnantur et dæmones superantur, *ut possitis resistere* diabolo et peccatis (diabolus namque tanquam leo rugiens circuit, quærens quem devoret), *in die malo*, id est tempore tentationis et adversitatis, *et in omnibus*, tam prosperis quam adversis, *perfecti stare* adversus ruinam peccati, ut nec prospera vos extollant, neque adversa dejiciant, sed regia semper via incedatis, *quatenus omnia cooperentur vobis in bonum.*

Rom. viii, 28.

State ergo per virtutes ad Deum erecti et fixi, *succincti* cingulo castitatis *lumbos vestros*, in quibus viget luxuria, id est, carnis concupiscentias refrenate, continenter vivendo, quemadmodum ait Salvator : *Sint lumbi vestri præcincti.* Hos lumbos præcinxit beatus Job : *Pepigi* (inquiens) *foedus cum oculis meis*, ne cogitarem quidem de virgine. Sic ergo accingite lumbos *in veritate*, id est veraciter coram

Luc. xii, 35. Job xxxi, 1.

Deo, non simulatorie coram hominibus, sicut hypocritæ. *Et induiti lorica justitiæ*, id est, virtute justitiæ corda vestra munite, sicut corpus per lorica contra vulnera tegitur. *Et calceati pedes*, id est, pedes corporales, et etiam spirituales, videlicet animi affectiones, habete expeditos, *in præparatione Evangelii pacis*, id est ad hoc ut sitis parati annuntiare seu prædicare ac adimplere evangelicæ legis doctrinam, in qua pacificatio nostra cum Deo per Christum facta describitur, et per cujus observantiam nunc pacem pectoris ac in futuro pacem æternitatis consequimur, juxta illud Psalmistæ : *Pax multa diligentibus legem tuam.*

Ps. cxviii, 165.

In omnibus sumentes scutum fidei, id est, fidem catholicam pro scuto mentis arripite, virtutem et actum fidei suggestionibus dæmonum opposcentes, videlicet considerationem passionis Christi, suppliciorum inferni, gaudiorum cœlestium et terribilium Dei judiciorum, quæ omnia cadunt sub fide : et eorum diligenti consideratione omnia tentamenta vincuntur. Ideo subditur : *in quo fidei scuto possitis omnia tela nequissimi ignea exstinguere*, id est universas tentationes diaboli acres ac fervidas superare. Hinc prima Petri dicitur : *Adversarius vester diabolus circumcui*; cui resistite fortes in fide. *Et galeam salutis assumite*, id est, spem futuræ felicitatis seu caritatem mentibus vestris superponite, ut contra præsentia blandimenta, spe futurorum præmiorum atque divino amore armemini; *et gladium spiritus, quod est verbum Dei*, id est, ensem animæ qui a Spiritu Sancto confertur apprehendite, qui est sermo sacræ Scripturæ, penetrans intima animæ, vitia resecans, atque a mundo animam dividens, sicut gladius materialis penetrat corpus ac dividit illud. De quo gladio ait Salvator : *Non veni pacem mittere in terram, sed gladium.* Et subdit ibidem : *Veni enim separare hominem a patre suo.* De quo etiam gladio Psalmista loquitur Christo : *Accingere gladio tuo super femur tuum, potentissime.*

I Petr. v, 8, 9.

Matth. x, 34.

Ibid. 35.

Ps. xlii, 4.

SERMO PRIMUS

DE FORTITUDINE ET HIS QUÆ HOMINEM IN DEO CONFORTANT, ET QUALITER
SIT TENTATIONIBUS RESISTENDUM.

CONFORTARE, et esto robustus valde; *A* noli timere, quoniam tecum est Dominus Deus tuus in omnibus ad quaecumque perrexeris. Josue 1, 7, 9.

Ista ad litteram sunt verba Dei omnipotentis atque piissimi ad Josue ducem ac principem Israeliticæ plebis. Spiritualiter vero loquitur Deus verba ista ad quemlibet Christianum, cui præcipit ut virtutibus confortetur, ita ut Deo obediat, dæmonibus reluctetur, vitiisque prævaleat, et dominetur animo suo, sensualitatem quoque edomet ac gubernet.

Denique confortatione ista vehementissime indigemus. Primo, ex parte nostri, quoniam defectuosi, infirmi et fragiles sumus, in tantum ut Christus dicat : Sine me nihil potestis facere. Atque Apostolus : *Joann.* xv, 5. Non sumus (inquit) sufficientes cogitare aliquid a nobis quasi ex nobis. Hinc orat *II Cor.* iii, 5. Psalmista : Miserere mei, Domine, quoniam *Ps.* vi, 3. infirmus sum; et rursus : Deus, in adiutorium meum intende; Domine, ad adjuvandum me festina. Itaque fatuus est qui de viribus suis præsumit. — Secundo, ex parte adversariorum nostrorum. Nam contra invisibiles hostes continuum bellum habemus, videlicet dæmones, a quibus videmur et quos non videmus. Qui quum incorporales exsistant, non fatigantur nos impugnando, suntque nobis nimium fortiores, callidiores et ineffabiliter magis experti. Hinc Christus in Evangelio per *Luc.* xi, 21. fortem armatum designat diabolum. In Job quoque de ipso asseritur : Non est potestas super terram quæ comparetur ei. — Tercio, ex parte periculi. Tanta equidem est *Job* xli, 24. multitudo ac magnitudo periculorum nobis certissime imminentium, nisi confor-

tati prævaleamus contra hostes nostræ salutis, quod ea exprimere non valemus, imo nec comprehendere possumus. Si enim a dæmonibus superamur, animæ nostræ mox letaliter vulnerantur, donis gratiæ ac virtutum privamur, æternam beatitudinem perdimus, infernalem calamitatem incurrimus, dæmonum servi, membra filiique efficimur : sicque a summo et incommutabili, ab infinito et incomparabili bono Domino Deo nostro avertimur, separamur, relinquimur. Ecce quanta pericula. —

B Quarto, ex parte propriæ infectionis seu fomitis, quia non solum impotentes sumus ad bona, sed et proni valde ad mala. Imo fortes atque multiplices habemus intra nos inclinationes, motiones ac inflammationes ad vitia. Siquidem concupiscentiæ carnis acriter movent, voluntas quoque ad propria commoda vult reflecti et libertate ingenita uti; et breviter, quatuor vulneribus ex originali peccato secutis taliter læsi sumus, videlicet malitia in voluntate, ignorantia in intellectu, infirmitate in vi irascibili, concupiscentia in concupiscibili, quod ab intra vehementer movemur ad mala, et grandi robore adiutorioque egemus, alioqui vincimur ac perimus. — Quinto, ex parte finis ad quem ordinatur ac tendit tota vita et pugna nostra præacta. Hic etenim finis est supernaturalis felicitas, utpote clara per speciem visio Deitatis: ad quam non nisi per supernaturalia media ac adiutoria, ut per virtutes infusas et dona Spiritus Sancti, valemus pertingere. Quum itaque tot, tales ac tantæ sint causæ propter quas confortari indigemus in Domino, debemus cum omni diligentia et fervore pro ista confortatione orare ac laborare.

Jam quoque tangendæ sunt considera-
 tiones quæ hominem in Deo magis con-
 fortant. Prima est consideratio infinitæ bo-
 nitatis Dei altissimi. Quum enim bonum
 sit communicativum sui, certum est quod
 Deus naturaliter ac incircumscribibiliter
 bonus, vere paratissimus sit succurrere in-
 vocantibus eum. Ideo in Threnis scriptum
 est : Bonus est Dominus sperantibus in
 se, animæ quærenti illum.

Thren. III,
25.

Secunda est consideratio infinitæ mi-
 sericordiæ Dei, quam qui rite perpendit,
 spem concipit et confortatur in Domino,
 certus quod Deus invocantibus se non
 desit, dummodo cordialiter et instanter
 oretur. Hinc in Ecclesiastico habetur :
 Respiciite, filii, et scitote quia nullus spe-
 ravit in Domino, et confusus est. Quis
 enim permansit in mandatis ejus, et de-
 relictus est? aut quis invocavit illum, et
 despexit eum? Unde Propheta loquitur
 Deo : Sperent in te qui noverunt nomen
 tuum, quoniam non dereliquisti quærentes
 te, Domine.

Eccli. II, 11,
12.

Ps. IX, 11.

Tertia est consideratio caritatis Dei ad
 nos, quam nec satis mirari, nec plene
 concipere, nec digne laudare valemus. Non-
 ne, sicut in Joanne legitur, sic Deus di-
 lexit mundum, ut Filium suum unigeni-
 tum daret, ut omnis qui credit in ipsum
 non pereat, sed habeat vitam æternam?
 Nonne, Paulo testante, proprio Filio non
 pepercit, sed pro omnibus nobis tradidit
 illum? Hinc in prima sua Canonica ait
 Joannes : Videte qualem caritatem dedit
 nobis Deus Pater, ut filii Dei nominemur
 et simus. Denique unigenitus Filius Patris
 æterni, nonne ex caritate sua ad nos no-
 stram assumpsit naturam, et Deus noster
 factus est frater noster, in mundo visus et
 cum hominibus conversatus, et sanguinem
 suum fudit pro nobis? Sed et Spiritus
 Sanctus nonne se ipsum infudit ac dedit
 hominibus? Ecce quantum tota superbea-
 tissima Trinitas nos dilexit. Quis ergo pos-
 sit ambigere, ista perpendens, quin pro-
 nissima sit subvenire invocantibus ejus
 auxilium?

Joann. III,
16.

Rom. VIII,
32.

I Joann. III,
1.

Baruch III,
38.

Quarta est consideratio veritatis divinæ,
 quoniam Deus toties in Scripturis promi-
 sit adjutorium suum sperantibus in se et
 invocantibus eum, imo toties exhortatus
 est ut speremus in eo invocemusque eum,
 quod nihil tam fatuum ac perversum quam
 dubitare aut desperare de adjutorio Dei et
 gratia ac misericordia ejus, dummodo fi-
 ducialiter invocetur. Ipse etenim per Pro-
 phetam locutus est : Invoca me in die
 tribulationis, eruam te, et honorificabis
 me; item per Isaiam, Ego Dominus, super
 quo non confundentur omnes qui exspe-
 ctant illum.

Ps. XLIX, 15.

Is. XLIX, 23.

Quinta est consideratio summæ sapien-
 tiæ Dei. Ipse etenim omnia intuetur, et
 infirmitatem ac indigentiam nostram agno-
 scit, crudelitatemque, calliditatem atque
 ferociam hostium nostræ salutis, quibus
 nil minus sufficit de nobis quam æterna-
 lis damnatio nostra. Quum itaque Deus,
 cujus sapientiæ non est finis aut nume-
 rus, omnia ista clarissime intueatur, du-
 bitari non potest quin benignissime velit
 succurrere, si eum deprecati fuerimus,
 nec ejus misericordia fecerimus nos in-
 dignos per desperationem, diffidentiam,
 hæitationem, præsumptionem vitiosam-
 que vitam. Hinc fertur in Psalmo : Quo-
 modo miseretur pater filiorum, misertus
 est Dominus timentibus se, quoniam ipse
 cognovit figmentum nostrum; recordatus
 est quoniam pulvis sumus : homo sicut
 fœnum dies ejus, tanquam flos agri sic
 efflorescit. In Ecclesiastico quoque legi-
 tur : Oculi Domini multo plus lucidiores
 super solem, circumspicientes omnes vias
 hominum.

Ps. CXLVI, 5.

Ps. CII, 13-
15.

Eccli. XXIII,
28.

Sexta est consideratio omnipotentiae Dei,
 qui uno imperio omnes nostræ inimicos
 salutis potest dejicere. — Aliæ multæ con-
 siderationes ex parte Dei ad idem possent
 induci, videlicet : consideratio suæ fide-
 litatis ad suos ministros; et item, quoniam
 ipse est creator ac dominus noster, ergo
 nos diligit tanquam opera sua et res suas;
 item, quoniam tanta beneficia nobis etiam
 non rogantibus, sed indignis aut etiam

pessime agentibus est largitus. Et ad hoc A
possent innumerabilia ex Scripturis com-
memorari exempla, videlicet quantam mi-
sericordiam fecit cum David, imo et cum
II *Reg.* xii, 13.
II *Par.* xxxiii, 13.
Luc. vii, 48;
xix, 9; xxiii, 43.
Præterea, interdum debet homo bonus
se ipsum confortare in Domino ex consi-
deratione operum bonorum quæ fecit, et
tribulationum quas pro Deo aut propter
Deum pie sustinuit, non inaniter gloriando
de his, aut suis ea viribus adscribendo,
sed omnia Deo. Sic enim Ezechias rex
virtuosus, quum a rege crudelissimo im-
pugnaretur, confortavit se ipsum in Deo,
dicendo : Memento, Domine, quomodo am-
bulaverim coram te in veritate et in corde
perfecto. Unde in Vitaspatrum de quodam
sancto Fratre narratur, quod quando dæ-
mones eum tentaverunt de præsumptione
et gloria vana, reduxit ad mentem suam
peccata, et dixit : Ubi sunt omnia tua pec-
cata ? Porro quum tentaretur de despera-
tione, dicentibus ad eum dæmonibus, Quia
post omnes istos tuos labores venies in
infernum ; reduxit ad memoriam opera bo-
na quæ fecit, et ait : Modicum obsequium
exhibeo Deo, et spero quod propter hoc
faciet misericordiam mecum. Tandem dæ-
mones victi et veritate compulsi, dixe-
runt : Quid faciemus tibi ? quia si nos te
extollimus, tu te humilias ; si nos te hu-
miliamus, tu te extollis. Sicque confu-
si, fugerunt ab eo.

IV *Reg.* xx,
3.

Postremo confortari debemus in Domi-
no ex consideratione multiplicis adjutorii
nobis ab eo exhibiti : præsertim quod be-
nignissima Genitrix Christi facta est no-
stra mediatrix, mater et advocata ; quod
item angeli sunt nostri custodes, adjutores
ac protectores, deinde Sancti et Sanctæ,
imo tota triumphans Ecclesia.

Deinceps tangendum est qualiter resi-
stere tentationibus debeamus. Primus er-
go et convenientissimus modus resistendi
tentanti diabolo, est caput ejus contere-

re. Caput autem diaboli vocatur superbia.
Quum itaque simus tam fragiles et infir-
mi, ac tantis periculis expositi laqueisque
circumdati, debemus nos in primis pro-
fundissime humiliare, et omnem defectuo-
sitate ac insufficientiam nostram adver-
tere ac fateri, sicque ad Deum adspicere,
et ejus auxilium jugiter invocare : sicque
insuperabiles erimus. Nam sicut superbis
Deus resistit, ita humilibus adsistit. Se-
cundus modus resistendi, est stare in con-
tinuo Dei timore, non in aliqua vana secu-
ritate, quia in medio laqueorum versamur,
et pericula nostra sunt infinita, atque
omnino incerti consistimus quid finaliter
fiet de nobis. Hinc in Ecclesiastico dicitur :
In tentatione Deus timentem se ser-
vabit, et liberabit a malis. Præterea, qua-
liter resistendum sit tentationibus, Deum
invocando, dominicam passionem inspi-
ciendo, in Deo plene sperando, novissima
præmeditando, multisque aliis modis, di-
ctum est in sermonibus circa evangelium
in dominica Quadragesimæ prima. Ideo
brevitati studens, ad illum mitto locum
lectorem.

Studeamus ergo quotidie magis ac ma-
gis confortari in Domino, in caritate et
gratia omnique virtute proficere, spiritu-
alibus armis undique esse armati, et Deum
semper habere præ oculis, atque in omni-
bus custoditi, timorati, solliciti esse co-
ram Altissimo : sicut in Vitaspatrum de
abbate fertur Helladio, quod viginti annis
habitavit in cella sua, et nusquam adspe-
xit ad superiora ipsius, tam custoditus fuit
in mente, tam introversus, tamque eleva-
tus ad Deum ; quemadmodum etiam de
beatissimo Bernardo abbate describitur,
quod tota die equitavit circa fluvium ma-
gnum, et tamen nequaquam advertit : unde
de vespere, aliis qui secum juxta flumen
equitaverant, de fluvio illo loquentibus,
ignoravit de quo flumine loquerentur, et
mirabatur quod dixerunt se circa fluvium
equitasse. Sic quoque legitur de abbatis-
sa Sara, quod multis annis super flumen
quoddam habitans, nunquam inclinavit se

Jacob. iv,
6; *1 Petr.* v,
5.

Eccli.
xxxiii, 1.

ut flumen illud adspiceret. Ecce Sancti A qui per cogitationes vanas ac frivolas un-
 isti quam custoditi fuerunt suis in cordi-
 bus coram Deo. Quid ergo fiet de nobis, dique mentibus evagamur, et absque re-
 sistencia talibus immoramur?

ENARRATIO IN EVANGELIUM

ERAT QUIDAM REGULUS, CUJUS FILIUS INFIRMABATUR, ETC. Joann. IV, 46-53.

HODIERNO in evangelio recitatur unum B
 præclarum Christi miraculum, qua-
 liter juvenem letaliter seu incurabiliter
 per naturam ægotantem curavit. Ait ergo
 evangelista Joannes : *Erat quidam regu-
 lus, cujus filius infirmabatur Capharna-
 um.* Capharnaum fuit metropolis, id est
 principalis urbs, Galilææ; in qua urbe
 habitavit regulus iste cum filio suo leta-
 liter febricitante. Denique, secundum Be-
 dam, vocatur regulus diminutive, quasi
 rex parvus. Chrysostomus vero dicit, quod
 non fuit rex parvus, sed vocetur regulus, C
 quoniam regiæ stirpis fuit. Alii dicunt,
 quod ita vocatur, quia officiiatus * fuit Cæ-
 saris, ad custodiam ac regimen urbis Ca-
 pharnaum deputatus. Sed quidquid horum
 dicatur, constat quod regulus iste fuit ex-
 cellens persona, unus de principalioribus
 terræ.

*Hic quum audisset quia Jesus adveniret
 a Judæa, per Samariam, in Galilæam :* quia
 ut scriptum est alibi, quum Christus con-
 vertisset aquam in vinum in Cana Galilææ,
 paulo post ivit circa Pascha in Jerusalem, D
 quæ fuit metropolis in Judæa. Quumque a
 Jerusalem et Judæa reverteretur, contigit
 quod hic dicitur, scilicet quod regulus iste
*abiit a Capharnaum ad eum, et rogabat eum
 ut descenderet,* id est, ad Capharnaum ve-
 niret, quæ fuit bassius sita quam locus ubi
 regulus iste reperit Christum, *et sanaret
 filium ejus.* Jam enim fama Christi fuerat
 magna propter præcedentia ejus miracula,
 et propter testificationem Joannis Bapti-
 stæ de eo. Unde in Matthæo legitur, quod

abiit fama ejus in totam Syriam, quæ fu-
 erat regnum magnum. Sicque regulus iste
 credidit Jesum posse curare filium suum.
 Verumtamen imperfectam habuit fidem,
 quia non credidit Jesum corpore absen-
 tem, sanitatem posse impendere filio ægro-
 tanti. Nondum enim cognovit Jesum esse
 verum Deum ubique præsentem, et quod
 angeli sancti essent ejus ministri, quorum
 etiam ministerio potuit ægros sanare. Quod
 cognovit venerabilis ille centurio qui di-
 cebat : Domine, non sum dignus ut intres
 sub tectum meum, sed tantum dic verbo,
 et sanabitur puer meus. *Incipiebat enim
 mori.* Hoc interponit Evangelista : primo,
 ad insinuandum cur regulus festinavit tam
 maxime, tamque obnixè rogavit; secundo,
 ad ostendendum magnitudinem hujus mi-
 raculi, quia ejusdem potentiae est mortu-
 um suscitare, et letali infirmitate laboran-
 tem curare.

Dixit ergo Jesus ad eum : Nisi signa, id
 est miracula divinæ potentiae ostensiva, *et
 prodigia,* id est miracula aliquid in lon-
 gum et posterum indicantia, secundum
 Bedam; vel potius miracula signantia di-
 vinam omnipotentiam procul a sensu ex-
 istentem non loco, sed incomprehensi-
 bilitate; *videritis, non creditis* me esse
 omnipotentem Filium Dei, qui corporali-
 ter absens, secundum divinitatem omnia
 impleo, et cuncta ubique facere queo solo
 imperio. Gregorius quærit hic, cur verba
 hæc Christus dixerit regulo, quoniam re-
 gulus credidit, alias filio suo sanitatem a
 Christo non poposcisset. Et respondet,

*Hebr. I, 7;
 Ps. CIII, 4.*

*Matth. VIII,
 8.*

* officialis

*Joann. II, 1
 et seq.*

Ibid. 13.

*Matth. IV,
 24.*

*Jer. XXXII,
 24.*

quod regulus aliquid credidit, scilicet Jesus posse curare ægrum illum; aliquid quoque non credidit, puta quod Jesus corporaliter absens posset hoc facere. Porro, secundum Theophilum, regulus iste interfuit nuptiis in quibus Christus aquam convertit in vinum, ideo credidit filium suum posse a Christo curari. Sed quum nuptiæ illæ fuerint pauperum (nam et vinum defuit ibi), regulus vero iste homo tam potens ac nobilis, non videtur quibusdam probabile quod ipse interfuit nuptiis illis. Nihilo minus miraculum ibi factum potuit percepisse.

Dicit ad eum regulus: Domine, descende priusquam moriatur filius meus. Imperfectio fidei reguli patet, non solum in hoc quod corporalem Christi præsentiam credidit necessariam, sed etiam quia non cogitavit vel credidit quod posset suscitare defunctum. Nempe sic orat, « Descende priusquam moriatur filius meus », quasi putet quod mortuum, etiam descendendo ad eum, suscitare non possit. *Dicit ei Jesus: Vade, filius tuus vivit* vita naturali et convenienti, imo et vita gratiæ, juxta dictum commune, quia quos Christus curavit in corpore, curavit et mente. Itaque eodem momento quo verba hæc protulit Christus, ipse sua divina virtute sanavit reguli filium. *Credidit homo sermoni quem dixit ei Jesus, et ibat ad domum suam.* Jam merito regulus appellatur homo, id est rationabiliter agens, dum credit Christo, et voci ejus obedit, eundo non solum gressibus corporis, sed et mentis profectu, ab imperfecta fide ad perfectam proficiens.

Jam autem eo descendente, servi occurrerunt ei, et nuntiaverunt dicentes, quia

filius ejus viveret, id est, incolumis esset. Tribus de causis ministri isti suo domino occurrerunt: primo, ut bonum nuntium apportando, eum lætificarent quem tristissimum putaverunt, sicque placerent eidem; secundo, ut veritatem rei domino suo insinuantes, eum ab itineris relevarent labore; tertio, secundum Origenem, quoniam filio jam sanato, putabant præsentiam Christi superfluam, quem cum regulo æstimabant venturum. *Interrogavit ergo regulus horam ab eis in qua melius habuerat filius suus.* Hoc quæsit, ut certior fieret de veritate miraculi, atque ut alios roboraret in fide quam jam ipse concepit. *Et dixerunt ei: Quia heri hora septima reliquit eum febris*, ita quod subito ac perfecte fuit sanatus, nullo signo pristinæ infirmitatis apparente aut remanente in eo: quemadmodum socrus Petri febricitans, a Christo curata, statim surrexit et ministravit ad mensam, ut apud Matthæum habetur: quod naturaliter fieri nequit, sed natura reformat paulatim.

Cognovit ergo pater, id est regulus iste, cujus proprium nomen non ponitur hic: nam regulus est nomen officii aut dignitatis, non personæ; *quia illa hora*, scilicet septima, *erat in qua dixit ei Jesus: Filius tuus vivit.* *Et credidit ipse et domus ejus tota*, id est, tam ipse quam omnes sui domestici crediderunt Jesum esse Christum filium Dei. Ex consideratione etenim horæ, noverunt quod Jesus, etiam corporaliter absens, posset supernaturaliter operari atque curare, non qualitercumque, sed excellentissimo modo, utpote solo verbo, nutu atque imperio: quod puræ non competit creaturæ.

Joann. II, 3.

Matth. VIII,
14, 15.

SERMO SECUNDUS

DE FEBRE SPIRITUALI, DEQUE TIMORE LAUDABILI TRANQUILLITATEQUE ANIMI SERVANDA.

A LLEVAT Dominus omnes qui cor-
ruunt, et erigit omnes elisos. Ps.
CXLIV, 14.

Quidquid Christus corporaliter gessit, spiritualem significationem ac intelligentiam habet. Denique per hunc juvenem reguli filium febricitantem, intelligi potest omnis homo in mortali peccato existens. In febricitantibus namque duo considerantur. Primum est frigus, ex quo tremor corporis nascitur : et frigus istud causatur ex hoc quod sanguis recedit de membris. Secundum est calor, quo corpus excessive accenditur dum sanguis ad priora loca revertitur. Omnia ista in omni mortaliter reo spiritualiter inveniuntur. Primo enim in eo est frigus, id est torpor acediæ, quo ad opera virtuosa tam tardus est, quasi per modum glaciei esset constrictus seu animo congelatus. Acedia quippe caritati contrariatur. Unde quemadmodum caritas efficit hominem promptum et agilem ad actus virtutum et ad omnia quæ Deo sunt placita, ita acedia facit miserum hominem ad opera divini honoris ac propriæ salutis tardum et quasi immobilem, secundum quod Salomon loquitur :

Prov. xx, 4. Propter frigus piger arare noluit.

Spiritualis equidem hominis ager est cor ipsius, in quo semina virtutum, videlicet bonæ cogitationes et salubres affectiones verbaque Dei, sunt seminanda, ex quibus virtutes crescunt ac perficiuntur. Hic ager aratur dum interiora animæ revolvuntur ac discutiuntur, ita quod homo diligenter examinat semetipsum qualiter vivit, an divina observet præcepta, et tempus suum fructuose expendat, proximis quoque exemplaris consistat. Sed homo piger seu acediosus, propter frigus

suæ acediæ quo congelatus est, taliter agrum proprii cordis non vult arare, sed manet in suis pigritiis, negligentis et peccatis; atque ut rursus Salomon protestatur, Sicut ostium vertitur in cardine suo, *Prov. xxvi, 14.* sic piger in lectulo suo. Quis est lectulus pigri, nisi sua prava consuetudo et carnalis repausatio, qua labores refugit virtuosos? In hoc lectulo vertitur, quia de una negligentia, carnalitate ac vanitate ruit in aliam, et addit quotidie peccata peccatis, similis porcis qui versantur in cœno, et in suis turpitudinibus delectantur. Hinc in libro Proverbiorum Spiritus Sanctus per Salomonem effatur : Per agrum hominis pigri transivi, et ecce totum operuerunt urticæ et spinæ. Siquidem Deus omnipotens, invariabilis et immensus, qui nec locum mutat neque movetur, transire per res creatas et mentes humanas asseritur, eas considerando, judicando ac remunerando, aut influendo eisdem. Dum ergo Deus sic transit per agrum hominis pigri, hoc est, dum cor ejus considerat, invenit illud urticis ac spinis totaliter coopertum, hoc est variis vitiis passionibusque repletum, ira, impatientia, indignatione, amaritudine, elatione, crudelitate, ac aliis vitiis, tanquam pessimis herbis corruptum.

Præterea, sicut frigus in febricitantibus causatur ex recessu sanguinis a corporis membris, sic præfatum frigus acediæ et omne peccatum mortale generatur in corde dum fervor divinæ dilectionis recedit a voluntate ac ceteris viribus animæ. Ad hanc frigefactionem pestiferam perducitur homo bonus paulatim, dum opera bona agit quotidie magis ac magis remisse, ex quadam arida consuetudine, absque consideratione et reverentia divinæ præ-

Ibid. xxiv, 30, 31.

sentiae, ita quod cordis sui distractionibus tempore orationum ac cultus divini non satis resistit, nec venialia peccata cum diligentia vitat condigna. Nempe quum venialia peccata disponant ad mortalia, dum homo quotidie levis et pronus est in verbis inutilibus, in risu et jocis, in cogitationibus vanis, in incustodia sensuum, in sumptione ciborum ac potuum, certum est quod cito in mortalia labatur peccata. Propter quod in Ecclesiastico scriptum est: Si non in timore Domini tenueris te instanter, cito subvertetur domus tua. Quum enim invisibilibus atrocissimis hostibus undique simus obsessi, eorumque laqueis circumvallati, quomodo poterimus eorum evadere jacula, insidias atque letalia vulnera, nisi in continua fuerimus cordis custodia contra eos? Videmus quod homines qui letales inimicitias cum hominibus habent, ubique pergunt armati; similiter negotiatores dum per loca latronibus raptoribusque infamia gradiuntur, in magna incedunt formidine, custodia ac praeparatione ad resistendum: quanto magis quum contra invisibiles hostes et infernales latrones atque raptores incessabile ac periculosum praelium habeamus, et locus iste quo degimus, illis latronibus ac raptoribus plenus sit, debemus indesinenter esse virtutibus contra illos armati, et animo custoditi, timorati atque solliciti, ne vincamur, spoliemur et morte aeterna trucidemur ab illis? Hinc Salomon loquitur: Beatus homo qui semper est pavidus. Et alibi dicitur: Sapiens in omnibus metuit. Itaque jugiter caveamus ne fervor divini amoris tepescat in nobis, sed in eo quotidie amplius inflammemur, infinitam Dei bonitatem, amabilitatem, dulcedinem, ejusque beneficia ac promissa considerando.

Insuper, sicut in febricitantibus ex frigore sequitur corporis tremor, ita in homine vitioso a divini amoris calore frigefacto est tremor, id est timor multiplex inordinatus, sicut de impiis ait Propheta: Deum non invocaverunt; illic trepidaverunt timore, ubi non erat timor, id est, ubi

A rationabiliter non fuit timendum. Homines enim injusti, carnales, obtenebrati, pro eo quod Deum et ejus offensam atque aeternam damnationem merito super omnia formidarent, timent temporalia damna, corporis afflictiones, privationem temporalis honoris, quum tamen haec omnia saepe expediant animarum saluti. Imo per ista Deus suos electos in praesenti vita exercet, purgat, atque purgatos virtute et gratia implet multiplici, ac deinde gloria aeternali, ut patet in sanctis Job et Tobia.

B In novo quoque Testamento potissime ac evidentissime patuit hoc in parentibus S. Clementis eorumque filiis, deinde in S. Eustachio ejusque contorali ac filiis eorumdem. Ideo ista non sunt immoderate timenda, nec absolute refugienda, sed divinae dispositioni ac pietati debemus committere, an ista nobis eveniant. Verum hoc omnino a Deo petendum est, ut si ista nobis evenerint, ipse in eis patientiam nobis praestare, et ad nostram salutem ea ordinare dignetur. Unde quum sanctus David a proprio filio pulsus esset ex regno, non inordinate contristabatur, sed dixit: Si dixerit Deus, Mihi non places (id est, mihi non placet ut amplius sis rex), praesto sum; quod bonum est in oculis suis, faciat. Sic quoque beatissimus Christi confessor, praesul ac consanguineus, gloriosus sanctissimusque Servatius, quum a perversissimis et ingratis Tungrensibus expelleretur tam irreverenter ut canis, mente tranquilla ac placido vultu exivit, nec de sua inhonoratione atque injuria, sed de illorum dolebat transgressione gravissima. Hinc itaque in adversis patientes et imperturbati esse debemus.

Præterea, secundum quod cernitur, in febricitantibus est calor immoderatus; sic quoque in peccatoribus, dum a divinae dilectionis frigescent calore, accenditur amor carnalis ac mundialis, quo se ipsos ac alios carnaliter amant, propria commoda et oblectamenta quaerendo et amplectendo, divitias et honores ferventissime cupiendo, et breviter, temporalia atque carnalia

Eccli.
xxvii, 4.

Prov.
xxviii, 14.

Eccli. xviii,
27.

Ps. lxi, 6.

Job i, ii;
Tob. i, ii; ii,
12.

II Reg. xv,
26.

magis quam spiritualia ac æterna amando et exquirendo. Quis religiosorum ac devotorum tam instanter ac fervide pro incremento gratiæ ac virtutum laborat, ut multi sæculares pro temporali opulentia et honore? Ideo dixit Salvator, quod filii hujus sæculi prudentiores sunt filiis lucis in sua generatione. Sed redeamus ad cor, et cogitemus quam breve et momentaneum sit tempus quo in vita hac erimus, comparatione durationis perpetuæ in qua paulo post consistemus: sicque pro animarum nostrarum saluberrima ac perpetua provisione sollicitiores laboriosioresque simus, quam pro corporum horum mortalium protinus putrefiendorum provisione caduca. Imo quidquid Christianus in exterioribus et pro corpori suo necessariis operatur, ad Dei honorem et spiritualem suum profectum debet ordinare, quatenus alimenta et quibus tegatur habendo, vivat ac serviat Domino Deo.

Luc. xvi, 8.

1 Tim. vi, 8.

Refert S. Gregorius, quod in cœnobio suo in Roma fuit quidam monachus valde devotus ac Fratribus universis carissimus. Quem frater suus carnalis, non ex devotione, sed paupertatis necessitate, secutus est; et vixit in cœnobio in habitu sæcu-

lari vane et intimorate, nec recipiebat sed aspernabatur Fratrum exhortationes; verum amore devotissimi fratris sui, ab omnibus æquanimiter portabatur. Tandem pestilentia percussus, ad extrema devenit, et Fratribus lecto ejus adstantibus atque pro ipso orantibus, subito exclamavit: Recedite, recedite, ecce draconi ad devorandum datus sum, sed propter vestram præsentiam me devorare non potest; date locum ut faciat quod facturus est, ne me diutius torqueat. Quare propter vos patior moras? Jam enim me stringit ac opprimit. Cui Fratres responderunt: Quid est hoc quod loqueris, frater? Signum tibi sanctæ crucis imprime. Respondit: Volo me signare, sed nequeo, quoniam a dracone premor. Tunc Fratres in terram prostrati, cœperunt cum lacrimis pro illo ardentius exorare. Tunc paulo post ille melioratus clamavit: Deo gratias, ecce draco cui ad devorandum traditus fui, virtute orationum vestrarum fugatus est; jam pro meis peccatis orate, quia converti toto corde paratus sum. Atque ex illo die vir ille se totaliter emendavit, et continuis infirmitatibus purgabatur, quousque feliciter de sæculo isto migravit.

B

C

SERMO TERTIUS

DE VERA SAPIENTIA, EJUSQUE COMMUNICATIONE IN ALIOS.

MULTITUDO sapientium sanitas est orbis terrarum. Sap. vi, 26.

Juxta Aristotelis documenta, nullus est vere prudens nisi virtuosus, ita quod homines vitiosi non habent veram prudentiam, sed quamdam astutiam. Multo magis nullus reputandus est sapiens, nisi justus ac virtuosus. Propter quod iterum Sapiens ait: In malevolam animam non introibit sapientia. Quod de illa sapientia potissime verum est, quæ est unum de septem donis

Sap. i, 4.

Spiritus Sancti. Sapientia vero naturalis et acquisita atque scholastica, malis potest inesse hominibus. Itaque qui vere ac proprie sapiens est, utpote Deum et ea quæ Dei sunt cum interno sapore cognoscens, caritate Dei et proximorum aliisque virtutibus decoratur: ideoque sapientiam suam modo sibi possibili ac convenienti communicat aliis, ad divinorum notitiam et amorem eos hortando, a vitiis retrahendo, salubriter instruendo. Hinc in Eccle-

Eccli. xli, 17. siastico habetur : Sapientia abscondita et thesaurus invisus, quæ utilitas in utrisque?

Prov. v, 16. Unde et Salomon exhortatur : Deriventur fontes tui foras. Rursusque scriptum est :

Ibid. ix, 12. Fili, si sapiens fueris, tibi et proximis tuis eris. Veraciter ergo dictum est, « Mul-

titudo sapientium sanitas est orbis terrarum » : hoc est, ubi sapientes viri abundant, ceteri quoque a vitiis suis curantur, et illustrantur; et si non omnes, aliqui tamen, præsertim quando qui præsent, sunt sapientes, id est just, illuminati ac spirituales. Idcirco in Proverbiis legitur : B

Prov. xiii, 20. Qui cum sapientibus graditur, sapiens erit. Nam etsi sapiens nullum verbum loquatur, sua tamen exemplari conversatione ac fervida oratione aliis prodest.

Denique quod hæc ita se habeant, ex evangelio ostenditur hodierno. Nam regulus iste cujus filius usque ad mortem languebat, pro ejus curatione Christum accessit atque ardentem precatus est. Per regulum intelligitur omnis sapiens homo, præsertim qui spiritualiter præsidet populo. Unusquisque ergo qui aliis præest, si C viderit aliquem ex sibi commissis aliquo vitio infirmari in anima, puta superbia, impatientia, invidia, incontinentia aut simili culpa, debet pro ejus curatione interna ac salute perpetua valde sollicitus esse, Christumque mente accedere, et pro illius emendatione ferventer ac indesinenter orare. Si autem sentit se non protinus exaudiri, non cesset, sed ardentius clamet ad Christum : Domine, descende per gratiæ infusionem, per misericordissimam visitationem, ad filium meum tam ægrum, pri- D usquam moriatur hic filius, hoc est, antequam in culpa mortali tollatur de vita præsent, vel antequam moriatur in anima, consentiendo tentationi aut motibus passionum, et antequam perducatur eas ad actum, potissimum priusquam pravæ consuetudinis mole prematur.

Præterea, quilibet sapiens, comparatione insipientis ac peccatoris, rite pater vocatur. Quilibet ergo Christianus dono sapientiæ illustratus ac Deum formidans et

diligens, quum aliquem proximorum sibi notum viderit aliquo vitio victum, sollicitus esse debet pro eo, et oratione, exhortatione, informatione et correptione pro illius reparatione, prout caritas requirit, satagere, sicque gratiam sibi concessam, in illum pro posse transfundere, quemadmodum princeps Apostolorum hortatur :

Unusquisque sicut accepit gratiam, in al- I *Petr.* iv, 10. terutrum illam administrantes. Unde et

Paulus : Fratres (inquit), etsi præoccu- *Galat.* vi, 1. patus fuerit homo in aliquo delicto, vos

qui spirituales estis, hujusmodi instruite in spiritu lenitatis. Si aliqui viatores per idem iter ad aliquem tendant locum, et viderint quempiam a recto deviare itinere, protinus revocant eum; si

vero ierit quisquam eorum per devium deducens ad speluncam latronum, non simpliciter revocant eum, sed etiam seriosissime, ardentissime atque fortissime persuadent ei ac supplicant ut iter illud relinquat, ne occidatur. Quum ergo omnes Christiani sint in mundo hoc peregrini ac viatores, ad eandem patriam, puta

cœlestem paradisum, proficiscentes vel saltem proficisci debentes, si unus viderit alium per vitiorum abrupta, per vanitates et pompas non solum a recto calle abscedere, sed etiam ad infernalem lacum procedere, debet eum omni cum diligentia ac fervore revocare pro posse, atque ad viam reducere justitiæ ac salutis, orando, hortando, instruendo et corripiendo. Hinc ad correptionem fraternam omnes tenentur. Sed, heu, quanta est excæcatio nostra ! Si

quis incidat in latrones, et spoliatur ac trucidetur, omnes gemimus et dolemus; imo si ovem, bovem, equum aut asinum videmus in foveam lapsum, compatimur et subvenire conamur : sed quod proximos nostros conspiciamus per diversa facinora, per superbias, avaritias, acedias, carnalitates, mendacia, fraudes, potationes, choreas indesinenter a dæmonibus spiritualiter strangulari, occidi, ad inferos trahi, dissimulamus, nec digne deflemus, neque pro viribus subvenimus. Ubi est caritas

ordoque caritatis? ubi zelus justitiæ? Hæc A circa primum hujus evangelii documentum sint tacta.

Secundo, docet Salvator quanta sit carnalium hominum durtia, dicens : Nisi signa et prodigia videritis, non creditis. Sunt enim quamplures ita in suis carnalitatibus, vanitatibus ac dissolutionibus indurati, ut quidquid dicatur eis aut prædicetur de pertinentibus ad salutem, de Dei timore, de vitæ reformatione, sic parvi pendunt quasi non pertineret ad eos, ita quod nulla compunctione, nulla devotione, nullo timore moventur, sed in suis permanent levitatibus ac peccatis. Et si fide informi aliquantulum credant, tamen ita se habent in opere quasi non credant, sic-
Joann. iv, 48.
Tit. i, 16.
Is. xxviii, 19.
Ps. lxxxii, 17.
Ibid. 18.
 ut de talibus contestatur Apostolus : Dicunt se nosse Deum, factis autem negant. His ergo loquitur Christus, Nisi signa et prodigia videritis, non creditis : hoc est, nisi plaga ac ultio divinæ vos tangat justitiæ, vel in præsentī vos graviter visitando et per vexationes intellectum donando, aut certe æternam damnationem infligendo, non creditis satis attente, vera esse quæ de vestra vobis dicuntur salute, de incertitudine hujus vitæ, de divini rigore iudicii, de ineffabili acerbitate infernalis supplicii. Unde de talibus Psalmista loquitur Deo, Imple facies eorum ignominia, et quærent nomen tuum, Domine : hoc, quantum ad eos qui in vita hac per paterna Dei flagella salubriter corriguntur. Porro quantum ad incorrigibiles subdit : Erubescant et conturbentur in sæculum sæculi, et confundantur, et pereant; et cognoscant (per suorum videlicet experientiam tormentorum) quia nomen tibi Dominus. In talibus quippe oculos interiores sero aperit pœna, quos in vita præsentī damnabiliter clausit culpa. Sed redeamus ad cor, et sufficiant nobis signa et prodigia a Christo et Apostolis ac ceteris Sanctis facta, ultiones quoque et pœnæ quas Deus in veteri novoque Testamento in multis apertissime nimis exercuit. Siquidem felix quem faciunt aliena damna peritum.

Itaque de fidei nostræ veritate certissimi, studeamus vitam et mores altitudini fidei conformare, quatenus ex conversationis nostræ humilitate, pietate, devotione, caritate atque justitia, vere pateat esse nos Christianos, et glorificetur Deus in nobis servulis suis, secundum quod Christus hortatur : Sic luceat lux vestra coram hominibus, ut videant bona facta vestra, et glorificent Patrem vestrum qui in cœlis est. *Matth. v, 16.*

Tertio, docet nos Christus in evangelio hodierno humilitatem præcipuam. Nam rogatus Jesus a centurione ut veniret et manum suam super servum ejus paralyticum poneret, mox respondit : Ego veniam, et curabo eum. Rogatus vero a regulo ut veniret ad filium ejus, non acquievit. Hoc ergo fuit humilitas magna, quod paratior fuit ire ad centurionis ministrum, quam ad reguli filium. Quo exemplo docemur in primis non aspernari personas pauperes et abjectas, sed visitare, consolari adjuvareque eas, imo in cordis occulto tales plus beatificare quam divites et excelsos, quum dicat Salvator : Beati pauperes, quia vestrum est regnum Dei. Jacobus quoque ait : Nonne Deus elegit pauperes in hoc mundo, divites in fide? Secundo docemur per hoc pensare in hominibus magis naturam qua ad Dei imaginem facti sunt, et præsertim dona gratiæ ac virtutum quæ in pauperibus communiter plus abundant, quam exteriora et accidentalia bona quibus in hoc mundo præfulgent. Tertio, quod alia sunt judicia Dei, alia hominum, ita quod tanto plus a Deo quis reputatur ac sublimatur in cœlis, quanto ab hominibus magis despicitur nunc in terris. Propter quod loquitur Christus iudex : Quod hominibus altum est, abominatio est ante Deum. Verumtamen sæcularis potestas non est aspernanda, sed honoranda, dicente Apostolo : Non est potestas nisi a Deo, et qui potestati resistit, Dei ordinationi resistit; itemque, Omnis anima potestatibus sublimioribus subdita sit. Honorandi sunt principes et prælati, iudices et rectores, in *Ibid. viii, 7.*
Joann. iv, 49, 50.
Luc. vi, 20.
Jacob. ii, 5.
Luc. xvi, 15.
Rom. xiii, 1, 2.
Ibid. i.

quantum sunt Dei vicarii ac ministri, personæque publicæ et summæ potestatis participes : unde et signa reverentiæ magis monstranda sunt eis forinsecus.

Quarto, in evangelio isto instruimur quantum valeat apud Deum fides et affectuosa continuata oratio, quoniam regulus iste, quamvis imperfectus in fide, tamen fide sua tali quali et precibus repetitis suo obtinuit filio sanitatem.

Refert S. Gregorius habuisse se tres nepotes in Roma nobiles valde ac divites : et erant sorores carnales. Quæ omnes uno fidei fervore conversæ sunt, et spiritualem atque communem vitam in propria domo duxerunt. Quarum una quotidie in omni virtute ac sanctitate profecit præcipue, orationibus vacans continue. Alia quoque soror fuit multum devota. Sed tertia paulatim refriguit mente, et sæcularium puellarum gaudebat societate. Propterea aliæ duæ sorores plurimum tristabantur, eamque ad arrepti propositi hortabantur constantiam ; sed illa ad solitas rediit levitates. Idcirco soror illa tam sancta frequenter dixit ad aliam : Video sororem nostram de

A sorte nostra non esse. Post aliquantulum temporis, quidam vir sanctus paulo ante defunctus, qui fuit harum sororum avunculus, apparuit in visione sorori illi sanctiori, et dixit : Veni, quia in cœlestis mansionis te luce suscipio. Quibus dictis, illa cœpit protinus infirmari, et circa festum Nativitatis Christi migravit ad Dominum. Post modicum tempus, soror illa apparuit in visione sorori suæ devotæ, vocans eam ad regnum cœleste. Illa vero de sorore illa indevota valde sollicita, dixit : B Et si venio, istam cui dimitto? Cui respondit facie tristi : Veni, soror, etenim illa inter sæculares et laicas reputata est. Mox soror illa devota infirmari incepit, et circa festum Epiphaniæ aut circiter feliciter obiit. Tunc soror illa residua, oblita timoris divini atque arrepti propositi, conductorem agrorum suorum accepit maritum.

Ex quo patet exemplo, quam periculosum sit in caritate et gratia Dei tepescere, et quod nemo securus est de sua salute. Oportet ergo in caritate et gratia crescere, in bono inchoato persistere, in timore Dei jugiter permanere.

AD RELIGIOSOS

SERMO QUARTUS

SINE GRATIA DEI NIL MERITORIE AGI POSSE ; DE CONFORTATIONE SPIRITUALI MENTIS
IN DEO, DEQUE JUGI PUGNA VITÆ PRÆSENTIS.

CONFORTAMINI in Domino et in potentia virtutis ejus. Ephes. vi, 10.

Sciens Apostolus infirmitatem mentis humanæ in se, hortatur in præsentī epistola ut confortemur in Domino. Fuerunt autem hæretici Pelagium hæresiarcham sequentes, qui asserebant hominem propriis ac naturalibus viribus posse peccata vitare, præcepta implere, virtutes acqui-

D rere, Deo placere et meritorie operari ; et reputabant se virtuosos ac multum devotos, quum essent vitiosi, præsumptuosi atque hæretici. Porro, ut sæpe recitat Cassianus, sanctissimi Patres in eremo, non solum Scripturarum auctoritatibus, sed propriis quoque experiētiis eruditi, dixerunt oppositum, affirmantes hominem sine speciali et supernaturali auxilio gratiæ

Dei non posse aliquid meritorie cogitare, appetere, loqui aut operari, nec tentationibus prævalere, nec diu posse mortalia vitare peccata, neque proficere. Et istud esse verissimum non solum credit populus christianus vere catholicus, sed et omnes spiritualiter conversantes, proficere cupientes, internis ac virtuosis exercitiis vere intenti, et contra vitia præliantes, per experientiam norunt. Merito ergo monet Apostolus ut confortemur in Domino.

Sed quid est confortari in Domino? Hoc est propriam defectuositatem, infirmitatem atque in omne vitium pronitatem recognoscere ac fateri, et auxilio Dei inniti, non sibi ipsi confidere, non de suis viribus meritisque præsumere, sed se coram Deo dejicere et humiliare se ipsum, ejusque adjutorium implorare, robur gratiæ, lumen sapientiæ, vigorem constantiamque virtutum postulare ab ipso. Hoc clarissime contemplantur et expertus fuit qui dixit: *Diligam te, Domine, fortitudo mea; Dominus firmamentum meum et refugium meum, et liberator meus; Deus meus adjutor meus, et sperabo in eum; protector meus, et cornu salutis meæ. Unde et sanctus David, horum prolator verborum, qui tam admirabilis fuit et præclarus in omni sapientia et virtute, in caritatis fervore, in summa devotione, in omni interna et secretissima exercitatione, ex gratia Dei, quando paulisper dispensatione divina relinquebatur a gratia, horribiliter corruit. Cujus exemplo omnes edoceri debemus ut jugiter timorati, custoditi ac humiles simus, nec unquam inaniter gloriemur, neque nostris laboribus, industriis, viribus adscribamus, si quid gratiæ et virtutum habemus, sed ad fontem charismatum refluant gratiæ dona, ut rursus exuberantius refluant. Grato enim datur ut abundet.*

Ps. xvii, 2, 3.

Matth. xxv, 29.

Deinceps adjutorio Dei gratioso, supernaturali, incessabili indigemus: Primo, quia ad supernaturalem beatitudinem conditi sumus, ad quam non nisi per supernaturalia media, gratiarum charismata, pervenire valemus. Secundo, quia ex

naturalibus nostris sumus vehementer defectuosi, et debiles in superioribus animæ viribus, eo quod anima rationalis in ordine intellectualium substantiarum se habeat sicut materia prima in ordine entium: propter quod in umbra intelligentiæ fertur creata, et intellectus humanus in principio sui est tanquam tabula rasa. Tertio, quia contra callidissimos, expertissimos, fortissimos et innumerabiles hostes continua habemus certamina, quibus nequaquam propriis possumus viribus reluctari: et hanc rationem tangit in epistola hodierna Apostolus. Quarto, propter infectionem fomitis, ad mala jugiter ac valide inclinantis, sed et propter incomparabilem magnitudinem periculorum imminentium nobis. Sint igitur oculi nostri semper ad Dominum, et indesinenter clamemus in cælum; innitatur, inhæreamus, infigamur semper et inavertibiliter Deo nostro, tam filialiter et perfecte sperantes in ipso, ut cum sancto Job fateamur: Etiam si occiderit me, in ipso sperabo. Ab hac innitentia atque fiducia nullus avertat nos unquam, ut cum Psalmista ex corde dicamus: In Deo salutare meum et gloria mea; Deus auxilii mei, et spes mea in Deo est.

Ps. xxi, 15.

Job xiii, 15.

Ps. lxi, 8.

Insuper, sic confortemur in Domino, ut studeamus quotidie in omni gratia et virtute, in omni dono et fructu Spiritus Sancti, in omni sancta devotione et caritatis ardore proficere, in Deo constabiliri, in recto rationis judicio immobilitari, ut nec prosperis elevemur, nec adversis dejiciamur, nec adulatione aut laude delectemur humana, nec vituperatione frangamur, neque diffamia. Nulla passio suo impetu mentem obscuret, nulla voluptas voluntatem subvertat, nullus eventus mentem a sua in Deo stabilitate præcipitet. Regio semper itinere gradiamur ad Deum, et hæc nobis sit summa atque indesinens sollicitudo, intentio, affectio, ne Deum in aliquo offendamus, nec aliquam gratiæ læsionem aut virtutum minorationem incurrat cor nostrum, sed juxta prætacta crescat ac roboretur in eis. Quod fiet si omni cordis

custodia ac animi vigilantia, orationibus, meditationibus et ceteris virtuosis insistamus operibus. Præterea, in Deo poterimus confortari, in spe firmari, in caritate accendi, nec unquam de Deo diffidere, si consideremus quam infinita sit bonitas et misericordia, quanta dilectio ejus ad genus humanum, quanta beneficia ejus in nobis, quæ, quanta et qualia Unigenitus Dei pro nostra salute assumpsit, fecit ac passus est, et quod ipse fidelis et verus Deus, vere omnipotens et omnia intuens, toties nobis opem et gratiam suam promisit, tot bona promisit ac præparavit, dummodo ei humiliter confidamus eumque invocemus, et quod in nobis est faciamus. Porro, si dæmones aliquem sæpe vellent ad desperationem aut nimiam pusillanimitatem inducere, posset se ipsum confortare in Domino, attendendo humiliter bona quæ egit, et dura quæ Dei intuitu pertulit, ac dona gratiæ sibi divinitus piissime et frequenter concessa, sicque se ipsum consolari in Deo, dicendo : Confido quod Deus qui ista et ista mihi benignissime dare dignatus est, horum occasione miserebitur mei, neque relinquet me.

Ephes. vi,
11, 12.

Præterea docet Apostolus ut induamus nos armaturam Dei, quatenus stare possimus adversus insidias diaboli, quoniam non est nobis colluctatio adversus carnem et sanguinem, sed adversus principes et potestates. Sed quomodo verum est hoc, quum alibi protestetur idem Apostolus, Caro concupiscit adversus spiritum? Et princeps Apostolorum : Abstinete (inquit) a carnalibus desideriis, quæ militant adversus animam. Nonne trium hostium animæ, caro ponitur unus? Nonne corpus corruptibile aggravat animam, et deprimit terrena inhabitatio sensum multa cogitantem? Et respondendum, quod utique omnia ista sunt vera. Apostolus vero vult dicere, quod colluctatio quam contra invisibiles hostes habemus, sit adeo gravis, principalis atque assidua, quod ejus comparatione

Galat. v,
17.
1 Petr. ii,
11.

Sap. ix, 15.

aliæ parvæ aut nullæ censentur, præsertim quum et hoc ipsum quod caro et mundus impugnant nos, ex diaboli operatione frequenter contingat. Itaque quanto acrior, periculosior et incessabilior pugna est nobis contra spiritus malignos, tanto fortior armatura, vigilantior mentis custodia, virilior resistentia nobis sunt necessariae.

Quæ ergo sunt arma nostra, nisi virtutes et dona Spiritus Sancti, imo potius strenua exercitia et infatigabiles actus illorum? Quemadmodum enim corporale bellum gerentibus non sufficit undique fulgidis ac solidissimis armis esse indutos, munitos, contectos, nisi armis suis utantur; sic nec in spirituali prælio constitutis sufficiunt habitus ipsi virtutum atque donorum, sed eorum actus et exercitia requiruntur: alioqui habitus ipsi perduntur. Postremo, sicut corporale bellum acturis necessarium est singula quæque membra competenter ac proportionate armare, ita fidelibus contra dæmones incessanter pugnantibus opportunum est singulas quasque animæ vires virtutibus communire, ut in quibus anima tentari potest, lædi ac vinci, sit virtutibus congruis roborata, armata, provisa: ut scilicet intellectus armetur fide, sapientia, prudentia, consilio, scientia; voluntas spe, caritate, justitia; appetitus sensitivus virtutibus moralibus ad ipsum spectantibus. Et sicut in bello exteriori, personæ unius exercitus se invicem juvant, confortant et protegent, ita in bello spirituali una virtus roborat aliam, et omnes se mutuo juvant: ut si quis de incontinentia impugnetur, non solum castitas seu temperantia, sed et fides, caritas, discretio, spes, oratio reluctantur, prout de isto in sequenti sermone plenius est tangendum. Sic igitur confortemur in Domino, spiritualiterque armemur, ut nulla tentatione, nulla passione, nullo vitio superemur, sed in omnibus Dei virtute prævaleamus, et omnia coe-

Rom. viii,
28.

SERMO QUINTUS

QUEMADMODUM VIRTUTES COMPARENTUR AD ANIMAM, ET QUALITER SIT TENTATIONIBUS
RESISTENDUM, DEQUE INSTANTIA INIMICORUM NOSTRORUM.

ACCIPITE armaturam Dei, ut possitis **A** resistere in die malo, et in omnibus perfecti stare. Ephes. vi, 13.

Virtutes et dona Spiritus Sancti, atque eorum actus, comparantur ad animam variis modis : Primo, tanquam spiritualia alimenta ipsius. Nisi etenim actus virtuosus essent refectio hominis, non dixisset Salvator : Meus cibus est ut faciam voluntatem Patris mei. Secundo, tanquam vestes ipsius, quum scriptum sit : Induit me Dominus vestimento salutis, et indumento justitiæ circumdedit me. Hinc caritas vestis nuptialis vocatur. Et in Apocalypsi Dominus protestatur : Qui non inquinaverunt vestimenta sua, ambulabunt mecum in albis. Unde anima virtutibus carens dicitur nuda. Tertio, sicut ornamenta ipsius, quibus coram Deo fulget ac venustatur. Propter quod in Apocalypsi iterum loquitur Dominus : Suadeo tibi emere aurum ignitum probatum (hoc est caritatem ardentem, quæ a Deo precibus comparatur), ut non appareat confusio nuditatis tuæ. In Canticis quoque ait sponsus animæ virtuosæ : Quam pulchra es, amica mea, quam pulchra es ! Quarto, sicut divitiæ ejus, sine quibus ipsa est pauper. Unde ad Corinthios scribit Apostolus : In omnibus divites facti estis in illo, in omni verbo et in omni scientia ; itemque, Altissima paupertas eorum abundavit in divitias simplicitatis eorum. Quinto, sicut arma ipsius, ut in hodierna epistola innotescit. Nam et alibi scribit Apostolus : Arma militiæ nostræ, non carnalia, sed potentia Deo. Sexto, sicut lux. Septimo, sicut vita ipsius, D

Ex his constat quam multa bona faciant virtutes animæ rationali. Virtutes quippe et actus earum, in quantum sunt spiritualia alimenta, eruunt animam a spirituali inedia, ab infirmitate interna ac defectu multiplici, eamque confortant, exhilarant et sustentant. Porro virtutes et actus earum, in quantum sunt animæ vestes, eam defendunt ab æstu vitiorum, a concupiscentiæ igne, a frigore peccatorum, a passionum vento urente, ne lædatur ab istis. In quantum vero sunt ornamenta animæ, protegunt eam ab omni culparum deformitate. In quantum autem sunt divitiæ animæ, a spirituali inopia sublevant eam, ne illud Apocalypsis ei dicatur : Quomodo dicis quia dives sum, et nescis quia tu es miserabilis, pauper, etc. ? Sed in quantum sunt animæ arma ac fortitudo, sic contra tentationes muniunt eam. Quemadmodum enim homo visibiles adversarios suos tanto facilius dejecit, quanto in corporali fortitudine atque prudentia magis abundat, sicut Samson qui cum mandibula asini mille viros occidit (nam ad bene utendum fortitudine corporali maxime confert prudentia : propter quod in Ecclesiaste asseritur, Melior est sapientia fortitudine ; et denuo, Melior est sapientia quam arma bellica ; et in libro Sapientiæ, Melior est sapientia quam vires, et vir prudens quam fortis) ; sic quanto quis in virtutibus exstat perfectior et donis Spiritus Sancti repletior, tanto in omni tentatione facilius sortitur triumphum, atque in omni adversitate manet constantior, in tribulatione et persecutione securior, et in omni eventu stabilior, si tamen virtutibus adsit vigilantia, discretio et sapientia vera, ne scilicet occasione

suæ perfectionis homo ad gloriam moveatur inanem, aut periculosa securitate torpescat, aut incustoditus reddatur. His etenim modis et causis cedri Libani corruiſſe leguntur. Propterea sancta dixit Syncletica, quod nos religiosi quasi in tranquillo et tuto navigamus, sæculares vero in procelloso : et tamen sæpiſſime contingit ut in tranquillo navigantes, per negligentiam pereant; in procelloso autem navigantes, per diligentiam suam evadant.

Denique ex his constat, quomodo viri sancti in gravissimis tribulationibus et B tentationibus tam insuperabiles et victoriosi immobilesque fuerunt, prout de beatissimis patribus Antonio, Hilarione, Francisco ac aliis legitur. Nos autem tam cito deſicimur, tam facile perturbamur, tam frequenter tentationibus superamur, et protinus ad iram, impatientiam, tristiſſimam, dissolutionem, ceterasque passiones et culpas movemur, videlicet quia in virtutibus radicati et roborati non sumus, sed pusilli et imbecilles manemus, nec de tanta nostra imperfectione, calamitate et puerilitate verecundamur : imo si illatam injuriam ad votum ulſi fuerimus, si per verba dura fratri aut etiam superiori silentium imposuisse videmur, gloriamur, quasi bene egerimus facta nostra. Hinc, heu, heu ! quotidie lædimur, quotidie vincimur, quotidie a nostris atrocissimis hostibus irridemur, qui videntes nos esse tam imperfectos ac impotentes, derisioni et aspernationi nos habent. A qua irrisione et aspernatione præſervari optavit qui exoravit : Illumina oculos meos, ne unquam obdormiam in morte, nequando dicat inimicus meus, Prævalui adversus eum ; itemque, Deus meus, in te confido, non erubescam, neque irrideant me inimici mei.

Ps. xii, 4, 5.

Ps. xxiv, 2, 3.

Quum igitur contra crudelissimos, callidissimos, robustissimos adversarios, invisibiles malitiosissimosque spiritus incensabilis pugna sit nobis, qui non temporale damnum, corporalem ac momentaneam mortem, sed æternæ beatitudinis spoliationem atque perpetuæ damnationis miseri-

A am cupiunt nobis infligere ; hinc permaxime indigemus spiritualiter nos armare, et arma nostra consolidare, in omni virtute et gratia proficiendo, quatenus quotidie humiliores, patientiores, mitiores, discretiores, magisque sobrii, magis timorati ac fervidi simus, et per hoc omnem elationem, præſumptionem et gloriam vanam, omnem impatientiæ et iracundiæ motum, omnem indiscretionem, immoderantiam cibi et potus, dissolutionem, vanitatem, acediam, omni die facilius superemus, et B Deo inavertibilius adhæreamus, ita ut fieri possimus : Quis nos separabit a caritate Dei ? Etenim hostes nostri nunquam dormiunt aut quiescunt : idcirco et nos quantum fieri potest, vigiliis et sanctis exercitiis insistamus, orationibus et lacrimis contra illos pugnemus. Nos ipsos in omnibus vere et profunde humiliando, accusando, despiciendo, atque in Deo filialiter ac sincerissime confidendo ac eum laudando, prosternimus illos, prout scriptum est : Laudans invocabo Dominum, et ab inimicis meis salvus ero. Jacobus quoque apostolus : Resistite (inquit) diabolo, et fugiet a vobis. Insuper omnem otiositatem vitando, et semper boni aliquid exercendo, aditum præcludimus hosti antiquo. Sed et Christi passionem, et omnem ipsius in sæculo isto humilitatem, mansuetudinem, patientiam, paupertatem, caritatem sagaciter reminiscendo, non mediocriter dæmones molestamus. Sed et quatuor novissima præmeditando, omnium diabolicarum tentationum sagittas, omnium passionum impulsus rejicimus. Virginem quoque gloriosam, et angelos sanctos animarum nostrarum custodes, ac alios Sanctos, eos præsertim ad quos majorem habemus affectum, devotionem, fiduciam, instanter in nostrum auxilium invocando, contra nostræ salutis æmulos confortamur.

Rom. viii, 35.

Ps. xvii, 4.

Jacob. iv, 7.

Præterea, de iis spiritualibus armis ac resistentiis scribit in præſenti epistola felix Apostolus, primo exhortans ut succincti sint lumbi nostri cingulo castitatis, atque induti simus loricaſtitiæ, quatenus

Ephes. vi, 14.

sicut lorica corpus ambit, tegit ac munit, sic anima nostra undique decoretur justitia, unicuique reddens quod ei debetur, Deo puram conscientiam et honorem, proximis bonam famam, consilium et auxilium, ac fraternam in omnibus caritatem, superiori obedientiam, sibi ipsi cordis sui custodiam. Sicque in cunctis sincerum et discretum habeamus justitiæ zelum, omnem inordinatam affectionem, simulationem, adulationem, fraudem versutiamque vitantes, quatenus coram Deo simus veraciter recti corde, neque in tota conversatione et incolatu nostro in sæculo isto aliud intendamus, quæramus, optemus, nisi Dei adorandi et benedicti gloriam et honorem, animarum nostrarum salutem, commune bonum Ecclesiæ, universorumque hominum conversionem, reformationem ac felicitatem, ut propriam.

Ephes. vi,
16.

Postremo, in cunctis sumamus scutum fidei, id est, catholicam fidem et ejus considerationem pro spirituali habeamus scuto, ita ut suggestionibus dæmonum opponamus memoriam metuendi judicii Dei, poenarum inferni gaudiorumque cœli, dominicæ passionis, divini adspectus omnia intuentis, quæ omnia cadunt sub fide : per quæ Deo auxiliante possumus omnia

A tela nequissimi ignea exstinguere, hoc est diabolicorum tentamentorum jacula acuta ac vehementia superare, sive de vitiis gulæ atque carnalitatis, sive de ambitione aut acedia nos impugnent, quæ omnia facile contemnuntur, si illa præacta rite pensentur. Unde et galeam salutis, id est spem futuræ felicitatis, specialiter exprimit assumique præcipit sanctus Apostolus, quia si inæstimabilem futuræ beatitudinis magnitudinem intueamur, omnis labor vitæ præsentis videtur permodicus, et omnis excutitur pigritiæ torpor. Sed et gladium spiritus, quod est verbum Dei, debemus assumere, sacram Scripturam imprimendo memoriæ, ut juxta illius doctrinam in omnibus nos regamus, vitia fugiamus, quæ bona sunt exsequamur, temptationibus reluctemur. Hinc magnus et sanctus Antonius, interrogatus a Fratre, Quid faciens Deo placebo? respondit: Quocumque vadis, Deum semper habe præ oculis; et in iis quæ agis, adhibe testificationem Scripturarum sanctarum; et in quocumque loco sederis, non cito movearis. Hinc quoque dixit Psalmista: In corde meo abscondi eloquia tua, ut non peccem tibi. Sic ergo agamus et nos, ad laudem et gloriam Creatoris.

Ephes. vi,
17.

Ps. cxviii,
11.

SERMO SEXTUS

QUOMODO RECTORES ET PRÆLATI DEBENT LUCERE AC PRODESSE SUBJECTIS,
IMBECILLITATESQUE INFIRMORUM PORTARE.

DOMINE, *descende priusquam moriatur filius meus.* Joann. iv, 49.

Quemadmodum regulus iste cujus in evangelio hodierno est mentio, fuit pro corporali filii sui letaliter ægrotantis curatione sollicitus, Christum accessit et exoravit; sic quilibet bonus prælatus, si quem subditorum suorum conspexerit aliquo vitio inquinari, pro illius curatione debet

permaxime sollicitari, eumque corripiendo, hortando, instruendo, comminando, corrigendo, pro posse sanare; quod si viderit non posse se ita proficere, ad Deum se convertat omnino, atque pro periclitante filio affectuose deprecetur. Sed et quilibet pro proximo suo defectuoso tanto ardentius atque frequentius oret, quanto illum defectuosiores existere arbitratur.

Hæc est sapientia vera, caritas sancta, perfectio magna, propriam fragilitatem semper attendere, exemplarem se exhibere, omniumque salutem totis præcordiis affectare. Porro, qui ita proximorum cupit salutem, non dubium quin illa ipsis impendat quæ sapientia dictat, et caritas esse impendenda requirit : quæ sunt fidelis oratio, fraterna correptio, admonitio pia, informatio bona, ædificatio salutaris, subventio omnis possibilis et salubris. Unicuique etenim mandavit Deus de proximo suo, ut scilicet faciat ei prout sibi vult fieri. Hinc innotescit, quam utiles et salubres sint in omni congregatione personæ vere sapientes, caritativæ atque devotæ, quoniam tales instar lucernæ lucentis et ardentis alios illuminare, ædificare et inflammare non cessant, implentes quod princeps ait Apostolorum : Unusquisque sicut accepit gratiam, in alterutrum illam administrantes ; et quod Salomon exhortatur, Deriventur fontes tui foras. Quod cum omni humilitate agendum est, omni complacentia vana et gloriatione iniqua exclusis, sicut Apostolus protestatur : Debemus nos firmiores, imbecillitates infirmorum portare, et non nobis placere. Siquidem ferventioribus et irreprehensibilioribus, exemplarioribus reputatoribusque personis solent quandoque complacentia stulta et gloria vana insidiari ; sed vir vere virtuosus ac sapiens, huiusmodi stolidissimorum motuum ventos faciliter celeriterque exsufflat.

Sit ergo in omni religioso vera justitia compassionem habens adjunctam, et zelus rectitudinis discretione ornatus, non amaritudine qualificatus. Et qui se sapientem esse confidit, per verba salubria et exemplaria opera, sapientiam suam ad Dei gloriam et proximorum ædificationem ostendat, ut verificetur in eo quod scriptum est : Fili, si sapiens fueris, tibi et proximis tuis eris. Nam, ut asserit B. Leo Papa, nullius sapientia tibi soli est proficua. Et hæc verarum est virtutum natura, ut prosint ac luceant multis. Propter quod sacratis-

Eccli. xvii, 12.

1 Petr. iv, 10.

Prov. v, 16.

Rom. xv, 1.

Prov. ix, 12; cf. tom. VII, p. 63D.

A simus ait apostolus Jacobus : Quis sapiens et disciplinatus inter vos ? Ostendat ex bona conversatione operationem suam in mansuetudine sapientiæ. Quum enim omnis culpa sit quædam stultitia (Salomone testante, Stultorum, id est peccatorum, infinitus est numerus), certum est unumquemque tanto esse sapientiore, quanto virtuosiore et exemplariore, tantoque insipientiore, quanto negligentiore et inexemplariore ; etiam si ingenio sit acutus et scientia acquisita abundans, nihilo minus tanto reprehensibilior stolidiorque probatur, quanto plus Dei donis abutitur, et irregulariter conversatur. Hinc sanctus Job dixit : Ecce timor Domini (vel, ut alia habet translatio, Ecce cultus Dei), ipsa est sapientia ; et recedere a malo, intelligentia. O quam longe sunt a sapientia salutari hi inter quos vigent zelus et contentio, aspernatio, detractio et ambitio, quorum unus alio sapientior cupit videri, discretior reputari, amplius honorari ! Non est sapientia ista a Deo, sed terrena, animalis et diabolica.

Præterea, per febrientem istum a Christo curatum, intelligitur omnis iniquus, præsertim omnis negligens, piger et acediosus. Sicut enim in febricitante sunt frigus intensum ex recessu sanguinis a membris proveniens, et corporis tremor ex frigore oriens, difficultas quoque ad calefactionem, deinde calefactio immoderata sanguine ad loca pristina redeunte, atque infectio gustus ex amaris et salsis humoribus, et ultra hæc, totius corporis lassitudo, torpor et quædam afflictio ; sic universa hæc in quolibet vitioso, præsertim in acedioso, reperiuntur. Est quippe in eis frigus intensum, quia in eis refriguit caritas, et tardi ad opera bona consistunt, atque ut glacies restringuntur in membris suis ac viribus, ne ea ad opera meritoria laxent. Quemadmodum autem caritas, quæ est vivacitas mentis, efficit hominem ad opera religiosa alacrem et jucundum ; ita acedia, negligentia et omnis iniquitas, horrorem, tarditatem et omissionem sanctarum acti-

Jacob. iii, 13.

Eccli. i, 15.

Job xxviii, 28.

1 Cor. iii, 3.

Jacob. iii, 15.

Prov. xxvi, 14. onum inducit. Unde, teste Scriptura, sicut A ostium vertitur in cardine suo, sic piger in lectulo suo, hoc est in sua consuetudine prava et repausatione carnali. Quum enim in spiritualibus non delectetur, in carnalibus consolationem exquirat, et agrum proprii cordis non colit virtutibus, non ornat sanctis meditationibus, non fecundat actibus virtuosus, sed urticis negligentiarum, spinis passionum, vepribus vitiorum permittit impleri, relinquit corrumpi, non dolet neque advertit undique demoliri. Propterea de ipso conqueritur Spiritus B Sanctus : Per agrum hominis pigri transivi, et per vineam viri stulti; et ecce totum repleverunt urticæ.

Ibid. xxiv, 30, 31.

Ps. xiii, 5.

Prov. xxviii, 1.

Ibid. xxix, 25.

Josue xviii, 3.

Insuper in talibus tremor est, utpote timor multiplex inordinatus, carnalis, sæcularis, et puerilis atque humanus, quemadmodum scriptum est : Illic trepidaverunt timore, ubi non erat timor; et iterum, Fugit impius, nemine persequente. Ita sunt multi religiosi, magis hominum quam Dei omnipotentis verentes adspectum, verecundantes coram hominibus negligentius agere ac fatue loqui, nec tamen in divinæ majestatis præsentia, iniqua ac turpia cogitare seque negligenter habere erubescunt. Quibus contingit quod scriptum est : Qui timet hominem, cito corrumpet. Sunt etiam quidam tam frigefacti et duri, quod instar febricitantium non calefiunt igne divini amoris, nec sanctæ devotionis fervent alacritate, quidquid eis salubriter prædicetur. Quibus illud Josue est dicendum : Usquequo marcetis ignavia, et non intratis ad possidendam terram quam Do-

minus vobis promisit (de qua ait Prophe- *Ps. xxvi, 13.* ta : Credo videre bona Domini in terra viventium) ? et quod ait Ambrosius, Nemo cum desidia quærit Christum. Qui enim sic quærit, non veraciter quærit nec invenit eum, quum et Moyses fateatur : Quum *Deut. iv, 29.* quæsieris Dominum Deum tuum, invenies eum, si tamen toto corde quæsieris eum et tota tribulatione animæ tuæ. Sed quoniam homo diu esse non potest sine amore, in quibus divinus exstinctus est amor, carnalis affectus accenditur, avaritiæ æstus flammescit, ira, impatientia, superbia inflammatur, et amor invalescit privatus, ita quod corporis commoda, temporalem honorem et propriæ voluntatis desideria avidissime quærunt, fervide amplectuntur, infatigabiliter exsequuntur : sicque in eis interioris gustus palatum inficitur, et pessime judicant, quia carnalia plus quam spiritualia sapiunt eis, et suos defendunt errores, culpas suas excusant. Quibus in Isaia asseritur : Væ qui dicitis bonum ma- *Is. v, 20.* lum, et malum bonum.

C Sed resipiscamus et caveamus ab universis his vitiis, ab omni sensuum et linguæ ac cordis incustodia detestanda. Et sicut in febrientibus, sanguine ad membra revertente, fit calor intensus; sic, Deo miserante, divino quotidie invaleamus amore, Dei et proximorum succendamur dilectione, atque in omni proficiamus virtute; agiles et jucundi in divino simus obsequio, et ea quæ Ordinis sunt assidue prosequamur etiam cum majori devotione ac puritate. Ad laudem et gloriam Omni-

D potentis.

DOMINICA XXII POST TRINITATEM

ENARRATIO IN EPISTOLAM

CONFIDIMUS IN DOMINO JESU, QUIA QUI COEPIT IN VOBIS OPUS BONUM, ETC. Philipp. I, 6-11.

HORTATUR Apostolus in præsentī epistola, ut perseveremus et proficiamus in bonis, ostendendo affectum suum quem habuit pro spiritualium filiorum profectu. Ait ergo : *Confidimus in Domino Jesu, quia qui coepit in vobis opus bonum*, id est, in bonitate et misericordia Dei confido, quod ipse qui ex sua pietate, per gratiam gratum facientem et actualem Spiritus Sancti motionem, inchoavit in vobis opus meritorium, *perficiet* illud in vobis *usque in diem Jesu Christi* inclusive, id est usque ad diem mortis vestræ, quando particulari iudicio judicabit et visitabit vos Christus, dando quod meruistis. A Deo quippe est inchoatio, continuatio et consummatio operis boni.

Sicut est mihi justum hoc sentire pro omnibus vobis, id est : tam ex parte divinæ bonitatis et misericordiæ, quam ex parte vestræ devotionis et gratiæ, justum est me ita de vobis et pro vobis confidere ac sentire ; *eo quod habeam vos in corde*, id est, cordiali affectu id optem et sperem quod subditur : *et in vinculis meis, et in defensione et confirmatione Evangelii, socios gaudii mei omnes vos esse*, id est, ut tam in præsentī sæculo quam futuro, sitis participes consolationis meæ internæ : quam habeo « in vinculis meis », id est in captivitate et incarceratione mea, in qua propter Evangelii prædicationem vinculis sum ligatus ; « et in defensione Evangelii », id est evangelicæ legis, quam contra fidei ini-

amicos defendo ; « in confirmatione » quoque « Evangelii », qua ejus veritatem per miracula et Scripturas corroboro. *Testis enim mihi est Deus, quomodo*, id est quam affectuose, spiritualiter et sincere, *cupiam omnes vos*, id est, omnium vestrum salutem et consolationem desiderem, *in visceribus Jesu Christi*, id est in intima caritate ac pietate mihi a Christo collatis ac ei placentibus. Vel, « cupiam omnes vos » esse « in visceribus Jesu Christi », id est intime Christo uniri, atque ab eo viscerose seu cordialiter diligi.

Et hoc oro, id est, Deum rogo, *ut caritas vestra* vobis a Deo infusa, qua Deum proximumque diligitis, *magis ac magis abundet*, id est, incessanter proficiat, *in scientia*, id est discretionē, ut cum discretionē cuncta agatis, sitque rationabile obsequium vestrum ; vel, « in scientia », id est Dei cognitione, quatenus Deum amando mereamini illuminari ab eo in cognitione divinorum aliarumque rerum ad salutem spectantium, præsertim ut in illa crescatis scientia quæ est unum de septem donis Spiritus Sancti. *Et in omni sensu*, id est intellectuali notitia, vel potius experimentalī sapore interno, cœlestium ac spiritualium rerum. *Ut probetis*, id est, per approbationem sequamini, *potiora*, id est opera perfectiora, proficiendo quotidie, *ut sitis sinceri*, id est mundi corde, *et sine offensa*, id est peccato mortali ac scandalo, ut nec Deum offendatis nec proxi-

Rom. XII, 1.

Is. XI, 2.

mum, mala committendo aut bona omit-
tendo, *in diem Christi*, id est perseveranter
usque ad mortem : cujus dies dicitur dies
Christi, quia in illo particulare facit judi-
cium morienti, quemadmodum dies novis-
simus dicitur dies Christi, quia in illo aget
generale judicium. *Repleti fructu*, id est
actu et delectatione, *justitiæ* : quæ est
præclarissima virtus, ita ut, teste Philoso-
pho, nec Lucifer, nec Hesperus sit ita ad-

A mirabilis. Repleti, inquam, non propriis
viribus, sed *per Jesum Christum*, id est
virtute ac merito ejus, *in gloriam et lau-
dem Dei*, id est finaliter propter hoc ut
Deus unus ac trinus glorificetur per opera
bona, atque laudetur per verba devota a
vobis aliisque electis temporaliter in præ-
senti et æternaliter in futuro : quia ad Dei
honorem, laudem et gloriam omnia bona
fieri debent.

SERMO PRIMUS

QUOMODO UNIVERSA NOSTRA BONA A DEO SINT ; DE VITANDO
PRAVO USU JURATIONIS ; ET QUOMODO PERFICI DEBEAMUS IN SCIENTIA SCRIPTURARUM
CETERISQUE VIRTUTIBUS.

CARITAS vestra magis ac magis ab-
undet in scientia et in omni sensu.
Philipp. i, 9.

Primo, in præsentī epistola docet nos
sanctus Apostolus, quam totaliter omnia
opera nostra bona a Deo sint : nam ipse
inchoat bona in nobis, et continuat ea ac
perficit. Nunquam ergo in nobismetipsis
inaniter gloriemur, sed omne bonum Deo
plenarie adscribamus, ejusque adjutorio
incessabiliter innitatur. Hinc in Jeremia

Jer. x, 23. scriptum est : Scio, Domine, quia non est
hominis via ejus ; nec viri est ut ambulet

Rom. ix, 16. et dirigat gressus suos. Hoc est quod ad
Romanos asseritur : Igitur non volentis,
neque currentis, sed miserentis est Dei.

Hinc vir justus grata mente loquitur Deo :

Ps. lxxii, 24. Tenuisti manum dexteram meam, et in
voluntate tua deduxisti me. Unde constat

quod homines ad bene ac meritorie ope-
randum ita se habent sicut infantes ad
ambulandum : non enim per se queunt
incedere, sed indigent curriculo seu du-
cente. Ita et nos per nos ipsos seu pro-
prias vires virtuose vivere seu meritorie
agere non valemus, sed divina directio-
ne ac deductione indesinenter egemus, ut

B Deus corda nostra illuminet, roboret ac
deducat per actuales motiones et inspira-
tiones Spiritus Sancti. Propter quod ait
Scriptura : Justum deduxit Dominus per
vias rectas. Et Propheta loquitur Deo :
Spiritus tuus bonus deducet me in terram
rectam. Hinc jugiter ac præcordialissime
Dominum deprecemur ut ipse opera vir-
tuosa in nobis incipiat, prosequatur, con-
summet.

Secundo, ex præsentī docemur epistola
quod quandoque ex rationabili causa licet
nobis jurare, quia in hac epistola jurat

Apostolus : Testis (inquiens) mihi est Deus.

Quod non est aliud dicere, nisi, Deum tes-
tem veritatis eorum quæ dico assumo.

Quod rursus quid aliud est, nisi, Per Deum

juro? In veteri quoque Testamento, viri
sancti David, Elias et Eliseus jurasse le-
guntur, dicendo : Vivit Dominus, etc. Sed

objici potest quod loquitur Christus : Ego
dico vobis non jurare omnino ; sit autem

sermo vester, Est, est ; Non, non : quod
his abundantius est, a malo est. Unde et

D Jacobus scribit : Ante omnia nolite jurare.

Et respondendum, quod hæc ita intelli-
gi nequeunt quasi nequaquam licitum sit ju-

Sap. x, 10.

Ps. cxlii, 10.

Philipp. i, 8.

I Reg. xx, 3 ; xxvi, 10, etc. ; III Reg. xvii, 1 ; IV Reg. iii, 14.

Matth. v, 34, 37.

Jacob. v, 12.

Deut. vi, 13. rare, quum in Deuteronomio dicatur : Dominum Deum tuum timebis, et per nomen ejus jurabis. Idcirco verba Christi Jacobi-que apostoli intelligenda sunt, non per modum absolutæ prohibitionis, aut quasi jurare in se sit illicitum : imo potest esse actus virtutis quæ latria appellatur, quando cum debitis circumstantiis fit et ex causa idonea. Salvator ergo et ejus Apostolus idcirco verba illa locuti sunt, ut nequaquam jurationi assuescamus, imo nec vera sine rationabili causa juremus : quia et hoc ad irreverentiam pertinet Dei, absque causa condigna testem eum adhibere veritatis prolata. Unde in Exodo jussum est : Non assumes nomen Dei tui in vanum ; non enim habebit insontem Dominus eum qui assumpserit nomen Dei sui frustra. Quum ergo illicitum sit vera sine rationabili causa jurare, penset unusquisque pro posse quam enorme peccatum sit falsa jurare seu perjurare : quod est Deum falsitatis testem adhibere, præsertim si scienter id fiat, quia tunc est peccatum mortale ineffabiliter grave. Denique, quum usus venialium irrefrenatus a mortali culpa non excusetur, qualiter a mortali excusabuntur peccato, qui quotidie ex pessimo usu tam frequenter ac facile jurant, ita ut vix verbum enuntient quin juramentum apponant ? Maledictus est usus iste, atque divino præcepto contrarius, ac multis periculis plenus. Idcirco in Ecclesiastico fertur : Jurationi non assuescat os tuum, multi enim casus in ea ; vir multum jurans implebitur iniquitate, et non deficiet de domo illius plaga. Abjiciat ergo unusquisque hunc usum pravissimum, ne pereat in æternum. Qui autem per membra Christi jurant, tanquam blasphemi sceleratissime peccant.

Philipp. i, 9. Tertio docet Apostolus ut caritas nostra (id est nos ipsi caritatem habentes) quotidie « magis ac magis abundet in scientia », non qualicumque, sed in scientia salutari, in cognitione sacræ Scripturæ, « et in omni sensu » ipsius, videlicet litterali, allegorico, tropologico ac anagogico : quod tamen

A ad aliorum prælatos, prædicatores et eorum præcipue pertinet. Potissimum salubre est valde abundare in scientia illa quæ est donum seu unum de septem donis Spiritus Sancti, quæ est habitus supernaturalis infusus, per quem de rebus creatis bene judicamus per gustum et connaturalitatem seu conformitatem affectus ad ipsum judicium veritatemque agnitam, ita quod cordialiter sic sentimus et sapimus quod rebus creatis non sit finaliter inhærendum, quia ex se vanæ et nihil sunt, sed Deo dumtaxat, cujus comparatione debemus omnia ista carnalia, caduca, creata parvi pendere atque pro nihilo reputare, nec ea appetere seu amare nisi in Deo et propter Deum, videlicet juxta Dei præceptum, ut omnia referantur ad ejus honorem. Hac salutari scientia carent quicumque in mortali sunt culpa ; eamque habent omnes qui sunt in caritate et gratia. Imo valde probabile signum quod homo sit in caritate, est quando sentit se omnia ista carnalia et caduca fastidire, parvi pendere, transilire, ut summo Deo inhæreat, et in eo solo finaliter conquiescat. In hac salutari scientia tanto plus abundamus et crescimus, quanto plus in cordis puritate, Dei amore ceterisque virtutibus, præsertim in latriæ ac pœnitentiæ virtute, proficimus. Siquidem quanto plus homo sua detestatur, dolet ac plangit peccata, tanto abundantius illustratur a Spiritu Sancto ad cognoscendum salubriter quod in rebus creatis non sit finis ultimus statuendus, nec eis immoderate sit inhærendum.

D Deinceps hortatur Apostolus ut simus *Philipp. i, 10.* sinceri et absque offensa, id est pure et irreprehensibiliter conversantes, atque bonis operibus bona opera omni hora adjicientes, sicut et Salomon cohortatur, Quodcumque potest manus tua, instanter operare : ut sic thesaurizemus nobis in cœlo, opusque Dei cum ingenti attentione ac reverentia peragamus, non vago, intimorato dissolutoque corde. Ecce talis in primitiva Ecclesia fuit communiter conversatio omnium Christianorum, quoniam longo

Eccle. ix, 10.

Matth. vi, 20.

tempore consueverunt omnes Christiani A quotidie confiteri et communicare, ac nocturnis temporibus surgere, psalmodiis, orationibus meditationibusque sanctis insistere, atque in omni sanctitate et justitia deservire Altissimo. Sed, proh dolor! ad quantam ruinam, ad quam vitiosam ac miserissimam vitam delapsus est nunc populus christianus? Ubi jam antiqua illa est devotio? Propterea dici nunc potest de populo christiano quod de populo Judæorum fertur in Osee : Judicium (inquit) Domino cum habitatoribus terræ; non est veritas, non est misericordia, et non est scientia Dei in terra; maledictum, et homicidium, et adulterium, et mendacium, et furtum, et fraus inundaverunt, et sanguis sanguinem tetigit. Sed emendemus nos ipsos, et quam sanctissima fuerit vita patrum nostrorum pensemus, ut comparatione eorum humiliemus animas nostras, eosque saltem aliquantulum imitemur.

Denique inter Patres eremitas sanctissimos fuit et abbas Sisois, qui fuit vir tantæ puritatis ac elevationis ad Deum, quod exteriora non attendebat. Unde discipulus suus frequenter dixit ad eum : Surge, Pa-

ter, manducemus. Dixitque senex : Non manducavimus adhuc, fili? Respondit : Non, Pater. Et ille : Si nondum manducavimus, surge, et manducemus. Quum autem hora obitus sui sederent circa eum Patres, resplenduit facies ejus ut sol. Et dixit ad eos : Ecce abbas Antonius venit. Et post pusillum iterum dixit ad illos : Ecce chorus Prophetarum venit. Et refulsit facies ejus magis quam ante. Deinde dixit : Ecce chorus Apostolorum venit. Et resplenduit facies ejus dupliciter plus quam ante. Et ecce ipse quasi cum aliquibus loquebatur. Rogaveruntque eum senes, dicentes : Cum quo loqueris, Pater? Respondit : Ecce angeli venerunt accipere me, et rogo ut permittant me modicum pœnitere. Et seniores dixerunt : Non indiges pœnitentia, Pater. Ait illis : Vere nescio me vel initium pœnitentiæ peregissem. Et cognoverunt omnes quia perfectus est. Et rursus repente facta est facies ejus sicut sol, timueruntque omnes. Qui dixit eis : Ecce Dominus noster venit, dicens, Afferte mihi vas electionis eremi. Et continuo reddidit spiritum, et factum est fulgur, et repletus est locus ille odore suavitatis.

ENARRATIO IN EVANGELIUM

ASSIMILATUM EST REGNUM COELORUM HOMINI REGI QUI VOLUIT RATIONEM PONERE CUM SERVIS SUIS. Matth. XVIII, 23-35.

CHRISTUS in evangelio hodierno per D similitudinem valde terribilem docet, hortatur ac præcipit ut unusquisque ignoret proximis suis qui sibi forefecerunt, ita ut cordialiter diligat eos, et culpam eis remittat. Itaque, sicut in Matthæo habetur, *Dixit Jesus discipulis suis parabolam*, id est similitudinem, *hanc : Assimilatum est regnum cœlorum homini regi*, id est, negotium seu regimen Ecclesiæ militantis simile est facto regis alicujus ter-

reni, *qui voluit rationem ponere*, id est computationem seu justam exactionem seu inquisitionem facere, *cum servis suis. Et quum cœpisset rationem ponere, oblatus est ei unus qui debebat ei decem millia talenta*. Juxta litteræ superficiem non est difficultas in ista parabola.

Porro juxta principalem spiritualemque intellectum, rex iste, est Dominus noster Jesus Christus Rex regum et Dominus universorum : qui licet in die generalis judi-

Apoc. xvii, 14; xix, 16.

cii aut iudicii particularis, quod fit unicuique dum moritur, nullum peccatum ejus quem judicat relinquat inultum, nec pœnitendi tribuat tempus secundum legem communem, tamen quotidie ponit rationem cum servis suis, id est fidelibus, per vicarios suos prælatos, et per Scripturarum admonitiones, per inspirationes quoque internas, instigando hominem ad sui ipsius discussionem : atque in hac rationis positione veniam ac pœnitendi tempus largitur. Sicque parabola ista de Christo exponitur. Per illum vero qui debuit decem millia talenta, intelligitur quicumque homo magnis ac multis peccatis obnoxius.

Quum autem talis transgressor non haberet unde redderet, id est, opera virtuosa ac meritoria non haberet quibus Deum placaret, et suæ justitiæ condignam honoris recompensationem pro illata injuria exhiberet. Hæc enim non habet qui in mortali est culpa, quia et si aliquando habuit ea, per sequens mortale peccatum sunt mortificata : per pœnitentiam tamen possunt denuo vivificari. *Jussit eum dominus ejus venundari*, id est pœnis addici ac dæmonibus tradi, ut pro culpa reciperet pœnam, quemadmodum in venditione unum datur pro alio. Dæmones quoque pro peccatore eis tradito, solvunt Deo nummum vindictæ, subserviando divinæ justitiæ in punitione damnati. Ista facit Christus quotidie per comminationem et prænuntiationem Scripturæ ac prælatorum Ecclesiæ. *Et uxorem ejus*, id est sensualitatem, *et filios*, id est opera mala, *et omnia quæ habebat in se*, quoniam omnia ista obligata sunt ad pœnam propter peccata, *et reddi*, id est divinæ justitiæ satisfieri pro peccatis illius.

Procidens autem, id est super genua sua ruens, vel se in terram prosternens, *servus ille*, id est peccator per pœnitentiam se Deo humilians, *rogabat eum, dicens : Patientiam habe in me*, id est, emendationem meam et satisfactionem clementer exspecta, nec statim me damnes, sed æterna supplicia quæ merui, in

A temporalem mihi pœnam commuta, *et omnia reddam tibi*, id est, pro universis peccatis meis satisfaciam tibi, et sicut te inhonoravi male agendo ac bona debita omittendo, ita te honorabo bene vivendo et bona neglecta recuperando. *Miseratus autem dominus Jesus servi illius, dimisit eum*, et omne debitum dimisit ei : sicque plus dedit quam servus petivit. Servus enim petivit non vendi et dilationem adipisci, sed dominus non solum non vendidit eum, nec solum concessit dilationem, B sed omne quoque debitum servo dimisit : quia quacumque hora peccator pro suis ingemiscit peccatis, omnia ei donantur, nec larga Dei pietas dimidiat veniam, sed cuncta mortalia simul dimittit ad minus quantum ad culpæ offensam. Potestque tanta esse contritio pœnitentis, et tantus fervor suæ dilectionis, tantusque pudor de propriis vitiis, quod omnia peccata sua ei etiam quantum ad pœnam mox dimittantur.

Egressus autem, id est mente a Deo C aversus, *servus ille*, liber a debito, sed rursus victus a vitio, utpote Deum relinquens per recidivum peccati, *invenit unum de conservis suis, qui debebat ei centum denarios*, id est modicum comparatione debiti sui quo ipse Deo suo fuit obligatus. Omnis etenim homo est debitor Dei propter beneficia ab eo suscepta, et propter peccata in eum commissa : nam propter beneficia tenetur Deo gratias agere ac servire ; propter peccata vero tenetur satisfacere ei pro injuria et offensa. D Habet etiam homo debitorem proximum suum qui peccavit in eum, vel alio modo aliquid ei tenetur ; sed debitum quo proximus obligatus est nobis, minimum est comparatione debiti quo Deo adstricti sumus, quia in Deum peccare tanto est gravius, quanto major est sanctitas et dignitas ejus præ omnibus. Ad quod insinuandum scriptum est primo Regum : Si peccaverit vir in virum, placari ei potest Deus ; si autem in Dominum peccaverit, quis orabit pro eo ? *Et tenens collum ejus, suffo-*

Ezech.
xviii, 21, 22.

1 Reg. ii, 25.

cabat eum, vitalem spiritum includendo, ne respiraret, dicens : Redde mihi quod debes. Hoc agunt crudeles, qui persolutionem debiti aut pro injuria satisfactionem ultra vires aut violenter a proximis suis exquirunt. Et procidens conservus ejus, rogabat eum, dicens : Patientiam habe in me, et omnia reddam tibi, id est, plene satisfaciam tibi. Ille autem noluit acquiescere deprecanti, sed abiit, et misit eum in carcerem, donec redderet debitum : in quo patet magna ejus crudelitas.

Videntes autem conservi ejus quæ fie-

Hebr. i, 14.

Apoc. xii, 9.

bant ab isto crudeli in suum conservum, contristati sunt valde : quoniam sicut ad caritatem pertinet proximis in bono congratulari, sic pertinet ad eandem proximis compati in adversis ; et venerunt, et narraverunt domino suo omnia quæ facta fuerant inter hos duos. Per servos istos intelligi possunt angeli sancti, qui omnes sunt administratorii spiritus : quorum unus in Apocalypsi ait Joanni, Conservus tuus sum, et fratrum tuorum. Hi tanquam diligentissimi fidelissimique custodes nostra considerant facta ; et sicut de nostro gratulantur profectu, ita de nostro defectu seu vitio metaphorice contristari dicuntur, quia per modum dolentis se habent, dum nostræ eis displicent culpæ. Hi narrant Christo, non ut ignorant, sed ut judicanti, verba et opera nostra, sicut Tobiae loquitur angelus : Ego obtuli orationem tuam Domino. Secundo, per servos intelligi possunt homines justi, judices ac prælati zelo caritatis et æquitatis succensi : qui videntes quomodo unus opprimat alium, Deo id conqueruntur, non zelo vindictæ, sed amore justitiæ, atque ut in præsentī castigetur ferox, ne pereat in æternum.

Tob. xii, 12.

Tunc, istis scilicet perceptis, vocavit illum servum crudelem dominus suus, videlicet Dominus Jesus Christus, qui quotidie quosdam per mortem vocat ad particulare judicium ; et ait illi : Serve nequam,

A id est nocive in proximum, et mihi tuo domino infidelis, omne debitum tuum dimisi tibi, quoniam rogasti me pro dilatione, et feci tibi plusquam postulasti ; nonne ergo oportuit et te, qui teneris facere alteri sicut tibi vis fieri, misereri conservi tui, sicut et ego tui misertus sum ? Istud utique oportuit te facere debito condecenciæ ac præcepti, necessitateque finis, quia aliter non potes salvari.

Matth. vii, 12.

Et iratus dominus ejus, videlicet Christus, qui irascitur, non per passionis commotionem, sed per justitiæ executionem seu pænæ inflictionem, tradidit eum tortoribus, puta dæmonibus, qui sunt infatigabiles impiorum punitores, saltem usque ad diem judicii, post quem omnes reprobi simul cruciabuntur pœnis inferni, non a se invicem, ut plurimi dicunt ; quoadusque redderet universum debitum, id est in æternum, quia damnati nunquam salubriter pœnitent, unde nec debitum solvunt satisfaciendo pro culpis. Sic et Pater meus cælestis, qui est Pater meus per generationem æternam ac naturalem, faciet vobis, mancipando vos pœnis æternis, si non remiseritis unusquisque fratri suo, id est proximo, de cordibus vestris, cordialiter diligendo injuriantem, et culpæ offensam dimittendo eidem.

Postremo videtur hic innui, quod peccata dimissa redeant in recidivante, quia de servo hoc nequam dictum est, quod dominus tradidit eum tortoribus, quousque solveret debitum universum, et subditur : Sic Pater faciet vobis. Sed ut communiter nunc tenetur, peccata dimissa non redeunt eadem, nec quoad culpam nec quoad pœnam, directe et integre, sed indirecte et aliquo modo, in quantum peccata sequentia graviora et damnabiliora sunt propter ingratitude indultæ pietatis et gratiæ, et propter recidivum in eadem mala, sicut et vulnera corporis reiterata sunt periculosiora.

SERMO SECUNDUS

QUAM NECESSARIUM SIT INJURIAM IRROGANTIBUS IGNOSCERE, ET MULTA
QUÆ AD HOC INDUCERE NOS DEBENT.

NON quæras ultionem, nec memor eris injuriæ civium tuorum. Lev. xix, 18.

Videmus in sæculo isto, quod prælati ac principes, atque communiter domini universi, valde libenter habent quod servi eorum conformant se voluntati eorum, sequendo eos sive in bono sive in malo. Ideirco in libro Proverbiorum Salomon loquitur : Rex impius omnes ministros habet impios. Siquidem simile applaudit suo simili. Ideo in Proverbiis asseritur :

Prov. xxix,
12.

Ibid. xxviii,
4.

Eccli. xiii,
20.

Qui derelinquunt legem, laudant impium. In Ecclesiastico quoque dicitur : Omnis caro ad sibi similem conjungetur, et omnis homo sibi simili sociabitur. Quum ergo Dominus Deus noster omnipotens, sit essentialiter caritas (quemadmodum ait Scriptura : Deus caritas est), per nullam virtutem homo ita suo fit similis Creatori sicut per caritatem. Caritas enim jungit amantem amato, et transformat unum in alium, facitque eos idem velle et idem nolle. Hinc Deus in suis ministris summe præcipit et requirit caritatem ad ipsum, deinde caritatem eorum ad invicem. Unde Christus

I Joann. iv,
8, 16.

Joann. xiii,
35.

Dominus noster : In hoc (inquit) cognoscent omnes quia discipuli mei estis, si dilectionem habueritis ad invicem. Porro caritas virtus est per quam unus alteri mente unitur, et bonum vult ei, volendo seu appetendo ei dona gratiæ ac virtutum in vita præsentis, bonaque gloriæ in futuro. Hinc mundi Salvator, unigenitus Filius Dei, in evangelio docet ac præcipit hodierno ut omni homini, quantumcumque forefecerit sibi ac suis, ignoscat homo, ita quod sincera caritate diligat eum, optando

omnem hominem in mundo hoc conversantem, quantumcumque sibi ac suis adversarium, caritative et sincere diligere : alias Christus non computat eum inter suos ministros. Præterea Christus Dominus noster est caput totius Ecclesiæ seu omnium electorum : oportet ergo ut omnes ejus ministri, per comparisonem ad ipsum, sint unum mysticum corpus, ac membra ad invicem. Sed nec unum mysticum corpus Christi, nec membra ad invicem esse possunt, nisi spiritualiter conjungantur, ita ut tam in Christo capite adunentur, quam inter se connectantur. Hanc autem adunationem et connexionem absolute et proprie nil facere potest, nisi caritas quæ est spiritualis dilectio. Dilectio demum dicitur quasi duo ligans seu duorum ligatio. Hinc itaque exigit Deus ut omnes ei veraciter servientes, se mutuo spiritualiter diligant, ut per hoc cum Deo et inter se uniantur. Si autem se mutuo diligant, certum est quod unus salutem optet alterius et oret pro eo, coopereturque ejus saluti pro posse, loco et tempore opportuno. Sed hoc adimplere non potest, nisi qui forefactoribus suis ignoscit. Nullus ergo in corde suo teneat iram, rancorem, amaritudinem, indignationem contra quemcumque, sed ad omnes ac singulos pie et caritative afficiatur, omniumque desideret ac pro posse procuret salutem.

Insuper ad hanc mutuam dilectionem, pacem, patientiam, mansuetudinem atque pacificam ad invicem conversationem multa nos debent inducere. Primo, quia (sicut jam tactum est) Deus hoc ipsum nobis præcepit, et specialissime id a nobis re-

Joann. xv,
12.

Ibid. xiii,
34.

I Cor. xiii,
4-8.

quirit. Hinc namque Salvator : Hoc est A
præceptum meum, ut diligatis invicem
sicut dilexi vos. Et alibi : Mandatum (in-
quit) novum do vobis, ut diligatis invicem
sicut dilexi vos. Ecce quam summe ac
seriosissime requirit Christus a nobis mu-
tuam caritatem. Certumque est quod ubi
exstiterit mutua caritas, erit et mutua pax
seu conversatio pacifica, mansuetudo, pa-
tientia, pietas, quum ad Corinthios dicat
Apostolus : Caritas patiens est, benigna
est; caritas non æmulatur, non agit per-
peram, non inflatur, non est ambitiosa, B
non quærit quæ sua sunt, non irritatur,
non cogitat malum; non gaudet super ini-
quitate, congaudet autem veritati; omnia
suffert; caritas nunquam excidit. Ecce
quanta bona facit in homine caritas, quam
plane non habet qui proximis non igno-
scit. Saluberrime ergo ac sapientissime
præcipit nobis unigenitus Filius Dei, ut
omni in nos peccanti cordialiter indul-
geamus.

Rom. v, 20.

Secundo, ad idem movere nos debet
consideratio bonitatis et misericordiæ Dei, C
videlicet quod ipse etiam impiissimis trans-
gressoribus tam pius et liberalis, dulcis
misericordissimusque consistit : nam per
tot annos sustinet eos in peccatis eorum,
et emendationem ipsorum exspectat, atque
indesinenter interim conservat eos in es-
se, et necessaria vitæ ipsis largitur, dona-
que gratiæ præbet eisdem, sed et multos
eorum convertit, et tantam eis tribuit gra-
tiam, quod ubi abundavit delictum, abun-
dat et gratia; item, quod Deus nobis ipsis
tantam misericordiam fecit, tam diu ac sæ- D
pe nobis in maximis pepercit peccatis, at-
que pro tantis malis, injuriis ac offensis
tot et tanta nobis retribuit bona. Nonne
Dominus Jesus Christus interfectores suos,
Annam, Caipham, Pilatum ac alios, post
suam crucifixionem multis permisit vive-
re annis, præstolans emendationem illo-
rum, quos uno valuit nutu occidere et
damnare? Imo et quosdam illorum in-
comprehensibili pietate convertit, quibus
et paulo ante passionem suam prædixit :

Quum exaltaveritis Filium hominis, id est, *Joann. viii,*
quum me in cruce suspenderitis, tunc co- 28.
gnosceitis quia ego sum. Ecce quam vere
et damnabiliter durus est, quem conside-
ratio horum ad ignoscendum proximis non
inducit.

Tertio, ad idem inclinare nos debet mul-
tiplex fructus quem ex ignoscentia ista
consequimur, quia per eam meremur pro-
priorum indulgentiam peccatorum, gratiæ
ac virtutum infusionem et incrementum,
Christi conformitatem, pacem et amici-
tiam : imo per hoc filii et amici Dei effi-
cimur, angelis complacemus, dæmonibus
prævaletur. Hinc Christus in Evangelio
loquitur : Dimittite, et dimittetur vobis; et *Luc. vi,* 37.
rursus, Diligite inimicos vestros, benefa- *Matth. v,*
cite his qui vos oderunt, et eritis filii 44, 45; *Luc.*
vi, 35.
Altissimi, quia ipse benignus est super
ingratos et malos. Unde in Ecclesiastico
habetur : Relinque proximo tuo nocenti *Eccli.*
te, et tunc deprecanti tibi peccata sol- xxviii, 2.
ventur.

Quarto, ad idem inducere debet multi-
plex, imo et ineffabile damnum quod in-
currimus non ignoscendo. Per hoc equidem
peccata nostra nobis imputantur, nec igno-
scuntur, omnique virtute et gratia spolia-
mur, dæmonibus subdimur, a Deo mane-
mus aversi; et nisi pœnituerimus, efficimur
in æternum damnati. Hinc loquitur Filius
Dei : Quum stabitis ad orandum, dimittite *Marc. xi,*
si quid habetis adversus aliquem; quod si 25, 26.
non dimiseritis, nec Pater vester qui in
cœlis est, dimittet vobis peccata vestra.
Insuper, quia incomparabiliter gravius at-
que frequentius in Deum peccavimus, quam
aliquis in nos, valde utique duri ac fatui
sumus, si proximis indulgere renuimus,
quatenus Deus indulgeat nobis. Dimitta-
mus ergo modicum, ut multa et gravia no-
bis indulgeantur; alioqui timeamus quod
in Ecclesiastico asseritur : Qui vindicari *Eccli.*
vult, a Deo inveniet vindictam, et peccata 4.
illius servans servabit. Homo homini ser-
vat iram, et a Deo quærit medelam? In
hominem sibi similem non habet miseri-
cordiam, et pro peccatis suis deprecatur

Altissimum? Sed et quam irrationabile et A enorme sit istud, constat ex eo quod subditur ibi: Quis exorabit pro delictis illius?

Eccli.
xxviii, 5.

Denique qualiter, quam prompte ac incessabiliter indulgendum sit proximis, constat ex eo quod dum beatissimus Petrus dixisset ad Christum, Domine, quoties peccabit in me frater meus, et dimittam ei? usque septies? hoc est, an proximo in me peccanti non nisi septies indulgebo? illi

Matth.
xviii, 21.

Ibid. 22.

Christus respondit: Non dico tibi, Usque septies, sed, Usque septuagies septies. Et ponitur ibi numerus determinatus pro numero indeterminato, ac si dicat: Quotiescumque peccaverit in te, ignosce ei, sicut et tu vis tibi a Deo ignosci quotiescumque in eum peccaveris. Verumtamen contra hæc objici potest. Si enim non licet vindicare injuriam, et si omni injurianti est ignoscendum, peribit pax communitatis, peribit rigor justitiæ, boni undique opprimuntur ac spoliabuntur, et filii iniquitatis audaciores fient ad opera pravitatis, nec stabunt judicia. Et respondendum ad omnia ista, quod semper dimittenda est culpa et caritas conservanda. Sed debitam pœnam dimittere in casibus multis non expedit, sicut jam tactum est: ut si ex pœnæ dimissione turbetur bonum commune, vel ordo pereat disciplinæ ac tenor justitiæ, seu alii scandalizentur, aut impius fiat ad peccandum procacior. Nempe in casibus istis infligitur ultio, non ex mala radice, sed zelo æquitatis atque affectu caritatis, ut reus in vita hac castigetur, ne in æternum damnetur. Aut si prorsus incorrigibilis est, ideo puniatur, ne diutius vivens gravius peccet et damnationem incurrat majorem, et ne commune bonum patiatur jacturam.

Postremo, pensemus quanta sit nostra perversitas. Nam quamvis omnia præinducta ita se habeant, nihilo minus multi pronissimi sunt ad indignandum, ad irascendum, ad vindicandum: imo pro modico verbo, signo seu ictu gravem cupiunt inferre vindictam, suisque conquerruntur amicis, propinquis ac notis, et ipsos ad similia inflammant peccata, ac sine mensura multiplicant mala. Alii multis precibus vix queunt induci ut ad aliquot dies ultionem suspendant, seu pacem concedant. O quale judicium, quam districtum et perhorrendum imminet istis, qui etsi nullum aliud haberent peccatum, istud solum faceret eos Deo penitus displicentes atque æterna damnatione condignos! Econtrario viri virtuosí et sancti injuriatoribus suis non solum non irascuntur, imo potius regratiantur, et in contumeliis suis ac adversitatibus gaudent: quemadmodum sanctus refert Gregorius de quodam religioso monacho, qui fuit in cœnobio sacrista, et fuit vir magnæ sanctitatis, fecitque miracula. Idcirco ad eum videndum multi quotidie confluebant. Erat autem parvæ staturæ. Quumque uno dierum inter alios venisset quidam vir rusticanus et rudis, et virum illum sanctum eminus conspexisset, despexit eum, et ait: Iste nihil habet de viro, cur ad istum videndum conveniunt homines? Hæc verba dixit tam alte quod omnes qui aderant eadem audierunt, similiter vir sanctus de quo loquebatur. Auditis igitur verbis istis, sanctus ille cucurrit ad eum qui dixit hæc verba, apprehenditque eum ac osculabatur, et dixit: Gratias ago tibi quia tu solus veritatem locutus es de me, et tu solus oculos habes apertos in me.

SERMO TERTIUS

DE CORREPTIONE FRATERNA ET RIGORE DIVINI JUDICII.

CORRIPIET me justus in misericordia et increpabit me; oleum autem peccatoris non impinguet caput meum. Ps. CXL, 5.

Quemadmodum in Matthæo docetur, occasio seu origo ex qua Salvator protulit parabolam evangelii hodierni, in qua jussit ut aliis ignoscamus, fuit præceptum quod de correptione fraterna proposuit, dicens : Si peccaverit in te frater tuus, vade et corripe eum inter te et ipsum solum. Quo audito, accedens Petrus ad Jesum, dixit : Domine, quoties peccabit in me frater meus, et dimittam ei ? usque septies ? Cui respondit Salvator : Non dico tibi, Usque septies, sed, Usque septuagies septies. Cujus verbi intellectus in præcedenti sermone est habitus. Huic demum responsioni Christus immediate subjunxit, Ideo assimilatum est regnum cœlorum homini regi qui voluit rationem ponere cum servis suis : quod est evangelium hodiernum. Expedi itaque aliquid dici de correptione fraterna, quia materia quotidiana ac practica est. Estque observatio hujus præcepti valde necessaria ad salutem et tam observanti quam aliis fructuosa, ob cujus transgressionem seu omissionem præcepti innumerabiles homines condemnantur.

Præcepit ergo Salvator unicuique nostrum, viro et feminæ, juveni ac seniori, subdito et prælato : Si peccaverit in te frater tuus, vade, corripe eum inter te et ipsum solum. In quibus verbis, per fratrem intelligitur quilibet proximus seu omnis Christifidelis, cujuscumque sit sexus aut gradus. Porro quod ait, In te, intelligi potest tripliciter. Primo, secundum Augustinum, In te, hoc est te sciente : quia

qui alio sciente peccat, quantum in se est illum scandalizat. Secundo, juxta Hieronymum, In te, hoc est directe contra te, non contra Deum directe, secundum quod quædam peccata fieri dicuntur in Deum, quædam in proximum, quum tamen omne peccatum sit aliquo modo in Deum, quoniam displicet ei et ejus præcepto contrariatur. Verumtamen peccata quæ sunt contra præcepta secundæ tabulæ, seu directe contra caritatem fraternam, dicuntur peccata in proximum; quæ vero sunt contra præcepta tabulæ primæ, seu contra fidem, spem vel caritatem, quibus immediate colitur Deus, dicuntur peccata in Deum, sicut infidelitas, desperatio, blasphemia, in quibus non oportet servare ordinem illum quem docuit ac præcepit Christus servandum in correptione fraterna. Tertio exponitur, In te, hoc est, te solum læserit. Si enim et alios læderet, vel coram illis peccaret, non servaretur ordo correptionis qui subditur.

Primo ergo corripiendus est proximus reus secrete, ne confundatur, exasperetur aut diffametur. Vitanda est equidem proximi diffamia quantum fieri potest : quoniam ex timore diffamiæ multi retrahuntur a vitiis; idcirco quum se viderint diffamatos, peccant sine rubore, fitque eis frons meretricis, quæ inverecundiam quasi characterem seu signum suæ prostitutionis portat in fronte. Hinc peccatori indurato inverecundoque dicitur apud Jeremiam : Frons mulieris meretricis facta est tibi, noluisti erubescere. In tantum enim peccatum rationem excæcat, quod homo de turpitudine vitiorum suorum non verecundatur, imo interdum inde se jactat et gloriatur, quemadmodum de gravissimis

Jer. III, 3.

Is. III, 9. peccatoribus dicit Isaias : Peccatum suum A
quasi Sodoma prædicaverunt, nec abscon-
derunt. De quibus in Proverbiis asseritur :
Prov. II, 14. Lætantur quum malefecerint, et exsultant
in rebus pessimis. Hæc, secundum B. Ber-
nardum, est iniquitas maxima; et nihil ita
offendit Altissimum, sicut de præteritis
vitiis non solum non pœnitere, sed etiam
gloriarī.

Matth.
XVIII, 15. Deinde subdit Salvator : Si te audierit,
hoc est, si proximus tuæ increpationi ca-
ritativæ acquieverit, lucratus es fratrem
tuum, hoc est, de peccati perditione et B

Ibid. 16, 17. dominatione diaboli eum eripuisti. Si au-
tem te non audierit, adhibe tecum unum
testem vel duos, id est, in præsentia unius
vel duorum testium corripe eum, ne cito

Deut. XIX,
15. coram omnibus diffametur, ut in ore duo-
rum vel trium testium stet omne verbum,
id est, per tot testes probetur quod delin-
quenti obicitur. Quod si eos non audierit,
qui tecum corripunt illum, dic Ecclesiæ,
hoc est prælato seu iudici aut toti con-
gregationi, quid ille commisit inique, aut
quid vitiose omisit, et quomodo correptionem
secretam testiumque inductionem
abjecit, in sua manens duritia. Si autem
Ecclesiam non audierit, sit tibi sicut ethni-
cus, id est gentilis, et publicanus, hoc est,
tunc omnino retrahe te ab eo.

Item advertendum, quod peccatum du-
pliciter consideratur. Primo, in quantum
nocivum est peccanti. Sicque peccantem
arguere, actus est caritatis, ad quem om-
nes tenentur, sicut ad caritatem : nam ista
correptio non est nisi remedium contra
peccatum. Secundo, consideratur pecca-
tum ut est aliorum scandalizativum ac
turbativum, inhonorativumque Dei. Et ita
peccantem corripere, est actus iustitiæ,
spectans præsertim ad præsidentes, quo-
rum est respicere ad bonum commune et
conservare legem atque tenorem ac rigo-
rem iustitiæ.

Præterea, quia præceptum de correptione
fraterna est affirmativum, obligat sem-
per, sed non ad semper. Hinc facienda est
correptio ista cum debitis virtutum cir-

cumstantiis, puta loco, causa, tempore,
modo intentioneque opportunis, secundum
quod expedit ad emendationem peccantis.
Unde correptio ista tribus modis omittit-
tur. Primo, meritorie et ex caritate, quan-
do videlicet tempus corripiendi congruum
expectatur, aut de graviore peccantis in-
duratione probabiliter formidatur. Nempe,
ut Salomon loquitur, Qui erudit deriso- *Prov.* IX, 7.
rem, ipse sibi injuriam facit; et, Non *Ibid.* XV, 12.
amat pestilens eum qui se corripit. Se-
cundo, omittitur vitiose, et cum mortali
peccato, ut dum ex cupiditate, aut timore
corporalis pœnæ temporalisve damni, aut
simili causa quæ non est caritati præfe-
renda, omittitur. Tertio, cum veniali pec-
cato, ut dum prædictæ causæ correptionem
istam non impediunt, sed retardant.

Insuper subditi superiores suos carita-
tive corrigere possunt ac debent in vitiis
manifestis correptioneque dignis, congruo
loco et tempore, cum humilitate et reve-
rentia, non procaciter aut proterve. Nam
et Moyses sanctus qui quotidie ad libitum
C loquebatur cum angelo, reprehensionem
ac informationem Jethro viri gentilis gra-
tanter ac patientissime assumpsit. Siqui-
dem in Exodo Jethro ait ad Moysen : Non *Exod.*
bonam rem agis; stulto labore consumeris *XVIII, 17, 18*
tu, et omnis populus tecum. Prælati ergo *et seq.*
non sint nimis magni et sapientes in ocu-
lis suis, sed subditorum suorum ac ali-
orum humilem correptionem, piam in-
formationem, caritativam exhortationem
gratanter humiliterque suscipiant, quum
in Proverbiis dicatur : Argue sapientem, *Prov.* IX, 8,
D et diliget te; doce justum, et festinabit ^{9.}
accipere.

Præterea, fraterna correptio, ut est actus
iustitiæ pertinens ad superiores, non est
omittenda ob id ne correptus fiat deterior,
quoniam talis correptio habet potestatem
coercendi per disciplinam. Idcirco per pœ-
nas compellendus est peccans, ut cesset a
vitiis, si aliter nolit desistere. Ex tali quo-
que correptione utilitas oritur communi-
tati, dum rigor iustitiæ observatur, aliique
exemplo puniti terrentur, ne agant similia.

Deinceps agnoscendum, quod quædam A peccata sunt publica : et in talibus providere oportet, non solum peccanti, sed etiam aliis, ne scandalizentur. Idcirco mox publice sunt redarguenda, juxta illud Apostoli ad Timotheum : Peccantem coram omnibus argue, ut ceteri timorem habeant. Quædam etiam peccata contrariantur veritati fidei, aut bono communi : et in talibus, quamvis occulta sint, statim ad publicationem est procedendum, ut si quis machinetur civitatem incendere, aut fidem aliorum corrumpere. Si tamen quis probabiliter putet, quod hujusmodi peccatorem possit per secretam correptionem emendare, potest sic facere.

Ex his itaque constat, quod peccantem corripere, actus sit caritatis. Si enim caritativum et pium est corporum mederi vulneribus, quanto magis pium et caritativum est animarum languoribus, id est peccatis, adhibere medelam per correptionem fraternam? Hinc loquitur Augustinus : Nescientes quis ad numerum prædestinatorum, et quis ad numerum pertineat reproborum, sic affici debemus caritatis affectu, ut omnes velimus salvari; ideoque fraternæ correptionis effectum omnibus debemus impendere sub spe divini auxilii. Et iterum : Si neglexeris (inquit) corripere, pejor efficeris eo qui peccat.

Sed incipiat quilibet a se ipso, propria vitia primitus emendando : qui enim in eisdem aut gravioribus est peccatis, indignus est alios increpare. Corripiens quoque, ex caritate, pietate seu æquitate, non ex vitiosa radice moveri debet ad increpandum. Ait namque Isidorus : Qui delinquentem superbo aut odioso animo corripit, non emendat, sed percutit; quidquid

protervus vel indignans protulerit animus, objurgantis est furor, non dilectio corrigentis. Verumtamen, eodem protestante doctore, qui pio verbo correptus non emendatur, est acrius increpandus.

Itaque potius eligat unusquisque a justo misericorditer increpari, quam oleo peccatoris impinguari, id est adulantium blandimentis liniri, eorumque verbis fraudulentè laudari : quia ut in Proverbiis dicitur, Meliora sunt vulnera diligentis, quam fraudulenta odientis oscula. Et ite-^{6.}

B rum Salomon ait : Melior est manifesta correptio, quam amor absconditus. Ideo loquitur Augustinus : Magis amat objurgator sanans, quam adulator dissimulans. Itaque paterfamilias quidquid in domo sua, præsertim in sobole sua, viderit inordinatum, corripiat et emendet, et ut hoc efficacius operetur, exemplariter conversari conetur.

Refert S. Gregorius, quod tempore suo fuit quidam Stephanus abbas, vir valde sanctus et virtute patientiæ singulariter decoratus, hominum vitans tumultus, et orationibus jugiter vacans. Cui si quis injurias fecit, injurianti maximas egit grates. Quumque moriturus esset, multi venerunt ad eum, ut tam sancto viro de hoc sæculo emigranti suas animas commendarent. Qui dum lecto ejus adstarent, quidam eorum angelos ingredientés oculis viderunt corporeis, alii nihil viderunt; sed omnes tanto timore percussi sunt, quod nullus eorum, egrediente anima illa sanctissima, illic potuit stare.

D Postremo possent hic plurima dici de rigore divini judicii; sed illa require in sermonibus circa evangelium in prima Adventus dominica.

1 Tim. v, 20.

Ps. cxl, 5.

Prov. xxvii, 6.

Ibid. 5.

AD RELIGIOSOS

SERMO QUARTUS

DE LAUDE FRUCTIBUSQUE CARITATIS.

HOC oro ut caritas vestra magis ac A plus in ejus operatione necessaria est
magis abundet in scientia et in om- rationis directio, ne caritatis fervor præ-
ni sensu. Philipp. i, 9. cipitet fervidum operatorem, magnitudi-
nem affectionis suæ sequentem. Hinc orat
et cohortatur Apostolus ut caritas nostra
magis ac magis abundet in scientia, id est
in discretione, eam dirigente, illustrante
ac moderante, quatenus sicut alibi ait, ra- Rom. xii, 1.
tionabile sit obsequium nostrum. Consue-
vit quippe Apostolus nomen scientiæ pro
discretione accipere, juxta quod asserit de
Judæis: Æmulationem Dei habent, sed non
Ibid. x, 2.
secundum scientiam. Potest nihilo minus
loco hoc, per scientiam, contemplatio in-
telligi divinorum quæ est doni sapientiæ
actus. De qua scientia legitur in Osee :
Scientiam Dei volui plus quam holocau- Osee vi, 6.
sta. Itaque hortatur Apostolus ut caritas
nostra actu ac lumine contemplationis quo-
tidie magis ac magis abundet, ut quemad-
modum Deum super cuncta diligimus, ita
ad ejus fidelem intuitum, amorosam con-
templationem, sinceram considerationem
frequenter et omni die frequentius exten-
damur ac elevemur, et figi ac stabiliri in
ea conemur, Deum quoque quotidie ar-
dentius diligendo, mereamur abundantius
illuminari ab eo, atque ad profundiorum
ipsius contemplationem sustolli, juxta il-
lud Ecclesiastici : Qui timetis Deum, dili- Eccli. ii, 40.
gite illum, et illuminabuntur corda vestra.
Deinceps, pulcherrime se invicem ornant
et complent dilectio Dei et contemplatio
ejus. Amor equidem movet et impellit ad
contemplandum, quoniam ubi amor, ibi
Matth. vi, 21.
oculus, et ubi thesaurus, ibi et cor; con-

Virtutes et dona Spiritus Sancti sibi in-
vicem concatenantur, nec in vita hac ab
invicem separantur. Unde quicumque ca-
ritatem sortitus est, ceteras quoque habet
virtutes et septem dona Spiritus Sancti
secundum aliquem gradum. Sed et quan-
to quis in caritate plus crescit, et in ea
perfectior redditur, tanto et aliæ virtutes
ac dona Spiritus Sancti in eo fortiores
efficiuntur. Nihilo minus unus electorum B
plus abundat in ista virtute, alter in illa,
prout de unoquoque Sancto cantatur : Non
est inventus similis illi. Porro, quum vir-
tutes connexæ sint, mutuo se fulciunt, ju-
vant atque perficiunt, quemadmodum in
exercitu unus alteri est præsidio. Nam et
ipsarum multitudo virtutum, in homine
est tanquam acies ordinata, contra aciem
vitiatorum rite disposita; et in acie illa
virtutum, caritas summum sortitur locum.
Ideo sicut in exercitu maxime providetur
ut ipse princeps aut rex suis militibus un- C
dique circumvalletur, juvetur ac protega-
tur, ita in acie virtutum specialissime est
prospiciendum ut caritas omnifarie mu-
niatur, custodiatur ac adjuvetur : quia si
ipsa tepescat, reliquæ virtutes languescunt;
si ferveat, ceteræ virtutes copiosius exci-
tantur ac tendunt in suos actus.

Denique, quum caritas inhæreat volun-
tati, quæ de se cæca perhibetur, et ab
intellectu illuminari ac dirigi indiget; id-
eo caritas quo exstat ferventior, eo am-

Eccli. xliv,
20.

templatio quoque dilecti, ejus dilectionem A nutrit et auget. Idcirco in Dei cognitione et contemplatione universa salus nostra consistit, secundum illud : Hæc est vita æterna, ut cognoscant te verum Deum. Ideo in his divinissimis actibus, scilicet actuali contemplatione dilectioneque Dei, exerceamus nos ipsos assidue cum profectu, atque ad hoc reliqua exercitia nostra omnia ordinemus.

Joann. xvii,
3.

Insuper agnoscendum, quod nulla forma, nulla virtus tam prompte agit ut caritas, cujus est ceteras virtutes impetrando movere et excitare in actum. Et satagendum est nobis ut caritas nostra quotidie amplius abundet in se ipsa, ut scilicet habitus caritatis per actus proprios et aliarum actus virtutum magis radicetur firmitusque stabiliatur in nobis. Quemadmodum enim caritas et virtutes aliæ debilitantur et tandem perduntur, si tempore opportuno non procedant in actum; sic quanto frequentius in suos exeunt actus, tanto in se ipsis fiunt intensiores et amplius abundantes, perfectæ ac divites, ad perfectiones quoque ac frequentiores actus producendos magis idoneæ : sicque virtutes et actus earum se mutuo nutriunt, augent, perficiunt. Hinc nunquam otio aut negligentiae locum demus, nullum horæ momentum infructuose pertranseamus, sed assuescamus corda nostra semper bonis actibus esse intenta, præsertim actibus caritatis et latriæ ac sapientiæ, Deum contemplando, laudando, orando ac diligendo, et gaudento ac quiescendo in ipso.

Amplius, laboremus ut caritas nostra assidue magis abundet in actibus suis elicitis, qui scilicet directe et elicitive progrediuntur ex ea, ut sunt Deum diligere, ipsum desiderare, ei inhærere, ipso frui, in eo quiescere et gaudere, ejus beatitudini congratulari. Idcirco in omnibus actibus istis satagamus quotidie plenius abundare, ad Deum ferventius adspirare, ipsum amorousius in corde constringere, in eo stabilis tranquillari, ejus immensæ felicitati et gloriæ cordialius congaudere, in actibus quo-

que fraternæ caritatis quotidie gratiosius abundare conemur.

Præterea studeamus ut caritas nostra in aliarum etiam virtutum actibus atque habitibus plus abundet, non solum « in scientia et in omni sensu », hoc est Scripturarum intellectu ac experimentaliter divinorum sapore, et spiritualibus sensibus animæ, ut oculis et auribus cordis Deum intueamur ac audiamus, sed item in mansuetudine, patientia, fortitudine, temperantia, justitia, pietate. Caritas namque patiens et benigna, mansueta, fortis, sobria, justa, pia

I Cor. xiii,

vocatur. Et enitendum est nobis ut caritas nostra quotidie patientior, benignior, mitior, fortior, temperantior, justior misericordiorque exsistat, sic ut caritate impetrante ac movente, harum actus virtutum copiosius exsequamur, passiones plenius refrenando, et actus morales perfectius exercendo. Tunc autem fit caritas nostra patientior, mitior, fortior, justior atque benignior, quando caritate nos excitante, in ipsa patientia, mititate, fortitudine, temperantia, justitia, pietate nos ipsos copiosius exercemus, et harum virtutum actus perfectius quotidie exhibere conamur desiderio caritatis perfectioris, hoc est propter hoc ut in caritate et ejus elicitis actibus perfectiores reddamur : quia ad caritatis culmen, puritatem et perfectionem pertingere non valemus, nisi in vera patientia, mansuetudine, temperantia, justitia, pietate, fortitudine eminenter crescamus, atque per eas passionum inordinationes ac impetus refrenemus, ne per eas, hoc est per iram, impatientiam, tristitiam, gulam, cupiditatem, injustitiam, crudelitatem, timorem, voluptatem, caritas exstinguatur aut minuat in nobis. Quidquid enim caritatis minorativum aut extinctivum est, tanquam maxima nocumenta infernalique venena nos abhorrere et vitare oportet, videlicet omne peccatum non solum mortale, quo exstinguitur caritas, sed etiam veniale, quo minoratur et fervor amoris deifici impeditur. Idcirco et exteriores sensus custodire oportet, ne

per eos vanitates passionumque motus, A cordis distractiones varias hauriamus. Con- formiter turpes imaginationes, inutiles phantasias et mentis evagationes semper et maxime in divinis oportet abjicere, et mentem in Domino ancorare, neque ad aliquam rem citra Deum affici inordinate, sed solum in Deo, neque superflua affectare aut curiosa sectari.

Deinceps, ita nos agere monet Aposto-
Philipp. i, lus, ut simus sinceri, id est coram Do-
10. mino puri. Siquidem beati mundo corde,
Matth. v. 8. quoniam ipsi Deum videbunt. Et sanctus B
 Deus animam sine peccato requirit ac di-
Sap. xiv, 9. ligit : odio enim sunt ei impius et impie-
Ps. v, 7, 6. tas ejus. Cui ait Propheta : Odisti omnes
 qui operantur iniquitatem ; neque habita-
 bit juxta te malignus, nec permanebunt

injusti ante oculos tuos. Ideo si a Domino
 Deo nostro cupimus diligere, ei uniri, eo
 æternaliter frui, odiamus et fugiamus om-
 ne peccatum propter ipsius fœditatem, et
 quia offensivum et inhonorativum est Dei
 ac elongativum ab eo. Verum quia non
 sufficit coram Deo sinceriter ambulare,
 nisi et circa proximos bene se habeat ho-
 mo (secundum quod alibi dicitur : Pro-
 videntes bona non solum coram Deo, sed
 etiam coram omnibus hominibus), ideo
 docet in epistola præsentis Apostolus ut
 etiam simus sine offensa, nulli videlicet
 offendiculum scandalumve ponentes. Imo
 exemplo et verbo et fama omnes, quan-
 tum in nobis est, semper ædificemus, sic-
 ut præcipit Christus : Sic luceat lux vestra
 coram hominibus.

Rom. xii,
17.

Matth. v,
16.

SERMO QUINTUS

QUAM NECESSARIA SIT AD SALUTEM REMISSIO INJURIARUM.

SERVE nequam, omne debitum dimisi C
 tibi, quoniam rogasti me : nonne ergo
 oportuit et te misereri conservi tui, sicut
 et ego tui misertus sum ? *Matth. xviii,*
32, 33.

Deus naturaliter bonus et pius, cujus
 bonitas ac sapientia finem non habet, sci-
 ens fragilitatem conditionis humanæ ad
 omne malum proclivem, regulam prorsus
 benignam et vere piissimam posuit homi-
 ni in proximo suo, ut scilicet ita se habeat
 circa illum quomodo vult circa se habere
 Deum. Unde et Christus in Evangelio lo-
 quitur : Eadem mensura qua mensi fue-
 ritis, remetietur vobis. Quum itaque tam
 frequenter tamque enormiter peccet ho-
 mo in proprium Creatorem, ut pro unius
 hominis peccatis satisfacere non sufficiat,
 secundum rigorem justitiæ, totus mundus,
 volens misericordissimus Conditor salutis
 remedium, salubre consilium, reconciliati-

Matth. vii,
2.

onis compendiosissimum modum confer-
 re hominibus, jussit et docuit ut invicem
 sibi ignoscant, se mutuo diligant, alter-
 utrum pro viribus benefaciant, quatenus
 Deus eis ignoscat, ipsos amet, eis suc-
 currat.

Et istud est superpiissimum Dei præ-
 ceptum atque facillimum documentum.
 Quum enim offensa in aliquem tanto sit
 gravior quanto qui offenditur fuerit di-
 gnior, et Deus omni creatura in infinitum
 exstet præstantior, constat quod peccatum
 in ipsum commissum, in quantum hujus-
 modi, hoc est secundum quod tale, infini-
 te sit gravius omni in proximum commis-
 so peccato, secundum quod tale est. Quod
 ideo addo, quia peccatum in proximum
 factum, in quantum est contra Dei præ-
 ceptum, etiam est contra Deum ; nec ut
 tale, in infinitum est minus peccatis per-
 petratis in Deum. Elucescit ergo quod in

hoc superpiissime se habeat Deus, quia hominibus propter ipsum ignoscentibus debitoribus seu forefactoribus suis, ipse quoque se præbet indulgere paratum. Quanta est igitur ingratitude, perversitas, duritia hominum miserorum, impatientium, iracundorum, superbiorum, vindictarum aut vindicare cupientium semetipsos, qui quum in multis ac gravibus offenderint Dominum Deum, volunt et petunt sibi divinitus indulgeri, quum tamen renuant forefactoribus suis etiam in parvis et paucis ignoscere ?

Unde, ad insinuandum quam graviora sint nostra peccata in Deum, quam proximorum nostrorum peccata in nos, in hodierno evangelio dicitur, quod servus regi judicanti, scilicet Christo, oblatus, debebat ei decem millia talentorum; servus vero huic servo obligatus et ei occurrens, debebat ei centum denarios. Quid ergo cum impatientia, ira, superbia, ultione, amaritudine, indignatione, aversione nostra meremur, nisi ut durissimum nobis a Deo fiat judicium, et ipse usque ad minimum nostra districtissime ulciscatur peccata, secundum quod in evangelio isto ait Salvator, quod iratus dominus tradidit servum crudelem, non ignoscentem, sed ferociter se habentem, tortoribus, quousque redderet debitum universum ?

Insuper, in ista parabola valde diligenter ac formidolose est advertendum, quod secundum evangelicam recitationem, dominus servo huic veniam et dilationem postulanti, universum debitum suum dimisit; sed quum servus iste suo conservo immisericors et rigorosus fuisset, dominus omne debitum quod ei ante dimiserat, repetivit et exegit, atque pro illo tortoribus tradidit illum. Ex quo doctores eliciunt, quod peccata dimissa, recidivantibus et ingratis denuo imputentur ac redeant. Et quamvis diversus sit modus assignandi qualiter redeant ac reimputentur, tamen sufficiat pro præsentis ad incutiendum nobis salubrem timorem, atque ut proni simus ad ignoscendum, quod aliquo utique

A redeant modo. Siquidem ad minus peccata sequentia et futura recidivantium crudelium et non ignoscentium, quamdam sortiuntur enormitatem ex ipsa ingratitude et recidivatione, quia et vulnera repetita plus nocent; et quanto alicui major a Deo fit gratia, tanto si fiat ingratus ac recidivans, vitiosior est ingratitude ac recidivatio sua.

Præterea, redeat unusquisque ad se, discutiatque se ipsum. Ecce in Baptismo, deinde in sacramentali confessione frequenter, et præsertim in Ordinis nostri professione, dimisit nobis elementissimus Deus peccata nostra. Si ergo non dimiserimus proximis nostris, replicabit et reimputabit Deus nobis, secundum quemdam modum, cuncta peccata præterita quamvis dudum indulta, et ipsam iram et impatientiam ac vindictam nostram in proximum. Sic enim in fine hujus parabolæ infert Salvator: Sic ergo et Pater vester cœlestis faciet vobis, si non remiseritis

Matth.
xviii, 35.

C Attendamus ergo diligentissime atque sæpissime multitudinem et magnitudinem præteritarum nostrarum culparum, et quam modica vel potius nulla sit injuria nobis a proximis nostris illata comparatione offensionum nostrarum in Deum: sicque promptissime ac purissime ignoscamus semper injuriatoribus nostris, quatenus Deus nobis ignoscat. Imo quia tam sæpe ac dire in Deum peccavimus, non reputemus nobis injuriam fieri quidquid adversitatis sive injuriæ acciderit nobis, sed dispensatione pietatis divinæ æstimemus nos in vita hac pro injuriis Creatori illatis puniri, nec digna tormenta recipere, imo excessibus nostris omnia hæc incomparabiliter esse minora: sicque in adversis lætemur, et Deo regratiemur, ac tribulatores nostros arbitremur purgatores nostros et utilissimos nobis. Hoc est quod Judith docet: Non ulci-

Judith viii,
26, 27.

servi qui corripimur, ad emendationem, et non ad perditionem nostram evenisse credamus.

Deinceps istud in Evangelio docet Salvator in pluribus locis, quamvis sub aliis et aliis verbis. Nam ait apud Matthæum :
Matth. v. Diligite inimicos vestros, benefacite his
 44. qui oderunt vos, et orate pro persequen-
 tibus et calumniantibus vos. Hujus quo-
 que suæ jussionis ac instructionis dignis-
 simam causam, et multo præclariorem
Ibid. 45. quam hic, subdit ibidem : Ut sitis (in-
 quiens) filii Patris vestri qui in cœlis est,
 hoc est, Deo patri et creatori vestro simi-
 les efficiamini, et adoptivi filii ejus, con-
 formando vos ei, qui adversariis suis,
 ingratis impiissimisque hominibus bene-
 ficia multa largitur, eosque ad salutem
 hortatur, et misericorditer præstolatur.

Quum ergo ista ad omnem pertineant Christianum, quanto magis ad religiosum? Quales ergo sunt religiosi nonnulli, qui heu! tam faciliter offenduntur, indignan-
Cf. l. VIII, tur, prattant* et irascuntur, imo et vin-
 p. 129 D', dicant se per se si possunt et audent?
 130 A. Alioqui conqueruntur præsidenti, et pe-
 tunt justitiam fieri, et frequenter injuriam
 sibi illatam recitando, plus quam veritas
 habet, exaggerant, mentientes et obloquen-
 tes, et periculosissime se habentes, nec
 tamen, suis passionibus obtenebrati, ad-
 vertunt sua pericula, sed diuturna in eis
 perseverat illati mali memoria, nec æqua-
 nimiter queunt eum a quo sibi irrogatam
 affirmant injuriam, intueri, affari, audire,
 imo verbis aut signis aversionem et indi-
 gnationem suam ei demonstrant, et quales
 sint intus pandunt foris, atque per hoc
 alios scandalizant, et contemptibiles red-
 dunt se ipsos. Hi ergo discant se ipsos
 cognoscere et deflere, ac protinus emen-
 dare.

Præterea, omnia jam præacta, videlicet mala illata dimittere, oblivisci, ac bona

A pro malis rependere, nos oportet, libentis-
 simeque debemus : primo, quoniam Do-
 minus Deus noster sic facit; secundo, quia
 et Christus sic egit in natura assumpta, in
 tantum quod pro crucifixoribus suis ora-
 vit; tertio, quia Deus præcepit et exigit
Luc. xxiii,
 34. istud a nobis; quarto, quoniam copiosis-
 simum ex hoc consequimur fructum, quia
 et filii Dei efficimur, et indulgentiam gra-
 tiamque consequimur magnam, ac Chri-
 sto assimilamur; quinto, quia nisi ita
 egerimus, multiplex et maximum incur-
 rimus damnum, quia peccata nostra no-
 bis replicantur præterita, et præsentia ac
 futura non dimittuntur, et horrendum
 Dei incidemus judicium, gravissime quo-
 que in æternum damnabimur. Hinc in
 Ecclesiastico legitur : Qui vindicari vult,
Ecclesi.
 xxviii, 1, 3, a Deo inveniet vindictam, et peccata illi-
 4. us servans servabit. Homo homini servat
 iram, et a Deo quærit medelam? In homi-
 nem sibi similem non habet misericordi-
 am, et pro peccatis suis deprecatur Altis-
 simum? Quod quam enorme, irrationabile
 C fatuumque consistat, subditur ibidem :
 Quis exorabit pro delictis illius? quasi
Ibid. 5. dicat : Tam graviter peccat ut pro eo vix
 possit orari.

Postremo, quam cito et indesinenter de-
 beamus injuriantibus indulgere, constat ex
 hoc quod Christus a Petro interrogatus,
 Domine, quoties peccabit in me frater
 meus, et dimittam ei? usque septies? re-
 spondit : Non dico tibi, Usque septies, sed,
Matth.
 xviii, 21, 22. Usque septuagies septies. In qua respon-
 sione ponitur numerus determinatus pro
 D indeterminato, tanquam dicat : Quoties-
 cumque peccaverit in te, ignosce ei, quem-
 admodum vis tibi a Deo ignosci quoties-
 cumque in eum peccaveris. Quæ quum ita
 se habeant, quid fiet de his qui nec semel
 volunt ignoscere? Si cum Christo cupimus
 coronari, non negligamus neque cessemus
 ejus vestigia imitari.

SERMO SEXTUS

DE REMISSIONE INJURIARUM EX SACRIS LITTERIS ET VERBIS SANCTORUM
ET CATHOLICORUM PATRUM.

TRADIDIT eum dominus tortoribus, A quousque redderet universum debitum : sic et Pater cœlestis faciet vobis, si non remiseritis unusquisque fratri suo de cordibus vestris. Matth. xviii, 34, 35.

Injurianti ignoscere, opus est patientiæ, sine qua salvari non possumus, Christo testante : In patientia vestra possidebitis animas vestras. Quocirca ait Bernardus : Qui patientiam non observat, perdet justitiam, perdet vitam, perdet et animam suam. Vide opera Christi ; flagellis cæsus, spinis coronatus, clavis confossus, affixus

Ibid. xxiii, 34.

patibulo, saturatus opprobriis, omnium dolorum immemor propriorum, orat pro interfectoribus suis sacrilegis : Pater, inquit, ignosce illis. Vide ergo ne per impatientiam pereas, sed pro Christo sustine universa, qui pro te sustinuit duriora, et apud quem patientia tua erit fructuosissima. Siquidem ipsemet Dominus Jesus Christus est nobis patiendi exemplum et patientiæ præmium, dicente Bernardo : Utrumque es mihi, Domine Jesu, videlicet speculum patiendi et præmium patientis.

Ps. cxliii, 1.

Tu doces manus meas ad prælium, exemplo tuæ virtutis ; tu post victoriam caput meum coronas tuæ præsentia majestatis. Utrumque fortiter provocat, vehementer

Cant. i, 3.

accendit. Trahe me post te, ut libenter te sequar, ut et gloriose te fruar. Sed pauci post te volunt ire, quum tamen omnes

Ps. xv, 11.

velint ad te pervenire, scientes quia delectationes in dextera tua usque in finem. Propterea volunt te frui, sed non ita imitari ; cupiunt conregnare, non compati. Sed si cupis præmium consequi, non cesses exemplum sequi. In omni tribulatione hæc duo nos consolentur, memoria domi-

nicæ passionis et spes futuræ beatitudinis.

Denique quid est quod in adversis sumus impatientes, injuriæ memores, ultionem optantes, atque de omnipotentis Dei injuriis innumerabiliter multis, incomparabiliter magnis, tam a nobis ipsis quam ab aliis ei illatis, parum aut nihil dolentes, neque nos ipsos condigne castigantes ? nisi quia privato et improbo ad nos ipsos reflexo amore existimus pleni, et a Dei amore pervacui. Ideo non est in nobis affectio boni honesti, sed proprii commodi, et inter eos annumeramur de quibus

ait Apostolus : Omnes quæ sua sunt quæ-
runt, non quæ Jesu Christi ; itemque, Erunt
homines se ipsos amantes, cupidi, elati,
inobedientes. Sed redeamus ad cor, et dili-
gamus super omnia pure integro corde
Deum, et nos ipsos sincere in ipso, de
Creatoris inhonationibus ingemiscentes,
et eas in nobis rationabiliter ulciscentes ;
atque nos ipsos omni confusione et pœna
judicemus condignos. Sicque non solum
a superioribus nostris cupiamus corripiri
omni die ac corrigi, sed a confratribus
quoque exerceri et increpari, et in omni
tribulatione patientes semper veraciter in-
veniri. Hoc quippe est se vere in Deo
diligere, quoniam istud saluberrimum no-
bis est.

Philipp. ii,

21.

II Tim. iii, 2.

Is. xlvii, 8.

Insuper sunt quidam prælati negligentes, remissi, non fervidi, ad se reflexi, non corde recti, in quorum persona ait Hieronymus : Nos in Dei injuria sumus benigni, et in nostris injuriis odia exercemus. Quocontra ait Ambrosius : Meam injuriam patienter sustinui, impietatem contra Deum ferre non potui. Hinc ait Chrysostomus : In propriis injuriis patientem esse

III Reg. xix,
10, 14.

Lev. xix, 18.

laudabile est, Dei autem injurias dissimulare impium est. Et denuo : Discamus (inquit) exemplo Christi, proprias injurias magnanimiter tolerare, Dei autem injurias nec usque ad auditum sufferre. Idcirco sacratissimus dixit Elias : Zelo zelatus sum pro Domino exercituum. Verumtamen istud ad præsidentes potissimum pertinet, quorum est ex auctoritate delinquentes corrigere. Nihilo minus in unoquoque nostrum sit rectitudinis amor, justitiæ zelus, fervor discretus; quoad Ordinis observantiam accendamus, contra transgressores caritative, compassive, juste et sapientialiter provocemur, et moderate ac fraterne corripiamus eosdem, propriamque in primis negligentiam vindicemus in nobis, et aliis exhibeamus nos exemplares. Impleamus quod per Moysen Deus præcepit, Non quæras ultionem, nec memor sis injuriæ civium tuorum : præsertim quum et Seneca naturali ratione inductus, loquatur, Turpe est, maxime homini virtuoso, refricare injurias, et odiorum sopitos cineres denuo suscitare. Nempe qui alicui injuriatur, sibi ipsi potius nocet, secundum quod iterum asserit Seneca : Injuria injuste irrogata, ejus infamia est qui fecit. Verum sunt aliqui qui beneficii sibi impensi cito obliviscuntur, injuriæ jugiter recordantur, in quibus Senecæ illud impletur : Memoria beneficiorum fragilis, injuriarum tenax. Nos autem humanam fragilitatem pensantes, injurias nobis illatas quantum possumus excusemus, beneficiorum semper memores simus, nec propter sequentes injurias priora beneficia alicujus oblivioni tradamus.

Insuper, quam detestanda ac vitiosa, quam damnabilis et nociva sit illatæ offensionis seu injuriarum memoria, pandit Climacus, dicens : Memoria malitiæ, id est mali irrogati sive injuriæ, est furoris consummatio, vitiorum custodia, justitiæ odium, virtutum perditio, sagitta et rubigo venenumque animæ, vermis mentis, orationis confusio, obsecrationis decisio, alienatio caritatis, clavus cordi infixus, non

A delectabilis sensus in amaritudinis delectatione amatus, id est non jucunda interior sensatio, quæ tamen quasi bona amatur in delectatione (id est complacentia) amaritudinis tali memoriæ injuriarum annexa; indesinens peccatum, non dormiens iniquitas, transgressio quotidiana continuaque malitia, tenebrosus ac triste peccatum. Qui iram a corde suo repellit, memoriam mali illati occidit. Possidens caritatem, expellit ultionem; qui vero inimicatur, importunos labores sibi ipsi accumulatur. Tu qui memor es malitiæ, demonum malitiæ memorare; et qui homini inimicitias servas, inimicare corpori tuo semper. Siquidem imprudens, irrationalis et dolosus amicus est caro, et fota seu delicate nutrita maxime lædit. Memoriam malitiæ confundat oratio Jesu Christi, videlicet Oratio dominica, in qua dicitur : Dimitte nobis debita nostra, sicut *Matth. vi, 12.* et nos dimittimus debitoribus nostris. De quo dixit in cruce : Pater, ignosce illis. *Luc. xxiii, 34.* Quam orationem, malorum memores, cum ipso dicere non valemus. Quando contra passionem et impatientiam propriam certans, non potes eam perfecte dissolvere et abjicere, saltem ore pœnitentiam age, adversario tuo veniam postulando, aut te ei aliter reconciliando, ut super hypocrisis tua coram illo ostensa multum erubescens, ipsum tandem perfecte diligas atque suscipias, quasi ab igne ita a conscientia tua punctus et victus. Cognosces tunc te ab hac putredine in melius commutatum, non quando pro contristante et persequente te oras, nec quando ipsum donis remuneras, neque dum ipsum ad mensam suscipis; sed quando ipsum corporali aut spiritali tribulatione percipis corruisse, et super ipso sicut super te ipso dolueris atque ploraveris, tunc vere immemor malitiæ eris. Solitarius malitiæ memor, est quasi aspis nidificans, circumferens in se ipsa venenum mortiferum. Abjiciens malitiæ memoriam, inveniet indulgentiam; adhærens autem huic memoriæ, privatur propitiationibus. Do-

loribus et sudoribus quidam propter indulgentiam impetrandam afflixerunt se ipsos; sed vir malitiæ immemor, præantecipavit et prævenit eos. Argumentum nobilis ac probatæ pœnitentiæ, est oblivio malitiæ; qui inimicitiam detinet et pœnitere apparet, similis est ei qui se in somnis currere putat. Ecce quanta mala scribit vir iste totus profundus et spiritualis, de memoria illatæ injuriæ, et quanta bona de oblivione et remissione ipsius.

A Vitemus ergo pessimum vitium, quod sæpius usque ad spirituales viros extenditur, et nec verbo, nec signo, nec facto, nec taciturnitate, nec beneficii subtractione aliquem perturbemus, gravemus, aut propriam ulciscamur injuriam : imo in bono malum vincamus, et pro maledicto ac persecutione benedictionem ac beneficentiam rependamus, primo et maxime intuitu et amore Domini Dei nostri, cui honor et gloria per infinita sæcula. Amen.

Rom. xii,
21; *1 Petr.*
iii, 9.

DOMINICA XXIII POST TRINITATEM

ENARRATIO IN EPISTOLAM

IMITATORES MEI ESTOTE, ET OBSERVATE EOS, ETC. Philipp. III, 17-21; IV, 1-3.

APOSTOLUS in præsentī nos hortatur A epistola ut ipsius sequamur vestigia : *Imitatores, inquit, mei estote*, id est, virtuosa opera mea sequamini in omni humilitate, mansuetudine, caritate, etc., *et observate*, id est, diligenter considerate ac sequi curate, *eos qui ita ambulant*, id est, taliter vivunt, *sicut habetis formam nostram*, id est modum ac regulam vitæ nostræ, quia ex verbis et scriptis atque operibus meis scitis qualis sit conversatio nostra. Unde ad Corinthios ait Aposto-
lus : Quales sumus in verbis absentes, ta-
les et in facto præsentēs.

II Cor. x, 11.

Matth. vii, 13.

Multi enim ambulant per latam viam quæ ducit ad mortem, quos sæpe dicebam vobis, dum eram vobiscum (nunc autem et flens dico, quia tam eis quam his qui falluntur ab ipsis, lacrimose condoleo). Itaque dico eos esse inimicos crucis Christi, id est adversarios crucifixi, quia tam verbis quam factis sunt Christo contrarii, falluntque plurimos. Isti præsertim fuerunt hæretici qui legalia cum Evangelio observanda docebant. Quorum finis interitus, id est, finis seu finalis eorum merces, erit æterna damnatio. Quorum deus venter est, id est, vitiis carnalibus ita deserviunt quasi in eis sit hominum salus, et proprium ventrem plus amant et colunt quam Deum. Et gloria in confusione ipsorum, id est, vitiosa gloriatio qua ad tempus exsultant, erit confusibilis eis in divino iudicio, eritque eis causa æternæ

confusionis; *qui terrena sapiunt*, id est, in sensibilibus magis quam in spiritualibus delectantur.

Nostra autem conversatio in cælis est ratione objecti, id est, per contemplationem et sanctam dilectionem Deo ac cælestibus inhæremus. Ibi enim est noster thesaurus, ergo et cor nostrum. Unde etiam ^{Matth. vi, 21.} *Salvatorem exspectamus Dominum nostrum Jesum Christum venturum ad universale iudicium, et item particulare ejus præstolamur iudicium. Denique quorum conversatio est cælestis, secure exspectant Christi adventum. Qui reformabit corpus humilitatis nostræ, id est, humile et corruptibile istud corpus nostrum in die iudicii suscitabit, atque ad pristinam formam sive effigiem reparabit, configuratum corpori claritatis suæ, id est, ita quod tunc simile erit glorificato ac splendidissimo corpori Christi, quia in corpore glorioso Sancti resurgent. Vel ideo ait, « configuratum corpori claritatis suæ », quoniam sancti viri in vita hac per labores, abstinentias, vigiliās, disciplinas corpora sua affligunt, sicque assimilantur corpori Christi propter nos multipliciter passo. Sic igitur faciet Christus secundum operationem virtutis suæ, qua possit etiam subjicere sibi omnia, id est secundum suæ omnipotentiae efficientiam, quia potest facere quidquid sibi placuerit.* ^{Sap. xii, 18.}

Itaque, fratres mei carissimi propter bona gratiæ in præsentī, et desideratissi-

mi propter bona gloriæ in futuro; *gaudium meum*, id est materia seu objectum spiritualis gaudii mei, quia de vestro profectu et gratia lætor in Domino; *et corona mea*, id est causa coronationis meæ in cælo, quoniam bona vestra redundant in me, et particeps ero meritorum vestrorum ac præmiorum tanquam doctor et prælatus vester; *sic state in Domino, carissimi*, id est, stabiliter perseverate in bonis. *Evdiam rogo et Syntychen deprecor id ipsum sapere in Domino*, id est idem sentire cum aliis sanctis. Has duas devotas matronas Apostolus exprimit nominatim, quia fuerunt notabiles, et fidelibus ministraverunt necessaria vitæ.

Etiam rogo et te, Germane compar, id est, collega in Christo. Vir iste nomine Germanus, fuit talis ac tantus in gratia, quod Apostolus vocat eum comparem suum seu socium, sicut et Philemonem ac Titum. *Adjuva illas*, id est, præfatas feminas in Christo conforta, *quæ mecum laboraverunt in Evangelio*, id est in prædicatione evangelicæ legis : non quod feminae istæ prædicaverint publice, quia

Philem. 17;
II Cor. VIII,
23.

A mulierem, inquit Apostolus, docere non permitto, sed evangelizanti Apostolo necessaria præbuerunt; *cum Clemente*, id est etiam Clementi, *et ceteris adiutoribus meis* collaboraverunt feminæ illæ, necessaria vitæ eis ministrando, sicut et mihi; *quorum nomina sunt in libro vitæ*, id est in æterna prædestinatione conscripta. Hoc enim Apostolus ex revelatione certitudinaliter scivit, quod prædestinati fuerunt; vel si sibi revelatum non fuit, tamen aliunde multum probabiliter id cognovit. Porro liber vitæ, secundum doctores, in Deo metaphorice dicitur. Quemadmodum enim homo eos conscribit qui ad ipsum specialiter pertinent, sic Deus dicitur conscripsisse electos. Quæ conscriptio non est nisi divina prædestinatio, seu firma electorum notitia in mente divina. Et quum dicitur liber vitæ, intelligendum est de vita gloriæ. Item dum dicitur, « nomina » scripta « sunt in libro vitæ », intelligendum est de nominibus nominatis, videlicet ipsis personis per nomina nominantia designatis. Unde loquitur Christus : Gaudete quia nomina vestra scripta sunt in libro vitæ. *Cf. Luc. x,*
20.

SERMO PRIMUS

QUOMODO CONVERSATIO NOSTRA DEBEAT ESSE IN COELIS, UT CARITAS NOSTRA IN DIES
MAGIS MAGISQUE ABUNDET, ET DECLINANTES A MALIS FACIAMUS BONA.

NOSTRA conversatio in cælis est. *Philipp.* III, 20.

Augustino testante, verius est anima ubi amat, quam ubi animat, hoc est, verius est in re dilecta quam in proprio corpore. Amor etenim fervens amantem in amatum transponit, et efficit eos quodammo-
do unum. Hinc amicus dicitur, alter ego. Quum igitur Deus in cælo potissimum esse dicatur, merito conversatio perfectorum Christifidelium dicitur esse in cælis : ibi enim sunt animæ eorum juxta modum

prædictum. Et ad hoc hortatur nos Christus : Nolite (inquiens) thesaurizare vobis thesauros in terra, thesaurizate autem thesauros vobis in cælo. Et rationem subjungit : Ubi enim thesaurus tuus, ibi est et cor tuum. Ac si dicat : Ex quo debetis cor vestrum semper habere fixum in cælo et non in terra, propterea colligite atque reponite vobis thesauros in cælo, non in hoc mundo, hoc est, virtuosius operibus inhærete, et cumulum meritorum acquirite, et ista in divinæ pietatis conspectu relinqui-

Matth. VI,
19, 20.

Ibid. 21.

te, non in vita præsentī nec ab hominibus mercedem quærendo, sed a Deo dumtaxat in cœlo. Itaque, sicut in terra thesaurizare, est pecuniam adunare, ita thesaurizare in cœlo, est æternæ beatitudinis merita congregare, indeque præmium præstolari de manu Omnipotentis. Hæc una est ratio cur conversatio Christifidelium perfectorum dicitur esse in cœlis.

Alia ratio est, propter conformitatem actuum eorum cum actibus civium superiorum, quorum actus sunt, supergloriosissimum Deum clare et incessabiliter contemplari, ferventer inavertibiliterque diligere, incessanter laudare, admirari ac honorare, et ei in cunctis promptissime obedire. His sacratissimis actibus se totis viribus viri perfecti conformant, et perfectioni patriæ quotidie propinquare nituntur, in caritate ac ceteris gratiæ donis proficiendo. Homines ergo perfecti Deum pro modulo suo, prout in isto fieri potest exsilio, clare, etsi non indesinenter, tamen frequenter, contemplantur, ferventer ac fortiter diligunt, sæpissime laudant, maxime admirantur, et ei in cunctis prompte obediunt. Hinc in talium persona ad Corinthios ait Apostolus : Nos omnes revelata facie, id est illuminata mente, gloriam Domini speculantes, in eadem imaginem transformamur a claritate in claritatem, tanquam a Domini Spiritu. Hoc, quantum ad contemplationem. Quantum vero ad dilectionem, docet ac monet Apostolus ut caritas nostra semper magis ac magis abundet. Et denuo loquitur : Quis nos separabit a caritate Dei ? Quantum autem ad continuam Dei laudationem, ait ad Hebræos : Per Christum offeramus hostiam laudis Deo semper ; et Propheta : Benedicam Dominum in omni tempore, semper laus ejus in ore meo.

Quoniam itaque talis fuit conversatio beatissimi Pauli apostoli, rite hortatur nos ut ipsum imitemur in omni caritatis fervore, humilitatis profunditate, patientiæ mansuetudinisque vigore, in Dei laudatione ac veneratione in omnibus. Nec

solum istud hortatur, sed etiam ut consideremus eos qui juxta suam doctrinam suæque vitæ maneriem conversantur, ut sequamur et illos : quoniam tales aliqui sunt semper in mundo et frequenter nobiscum, quorum exemplis accendi quotidie debemus ad meliora. Consideremus ergo virtutes et bona exercitia proximorum nostrorum Deum timentium, quorum unus magis abundat in virtute et gratia ista, alter in illa. Idcirco ab uno discamus caritatis fervorem ac puritatem, ab alio humilitatem, ab alio patientiam, ab alio castitatem, ab alio misericordiam, ab alio justitiam, ab alio devotionem, orationum instantiam, meditationum sinceritatem. Sic fecit sanctissimus pater noster Antonius, qui tanquam prudentissima apis, ab unoquoque Fratre devoto didicit, collegit et hausit virtutem et gratiam in qua Frater ille aut ille amplius abundavit. Sed, heu ! multi sunt nimis perversi, qui bona aliorum interpretantur in pejus, et melioribus obloquuntur, aliorumque defectuositates et culpas observant, memoriæ imprimunt, aliis recitant, atque stercorem nidum in proprio construunt corde, similes brutis quæ pascuntur stercoribus. Verum homines boni, virtutes et dona ac opera virtuosa quæ in se ipsis non habent, in aliis amant, laudant ac venerantur, atque per hoc ad similem gratiam disponuntur.

Insuper docet Apostolus cur necessarium nobis sit ipsum sequi ac alios virtuosos : quia jam multi sunt per vitiorum itinera gradientes, qui inimici sunt Christi, quorum deus est venter eorum, quorum vana gloria in æternam ignominiam tristitiamque vertetur. Ecce istud, prohi dolor ! jam nimis impletum est. Jam enim tam vitiosa est Christianorum vita, ut juxta verba Bernardi, contra Christum conjurasse videatur universitas populi christiani. Heu, qualis est nunc vita clericorum, vita sacerdotum, vita quoque eorum qui religiosi vocantur ! Sed et majorum conversatio prælatorum qualis sit, quis igno-

II Cor. III,
18.

Philipp. I,
9.
Rom. VIII,
35.

Hebr. XIII,
15.
Ps. XXXIII, 2.

Philipp. III,
18, 19.

rat? Quid itaque mirum si laicorum ac A vulgarium hominum vitiosa sit vita? Istud deplorandum est magis quam describendum, et incessanter ac ardentissime invocandus est Deus, ut Ecclesiam suam misericordissime et superpiissime adspicere, visitare, reformare dignetur in omni gradu, statu, conditione et ordine. Verumtamen quanto jam magis abundat iniquitas, quanto plures et sublimiores sunt qui alios scandalizant, quanto innumerabiliores sunt qui peccandi præbent audaciam, imo quanto in præsidentibus aliosque docentibus B vitiosior atque carnalior vita apparet, tanto plus necessarium est homini animam suam salvare volenti, Deum habere præ oculis, ejus auxilium jugiter implorare, bonos adspicere, et eorum sequi exempla. Itaque qui Deo placere desiderat, a pravorum hominum comessionibus, potationibus, luxuriis, ludis, loquacitatibus, superbiis, negligentis, acediis ceterisque peccatis se abstrahat.

Hebr. x, 29.

Judæ 12, 13.

Denique, nonne homines impii et carnales, qui sua vitiosa scandalosaque vita C non proprias tantum animas, sed et aliorum occidunt, tamque ingrati et rebelles sunt, merito inimici crucis Christi vocantur? Cujus passionem, crucem et sanguinem pro nihilo ducunt, et fructum dominicæ passionis in se ipsis cassant atque in aliis : imo, secundum Apostolum ad Hebræos, isti Filium Dei conculcant, et sanguinem testamenti pollutum ducunt, et spiritui gratiæ contumeliam faciunt. O quam multi sunt modo etiam ex his qui religiosi et spirituales videntur, quorum tamen deus venter est, qui gulæ atque luxuriæ inquinamenti fœdantur, qui terrena et carnalia magis quam cœlestia ac spiritualia sapiunt, amant, cogitant, amplectuntur, quorum finis erit infernalis interitus æternalisque cruciatus ! De quibus Judas ait : Hi sunt in epulis suis convivantes sine timore, semetipsos pascentes, nubes sine aqua, arbores autumnales, infructuosæ, bis mortuæ, fluctus feri maris, despumantes suas confusiones, quibus

A procella tenebrarum conservata est in æternum. Præterea horum corpora Christus in die judicii corpori suo clarissimo non configurabit, sed erunt eorum corpora tenebrosa, passibilia, grossissima atque gravissima, magisque fœda ac turpia quam dum pro media parte fuerunt a vermibus in sepulcris corrosa. Sed abstinence ab universis vitiis istis, et sobrietati ac castitati, ceteris quoque virtutibus viriliter studeamus. Consideremus quam nihil sit vitæ hujus duratio comparatione duratio- B nis æternæ quæ imminet nobis, et quam indubitantissime cito habebimus sive in summa felicitate et gloria æternali, sive in summa miseria et pœna, heu ! infernali. Si non volumus condemnari cum multis, sed salvari cum paucis, non vitia plurimorum, sed virtutes sectemur paucorum. Non permittamus nos seduci a pravis et intimatoris hominibus, ne cum perver- sis pervertamur, sed Deo fortiter adhæ- reamus.

Ps. xvii, 27.

Legitur in Genesi, quemadmodum Jo- C seph filius Jacob patriarchæ, a fratribus suis venditus fuit principi militiæ Pharaonis. Et erat in domo ac regno gentilium, ubi nec vestigium fuit cultus divini, sed serviebant idolis universi : et tamen Joseph soli vero Deo servivit, nec potuit unquam seduci ab illis, quamvis adhuc adolescentulus esset. Denique, quum præ- positus factus esset totius substantiæ domini sui, et divitiis abundaret, essetque pulcherrimus juvenis, uxor domini sui quotidie invitabat et alliciebat eum ad committendum adulterium secum, dicens ad eum : Dormi mecum. Et tamen sanctus Joseph tam justus, castus timoratusque fuit, quod nunquam acquievit dominæ suæ, sed castissimus virgo permansit quousque accepit uxorem. Insuper a domina sua falsissime accusatus quod voluerit eam opprimere, atque ob hoc injustissime in- carceratus et valde diu in carcere tentus, ad minus per tres annos vel circiter, inviolabilem fidem Deo servavit, nec ab ejus cultu recessit, sed patiens fuit in omni-

Gen. xxxvii.

Ibid. xxxix.

bus, quousque placuit Deo ejus fidelitatem, patientiam, castitatem, caritatem et justitiam remunerare. Hujus ergo sancti viri exemplo, discamus Deo firmiter adhærere, neque iniquis ad vitia consentire.

ENARRATIO IN EVANGELIUM

ABEUNTES PHARISÆI, CONSILIUM INIERUNT, ETC. Matth. XXII, 15-22.

HISTORIA evangelii hodierni contigit in hebdomada passionis Christi, videlicet die sequente post dominicam Ramis palmarum. Quum enim die illo sequente Christus multipliciter vicisset ac confudisset principes sacerdotum, Pharisei conati sunt Christum sua calliditate circumvenire ac fallere. Unde nunc dicitur : *Abeuntes Pharisei*, id est, a corporali Christi præsencia se subtrahentes et seorsum euntes. Stabant equidem coram Christo cum principibus sacerdotum, sed illis convictis, callide abierunt, et inter se contulerunt quomodo possent decipere Christum. Ideo subditur : *consilium inierunt, ut caperent Jesum in sermone*, id est, in sua responsione reprehenderent eum.

Et mittunt ei, id est ad eum, *discipulos suos cum Herodianis*, id est militibus Herodis ac stipendiariis ejus. Quidam per Herodianos intelligunt Judæos qui solvebant tributa prout Herodes ex commissione imperatoris exegit, quos Pharisei Herodianos despectively vocabant. Iste Herodes fuit filius Herodis qui occidit infantulos. Denique Pharisei in propria persona non iverunt ad Christum, ne eis visis se observaret; sed mittebant discipulos suos, quos Christo putabant ignotos, ut Christus mali nil suspicans loqueretur liberius.

Dicentes. Verba sequentia dixerunt discipuli Phariseorum, prout Pharisei formam eis præfixerant. *Magister, scimus quia verax es* veritate vitæ, recte vivendo, *et viam Dei*, id est divina præcepta ac cetera quibus homo complacet Deo atque

conjungitur, *in veritate doces*, absque admixtione erroris. *Et non est tibi cura de aliquo*, id est, de nullo habes timorem inordinatum aut sollicitudinem superfluum; *non enim respicis personam hominum*, nec personæ intuitu, nec propter ejus humanam affectionem, laudem seu commoditatem humanam, recedis a veritate. His præconiis simulatis nitebantur animum Christi mollificare et sibi allicere, ut responderet ad voluntatem eorum.

Dic ergo nobis quid tibi videtur. Licet census, id est tributum, *dare Cæsari, an non ?* Pompeius consul Romanus, Judæam subjugavit Romanis. Quo facto, promiserunt Judæi tributum solvere Romanis, tanquam defensoribus rei publicæ et conservatoribus pacis communis. Postea vero a quodam Juda Galilæo inducti sunt aliqui Judæorum ad asserendum quod liberi essent a legibus Romanorum, nec legibus subjacerent humanis, eo quod legem haberent divinam, Deoque solverent decimas atque primitias. Alii vero Judæi senserunt oppositum. Et ista dissensio inter eos diu duravit. Ideo Pharisei quæstionem hanc Christo proposuerunt, ut quidquid responderet, reprehenderetur. Nam si dixisset census non esse solvendum imperatori, mox tanquam Romano rebellis imperio, ab Herodianis his caperetur. Unde apud Lucam legitur : *Miserunt insidiato-* Luc. xx, 20. *res*, qui se justos simularent, ut caperent eum in sermone, et traderent illum principatui et potestati præsidis. Si vero diceret esse solvendum, videretur divino

derogare honori et libertati populi Dei. A Verumtamen Pharisæi magis optabant a Christo audire non esse solvendum, ut traderent eum Romanis ad occidendum.

Cognita autem Jesus nequitia, id est simulatione et fraudulenta machinatione, eorum, ait : Quid me tentatis, hypocritæ ? Recte vocavit eos hypocritas, qui aliud erant, et aliud simulabant : nam, ut Lucas ait, justos se simulabant, quum pessimi fuerint. Porro tentare, est experimentum de aliquo sumere : et quando id fit intentione fallendi sive nocendi, vocatur B tentatio vitiosa, qua dæmon et mundus justos nunc tentant. Sicque isti tentabant Christum. Non enim sciscitabantur ut discerent veritatem, sed ut respondentem ex propria responsione gravarent. Ostendite mihi numisma census, id est nummum qui solvitur annuatim pro censu. At illi obtulerunt ei denarium. Et ait illis Jesus : Cujus est imago hæc, et superscriptio, id est, quem repræsentat imago nummo impressa, et superscriptio exarata in eo ? Non ex ignorantia hoc quæsivit, sed C ut juxta eorum responsionem eis pruden-

ter ac irreprehensibiliter responderet, sicque confunderet eos ac superaret. *Dicunt ei : Cæsaris, puta Tiberii, sub quo contigit istud, et sub quo passus est Christus. Tunc ait illis : Reddite ergo quæ sunt Cæsaris, Cæsari, utpote census, tributum et subjectionem in exterioribus ; et quæ sunt Dei, Deo, id est, quæ Deo debentur solvite ei, videlicet oblationes, et cetera quæ in lege divina jubentur, præsertim cordialem subjectionem. Hæc autem subjectio Judæorum in temporalibus et corporalibus sub Romanis, non derogavit spirituali libertati et subjectioni eorum sub Deo.*

Et audientes responsionem Christi irreprehensibilem, mirati sunt. Secundum Hieronymum, mirabantur quod eorum caliditas non invenit insidiandi locum, id est, quod non prævaluit obtinendo intentum. Potius tamen mirabantur quod Salvator tam sapienter irreprehensibiliterque respondit. Unde alibi legitur : Mirati in responsis ejus, tacuerunt. Et relicto eo, abierunt a Christo ad eos a quibus missi fuerant, ut Christi responsionem illis insinuarent. Luc. xx, 26.

SERMO SECUNDUS

DE TRIPLICI VERITATE QUÆ FUIT IN CHRISTO, ET QUALITER IN EA
CHRISTUM IMITARI DEBEAMUS.

MAGISTER, scimus quia verax es, et viam Dei in veritate doces, et non est tibi cura de aliquo. Matth. xxii, 46.

Christus salvator ac dominus noster testatur : Ego sum via, veritas et vita ; nemo venit ad Patrem, nisi per me. In quibus verbis unigenitus Filius Dei tria perhibet de se ipso : primo, quod ipse sit veritas ; secundo, quod via ; tertio, quod vita. Christus ergo in quantum est verus Deus, est substantialiter verus et veritas : imo Pater, Filius et Spiritus Sanctus sunt veritas una,

D sicut et una essentia. Unde ad Romanos ait Apostolus : Est autem Deus verax, omnis vero homo mendax. Christus quoque loquitur Patri : Sermo tuus veritas est. Ubi per sermonem Patris intelligi potest unigenitus Filius ejus, de quo in Joanne habetur : In principio erat Verbum. Et ad Hebræos : Vivus est sermo Dei et efficax. Porro, quod hoc de increato Patris sermone, utpote unigenito ejus Filio Verbo æterno, dicatur, constat ex his quæ ibi subduntur, videlicet : Et non est ulla creatura invisibi- Rom. iii, 4. Joann. xvii, 17. Ibid. i, 1. Hebr. iv, 12. Ibid. 13.

lis in conspectu ejus; omnia autem nuda et aperta sunt oculis ejus. Christus ergo in quantum Deus, est essentialiter verus et veritas. Similiter ipse secundum quod Deus, est essentialiter vivus et vita. Propter quod ait : Sicut Pater habet vitam in semetipso, sic dedit et Filio vitam habere in semetipso. Sed quod ipsemet ait, Ego sum via, magis competit ei ratione naturæ assumptæ, puta in quantum homo, Dei ac hominum mediator. Via namque est medium inter terminos duos seu duo extrema. Unde Christus secundum quod inter Deum et homines mediat tanquam reconciliator, salvator, satisfactor et advocatus, recte via vocatur.

Præterea Christo etiam secundum quod Deus est, convenit viam Dei in veritate docere. Deus namque sui ipsius viam homines docet, quemadmodum scriptum est : Beatus homo quem tu erudieris, Domine, et de lege tua docueris eum. Unde Propheta Dominum deprecatur : Viam justificationum tuarum instrue me. Et Isaias : Docebit nos (inquit) vias suas, et ambulabimus in semitis ejus. — Rursus, non curare de aliquo in derogationem justitiæ, maxime competit Christo secundum naturam divinam. Propter quod princeps Apostolorum fatetur : In veritate comperi quoniam non est personarum acceptor Deus. Hinc secundo Paralipomenon, virtuosus rex Josaphat ait iudicibus suis ac sacerdotibus quos misit per regnum suum ad instruendum populum universum : Sit timor Domini Dei vobiscum, et cum diligentia cuncta facite; non est enim apud Dominum Deum nostrum iniquitas, nec personarum acceptio, neque acceptio munerum.

Præterea tria quæ in themate præassumpto tanguntur, conveniunt Christo etiam quoad naturam humanam. Nam quoad eam verax fuit, quoniam ab incarnationis suæ exordio, anima ejus fuit impleta omni sapientia, veritate ac Dei beatifica visione. Sed et viam Dei in veritate docuit, absque erroris et culpæ admixtione. Propter quod suis adversariis ait : Quis ex vobis arguet

me de peccato? Si veritatem dico, quare vos non creditis mihi? Unde in Isaia fertur de Christo : Peccatum non fecit, nec inventus est dolus in ore ejus. Nec etiam fuit Christo cura de aliquo, ita quod ob alicujus timorem, favorem, aut aliam causam, a veritate et æquitate recessit : imo maluit crucifigi, quam veritatem tacere. Propter quod dixit Pilato : Ego in hoc natus sum, et ad hoc veni in mundum, ut testimonium perhibeam veritati. Itaque verba hæc præinducta Domino salvatori secundum utramque suam naturam verissime adscribuntur, quamvis Phariseorum discipuli qui ea ad ipsum locuti sunt, æstimabant ea non convenire eidem, sed ea simulatorie protulerunt.

Insuper in his verbis tangitur triplex veritas quæ fuit in Christo, videlicet : veritas vitæ, quum dicitur, « Magister, scimus quia verax es »; et item veritas doctrinæ, dum subditur, « et viam Dei in veritate doces »; veritas quoque justitiæ, quum subinfertur, « non est tibi cura de aliquo ». De hac triplici veritate dici possent multa subtilia, difficilia et profunda, quæ hic locum non habent, quum pro idiotis simplicibusque ista scribantur. Superficialiter autem tangendo, fuit in Christo veritas vitæ, ita quod vere fuit virtuosus, nec suæ conversationi admixta fuit simulatio aliqua sive duplicitas, aut quidquam virtuti contrarium, sed prorsus per omnia consona fuit legi divinæ et increatæ regulæ veritatis istius consistenti in mente divina. Hinc ipse disseruit : Non reliquit me Pater solus, quia ego quæ placita sunt ei, facio semper. Amplius autem fuit in Christo veritas doctrinæ, quoniam quidquid dixit et docuit, fuit verissimum. Ideoque asseruit : Cælum et terra transibunt, verba autem mea non transibunt. Fuit quoque in Domino Jesu Christo veritas justitiæ, id est justitia vera et inviolata in omnibus, a qua nulla affectio, nulla adulatio, nulla causa, nulla occasio potuit eum avertere.

Præterea, quoniam scriptum est, Qui se dicit in Christo manere, debet, sicut ille

Joann. v, 26.

Ibid. xiv, 6.

Ps. xciii, 12.

Ps. cxviii, 27.

Is. ii, 3.

Act. x, 34.

II Par. xix, 7.

Joann. viii, 46.

Is. liii, 9.

Joann. xviii, 37.

Ibid. viii, 29.

Marc. xiii, 31.

I Joann. ii, 6.

ambulavit, et ipse ambulare; ideo quilibet nostrum juxta modulum suum et juxta suæ vocationis exigentiam, sequi debet Dominum Jesum in præfata triplici veritate. Itaque primo in nobis esse debet veritas vitæ, ut simus veraciter virtuosus, et tota conversatio nostra concordet divinæ legi. Sit ergo in quolibet nostrum humilitas sine fictione, quia ut ait Scriptura, Est qui nequiter se humiliat, et interiora ejus plena sunt dolo. Imo quidam sunt ita ambitiosi, ut fingant se honores, officia dignitatesque fugere, quatenus per hoc ea B facilius adipiscantur: nam honor sequitur fugientem. Quidam quoque se ipsos abundanter accusant, et tamen si corripiantur ab alio, indignantur, imo nec superiorum suorum justas reprehensiones æquanimiter ferunt. Hi ergo non sunt sinceriter humiles, nec vitæ veritas inest eis.

Insuper, sit in quolibet nostrum patientia vera, ut nec foris impatientiæ signa monstremus, nec intus turbemur aut murmuremus, sed mente maneamus tranquilli. Quum enim etiam coram hominibus C honestum sit patientiam conservare, ac inhonestum impatientiam demonstrare (quum Salomon protestetur: Qui impatiens est, operatur stultitiam; et rursus, Qui patiens est, multa gubernatur prudentia); hinc aliqui versipelles se simulant patientes, ne ob impatientiam suam vilescant hominibus: et tamen intus impatientia, indignatione, amaritudine pleni sunt, et si opportunitas eis occurrerit, se graviter ulciscuntur. Hinc ait Sapiens: Qui dissimulat injuriam, callidus est. Isti plus verentur hominibus displicere quam Deo. Iterum aliqui, eo tempore quo eis adversitas seu injuria accidit, patientiam servant; postea vero dum injuriam eis illatam reducunt ad mentem, impatientia magna implentur, seque talia æquanimiter tolerasse verecundantur, atque ad retribuendum mala pro malis se acuunt. Sit ergo in nobis patientia firma ac stabilis, et de hoc quod adversa æquanimiter tulimus, gloriemur in Domino, regratiantes eidem quod

patientiæ gratiam contulit, atque ab impatientia nos præservavit.

Amplius, sit in unoquoque nostrum vera et spiritualis dilectio, ut proximorum emendationem, profectum, salutem tanquam propriam beatitudinem appetamus, eosque ædificare verbis et factis conemur, et indigentibus tam in spiritualibus quam in corporalibus pro viribus jugiter succurramus, pensantes illud Joannis: Non diligamus verbo neque lingua, sed opere et veritate. 1 Joann. iii, 18.

Itaque omnem simulationem, calliditatem ac duplicitatem vitemus. Simulatores enim et callidi provocant iram Dei. Et Jacobus asserit: Vir duplex animo, instans est in omnibus viis suis. Unde in Ecclesiastico habetur: Væ duplici corde. Sit ergo in omni opere nostro intentio nostra simplex et recta, ut soli Deo summe ac finaliter complacere optemus, atque ad ejus honorem et gloriam omnia referamus. Job xxxvi, 13. Jacob. i, 8. Eccli. ii, 14.

Præterea sequamur Dominum salvatorem in veritate doctrinæ, ita ut nec falsis doctrinis consentiamus, nec aliquem doceamus nisi quod verum est, unde nec incerta pronuntiemus ut certa. Hinc ad Hebræos dicitur: Doctrinis variis et peregrinis nolite abduci; et alibi, Non circumferamur omni vento doctrinæ. Quidquid ergo veritati sacræ Scripturæ et determinationi ac doctrinæ Ecclesiæ contrariatur, tanquam falsissimum abjiciatur. Hebr. xiii, 9. Ephes. iv, 14.

Postremo sequamur et Christum in veritate justitiæ, ut tam vere ac inviolabiliter justi simus, quod pro nulla re a rectitudine æquitatis flectamur, ut nec propter adversa, neque ob prospera recedamus a veritate, nec eam dum pandenda est occultemus: quia ut ait Chrysostomus, Non solum est proditor veritatis qui mendacium loquitur, sed etiam qui non libere pronuntiat veritatem quam pronuntiare oportet, aut non libere eam defendit quam oportet defendere. Rursus, testante Chrysostomo, Si propter timorem mortis tacere veritatem impietas est, quomodo non est major impietas propter miserum ventrem

Eccli. xix, 23.

Prov. xiv, 17.
Ibid. 29.

Ibid. xii, 16.

et vani honoris spem veritatem tacere, melioremque facere gratiam panis et honoris, quam gloriam veritatis? Itaque mentiri et jurare lingua tua ignoret, tantusque in te amor sit veritatis, tantus justitiæ zelus, ut quidquid dixeris, juramentum putetur.

At vero quum similitudo sit causa amoris, et ipse Dominus Deus noster sit essentialiter veritas, constat quod per præfatam triplicem veritatem efficiamur Deo valde amabiles et conformes. Sed multi sunt nimis injusti, molles et vitiosi, qui pro rebus vilissimis, pro modicis lucris, pro humanis favoribus, mentiri, blandiri, perjurare, decipere non verentur, nec coram Altissimo erubescunt : in quibus nihil est divini amoris, nil veræ justitiæ, sed amor carnalis, privatus, reflexus. Tales sunt vacua vasa, dæmonum organa, adversarii Creatoris, filii perditionis.

Fuit judex quidam in civitate, vir valde justus et timoratus, nulli contra justitiam parcens. Quumque filius suæ sororis grave crimen egisset, jussit eum occidi : ipse enim graviter infirmabatur. Sed servi ipsius non impleverunt ejus præceptum. Post aliquot dies, præfatus nepos intravit hujus avunculi sui domum, et introscepit per cameræ januam. Avunculus autem eo viso, vocavit eum blande ad se, fecitque eum prope lectum suum sedere, et pie alloquebatur eundem ; tandem, cultello occulte extracto, guttur nepotis abscidit.

A Quo facto, concurrentes domestici doluerunt, et crudele judicaverunt hoc factum. Post modicum tempus, invalescente ægritudine judicis, fecit episcopum civitatis venire ad se, confitebaturque ei. Episcopus vero mirabatur quod non confitebatur de hoc quod proprium nepotem tam horribiliter interfecit, et admonuit judicem ut inde confiteretur. Qui dixit se de hoc nullum conscientiae habere remorsum. Episcopus vero noluit eum absolvere et communicare, nisi de hoc confiteretur. Judex vero nequaquam de hoc voluit confiteri, dicens se hoc juste egisse et ex debito sui officii, petiitque ferventer sibi dari corpus Christi ; episcopus vero hoc renuit facere, et recessit. Tunc judex Christum rogavit, et ecce Christus corpus suum miraculose misit ac præstitit judici. Qui gratias agens Deo, rursus vocavit episcopum ad se, dixitque ei : Quamvis tu corpus Christi mihi negasti, Christus tamen illud mihi non negavit ; et ut scias me verum dicere, vade et vide pyxidem quot in ea sint hostiæ consecratæ, inveniesque in ea unam minus quam in ea ultimo reliquisti. Episcopus ergo inspiciens pyxidem, reperit sicut audivit a iudice, ac plurimum mirabatur.

Ex hoc patet exemplo, quantum justitia placeat Deo. Siquidem præfata triplex veritas, in prælatis ac principibus atque iudicibus potissimum debet fulgere ac abundare.

SERMO TERTIUS

DE HIS QUÆ CHRISTIANI TENENTUR DEO, SUISQUE PRINCIPIBUS AC PRÆLATIS.

REDDITE quæ sunt Cæsaris, Cæsari ; et quæ sunt Dei, Deo. Matth. xxii, 21.

Rom. xiii, 7.

Ad Romanos quoque ait Apostolus : Reddite omnibus debita ; cui timorem, timorem ; cui honorem, honorem ; cui tributum, tributum ; cui vectigal, vectigal. Rursus

ibidem ait Apostolus : Omnis anima potestatibus sublimioribus subdita sit. Christiani itaque reddere debent tam domino temporali seu principi, quam domino spirituali, puta prælato, quod ei tenentur, puta subjectionem, honorem, obedientiam,

Rom. xiii, 1.

dilectionem, fidelitatem, sed et temporalia A etiam sanitatem animæ et corporis consequeris, quoniam decimas dando, et terrena et cœlestia præmia promereris. Unde qui decimas dare nolunt, res alienas invadunt, et Deo injuriantur : nam ipse qui totum dare dignatus est, decimas ab hominibus dignatur recipere. Iterum asserit Augustinus : Hæc est Dei justissima consuetudo, ut si tu illi (hoc est ministris ejus) decimam non dederis, tu ipse ad decimam revocaberis, id est, dæmonibus qui sunt decima pars angelorum, associaberis : dabis, inquam, impio militi quod dare non vis sacerdoti. Hieronymus quoque fatetur : Quia non reddidistis decimas et primitias, idcirco in penuria et fame maledicti estis, quia dum parva subtraxistis, ubertatem possessionum vestrarum, id est totam abundantiam fructuum, perdidistis : sciatis vos ideo perdidisse, quoniam Deum parte sua fraudastis. Itaque qui decimas non persolvunt, in temporalibus et spiritualibus, et in præsentī atque futuro puniuntur, et maledicuntur a Deo.

1 Tim. vi, 1. tam. Hinc rursus ait Apostolus : Quicumque sub jugo sunt servi, dominos suos omni honore dignos arbitrentur ; et denuo *Ephes. vi, 5, 6.* ad Ephesios, Servi, obedite dominis carnalibus cum timore et tremore, in simplicitate cordis vestri, non ad oculum servientes, quasi hominibus placentes, sed ut servi Christi, facientes voluntatem Dei ex animo. Princeps quoque Apostolorum *1 Petr. ii, 18.* in prima sua Canonica : Servi, inquit, subditi estote in omni timore dominis, non tantum bonis et modestis, sed etiam dyscolis. Et intelligenda sunt ista quamdiu domini isti nihil præcipiunt servis suis contrarium divinis præceptis, nec transgrediuntur terminos suæ auctoritatis ac præsentis : siquidem unicuique superiori obediendum est in his quæ ad suum spectant dominium sive officium. Præterea diligentissime advertendum, quod si juxta apostolica documenta, tam formidolose, reverenter et cordialiter obediendum est sæcularibus dominis etiam impiis, quanto magis Christiani cum omni reverentia, formidine et caritate obedire debent spiritualibus dominis suis, puta prælatis et eorum vicariis, eorum præcepta implendo, documenta et monita gratanter suscipiendo, eosque filialiter diligendo et exterius honorando (quamvis vita eorum videatur indigna), in quantum sunt Christi vicarii et publica auctoritate fungentes?

Insuper pastoribus istis ministris Ecclesiæ persolvendæ sunt animo caritativo ac prompto oblationes et decimæ, quum hoc sit de jure divino, ut temporalia dentur his qui spiritualia exhibent. Unde qui oblationes ac decimas fideliter solvunt, multipliciter remunerantur a Deo, quia tam in corporalibus quam spiritualibus bonis benedicuntur ab eo, et tam in præsentī quam in futuro sæculo præmiantur. Hinc loquitur Augustinus : Si decimam dederis, non solum abundantiam fructuum recipies, sed

B Deinde tangendum est, quid Deo reddere teneamur. Et certum est, quod nos ipsos et omnia nostra ei tenemur. Quod si et nos ipsos et omnia nostra ei quotidie offerremus, et millies impenderemus ac rependeremus, imo si omni hora moremur pro eo, nil ei exhiberemus condignum. Nonne tenemur ei nos totos et omnia nostra, qui creavit nos, et quidquid habemus ac sumus, contulit nobis? Rursus, tanta sunt beneficia ejus in nobis, tot dona gratiæ contulit nobis, tot gloriæ bona nobis promisit, quod ei nil dignum valeamus rependere. Iterum, unigenitus Dei Filius tanta pro nobis assumpsit, fecit ac passus est, et tanta dilectione prævenit et præamavit nos, quod nos ipsos ejus dilectioni ac servituti omnino debemus ; et quum fecerimus hoc, nil condignum peregerimus. Idcirco loquitur Christus : Quum feceritis omnia quæ præcepta sunt vobis, dicite : Servi inutiles sumus ; quod debuimus facere, fecimus. Hinc Deus in primis requirit a nobis ut eum toto corde, toto

Luc. xvii, 10.

affectu totisque viribus diligamus; requirit quoque a nobis ut ejus impleamus præcepta, et mandata vicariorum suorum.

Porro primum et summum præceptum est, ut ipsum toto corde amemus ac veneremur. De quo præcepto hinc inde dicta sunt multa. Sed contra præceptum hoc agunt, qui contra Dei judicia murmurant, et contra ordinationes ac regimen ejus, et contra plagas quas juste infligit hominibus in se ipsis aut in rebus eorum. Iterum, contra præceptum hoc agunt, qui urgente necessitudine aliqua, sortilegos consulunt aut divinatores, et qui utuntur pomis inscriptis, aut brevibus chartulis seu schedulis collo suspensis, aut characteribus, vel aliis quibuslibet vanis credulitatibus, quasi Deus non sit satis bonus, potens ac sapiens ad subveniendum eis secundum quod novit eorum saluti ac necessitati esse expediens. Infirmetas namque, paupertas et alia tribulatio quævis, hominibus sæpe perutilis est: idcirco pro liberatione ab eis non sunt præinducta aut alia quæcumque illicita peragenda. Agunt

Secundum præceptum est, non vane jurare per Deum: ubi omnis illicita prohibetur juratio per Deum, per Evangelium, per Christi humanitatem et membra, per Sanctos, seu per alias creaturas. Deinceps contra perjurantes, et per Christi membra irreverenter jurantes ac blasphemantes, statutæ sunt leges punitivæ tam a sæcularibus principibus quam a prælatis; estque valde dolendum quod non servantur. Contra præceptum istud multi mercatores et lusores, potissimum taxillatores et ebriosi, sæpe enormiter peccant, vane jurantes, ac perjurantes et blasphemantes. Sed et reductive contra præceptum hoc peccant, qui votum frangunt et secretum revelant, hi quoque qui promittunt aut jurant illicita, quæ et si impleant, gravius prævaricantur.

A Tertium præceptum est, observare dies festos, ut scilicet unusquisque, legitimo impedimento cessante, tunc audiat Missam et prædicationem, examinetque conscientiam suam, et vitam suam discutiat, atque de præteritis malis postulet veniam, et aliorum dierum negligentias ac peccata recuperet. Cessandum est ergo diebus dominicis et festivis ab operibus laboriosis, mechanicis, et multo plus ab actibus in se vanis atque illicitis, ut sunt loquacitates, cachinnationes, comessationes, potationes immoderatæ, choreæ et ludi qui fiunt intentione lucrandi, atque contractus qui possent differri; sed et barbam aut pilos tunc radere, contra divinum exstat præceptum.

Quartum præceptum est, honorare parentes: quo verbo jubentur fideles honorare non solum carnales parentes, sed et praelatos, magistros, et quoslibet superiores ac seniores. Unde contra præceptum hoc graviter peccant, qui parentibus aut superioribus suis irrationabiliter irascuntur, indignantur, maledicunt aut detrahunt. Imo et pro mortuis parentibus filii orare et alia bona agere obligantur.

Quintum præceptum est, Non occides: quo omnis injusta læsio ac violentia prohibetur, imo et omnis voluntas nocendi aut occidendi, seu aliquo modo injuste gravandi proximum. Gravissime autem transgrediuntur homicidæ, præsertim qui ex proposito quemquam occidunt, quia non solum corpus interimunt, sed animam quoque ejus quem perimunt, æternæ mortis exponunt periculo: sæpe etenim imparati sunt ad mortem, qui occiduntur. Quidam vero ita in dæmones transformati sunt, ut pro pecunia, eos a quibus læsi non sunt occidere audeant: isti dæmonibus pejores censentur. Contra hoc demum peccant præceptum, qui quoquomodo ex commixtione viri et feminæ impediunt prolificationem, aut abortivum procurant, et qui discordiam inter alios seminant, aliorumve famam denigrant. Postremo transgrediuntur præceptum hoc enormiter nimis,

homines qui vitiosissimam consuetudinem A illam observant, qua pro unius occisione aut læsione, tota læsi aut occisi parentela, aut magna pars ejus, armat se, et persequitur non solum illum qui læsit aut interfecit, sed et propinquos ipsius, qui frequenter prorsus in re illa sunt innocentes, imo et de perpetrato facinore vehementer dolentes. Sed forsitan respondebunt persecutores : Non possumus salvo honore nostro istud omittere ; imo si istud omittimus, passim interficiemur ut pecora. Sed respondendum, quod per viam justitiæ B possunt multum honeste et absque Dei offensa illatam vindicare injuriam, observando juris ordinem ac processum. Nonne jus injustitia fortius est ? Salus quoque animæ præponenda est mundano honori. Frequenter etiam accidit ut hi occidantur qui alios quærunt ad occidendum : et tunc periculosissime ac vitiosissime moriuntur, imo æternaliter pereunt, nisi forsitan ante spiritus exhalationem vere pœniteant.

Sextum præceptum est, non furari : ubi prohibetur omnis injusta ablatio rei alienæ sive per latrocinium seu per rapinam, omnis quoque injusta mercatio, et infidelis cultura terræ laborque fallax, et fictus labor dietæ, atque inutilium rerum pro utilibus rebus venditio, sive venditor earum eas emendo deceptus fuit, sive non : non enim quia deceptus est, potest licite decipere alium. Prohibetur etiam hoc præcepto omnis usura, et advocatio falsa ac patrociniatio, placitatio* et lis non rite assumpta, injustum judicium, et generaliter omnis deceptio manifesta aut falso colore velata. D Gravissime etiam peccant contra præceptum hoc mulieres adulteræ quæ illegitimam prolem ad legitimorum filiorum hereditatem succedere faciunt ; et qui a subditis suis temporalia bona eripiunt, aut ultra juris tenorem quid exigunt.

Septimum præceptum est, Non mœcha-beris : ubi omnis carnalis commixtio præter matrimonialem vetatur, imo amplexus et tactus ac oscula libidinosæ, abusiones quoque quæ in conjugatis contingere so-

lent circa venerea. Quomodo etiam omnis amator et amatrix ardentior, sit adulter aut adultera, sæpe expositum est. Si autem ex contactu, osculo vel amplexu contingat stimulatio corporis, resolutio seminis, aut aliquid tale, periculosum est valde.

Octavum præceptum est, Non falsum testimonium dices : quo prohibetur omne mendacium in alterius perniciem dictum. Interdum etiam tenetur homo veritati testimonium perhibere, quamvis non interrogatus nec requisitus, ut si viderit se posse innocentem eripere.

Nonum præceptum est, Non concupisces uxorem proximi tui. Similiter femina maritum non debet alterius cupere. Omnis quoque concupiscentia carnalis commixtionis non legitimæ cum rationis consensu, est mortale peccatum : imo et omnis consensus deliberatus seu plenus quo quis in turpibus aut carnalibus cogitationibus delectatur, quamvis desit voluntas operis exterioris, secundum doctores communiter, est peccatum mortale.

Decimum præceptum est, Non concupisces rem proximi tui : quod de concupiscentia deliberationi seu consensui juncta est intelligendum.

Sic ergo reddamus pro posse Deo quæ Dei sunt, omnibus viribus animæ membrisque corporis ei plenarie serviendo. Et qui taliter servit Deo, nec propter quæcumque adversa ab ejus recedit præceptis, gloriosissime coronatur et supercopiosissime remuneratur ab eo : imo et frequenter in vita præsentis præservatur ab eo a læsionibus corporis sui, quemadmodum in Daniele legitur de beatissimis viris Anania, Azaria et Misaele. Qui quum regi Chaldaeorum carissimi essent et sublimati ab ipso, nequaquam tamen potuerunt induci ab eo ut statuam auream adorarent : maluerunt in fornacem ardentissimam projici, quam Dei præceptum prævaricari. Quumque projecti fuissent in fornacem vehementissime æstuantem, Deus omnipotens conservavit eos ibi illæsos ; et flamma fornacis erumpens diffusa est su-

* Cf. t. XII, p. 170 B, et Cangii *Glossarium*.

Dan. 1, 6 et seq. ; III, 12 et seq.

per fornacem cubitis quadraginta novem, A illi de fornace, et tam rex quam principes ejus vehementissime mirabantur quod ignis nil virtutis habuisset in eos. Unde et tunc rex ille idololatra ac gentilis agnovit ac fatebatur Deum Israeliticæ plebis esse solum verum omnipotentemque Deum.

AD RELIGIOSOS

SERMO QUARTUS

DE INVITATIONE APOSTOLI AD SUI IMITATIONEM.

IMITATORES *mei estote.* Philipp. iii, 17. B Sanctus Apostolus ex revelatione divina sciens se esse non solum in caritate et gratia, sed etiam in caritate perfecta et gratia eminente, puta in statu, gradu ac numero perfectorum (secundum quod alibi loquitur : Nos ipsi primitias Spiritus habentes), in hodierna epistola nos hortatur secure ut ipsius sectemur vestigia. Sciebat quippe se ducere vitam auctoritati apostolicæ congruentem. Unde, quemadmodum alio ait loco, Imitatores Dei estote, ita nunc admonet, « Imitatores mei estote », non ignorans se esse imitorem Dei perfectum et imitatione condignum. Nec solum admonuit istud, sed etiam ut eos observemus, id est, ad imitandum consideremus, qui juxta apostolica documenta ac jussa sinceriter conversantur.

Imitemur ergo beatum Apostolum, qui quum sciret se nihil minus egisse ab his qui erant supra modum Apostoli, et raptum fuisse ad tertium cœlum, atque plus omnibus laborasse, nec instar aliorum virtui necessaria accepisse ab his quibus D evangelizavit, sed de propriis vixisse laboribus, manusque suas die ac nocte tam sibi quam existentibus secum pro vitæ necessariis laborasse, nihilo minus tam profundissimæ fuit humilitatis, ut ex cor-

de protulerit, et ad perpetuæ rei memoriam toti mundo in suis epistolis id insinuaverit : Venit (inquiens) Jesus Christus in hunc mundum peccatores salvos facere, quorum primus, id est maximus, ego sum ; itemque, Ego (ait) sum minimus Apostolorum, qui non sum dignus vocari apostolus. Hanc divini Apostoli humilitatem profundissimam et completam semper et efficaciter imitemur. Et quanto quis major est, tanto plus humiliet se in omnibus, considerando mala omnia quæ commisit, bona quæ omisit, et quod ex se ipso non habeat nisi deficere et peccare, imo ad omne vitium esse proclivem ; quod item ex nihilo sit productus et Dei conservatione incessanter indigens, a quo nisi conservaretur et adjuvaretur, in omne protinus malum delaberetur. Ecce talis ac tantus Apostolus, bona quæ egit, dona Dei quæ suscepit, omnem excellentiam qua præditus fuit, quasi dissimulans ac Deo grata et humillima mente attribuens, culpas suas, quamvis sibi prorsus dimissas, revocavit ad mentis suæ intuitum, eas in tantum ponderans, exaggerans et exhorrens, quod ex consideratione earum dixit et scripsit se esse primum et maximum peccatorum. Sic ergo faciamus et nos, quidquid boni in nobis est, Deo cum omni humilitate et

Rom. viii, 23.

Ephes. v, 1.

II Cor. xi, 5.

Ibid. xii, 2.

I Cor. xv, 10.

Ibid. ix, 2.

et seq. ; iv, 12 ; Act. xx, 34, etc.

I Tim. i, 15.

I Cor. xv, 9.

Eccli. iii, 20.

gratiarum actione committentes et adscribentes, et vitia nostra ad memoriam revocantes, subtiliter ponderantes, cordialissime abhorrentes, atque ex hoc nos ipsos in infinitum humiliantes, despicientes, deficientes, omnem quoque correptionem, castigationem, exercitationem, persecutionem æquanimiter et cum gaudio perfectentes.

Insuper imitemur invictam sancti Apostoli patientiam, qui quum innumerabiles (ut in suis refert epistolis) pateretur tribulationes, in omnibus gratias egit Deo, et has ipsas tribulationes tanquam dona ac beneficia Dei reputavit et acceptavit. Unde et aliis scripsit : Vobis datum est pro Christo, non solum ut credatis in eum, sed etiam ut patiamini pro illo; et denuo : Non sunt condignæ passiones hujus temporis ad futuram gloriam. Imo futuræ beatitudinis intuitu et amore reputavit eas permolivas, dicens : Id quod in præsentī est momentaneum et leve tribulationis nostræ, supra modum in sublimitate æterni gloriæ pondus operatur in nobis. Sic igitur et nos in omni tribulatione et angustia, in omni persecutione, reprehensione, contemptu et pœna studeamus imperturbatum cor possidere, tranquillitatem mentis servare, patientiam inconcussam habere : quemadmodum S. Martinus dixit, se nunquam fuisse ita securum sicut dum latro in caput suum vibravit securim; beatus quoque Hilarion irruentibus in cellam suam latronibus non expavit. Itaque adversa et aspera tanquam vulnerum animæ nostræ remedia, tanquam vitiorum nostrorum purgationes, tanquam beneficia Dei, tanquam dispositiones gratiæ amplioris in via ac gloriæ exuberantioris in patria accipiamus ac læti sustineamus, prout ait Salvator : Gaudete in illa hora, et exultate, quoniam merces vestra copiosa est in cœlis. Sic et mansuetudinem, constantiam, agilitatem, sobrietatem, ceterasque beatissimi hujus Apostoli sectemur virtutes, qui tam infatigabiliter laboravit, et pro communi bono Ecclesiæ, pro aliorum conver-

sione, pro honorificentia Dei tam indefesse ac fervidissime desudavit, orando, prædicando, scribendo, docendo, flagellationes, lapidationes, incarcerationes et alia millia, tandemque mortem libentissime tolerando.

Potissimum vero in ipso emicuit caritatis Dei ac proximorum calidissimus et inextinguibilis ardor : in quo sequamur et ipsum qui dixit, Quis nos separabit a caritate Dei? Qui tanquam benignissimus pater, quanto plura ac duriora a perfidis Judæis gentilibusque patiebatur, tanto cordialius eis condoluit, et eorum miserabatur insaniam, atque tam ineffabiliter persequentium se Judæorum optavit salutem, ut diceret : Tristitia mihi magna est, et dolor continuus cordi meo; optabam enim ego ipse anathema esse a Christo pro fratribus meis Judæis. Propterea et in hac Dei et proximorum firma et fervida caritate sequamur Apostolum, Deum in se et propter se pure, ardentem et incomparabiliter diligentes, appetiantes et affectantes, et quidquid ejus in nobis minuere potest amorem jugiter detestantes. Proximorumque omnium salvationem ardentissime peroptemus; pro communi bono Ecclesiæ, pro generali reformatione, pro vivis ac mortuis, pro parentibus, propinquis, commissis et benefactoribus, pro infidelium conversione, pro fidelium emendatione, pro universorum salute omni modo nobis possibili laborare, insudare, satagere non cessemus, orando, celebrando, hortando, corripiendo, aliorum peccata sicut et nostra deflendo, pro eis nos disciplinando, vigiliis, abstinentiis et aliis virtuosis exercitiis insistendo. Et quanto ab aliquo nobis major persecutio irrogatur, tanto elementius ad ipsum afficiamur, ejus malis compatientes, pro ipso orantes, ut in nullo caritas nostra circa ipsum lædatur, sed magis perficiatur.

Insuper, sicut Apostolus se ipsum in omnibus verbo et opere præbuit exemplarem, apparatu ac moribus condecentem, sic et nos pro viribus faciamus. Luceat lux nostra coram hominibus, quatenus ad

Philipp. i.
29.

Rom. viii.
18.

II Cor. iv.
17.

Matth. v.
12; *Luc. vi.*
23.

Rom. viii.
35.

Ibid. ix. 2, 3.

Matth. v.
16.

Dei gloriam ædificentur in nobis. Coram A fratribus et cunctis præsentibus unusquisque exemplariter semper se habeat, quia ut loquitur Augustinus : Qui in aliorum præsentia male agit, quantum in se est eos occidit aut lædit. Idcirco non tantum curemus habere conscientiam bonam, sed quantum valet fragilitas nostra, studeamus nil agere quod malam possit parere suspicionem pusillis. Et quoniam Climaco teste, solitarios specialiter vexat acedia, dum in cella aut alibi sumus soli, omnem abjiciamus pigritiam, nec minus ferventer ac B reverenter, devote et efficaciter habeamus nos coram Deo, quam si inspiceremur a toto mundo.

Philipp. iii, 17. Præterea fratres nostros devotos, religiose et exemplariter conversantes observemus, non instar malevolorum, ut eos in aliquo reprehendere, accusare, denigrare possimus, sed instar piorum atque prudentium, ut eorum alacritatem, constantiam, agilitatem, humilitatem, patientiam, sobrietatem, mansuetudinem, exemplaritatem, caritatem, perseverantiam C imitemur viriliter, et unumquemque se-

quamus in ea virtute qua magis abundare videtur, et bonum quod in nobis ipsis non habemus, in aliis diligamus ac veneremur.

Non simus gulosi ut hi quorum deus ^{Philipp. iii, 19.} venter est; sed conversatio nostra in cœlis ^{Ibid. 20.} sit, quoniam ibi patrem patriamque habemus. Ibi sit noster thesaurus, et illic cogitatio nostra figatur, affectio radicetur, mens elevetur, ut vere sursum sint corda nostra. Postremo, tunc vere conversatio nostra in cœlis est, si quæ agunt indesinenter cives cœlestes, nos quoque pro viribus nostris jugiter agere enitamur, Deum sinceriter contemplando, ardenter amando, assidue cogitando, sine intermissione orando, devote laudando, ipsum colendo cum omni reverentia atque instantia, et corporalia universa ad spiritualia referendo intentione rectissima. Sicque fiducialiter exspectare poterimus Salvatorem nostrum ^{Philipp. iii, 20, 21.} Dominum Jesum Christum, qui in die novissimo reformabit et suo corpori glorificatissimo conformabit corpus nostrum mortale ac fragile, si tamen nunc conformetur corpori Christi per sanctos labores, castigationes, abstinentias atque vigili-

SERMO QUINTUS

DE MALITIA CORDIS HUMANI, ET DE TRIPLICI VERITATE IN CHRISTO.

COGNITA *Jesus nequitia eorum, dixit: Quid me tentatis, hypocritæ?* Matth. D xxii, 18.

Ex historia evangelii discimus quam admiranda et deploranda sit defectuositas, imo et malitiositas cordis humani. Ecce enim quum Christus præ cunctis Prophetis sapientia, eloquentia, sanctitate atque miraculis inter Judæos resplendisset, infelices Pharisæi, Scribæ ac sacerdotes ad pœnitentiam non sunt moti, nec vere compuncti, sed invidentia vehementissime inflammati; et quanto verba, facta et mira-

cula Salvatoris erant præclariora, tanto intensiori torquebantur illi invidia. Sic malitia mentem excæcat humanam; sic invidia cor corrumpit; sic passiones et vitia obtenebrant hominem. Hinc in die Palmarum, dum paulo ante Salvator inauditum a sæculo fecisset prodigium, illuminando a nativitatis exordio cæcum, utpote cæcum natum, suscitando quoque quatrIduanum defunctum, dixerunt præfati miserrimi illi Judæi : Videtis quia nihil proficimus? ecce totus mundus abiit post eum. Unde et die sequente, inierunt consilium ut cape-

Johann. ix.

Ibid. xi.

Ibid. xii 19.

Matth. xxii, 13 et seq.

rent Jesum in sermone, mittentes ad eum insidiatores, qui se justos simulaverunt, ut blanda interrogatione et laude prægrandi, quamvis non cordiali, allicerent Christum ad respondendum pro voluntate eorum. Videamus ergo et nos ne aliquid simile his inveniatur in nobis, ne passionum impetu, ne aversione, indignatione aut aliquo motu invidiæ obtenebretur cor nostrum, ne facta aut verba aliorum interpretemur in pejus, ne justioribus et sapientioribus insidiamur, cupientes eorum famam in aliquo maculare.

Deinceps, ideo principes sacerdotum, Scribæ et Pharisei ac seniores erant tam implacabiliter contra Christum accensi, quia eorum vitia juste et acriter reprehendit publice et seorsum. Caveamus ergo ne contra præidentem aut aliquem Fratrem ad iram, indignationem, aversionem, impatientiam concitemur propter correptionem, castigationem, accusationem, proclamationem seu exercitationem nobis ab illis exhibitam. Qui enim abjicit disciplinam, infelix est; et, Viro qui corripientem dura cervice contemnit, repentinus superveniet interitus. Patrocinetur ergo religiosus, sicut tenetur, in propria causa, et custodiat semetipsum; quotidie semetipsum observet, inquirat, examinet, dijudicet et castiget: et tantum habebit agere cum se ipso, tantas in se ærumnas, defectuositates, excessus, fragilitates, periculositates inveniet, quod ab occupationibus curiosis, ab observationibus insidiosis facilliter abstinebit. Simus ergo in omnibus timorati, intus et foris jugiter custoditi; et cur religionem intravimus, semper pensemus; an divino præsentari tribunali simus parati, atque ad reddendam de omnibus rationem dispositi, consideremus.

Præterea, sicut Evangelista testatur, insidiatores Judæi, insidiatorum magistrorum discipuli, dixerunt ad Christum: Magister, scimus quia verax es, et viam Dei in veritate doces, et non est tibi cura de aliquo. Quamvis autem ipsi de Christo hæc simulatorie sint locuti, longe aliter sentientes

A de ipso, nihilo minus verissime fuit in Christo triplex veritas, de qua in verbis his laudaverunt eundem. Fuit quippe in eo veritas vitæ, quæ tangitur quum dicitur: Scimus quia verax es. Fuit quoque in eo veritas doctrinæ, quæ tangitur in his verbis: Viam Dei in veritate doces. Fuit item in eo veritas justitiæ, de qua subdunt: Et non est tibi cura de aliquo. Sit ergo et in nobis triplex hæc veritas: et primo veritas vitæ, ut quemadmodum

Act. i, 1.

B opere in primis adimpleamus quod alios edocemus aut exhortamur, et culpas de quibus alios corripimus, accusamus aut castigamus, in nobis ipsis in primis reprehendamus, puniamus ac devitemus, ne cuiquam nostrum dicatur, Qui alium doces, te ipsum non doces; et, Medice, cura te ipsum. Nam et ejus prædicatio, exhortatio, correptio spernitur, cujus vita juste despicitur. Sit itaque primo in nobis veritas vitæ, quatenus tota conversatio nostra intus coram Altissimo cordium inspectore, et foris coram hominibus quæ extra apparent intuentibus, sincere concordet legi divinæ, præceptis Ecclesiæ, evangelicisque consiliis, ac Ordinis nostri statutis, seclusa a nobis procul omni simulatione vilissima et calliditate vulpina (simulatores namque et callidi provocant iram Dei), omni quoque locutione sophistica et omni apparenti non existente justitia. Qui enim sophistice loquitur, odibilis est; in omni re defraudabitur; non est illi sapientia data a Deo. Maledictus quoque dolosus; et, Fraudulenti vasa sunt pessima. Propter quod virum sanguinum et dolosum abominabitur Dominus.

Rom. ii, 21.

Luc. iv, 23.

Job xxxvi, 13.

Eccli. xxxvii, 23, 24.

Malach. i, 14.

Is. xxxii, 7.

Ps. v, 7.

Denique, sicut a spiritualibus et sapientibus dictum est viris, imo ut quotidiana docet experientia, religiosi qui vitam suam in vera sinceritate, in privati amoris extirpatione, in sincera humilitate et Dei timore non fundant, neque in istis fundamentis proficiunt, periculosioribus sæpe passionibus afficiuntur, fœdantur ac superantur, quam homines sæculares; suntque

Sap. iii, 11.

Prov. xxix, 1.

Matth. xxii, 16.

eorum peccata tanto periculosiora, quanto secretiora et palliatione quadam virtutum magis obtecta. Unde et melioribus invident, sapientioribus detrahunt, justiores se persequuntur, quemadmodum Pharisæi et Scribæ persecuti sunt Christum. Tales etenim religiosi etsi foris se ipsos humilient nequiter, intus pleni sunt dolo, famæ honorisque cupidi, nec sunt coram Deo sinceri et recti. Tales sunt qui accusant et dejiciunt semetipsos, et tamen si accusentur ac vilipendantur ab aliis, indignantur. Tales demum sunt aliqui versipelles, qui scientes quam laudabile et honestum sit apud religiosos patientiam conservare, quam item vituperabile impatientem se exhibere, dum corripuntur, corriguntur aut qualibet adversitate tanguntur, signa impatientiæ erubescunt coram hominibus demonstrare, et tamen intus coram Deo non verentur indignatione, impatientia, murmuratione, amaritudine agitari. Caveamus itaque universa hæc vitia, tam vera seu aperta quam palliata, et coram Deo assidue discutiamus ac purificemus cor nostrum.]

Ps. CXL, 5.

Præterea, sicut Salvator non fuit adulatoriis verbis et humanis laudibus motus, ita et nos adulatoria verba despiciamus, neque vanis laudibus alliciamur, sed potius corripere et increpare optemus, cum Propheta dicentes : Corripiet me justus in misericordia et increpabit me ; oleum autem peccatoris non impinguet caput meum. Religiosorum namque est abjectione et subjectione gaudere, subdi et obedire, probari, humiliari, et mille modis exerceri ac conculcari, quousque ad plenam pertingant mortificationem sui ipsius, ad puram evulsionem privati amoris, ad reformationem perfectam hominis interioris : quatenus omnia ea quæ mundi amatores appetantur, cupiunt, quærunt et amplectuntur, divitias, delicias et honores, vanitates, dissolutiones ac proprias libertates, fastidiant et refutant ; ea quo-

A que quæ refugit mundus ac metuit, puta aspernationes, persecutiones, increpationes, labores, vigiliæ, abstinentias, disciplinas, ament et amplexentur, atque in his quasi in omnibus divitiis gloriantur. Hoc est saluberrime vincere semetipsum, et violentiam optimam propriæ inferre naturæ, seque mundo crucifixum præbere et mundum sibi crucifixum habere, quatenus cum Apostolo dicere valeat, cui tanta donata fuerit gratia Spiritus Sancti : Mihi absit gloriari, nisi in cruce Domini mei ^{Galat. vi, 14.} B Jesu Christi, per quem mihi mundus crucifixus est, et ego mundo.

Postremo, ad hanc perfectionem non cito neque faciliter quis pertingit, nisi qui a Spiritu Sancto totaliter prævenitur, misericordissime præoccupatur, incessanter dirigitur, gratiosissime possidetur, indesinenter afficitur, ita ut dicere queat cum sancto taliter præoccupato : Tenuisti, Domine, manum dexteram meam, et in voluntate tua deduxisti me. Verumtamen quia non est abbreviata manus Dei omnipotens atque largissima, ut salvare non possit, nec aggravata est auris ejus misericordissima, ut exaudire non velit, neque acceptio personarum fit apud eum, conemur indefesse ac jugiter ad perfectionem præactam, divinæ pietatis viscera affectuosissime deprecando, Christi in sæculo isto conversationem, passionem, virtutes sapienter pensando, Sanctorum intuendo exempla, sequendo vestigia, in Dei timore et humilitate profunda nostram fundando conversationem, et divinam semper attendendo ac venerando præsentiam. Sicque in omni patientia, mansuetudine, obedientia, sobrietate, diligentia, stabilitate, discretionem exercitando nos ipsos quotidie, diligamus nos pure in Deo, quidquid ad complacendum ei, ad proficiendum in caritate et gratia ejus, ad unionem et fruitionem ipsius exstat nobis accommodum amplectentes, et quidquid inde nos impedit detestantes.

Ps. LXXII, 24.

Is. LIX, 1.

Rom. II, 11.

SERMO SEXTUS

DE HIS QUÆ SUPERIORIBUS DEBENTUR, PUTA OBEDIENTIA, REVERENTIA, AMOR, ETC.

REDDITE quæ sunt Cæsaris, Cæsari; A
et quæ sunt Dei, Deo. Matth. xxii, 21.

Ps. x, 8.

Justus Dominus et justitias diligens, jubet ut unicuique quæ ei debemus solvamus. Idcirco et nos religiosi, a sæculari potestate exempti, superioribus nostris spiritualibus patribus nostris reddamus quæ eorum sunt, quæ eis tenemur, obedientiam, reverentiam, dilectionem, fidelitatem, obsequium. Obedientiam namque eis

Eccle. v, 3.

promisimus, et scimus quia displicet Deo stulta et infidelis promissio. Imo quum votum, secundum Thomam, plus obliget quam juramentum, constat quod inobedientia sive rebellio gravius crimen sit in religioso quam ipsum perjurium. Vitemus ergo cum infinito horrore tam diabolicum scelus. Siquidem quasi peccatum ariolandi est, repugnare, et quasi scelus idololatriæ, nolle acquiescere. Ideo Salomone testante,

1 Reg. xv, 23.

Prov. xv,

28.

Ibid. xxviii,

14.

Mens justi meditatur obedientiam. Qui autem mentis est duræ atque in proprio pertinax sensu, in diversa atque enormia corruebat mala. Denique tanta est virtus obedientiæ, tanta est eminentia et potestas ipsius, ut plenarie obedientes, Deum faciant sibi obedientem, quemadmodum

Josue x, 12,

13.

Deus obedivit obedientissimo Josue, soli ac lunæ ne moverentur jubenti. Propter quod sancti Patres locuti sunt, quod quantum nos obedierimus Deo, tantumdem et ipse obediet precibus nostris. Et sicut religiosorum est quotidie ad perfectionem procedere, proficiendo in omni virtute; ita eorum est quotidie ex promptiori cordis desiderio obedire, humiliter celeriusque parere, et quanto diutius fuerint in Ordine, tanto in omni obedientia, humilitate ceterisque virtutibus exemplariores se exhibere.

Præterea, quam sincere, reverenter et amore obediendi debeat religiosus, quamvis ex Sanctorum pateat documentis et regulis, et frequenter sit allegatum, clarissime tamen id ipsum poterimus discere, si beatissimorum apostolorum Petri et Pauli verba ac jussa intueamur. Ait equidem gloriosissimus apostolici agminis princeps: Servi, subditi estote in omni timore domini, non tantum bonis et modestis, sed

1 Petr. ii, 18.

etiam dyscolis. Paulus quoque: Quicumque (inquit) sub jugo sunt servi, dominos suos omni honore dignos arbitrentur; et denuo, Servi, obedite dominis carnalibus cum timore et tremore, in simplicitate

1 Tim. vi, 1.

Ephes. vi, 5, 6.

cordis vestri, non ad oculum servientes, quasi hominibus placentes, sed ut servi Christi, facientes voluntatem Dei ex animo. Si ergo tam reverenter, tam timorate, tam cordialiter servire et obedire oportet carnalibus dominis, terrenis principibus etiam pravis, in his quæ ad eorum spectant dominium, quam reverenter, timorate et affectuose necesse est obedire spiritua-

libus patribus ecclesiasticisque prælatis, potissimum religiosos, qui non solum ex jure divino et communi præcepto, sed ex solenni quoque voto ad obedientiam obligantur? præsertim quum, teste Bernardo, quanto major est dignitas, quanto sublimior exstat auctoritas, tanto ei obedire magis est necessarium magisque debitum, atque eidem inobedire tanto vitiosius damnabiliusque consistit. Rursus, secundum eundem, quanto præceptum exstat salubrius, rationabilius ac divinius, tanto non obedire magis iniquum est. Si ergo temporalibus dominis corporalia obsequia exigentibus non parere, censetur damnabile, quam inæstimabiliter damnabilius est non

obedire religiosis ac spiritualibus patribus, ea quæ ad regularem observantiam spectant jubentibus? Quocirca id quoque pensandum, quod superioris præceptiva voluntas, qualitercumque innotescat, vim habet præcepti et obligat sub mortali. Rursus, ut Climacus protestatur, quicumque quacumque machinatur cautela aut practica ut id quod ipse habet in animo et affectu, sibi a patre præcipiatur, beatitudinis præmio spoliatur semetipsum, etiamsi foris simulet id sibi esse molestum.

Præterea, non tantum obedientiam, sed reverentiam quoque præcipuam præsentati tenemur tanquam spirituali patri atque vicario Christi; et quo majori sapientia, abundantiori virtute, paternaliori diligentia decoratur, et amorosius ac sollicitius habet se circa subjectos, eo ampliori reverentia est condignus, detestabiliusque consistit circa eum cervicose, dure et irreverenter se exhibere. Innotescit ergo ex præinductis, quam periculose vivant quidam audaces sibi placentes, de suis superioribus parum aut nihil curantes, eisdem intimorate loquentes, aspere respondentes, ita ut superiorem sollicitari oporteat qualiter eorum satisfaciat voluntati et quid eis injungat, ne forte magis exasperentur ac pejorentur. O quam parum pensant hi excæcati quid eorum requirat professio, in quali sint statu, et quid sit ipsa monachalis religio! Resipiscant ergo a laqueis diaboli, a quo detinentur captivi.

II Tim. II,
26.

Insuper, quam specialiter debeamus spirituales patres nostros diligere, facile est pensare, et partim evidens est ex prædictis. Ipsi namque sunt patres, doctores et pastores nostri, a quibus quotidiana beneficia magna suscipimus, utpote instructionem, directionem, correptionem, provisionem et spirituales medelas; ipsi nostræ salutis multipliciter cooperantur, et anxiantur pro nobis ne pereamus; in exterioribus quoque laborant pro nobis, ita quod propter nos frequenter spiritualia exercitia interrumpunt, omittunt, ac variis sollicitudinibus prægravantur. Non ergo simus

A eis ingrati, sed præcordialem dilectionem, præcipuam fidelitatem, obsequium omne nobis possibile rependamus eisdem, jugiterque deprecemur pro ipsis, et compatiamur occupationibus oneribusque ipsorum, quia et ipsi quo in altiori, eo et in periculosiori gradu versantur. Unde et quantumcumque corripuerint atque correxerint nos, nihilo minus semper plenam ac filialem geramus ad eos fiduciam, confidentes quod ex caritate et debito sui officii ac instinctu Spiritus Sancti omnia illa faciant nobis.

Præterea, reddamus Deo quæ Dei sunt, quæ ei promisimus, quæ ei tenemur, cui in ipsa nostra professione nos ipsos in holocaustum obtulimus, ut simus ejus obsequio totaliter mancipati, ejus caritate accensi, ab omni alieno, carnali, sæculari, immundo, injusto affectu penitus alieni. Corpus ergo et animam, membra et vires, et quidquid valemus, sumus, habemus, ejus honorificentiae offeramus, de his omnibus ipsum assidue venerantes, atque hæc omnia inviolate custodire conantes, ne per ea ipsum in aliquo offendamus, ne dæmoni placita faciamus, ne alteri quam Omnipotenti de his omnibus sacrificemus. Custodire ergo et refrenare tenemur omnem sensum exteriorem et interiorem, linguam, ventrem, manus, pedes, et cetera cuncta, ne per ea quidquam operemur culpabile, sed ea quæ Dei sunt, quæ ei sunt placita, fideliter exsequamur: et hoc, quotidie magis perfecte, ut nihil debiti subtrahamus, quia maledictus qui opus Dei efficit fraudulenter.

Jer. XLVIII,
10.

Postremo, ad istud complendum exigitur ut nunquam nos apprehendisse putemus, sed quæ retro sunt obliviscentes, semper in anteriora extendamur, meliora æmulantes charismata, et viciniora salutis quærentes. Quod quamvis ad omnes aliquo modo pertineat, eo quod non progredi sit regredi, potissimum tamen ad religiosos, qui ex sua professione ad perfectionem tendere obligantur. Hinc ait Bernardus: Vera virtus finem nescit, non tempore clau-

Philipp. III,
13.

I Cor. XII,
31.
Hebr. VI, 9.

ditur. Nunquam justus arbitratur se apprehendisse, nunquam asserit satis esse, sed semper esurit ac sitit justitiam, ita ut si semper hic viveret, semper justior esse contenderet, semper de bono in melius proficere totis viribus conaretur. Non enim ad annum vel ad tempus, sed in æternum divino se mancipat famulatui : ideo sempiternam meretur refectionem ; et licet *Sap. iv, 13.* brevi tempore consummetur, tamen iudicatur explesse tempora multa. Itaque indefessum proficiendi studium et jugis conatus ad perfectionem reputatur perfectio. Quod si studere perfectioni est esse perfectum, profecto nolle proficere, deficere est. Non est stare omnino ; nec in incerto hujus mortalis vitæ, quidquam in eodem permanet statu. Aut ascendas necesse *Gen. xxviii, 12.* est, aut descendas. Si attentas stare, ruas necesse est. Minime bonus est qui melior esse non cupit ; et ubi incipis nolle fieri melior, ibi desinis esse bonus. Vidit scilicet Jacob et in ea angelos, ubi nullus residens, nullus subsistens apparuit, sed vel ascendere vel descendere videbantur universi : quatenus palam daretur intelligi, inter profectum et defectum in hoc statu vitæ mortalis nihil medium inveniri. Hæc Bernardus. Itaque hujus vitæ brevitatem et beatitudinis æternitatem pensantes, præsertim infinitam Dei honorabilitatem et amabilitatem considerantes, accendamus atque quotidie validius inflammemur, et viam salutis non solum ambulare, sed et currere ac volare nitamur. Ad laudem et gloriam Omnipotentis.

DOMINICA XXIV POST TRINITATEM

ENARRATIO IN EPISTOLAM

NON CESSAMUS PRO VOBIS ORANTES ET POSTULANTES UT IMPLEAMINI AGNITIONE
VOLUNTATIS DEI. Coloss. I, 9-14.

DOCET Apostolus in præsenti epistola A quid prælati pro subditis suis debeant desiderare ac exorare. Nam ad Colossenses ait : *Non cessamus pro vobis orantes et postulantes*, id est, omni tempore opportuno mente et ore precamur, *ut impleamini agnitione voluntatis Dei*, id est, divinitus illustremini ad cognoscendum quid velit Deus, quid requirat a vobis, quid magis complaceat ei, ut sciatis et advertatis ejus mandata et Christi consilia; *in omni sapientia*, id est sacra doctrina divinæ Scripturæ, *et intellectu spirituali*, id est B interna ac mystica intelligentia Scripturarum : *ut ambuletis in semitis præceptorum digne Deo*, id est tam reverenter ac sancte ut decet tanto Domino deservire, atque ut eum pro præmio mereamini possidere. Maledictus enim qui facit opus Dei negligenter. *Per omnia*, id est in omni actu, *placentes Domino Deo* : quia ut Jacobus ait, si quis totam legem impleverit, offendat autem in uno, factus est omnium reus. *In omni opere bono fructificantes*, id est, omnium virtutum opera exercentes : virtutes namque connexæ dicuntur. *Et crescentes in scientia Dei*, id est notitia divinorum : de qua per Osee Dominus protestatur, Scientiam Dei volui plus quam holocausta.

In omni virtute theologica, et intellectuali atque morali, confortati secundum potentiam claritatis ejus, id est secundum

quod Deus potest per omnipotentiam suam clarissimam, vel secundum quod Deus idoneus est vos confortare per claritatem gratiæ suæ; *in omni patientia*, per quam adversa æquanimiter tolerantur, *et longanimitate*, qua divina promissa exspectantur constanter, *cum gaudio spirituali*, quod ex actu virtutum procedit, ut in expectatione futuræ beatitudinis gaudeatis.

Gratias agentes Deo Patri, qui dignos nos fecit per merita Christi gratiamque Baptismi, atque per opera meritoria quæ per gratiam suam fecit in nobis (juxta illud Isaïæ : Omnia opera nostra, Domine, operatus es in nobis), *in partem*, id est ad habendum participationem, *sortis Sanctorum*, id est hereditatis electorum, puta felicitatis æternæ, quæ habetur *in lumine*, id est per lumen gloriæ, vel in claritate visionis divinæ. De qua sorte ait Psalmista : Dominus pars hereditatis meæ. Qui item de lumine isto testatur : In lumine tuo videbimus lumen. Hæc autem hereditas dicta est sors, quia divinæ voluntatis electione, non humana provisione distribuitur, quemadmodum sortes dicuntur temperari ac disponi a Deo.

Qui eripuit nos per incarnationem, conversationem sanctissimam in hoc mundo ac passionem Unigeniti sui, de potestate tenebrarum, id est dominio dæmonum, a jugo peccati et tenebris ignorantiae, *et transtulit in regnum Filii dilectionis suæ*,

id est in regnum Filii sui dilecti, hoc est A in societatem Ecclesiæ militantis, seu in numerum electorum. Quæ Ecclesia dicitur regnum Christi, quia in corde fidelium regnat per fidem et gratiam. De quo regno

Luc. i, 32. scriptum est : Regnabit in domo Jacob in

Is. ix, 7. æternum; in Isaia quoque, Super solium David, et super regnum ejus sedebit. Nunc quoque translati sumus in regnum Ecclesiæ triumphantis in merito et in spe, transferendi illuc tandem in re. De hac ereptione et translatione generis humani,

Ibid. xlii, 6, 7.

Pater ait ad Filium apud Isaïam : Dedi te B in fœdus populi, in lucem gentium, ut educeres de conclusione vinctum, de domo carceris sedentes in tenebris. Præterea,

per id quod ait Apostolus, « transtulit » nos « in regnum Filii dilectionis suæ », Augustinus in libro de Trinitate ostendit, quod dilectio in divinis, non solum relative et notionaliter, sed etiam absolute dicatur : alias Filius Dei a Spiritu Sancto diceretur procedere.

In quo Christo, id est per cujus passionem et merita, *habemus redemptionem* a dominatione diaboli, utpote *remissionem peccatorum* nostrorum, quæ nobis per Christi passionem ac merita dimittuntur in fonte Baptismatis. Unde in Apocalypsi de Christo asseritur : Qui dilexit nos, et lavit nos a peccatis nostris in sanguine suo.

Apoc. i, 5.

SERMO PRIMUS

QUAM SOLLICITUDINEM PRÆLATI ERGA SUBDITOS GERERE DEBEANT.

DEUS Pater eripuit nos de potestate C tenebrarum, et transtulit in regnum Filii dilectionis suæ. Coloss. i, 13.

Ex principio hujus epistolæ docentur omnes animarum curam habentes, qualiter et quid pro sibi commissis debeant exorare, et item quid subditis præcipue necessarium sit ad salutem. Ait namque

Coloss. i, 9.

Apostolus : Non cessamus orantes ut impleamini agnitione voluntatis Dei. Apostolus autem prælatorum speciem tenet.

Quilibet ergo prælatus et curam animarum sortitus, incessabiliter debet viscera D pietatis divinæ pro grege sibi commissio affectuosissime invocare. Et primo hoc facere debet ex caritate sua ad illos præcipua et paterna. Quemadmodum enim illos paterno et speciali amore tenetur diligere, sic debet pro illorum salute sollicitus ac operatorius esse, orando, docendo, prædicando, corripiendo et corrigendo, sicut ad Timotheum scribit Apostolus : Prædica verbum, insta opportune, importune, argue, obseca,

II Tim. iv, 2.

increpa in omni patientia. — Secundo hoc facere debet ex justitia, hoc est ex debito sui officii. Est enim mediator inter Deum et plebem sibi commissam : idcirco potissimum sibi incumbit plebem suam Deo reconciliare, et dona gratiæ eidem divinitus impetrare. Quorum utrumque præsertim orando peragitur, quia ut ait Gregorius, Deus vult precibus placari, qui scit quod iratus non possit portari. Et S. Jacobus apostolus in sua scribit Canonica : Non habetis, quia non postulastis. — Tertio id facere debet ex sui ipsius spirituali amore dupliciter. Primo, ne et ipse dispereat et damnetur. Quum etenim quilibet homo insufficiens sit regere semetipsum et custodire, ac divina præcepta implere absque gratioso atque continuo Spiritus Sancti auxilio, sine quo nec aliquid salubriter cogitare, nec meritorie loqui, nec tentationibus reluctari victoriose valemus, multo minus quis potest et alios gubernare, custodire, perducere absque magno, inces-

Jacob. iv, 2.

santi et gratioso juvamine Spiritus Sancti. Idcirco qui præest, indesinenter ac ardentissime divinam debet misericordiam invocare, ut sibi conferre dignetur sapientiam, gratiam ac virtutem salubriter præsidendi, efficaciter prædicandi exemplariterque vivendi, subditis quoque det gratiam sic audiendi ut proficiant, obediunt et salventur. Itaque quum damnatio omnisque transgressio subditorum in superiores redundant, nisi debitum egerint sui officii, debet qui præest sic pro subditorum directione, illuminatione et salute

Sap. vi, 6.

Luc. xii, 48.

orare, ne illorum peccatis ac condemnationibus ipsemet involvatur : quia ut Sapiens asserit, Judicium durissimum in his qui præsumunt fiet. Christus quoque loquitur : Cui multum commendatum est, plus requiretur ab eo. Secundo, sic facere debet ex sui ipsius spirituali amore, quatenus omnium bonorum quæ subditi sui agunt, et futuræ felicitatis eorum sit particeps. Quemadmodum enim transgressio et damnatio pereuntium subditorum, in negligentes et carnales redundant prælatos, sic utique bonorum et obedientium subditorum merita et præmia, in diligentes redundare prælatos noscuntur. Unde ad Philippenses scribens Apostolus : Fratres (inquit) mei carissimi, gaudium meum et corona mea.

Philipp. iv, 1.

Insuper ex eisdem verbis docentur qui præsumunt, quid pro subditis suis debeant exorare, videlicet ut impleantur agnitione voluntatis Dei, id est intelligentia ac advertentia præceptorum cœlestium et eorum quæ Deo amplius placent, ut inter virtutes et vitia vere distinguant, nec malis et falsis pro bonis et veris præstent assensum. Multi etenim peccant ex ignorantia ; et frequenter incertus est homo quid sit melius, quid verius, quid salubrius exercendum, quia et vitia quædam speciem habent virtutum. Hinc necessaria valde est homini illuminatio Spiritus Sancti, ut impleatur agnitione voluntatis divinæ. Unde orat vir sapiens : Mitte, Domine, sapientiam de cœlis sanctis tuis et a sede

A magnitudinis tuæ, ut mecum sit et mecum laboret, ut sciam quid acceptum sit coram te omni tempore ; scit enim illa omnia et intelligit, et deducet me in operibus meis sobrie. In primis etenim oportet veritatem cognoscere, deinde quod bonum est operari. Propter quod, secundum Ambrosium, ignorantia est maximum omnium vitiorum, non utique magnitudine culpæ seu enormitate offensionis, sed magnitudine periculositatis, quoniam qui ignorat quid agere debeat, quid Deus ab ipso requirat, quid vere sit virtuosum, multa et magna incidit tam omissionis quam commissionis peccata.

Denique in his non sufficit humana instructio, sed divina quoque illuminatio necessaria exstat hominibus, tot et tanta occurrunt eis, tot tentationes, perplexitates, dubietates et obscuraciones. Nos quippe involvimur tenebris. Idcirco in libro Sapientiæ habetur : Quis poterit cogitare quid velit Deus, nisi tu, Deus, dederis sapientiam, et miseris spiritum tuum de cœlis ? Cogitationes enim mortalium sunt timidæ, et incertæ sunt providentiæ nostræ ; corpus enim quod corrumpitur, aggravat animam. Hinc orat Psalmista : Faciem tuam, Domine, illumina super servum tuum, et doce me justificationes tuas. Propterea demum assignavit providentia pietatis divinæ unicuique homini angelum bonum, qui illustret et dirigat eum.

Job xxxvii, 19.

Sap. ix, 13, 17, 14, 15.

Ps. cxviii, 135.

Præterea, ex eisdem verbis docentur subjecti, quid eis potissimum opportunum sit ad salutem, puta ut impleantur agnitione voluntatis Dei. Id ergo in primis summe eis incumbit, ut divina præcepta agnoscant et vere intelligant, præcepta quoque Ecclesiæ et doctrinas sacræ Scripturæ. Unde ad prædicationes ire tenentur, atque de his instructionem exquirere publice et privatim, quum dicat Apostolus : Qui ignorat, ignorabitur. In Deuteronomio quoque jubetur : Interroga patrem tuum, et annuntiabit tibi ; majores tuos, et dicent tibi. Specialiter vero unusquisque fideliter Deum jugiter debet precari, ut se illumi-

I Cor. xiv, 38.

Deut. xxxii, 7.

Sap. ix, 10, 11.

nare, custodire atque dirigere in cunctis
Ps. lxxxv, dignetur, sicut orat Propheta : Deduc me,
 11. Domine, in via tua, et ingrediar in veritate
Ps. cxviii, tua ; et rursus, Deduc me in semita man-
 35. datorum tuorum. Unde denuo protestatur
Ps. xciii, 12. ac loquitur Deo : Beatus homo quem tu
 erudieris, Domine, et de lege tua docueris
 eum. Est ergo unicuique nostrum in pri-
 mis necesse ut sciat quid Deo sit placitum,
 et quid ei acceptum agere queat, ut
Coloss. 1, ambulet digne Deo cum omni diligentia,
 10. reverentia, munditia et fervore, deservien-
 do regi majestatis immensæ ; quia ut tali-
 ter Deo ministremus, Christus venit in
 mundum, Zacharia testante : Benedictus
Luc. 1, 68, Dominus Deus Israel, quia visitavit et fecit
 74, 75. redemptionem plebis suæ, ut sine timore
 serviamus illi, in sanctitate et justitia co-
 ram ipso omnibus diebus nostris.

Præterea quæri potest, qualiter fragilis
 homo possit Deo digne servire seu ambu-
 lare, quum Deus omnipotens et excelsus
 sit in infinitum majori reverentia dignus,
 quam omnes simul intellectuales creatu-
 ræ ei possint impendere. Et responden-
 dum, quod habendo respectum ad infini-
 tam dignitatem et excellentiam Dei, nullus
 potest ei digne servire ; sed considerando
 possibilitatem fragilitatis humanæ, digni-
 tatem quoque gratiæ gratum facientis, et
 caritatis infusæ, actualisque motionis Spi-
 ritus Sancti, et item dignationis et acce-
 ptationis divinæ, qua Deus tale aut tale
 obsequium sibi impensum dignatur quasi
 dignum suscipere, sic potest homo Deo
 digne servire, præsertim dum agit omne
 quod valet, et tamen nil dignum se agere
 arbitratur.

Hortatur ergo Apostolus ut in omni ope-

A re bono crescamus, atque ad Dei gloriam in
 omni roboremur virtute, quoniam « Deus
 Pater » per Unigenitum suum « eripuit nos
 de potestate tenebrarum, et transtulit in
 regnum Filii » sui. Christus enim ut homo,
 passus est atque promeruit hominibus
 gratiam beatitudinemque æternam ; sed
 efficacia seu idoneitas id agendi fuit a
 divinitate, et Deus Pater, imo superbea-
 tissima Trinitas tota, per Christum homi-
 nem nos efficienter ac principaliter libe-
 ravit. Unde in Osee scriptum est : Ego
 Osee xiii, 4.
 B Dominus Deus tuus, et salvator non est
 præter me. De hac ereptione scriptum est
 prima Petri : Non corruptibilibus auro et
 I Petr. i, 18,
 argento redempti estis, sed pretioso san-
 19. guine Agni immaculati. Simus igitur tanto
 liberatori subjecti et grati, ejus præceptis
 diligentissime jugiter obediendo, exemplo
 beatissimi Danielis prophetæ. Qui quum
 Dan. i-vi.
 esset per aliquot annos cum Dario rege
 Medorum, deinde pluribus annis cum Cy-
 ro rege Persarum, et esset in medio gen-
 tilium pessime idololatrantium, essetque
 C regibus illis carissimus et plurimum fa-
 miliaris, et in maxima dignitate constitu-
 tus ab eis, nunquam tamen potuit ab eis
 aut eorum principibus ac ministris induci
 adulatione aut minis ut divinum transgre-
 deretur præceptum, vel veri Dei relinque-
 ret cultum, idola adorando ; sed maluit
 mitti in lacum leonum, quam particeps
 fieri transgressionum. Unde pro hac causa
 in lacum leonum bis missus est. Et quam-
 Ibid. vi, 16 ;
 vis illi fuerint plurimi atque ingenti fame
 xiv, 30.
 confecti, et Daniel multis horis inter eos
 D sedisset, nil tamen fecerunt eidem, sed
 illæsus exivit. Sic Deus inter leones pro-
 texit fidelissimum servum suum.

ENARRATIO IN EVANGELIUM

LOQUENTE JESU AD TURBAS, ETC. Matth. IX, 18-22.

MATTHÆUS evangelista in præsentī de-
scribit evangelio, qualiter Domino
nostro Jesu transeunte ad suscitandum
puellam defunctam, in via sanaverit fe-
minam a sanguinis profluvio, solo sui ve-
stitus contactu. Itaque Matthæus sic ait :
Loquente Jesu ad turbas, id est prædicante
eo Judæis, *ecce princeps unus accessit*. Se-
cundum Lucam et Marcum, princeps iste
nomine Jairus, fuerat archisynagogus, id
est princeps synagogæ unius : ideo a Mat-
thæo princeps vocatur. Habuerunt enim
Judæi certas domos in quibus convene-
runt ad vacandum orationi, lectioni, ac
laudibus Dei : quæ domus dictæ sunt sy-
nagogæ ; et qui præerant eis, vocati sunt
archisynagogi, id est principes synago-
garum. *Et adoravit eum, dicens*. Nondum
Jairus iste explicite credidit Jesum esse
verum Deum, nec adhuc tenebatur ad fi-
dem ita explicitam ; credidit tamen quod
posset filiam suam suscitare a morte vir-
tute et auxilio Dei, eo quod esset sanctus
vir et magnus propheta. Non ergo adora-
tione latriæ, sed duliæ, Christum adoravit :
nam magnam ei reverentiam fecit, quia ut
Lucas refert, cecidit ad pedes ejus. Juxta
quem modum, tertio Regum, Nathan pro-
pheta et Bethsabée David regem adorasse
scribuntur.

Domine, filia mea modo defuncta est.

Huic videtur contrarium, quod in Marco
legitur Christo dixisse : *Filia mea in ex-
tremis est*. Respondetur dupliciter : Pri-
mo, quod Jairus loquitur juxta communem
modum loquendi, quo de homine agoni-
zante cujus vita desperatur, communiter
dicimus, quod sit mortuus homo. Unde
Lucas narrat, quod moriebatur. Secundo,
quod Matthæus narrat verba a Jairo dicta

A ad Christum, postquam a servis suis au-
divit filiam suam jam esse defunctam. *Sed
veni corporaliter, impone manum tuam
super eam, et vivet*, id est, super corpus
defunctæ manum tuam impone, et resusci-
tabitur. Itaque corporalem Christi putavit
præsentiam necessariam, nec tam perfe-
ctæ fuit fidei sicut centurio, qui Christum
corporaliter absentem credidit virtute di-
vina angelorumque ministerio posse cu-
rare. Verumtamen Jairus iste tam perfectæ
fidei fuit, quod credidit Christum tantæ
B existere sanctitatis, quod per manus suæ
contactum posset mortuam suscitare, vir-
tute, precibus ac meritis animæ suæ, quasi
per causam instrumentalem ac merito-
riam, divina omnipotentia effective ac
principaliter operante, juxta illud in Psal-
mo : *Benedictus Dominus Deus Israel, qui
facit mirabilia solus*. Noverat quippe hic
Jairus, qualiter quarto Regum legatur ex
contactu ossium Elisei quidam mortuus
suscitatus.

Et surgens Jesus, sequebatur eum, quia
condoluit ei. Nam filia ista erat unica pro-
les ejus, habuitque duodecim annos, ut
legitur apud Lucam, sicque cœpit nubilis
esse. *Et discipuli ejus*, id est Apostoli, imo
et turba magna sequebatur in via hac
Christum, ut dicit Marcus.

*Et ecce mulier quæ sanguinis fluxum
patiebatur duodecim annis*. Et secundum
Lucam, erogavit omnem substantiam su-
am in medicos, nec aliquid profuit ei :
sicque videtur incurabiliter ægra fuisse.
Accessit retro : quia præ verecundia voluit
occulte facere quod fecit, præsertim quia
secundum legem, fuit immunda ; *et tetigit
fimbriam vestimenti ejus*, videlicet infe-
riorem vestis partem. Cur Christus fim-

Luc. viii,
41; Marc. v,
22.

Matth. viii,
8 et seq.

Ps. lxxi, 18.

IV Reg. xiii,
21.

Luc. viii, 42.

Marc. v, 24.

Luc. viii, 43.

Lev. xv, 25.

Luc. viii, 41.

III Reg. 1,
23, 16.

Marc. v, 23.

Luc. viii, 42.

briam in vestimento habuit, in sermone A dicetur. Denique Eusebius, Cæsariensis episcopus, in Historia ecclesiastica asserit, feminam hanc fuisse civem Cæsareæ Philippi, atque in testimonium hujus miraculi fuisse ante domum ejus erectam ipsius imaginem æream genibus provolutam ante imaginem Salvatoris, quæ stabat ante eam, extendebatque dexteram ad imaginem mulieris. Aliqui tamen dixerunt, quod mulier ista fuerat Martha. Sed primum verius creditur, præsertim quia et Martha post hæc dives permansit; sed mulier ista B consumpsit omnia sua pro medicina, ut tactum est.

Dicebat enim intra se : Si tetigero tantum vestimentum ejus, salva ero a sanguinis hujus profluvio. In quo magnitudo fidei ac devotionis hujus feminæ declaratur, quæ non solum per tactum manus, sed etiam vestis Christi credidit omnem infirmitatem, quamvis naturaliter incurabilem, posse curari. Tantam etenim credidit Christo sanctitatem atque virtutem inesse, ut diffunderetur per ejus vestem : C quæ licet in se virtutem non haberet sanandi, tamen in quantum fuit operimentum corporis Christi, efficax fuit instrumentum miraculosæ curationis.

At Jesus conversus, id est, retro adspiciens, et videns eam oculo corporali et

intellectuali, atque per approbationis notitiam, *dixit : Confide, filia*, id est, firmiter spera te adepturam quod cupis, imo et plus, quia et mente ab omni peccato purgaberis; *fides tua te salvam fecit*, id est, merito fidei tuæ a me curari jam promereris, ita quod actio fidei fuit causa meritoria hujus curationis. *Et salva facta est mulier* a sanguinis sui fluxu et culpis, *ex illa hora*, id est, mox ut tetigit fimbriam vestis Christi. Christus equidem, cujus perfecta sunt opera, *Deut. xxxii, 4.*

Postremo Lucas et Marcus plenius recitant signum istud, quia secundum eos, Christus post fimbriæ suæ contactum a femina ista interrogavit : Quis me tetigit? Et Petro respondente : Præceptor, turbæ te comprimunt et affligunt, et tu dicis, Quis me tetigit? Christus vero repetivit et ait : Tetigit me aliquis; nam et ego novi virtutem de me exisse. Quo dicto, videns mulier quod factum suum non latuit Salvatorem, venit et procidit coram eo cum magno timore; atque coram cunctis qui aderant, dixit quod fecit, et qualiter esset curata. Tuncque dixit Dominus ei : « Confide, filia; fides tua te salvam fecit. » — Hic finitur evangelium hodiernum, secundum plerasque Ecclesias. De suscitatione autem filiæ archisynagogi in sermone dicetur tertio mox subsequente. *Luc. viii, 45-47; Marc. v, 30-33.*

SERMO SECUNDUS

DE MYSTICA SIGNIFICATIONE FEMINÆ A SANGUINIS FLUXU CURATÆ.

CONFIDE, filia; fides tua te salvam D *fecit.* Matth. ix, 22.

Christus per totum Evangelium tres virtutes videtur specialiter commendasse ac docuisse, videlicet fidem, humilitatem et caritatem. De fide etenim ait : Omnia possibilia sunt credenti; et rursus, Habete fidem Dei; itemque Apostolis submergi

timentibus, Ubi est fides vestra? atque *Luc. viii, 25.* ad Thomam apostolum, Beati qui non viderunt et crediderunt. Sæpius quoque dixit : Fides tua te salvum fecit. Itaque fidem Christus tam multipliciter ac specialiter commendavit : Primo, quoniam ipsa est omnium fundamentum virtutum, et sine ea nihil est meritorium, nil Deo placitum *Joann. xx, 29.* *Matth. ix, 22; Marc. x, 52; Luc. vii, 50; etc.*

Marc. ix, 22.
Ibid. xi, 22.

Hebr. xi, 6. et acceptum, dicente Apostolo : Sine fide A impossibile est Deo placere. Imo alibi plus
Rom. xiv, 23. affirmare videtur, dicendo : Quidquid non est ex fide, peccatum est. Secundo, quoniam ipsa est lux et oculus mentis, ostendens homini ultimum finem, propter quem omnia debet peragere. Per fidem enim cognoscimus ea quæ pertinent ad salutem, et quod ad æternam felicitatem conditi sumus, quod item ob eam obtinendam universa pati et operari debemus, et præsertim ob Dei gloriam et honorem.

Is. xxi, 2. Hinc in Isaia habetur : Qui incredulus est, B infideliter agit. Habacuc quoque ait : Ecce qui incredulus est, non erit anima ejus recta in semetipso; justus autem in sua fide vivet. Tertio, quia per fidei actum Deum maxime honoramus, dum scilicet propter ipsius auctoritatem ac reverentiam subjicimus intellectum nostrum articulis fidei christianæ, præbendo firmum assensum his quæ per intellectum capi non valent, imo omnem rationem prorsus transcendunt. Unde secunda ad Corinthios *II Cor.* x, 5. ait Apostolus : In captivitatem redigimus C omnem intellectum in obsequium Christi. Quarto, quia per fidem alia dona impetramus a Deo, quum dicat Salvator : Quicumque dixerit huic monti, Jaeta te in mare, et non hæsitaverit in corde suo, sed crediderit quia quodcumque dixerit, fiat, *Jacob.* i, 6, fiet. Hinc et Jacobus ait : Postulet homo in fide, nihil hæsitans; qui autem hæsitaverit, similis est fluctui maris : non ergo æstimet homo ille, quod accipiat aliquid a Domino. Debemus ergo firmissimi atque certissimi esse in fide, sicut certissime D scimus quod Deus qui fidei testis est, falsitatis confirmator et testis nequit existere.

Præterea de humilitate ait Salvator : *Matth.* xviii, 3. Nisi conversi fueritis, et efficiamini sicut parvuli, non intrabitis in regnum cælorum; itemque, *Ibid.* xi, 29. Discite a me, quia mitis sum et humilis corde. Nam et ipsa humilitas secundum quasdam considerationes vocatur fundamentum virtutum, quia ad omnium gratiarum profectum disponit, et

præsertim quia directe extirpat superbiam, omnium vitiorum originem. Hinc omnem superbiam nos oportet vitare, ut nec in cogitationibus propriis extollamur ut *Eccli.* vi, 2. tauri, nec in affectionibus nostris ut Lucifer, neque in verbis ut hi qui laudant et jactant se ipsos, neque in factis ut onagri in deserto, neque in vestimentis sicut pavones in suis pennis. Qui tamen dum pedum suorum deformitatem inspiciunt, exterrentur, abhorrent et clamant. Ita si quis ex consideratione excellentiæ suæ in donis naturæ aut gratiæ vel in bonis Ecclesiæ seu fortunæ, velit extollere semetipsum atque inaniter gloriari, quasi a Deo non sit cuncta sortitus, adspiciat suos pedes. Per pedes quippe, quæ extrema et infima corporis sunt, intelligendæ sunt defectuositates, vitiositates, sordes et turpitudines hominis in corpore et in anima : quas si quis acute intueatur, se ipsum satis aspernari et humiliare non poterit. Humilitatem ergo jugiter amplectamur, simusque viles, foedi ac miseri in propriis oculis, ita ut omni adversitate arbitremur nos dignos, et ita propter adversa, injurias, irrisiones non indignemur, sed patientes perseveremus, et gratias Deo reddamus.

Insuper de caritate ait Salvator, ut Deum *Matth.* xxii, 37-40. toto corde amemus, et proximos nostros tanquam nos ipsos : In his (inquiens) duobus mandatis tota lex pendet et Prophetæ. Caritas etenim Dei, est omnium virtutum regina, imperatrix, motrix, vita et forma, sine qua homo spiritualiter nihil est. Idcirco caritatem in omnibus et præ omnibus semper habere, conservare atque augere in nobis conemur, faciamusque *Ibid.* vii, 12. proximis nostris prout nobis fieri rationabiliter volumus.

Denique hæ tres virtutes in femina ista sanguinis fluxum ferente possunt attendi. Nam fides ejus patet in hoc, quod ex contactu vestium Christi credidit se ab incurabili morbo curandam; humilitas, quod retro silenter et verecunde accessit, quod item ad Christi cecidit pedes, omnem ei confitens veritatem; caritas, quod affe-

* Cf. t. IX, p. 549 B', 611 C'.
 ctuosissime Christum imitabatur *, atque post suam ab eo curationem valde grata fuit ei, quia ut tactum est, ad perpetuam beneficii sibi collati memoriam, fieri fecit in horto suo imaginem Salvatoris stantem erecte cum fimbriis vestimenti, atque in ea Christum devotissime adoravit. Fecit quoque sui ipsius imaginem coram imagine Christi genibus flexis et manibus cancellatis. Et sicut in Ecclesiastica historia scribit Eusebius, juxta imaginem Salvatoris quædam herbæ crescebant, quæ quum prius nullius essent virtutis, postquam Christi fimbriam tetigerunt, tantæ virtutis effectæ sunt, quod omnes infirmitates curabant. Cassiodorus demum asserit in Historia tripartita, quod Julianus apostata inde removit imaginem Christi, ponens ibidem imaginem suam, quæ postea ictu fulminis est destructa.

Præterea, circa intellectum hujus quod Christus fimbrias tulit in veste, sciendum quia (ut communiter expositores testantur) Christus juxta consuetudinem Judæorum portavit vestimentum cum quatuor fimbriis. Nam et Deus præcepit per Moysen ut filii Israel facerent sibi fimbrias quatuor, per quatuor angulos palliorum, ponentes in eis vittas hyacinthinas, quas quum viderent, recordarentur omnium præceptorum Domini. Istud ad cærimonialia pertinebat præcepta : ideo Christus factus sub lege, id observavit, sicut et alia quædam legalia, usque ad tempus passionis, in quo cærimonialium legis præceptorum obligatio prorsus cessavit.

At vero, quamvis in hac muliere considerentur virtutes præfatæ, nihilo minus per eandem ut sanguine fluentem, intelligi potest omnis peccatrix anima, vitiis concupiscentiisque subjecta. Talis etenim anima nunquam in rectæ rationis judicio permanet stabilis, nec virtutum robore solidatur, sed juxta Psalmistam, est tanquam pulvis quem projicit ventus a facie terræ. Sic anima talis de uno vitio ruit in aliud, de concupiscentia una in aliam. Nunc ridet, nunc mœret, nunc perterre-

tur, jam quasi securam se arbitratur; atque innumerabilibus passionum motibus agitur, et in desideriorum suorum profluviiis perit, in cogitationum suarum tumultibus peccat. Sed homo virtuosus ac sapiens passiones suas refrenat, affectiones in ultimum ordinat finem, mentem suam in Deum recolligit, virtutibus solidatur : ideo constans ac stabilis est. Unde in Proverbiis scribitur : Justus quasi fundamentum æternum; quasi tempestas transiens, impius non erit. In Ecclesiastico quoque legitur : Homo sanctus in sapientia manet sicut sol; nam stultus sicut luna mutatur. Quemadmodum enim caro sustentatur per ossa, et ædificium domus per saxa et ligna, sic homo per sapientiam et virtutes spiritualiter consolidatur, fortificatur ac stabilitur. Siquidem per humilitatem consolidatur contra superbiæ ventum, per mansuetudinem contra iracundiæ impetum, per patientiam contra tristitiæ dejectionem, per liberalitatem contra avaritiæ inquietationem, per castitatem contra concupiscentiarum impulsus, per sapientiam contra cogitationum tumultum, per confidentiam Dei contra timorem, per caritatem Dei et proximi contra omnem invidiam et rancorem. His ergo virtutum machinis et columnis, ac veræ sapientiæ radiis, studeamus quotidie animas nostras confortare, ædificare et custodire, ne a dæmonum tentamentis, a carnis illecebris, a vanitatibus mundi vincamur.

Porro qui adhuc vitiis subjacet et concupiscentiis fluit ac defluit, exemplo feminæ hujus Christum verecunde humiliterque accedat, propria ponderando flagitia, et de eorum turpitudine coram Altissimo valde verecundando; et dicat in corde suo : Si tetigero fimbriam vestimenti ejus, curabor a vitiis, hoc est, si Christi humilitatem fuero saltem aliquammodo imitatus, gratiose ab eo adspiciar et mundabor. Per fimbrias quoque vestis Christi, sacramenta ejus intelliguntur, sub quibus Christus ejusque gratia tegitur ac consistit. Oportet ergo sacramenta hæc tangere, et ex eis tan-

Prov. x, 25.

Eccli. xxvii, 12.

Num. xv, 38, 39.

Ps. i, 4.

quam ex vasis medicinalibus purgationem, gratiam et virtutes haurire. Atque in primis oportet humiliter, vere et integre confiteri, sicque Eucharistiæ sumere sacramentum, spiritualiter quidem quotidie, conjungendo se ei per fidem et caritatem (Augustino dicente, Crede, et manducasti), sacramentaliter vero simul et spiritualiter tempore opportuno, alia etiam sacramenta congruo loco et tempore apto, ut sic in omni virtute et gratia robaremur, et forti mulieri assimilemur. De qua Salomon factur : Mulierem fortem quis inveniet? Accinxit fortitudine lumbos suos; manum suam misit ad fortia; os suum aperuit sapientiæ, et lex clementiæ in lingua ejus; panem otiosa non comedit; mulier timens Dominum, ipsa laudabitur. Istæ sunt proprietates et operationes bonæ mulieris, quas etiam viri habere, sequi et conservare tenentur.

Prov. xxxi,
10, 17, 19,
26, 27, 30.

Dan. xiii.

Talis fuit virtuosa ac venerabilis illa Susanna, uxor Joakim. Quæ quum esset pulcherrima et fidelissima viro suo, imo quod majus est, devota ac timorata, atque in lege Moysis erudita, a duobus presbyteris judicibus Israelitici populi concupiscebatur. Quumque eam in pomario viri sui solam deprehendissent, dixerunt : Ecce nullus nos videt, et in concupiscentia tui sumus; quamobrem nostræ nunc acquiesce voluntati, alioqui dicemus contra te testimonium, quod juvenis unus concubuerit tecum. His auditis, ingemuit Susanna : Angustiæ,

inquiens, mihi sunt undique : si enim vobis consensero, mortem promereor; si non consensero vobis, non effugiam manus vestras. Sed melius est mihi absque opere pravo incidere in manus vestras atque occidi, quam peccare in conspectu Dei. Exclamavit ergo Susanna; exclamaverunt quoque contra eam presbyteri et iudices illi. Accurreruntque famuli Susannæ. Quibus dixerunt presbyteri, quod vidissent eam cum adolescente peccare; et erubuerunt vehementer, quia Susanna semper honestæ fuerat famæ. Altero die, convocantes presbyteri populum Israel et Susannam, accusaverunt eam coram omnibus de adulterio. Et stabant cum ea vir ejus, et parentes sui ac filii, ceterique consanguinei ac amici, et flebant cuncti, imo et omnes qui eam noverunt. Nihilo minus populus credidit illis duobus presbyteris tanquam iudicibus. Susanna vero in cælum adspiciens, dixit : Deus æternæ, qui absconditorum es cognitor, tu scis quia falsum contra me testimonium protulerunt. Quumque duceretur ad mortem, Deus justus et sanctus revelavit veritatem Danieli prophetæ ibi præsentis. Qui statim coram omnibus exclamavit : Falsum testimonium contra eam dixerunt. Stetitque populus. Daniel vero seorsum examinans illos duos presbyteros, ex verbis eorum convicit eos, et coram omnibus probavit eos esse mentitos. Sicque liberata fuit Susanna, et iudices illi mox interfecti fuerunt.

SERMO TERTIUS

DE SPIRITUALI SIGNIFICATIONE EORUM QUÆ DE SUSCITATIONE FILIÆ
JAIRI SCRIPTA SUNT.

EGO occidam, et ego vivere faciam, D percutiam, et ego sanabo, et non est qui de manu mea possit eruere. Deut. xxxii, 39. Hæc sunt verba Dei omnipotentis.

Quamvis itaque creaturis rationabilibus et irrationabilibus conveniat occidere, tamen soli Deo proprium est occidere et quod occisum seu mortuum est idem nu-

mero rursus vivificare. Unde et Christus A Deum se esse demonstrans, filiam Jairi archisynagogi defunctam, non orando, sed imperando, repente ad libitum reduxit ad vitam, vere resuscitans eam. Quod qualiter factum sit, in evangelio hodierno non legitur; sed inchoatur in eo historia resuscitationis istius, atque in verbis post evangelium istud immediate sequentibus enarratur, et nunc breviter tangam.

Itaque, quum Christus mulieri quam a sanguinis fluxu curavit, dixisset, Confide, filia, fides tua te salvam fecit, et esset B in via ad domum Jairi archisynagogi, venerunt nuntii ad Jairum, dicentes: Mortua est filia tua; quid ultra vexas Magistrum? Putaverunt nuntii isti quod Christus mortuam suscitare non posset. Jesus autem audito hoc verbo, dixit patri puellæ, videlicet Jairo, qui in Hebræo vocatur Jair: Noli timere; crede tantum, et salva erit, id est, a morte redibit ad vitam ac sanitatem. « Et quum venisset in domum » Jairi, « et vidisset tibicines », id est quosdam in domo sedentes et lugubre carmen canentes, ad provocandum compassionem et fletum in audientibus. Tales cantores seu cantatrices adducebantur olim, imo adhuc in quibusdam terris adducuntur in magnarum funere personarum, ut suo cantu provocent audientes ad lacrimas. Nam juxta diversitatem symphonie seu notæ, cantus sive sonorum, diversæ generantur affectiones in audientium cordibus: hinc aliquæ melodie provocant ad audaciam, sicut in bellis; aliquæ ad lætitiā, sicut in nuptiis; quædam ad devotionem, quemadmodum in divinis; quædam ad compassionem et planctum, ut in funeribus. « Et turbam tumultuantem », quia turba quæ fuit in domo Jairi, fecit sonum confusum et strepitum magnum, lamentando, loquendo, et funeri necessaria præparando; « dicebat » ad eos: « Recedite » et nolite flere; « non est puella mortua, sed dormit. Et deridebant eum », scientes quod mortua esset. Ideo deriserunt Christum, quoniam verba ejus non intellexerunt:

non enim voluit Christus asserere, quod puella non esset mortua morte naturæ, sed quod quoad se non esset more aliorum defuncta, sed potius dormiens seu similis dormienti, utpote protinus resuscitanda ab ipso.

« Et quum ejecta esset turba » illa tumultuans, id est de domo expulsa, quoniam ob suam incredulitatem et Christi derisionem, indigna fuit interesse tanto miraculo, « intravit » cubiculum, et non permisit illuc intrare secum quemquam, nisi Petrum et Joannem et Jacobum fratrem ejus, atque parentes puellæ. Hi tres Apostoli fuerunt præ ceteris Christo familiariores: unde et passione instante eos seorsum duxit, et coram ipsis cœpit contristari, pavere ac tædere. Et tenens manum puellæ, clamabat dicens: Puella, surge. Et reversus est spiritus ejus, id est, anima ejus a loco quo eam divina justitia constituerat rediit, et corpori reunita est. « Et surrexit puella » continuo, et ambulavit; et jussit illi dare manducare. Sicque per ambulationem et manducationem patuit eam esse veraciter resuscitatam. Et obstupuerunt parentes puellæ, stupore maximo, præ admiratione tanti miraculi tam repente imperialiterque peracti; quibus præcepit ne alicui dicerent quod factum erat, id est, ne istud miraculum alicui notificarent. Hoc præcepit Salvator, non quia putavit tantum miraculum debere celari, sed ut nos humilitatem amare, vanitatem vero et ostentationem vitare doceret. Idcirco, Christi exemplo laudem humanam jactantiamque spernamus. « Et exiit fama hæc », id est rumor hujus miraculi, « in universam terram illam », id est per totam Galilæam, in qua contigit istud. Quamvis equidem Christus præcepit parentibus puellæ atque Apostolis istud non revelare, protinus tamen vulgatum est a turba illa quæ Christum derisit, et puellam fuisse defunctam cognovit.

Ista est historia suscitationis hujus puellæ, ex tribus Evangelistis, puta Matthæo, Luca et Marco, accepta. Superius quoque,

Matth. ix, 25.

Marc. v, 37.

Matth. xxvi, 37.

Luc. viii, 54, 55.

Matth. ix, 25.

Marc. v, 42.

Luc. viii, 55.

Ibid. 56.

Matth. ix, 26.

Matth. ix, 22.

Marc. v, 35;
Luc. viii, 49.

Marc. v, 36;
Luc. viii, 50.

Matth. ix, 23.

Ibid. 24.

Cf. p. 467 D et s. in sermone circa evangelium in dominica sextadecima, dictum est quid per tres mortuos a Christo resuscitados spiritualiter designetur. Illo ergo omisso, de aliorum quæ in hujus miraculi historia dicta sunt, tropologico intellectu aliquid est dicendum.

Itaque per Jairum archisynagogum designatur quilibet prælatus Ecclesiæ : qui si filiam suam, hoc est congregationem seu plebem sibi commissam, agnoverit spiritualiter mortuam per peccata mortalia, aut morti tali jam proximam per dispositionem ad peccata letalia, statim cum omni sollicitudine et caritatis fervore accedat ad thronum gratiæ Christi, et prostratus in terram, imploret auxilium gratiæ ejus. Si interea denuntietur prælato, Quia mortua est filia tua, id est, plebs tua seu persona aliqua tibi commissa, indurata est incorrigibilisque effecta, non desperet, nec Deum pro illius reformatione invocare desistat. Et tunc Christus pie exaudiet eum, atque subveniet.

Itaque per puellam hanc mortuam, intelligi potest quilibet homo mortali subiectus ac victus peccato. Primo, nam sicut puella est tenera ac fragilis creatura, non fortis in ratione neque in discretione prudentiæ, sed bono regimine refrenationeque indigens, quia ex se faciliter decipi potest ac vinci ; sic omnis peccator qui in mortali est culpa, miserabiliter mollis ac debilis est, utpote cedens et acquiescens hostibus suæ salutis, et omni spirituali ac salutari sapientia carens, imo et indiscretissime agens, quia a suo Creatore, a fonte beatitudinis suæ, a summo, infinito et incomparabili bono cor suum avertit, nec divino neque angelico instinctui consentiens sive obtemperans, sed diabolicis suggestionibus et carnalibus vitiosisque motibus præbens assensum : quod utique summa exstat stultitia. Unde et omnis peccator recte stultus vocatur, quemadmodum ait Salvator : Omnis qui audit verba mea et non facit ea, similis erit viro stulto qui ædificavit domum suam supra arenam. Quemadmodum enim stultus est ædi-

ficator qui supra arenam ædificium suum fundat, sic fatui sunt omnes qui non obediunt Christi doctrinis, quoniam mentem suam non figunt in Deo, sed in rebus caducis, vanis ac deceptoriiis, de quibus Salomon loquitur : Vanitas vanitatum, et omnia vanitas. Ideirco in his decipiuntur, quia ad tempus prosperantur in talibus, et post in infernum labuntur, eo quod creaturis inanibus magis quam Creatori beatissimo inhæserunt. De quibus in Job habetur : Impii sublevati sunt confortatique divitiis; ducunt in bonis dies suos, et in puncto ad infernum descendunt. Hinc Christus per fatuas virgines omnes iniquos designat.

Insuper, sicut puella ob cordis sui molitiem, inexperientiam, imprudentiam ac fallibilitatem, bono eget regimine et refrenatione præcipua (quemadmodum in Ecclesiastico scriptum est : Filiæ tibi sunt? conserva corpus earum, et ne ostendas hilaritatem faciem tuam ad eas; itemque, In filia non avertente se firma custodiam, ne inventa occasione abutatur se); sic impii et injusti maxime egent regimine sapientiali et refrenatione indesinenti, quatenus ad viam veritatis, ad tramites justitiæ reducuntur, nec libertati propriæ relinquuntur, sed per rigorem disciplinæ compescantur a malis, si aliter resipiscere nolint. Quemadmodum enim equus velox absque freno et rectore discurrens, se ipsum in aquas aut lacum præcipitat; sic vitiosi ac intemorati, dum sibimetipsis relinquuntur, in profundum se ipsos præcipitant vitiorum, quousque in pœnas projiciantur perpetuas inferorum. Hinc in Proverbiis scriptum est : Ubi non est gubernator, populus corruet. In talibus plane impletur quod Salomon protestatur : Est via quæ videtur homini bona, et novissima ejus ducunt ad mortem. Multi etenim diversis vitiis seducuntur et opera saluti contraria operantur, nec tamen credunt se deviare, nec increpantibus et informantibus acquiescunt. Quum enim vitiosis affectionibus sint repleti et animo excæcati, perverse judicant

Eccle. i, 2.

Job xxi, 7, 13.

Matth. xxv, 2 et seq.

Eccle. vii, 26.

Ibid. xxvi, 13..

Prov. xi, 14.

Ibid. xiv, 12.

Matth. vii, 26.

et injuste : ideo contra suam salutem, ad honores, ad divitias, ad voluptates, ad vana et frivola tendunt. De quibus Isaias ait : Væ qui dicunt bonum malum, et malum bonum, ponentes tenebras lucem, et lucem tenebras. Pro istis igitur incorrigibilibus est orandum, ut Christus eos suscitare dignetur, eos misericordissime præveniando, intus tangendo, illuminando ac inflammando.

Is. v, 20.

Denique, sicut puella in lectulo jacuit mortua, vestibis cooperta ; ita peccator in propriis vanitatibus et cogitationum atque affectionum suarum mollitie, quasi in lectulo miseræ mentis, spiritualiter mortuus jacet, pravis operibus quasi vestibis coopertus. Quemadmodum ergo Christus puellam defunctam accessit, et clamando locutus est, Puella, surge, deditque ei manum et eam erexit ; ita prælatus seu prædicator, aut quicumque spiritualis amator, peccatorem sic mortuum debet accedere, et cum clamore, id est mentis fervore, eum hortari, informare et increpare, manum quoque ei porrigere, id est bonis exemplis et orationum suffragio eum ad emendationem juvare.

III Reg. xvii, 17 et seq.

Legitur tertio Regum, quod quum sanctus Elias hospitaretur apud viduam pauperem unicum filium habentem, obiit filius ille ; Elias vero Deum rogando et super

A puerum mortuum incumbendo, tandem obtinuit quod rogavit, et puerum suscitavit. Similiter Eliseus filium susceptricis suæ suscitavit a mortuis, septies super puerum mortuum incumbendo, et ejus corpusculum calefaciendo. Christus vero solo imperio puellam hanc suscitavit. Multi quoque viri sanctissimi in novo Testamento mortuos facillime suscitaverunt. Legitur enim in Vitaspatrum, quod dum quidam vir cum filio suo juvenculo iret ad visitandum abbatem Sisoim, puer ille in itinere obiit. Pater vero ipsius timens quod abbas Sisois ex humilitate abnueret puerum suscitare, apprehendit puerum defunctum in ulnis suis, ingrediensque cellam senis, posuit puerum ante pedes illius, quasi veniam postulantem. Tandem abbas Sisois putans puerum ex humilitate in prostratione tam diu jacere, dixit : Surge. Statimque puer surrexit a mortuis. Quo viso, pater pueri obstupuit vehementer. Fuit quoque alius magnus eremita, cujus discipulus in re quadam excessit. Et commotus eremita, dixit discipulo : Vade et morere. Moxque discipulus ruit et exspiravit. Quo viso, dolens de hoc eremita dixit : Domine Jesu Christe, precor, suscita illum, et amplius ita non loquar. Protinus ergo discipulus ille surrexit. Ecce quanta facit Altissimus pro suis amicis viris sanctissimis.

IV Reg. iv, 33-35.

AD RELIGIOSOS

SERMO QUARTUS

PRÆLATI QUOMODO PRO SIBI SUBJECTIS ORARE CURAMQUE GERERE DEBEANT.

IMPLEAMINI agnitione voluntatis Dei, in omni sapientia et intellectu spirituali. Coloss. i, 9.

Matth. xii, 34.

Sicut ait Salvator, Ex abundantia cordis os loquitur. Idcirco ex mente sapientia et

D caritate repleta ac redundante, profluunt verba vere sententiosa atque ignita : quod in præsentī epistola facile est pensare. Si quidem in ejus exordio, Vas electionis, divinissimus Paulus, ad tertium cælum ra-

II Cor. xii, 2.

Coloss. 1, 9. ptus, indeque rediens, compendiosissime docuit quid ad praelatos, quid item spectet ad subditos: Non cessamus (inquiens) orantes et postulantes ut impleamini agnitione voluntatis Dei. Quibus verbis docemur, quod ad praelatos pertineat pro sibi commissis incessabiliter deprecari. Ad quod primo tenentur ex debito sui officii, deinde ex paterna et præcipua caritate qua illos tenentur diligere, tertio ex consideratione insufficientiæ propriæ. Quum enim ex propriis viribus nequaquam sufficiant gubernare se ipsos, nec quidpiam merito cogitare, loqui aut operari, multo minus ex se ipsis sufficiunt alios regere et salvare. Nec praelatorum instructio valet audientes convertere, nisi intus operetur unctio Spiritus Sancti, qui audientium mentes dignetur illuminare atque afficere. Ideo dicit Gregorius: Incassum foris laborat vox prædicantis, nisi intus adsit unctio Spiritus Sancti docentis. Indigent ergo praelati instantissime ac affectuosissime pro sibi creditis exorare, quatenus misericordissimus Spiritus Sanctus eos dignetur intus gratiose prævenire, purgare, et ad intelligendum salubriter quæ eis dicuntur, movere ac illustrare. Orent ergo praelati pro lapsis ut resurgant, pro stantibus ut proficiant, pro omnibus ut salventur; et quos viderint magis pusillos, magis defectuosos ac gravius periclitantes, pro illis instantius ac lacrimosius deprecantur; et ubi plus deficit humanum auxilium, ferventius requiratur divinum.

Deinceps ex præactis verbis docetur quid præsidentes pro subditis debeant exorare, hoc scilicet ut subditi impleantur agnitione voluntatis Dei, hoc est divinorum præceptorum et evangelicorum consiliorum, et eorum quæ amplius placent Deo: ut divina præcepta non informi et nuda notitia, sed formata ac practica noscant scientia, eadem fortiter exsequendo. In multis autem agnoscimus, saltem nuda cogitatione, quid velit Dominus Deus noster, quid consuluit, quid præcepit, quid requirat a nobis: et in talibus scimus

A quid orandum sit nobis, videlicet ut Deus præstet nobis caritatem, humilitatem, patientiam, ceterasque virtutes, ac divina implere præcepta, et digne conversari vocatione qua sumus vocati. In aliis vero ignoramus quid magis nostræ saluti expediat, et quid amplius placeat Deo ac magis pro ejus consistat honore, ut sunt ea quæ in se indifferentia sunt, et in utramque partem vergere possunt: ut sunt corporis infirmitates, damna rerum, mutationes locorum, et alia exercitia quædam, in quibus homo frequenter decipitur, ea optando quæ suæ adversantur saluti, quum tamen potius opinetur ea sibi esse proficua. In talibus ergo maxime indigemus illustratione divina, ut impleamur agnitione voluntatis Dei in illis, nec decipiamur. Unde quamdiu in talibus sumus ambigui, non debemus determinate et absolute ea appetere, sed cum quadam conditione, utpote dummodo sint pro Dei honore et nostra salute. Hinc Sapiens ait: Quis hominum poterit scire consilium Dei, aut quis poterit cogitare quid velit Deus? Et sensum tuum, Domine, quis sciet, nisi tu dederis sapientiam, et miseris spiritum tuum de cœlis?

Insuper, ex eisdem verbis docemur quid ad subditos pertineat, scire videlicet ea quæ eorum vocationem et statum concernunt, qualiter debeant obsequi Deo, reluctari dæmonibus, vitia superare. Discamus ergo et nos, atque assidue advertamus, ad quæ ex nostra vocatione et professione adstringamur, nec in supervacuis et impertinentibus occupemur, sed juxta doctrinam Apostoli, in omni opere bono fructificemus, quemadmodum jubet Salvator: Thesaurizate vobis thesauros in cœlo.

Insuper Deo Patri totis regramur præcordiis, quia de potestate nos eripuit tenebrarum, hoc est, de tenebris sæculi et vitiis quibus ibi involuti eramus eduxit nos, ita ut dicere cum Psalmista valeat omnis religiosus vere devotus et Deo gratus: Protexisti me a conventu malignantium, a

Ephes. iv,

1.

Sap. ix, 13,

17.

Coloss. 1,

10.

Matth. vi,

20.

Coloss. 1,

12, 13.

Ps. lxxiii, 3.

multitudine operantium iniquitatem. Et transtulit nos in regnum Filii sui dilecti, id est, ad sacram religionem monasticam nos perduxit, in qua Christus per gratiam habitat specialem. In quo regno soli Christo militare debemus, et prorsus spiritualiter conversari; et carnem nostram non carnaliter, sed spiritualiter adamare, ea exhibendo eidem quæ ad æternam suam glorificationem proficiunt ei; nec quidquam admittere quo nostræ salutis adversarii delectantur. Consideremus acute quam infatigabiliter milites stipendiarii suo regi fideles, insidientur ac reluctantur hostibus regni regis ac domini sui: sic et nos, si Deo omnipotenti, regi sæculorum immortalis, invisibili, vere fideles existimus, si ipsum sincere diligimus, universis æmulis sui honoris ac nostræ salvationis, dæmonibus, concupiscentiis carnis, vanitatibus mundi et omni iniquitati, omni industria ac virtute cum incessabili Dei invocatione repugnemus et insidiamur. Et sicut pugnantissimi atque fortissimi principes adversarios suos terram suam ingredi non permittunt, sed extra fines suos eis occurrunt; ita et nos nequaquam demus locum diabolo, imo ejus suggestionibus statim in principio renitamur, negemus consensum, divini districtiōnem judicii, amarissimam mortem Christi, inferorum supplicia, cœlestis palatii gaudia, mortis appropinquationem, amaritudinem et discrimen assidue recordemur: imo, quod maxime spectat ad nos, ex sincerissimo Dei amore odiamus ac evitemus omne quod displicet ei, et diligamus ac prosequamur omne quod complacet ipsi.

Refert Climacus dicens: Fuit in monte hoc Sinai Stephanus quidam solitariam et tranquillam diligens vitam, ac multis tem-

poribus in conversatione monastica exercitatus, jejuniis maxime et lacrimis adornatus, ac aliis plurimis exuberantibus bonis repletus. Qui majoris perfectionis desiderio abiens, anachoreticam alibi duxit vitam, arduissimam et nimis angustam, quia et locus in quo degebat, omni humano carebat solatio, et quasi inaccesibilis fuit. Qui circa finem vitæ suæ ad propriam rediit cellam. In qua tandem ægrotans, ante unum sui obitus diem in ecstasi mentis factus, apertis oculis adspexit ad dexteram sui lectuli et sinistram, et quasi ad reddendam rationem a quibusdam exactus, cunctis qui aderant audientibus, dixit interdum sic: Utique verum est, sed confessus sum, et tanto tempore jejunavi pro isto; interdum sic, Nequaquam, sed mentimini. Quandoque sic dixit: Istud feci, sed deploravi, et Domino ministravi; quandoque sic, False me accusatis. Aliquando autem dixit: Ita est, nec valeo respondere, sed in Deo est misericordia. Et erat terribile et horrendum exactæ rationis exsecutorium. Ecce anachoreta qui circa quadraginta annos monachus fuit, et donum lacrimarum habebat, ad quasdam offensiones sibi objectas dixit, Ad hoc nihil dicere possum nec habeo: qui tamen in deserto adhuc habitans, leopardum ad se venientem pascebat. Et tamen hic talis et tantus sub hac exactiōne discedens a corpore, manifestum indicium non reliquit quæ fuerit finalis ejus sententia. Quid ergo fiet de nobis tam defectuosis atque fragilissimis, tam remisse viventibus, toties omni die peccantibus? Non aliud restat, nisi ut vehementer formidemus, nosque quotidie fortiter emendemus, in omni custodia, pœnitentia et profectu perseverantes.

1 Tim. i, 17.

Ephes. iv,
27.

SERMO QUINTUS

QUOMODO RELIGIOSI FIMBRIAM JESU TANGERE DEBEANT, SANCTISSIMÆ
VITÆ EJUS VIRTUTES ÆMULANDO.

DICEBAT intra se : Si tetigero tantum fimbriam vestimenti ejus, salva ero. Matth. ix, 21.

Per vestimentum, spiritualiter intelligitur virtus seu gratia Dei, qua anima decoratur, et contra tentationum ac vitiorum fervorem, contra pigritiæ frigus, contra intemperiem passionum munitur atque defenditur. Unde et legitur : Induit me Dominus vestimento salutis. Et caritas vestis nuptialis vocatur. Porro per fimbriam, quæ est quædam vestimenti extremitas, infimus gradus virtutis seu caritatis, seu minima ejus operatio, designatur.

Christo autem qui gratiam non ad mensuram accepit, nullus in caritate, virtute et gratia potest æquari. Nihilominus tene-mur ejus vestigia sequi, hoc est ejus virtutibus assimilari seu eas sectari, et conversationi ipsius nos saltem aliquantulum conformare, quemadmodum scriptum est : Qui se dicit in Christo manere, debet, sicut ille ambulavit, et ipse ambulare. Propter quod dixit : Exemplum dedi vobis, ut quemadmodum ego feci, ita et vos faciatis ; itemque : Ego sum (inquit) via, veritas et vita ; nemo venit ad Patrem, nisi per me. Dicat ergo et quilibet nostrum : Si tetigero tantum fimbriam vestimenti Christi, salvus ero, hoc est, si Salvatoris caritatem ceterasque virtutes et operationes sanctas saltem pro aliquantula ac modica fuero parte secutus, salvabor. Ipse equidem perfectam et summam habuit caritatem, secundum quod protestatur : Majorem hac caritatem nemo habet, ut animam suam ponat quis pro amicis suis. Et tamen ipse majorem habuisse videtur, quia pro inimicis suis, imo pro interfectori-

bus suis crudelissimis sustinuit mortem, quorum multi pretio sanguinis sui ac suæ merito passionis exstant salvati. De quibus et passione sua imminente disseruit : Quum exaltaveritis Filium hominis, tunc cognoscetis quia ego sum. Hinc ait Apostolus : Commendat caritatem suam in nobis Deus, quoniam quum adhuc peccatores essemus, Christus pro nobis mortuus est. Verum hi secundum prædestinationem æternam fuerunt amici. Nihilominus pro inimicis et reprobis passus est Filius Dei, qui universum salvavit genus humanum, et pro omnibus mori dignatus est et satisfecit quantum ad sufficientiam, quamvis in solis electis fructum sortiatur finale meritum suæ passionis, ceteris obicem fructificationis hujus ponentibus.

Deinceps hanc Christi perfectissimam caritatem, secundum aliquem gradum sequi tenemur (secundum quod protestatur : Hoc est præceptum meum, ut diligatis invicem sicut dilexi vos) : quia non solum amicos, sed inimicos quoque tenemur diligere, et unumquemque proximum seu viatorem magis quam proprium corpus seu corporalem vitam amare. Ideo casu se offerente, pro talium unoquoque animam seu vitam nostram corporalem ponere obligamur, prout in prima sua Canonica ait Joannes apostolus : In hoc cognovimus caritatem Dei, quoniam ille, videlicet Christus, qui est verus Deus et vita æterna, pro nobis animam suam posuit ; et nos debemus pro fratribus animas ponere. Attamen si quis pro proximo suo etiam inimico animam suam ponat, id est, mortem sponte sustineat, ut illum a peccato aut quovis periculo eruat, necdum

Joann. viii, 28.

Rom. v, 8, 9.

Joann. xv, 12.

Matth. v, 44.

1 Joann. iii, 16 ; v, 20.

Is. lxi, 10.

Matth. xxii, 11.

Joann. iii, 34.

1 Joann. ii, 6.

Joann. xiii, 15.

Ibid. xiv, 6.

Ibid. xv, 13.

adæquatus est Christo, nec caritas ejus caritati Christi par exstat, quia et propter proprium facit hoc præmium, nec in remissionem peccatorum alienorum sanguinem fundit suum. Talis tamen multum propinquaret perfectissimæ caritati Dei Domini Jesu Christi.

Præterea, quamvis non ad semper te neamur caritatem Christi tam perfecte sectari, nihilo minus necessarium nobis est ad salutem ut fimbriam ejus tangamus, eam saltem aliquammodo imitando, ita ut propter Deum æquanimiter patiamur adversa, et injuriantibus ignoscamus, pro persecutoribus nostris oremus, bona pro malis reddamus, sicque proximorum cooperemur saluti. Quæ cuncta quum ita se habeant, qualis illorum est caritas qui proximis et fratribus suis negant rem parvam, modicam opem, parvum obsequium, concessionem et usum rerum exteriorum? qui facile offenduntur, irascuntur, et magnam aversionem displicentiamque concipiunt, ita ut proximum suum vix queant tranquille adspicere, sinceriter cogitare, et cupiant malum pro malo rependere? Sed quoniam omnes blandimur persuademusque nobis quod utique fratres nostros spiritualiter diligamus, ut valeamus agnoscere an vere sit ita, attendamus quod Climacus ait: Si caritatem tuam circa fratrem vis experiri, vide an dum illum forte adspexeris contristatum, turbatum aut lapsum, toto condoleas corde, et quasi super te ipsum lacrimas fundas, et illum pro posse relevare coneris. Nunc ergo attendant qualiter suos diligant fratres, qui dum eos contra superiorem aut alium viderint conturbari, tristari, aut altercari, seu discordare, non dolent, non plorant, sed potius rident et complacentiam habent iniquam, aut unam adjuvant partem, et augenturbationem. Isti non cooperantur, sed adversantur proximorum saluti.

Si itaque volunt salvari, fimbriam caritatis Christi tangere studeant, discordantes pacificent, de adversariorum tristentur ruina, omnium deplorent peccata, orando,

A hortando, exemplariter conversando, bonum nomen habendo; et omni modo sibi possibili proximis cooperentur ad gratiam et salutem, juxta apostolicam illam doctrinam: Dum tempus habemus, operemur bonum ad omnes, maxime autem ad domesticos fidei; itemque, Quæ pacis sunt, sectemur, et quæ ædificationis sunt, in invicem custodiamus. Siquidem vae homini per quem scandalum venit. Et qui inter plurimos conversatur, aut cum ingenti fructu ac merito habet se exemplariter et devote, aut cum gravi periculo et peccato scandalose atque remisit. Vae illi qui sua dissolutione, loquacitate, levitate, carnalitate, ira, impatientia, inquietudine alios trahit ad culpam, ad inquietationem, ad devotionis ac profectus obstacula, qui sua perversitate alterius alacritatem, tranquillitatem, puritatem conturbat, et Spiritum Sanctum habitantem in eis quasi contristat. Nempe si unum scandalizare pusillum tam impium est, ut dicat infallibilis Judex, Qui scandalizaverit unum de pusillis istis, expedit ei ut suspendatur mola asinaria in collo ejus, et demergatur in profundum maris: quam enorme et damnable est plurimos scandalizare, et totum inquietare conventum, aut etiam præsidem offendere et gravare? Vae eis qui sua animositate et cervicosa responsione, aut certe acedia, aut alia qualibet passione irrefrenata, ad consimilia mala quempiam trahunt, qui ad remissius vivendum alliciunt, quorum exemplo alii fiunt audaces, sibi placentes, inobedientes, carnales et dissoluti, non timorati, sobrii, humiles et subjecti. Hinc seniores in religione maxime obligantur juniores ædificare, atque totius obedientiæ, humilitatis, maturitatis et dilectionis eis præbere exempla: quod si contrarium egerint, vae eis in æternum.

Insuper nobis religiosis præcipue est necesse ut fimbriam humilitatis Christi tangamus. Nam suæ humilitatis verticem seu perfectionem nullus tangere potest mortalium, nec pura aliqua creatura. Ipse

Galat. vi,
10.

Rom. xiv,
19.

Matth.
xviii, 7.

Ibid. 6.

Philipp. II., etenim quum in forma Dei esset, ex-
 6, 7. inanivit se ipsum usque ad servilis for-
Apoc. XIX., mæ susceptionem. Quumque Rex regum
 16. et Dominus esset universorum, in tam
 profundissima humilitate conversari ele-
 git in sæculo isto, quod rudes, pauperes
 atque ignobiles congregans sibi discipu-
Luc. XXII., los, in medio eorum fuit tanquam mini-
 27. strans, et frequenter servivit eisdem, tan-
Joann. XIII., dem curvatis genibus lavans ac tergens
 4 et seq. pedes eorum. Quum igitur non sit servus
Ibid. 16. major domino suo, imo quum Domino isto
 sit omnis servus omnisque homo, omnis
 demum creatura, quamvis angelica, in in-
 finitum inferior : quæ est ista excæcatio,
 perversitas, obduratio nostra, quod per ca-
 ritatem servire invicem renuimus, quod
Rom. XII., mutuo quasi superiores venerari negligi-
 10. mus, quod honore invicem non præveni-
 mus, quod unus contra alium inflatur,
 quod unus alterum aspernatur, quod homo
 homini dominari appetit et præesse, quod
 in hoc sæculo volumus reputari aut ali-
 quid apparere ? Abjiciamus insanias istas,
 et unusquisque ceteris cunctis se ipsum

A ex corde humiliet, subdat et multo reputet
 viliolem.

Postremo, fimbriam obedientiæ Christi
 tangere valde necessarium nobis est re-
 ligiosis, voto obedientiæ circumseptis. In-
 tueamur igitur incessanter Sanctum San-
 ctorum, unigenitum Dei Filium, cui a
 Patre data est omnis potestas in cœlo et
 in terra, factum obedientem Patri æterno
 usque ad crucis ignominiosissimam ac
 acerbissimam mortem, atque in termino
 vitæ, in mortis articulo prolocutum : Pa-
 ter, in manus tuas commendo spiritum
 meum. Quid ergo nos servulos, nos viles
 vermiculos, nos defectuositate et omni fra-
 gilitate repletos, operari oportet, nisi Deo
 et ejus vicariis, sicut promisimus, in om-
 nibus caritative atque humiliter obedire,
 in eorum manus nostras animas commen-
 dare, in observantiis Ordinis esse ferventes,
 in omni Dei obsequio diligentes, aliarum
 quoque virtutum Christi fimbrias tangere,
 opera imitari ? Simus in omnibus patien-
 tes, sobrii, mansueti, constantes, timorati,
 devoti et custoditi.

Matth.
 XXVIII, 18.
Philipp. II.
 8.

Luc. XXIII.
 46; *Ps. XXX.*
 6.

SERMO SEXTUS

DE INSTABILITATE MENTIS HUMANÆ, ET CONTRA FLUXIBILITATEM COGITATIONUM.

SALVA facta est mulier ex illa hora.
Matth. IX, 22.

Per eandem rem, secundum diversas
 proprietates in ipsa exsistentes, diversa si-
 gnificantur. Itaque per mulierem evange-
 licam istam, in quantum fidei magnitudine
 vigit, humilitate, caritate, devotione, con-
 stantia, gratitudine, patientia, ceterisque
 virtutibus gratiose resplenduit, potest in-
 telligi omnis religiosa persona vere devota
 et virtuosa, quæ nihilo minus fluxum san-
 guinis patitur, id est cogitationum proflu-
 via, affectionum instabilimenta, motus et
 alternationes varias passionum, aut etiam

stimulos concupiscentiarum. Et istud est
 omni homini vere devoto, vere spirituali
 atque proficere cupienti, assidua quædam
 afflictio, mœror ac tædium, quod tanta est
 instabilitas suæ mentis, tam frequens et
 diuturna a Deo distractio etiam in divinis,
 ubi cum præcipua puritate, reverentia ac
 stabilitate vacare oportet Deo. Hic quoque
 est ei labor jugis ac singularis, ut quotidie
 ab hac calamitate et evagatione mentis
 magis ac magis eruatur ac præservetur,
 atque in Deo plus stabiliatur, præsertim
 tempore orationis, meditationis, psalmodiæ
 et celebrationis. Propter quod ait Aposto-

Hebr. xiii, 9.
1 Cor. xv, 58.
 lus : Optimum est gratia stabiliri cor; et

rursus, Stabiles (inquit) et immobiles es-
 tote, abundantes in opere Domini semper.

Porro, ut gratiam hanc stabilitionis in Deo obtineamus, oportet nos ire post Christum et ejus vestigia sequi, ac fimbriam vestimenti sui contingere, ut scilicet ejus documenta et opera, virtutes et dona consideremus et nostris imprimamus memoriis, ac jugiter exerceamur et occupemur in illis, speculando quæ, quanta et qualia pro nostra fecit ac toleravit salute, quæ documenta, quæ consilia, quæ præcepta contulit nobis, qualiter in omni nos virtute præcessit, et nos ipsum imitari præcepit. Si ista solerter et assidue intueamur et reminiscamur, excluduntur de cordibus nostris stultæ et frivolæ cogitationes, phantasticæ imaginationes, inordinatæ affectiones, otiositates et dissolutiones, nec delectat cum hominibus fabulari, et tempus infructuose expendere, iræ et contentionibus deservire.

Denique Christus secundum naturam assumptam, quantum ad supremas animæ suæ vires, fuit incessabiliter Divinitati per actualem contemplationem et ardentissimam dilectionem intentus; nec unquam ad momentum ex quacumque occupatione exteriori aut somno impediabatur mens ejus ab actuali Divinitatis intuitu ac amore. Et quamvis ad hanc Christi perfectionem nemo in vita hac queat pertingere,

Sap. ix, 15.
 quoniam deprimit terrena inhabitatio mentem; nihilo minus fimbriam vestimenti ejus oportet nos tangere, hoc est ad mentis in Deo stabilitionem conari, ad actualem Dei intuitum adspirare, ad contemplationem quotidie magis sinceram, amorosam ac stabilem intendere. Et hic jugiter esse debet noster affectus, noster labor, nostra intentio, ut quantum in vita hac fieri potest, simus semper actualiter Deo intenti, sine evagatione et labe ac inquietudine animi, quatenus quum a Deo aversos et evagantes nos ipsos senserimus, doleamus, atque ad ipsum reducere mentis nostræ oculum non tardemus. De hoc abbas Moy-

ses dixit : Deo et contemplationi ejus jugiter et sine interruptione inhærere, et ei inseparabiliter copulari impossibile est homini ista carnis fragilitate circumdato; sed oportet nos scire ubi mentis nostræ intentionem debeamus habere defixam, atque ad quam destinationem sive ad quod propositum semper animæ nostræ revocemus intuitum. Quam quum obtinuerit mens, gaudeat, et a qua distractam se doleat ac suspiret; totiesque a summo bono se sentiat recedisce, quoties se ab ejus intuitu deprehenderit separatam, fornicationem judicans vel momentaneum a Christi speculatione discessum, a quo dum deviaverit paululum noster intuitus, rursus ad eum cordis oculos retorquentes velut rectissima linea ad ipsum mentis aciem revocemus.

Porro, sicut mentem cogitationibus non interpolari impossibile est, ita quod cogitationum ortus non est omnimode in nostra potestate; ita in nostra potestate est cogitationes recipere, approbare, reprobare, abjicere : quemadmodum molendinum incidentibus aquis non potest a suo motu quiescere, sed in molendinarii est potestate quid molat, videlicet triticum aut hordeum, sive zizania. Quum itaque totus noster profectus quotidianus sit, a cogitationum inutilium et evagationum atque illicitorum desideriorum profluvio omni die magis ac magis purgari, in sapientia et caritate constabiliri, in actuali Dei contemplatione ac fervida dilectione firmari, conemur indesinenter ad ista; atque ad ea adipiscenda a Domino referamus cetera exercitia nostra, utpote vigilias, abstinentias, disciplinas, labores, studium Scripturarum. Et quia nequaquam viribus nostris ad ea obtinenda sufficimus, Deum instanter et affectuose rogemus, ut nostram in hac parte juvet infirmitatem, et corda nostra in se confirmare dignetur, augendo semper in nobis gratiam, sapientiam et virtutes. Id quoque quod in nobis est, faciamus fideliter, custodiendo ac refrenando sensus nostros exteriores et interiores,

loquacitates, levitates et ceteras peccandi A occasiones, immoderantiam cibi et potus ac somni, et omnem cordis torporem ac otiositatem; nec longe a spiritualibus studiis recedamus. In ipsis demum exterioribus occupationibus assuescamus mentem sæpe ad Deum erigere per meditationes et orationes ferventes, saltem breves, ac plurimas. Ex multis etenim actibus consuetudo generatur seu habitus, qui est tanquam altera natura, facitque hominem prompte ac delectabiliter operantem.

Amplius, sicut homines prorsus munda- B ni, diversarum rerum quas vitiose amant, speciebus, phantasiis, memoriis ita repleti et occupati sunt, ut rarissime cogitent quæ sunt Dei, sed de una cogitatione et affectione immunda ac prava labuntur ad aliam; ita vere religiosus implere non cesset cor suum cognitionibus divinorum, memoriis rerum salubrium, intelligentia Scripturarum, sollicitudine spirituali, affectione cœlesti, occupationibus exercitiorum sanctorum, præsertim dominicæ passionis memoria, ut nunc meditetur de morte, C

nunc de pœnis inferni, nunc de districti- one divini judicii, jam de beneficiis Dei, modo de beatitudine regni, de vita quoque Sanctorum, de passionibus martyrum, modo de his quæ Deus ab ipso requirit, et ad quæ tenetur, et qualiter coram Deo se habeat, quantum proficiat sive deficiat: quatenus si semper Deo directe intenti esse non possumus, saltem illicitas cogitationes quantum fieri valet vitemus, atque de una bona cogitatione et salubri occupatione ad aliam bonam et salubrem cadamus, sicque in cordis latitudine coram Altissimo ambulemus. Istud sit indesinenter exercitium nostrum, labor et studium, quamdiu in vita ista subsistimus. Et certe si ad modicum tempus ita egerimus, magnum plane sentiemus profectum, atque quotidie ampliorem mentis alacritatem, dulcedinem, firmitatem, et experiemur verum esse quod ait Scriptura: Justus quasi fundamentum æternum; *Prov. x, 25.* itemque, Homo sanctus in sapientia manet ut sol. Ad laudem et gloriam Omni- *Eccli. xxvii, 12.* potentis.

DOMINICA XXV POST TRINITATEM

ENARRATIO IN LECTIONEM LOCO EPISTOLÆ

ECCE DIES VENIUNT. Jer. XXIII, 5-8.

QUONIAM dominica ista proxima est A dominicæ Adventus Christi, idcirco nunc legitur loco epistolæ, lectio ista prophetica apud Jeremiam scripta, quia in verbis lectionis istius, Christi adventus prophetatus legitur, divinitusque promissus est. Ait itaque sanctificatus in utero Jeremias propheta : *Ecce dies veniunt, dicit Dominus, et suscitabo, id est, in terra concipi generarique faciam, David germen justum, id est Christum, qui secundum naturam humanam, de semine David regis natus est ex Virgine gloriosa, secundum illud ad Romanos : Factus est ex semine David secundum carnem. Idcirco vocatur justum germen, id est sanctus filius, regis David. Unde ad Virginem sanctam angelus dixit : Dabit illi Dominus Deus sedem David patris ejus. Et recte Christus vocatus est justum germen, de quo Gabriel dixit Mariæ : Quod ex te nascetur sanctum, vocabitur Filius Dei. De quo etiam apud Isaiam legitur : Iniquitatem non fecit, nec inventus est dolus in ore ejus. Unde Stephanus primicerius martyrum ait obstinatis Judæis : Dura cervice, patres vestri occiderunt eos qui annuntiaverunt de adventu Justi, cujus vos proditores et homicidæ fuistis. De his diebus scribit ad Galatas Apostolus : Ubi venit plenitudo temporis, misit Deus Filium suum. Et de germine isto scriptum est in Isaia : In die illa, videlicet tempore evangelicæ legis, erit germen Domini in magnificentia et gloria, et fructus terræ sublimis.*

*Et regnabit Rex, hoc est, Christus per fidem, caritatem et gratiam spiritualiter regnabit in corde credentium qui ei deserviunt. Per prælatos quoque et vicarios suos præest fidelibus. Sicque ab exordio primitivæ Ecclesiæ, regnavit in Ecclesia militanti, et nunc regnat in Ecclesia triumphanti. Imo Christus secundum suam naturam assumptam, prælatus est omnibus creaturis, quemadmodum contestatur : Data est mihi omnis potestas in cœlo et in terra. Alibi quoque dicitur : Pater diligit Filium, et omnia dedit in manu ejus. Hinc Gabriel dixit Mariæ : Dabit illi Dominus Deus sedem David patris ejus, et regnabit in domo Jacob in æternum, et regni ejus non erit finis. Quod et ab Isaia apertissime est prædictum. De quo etiam apud eundem legitur prophetatum : Dominus judex noster, Dominus legifer noster, Dominus rex noster, ipse veniet et salvabit nos. Denique Christo secundum utramque suam naturam competit esse regem : quia ut Deus, est rex per increatam auctoritatem ; et ut homo, per concessam in tempore potestatem. *Et sapiens erit : quia in quantum Deus, sapiens est sapientia increata et infinita, imo essentialiter est ipsa Sapientia. Unde Apostolus Christum Dei virtutem et Dei sapientiam nominat. Sapientia namque appropriatur Filio, quemadmodum ars, veritas et exemplar, quia procedit a Patre per intellectum. Porro secundum naturam humanam, sapiens est sapientia creata infusa, quæ**

in Christo multiplex assignatur, sicut in A
Cf. t. XXIX, expositione evangelii in dominica secunda
p. 159 A et s. post Nativitatem ostensum est.

Et faciet judicium et justitiam in ter-

Joann. viii, 15.
Ibid. iii, 17. ra. In Evangelio asserit Christus, Ego non

judico quemquam; et iterum, Non misit
 Deus Filium suum ut judicet mundum,
 sed ut salvetur mundus per ipsum: quo-
 modo ergo Christus in primo suo adventu
 fecit judicium? Et respondendum, quod
 duplex est judicium, videlicet discretio-
 nis, quod ad prudentiam atque justitiam
 pertinet, quo inter bonum et malum, inter
 verum et falsum discernitur: et hoc Chri-
 stus in primo suo adventu perfectissime
 fecit, bonos laudando, impios increpando
 ac detestando, virtutes docendo, vitia pro-
 hibendo, sicut in Evangelio scribitur;
 quosdam etiam occulto judicio ad fidem
 et gratiam misericorditer deducendo, alios
 juste derelinquendo. Sicque inter præde-
 stinatos et præscitos discrevit: propterea

Ibid. xii, 31. ait, Nunc judicium est mundi. Aliud est
 judicium discussionis et remunerationis,
 quod particulariter fit in mortibus singu-
 lorum, et universaliter fiet in fine sæcu-
 lorum: cujus judicii executio spectat ad
 Christum secundum naturam assumptam.
 Judiciariam namque potestatem et ejus
 executionem seu sententiæ prolationem
 meruit Christus sua humiliatione ac pas-
 sione: quanquam et aliunde sibi compe-
 teret, utpote ratione hypostaticæ unionis
 suæ humanitatis cum Verbo æterno. Nam
 eo ipso quo Christi humanitas suppositali
 unionem Verbo unita est, prælata est omni
 enti creato, et habet super omnia aucto-
 ritatem, præidentiam atque judiciariam
 potestatem. Hinc ait ipse: Neque enim

Ibid. v, 22. Pater judicat quemquam, sed judicium

Ibid. 27. omne dedit Filio; et denuo, Dedit ei po-
 testatem, et judicium facere, quia Filius
 hominis est. Hinc de ipso in Isaia est præ-

Is. xi, 3, 4. dictum: Non secundum visionem oculo-
 rum judicabit, neque secundum auditum
 aurium arguet; sed judicabit in justitia
 pauperes, et arguet in æquitate pro man-
 suctis terræ. Præterea Christus in terra

A fecit justitiam, hoc est opera virtuosa, ju-
 sta et sancta, quemadmodum fatetur: Ego
 (inquiens) quæ placita sunt Patri, facio
 semper. *Joann. viii, 29.*

In diebus illis, puta in primo Christi
 adventu, *salvabitur Juda,* hoc est omnis
 populus Judæorum, imo totum genus hu-
 manum, quantum ad sufficientiam, non
 quantum ad efficientiam. Christus quippe,
 quantum in se est, pro totius humani ge-
 neris satisfecit peccatis, sanctissime con-
 versando, innocenterque moriendo. Verum

B non omnes passionis suæ fructum et effi-
 ciam sortiuntur: quod est ex defectu
 eorum, non Christi. In Christi quoque pas-
 sione omnes Judæorum Patriarchæ, Pro-
 phetæ, ac ceteri prædestinati olim defun-
 cti, ab originalis peccati reatu redempti
 sunt, sicut et ipse prædixit: Ego si exalta-

tus fuero a terra, omnia traham ad me
 ipsum. Præterea, in primo Christi adventu
 salvati sunt omnes veri Judæi, hoc est Deo
 fideliter confitentes (Juda namque confes-
 sio interpretatur), non autem carnales re-

C probique Judæi, qui synagoga sunt Sata-
 næ. Propter quod Simeon justus dixit de
 infantulo Jesu: Positus est hic in ruinam
 et resurrectionem multorum in Israel. Un-

de de electis Judæorum reliquiis apud Isa-

iam prædictum est: Sanctus vocabitur
 omnis qui scriptus est in vita in Jerusa-
 lem. Præterea, de salvatione non Judæorum
 tantum, sed et totius mundi per Christum,
 omnes pene Prophetæ locuti sunt. Ad Abra-
 ham etenim dictum est: In semine tuo
 benedicentur omnes gentes; et in Psalmo:

Is. iv, 3. Reminiscetur, et convertentur ad Domi-
 num universi fines terræ. Et in Isaia Deus
 Pater loquitur Christo: Dedi te in lucem
 gentium, ut sis salus mea usque ad extre-

mum terræ; itemque apud Danielelem: Om-
 nes populi, tribus et linguæ servient ei;
 potestas ejus, potestas æterna, quæ non
 auferetur; et regnum ejus, quod non cor-
 rumpetur. At vero salvatio ista hominum
 facta per Christum, intelligenda est a reatu
 originalis peccati, a potestate diaboli, ab
 omni iniquitate, ab infernali punitione,

Gen. xxi, 18. *P's. xxi, 28.* *Is. xlix, 6.* *Dan. vii, 14.*

atque de veræ et æternæ felicitatis adeptione, non de liberatione corporali ac temporali a captivitate humana ad regnandum in sæculo isto, sicut excæcati putant Judæi. Unde hanc spiritualem salvationem optavit beatissimus patriarcha Jacob, dicens : Salutare tuum exspectabo, Domine.

Gen. XLIX, 18.

Et Israel habitabit confidenter. Hoc uno modo intelligi potest de habitatione illa pacifica quam in primo Christi adventu habebant Judæi sub Romano imperio, quia tunc multis annis inaudita pax fuit in sæculo, ita quod ad unius Octaviani imperatoris præceptum totus orbis conscribatur. Unde ab Isaia et Michæa prædictum fuit, Erit in novissimis diebus præparatus mons domus Domini in vertice montium (quod omnes de primo Christi exponunt adventu); et subditur ibi, Conflabunt gladios suos in vomeres, et lanceas suas in falces. Secundo potest istud exponi de habitatione illa confidentiali et segura quam veri Israelitæ in Christum credentes, habuerunt post ejus resurrectionem suscepto Spiritu Sancto, quando etiam pro fide Christi non metuebant, sed cupiebant occidi, utpote pleni fiducia Dei. De quibus in Actibus habetur : Omnes qui credebant, erant pariter, et sumebant cibum cum exultatione et simplicitate cordis; et collaudabant Deum, habentes gratiam ad omnem plebem. Et rursum : Quum orassent, motus est locus in quo erant; et repleti sunt omnes Spiritu Sancto, et loquebantur verbum Dei cum fiducia. Hinc per Isaiam Deus prædixit : Sedebit populus meus in pulchritudine pacis, et in tabernaculis fiduciæ, et in requie opulenta. Tertio potest istud intelligi de electis Israelitis pro statu eorum in Ecclesia triumphanti.

Luc. II, 4.

Is. II, 2;
Mich. IV, 1.

Is. II, 4;
Mich. IV, 3.

Act. II, 44,
46, 47.

Ibid. IV, 31.

Is. XXXII, 18.

Et hoc est nomen quod vocabunt eum, Dominus justus noster. Ex hoc vaticinio probatur divinitas Christi. Nempe pro eo quod dicitur hic, Dominus justus, in Hebræo ponitur nomen Domini tetragrammaton, quod secundum Rabbi Moysen et ceteros Hebræorum doctores, incommuni-

cabile est creaturis, quia impositum est Deo altissimo ad designandum nudam ejus essentiam absque omni ad creaturas respectu. Divinitas autem Christi etiam aliis locis quamplurimis veteris Testamenti ostenditur, quemadmodum in illo Isaia : Parvulus natus est nobis, et vocabitur nomen ejus, Admirabilis, Consiliarius, Deus, Fortis, Pater futuri sæculi, Princeps pacis; item in Michæa, Egressio ejus a principio, a diebus æternitatis; atque in Psalmo, Sit nomen ejus benedictum in sæcula, ante solem permanet nomen ejus. Quod aliis pene innumerabilibus probari testimoniis potest. Itaque credentes in Christum « vocabunt eum, Dominus justus noster ». Etenim in se ipso essentialiter justus est secundum quod Deus, et omni justitia quantum creatura capax est, plenus ut homo. Ipse quoque justificat eos qui credunt in ipsum, juxta illud : In hoc omnis qui credit, justificatur.

Is. IX, 6.

Mich. V, 2.

Ps. LXXI, 17.

Act. XIII, 39.

Propter hoc, ecce dies veniunt, dicit Dominus; et non dicent ultra, Vivit Dominus qui eduxit filios Israel de terra Ægypti; sed, Vivit Dominus qui eduxit et adduxit semen domus Israel de terra aquilonis, et de cunctis terris ad quas ejeceram eos illuc, et habitabunt in terra sua. Totum hunc textum passum pariter posui, eo quod expositio id requirat, ut veritas plenius innotescat. Itaque doctores catholici, sequentes Hieronymum, ista exponunt de Judæorum conversione ad fidem, per quam spiritualiter adunati sunt in Christo, atque ad Deum reducti; habitaveruntque in terra sua, videlicet in Ecclesia militanti, deinde in Ecclesia triumphanti et regno cælorum, quod est terra viventium, regioque vivorum, quam Deus patribus antiquis sub nomine terræ promissionis principaliter promisit in præmium. Sed huic expositioni obviare videtur, quod alio quodam loco Jeremiæ, hæc eadem verba, quasi sub eadem habentur forma, et tamen ibidem de reditu a captivitate Babylonica exponuntur. Et respondendum, quod Jeremias ibi præmisit de

Jer. XVI, 14,
15.

Babylonica captivitate, quod scilicet Judæi A habitantes ibidem in terra patrum suorum. ob sua facinora in Babylonem ducerentur captivi, et statim adjecit verba nunc introducta : ideo ibi sic exponuntur. Hic vero prophetavit Jeremias de Christi adventu, incarnatione, regno, et mundi salvatione per ipsum, protinusque adjecit verba nunc introducta : ideo hic exponuntur de spiritali educatione Judæorum a locis terrarum in quibus dispersi fuerunt. Nam quidam eorum in omnibus locis illis conversi sunt. In Actibus quoque habetur, quemadmodum in Jerusalem fuerunt habi- B tantes Judæi viri religiosi, ex omni natione quæ sub cælo est, quorum plurimi per Apostolos crediderunt : erantque præordinatione divina ex diversis regnis ac sedibus ad Judæam reducti, et in Jerusalem adunati, Itaque verbis iis declaratur magnitudo et grata cognitio beneficiorum Christi, ita quod Judæi in Jesum credentes, beneficia suæ incarnationis, instructionis, passionis, missionisque Spiritus Sancti, et donorum gratiæ ac salutis, in tantum magni penderent, quod beneficium educationis de Ægypto traderent quodammodo oblivioni, eo quod beneficia per Christum collata, incomparabiliter sint majora. Liberatio demum Judæorum de Ægypto et Babylone, fuit figura liberationis spiritalis et perfectæ factæ per Christum. Figura autem et umbra, veritate patefacta et figurato jam apparente, cessant. Sed et motus majores expellunt minores, et majus lumen offuscat minus.

SERMO PRIMUS

DE IMMENSA LIBERALITATE CARITATIS DEI AD HOMINES, ET DE SANCTITATE CHRISTI.

OMNES Prophetæ a Samuel et deinceps, annuntiaverunt dies istos. Act. iii, 24. Hæc sunt verba principis Apostolorum.

Quoniam in fide unigeniti Filii salus totius consistit mundi (quemadmodum beatissimus Petrus docet : Non est, inquit, aliud nomen sub cælo datum hominibus, in quo oporteat nos salvos fieri), hinc de Christo et ejus mysteriis Deus per universos Prophetas locutus est et prædixit. Et quamvis in themate præassumpto Petrus affirmet, quod omnes Prophetæ a tempore D Samuelis et deinceps, annuntiaverunt dies adventus Christi, et tempus gratiæ ac evangelicæ legis, per hoc tamen nequaquam excludit tempora quæ Samuelem præcesserunt prophetam. Imo a principio mundi, Deus per verba et facta, per mysteria et figuras, de Christo prænuntiavit per sanctos Patriarchas ac vates, per Adam,

C Seth, Enoch, Abraham, Melchisedech, Job, multosque alios, quamvis non omnia sint descripta. Propter quod evangelicus Zacharias effatur : Erexit cornu salutis nobis, in domo David pueri sui, sicut locutus ^{Luc. i, 69, 70.} est per os sanctorum, qui a sæculo sunt, Prophetarum ejus. Et in isto relucet certitudo ac firmitas fidei christianæ. Istud quoque tangitur in exordio hodiernæ lectionis propheticæ, Deo per Jeremiam loquente : Ecce dies veniunt, et suscitabo ^{Jer. xxiii, 5.} David germen justum.

Secundo in verbis his tangitur immensa liberalitas beneficiorum Domini Dei, atque inæstimabilis caritas ac pietas ejus ad homines. Hoc quippe inter omnia beneficia omnipotentis Creatoris est maximum, quod Deus Pater unigenitum Filium suum misit ^{Joann. iv, 9.} in mundum per incarnationis mysterium, deditque eum hominibus salvatorem et advocatum, imo et fratrem : atque Filium

suum sic dando, etiam minora dedit nobis A per eum, vel in re, aut certe in spe. Propter quod ad Romanos ait Apostolus : Proprio Filio suo non pepercit, sed pro omnibus nobis tradidit illum : quomodo etiam non omnia nobis cum illo donavit? De hoc incomparabili beneficio Dei gratulabunda mente cecinit Isaias : Puer, in-quiens, natus est nobis, filius datus est nobis; et vocabitur, Admirabilis, Consiliarius, Deus, Fortis, etc. Hinc in sermone de sacramento Eucharistiæ dicitur : Immensitas liberalitatis beneficiorum Dei exhibita populo christiano, inæstimabilem ei tribuit dignitatem. Neque enim est aut fuit aliquando natio tam grandis, quæ habeat deos appropinquantes sibi, sicut Deus noster adest nobis : nam et in Sacramento altaris tam veraciter quam incomprehensibiliter adest nobis.

Denique in isto relucet caritas Dei ac totius supergloriosissimæ Trinitatis ad homines, quod scilicet Deus Pater tantum bonum hominibus voluit ac donavit, et quod Unigenitum suum hominibus sic conjunxit; item, quod Unigenitus Patris nostram naturam sibi tam immediate et hypostatice copulavit, atque se ipsum nobis ita impendit; itemque, quod Spiritus Sanctus huic unioni cooperari dignatus est, et eam per Prophetas prædixit. Hinc ait Apostolus : Propter nimiam caritatem qua dilexit nos Deus, Filium suum misit in similitudinem carnis peccati. Insuper in eodem ostenditur infinita pietas Dei ad homines, quod scilicet genus humanum ita liberare dignatus est. Simus ergo pro posse grati divinæ liberalitati et beneficiis ejus, imo totius supersanctissimæ Trinitatis caritati qua prævenit nos et prior dilexit nos, atque universæ pietati et misericordiæ ejus in nobis. His, inquam, grati jugiter simus, hæc omnia memoriter retinendo, sæpissime attendendo, Deum ferventer amando, ei quoque obediendo in omnibus reverenter, et laudando eum devote ac semper. Nonne perversus et excæcatus est nimis, qui ex horum conside-

ratione non accenditur ad amandum, nec incitatur ad honorandum, nec movetur ad regratiandum, nec emollitur ad pœnitentiam ac devotionem?

Præterea in verbis his insinuatur virtus ac sanctitas Christi, quum dicitur, Germen justum. Ipse etenim justus fuit et vere justissimus, non solum injustitia omni carente, sed etiam omnem virtutem et perfectionem atque justitiam exsequendo. Unde quum ipse Dominus universitatis, inter peccatores ad Joannem venisset Baptistam ut baptizaretur ab eo, et Baptista ex tam incomparabili Christi humilitate esset attonitus, atque ex consideratione suæ majestatis ac sanctitatis reverberatus, admirandoque diceret, Ego a te debeo baptizari, et tu venis ad me? ipse respondit : Sine modo : sic enim decet nos implere omnem justitiam. Denique teste Apostolo, Christus humiliavit se, factus obediens usque ad mortem; nec metu mortis omisit veritatis prædicationem, impiorum reprehensionem, omniumque executionem virtutum, sed coram Pilato, Ego, inquit, in hoc natus sum, et ad hoc veni in mundum, ut testimonium perhibeam veritati. In hac ergo veritate Christum Dominum incessabiliter imitemur, ipsamque justitiam cordialiter diligamus, zelemus et pro viribus defendamus, in ea jugiter crescere cupiamus ac enitamur, quia ut ait Salvator, Beati qui esuriunt et sitiunt justitiam. Justitiam sitit et esurit, qui tam indesinenter ac fervide de ea cogitat, eamque amplectitur, et in ea proficere nititur, quam incessanter atque ferventer esuriens ac sitiens cogitat et affectat cibum et potum. Injustitiam odiamus, et de operibus impietatis cordialiter doleamus; totisque viribus impediamus ne quæ injusta sunt fiant, aut quod justum est omittatur, secundum quod caritas Dei ac proximorum requirit.

Porro, ut sanctus ait Bernardus, justitia est reddere unicuique quod suum est. Tribue ergo tribus quod eorum est : redde superiori reverentiam et obedientiam,

Rom. viii, 32.

Is. ix, 6.

S. Thomas.

Deut. iv, 7.

Ephes. ii, 4; Rom. viii, 3.

1 Joann. iv, 10, 19.

Matth. iii, 14.
Ibid. 15.

Philipp. ii, 8.

Joann. xviii, 37.

Matth. v, 6.

æquali consilium et auxilium, inferiori disciplinam atque custodiam. Sanctus quoque Ambrosius loquitur : Justitia est quæ alienum nil vindicat, quæ cuilibet præstat quod suum est, quæ negligit propriam utilitatem ut servet communem æquitatem. Justitia, secundum Anselmum, est animæ rectitudo. Unde quemadmodum corpus est rectum dum ad superiora erigitur, et curvum dum inferius inclinatur : sic anima hominis justa et recta est, dum per cogitationes ac desideria, erecta est ad divina ; injusta vero et curva, quando immoderate cogitat et affectat carnalia ac terrena.

Præterea, sicut de Domino Jesu Christo prædictum est, Regnabit Rex, et sapiens erit ; ita et quilibet nostrum sit rex et sapiens, bene regendo se ipsum, carnem domando, concupiscentias ejus frangendo, in cibo, potu, somno, verbis ac vestibus moderamen servando, passionibus, animositati ac vitiis dominando, rationem quoque et voluntatem subjiciendo legi divinæ, et juxta documenta sacræ Scripturæ conversando ubique. Hæc est vera sapientia, intuitu et amore summi et incommutabilis boni beatitudinisque æternæ, præsentia ac terrena despiciere, coram Altissimo semper sollicite ambulare, Deo jugiter obedire, omneque tempus ordinate ac fructuose expendere. Qui autem aliis appetunt dominari atque in mundo hoc exaltari, vani sunt, ambitiosi et fatui, non attendentes divini judicii rigorem.

Postremo, sicut de Christo legitur prophetatum, quod faciet judicium justitiæque in terra ; sic quilibet nostrum exerceat in se ipso judicium, quia ut ait Apostolus, Si nos ipsos dijudicaremus, non utique judicaremur. Judicet ergo unusquisque se ipsum, proprios defectus et vitia considerando, reprehendendo et castigando ; discutiat propriam vitam, examinet et expurget conscientiam suam ; proximis quoque impendat caritatis effectum, eos pro posse pie instruendo, caritative corripiendo, ad salutem juvando. Hinc

etenim ait Michæas propheta : Indicabo tibi, o homo, quid sit bonum, aut quid Dominus requirat a te : utique facere judicium et justitiam. Verumtamen judicia aliorum temeraria sunt prorsus vitanda, quum dicat Salvator : Nolite judicare, ut non judicemini. Et rursus : Nolite (inquit) secundum faciem judicare, sed justum judicium judicate.

Itaque usque ad mortem inhæreamus justitiæ, nec unquam a Dei avertamur amore, neque ab ejus filiali timore. Unde in Vitaspatrum conscribitur, quod fuit quidam eremita famosus et sanctus, de cujus virtutibus populus undique loquebatur. Dixitque mulier quædam impudica et meretrix ad juvenes quosdam : Quid vultis mihi dare ? et ego deponam et vincam solitarium istum. Illi vero promiserunt ei pecuniam : quod tamen fecerunt, non tam ut eremita ille peccaret, quam ut probaretur. Itaque mulier illa, ad vesperascente die quodam, cœpit coram cella eremitæ illius deambulare et fingere se errare ; cœpitque flere et eremitæ auxilium invocare. Rogavit itaque eum ut se intrare cellam permetteret, ne devoraretur a bestiis. Tandem eremita ex caritate et compassione intromisit eam. Intromissa vero, cœpit paulatim solitarium illum tentare et attrectare, et ad peccandum allicere ; diabolus quoque virum illum sanctum cœpit impugnare ac inflammare fortissime. Quod sentiens ipse, dixit : Deus lux est, opera autem inimici sunt tenebræ. Quo dicto, accendit candelam, et posuit digitos suos in flamma candelæ et eos combussit, ut sic exstingueret ignem concupiscentiæ quo tentabatur. Mulier autem hæc videns, expavit atque obduruit quasi lapis. Facto mane, juvenes venerunt ad eremitam, dicentes : Venit hic vespere mulier aliqua ? Qui respondit : Etiam. Et illi : Ubi est ? inquirunt. Ait : Ite, videte maledictam et miseram illam, ecce destruxit omnes digitos meos. At illi circumspicientes, viderunt eam jam mortuam. Dixeruntque seni : Abba, ecce mortua est. Qui

ait : Diabolus accepit potestatem in eam, A facta oratione, suscitavit eam a mortuis.
 Rom. xii, 17, et ipsam occidit. Deinde subjunxit : Scri- Illa vero pœnitens et veniam poscens,
 21. ptum est ut reddamus bona pro malis. Et emendavit vitam suam veraciter.

NOTA. — Evangelium dominicæ hujus est, quod in quarta dominica Quadragesimæ legitur : quod ibidem expositum est. Suntque ibidem tres sermones annexi eidem : idcirco nunc brevitati studens, illud prætermitto.

AD RELIGIOSOS

SERMO SECUNDUS

DE DULCEDINE ET FRUCTU INCARNATIONIS FILII DEI.

ECCE dies veniunt, dicit Dominus, et suscitabo David germen justum, et regnabit Rex, etc. Jer. xxiii, 5.

Inter omnia opera omnipotentis et supergloriosissimi Dei præclarissimum, mirabilissimum et incomprehensibilissimum, est incarnatio Verbi æterni, Unigeniti Patris altissimi. Ideo Deus, cujus sapientiæ non est finis, opus hoc incomparabile a mundi prædixit exordio, et per Prophetarum oracula, per Patriarcharum mysteria, per ænigmata et figuras id futurum præ-nuntiavit. Quod etiam ideo tam diu, tam multipliciter ac frequenter prædixit, quia in ipso consistit omnium salus. Per Filii enim sui incarnationem et passionem Deus Pater genus humanum decrevit sibi reconciliare atque salvare : ideo semper necessarium fuit illud aliquo modo credi. Hinc princeps Apostolorum ait : Omnes Prophetæ a Samuel et deinceps annuntiaverunt dies istos. Et rursus testatur : Deus qui prædixit per os omnium Prophetarum pati Christum suum, implevit sic. Evangelicus quoque Zacharias apertius loquitur : Benedictus Dominus Deus Israel, quia visitavit et fecit redemptionem plebis suæ ; et erexit cornu salutis nobis, in do-

mo David pueri sui, sicut locutus est per os sanctorum, qui a sæculo sunt, Prophetarum ejus. Denique sacratissima Virgo Christifera idem fatetur : Suscepit (inquiens) Israel puerum suum, recordatus misericordiæ suæ, sicut locutus est ad patres nostros, Abraham et semini ejus in sæcula. Et in isto clarissime lucent robur ac veritas fidei christianæ, quoniam ea quæ in novo Testamento credimus adimpleta, probamus a mundi principio, præsertim in veteri Testamento, esse multipliciter divinitus revelata, præsignata ac prophetata. — Et insuper omnia divina prodigia ac summa miracula per quæ Deus excelsus et adorandus, olim in veteri Testamento probavit Prophetarum oracula esse vere divina, a tempore Christi et Apostolorum a Synagoga ablata sunt, et per Christi Apostolos aliosque ipsius discipulos ad Ecclesiam copiosissime sunt translata, etiam quasi incomparabiliter abundantius atque præclarius quam unquam fuerunt tempore veteris Testamenti. Propter quod Christus in sermone post Cœnam disseruit : Si opera non fecissem in eis quæ nemo alius fecit, peccatum non haberent. Sunt autem et alia mul-

Luc. i, 54, 55.

Ps. cxlvi, 5.

Act. iii, 24.

Ibid. 18.

Luc. i, 68-70.

Joann. xv, 24.

ta christianæ fidei certissima argumenta. A

Præterea, quoniam Unigenitus Dei, verus Deus, Patri consubstantialis, æqualis et coæternus, tot et tanta pro nostra assumpsit ac fecit pertulitque salute, consideremus frequenter et contemplemur subtiliter quam supernaturalis, altus et præclarissimus sit finis propter quem pius Creator condidit genus humanum, ita quod propter finem illum (per originale peccatum sublatum hominibus) recuperandum, necessarium et convenientissimum erat Dei Filium incarnari. Quis ergo est finis B iste? Utique salus æterna, beatitudo angelica ac cœlestis, beatifica et per essentiam clara visio Deitatis immediata, plena ac contentativa fruitio increatæ et incircumscripibilis bonitatis. Ecce quam magna felicitas, quam altissimus finis, quam plenissimum gaudium, illum in se ipso clare per speciem intueri, qui est essentialiter verus et veritas, cujus essentia est veritas prima, increata, idealis, supersplendidissima, superserenissima, superconvenientissima et superpulcherrima, imo quæ est ipsa C lux supermundissima et immensa, pulchritudo penitus infinita, serenitas illimitata.

Si naturaliter delectabile est videre quod pulchrum est, et tanto delectabilius quanto quid pulchrius (propter quod ait Scriptura : Dulce lumen, et delectabile oculis
Eccle. xi, 7. videre solem; unde et venerabilis ille Tobias : Quale, inquit, mihi gaudium esse
Tob. v, 12. potest, qui in tenebris sedeo, et lumen cœli non video?): quale et quam incomparabile gaudium est, divinam in se ipsa clare contemplari essentiam, quæ omnis pulchritudinis et decoris est fons, essentialiter pulchra, incircumscripibiliter splendida, infinite serena, conveniens, deliciosa, universis et singulis vere in infinitum splendidior, pulchrior, convenientior atque serenior? Si delectabile est videre non solum aliquem speciosum adolescentem, elegantemque virum, aut magnum prælatum, præpotentemve regem, sed etiam bestias quasdam raras, fortes, pulchras ac nobiles, puta leonem, elephantem, rhinocero-

tem : quam superjucundissimum est, clare conspicere summæ et interminabilis majestatis regem ac principem, universorum Deum deorum, in suo decore, supergloriosissimum, omnipotentem, supernobilissimum, incomprehensibiliter sapientem, pi-um, justum, perfectum, divitem et beatum, in sua illimitabili venustate, in omni sua opulentia, excellentia et splendore? Insuper, si tantum delectant exteriores sensus, corporalium ac vilium rerum odores, sapor- res, contactus, uniones, soni, harmoniæ ac melodiarum varii cantus : quam inæstimabili- ter delectat omnem spiritualem interio- remque sensum Creator omnipotens, omni- um odorum, suavitatum, convenientiarum, delectabilitatum, harmoniarum, sonorum, melodiarum et cantuum sapientissimus institutor, excellentissimus ordinator, supergloriosissimus dator, in quo omnia il- la superessentialiter, superexcellentissime et superplenissime continentur? Propter quod omnibus illis incomparabiliter plus delectat, et superdelectabilissimus, super- deliciosissimus superconvenientissimus- que consistit.

Præterea, quum naturaliter sit jucundum frui re dulci, convenienti et bona, sapere et gustare suavia, amplecti amata, possidere desiderata : nonne ineffabiliter incomparabiliterque jucundum est, et ve- re beatificum et beatum, frui ad libitum summo, incommutabili, increato infinito- que bono, cujus natura est bonitas pura, quomodolibet omniformiterque perfecta atque perfectionaliter infinita, cujus es- sentia est dulcedo immensa, a quo omnis bonitas, universa suavitas, cuncta amœni- tas emanavit, dependet, infiniteque defi- cit? O quam incomparabiliter dulce et ju- cundum est omni menti beatæ, in hoc bonum immensum, in hanc veritatem æter- nam, in hanc dulcedinem increatam ac infinitam, ore intellectus sui mordere, oculo interiori inspicere, palatum voluntatis immergere, gustu interno hunc supersub- stantialem ac supersuavissimum cibum gustare, eo refici, satiari et in perpetuum

æque delectabiliter frui ! Quam delectabilissimum est universis Beatis, hoc supercarissimum bonum, ardentissime prædictum, cum perpetua fruitione intra se amplexari ; hunc superditissimum Deum, omnium bonorum et pulchrorum ac desiderabilium opulentissimum fontem, cum æterna securitate feliciter possidere ! Ecce qualis et quanta est felicitas electorum, quam vera et rationabilis est doctrina ac fides Christianorum, asserentium nullam puram creaturam fuisse idoneam et condignam recuperare ac promereri humano generi beatitudinem istam, quæ est dignitatis quodammodo infinitæ, quum sit infiniti boni immediata atque beata fruitio. Propterea Unigenitus Dei humanam assumpsit naturam, et in ea ac per eam recuperavit ac meruit nobis felicitatem et gloriam istam immensam, perpetuam, consummatam.

Josue xviii, 3.

Et nunc, o fratres, quare negligimus, cur torpemus ? Usquequo marcemus ignavia, et non intramus ad possidendam terram viventium, regionem cœlestem, hereditatem nobis paratam ? Cur non cum omni diligentia ac sollicitudine continuavimus universa peccata quantumcumque minuta ? Cur non cum omni reverentia opus Dei peragimus ? Quare non inflammatur cor nostrum tam summi et incomparabilis boni amore, tantæ felicitatis affectione ? Cur non oculum mentis in eam modo pro posse defigimus, contemplando pro viribus bona gloriæ, quæ Do-

minus Deus noster omnipotens præparavit nobis in cœlis ? Nunc ergo corda nostra quotidie cum omni conatu purgemus, custodiamus ac decoremus, et accendamus in Domino. Sicut desiderat cervus ad fontes aquarum, ita desideret anima nostra ad Deum ; ad ejus beatificam visionem, superdulcissimam fruitionem, securissimam possessionem avidissime suspiremus ; quæ sursum sunt sapiamus ; terrena, carnalia et caduca despiciamus. Nullus labor appareat nobis gravis, nullum tempus longum, quo beatitudinem tantam promereri valemus, et quoniam omni momento eam et ejus augmentum possumus promereri. Omnis quippe caritativa ad Deum affectio, omnis quoque ex caritate profluens actio, æternæ felicitatis est meritoria. Propterea nullam temporis horulam infructuose pertranseamus, imo assidue ac ferventer elevemus cor nostrum ad Dominum Deum nostrum, ipsum contemplando, diligendo, desiderando, orando, laudando, atque in sanctitate et justitia ei infatigabiliter serviendo. Et quoniam lumen illud æternum essentialiter sanctum infiniteque purum, nequaquam beatifice inspicere potest nisi a mentibus omnifarie purificatis, vitemus cum summo conatu omne peccatum, et a quotidianis præteritisque peccatis omni modo nobis possibili nos ipsos quotidie expurgemus, atque in caritate et gratia Omnipotentis incessabiliter crescere enitamur, ad laudem et gloriam ejus.

Ps. xli, 2.

Coloss. iii, 2.

Luc. i, 74, 75.

SERMO TERTIUS

QUOMODO RELIGIOSI VENTURO JUDICI CHRISTO REGNUM IN SE PARARE DEBEANT.

HIC est vere *Propheta qui venturus est in mundum*. Joann. vi, 14.

Recte in ista dominica leguntur lectio ista prophetica atque evangelium hodiernum,

quoniam pulchre per omnia consonant sibi. Et quod in lectione ista Jeremias legitur prophetasse de Christo, in evangelio isto declaratur impletum in eo.

Joann. vi, 5-14. Ipse etenim tam præclarissimum faciendo A miraculum, utpote satiando tot millia hominum ex quinque panibus ac paucis pisciculis, comprobavit se esse regem Messiam in lege et Prophetis promissum. Unde *Ibid.* 14. et turba viso tanto prodigio, dixit : Quia «hic est vere Propheta qui venturus est in mundum ». Per quam circumlocutionem intellexerat Christum. Itaque, quum suscitatset Deus Pater David germen justum, id est Christum, regis David justissimum filium secundum humanitatem assumptam, ex tunc cœpit Christus rex regnare per gratiam in cordibus suorum fidelium, quos non corporaliter tantum, sed spiritualiter quoque refecit : quod exinde usque in præsens fecit in tota militanti Ecclesia in innumerabilibus millibus hominum.

Rogemus igitur Dominum Jesum Christum ut ipse solus indesinenter ac pure regnet in nobis, et mentes nostras spiritualibus panibus suis reficere semper dignetur. Nempe in quantum peccamus, in tantum non Christus, sed peccatum atque diabolus regnant in nobis, quum ratio nostra illis in tantum succumbat, consentiat ac ministret. Nam ut beatissimus ait princeps Apostolorum, A quo quis superatus est, hujus et servus est. Et quamvis absolute loquendo, non regnet diabolus in homine nisi per peccatum mortale, nihilo minus propter venialia aliquantulum in homine fertur regnare, quia et venialia ad mortale disponunt.

Hinc Cassianus ex ore abbatis Moysis loquitur : Expulso dæmone et vitiis in animabus nostris nequaquam regnantibus, D Evangelista : Regnum Dei intra vos est. Porro intra nos esse non potest nisi scientia aut ignorantia veritatis, et amicitia virtutum aut vitiorum : per quæ vel Christo vel diabolo regnum in nobis paramus. Cujus regni qualitatem describens Apostolus, ait : Non enim regnum Dei est esca aut potus, sed justitia, et pax, et gaudium in Spiritu Sancto. Qui ergo justus est, et pacem habet internam ac gaudium spiritua-

le, in eo regnat Dominus Deus. Et in quo sunt injustitia, discordia atque tristitia inordinata operans mortem, regnat diabolus.

Nunquam igitur regnet in nobis superbia, ne ejus servi efficiamur ac filii, qui est rex super universos filios superbiæ.

Non regnet in nobis impatientia quæ stultitiam operatur; non ira quæ in sinu stulti quiescit; non gula aut concupiscentia car-

nis, ne bestiis conformemur, et efficiamur ut equus et mulus quibus non est intellectus; non tepiditas aut pigritia, ne ex ore

B Domini evomamur. Sed rationi nostræ in omnibus imperet Deus, et ratio passionibus, quatenus anima nostra sit quasi cœlum in terris, et mens nostra sit thronus Dei : sicque in omni eventu, in omni adversitate et tribulatione perseveret mens nostra in luce sapientiæ constans, in discretionis judicio stabilis, in contemplatione jucundans, voluntas quoque in Deitatis amore flammigera, in zelo justitiæ libera, in totius boni affectu fidelis. Quo facto, venti passionum, tumultus tentationum C facile exsufflabuntur.

Denique de hoc cœlo terreno loquitur Climacus : Firmamentum pro pulchritudine habet stellas; anima vero impassibilis facta (id est passionibus dominans), pro ornatu habet virtutes. Anima talis dæmonum impugnationes atque astutias reputat ludos. Impassibilis autem (id est vir perfectus, heroicus et divinus) proprie dicitur, qui carnem suam fecit incorruptibilem, hoc est inviolabilem a peccatis, ita quod concupiscentiis non assentit, passionibus non succumbit, vitiorum non servit corruptioni, nec exhibet membra sua arma iniquitatis peccato, a vitiis gulæ et immunditiæ penitus abstinet, ab exteriorum interiorumque sensuum irrefrenatione et abusu se prorsus custodit, mentem quoque suam a rebus creatis abstraxit et exaltavit, omnes sensus ei subjiciens, Deique vultui eam jugiter repræsentans.

Denique talis coram Deo et hominibus irreprehensibilem exhibet semetipsum. Tribus etenim modis, vel magis in tribus de-

Tob. iv, 14.

Job xli, 25.

Prov. xiv, 17.

Eccle. vii, 10.

Ps. xxxi, 9.

Apoc. iii, 16.

Rom. vi, 13.

Luc. xvii, 21.

Rom. xiv, 17.

bemus nos coram Deo irreprehensibiles exhibere, videlicet in cogitatu, affectu et intentione, ut sit cogitatio sancta et utilis, affectio pura et spiritualis, intentio recta ac stabilis. Sic et coram hominibus in tribus bona provideamus, puta : in habitu seu vestibus, ne sint curiosæ; in operationibus, ne sint illicitæ; in locutionibus, ne sint infructuosæ. Quumque nihil sit cogitatu facilius, ac copiosissimam habeamus materiam cogitandi de pertinentibus ad salutem, utpote de Deo omnipotente et omni excellentia, perfectione ac beatitudine ejus, de universis beneficiis et promissis ipsius, de præceptis, consiliis et prohibitionibus ejus, de mysteriis Christi, et verbis, doctrinis, miraculis, sanctitate, gestis et passione ipsius, de propria vocatione et causa coram Altissimo, de his quæ Deus requirit a nobis, de examinatione conscientiae et discussione propriae vitæ, de omnibus quæ in Scripturis sanctis contenta sunt, et de virtutibus, operibus atque miraculis patrum nostrorum : quid est quod omnibus his relictis, vana et frivola, stulta et inutilia cogitamus, et ex cogitatione prava ad desideria labimur vitiosa? Ne ergo inutiliter occupemur, omnipotentis, sancti et supersapientissimi Dei præsentiam jugiter meditemur, ut sint oculi nostri semper ad Dominum, in cuius intuitu erubescamus committere quidquam illicitum sive omittere debitum. Quanto Creator cunctis hominibus major est in sapientia, sanctitate et dignitate, tanto plus verecundemur coram ipso habere nos viliter, acediose, turpiter, inordinate.

Ps. xxiv, 15.

Jer. xxiii, 5.

Postremo David germen justum, videlicet Christum prorsus justissimum, in vera sectemur justitia, omnem odientes impietatem et culpam ob propriam ejus enor-

mitatem, turpitudinem, inordinationem ac vilitatem, et maxime in quantum inhonorativa est majestatis divinæ, ac offensiva sanctitatis supremæ. Propria quoque peccata in nobis ipsis reprehendamus ac ulciscamur quotidie. Et ita agamus judicium justitiamque in terra, dijudicantes, corripiantes ac castigantes nos ipsos assidue in vera discretionem; sed et proximum suum corripit unusquisque caritative et ordinate. Et quoniam domini sapientes, servos sapientes libenter habent ac diligunt, exhibeamus nos servos sapientes sapientissimi Christi, ut in primis dono sapientiæ decoremur, atque per illud Deum et bona æterna cum mentis dulcedine amorose et uberrime contemplemur, deinde notitia sacræ Scripturæ, juxta cujus documenta, præcepta, consilia nos ipsos in omnibus dirigamus, ex qua etiam contemplandi materiam et diligendi formam accipiamus. Sicque juxta apostolica hortamenta, in sapientia ambulemus ad eos qui foris sunt, ut Deus per servos suos glorificetur et in eis laudetur, simusque bonus odor Christi in omni loco. Sed et sermo noster semper in gratia sale sapientiæ sit conditus, nec proferamus quod quempiam scandalizet, sed solum quod audientes ædificet. Rogemus quoque Dominum ut linguam nobis tribuat eruditam, scientiam salutarem, copiam exhortandi salubriter efficacem : quatenus quicumque quempiam nostrum accesserit, ædificatus discedat; qui venerit desolatus, abeat consolatus; qui mente vulneratus aggreditur, curatus regredietur. Et ita verbis et factis ac moribus simus proximis exemplares, atque nos ipsos coram Judice summo nobiliter, hoc est sapienter et virtuose, in cunctis habentes, et ipsum semper in omnibus totis præcordiis et totis viribus honorantes.

Jer. xxiii, 5.

Coloss. iv, 5.

II Cor. ii, 14, 15.
Coloss. iv, 6.

Is. l, 4.

SERMO QUARTUS

DE INSTITUTIONE VITÆ MONASTICÆ, ET ORIGINE RELIGIOSORUM AC MONACHORUM.

MULTITUDINIS credentium erat cor A
unum et anima una. Act. iv, 32.

Beatissimus monachorum pater, re et nomine Benedictus, in principio Regulæ suæ ponit quatuor genera monachorum. Primum vocavit monasteriale seu cœnobitale, videlicet congregationem religiosorum sub uno rectore ac regula servientium Deo. Secundum anachoretale vocavit, hoc est eremitarum, qui bene exercitati ac reformati in cœnobio, procedunt ad singulare certamen contra diabolum, congregationem Fratrum relinquendo ac solitariam B prorsus vitam ducendo, ut tanto quietius, perfectius, ardentius atque propinquius vacent ac placeant Deo, quanto ab omni societate, occupatione et inquietatione humana fuerint plus abstracti. Tertium vocavit genus Sarabaitarum, id est pigrorum atque carnalium monachorum, qui bini aut trini, aut certe seorsum singuli habitantes, absque spiritualis patris regimine et sine approbatæ regulæ observatione vivunt ad libitum : quibus pro lege est desideriorum voluptas ; et quidquid C rectum putaverint sive elegerint, sanctum affirmant ; quod autem noluerint, putant illicitum. Quartum genus vocavit gyrovagum, puta eorum qui per totum tempus suum per diversas provincias hinc inde discurrentes, ternis aut quaternis diebus in diversis Fratrum cellulis hospitantur, vagi, instabiles, suisque desideriis ac gulæ illecebris servientes, ac Sarabaitis deteriores.

Denique huic S. Benedicti recitationi magna ex parte concordat quod secundo D Collationum Patrum libro, præclarissimus pater et doctor noster Joannes Cassianus ex verbis sancti patris abbatis Piammonis

descripsit : Tria (inquiens) sunt genera monachorum, quorum duo sunt valde bona, tertium tepidum est et omnino vitandum. Primum est cœnobitarum, qui scilicet in congregatione pariter consistentes, unius superioris directione reguntur. Secundum est genus anachoretarum, qui primo in cœnobiis instituti, atque in actuali conversatione perfecti, secreta solitudinis elegerunt. Tertium est Sarabaitarum, qui cœnobiorum disciplinam et patrum gubernationem vitantes, proprias discunt facere voluntates, bini aut trini in cellulis comorantes. Est sane et aliud quartum genus eorum, qui anachoretarum speciem sibi assumunt. Quum enim in principio suæ conversionis ad modicum tempus in cœnobio cum fervore quodam fuerint conversati, statim tepescunt ; et passiones suas ac vitia moresque pristinos evellere negligentes, ac spiritualis patris subiacere judiciis dedignantes, separatas expetunt cellas et solitarie manent, quatenus a nemine molestati, videantur ac reputentur C patientes, mites ac humiles. Quæ institutio, imo tepiditas, eos quos semel infece- rit, nunquam ad perfectionem permittit accedere : quia per talem recessum, eorum passiones et vitia non solum non eradicantur, sed in deterius convalescunt, dum a nemine provocati, quoddam letale vulnus intra se portant absconditum.

Præterea de origine cœnobitarum, id est monachorum in congregatione sub rectore viventium, sic abbas Piammon dixit : Cœnobitarum conversatio a tempore prædicationis Apostolorum sumpsit exordium. Nam talis fuit vita primitivæ Ecclesiæ in Jerosolymis sub sanctis Apostolis, quia ut Lucas testatur, multitudinis credentium ^{Act. iv, 32,} 35.

erat cor unum, et omnia erant eis communia, dividebaturque singulis prout unicuique opus erat. Quumque tempore procedente, post Apostolorum discessum ac divisionem, multiplicatis credentibus, cœpisset fervor ille primitivus tepescere, non solum in subditis sed etiam in prælatis, quidam in quorum mentibus mansit apostolicus fervor, memores pristinae perfectionis, ab aliorum recesserunt consortio, atque in suburbanis et secretioribus locis morari cœperunt, talemque vitam ducere, qualem sub Apostolis omnes credentes habuerunt communiter. Qui eo quod a conjugiiis abstinerunt, et a parentum consortio aliorumque conversatione se abalienaverunt, inter se communem vitam ducentes, ex communione consortii cœnobia vocati sunt; eorumque habitacula cœnobia sunt vocata. Istud itaque est antiquissimum monachorum genus, quod per annos plurimos solum usque ad abbatis Pauli vel Antonii duravit ætatem.

Insuper his concordat quod S. Hieronymus libro de Illustribus viris ait : Philo Judæus, natione Alexandrinus, idcirco a nobis inter scriptores ecclesiasticos ponitur, quia in libro quem de prima Marci evangelistæ apud Alexandriam scripsit Ecclesia, in nostrorum laude versatus est, id est, Christianos laudavit, non solum eos ibi, sed in multis quoque provinciis esse commemorans, et habitacula eorum monasteria vocans. Ex quo apparet, talem vitam fuisse Ecclesiæ primo in Christum credentis, qualem nunc monachi imitantur, ut nihil cuiusquam sit proprium, nullus inter eos sit dives, nullus pauper, patrimonia egentibus dividantur, orationi vacent et psalmis, doctrinæ quoque et continentia, quales Lucas refert primum Jerosolymæ fuisse credentes.

Insuper, juxta abbatis Piammonis relationem, ex optimis cœnobitis prodiit genus anachoretarum, qui ex cœnobiis, non ex impatientia, tædio, pusillanimitate aut vanitate, sed majoris profectus altiorisque contemplationis desiderio recedentes, soli-

tudinis secreta ingressi sunt, solitariam omnino vitam agentes : non contenti victoria qua inter homines occultas diaboli calcaverunt insidias, sed manifesto cum dæmonibus conflictu congredi cupientes. Quorum principes Paulus Antoniusque fuerunt. Sarabaitæ autem per Ananiam et Saphiram de quibus in Actibus habetur, sunt figurati, quoniam instar illorum evangelicam perfectionem non in veritate et sinceritate, sed simulatorie arripuerunt, ut carnalia commoda et laudes assequerentur humanas. — Ex his innotescit institutio vitæ monasticæ, et monachorum origo atque distinctio.

Sed advertendum, quod omnis religiosa ac monachalis vita ac Ordo in evangelicis Christi fundatur consiliis, præsertim in tribus : in quorum uno consulit paupertatem, in alio castitatem, in tertio plenam obedientiam. Practica vero et executio consiliorum illorum, exordium habuit tempore, loco ac modo præfatis. Nunc ergo, o religiosi, o solitarii, o monachi universi, admirabilem vestræ vocationis dignitatem pensate, quæ in evangelicis æternæ et increatæ sapientiæ unigeniti Filii Dei fundatur consiliis, quæ a sanctis Apostolis ac beatissima illa primitiva Ecclesia sumpsit exordium, quæ a tot præelectis, gloriosis ac sanctis patribus est servata, quæ angelicam puritatem sectatur, atque in terris vitam orditur cœlestem. Idcirco satagite digne ambulare vocatione qua vocati estis a Spiritu Sancto. Non fatigemini animis vestris, nec ex diuturnitate et frequentia exercitiorum actuumque bonorum quæ quotidie agitis, tepescat, lassescat aut præsumat cor vestrum : imo quo diutius, eo ferventius magisque timorate Deo servite in omni mentis custodia. Non cesset manus vestra, sed quidquid potest, instanter efficiat : erit enim merces, et utique merces æterna ac infinita, operi vestro. Non sunt condignæ passionibus vitæ præsentis ad gloriam vobis paratam : ideo patrum vestrorum vestigia incessanter sequamini, et eorum statum cum omni diligentia observate.

Act. v, 1 et seq.

Ephes. iv,
1.
Hebr. xii, 3.

Ps. ii, 11;
Deut. iv, 9.

Eccle. ix,
10.
II Par. xv,
7.
Rom. viii,
18.

Act. iv, 32,
35.

SERMO QUINTUS

DE VITA ET PERFECTIONE AD MONACHOS PERTINENTE, SECUNDUM DOCTRINAM
DIVINI DIONYSII.

ACCEDAMUS cum corde vero in plenitudine fidei, adpersi corda a conscientia mala, tenentes spei nostræ confessionem indeclinabilem. Hebr. x, 22, 23.

cap. vi. Ferventissimus ac illuminatissimus ille Areopagita Dionysius, ritum institutionis ac benedictionis seu consecrationis monachorum, prout in primitiva fiebat Ecclesia, in libro de Ecclesiastica hierarchia describens, inter cetera ait, quod inter eos qui perficiuntur, summus est ordo monachorum, qui ideirco speciali nomine designantur. Nam quidam Apostolorum nuncupaverunt eos Dei famulos seu placatores, propter assiduum quem Deo exhibent famulatum. Alii nominaverunt eos monachos, a monade seu unitate, propter ipsorum singularem vitam qua adunantur ac simplicificantur in Deo per abstractionem a materialibus ac sensibilibus rebus, et per divinorum contemplationem ac puram affectionem. Unde dicuntur et monachi, quasi singulares ac solitarii et uniti, quia eorum vita non debet in temporalibus esse divisa, sed in Deum reducta, ne cogitationibus et affectionibus aut sollicitudinibus per temporalia distrahantur aut evagentur, sed in uno summo quod solum necessarium est, stabiliantur.

Luc. x, 42.

Deinde, in primitiva Ecclesia, sacerdos monachum benedicens ac consecrans stetit ante altare, cum cantu Deum pro monacho invocans, id est, aliquos psalmos illi ministerio convenientes decantans; et consecrandus in monachum, stetit retro sacerdotem. Qui monachum interrogavit an vellet renuntiare omnibus sæcularibus conversationibus ac phantasiis, sæcularibus quoque rebus seu opibus, non solum

T. 39.

A quoad consecutionem earum, sed etiam cogitationibus affectionibusque illarum; et exposuit monacho perfectionem vitæ monasticæ. Monacho autem confitente quod omnia vellet servare, signavit eum sacerdos crucis signaculo, atque tondebat; et pristinis vestimentis extractis, induit eum alias vestes, osculabaturque eum cum ceteris qui adstabant, et dedit ei Eucharistiæ sacramentum. Monachus vero nullum genu flectebat, nec super caput ejus evangelium ponebatur, ad designandum quod non est sui officii aliorum gerere curam seu prælationem, et animarum gubernationem habere, sed sui ipsius esse sollicitum et custodire unum, scilicet Deum, ipsum sincere colendo, vel se ipsum, corpus purum ubique servando. Unde dicitur monachus, quasi custos unius.

Præterea, crucis signatio innuit monachum a carnalibus desideriis oportere penitus abstinere, ut cum Christo crucem suam portet quotidie, corpus proprium castigando ac proprias voluntates mortificando. Capillorum vero detonsio signat mundam, nudam et non fictam monachi conversationem, ne simplicitas mentis, eorum exteriori compositione fiete ornetur, sed pure erigatur ad Deum : quoniam sicut in libro Job scriptum est, Congregatio hypocritarum est sterilis, hoc est coram Deo infructuosa, Christo in Evangelio de talibus contestante, quia receperunt mercedem suam. Et iterum ait Scriptura : Simulatores et callidi provocant iram Dei. Rursus, quia capilli superfluum corpori, per eorum abrasionem intelligitur resectio superfluum, ut monachi simplici ac tenui victu atque vestitu sint contenti, pro-

Luc. ix, 23.

Job xv, 34.

Matth. vi,
2, 5, 16.
Job xxxvi,
13.

42

ut votum paupertatis eorum requirit. Propter quod dominus Guillelmus Antisiodorensis fatetur in Summa sua, quod tenuitas victus et vestitus adeo sunt de religionis essentia, quod non cadit dispensatio super ea. Insuper, per mutationem vestitus, innuitur quod monachus de gradu communis plebis ad altiorem assumitur gradum ac ordinem : propter quod ad novam melioremque vitam tenetur.

De his in libro præfato multa Dionysius sacer conscribit, ex quibus fundamentaliter innotescit quam interna, spiritualis, pura ac fructuosa religiosorum conversatio debeat esse, quia divino obsequio totaliter mancipati consistunt. Idcirco per sacrificium illud legale quod holocaustum vocatum est, sunt expressi. Holocaustum namque seu incensum ad divinæ majestatis honorem totaliter comburebatur, ad figurandum quod religiosi debent se totos Deo offerre mundoque mortuos exhibere.

Rom. XII, 2.

Coloss. III, 1-3.

Quibus specialissime ait Apostolus : Nolite conformari huic sæculo ; et rursus : Quæ sursum sunt quærite ; quæ sursum sunt sapite, non quæ super terram : mortui enim estis, et vita vestra abscondita est cum Christo in Deo. Hinc cœnobium sepulcro assimilatur, quia in cœnobio debet religiosus huic mundo abscondi ac mori. Unde et claustrum a clausura nomen accepit, quia claustrales ab universis sæculi hujus inquietudinibus, curis, tu-

A multis debent esse reclusi, tanquam in omnipotentis Dei præsentia constituti, et vultui gloriæ ejus intenti (quorum est dicere cum Elia, Vivit Dominus, in cujus conspectu sto hodie), ut omne opus Domini efficiant diligenter, et juxta regulæ suæ tenorem ambulent timorate indescenderent, nec intente Altissimo audeant cogitare et affectare quod coram hominibus erubescerent dicere.

Væ igitur religiosis pigris, carnalibus, intempestis ac dissolutis, qui cum ingratis illis Judæis redeunt corde in Ægyptum sæculi hujus nequam, hoc est ad levitates pueriles, ad vanitates et affectiones carnales, ad loquacitates et lautitiam gustus oblectamentaue corporis : sicque ad transgressionem et negligentiam detestabiles efficiuntur quotidie proniores, et tandem sic indurantur ut propriam non advertant ruinam, nec sua pensent pericula, imo nec informationem, nec correptionem, multoque minus correctionem suscipiant ; sed fit eis frons mulieris meretricis, quia de suis vitiis erubescere renuunt. Quibus, ut beatissimus princeps Apostolorum locutus est, contigit illud veri proverbii : Canis reversus ad vomitum suum ; et, Sus lota in volutabro luti. Attendamus ergo, o fratres, vocationem professionemque nostram ; et cuncta carnalia ac terrena pronihilo adspicientes, Domino majestatis cum omni spirituali profectu jugiter serviamus.

Num. XIV, 3, 4.

Jer. III, 3.

II Petr. II, 22.

I Cor. I, 26.

SERMO SEXTUS

DE FORMA ET SIGNIFICATIONE HABITUS MONACHORUM.

INDUIT me Dominus vestimento salutis, et indumento justitiæ circumdedit me. Is. LXI, 10.

Ut religiosus advertat quam abominabilis et injustus, quamque deridendus et stultus sit coram inspectore cordium Deo,

nisi veræ devotioni, contemptui mundi virtutibusque insistat, nunc aliquid de ipso monastico habitu est tangendum. Monachorum etenim habitus, non solum literalis, sed et mysticus perhibetur, quia non solum certus habitus eis præfigitur

ut contegat nuditatem, pudorique consu-
lat, et frigoris aut caloris immoderantiam
pellat, sed etiam ut ex qualitate habitus
sui admoneantur qualiter vivere obligen-
tur. Quum enim habitus professioni, quem-
admodum medium fini, debeat correspon-
dere, sancti Patres tam specialem habitum
religiosis præstiterunt, ad insinuandum
quantum a mundanis hominibus tenean-
tur distare, quibusque virtutibus et acti-
bus oporteat eos pollere, et quam mor-
tificati esse debeant omnibus quæ sunt
mundi.

Denique de hoc gloriosus pater et do-
ctor Joannes Cassianus, primo libro Insti-
tutionum Patrum sanctorum, sapienter dis-
seruit. Et primo, cur cingulo utantur
monachi exprimens : Monachum, inquit,
ut militem Christi in procinctu belli ju-
giter positum, oportet accinctis lumbis
semper incedere. Sic namque in veteri
Testamento Sancti aliqui incesserunt, qui
hujus monasticæ vitæ fundaverunt pri-
mordia, puta Elias ac Eliseus. Unde de
Elia servi regis Israel regi suo dixerunt :

IV Reg. 1, Vir pilosus et zona pellicea renes accin-
ctus occurrit nobis. De Joanne quoque Ba-

Matth. III, ptista refert Evangelista : Ipse Joannes
habebat vestimentum de pilis camelorum,
et zonam pelliceam circa lumbos suos. Sed
et principi Apostolorum Petro angelus jus-
sit : Præcingere, et calcea te caligas tuas.

Act. XII, 8. De Paulo item apostolo Agabus dixit pro-
pheta : Virum cujus hæc zona est, sic al-
ligabunt in Jerusalem Judæi. Ex quibus
omnibus constat hos utriusque principes
Testamenti cingulo esse usos. Itaque mo-
nachus, tanquam veraciter Christi miles,
idcirco se noverit esse debere cinctum, ut
ad cunctos usus ac opera cœnobii sit non
solum mente paratus, sed etiam ipso ha-
bitu expeditus : nam quanto ad obedien-
tiam fuerit promptior, tanto circa spiritua-
lem profectum ac divinorum cognitionem
ferventior comprobatur. Insuper lumbo-
rum accinctio, et ambitus mortuæ pel-
lis, significat monachum mortificationem
membrorum in quibus libidinis seminaria

A continentur, jugiter circumferre, ut im-
pleat evangelicum illud, Sint lumbi vestri
præcincti ; et quod hortatur Apostolus,
Mortificate membra vestra quæ sunt super
terram. Luc. XII, 35.
Coloss. III, 5.

Præterea, Cassiano narrante, in Ægypti-
orum monachorum habitu quædam erant
non tantum ad corporis curam quantum
ad morum formulam congruentia. Nam
parvulis utebantur cucullis diebus ac no-
ctibus, ad innuendum ex habitu ipso, quod
simplicitatem et innocentiam custodire es-
sent solliciti. Sic et colobiis lineis vix ad
cubitus pertinentibus utebantur, ad de-
signandum quod opera mundi essent am-
putata ab eis, atque ab omni conversatione
terrena eos esse mortificatos. Alia quoque
nonnulla ad habitum suum spectantia de-
ferebant, ad demonstrandum quibus pec-
catis carere, et quibus virtutibus teneren-
tur pollere. Et sic in diversis Ordinibus,
diversi instituti sunt habitus ob mysticas
causas, ut religiosi intelligant se omnia
vana atque mundana debere despiciere, et
solis cœlestibus inhiare.

Nunc ergo perpendant religiosi et mo-
nachi qui sub veste religiosa monastica
cor gerunt carnale, mundanum, inane,
quam viles ac miseri, quam iniqui ac ir-
ridendi, quamque damnabiles sint coram
Judice summo, infallibili ac supersapien-
tissimo Deo. Nonne omnino monstruosi
atque mendaces, et velut vacua vasa sunt
coram eo ? Quum enim monstrum dicatur
effectus suæ speciei inconueniens, isti qui
a veris religiosis tam damnabiliter distant
ac differunt, imo intus omnino eis con-
trarii dissimillimique consistunt, rite in or-
dine monachali monstra censentur. Quum-
que rem per eorum habitum forinsecus
designatam intus non habeant, vacua vasa
sunt. Imo quum vitiis intus sordeant, quæ
virtutibus ad quas obligantur directe con-
trariantur, recte dicuntur mendaces, non
habendo quod se habere ostendunt, sicque
hypocritis conformantur. Denique similes
sunt asino coronato, et simiæ religioso
vestimento opertæ, ac fatuis veste sa-

piensium indutis. Sunt igitur deridendi. A Quis enim hominem armatum suis armis non utentem, sed omni hostium ictui se præbentem non irrideret? Cur equidem se armavit, si hostibus reluctari aut se tueri non voluit? Sic irridendus est religiosus monasticis utens vestibus, nec tamen virtutibus studens, ad quas designandas suus institutus ac formatus est habitus; imo potius omni dæmonum impugnationi, omni passionum vitiorumque motui infeliciter cedens, seque undique vulnerabilem præbens, nec suæ salutis B adversariis digne resistens.

Postremo, circa habitum religiosorum, multæ, proh dolor! inordinationes, abusiones et enormitates jam emergerunt, tam in pretiositate et colore quam in curiositate et forma ac superfluitate diversa: quæ omnia prorsus sunt evitanda, ut nil curiositatis aut pompæ, nil superfluitatis aut indecentiæ in eorum appareat habitu, sed omnis simplicitas, omnis humilitas, aspernatio mundi, mortificatio sui, et interna religiositas mentis, hoc est interior cultus Dei, et diligentia animi soli Deo intenti, et ei jugiter complacere optantis.

SERMO SEPTIMUS

DE MONACHORUM ET RELIGIOSORUM DEFINITIONIBUS VERIS.

STABILES estote, et immobiles, abundantes in opere Domini semper, scientes quod labor vester non est inanis in Domino. I Cor. xv, 58.

Ad hoc finaliter ordinatur ac tendit omnis illa religiosorum abstractio, qua a curis et actibus sæculi, a propinquis et sæcularibus hominibus se elongant, quatenus Deo altissimo stabilius sint intenti, et spiritualibus actibus frequentius occupati, puriores ferventioresque corde in omnibus. Hinc Climacus monachum multipliciter definiens seu describens, inter cetera ait: Monachus est, qui solum ea quæ Dei sunt D agit, cogitat, loquitur, Christo unitus omni tempore, loco atque negotio. Et datur descriptio ista de monacho secundum statum monachalem perfectum, hoc est secundum completam monasticæ vitæ perfectionem. Ad hoc equidem tendit institutio regularis atque professio monachalis, ut monachus quantum in vita præsentis sit possibile, indesinenter Deo intendat, orando, psallendo, meditando, legendo, contemplando, diligendo, ceterisque virtutum

exercitiis insistendo. Corporalia quoque C opera ordinate ac discrete secundum divinæ legis tenorem et suæ regulæ institutionem, ad Dei honorem efficiat, otia semper negligentiasque vitando, et in continua cordis stando custodia, cum Propheta veraciter dicens: Providebam Dominum Ps. xv, 8. in conspectu meo semper; et item, Oculi Ps. xxiv, 15. mei semper ad Dominum. Ad hoc itaque conemur indesinenter, ut in divinis simus quotidie stabiliores, et orationibus, psalmodiis, meditationibus sacris absque distractionibus vanis ac miseris vacemus perfectius. Consuescamus mentem nostram in omni loco et actu frequenter ad Deum levare per internas ac breves orationes, laudes et meditationes, etiam in mensa, in via, in lecto, et in omni labore atque colloquio; nec sic recreationibus quibuscumque utamur, ut cordis læsionem dissolutionemque incurramus. Imo scribendo, studendo, aut alia quævis agendo, a Dei memoria non cessemus.

Deinceps istud faciliter adimplebit, qui Deum fervide diligit. Quod namque arden-

ter diligitur, ante oculos cordis quasi incessanter habetur, juxta illud, Ubi amor, ibi oculus : sicut videmus quosdam mierrimos carnali amore ita succensos, ut quidquid faciant, rei dilectæ oblivisci non queant. Qui autem in Dei amore nondum est perfectus, ad ista agenda consuetudinem sibi optimam facere moliatur, et Deum piissimum pro auxilio gratiæ id agendi fiducialiter ac instanter precetur. Consuetudine vero adepta, erit sibi istud perfacile et jucundum, imo dulcissimum. Hæc namque agendo, experietur sæpissime consolationes divinas, compunctiones internas, inflammationes supernas : sicque cum Enoch ambulabit cum Deo, et cum David ambulabit coram Domino. Præterea, constat ex his quam longe sint a vera monachi ratione, a monastica perfectione, a spirituali profectu, qui dissoluti sunt moribus incustoditique oculis, qui tam facili occasione ad loquacitates, ad consolatiunculas pueriles et fatuas se effundunt, atque in risus et cachinnos ac dissolutiones vertuntur. Videant tales qualiter suæ satisfaciant professioni, qua ad perfectionem quotidie tendere tenentur, ne tanquam rei et transgressores voti desuper judicentur, reprobentur ac pereant.

Iterum Climacus monachum describens, ait : Monachus est violentia naturæ indesinens, et custodia sensuum indeficiens. In qua descriptione abstractum pro concreto est positum, ut sit sensus : Monachus est indesinens violentator sui ipsius, et indeficiens propriorum sensuum custos. Quum namque Christo testante, regnum cœlorum vim patiatur, et violenti rapiant illud, et arcta sit via salutis (in quibus verbis cœlestibus violenti vocantur qui salubriter vincunt se ipsos, et salutarem violentiam inferunt sibimetipsis, prava desideria superando, et Deo propriam voluntatem subdendo), patescit quod quanto religiosi præ ceteris magis abnegaverunt se ipsos et propriis voluntatibus renuntiaverunt, tanto amplius obligantur propriam superare naturam, proprias libertates concupiscen-

tiasque abjicere, et proprios refrenare affectus ac motus. Quod in principio satis est difficile, in tantum ut Salomone testante, qui dominatur animo suo, melior ac fortior sit urbium expugnatore. Dicitur demum monachus custos indeficiens sensuum suorum interiorum et exteriorum, inordinatum illorum usum vitando, ne per exteriorum sensuum portas mors ingrediatur, ne oculi videant vanitatem, ne figantur in feminas, ne aures illicitorum verborum auditui præbeantur, sed juxta Scripturam, sepiantur spinis, ne audiant linguam nequam, ne audientiam tribuant detractori, neque discordiam seminanti. Tactus etiam præcipue refrenetur ab omni contactu inordinatum motum ac stimulum concitante, nec in cibo et potu quærat delectatio gustus, sed naturæ necessitas. Conformiter custodiendi sunt religioso sensus interiores ab apprehensionibus phantasticis, ab imaginationibus fœdis, a phantasiis protervis, a cogitationibus vanis. Hic ergo considera te ipsum, O religiose, an vere sis monachus, an modo præfato frangas atque custodias temetipsum : alioqui dole, ingemisce, et juxta prædicta te dirige.

Tertia descriptio monachi est : Monachus est sanctificatum corpus, expurgatum os, et illuminata mens. Quæ descriptio datur quasi per partes integrales, et in ea ponitur pars pro toto, ut sit sensus : Monachus est homo habens corpus divino cultui consecratum, a carnalibus inquinamenti mundatum, in sanctis operibus animæ subditum, habens quoque os a verbis illicitis purum ac sancto silentio perornatum, et mentem desuper illustratam, ad divinorum contemplationem limpide elevatam. Cur autem per tria hæc specialiter describitur monachus, nisi quoniam specialiter spectant ad eum, et in his alia ad ipsum spectantia includuntur? Itaque constat quam longe distent a monacho gulosi, garruli, pertinaces ac duri.

Quarta descriptio est : Monachus est inœrens et dolens anima indesinenti mor-

Gen. v, 24.
III Reg. iii,
6; ix, 4.

Matth. xi,
12.

Ibid. vii, 14.

Prov. xvi,
32.

Jer. ix, 21.
Ps. cxviii,
37.

Eccli.
xxviii, 28.

tis memoria. Ubi rursus principalis pars hominis pro homine ponitur. Pertinet quippe ad monachum, ex consideratione mortis quotidie flere, propria pensando ac deplangendo peccata, ac metuendissimum Dei ponderando iudicium atque supplicia peccatoribus post vitam præsentem parata. Debet etiam flere præ desiderio regni

Rom. vii, 24.

Ps. cxix, 5.

Ps. xli, 3.

Jer. xi, 19.

Galat. ii, 19.

Rom. viii, 17; II Tim. ii, 12.

cœlestis, cum Apostolo exclamando : Infelix ego homo ! quis me liberabit de corpore mortis hujus ? et cum Propheta : Heu mihi ! quia incolatus meus prolongatus est ; et rursus : Sitivit anima mea ad Deum fortem, vivum ; quando veniam et apparebo ante faciem Dei mei ? Sed ex compassione passionis Christi flendum est monacho, non in quantum passio Christi fuit redemptio mundi, sed quia mitissimus Agnus tam crudelissimam mortem innocentissime pertulit. Ideo dixit Apostolus : Christo confixus sum cruci ; et iterum, Si compatimur, et conregnabimus. Spectat quoque ad monachum, aliorum peccata deplangere et pro omnibus orare, præsertim pro benefactoribus et propinquis ac sibi commissis. Postremo, qui verissime monachus est, lacrimatur frequenter ex abundantia gaudii spiritualis, et ex suavissima complacentia proprii Creatoris, qua supererens ac supergratiosissimus Deus

A complacet sibi in contemplatione theorica qua rapitur ad divina. Advertant hæc religiosi ad levitates, risus, cachinnos dissolutionesque proni, et deplorent se ipsos, eo quod a ratione verissima monachi distent tam infinite, quum et Christus in Evangelio contestetur : Væ vobis qui ridetis nunc, quia plorabitis et flebitis.

Luc. vi, 25.

Quinta descriptio est : Monachus est ordo et consistentia incorporalium in corpore materiali et sordido consummatus. In qua definitione denuo abstractum et substantivum concrete adjectiveque sumitur, ut sit sensus : Monachus est homo ordinatus et consistens instar angelorum in corpore materiali et sordido seu immundo quantum ad naturales impuritates. In carne etenim non carnaliter conversatur, et vitam angelicam ducit in terris, terminos sibi in regula sua præfixos transgredi non præsumens, sed juxta similitudinem angelicorum spirituum in cunctis ordinate se habens, seque divinæ legi et observationi regulari subjiciens. Unde et discretio præcipue necessaria est monacho, teste beatissimo patre nostro Antonio, ut omnia suo loco et tempore agat, ne perturbetur, sed tranquilla mente adhærens Altissimo, ei acceptum semper reddat obsequium. Sapientissimo etenim Deo ordinatio valde placet.

Deut. xix, 14.

SERMO OCTAVUS

DE TRIBUS PRINCIPALIBUS CHRISTI CONSILIIS, IN QUIBUS

OMNIS MONASTICA RELIGIO TRIQUE VOTA RELIGIOSORUM FUNDANTUR QUÆ SUNT

DE ESSENTIA CUJUSLIBET RELIGIONIS.

CHRI^{STO} confixus sum cruci ; vivo D
autem jam non ego, vivit vero in me
Christus. Galat. ii, 19, 20.

Is. xxxiii, 22.
I Cor. i, 24.

Dominus noster Jesus Christus, legifer summus et sapientia Dei Patris, sciens ac docens caritatem Dei omnium esse virtutum altissimam, universa quæ docuit, con-

suluit aut præcepit esse vitanda aut peragenda, ordinavit ad hoc, ut credentes in ipsum, in caritate Dei proficiant, perseverent, perfectique fiant. Unde in Enchiridio loquitur Augustinus : Omnium evangelicorum Christi consiliorum ac præceptorum finis est, ut præceptum illud primum ac

Matth. xxii, 37, 38.

summum diligendi Deum toto corde perfecte adimpleamus. Porro quædam caritati Dei directe contrariantur, sicut peccata mortalia, præsertim invidia : et illa Christus absolute prohibuit. Quædam vero a caritatis profectu ac perfectione ut communiter impediunt hominem, ut divitiæ, deliciæ et honores, carnalis propinquitas, propriaque libertas : ideo talia consuluit Christus esse vitanda.

Horum vero quædam sunt penitus extra hominem, sicut terrenarum rerum possessio. Quas Christus consuluit propter Deum **B** relinqui, dicendo : Si vis perfectus esse, vade, vende omnia quæ habes, et da pauperibus; et veniens sequere me. Sicque in isto consilio fundatur votum paupertatis voluntariæ. Quædam autem illorum sunt aliquo modo nobis conjuncta, ut uxor, parentes et proles. Quæ omnia docuit relinqui Salvator, dicens : Si quis venit ad me, et non odit patrem suum et matrem, et fratres et sorores, et uxorem et filios, non potest meus esse discipulus. Et in isto fundatur votum perpetuæ castitatis. **C** Quædam vero illorum sunt intra nos, ut propria voluntas. Quam Dominus Jesus relinquendam consuluit, præinductis verbis adjiciendo : Adhuc autem et animam suam. Unde apud Matthæum ait : Si quis vult venire post me, abneget semetipsum, et tollat crucem suam, et sequatur me. Et in isto fundatur votum obedientiæ. Docuit itaque Filius Dei hæc omnia derelinqui desiderio perfectionis atque intuitu Dei, ut in Deo cor amorosius perfectiusque figatur, vitiis plenius reluctetur, et in omni **D** virtute concreseat. Cor namque humanum tanto integrius ac ferventius in uno defigitur, quo minus in multis dispergitur, et quo magis a multis abstrahitur. Siquidem virtus unita fortior est quam dispersa. Estque vulgare eloquium : Pluribus intentus, minor est ad singula sensus. Propter quod sancti affirmant doctores : Nequaquam homo in uniuscujusque operis ratione colligitur, quando mens ejus per diversa partitur. Et rursus : Impar (inquiunt) quisque

A invenitur ad singula, dum mente confusa dividitur per diversa.

Ut ergo in summi boni sincerissimo proficiamus amore, studeamus ad nullum prædictorum, imo ad nullum creatum affici inordinate, sensualiter, immoderate, sed solum spiritualiter, ordinate et pure, puta in Deo, secundum Deum et propter Deum, omnia scilicet referendo ad Dei honorem ac gloriam, nec ea amando aut cupiendo nisi secundum Dei voluntatem ac legem, seu prout nobis utilia aut necessaria sunt ad serviendum complacendumque Deo. Cujus oppositum faciunt religiosi proprium peculiumve habentes, et qui ad suos propinquos seu alios carnaliter afficiuntur, et pro eis inordinate sollicitantur, aut sæcularium more inquietantur. Sed quum ad proficiendum in Dei sancto amore, parum aut nihil prosit res ipsas exteriores ac propinquos deseruisse, nisi et ipsi interiores inordinati affectus ad illa funditus eradicentur de corde, propterea ipsas cupiditates et inordinatas omnes affectiones penitus extirpemus, et solis necessariis contenti simus, atque in **I** omnibus animum imperturbatum, cor per patientiam forte et inconcussum, mentemque reformatam habere ac possidere semper conemur. Unde nonnulli religiosi ita non agentes, frequenter pro rebus minimis ac vilissimis passionantur, contendunt et indignantur, tamque inordinate afficiuntur ad parva quorum usus eis concessus est, ut sæculares ad magna quæ possident. Hinc parva fratribus suis concedere renuunt, nec ea sibi auferri a superioribus suis æquanimiter ferunt.

Postremo de hac re sancti et expertissimi patres Eusebius Emisenus, Cassianus et Climacus plenissime ac subtilissime scribunt, quemadmodum quidam ad interiorem renuntiationem ac reformationem dare se negligentes, nunquam ad perfectionem pertingunt, imo parum aut nihil proficiunt : quin imo pereunt, quia sæpius pro uno stilo, pro graphio, pro tabula aut similibus immoderatissime concitan-

Matth. xix,
21.

Luc. xiv,
26.

Matth. xvi,
24.

I Tim. vi, 8.

tur. Nam amor habendi seu ipsa cupido A nisi radicitus extirpetur, ardentior est in parvis.

Deinceps sancti Patres hi docent triplicem esse renuntiationem : primam, qua ipsis rebus abrenuntiamus ; secundam, qua interioribus inordinatis renuntiamus affectibus et pristinis moribus pravis ac vitiis ; tertiam, qua propriæ voluntati in cunctis renuntiamus, et nos ipsos ac universa creata in tantum relinquimus atque transcendimus, sicque in Deum movemur, defigimur, transformamur ac rapimur, ut B nihil creatum, neque nos ipsos, nec proprios actus, advertimus aut sentimus. Harum renuntiationum prima ad secundam, ambæque illæ ad hanc tertiam ordinantur.

Denique, sicut Climacus scribit, quicumque peccata sua efficaciter ponderat, ac divini rigorem iudicii profunde considerat, imminentemque sibi mortis amaritudinem ac futura tormenta acutius speculatur, propriam quoque vocationem, et quid Deo promisit ac tenetur, subtiliter contemplatur, non ultra ad terrena et carnalia vitiose afficietur, nec ad propinquos aut alios sensualiter se habebit, neque in arrepto Dei itinere piger efficietur aut negligens.

Propterea omnia hæc juxta sanctorum horum doctrinam Patrum adimplere, et Deo digne conversari conemur. Ad laudem ejus, qui est super omnia Deus sublimis et benedictus. Amen.

MONITUM AUCTORIS. — Epistolam et evangelium cum sermonibus suis de templi Dedicatione, in operis fine de Sanctis, Deo propitio ac agente, exponam. Nam juxta formam istam expositionum epistolarum ac evangeliorum de Tempore cum suis sermonibus, intendo et de Sanctis epistolas et evangelia cum sermonibus exponere.

FINIS SERMONUM DE TEMPORE

INDICES

LOCA S. SCRIPTURÆ PRÆCIPUA

GENESIS.

- VI, 7. Pœnitet... me fecisse eos, 547D.
XV, 1. Ego protector tuus sum et merces tua magna nimis, 306A'.

EXODI.

- III, 14. Ego sum qui sum... Sic dices filiis Israel : Qui est, misit me ad vos, 17B'.
XVI, 8. Nec contra nos est murmur vestrum, sed contra Dominum, 331B.
XX, 7. Non assumes nomen Domini tui in vanum : nec enim habebit insontem Dominus eum qui assumpserit nomen Domini Dei sui frustra, 587B.

LEVITICI.

- XIX, 18. Non quæras ultionem, nec memoreris injuriæ civium tuorum, 591A.

DEUTERONOMII.

- IV, 19. Ne... elevatis oculis ad cœlum, videas solem et lunam et omnia astra cœli, et... adores ea, quæ creavit Dominus Deus tuus in ministerium cunctis gentibus quæ sub cœlo sunt, 82A.
— 29. Quumque quæsieris... Dominum Deum tuum, invenies eum, si tamen toto corde quæsieris et tota tribulatione animæ tuæ, 42D.
XXXII, 13. Ut sugeret mel de petra, oleumque de saxo durissimo, 286D.
— 28, 29. Gens absque consilio est et sine prudentia ; utinam saperent et intelligerent ac novissima providerent, 534D.
— 39. Ego occidam et ego vivere faciam, percutiam et ego sanabo, et non est qui de manu mea possit eruere, 633D.
XXXIII, 2. In dextera ejus ignea lex, 69C', 426D.

JOSUE.

- I, 7, 9. Confortare... et esto robustus valde... Noli timere, quoniam tecum est Dominus Deus tuus in omnibus ad quæcumque perrexeris, 567A.
VII, 19. Fili mi, da gloriam Domino... et confitere atque indica mihi quid feceris, ne abscondas, 537A.
XXIV, 14. Timete Dominum et servite ei perfecto corde atque verissimo, 273A.

JUDICUM.

- V, 31. Domine, qui... diligunt te, sicut sol in ortu suo splendet, ita rutilent, 407A.

I REGUM.

- VII, 3. Præparate corda vestra Domino, et servite ei soli, 273D', 447B.
XV, 23. Est... quasi scelus idololatriæ nolle acquiescere, 436D'.

III REGUM.

- X, 8. Beati viri tui et beati servi tui, qui stant coram te semper et audiunt sapientiam tuam, 404A.
XIX, 10. Zelo zelatus sum pro Domino Deo exercituum, 603A.

IV REGUM.

- I, 6, 8. Occurrit nobis... vir pilosus et zona pellicea accinctus renibus, 659C.
II, 12. Pater mi, pater mi, currus Israel et auriga ejus, 529C.

I ESDRÆ.

- IX, 6. Deus meus, confundor et erubesco levare faciem meam ad te, quoniam iniqui-

tates nostræ multiplicatæ sunt super caput nostrum, et delicta nostra creverunt usque ad cælum, 284A.

JUDITH.

VIII, 26, 27. Non ulciscamur nos pro his quæ patimur; sed reputantes peccatis nostris hæc ipsa supplicia minora esse... non ad perditionem nostram evenisse credamus, 441B.

ESTHER.

XIII, 9. Domine, rex omnipotens, in ditione... tua cuncta sunt posita, et non est qui possit tuæ resistere voluntati, 375C'.

JOB.

V, 2. Vere stultum interficit iracundia, et parvulum occidit invidia, 490C', 501B'.

XV, 12, 13. Quid te elevat cor tuum, et quasi magna cogitans, attonitos habes oculos? Quid tumet contra Deum spiritus tuus? 364D.

— 34. Congregatio... hypocritæ sterilis, 298C, 657C'.

XXVII, 9, 10. Numquid Deus audiet clamorem ejus, quum venerit super eum angustia? aut poterit in Omnipotente delectari? 311C'.

XXXIV, 14. Si direxerit ad eum cor suum, spiritum illius et flatum ad se trahet, 85C.

— 17. Numquid qui non amat iudicium, sanari potest? 223D'.

— 30. Qui regnare facit hominem hypocritam propter peccata populi, 173D.

XXXVI, 5. Deus potentes non abjicit, quum et ipse sit potens, 141B.

— 13. Simulatores et callidi provocant iram Dei, 299B'.

— 22. Ecce Deus excelsus in fortitudine sua, et nullus ei similis in legislatoribus, 379D.

XLI, 25. Ipse est rex super universos filios superbæ, 165D.

PSALMORUM.

I, 1. Beatus vir qui non abiit in consilio impiorum, et in via peccatorum non stetit, et in cathedra pestilentie non sedit, 384D'.

IV, 5. Irascimini, et nolite peccare, 257A.

XIV, 4. Ad nihilum deductus est in conspectu ejus malignus, 372A.

XVII, 2, 3. Diligam te, Domine, fortitudo mea,... et cornu salutis meæ, 578B.

XX, 7. Lætificabis eum in gaudio cum vultu tuo, 37B'.

XXXIII, 14. Prohibe linguam tuam a malo, 229C.

XXXV, 9, 10. Inebriabuntur ab ubertate domus tuæ, et torrente voluptatis tuæ potabis eos: quoniam apud te est fons vitæ, et in lumine tuo videbimus lumen, 201C.

XXXVI, 4. Delectare in Domino, 422C, 518C'. — 27. Declina a malo, et fac bonum, 560C'.

XXXVIII, 2. Dixi: Custodiam vias meas, ut non delinquam in lingua mea, 20D.

— 6. Substantia mea tanquam nihilum ante te, 177D, 375B'.

XL, 2-4. Beatus qui intelligit super egenum et pauperem; in die mala liberabit eum Dominus, etc., 209B.

XLVIII, 19. Confitebitur tibi quum benefeceris ei, 505C.

LII, 2. Corrupti sunt et abominabiles facti sunt in iniquitatibus, 425A.

LXIX, 2. Deus, in adjutorium meum intende; Domine, ad adjuvandum me festina, 338B'.

LXX, 23. Exsultabunt labia mea quum cantavero tibi, et anima mea quam redemisti, 563C'.

LXXVIII, 8. Cito anticipent nos misericordiæ tuæ, quia pauperes facti sumus nimis, 338B', 350A.

LXXX, 13. Dimisi eos secundum desideria cordis eorum, ibunt in adinventionibus suis, 463C'.

LXXXII, 17, 18. Imple facies eorum ignominia, et quærent nomen tuum, Domine; erubescant et conturbentur in sæculum sæculi, et confundantur et pereant, 576C.

LXXXVIII, 15. Justitia et iudicium præparatio sedis tuæ, 96A'.

XCH, 5. Testimonia tua credibilia facta sunt nimis, 56D'.

XCIII, 12. Beatus homo quem tu erudieris, Domine, 248A'.

XCIX, 2. Servite Domino in lætitia, 190C'.

CH, 5. Renovabitur ut aquilæ juvenus tua, 524C.

CIV, 3, 4. Lætetur cor quærentium Dominum; quærite Dominum et confirmamini; quærite faciem ejus semper, 120B.

CXVIII, 63. Particeps ego sum omnium timentium te et custodientium mandata tua, 429A.

CXVIII, 136. Exitus aquarum deduxerunt oculi mei, quia non custodierunt legem tuam, 344 D.

CXIX, 5. Heu mihi! quia incolatus meus prolongatus est, 139 B.

CXL, 5. Corripiet me justus in misericordia et increpabit me; oleum autem peccatoris non impinguet caput meum, 594 A, 621 C.

CXLIV, 14. Allevat Dominus omnes qui corruunt, et erigit omnes elisos, 572 A.

PROVERBIORUM.

I, 32. Prosperitas stultorum perdet illos, 472 B'.

II, 4, 5. Si quæsieris eam quasi pecuniam, et sicut thesauros effoderis illam, tunc intelliges timorem Domini, et scientiam Dei invenies, 237 C.

III, 13. Beatus homo qui invenit sapientiam, 492 B.

VII, 4. Dic sapientiæ, Soror mea es, et prudentiam voca amicam tuam, 50 C.

VIII, 31. Deliciæ meæ esse cum filiis hominum, 194 C.

XI, 27. Qui... investigator malorum est, opprimetur ab eis, 214 C'.

XVIII, 3. Impius, quum in profundum venerit peccatorum, contemnit, 470 C.

— 24. Vir amabilis ad societatem, magis amicus erit quam frater, 513 B.

XX, 3. Honor est homini qui separat se a contentionibus, 432 D'.

— 4. Propter frigus piger arare noluit, 572 C.

XXII, 9. Qui pronus est ad misericordiam, benedicetur, 211 A.

XXV, 20. Sicut tinea vestimento,... ita tristitia viri nocet cordi, 170 D'.

XXVII, 4. Ira non habet misericordiam, nec erumpens furor; et impetum concitati ferre quis poterit? 266 D'.

ECCLESIASTÆ.

III, 7. Tempus tacendi, et tempus loquendi, 74 A, 88 B.

VII, 10. Ne sis velox ad irascendum, quia ira in sinu stulti requiescit, 257 A.

IX, 1. Nescit homo utrum amore an odio dignus sit, 307 B'.

X, 1. Muscæ morientes perdunt suavitatem unguenti, 45 B.

CANTICI CANTICORUM.

II, 5. Fulcite me floribus, stipate me malis, quia amore langueo, 509 B.

III, 1. In lectulo meo per noctes quæsivi quem diligit anima mea, 65 C.

IV, 1. Quam pulchra es, amica mea, quam pulchra es! 580 C.

V, 1. Comedite, amici, et bibite; et inebriamini, carissimi, 79 A'.

VII, 10. Ego dilecto meo, et ad me conversio ejus, 510 A'.

SAPIENTIÆ.

I, 5. Spiritus... sanctus disciplinæ effugiet fictum, et auferet se a cogitationibus quæ sunt sine intellectu, 11 A, 80 D'.

VI, 26. Multitudo... sapientium sanitas est orbis terrarum, 574 D.

IX, 15. Corpus... quod corrumpitur, aggravat animam, et terrena inhabitatio deprimit sensum multa cogitantem, 130 D'.

XI, 24. Misereris omnium, quia omnia potes, et dissimulas peccata hominum propter penitentiam, 194 A, 277 B.

— 25. Diligis... omnia quæ sunt, et nihil odisti eorum quæ fecisti, 145 A'.

XIII, 1, 5. Vani... sunt omnes homines in quibus non subest scientia Dei, et de his quæ videntur bona, non potuerunt intelligere eum qui est;... a magnitudine enim speciei et creaturæ cognoscibiliter poterit Creator horum videri, 288 A, 386 D'.

ECCLESIASTICI.

I, 22, 28. Corona sapientiæ timor Domini... Qui sine timore est, non poterit justificari, 117 D.

III, 19. Fili, in mansuetudine opera tua perfice, et super hominum gloriam diligeris, 485 C.

— 31. Auris bona audiet cum omni concupiscentia sapientiam, 236 C.

V, 14. Si est tibi intellectus, responde proximo; sin autem, sit manus tua super os tuum, 516 B.

VI, 1. Noli fieri pro amico inimicus proximo, 229 C'.

— 2. Non te extollas in cogitatione animæ tuæ velut taurus, 499 C.

— 6. Multi pacifici sint tibi, et consiliarius sit tibi unus de mille, 114 A'.

- X, 7. Odibilis coram Deo est et hominibus superbia, 362 D.
- XIV, 4. Beatus vir qui non est lapsus verbo ex ore suo, 87 C'.
- XV, 14. Deus ab initio constituit hominem, et reliquit illum in manu consilii sui, 494 C.
- XVII, 12. Mandavit illis unicuique de proximo suo, 532 C.
- XVIII, 31. Si præstes animæ tuæ concupiscentias ejus, faciet te in gaudium inimicis tuis, 316 A.
- XXVII, 4. Si non in timore Domini tenueris te instanter, cito subvertetur domus tua, 438 D.
- 6. Vasa figuli probat fornax, et homines justos tentatio tribulationis, 308 C', 496 C.
- XXVIII, 2. Relinque proximo tuo nocenti te; et tunc deprecanti tibi peccata solventur, 205 D.
- 6, 10. Memento novissimorum et desine inimicari... Abstine te a lite, 261 A.
- 28. Sepi aures tuas spinis, linguam nequam noli audire; et ori tuo facito ostia et seras, 294 C'.
- XXX, 24. Miserere animæ tuæ, placens Deo, 448 B.
- XLI, 15. Curam habe de bono nomine, 454 C.
- XLII, 17. Dominus omnipotens stabilis in gloria sua, 440 D.
- XLIV, 20. Non est inventus similis illi... qui conservavit legem Excelsi, 426 D, 597 B.

ISAIÆ.

- I, 16. Auferte malum cogitationum vestrarum ab oculis meis, 323 A'.
- III, 12. Popule meus, qui te beatum dicunt, ipsi te decipiunt et viam gressuum tuorum dissipant, 303 B.
- VI, 2. Seraphim stabant super illud; sex alæ uni et sex alæ alteri, 66 C.
- XXVI, 9. Anima mea desideravit te in nocte, sed et spiritu meo in præcordiis meis; de mane vigilabo ad te, 525 A.
- XXXIII, 22. Dominus... judex noster, Dominus legifer noster, Dominus rex noster, 378 D.
- XXXV, 4-6. Ecce Deus vester... ipse veniet et salvabit vos. Tunc aperientur oculi cæcorum... et aperta erit lingua mutorum, 382 D, 392 D.
- XLI, 8. Semen Abraham amici mei, 325 B.
- XLV, 15. Vere tu es Deus absconditus, 520 C'.
- LIII, 2, 4, 5. Non est species ei neque decor, et

vidimus eum, et non erat adspectus;... vere languores nostros ipse tulit, et dolores nostros ipse portavit;... ipse autem vulneratus est propter iniquitates nostras, attritus est propter scelera nostra, 59 C.

- LVI, 7. Domus mea domus orationis vocabitur, 346 B.
- LVII, 20. Impii... quasi mare fervens quod quiescere non potest, 529 A.
- LXI, 10. Induit me vestimentis salutis, et indumento justitiæ circumdedit me, 658 D.
- LXIV, 4. Oculus non vidit... quæ præparasti expectantibus te, 249 A'.
- LXVI, 2. Ad quem... respiciam, nisi ad pauperulum et contritum spiritu et trementem sermones meos? 65 A.

JEREMIÆ.

- II, 13. Duo... mala fecit populus meus: me dereliquerunt fontem aquæ vivæ, et foderunt sibi cisternas... dissipatas, quæ continere non valent aquas, 489 B.
- VI, 13. A minore... usque ad majorem, omnes avaritiæ student, 451 A.
- X, 21. Quia stulte egerunt pastores et Dominum non quæsierunt, propterea... omnis grex eorum dispersus est, 333 A.
- XII, 1. Justus quidem tu es, Domine, si disputem tecum; verumtamen justa loquar ad te: Quare via impiorum prosperatur, bene est omnibus qui prævaricantur? 346 B'.
- XVII, 16. Ego non sum turbatus, te pastorem sequens; et diem hominis non desideravi, tu scis, 475 B'.
- XXIII, 5. Ecce dies veniunt, dicit Dominus, et suscitabo David germen justum, et regnabit Rex, etc., 650 B.
- XLVIII, 36. Quia plus fecit quam potuit, idcirco perierunt, 426 D'.

THRENORUM.

- III, 22. Misericordiæ Domini, quia non sumus consumpti: quia non defecerunt miserationes ejus, 278 C, 471 A.
- 30. Dabit percutienti se maxillam, saturabitur opprobriis, 351 D'.

BARUCH.

- III, 24, 25. O Israel, quam magna est domus Dei, et ingens locus possessionis ejus; ma-

gnus est et non habet finem, excelsus et immensus! 459A'.

EZECHIELIS.

VI, 9. Contrivi cor eorum fornicans et recedens a me, 329D.

XVI, 49. Hæc fuit iniquitas Sodomæ sororis tuæ... saturitas panis et abundantia, 148D.

XXIX, 3. Ecce ego ad te, Pharao,... draco magne, qui... dicis : Meus est fluvius et ego feci memetipsum, 366C.

XXXVI, 26. Auferam cor lapideum de carne vestra, et dabo vobis cor carneum, 392B'.

DANIELIS.

IX, 26, 27. Occidetur Christus, et non erit ejus populus qui eum negaturus est;... et finis ejus vastitas,... et usque ad... finem perseverabit desolatio, 398C.

MICHÆÆ.

II, 4. Væ qui cogitatis inutile, 354A.

VI, 8. Indicabo tibi, o homo, quid sit bonum, et quid Dominus requirat a te : utique facere iudicium, et diligere misericordiam, et sollicitum ambulare cum Deo tuo, 490C'.

HABACUC.

II, 4. Ecce qui incredulus est, non erit recta anima ejus in semetipso ; justus autem in fide sua vivet, 631B.

— 5. Quomodo vinum potantem decipit, sic erit vir superbus, et non decorabitur, 458A.

AGGÆI.

I, 5. Ponite corda vestra super vias vestras, 448C.

II, 8. Veniet Desideratus cunctis gentibus, 397C.

ZACHARIÆ.

IX, 11. Tu quoque, in sanguine testamenti tui, emisisti vinctos tuos de lacu in quo non est aqua, 240D.

MALACHIÆ.

II, 7. Labia... sacerdotis custodient scientiam, et legem requirent ex ore ejus, 56D.

MATTHÆI.

V, 6. Beati qui esuriunt et sitiunt justitiam, 648C'.

— 7. Beati misericordes, quoniam ipsi misericordiam consequentur, 207D, 245C, 438B', 456A.

— 22. Omnis qui irascitur fratri suo, reus erit iudicio, 265B.

— 23. Si... offers munus tuum ad altare, et ibi recordatus fueris quia frater tuus, etc., 268B.

VI, 22. Lucerna corporis tui est oculus tuus ; si oculus tuus fuerit simplex, totum corpus tuum lucidum erit, 559A'.

— 28, 29. Considerate lilia agri, quomodo crescunt ;... dico... vobis, quoniam nec Salomon in omni gloria sua coopertus est sicut unum ex istis, 37C.

— 33. Quærite... primum regnum Dei et justitiam ejus, et hæc omnia adjicientur vobis, 450B, 458D.

VII, 16. A fructibus eorum cognoscetis eos, 307D.

— 19. Omnis arbor quæ non facit fructum bonum, excidetur et in ignem mittetur, 310B.

— 21. Non omnis qui dicit mihi, Domine, Domine, intrabit in regnum cælorum, sed qui facit voluntatem Patris mei qui in cælis est, 27C.

IX, 1. Ascendens (Jesus) in naviculam, transfretavit, et venit in civitatem suam, 538A.

— 2. Confide, fili, remittuntur tibi peccata tua, 540D.

— 21. Dicebat... intra se : Si tetigero tantum vestimentum ejus, salva ero, 639A.

— 22. Confide, filia ; fides tua te salvam fecit. Et salva facta est mulier ex illa hora, 630D, 641D.

X, 16. Estote... prudentes sicut serpentes, et simplices sicut columbæ, 63B'.

XI, 28. Venite ad me, omnes qui laboratis et onerati estis, et ego reficiam vos, 280D.

XII, 42. Regina Austri surget in iudicio cum generatione ista, et condemnabit eam, quia venit a finibus terræ audire sapientiam Salomonis ; et ecce plus quam Salomon hic, 404A'.

XVI, 24. Si quis vult post me venire, abneget semetipsum, et tollat crucem suam, et sequatur me, 663C.

XVIII, 32, 33. Serve nequam, omne debitum

- dimisi tibi, quoniam rogasti me : nonne ergo oportuit et te misereri conservi tui, sicut et ego tui misertus sum ? 599 C.
- XVIII, 34, 35. Dominus ejus tradidit eum tortoribus,... sic et Pater meus cœlestis faciet vobis, etc., 602 A.
- XXII, 2. Simile factum est regnum cœlorum homini regi qui fecit nuptias filio suo, 562 D.
- 13. Ligatis manibus et pedibus ejus, mittite eum in tenebras exteriores ; ibi erit fletus et stridor dentium, 555 A.
- 16. Magister, scimus quia verax es, et viam Dei in veritate doces, et non est tibi cura de aliquo, 610 D.
- 18. Cognita... Jesus nequitia eorum, ait : Quid me tentatis, hypocritæ ? 619 D.
- 21. Reddite... quæ sunt Cæsaris, Cæsari ; et quæ sunt Dei, Deo, 613 D, 622 A.
- 37. Diliges Dominum Deum tuum ex toto corde tuo, etc., 520 B.
- 40. In his duobus mandatis universa lex pendet et Prophetæ, 517 D.

MARCI.

- VII, 34. Suspiciens in cœlum, ingemuit, 390 C.
- 37. Bene omnia fecit : et surdos fecit audire et mutos loqui, 385 B, 392 D.
- VIII, 2. Misereor super turbam, quia ecce jam triduo sustinent me, nec habent quod manducent, 278 D', 285 B.
- 3. Si dimisero eos jejunos..., deficient in via, 287 D.
- XI, 25. Quum stabitis ad orandum, dimittite si quid habetis adversus aliquem, ut et Pater vester... dimittat vobis peccata vestra, 269 A.

LUCÆ.

- I, 69, 70. Erexit cornu salutis nobis,... sicut locutus est per os sanctorum, qui a sæculo sunt, Prophetarum ejus, 410 D.
- V, 1. Quum turbæ irruerent in eum, ut audirent verbum Dei, etc., 247 A.
- 3. Sedens docebat de navicula turbas, 239 C.
- VI, 24. Væ vobis divitibus, quia habetis consolationem vestram, 137 D.
- 25. Væ vobis qui saturati estis, quia esurietis, 141 A.
- 37. Nolite judicare, et non judicabimini, 214 B, 220 B.
- 41. Quid... vides festucam in oculo fratris

tui, trabem autem quæ in oculo tuo est, non consideras ? 223 A.

- VII, 13, 14. Dominus misericordia motus... ait : Adolescens, tibi dico, surge, 476 C.
- 16. Propheta magnus surrexit in nobis, 478 D.
- X, 23. Beati oculi qui vident quæ vos videtis, 412 A.
- 27. Diliges Dominum Deum tuum ex toto corde tuo, 414 C.
- XIV, 1. Ipsi observabant eum, 497 D.
- 4. Ipse... apprehensum sanavit eum, 500 A.
- 16. Homo quidam fecit cœnam magnam, et vocavit multos, 172 D.
- XV, 1. Erant... appropinquantibus ei publicani et peccatores, ut audirent illum, 192 A.
- 10. Gaudium erit coram angelis Dei super uno peccatore pœnitentiam agente, 194 C.
- XVI, 2. Redde rationem villicationis tuæ, 332 D.
- 9. Facite vobis amicos de mammona iniquitatis, 324 D.
- 19. Dives... induebatur purpura et bysso, et epulabatur quotidie splendide, 146 D.
- 22. Factum est... ut moreretur mendicus, et portaretur ab angelis in sinum Abrahamæ ; mortuus est autem et dives, et sepultus est in inferno, 149 A.
- XVII, 13. Jesu præceptor, miserere nostri, 428 B.
- 14. Ite, ostendite vos sacerdotibus, 433 D.
- 17. Nonne decem mundati sunt ? Et novem ubi sunt ? 436 A.
- XVIII, 11. Pharisæus stans, hæc apud se orabat : Deus, gratias ago tibi, quia non sum sicut ceteri hominum, 371 D.
- 14. Omnis qui se exaltat, humiliabitur ; et qui se humiliat, exaltabitur, 366 A, 374 C.
- XIX, 41. Videns civitatem, flevit super illam, 351 C.
- 43. Circumdabunt te inimici tui vallo... et coangustabunt te undique, 353 D.

JOANNIS.

- III, 3. Nisi quis renatus fuerit denuo, non potest videre regnum Dei, 113 C, 115 A.
- IV, 24. Spiritus est Deus ; et eos qui adorant eum, in spiritu et veritate oportet adorare, 45 B.
- 49. Domine, descende priusquam moriatur filius meus, 582 D.
- V, 21. Sicut... Pater suscitavit mortuos et vivificavit, sic et Filius quos vult vivificat, 467 D.

- VI, 14. Hic est vere Propheta qui venturus est in mundum, 652 D.
- VII, 24. Nolite judicare secundum faciem, sed justum iudicium iudicate, 220 C.
- XIII, 35. In hoc cognoscent omnes quia discipuli mei estis, si dilectionem habueritis ad invicem, 168 B.
- XIV, 1. Creditis in Deum, et in me credite, 125 A'.
- 6. Nemo venit ad Patrem, nisi per me, 251 C.
- 23. Si quis diligit me, sermonem meum servabit, etc., 89 C, 90 A.
- 26. Paracletus... Spiritus Sanctus, quem mittet Pater in nomine meo, ille vos docebit omnia, 92 A.
- XV, 26. Quum... venerit Paracletus, quem ego mittam vobis a Patre, Spiritum veritatis, qui a Patre procedit, ille testimonium perhibebit de me, 63 D, 71 D'.
- XVI, 8. (Paracletus) arguet mundum de peccato, et de iustitia, et de iudicio, 21 D.
- 23. Amen, amen dico vobis, si quid petieritis Patrem in nomine meo, dabit vobis, 41 C.
- 24. Petite... ut gaudium vestrum sit plenum, 36 A, 44 C.
- XX, 29. Beati qui non viderunt et crediderunt, 412 A'.

ACTUUM.

- II, 4. Repleti sunt omnes Spiritu Sancto, 71 D, 86 D.
- 14. Stans... Petrus cum undecim, levavit vocem suam, 79 A.
- 43. Fiebat autem omni animæ timor; multa quoque prodigia et signa per Apostolos in Jerusalem fiebant, et metus erat magnus in universis, 72 D'.
- III, 18. Deus... prænuntiavit per os omnium Prophetarum pati Christum, 58 B'.
- 24. Omnes Prophetæ a Samuel et deinceps... annuntiaverunt dies istos, 647 C.
- IV, 32. Multitudinis... credentium erat cor unum et anima una, 655 A.
- X, 43. Huic omnes Prophetæ testimonium perhibent, 58 B.

AD ROMANOS.

- V, 5. Caritas Dei diffusa est in cordibus nostris per Spiritum Sanctum, qui datus est nobis, 81 C.

T. 30.

- VI, 4. Quomodo Christus surrexit a mortuis..., ita et nos in novitate vitæ ambulemus, 263 A.
- 21. Quem... fructum habuistis tunc in illis, in quibus nunc erubescitis? 282 D.
- VIII, 14. Quicumque... Spiritu Dei aguntur, ii sunt filii Dei, 293 D.
- 16. Ipse... Spiritus testimonium reddit spiritui nostro, quod sumus filii Dei, 84 B, 304 D.
- 17. Si... compatimur, ut et conglorificemur, 147 C'.
- 18. Non sunt condignæ passionibus huius temporis ad futuram gloriam, 200 A, 218 B.
- 35. Quis... nos separabit a caritate Christi? 92 B'.
- XIV, 10. Omnes... stabimus ante tribunal Christi, 322 A.

I AD CORINTHIOS.

- I, 4. Gratias ago Deo meo semper pro vobis in gratia Dei quæ data est vobis, 515 B.
- X, 12. Qui se existimat stare, videat ne cadat, 315 B, 327 C.
- 13. Tentatio vos non apprehendat nisi humana, 330 A.
- XII, 6. Deus... operatur omnia in omnibus, 338 A.
- 11. Omnia operatur unus atque idem Spiritus, dividens singulis prout vult, 349 A.
- XIV, 40. Omnia... honeste et secundum ordinem fiant, 50 C'.
- XV, 10. Gratia... Dei sum id quod sum, 359 D', 369 B.
- 58. Stabiles estote, et immobiles, abundantes in opere Domini semper, scientes quod labor vester non est inanis in Domino, 660 C.
- XVI, 14. Omnia vestra in caritate fiant, 409 A'.

II AD CORINTHIOS.

- III, 6. Littera... occidit, spiritus autem vivificat, 388 A.
- 18. Nos vero omnes revelata facie gloriam Domini speculantes, in eadem imaginem transformamur a claritate in claritatem, tanquam a Domini Spiritu, 122 A, 281 B.
- V, 20. Legatione fungimur, tanquam Deo exhortante per nos; obsecramus pro Christo, reconciliamini Deo, 262 A.

AD GALATAS.

- II, 20. Vivo autem, jam non ego, vivit vero in me Christus, 264A, 662D.
 — — In fide vivo Filii Dei, qui dilexit me et tradidit semetipsum pro me, 188D.
 III, 22. Conclusit Scriptura omnia sub peccato, ut promissio ex fide Jesu Christi daretur credentibus, 410B.
 V, 22. Fructus... Spiritus est caritas, gaudium, pax, patientia, 420D, 431C.
 — 26. Non efficiamur inanis gloriæ cupidi, invicem provocantes, invicem invidentes, 440D.
 VI, 1. Fratres,... si præoccupatus fuerit homo in aliquo delicto,... hujusmodi instruite, etc., 456A.
 — 2. Alter alterius onera portate, 453B.

AD EPHESIOS.

- III, 14. Flecto genua mea ad Patrem Domini nostri Jesu Christi, 474A.
 — 16. (Pater) det vobis secundum divitias gloriæ suæ, virtute corroborari... in interiorem hominem, 463B.
 IV, 1. Digne ambuletis vocatione qua vocati estis, 483D, 495A, 656C'.
 — 23, 24. Renovamini... spiritu mentis vestræ, et induite novum hominem, qui secundum Deum creatus est, 535C.
 — 29. Omnis sermo malus ex ore vestro non procedat, sed si quis bonus ad ædificationem..., ut det gratiam audientibus, 49B'.
 V, 1, 2. Estote... imitatores Dei, sicut filii carissimi; et ambulate in dilectione, sicut et Christus dilexit nos, 343A.
 — 15. Videte... quomodo caute ambuletis, 558A.
 — 18. Implemini Spiritu Sancto, 545C, 560C.
 VI, 10. Confortamini in Domino et in potentia virtutis ejus, 577D.
 — 13. Accipite armaturam Dei, ut possitis resistere in die malo et in omnibus perfecti stare, 580A.

AD PHILIPPENSES.

- I, 9. Caritas vestra magis ac magis abundet in scientia et in omni sensu, 586B, 597A.
 — 23. Desiderium habens dissolvi et esse cum Christo, 184C'.
 III, 17. Imitatores mei estote, 617B.

III, 20. Nostra... conversatio in cœlis est, 606D.

AD COLOSSENSES.

- I, 9. Impleamini agnitione voluntatis ejus, in omni sapientia et intellectu spirituali, 636D.
 — 13. (Pater) eripuit nos de potestate tenebrarum, et transtulit in regnum Filii dilectionis suæ, 626C.

I AD TIMOTHEUM.

- I, 15. Fidelis sermo, et omni acceptione dignus, quod Christus Jesus venit in hunc mundum peccatores salvos facere, 187D.
 IV, 7, 8. Exerce... te ipsum ad pietatem: nam corporalis exercitatio ad modicum utilis est, etc., 211C.
 VI, 15, 16. Beatus et solus potens Rex regum et Dominus dominantium; qui solus habet immortalitatem, et lucem inhabitat inaccessibilem; quem nullus hominum vidit, sed nec videre potest; cui honor et imperium, 119B.

II AD TIMOTHEUM.

- III, 1, 2, 4. In novissimis diebus instabunt tempora periculosa, erunt homines se ipsos amantes, cupidi, elati,... voluptatum amatores magis quam Dei, 512C.

AD HEBRÆOS.

- II, 1, 3. Abundantius oportet observare nos ea quæ audivimus, ne forte pereffluamus... Quomodo nos effugiemus, si tantam neglexerimus salutem? 370A.
 III, 13. Adhortamini vosmetipsos per singulos dies,... ut non obduretur quis ex vobis fallacia peccati, 242A'.
 X, 22, 23. Accedamus cum vero corde in plenitudine fidei, adpersi corda a conscientia mala, et... teneamus spei nostræ confessionem indeclinabilem, 657A.
 — 28, 29. Irritam quis faciens legem Moysis, sine ulla miseratione, duobus vel tribus testibus moritur: quanto magis putatis deteriora mereri supplicia, qui Filium Dei conculcaverit, etc.? 389C.
 XI, 6. Sine fide... impossibile est placere Deo, 358B.
 XII, 1, 2. Deponentes omne... peccatum, per

patientiam curramus ad propositum nobis certamen, adspicientes in auctorem fidei et consummatorem Jesum, qui proposito sibi gaudio sustinuit crucem, confusione contempta, 445B'.

JACOBI.

I, 47. Omne datum optimum et omne donum perfectum desursum est, descendens a Patre luminum, 47A.

— 49. Sit... omnis homo velox ad audiendum, tardus autem ad loquendum, et tardus ad iram, 4B, 49D.

— 25. (Refrenans linguam suam) hic beatus in facto suo erit, 39D.

— 26. Si quis... putat se religiosum esse, non refrenans linguam suam, sed seducens cor suum, hujus vana est religio, 38D.

II, 43. Judicium... sine misericordia illi qui non fecit misericordiam, 456A.

IV, 8. Appropinquate Deo, et appropinquabit vobis, 480C, 484C.

— — Purificate corda, duplices animo, 304C.

I PETRI.

III, 8. Omnes unanimes (in oratione estote), 241D.

— — Compatientes, fraternitatis amatores, misericordes, modesti, humiles, 244C.

— 45. Dominum... Christum sanctificate in cordibus vestris, parati semper ad satisfactionem omni poscenti vos rationem de ea quæ in vobis est spe, 55C.

IV, 7. Estote... prudentes, et vigilate in orationibus, 60D.

V, 6. Humiliamini... sub potenti manu Dei, ut vos exaltet in tempore visitationis, 489D.

— 8. Sobrii estote et vigilate, quia adversarius vester diabolus tanquam leo rugiens circuit, quærens quem devoret, 477B.

II PETRI.

II, 19. A quo... quis superatus est, hujus et servus est, 446C'.

I JOANNIS.

II, 46. Omne quod est in mundo, concupiscentia carnis est, et concupiscentia oculorum, et superbia vitæ, 463C.

II, 27. Unctio ejus docet vos de omnibus, 61B'.

III, 8. Qui facit peccatum, ex diabolo est, 44D.

— 14, 15. Qui non diligit, manet in morte; omnis qui odit fratrem suum, homicida est, 453C, 469D.

— 18. Non diligamus verbo neque lingua, sed opere et veritate, 467A.

IV, 46. Deus caritas est; et qui manet in caritate, in Deo manet, et Deus in eo, 429A, 444A.

— 19. Diligamus Deum, quoniam Deus prior dilexit nos, 428C.

V, 14. Hæc est fiducia quam habemus ad eum, quia quodcumque petierimus secundum voluntatem ejus, audit nos, 33B.

III JOANNIS.

4. Majorem horum non habeo gratiam, quam ut audiam filios meos in veritate ambulare, 504C.

JUDÆ.

5. Jesus populum de terra Ægypti salvans, secundo eos qui non crediderunt perdidit, 440B.

19. Hi sunt qui segregant semetipsos, animales, spiritum non habentes, 364A.

APOCALYPSIS.

II, 4, 5. Habeo adversum te, quod caritatem tuam primam reliquisti. Memor esto itaque unde excideris, et age pœnitentiam,... sin autem, venio tibi, 252C.

III, 4, 17. Nomen habes quod vivas, et mortuus es... Quia dicis quod dives sum... et nullius egeo, et nescis quia tu es miser et miserabilis et pauper et cæcus et nudus, 454D.

— 20. Ecce sto ad ostium, et pulso; si quis... aperuerit mihi januam, intrabo ad illum, et cœnabo cum illo, et ipse mecum, 460C', 472D.

IV, 6. In circuitu sedis, quatuor animalia plena oculis ante et retro, 446C.

— 8. Sanctus, Sanctus, Sanctus, Dominus Deus omnipotens, 401D.

XVIII, 7. Quantum glorificavit se et in deliciis fuit, tantum date illi tormentum et luctum, 449A'.

XIX, 7. Venerunt nuptiæ Agni, et uxor ejus præparavit se, 552A.

— 9. Beati qui ad cœnam nuptiarum Agni vocati sunt, 459D.

INDEX

NOMINUM ET RERUM NOTABILIMUM

A

- ABBACYRUS monachus, 151B.
ABIMELECH. Ejus ambitio, 166A'.
ABNEGATIO, 663A'. *Cf.* Mortificatio, Renuntiatio.
ABRAHAM hospitalitati deditus, 52C'. — Promissiones illi factæ, 395A et s., 398A', quid spiritualiter significant, 398B'. — Sinus Abrahamæ, 132D'.
ABRAHAM eremita, 406B'.
ABSALON, typus superbiæ, 365A'.
ABSTINENTIA, 147A. *Cf.* Cibus.
ACEDIA, 491D, 501C', 572B, 583C'.
ADOLESCENTES duo quam sancte vixerint in eremo Scythi, 240D'.
ADONIS, 405B.
ADOPTIO filiorum, 292C, 306B.
ADVERSITAS patienter toleranda, 190C, 246A', propter futuram gloriam, 197A, 200A et s., 219C. *Cf.* Patientia, Tribulationes.
ÆDIFICATIO proximi, 453B', 583B, 618D'.
AFFECTIONES mortificandæ, 459A.
AGATHON abbas, 3D, 41A', 45C', 355C.
AGNES (S.), 509C.
ALBERTUS (B.) Magnus, 26A', 56A', 97B, 99B, 134A, 162D, 217A.
ALCORANUS, 379A', 479B.
ALEXANDRINA Ecclesia, 100C, 656C.
AMAN propter superbiam punitus, 368A'.
AMBITIO, 225C', 493C, 498C', 556A', religionis vitanda, 173C et s., 437C.
AMBROSIUS (S.), 5B', 54C', 55A, 132C, 177D', 183C', 208B', 209D, etc.
AMICITIA Dei quomodo acquirenda, 324D et s. *Cf.* Amor, Caritas, Dilectio.
AMMON abbas, 559C'.
AMMONIUS (S.), 131A'.
AMOR multiplex, 513A, 522A. — Amor naturalis ac socialis, 513D. — Amor mercenarius, 513B'. — Amor carnalis, 13B, 392A, 512D, 514D, 522C. — Amor vanitatis, 471A' — Amor sui improbus, 163C et s., 264B. — Amor ecstaticus, 509B et s., 520B et s. — Amor Dei crescens usque ad contemptum sui, 164D'. — *Cf.* Amicitia, Caritas, Dilectio.
ANANIAS ab igne præservatus, 616D'.
ANDREAS cardinalis, intercessione S. Hieronymi suscitatus et salvatus, 143B'.
ANGELI quomodo nos diligant, 189B, et gaudeant de conversione peccatorum, 182B, 183D'.
ANIMA, cui adversatur caro, 432C, quo pacto regenda, 322B', 333B, 649B, et corpori præficienda, 420D. — Ejus infirmitas, 375A, confortatio, 567A et s., 577D et s., renovatio, 524C, 535C, integritas, 425B et s. — Anima impassibilis, 653C', et irreprehensibilis, 653D'. — *Cf.* Cor, Homo, Ratio.
ANIMALIA quatuor in Apocalypsi laudata, 99B, 116C et s.
ANSELMUS (S.), 10D', 117B', 128C', 136C.
ANTIOCHENA Ecclesia, 100B.
ANTIOCHUS rex, non bene pœnitens, 486A', propter superbiam percutitur, 14A'.
ANTONIUS (S.), 90D', 113A', 131A', 240A', 339B', 351A', 354B, 394C, 453A, 498B', 559B, B', 561D', 581B, 582B', 588A', 607B', 656B, A', 662C'.
APOLLO abbas, 443A', 444A.
APOLLONIUS (S.) eremita, 213C', 339C'.
APOSTOLI qualiter Spiritu Sancto repleti, 69D et s. — Eorum prædicatio, 53C, 54C, 71A, 72A', 79A et s., et miracula, 57C, 72C'.
APPARITIONES discernendæ, 339A'. — Christi apparitiones post resurrectionem, 357A.
APPETITUS sensitivus reformandus, 536A.
ARABIA, 71A'.
ARBOR bona virtuosum significat, 303C, 312B.
ARISTOTELES, 1C, 18B', 59D', 61A, A', 62A, 74C, D', 81C, 114B', 119B, 153C, 170D, 186B, 204B', 215D', 222C, 326A, 333B, 418A, 426D', 472D, 571D.

ARMATURA Dei, 565 C, 566 C, 579 A', 581 D'.
 ARSENIUS (S.) abbas, 46 B', 126 B, 282 B', 355 C, 478 A, C', 534 D', 548 A'.
 ASTION monachus et martyr, 90 B, 409 B', 410 A.
 AUDITUS refrenandus, 294 C'.
 AUGUSTINUS (S.), 4 B', 7 A', 15 C, 19 B, 31 B, etc. — Ejus Regula, 561 C. — Profundissimus fuit Trinitatis contemplator, 103 A'. — Illi apparuit S. Hieronymus, 405 A'.
 AVARITIA, 16 A, 141 B, 157 C', 165 D', 426 A', 448 A', 450 B' et s., 490 D', 501 D, 556 D'. — Avari in inferno positi, 449 B'. — Cf. Divitiæ.
 AVICENNA philosophus, 379 D.
 AZARIAS ab igne præservatus, 616 D'.

B

BAPTISMUS, 98 D', 105 C, 106 B, 108 D, 249 A et s. — Rex aliquis stolidus ratione Baptismum renuit, 253 B'.
 BARNABAS (S.), 239 A.
 BASILIUS (S.) a S. Ephrem visitatur, 86 B'. — Ejus Regula, 39 C', 45 D', 46 A, C, 168 D, 169 C', 328 B. — Allegatur etiam, 45 A, D, 143 C', 171 B, 210 B, 401 D', 488 B'.
 BEATITUDO, 36 A et s., 156 B, 162 B', 194 D', 200 A et s., 205 B', 218 A et s., 404 C' et s., 553 D', 651 B et s. — Beatorum caritas, 408 C', 415 C'.
 BEDA (S.) Venerabilis, 27 A', 48 C, 56 A', 71 B, 97 B, 99 B, D', 108 C', 125 B', 126 A, 160 B, 184 A', 570 B, D'.
 BENEDICTUS (S.). — Ejus Regula, 20 D, 44 C, 146 A', 457 A', D', 561 D, 655 A, C.
 BENEFICIA Dei, 12 A, 64 D, 81 C' et s. — Beneficia spiritualia quanta gratitudine accipienda, 439 B', 443 B, 458 B.
 BENJAMIN eremita, 561 C.
 BERENGANDUS (*alias* Berengaudus), 96 C, 97 A, 99 B, 100 A.
 BERNARDUS (S.), 17 C', 23 D, 43 D', etc. — Varia de ejus gestis et virtutibus, 16 C', 163 A, 221 B', 360 B, 387 A, 548 A', 569 D'. — Illi attributa Epistola ad Fratres de Monte Dei, 288 B'.
 BESSARION abbas, 46 C', 512 A.
 BOETIUS (B.), 135 B', 452 A'.
 BONUM delectabile, utile et honestum, 164 A. — Bona diversi generis, 224 A', 228 C, 372 B'. — Bona exteriora bene dispensanda, 324 C. — A Spiritu Sancto procedit omne bonum quod agimus, 349 B'.

BRIGITTA (S.), 136 B', 232 C', 486 A'.
 BYSSUS quid, 131 D.

C

CARITAS igni assimilata, 426 C, 427 D. — Ejus natura, 130 C, excellentia, 48 A', 128 C et s., 153 C et s., 283 B, 597 A, motiva, 130 A, 519 B', actus, 93 A, 519 D', 598 B, dotes, 518 C et s., dimensiones, 462 B, 464 B, gradus, 131 B, 408 C' et s., perfectio, 130 B', signa, 84 B et s., 89 C, 306 D', effectus, 48 C', 52 A, 63 A, 92 C, 145 C'. — Præceptum caritatis, 400 C' et s., 413 B', 414 C et s., 507 C', 517 D, 591 D'. — Caritas erga Deum, 407 A et s. — Caritas fraterna, 51 C', 63 B, 93 D, 127 C', 129 B', 130 A', 144 A' et s., 152 B et s., 155 B, 167 C' et s., 226 A, 343 B', 532 C et s., 591 A et s., 618 C', 639 B', erga pauperes, 155 C', 160 D, erga inimicos, 343 C, 352 C. — Cf. Amor, Devotio, Dilectio, Proximus.
 CARO crucifigenda, 433 B'. — Vitanda ejus desideria, 431 C, et opera, 432 D. — Cf. Concupiscentia, Corpus.
 CAROLUS Magnus, 26 B'.
 CARTUSIENSIS Ordo. Ejus Statuta de silentio, 40 A'.
 CASSIANUS, 42 A, 148 C, 256 B, 269 B, 288 A', 289 D, 376 C', 391 B', 463 D', 477 A, 526 C', 558 C', 559 B, C', 561 C, 564 C, B', 577 D', 653 C, 655 D, 659 B, A', 663 D'.
 CASSIODORUS, 506 D.
 CATO (Dionysius), 175 C', 294 D.
 CAUTIO, 558 A. Cf. Discretio.
 CHOREB eremus, 478 B.
 CHRISTIANUS. Ejus vocatio, 483 D et s., privilegia, 406 A, finis, 169 A', officia diversa, 28 B, 57 C', 137 D et s., 211 B', 293 D et s., 303 C, 389 D, 453 B, 587 D', perfectio, 606 D et s. — Religio christiana per naviculam figurata, 538 A et s. — Christiani populi peccata, 486 D, 489 B', 607 D'.
 CHRISTUS in veteri Testamento prænuntiatus, 58 B et s., 287 A, 395 A et s., 397 C, 410 C, 647 C, 650 B. — Ejus divinitas, 646 D, humanitas, 123 A', adventus multiplex, 504 A, regnum, 644 A', 653 B, potestas, 508 A', justitia, 644 A, 648 A', judicium, 645 A, redemptio, 645 A, lacrimæ, 344 B, miracula, 56 D', 411 A, sacramenta, 632 D', convivium, 160 C', 280 D et s., sermo post Cœnam, 64 A, passio, 115 C, crux per navim figurata, 240 D, apparitiones post resurrectionem, 357 A, pax, 76 C', 91 A,

- jugum suave, 472B. — Illi quomodo testimonium perhibuerit Spiritus Sanctus, 72C et s. — Christus quærendus, 247A et s., et audiendus, 248A'. — Ejus consilia, 662D et s., et varia documenta, 347B', 381C et s., 382D et s., 385B et s., 392D et s., 467D et s. — Quam fructuosum sit ejus sermonem servare, 89C et s. — Christus imitandus, 238C', 247A', 263A, 286B', 351C et s., 536C, 554B, 612A, 639A et s., 642A. — Ipsius caritas erga homines, 435A', 488C, 628A', 639C, etiam inimicos, 343A, 352A, misericordia, 278D', 402B' et s., 589A', veritas, 610D et s., sapientia, 404C, 644C', humilitas, 263A, 363A, 640D', paupertas, 450B', obedientia, 641A', patientia, 602A. — Unio cum Christo, 411A', 475A. — *Cf.* Deus, Incarnatio, Verbum.
- CHRYSOSTOMUS (S.), 45D, 42B, 407C', 433C, 441B', 448A', etc. — Consuevit subditos interrogare de prædicationibus suis, 238B.
- CIBUS moderandus, 294A, præsertim religionis, 304D', 328B, 355A', 434B, 561B. *Cf.* Abstinencia, Sobrietas.
- CINGULUM monachorum, 659B.
- CIRCUMSPECTIO, 62C, 545C'. *Cf.* Discretio.
- CISTERCIENSIS Ordo. Allegatur liber de Viris illustribus hujus Ordinis, 387A — Cisterciensis quidam monachus quare in purgatorio detentus, 38A'.
- CLEMENS (S.) Papa et martyr, 455C, 471C, 573B'. — Adhæsit primum S. Barnabæ, 239A, deinde S. Petro, 239A'. — Ejus miracula, 239B'.
- CLIMACUS (S. Joannes), 39D', 40D, 41A', 42A, 43A, C, B', 46D, 448C', 451A, A', 491A', 222B', 264D', 265A, 267B', 288B', 312A, 328A', 350B, 351A, 355C, 372D, 374A, 376A, 475C, 476C', 477C', 478B, 480C', 500C', 501B, 517B', 520A, 536B', 537C, B', 539C, B', D', 540A', 603D, 619A, 638D, 640C, 653C', 660C, 661C, 663D', 664A'.
- COELUM adspiciendum, 386B', et desiderandum, 438D', 652C. — In cœlis est conversatio perfectorum, 606D et s. — Cœli gaudia. *Vide* Beatitudo.
- COENA corporalis, 459D, spiritualis, 460C', infernalis, 461C', cœlestis, 462B'. *Cf.* Convivium.
- COENOBITÆ unde orti, 655C'.
- COGITATIONES qualiter moderandæ, 642B', 643B, 654A.
- COLLOQUIA vitanda, 231C'.
- CONCORDIA bona et mala, 229C, 242B', 243A. *Cf.* Caritas, Unitas.
- CONCUPISCENTIA sensitiva et intellectiva, 316A. — Carnalis concupiscentia, 327C. — *Cf.* Caro, Corpus.
- CONDEMNATIO proximi vitanda, 205A, 245C.
- CONFESSIO religiosorum quomodo facienda, 433D et s.
- CONSIDERATIO, 417D.
- CONSILIUM. Donum consilii, 281A'. — Consilia evangelica, 325B', 662D et s. — Consiliarius eligendus, 414D.
- CONSOLATIO spiritualis, 289B', 370D.
- CONSORTIA pravorum fugienda, 384B', 393B'.
- CONSTANTINOPOLITANA Ecclesia, 400C.
- CONSTANTINUS Magnus, 26B'.
- CONSUETUDO mala, 394B, 430A.
- CONTEMPLATIO, 253C, 289B', 597B'. — Variæ ejus species, 418B, 422A et s. — Oratio ad illam pertinens, 65C, 66C. — Exemplum contemplationis, 413A'. — *Cf.* Theologia.
- CONTEMPTUS rerum terrenarum, 484C. *Cf.* Creatura.
- CONTENTIO, 243D'.
- CONVERSIO in Deum per legem evangelicam edocta, 60A. — Conversio mundi ad fidem, 57D, 358C'. — Quomodo peccator convertatur, 486C, D', 468A' et s. — Conversio non differenda, 473B, 486C'. — Exempla conversionis, 487B, 282B', 384B, 387A, 393D, 409B', 470A', 574C.
- CONVIVIUM Christi quid sit, 280D et s. — Convivia splendida quam nociva, 280B. — *Cf.* Cœna.
- COR Deo præparandum, 447B, 448A. — Cordis custodia, 573B. — Cordis humani malitia, 619D. — *Cf.* Anima.
- CORPUS quam vile, 375C. — Exercitia spiritualia impedit, 538B'. — Qualiter tractandum, 446D et s., 293D et s., 322C. — *Cf.* Caro, Sensualitas.
- CORRECTIO vel Correptio fraterna, 575D, 594A et s., ordinate facienda, 247A', 223C, 438A', 442D, 456A et s., et suscipienda, 330B', 331B, 500C', 537A, 620B. — *Cf.* Incepciones.
- CORRUPTIO corporalis et spiritualis, 425A.
- CREATURA quantum distet a Deo, 184C, quem manifestat, 287D'. — Creaturæ pro Creatore abjiciendæ, 663A'.
- CRUELITAS a quodam tyranno punita, 416B.
- CRUX Christi per navim designata, 240D. — Ejusdem inimici, 608C.

CURIOSITAS, 371 A, 437 A', 498 D.

CUSTODIA cordis, 573 B.

CYPRIANUS (S.), 179 C, 390 B.

CYRILLUS (S.), Alexandrinus episcopus, 204 C, 222 B'.

D

DÆMON vel Diabolus, 78 B, apparet in specie angeli, 339 A', 351 A, imo ipsius Christi, 339 B', 351 D. — Dæmonum potentia, 565 B', et malignitas, 34 C', 176 A, 526 C, 573 B, 579 C, speciatim contra moribundos, 347 B, 354 C'. — Dæmones repellendi, 139 C', 176 C, 179 A, 581 D. — Parochiani diaboli, 133 D. — Frater quidam a dæmonibus deceptus patrem suum occidit, 339 C'.

DAMASCENUS (S.), 2 B, 17 C', 30 C, 136 D, 462 D'.

DAMNATI. Eorum dispositiones, 136 D, et pœnæ, 133 D', 534 C. *Cf.* Infernus.

DANIEL propheta. Ejus fidelis obedientia, 628 B'.

DAVID peccans fragilitatem humanam denotat, 578 C.

DECIMÆ, 614 D.

DEFECTUS aliorum portandi, 455 B', 485 B'.

DELECTATIO vitiosa, 315 C.

DEMOPHILUS monachus, 259 C', 267 A'.

DESIDERIUM cœli, 138 D', et spiritualis profectus, 426 B'. — Desideria carnalia, 431 C et s.

DETRACTIO, 171 D, C'.

DEUS caritas est, 125 A, 144 A, 145 A', actus purus, 18 B', immutabilis, 2 A. — Ejus essentia, 17 A', perfectio, 407 B', pulchritudo, 405 A, 651 C, longitudo, latitudo, sublimitas et profundum, 462 D, 464 D, bonitas, 11 C, 81 C, 129 A', 407 C, 651 C', misericordia, 203 A, 261 A et s., 269 B', 277 B et s., 471 A, 555 A, 592 C, 599 C, dilectio erga homines, 127 D, 194 C et s., 568 C, 647 D', beneficia, 12 A, 408 B. — Ab illo sunt et conservantur universa, 19 A. — Ejus præcepta, 615 A et s., et judicia metuenda, 142 D'. — Dupliciter cognoscitur, 122 B'. — Oportet illi corda præparare, 447 B, 448 A, ejus memoriam servare, 168 D', et præsentiam revereri, 399 A, 495 C, 582 B'; illi appropinquare, 184 C et s., 192 A et s., et servire, 189 D', 273 A et s., 285 A, 295 D, 350 A, 447 B et s., 623 B', 628 B; ipsum diligere, 130 C, 660 D', et se in Deo diligere, 164 C'; ejus amicitiam acquirere, 324 D et s., et voluntatem sequi, 169 B; in illo delectari, 518 B', confortari, 567 A et s., 577 D et s., fiduciam ponere, 33 B et s.; ad eum in tribu-

latione confugere, 386 B', ipsique inhærere, 642 C. — Quare sit amandus, 289 D, 519 B'. — An odio possit haberi, 444 B'. — Peccata contra amorem illi debitum, 615 A. — Gratitude illi exhibenda, 504 C et s., 614 C'. — *Cf.* Christus, Spiritus, Trinitas.

DEVOTIO, 66 D' et s. — Devoti impetrant conversionem peccatorum, 468 D', 470 A'.

DIES omnis velut ultimus ordinandus, 480 B'.

DILECTIO, 65 C', 591 B', spiritualibus patribus debita, 623 C. *Cf.* Caritas.

DIOGENES, 179 B'.

DIONYSIUS (S.) Areopagita, 32 C, 57 B, 74 B', 78 D', 92 A', 96 C, 122 B', D', 129 A', 162 D, 176 A, 215 D', 234 A, 259 B, C', 267 A', 314 A', 336 A, 418 A, 497 D', 657 A, 658 A.

DIRECTIO quærenda, 139 D.

DISCORDIA vitanda, 243 D, 485 C'.

DISCRETIO, 51 B, 558 B et s. — Discretio spirituum, 337 D, 339 A', 351 A. — *Cf.* Prudentia.

DIVITIÆ quo sensu dicantur « mammona iniquitatis », 321 B'. — Divitiarum contemptus, 141 A', 327 A', 450 B et s. — Divitiæ spirituales, 506 B', 516 A. — Dives epulo, 131 C et s., 141 A et s., 149 A et s., ejusque imitatores, 142 B'. — *Cf.* Avaritia.

DOMINICUS (S.), institutor Ordinis Fratrum Prædicatorum, 506 D'.

DONA Spiritus Sancti, 281 B et s.

DULAS abbas, 46 B', 512 A.

DUPLICITAS, 301 C. *Cf.* Hypocritæ.

DURANDUS (Campanus), 222 B.

E

EBRIETAS, 547 B.

ECCLESIA militans figurata per navim, 239 C, 529 A et s., et per Jerusalem, 347 A'. — Ejus pulchritudo, 350 B', deformatio, 352 B', murus triplex, 530 A'. — Ecclesia primitiva, 655 D', 656 C, 657 A. — Ecclesiæ patriarchales, 100 B. — Ecclesia triumphans, 553 D'. — Ecclesia (id est templum) ad quid Deo consecrata, 347 D'.

ECSTASIS, 92 A'.

ELEAZARUS, typus fortitudinis, 532 A'.

ELECTI. Quam fructuosæ illorum tribulationes, 149 A et s., 154 C', 167 A, 200 A et s., 219 C, 228 B, 296 A, 463 D, 474 C, 497 A, 573 A'. *Cf.* Tribulationes.

ELEEMOSYNA quare facienda, 212 C'. *Cf.* Misericordia.

ELIAS abbas, 43 C, 426 B, 355 C.
 EPHREM (S.), 86 B'.
 EPICTETUS presbyter et martyr, 409 B', 410 A'.
 EPIPHANIUS (S.), episcopus Cypri, 262 C'.
 EPISTOLA ad Fratres de Monte Dei, 288 B'.
 EREMITA quidam sanctus allegatur contra iram, 259 D.
 EUCHARISTIA, 287 C. — Monachus de illa tentatus liberatur, 360 B. — Cuidam iudici miraculose datur, 613 B'. — *Cf.* Missa.
 EUPHRASIA (S.), 554 D.
 EUSEBIUS, Cæsariensis episcopus, 630 A, 632 A.
 EUSEBIUS, Emisenus episcopus, 288 B', 355 B, 663 D'.
 EUSTACHIUS (S.), 573 B'.
 EVANGELISTÆ quatuor, 99 D.
 EXEMPLA mala non sequenda, 473 C. — Narrantur exempla conversionis, 187 B, 282 B', 384 B, 387 A, 393 D, 409 B', 410 A, 470 A', 574 C, pœnitentiæ, 46 C', 43 D', 406 B', 478 B, 540 D' et s., mortificationis, 399 A', 548 A, 569 C', abnegationis, 264 D, laudabilis luctus, 344 D', 345 B', divitiarum contemptus, 327 A', 453 A, humilitatis, 275 B, 304 B, 423 A, 526 D', orationis, 46 B', contemplationis, 413 A', castitatis, 608 C', 633 B, 649 A', patientiæ, 451 B, 491 A', 573 C', 593 B', fortitudinis, 318 A', caritatis fraternæ, 217 D', 232 A', 262 C', 280 A', 348 A', zeli apostolici, 463 A, hospitalitatis, 52 C', 210 B', obedientiæ, 628 B', silentii, 6 D', 41 A', 385 A', 422 D', perfectionis monasticæ, 240 D', 554 D, mortis sanctæ, 301 B, 588 A', 596 C'.

F

FAMA bona quærenda, 453 C', 454 C.
 FEBRIS spiritualis, 572 A et s.
 FERVOR in Officio divino, 563 B'.
 FESTA quomodo observanda, 615 A'.
 FIDES, 128 C, 129 B, 440 B, 630 D. — Ejus argumenta, 55 C et s., 58 B et s., 63 D, 113 C, 339 C, 358 B et s., 369 C et s., 440 B' et s. — Scutum fidei, 582 B.
 FIDUCIA, 33 B et s., 425 C'.
 FINIS operis et operantis, 54 D'. — Finis generis humani, 651 A et s.
 FORNICATIO, 313 C, 317 B, spiritualis, 329 C.
 FORTITUDO, 567 A et s., 577 D et s.
 FRANCISCUS (S.), 289 D, 453 A', 581 B.
 FRATERNITAS christiana, 231 A, 245 A. *Cf.* Caritas.
 FURTUM, 616 B.

G

GABRIEL (S.) archangelus adfuit cuidam peregrino morienti, 301 B.
 GAUDIUM spirituale, 422 B. — Gaudium Beatorum. *Vide* Beatitudo.
 GLORIA vana, 440 D' et s., 454 D, 457 D'. *Cf.* Superbia.
 GLOSSA, 70 A', 292 D, A', 360 A, 364 A'.
 GODEFRIDUS de Bolonia, rex Jerusalem, 526 D'.
 GORRA (Nicolaus de), 134 C, 160 C.
 GRATIA, 272 A'. — Ejus necessitas, 577 D et s. — Gratiae gratum facientis dignitas, 283 A, et signa, 152 B. — Gratiae gratis datæ, 335 B', 336 A'. — Gratiarum actio, 44 A', 515 B, 562 B.
 GRATITUDO pro beneficiis Dei, 504 C et s., 614 C'.
 GREGORIUS (S.) Magnus, 3 D', 5 A', 6 B, 15 C', etc. — Ejus tres amitæ, 577 A.
 GREGORIUS (S.) Nazianzenus, 27 D.
 GREGORIUS (S.) Nyssenus, 160 B'.
 GUILLELMUS (S.) quomodo pœnitentiam egerit, 46 C'.
 GUILLELMUS Antisiodorensis, 84 D', 306 D', 658 A.
 GULA, 142 A, 147 A et s.

H

HABITUS monachorum, 658 D' et s.
 HADRIANUS (Ælius), 341 D.
 HALES (Alexander de), 224 D'.
 HAYMO, Halberstatensis episcopus, 99 C'.
 HELLADIUS abbas, 569 C'.
 HENRICUS, cognatus regis Franciæ, 387 A, fit monachus Cisterciensis, 387 B, et episcopus, 387 C'.
 HIERONYMUS (S.), 15 D, 99 B', 126 B, 146 D', 172 A, etc. — Ejus Regula, 20 B', 39 C. — Ejus gesta et virtutes, 43 D', 143 B', 405 A', 485 B, 499 D.
 HILARION (S.), 262 C', 354 C, 581 B, 618 C.
 HILARIUS (S.), 18 B, 100 A.
 HOMICIDIUM, 615 C', multiplex, 155 C, 171 C. — Utrum gravius odio, 170 A.
 HOMO, qui lignum seu arbor vocatur, 529 C', quo sensu distet a Deo, 184 C et s., a quo beneficia multa accepit, 12 A, 64 D, 81 C' et s. — Quomodo ad finem suum se regere debeat, 322 A et s., 494 B. — *Cf.* Anima.
 HOROLOGIUM æternæ sapientiæ (Henrici Suso), 480 A.
 HOSPITALITAS, 52 B'.

HUGO (S.), Gratianopolitanus episcopus, 344 D'.
 HUGO (S.), Lincolnensis episcopus, 29 B'.
 HUGO de S. Victore, 6 A, 29 B, 39 B, 41 B', 66 D',
 82 B, 105 C', 245 D, 289 C, 350 D, 434 C', 437 A',
 442 B.
 HUMILITAS, 175 A, 245 D', 362 A, 370 B', 484 B',
 488 C, 493 C', 495 C', 499 C, 547 C', 576 B',
 617 B', 631 D. — Ejus motiva, 174 B, 177 B,
 374 C et s. — Humilitas Christi, 363 A.
 HYDROPICUS peccatorem significans, 490 B et s.
 HYPOCRITÆ, 296 C, 298 C et s., 310 B et s.,
 437 B, qualiter dignoscendi, 307 D et s. —
 Mors cujusdam hypocritæ, 300 D'.

I

IDOLOLATRÆ quinam efficiantur, 316 D', 328 D'.
 IGNATIUS (S.), episcopus Antiochenus et mar-
 tyr, 189 A'.
 IGNORANTIA vitanda, 627 D.
 ILLUMINATIO divina, 627 B'.
 IMMISERICORDIA, 142 A', 209 B'.
 IMPEDIMENTA salutis, 555 A' et s.
 IMPII quam ingrati erga Deum, 83 B, et quo-
 modo regendi, 635 C'. — Eorum excæcatio,
 188 D', 346 B, et pœnæ, 347 A. — Impius qui-
 dam quare solenniter sepultus, 296 A. — Cf.
 Iniquus.
 INCARNATIO Verbi, 123 A', 196 B, 552 C, 562 D',
 647 D'. Cf. Verbum.
 INCONSTANTIA, 537 A'.
 INCREPATIONES religiosis utilissimæ, 150 B',
 540 A', qualiter ab ipsis accipiendæ, 22 C'.
 Cf. Correctio.
 INDURATI, 576 A.
 INFERNUS, 133 B', 161 C', 492 A, 534 C. Cf.
 Damnati.
 INGRATITUDO, 506 B.
 INIMICI. Caritas erga illos, 343 C, 352 C. —
 Fugiendæ inimicitiae, 421 D'.
 INIQUUS per surdum et mutum designatus,
 383 A et s. Cf. Impii.
 INJURIÆ dimittendæ, 205 C, 215 D, 591 A et s.,
 599 C et s., 602 A et s., et sustinendæ in
 spiritu pœnitentiæ, 539 C'.
 INNOCENTES an pœnitentibus præferendi,
 182 A'.
 INNOCENTIUS, monachus patientissimus, 191 A'.
 INSTABILITAS mentis qua arte curanda, 641 D
 et s.
 INTEGRITAS spiritualis, 425 B et s.
 INTELLECTUS, donum Spiritus Sancti, 55 C',
 281 D.

INTIMORATI, 555 B'.
 INVIDIA, 14 D', 170 D, 442 A, 455 A, 490 B',
 498 A.
 IRA, 6 B, 21 C, 255 A, 257 A et s., 265 B et s.,
 421 A', 523 A', 537 B. — Ira laudabilis, 257 A',
 265 C'.
 ISIDORUS (S.), Hispalensis episcopus, 51 B, 61 A,
 245 C, 317 D', 331 D, 442 D', 558 B', 596 D.

J

JACOBUS (S.) Minor, apostolus, 357 C.
 JACOBUS de Voragine, 84 D'.
 JAIRUS archisynagogus, prælatus figurans,
 635 A. — Ejus filia suscitatur, 629 A et s.,
 633 D et s.
 JEREMIAS cruciatus, 557 C', et occisus, 557 D'.
 JERUSALEM a Romanis obsessa et vastata,
 340 D', 341 D. — Ecclesia Jerosolymitana,
 100 B.
 JOANNES (S.) apostolus, 100 A, quatuor mor-
 tuos suscitavit, 57 D.
 JOANNES eremita, 90 B, 399 A'.
 JOANNES, Bossinensis episcopus (auctor Sum-
 mæ confessariorum), 222 B.
 JORAM rex. Ejus crimina, 494 B', et punitio,
 494 C'.
 JOSEPH filius Jacob, exemplar castitatis, 608 C'.
 JUDÆI. Illorum excæcatio, 398 A, 411 C, et pec-
 cata, 489 B.
 JUDAS Galilæus, 609 C'.
 JUDICIUM multiplex, 220 D, 223 C'. — Judi-
 cium divinum, 534 A. — Judicium faciendum,
 203 A', 214 A, 649 D, vel licitum, 225 A. — Ju-
 dicium suspiciosum, 204 A', 222 B. — Judi-
 cium temerarium, 117 D', 204 A, 214 C', 221 C,
 224 C, religiosis specialiter vitandum, 223 A.
 JULIANUS Apostata, 632 B.
 JURAMENTUM, 586 C', 615 C.
 JUSTITIA, 581 D', 612 C' et s., 648 C'. — Justi-
 tia originalis, 293 D.

L

LACRIMÆ monachorum, 661 D'.
 LARGUS, Sarracenus ad fidem catholicam con-
 versus, 380 C'.
 LATRIA, 193 A.
 LAUS humana contemnenda, 302 D.
 LAZARUS mendicus, 132 A et s., 149 A et s.
 LEO (S.) Papa, 91 A', 176 B, 211 D', 230 A, 331 D',
 338 A', 360 A, 583 D. — Quomodo gratiam
 castitatis impetraverit, 35 C'.

LEPRA peccati mortalis, 428 B et s. *Cf.* Peccatum.

LEX Mosaica, 377 B', 379 A et s., 388 B et s., 395 C' et s. — Lex evangelica quam sancta et perfecta, 25 A', 59 B' et s., 377 A', 378 D et s., 388 A et s. Ad illam observandam quantum obligentur Christiani, 28 B, praesertim religiosi, 64 B.

LIBER vitae, 606 A'. — Liber de Causis (David Judæi), 336 D, de Profectu religiosorum (David Augustani), 258 B, 288 B', de Sphæra (Maschaallah Arabi), 233 D', de Viris illustribus Ordinis Cisterciensis (id est Exordium magnum Ordinis Cisterciensis), 387 A. — Liber Vitaspatrum, 3 D, 243 C', 247 C', 288 B', 296 A, 300 C', 304 A, 341 D', 318 A', 327 A', 339 C', 345 B', 385 A', 399 A', 422 D', 431 B, 443 A', 465 B, 534 D', 569 B, C', 649 B'. (*Migne Patrol. lat.* tom. 73 et 74.)

LIBERALITAS, 245 D'.

LIBYA, 74 C.

LINGUA frenanda, 49 D, 26 B, 29 A, 38 D et s., 87 D, et dirigenda, 73 D', 87 C' et s., 394 C, 546 B. — Lingua Hebræa, 73 C'.

LONGANIMITAS in spe, 422 A'. *Cf.* Patientia, Spes.

LORICA justitiæ, 581 D'.

LOT hospitalitati deditus, 52 C'.

LUCAS (S.), 400 A.

LUCTUS laudabilis multiplex, 344 D et s.

LUXURIA, 45 B', 457 D', 466 B, 317 B, 491 A'. — Luxuriosus in inferno punitus, 492 A.

LYRA (Nicolaus de), 434 C.

M

MACARIUS (S.) abbas, 240 D', 345 B', 480 B'.

MACROBIUS, 453 C.

MAHOMETUS. Ejus doctrina, 359 B, 379 D, 479 B.

MALITIA manifesta, 557 B.

MALUM. De apertis malis utrum liceat judicare, 225 A.

MAMMONA iniquitatis, 326 C. *Cf.* Divitiæ.

MANSUETUDO, 485 C.

MARCUS (S.), 400 A. — Sub illo floruit Ecclesia Alexandrina, 656 C.

MARIA (S.) Ægyptiaca, 307 A.

MARIA (S.) Magdalene, 307 A.

MARIA, filia Abrahæ eremitæ, 406 B'.

MARTINUS (S.), 429 D, 433 C, 436 D', 289 D, 339 B', 618 C.

MARTYRIUS, « monachus sanctus », 348 A'.

MATTHÆUS (S.), 99 A' et s.

MELANCHOLICI, 470 B', D'.

MEMBRA in bonum adhibenda, 284 D.

MENAS, « vir sanctus », 264 D'.

MENDACIUM, 525 C, 536 C'.

MICHAEL (S.) adfuit cuidam peregrino morienti, 304 B.

MIRACULUM, 404 B'. — Miracula novi Testamenti, 650 C', Christi, 56 D', 441 A, Apostolorum, 57 C, 441 B. — Narrantur diversa miracula, 60 C, 436 D', 243 C', 507 A', 542 A', 636 B', 650 A'.

MISAEEL ab igne præservatus, 646 D'.

MISERICORDIA, 243 D. — Misericordia Dei, 203 A, 264 A et s., 269 B', 277 B et s., 471 A, 555 A, 592 C, 599 C. — Opera misericordiæ, 27 A, 29 D, 52 C, 207 D et s., 244 A et s., spiritualia, 334 B', 339 A, 438 A', 442 D, 456 A et s.

MISSA quomodo celebranda, 435 C. *Cf.* Eucharistia.

MODESTIA, 231 B, religiosis commendatur, 245 C.

MONACHUS verus, 350 B, 660 C et s. — Quatuor genera monachorum, 655 A et s. — Consecratio monachorum in primitiva Ecclesia, 657 A et s. — Monachi quare detondeantur, 657 C', et quid significet illorum habitus, 658 D' et s. — Monachorum quorundam mira pœnitentia, 540 D et s. — *Cf.* Religiosus.

MONICA (S.), mater S. Augustini, 383 C'.

MORS timenda, 477 B, non tremenda, 477 C'. — Memoria mortis, 476 C' et s., 479 C et s. — Mors justorum, 304 B, 588 A', 596 C'. — Mors peccatorum, 300 D', 473 C'.

MORTIFICATIO corporis, 446 D et s., 293 D et s., sensuum, 284 A', 294 A', 322 B', 334 B, affectionum, 459 A. *Cf.* Caro, Corpus, Pœnitentia.

MOYSES. Ejus lex, 377 B', 379 A et s., 388 B et s., 395 C' et s.

MOYSES abbas, 247 D', 264 D, 559 B, D', 561 C, 653 C.

MULIER a sanguinis fluxu curata, 629 C', 634 D'.

MUNDUS quare vocetur « mare », 531 A'. — Mundi conversio ad fidem, 57 D, 358 C', et futura innovatio, 498 C'.

MURMURATIO, 344 A, 347 A', 330 A et s.

MUTIUS abbas, 477 D', 478 A.

N

NABAL, 440 B'.

NAVICULA Petri, 239 C et s. — Navicula re-

ligionem christianam figurans, 538A et s.
 NEGLIGENTIA, 556A, 563A'.
 NICODEMUS (S.), 103D' et s., 113C et s.
 NOVISSIMA quatuor, 533D'.
 NUPTIÆ quinquepartitæ, 552B et s. — Nuptiæ spirituales, 499B, 553A.

O

OBEDIENTIA, 613D', 622A.
 OBLATIONES, 262C, 614D. — Reconciliatio ante oblationem facienda, 268B et s.
 OBSECRATIO, 44A.
 OBSTINATI, 557B.
 OCTAVIANUS imperator, 646B.
 OCULI Christum contemplantes, 412A et s. — Mortificatio oculorum, 569C'.
 ODIUM proximi, 169D et s.
 OFFICIUM divinum qualiter persolvendum, 434C', 563B'.
 OPERA bona a Deo sunt, 586B. — Opera misericordiæ. *Vide* Misericordia.
 ORATIO. Ejus species, 43D', 46D', motiva, 34A', 41C, 51C, conditiones, 30B, 35B, 42D, 44C, 46C', efficacia, 43A', 468D'. — Attentio requisita ad orationem, 44C'. — Unanimitas in oratione, 242A. — An oratio debeat esse diuturna et verbis prolixa, 46C. — Oratio ad contemplationem pertinens, 66C. — Oratio prælati pro subditis, 625A et s., 626C et s., 636D et s. — *Cf.* Contemplatio, Suffragia.

P

PACOMIUS (S.), 393D, 470A', 548A.
 PALÆMON (S.), 548A.
 PAMBO abbas, 87C', 422D'.
 PANES septem a Christo multiplicati quid significant, 281B et s., 285C et s.
 PAPHNUTIUS abbas, 371B.
 PARIS, 405B.
 PASSIO Christi, 115C.
 PASTOR abbas, 41B', 275B, 559C'.
 PATER æternus, 101D', 120D, 474C'. *Cf.* Deus, Trinitas.
 PATIENTIA, 612B, in adversitatibus, 190C, 231A', 485D, 496B, 618C. — Patientia religiosi commendatur, 246A, ut probatrix virtutum, 496B'.
 PAULUS (S.) apostolus quomodo imitandus, 617B et s. — Ejus humilitas, 357A', 359C', 617D, patientia, 618A, caritas, 618A'.

PAULUS (S.) primus eremita, 656B, A'.
 PAUPERTAS Christi, 450B', et Sanctorum, 453A. — Pauperes sublevandi, 155C', 160D.
 PAX Christi, 76C', 91A. — Pax carnalis, 354D.
 PECCATUM, 16D, 112B', 185B', ex triplici radice oritur, 185D'. — Peccati originalis vulnera, 567B'. — Peccati mortalis enormitas, 553A', et effectus, 385B', 406C, 416B', 428B et s., 471B', 572A et s., 632D, 635C et s. — Peccati consuetudo, 186B, B'. — Peccata dimissa an redeant in recidivante, 590C', 600D. — Vitanda peccata etiam venialia, 414A. — Deffenda peccata propria, 344D, et proximorum, 344A'. — Ad peccandum non fiat provocatio, 441C'. — Peccatores per leprosos designati, 428B, 430A', et per suscitatos a mortuis, 468C et s. — An peccator debeat orare, 30C', qua via ad Deum redeat, 186C, D', 383A' et s., et quibus causis retardetur, 471D et s. — De conversione peccatorum quomodo gaudeant angeli, 182B. — Quanta sit Dei misericordia erga peccatores, 277B', 278B'. — *Cf.* Vitia.
 PELAGIUS hæresiarcha, 577D.
 PENTECOSTE, 68A et s., 86D. *Cf.* Spiritus Sanctus.
 PERFECTUS per navim significatus, 529C. — Perfectorum caritas, 415D.
 PERSECUTORES Apostolorum et martyrum, 54C'.
 PERSEVERANTIA, 114C'.
 PERTINACIA, 436B'.
 PETRUS (S.) ordinavit S. Clementem suum in papatu successorem, 239A'. — Ejus humilitas, 235A, prædicatio, 79A et s., sententia de homicidio, 155C, 171C. — Quid figuret ejus navicula, 239C et s.
 PETRUS (S.), Ravennensis episcopus, 133B.
 PHÆDO, 479D', 480A, 538B'.
 PHILO, Judæus scriptor, 656C.
 PIAMMON abbas, 655D, C', 656D.
 PLATO, 479A' et s., 538C'.
 POENITENTIA, 252C', 279D, 531D, per navim figuratur, 240B, 539C. — Pœnitentes utrum innocentibus præferendi, 182A'. — Monachorum quorundam mira pœnitentia, 540D et s. — *Cf.* Mortificatio.
 POLYCARPUS (S.), 57B.
 POMPEIUS, 609C'.
 PORTITORES quatuor paralytici varia significant, 533A et s.
 POSTULATIO, 44A'. *Cf.* Oratio.
 PRÆCEPTA Dei, 615A et s.

PRÆDESTINATIO, 75B.

PRÆDICATIO quomodo audienda, 236C et s.
— Prædicatores, 458B, 234D, B'.

PRÆLATUS qualis esse debeat, 246A', 545B, erga delinquentes, 23C, 457B, 595D'. — Quis non eligendus in prælatus, 206C. — Prælatus malus, 332D', 492D', aut corde non rectus, 602C'. — Prælatus sapiens et sollicitus, 575B, pro subditis orans, 625A et s., 626C et s., 636D et s. — Prælati correctio quomodo accipienda, 500C'. — An liceat vitioso prælato alios corrigere, 247A. — Officia subditi erga prælatus, 458B, 622A et s. — Contra prælatos non murmurandum, 330B'.

PRIMITIÆ solvendæ, 262D.

PRINCIPATUS qualis appetendus, 494B.

PROCLUS Platonius, 336D.

PROFECTUS spiritualis, 438B, 440C, 450C', 485D, 252A, 279A', 284C, 288C', 345C', 345D, 623D', sapienter desiderandus, 426B', qualiter impediatur, 538A'. — Liber de Profectu religiosorum (David Augustani), 258B, 288B'.

PROPHETIÆ de Christo, 58B et s., 395A et s., 397C, 440C, 647C, 650B.

PROPOSITUM bonum, 254C.

PROSPER (S.), 447D', 332B, 442C'.

PROSPERITAS temporalis quam periculosa, 472B'. — Prosperitas impiorum funesta, 346B'.

PROXIMUS ædificandus, 453B', 583B, 648D'.
— Proximis compatiendum, 230A', 244D, 455B'. — *Cf.* Caritas.

PRUDENTIA, 50C, 60D et s.

PUGNA spiritualis, 252A'.

PURGATORIUM. Ejus poenæ, 38A', 348D, 477D.

PYTHAGORAS, 3D.

R

RAIMUNDUS (S.) de Pennafort, 217A.

RATIO, per quam regenda est anima, 333B, et cui submittenda est sensualitas, 295C, 322C', 420D', 421D, Deo subjiciatur, 295D, 323B. *Cf.* Anima, Homo.

RECONCILIATIO fraterna, 255C' et s., 261A et s., 268B et s. *Cf.* Caritas.

REDEMPTA, mulier sancta, 202C.

REFECTIO corporalis, 459D. *Cf.* Cibus, Cœna.

REGNUM Dei, 653C, primum quærendum, 446B', 452B'.

RELIGIO quid sit, 26D.

RELIGIOSUS qualem sollicitudinem habere debeat, 491A. — Religiosorum vocatio, 370B, 495A et s., 637D', 656C', vota, 662D et s., profectus, 450C', 263A et s., 623D', concordia, 242D', caritas, 409B, 445B, silentium, 20B et s., 21B', studium seu lectio, 288A', 516A', varia officia, 22C', 23D, 64D', 242D, 265B, 304D', 328B, 354C et s., 353A, 355A', 371A', 390B, 443C et s., 458B, 475B, 517B, 539A', 621C, 622A et s., 658B. — Religiosi quare tepescant, 353D et s., et quænam illis sint vitanda, 24D et s., 447C, 473C et s., 434B et s., 460A, 499B', 500B et s., 516D, 558B', 563A', 604B, 620D', 658A', 659C'. — Religiosus spiritualiter surdus et mutus, 390C et s., 393B. — Religiosi infidelis judicium, 353A'. — Religiosi quomodo debeant confiteri, 433D et s., se ipsos regere, 333C, et Spiritu Dei agi, 305D. — *Cf.* Monachus.

REMIGIUS (Antisiodorensis), 255C.

RENOVATIO animæ, 524C, 535C. *Cf.* Anima.

RENUNTIATIO, 663A, 664A. *Cf.* Abnegatio.

REPROBI. Miserrima eorum prosperitas, 149A et s.

REVERENTIA prælatis exhibenda, 623B. *Cf.* Prælatus.

ROMANI, 550A, 609C'.

ROMULA, discipula Redemptæ, 202C.

S

SACRAMENTA, 632D'.

SALOMON utrum poenitentiam egerit, 569A.

SALUS, 144B, a Christo procedens, 645A'. — Impedimenta salutis, 555A' et s. — Salus proximi sapienter procuranda, 583A.

SANCTITAS legis evangelicæ quomodo demonstratur, 59B' et s. *Cf.* Lex.

SAPIENTIA aquæ assimilata, 426B, A', 427B, caritati favet, 583A. — Sapientia, donum Spiritus Sancti, 423A, 281B, 325D', 386A, 394C, 574D et s., 654B'. — Sapientia, gratia gratis data, 336C'.

SARA abbatissa, 569D'.

SARABAITÆ, 655B, A', 656A'.

SARRACENI, 444A, 495D', 347A', 379D, 380C', 463D'.

SCANDALUM, 453C', 454C', 469D, 640B'.

SCIENTIA virtutibus jungenda, 27C. — Scientia, donum Spiritus Sancti, 281C', 587A'. — Sermo scientiæ, 336D'.

SCOTUS (Duns), 74B'.

- SCRIPTURA. Ejus multiplex sensus, 285 C et s., et septem effectus, 287 D et s. — Quomodo ex illa Deus cognoscatur, 287 D'.
- SCYTHI eremus, 240 D'.
- SEBASTIANUS (S.), 453 B.
- SENECA, 5 C', 61 D', 63 A', 167 B', 297 B, 333 A', 480 C', 603 B.
- SENIOR quidam perseverantiam in cella commendat, 451 A.
- SENSUALITAS rationi subjicienda, 295 C, 322 C', 420 D', 421 D, per sensuum mortificationem, 284 A' et s., 294 A', 322 B', 661 A'. *Cf.* Corpus, Mortificatio, Ratio.
- SERAPION abbas, 561 B.
- SERPENS æneus, 110 B, 115 B.
- SERVATIUS (S.), 573 C'.
- SEVERINUS (B.), Coloniensis episcopus, 348 D.
- SILENTIUM opportunum, 5 B'. — Silentium religiosorum, 20 B et s., 21 B', 40 A. — Silentium alicujus monachi prodigiose remuneratur, 6 D'.
- SILVANUS monachus, 393 D, 470 A'.
- SIMULATORES. *Vide* Hypocritæ.
- SISOIS abbas, 588 B, 636 A'.
- SOBRIETAS, 148 B', 178 C'. *Cf.* Cibus.
- SOCIETAS virtuosorum quærenda, 140 A.
- SOCRATES, 452 D'.
- SOL, imago Dei, 129 A'.
- SOLITARIUS aliquis quare a fera comestus, 296 A.
- SOLLICITUDO vitanda, 138 A', 445 C, 446 D, 450 D et s., 459 C'. — In Deum projicienda, 178 B, 190 A'.
- SOLON philosophus, 170 B', 455 B.
- SOMNUS qualiter moderandus, 294 C, 434 A'.
- SPES, 128 C, 129 B, 193 B'. — Ejus argumenta, 55 C et s. — Longanimitas in spe, 422 A'.
- SPIRITUS multiplex, 419 A. — Discretio spirituum, 337 D, 339 A', 351 A.
- SPIRITUS Sanctus. Ejus processio, 54 A, 102 A, 120 D', missio, 8 B et s., 23 D', 53 B, 68 A et s., 76 D, 82 C', 86 D, dona, 55 C', 281 B et s., fructus, 419 B', 422 B, 433 A. — Quomodo testimonium Christo perhibuerit, 72 C et s. — Quo sensu illo impleamur, 547 A', 560 C et s., illique assimilemur, 92 A et s. — Præparatio ad ejus visitationem, 64 D', 73 B', 545 C, 546 A. — Quibus signis dignoscatur ejus præsentia, 84 B et s. — Quænam impediunt ne ab hominibus suscipiatur, 11 A et s., 14 D et s., 87 D. — Qualiter deprecandus sit, 24 C. — Actuali ejus motione indigemus, quo sensu, 292 A, 305 A', 335 C, 338 C, 349 B. — Ab illo procedit omne bonum quod agimus, 349 B'. — *Cf.* Deus, Trinitas.
- STATUS incipientium, proficientium et perfectorum, 161 D. — Status diversi ad diversa obligantes, 486 A.
- STEPHANUS abbas, 596 B'.
- STEPHANUS anachoreta, 638 D.
- STOICI allegantur de passionibus, 260 A'. — Unus ex illis in tempestate turbatus, 260 B', quomodo se justificaverit, 260 C'.
- STUDIUM religiosorum, 288 A', 516 A'.
- SUBDITI quales esse debeant erga prælatos, 458 B, 622 A et s. *Cf.* Prælati.
- SUFFRAGIA Sanctorum et devotorum quam utilia, 383 D', 384 C. *Cf.* Devotio.
- SUPERBIA, 13 B', 157 D, 165 B, 173 B et s., 360 D, 361 D, 362 D et s., 376 D, 391 A', 439 A, 449 A, 459 A', 490 B, 500 B. — Ejus species diversæ, 173 D', 366 A et s., 371 C et s., et remedia, 373 A. — *Cf.* Gloria.
- SURDUS et mutus a Christo curatus, 381 A et s., 382 D et s., 385 B et s.
- SUSANNA, castitatis exemplar, 633 B.
- SUSPICIO vitanda, 204 A'.
- SYMPHRONIUS, præfectus Romæ, 509 C.
- SYNCLETICA (S.), 581 A.

T

- TACITURNITAS laudabilis, 5 B'. *Cf.* Silentium.
- TACTUS reprimendus, 294 D'.
- TEMPUS redimendum, 546 C.
- TENTATIO, 314 B', 318 B, 331 D. — Quomodo illi resistendum, 569 D. — Tentatio præsumptionis et desperationis quo pacto superata, 569 B. — Tentatus caritative tractandus, 443 A'. — Monachus a tentatione contra fidem Eucharistiæ liberatur, 360 B.
- TESTIMONIA Dei, 4 B.
- THEODORUS abbas, 464 A.
- THEODOSIUS imperator, 26 B', 90 C.
- THEOLOGIA mystica, 123 A. *Cf.* Contemplatio.
- THEONAS (S.) abbas, 561 B.
- THEOPHANIUS comes, 210 B'.
- THEOPHILUS (id est Theophylactus), 182 A, 217 A', 423 D, 571 A.
- THEOPHILUS, Alexandrinus episcopus, 422 D', 478 C'.
- THOMAS (S.) Aquinas, 26 D, 44 C', 45 D, 46 D, 66 D', 74 B', 82 D', 129 A, 134 B', 136 A', 170 B, D, 198 D', 203 B', 204 A', 217 A, D, 219 B, 222 B, 243 D, C', 335 B', 358 C, 359 A', 419 D', 436 D, 452 B, 622 B, 648 A.

TIBERIUS, 610 A'.

TIMOR multiplex, 126 C'. — Timor laudabilis, 273 A, 531 B, 573 A. — Timor vitandus, 146 A, 232 A, 573 D, 584 B. — Timor spiritualis laboris, 472 A. — Timor cujusdam anachoretæ ante mortem, 638 D.

TITUS, 340 D', 341 C, 550 A.

TRIBULATIONES Ecclesiæ, 530 A. — Tribulationes electorum, 463 B, quam fructuosæ, 149 A et s., 154 C', 167 A, 200 A et s., 219 C, 228 B, 296 A, 463 D, 474 C, 497 A, 573 A'. — Tribulationes per sapientiam mitigantur, 427 C. — *Cf.* Adversitas, Electi.

TRINITAS divina, 74 C', 75 A', 101 D et s., 110 D et s., 119 B et s. — Ejus beneficia, 64 D, 187 D, 196 B, 648 B, cognitio, 119 B, cultus, 102 D'. — *Cf.* Christus, Deus, Pater, Spiritus Sanctus.

TRISTITIA inordinata, 170 D.

TULLIUS, 229 C', 297 B.

TUNGRENSES, 573 C'.

U

UNANIMITAS in oratione, 242 A. *Cf.* Oratio.

UNITAS spiritus, 497 A'. *Cf.* Concordia.

V

VANITAS, 471 A'.

VERBUM æternum, 120 D. — Verbi incarnatio, 123 A', 196 B, 552 C, 562 D'. — *Cf.* Christus, Trinitas.

Verbum Dei audiendum, quare, 4 D, 21 A, et quomodo, 6 A', 236 C et s., 279 B. Idem implendum, 25 A, 89 C et s. — Verba quænam

proferenda, 49 A', vitanda, 231 C', 561 C', non audienda, 294 C'.

VERITAS vitæ, 620 A'.

VESPASIANUS, 340 D', 341 C, 550 A.

VIA purgativa, 148 A.

VIGILANTIUS, 409 D', 410 A.

VIOLENTIA laudabilis, 661 C.

VIRTUS quam suavis, 472 B. — Per virtutes qualiter Deo assimilemur, 192 D et s. — Virtutes theologicæ, 128 C. — Virtutum necessitas, 579 A', connexio, 597 A, profectus, 598 B, fructus, 580 A et s., 632 B'. — Virtutes quomodo colligendæ, 607 A'. — Virtuosum significat arbor bona, 303 C.

VISIO beatifica, 404 C' et s. — Visio de gaudiis et pœnis alterius vitæ, 465 A', de operibus hominum, 534 D'. — *Cf.* Beatitudo.

VISUS reprimendus, 294 B'.

VITA humana quam brevis, 149 A. — In novitate vitæ ambulandum, 263 A et s. — Veritas vitæ, 620 A'. — Liber vitæ, 606 A'.

VITÆ Patrum, seu Liber Vitaspatrum. *Vide* Liber.

VITIA quam deformia, 283 D. — Speciem virtutum assumunt, 301 D', 309 A. — Quomodo sint impugnanda, 564 C. — *Cf.* Peccatum.

VOCATIO christiana, 483 D et s., religiosa, 370 B, 495 A et s., 637 D', 656 C'.

VOLUNTAS Deo subjicienda, 295 A', 323 B'. *Cf.* Anima.

VOTA religiosorum, 662 D et s. *Cf.* Religiosus.

Z

ZACHARIAS monachus, 264 D.

ZELUS. Ira per zelum, 257 A', 258 C, 265 C'.

INDEX GENERALIS

DOMINICA QUARTA POST PASCHA.

Enarratio in epistolam : *Omne datum optimum et omne donum perfectum desursum est.* Jacob. i, 17-21 1

Sermo I. De testimoniis Dei et præceptis, auditioneque verbi Dei 4

Enarratio in evangelium : *Vado ad eum qui me misit.* Joann. xvi, 5-15. 7

Sermo II. De impedimentis quibus homines impediuntur a susceptione Spiritus Sancti 11

Sermo III. Qualiter invidia, luxuria, avaritia, ceteraque mortalia peccata impediant infusionem ac tollant inhabitationem Spiritus Sancti 14

Ad religiosos.

Sermo IV. De excellentia, munificentia et effectibus Dei. 17

Sermo V. De moderamine in loquendo et observatione silentii 19

Sermo VI. Qualiter Spiritus Sanctus per patres arguit negligentes religiosos . . 21

DOMINICA QUINTA POST PASCHA.

Enarratio in epistolam ; *Estote factores verbi, et non auditores tantum, fallentes vosmetipsos.* Jacob. i, 22-27 . . 25

Sermo I. De lege Christi servanda, lingua cohibenda, et caritate proximis impendenda 27

Enarratio in evangelium : *Amen, amen dico vobis, si quid petieritis Patrem in nomine meo, dabit vobis.* Joann. xvi, 23-30 30

Sermo II. Qualiter invocandus sit Deus, et de pietate ac pronitate ejus ad exaudendum 33

Sermo III. De pleno gaudio Beatorum, et de mediis quibus pervenitur ad illud . . 36

Ad religiosos.

Sermo IV. De reformatione et moderatione linguæ. 38

Sermo V. De orationis necessitate ac utilitate, si debite fiat. 41

Sermo VI. De oratione; et quomodo ad eam requiratur actualis intentio, et qualiter fiat ad impetrandum idonea; et an debeat esse diuturna et pluribus utens verbis 44

DOMINICA POST ASCENSIONEM DOMINI.

Enarratio in epistolam : *Estote prudentes, et vigilate in orationibus.* IPetr. iv, 7-11. 48

Sermo I. De prudentia, discretionem, orationem, caritatem et hospitalitatem, Christiano necessariis 50

Enarratio in evangelium : *Quum venerit Paracletus, quem ego mittam vobis a Patre, Spiritum veritatis,* etc. Joann. xv, 26, 27; xvi, 1-4. 53

Sermo II. De argumentis testimoniisque fidei christianæ 55

Sermo III. De fidei veritate et lege evangelica 58

Ad religiosos.

Sermo IV. De prudentia, et quæ ad eam necessaria requiruntur 60

Sermo V. De mysteriis christianæ fidei, et quid eadem operari in veris debeat religiosis 63

Sermo VI. De oratione et devotione ad contemplationem mysticamque theologiam pertinente. 65

IN DIE SANCTO PENTECOSTES.

Enarratio in epistolam : *Dum complerentur dies Pentecostes,* etc. Act. ii, 1-41. 68

- Sermo I. Quomodo Spiritus Sanctus perhibuit Apostolis et electis testimonium de Christo, et de cautelis servandis in loquendo 71
- Enarratio in evangelium : *Si quis diligit me, sermonem meum servabit*, etc. Joann. xiv, 23-34 74
- Sermo II. De prædicatione Apostolorum in die sacratissimo Pentecostes 79
- Sermo III. De caritate, pietate et liberalitate Dei circa homines, atque de negligentia, ingratitude perversitateque hominum erga Deum 81
- Sermo IV. De effectibus Spiritus Sancti in corde fidelium; qualiterque si in nobis Spiritum Sanctum, caritatem ejus ac gratiam habeamus, nosse possimus. 84

Ad religiosos.

- Sermo V. De eminentia sacrosanctissimæ solennitatis Spiritus Sancti, et de observandis in loquendo. 86
- Sermo VI. Quam sit salubre, fructuosum ac meritorium, verbum Dei nedum audire vel scire, sed opere quoque adimplere 89
- Sermo VII. Qualiter Spiritui Sancto per virtutes et dona sanctaque opera assimilari debemus. 92

DOMINICA SS. TRINITATIS.

- Enarratio in epistolam : *Vidi ostium apertum*. Apoc. iv, 1-10. 95
- Sermo I. De natura et essentia æternæ superbeatissimæque Trinitatis, et quales exigit cultores 101
- Enarratio in evangelium : *Erat homo ex Pharisæis Nicodemus nomine*. Joann. iii, 1-16. 103
- Sermo II. De infinita felicitate et gloria superdignissimæ Trinitatis, et de fideli ac humili contemplatione ipsius 110
- Sermo III. De certitudine christianæ fidei, et eadem quibus adornanda sit operibus. 113

Ad religiosos.

- Sermo IV. De spirituali significatione quatuor animalium, et de sex speciebus contemplationis, per sex alas animalium designatis 116
- Sermo V. De supergloriosissimæ Trinitatis vita, felicitate et gloria penitus infinita. 119

- Sermo VI. De speciebus contemplationis, et de mystica theologia 122

DOMINICA PRIMA POST TRINITATEM.

- Enarratio in epistolam : *Deus caritas est*. I Joann. iv, 16-21 125
- Sermo I. De commendatione et perfectione caritatis, qua Deus proximusque diligitur 128
- Enarratio in evangelium : *Homo quidam erat dives, qui induebatur purpura et bysso*. Luc. xvi, 19-31. 131
- Sermo II. Contra prosperitatem mundanam, et de contemptu hujus mundi. 137
- Sermo III. Contra imitatores divitis epulonis, et contra vitia ejus 141

Ad religiosos.

- Sermo IV. De divisionibus, habitibus effectibusque caritatis, quibusve operibus declarari debeat. 144
- Sermo V. De salubri corporis afflictione, triplicique via salutis, nempe purgativa, illuminativa et perfectiva 146
- Sermo VI. De impiorum miseriis periculosissimaque prosperitate eorum, et de beatitudine electorum. 149

DOMINICA SECUNDA POST TRINITATEM.

- Enarratio in epistolam : *Carissimi, nolite mirari si odit vos mundus*, etc. I Joann. iii, 13-18 152
- Sermo I. De præconio et conditionibus caritatis in Deum proximumque, et quomodo hæc filios Dei constituat. 153
- Enarratio in evangelium : *Homo quidam fecit cœnam magnam, et vocavit multos*. Luc. xiv, 16-24. 156
- Sermo II. De quadruplici cœna 159
- Sermo III. Contra tria principalia vitia, superbiam, avaritiam et luxuriam, de quibus in evangelio hodierno fit mentio. 163

Ad religiosos.

- Sermo IV. Adversa omnia forti animo esse ferenda, ut humilitas fraternaue caritas incolumes servantur; et Dei voluntas quomodo in omnibus præ oculis haberi debeat 167
- Sermo V. De enormitate fraterni odii, multiplicique homicidio; et contra de-

tractionis vitium	469
Sermo VI. De multiplici cœna, et tribus principalibus vitiis per quæ homines a divinæ cœnæ participatione præpediuntur	472

DOMINICA TERTIA POST TRINITATEM.

Enarratio in epistolam : <i>Humiliamini sub potenti manu Dei, ut vos exaltet</i> , etc. I Petr. v, 6-11	475
Sermo I. Quibus modis et mediis studere debeant fideles potentem Dei manum evadere, ejusque misericordia salutem consequi	477
Enarratio in evangelium : <i>Erant appropinquantes ad Jesum publicani et peccatores</i> , etc. Luc. xv, 1-10	480
Sermo II. Qualiter homines Deo variis modis debeant appropinquare.	484
Sermo III. De caritate et misericordia Dei angelorumque ad homines, et de miserorum hominum ingratitude	487

Ad religiosos.

Sermo IV. Quomodo omnis correptio, adversitas sive exercitatio, tanquam de manu Dei, benignissimi Patris, suscipienda ferendaque sit	489
Sermo V. Qualiter appropinquandum sit Deo	492
Sermo VI. De admirabili caritate et misericordia Dei ad homines.	494

DOMINICA QUARTA POST TRINITATEM.

Enarratio in epistolam : <i>Existimo quod non sunt condignæ passionēs hujus temporis ad futuram gloriam, quæ revelabitur in nobis</i> . Rom. viii, 18-23.	497
Sermo I. Quomodo liberalissimus Deus, electis suis pro tribulationibus operibusque bonis vitæ præsentis, præstat in patria beatitudinem ineffabiliter magnam	200
Enarratio in evangelium : <i>Estote misericordes, sicut et Pater vester cœlestis misericors est</i> . Luc. vi, 36-42	203
Sermo II. De misericordia operibusque misericordiæ corporalibus ac spiritualibus.	207
Sermo III. De eadem materia.	211
Sermo IV. De temerariis vitandis judiciis,	

de injuriarum remissione, ac de ordinato modo judicandi et corripiendi proximos	214
---	-----

Ad religiosos.

Sermo V. De incomparabili inæstimabili-que electorum beatitudine	218
Sermo VI. Qualiter non debeamus judicare; et de multiplici judicio.	220
Sermo VII. Quam faciat sibi terribilem judicem Deum, qui pronus est confratris sui dicta vel facta temere judicare.	223

DOMINICA QUINTA POST TRINITATEM.

Enarratio in epistolam : <i>Omnes unanimes in oratione estote</i> . I Petr. iii, 8-15.	226
Sermo I. De unanimitate, pace concordia-que fraterna; deque vitiosis vitandis colloquiis	229
Enarratio in evangelium : <i>Quum turbæ irruerent in Jesum, ut audirent verbum Dei</i> , etc. Luc. v, 1-11	232
Sermo II. Qualiter audienda sit prædicatio verbi Dei	236
Sermo III. Quænam sint turbæ, per Petri naviculam spiritualiter intellectæ, quas Christus Dominus docet	239

Ad religiosos.

Sermo IV. De unanimitate, pace et fraterna in bono concordia.	241
Sermo V. De caritate et compassione fraterna, aliisque virtutibus quæ maxime cœnositam decent	244
Sermo VI. Quam feliciter irruant in Jesum boni religiosi, quam felicissime autem atque deliciosissime veri contemplativi	247

DOMINICA SEXTA POST TRINITATEM.

Enarratio in epistolam : <i>Quicumque baptizati sumus in Christo Jesu, in morte ipsius baptizati sumus</i> . Rom. vi, 3-11.	249
Sermo I. Qualiter vita Christi est exemplar vitæ Christianorum	251
Enarratio in evangelium : <i>Nisi abundaverit justitia vestra plus quam Scribarum et Phariseorum, non intrabitis in regnum celorum</i> . Matth. v, 20-24	253
Sermo II. Qualiter liceat irasci, et qualiter non.	257

Sermo III. Qualiter debeamus nos proximis reconciliare. 261

Ad religiosos.

Sermo IV. Quomodo boni religiosi in novitate vitæ ambulantes, se virtutibus vitæ Christi conformare debeant. 263

Sermo V. De vituperio iræ, et mansuetudinis laude 265

Sermo VI. De reconciliatione facienda ante oblationem. 268

DOMINICA SEPTIMA POST TRINITATEM.

Enarratio in epistolam : *Humanum dico, propter infirmitatem carnis vestræ.* Rom. vi, 19-23 271

Sermo I. De gradibus timoris, et quomodo Deo serviendum corde perfecto atque verissimo 273

Enarratio in evangelium : *Quum turba multa esset cum Jesu, nec haberent quod manducarent,* etc. Marc. viii, 1-9. 275

Sermo II. De sex considerationibus ex quibus potissimum liquet immensitas misericordiæ Dei ad homines; et quomodo mentis desiderio audiendum sit verbum Dei, ipsique Christo adhærendum per triduum 277

Sermo III. De spirituali significatione convivii de quo in evangelio hodierno legitur, et de septem panibus quos Christus quotidie fidelibus suis apponit. 280

Ad religiosos.

Sermo IV. De virtutum splendore, gratiarum pulchritudine, et plerisque aliis religiosorum ornamentis 282

Sermo V. De panibus ac piscibus spiritualibus, quibus boni religiosi a Domino misericorditer pascuntur. 285

Sermo VI. De septem effectibus sacræ Scripturæ. 287

DOMINICA OCTAVA POST TRINITATEM.

Enarratio in epistolam : *Debitores sumus non carni, ut secundum carnem vivamus.* Rom. viii, 12-17. 291

Sermo I. Quomodo conandum cuilibet Christiano, ut ad originalis justitiæ conformitatem redeat 293

Enarratio in evangelium : *Attendite a fal-*

sis prophetis, qui veniunt ad vos in vestimentis ovium, etc. Matth. vii, 15-21. 296

Sermo II. Contra simulatores et callidos, contra deceptores atque hypocritas. 298

Sermo III. Quod discretio medium in omnibus desiderat, et ratio bene illuminata, bona operatur, nec falli facile potest. 301

Ad religiosos.

Sermo IV. De carnalibus vitiis evitandis et concupiscentiis refrenandis. 304

Sermo V. De vitanda hypocrisi et ficta devotione 307

Sermo VI. De hypocrisi et ficta devotione vitanda, variisque documentis religiosorum 310

DOMINICA NONA POST TRINITATEM.

Enarratio in epistolam : *Non simus concupiscentes malorum, sicut et illi,* etc. I Cor. x, 6-13. 313

Sermo I. De refrenandis iniquis peccatorum concupiscentiis, deque sinceris summi Dei cultoribus 315

Enarratio in evangelium : *Homo quidam erat dives, qui habebat villicum.* Luc. xvi, 1-9. 318

Sermo II. Quomodo quisque substantiam sibi a Deo commissam, corpus videlicet et animam, et quidquid ad se pertinet, fideliter dispensabit 322

Sermo III. De temporalium rerum pia et fidei dispensatione. 324

Ad religiosos.

Sermo IV. De inordinatis affectionibus et carnalibus concupiscentiis abjiciendis. 327

Sermo V. De murmuratione compescenda a bonis religiosis, et tentationum utilitate 330

Sermo VI. Quomodo religiosi in omnibus secundum rationem se regere, et sensualitatem refrenare debent. 332

DOMINICA DECIMA POST TRINITATEM.

Enarratio in epistolam : *Scitis quoniam quum gentes essetis, ad simulacra mutata,* etc. I Cor. xii, 2-11. 335

Sermo I. De ornatu Ecclesiæ membrorumque ipsius, et de certitudine fidei christianæ 338

- Enarratio in evangelium : *Quum appropinquaret Jesus Jerusalem, videns civitatem, flevit super illam.* Luc. xix, 41-47. 340
- Sermo II. De Christi caritate, pietate, compassione et lacrimatione; et qualiter Christo in his conformari debemus. 343
- Sermo III. De causa spiritualis excæcationis, et angustiis impiis superventuris; et demum quid in ecclesia materiali agendum sit, etc. 346

Ad religiosos.

- Sermo IV. De caritate, misericordia et liberalitate Dei ad homines; de insufficiencia quoque defectuositateque hominum. 349
- Sermo V. In quo cohortantur potissimum religiosi ne inaniter in prosperitate vel promotione gloriantur, et multiplicis visitationis a Domino Jesu sibi exhibitæ admonentur. 351
- Sermo VI. De causa quotidianæ ruinæ et defectionis religiosorum. 353

DOMINICA UNDECIMA POST TRINITATEM.

- Enarratio in epistolam : *Notum vobis facio Evangelium quod prædicavi,* etc. I Cor. xv, 1-10. 356
- Sermo I. De fidei christianæ firmitate, quæ non rationi humanæ, sed supernaturali operationi innititur; deque Mahometici erroris vanitate. 358
- Enarratio in evangelium : *Dixit Jesus ad quosdam qui in se confidebant tanquam justi.* Luc. xviii, 9-14. 360
- Sermo II. Contra superbiam et filias ejus. 362
- Sermo III. De quatuor speciebus superbiæ, et de humilitate, atque aliquot evangelii hujus documentis. 366

Ad religiosos.

- Sermo IV. De fidei certitudine, et humilitate. 369
- Sermo V. De quadam mirabili et occulta superbiæ specie. 371
- Sermo VI. De laude et origine humilitatis, et de vituperiis atque effectibus maledictæ elationis. 374

DOMINICA DUODECIMA POST TRINITATEM.

- Enarratio in epistolam : *Fiduciam talem habemus per Christum ad Deum,* etc.

T. 30.

- II Cor. iii, 4-9. 377
- Sermo I. De perfectione et excellentia evangelicæ legis. 378
- Enarratio in evangelium : *Exiens Jesus de finibus Tyri, venit per Sidonem,* etc. Marc. vii, 31-37. 381
- Sermo II. De spirituali significatione curationis surdi ac muti. 382
- Sermo III. De spirituali intellectu eorum quæ Christus in curatione surdi et muti egit, agitque in dies in justificatione peccatorum. 385

Ad religiosos.

- Sermo IV. De excellentiis legis evangelicæ supra legem veterem, et qua sanctionia nunc vivendum. 388
- Sermo V. Causæ speciales quæ religiosum reddunt spiritualiter surdum aut mutum. 390
- Sermo VI. De mysteriis curationis surdi et muti, quæ in scopum sibi præfigere boni debent religiosi. 392

DOMINICA TERTIADECIMA POST TRINITATEM.

- Enarratio in epistolam : *Abrahæ dictæ sunt promissiones,* etc. Galat. iii, 16-22. 395
- Sermo I. Quomodo Deus promissa olim Abrahæ in lege, spiritualiter suis largiatur fidelibus; hi quoque quomodo digne vivere debeant. 397
- Enarratio in evangelium : *Beati oculi qui vident quæ vos videtis.* Luc. x, 23-37. 399
- Sermo II. De jucunditate visionis divinæ, de felicitate Christianorum, deque nocumentis mortalium peccatorum. 404
- Sermo III. De divino amore et elucidatione præcepti caritatis Dei et proximi. 407

Ad religiosos.

- Sermo IV. Quomodo per fidem in Jesum Christum fideles consequantur gratiam et gloriam. 410
- Sermo V. De primis et principalibus legis divinæ præceptis, et quo studio impleri debeant. 412
- Sermo VI. Elucidatio præcepti caritatis, et de novem nocumentis peccati. 414

DOMINICA QUARTADECIMA POST TRINITATEM.

- Enarratio in epistolam : *Spiritu ambulante, et desideria carnis non perficietis.* Galat. v, 16-24 418
- Sermo I. De fructibus Spiritus quibus ornare se debent boni religiosi 420
- Enarratio in evangelium : *Dum iret Jesus in Jerusalem, etc.* Luc. xvii, 11-19 423
- Sermo II. De spirituali significatione leprosororum, et quæ requirantur ad integritatem spiritualis sanitatis 425
- Sermo III. De spirituali significatione leprosororum, per quos et universi designantur peccatores. 428

Ad religiosos.

- Sermo IV. Quomodo religiosi, superatis vitiis et operibus carnis, fructus Spiritus apprehendere possint, et secundum eos digne vivere. 431
- Sermo V. Qualiter quisque se confessori ostendere debeat, ut a lepra peccati mundetur. 433
- Sermo VI. De ingratitude peccantium, deque multiplici religiosorum lepra. 436

DOMINICA QUINTADECIMA POST TRINITATEM.

- Enarratio in epistolam : *Si spiritu vivimus, spiritu et ambulemus.* Galat. v, 25, 26; vi, 1-10 438
- Sermo I. De inani gloria invidiaque vitandis, et variis circa caritatem profectumque proximi observandis. 440
- Enarratio in evangelium : *Nemo potest duobus dominis servire.* Matth. vi, 24-33. 444
- Sermo II. De impedimentis divini obsequii, et multiplici servitute. 447
- Sermo III. De variis causis vitandi avaritiam sollicitudinemque superfluum, et de multiplici insipientia avarorum. 450

Ad religiosos.

- Sermo IV. De multiplici perfectione ad quam potissimum obligantur religionum professores 453
- Sermo V. Quomodo subditi a prælatis ad viam virtutis post lapsum sint revocandi, prudenterque dirigendi; et quomodo illi ipsi subditi habere se debeant. 456
- Sermo VI. Deo et animæ profectibus serviendum, non concupiscentiis carnis;

et de inutili temporalium sollicitudine abigenda 458

DOMINICA SEXTADECIMA POST TRINITATEM.

- Enarratio in epistolam : *Obsecro vos ne deficiatis in tribulationibus meis pro vobis.* Ephes. iii, 13-21 461
- Sermo I. Quomodo radicari in Dei ac proximi caritate debeamus, tribulationesque ac sensualitati molesta æquanimiter ferre 463
- Enarratio in evangelium : *Ibat Jesus in civitatem quæ vocatur Naim.* Luc. vii, 11-16 466
- Sermo II. De spirituali significatione trium mortuorum quos Christus suscitavit. 467
- Sermo III. De portitoribus qui peccatores spiritualiter mortuos portant sepeliendos in inferno 471

Ad religiosos.

- Sermo IV. De tribulationis utilitate; et quomodo Christus in corde et corpore portandus sit. 474
- Sermo V. Memoria mortis quæ gignat bona; et de purgatorii pœnis. 476
- Sermo VI. De utilissima mortis memoria, et præparatione ad eandem 478

DOMINICA SEPTIMADECIMA POST TRINITATEM.

- Enarratio in epistolam : *Obsecro vos, ego vinctus in Domino.* Ephes. iv, 1-6. 482
- Sermo I. De perfectione vitæ Christianorum, et quomodo digne ambulare in vocatione sua debeant 483
- Enarratio in evangelium : *Quum intraret Jesus in domum cujusdam principis Phariseorum sabbato manducare panem, etc.* Luc. xiv, 1-11 487
- Sermo II. De septem hydropicorum proprietatibus, per quas septem mortalia peccata designari possunt 489
- Sermo III. De variis virtutibus quibus cœlestibus nuptiis disponuntur fideles. 492

Ad religiosos.

- Sermo IV. De variis mediis quibus pertingitur ad finem perfectionis monasticæ. 495
- Sermo V. Quæ debeat fugere vitia, quasque colere virtutes verus vestigiorum Christi observator 497

Sermo VI. De hydrope septemplici negligentium et pereuntium religiosorum, qui opus habent curari a Christo. . . . 500

DOMINICA OCTADECIMA POST TRINITATEM.

Enarratio in epistolam : *Gratias ago Deo meo semper*. I Cor. i, 4-8. 503

Sermo I. De gratitudine pro naturæ et gratiæ beneficiis 504

Enarratio in evangelium : *Accesserunt ad Jesum Pharisei*. Matth. xxii, 34-46. . . . 507

Sermo II. De amore spirituali perfecto, qui vocatur amor ecstasticus, et de signis ipsius 509

Sermo III. De amore multiplici, et de fœditate ac signis amoris carnalis 512

Ad religiosos.

Sermo IV. Quomodo religiosi satagere debent ut spiritualiter divites fiant, et nihil eis desit in ulla gratia 515

Sermo V. Quomodo diligendus sit Deus (quemadmodum prior dilexit nos) suaviter, sapienter et fortiter 517

Sermo VI. De effectibus atque indiciis amoris ecstatici, deque multiplicibus amoribus aliis. 520

DOMINICA NONADECIMA POST TRINITATEM.

Enarratio in epistolam : *Renovamini spiritu mentis vestræ*. Ephes. iv, 23-28. . . 523

Sermo I. De renovatione spiritus; et de mendacio, ira furtoque vitandis. . . . 524

Enarratio in evangelium : *Ascendens Jesus in naviculam, transfretavit*. Matth. ix, 1-8 527

Sermo II. De spirituali comparatione navis et Ecclesiæ, maris et mundi, transfretationis vitæque præsentis 529

Sermo III. De spirituali intellectu eorum quæ circa paralytici curationem acta sunt. 532

Ad religiosos.

Sermo IV. De renovatione sensitivi appetitus ceterorumque habituum intellectum et voluntatem perficientium, et quibusdam aliis ornamentis animæ 535

Sermo V. Quo pacto per naviculam, nedum monastica, sed tota religio christiana designetur; et de vera et falsa

pœnitentia 538

Sermo VI. De exemplari inductione quorundam veraciter pœnitentium, ut vere pœnitere discamus. 540

DOMINICA VICESIMA POST TRINITATEM.

Enarratio in epistolam : *Videte quomodo caute ambuletis*. Ephes. v, 15-21. . . . 544

Sermo I. Quomodo vivendum his qui Spiritu Sancto impleri peroptant 545

Enarratio in evangelium : *Locutus est Jesus principibus sacerdotum et Phariseis*, etc. Matth. xxii, 1-14 548

Sermo II. De multiplicibus nuptiis de quibus sacra loquitur Scriptura 552

Sermo III. De impedimentis pertingendi ad spirituales nuptias Christi 555

Ad religiosos.

Sermo IV. De discretionem et vigilantiam mentis semper habenda 558

Sermo V. Quomodo religiosi præcipue Deum orare, ad ipsum suspirare, Spirituique Sancto habitaculum parare debeant 560

Sermo VI. De variis nuptiis, et impedimentis pertingendi ad nuptias spirituales perfectionemque monasticam. . . . 562

DOMINICA VICESIMA PRIMA POST TRINITATEM.

Enarratio in epistolam : *Confortamini in Domino*, etc. Ephes. vi, 10-17. 565

Sermo I. De fortitudine et his quæ hominem in Deo confortant, et qualiter sit tentationibus resistendum 567

Enarratio in evangelium : *Erat quidam regulus, cujus filius infirmabatur*, etc. Joann. iv, 46-53. 570

Sermo II. De febre spirituali, deque timore laudabili tranquillitateque animi servanda 572

Sermo III. De vera sapientia, ejusque communicatione in alios. 574

Ad religiosos.

Sermo IV. Sine gratia Dei nil meritorie agi posse; de confortatione spirituali mentis in Deo, deque jugi pugna vitæ præsentis 577

Sermo V. Quemadmodum virtutes comparantur ad animam, et qualiter sit ten-

- tationibus resistendum, deque instantia
inimicorum nostrorum 580
- Sermo VI. Quomodo rectores et praelati
debent lucere ac prodesse subjectis, im-
becillitatesque infirmorum portare . . 582

DOMINICA VICESIMA SECUNDA POST TRINITATEM.

- Enarratio in epistolam : *Confidimus in
Domino Jesu, quia qui cæpit in vobis
opus bonum*, etc. Philipp. I, 6-11. . . 585
- Sermo I. Quomodo universa nostra bona
a Deo sint; de vitando pravo usu jura-
tionis; et quomodo perfici debeamus in
scientia Scripturarum ceterisque virtu-
tibus 586
- Enarratio in evangelium : *Assimilatum
est regnum cælorum homini regi qui
voluit rationem ponere cum servis suis*.
Matth. XVIII, 23-35 588
- Sermo II. Quam necessarium sit injuriam
irrogantibus ignoscere, et multa quæ ad
hoc inducere nos debent. 591
- Sermo III. De correptione fraterna et ri-
gore divini judicii. 594

Ad religiosos.

- Sermo IV. De laude fructibusque carita-
tis 597
- Sermo V. Quam necessaria sit ad salutem
remissio injuriarum 599
- Sermo VI. De remissione injuriarum ex
sacris litteris et verbis sanctorum et ca-
tholicorum Patrum 602

DOMINICA VICESIMA TERTIA POST TRINITATEM.

- Enarratio in epistolam : *Imitatores mei
estote, et observate eos*, etc. Philipp.
III, 17-21; IV, 1-3 605
- Sermo I. Quomodo conversatio nostra de-
beat esse in cælis, ut caritas nostra in
dies magis magisque abundet, et de-
clinantes a malis faciamus bona. . . 606
- Enarratio in evangelium : *Abeuntes Pha-
risæi, consilium inierunt*, etc. Matth.
XXII, 15-22. 609
- Sermo II. De triplici veritate quæ fuit in
Christo, et qualiter in ea Christum imi-
tari debeamus 610
- Sermo III. De his quæ Christiani tenen-
tur Deo, suisque principibus ac præ-
latis. 613

Ad religiosos.

- Sermo IV. De invitatione Apostoli ad sui
imitationem 617
- Sermo V. De malitia cordis humani, et
de triplici veritate in Christo 619
- Sermo VI. De his quæ superioribus debentur,
puta obedientia, reverentia, amor,
etc. 622

DOMINICA VICESIMA QUARTA POST TRINITATEM.

- Enarratio in epistolam : *Non cessamus
pro vobis orantes et postulantes ut im-
pleamini agnitione voluntatis Dei*. Co-
loss. I, 9-14 625
- Sermo I. Quam sollicitudinem praelati er-
ga subditos gerere debeant. 626
- Enarratio in evangelium : *Loquente Jesu
ad turbas*, etc. Matth. IX, 18-22. . . 629
- Sermo II. De mystica significatione femi-
næ a sanguinis fluxu curatæ 630
- Sermo III. De spiritali significatione eo-
rum quæ de suscitatione filiæ Jairi scri-
pta sunt 633

Ad religiosos.

- Sermo IV. Praelati quomodo pro sibi sub-
jectis orare curamque gerere debeant. 636
- Sermo V. Quomodo religiosi fimbriam Je-
su tangere debeant, sanctissimæ vitæ
ejus virtutes æmulando 639
- Sermo VI. De instabilitate mentis huma-
næ, et contra fluxibilitatem cogitati-
onum 641

DOMINICA VICESIMA QUINTA POST TRINITATEM.

- Enarratio in lectionem loco epistolæ : *Ec-
ce dies veniunt*. Jer. XXIII, 5-8. . . 644
- Sermo I. De immensa liberalitate cari-
tatis Dei ad homines, et de sanctitate
Christi 647

Ad religiosos.

- Sermo II. De dulcedine et fructu incarna-
tionis Filii Dei 650
- Sermo III. Quomodo religiosi venturo ju-
dici Christo regnum in se parare de-
beant 652
- Sermo IV. De institutione vitæ monasticæ,
et origine religiosorum ac monacho-
rum. 655

Sermo V. De vita et perfectione ad monachos pertinente, secundum doctrinam divini Dionysii	657	Sermo VIII. De tribus principalibus Christi consiliis, in quibus omnis monastica religio triaque vota religiosorum fundantur quæ sunt de essentia cujuslibet religionis	662
Sermo VI. De forma et significatione habitus monachorum	658	Index locorum S. Scripturæ	667
Sermo VII. De monachorum et religiosorum definitionibus veris.	660	Index nominum et rerum notabilium.	677

AD CLERUM

QUI ROMANO UTITUR KALENDARIO

A dominica quarta post Pascha usque ad festum Pentecostes inclusive, in utroque ritu, Romano scilicet ac Cartusiano, epistolæ et evangelia concordant; discrepant vero in sequentibus :

1^o Require enarrationes

- In dominicæ primæ post Pentecosten epistolam, pag. 125.
- In dominicæ primæ post Pentecosten evangelium, pag. 203.
- In dominicæ secundæ post Pentecosten epistolam, pag. 152.
- In dominicæ secundæ post Pentecosten evangelium, pag. 156.
- In dominicæ tertiæ post Pentecosten epistolam, pag. 175.
- In dominicæ tertiæ post Pentecosten evangelium, pag. 180.
- In dominicæ quartæ post Pentecosten epistolam, pag. 197.
- In dominicæ quartæ post Pentecosten evangelium, pag. 232.
- In dominicæ quintæ post Pentecosten epistolam, pag. 226.
- In dominicæ quintæ post Pentecosten evangelium, pag. 253.
- In dominicæ sextæ post Pentecosten epistolam, pag. 249.
- In dominicæ sextæ post Pentecosten evangelium, pag. 275.
- In dominicæ septimæ post Pentecosten epistolam, pag. 271.
- In dominicæ septimæ post Pentecosten evangelium, pag. 296.
- In dominicæ octavæ post Pentecosten epistolam, pag. 291.
- In dominicæ octavæ post Pentecosten evangelium, pag. 318.
- In dominicæ nonæ post Pentecosten epistolam, pag. 313.
- In dominicæ nonæ post Pentecosten evangelium, pag. 340.
- In dominicæ decimæ post Pentecosten epistolam, pag. 335.
- In dominicæ decimæ post Pentecosten evangelium, pag. 360.
- In dominicæ undecimæ post Pentecosten epistolam, pag. 356.
- In dominicæ undecimæ post Pentecosten evangelium, pag. 381.
- In dominicæ duodecimæ post Pentecosten epistolam, pag. 377.
- In dominicæ duodecimæ post Pentecosten evangelium, pag. 399.
- In dominicæ tertiæ decimæ post Pentecosten epistolam, pag. 395.
- In dominicæ tertiæ decimæ post Pentecosten evangelium, pag. 423.
- In dominicæ quartæ decimæ post Pentecosten epistolam, pag. 418.
- In dominicæ quartæ decimæ post Pentecosten evangelium, pag. 444.
- In dominicæ quintæ decimæ post Pentecosten epistolam, pag. 438.
- In dominicæ quintæ decimæ post Pentecosten evangelium, pag. 466.
- In dominicæ sextæ decimæ post Pentecosten epistolam, pag. 461.
- In dominicæ sextæ decimæ post Pentecosten evangelium, pag. 487.

In dominicæ septimæ decimæ post Pentecosten epistolam, pag. 482.
 In dominicæ septimæ decimæ post Pentecosten evangelium, pag. 507.
 In dominicæ octavæ decimæ post Pentecosten epistolam, pag. 503.
 In dominicæ octavæ decimæ post Pentecosten evangelium, pag. 527.
 In dominicæ nonæ decimæ post Pentecosten epistolam, pag. 523.
 In dominicæ nonæ decimæ post Pentecosten evangelium, pag. 548.
 In dominicæ vicesimæ post Pentecosten epistolam, pag. 544.
 In dominicæ vicesimæ post Pentecosten evangelium, pag. 570.
 In dominicæ vicesimæ primæ post Pentecosten epistolam, pag. 565.
 In dominicæ vicesimæ primæ post Pentecosten evangelium, pag. 588.
 In dominicæ vicesimæ secundæ post Pentecosten epistolam, pag. 585.
 In dominicæ vicesimæ secundæ post Pentecosten evangelium, pag. 609.
 In dominicæ vicesimæ tertiæ post Pentecosten epistolam, pag. 605.
 In dominicæ vicesimæ tertiæ post Pentecosten evangelium, pag. 629.
 In dominicæ vicesimæ quartæ post Pentecosten epistolam, pag. 625.

2° Ritui Romano proprium est evangelium dominicæ vicesimæ quartæ post Pentecosten, ideoque a Dionysio non enarratum.

3° Evangelium dominicæ primæ, epistola et evangelium dominicæ vicesimæ quintæ post Trinitatem, sunt ritui Cartusiano propria, quorum enarrationes invenies pag. 431 et pag. 644.

EMENDANDA. Pag. 14 B, lin. 3 : Itaque, *lege* Itemque ; — 18 C', lin. 1 : utputa,... utpote ; — 41 A, lin. 1 : in,... ex ; — 50 B, lin. 8 : forma,... fama ; — 51 A', lin. 1 : utile,... inutile ; — 60 D, lin. 3 : quædam,... quemdam ; — 62 B', lin. 12 : possumus,... possimus ; — 80 D', lin. 5 : actiones,... affectiones ; — 145 D, lin. 12 : atque,... neque ; — 167 C', lin. 4 : præcipue,... præcipui ; — 577 A, lin. 11, 12 : neptes,... amitas.

DUBIUM. Pag. 55 A', lin. 2 : facilem, *forsan* facialem.

OMISSA. Pag. 53 A', lin. 8, *lege* in cruce ; — 73 A', lin. 1, ... diversis linguis ; — 75 C, lin. 4, ... impendit eis ; — 118 C, lin. 1, ... speculatio Deitatis ; — 119 C', lin. 2, ... actus est doni ; — 157 A, lin. 2, ... Beatorum indesinenter ; — 174 A', lin. 7, ... Considera etiam te.

NOTANDUM. Pag. 24 B, lin. 2, in prima editione legitur : Propterea eam sollicite caveamus.

Tom. XXIX, pag. xv, lin. ult. : septimo, *lege* tertio ; — 515 C', lin. 4 : tunicam, nisi quæ,... tunicam quæ ; — 630, lin. 1 : Astio,... Astion.



Typis Cartusiæ Sanctæ Mariæ de Pratis. Tornaci.
A. BAUDECHON typographus.



opera

THE INSTITUTE OF MEDIAEVAL STUDIES
10 ELMSLEY PLACE
TORONTO 5, CANADA.

39401

